

道

藏

501541




第五册

通

藏

文物出版社
上海书店
天津古籍出版社



李

氏

道藏（全三十六冊）

出版者 文物出版社

（北京五四大街二十九號）

上海書店

（上海福州路四〇一號）

天津古籍出版社

（天津河西區佟樓三合里）

印刷者 上海影印廠

上海市印刷七廠

發行者 上海書店

一九八八年三月第一版第一次印刷

書號：一七〇六八·一六四八

責任編輯 陸國強

裝幀設計 范一辛

二經同卷

黃

黃帝授三子玄女經

太上登真三矯靈應經

黃帝授三子玄女經

天一所在甲戌庚旦大吉夕小吉乙巳晝神

后夜傳送丙丁旦登明暮從魁六辛晝勝先

夜功曹壬癸晝太一夜太衝占與人期會天

罡臨日辰者會在日辰前為已過在日辰後

為未至又神在門會行人未主人近行在外

已至主人遠行在內未至神在門加季在外

天罡大吉加午未者喚人必來非此者凶時

上見王相必來相剋無氣來

求物天罡加孟不得臨仲得半加季盡得占

行人至時甲乙行丙丁至不至還以甲乙日

至他例此

諸欲娶婦嫁女必記初許嫁之日以為本其

娶婦時慎無令剋其許嫁日辰也剋日言舅

剋辰害姑姑與舅是夫之父母也盡剋日辰為不利一

家

假令甲子日許嫁庚辛日納財皆為剋日戌

已納之為剋辰也

假令辛未日納皆為剋日辰戌申巳酉日亦

然也又欲令日辰陰陽中及用傳中有天后

無騰蛇白獸相剋吉謂內婦時如此者即吉

又無令夫家之門傷婦年即婦有咎

假令二月乙未日巳時天罡加巳婦年立辰

從魁加之夫家門在子地太一加之夫家門

在丑勝先加之此並為夫家門傷婦年也謂

夫家門上火神剋妻家門上金神也若夫門

立酉功曹加酉婦在東方卯來氏酉酉入功

曹即婦有咎他倣此又無令婦年上神傷夫

家之門即夫家有咎也

假令婦年立辰從魁加之夫門在酉功曹臨

之夫門在戌太衝臨之此為婦年上神傷夫

家之門即夫家有咎門者所出之辰凡娶婦

為入頑嫁女為出頑從方入圓為入頑從方

出圓為出頑也又不欲所出入之神傷日辰

為女固有敗傷又不欲令傷日為害翁謂神

將共傷日也

假令一月庚子日魁罡加丑之時也太一臨

庚上其將得朱雀謂小吉為天一臨戌上此即太一為前二加庚也

為神將并傷日傷日害舅若日并傷神將為

害矣

假令二月癸丑日巳時勝先加癸將得騰蛇

此為日并傷神將害夫又辰中有微氣往助

之者為夫死

假令二月甲戌日辰時而傳送加甲甲木也

傳送金也金傷木又戌中之金復往助之者

為夫死傷辰為婦謂神將共傷辰也

假令二月庚申日魁加丑丑時也太一臨申

將得朱雀此為神將并傷辰也

假令二月壬子日魁加辰勝先臨子為用將

得騰蛇此為日辰并傷神將也但辰傷婦謂

辰傷其陽神神將者又曰內有微氣往助之

者為婦死也

假令二月丁巳日魁加卯神后加巳巳火也

神后水也水傷火又丁巳丁是土妻故也復往助之

為婦死以其上將為所坐形狀

假令二月甲戌日魁加辰傳送為青龍而加甲為夫婦死死坐送行酒食故也

黃帝授三子玄女經

太上登真三矯靈應經

凡學修仙道遇三矯經能入妙道與諸法不同與諸術不同用之如石火立之於烟霞施之於電光速遊仙島矣夫三矯經者上則龍矯中則虎矯下則鹿矯如此矯者是上清宮內隱秘之書大凡學仙之道用龍矯者龍能上天入地穿山入水不出此術鬼神莫能測能助奉道之士混合杳冥通大道也

夫龍矯者氣也氣者道也長視龍矯煉身為氣與道合真足生雲也龍矯者奉道之士欲遊洞天福地一切邪魔精怪惡物不敢近每去山川江河州府到處自有神祇來朝現孫真人云此法甚靈驗矣

夫虎矯者風之母水之子用之三載其虎自乘風來來往住如風動敗葉飛空聚則為形散則為風與天地正陽之炁混合為一了也列子云吾將此法習之自然成道矣後受之士勿得輕漏泄耳

夫鹿矯者常也能助奉道之士日行千里遇鹿者能採靈芝自知其方位遠近鹿到有靈

芝處地上其鹿自經三遭其芝草自不能走之而依法採食其靈芝自得長生不死如不得此法其靈芝不能服矣

夫三矯之經是天地之靈文神仙之秘術若傳非人先殃一身後滅九祖須主盟擇方可傳之與有德之人也

入法

凡持鹿矯者先須香湯沐浴三日然後於甲子庚申日夜半時明立小壇子不論大小高下用燈一盞香一爐花三朵白茆草用八十根鋪在壇上桃葉用七箇然後焚香具某府州縣姓名弟子性好清虛志慕大道今告大帝乞烟霞白鹿一隻與弟子助道積行救人然後將

玉帝印一道含放口內念咒七遍

咒曰

白鹿白鹿舍花果玉帝命立至吾家急急如律令敕

右念此咒訖後心不生二念俱捨一心存想自己身為

玉帝又想白鹿一隻後乘空而來於壇上舍
花果而來與自己收之花果用手摩息其鹿
二十四息而足去之不存想如此行持三十
日想如白鹿在懷裏卧地滿八十一息去之
如滿四十九日是存三日則在蒼室中往來
下三十日滿後一任周遊行於天下走及奔
馬日行千里往來如飛入山採靈芝自在無
忌大凡用鹿矯須用一物隱之可用竹竿子
即用好竹安幕幕上書馬字一箇在竹內封
之了當其鹿入不能見之常人只見是竹竿
子自見是白鹿一隻或白荆木亦得中書馬
字一箇在木上封了不可教人見之凡書字
時亦念前咒一遍想鹿取炁一口吹在筆上
後書其字
凡用虎矯者先當齋戒七日於庚寅日夜半
子時立壇下方上圓地方一丈二尺天圓三
尺用灰爲界道上安燈七盞香一爐鹿脯七
分白茆草一握安排了當然後焚香告祝某
處姓名甲弟子性好清虛入道今告
玉帝願賜風巖猛虎一隻與弟子乘騎奉道

濟度生靈然後將

玉帝印一道含於口內後念咒曰

庚辛妙機風虎將三天敕命及吾乘急急如

玉帝律令敕

咒畢清心守一屏除外事鼻息綿綿心思注

想白虎一隻從西而來到壇上想之用手摩
之頂門四十九息速之至夜一依前法爲之
滿六十日足自有虎一隻來於膝下更不用
別物持之天賜全炁自然成就不覺身輕離
地百餘丈勿得驚怖遊太空及遊洞天福地
精恠外道不敢相干到處自有神祇來朝現
若用之三年身自得乘風動如敗葉今與道
合真也與正炁合一也列子云非人相傳先
滅一身後殃九祖決不虛矣

夫龍矯者當於正月二日擇甲寅日晝八卦

在八方位上用燈九盞秋木板子一片闊二
寸四分以應天地之數長四寸四分於板上
朱書六字

玉帝敕命召龍井用硃砂印玉帝印一顆於
紙上貼在板上著在水盆上用鏡一面繫於

板上底下照於水面上用好紙剪赤龍一條
長九寸不拘大小於水心中內安放不得令
教水面動遊走板子上用明鏡照之龍形入
於鏡中照之後念咒曰

九天九地入吾鏡中照之立現乘騎太空煉

吾一體與道合真急急如律令奉敕化冲和
念前咒九遍然後存想水面上赤龍乘騎如
火雲入於鏡中來往也如此念咒九遍一日
念一遍從正月中後甲寅日於頭到六甲日
九遍不絕然後任便役使如用日辰成關日
爲妙如用時先念前咒九遍向南方取炁九
口咽於腹中然後用鏡照之立有赤龍自於
膝下巡遊八極上天入地入石穴無碍處如
太空入水火不能傷身百毒不害如要止其
龍知人其意止便止起則便起萬里如石中
火落早到也依此行持八十一度已後更不
用鏡并板子也其鏡須丙午日戌時埋於乾
地入地九寸埋之不用也其板子於戌戌日
丑時埋在勾陳地中處是也入地一尺二寸
埋了然後只用

玉帝印用硃砂印之於紙上燒灰用井花水調吞之八十一日無足後又書青一道與都印燒之已後任意呼召其龍立至不用諸物也如要乘騎三年與道合真聚則成形散則成炁故曰壽同一炁命等太虛也

上古真人皆須此符經而登真矣此書不可亂傳非人而輕泄天寶者殃及七祖得人而秘之者禍亦非淺矣敬之保之哉

玉帝印式



右用雷驚蟄末為之極妙可取天合日雕方闊一寸二分厚九分於成日造畢至庚申日夜半子時用香酒果齋潔志心祭之不用肉葷其印可安放於案上用燈九盞及牌位上書

玉帝位前放印祭之至丑時黃絹袋子盛之

卷六


其印如要用之時如前作法用之自持之後常行扶危拔苦救濟孤貧老幼一切疾患慈念如此修持立有神驗矣

太上登真三籙靈應經

通占大衆曆星經卷上

原缺文一張


卷七



四輔四星抱北極樞星主君臣禮儀主政萬機輔弼佐理萬邦之象輔佐北辰而出入授政也



六甲六星在華蓋之下扛星之旁主分陰陽而配於節候出入故在帝座旁所布政教而授農時也




鉤陳六星在五帝下為後宮大帝正妃又主天子六軍將軍又主三公若星暗人主凶惡之象矣

天皇

天皇大帝一星在鉤陳中央也不記數皆是一星在五帝前坐萬神輔錄圖也其神曰耀鬼寶主御羣靈也

柱下


柱下史在北辰東主左右史記過事也



五尚書在東南維主納言風夜諮謀事也


內廚

內廚二星在西北角主六宮飲食后妃第宴飲廚府也



天床六星在宮門外聽政之前亦主寢宴會讌息床星傾天子不安失位也訣曰火入紫


微官中天下大亂帝王失位




北斗星謂之七政天之諸侯亦為帝車魁四星為璇璣杓三星為玉衡齊七政斗為人君號令之主出號施令布政天中臨制四方第一名天樞為土星主陽德亦曰政星也是太子像星暗亦經七日則大災第二名璇主金刑陰女主之位主月及法若星暗經六日則月蝕第三名璣主木及禍亦名金星若天子不愛百姓則暗也第四名權主火為伐為天理伐也無道天子施令不依四時則暗第五名衡主水為熱助四時旁然有罪天子樂淫則暗第六名闔陽主木及天下倉庫五穀第七名瑶光主金亦為應星決曰王有德至天則斗齊明國昌總暗則國有災起也右斗中子星少則人多姪亂法令不行木星守貴人繁天下亂也火星守兵起人主災人不聊生

棄宅走奔諸邑守斗西大飢人相食守斗南


五果不成五星入斗中國易政又易主大亂也彗孛入斗中天下改主有大戮先舉兵者谷後舉兵者昌其國主大災甚於彗之禍右旁中之彗重細審之所守樞入張一度去北辰十八度也衡去極十五度去辰十一度




華蓋十六星在五帝座上正吉帝道昌星傾邪大山扛九星為華蓋之柄也上七星為庶子之官若星明匡主天下不明主亂期八年國無主也



五帝內座在華蓋下覆帝座也五帝同座也上色政吉色變為災凶也




御女四星在鈞陳北主天子八十一御女妃也后之官明吉暗凶也




天柱五星在紫微宮內近東垣主建教等二十四氣也

女史

女史一星在天柱下史比掌記禁中傳漏動靜主時要事也




陰德二星以太陰在尚書西主天下綱紀陰德遺周給惠賑財之事




大理二星在宮門內主刑獄事也自北極已下五十星並在紫微宮內外占曰慧孛入中宮有異姓王火星入守北極臣下煞君木星入守北極國有大衰若分守久有逆臣反亂土星犯乘之大人當之太子有罪五星聚在中宮改立帝王五星及客犯守鈞陳者大臣凶所守犯之座皆受其殃咎也

輔星


輔星像親近大臣輔佐興而相明若明大如斗者則相奪政兵起若暗小則死免官若近斗一二寸為臣迫脅主若五六寸四遠客及慧孛入斗中諸侯爭權逼天子月暈斗大水入城兵起主有赦北斗第六七損角第四五六指南第一二指箭二十有九星




內階六星在文昌北階為明堂頭



文昌七星如半月形在北斗魁前天府主管計天下事其六星各有名六司法大理色黃光潤則天下安萬物成青黑及細微多所殘害搖動移處三公被誅不然皇后崩文昌與三公攝提軒轉共為一體通占本土星守之天下安火星守國亂兵起金星守兵大起若慧孛流星入之大將返叛亂也




三公星三在斗杓東和陰陽齊七政以教大下人一星亡天下危二星亡天下亂三星亡天下不治也




天樞五星不用明明則天下兵起斧鉞用鎗倍八星皆非常也入氐一度去北辰二十八


度



天槍三星在北斗柄東主天鋒武備在紫微宮右以御也



傳舍九星在華蓋箕仲北近天河主賓客之館客星守之其起令四方館也



天廚六星在紫微宮東北維近傳舍北百官廚今光祿廚像之星亡君子賣衣民人賣妻子大飢客守之大飢荒

天一


天一星在紫微宮門外右曰南為天帝之神主戰聞知吉凶星明吉暗凶若離本位而乘

斗後九十日必兵大起也光明陰陽和也萬物盛天子吉星亡天下亂大凶也

太一


太一星在天一南半度天帝神主十六神知

風雨水旱兵馬飢饉疾病災害若在其國也星明吉暗凶離本位而乘斗者九十日必兵大起也太一星入軫十度去北辰十五度半太一星去北辰十一度



天牢六星在北斗魁下貴人牢占為貴索同主禁思恭恭志火星守入之人民相食之應有故也


東方七宿三十三星七十五度并中外宮輔座等




角二星為天門壽星金星春夏為火秋冬為水蒼龍角也東方首宿南左角名天津蒼色

為列宿之長北右角為天門黃色中間名天關左主天田右主天祇十三度八月日在北南去北辰九十一度凡日月五星皆從天關行此為黃道入黃道為旱其角南二度為太陽道入陰道為水角宿北二度為陰道角宿直指辰即是耕種次為農官若明大王道太平若暗及亡角搖動王者失政星微小國弱失政王道不行春日月入角暈者王失政日月角中蝕者其邦不寧木星守七日有故忠臣用火星守忠臣賢相受誅繒帛貴有鬪戰萬人兵起期以日宮中盜賊內亂火守角宮道不通大環遠鉤已者國大飢火犯之必戰火守左角太尉死國危守右角五穀不熟大水災犯左右角羣臣謀戰不成伏誅土守內主喜六十日國有忿爭金守天下兵大盛國有事事金火合守太白居後被軍將殺水守王者刑罰急有水災疾疫客彗守入角色白者國有兵起及大喪亦軍敗城垣客守四十五日早五穀焦風雨不時蝗蟲起星流出角門天子發使出外從他宿入角門外國使入

中京或為近臣殺主戰死月蝕焚感有亂臣
在官非賊而盜月人天市及河而暈三重兵
起天下道斷軍將失利



天理四星在北斗杓中主貴人牢為執法官
星不欲明明則貴人被罪



執法四星在太陽首西北主刑獄之人又為
刑政之官助宣王命內常侍官也


太陽

太陽守在西北主大臣將備天下不虞事星
明吉暗凶星移天下兵起中國不安之應也
入張十三度北極四十五度

相

相星在北極斗南總領百司掌邦教以佐帝


王安撫國家集眾事家宰之位星明吉暗凶
亡相死不然流出太陽入張十三度去北辰
四十五度相入翼一度去北辰三十一度




平道二星在角間主洛道之官

進賢


進賢一星在平道西垣卿相薦舉逸士學官
等之職也星明賢士用進暗小人用



天門二星在左角南主天門侍宴應對之所




天田二星在角北主天子畿內地左對垣東
城邑邊塞




周鼎三星足狀云鼎足星在攝提大角西主

神鼎



庫樓星二十八星庫樓十五柱十五星衡四
星在角南軫東南次器府東一曰文陣兵車
之府中繁眾則大兵起庫中無星下臣逆謀
兵盡出天下無災居者庫中柱動出兵戈四
夷狄柱半不具天子自將半兵出木星守人
飢米貴西入軫一度去北辰四十九度昏中
西去北辰八十九度




攝提六星在角亢東北主九卿為甲兵携紀
綱建時節祥大星守天下更主金星守兵起


大角

大角一星天棟在攝提中主帝座金星守兵


大起月蝕王者惡忌之入亢三度半去北辰五十九度也



帝席三星在大角北星暗天下安星不欲明明則王公凶




亢池六星在亢北主度送迎之事




折威七星在亢南主詔獄斬殺邊將死事




陽門二星在庫樓東北隘塞外寇盜之事




障車三星在氐南主革車兵車



亢四星名天府一名天庭總領四海名火星春夏水秋冬金暗國內亂弱大明天下安平日月蝕亢中國有事五星犯亢逆行君憂失國大臣不用木星守留三十日已上有赦年豐久守其國米貴人多疾病水災木與火星同殺不成人死如草木水災火星守多雨天下兵盡返大起水星守其分米貴久守多病大水災也土星守萬物不成多病金星守天下道不通兵起盜賊水災傷人金星行入南上道五穀傷赤色旱人流走華宇犯之其國兵起大臣作亂一年月暈國光士卒自將百里不遂士卒死




梗河三星梗在大角帝座北主天子鋒又主胡兵及喪決日梗河去也相去吉相向兵起客守世亂矣




騎官二十七星在氐南主天子騎虎貴諸侯之族子弟宿衛天子令三衛之像星衆大下安星少兵起五星守之兵起西北入北辰一百十五度

車騎將軍




車騎將軍星在騎官東南主車騎將軍之官




西咸四星在氐東主治淫佚南星入氐五度


去北辰九十三度



七公七星在招搖東辰北為天相主三公十
政善惡星明則眾議詳審星入河中朱貴人
相食金星守天下兵起亂西星入辰四度去
北辰四十九度



前下積卒星十二在辰東南星微小吉如大
明及搖動主朝廷有兵微小吉一星亡兵半
出二星亡兵大半出三星亡兵盡出五星守
兵起星西入辰十三度去北辰一百二十四度



房四星名天府管四方一名天旗二名天駟
三名天龍四名天馬五名天衡六為明堂是

火星春夏水秋冬火房為四表表三道日月
五星常道也上第一星名為右服次將其名
陽環上道二星名右驂上相其名中道三名
左服次將其名下道四名左驂上相總四輔
左驂左服云東方及南方可用兵右驂右服
云西方北方不可用兵

言戈


玄戈一星在招搖北一名臣戈五星守兵起
星明動胡兵起入辰一度去北辰四十二度

招搖

招搖星在梗河北主胡兵芒角動兵筆起行
入辰二度去北辰四十一度

顯項

顯項二星在折威東南主治獄官橫囚憎杖
察真偽也



辰四星為天宿宮一名天根二名天符木星
春夏木秋冬水主皇后妃嬪前二大星正妃
後二左右大明為臣奉事君寧暗失臣勢動
臣出國日月辰中君犯惡之木星守之后喜
守二十日有王者之所行不利疾則治遲行

言主


臣職主守必有諸侯並王火守大臣相諧逆
行而赤色大臣亡久守六十日有大赦火星
入之有賊臣為亂近期一年遠二年金星守
者有兵起將軍有封爵者火之位水守有大
水漂浸宮館萬物不成水入貴臣憂有獄事
客守布帛貴土星守有立太子久守八十日
已上國有兵起孽宇行入辰中後宮有異兵
動不出一百八日內遭水東平月暈圓辰大
將軍殃人多疾病




鉤鈴二星主法去房宿七寸第一名天健二
名天官篇開藏若近夫妻同心遠者夫妻不
和 大明則羣臣奉職天下道洽暗則羣臣亂

政王道不行日月蝕房中王者亂昏大臣專權木星守天下和平留四十日五穀豐人安吉無疾病天子有令德期在四月火星守有兵起七日有大喪及赦十日守大夫災二十日不去必臣反及君子天子憂亂王者惡之

天子兵早守止一日大臣亂土星守有妻王亦亂旱及地動久守其有兵金守陪脇者大有土功事國亂布帛貴久守人飢易主火守姦臣謀王大臣相譖暴誅臣佐天下乖離若出房心中間地動客守米貴十倍日月五星犯之色青國憂兵喪色白大兵相殺積尸如丘墓寺入房國危人亂相殘流星入房西行為狂夫王教忠臣臣殺主輔臣亡遠期三年常以三月候房日月出表南大旱喪出表北災及萬里兵亂陰雨若出中道太平許徐賴州月暈圍房心災疫凶五度九月日此上去北辰一百四度半




罰三星在東咸西下南北而列主受金罰贖市布租也



東咸四星在房東北主防姪佚木在北守而搖動天子姪佚過度星南入心二度去北辰一百三度也後則不過百八十八日遠則不過三年起於宋汴等州

天乳

天乳星在氏北主甘露十五度十二中西南星去北辰九十六度北件屬前項天乳別



貴索星九在七公前為賊人牢牢口一星為門門欲開開則有赦若赦主人憂若牢門閉及口星入牢中有自絞死者以五子日夜候之一星亡有喜事二星亡有爵事三星亡有赦甲庚期八十日丙辛期七十日戊壬期六

十日星入河中人相食若九星總見獄事煩水星守水災火星守米貴有大星出牢大赦小星即小曲恩降慮口舌右星入尾一度去北辰五十五度也




天官二星在房西南主醫巫之職事也

天福三星在房西主鑾駕乘輿之官也


鍵閉

鍵閉星在房東北主管篇星不欲明明則內亂門扉不禁姦姪至行於女也




心三星中天王前為太子後為庶子火星也春夏木秋冬水一名大火二名大辰三名鶉大甲星明大赤為照天子德行暗小失常色


爲王微弱不能自斷星不欲直直則主失計
動搖天子憂木星守天下安久守而絕犯者
臣謀主大兵起火星守地動守二十日臣謀
主色黑主崩之像土守聖帝出謀臣天下太
平有云國有赦久守不去憂賊天下大早有
金星守山崩四方兵起久守二十日已上去
心三寸兵起鉤戰上殿期八十日亦有大蟲
災人飢災也水星犯有水災及旱兵起布帛
貴客守犯大旱赤地千里日月五星經心失
積赤暈虹蜺背向蝕人飢兵起臣反國易主
○喪使客月貫心內亂孳孳入心主憂有喪大
○臣廢黜心變期急不過七日之應也




旗大明則米貴市中星東則歲實五星入市
門則兵起芒角色赤赤氣入大災火守米貴
所守坐犯皆當之門左星入尾一度去北辰
九十四度也



候星在市東主輔臣陰陽法官明則輔臣強
小暗輔微弱入箕三度去北辰七十二度




度 宜星四星在帝座西南侍帝之傍入尾十二



斗五星在宦星西南主稱量度明斗西後則
豐若斗亡仰不熟入尾十度

宗人四星在宗政東主司享先人星動帝親
致憂



宗正二星在帝座東南主宗正卿大夫暗室位室族有事




通占大象曆星經卷上


通占大象曆星經卷下

畫八


屠肆二星在帛度北主屠然之位也




市樓六星在市門中主關關之司今市曹官之職



斛四星在北斗南主斛食之事已上諸星並
在市中也




女床三星在天紀北主後宮生女事侍帝及
皇后明則宮人自恣入箕一度去北辰五十




三度

帝座


帝座一星在市神農所貴色明潤天子威
令行微小凶亡大惡之入尾十五度去北辰
七十一度



宗二星在候東主宗室為帝血脉之臣錄呈
家親族等級星明則族人有序暗則族有憂




列肆二星在斛西北主貨珍寶金玉等也




東肆二星在宮門門垣左星之西主市易價

直之官


帛度二星在宗星東北主平量也




天紀九星在貫索東主九卿萬事綱紀掌理
總訟與貫相連有索即地動期二年星不欲
明即天下有怨恨生亡則國政壞西入尾五
度去北辰五十一度




天棒五星在女床東北主忿爭刑罰以禦王
難備非常明大有憂微小吉不用明火星守
兵起入箕八度去北辰十二度春夏火秋冬
水主八風之始一名析木




天維三星在尾北斗杓後若星散則天下不微名也



天江四星在尾北主太陰明動大水不禁兵起不具天下津梁不通南星入尾六度去北辰一百一十一度




天龜六星在尾南漢中主卜吉凶明君臣若火星守旱滂災入尾十二度去北辰一百四十一度




天魚一星在尾河中主雲雨理陰陽明河海




出天魚搖暴水災火星守南旱北水




龍尾九星為後宮第一星后次三夫人次九嬪次嬪妻一名后族水星也二風后三天難四天狗五太廟皆欲明大小相承則官多子孫傳說曰一星在第二東二寸小者是長其星明則輔臣忠政暗則陪臣亂邦木星守立太子三十日必后族逆兵妻貴權臣亂國火星守兵相向大臣憂火興水合守箕尾間名九江口必有赦若勝踊折絕者天下亂及旱災土星守多盜賊旱官有廢黜土入魚鹽貴兵起大將出征土火星金守准上合星入守人亂大臣變易失政水守入天下水災江河決魚米貴客守賊暴貴客入天下大飢荒亂人相食疾疫死竄他方不耕織君子貨衣小人賣妻子日月蝕於尾貴臣中相刑反掌虹蜺背向尾將相憂亂后有喪葬字行犯貴臣誅內寵亂政幽州定冀遼東等之應也




箕四星主後別府二十七世婦八十一御女為相天口后也亦為天漢九江口主梁在漢邊金星春夏金秋冬土箕后動有風期三日也前二星為后也箕入河中大飢人相食箕前亦名糠星大明歲豐小微天下飢荒天下無米木守官有口舌火星守天下飢久守環遶成鉤已大臣被誅火守大水災平溢澤若十月守之大水米倍飢土水二星守萬物不成飢久守兵起或米貴或赦金星入守兵起有赦更主久守風旱防內亂兵起攻政水星守穀不豐入大人憂客守天下大飢米貴十倍人相食流亡他邑不耕織色赤大風雨亂客在南旱計日月五星入之中天下兵起滄州洛陽玄兎廣陵等應之也




建六星在南斗北天之都開三光道也主司
七耀行得失十一月甲子冬至大應治政之
宿所起也木星守水災米貴多病金星守萬
物不成久惡等守惡水星守人飢恚星入斗
七度去北辰一百十三度



天弁九星在建近河為市官之長暗凶無萬
物明大萬物興眾主市易也




狗二星在斗魁前主卿臣移處卿臣為亂




狗國四星在建東南主鮮卑烏丸明邊兵起
也


天箭七星在斗杓第二星西主關箭開閉明
吉暗凶災



天箭十五星在斗南主太陰水蟲不在漢中
有水火災白衣食星大人喪火守旱水星即
水災右入斗一度去北辰一百二十七度




漸臺四星屬織女東足主君漏律呂陰陽事




輦道五星屬織女西足主天子遊宮嬉樂之
道也

杓三星在箕南主杓曰春米事星動人失釜
既修田橫大飢荒守之天下飢北星入箕一
度去北辰一百四十三度




農

農又人一星在斗南主農官正政司農卿等
之職
北方七宿三十五星九十八度七十五度五
十秒





南斗六星主天子壽命亦云宰相爵祿之位
巫咸氏云木星春夏木秋冬水一名天斧二
名天關三名天機大明王道和平將相同心
帝命壽天下安暗大臣失位天下驚芒角動
搖國失忠臣天下愁木守六十日大臣增壽

爵祿未通行入魁中大臣逆久守兵起水災
大飢人相食大守國有內變相輔不安兵起
火逆行順守者及遠城鉤已將相崩死國災
火久守國絕嗣土星守入斗中有王者不用
兵昇大位守之九十日兵起水災金星守執
法大臣作逆國亂兵起有赦火星金俱入斗
中名曰鑠必有臣子逆久留遲火經過速出
者禍難速平水星守水災火入斗兵起於吳
越人大飢守客有兵絕道卒有大水賊盜多
亂喪弟攻兄子殺父或主崩米貴久守國絕
嗣客守第二星大水人相食客赤色入斗中
兵起軍將死日月入斗大臣失位或被戮若
斗中蝕者日帝惡月后惡暈圍斗之人流千
里江池丹楊越廬洪地等應也




天泉十星在龍東一日大海住灌漑溝渠之
事也

織女三星在天市東端天女主瓜果絲帛收
藏珍寶及女變明大天下平和常以七月一
月六七日見東方色赤精明女功善一星主
兵起女人為役常向扶匡即善不向則絲帛
倍貴火星守布帛貴兵起十年乃息公主憂
客守絲帛等貴入二十七去北辰五十一度
也




牽牛六星主關梁工與主大路中主牛木星
春夏大秋冬大中央火星為政始日月五星
行起於此皆携星遠漢天下牛貴明亦貴暗
小賊入漢中并役死直未穀價牛由米貴失
常色牛多死穀不成木星守天下和平久守
水災人陳死米貴賣子虎害人臣謀主木逆
久守有水道不通火星守老臣逆牛貴十倍


人相食兵起將軍死大水災津梁不通土星
守臣謀主君有失位臣金星守地氣泄兵起
至城天下人多死水守辰星常以冬朝牽牛
若不朝來年五穀不熟大水損害客守二十
日兵起望平行牛中兵越有自王者望出牛
中七十日有政更像虹蜺出牛必有壞城臨
淮月暈牛損小兒災變也八度八月昏中
底中云北辰一百十度




扶匡七星在天柱東主桑蠶之事




天雞二星在狗國北主異鳥火星守兵起土
守人飢相食流亡




河鼓三星中大星為大將軍左星為左將軍
右為右將軍星直吉為羽軍幹能曲即凶為
失計奪勢左右旗各九星並在牛北枕河主
軍鼓達者聲言設守險以旗表亡動兵起左
旗黑色主陰幽之處備警急之事河鼓有芒
角為將軍雄強百威也




天浮四星在左旗南北烈主漏刻天鼓若暗
漏刻失時明則得所吉




九坎九星在牛南立溝渠水泉流通明災起
暗吉五星守及犯之水泛溢西入斗四度去
北辰一百二十六度



天田九星在牛東南主畿內田苗之職




羅堰二星在牛東星不明暗吉大明馬被水
淹浸




須女四星主布帛為珍寶藏一名藝女天女
水星春夏水秋冬火大明女功有就天下甚
熟小暗天下不足庫藏空虛日月蝕女中天
下女功不為邦憂慮木星守歲多水有喜女
主人多凍死火星守產婦多死布帛貴蒙土
星守人相嫉惡有錢人暴貴有女喪金星守
臣下謀主兵起人多死女多寡府藏出珍帛
水星守有水災萬物不成布帛貴客守諸侯
進妓女布絹貴有女暴貴禁字行犯國兵起
女亂常海西郡婺州台州等月暈國王女死
也十二月日在此二月旦中西星去北辰一


百六度




離珠五星在女北主藏府以御後宮移則亂
西入女一度去北辰九十四度也



瓜瓠五星在離珠北敗瓜五瓜南星明大熟
主陰謀後宮天子果園星不具搖動有賊害
人木水客星等守魚鹽貴瓜瓠入女一度去
北辰七十一度



瑤瑜三星在秦代東南列北主王饑衣服



虛二星主廟堂哭泣金星春夏水秋冬金一名玄枵二名顓頊三名大卿亦臨官星欽枕斜上下不比則鄉祠失禮木星守昭穆失序人飢多病木星與土合守名陰陽益為大水災魚行人道民流亡不居其處期三年當大旱赤地千里火星守赤地千里女子多死萬物不成有土功役天子之兵久守人飢米貴十倍土守風雨不時大旱多風米貴金星守臣謀王國政急兵起殺人流血水星守旱萬物不成其客守其分有災疫若凌犯環遠鉤已國亂禁宇行犯久有兵入相殺流血如川屍如丘大星如半月守名天賊為帝主者奉郊廟以銷災齊州日圓虛兵動人飢

越。

越一星在婺女之南

鄭。

鄭一星在越星南

趙

趙二星在鄭之南

齊

齊二星在越星南

周

周二星在越星東

楚

楚二星在魏星南

燕

燕一星在楚星南

秦

秦二星在周星東南

魏

魏二星在韓星北

韓

韓一星在晉星北

晉

晉一星在代星北


代

十五


十四

代二星在秦星南


右伴星色黑變動流亡五星凌犯則其國各當咎也




司命司祿司危司非各二星已上在虛北司祿次司命北司危次司祿北司非次司危北右各主天下壽命爵祿安泰危敗是非之事




天津九星在虛北河中主津濱津梁知窮危浪濟度之官星明動兵起參差米貴星大津不通三河水為害星十河溢覆赤氣入之早災黃白氣入天子有令德火星守天下大亂及旱西入牛二度去北辰四十九度也




危三星主宮室祭祀土星春夏水秋冬火動而暗天子宮室土功事興




墳墓四星在危下主山陵悲慘事暗失本位小不見則山陵毀梓宮割割事也日月蝕危中主殿宮崩陷大臣殺逆天下作木星守祀不敬天子別造宮室土火守人多役死不墓歲儉南方有兵久守東大兵逆國敗政人飢早米貴十倍土星守土功起早損急兵金星守罷兵將軍喜慶水星皆臣下亂謀敗破被刑法官有憂國有水災日月五星入天下亂來年大飢客守國政主王侯事米貴彗孛行犯國返兵起流星入天下不安近半年遠三年蔡州太原郡月暈圍色人多病




營室二星主雷平糧離官上六星主隱藏水星春夏火秋冬水一名官二名室明國昌動搖兵出起日蝕室中王自將出征不伏月蝕歲飢百姓絕種上六星名離官主六官妃后位為掖求卷若危乘守入城鉤已環遠左右逆行往來於官者為妃后廢黜或主崩后黨被誅或宮女外通以時占之木星守在南東有善事北即憂四米貴火星守將軍凶久守成鉤已者主失官位大臣陰謀憂旱未貴十倍大臣作逆守經二十日已上至久九十日臣亂殺君篡位天子惡之土星守主陰造宮室起土功將軍益封金星守兵革散久守軍兵滿野水星守水災民為主欲敗亡候之不出四十客守有軍出失兵法主民得地人米貴人散彗孛星出天下亂國易政卒為績廣政彗孛犯之前起兵者為弱亦不守鬪戰必敗淫衛甘秦州月暈圍室壁下人謀成起謀不成婦兒多病死者應之時取占之應也




翼仲四星在天津北帝王東宮之宮也




鉤九星在造父西河中星移主地動之應




車府七星在天津東近河主官車之府也



哭二星在虛南主死哭之事




泣二星在哭星東已上並主死悲泣之事




造父五星在傳舍南主御女之官則馬貴




蓋屋二星在危宿之南主官室之事也



虛梁四星在危南主國陵寢廟非人居處




天壘十三星如貫索狀在哭泣之南主北夷
丁零匈奴之事也




敗曰四星在虛危南主政治如哭泣亡人賣
釜甑出鄉宅客守人亂西南入女十三度去


北辰一百三十一度




人五星在危北主天下百姓亡官有詐偽作
詔勅之人為婦人凶亂者也



杵三星在人傍主春軍糧曰四星在杵下若
杵曰不相富軍事飢曰仰歲熟豐傾覆大飢也




土吏三星在室西南主鋪故司過農事




天錢十星在虛梁南主錢財庫聚天下財安


庸調之筆司今左右廟十藏是也




騰蛇二十三星在室北枕河主水蟲暗國安
移南大旱移北大水安守水災頭入室一度
去北辰五十度也




大海十星在壁西南五星及客守之水涌溢
浸溺人邑



雷電六星在室西南主興雷電也



雲雨四星在二雷電東主雨澤萬物成之



霹靂五星在二雲雨北主天威擊擊萬物


北落

北落師門一星在羽林軍西主候兵星明大
而角軍兵安小暗天下兵五星犯兵起金水
木星守九甚不土犯吉火星守人兵羽不可
固國殘朝亡八危九度去北辰一日二十度

天剛

天剛

天剛二星在北落西南主天繩張漫野宿所
用也



八魁九星在北落東南主獸之官五星及客
守之兵起金火星守尤凶甚




鉄鎖三星在八魁西北一名斧鉞主斬刈亂
行誅誑詐偽人暗吉移處兵起

壁宿




東壁二星土文章圖書也土星春夏金秋冬
土一名天術失色大小不同天子將封鄙土
而失天下過日蝕壁中國不用賢士失文字
月蝕中大臣憂文者死木星守五經仕人被
用朝廷興火星守大臣謀君歲早不熟米貴
不顯內外勝政兵起土星守久賢臣國用文
章道術興行國君延壽天下豐熟太平火星
入中街君崩五日則相薨若不死則流散土
星守逆行入壁萬物不成守經九十日已上
大兵起百姓有立王者金星守天下不通王

者急刑罰有兵大臣憂水守水災道不通客
守多風雨及水災臣下賊王者政刑事內明
通明有政事內清月暈壁其久國亂孽宇行
犯兵起火守火災大廟門天下有兼并者辟
明王道興有君子在位星暗王道衰人得用
武蘭涼衛州等分也



羽林軍星四十五星彗辟十二星並在室南
主翊衛天子之軍人安飛將星欲威明天下
安星暗兵盡失西入室五度去北辰一百二
十三度也




王良五星在奎北河中為御馬官漢中四星
天駟旁一星名王良主疾及路為天橋主急
兵也星不具津河不通移向四方隨方有兵


起也

策

策一星在王良前為天子僕策御馬云王良
策馬軍騎滿野大兵起火守良兵起明則馬
賤暗即馬貴西入室半度去北辰四十二度



土公二星在壁南主營造宮室起土之官等
類也



天觀十星在壁北主天子馬坊觀光之官也

通占大象曆星經卷下

二經同卷

靈臺經

秤星靈臺秘要經

靈

靈臺經

定三方主第九

原第八

寅午戌畫生日木土夜生木日土
申子辰畫生土水木夜生水土木
亥卯未畫生金火月夜生火金月
巳酉丑畫生金月火夜生月金火
右件凡畫生看日所在之宮以定之夜生看
月所在之宮以定之而為主也
經云畫生人日在陽宮夜生人月在陰宮為
不背三方主皆得力大富貴之人也若畫生
日在陰宮夜生月在陽宮此為背三方主合
一生貧賤據此論之恐未臻元奧
又四門經云若雖不背看三方三方若在无
力之地或伏留逆行即不可以為有福之人
也若雖背看三方主三方主若在有力之地

或居王廟之宮不可便為無福之人也然有此論又別無斷定今是以操其樞要准以為標庶有効焉凡論人災福以卯辰巳為少年時以午未為中年時以申酉為老年時若初主在少年時中主在中年時末主在老年時

為不背三主大貴之人也若初主在老年時末主在少年時此為背三主也若初方主在北面以西為初年戌亥是也以北為中年時子時是以東為老年時丑寅是也如論向背以南方而言之見其向背也若方主雖逆行伏留或在王廟之宮但依加減論之方見准的也若初中主在本分地位末主在中主前者其三主減半論之若末主在初主前者在卯北其末主並不論其災福若在卯南者即全力論之其初末主俱不論之也若中主在初主前者居卯北即中主全不論之其初主亦減力論之若在卯南者即初主全不論之以中主言之即中年乃應也若初主在中主後者減半論之若初主在末主地分之後者全不論之更在臨時消息看身命官主及諸

星之力以定貧富貴賤併其星曜力分分雖數以定之凡定三方主遠近先算壽期長短以三限分之即可定期遠近之災福也以定災福應驗之期也

飛配諸宮第十

古經云以二十八宿定一十二月將從朔日數之以定身宮蓋太陰行度有遲有疾有跳切難為約定但以曆算先定太陰所在之宮便為身宮以加時所至之宿便為見生之宿於此宿上有三絕之宿先數七宿為第一絕次數十宿為第二絕更數十宿為第三絕凡相去二十五宿也假令畢為見生之宿即從畢數七至星為第一絕又從星數十至尾為第二絕又從尾數十至奎為第三絕凡為三絕日得患者難治也 右身宮

但生時諸星曜落在陷宮及五弱之位者若與月同宮即不為陷緣日月無陷宮故也或者對望旁合見即可減三分之力論之若在本分王廟之宮即全力論之若日木在王太貴有錢長壽火在坊母火在前損日月減即

可土在作事多滯宜修進金在好容貌多愁得女人愛慕水在好文心巧有智交在宜官天一在少年近貴人也太一在毒害多災若有癰疽及蟲傷火燒應之即吉與交同 右身宮災福

紫唐經云以太陽所生之宮宿為命宮以加時所至之宿便為命宿亦於此宿上有六害之宿以太陽所在之宿為第一命宿前數四宿為第二宿又前數七宿為第三宿又前數四宿為第五宿又前為第六數五宿宿若諸惡星押此六宿悉有災厄以星曜之力言之押命宿多災厄押意宿多不稱意押事宿多飛禍押克宿多賊害押聚宿多死亡押同宿多離別假令太陽在妻宿便以妻為第一命宿數四至畢為第二意宿又自畢數七至星為第三事宿又自星數四至軫為第四克宿又自軫數四至亥為第五聚宿又辰數五至箕為第六同宿他皆倣此又都例經云天輪初出地平際卯上星辰為命宮以次定一十二位所有災福在七強宮中 右命宮

晝生從日夜生從月從東出配之至終如配在七強福祿殊常配在五弱位即福薄仍須以星曜逆順及王廟言之分其分數須看配到之處有何星曜照臨旁合以定厚薄又須看財位強弱助之若晝生夜三方主皆弱

右福德

晝九

不以晝夜從財官主數至財官從東出配之至終看其位高下及有無星曜照臨旁合定之其主是日因先代月因外家木因官長久因兵盜土因奴僕田園水因文書金因妻如已上宮中有善星必因上事成之惡星因上事破之首尾即兵盜破太一如上天一因貴人成之 右財帛位

白日從木至月夜生反此從東出配之善星守之長命惡星見之夭折但見木月有壽若木逆月在同宮未則短壽又惡星剋即夭亡晝生火與月同亦夭亡如土剋日火剋月太一剋木皆減一分之力木月又在無力之地又減一分之力火守西沒減四分之力火守八煞惡死但善見木月減一分之力帝以善

惡累增損之則得壽長短限得陰範策有百六之會易局有百八之數每一紀為一分之壽即九分有一百八歲也如陰德可延一紀者即一百二十歲如定得分數即餘年餘月餘日尚未知之即取木星餘日以太陽餘日

晝九

五

棄之所得以周天分除之所為歲數餘則棄之其月天分除不盡者命以三十除為別本以一十除為歲數今且以十二除之月數不盡為日數則得所之紀餘年餘月餘日也每一紀一十二年此法甚妙更有一法在行年官篇收之又若生男後三日及九日月至火守處生女七日後月至土守處必主撮口夜生尤甚妙 右壽命官

晝生從土至火夜生反此從東出配之如是日月木水並好死是蝕神火字惡死金因女人死土好道死木卒死水冷疾死土腹疾死火見血死蝕神驚怕死幸劫死天一與惡星併藥死又常以申酉二位定之不以貧富貴賤先須看此二位大底不宜見火必主惡死雖大貴亦不免之故李公云火星入宮一度

至三度皆死至八度乃劍死至十一度縊死至十四度水死至十七度呪詛死至二十度驚劫死至二十三度蟲傷刑害死至二十六度非橫死至二十八度墜撲死至三十度市死又若火在八煞位角亢水死戌房心狐魁死尾箕蟲傷死斗牛女抵觸死虛危魂寐死室壁水死奎婁蟲傷死胃昂骨鯁死畢觜參駝驢死井鬼柳捕逐死星張馬墜死翼軫蛇豕死十五度必市死又云自南六宮乾位蟲傷并市死北面六度陰謀水火死如火伏在此及身命有木貴而夭亡無金木夭折中年死又一法如算至某年某月日死者看其火在何宮及看身命有何星曜以此言之即知死之所因也陽宮從師子宮星宿順行數為頭張翼軫角亢戌房心尾箕斗牛女虛六度已前皆為陽位也陰宮從巨蟹柳宿逆數為頭至鬼井參觜畢胃昂婁奎室壁室危虛七度已來為陰宮也日月木疾病死火見血死土墜死金因女人死水文字死交中朋友死天一貴人害死太一兵盜死不然用兵死 右

死四宮

從師子星宿順數為頭至張翼軫角亢六房心尾箕斗牛女虛六度已來為陽位也 右陽宮

從巨蟹柳宿逆至虛七度已來為陰位也

右陰宮

晝夜皆從月至第八位東出配之看此位宮辰宿曜言之但火土到此宮即為災如火土是主星不為災也即蝕神天一為災矣又看其下臨何宮位以所併之宮是何宮所臨之位是何位即言其妨害緣主星在此不為身分之災必臨注他人也如行年星曜到此宮亦與生時同論之也若生時即主一生之事若行年如此者即以星曜在此宮月日為限也 右災厄宮

晝夜皆從日數至第六宮從東出配之以此宮宿所主言之日月主眼目之疾木主風疾火主瘡癰土主腫痛水主冷疾金主嗽疾交中內疾天一心疾太一中惡之疾此乃生時即一生如此行年即一年也 右疾患宮

晝夜從土數至木從東出配之以此位宮宿所主言及看強弱星曜臨照定其吉凶若身命及此宮配在師子人馬磨蝎寶瓶雙女皆主少兄弟如得魚羊蝎蟹即多兄弟如是魚羊人馬夫妻有異類兄弟又從水數至木從東出配之其人剋為妙配在福德相貌位有兄弟相宜又以火守三方主居土位惡星不剋為妙中所經歷者星是兄弟數看此位亦如上法即知姊妹強弱也如要知兄弟之數白日看南面之宮有幾星夜生看北面之宮有幾星是兄弟姊妹之數陽是兄弟陰是姊妹要知得力與不得力者看其星善惡斷之也 右兄弟宮

族之女見太一得醜惡之妻又須以其宮在高下位定之又從數至日月從金配之約虛處以行年配至終 右妻妾宮

是婚姻之年也此宮唯忌土火見之必主難婚或以賤為妻亦少子若土見金又見妻宮妻多病及不具足若火見金妻不良火在金宮金度亦同 右會合宮

晝夜從金至土東出配之若其中有星曜如上斷之亦依妻宮斷之 右夫宮

晝夜從木至土從東出配之若其中有善星必生好男女有惡星必主妨害如自東出至加臨所至之宮其中所經歷者星曜是女數如先見陰星首生是女先見陽星首生是男以善星為淑善之男以惡星為兇暴之子以伏逆為傷害也以陰陽星定男女力 右男女宮

晝夜從火至木東出配之如行年上有金木到此必有男女又木到火金元守有子又行年至木金元守火到本元守亦有子又土與金水對少子若金月與惡星同在翻復宮絕

嗣若星在陽宮生時屬陰又在雙女身宮主
雙生如增修宮在高位見月即男女易養若
金在陰陽宮第二分絕男女主不生養 右
生育宮

晝夜從日至木東出配之在有力之位善星
臨照即有好男女若被惡星剋之即少子難
養有少亦妨之 右男宮

晝夜從月至金東出配之一如前法善惡星
斷其吉凶要知其數者從東出配到之宮有
幾箇星是其數也善星吉惡星凶以陰陽星
定其男女也 右女宮

白日從日至土夜生反此東出配之如有善
星父貴如晝生日見火夜生土見日日與蝕
神同並主妨父也 右父宮

晝生從金至月夜生反此東出配之看星善
惡定其吉凶如晝生火見月夜生土見月及
月在土下宮皆主妨母日月同在翻復宮又
居東方此人父母不同類日三方高父強月
三方母強也凡日月與東出宮背又被惡星
照此人父母必主離別如金月在土下宮母

賤亦惡聲名日官主及三方主在奴婢禍害
宮必父賤及無祿也若月宮主及三方主在
第六十二母賤短壽 右母宮

晝夜從官宮主數至官宮東出配之看其高
下在高位即為官大貴若在下位即為官卑

下如雖在高位主星不照惡星不剋居官而
無祿也若在下位主星又照或居王廟則為
大官只是不清貴也如木日水天一交首占

高位為又官土火金尾字在高居武常以星
力淺深強弱定其高下又以其星是主與不

是主及王廟言之又從土至月東出配之為
武官從木至水東出配之為文官其高下如

上法斷之 右官祿宮

晝生從月至水夜生反此東出配之唯不宜
蝕神太一土火並已與身為仇讎害施恩禍

報若此星曜對望旁合同此論之若此星曜
在王廟反災為福宜近武勇之人結交得力

也若火在小十宮即被人謀害又日被火剋
月被土剋並不宜知已也 右交遊宮

白日從月至日夜生反此東出配之此官所

主善星見好修飾見日好道見木好丹見月
好釋見火多禮見土好長生之術見金好女
人見水好文章見火好武勇見天一好接貴
人見太一好姦虛作盜對望旁合見亦同此
右精魂增修宮

白日從相貌宮至精魂增修宮夜生反此東
出配之若得牛羊魚鷹等宮多情慾如見金
尤甚若水在羊蝎火在花樹驚鴛好男色金
月在第四男女俱姪為巫覡若金留與眾通
若土木剋則姪於六畜火與金姪常不足金

在第八好男女色火在第九亦同金在獅子

好奪人妻妾金在蟹磨有穢行月在張九

十二三十三四尾十二胃十四井二十四金

在奎二參一井十九柳十三辰五斗十三危

十一日在室十三翼十三水在井十五翼三

辰四火在井十五翼十五角六亢四辰五巳

上皆主姪穢亦以賤為妻或受他妻為妻其

宮若男女宮併即幸於男女也與奴婢併即

幸於奴婢也但以所併者必私通之也又金

在第七位土火同宮浮惡毒與外人私通不

擇好惡金在官宮月在田宅合取親戚為妻
其位高強即吉 右情慾宮

晝夜從水至月從東出配之如在高位好星
見得奴婢之力如下位惡星臨之主不得力
宜子細定之若惡星守照必婢逆作賊火土

首尾見之常有害主之心 右奴婢宮

白日從情慾至水夜生反此東出配之看所
臨之位必主事多艱迫也假如臨男女宮即
於男女上多致艱迫 右艱迫宮

從天想宮日至月地想宮從月至日此二宮

皆業次之分也每宮分為三分即每分十度
也此定之其事極繁皆出五行定分經中此
乃更不具錄也 右天想宮

秤星力分第十一

夫定人災福先以身命宮次以三方主定之
若身命宮主不得力但得三方主居好處亦
得中下富貴如三方主俱不得力身命主在
好位亦得小富小貴本在第三宮與月同俱
不為陷又日月無陷宮所到之處皆如福如
星曜在五弱之位見日月俱不為陷仍可減

力論之如首尾在四正宮為官之人也首多

吉尾多凶如太一土火雖為官必患惡瘡致

死也若身宮主及方主俱在下位餘星在高

位得三分之力若居王廟之宿得六分之力

身命主及方主俱在下位居王廟之宮諸星

在高位得七分之力若諸星不得力得四分

之力若身命主方主在下位居王廟餘星在

高處亦居王廟得八分之力若身命主方主

居高餘星在下位居王廟得九分之力若身

命主居王廟占高位得六分之力若身命主

不在好處三主居王廟在好處方主王廟在

下之位得六分之力在有力位但身主命主

與方主併即未定其災福仍須常見日月即

得十分之力每星曜見日月即得十分之力

每星曜見日月即加二分之一力不見即可減

二分力論之星曜在王廟好樂得多少力各

不同本在室得八分力在鬼得十分力在人

馬得四分之力火在心得十分在斗得六分

土在斗得十分在亢八分在虛四分之力金

在亢得十分在胃九分在卯八分力在畢六

分在室五分之力水在翼十分在軫九分日

在星十分在婁八分月在胃八分在卯七分

在畢六分在蟹宮得四分力首在星得六分

力在軫八分力尾在壁八分天一在女得十

分之力月字柳得六分之力若身命主方主

在王廟居強位見日月得十分力若在於本

分地位倍之如留又倍之得三十分之力也

若在下位得七分之力見日月得七分之

力若餘星不在王廟居強位見日月得八分之

力不見日月不得力若餘星在高處不居王

廟得八分力不見日月五分之力但與主星

減二分力論之也凡星曜入王廟之宮不在

王廟之度有及與不及至與不至亦須加減

是之或向或背亦須增損斷之向王廟之度

者為星曜順行其王廟之度在前若星逆行

其王廟之度在後即為向也背王廟之度者

為星曜順行其王廟度在後星逆行王廟度

在前皆為背也又及與不及者為王廟之度

在前星行得其度為及也不及者為王廟

之度在前星行不至其度便留留乃逆並為

不及也不至者為星曜逆行王廟之度在後欲至其度而便留乃復順為不至也得至者王廟之度在後星逆行入其度也向者得及得至者並減二分力論若背與不及不至者並減四分論之若近者王廟之度三日而得至者並可減一分之力論之若在其王廟之宿度即十分論之更若臨本分地位者倍而論之若留守其宿者又再倍而論之若順即為文逆即為武須在七強之位即大貴也若身命主方主在五弱之位者大貧之人也。凡言善星被惡星剋者雖是同官須有凌犯即為剋也若惡星在前日月五星不出其官行住犯之即為災若惡星在後星曜逆來凌者即災甚也若善星在前惡曜逆來犯者災亦甚重矣若星曜在後惡星逆來凌者災尤重也若善星在前惡星在後惡星行疾者不為凌不凌不犯不為災也若七日內有凌犯者即不為離機祿若日月在高處惡星在下位來剋不為災也若善星與日月在下位惡星在高處來剋必為災也若俱在高處所剋

不深若在下位所犯必重也若生時日月交蝕則不具足也若火逆來見日月得善星救則損目不救則撮口死木主重位土主重務金主女人女業水主文才火主武畧交主兵權天一主服色貴太一主刑殺日主天子月主后妃月在第五多男女水在西沒怕妻火逆非命土犯命少孤宜為道僧火犯命勇猛好殺木犯命有壽金犯命有女人之厄水犯命劣技能日犯命貴人重華曜犯命妨妻金性快自用意火性急難侵犯土性厚多仁惠水性聰多能解木性仁好梗直日主先代月主外家木為福惠火為官土為田宅金為妻水為藝業土為腹疾水為冷疾火為官事蟲傷金為女人色慾木為風疾水為文學言語

行年災福第十二

但以東出宮為首一歲一移宮直須迴生日後方可移宮常以行年官主言其吉凶若得日為主須候太陽至本主廟官宿之時有喜宜近貴人如行年得為主則月水行疾當以身命主及本主星推之時為主則有非常之

喜在順行之時仍須在有力之地木至身命主先有災憂後有大喜若得火為主災在逆伏身命及行年必為災若是主星即看何時至官命及第三第九皆為有喜之時也若得土為主合作事鈍滯多破財病病在逆伏之時也若是主星即含有土地之權須在有力之地若庶人則多錢穀若得金為主看何時到本主廟之官皆為有喜之時也又常以生時三絕六害之宿定逐年吉凶亦甚準的宜用之也歲星入命主遠行起災位寅上得財見貴人丑上兄弟不和子上損六畜或因六畜所損亥上憂子戌上遠行吉酉上主貴子遷官申上平平未上大喜亦妨鞍馬災午上遷官巳上得知已力辰上遠行即吉癸亥入命六十日驚恐瘡腫血光寅上失財丑上得財子上官災疾病亥上憂妻子戌上損六畜奴婢酉上女人口舌妻子血光申上為人謀害未上作事不成午上憂官巳上大吉小人即凶辰上兵厄生時得力不為災鎮星入命夜生災寅上小口破財丑上大吉子上遠行

亥上子孫爭論未上遷官戌上有喜酉上妻
患申上大吉午上加官巳上憂小口哭泣辰
上破財太白入命爭訟起寅上加衣丑上加
六畜子上忌咒詛亥上有疾病口舌酉上逢
貴人戌上進財申上女人為災午上有不測
之喜巳上大人舉薦辰上惡人累及天一到
處皆為喜太一到處皆為災蝕神人命毀謗
口舌寅上損財丑上兄弟不和子上父母疾
病亥上損子戌上得貴人力酉上損財妨妻
申上貴人往來未上百事吉午上先憂後喜
巳上得貴人接引辰上心不安為人連累火
至三六十一皆喜木至二五七九皆喜若遇
入六十火來即死水日火至命皆為災土至
三六十一喜金至三四五十二皆喜行年
至土元守宮災至火元守合有子火土見力
減至木元守宮火土見亦為災至金元守宜
婚姻有子至水元守宮土火見有災不見則
不為災至月元守宮火土見災重至日元守
宮宜入仕見貴人至土元守宮亦多災日月
至土火元守宮土火至日月元守宮土至火

元守宮皆為災重日至金元守喜火至金元
守有女人災土至金元守喜土至木元守有
官災木至火元守有子火至土元守喜土至
日元守災火至月元守破財疾病木至土元
守大富得財金至土元守大吉金至木元守
因女人破財金至火元守心疾金至水元守
因文書喜水至木元守有盜水至金元守有
官火至木元守憂公事日月至木元守皆有
喜
右件行年更有細微災福備在諸經此即撮
要而已故不盡錄也

靈臺經

秤星靈臺秘要經
明五行之性各異
木性強直火性猛烈土性仁和金性嚴毅水
性謙退

攘災星法

人倫經云申酉為八殺位此位唯不宜見火
郭景純以火在西沒故知不令終因以法攘
先須淨修一廁常須焚香勿令人往只自己
如之作法時即須披頭仗劍立此廁間如一
頃刻不逢人即置劍於廁中可以攘之若人
見之則彼此不免也其時被桓玄見之璞曰
與爾俱不免也後果如其言其法不欲匿之
秘如金匱經後一行與李筌撰筆斯經卷內
收之余恐師巫以為取資之具乾寧中勘其
疏已去之更不備載今復慮年紀綿邈流落
其本故別錄之

攘法

候火星行度來到元守宮分度一如生時遠
近度數合於何日符同遂先絕嗜慾自晨居
靜室早飯了至日午可裸形仗劍入廁作法

靈九

十八

了低聲哭出廁門却入靜室澡浴卧一時看夢寐所見何物必去其禍也可二度為之也若恍惚與人為官災疾病者宜用栢木刻如自已之形狀披以已之衣服候火星見自已披髮仗劍呼已名唱栢木形星下連呼僕妾以火焚之然後入靜室端坐存身破財施貧濟乏行陰德其木人長三尺二寸其工匠多與錢物勿令洩於外人其衣服象木人長短為之忌僧尼難犬見之若土到元守為災必若第一度到父母妻子疾病死亡失財貴人則坐致流亡但看生時得力與不得力若星主得力則先吉後災也

攘法

其法與火同若年下為災及元守者以已之冠冕衣服令入木竹林下候為災日月情人作一竹人形架其衣服冠冕向其星辰下如值陰雨即向廁上作人之形呼已名斷其竹木投諸廁中可去其災亦忌人見之見則不免也

攘火出九執經

九

十九

使赤油麻七粒赤稻五粒赤小豆三粒赤驢尾七莖赤銅屑少許以緋袋子盛緋線子繫在臂上大言又若畫其形供養言又轉度人經及消災經及帶緋頭鬚朱砂即於雲漢日為之寶命經云乘赤馬著赤衣在身須七處刺出血又刺出赤驢血當火見日為災時造八角壇於四面四角頭各著四方箭箭上繫四方色續時已身上血并赤驢血與檀末相調灑於壇上上又以赤油麻油燈五方五盞燈樹皆須赤前來所用袋用緋索子繫在臂上帶頭鬚吉又九執經云取隨年五果木茶隨年甘草兩數并前功德焚之左臂上帶赤銅釧南壇下置水一甕午上立竿懸赤幡埋赤炭六斤

攘土法

取黑油麻七粒黑豆七粒以皂綾袋子盛之用皂索子繫左臂上能除一切鬼魅邪魔咒詛之災於朔日以黑油麻汁作粥自食少許餘以施貧人及道僧緣土管一切修道人及苦行求正之者布施則大吉不得傷害等事

及老人不宜多作樂緣土好哀哭不好音樂故也又九執經云宜以犁具鐮鐵鑄作一土星真形長七寸以黑磁甕盛之置於卧床頭安之每於雞緩直日平旦時以黑油麻汁灑頭上經年乃去之如畫之供養亦得以隨年果子供養帶黑色者尤妙咒曰雞緩是我君主某臣僕願加祐護次以度災厄然後拜之供養訖自已食之好食酸苦等宜看八陽經帶雄朱燒安息香著皂衣不入惡神廟忌食牛肉忌角器等

攘關曜九

二十

經云以屠宰熟鐵打作釧如蛇形以口銜尾帶左臂上著緋衣忌夜食及黑處行取高岡上土一斗置床下別取黃土一斗煮熟送銀長生鵝鴨食之大吉

攘木法

取白猪毛七莖以白袋盛繫左臂上忌食猪肉不得殺生命又以白銀一兩鑄作真形供養看經不得入神廟及吊死問病供養一切道人吉

洞微限歌

人生貴賤稟星推限數交官各有時若過羅

限金木曜太陽紫炁月同隨限逢此曜加官

祿限數若逢金木日月紫炁火土二星到便危

夜降土星晝火曜三方不是死無疑土不生人

主盡生人火不是主此星若是三方主雖有

限數若逢立主死此星若是三方主雖有

災傷命不離數若逢生土是主盡生火是主限

家宅不寧因字至更兼鈍悶恰如癡限數逢

主家宅不寧計都失職人須記若過奎婁主

身心鈍悶計都失職人須記若過奎婁主

轉移主有過計都失職人須記若過奎婁主

室奎二宿主喜慶為好廟首在陽宮為福緊

尾星陰位定災稀羅限在陽宮為福緊在陰

官為福限在陽宮中對視三方淨空限凡為事不

期若人限逢看正入并三合對照無星官祿

上逢空限死四旬六七命須辭之時即過五

十不得應存善星限內逢災忌稱意中亡此

是機忌若人限數逢好星之數有只有災星消

息定忌若主其福壽不定消息詳之利官字計

限仍知惡曜相參各有時運上逢之何月死

失職中亡請細思之數內有忌星台照此

失職之盡土夜焚如是主限逢稱遂轉官資
大陰陽土官尤妙

缺文

星相見職昌位顯主麻詞若人限逢紫炁尤

權一限兩星居好廟益壽四年人要知道限之

中見兩星居好廟益壽四年人要知道限之

四年也凡定災福若是逢逆還福慢順行還

災緊順行即慢限逢惡曜兩相見為災至

甚並無移若是一限之中見兩惡星初入忌

星官宿限身命行年惡曜隨留連之月為亡

月官為五弱不須疑命若初八忌星行年身

弱官此忌星留連之月必身限惡行年身命

亡更不待第二年是災也限惡行年身命

喜好星過時便見危星辰本官勝餘位七強

宮內福加之五弱添災福力減學者須詳善

惡推此書如後更無妙先賢指定更無迷生

死定人無一失方顯從來學洞微

洞微大數休咎歌

卯十五方辰官十已十一方酉同式午官十

五最高強申七未八却在詳戊亥子各四年

半丑寅都各五年強假今書生火在巳午未

申酉至空亡二十五年為盡處不然破敗在

他鄉木在午方酉上火三旬之七福堂堂竭
在酉前申位盡六旬之六為殃人生一百
以為準學而細記莫令忘

夫人生以一百為準多有星辰善惡加減其

半以此不及一百從命官從十五年經歷善

星得其本官之數歷惡官切見相對與三合

加減之過惡即減半善加半法也

秤星靈臺秘要經

廣黃帝本行記

海一

唐閬州晉安縣主簿王瑾進

修行道德

黃帝以天下既理物用具備乃尋其訪隱問
道求仙冀獲長生久視所謂先理代而登仙
者也時有竄封子為陶正有神人過為其掌
火能出入五色煙火則以教封子封子積火
自燒隨煙氣上下一旦飛去往流沙食飛魚
暫死二百年更生黃帝師其道從封子遊於
蘭沙使風后負書常伯荷劍旦往洹流夕歸
滿晉行萬里而一息洹流如沙塵足踐則陷
其深難測大風吹沙如霧霧中多種龍魚鼈
皆能飛翔有石藍青色堅而甚輕從風靡靡
覆於流沙之上莖百葉千年一花故竄封
遊海詩曰青藍灼燦千載舒百齡暫死食飛
魚有務光子身長八尺七寸神仙者也務光自黃帝至夏時帝遊民間有赤將子與者不食五穀唱百草花而長年風雨上下已二千歲矣
有容成公善補導之術守生養氣谷神不死能使白髮復黑齒落復生帝慕其道乃造

五城十二樓以候神人即訪道遊華山首山
東之泰山時致怪物而與神會通接神人於
蓬萊迴乃接萬靈於明庭京兆仲山寒門甘
泉谷口在長安北黃帝於是祭天圓丘將求
至道即師事九元子以地皇元年正月上寅
日齋於首山在河東復周遊以訪其道將見
大隗于具茨之山方明為御昌寓騶乘張若
謂彥前導謂音習房舒氏切或作朋昆閭滑稽後從至襄
城之野七聖皆迷遇牧馬童子問途焉若知
具茨之山乎曰然莊子以大隗喻大道具茨在梁陽密縣若知大隗之所存乎曰然黃
帝曰異哉小童非獨知具茨之山又知大隗
之所存乎牧馬童子喻請問為天下小童曰夫為天下者亦若是而已矣又奚事焉
夫為天下者亦若是而已矣又奚事焉其水草量力乘之治天下者耕而余少而自餘鐵而木處以無為亦何事耳
遊於六合之內余適有瘡病有長者教余曰
爾乘日之車而遊於襄城之野今余病少痊
余又且復遊於六合之外夫為天下者亦若
此而已又奚事焉六合外者異於世也六合也長者體道之人也日車者日新也童子言未悟道之時與物不羣潔身明行以遺風疾

心緒荒狂及遇體道之人聞乎至理衆日新
之通與時推移和光同塵波流飄靡外無物
累內盡虛忘如此真無病而人自化帝曰
夫為天下誠非吾子之事雖然請問為天下
小童辭黃帝又問小童曰夫為天下者亦奚
以異乎牧馬哉亦去其害馬而已牧馬者不傷其性也
理天下者無帝再拜稽首稱天師而退帝留
省天皇真一之經而不解三一真氣之要是
以周流四方求其釋解乃至圓丘之上其國
有不死之樹食其實與葉人皆不死丹巒之
泉飲之長生有巨蛇害人帝以雄黃逐之留
一時而返外國記云帝令三子習服之皆壽三百歲東到青丘見紫府先生登於風山受三皇內天文大字
三皇內天文大字抱朴子以効召萬神沒使羣靈南到五芝玄澗登玄隴建木觀百靈所登降採若乾之芝
飲丹巒之水西見中黃子受九茹之方北到鴻隄上具茨見
大隗君密縣有黃蓋童子受神仙芝圖十二卷登稽山陟王屋開石函發玉笈得金鼎九丹之經復受九轉之訣於玄女南至江登熊湘
在長沙益陽縣往天台受金液神丹之

方聞廣成子有道在空同山在崑崙虛城見之曰聞吾子達於至道敢問至道之精吾欲取天地之精以佐五穀以養人民吾又欲官陰陽以遂羣生爲之奈何廣成子曰汝欲問者物之質也汝欲官者物之殘也自汝理天下雲氣不待簇而雨草木不待黃而落日月之光益以荒矣汝佞人之心剪剪者奚足以語至道哉黃帝退捐天下策特室席白茅閑居三月復往邀之廣成子南首而卧黃帝順下風膝行而進再拜稽首而問曰聞吾子達於至道敢問治身奈何可以長久廣成子蹶然而起曰善哉問乎來吾語汝至道之精窈窕冥冥至道之極昏昏默默必靜必清無勞汝形無搖汝精乃可長生目無所見耳無所聞心無所知神將守形乃可長生慎汝內聞汝外多知爲敗我爲汝遽於大明之上矣至彼至陽之原也我爲汝入於杳冥之門矣至彼至陰之原也天地有官陰陽有職慎守汝身物將自壯我守其一以處其和故我修身千二百歲矣吾形未嘗衰也黃帝再拜稽首

曰廣成子之謂天矣廣成子又曰彼其物無窮而人皆以爲終彼其物無測而人皆以爲極得吾道者上爲皇而下爲王失吾道者上見光而下爲土今夫百昌皆生於土而返於土故將與汝入無窮之門以遊無極之野吾與日月參光與天地爲常當我緡乎遠我昏乎人其盡死而我獨存乎黃帝得道之要復周遊四海車轍馬跡丹井遺墟往往而有之天社山有丹井昌利山青城山結雲山皆有轍跡永嘉山有丹泉青城山羅浮山有古壇越玄闕見中黃丈人登雲臺入青城天國之都見竊先生受龍蹠之經築壇于山上封竊先生爲五嶽丈人使嶽神一月再朝嶽神灑六時之泉以代畧漏帝問先生真一之道先生曰吾得道始仙耳非是三皇天真之官實不解此真一之文近皇人爲扶桑君所使領峨嵋山仙官今猶未去可往問之帝乃到峨嵋之山清齋三月得與皇人相見皇人者不知何世人也身長九尺玄毛被體皆長尺餘髮纔長數寸其居乃在山北絕巖之下中以蒼玉爲屋黃金爲牀然千和之香侍者皆衆

仙王女座賓三人皆稱太清仙王方見皇人飲以丹華之英漱以玉井之漿黃帝匍匐既坐再拜稽首而立請問長生之道皇人曰子既官四海復欲不死不亦貪乎帝曰萬兆無主則相凌暴今爲制法足以傳後私心好道遠涉四海幸遇道君願垂哀告竊見真人食精之經徒省其文而弗綜其意看其辭而不釋其事乞得教誨皇人大驚良久乃答曰汝安得聞見此乃金籙之首篇上天之靈符太上之寶文矣白日昇天飛步虛空身生水火變化無常此天仙之真唯有龍胎金液九轉之丹守形絕粒辟除萬邪役使鬼神長生久視乃血脉流宣腸化爲筋百災不能傷延年期至億千則唯有真一食五牙之文此二事但使南斗君領錄參於太帝捷籙自非仙人四千年一出之約皆不得背科而妄泄也又西王母秘此書於五城之內其外衛備有仙樓十二藏以紫玉之匱刻以黃金之札封以丹芝光華印以太上中章其無仙籍者不得聞知也子未可聽天音於地耳矣便可去也帝

答曰昔已受神丹於玄女唯未受五牙食真之經幸今運會得見道君既不以授生道是臣相命不得度世耳因叩頭流血唯乞慈濟太清三仙王復愍助之曰此子先世有功德及鳥獸故芳氣之流光于帝位何為隱其真牙之經乎可教而成之也皇人命帝坐而告之曰汝向所道之經蓋上天之氣歸於一身一身分明了可長存耳夫人有生之最靈也不能自守其神而却衆惡若知之者不求祐於天止於其身則足矣且一身猶一國也胃腹之位猶官室也四肢之列猶郊境也骨節之分猶百官也神猶君也血猶臣也氣猶民也故知理身則知理國愛其民所以安其國吝其氣所以全其身民散則國亡氣竭則身死亡者不可存死者不可生所以至人消未起之患理未病之疾堅守之於無事之前不追之於既逝之後民難養而易散氣難保而易失審威德所以固其理割嗜欲所以成其真然後真一存焉三一守焉泥丸絳官丹田三一之宅也子勤守之萬毒不傷漱華池食

五牙便為真仙矣吾受此經於九天真王今以相付存之於口名曰朱鳥之丹取之於身名曰真一勤乎秘哉大有旨曰五穀為刺命之鑿五牙為長生之根也帝受道畢東過廬山署九天使者秩次青城丈人比御史主總仙官之籍為五嶽之監司也帝又封瀋山君為九天司命主生死之錄復以四嶽皆有佐命之山而南嶽孤峙無輔乃章祠三天太上道君命霍山為南嶽儲君瀋山為南嶽之副以貳其政以輔佐之乃寫九州山川百物之形又作五嶽之圖用傳於世帝鍊石於緇雲之山有緇雲之瑞立緇雲之堂丹丘存焉帝藏兵法勝負之圖六甲陰陽之書於苗山在今湖南衡陽縣又合符瑞於釜山在今湖南衡陽縣奉事太一元君受易形變化藏於空同之巖帝考推步之術於太山稽力牧者體診之訣於岐伯雷公講氣脈於風后窮律度於容成救殘傷綴金冶之事畢該秘要窮究道真傳陰符則內合天機外合人事理天下南泊交趾北至幽陵西極流沙東界蟠桃在崑崙山

帝曰吾聞在宥天下不聞理於天下我勞天下久矣息駕玄圃以反余真也玄圃在崑崙山帝脩封禪禮畢乃採首山之銅鑄鼎象物鼎成以象太一於雍州雍州在陝西其鼎知吉凶知存亡能輕能重能息能行不灼而沸不汲而盈自生五味真神鼎也遂鍊九鼎之丹服之以丹法傳於玄子重盟而付之丹經藏於九疑之東委羽之山承以文玉覆以盤石金簡玉字刻其文夏禹得其書合丹成道藏於會稽之山帝又得其書合丹昇天藏於雲臺之山也帝又以靈寶五符真文金簡書之一通藏於鍾山一通藏宛委之山帝所鑄劍鏡鼎器皆以天文古字題銘其上或有祕藏之詞焉時薰風至神人集成厭代之志留冠珮劍舄於鼎湖極峻處昆臺之上立館於其下有馬師皇者善醫馬通神明忽有龍下于庭張口閉目師皇視之此龍有病乃引鍼以鍼龍口中以牛乳煎甘草灌之龍病即愈師皇乘龍而去黃帝聞之自擇以戊午日昇天果有黃龍垂胡鬚迎帝帝乘龍登天與無為子及臣僚昇

天者七十二人其小臣不得去者攀斷龍髯及墮帝弓小臣抱弓而號因曰烏號弓萬姓仰天而呼因名其地為皇天原亦名鼎湖湖今縣城其後有臣左徹削木為黃帝像率諸侯而朝奉之臣僚追慕取几杖立廟而祭之取衣

冠置墓而守之於是有喬山之冢在上郡周陽縣有橋

山又南施縣有黃帝祠黃帝曾遊處皆有祠焉五百年後喬山墓崩空室唯劍與赤舄在

一旦亦失去音記具載黃帝居代總二百一十年在位一百年昇天為太一君又為軒轅

之星備黃龍之體在南宮之中大體祭天神軒轅星也

後代享之列為五帝居中配天蓋黃帝土德中央之位兼總四方也東方青帝太昊南方少昊北方黑帝顓頊以鎮星為子上配五老下

配五帝黃帝之子昌意居弱水昌意之弟少昊帝妃女節所生也帝之女溺於東海化為鳥名曰精衛常銜西山木石以堙東海焉少昊名摯字青陽即帝位號金天氏黃帝之子

也顓頊高陽氏黃帝之孫也有聖德在位七十八年年九十八歲母蜀山氏都商丘濮陽

禹強黃帝之胤顓頊之子與顓頊俱得道顓

頊為玄冥禹強為北方水神顓頊以來以帝

譽高辛氏黃帝之孫生也帝生而神靈自言其名都偃師今在河南在位七十年年一百五

歲帝堯陶唐氏黃帝玄孫姓伊祁名放勳與

於定陶以唐侯為帝濟陰有定陶都於平陽

在平在位九十八年年一百八十八歲帝舜

有虞氏姓姚名重華黃帝八代孫梁國有虞城今蔡州

都蒲坂年百歲得道登遐於九疑之山夏禹號夏后氏黃帝玄孫姓姁名文命舜已八代

而禹為玄孫何也按通甲開山圖曰禹得道

仙人古有大禹女嫫母十九代孫年三百六十歲入九嶷山後三千六百歲堯理天下洪水既甚人民塗炭大禹念之化生於石紐山泉中女秋華汲水得石子如珠愛而吞之有娠十四月而生子長成能知泉源乃賜號為禹

代父繼理水三年功成帝以其功為司殷湯

從後稷帝位以此推之黃帝玄孫也黃帝十七代孫

黃帝子孫各得姓於事帝吹律定姓者也黃帝子孫各得姓於事帝吹律定姓者

十二在中少昊有子姓曼顓頊姓姬以黃帝

帝子也堯姓伊祁舜姓姚禹姓姁湯姓

子又張鄧軒路黃冠宋酈白薛虞資伊祁申屠黃公托跋此俗以上為姓以君為姓乃以

此姓黃帝有子各封一國具中總三十三氏

出黃帝之後子孫相承凡一千二百五十年

自黃帝已酉歲至今大唐廣明二年辛丑歲

計三千四百七十二年矣

廣黃帝本行記

穆天子傳序

海二

穆天子傳出汲冢晉荀勗校定爲六卷有序言其事雖不典其文甚古頗可觀覽予攷書序稱穆王享國百年耄荒太史公記穆王賓西王母事與諸傳說所載多合則此書蓋備記一時之詳不可厚誣也春秋之時諸侯各有國史多尾雜之言下逮戰國王迹熄而聖言湮處士橫議而異端起人人家自爲說求其欲不尾雜其可得乎其書紀王與七萃之士巡行天下然則徒衛簡而微求寡矣非有如秦漢之千騎萬乘空國而出也王之自數其過及七萃之規未聞以爲迂也登羣玉山命邢侯攻玉而不受其牢是先王恤民之法未嘗不行至遇雨雪士皆使休獨王之八駿起騰以先待輶旬日然後復發去是非督令致期也其承咸熙洽之餘百姓晏然雖以徐偃王之力行仁義不足以爲倡而搖天下以知非有暴行虐政而君子猶以王爲獲沒於祗宮爲深幸足以見人心之危之如此也是豈可效哉是豈可效哉存其書者固可以

覽其古微其事者又安可不攷其是非歟南臺都事海岱劉貞庭幹舊藏是書懼其無傳暇日稍加讎校訛舛命金陵學官重刊與博雅之士共之諗予題其篇端云時至正十年歲在庚寅春二月二十七日壬子北岳王漸玄翰序

穆天子傳序

侍中書監光祿大夫濟北侯臣荀勗撰

序古文穆天子傳者太康二年汲縣民不准盜發古塚所得書也皆竹簡素絲編以巨勗前所考定古尺度其簡長二尺四寸以墨書一簡四十字汲冢者戰國時魏地也案所得紀年蓋魏惠成王子令王之塚也於世本蓋襄王也案史記六國年表自令王二十一年至秦始皇三十四年燔書之歲八十六年及至太康二年初得此書凡五百七十九年其書

言周穆王遊行之事春秋左氏傳曰穆王欲肆其心周行於天下將皆使有車轍馬迹焉此書所載則其事也王好巡守得盜驪騮耳之乘造父爲御以觀四荒北絕流沙西登昆侖見西王母與太史公記同汲郡收書不謹多毀落殘缺雖其言不典皆是古書頗可觀覽謹以二尺黃紙寫上請事平以本簡書及所新寫並付祕書繕寫藏之中經副在三閣謹序

穆天子傳卷之一

晉 郭璞注

古文

飲天子獨清山之上戊寅天子北征乃絕漳水絕猶載也漳庚辰至于口觴天子于盤石

之上觴者所以進天子乃奏廣樂史記云趙知人七日而奏曰我之帝所樂與百神遊于樂天廣樂九奏萬舞不類三代之樂其聲動心廣樂載立不舍言在車上至于鉞山之義見此

下即鉞山今在常山癸未雨雪天子獵于鉞山之西阿阿山今在常山於是得絕鉞山之隊隊謂谷中險阻

通也北循庫沱之陽庫沱水北流者索駝之乙酉天子北升于口天子北征于犬戎

得四王將征犬戎祭公謀父諫不從遂征之五王以東犬戎口胡觴天子于當水之陽天

子乃樂口賜七萃之士戰萃集也聚也亦猶集有智力者為庚寅北風雨雪詩曰北風其王之爪牙也

天子以寒之故命王屬休令王之徒甲午天子西征乃絕隴之關隴西也疑北謂北陵

山也己亥至于焉居焉知之平國名辛丑天子西征至于鄙人鄙國名音切河宗之子孫鄒

栢絮伯字多以水且逆天子于智之口先豹

皮十良馬二六之傳曰先進乘韋天子使

井利受之之井利穆王癸酉天子舍于漆澤宿

舍乃西釣于河以觀口智之口甲辰天子獵于漆澤於是得白狐玄貉焉以祭於河宗

有事于河奇此獲故用之漢武帝郊祀兩午天子飲于河水之阿阿水天子屬六師之人

于鄒邦之南漆澤之上會也戊寅天子西征驚行至于陽紆之山紆音也河伯無夷之所都居無夷無夷也是惟河宗氏河宗氏之宗主

以焉氏河宗栢天逆天子燕然之山伯天勞用東帛加璧勞郊勞也五兩為先白口天子

使鄒父受之鄒父鄒公之謀父癸丑天子大朝于燕口之山河水之阿告將禮河也乃命井

利梁固梁門大夫聿將六師聿猶也天子命吉日戊

午詩曰吉天子大服冕天子大服冕冕冠也天子

所未詳詳也天子大服冕冕冠也天子

寒下寒下曹祝佐之曹重也傳官人陳牲全

授河宗璧河宗伯天受璧西向沉璧于河

載載再拜稽首至地也祝沉牛馬豕羊河宗

口命于皇天子皇上帝河伯號之王穆王帝曰

穆滿以名應謙也言謚女當永致用審事穆王世事也

曰穆滿示女春山之琺山海經春字作鍾音怪詔女昆侖口舍四平泉七十疑皆說昆侖

乃至於崑崙之立以觀春山之琺穆王乃披圖

賜語賜語賜女受終福天子受命南向再拜

命已未天子大朝于黃之山特禮河乃披圖

視典用觀天子之琺琺器省河所曰天子之琺

銀有精黃金之膏金膏亦玉膏天子之琺

萬金口琺百金士之琺五十金鹿人之琺十

金之琺百金以下宜次言諸侯之琺千金大夫

口野馬走五百里後倪師子亦食虎豹野馬
 戎印印距虛走百里亦如馬而小狻猊後倪青
 坐距虛並言之耳廣口二十里獸能走里數遠近曰
 相天皆致河典典禮也自此以上事物皆河
 也乃乘渠黃之乘為天子先先驅導以極西
 土極乙丑天子西濟于河口爰有溫谷樂都
 溫谷言冬暖也燕河宗氏之所遊居伯天之
 有寒谷不生五穀丙寅天子屬官效器會官司閭乃命正公郊
 父正公謂三上公天子受勅憲憲教令也管
 用伸口八駿之乘八駿名在下以飲于枝詩之中
 水岐成詩詩積石之南河積石山名今在金山
 北山而天子之駿駿者馬赤驥世所謂盜驪
 為馬細頸白義踰輪山子渠黃華騮色如華
 驪黑色也名馬標赤者為綠耳綠耳以一驪馬是生級耳魏
 東駿素駒赤也時鮮卑獻千里馬白也而兩耳黃名曰黃耳
 即此類也八駿皆因其毛色以為名號耳案
 史記造父為穆王得盜驪騮縹耳之馬御
 以西巡遊見西王母樂而忘歸皆與此同若
 合符狗重工徹止翟獬口黃南口來白狗皆陵
 契亦猶宋天子之御造父三百下云三百耿
 鵠之類造父善御穆王封之曰天子是與出
 倫芍及於趙城餘未聞也天子曰於乎予一人
 口入藪田獵釣弋弋織天子曰於乎予一人

不盈于德盈滿也而辨於樂辨作通樂之事後世亦追
數吾過乎穆王遊放過度行樂忘歸故作此言以自警也七萃之士
曰天子曰後世所望無失天常奉六農工既
得歲歲也男女衣食無飢飢也百姓珥富富者安也官人
執事各視職事故天有眚四時民口氏響音何謀
於樂言不規樂而樂自及何意之忘常慎也與民共利世
以爲常也天子嘉之善其有辭賜以左佩華也王
之佩佩乃再拜頓首之精也

穆天子傳卷之一

穆天子傳卷之二

古文

○栢夭曰○封膜畫于河水之陽膜畫人名疑音失

以爲殷人主主謂主其祭祀言同姓也丁巳天子西南升

口之所主居以說古之賢聖以居爰有大木碩艸碩大也

爰有野獸可以收獵戊午曷口之人居慮古時

字居慮名獻酒百口于天子百下脫盛酒器名天子已飲

而行遂宿于昆侖之阿赤水之陽昆侖山有五色水出東南隅而東北流皆見山海經爰有鷦鳥之山鷦鳥一名指天

○子三日舍于鷦鳥之山口吉日辛酉天子升

于崑崙之丘以觀黃帝之宮黃帝巡遊四海登崑崙山起宮

見於其上室於其上而豐口隆之葬陸上宇疑作豐豐陸上宇疑作豐豐

卦遂爲雷師亦猶黃帝橋山有異以詔後世

詔謂之癸亥天子具蠲齊牲全以禋口昆侖之

丘蠲者潔也齊祭神曰禋書天子禋于六宗蠲音主甲子天子北征

舍于珠澤此澤出珠國名之云今越萬平澤出青珠是以釣于流

水曰珠澤之數方三十里澤中有草爰有穫

葦莞蒲莞菹或曰莞蒲有葦耳聞西云莞音九芋蕒蕒音今著蕒蕒荷也似藿乃獻白玉口雙口

而細音蕒蕒四月秀要

角之一口三可以口沐乃進食口酒十口姑
剝九口亦味中糜胃而滑中猶也因獻食馬三
百可以供牛羊三千天子口昆崙說封人林
昆崙以守黃帝之宮南司赤水而杜守春山
之寶因用顯其功天子乃口之人口吾黃
金之環三五空邊等朱帶貝飾三十淮南子
是也工布之四吾乃膜拜而受人禮之胡
舉手加額南說拜天子又與之黃牛二六
牲種以三十口人于昆崙立季夏丁卯天
子北升于春山之上以望四野曰春山是唯
天下之高山也華水口華晨雪天子於是取
華木華之實特歸種之曰春山之澤清水出
泉溫和不風飛鳥百獸之所飲食先王
所謂縣圖上有城重或上信之是謂閼
風或上信之是謂閼風又曰實唯
明明昆崙京圖各一山但相近耳又曰實唯
帝之平天子於是得玉策拔斯之英精華也
尸子曰龍泉有玉英山海經曰黃帝乃曰春
山百獸之所聚也飛鳥之所棲也爰有口獸
食虎豹如麋而戴骨盤口始如麋小頭大鼻
是也爰有赤豹白虎詩云赤熊羆豺狼野馬

野牛山羊野豕今華陰山有野牛爰有白鳥
青鵬執犬羊食豕鹿能食獐鹿曰天子五日
觀于春山之上乃為銘述於縣圖之上以詔
後世謂勸石銘功也秦始皇漢武帝巡
申天子西征甲戌至于赤鳥之人其獻酒千
斛于天子食馬九百羊牛三千糝麥百載似
不結而天子使祭父受之曰赤鳥氏先出自周
宗與周同大王亶父即古公亶之始作西土
邑在扶風美陽是也今封其元子吳太伯于
東吳因即封之於吳詔以金刃之刑南金精
其刑賄用周室之璧賄也封丹璧臣長季綽
于春山之風妻以元女詔以玉石之刑昆崙
美玉石處以為周室主天子乃賜赤鳥之人
口其墨乘四周禮大夫黃金四十鎰二十兩
貝帶五十朱三百裘丁乃膜拜而受過之過
人名也曰口山是唯天下之良山也寶玉
之所在嘉穀生之草木碩美天子於是取嘉
禾以歸樹于中國漢武帝取外國香曰天子
五日休于口山之下乃奏廣樂赤鳥之人乃
好獻女于天子思好也女聽女列為嬖人名一

聽名夫一曰赤鳥氏美入之地也寶玉之所
在也已卯天子北征趙行口舍趙猶起騰庚
辰濟于泮水泮水出崑崙山西北辛巳入于
曹奴之人戲觴天子于泮水之上戲國人乃
獻食馬九百牛羊七千糝麥百車天子使逢
固受之逢固周天子乃賜曹奴之人戲口黃
金之鹿銀口此皆古者以賂夷狄之奇貨也
貝帶四十朱四百裘戲乃膜拜而受壬午天
子北征東還從東頭甲申至于黑水水亦出
東北隔而西膜之所謂鴻鷺西膜沙膜之鄉
物與中不問春秋叙弓賦苦師于續水載
果傳曰狄人謂續泉失名號以中國名從主
類也於是降雨七日天子留骨六師之屬穆
行輒出從泉前天子乃封長肱于黑水之西
河即長肱人也身如中國臂長三丈魏時在
東海經見是惟鴻鷺之上以為周室主是曰留
骨之邦國以辛卯天子北征東還乃循黑水
癸巳至于羣玉之山即山海經云羣玉
氏之所守曰羣玉田山口知阿平無險言邊
阻四徹中繩言皆先王之所謂策府言往古
以爲藏書冊之府所藏草木而無鳥獸言統
謂藏之名山者也

也爰有口木西膜之所謂口天子於是取玉
三乘玉器服物之環佩於是載玉萬隻見左

傳氏天子四日休羣玉之山息也乃命邢侯待

攻王者待留之也孟秋丁酉天子北征

口之人潛時名也觴天子于羽陵之上乃獻

良馬牛羊天子以其邦之攻玉石也受其

牢重慎其相天曰口氏檻口之後也天子

乃賜之黃金之璽三六州即玉也朱三百裏

潛時乃膜而受戊戌天子西征辛丑至于割

閭氏音天子乃命割閭氏供食六師之人子天

六軍詩曰周王于鐵山之下壬寅天子登于

鐵山乃徹祭器于割閭之人以祭餘溫歸乃

膜拜而受溫歸天子已祭而行乃遂西征丙

午至于鷄韓氏爰有樂野溫和糝麥之所草

此字作草下犬馬牛羊之所昌昌猶寶玉之

所口丁未天子大朝于平衍之中新墳之下

乃命六師之屬休已酉天子大饗正公諸侯

王吏七莘之士于平衍之中鷄韓之人無鳧

乃獻良馬百匹用牛三百用者良犬七千習

者牝牛二百野馬三百牛羊二千糝麥三百

車天子乃賜之黃金銀璽四七貝帶五十朱

三百裏變口雕官無鳧上下乃膜拜而受古

上下字今失庚戌天子西征至于玄池天子

三日休于玄池之上乃奏廣樂三日而終是

日樂池武因改名為廣樂池天子乃樹之

竹池達竹是曰竹林竹木盛癸丑天子乃遂西

征丙辰至于苦山西膜之所謂茂苑天子於

是休獵於是食苦苦少名丁巳天子西征已

未宿于黃鼠之山西口乃遂西征癸亥至于

西王母之邦

穆天子傳卷之二

穆天子傳卷之三

晉郭璞註

古文

吉日甲子天子賓于西王母西王母如人虎

見西王母其年來見賓于昭公乃執白圭

玄璽以見西王母執贊者好獻錦組百純口

組三百純純足端名也周禮曰純帛西王母

再拜受之口乙丑天子觴西王母于瑤池之

上西王母為天子謠曰白雲在天山階

陵自出道里悠遠山川間之諫將子無死

尚能復來尚能天子答之曰予歸東土

和治諸夏萬民平均吾顧見汝顧還比及三

年將復而野復反此野天子遂驅升于弇山

日弇山乃紀刀跡于弇山之石銘題而樹

之槐眉曰西王母之山言是西王母所居也

山還歸刀口世民作憂以吟曰比徂西土徂往

也爰居其野虎豹為羣於鷄與處於鷄與處嘉命

不遷言守此我惟帝帝天天子大命而不可

稱顧世民之恩流涕歔隕吹笙鼓簧黃在中

心翔翔夢無世民之子唯天之望望也丁未

隻貝帶五十朱七百裏箭桂薑百蘭絲纈
離官解箴乃膜拜而受乙丑天子東征解箴
送天子至于長沙之山口隻天子使栢天受
之栢天曰重絕氏之先三苗氏之口處以黃
木鐃銀采口乃膜拜而受三苗氏所寶丙寅
天子東征南還已已至于文山西膜之所謂
口觴天子于文山西膜之人乃獻食馬三百
牛羊二千糝米千車天子使畢矩受之曰口
天子三日遊于文山於是取采石以有采石
士寅天子飲于文山之下文山之人歸遺歸
名乃獻良馬十駒四馬用牛三百守狗九十
物牛二百以行流沙此牛能行流沙中如素脫天子之豪
馬豪牛豪猶龍也山海經云龍狗謂龍狗
或曰龍豪羊以三十祭文山又賜之黃
金之嬰二九貝帶三十朱三百裏桂薑百蘭
歸遺乃膜拜而受癸酉天子命駕八駿之乘
右服驪驪驪驪字而左綠耳右驂赤龍古驂而
左白儀古義天子主車造父為御園固為右
次車之乘次車右服渠黃而左踰輪右盜驪
而左山子栢天主車參百為御奔戎為右天

子乃遠東南翔行馳驅千里行如飛千里至
于巨蒐之人獮奴乃獻白鵠之血以飲天子
所以飲血因其牛羊之漣漣乳也今江南北
益人益人力因具牛羊之漣亦呼乳為漣音寒
反以洗天子之足骨及二乘之人謂主天
者也甲戌巨蒐之獮奴觴天子于焚留之山
乃獻馬三百牛羊五千秋麥千車秋麥膜稷
三十車膜稷也天子使栢天受之好獻枝斯
之石四十精者餽錫錫夢龍秘佩百隻琅玕四
十龍龍龍十龍天子使造父受之口乃
賜之銀木鐃采黃金之嬰二九貝帶四十朱
三百裏桂薑百蘭獮奴乃膜拜而受乙亥天
子南征陽紆之東尾尾山乃遂絕燕膏之谷
已至于纓瑀河之水北阿爰有漿澠之口河
伯之孫今西有渠事皇天子之山有模莖
其葉是食明后模莖字天子嘉之賜以
佩玉一隻栢天再拜稽首癸丑天子東征栢
天送天子至于鄆人鄆伯絮觴天子于澡澤
之上鄆多之汭河水之所南還還也
曰天子五日休于澡澤之上以待六師之人
戊午天子東征顧命栢天歸于乃邦天子曰

河宗正也栢天再拜稽首去天子南還升
于長松之陞長松有孟冬壬戌至于雷首雷首
今在河東雷首犬戎胡觴天子于雷首之阿乃
獻食馬四六天子使孔牙受之曰雷水之平
寒寒人具犬馬牛羊爰有黑牛白角爰有黑
羊白血也癸亥天子南征升于崑之陞崑
丙寅天子至于鉅山之隊東升于三道之陞
乃宿于二邊命毛班毛班達固先至于
周以待天之命癸酉天子命駕八駿之乘赤
驥之駒造父為御口南征翔行逕絕翟道翟
在陝西翟升于太行南濟于河馳驅千里遂
入于宗周官人進白鵠之血以飲天子以洗
天子之足亦謂造父乃具羊之血以飲四馬
之乘一與王同車天子大朝
于宗周之廟乃里西土之數也紀年曰
西征還里天下曰自宗周灋水以西灋水
洛即成周洛至于河宗之邦陽子之山三千有
四百里自陽紆西至于西夏氏二千又五百
里自西夏至于珠余氏及河首千又五百里
自河首襄山以西南至于春山珠澤昆侖之

穆天子傳卷之五

晉 郭 璞 注

古文

寶處曰天子四日休于濩澤今平陽濩澤縣是也音濩特於是射鳥獸獸丁丑天子口兩乃至祭父自

圖鄭來謁鄭有國田因云留昆歸玉百枚昆

紀年陵翟致賂國也音陵姓良馬百駟傳曰文

歸畢之寶前取此寶也以詰其成詰猶責也

陵子焉胡口東牡夷狄有德者見許男于消上消水之所在音胡美反祭父以天子命辭

曰去茲羔用王帛見禮男執蒲璧許男

不敢辭奉王還取束帛加璧口毛公舉幣王

毛公即是日也天子飲許男于消上天子曰

朕非許男而恤百姓口也答氏宴飲母有禮

禮天子稱異姓諸侯為伯舅燕者私會不欲

崇禮教也管子曰伯舅無下拜字亦作舅各

猶舅許男不敢辭升坐于出尊禮記曰反站

為好既獻反爵站上出尊蓋此之類也乃用

宴樂言曲天子賜許男駿馬十六名稱駿者許

男降再拜空首周禮三日空拜乃升平坐及

暮天子遣許男歸癸亥天子乘鳥舟龍卒浮

于大沼沼池龍下有舟字舟皆以龍為夏

庚午天子飲于消上乃遣祭父如圖鄭用口

諸侯辛未天子北還釣于漸澤食魚于桑野

丁丑天子里圃田之路盡規度以為苑園東

至于房房有山西至于口丘南至于桑

野北盡經林黃口之藪南北五十口十虞東

虞曰兔臺西虞曰櫟立櫟今河南陽南虞曰

口富丘北虞曰相其御虞曰口來十虞所口

辰天子次于軍丘以畋于藪口甲寅天子作

居范宮范離宮之名也以觀桑者桑者問問也乃

飲于桑中桑林之中天子命桑虞主桑者出口桑者

用禁暴人不得令妄仲夏甲申天子口所庚

寅天子西遊乃宿于祭祭公邑祭壬辰祭公飲天

子酒乃歌陶天之詩詩頌有昊天有成命二

祭公以此天子命歌南山有桂詩小雅有南

君于邦家之基以答祭公之乃紹宴樂紹繼

丁酉天子作臺以為西居壬寅天子東至于

雀梁甲辰浮于榮水榮澤是乃奏廣樂季夏

庚口休于范宮仲秋丁巳天子射鹿于林中

乃飲于孟氏爰舞白鶴二八今之白鶴孔雀

穆天子傳卷之四

立七百里自春山以西至于赤鳥氏春山三百里東北還至于羣玉之山截春山以北由也自羣玉之山以西至于西王母之邦三千里口自西王母之邦北至于曠原之野飛鳥之所解其羽毛所謂解千有九百里口宗周至于西北大曠原案山陰經云羣鳥所集澤有此大曠萬四千里乃還東南復至于陽紆七千里還歸于周三千行兼數三萬有五千吉曰甲申天子祭于宗周之廟告行反也告廟也乙酉天子口六師之人于洛水之上丁亥天子北濟于河口羣之隊以西北升于盟門九河之隘盟門山今在河北尸子乃逐西南仲冬壬辰至彙山之上乃奏廣樂三日而終吉曰丁酉天子入于南鄭今京兆鄭也紀年穆王元年秦穆宮于南鄭傳所謂王是以獲後于極官者

還宿于雀梁季秋辛巳天子司戎于口來
數還宿于雀梁季秋辛巳天子司戎于口來
虞人次御以次侍御孟冬鳥至鳴也王目口
下云王目諸侯也仲冬丁酉天子射獸
姓女姓是婦官也休于深藿藿華之藿得麋麋豕鹿四百有二十得
二虎九狼乃祭于先王命庖人熟之庖人主飲食者
戊戌天子西遊射于中口方落草木鮮命虞
人掠林除藪以為百姓材以供人之材用是
日也天子北入于邠邠音鄰邑與井公博三日
而決決音并公賢人而隱也辛丑塞塞音不進焉塞也
至于臺乃大暑除天子居于臺以聽天下之
因以遠方口之數而衆從之是以選勅勅音乃
載之神人口之能數也有道也乃左右望之占
也天子樂之受其命為口而時口焉口其名
曰口公去乘人口猶口有虎在平葭中葭音天
子將至七萃之士高奔戎請生捕虎必全之
乃生捕虎而獻之詩所謂袒裼暴虎天子
命之為桺桺音也而畜之東虞是為
虎牢因以名其地也天子賜奔戎改馬十
駟駟音足高疾也歸之太牢太牢音奔戎再拜
饋首丙辰天子北遊于林中乃大受命而歸

仲秋甲戌天子東遊次于雀梁一宿為舍
為口靈書于羽林羽林音書中靈書也季秋口乃
宿于汾畢人告戎戎音也曰陵翟來侵天子使
孟念如畢討戎孟音霍侯舊告覺平陽永安
有城天子臨于軍丘狩于藪季冬甲戌天
子東遊飲于留祈射于麗虎讀書于荔丘舉若
必書焉口獻酒于天子乃奏廣樂天子遺其
靈鼓乃化為黃蛇周禮曰靈鼓四而是日天
子鼓道其下而鳴從失鼓而擊鼓也鼓在地
也方末乃樹之桐桐音木也以為鼓則神且
鳴則利於戎戎音也以為琴則利口于黃澤東
遊於黃澤宿于曲洛洛水之曲也廢口使宮樂
謠宮樂音典曰黃之池其馬歛沙歛音善問切皇人
威儀威音威儀黃之澤其馬歛玉玉音善皇人受穀
也丙辰天子南遊于黃口室之丘以觀夏
后啓之所居疑此言太室之丘嵩高山啓母
故其上有啓室也皆音山化為石而夫啓亦登仙
見歸藏及淮南子乃口于啓室啓音中天
子筮獵華澤華音音其卦遇訟訟音下逢公占之
曰訟之絲絲音音藪澤蒼蒼其中口宜其正
公戎事則從不曲執則戎事樂也祭祀則惠

畋獵則獲口飲逢公酒賜之駿馬十六締紆
三十箇締音音逢公再拜稽首賜筮史狐口有
陰雨夢神有事祭也是謂重陰紀因也天子乃
休日中大寒北風雨雪有凍人天子作詩三
章以哀民哀音也曰我徂黃竹口員閔寒帝收
九行行音也左傳曰九行九域之道嗟我公侯百
辟冢卿卿音家皇我萬民皇音正旦夕勿忘念
也我徂黃竹口員閔寒帝收九行嗟我公侯
百辟冢卿皇我萬民旦夕勿窮今無有較者
駘駘音鳥名駘駘其飛言得嗟我公侯口勿
則則音自侯以下似音云辟冢居樂甚寡言
一居不如遷土居音無禮樂其民化其人也
天子曰余一人則淫淫音無不皇萬民口登乃
宿于黃竹天子夢羿射于塗山羿音有窮祭
公占之疏口之口乃宿于曲山壬申天子西
升于曲山口天子西征升九阿疑今西安縣
南宿于丹黃戊寅天子西升于陽口過于靈
口井公博穆王姓及軒從井公博乃駕底以
遊于山上為之石主而口寘軫軾音也今
中軾音也乃次于涇水之陽今之涇水

河北縣音 項縣之縣 吉日丁亥天子入于南鄭

穆天子傳卷之五

九

穆天子傳卷之六

晉 郭 璞 注

古文

之虛皇帝之閭乃口先王九觀以詔後世此是登名山有所勸勉封建已已天子口征舍也殘缺字多不可推考耳

于蒞臺辛未紐蒞之獸管子曰蒞菜之壤今為蒞於是白鹿一牯蔡逸出走觸也或曰出所駕鹿也天子乘渠黃之乘口焉說遠得鹿之狀天子丘之號方言耳是曰五鹿官人之

口是丘口其皮是曰口皮口其脯是曰口脯

天子飲于漂水之上漂水今涇陰官人膳鹿

獻之天子天子美之是曰甘鹿以此名以上皆因用起之也今元城縣東有五鹿癸酉天子

南祭白鹿于漂口乃西飲于草中草野之大奏

廣樂大謂盛是曰樂人紀之以甲戌天子西北

口姬姓也盛栢之子也盛國名殿上說姬事也者為栢之盛天子賜之上姬之長今盛栢

是曰重璧之臺古臺狀如臺壁戊寅天子東徂于澤

中逢寒疾言盛姬在此天子舍于澤中盛姬

告病天子憐之口澤曰寒氏澤以名盛姬求飲

天子命人取漿而給得之速也傳是曰壹輜

告病口天子哀之上說盛姬死也是曰哀次哭泣

次天子乃殯盛姬于穀丘之廟先王之廟有

亦所至士寅天子命哭今尋臣啓為主為之

即下伊也上祭父賓喪禮儀天子王女

叔姓為主叔姓穆王之天子口賓之命終哀

禮終喪於是殯祀而哭殯年小也內史

執策內史主冊命者官人口丁職曾祝敷

筵席設几敷猶鋪也周禮盛饋具其具肺鹽

羹肉也當行臠肺臠醢也醢肉也魚腊

乾糗寒餽也莊莊百物有也乃陳腥俎十二乾

豆九十鼎敦壹尊四十敦似器也曾祝

祭食禮雖有祭皆祭進肺臠祭酒中以肺換

見少牢饋食也乃獻喪主伊扈伊扈拜受

口祭女又獻女主叔姓叔姓拜受祭口祝報

祭觴大師官樂乃哭即位就夜畢哭內史口策

而哭策上宜作讀既夕禮曰曾祝捧饋而哭

持也御者口祈而哭御者入浴抗者觴

夕而哭抗猶舉也禮記曰佐者承斗而哭佐者承斗而哭抗猶舉也禮記曰佐者承斗而哭陳琴瑟口琴琴瑟亦等為籥三孔籥所吹者而哭百口衆官人各口其職事以哭百族也曰士女錯踊九口乃終哭則三所謂成踊者也宮主伊扈哭出造舍僮父兄宗姓及在位者從之佐者哭者也且徹饋及壺鼎俎豆皆佐者衆官人各口其職皆哭而哭井利口事後出而收井利所以得後物收飲之也或曰井利祭器後出不及輩故收縛之癸卯大哭殯祀而載載也祖甲辰天子南葬盛姬於樂池之南也天子乃命盛姬口之聖視皇后之葬法視也亦不邦後于諸侯疑字錯誤河濟之間共事供給韋穀黃城三邦之士輦輦謂輓轎之舉示祭後七萃之士抗者即車舉柩以曾祝先聖導大匠御棺禮記曰諸侯御柩以聖也禮記曰諸侯御柩以日月之旗七星之文言旗上畫星也禮記曰日月鼓鐘以葬龍旗以口鳥以建鼓獸以建鍾龍以建旗曰聖之先後及哭踊者之間畢有鍾旗口百物聖器井利典之列

于聖行靡有不備行擊鼓以行聖舉旗以勸之令盡擊鐘以止哭彌旗以節之為節音也曰口祀大哭九而終聖出于門喪主即位就哭周室父兄子孫倍之倍信列諸侯宗屬王吏倍之外官王屬七萃之士倍之外所主在姬姓子弟倍之族屬也執職之人倍之執職猶百官衆人倍之哭者七倍之重列七踊者三十行行萃百人信萃聚也一女主即位嬖人羣女倍之嬖人王所王臣姬姓之女倍之與同姓之女為大夫官官人倍之內官官為宮賢庶妻倍之庶妻也哭者五倍踊者父從相從曰天子命喪一里而擊鐘止哭曰臣人哭于車上御柩不曾祝哭于聖前七萃之士哭于喪所曰小哭錯踊三踊而行五里而次止也曰喪三舍至于哀次五舍至于重壁之臺傳三十里為舍也乃休休也天子乃周姑縣之水以園喪車縣音通園音員也是曰園卓水曰殯祀之於此孟冬辛亥邢侯曹侯來弔曹國今海陰內史將之以見天子天子告不豫而辭焉不豫辭病也為邢侯曹侯乃即太

子太子哭出廟門以迎邢侯不進再拜勞之侯不答拜太子抗禮邢侯謁哭于廟謂也太子先哭而入西向即位內史實侯實侯向而立大哭九邢侯盾踊三而止與太子子送邢侯至廟門之外邢侯遂出太子再拜送之曹侯廟弔入哭太子送之亦如邢侯之禮禮而禮同太子具官見邢侯曹侯真官見天子還返將邢侯曹侯執見拜天子之武一義所天子見之乃遣邢侯曹侯歸于其邦王官執禮共于二侯如故言不以曰天子出憲以或以禘贈此以上以說贈癸丑大哭而口甲寅殯祀大哭而行喪五舍于大次曰喪三日于大次日也三殯祀如初辛酉大成百物皆備送葬之壬戌葬史錄絲鼓鐘以亦下棺棺七萃之士口士女錯踊九口聖下上謂昧爽天子使嬖人幸者贈用文錦明衣九頌謂之明衣聖宗伊扈贈用變裳宗亦主變女主叔姓贈用茵組茵組百嬖人官師畢贈有禮記曰官師一廟井利乃藏藏之於報哭于大次報祭也祥祠口祝聖罷哭

辭于遠人

辭歸為盛姬謚曰哀淑人

天子丘人

為立是曰淑人之丘乙丑天子東

征舍于五鹿

叔姓思哭是曰女姓之丘

因以名

五鹿也丁卯天子東征釣于深水以祭淑人

是曰祭丘

已巳天子東征食馬于深水之上

乃鼓之

棘是曰馬主

于蒞臺

仲冬甲戌天子西征至於因氏

子乃釣于河

以觀姑繇之木

乃致父兄

子第王臣姬口祥祠畢哭

之

終寧于麗氏

河

麗氏之遂庚辰舍于茅尺

宅始樂

素服而歸

南

癸未至於野王

北

之陞

子永念

傷心乃思淑人盛姬於是流涕七萃

之士

萑豫上諫于天子曰自古有死有生豈

獨淑人

天子不樂出於永思永思有益莫忘

其新

言是日輟已未乙酉天子西絕鉞陞

言

是日輟已未乙酉天子西絕鉞陞

言

是日輟已未乙酉天子西絕鉞陞

言

是日輟已未乙酉天子西絕鉞陞

井

之坂一云發已遊于乃遂西南戊子至于

鹽

東縣池今在河已丑天子南登于薄山賓

幹

之陞

庚申

天子南征吉日辛卯天子入于南鄭

穆

天子傳卷之六

漢武帝內傳

海四

孝武皇帝好長生之術常祭名山大澤以求

神仙元封元年甲子祭嵩山起神宮帝齋七

日祠訖迺還至四月戊辰帝夜間居承華殿

東方朔董仲舒侍忽見一女子着青衣美麗

非常帝愕然問之女對曰我壻宮玉女王子

登也向為王母所使從昆崙山來

曰聞子輕四海之尊尋道求生降帝王之位

而屢禱山嶽勤哉有似可教者也從今日日

清齋不閑人事也至七月七日王母暫來

也帝下席跪諾言訖女忽然不知所在帝問

東方朔此何人朔曰是西王母紫蘭室玉女

常傳使命往來樽桑出入靈州交關常陽傳

言玄都阿母昔以出配壯燭仙人近又召還

使領命錄真靈官也帝於是登延靈之臺盛

齊存道其四方之事權委於冢宰焉至七月

七日迺脩除宮掖之內設座殿上以紫羅薦

地燭百和之香張雲錦之帳然九光之燈設

玉門之棗蒲桃之酒躬監肴物為天官之饌

帝迺盛服立于陛下敕端門之內不得妄有

窺者內外寂謐靜肅也以俟雲駕至二唱之後

更即也忽天西南如白雲起鬱然直來遙趨宮

庭間雲中有簫鼓之聲人馬之響復半食頃

王母至也縣投殿前有似鳥集或駕龍虎或

乘音獅子或御白虎或騎白麋音或控白鶴

或藥科車羣仙數萬光耀庭宇既至從官不

復所在唯見王母乘紫雲之輦駕九色斑龍

別有五十天仙側近驚與皆身長一丈同執

絲毛之節金剛靈重帶天策威住殿前王母

唯扶二侍女上殿侍女年可十六七服青綾

之鞋古考切裙也上服容眸流盼莫見切表視神姿

清發真美人也王母上殿東向坐着黃錦綺

褥上夾下屬無文米鮮明光儀淑穆帶靈飛

大綬腰分頭之劍頭上大華結下髻戴太真

晨嬰之冠履玄璫鳳文之舄眎之可年卅許

脩短得中天姿音蒼靄雲顏絕世真靈人也下

車登牀帝拜跪問寒溫畢立如也因呼帝共

坐帝南面向王母母自設膳膳精非常豐珍

之肴芳華百果紫芝華盛貌紛若填音標

田下清香之酒非地上所有甘氣殊絕帝不

能名也又命侍女索桃須臾以饜盛桃七枚

大如鴨子形色青以呈王母母以四枚與帝

自食三桃桃之甘美口有盈味帝食輒錄錄核

也錄也母曰何謂帝曰欲種之耳母曰此桃三

千歲一生實耳中夏地薄種之不生如何帝

乃止於坐上酒觴數過王母乃命侍女王子

登彈八琅之璈又命侍女董雙成吹雲絳之

笙又命侍女石公子擊昆庭之鐘又命侍女

許飛瓊鼓震靈之簧侍女阮靈華拊五靈之

石音鳴音珠音之類也侍女范成君擊洞庭之磬侍

女段安香作九天之鈞於是衆聲激朗靈音

駭空又命侍女安法嬰歌玄靈之曲其詞曰

大象雖寥廓我把天地戶披雲沉靈輿儵忽

適下土空洞成玄音至靈不容冶太真噓中

唱始知風塵苦願神三田中納精六闕下遂

乘萬龍音椿音馳騁音九野

二曲曰玄圃遏北臺五城煥差義啓彼無涯

津汎此織女河仰上升絳庭下遊月窟阿顧

眎八落外指招九雲遐忽已不覺勞豈寤少

與多撫璫命衆女詠發感中和妙暢自然樂

為此玄雲歌韶盡至韻存真音辭無邪

歌畢帝乃下地叩頭自陳曰微武帝自受質

不才沉淪流俗承禪先業遂羈世界政事多

闕兆民不和風雨失節五穀無實德澤不建

寇盜四海黔首勞斃戶口減半當非其主積

辜立山然少好道仰慕靈仙未能棄祿委榮

棲跡山林思絕塵餌罔知攸向且捨世尋真

鑽啓無師歲月見及恒慮奄忽不圖天顏頓

集今日下臣有幸得瞻上聖是臣宿命合得

度世願垂哀憐賜諸不悟得以奉承切已之

教王母曰女音後音同音能賤榮樂卑音馳音虛音味道自

復佳耳然女情恣體慾淫亂過甚殺伐非法

奢侈其性恣則裂身之車淫為破年之斧殺

則響對奢則心爛慾則神隕聚穢命斷以子

義音爾音之身而宅滅形之殘盈尺之材改

以百仞之害欲此解脫三尸全身永久難可

得也有似無翅之鷲願鼓翼天池朝生之蟲

而樂春秋者哉若能蕩此衆亂撥穢易韻保

神悉於絳府閉淫宮而開悟靜奢侈於寂室

愛衆生而不危守茲道戒思乎靈味務施惠

和練惜精氣棄却浮麗今百競速游女行若斯之事將豈無彷彿也如其不爾無為抱石而濟長津矣帝跪受聖戒請事斯語養身之要既聞之矣然體非玉石而無主於恒烝非四時而常生於內政當率御出入呼吸中適和液得循形神靡銷烝既隨宜則竟不滯若使理合其分烝甄居延切其適則形可不枯宅可不廢昔受道書具以施業之矣遂不獲真驗未為巨益使精神疲於往來津液勞於出入歲減其始月虧其昔形亦漸凋神亦廢落是微不得所奉於口訣開閣塞於明堂爾不審服御可以永久者吐納可以延年者乞賜長生之術暫悟於行尸之身若蒙聖詔於即日臣伏聽麗天之教矣王母曰昔先師元始天王時及閭居登於萊霄之臺侍者天皇搏桑大帝君及九真諸王十方衆神仙官爰延弟子丹房之內說玄微之言因問我何為而欲索長存矣吾因避席叩頭請問長生之術天王登見遺以要言辭深旨幽實天人之玄觀上帝之奇秘女今日願聞之乎帝跪

曰微小醜賤生枯骨之餘敢以不肖之軀而慕龍鳳之年欲以朝花之質希晦朔之期雖樂遠流莫知以濟塗路堅塞所要無寄常恐一旦死於鎖仰之難取笑於世俗之夫豈圖今日遭遇尤會一覩聖姿而精神飛揚恍惚大夢如以涉世千年救護死歸之日乞願垂哀誥賜微元元王母曰將告女要言我曾聞天王曰夫欲長生者宜先取諸身但堅守三一保爾族金璣夾草廣山黃木昌城玉葉夜山火玉連及鳳林鳴酢酢音酒西瑤瓊酒中華紫雲北陵綠阜太上之藥風實雲子玉津金漿月精萬壽碧海琅萊蓬萊文醜濁河七榮動山高柳北采玄都之綺華仰漱雲山之朱蜜夜河天骨昆吾漆沫空洞靈瓜四劫一實宜陵麟膳炎山夜日東撥扶桑之丹椹俯探長河之文藻素虬童子九色鳳腦太真虹莖音莖天漢巨草南宮大碧西鄉扶老三梁龍華生子大道有得食之後天而老此太上之所服非中仙之所保其次藥有八光太和斑龍黑胎文虎白沫出于西丘七玄飛節九孔連

珠雲漿玉酒玄圃瓊腰鍾山白膠王屋青敷閼風石髓黑河珊瑚蒙山白鳳之肺靈丘蒼鸞之血東萊朱萊九節交結太微嘉禾瓊華腦實流淵鯨眼赤河絳壁北汲太玄之酪中握二儀之脉雲瀆萊父昆丘神雀廣夜莖草流淵青狄真陵雷精玄都平蓋左食神元右閼玄瀨上屈蘭圓之金精下摘圓丘之紫柰鸞水靈蛤八陵赤薤萬載一生流光九隊有得食之後天而逝此天帝之所服下仙之所逮其次藥有九丹金液紫華紅英太清九轉五雲之漿玄霜絳雪騰躍三黃東瀛白香炎洲飛生八石十莖威儀九光西流石膽東滄青錢高丘餘糧精石瓊田太虛還丹盛次金蘭長光綠草雲童飛千子得服之白日升天此飛仙之所服地仙之所見也其下藥有松栢之膏山薑沈精芻草澤瀉枸杞茯苓菖蒲門冬巨勝黃菁雲飛赤版桃膠朱英椒麻續斷萎蕤黃連如此下藥略舉其端草類繁多名有數千子得服之可以延年雖不長享無期上升青天亦能身生光澤還髮童顏役使

羣鬼得為地仙要且錄此有階漸尋遠勝也是以天官遠妙靈藥別品靈無奇挺真仙有域今不可謂呼吸六炁安在一身灌漑三官近出阿庭淺薄其術棄而不為其大慧者也夫呼吸御精保明神炁足以精不脫則永久炁長存則不死既得其和其壽不已又復不用藥物之煩費管索之劬勞者也百姓日用故上品謂之自然者矣但不得游乎十天飛我八外自得縱身於四域之內亦駐策衆靈焉夫始欲脩之先營其炁太上真經所謂行益易之道益者益精易者易形能益能易名上仙籍不益不易不離死厄行益易者謂常思靈寶也靈者神也實者精也子但受精握固閉炁吞液炁化血血化精精化液液化骨行之不倦精神充溢為之一年易炁二年易血三年易脉四年易炁時五年易髓六年易筋七年易骨八年易髮九年易形變化易形變化則道成道成則位為仙人吐納六炁口中甘香欲食靈芝存得其味微息抱吞從心所適炁者水也無所不成至柔之物通致神

精矣此元始天王丹房之中微言所說今敕侍女王女李慶孫書出以相付子善錄而循焉於是王母言粗畢肅命靈官使駕龍嚴車欲去帝叩頭請留殷勤王母廼止王母廼遣侍女郭密香與上元夫人相問云王九光母敬謝但不相見四千餘年天事勞我致以愆面劉徹好通適來視之微了了似可成進然形慢神穢腦血淫漏五藏不淳關胃彭勃骨無津液浮反外內炁多精少瞳子不夷三尸拔亂玄白失時語之至道殆恐非仙才吾久在人間實謂臭濁然時復可游望以寫細念庸主對坐悒悒不樂夫人肯暫來否若能屈駕當停相須帝不知上元夫人何神人也又見侍女下殿仍失所在須臾郭侍女返上元夫人又遣侍女答相問云阿環再拜上問起居遠隔絳河擾以官事遂替顏色近五十年仰應光潤係係無違密香至奉信承降尊於劉徹處聞命之際登當顛倒先被大帝君勅使詣玄洲校定天元正爾暫往如是當還還便束帶須臾少留帝因問上元夫人由王母

曰是三天上元之官統領十方王女之名錄者也當二時許上元夫人至來時亦聞雲中簫鼓之聲既至從官文武千餘人皆女子年同十八九許形容明逸多服青衣光彩耀日真靈官也夫人可廿餘天姿清輝靈眸絕朗着赤霜之袍雲彩亂色非錦非繡不可名字頭作三角髻餘髮散垂之至腰戴九靈夜光之冠帶六出火玉之珮垂鳳文琳華之綬腰流黃揮精之劍上殿向王母拜王母坐而止之呼同坐北向夫人設廚廚之精珍與王母所設者相似王母勅帝曰此真元之母尊貴之神女當起拜帝問寒溫還坐夫人笑曰五濁之人耽酒榮利嗜味淫色固其常也且徹以天子之貴其亂目者倍於常人焉而復於華麗之墟振振根願無為之事良有志也王母曰所謂有心哉上元夫人謂帝曰女好道乎聞數招方士祭山嶽祠靈神禱河川亦為勤矣而不獲者寔有由也女胎性暴胎性奢胎性淫胎性酷胎性賊五者恒含於榮衛之中五藏之內雖鋒銑良針固難愈矣暴則使炁

奔而神攻是故神擾而炁竭淫則使精漏而魂疲是故精竭而魂銷奢則使真離而魂穢是故本游而靈寘酷則使喪仁而自攻是故失仁而服亂賊則使心闕而口乾是故內戰而外絕五者皆是截身之刀鋸剝命之斧鉞雖復疲好於長生而不能遺茲五難亦何為損性而自勞乎然猶是得此小益以自知往爾若從今已捨爾五性反諸柔善明務察下慈務矜慈惠務濟窮賑務施勞念務存孤惜務及身恒為陰德救濟死厄巨久孜孜不泄精液於是閉諸淫養爾神放諸奢從至儉勤齋戒節飲食絕五穀去是腥鳴天鼓飲玉漿蕩華池叩金梁按而行之當有異爾今阿母迂天尊之重下降於蟪蛄之窟霄虛之靈而詣孤鳥之姐且阿母至戒妙唱玄發驗其敬勗節度明脩所奉比及百年阿母必能致女於玄都之墟迎女於昆闕之中位以仙官游邁十方吾言之畢矣子厲之哉若不能爾無所言矣帝下席跪謝曰臣受性兇頑生長亂濁面牆不啓無由開達然貪生畏死奉靈敬

神今日受教此過天也輒載聖令以為身範是小醜之臣當獲生活唯垂哀護願賜元元夫人使帝還坐王母謂夫人曰卿之戒言言甚急切更使未解之人畏於至意夫人曰若其志道將以身投餓虎志軀破滅蹈火履水固於一志必無憂也若其無忠志則心疑真信嫌惑之徒勿畏急急言之發欲成其志耳阿母既有念必當賜以尸解之方耳王母曰此子勤心已久而不遇良師遂欲毀其正志當疑天下必無仙人是故發我閭宮暫舍塵濁既欲堅其仙志又欲令向化不惑也今日相見令人念之至於尸解下方吾甚不惜復三年吾必欲賜以成丹半劑石象散一具與之則徹不得復停當今匈奴未彌邊陲有事何必令其倉卒捨天下之尊而便入林岫也但當問篤向之至必卒何如如其回改吾方數來王母因撫帝背曰女用上元夫人至言必得長生可不勗勉帝跪曰徹書之金簡以身模之焉帝又見王母巾笈中有卷子小書盛以紫錦之囊帝問此書是仙靈之方邪

不審其目可得瞻矚王母出以示之曰此五嶽真形圖也昨青城諸仙就我求請當過以付之迺三天太上所出文祕禁極重豈女穢質所宜佩乎今且與汝靈先生經可以通神勸志也帝下地叩頭固請不已王母曰昔上皇清虛元年三天太上道君下觀六合瞻河海之短長察五嶽之高卑名立天柱安于地理植五嶽而擬諸鎮輔貴昆靈以舍靈仙遵蓬立以館真人安水神乎極陰之源栖太帝乎搏桑之墟於是方丈之阜為理命之室滄浪海島養九老之堂祖瀛玄炎長元流生鳳麟聚窟各為洲名並在滄流大海玄津之中水則碧黑俱流波則振蕩羣精諸仙玉女聚於滄溟其名難測其實分明迺因山源之規矩睹河嶽之盤曲陵回阜轉山高壠長周旋委蛇形似書字是故因象制名定實之號畫形秘於玄臺而出為靈寘之信諸仙佩之皆如傳章道士執之經行山川百神羣靈尊奉親迎女雖不正然數訪山澤叩求之志不忘于道欣子有心今以相與當深奉慎如事君

父泄示凡夫必致禍考也上元夫人語帝曰阿母今以瓊笈妙蘊發紫臺之文賜女八會之書五嶽真形可謂至珍且貴上帝之玄觀矣子自非受命合神弗見此文今雖得其真形觀其妙理而無五帝六甲左右靈飛之符太陰六丁通真遁虛玉女之籙太陽六戊招神天光策精之書左乙混沌東蒙之文右庚素收攝殺之律壬癸六遁隱地八術丙丁入火九赤班符六辛入金致黃水月華之法六已石精金光藏影化形之方子午卯酉八稟十決六靈威儀丑辰未戌地真素訣長生紫書三五順行寅申己亥紫度炎光內視中方凡闕此十二事者何以召山靈朝地神總攝萬精驅策百鬼來虎豹役蛟龍乎子所謂適知其一未見其他也帝下席叩頭曰徹下土濁民不識清真今日聞道是生命會遇聖母今當賜與真形脩以度世夫人今告徹應須五帝六甲六丁六戊致靈之術既蒙啓發弘益無量唯願告誨濟臣飢渴得使已枯之木蒙靈陽之潤焦炎之草幸甘雨之溉不敢多

陳願賜指授上元夫人曰我無此文也昔曾扶廣山見青真小童有此金書祕字云求道益命千端萬緒皆須五帝六甲靈飛之術六丁六壬名字之號得以請命延筭長生久視驅策衆靈役使百神者也其無六甲要事唯守真形者於通靈之來必無階矣女有心可念故相告篇目耳幸復廣加搜訪焉帝固請不已叩頭流血上元夫人曰吾無此文所以相示十二事者欲令女廣尋博求以參真形之用耳王母迺告上元夫人曰夫真形寶文靈官所貴此子守求不已誓以必得故虧科禁特以與之然五帝六甲通真招神此術眇邈必當須精潔至誠殆非流濁所宜施行吾今既賜徹以真形夫人今當授以致靈之途矣吾嘗憶昔日與夫人共登玄壑翔野及曜真之山脉王子童王子立迺就吾請求太上隱書吾以三元祕言不可傳泄於中仙夫人時亦有言見守助子童之言志矣吾既難違來意不獨執惜至於今日之事有以相似後造朱大丹陵食靈瓜其味甚好憶此未久而

已七十歲矣夫人既已告徹篇目十二事畢必當匠而成之何緣令人主啓願請乞叩頭流血邪上元夫人曰阿環不苟惜向不持來耳此是太虛寧文真人赤童所出傳之既自有男女之限禁又宜授得道者恐徹下才未應用此爾王母色不平迺曰若天禁漏泄犯違明科傳必其人授必知真者何緣夫人向下才而說靈飛之篇目乎妄言則漏妄說則泄說而不傳是謂街天道此禁豈輕於傳也別勅三官司直推夫人之輕泄也吾之五嶽真形文迺太上天皇所出其文寶妙而爲天仙之信豈復應下授之於劉徹也邪直以孜孜之心數請川嶽勤脩齋戒以求神仙之應志在度世不遭明師故吾等有以下賄之耳至於教仙之術不復限惜而弗傳夫人但有致靈真之事足以卻不信之狂夫耳吾意在此矣然此子性氣淫暴服精不純何能得成真仙浮空參差十方半勤而行之適足以不死耳明科所云非長生難也聞道難非聞道難也行之難非行之難也終之難良匠能與

人規矩不能使人必巧明師能授人妙術不能使人必爲何足其隱之也夫人不常憶問爲長桑公子請吾求八光揮疾藥玉樹方子上元夫人有慙色跪謝曰阿環昔初學道於廣都之丘建木丹誠術數未成之時倒景君無常先生此二人蓋太清玄和天之靈官也見授六甲左右靈飛方十二事初授之日二君告阿環曰初學道者聽四十年一傳得道者四百年一傳得仙者四千年一傳得真者四萬年一傳得昇太上者四十萬年一傳女受傳女男受傳男太上科禁已表於昭生之符矣阿環受書已來凡傳六十八女子賢大女郎抱蘭即阿環之弟子也阿環所授者固不可以授男也伏見扶廣山青真小童往授太微中元君五帝六甲靈飛遁虛天光左右策精等方凡十二事與阿環所受者同文一無異也青真男官也未開復有所授此子先是阿環學入火弟子今正勅取以授微也先所以告微篇目者意是慙其有心將欲堅其專氣今且廣求他日與之亦欲以男授男承

科而行既勤而獲令知天真之珍貴非徒苟執術泄天道矣本情如此阿環主臣願不昇焉阿母真形之妙靈人傳信天仙寶貴封之金臺佩入紫微迺經行而前衛門大虎却伏抱關出過太清則振身瑤房左邀滄海長揖東蒙右接常陽下盼版桐汎彼八海則乘蚪從龍游此名山則衆真奉迎動有雲輪羽蓋靜可長存永安至術洪矣初不傳地官阿母今迺授於淫濁之尸賜於枯骨之身可謂太不宜矣况阿環有六甲下術唯驅策百靈致日月之華精藏匿形影化生萬物出入水火唾叱杳冥徹視反聽收束千精乘虎豹以驅馳采月華以長生隱淪八地回倒辰星久視輕身與天相傾耳安得及太上之靈書八會之奇文乎用之眇邈可以游景靈之宮紛紛颼颼登流霞之堂臣五嶽之主挹藥醴之觴駕九龍以虛騰落紫鴻而玄翔邪王母笑曰先失自可恕手上元夫人即命侍女紀離容偃到扶廣山勅青真小童出六甲左右靈飛致神之方十二事來以授微也須臾侍女還

奉八色玉笈鳳文之蘊玄光明曜真華煒煥云青真小童問訊弟子阿昌言向奉詣絳河攝南真七元君檢校羣龍猛獸之數事畢過門受教承阿母相邀詣劉微家不意天靈至尊迺復下降於臭濁中也不審起居如何侍女紀離容至云尊欲得金書祕字六甲靈飛左右策精之文十二事輒封一通付微雖有心求慕實非仙才詎宜以此術傳泄於行尸乎阿昌近在帝處見有上言者甚衆云山鬼哭於叢林孤魂號於絕域興師旅而族有功忘賞勞而刑士卒縱橫白骨奢擾黔首淫酷自恣罪已彰於太上然已見於天氣驚言互聞必不得度世也真尊見勅不敢違耳王母笑曰言此子者誠多愆帝亦不必推也夫好道慕仙者精誠志念齋戒思愆輒除過一月剋已反善恭敬真神存真守一行此一月輒除過一年徹念道累年齊亦勤積屢禱名山真靈願求度脫校計功過殆以相掩但自今已去勤脩至誠奉上元夫人之言不宜復奢淫暴虐使萬兆勞殘怨鬼窮鬼有破拙之訴

流血之尸忘功賞之辭耳於是上元夫人離席起立手執八色玉笈鳳文之藎仰天向帝而祝曰

九天浩洞太上曜靈神照玄寂清虛朗明登虛者妙守氣者生至念道臻寂感真誠役神

十六

形辱安精年榮授微靈飛及此六丁左右招神天光策精可以步虛可以隱形長生久視還白留青我傳有四萬之紀授微傳在四十之齡違犯泄漏必沉於幽冥必慎其禍敢告

劉生爾師主是青童小君太上中黃道君之師真元始天王入室弟子也姓延陵名陽字

底華形有嬰孩之貌故仙官以青真小童之號其爲器也環朗洞照聖周萬變玄鏡幽鑒才爲真僞游于扶廣權此始運宮館玄圃治仙職分子存師君從爾所願不存所授命必傾墮上元夫人祝畢乃一一手指所施用節

度示帝

第一篇有五帝六甲左右靈飛之符

第二篇有六丁通真遁虛玉女之籙

第三篇有太陽六戊招神天光策精之書

第四篇有左乙混沌東蒙之文

第五篇有右庚素收攝殺之律

第六篇有壬癸六遁隱地八術之方

第七篇有丙丁入火九赤班文之符

第八篇有六辛入金致黃水月華之法

十七

第九篇有六已石精金光藏影化形之方

第十篇有子午卯酉八稟十訣六靈威儀

第十一篇有辰戌丑未地真曲素之訣長生

紫書三五順行

第十二篇有寅申巳亥紫度炎光內視中方

凡十二事都畢因復告帝曰夫五帝者方面之天精六甲六位之通靈太陰有潛空之妙遁靈復機之神秋舍春挺千真之生動則寂應成波靜則川陵緬平所以毫末不移浩嶽可傾赫哉太陽之招神策萬靈而驅馳六戊

飛而神暢天光因景以揚暉西鄉激電而辟

殛東桑空震以成雷蓋陽靈之日丙赫實九

天之元威左乙混沌萬物始通陽微其升蒼

暉應龍輕雲揚景飈胎潛風神眇集於有宅

真感應而必鍾萬春迴始是爲東蒙右庚素

秋歛散聚悉攝萬神而我役白虎動以彭勃

少女起而通真延九天之眇視金精地雷來

爲身衛誠彼邪惡故稱攝殺之律壬癸六遁

沉淪無根藏蔽萬鋒移行丘山隱地匿影崩

流塞川八術六奇萬勝常全佩我六遁久視

長存丙丁入火凌煙雲漢九赤龍書醫衛朗

煥爾用班符致千靈以朝謁迺由丙神迴丹

火以衝散炎光上術妙乎異觀六辛入金飛

害銷磨致日精得陽光之珠求月兔獲黃水

之華能致八石之靈菌能引扶桑之丹霞酣

雲漿於丹庭騰碧川於玄河其用少矣有益

蓋多佩此六辛必造我家六已石精金液流

光變化萬端千載孰當佩我六已易形游行

長生畢天無復始終元哉已書甚要難衡子

午卯酉大神四界方面峙鎮八稟十訣降靈

十八

之來必由齋祭萬事取成於精慎千神求通

於此術知我名字天人可致丑辰未戌地真

之符游行五嶽當用紫書曲素訣辭可以凌

虛三五順行與靈同車寅申巳亥可禮飛灾

紫度炎光內視反聽神辭通達六甲救攝地

司游天踐地與真不疑夫此十二事者上帝封於玄景之臺子其秘慎之焉王母曰此皆太靈羣文並三天太上所撰或三皇天真所造校定或九天父母真人赤童所出此輩書符藏之於紫陵之臺隱以靈壇之房封以華琳之函縕以蘭簡之帛約以北羅之素印以太帝之璽諸名真貴靈下遊山川看林岫以眇視察有心之學夫或告之以道德或傳之以天符諸學道未成者受此書文聽四十年授一人如無其人八十年可頓授二人得道者四百年授一人無其人八百年併授二人得仙者四千年授一人如無其人八千年可頓授二人得真者四萬年授一人如無其人八萬年頓授二人昇太上者四十萬年授一人傳非其人是為泄天道可授而不傳是為閉天寶不計限而妄授者是為輕天老受而不敬是為慢天藻泄閉輕慢四者取死之刀斧延禍之車乘也泄之者身死道路受土形而骸裂閉則目盲耳聾於來生命凋枉而卒沒輕則鍾禍於父母詣玄都而考罰慢則暴

終而墮惡道生靈疾於後世復有念茲罪者則宗斷而族滅同道謂之天親同心謂之地愛為道者當相親授共均榮辱皆守真一珍惜精液養和氣氣全神歸必齊靈會如其不爾天降爾禍此皆道之科禁今故相誠不可不慎然此法宜傳但當以年限齊之爾若便有其人不必須限訖而授之也汝欲授五嶽真形者董仲舒似其人也欲行六甲靈飛左右之符者可傳李少君此二人得道者也王母又命侍女宋靈賓更取一圖與帝靈賓探懷中得一卷盛以雲錦之囊形書精明俱如向中器中者王母起立手以付帝又祝曰天高地卑五嶽鎮形元津激滌滄澤玄精天回九道六和長平太上八會飛天之成真僊節信由茲通靈泄墜滅腐實歸長生徹其慎之敢告劉生祝畢授帝帝拜稽首王母曰夫始學道符者宜別祭五嶽諸仙真靈潔齋而佩之今亦以六甲雜事須用節度相與可明依案之也若女遂剋明正身反惡修善復三年七月更來告女要道也須臾殿南朱雀窻

中忽有一人來窺看仙官帝驚問何人王母曰女不識此人邪是女侍郎東方朔是我鄰家小兒也性多滑稽曾三來偷此桃此子昔為太上使令到方丈助三天司命收錄仙家朔到方丈但務山水游戲了不共營和氣擅弄雷電激波揚風風雨失時陰陽錯迕致今蛟鯨陸行山崩境壞海水暴竭黃鳥宿淵妨農芸田沉湎王酒失節御之和虧奉命之科於是九源丈人題言之於太上太上遂請片使在人間去太清之朝令處是濁之鄉近金華山二仙人及九疑君比為陳乞以行原之於是帝延知朔非世俗之徒也時酒酣周宴言請粗畢上元夫人自彈雲林之璫鳴絃駭調清音靈朗玄風四發超歌步玄之曲辭曰昔涉玄真道 騰步登太霞 負笈造天關 借問太上家 忽過紫微垣 真人列如麻 綠景清飈起 雲蓋映朱葩 蘭宮敞琳闕 碧空啓瑤沙 丹臺結空構 暉暉生光華 飛鳳蹁躑峙 燭龍倚委蛇 玉胎來絳莖 九色紛相挈 挹景練仙骸 萬劫方童牙

誰言壽有終 扶桑不為查

王母又命侍女田四飛答歌曰

晨登太霞宮 挹此八玉蘭 夕入玄元闕

采藥擷琅玕 濯足匏瓜河 織女立津盤

吐納挹景雲 味之當一餐 紫微何濟濟

璚輪復朱丹 朝發汗漫府 暮宿句陳垣

去去道不同 且各體所安 二儀設猶存

奚疑億萬椿 莫與世人說 行尸言此難

歌畢因告武帝仙官從者姓名及冠帶執佩

物名所以得知而紀焉至明旦王母別去上

元夫人謂帝曰夫李少君者專念精進理妙

微審必得道矣其似未有六甲靈飛之文女

當可以示之帝曰諾於是夫人與王母同乘

而去臨發人馬龍虎威儀如初來時雲氣勃

蔚盡為香氣極望西南良久絕於是帝既

見王母及上元夫人延信天下有神仙之事

亦有欲去世計數矣而淫色恣性殺伐不休

兆人怨於勞役死者怨於無辜其年作甘泉

宮通天臺長安蜚廉館朝鮮王攻遼東都尉

延慕天下死罪擊朝鮮八月甘泉宮内生並

草九莖詔曰甘泉宮中產並九莖聯葉上帝

博臨不異下房賜朕弘休其大赦天下賜雲

陽都百戶牛酒作並房之歌至元封三年春

作角觥戲三百人至元封四年又行幸雍祠

五時至元封五年行內守至於盛唐祠虞舜

于九疑登瀛山天柱山春三月還至泰山增

封甲子祠高祖于明堂以配上帝因朝諸侯

王元封六年行幸回中作首山宮三月行幸

河東祠后土又先以元封二年七月七日西

王母上元夫人下降於武帝王母授帝五嶽

真形圖靈先生經上元夫人授六甲靈飛招

真十二事王母及上元夫人見帝之日多所

稱說或延年之訣致神靈之法或乘虛之數

步玄之術諸要妙辭帝延自撰為一卷及所

授真形經書六甲靈飛之事帝延盛以黃金

之箱封以白玉之函璚璠為軸紫錦為幃囊

安看栢梁臺上數自齋戒整衣服親詣朝拜

燒香盟漱然後執省之焉帝自受書已來出

入六年意者自暢高韻自許云以為神真見

降必當度世強悍氣力不脩至誠延興起臺

館勞弊百姓坑殺降卒遠征夷狄路盈愁嘆

流血皁城每事不從王母之深言上元夫人

之妙誠王母遂不復來也到太初元年十一

月乙丑天火燒栢梁臺於是真形圖者凡四

卷共函燒失王母嘗以武帝不能從訓故以

火災之耳但帝先承王母言以元封三年七

月齋戒以五嶽真形圖授董仲舒登受帝又

承上元夫人言以元封四年七月齋戒以五

帝六甲靈飛十二事授李少君登寫受此書

得傳行於世者先傳此二君以存矣帝既失

書悔不行德自知道喪其後東方朔一旦乘

雲龍飛去同時眾人見從西北上再仰望大

霧覆之不知所在帝愈懊惱其年禪蒿里祠

后土東臨渤海望祠蓬萊仰天自誓重要靈

應而終無感春還受計於甘泉二月起建章

宮夏五月正曆以正月為歲首色尚黃數用

五定官名協律呂此本王母意也至太初二

年三月行幸河東祠后土以太初三年正月

行幸東巡海上夏四月還脩封泰山以太初

四年起明光宮改號天漢元年正月行幸河

東祠后土至天漢二年春行幸東海還幸回
中三月行幸泰山脩封祠明堂至太始三年
五月行幸東海山稱萬歲冬賜行所道戶錢
五千餘緡寡孤獨者人帛一匹太始四年三
月行幸泰山祠西王母求靈應征和四年春
行幸東萊臨大海清齋祀王母上元夫人求
應亦不得還行幸泰山脩封庚寅祀于明堂
改號後元元年正月行幸甘泉宮郊泰時秋
七月地震湧泉二年春朝諸侯王於甘泉宮
賜宗室二月帝疾行幸盤屋五柞宮丁卯帝
崩入殯未央前殿三月葬茂陵山陵之夕帝
棺自動而有聲聞宮外如此數過又有芳香
之氣異常陵畢於是墳塋間大霧門壞霧經
一月許日帝塚中先有一玉箱一玉枕此二
物是帝所嘗用者忽出在世間人見其誌告
之有司有司詰辭買者乃商人也從關外來
詣郡市見一人於北車巷賣此二物責素三
十匹錢九萬即售之度實不知賣箱枕主名
昨來洛市因見誌此二物事實如辭有司以
聞二物簿入官遺商人勿問帝未崩時先詔

以雜書四十餘卷常所讀玩者使隨身歛於
棺內至延康二年河東功曹李友入上黨抱
橫山採藥於巖室中得所葬之書盛以金箱
書卷後題東觀臣姓名記書月日武帝時侍
臣有典書郎并登見書及箱流涕曰此是孝
武皇帝殯殮時物也臣時料以著棺中不知
何緣得出耳宣帝大愴然驚愕以書又付武
帝廟中其茂陵安完如故而書箱玉枕忽出
地外又物尚鮮盛無黧汚也見之者亦甚感
不能名之矣按九郁龍真經云得仙之下者
皆先死過太陰中練尸骸度地尸然後超得
尸解去耳按武帝箱枕雜書先並隨身入槨
超從無間忽然顯出貨枕於市書見山室自
非神變幽妙孰有如此者乎明武帝之死尚
未可知應運靈化又王莽篡位到地皇二年
莽使通祭漢家諸陵言符瑞之意使者到茂
陵聞地中大噫咤而長嘆者四使者悚怖以
聞莽莽曰武帝當恨吾祠祭之晚耳又特更
祭以太牢

所葬書目

老子經二卷
靈樞經六卷
天柱經九卷
馬皇受真術四卷
太上紫文十三卷
太素中胎經六卷
六龍步玄文七卷

漢武帝內傳終

漢武帝外傳

海五

武帝既聞王母至言說八方巨海之中有十洲並是人跡所不到處又始知東方朔非世俗常人是以前之曲室親問十洲所在所有之物名故帝書記之朔對云臣學仙者耳非得道之人以國家之盛黃將招儒墨於名教之內抑絕俗之道於虛誕之跡臣故輶隱遠而赴王庭藏養生而侍朱闕矣亦由尊上好道且復欲抑絕其威儀也曾隨師主復行北至朱陵扶桑蜃海冥夜之丘純陽之陵始青之下月宮之淵內遊七丘中旋十洲踐赤縣而遊五嶽行波澤而息名山臣自少及今周流六天所涉天光極於是耳未若虛之子飛真之官上下九天洞視百方北極鈞陳而并華蓋南翔太丹而棲大夏東之通陽之霞西薄寒穴之野日月所不逮星漢所不與其上無復物其下無復底下臣所識安及於是愧不足以酬廣訪矣

一女子在空館中姿貌殊絕兩手皆拳帝令開其手數摩之手莫能舒帝於是自披手即伸由是得幸號為拳夫人進為婕妤居鈞弋宮解素女之術大有寵有娠十四月乃產是為昭帝帝曰昔堯十四月而生今鈞弋亦然乃命其門曰堯母門後至甘泉因幸告帝曰妾相運正應為陛下生一男男年七歲妾當死今年必不得歸願陛下自愛言終遂卒既殯不覺香聞十餘里因葬之雲陵帝甚哀悼又疑其非常人乃發塚開視空棺無尸唯衣復存焉乃為起通靈臺於甘泉常有青鳥集臺上往來至宣帝時乃止

服氣不食帝聞而嘉其事欲受其道王不肯傳云無其事帝怒將誅淮南王王知之出令與羣臣因去不知所之國人皆云神仙或有見王者帝恐動人情乃令斬王家人首以安百姓名為淮南王收其方書亦頗得黃白之事然非其要法試之多不驗帝既感淮南之道乃徵四方有術之士自燕齊而出者數千人矣

齊人李少翁年二百歲色若童子作諸方術皆有驗帝甚信之拜為文成將軍以客禮之於甘泉宮中畫太一諸神像祀之少翁云先致太一然後可得昇天昇天然後可至蓬萊歲餘未驗帝漸厭倦少翁又使鬼神方皆驗唯祀太一積年無應帝性急峻甚感之而少翁愈驕矜帝怒誅之文成被誅後月餘使者籍貨從關東還達於滯亭謂使者曰為吾謝帝不能忍少日而敗大事乎帝好自愛後四十年求我於勞成山方共事不相怨也使者還具言之乃令發其棺視之無所見唯有竹筥一枚帝疑其弟子竊其尸而藏之乃收捕

驗問了無蹤跡帝大悔誅復徵諸方士更於甘泉祀太一又別設一座祀文成帝親執禮會東郡送一短人長五寸衣冠具足帝疑其山精帝令在案上召方朔朔至呼短人曰巨靈汝何忽叛來阿母還未短人不對因指謂帝曰王母種桃三千年一作子此兒不良已三過偷之失王母意故被謫來此帝大驚愈知朔非世上人也短人謂帝曰王母使臣來告陛下求道之法唯有清淨不宜躁擾後五年與帝會言終不見帝愈恨又召問方朔朔曰陛下自當知臣不得說終已無言帝以其神不敢逼也

齊人公孫卿謂所忠曰吾有師說祕書言鼎事欲因公奏之如得引見以玉羊一為壽所忠許之視其書而有疑謝曰寶鼎事已訣矣無所復言公孫卿乃因郡人平時奏之有札書言黃帝得寶鼎究侯問於鬼吏區對曰帝得寶鼎神華延年歲已酉朔旦冬至得天之紀終而復始於是帝迎日推算凡二十推百八十歲黃帝乃登仙于天今年得朔旦冬至

與黃帝時協臣昧死奏武帝大悅召卿問卿對曰臣受此書於申公已死尸解去帝曰申公何人卿曰齊人安期先生同受黃帝言有此鼎書申公常告臣言漢之聖者在高祖之曾孫焉寶鼎出而與神通封禪得上泰山唯

有黃帝漢主當上封封則能登天矣黃帝且與百鬼戰且學仙百餘歲乃得與神通黃帝郊雍祠上帝宿齋三月鬼區尸解而去因葬雍雍今大鴻塚是其後黃帝接萬靈於明庭甘泉是也昇仙寒門谷口是也黃帝採首山銅鑄鼎於荆山鼎既成有龍垂胡髯下迎帝上龍羣臣及後宮從上龍者七十餘人小臣不得上乃悉持龍髯拔墜帝弓百姓仰望黃帝上天乃抱其弓與龍髯而號故後世號其塚曰鼎湖其弓曰烏號武帝於是歎曰嗟乎吾誠能及黃帝視去天下如棄土帝祠黃帝塚於喬山顧問公孫卿曰黃帝仙不死有塚何也對曰黃帝仙去羣臣思慕無已乃葬其衣冠非真塚也武帝又歎曰吾後昇天羣臣亦當思慕持吾衣冠葬於東陵乎

魯女生者長樂人也少好道初服餌胡麻及水絕穀八十餘年日更少壯色如桃李華一日能行三百里走及麋鹿世傳見之三百餘年後採藥於嵩高山忽見一女人坐山澗中女生知是神人因叩頭再拜稽首乞長生之要

良久女人曰我三天太上侍官者也汝當得仙故得見我我將授汝寶文祕要可以威制五嶽役使衆靈乃出五嶽真形圖以與之并告其施用節度女生道成一旦與親知故人別云入華山中去後五十年先相識者逢女生於華山廟前顏色更少乘白鹿從玉女三十人并令謝其鄉里親故人甚分明也其五嶽圖與王母文正同今得見於世間者豈不由李少君董仲舒及女生得之仲舒臨去以傳欒巴女生初時以圖傳蒯子訓訓後傳封君達君達後入玄丘山臨去傳左元放封君達隴西人也少好道初服黃連五十餘年乃入鳥鼠山又於山中服鍊水銀百餘年還鄉里年如三十者常乘青牛故號為青牛道士行聞有病殆死者識與不識便以腰間

竹管中藥與服之或為下針應手皆愈世多得其效驗都不以姓字語人人通識乘青牛因以青牛為名聞晉女生得真人五嶽圖連年請求之女生後見授并具告節度君達先在人間二百餘年乃入玄丘山中不知所往臨去以五嶽真形傳左元放元放以傳葛孝先也青牛道士受晉女生言家有五嶽真形一嶽各遣五神來衛護圖書所居山川近止者川澤神又恒遣侍官防身營家凶逆欲見傷害皆反受其殃有相謀議已者五神殺凶主皆亦驗應於夢想又辟除五方五瘟水火之災可帶履鋒刃此真形冥心精加奉敬敬而甚於君父每事宜有所施行皆先於靜處燒香啓五嶽君也五君恒書道士善事又司道士之奸穢言人之不正不正者禍身奸穢者禍門是以宜深忌慎之道士帶此文形及執持以履山林者百山地源靈主皆出境拜迎形見光景防護遏惡尊貴嶽形信遠我一身鬼神猶執卑降之禮何況凡人而可慢之哉李少君字雲翼齊國臨淄人也少好道入秦

山採藥修絕穀遁世全身之術道未成而病困於山林中遇安期先生經過見少君少君叩頭求乞活安期懸其有至心而被病當死乃以神樓散一匕與服之即起少君於是求隨安期奉給奴役便聽師事之安期將少君東至赤城南之羅浮北至太恒西遊玉門周流五嶽觀看江川如此數十年安期一旦語之我被玄洲召即日當去汝未應隨我至彼今當相捨去也復六百年當迎汝於此因授神丹鑪火飛玄之方誓約口訣畢須臾遂乘龍虎導引數百人迎安期安期乘羽車而昇天也少君於是還齋戒賣於市商估六國或時為吏或作師醫治病或時賈貨易姓改名遊行處所莫知其有道速漢武帝之時聞帝招募方士待敬道術而先貧不辦合大藥喟然長歎語弟子曰老將至矣死將近矣而財不足用躬耕力作商估求錢必不致辦合藥又吾亦羸拙於斯事也聞天子好道請欲見之求為合丹可得恣意無求不得天子中成者成之不中教者便捨去吾在世上已五百

餘年而不為一權者必不免於蟲蟻之糧矣乃以方上武帝言臣能凝汞成白銀飛丹砂成黃金金成服之白日昇天神仙無窮身生朱陽之羽體備圓光之翼竦則凌天伏入無間控飛龍而八遐已遍駕白鴻而九陔立周冥海之棗大如瓜鐘山之李大如瓶臣已食之速有先師安期先生授臣口訣是以保黃物之可成也於是引見甚尊敬之賜遺無數為立屋第武帝自謂必能使我度世者少君嘗從武安侯飲酒坐中有老人年九十餘少君言與其祖父遊射處老人為小兒時從其祖父識有此人一座盡驚少君見武帝有故銅器少君望而識之曰昔齊桓公嘗陳此器於栢寢帝按其刻果齊桓公器乃知少君數百歲人也然視之常如年五十許人面色甚好肌膚悅澤尤有光華眉目口齒似十五童子諸侯王貴人聞其能令人不死老更少壯饋遺之金錢無限乃密作神丹丹成未服又就帝求五帝六甲左右靈飛之書凡十二事帝以元封四年七月以書授少君到元封六

年九月少君稱疾上表云陛下思心玄妙志甄長生於是招誘道術無遠不至精誠感靈天神斯降自非宿命所適孰能諧合然丹方禁重宜絕臭腥仙法養物仁充蠢動而陛下不能絕奢侈遠聲色殺伐不止喜怒不除萬里有不歸之寇市朝有流血之形神丹大道未可得成而臣疾與年偕今者虛察又不獲躬親齋戒預觀彭祖丹砂之變於此邀矣先師安期先生昔所賜金丹之方而有微若按節度奉法戒爾乃可修用之焉若鬱砂虹飛玄朱九轉剖六一而流精奪日探霜雪而月光風卷徘徊丹霞騰沸龍虎投鉛錫而黃金克成刀圭入喉而形氣立反爾乃駕神虬以上昇騁雲車以涉遠當驗此方之神將明小臣之不安矣乃以小丹方與帝而稱疾困非大丹方也其夜武帝夢與少君俱上嵩高山半道有繡衣使者乘龍持節從雲中下言太一請少君武帝覺即遣使者問少君消息且告近臣曰如朕夢少君將捨朕去矣明日少君臨病困武帝自往視并使左右人受其方

書未竟而少君絕武帝流涕曰少君不死也故作此去耳既歛之忽失其所在中表衣帶不解如蟬蛻也於是為殯其衣物百餘日行人有見少君在河東蒲坂市者乘青驪帝聞之便發其棺棺中無所復有釘亦不脫唯餘履在耳武帝殊益悞恨求少君之不勤也明年栢梁臺火燒失諸秘書妙文也初少君與議郎董仲相親見仲宿有困疾體枯氣少乃與其成藥二劑并其方一篇用戊己之草后土脂精良獸沉肪先莠之根百卉華醴龍銜之草亥月上旬合煎銅鼎童男童女沐浴紫清調其湯火取使合成服如鷄子三枚為程服盡一劑身體便輕服盡三劑落齒更生服盡五劑命不復傾仲為人剛直博學五經然不達道術常笑世人服藥學道數上書諫武帝以為人生有命衰老有常非道術所能延益雖見其有異以為天性非術所致得其藥竟不服又不解從問其方為藏去之而已少君去後數月仲躬病甚又武帝數道其夢恨惜之仲乃憶所得少君藥試取服之未半能

行身體輕壯所苦了愈藥盡氣力如三十時乃更信世間有不死之道即以去官行求道士問以方意悉不能曉然白髮皆還黑形容甚盛後八十餘乃死臨死謂子道生曰我得少君神方我不信事懷恨黃泉汝後可行求術人問解之者若長服此藥必度世也道生感父遺言遂不肯仕周旋天下求解此方到江夏遇博澤先生先生曰此乃非神丹金玉也可使人得數百年而已耳乃具為說解其方意所用物真名道生合藥服之得壽三百七十歲入雞頭山中不知竟得道不同時卓元成張子仁吳士昇蔡子盛魏仲明張元達服之或得三百歲或得五百歲皆至死不病不偃面不皺理齒不落髮不白房室不廢此蓋少君凡弊方耳猶使人如此況其上方邪少君當去時密以六甲左右靈飛術十二事傳東郭延以神丹飛玄之方授少君鄉里人劉子訓者此二人後學道並得仙少君又授子訓崑崙神州真形也東郭延字公游山陽人也少好道聞李少君

有道求與相見叩頭乞得執侍巾櫛灑掃之役少君許之見延小心良謹可成臨當去密以五帝六甲左右靈飛之術遞虛招真十二事授延告之曰此亦要道也審而行之亦昇天矣口訣畢而遣去延遂還家合服靈飛散能夜書在寢室中身生光照左右行六甲左右術能占吉凶天下當死者識與不識皆逆知之又役使鬼神收攝虎豹無所不為在鄉里四百歲不老漢建安二十一年一旦有數十人乘虎豹之來迎之比鄰盡見之乃與親故別而辭去云詣崑崙臺臨去先以神丹方五帝靈飛秘要傳尹先生

尹先生諱軌字公度太原人也以晉元熙元年入南陽太和山以諸要事授其弟子河內山世遠延先承少君勅初以靈飛術傳蒯子訓子訓亦受傳神丹經

蒯遠字子訓齊國臨淄人李少君之邑人也少仕州郡舉孝廉除郎中又從軍拜駙馬都尉晚悟治世俗綜理官無益於年命也乃從少君學治病作醫法漸久見少君有不死之

道遂以弟子之禮事少君而師焉少君亦以子訓用心專知可成就漸漸告之以道家事因教令胎息胎食住年止白之法行之二百餘年顏色不老在鄉里與人信讓從事性好清淨常閒居讀易時作小小文疏皆有意義

少君晚又授子訓無常子大幻化之術按事施行皆效曾見比舍家抱一兒從求抱之失手兒墮地即死其家素尊敬之不敢有悲哀之色而埋之謂此兒命應不成人行已積日轉不能復思之子訓因還外抱兒還家家人恐是鬼乞不復用子訓曰但取無苦故是汝兒也兒識其母喜笑欲往母乃取之意猶不了子訓既去夫婦共往掘視所埋死兒窆器中有泥兒長六寸許耳此兒遂長大又諸老人髮畢白者子訓但與之對坐共語宿昔之間則明且皆髮黑矣亦無所施為焉黑可期一年二百日也亦復有不使人髮黑者蓋神幻之大變者也京師貴人聞之莫不虛心欲見子訓而無緣致之子訓比居有年少為太學生於是諸貴人共呼語之卿所以勤苦讀

書者欲以課試規富貴耳但為吾一致蒯子訓來能使卿不勞而達書生許諾乃歸親事子訓朝夕灑掃立侍左右如此且二百日子訓語書生曰卿非學道者何能如此書生曰忝鄉里末流長幼之道自當爾子訓曰何以

不道實而作虛飾邪吾以具知卿意諸貴人欲得見我我亦何惜一行之勞而不使卿得榮位乎便可達語諸人吾某月某日當往書生甚喜到京師具向諸貴人說此意到期日子訓未行書生父母憂之往視子訓子訓曰恐我不行邪不使卿兒失信當發以食時去所居書生父母相謂曰蒯先生雖不如期至要是往也定後日書生歸推計之子訓以其日中時到京師是不能半日行千餘里既至書生往見子訓子訓問書生曰誰欲見我者書生曰欲見先生者甚多不敢枉屈但乞知先生所止自當來也子訓曰不須使來吾尚千餘里來寧復與諸人計此邪卿今日使人盡語之使各絕賓客吾日中當往臨時自當擇所先詣書生如其言語貴人貴人各灑

掃到日中子訓往凡二十三處便有二十三子訓各在一處諸貴人各各喜自謂子訓先詣之定明日相參問同時各有一子訓其衣服顏色皆如一而論說隨主人諸問各各答對不同耳主人並為設酒食之具以餉子訓皆各家家盡禮飲食之於是遠近大驚諸貴人並欲詣之子訓謂書生曰諸人謂我當有重瞳八采故欲見我我亦無所道我不復往便爾去矣適出門諸貴人冠蓋塞道到門書生言適去東陌上乘青驃者是也於是各各走馬逐之望見驃徐徐而行各馬逐之不及如此行半日而常相去一里許不可及乃各罷還子訓既少君鄉里弟子微密謹慎思謹道與隨侍明匠將足甄綜衆妙矣

王真字叔堅上黨人也少為郡吏年七十乃好道尋見仙經雜言說郊間人者周宣王時郊間採薪之人也採薪而行歌曰巾金巾入天門呼長精噴玄泉鳴天鼓養泥丸時人莫能知唯柱下史曰此是活國中人其語秘矣其人乃古之漁父也何以知之八百歲人目

腫正方千歲人目理縱採薪者乃千歲之人也真讀此書而不解其旨遂搜問諸所在道士經年而遇有解其旨者語真曰此近淺之術也為可住年反白而已耳乃語訣云巾金中者恒存肺氣入泥丸中徐徐以繞身身常光澤翁玄泉者漱其口液而服之使人不老行之七日有效鳴天鼓者朝起常叩齒三十六下使身神安又夜恒存赤氣從天門入周身内外在腦中變為火以燔身身與火同光如此存之亦名曰鍊形泥丸腦也天門口也習閉氣而吞之名曰胎息習漱舌下泉而嚥之名曰胎食行之勿休也真受訣施行胎息胎食鍊形之方甚有驗斷穀二百餘年肉色充美徐行及馬力兼數人自歎曰我行此術唯可不死豈及神丹金玉之方邪乃師事藺子訓子訓授其肘後方也魏武帝聞之呼與相見見似年可三十許意嫌其虛詐定校其鄉里皆異口同辭多有少小見真者乃信其有道甚敬重之鄒孟節師事真十數年真以燕丹小餌法授孟節得度世鄉里計真已四

百歲後一旦將三少妻登女几山語弟子言合丹去遂不復還真一日行三百里孟節能含棗核以不食至十年又能閉氣不息身不動搖若死人可至百日半歲亦有家室此法是真所習郊間人之法也孟節為人質謹不妄言魏武帝為立茅舍使領諸方士晉惠懷之際人故有見孟節在長安市中者魏武帝時亦喜招求諸方術道士皆虛心待之但諸得道者莫肯告之以要言耳

劉京字太玄南陽人也漢孝文皇帝侍郎也後棄世從邯鄲張君學道受解朱英九方合服之百三十歲視之如三十許人後師事藺子訓子訓授京五帝靈飛六甲十二事神仙十洲真形諸秘要京按訣行之甚效能役使鬼神立起風雨召致行廚坐在立亡而知人吉凶期日又能為人祭天益命或得十年到期皆死其不信者至期亦死周流名山五嶽與王真俱行悉遍也魏武帝時故遊行諸弟子家皇甫隆聞其有道乃隨事之以雲母九子丸及交接之道二方教隆隆按合行服之

色理日少髮不白齒不落年三百餘歲不知
能得度世不耳魏黃初三年京入衡山中去
遂不復見京語皇甫隆曰治身之要當朝朝
服玉泉使人丁壯有顏色去三蟲而堅齒也
玉泉者口中液也朝未起早漱液滿口乃吞
之琢齒二七過如此者三乃止名曰鍊精使
人長生也夫交接之道至難非上士不能行
之乘奔牛驚馬未足論其峻墜矣卿性多淫
得無當用此自戒乎如京言慮隆不得度世
也

漢武帝外傳

列仙傳卷上

海六

漢光祿大夫劉向撰

赤松子

赤松子者神農時雨師也服水玉以教神農
能入火自燒往往至崑崙山上常止西王母
石室中隨風雨上下炎帝少女追之亦得仙
俱去至高辛時復為雨師今之雨師本是焉
眇眇赤松 飄飄少女 接手翻飛
泠然雙舉 縱身長風 俄翼玄圃
妙達巽坎 作範司雨

竇封子

竇封子者黃帝時人也世傳為黃帝陶正有
人過之為其掌火能出五色煙久則以教封
子封子積火自燒而隨煙氣上下視其灰燼
猶有其骨時人共葬於竇北山中故謂之竇
封子焉

海六

奇矣封子

妙稟自然 鑠質洪鑑

暢氣五煙

遺骨灰燼 寄墳竇山

人觀其跡

惡識其玄

馬師皇

馬師皇者黃帝時馬醫也知馬形生死之診
治之輒愈後有龍下向之垂耳張口皇曰此
龍有病知我能治乃鉞其唇下口中以甘草
湯飲之而愈後數數有疾龍出其波告而求
治之一旦龍負皇而去

師皇典馬

既無殘駟 精感羣龍

術兼殊類

靈虬報德 彌鱗銜轡

振躍天漢

繁有遺蔚

赤將子與

赤將子與者黃帝時人不食五穀而啜百草
花至堯帝時為木工能隨風雨上下時時於
市中賣繖亦謂之繖父云

蒸民粒食

孰享遐祚 子與拔俗

餐葩飲露

託身風雨 遙然矯步

雲中可遊

性命可度

黃帝

海六

黃帝者號曰軒轅能劾百神朝而使之弱而
能言聖而預知知物之紀自以為雲師有龍
形自擇亡日與羣臣辭至於卒還葬橋山山
崩柩空無尸唯劍舄在焉仙書云黃帝採首

山之銅鑄鼎於荆山之下鼎成有龍垂胡髯
下迎帝乃昇天羣臣百僚悉持龍髯從帝而
升攀帝弓及龍髯拔而弓墜羣臣不得從
望帝而悲號故後世以其處為鼎湖名其弓
為烏號焉

神聖淵玄 邀哉帝皇 覽茲萬物
冠名百王 化周六合 敷道無方
假藉橋山 超升昊蒼

倭佺

倭佺者槐山採藥父也好食松實形體主毛
長數寸兩目更方能飛行逐走馬以松子遺
堯堯不暇服也松者簡松也時人受服者皆
至二三百歲焉

倭佺餌松 體逸眸方 足躡鸞鳳
走超騰驤 遺贈堯門 貽此神方

盡性可辭 中智宜將

容成公

容成公者自稱黃帝師見於周穆王能善補
導之事取精於玄牝其要谷神不死守生養
氣者也髮白更黑齒落更生事與老子同亦

云老子師也

壺壺容城 專氣致柔 得一在昔
含光獨游 道貫黃庭 伯陽仰儔
玄牝之門 庶幾可求

方回

方回者堯時隱人也堯聘以為閭士煉食雲
母亦與民人有病者隱於五柞山中夏啓末
為官士為人所劫閉之室中從求道回化而
得去更以方回掩封其戶時人言得回一丸
泥塗門戶終不可開

方回願生 隱身五柞 咀嚙雲英
棲心隙漠 却閉幽室 重關自廓
印改掩封 終焉不落

老子

老子姓李名耳字伯陽陳人也生於殷時為
周柱下史好養精氣貴接而不施轉為守藏
史積八十餘年史記云二百餘年時稱為隱
君子謚曰聃仲尼至周見老子知其聖人乃
師之後周德衰乃乘青牛車去入大秦過西
關關令尹喜待而迎之知真人也乃強使著

書作道德經上下二卷

老子無為 而無不為 道一生死
跡入靈竒 塞兌內鏡 冥神絕涯
德合元氣 壽同兩儀

關令尹

關令尹喜者周大夫也善內學常服精華隱
德修行時人莫知老子西遊喜先見其炁知
有真人當過物色而遮之果得老子老子亦
知其竒為著書授之後與老子俱遊流沙化
明服臣勝實莫知其所終尹喜亦自著書九
篇號曰關令子

尹喜抱關 含德為務 挹漱日華
仰玩玄度 候氣真人 介焉獨悟
俱濟流沙 同歸妙趣

消子

消子者齊人也好餌木接食其精至三百年
乃見於齊著天人經四十八篇後釣於荷澤
得鯉魚腹中有符隱於宕山能致風雨受伯
陽九仙法淮南山安少得其文不能解其旨
也其琴心三篇有條理焉

消老餌術 享茲遐紀 九仙既傳
三才乃理 赤鯉投符 風雲是使
拊琴幽巖 高棲遐峙

呂尚

呂尚者冀州人也生而內智預見存亡避紂之亂隱於遼東四十年西適周匿於南山釣於磻溪三年不獲魚比間皆曰可已矣尚曰非爾所及也已而果得兵鈴於魚腹中文王夢得聖人聞尚遂載而歸至武王伐紂嘗作陰謀百餘篇服澤芝地髓具二百年而告亡有難而不葬後子伋葬之無尸唯有玉鈴六篇在棺中云

呂尚隱釣 瑞得麟 通夢西伯
同乘入臣 沈謀籍世 芝體鍊身
遠代所稱 美哉天人

嘯父

嘯父者冀州人也少在西周市上稱履數十年人不知也後奇其不老好事者造求其術不能得也唯梁母得其作火法臨上三亮上與梁母別列數十火而昇西邑多奉祀之

嘯父駐形 年衰不邁 梁母遇之
歷虛啓會 丹火翼輝 紫煙成蓋
眇企昇雲 抑絕華泰

師門

師門者嘯父弟子也亦能使火食桃李能爲夏孔甲龍師孔甲不能順其意殺而埋之外野一旦風雨迎之訖則山木皆焚孔甲祠而禱之還而道死

師門使火 赫炎其勢 乃泰虬龍
潛靈隱惠 夏王虐之 神存質斃
風雨既降 肅爾高逝

務光

務光者夏時人也耳長七寸好琴服蒲韭根殷湯將伐紂因光而謀光曰非吾事也湯曰孰可曰吾不知也湯曰伊尹何如曰強力忍詬吾不知其他湯既克桀以天下讓於光曰智者謀之武者遂之仁者居之古之道也吾子胡不遂之請相吾子光辭曰廢上非義也吾殺人非仁也人犯其難我享其利非廉也吾聞非義不受其祿無道之世不踐其位况於

尊我我不忍久見也遂負石自沈于蒙水已而自匿後四百餘歲至武丁時復見武丁欲以爲相不從武丁以與迎而從逼不以禮遂投浮梁山後遊尚父山

務光自仁 服食養真 冥遊方外
獨步常均 武丁雖高 讓位不臣
負石自沉 虛無其身

仇生

仇生者不知何所人也當殷湯時爲水正三十餘年而更壯皆知其奇人也咸共師奉之常食松脂在尸鄉北山上自作石室至周武王幸其室而祀之

異哉仇生 靡究其向 治身事君
老而更壯 灼灼容顏 怡怡德量
武王祠之 北山之上

彭祖

彭祖者殷大夫也姓錢名鏗帝顓頊之孫陸終氏之中子歷夏至殷末八百餘歲常食桂芝善導引行氣歷陽有彭祖仙室前世禱請風雨莫不輒應常有兩虎在祠左右祠訖地

即有虎跡云後昇仙而去

遐哉碩仙 時惟彭祖 道與化新

綿綿歷古 隱倫玄室 靈著風雨

二虎嘯時 莫我猜侮

叩疏

叩疏者周封史也能行氣鍊形煮石髓而服之謂之石鍾乳至數百年往來入太室山中有卧石林枕焉

八珍促壽 五石延生 叩疏得之

鍊髓餌精 人以百年 行邁身輕

寢息中嶽 遊步仙庭

介子推

介子推者姓王名光晉人也隱而無名悅趙成子與遊旦有黃雀在門上晉公子重耳異之與出居外十餘年勞苦不辭及還介山伯子常晨來呼推曰可去矣推辭母入山中從伯子常遊後文公遣數千人以玉帛禮之不出後三十年見東海邊為王俗賣扇後數十年莫知所在

王光沈默 享年遐久 出翼霸君

處契玄友 推祿讓勤 何求何取

避影介山 浪跡海右

馬丹

馬丹者晉耿之人也當文侯時為大夫至獻公時復為幕府正獻公城耿殺恭太子丹乃去至趙宣子時乘安車入晉都侯諸大夫靈公欲仕之逼不以禮有迅風發屋丹入迴風中而去北方人尊而祠之

馬丹官晉 與時汗隆 事文去獻

顯沒不窮 密網將設 從禮迅風

杳然獨上 絕跡玄宮

平常生

穀城鄉平常生者不知何所人也數死復生時人以為不然後大水出所害非一而平輒在缺門山頭大呼言平常生在此云復水兩五日必止止則上山求祠之但見平衣帔革帶後數十年復為華陰門卒

穀城妙匹 謫達奇逸 出生入死

不恒其質 玄化忘形 貴賤奚恤

暫降塵汗 終騰雲室

陸通

陸通者云楚狂接輿也好養生食素盧木實及蕪菁子遊諸名山在蜀峨嵋山上世世見之歷數百年去

接輿樂道 養性潛輝 見諷尼父

論以鳳衰 納氣以和 存心以微

高步靈嶽 長嘯峨嵋

葛由

葛由者羌人也周成王時好刻木羊賣之一旦騎羊而入西蜀蜀中王侯貴人追之上綏山綏山在峨嵋山西南高無極也隨之者不復還皆得仙道故里諺曰得綏山一桃雖不得仙亦足以豪山下立祠數十處云

木可為羊 羊亦可靈 靈在葛由

一致無經 爰陟崇綏 舒翼揚聲

知術者仙 得桃者榮

江妃二女

江妃二女者不知何所人也出遊於江漢之涘逢鄭交甫見而悅之不知其神人也謂其僕曰我欲下請其佩僕曰此間之人皆習於

辭不得恐懼悔焉交甫不聽遂下與之言曰
二女勞矣二女曰客子有勞妾何勞之有交
甫曰橘是袖也我威之以笥令附漢水將流
而下我違其傍採其芝而茹之以知吾為不
遜也願請子之佩二女曰橘是袖也我威之
以笥令附漢水將流而下我違其傍採其芝
而茹之遂手解佩與交甫交甫悅受而懷之
中當心趨去數十步視佩空懷無佩顧二女
忽然不見

靈妃艷逸 時見江湄 麗服微步

流盼生姿 交甫遇之 憑情言私

鳴珮虛擲 絕影焉追

范蠡

范蠡字少伯徐人也事周師太公望好服桂
飲水為越大夫佐勾踐破吳後乘輕舟入海
變名姓適齊為鴟夷子更後百餘年見於陶
為陶朱君財累億萬號陶朱公後棄之蘭陵
賣藥後人世世識見之

范蠡御桂 心虛志遠 受業師望
載潛載悅 龍見越鄉 功遂身返

履脫千金 與道舒卷

琴高

琴高者趙人也以鼓琴為宋康王舍人行消
彭之術浮遊冀州涿一作郡之間二百餘年
後辭入涿水中取龍子與諸弟子期曰皆樂

齋待於水傍設祠果乘赤鯉來出坐祠中旦
有萬人觀之留一月餘復入水去

琴高晏晏 司樂宋宮 離世孤逸

浮沉涿中 出躍潁潁 入藻清冲

是任水解 其樂無窮

冠先

冠先者宋人也以釣魚為業居睢水旁百餘
年得魚或放或賣或自食之常着冠帶好種
荔枝食其葩實焉宋景公問其道不告即殺
之數十年踞宋城門鼓琴數十日乃去宋人
家家奉祀焉

冠先惜道 術不虛傳 景公戮之

尸解神遷 歷載五十 撫琴來旋

夷侯宋門 暢意五絃

王子喬

王子喬

王子喬者周靈王太子晉也好吹笙作鳳凰
鳴遊伊洛之間道士浮丘公接以上嵩高山
三十餘年後求之於山上見栢良曰告我家
七月七日待我於緱氏山巔至時果乘白鶴
駐山頭望之不得到舉手謝時人數日而去
亦立祠於緱氏山下及嵩高首焉

妙哉王子 神遊氣爽 笙歌伊洛

擬音鳳響 浮丘感應 接手俱上

揮策青崖 假翰獨往

幼伯子

幼伯子者周蘇氏客也冬常着單衣盛夏着
襦袴形貌歲異後數十年更壯時人莫知世
世來誠祐蘇氏子孫得其福力也

周客載容 泯跡泥盤 夏服重纈

冬振輕丸 作不背本 義不獨安

乃眷周氏 祐其艱難

安期先生

安期先生者瑯琊阜鄉人也賣藥於東海邊
時人皆言千歲翁秦始皇東遊請見與語三
日三夜賜金璧度數千萬出於阜鄉亭皆置

去留書以赤玉一雙為報曰後數年求我於蓬萊山始皇即遣使者徐市盧生等數百人入海未至蓬萊山輒逢風波而還立祠阜鄉亭海邊十數處云

寥寥安期 虛質高情 乘光適性

保氣延生 聊悟泰始 遺寶阜亭

將遊蓬萊 絕影清冷

桂父

桂父者象林人也色黑而時白時黃時赤南海人見而尊事之常服桂及葵以龜腦和之千九十斤桂累世見之今荊州之南尚有桂九焉

偉哉桂父 挺直遐幾 靈葵內潤

丹桂外綏 怡怡柔顏 代代同輝

道播東南 奕世莫違

瑕丘仲

瑕丘仲者霽人也賣藥於霽百餘年人以為壽矣地動舍壞仲及里中數十家屋臨水皆敗仲死民人取仲尸棄水中收其藥賣之仲披裘而從詣之取藥藥仲者懼叩頭求哀仲

曰恨汝使人知我耳吾去矣後為夫餘胡王驛使復來至霽北方謂之謫仙人焉

瑕丘通玄 請脫其跡 人死亦死

泛焉言惜 邀步觀化 豈勞胡驛

苟不親本 誰知其謫

酒客

酒客者梁市上酒家人也作酒常美而售日得萬錢有過而逐之主人酒常醉敗窮貧梁市中賈人多以女妻而迎之或去或來後百餘歲來為梁丞使民益種芋菜曰三年當大飢卒如其言梁民不死五年解印綬去莫知其終焉

酒客蕭綽 寄沽梁肆 何以標異

醇醴殊味 屈身佐時 民用不匱

解綬晨征 莫知所萃

任光

任光者上蔡人也善餌丹賣於都市里間積八十九年乃知是故時任光也皆說如數十歲面顏後長老識之趙簡子聘與俱歸常在栢梯山上三世不知所在晉人常服其丹也

上蔡任光 能鍊神丹 年涉期頤 曄爾朱顏 頃適趙子 縱任所安 升軌栢梯 高飛雲端

蕭史

蕭史者秦穆公時人也善吹簫能致孔雀白鶴於庭穆公有女字弄玉好之公遂以女妻焉日教弄玉作鳳鳴居數年吹似鳳聲鳳凰來止其屋公為作鳳臺夫婦止其上不下數年一旦皆隨鳳凰飛去故秦人為作鳳女祠於雍宮中時有簫聲而已

蕭史妙吹 鳳雀舞庭 羸氏好合

乃習鳳聲 遂攀鳳翼 參翥高冥

女祠寄想 遺音載清

祝雞翁

祝雞翁者洛人也居尸鄉北山下養雞百餘年雞有千餘頭皆立名字暮棲樹上晝放散之欲引呼名即依呼而至賣雞及子得千餘萬輒置錢去之吳作養魚池後升吳山白鶴孔雀數百常止其傍云

人禽雖殊 道固相關 祝翁傍通

牧雞寄驩 育鱗道洽 棲雞樹端
物之致化 施而不刊

朱仲

朱仲者會稽人也常於會稽市上販珠漢高
后時下書募三寸珠仲讀購書笑曰直值汝
矣齋三寸珠詣闕上書珠好過度即賜五百
金魯元公主復私以七白金從仲求珠仲獻
四寸珠送置於闕即去下書會稽徵聘不知
所在景帝時復來獻三寸珠數十枚輒去不
知所之云

朱仲無欲

柳寄賣商

俯窺驪龍

捫此夜光

發跡會稽

曜奇咸陽

施而不德

歷世彌彰

脩羊公

脩羊公者魏人也在華陰山上石室中有懸
石榻卧其上石盡穿陷略不食時取黃精食
之後以道干景帝帝禮之使止王邸中數歲
道不可得有詔問脩羊公能何日發語未訖
牀上化為白羊題其脇曰脩羊公謝天子後
置石羊於靈臺上羊後復去不知所在

卓矣脩羊 韜奇含靈 枕石大華
餐茹黃精 漢禮雖隆 道非所經
應變多質 忽爾隱形

稷丘君

稷丘君者太山下道士也武帝時以道術受
賞賜髮白再黑齒落更生後罷去上東巡太
山稷丘君乃冠章甫衣黃衣擁琴來迎拜武
帝指帝陛下勿上也上必傷足指及數里右
足指果折上諱之故但祠而還為稷丘君立
祠焉為稷承奉之云

穆丘洞徹

脩道靈山

鍊形濯質

變白還年

漢武行幸

攜琴來延

戒以升陟

逆觀未然

崔文子

崔文子者太山人也文子世好黃老事居潛
山下後作黃散赤丸成石父祠賣藥都市自
言三百歲後有疫氣民死者萬計長吏之文
所請救文擁朱幡繫黃散以徇人門飲散者
即愈所活者萬計後去在蜀賣黃散故世寶
崔文赤丸黃散實近於神焉

崔子得道 術兼秘奧 氣瀉降喪
仁心攸悼 朱椿電麾 神藥捷到
一時獲全 永世作效

列仙傳卷上

海大

十六

列仙傳卷下

海士

漢光祿大夫劉向撰

赤須子

赤須子豐人也豐中傳世見之云秦穆公時主魚吏也數道豐界災害水旱十不失一臣下歸向迎而師之從受業問所長好食松實天門冬石脂齒落更生髮墮再出服霞絕後遂去吳山下十餘年莫知所之

赤須去豐 爰憩吳山 三藥並御

朽貌再鮮 空往師之 而無使延

顧問小智 豈識巨年

東方朔

東方朔者平原厭次人也久在吳中為書師數十年武帝時上書說便宜拜為郎至昭帝時時人或謂聖人或謂凡人作深淺顯默之行或忠言或虧語莫知其旨至宣帝初棄郎以避亂世置憤官舍風飄之而去後見於會稽賣藥五湖智者疑其歲星精也

東方奇達 混同時俗 一龍一蛇

豈豫榮辱 高韻冲霄 不羈不束

沈跡五湖 騰影陽谷

鈎翼夫人

鈎翼夫人者齊人也姓趙少時好清淨病卧六年右手拳屈飲食少望氣者云東北有貴人氣推而得之召到安邑甚偉武帝披其手得一玉鈎而手尋展遂幸而生昭帝後武帝害之殞尸不冷而香一月間後昭帝即位更葬之棺內但有絲履故名其宮曰鈎翼後避諱改為廟閣有神祠閣在焉

婉婉弱媛 廟符授鈎 誕育嘉嗣

皇祚惟休 武之不達 背德致仇

委身受戮 尸滅芳流

犢子

犢子者鄴人也少在黑山採松子茯苓餌而服之且數百年時壯時老時好時醜時人乃知其仙人也常過酤酒陽都家陽都女者市中酤酒家女眉生而連耳細而長衆以為異皆言此天人也會犢子牽一黃犢來過都女悅之遂留相奉侍都女隨犢子出取桃李一宿而返皆連莞甘美邑中隨伺逐之出門共

牽犢耳而走人不能追也且還復在市中數

十年乃去見潘山下冬賣桃李云

犢子山棲 採松餌苓 妙氣充內

變白易形 陽氏奇表 數合理冥

乃控靈犢 倏若電征

騎龍鳴

騎龍鳴者渾亭人也年二十於池中求得龍子狀如守宮者十餘頭養食結草廬而守之龍長大稍稍而去後五十餘年水壞其廬而去一旦騎龍來渾亭下語云馮伯昌孫也此間人不夫五百里必當死信者皆去不信者以為妖至八月果水至死者萬計

騎鳴養龍 結廬虛池 專至俟化

乘雲騰蹕 紆轡故鄉 告以速移

洞鏡災祥 情眷不離

主柱

主柱者不知何所人也與道士共上宕山言此有丹砂可得數萬斤宕山長吏知而上山封之砂流出飛如火乃聽柱取為邑令章君明餌砂三年得神砂飛雪服之五年能飛行

迷與柱俱去云

主柱同窺 道士精微 玄威通山

丹砂出穴 榮榮流丹 飄飄飛雲

宿長悟之 終然同悅

圓客

圓客者濟陰人也姿貌好而性良邑人多以女妻之客終不取常種五色香草積數十年食其實一旦有五色蛾止其香樹末客收而薦之以布生桑蠶焉至蠶時有好女夜至自稱客妻道蠶狀客與俱收蠶得百二十頭蠶皆如甕大繅一重六十日始盡訖則俱去其知所在故濟陽人世祠桑蠶設祠堂焉或云陳留濟陽氏

美哉圓客 願瞻朝華 仰吸玄精

俯掎五葩 韻馥芳卉 采采文蛾

淑女宵降 配德升遐

鹿皮公

鹿皮公者淄川人也少為府小吏木工舉手能成器械岑山上有神泉人不能至也小吏白府君請木工斤斧三十人作轉輪懸閣意

思橫生數十日梯道四間成上其巔作相舍留止其旁絕其二間以自固食芝草飲神泉且七十年淄水來三下呼宗族家室得六十餘人令上山平水蓋漂一郡沒者萬計小吏乃辭遣宗家令下山看鹿皮衣邊去復上閣後百餘年下賣藥於市

皮公興思 妙巧纏綿 飛閣懸趣

上挹神泉 肅肅清廟 情情二間

可以閑處 可以永年

昌容

昌容者常山道人也自稱殷王子食蓬萊根往來上下見之者二百餘年而顏色如二十許人能致紫草賣與漆家得錢以遺孤寡歷世而然奉祠者萬計

殷女忘榮 曾無遺戀 怡我素顏

改華標清 心與化遷 日與氣鍊

坐卧青貨 惠及孤賤

谿父

谿父者南郡鄰人也居山間有仙人常止其家從買瓜教之鍊瓜子與桂附子並實共藏

而對分食之二十餘年能飛走昇山入水後百餘年居絕山頂呼谿下父老與道平生時事云

谿父何欲 欲在幽谷 下臨清澗

上翳委葦 仙客舍之 導以秘蘇

形絕埃壙 心在舊俗

山圖

山圖者隴西人也少好乘馬馬蹄之折脚山中道人教令服地黃當歸羌活獨活苦參散服之一歲而不嗜食病愈身輕追道人問之自言五嶽使之名山採藥能隨吾使汝不死山圖追隨之六十餘年一旦歸來行母服於家間暮年復去莫知所之

山圖抱患 因毀致全 受氣使身

藥輕命延 寫哀墳柏 天愛猶縲

數周高舉 永絕俗緣

谷春

谷春者機陽人也成帝時為郎病死而屍不冷家發喪行服猶不敢下釘三年更著冠情坐縣門上邑中人大驚家人迎之不肯隨歸

發棺有衣無屍留門上三宿去之長安止橫門上人知追迎之復去之太白山立祠於山上時來至其祠中止宿焉

谷春既死 停屍猶溫 棺闔五稔 端委於門 顧視空棺 形逝衣存

留執太白 納氣玄根

陰生

陰生者長安中渭橋下乞兒也常止於市中乞市人厭苦以糞灑之旋復在里中夜不見汚如故長吏知之械收繫著桎梏而續在市中乞又械欲殺之乃去灑者之家室自壞殺十餘人故長安中諺曰見乞兒與美酒以免破屋之咎

陰生乞兒 人厭其黷 識真者稀

累見因辱 誰陰忘吝 况我仙屬

惡肆殃及 自災其屋

毛女

毛女者字玉姜在華陰山中獵師世世見之形體生毛自言秦始皇宮人也秦壞流亡入山避難遇道士谷春教食松葉遂不饑寒身

輕如飛百七十餘年所止巖中有鼓琴聲云

姚嬖玉姜 與時遁逸 真人授方

餐松秀實 因敗獲成 延命深吉

得意巖岫 寄歡琴瑟

子英

子英者舒鄉人也善入水捕魚得赤鯉愛其色好持歸著池中數以米穀食之一年長丈餘遂生角有翅翼子英怪異拜謝之魚言我來迎汝汝上背與汝俱昇天即大雨子英上其魚背騰昇而去歲歲來歸故舍食飲見妻于魚復來迎之如此七十年故吳中門戶皆作神魚遂立子英祠

子英樂水 游捕為職 靈鱗來赴

有鱗厥色 養之長之 挺角傳翼

遂駕雲螭 起步太極

服閣

服閣者不知何所人也常止莒往來海邊諸祠中有三仙人於祠中博賭瓜顧間令擔黃白瓜數十顆教令瞋目及覺乃在方丈山在蓬萊山南後往來莒取方丈山上珍寶珠玉

賣之久矣一旦髡頭着緇衣貌更老人問之言坐取廟中物云後數年貌更壯好鬚髮如往日時矣

服閣游祠 三仙是使 假寐須臾

忽起千里 納寶變形 未足多恥

攀龍附鳳 逍遙終始

文賓

文賓者太丘鄉人也賣草履為業數取姬數十年輒棄之後時故姬壽老年九十餘續見賓年更壯他時姬拜賓涕泣賓謝曰不宜至正月朝儻能會鄉亭西社中邪姬老夜從兒孫行十餘里坐社中待之須臾賓到大驚汝好道邪知汝爾前不去汝也教令服菊花地膚桑上寄生松子取以益氣姬亦更壯復百餘年見云

文賓養生 納氣玄虛 松菊代御

鍊質鮮膚 故妻好道 拜泣踟躕

引過告術 延齡百餘

商丘子胥

商丘子胥者高邑人也好牧豕吹竽年七十

不娶婦而不老邑人多奇之從受道問其要言但食木菖蒲根飲水不饑不老如此傳世見之三百餘年貴戚富室聞之取而服之不能終歲輒止慙慢矣謂將復有匿術也

商丘幽棲 韻積妙術 渴飲寒泉

饑茹蒲朮 吹竽牧豕 卓犖奇出

道足無求 樂茲永日

子主

子主者楚語而細音不知何所人也諸江都王自言竊先生顧我作客三百年不得作直以為狂人也問先生所在云在龍眉山上工遣吏將上龍眉山巔見竊先生毛身廣耳被髮鼓琴主見之叩頭吏致王命先生曰此主吾比舍九世孫且念汝家富有暴死女子三人勿預吾事語竟大風發吏走下山比歸宮中相殺三人王遣三牲立祠焉

子主挺年 理有所資 竊主祠秀

拊琴龍眉 以道相符 當與訟微

匡事竭力 問昭我師

陶安公

陶安公者六安鑄冶師也數行火火一旦散上行紫色衝天安公伏治下求哀須臾朱省止治上曰安公安公治與天通七月七日迎汝以赤龍至期赤龍到大雨而安公騎之東南上一城邑數萬人衆共送視之皆與辭決云

安公縱火 紫炎洞照 翩翩朱雀

銜信告時 奕奕朱虬 蜿蜒赴期

傾城仰觀 迴首顧辭

赤斧

赤斧者巴戎人也為碧雞祠主簿能作水瀕鍊丹與硝石服之三十年反如童子毛髮生皆赤後數十年上華山取禹餘糧餌賣之於蒼梧湘江間累世傳見之手掌中有赤斧焉

赤斧願真 發秀戎巴 寓跡神祠

瀕鍊丹砂 髮雖朱髮 顏暉丹葩

采藥靈山 觀化南邇

呼子先

呼子先者漢中關下卜師也老壽百餘歲臨去呼酒家老嫗曰急裝當與嫗共應中陵王

夜有仙人持二茅狗來至呼子先子先持一與酒家嫗得而騎之乃龍也上華陰山常於山上大呼言子先酒家母在此云

三靈潛感 應若符契 方駕茅狗

蜿蜒龍遊 參登大華 自稱應世

事君不端 會之有惠

負局先生

負局先生者不知何許人也語似燕代間人常負磨鏡局徇吳市中街磨鏡一錢因磨之輒問主人得無有疾苦者輒出紫丸藥以與之得者莫不愈如此數十年後大疫病家至戶到與藥活者萬計不取一錢吳人乃知其真人也後主吳山絕崖頭懸藥下與人將欲去時語下人曰吾還蓬萊山為汝曹下神水崖頭一旦有水白色流從石間來下服之多愈疾立祠十餘處

負局神端 披褐含秀 術兼和鵠

心託宇宙 引彼萊泉 灌此絕岫

欲返蓬山 以齊天壽

朱璜

朱璜者廣陵人也少病毒瘕就睢山上道士
阮丘立憐之言卿除腹中三屍有真人之業
可度教也璜曰病愈當爲君作客三十年不
敢自還丘與璜七物藥日服九九百日病下
如肝脾者數斗養之數十日肥健心意日更
開朗與老君黃庭經今日讀三過通之能思
其意丘遂與璜俱入浮陽山玉女祠且八十
年復見故處白髮盡黑鬚更長三尺餘過
食止數年復去如此至武帝末故在焉

朱璜寢瘕 福祚相迎 真人投藥

三屍俱靈 心虛神瑩 騰贊幽冥

毛賴髮黑 超然長生

黃阮立

黃阮丘者睢山上道士也衣裘被髮耳長七
寸口中無齒日行四百里於山上種葱薤百
餘年人不知也時下賣藥朱璜發明之乃知
其年人也地動山崩道絕預戒下人世共奉
祠之

慈鵲巖嶺 實棲若人 被裘散髮
輕步絕倫 含道養生 妙觀通神

發驗朱璜 告徧下民

女九

女九者陳市上沽酒婦人也作酒常美遇仙
人過其家飲酒以素書五卷爲質九開視其
書乃養性交接之術九私寫其文要更設房
室納諸年少飲美酒與止宿行文書之法如
此三十年顏色更如二十時仙人數歲復來
過笑謂九曰盜道無私有翅不飛遂棄家追
仙人去莫知所之云

玄素有要 近取諸身 彭聃得之

五卷以陳 女九蘊妙 仙客來臻

傾書關引 雙飛絕塵

陵陽子明

陵陽子明者鉅鄉人也好釣魚於旋溪釣得
白龍子明懼解鈎拜而放之後得白魚腹中
有書教子明服食之法子明遂上黃山採五
石脂沸水而服之三年龍來迎去止陵陽山
上百餘年山去地千餘丈大呼下人今上山
半告言谿中于安當來問子明釣車在否後
二十餘年于安死人取葬石山下有黃鶴來

棲其塚邊樹上嗚呼于安云

陵陽垂釣 白龍銜鈎 終獲瑞魚

靈述是修 五石溉水 騰山乘虬

子安果沒 鳴鶴何求

邦子

邦子者自言蜀人也好放犬子時有犬走入
山穴邦子隨入十餘宿行度數百里上出山
頭上有臺殿官府青松樹森然仙吏侍衛甚
嚴見故婦主洗魚與邦子符一函并藥便使
還與成都令喬君喬君發函有魚子也著池
中養之一年皆爲龍形復送符還山上犬色
更赤有長翰常隨邦子往來百餘年遂留止
山上時下來護其宗族蜀人立祠於穴口常
有鼓吹傳呼聲西南數千里共奉祠焉

邦子尋犬 宕入仙穴 館閣裁裁

青松列列 受符傳藥 往來交結

逐棲靈峯 音響昭徹

木羽

木羽者鉅鹿南和平鄉人也母貧賤主助產
嘗探產婦兒生便開目視母大笑其母大怖

夜夢見大冠赤幘者守兒言此司命君也當報汝恩使汝子木羽得仙母陰信識之母後生兒字之為木羽所探兒生年十五夜有車馬來迎去遂過母家呼木羽木羽為御來遂俱去後二十餘年鸛雀旦銜二尺魚著母戶上母匿不道而賣其魚三十年乃沒去母至百年乃終

司命挺靈 產母震驚 乃要報了
契定未成 道足三五 輕騎宵迎
終然報德 久乃遐齡

玄俗

玄俗者自言河間人也餌巴豆賣藥都市七九一錢治百病河間王病瘕買藥服之下蛇十餘頭問藥意俗云王瘕乃六世餘殃下墮即非王所招也王常放乳鹿麟母也仁心感天故當遭俗耳王家老舍人自言父世見俗俗形無影王乃呼俗日中看實無影王欲以女配之俗夜亡去後人見於常山下

質虛影滅 時惟玄俗 布德神丸
乃寄鹿贖 道發河間 親寵方渥

騰龍不制 超然絕足

讚曰易稱太極是生兩儀兩儀生然後有人民有人民然後有生死生死之義著明矣蓋萬物施張渾爾而就亦無所不備焉神矣妙矣精矣微矣其事不可得一一論也聖人仰則觀象於天俯則觀法於地日月運行四時分治五星受制於太微監無道之國吉凶預見以戒土者動靜言語應效相通有自來矣天然雖不言其變化云為不可謂之無也周書序桑螵問消子曰有死亡而復云有神仙者事兩成邪消子曰言固可兩有耳孝經援神契言不過天地造靈洞虛猶立五嶽設三台陽精主外陰精主內精氣上下經緯人物道治非一若夫草木皆春生秋落必矣而木有松栢檟檀之倫百八十餘種草有芝英萍實靈沼黃精白符竹蓂戒久長生不死者萬數盛冬之時經霜歷雪蔚而不彫見斯其類也何怪於有仙邪余嘗得秦大夫阮倉撰仙圖自六代迄今有七百餘人始皇好遊仙之事庶幾有獲故方士霧集祈祀彌布殆必因

列仙傳卷下

迹託虛寄空為實不可信用也若周公黃錄記太白下為王公然歲星變為孛壽公等所見非一家聖人所以不開其事者以其無常然雖有時著蓋道不可棄距而閉之尚貞正也而論語云怪力亂神其微旨可知矣

續仙傳序

海八

朝請郎前行潯水縣令沈汾撰

古今神仙舉世知之然飛騰隱化俗稀可親先賢有言人間得仙之人猶千不得聞其一況史書不長神仙之事故多不傳於世詳其史意以君臣父子理亂忠孝之道激勵終古也若敦尚虛無自然之迹則人無所拘制矣史記言三神山在海中仙人居金銀宮闕不死之藥生其上人有欲近山者則風引船而去終莫能到斯亦激勵之意也大哉神仙之事靈異罕測初之修也守一鍊氣拘謹法度孜孜辛勤恐失於纖微及其成也千變萬化混於人間或藏山林或遊城市其飛昇者多往海上諸山積功已高便為仙官卑者猶為仙民十洲間動有仙家數十萬耕植芝田課計頃畝如種稻焉是有仙官分理仙民及人間仙凡也其隱化者如蟬留皮換骨保氣固形於巖洞然後飛昇成於真仙信非虛矣汾生而慕道尤愧積習自幼及長凡接高尚所說兼復積年之間聞見皆銘於心又以國史

不書事散于野刻當中和年兵火之後墳籍猶缺詎有秉筆紀而述作處世斯久人漸稀傳惜哉他時寂無遺聲今故編錄其事分為三卷冀資好事君子學道之人談柄用顯真仙者哉

續仙傳卷上

飛昇一十六人內士真三人

玄真子

玄真子姓張名志和會稽山陰人也博學能文進士擢第善畫飲酒三斗不醉守其養氣卧雪不冷入水不濡天下山水皆所遊覽曾國公顏真卿與之友善真卿為湖州刺史日與門客會飲乃唱和為漁父詞其首唱即志和之詞曰西塞山邊白鳥飛桃花流水鱖魚肥青箬笠綠簑衣斜風細雨不須歸真卿與陸鴻漸徐士衡李成矩共唱和二十餘首連相誇賞而志和命丹青寫景更詞須臾五本花木禽魚山水景象奇絕蹤跡古今無比而真卿與諸客傳翫歎伏不已其後真卿東遊平望驛志和酒酣為水戲鋪席於水上獨坐飲酌嘯詠其席來去遲速如刺舟聲復有雲鶴隨覆其上真卿親賓參佐觀者莫不驚異於水上揮手以謝真卿上昇而去今猶有傳寶其畫在於人間

藍采和

藍采和不知何許人也常衣破藍衫六銖黑木腰帶闊三寸餘一脚着靴一脚跣行夏則衫內加絮冬則卧於雪中氣出如蒸每行歌於城市乞索持大拍板長三尺餘常醉踏歌老少皆隨看之機捷諧謔人問應聲答之笑皆絕倒似狂非狂行則振靴言曰踏踏歌藍采和世界能幾何紅顏一椿樹流年一擲梭古人混混去不返今人紛紛來更多朝騎鸞鳳到碧落暮見桑田生白波長景明暉在空際金銀宮闕高嵯峨歌極多率皆仙意人莫之測但將錢與之以長繩穿地行或散失亦不迴顧或見貧人却與之或與酒家周遊天下人有為兒童時至及斑白見之顏狀如故後踏歌濠梁間於酒樓乘醉有雲鶴笙簫聲忽然輕舉於雲中擲下靴衫腰帶拍板箒箒而去

朱孺子

朱孺子永嘉安固人也幼而師事道士王元正居大若巖義即陶隱居修其語於此亦謂之真結巖巖之西有陶山存焉勤苦事於元正深慕仙道常登山嶺採黃精

服餌歷十餘年一日就溪濯蔬忽見岸側有二花犬相趣孺子異之乃尋逐入苟杞叢下歸語元正訝之遂與孺子俱往伺之復見二犬戲躍逼之又入苟杞下元正與孺子共尋掘乃得二苟杞根形狀如花犬堅若石洗澤挈歸煮之而孺子益薪著火三晝夜不離竈側試嘗其汁味最甘美喫不已及見根爛以告元正來共取食之俄頃孺子忽然飛昇在峯上元正驚異久之孺子謝別元正昇雲而去至今俗呼其峯為童子峯元正後餌其根盡不知其年壽亦隱於巖之西陶山有採樵者時或見之

宜君王老

王老坊州宜君縣人也居于村墅頗好道務行陰德為善其妻亦同心不倦一旦有繼續老道士造其門王老與妻俱延禮之居月餘間日與王老言談杯酌甚相歡洽俄忽患遍身惡瘡王老乃求醫藥看療益加勤切而瘡日甚一日迨將逾年道士謂王老曰此瘡不煩以凡藥治療但得數斛酒浸之自愈於是

王老為之精潔釀酒及熟道士言以大甕盛酒吾自加藥寢之遂入甕三日方出鬚髮俱黑顏復少年肌若凝脂王老合家親之驚異道士謂王老曰此酒可飲能令人飛上天王老信之初甕酒五斛餘及窺存三二升耳清冷香美異於常醪其時方持麥王老與妻子并持麥人共飲皆大醉道士亦飲云可上天否王老曰願隨師所適於是祥風忽起綠雲如蒸屋舍草樹全家人物雞犬一時飛去空中猶聞打麥聲數村人共觀望驚歎惟貓鼠棄而不去風定其傭力持麥人乃遺在別村樹下後亦不食皆得長生宜君縣西三十里有昇仙村在焉

侯道華

侯道華自言峨嵋山來洎於河中永樂觀中風狂眾道士皆輕易之而道華能斤斧觀舍有所損悉自修葺登危歷險人所難及處皆到又為事賤劣有客到不問道俗凡庶悉為提汲湯水濯足浣衣又陶澗灌園辛苦備歷以資於眾眾益賤之驅叱比於傭隸而道華

愈欣然又常好子史手不釋卷一覽必誦之於口衆或問之要此何爲答曰天上無愚情仙人咸大笑之經十餘年殿梁上忽有異光人每見之相傳言開元中劉天師嘗鍊丹成試犬死人不敵服藏之於殿梁皆謂爲妄言

忽暴風雨殿微損道華乃登梁復見光於梁上陷中鑿起未得一合三重內小金合中有丹遂吞之擲下其合吞丹遂無變動謂之虛誑忽一日入市醉歸及觀前素有松樹偃蓋甚爲勝景乃著木屐上樹悉斫去松枝衆道士屢止之不可但斫曰他日礙我上昇衆人常謂風狂怒之且甚適永樂縣官入觀見斫松深訝之衆具白於縣官縣官於是責辱之道華亦欣然後七日道華晨起沐浴裝飾焚香曰我當有仙使來迎但望空拜不已衆猶未信須臾人言觀前松上有雲鶴盤旋簫笙響亮道華忽飛在松頂坐久之衆甚驚忙永樂縣官吏道俗奔馳瞻禮其責辱道華縣官叩膝流血道華揮手以謝道俗我授玉皇詔授仙臺郎知上清宮善信院今去矣俄頃雲

中仙衆作樂幡幢隱隱凌空而去

馬自然

馬湘字自然杭州鹽官縣人也世爲縣之小吏而湘獨好經史文學乃隨道士天下遍遊後歸江南而嘗醉於湖州鹽官溪經日而出衣不濕坐於水上而來言適爲項羽相召飲酒欲醉方返溪濱觀者如堵酒氣衝人狀若風狂路人多隨看之又時復以拳入鼻及出鼻如故又指溪水令逆流良久指柳樹令隨溪水走來去指橋令斷復續後遊常州適值馬植出相任常州刺史素聞湘名乃邀相見延湘甚異之植問道兄幸同姓欲爲兄弟冀師道術可乎湘曰相公何望植曰扶風湘戲曰相公扶風馬湘則馬風牛但且相知無徵同姓意言與植風馬牛不相及也然植留之郡齋益異之或飲會次相請見小術乃於席上以咒語盛土種瓜須臾引蔓生花結實取食衆賓皆稱香美異於常瓜又於偏身及襪上模錢所出錢不知多少擲之皆稱銅錢撮投井中呼之一一飛出人有收取者須臾復

失又植言此城中鼠極多湘書符令人貼於南壁下以筋擊盤長嘯鼠成羣而來走就符下俯伏湘乃呼鼠有大者近塔前湘曰汝天生微物天與粒食何得穿穴屋室晝夜擾於相公且以慈憫爲心未能盡殺汝宜便相率離此大耳乃迴羣鼠前皆若叩膝謝罪遂作羣莫知其數出城門去自後城內鼠便絕迹後南遊越州經洞巖禪院僧三百方齋而湘與婺州永康縣牧馬巖道士王知微及弟子王延叟同行僧見湘知微到踞而食略無揖者但資以飯湘不食促知微延叟速食而去僧齋未畢及出門又促速行到諸暨縣南店中約去禪院七十餘里深夜聞尋道士聲主人遽應此有三人外面極喜請於主人願見道士及入乃二僧但禮拜哀鳴衆僧不識道者昨失迎奉致貽責怒二百僧到今下床不得其二僧主事不坐所以特來固乞捨之湘唯睡而不對知微延叟但笑僧愈哀乞湘乃曰此後無以輕慢爲意迴去入門坐僧必能下床僧迴果如其言湘翌日又南行時方春

見一家好菰菜求之不得仍聞惡言命延叟取紙筆知微遂言求菜見阻誠無訟理況在道門詎宜勉之湘笑曰我非訟者也作小戲耳於是延叟捧紙筆湘畫一白鷺以水噴之飛入菜畦中啄菜其主趨起又飛下再三湘又畫一獨子走趨捉白鷺共踐其菜碎盡不已其主見道士戲笑曾求菜致此慮復爲他術遂哀求湘曰非求菜也故相戲耳於是呼鷺及犬皆飛走投入湘懷中視菜悉無所損又南遊霍桐山長溪縣界夜投旅店宿舍少而行旅已多主人戲曰無宿處道士能壁上睡即相容已逼日暮知微延叟切於宿止湘曰汝但於俗旅中睡我坐可到明衆皆睡湘躍身梁上以一脚挂梁倒睡適主人夜起燭火照見大驚異湘曰梁上猶能壁上何難俄又入壁久之不出主人祈謝移知微延叟入家內淨處方出及旦主人留連忽失所在知微延叟前行數里尋求已在路傍自霍桐迴永康縣東天寶觀安泊觀有大枯松湘指之曰此松已三千餘年即化爲石自後松果化

爲石忽大風雷震石列側作數截楊旂自廣州節度責授婺州刺史發性尚奇異乃徙兩截就郡齋兩截致之龍興寺九松院各高六七尺徑三尺餘其石松皮鱗皴今猶存焉或人有告疾者湘無藥但以竹拄杖打痛處取腹內及身上百病以竹拄杖指之口吹杖頭如雷鳴便愈其患脚膝腰背馳曲拄杖而來者亦以竹杖打之令放拄杖應手便伸展時有以財帛與湘者再三阻讓不得遂即留之復散與貧人所遊行之處或宮觀洞巖多題詩句其登秦望山詩曰太一初分何處尋空留屋數變人心九天日月移朝暮萬里山河換古今風動水光吞遠微雨添嵐氣沒高林秦皇謾作驅山計滄海茫茫轉更深後歸故鄉省兄適兄遠出嫂姪喜歸湘告曰我與兄共此宅歸來要分此地我唯愛東園耳嫂姪異之小叔久離家歸來兄猶未見面何言分地骨肉之情必不忍如此駐留三日嫂姪訝不食但飲酒而已待兄不歸及夜遽卒明日兄歸兄問妻子其故具以實對兄感慟乃曰我

弟學道多年非歸要分宅是歸託化於我以絕思望耳乃棺斂其夕棺鉤然有聲一家驚異乃窆於園中時大中十年也明年東川奏劔州梓桐縣道士馬自然白日上昇湘於東川謂人曰湘新羽化於浙西今又爲玉皇所詔於此日上昇以其事奏之帝遂勅浙西道杭州覆之發塚視棺果一竹杖而已

鄔通微

鄔通微不知何許人爲道士神氣清爽靜坐默之或吟或醉多遊於洪州名山人見之多年忽十數年不見則顏狀益少於當時如此識者不測耳其服鍊丹藥遊行無定後於酒樓乘醉飛昇而去

許碯

許碯自稱高陽人也少爲進士累舉不第晚學道於王屋山周遊五嶽名山洞府後從峨嵋山經兩京復自荆襄汴宋抵江淮茅山天台四明仙都委羽武夷霍桐羅浮無不徧歷到處皆石崖屋壁人不及處題云許碯自峨嵋山尋偃月子到此親筆蹤者矣莫不歎其

神異竟莫詳。偃月子也。後多遊廬江間。嘗醉吟曰。閒苑花前。是醉鄉。拚翻王母九霞觴。摩仙拍手。嫌輕薄。請向人間作酒狂。好事者或詰之曰。我天仙也。方在崑崙。就宴失儀。見謫人。皆笑之。以爲風狂。後當春景。揮花滿頭。把花作舞。上酒家樓。醉歌昇雲飛去。

金可記

金可記。新羅人也。賓貢進士。性沉靜。好道。不尚華侈。或服氣鍊形。自以爲藥。博學強記。屬文清麗。美容舉動。言談迥有中華之風。俄擢第。進居終南山。子午谷中。懷隱逸之趣。手植奇花異果。極多。膏焚香靜坐。若有思念。又誦道德及諸仙經。不輟。後三年。思歸本國。航海而去。復來。衣道服。却入終南。務行陰德。人有所求。無阻者。精勤爲事。人不可詰也。大中十一年十二月。忽上表言。臣奉玉皇詔。爲英文臺侍郎。明年二月二十五日。當上昇時。宣宗極以爲異。遣中使徵入。內固辭不就。又求見玉皇詔辭。以爲別仙所掌。不留人間。遂賜宮女四人。香藥金綵。又遣中使二人。專看侍。

然可記。獨居靜室。宮女中使。多不接近。每夜聞室內。常有人談笑聲。中使竊窺之。但見仙官。仙女各坐龍鳳之上。儼然相對。復有侍衛。非少而宮女中使。不敢輒驚。二月十五日。春景妍媚。花卉爛熳。果有五雲。喚鶴白鵲。簫笙金石。羽蓋瓊輪。幡幢滿空。仙仗極衆。昇天而去。朝列士庶。觀者填隘。山谷莫不瞻禮。嘆異。

宋玄白

宋玄白。不知何許人。爲道士。身長七尺餘。眉目如畫。端美肥白。言談秀麗。人見皆愛之。有道術。夏則衣綿。冬則單衣。卧雪中。去身一丈餘。周匝氣出如蒸。而雪不凝。又指燈即滅。指人若隙。風所吹。颼然指庭間。草木颼颼而動。多遊名山。自茅山出。潤州希玄觀。後遊括蒼。仙都。辟穀養氣。然嗜酒。或食麋肉。必五斤。以蒜齏一盆。手撮肉畢。即飲酒二盃。用一白梅。人有求得一片蒜食之者。言不作蒜味。有。如異香。終日在齒舌間。香不歇。人間得蒜食者。頗多。而畢身無病。壽皆八九十。玄白到處住。則以金帛求置二三美妾。行則捨之人。皆。

以爲得補腦還元之術。又遊越州。遇大旱。方曝。庭樂龍以祈雨。涉旬。亢陽愈甚。玄白見之。以爲凡所降雨。須俟天命。非上奏無以致之。於是止於玄真觀。焚香上祝。經夕大雨。澍告足。越人極神異之。復南遊。到信州。又逢大旱。祈禱有道士知玄白能致雨。州乃請之。遽作術。飛釘城隍神。雙目刺史。韋德璘怪其貯婦。女復釘城隍。此妖狂也。將加責辱。健步輩欲向之手。脚皆不能動。悉仆倒。枷杖亦自摧折。玄白笑謂德璘曰。使君不悟。劉根欲見誅。罰祖彌耶。德璘方懼。祈禱須臾。致雨。禮而遣之。其靈術屢施。不可備錄。後之撫州南城縣。白日上昇而去。

賀自真

賀自真。莫究其來也。爲道士。居嵩山。有文學。爲事高古。常焚修。精勤。年少人亦不知其甲子。然道俗相傳。見之多年矣。皆不甚爲異。一日雲鶴滿空。聲樂清響。自真忽飛昇而去。時有處士陳陶在東都。見洛城人觀望瞻禮。驚歎不已。遂爲詩曰。子晉鸞飛古洛川。金桃再

熟質郎仙三清樂奏高丘下五色雲屯御苑
前朱頂舞低迎絳節青鬟歌對駐香輶誰能
白晝相悲哭太極光陰一萬年

賣藥翁

賣藥翁不知其姓名人或詰之稱此是真
姓名也有自童稚見之迨于暮齒復見其顏
狀不改常提一大葫蘆賣藥人告疾苦求藥
得錢不得錢悉與之無阻藥皆稱神效或無
疾戲而求藥者得必失之由是不敢妄求
藥敬之如神明常醉於城市間得錢亦與貧
人或戲問之有大還丹賣否曰有一粒一千
貫錢人皆笑之以爲風狂多於城市笑罵人
曰有錢不買藥喫盡作土饅頭去人莫曉其
意益笑之後於長安賣藥抖擻葫蘆已空內
只有一丸出極大有光明安在掌中謂人曰
百年人間賣藥過却億兆人無一人肯把錢
買藥喫深可哀哉今須自喫却藥纔入口足
下五色雲生風起飄飄飛騰而去

鄧去奢

鄧去奢衛州龍丘人也家於九峯山下少入

道遊學道術精思忘疲年三十餘便居處州
松陽縣安和觀即葉靜能故鄉學道之所而
觀北五里有茅山高五十餘丈相傳云漢張
天師及葉靜能皆居此山修道去奢慕前事
登其山遂結菴以居後觀中道士相率山下
居人爲之構屋及造堂宇設老君寫張天師
像及葉靜能真景朝夕焚修朝禮山東南有
一方石潤二丈餘平若砥蓋天生也去奢常
坐其上拱默靜想一旦感神人謂之曰張天
師有斬邪劍二口并瓶盛丹在此石下可以
取之去奢謝神人曰此石天設非人力可加
自惟荒謬守真而已託以山棲獲安久蒙靈
祐劍之與丹詎敢輒取神人曰但勤修無怠
劍丹自可立致後三年神人遂以劍丹送於
去奢劍乃張天師七星劍丹以石匣藏一瓶
盛之瓶蓋得半餘如麻子紅色光明去
奢自服及施人時麗水縣人華造承中和年
荒亂之後擁土人據巖險時東師具以上朝
延後欲息兵授造
以爲而造兇險聞去奢得丹劍而囚鑊去奢
於空屋中時方盛暑一月不與飲食造謂去
奢已斃矣及開屋見神色儼然顏狀光白愈

於來時造極驚異却送去奢歸山劍丹留之
一夜風雷飛鳥失所去奢聞神仙告却歸石
下爾後去奢居山十五年每言常見龍虎異
鳥行於庭際安和觀道士多寄山頂燒香見
龍虎鳥跡咸驚異去奢不食多年他人忽穢
觸其山春冬則猛獸來驚夏秋則毒蛇所螫
去奢又言每見雷雨在山半龍行雨及雷公
電母鬼神甚衆或到此山相見甚有禮焉又
寄宿道士夜皆聞去奢居靜室內到晚與人
談話竊窺之乃聞異香滿山及環珮聲去奢
儼坐有戴遠遊冠絳服螺髻垂髮碧綃衣男
女四人對坐侍從皆玉童玉女光明照身復
有神人遠遊於側而道士皆不敢驚旦歸觀
中傳說以爲異耳却後十五去奢告道士
曰恐當離此山去不長相見也他日忽有綠
雲鸞鶴聲樂滿空徘徊山頂復有輿轎幢幡
靈官駕龍鹿皆五色亦騎鸞鳳迎去奢上昇
而去山下道俗觀望甚衆後野火焚其屋舍
而靈跡尚存今有道士黥祭焉

謝自然

謝自然蜀華陽女真也幼而入道其師以黃老仙經示之一覽皆如舊讀再覽誦之不忘及長神情清爽言談迥高好琴阮善筆札能屬文常鄙卓文君之為人每焚修瞻禱王母麻姑慕南嶽魏夫人之節操及年四十出遠

遊往青城大面峨嵋三十六靖廬二十四治直尋離蜀歷京洛抵江淮凡有名山洞府

靈跡之所無不辛勤歷覽後聞天台山道士司馬承禎居玉霄峯有道孤高遂詣焉師事承禎三年別居山野但日採樵為承禎執爨

而歸又持香果專切問道承禎訝其堅苦曰

我無道德何以勝此然爾竟何所欲自然曰萬里之外嚮師得度世之道故來求受上法以度耳非他求也承禎以女真罕傳上法恐泄慢大道但唯諾而已復經逾歲月自然乃歎曰明師未錄無乃命也每登玉霄峯即見滄海蓬萊亦應非遠人間恐無可師者於是告別承禎言去遊蓬萊聲格資裝布衣絕粒挈一席以投於海泛於波上適新羅船見之就載及登船數日但見海水碧色日落則遠

浪相蹙陰火連天船在火焰中行逾年船為風飄入一色水如墨又一色水如粉又一色水如朱又一色水黃若硫黃氣忽風轉船乃投易漢中有山日照如金色亦有草樹香霧走獸與禽皆黃色船人俱上山見石無大小

悉是硫黃賈客適棄別貨盡載其石凡經四色水每過一水皆三度敬終五晝夜風帆所適莫知遠近復行月餘又橫風所飄海人惶惑舟人恐懼遙見水上湧出大山上列紅旗千餘面海師言是鯨魚揚鬣又晴天忽見氣

直上高百餘里傍若暴風雨此魚腦有井噓吸則氣出如此復見海人怪獸鬼神千態萬狀自然乃焚香想蓬萊構祝須臾俄到一山見林木花鳥煙嵐若春海師登山望有屋舍人家甚衆自然謂曰豈非仙山也而海師言

船人可登山歇泊以候風便俄而人皆登山散遊而自然獨遊一處有道士數人侍者皆青衣有樹風動如金石聲花草香薰人徹骨綠鸞霜鶴碧雞五色犬遊於庭際中有一人花冠霞帔狀貌端美青衣引自然入虔懇禮

海八

十六

謁道士問欲何往自然曰蓬萊尋師求度世去道士笑曰蓬萊隔弱水此去三十萬里非舟楫可行非飛仙莫到天台山司馬承禎名在丹臺身居赤城此乃良師也可以迴去俄頃風起聞海師促人登船言風已便及揚帆又為橫風飄三日却到台州岸自然欣然復往天台具言其實以告承禎并謝前過承禎曰侯擇日昇壇以度於是傳授上清法後却歸蜀止貞元年中白日上昇而去節度使韋皋奏之

裴玄靜

裴氏道名玄靜緱氏縣今昇之女鄆縣尉李言妻也幼而聰慧母以詩書示之覽皆誦之不忘及笄以婦功客自飾而情迥然好道請於父母置於一靜室披戴父母亦崇道深念許之日以香火瞻禮道像以女使侍之必逐於外處獨居若別有女伴言話父母窺之復不見人詰之堅不言索思閑淡雖骨肉常而拘之以禮無慢容及年二十父母欲歸於李言聞之深以為不可唯願入道修真以求度

海八

十七

世父母抑之曰女生有歸是為禮婦時不可失禮不可虧儻入道是畢世無所歸也南嶽魏夫人亦從人棄嗣後為上仙遂逼之以適李言婦禮臻備未一月間告於李言以素修道神人不許為君妻請絕俗李言亦早慕道聞妻之言甚異乃獨居靜室焚修夜中聞言笑聲李言稍疑之未敢驚乃壁隙窺之見光明滿室聞異香芬馥有二女子年可十七八鳳髻霓裳姿態宛麗侍女數人皆雲鬟綰服綽約在側玄靜與二女子言談李言異之而退及旦問於玄靜曰有之此崑崙仙侶相省上仙已知君窺以術止之而君未覺更來慎勿窺也恐君為靈官所責然玄靜與君宿緣甚薄非久在人間道君念君後嗣未立候上仙來當為言之後一夕有天女降李言之室經年復降送一兒與李言此君之女也玄靜即當去矣三日有五雲盤旋仙女奏樂白鳳載玄靜昇天向西北而去

戚逍遙

戚氏道名逍遙冀州南宮人也父教授生徒

以自資而逍遙十餘歲情頗清澹不為兒戲有好道心父母亦知之常行陰德於人而父以女誠授於逍遙覽之曰此常人之事耳遂取老子仙經誦之不輟及笄媒氏詣其家聞之以為不祥迨二十歲父母以適同邑薊潯耕織之家而舅姑嚴酷責之以蠶農怠惰而逍遙晨暮以齋潔修淨為事殊不以生計在意薊潯亦屢責之逍遙白舅姑請退返於父母家及父母家亦逼迥於是以不能為塵俗事願獨居靜室修道以資舅姑薊潯與父母俱有他疑乃棄之於一室而逍遙但以香水為絕食靜想自歌曰笑看滄海欲成塵王母花前別眾真千載却歸天上去一心珍重世間人薊潯家及隣里悉以為妖狂夜聞室內有人言語聲及曉見獨坐亦不驚又三日晨起舉家聞屋裂如雷但見所服衣履在室內仰視半天有雲霞煙靄煥赫鸞鶴飛鳴復有仙樂香輶綵仗羅列逍遙與眾仙俱在雲中歷歷言分別言語薊潯馳報逍遙父母到猶見之已郭之人咸奔觀望無不驚歎

續仙傳卷上

續仙傳卷中

朝請郎前行陳水縣令沈汾編

隱化一十二人

孫思邈

孫思邈京兆華原人也七歲就學日誦千言及長盛談莊老百家之說周宣帝時以王室多事隱於太白山學道鍊氣養形求度世之術洞曉天文推步精究醫藥審察聲色迥蘊仁慈凡所舉動務行陰德用心自固濟物為功偶出路行見人欲殺小青蛇已傷血出思邈求其人脫衣贖而救之以藥封裹放於草間後月餘復出行見一白衣少年僕馬甚盛下馬迎拜思邈謝言小第家道者所救父母欲相見而思邈每以藥救人極廣聞之不以為意少年復懇拜請以別馬載思邈偕行如飛到一城郭花木正春景色和媚門庭煥赫人物繁盛儼若王者之居少年延思邈入見一人端美白帽絳衣侍從甚眾欣喜相接謝思邈曰深思道者固遣兒子相迎前者小兒偶出忽為愚人所傷賴脫衣贖救獲全其

命此中血屬非少共感再生之恩今面道者榮幸足矣俄頃延思邈入若官闈內見中年女子領一青衣小兒出再三拜謝思邈言此兒癡騷為人傷損賴救免害思邈省記嘗救殺青蛇即訝此何所也又見左右皆閭人宮妓呼恰帽為君王呼女子為妃子思邈心異之潛問左右曰此涇陽水府也恰帽乃命賓寮設酒饌妓樂以宴思邈辭以辟穀服氣唯飲酒耳留連三日問思邈所欲對曰居山樂道思真鍊神目雖所窺心固無欲乃以輕綃珠金贈於思邈堅辭不受曰道者不以此為意耶何以相報遂命其子取龍宮所頒藥方三十首與思邈謂曰此真道者可以濟世救人俄復命僕馬送思邈歸山深自為異歷試諸方皆若神效後著千金方三十卷散龍宮之方在其內又以聲色診人之疾著脉經一卷皆盛行於世隋文帝輔政徵為國子博士不就嘗謂人曰過此五十年當有聖人出吾方助之以濟生人唐太宗召詣京師訝其容貌甚少歎曰故知有道者誠可尊重美門之

徒虛言哉將授以爵位固辭不受高宗初召拜諫議大夫復固辭不受時年九十餘視聽不衰范陽盧照鄰有盛名而染惡疾嗟稟受之不同昧邀天之殊致問於思邈曰名醫愈疾其道如何對曰吾聞善言天者必質於人善言人者必本於天天有四時五行寒暑迭代其轉運也和而為雨怒而為風鬱而為霜雪張而為虹蜺此天地之常數也人有四支五藏一覺一寐呼吸吐納瀆而為往來疏而為榮衛彰而為氣色發而為音聲此人之常數也陽用其精陰用其形天人之所同也及其失也蒸則生熱否則生寒結而為瘕贅陷而為癰疽奔而為喘之竭而為焦枯診發手而變動乎形推此以及天地則亦如之故五緯盈縮星辰失度日月錯行彗孛流飛此天地之危疾也寒暑不時此天地之蒸否也石立木踣此天地之瘵贅也山崩地陷此天地之癰疽也奔風暴雨此天地之喘乏也雨澤不時川原涸竭此天地之焦枯也良醫導之以藥石救之以針劑聖人和之以道德輔

之以人事故體有可念之疾天地有可錯之災又曰膽欲大而心欲小智欲圓而行欲方詩曰如臨深淵如履薄冰謂小心也赴赴武夫公侯干城謂大膽也不為利回不為義疚仁之方也見機而作不俟終日智之圓也其文學也穎出其義術也不可勝紀高宗後無可制授承務郎致之尚藥局不就永徽三年二月十五日晨起沐浴儼其衣冠端然而坐謂子孫曰我為世人所逼隱於洞府修鍊將昇無何之鄉臣於金闕不能應召來往俄氣絕遺令薄葬不設盟器柱牢之奠月餘顏色不變舉屍入棺如空衣焉已尸解矣

張果

張果隱於常州條山往來汾晉間時人傳有長年秘術耆老云為兒童持見之自言數百歲矣唐太宗高宗累徵之不起則天召之出山佯死於妬女廟前時方盛暑須臾晷爛生蟲聞於則天信其死矣後有人於常州山中復見之開元二十三年玄宗召通事舍人裴晤馳驛於常州迎果對晤氣絕而死晤乃焚

香啓請宣天子求道之意俄頃漸蘇晤不敢逼馳還奏之乃命中書舍人徐嶠通事舍人盧重玄齋重書迎之果隨嶠到東都於集賢院安置肩輿入宮備加禮敬公卿皆往拜謁或問以方外之事皆詭對每云余是堯時丙子年人時莫能測也又云堯時為侍中善於胎息累日不食時進美酒及三黃元玄宗留之內殿賜之酒辭以山臣飲不過二升有一弟子可飲一斗玄宗聞之喜召之俄一小道士自殿簷飛下年可十六七美姿容奇趣雅澹應對言詞清爽禮貌臻謹明皇命坐果曰弟子常侍立於側未宜賜坐明皇目之愈喜遂賜之酒飲及一斗不醉果辭曰不可更賜過度必有所失致龍顏一笑耳明皇又逼賜之酒忽從頂湧出冠子爆地化為一植明皇及嬪御皆笑驚視之但見一金植在地覆之植咸一斗驗之乃集賢院中植也累試仙術不可窮紀遂下詔曰常州張果先生遊方之外者也跡仙高尚心入杳冥是混光塵應召城闕莫知甲子之數且謂羲皇上人閱以

道樞盡會玄極今則將命鶴書之禮爰旌蟬蛻之流可銀青光祿大夫仍賜號通玄先生果陳老病乞歸常州賜絹三百疋并隨侍弟子二人兼給驛舁到常州弟子一人相隨入山天寶初明皇又遣特詔果聞之忽卒弟子葬之後發棺空棺而已

許宣平

許宣平新安歙人也睿宗景雲中隱於城陽山南塢結菴以居不知其服餌但見不食頗若四十許人行疾奔馬時或負薪以賣常掛一花瓢及曲竹杖每醉騰騰以歸獨吟曰負薪朝出賣沽酒日西歸路人莫問歸何處穿白雲行入翠微爾來三十餘年或濟人艱危或救人疾苦城市之人多訪之不見但觀菴壁題詩云隱居三十載築室南山巔靜夜觀明月閑朝飲碧泉樵人歌隴上谷鳥戲巖前樂矣不知老都忘甲子年好事多詠其詩抵長安者於驛路洛陽同華間傳舍是處題之天寶中李白自翰林以東遊經傳舍覽詩吟之嗟歎此仙人詩也乃詰之於人得宣平之

實白於是遊及新安涉溪登山累訪之不得乃題其菴壁曰我吟傳舍詩來訪真人居煙嶺迷高跡雲崖隔太虛窺庭但蕭索倚杖空躊躇應化遼天鶴歸當千載餘是冬野火燎其菴莫知宣平蹤跡百餘年後咸通七年郡人許明奴家姬常逐伴入山採樵獨於南山中見一人獨坐石上方食桃甚大問姬曰汝許明奴家人也我明奴之祖宣平也姬言常聞已得仙多年汝歸為我語明奴言我在此山中與汝一桃食之不可將出山中虎狼甚多山神惜此桃姬乃食桃甚美頃之而盡宣平遣姬隨樵人歸家言之明奴之族其異傳聞於郡人其後姬憎食日漸童顏輕健愈常中和年以來兵荒相繼居人不安明奴徙家避難姬入山不歸今人採樵或有見其姬身衣藤行疾如飛逐之昇林木而去

劉商

劉商彭城人也家於長安少好學強記精思攻文有胡笳十八拍盛行於世兒童婦女咸悉誦之進士擢第歷臺省為郎性耽道術逢

道士即師資之鍊丹服氣靡不勤功每數光景甚促筋骸漸衰朝馳暮止但自勞苦浮榮世宦何益於己古賢皆隨官以求道多得度世幸畢婚嫁不為俗累豈劣於許遠遊哉於是病免官入道東遊及廣陵於城街逢一道士賣藥聚眾極多所買藥人言頗有靈效眾中見商目之甚相異乃罷賣藥攜手登樓以酒為勸道士所談自秦漢歷代事皆如目覩商驚異師敬之復言神仙道術不可得也及暮商歸僑止道士下樓悶然不是商益訝之商翌日又於街中訪之道士仍賣藥見商愈喜復挈上酒樓劇談歡醉出一小藥囊贈商并戲吟曰無事到揚州相携上酒樓藥囊為贈別千載更何求商記其吟暮乃別去後商累尋之不復見也商乃開囊視之重重紙裹一葫蘆得九粒藥如麻粟大依道士口訣吞之頓覺神爽不飢身輕醒然過江遊茅山久之復往義興張公洞當春之時愛畫溪之景遂於胡父渚葺居隱於山中近樵者猶有見之我劉郎中也而莫知其所止已為地仙矣

矣

劉瞻

劉瞻音小字宜哥瞻兄也瞻家貧好道常有道士經其家見瞻異之問知道否曰知之性饒俗氣業應未淨遽可羅學道士曰能相師乎瞻曰何敢於是師事之道士命瞻山棲求道無必巾裹瞻遂丫角布衣隨道士入羅浮山瞻與瞻俱讀書為文而瞻性唯高尚瞻情慕榮達瞻嘗謂瞻曰鄙必不第則逸於山野尔得第則勞於塵俗竟不及於鄙也然慎於富貴四十年後當驗矣瞻曰神仙遐遠難求秦皇漢武非不區區也廊廟咫尺易致馬周張嘉貞可以繼踵矣自後瞻愈精思於道乃隱於羅浮瞻以進士登科會昌七年及第屢歷清顯及昇輔相頗著愛調之稱俄被請南行次廣州朝臺泊舟江濱忽有了角布衣少年衝暴雨而來衣履不濕欲見瞻左右皆訝乃語之但言宜哥來也以白瞻問形狀具以對瞻驚歎乃迎入見之瞻顏貌可二十來瞻已皓然衰朽方為遂臣悲喜不勝瞻後勉之與

尔為兄弟手足所痛曩日之言今四十年矣
瞻益感歎謂瞻曰可復修之否瞻曰身邀榮
寵職和陰陽用心動靜能無損乎自非弟家
阿兄已昇天仙詎能救尔今惟來相別非來
相救也遂同舟行話平生隔濶之事一夕失
瞻所在今羅浮山中時有見者瞻遂南適歿
於貶所矣

羅萬象

羅萬象不知何許人有文學明天文洞精於
易節操奇特布衣遊行天下居王屋山久之
後南遊羅浮山歎曰此朱明洞天葛稚川曾
棲此以鍊丹今雖無鄧嶽相留聊自駐泊矣
於是愛石樓之景乃於山下結菴以居常餌
黃精服氣數十年或出遊曾城泉山布水下
採藥及入福廣城市賣藥飲酒來往無定忽
一食則十數人之食不足或不食則莫知歲
月光悅輕健日行三四百里緩行奔馬莫及
後却歸石樓菴中竟不復出隱於山中後不
知其所往矣

李珣

李珣廣陵江陽人也世居城市販糴自業而
珣性迥端謹異於常輩年十五隨父販糴父
適他行以珣專其事人有糴之與糴珣即授
之以升斗俾令自量不計時之貴賤一斗只
求兩文利以資父母歲月既深衣物甚豐父
怪而問之具以實對父曰吾之所業同流者
眾無不用出入升斗出輕入重以窺厚利雖
官司以春秋較推然終莫斷其弊吾早悟之
但一升斗出入皆用之自以為無偏久矣汝
今更出入任之自量吾不可及也然衣食豐
給豈非神明之助也後父母歿世及珣年八
十餘不改其業適李珣出相節制淮南而珣
以新節使同姓名極以自驚乃改名寬李珣
下車後數月修道齋次夜夢入洞府中見景
色正春煙花爛熳翔鸞舞鶴彩雲瑞霞樓閣
連延珣獨步其下見石壁光瑩填金書字列
人姓名內有李珣字長二尺餘珣視之極喜
自謂生於明代久歷顯官又昇宰輔能無功
德及於天下今洞府有名我仙人也再三為
喜方喜之際有二仙童自石壁左右出珣問

此何所也曰華陽洞天此姓名非相公也珣
驚復問非珣何人也仙童曰此相公江陽部
民也珣及曉歷記前事益自驚歎問於道士
無有知者復思試召江陽官屬詰之亦莫知
也乃令府城內外求訪同姓名者數日經營
里巷相推乃得李寬舊名及聞於珣乃以
車舉迎之入府致淨室齋沐拜為道兄一宗
敬事朝夕參禮李寬情素恬澹道貌秀異鬚
長尺餘皓然可愛年六十時曾有道者教其
胎息亦久不食珣愈敬之及月餘乃問道兄
平生得何道術服鍊何藥珣曾夢入洞府見
石壁姓名仙童所指是以迎請師事願以相
授辭以不知道術服鍊之事珣復虔拜以問
寬所修如何寬以愚民不知所修遂具販糴
以對珣再三審問咨嗟曰此常人之難事陰
功不可及也復曰乃知世之富貴動靜有損
雖在貧賤用心獲祐名書仙籍以警塵俗又
問胎息不食之由亦以實對珣曰師其胎息
後李寬一百餘歲輕健異常忽告子孫曰吾
寄世多年雖然養氣亦無益汝輩一夕而卒

三日棺裂聲視之衣帶不解如蟬蛻焉已尸解矣

王可交

王可交蘇州崑山人也以耕釣自業居於松江南趙屯村年三十餘莫知其道常取大魚自喜以槌擊殺煮之搗蒜釐以食常謂樂無以及一旦棹漁舟方鼓柁高歌入江行數里間忽見一絲畫花舫漾於中流有道士七人皆少年玉冠霞帔服色各異侍從十餘人髻角雲鬟又四人黃冠乘舫一人呼可交姓名方驚異不覺漁舟已近舫側一道士令髻角引可交上舫見七人面前各有青玉盤酒器果子皆瑩徹有先可交莫識有女妓十餘人悉持樂器可交遠立於筵之末徧拜七人共視可交一人曰好骨相合有仙分生於凡賤間已矣破矣一與酒與侍者瀉酒於樽中酒再三瀉之不出侍者具以告道士曰酒之靈物必若得入口當換其骨瀉之不出亦乃命也一人曰與栗與俄有一人於筵中取二栗侍者送與可交令喫視之其栗青赤光如棗

長二寸許齧之有核非人間之栗內脆而甘久之食方盡一人曰王可交已見之矣可令去命一黃衣送上岸乃於舫邊覓所乘漁舟不見黃衣曰不必漁舟但合眼自到於是合眼若風水林木浩浩之聲令開眼已到及開眼失黃衣所在但見峯巒重疊松栢參天坐於路中石上及望見有門樓人出入俄頃樵者并僧十餘人到問可交何人可交具以前事對又問何日離家可交曰今日早離家又問今日是何日是三月三日樵者與僧驚曰今日是九月九日去三月三日已半年餘可交問此地是何所僧曰此是天台山瀑布寺前也又問此去華亭多少地僧曰水陸千餘里可交自訝不已為僧邀歸寺設食可交但言飽不喜聞食氣唯飲水耳衆僧審問極異之乃以狀白唐興縣以達台州聞於廉使王泚泚素奉道召見極以為非常之事神仙變化不可測也可交身長七尺餘儀貌殊異言語清爽泚歎曰此誠真人也又以同姓益敬之飾以道服而遣人往蘇州以詰所貫具

言可交三月三日乘漁舟入江不歸家人尋得漁舟謂恐墮水而死妻子已招魂葬矣王泚具以奏聞詔稱其異後可交却歸鄉里備詰歷歷及與鄉人到江上指所逢花舫之處依然可交食栗之後已絕穀動靜若有神助不復耕釣乃挈妻子往四明山二十餘年復出明州賣藥使人沽酒得錢但施於人時言藥則虛公所授酒則餘杭阿母相傳藥極祛疾酒甚醉人明州里巷皆言王仙人藥酒世間不及道俗多圖其形像有患疔及邪魅者圖於其側即愈後三十餘年却入四明山不復出今人時見者

李昇

李昇字雲舉自言江夏人唐德宗甲午年生幼而聰悟及長博通羣書能文機捷出口成章為性高古師於少室山道士學鍊氣養形之術常布衣遊行天下時元稹廉察浙東白居易出牧錢塘以昇舊友皆慕昇之文學道術邀至於賓席間問昇生當太平之世何不就榮祿而久為布衣對曰不為世徵徵亦不

就乃徐吟曰生在儒家遇太平玄練重滯布衣輕誰能世路超名利臣事玉皇歸上清元與白奇之以詩酒飛留歲餘復去他遊莫知所之僖宗庚子歲黃巢犯關之後天下騷然唯江左稍安宛陵主帥田頌常好道術而昇五十年前宛陵有耆老為童稚時識之言狀貌不改於當時人甚異之田頌乃延之師敬益厚光澤輕健若四十餘許人鬚髮甚黑目瞳且方牙齒尖銳如排棗核好喫石蓮須更咬一升皆作兩截人不可學飲酒二斗不醉絕穀養氣雪中單衣而顏益紅白時引中指指燈火餘若聞風所吹不知其服餌人問其道術長生之事皆矯詞以對忽告人曰我厭此世兵革紛紛不如去矣時昭宗為朱全忠所篡昇聞而不平翌日俄氣絕顏色不變舉之就棺空衣耳已年一百四十七歲矣未月餘間田頌兵敗禍及昇已先覺而去亦嘗言之於人咸思之聖人也後累有人於蜀中見之

葉千韶

葉千韶字魯聰洪州建昌人少事師西山道士許吳二真君道術辟穀服氣嘗獨居山中忽大風雷雨電有一白衣人拜千韶言君道德臻備仙籍褒昇當在人間役使鬼神更顯功績今神人將降君可以見之無所畏也於是千韶焚香拱默以坐俄頃雲中有遠遊來衣真官一人降又神將十餘人皆帶劍佩龍虎符部從鬼神甚眾有二黃衣綠衣吏各執簿一卷神將皆列拜千韶真官謂千韶曰天命授君此簿神將吏兵幸備役使以救世人千韶拜授天書捧其簿閱之若人間兵籍也吏掌其簿書請召即應命自後長嘯則風生林壑噴水則雨流原野掃地則雷鳴轆轤手畫空則電光燦人乃遊行天下若徉狂常醉騰騰於城市間忽驅叱似振威人問之何為如此應之曰我見某處大災某處亢旱使雨救之耳人皆覆之實有其驗或經過郡縣逢早皆請救之千韶乃備香案啓祝須臾降雨人有請致雷者脚踏地便鳴從地底發轆轤聲或苦雨祈晴不應乃請千韶止之遂作術

便晴霽冬中或旱祈雪千韶乃單衣跣足立於日中嘯詠俄頃風雲會合降雪連宵又以符救人疾苦不俟人之求請見疾者無不憫而救之有邪魅者聞千韶之名自愈得符者終身不復更發咸通十一年遊及濠州聞刺史劉昉忽中風垂死名醫莫療千韶策杖入州曰感我此來使君再生矣於是書符三道貼於肩膊腿曰驅風從腳出三日當愈風果颺颺從腳心出三日平復如故昉博通文學素好道術歷官得郡善政及人乃謂賓吏昉平生師道忽中暴風遽感聖人以相救療董奉還士燮之寬庶可侔矣實道力之所報也郡人皆神於千韶昉乃迎之於郡齋欲師事厚以金帛謝之千韶遽捨昉而去尋之無蹤後荆襄間人見詒濠州事而笑十餘年却隱於西山今人時有見之者

徐鈞者

徐鈞者不知其名自稱東海蓬萊鄉人也言談清爽皆引子史捷而能文每自吟曰曾見秦皇架石橋海神忙迫漲驚潮蓬萊隔海雖

難到直上三清却不遙常腰懸一葫蘆掉扁舟泛於鄂渚上及三湘下經五湖每將魚就松江市井博酒與人吟話而去垂白好事者言識之數十年矣而顏貌不改人或戲留之約名目斤數釣魚須臾得魚如其約人皆異之及見人有疾即葫蘆內取藥救之其藥如麻栗大不許人服食唯以酒研塗心腹間其疾便愈無不神驗人有問之藥可服食否曰可祇是入口便憎飯去好道者服其藥一粒十年絕食而常須飲酒喫水暢之顏益紅白齒髮不衰得其藥者甚多壽皆八九十廬山錢朗累服其藥極得長年今江湖漁人時有見者逐之舟去如飛不可近乃是水仙也

錢朗

錢朗字內光洪州南昌人也少居西山讀書迥為精儒勤苦節操五經登科累歷世宦清直著稱所履皆有遺愛時論美之唐文宗朝為南安都副使後為光祿卿歸隱廬山情潔好道師於東嶽道士得補腦還元服鍊長生之術昭宗世錢塘彭城王錢鏐慕朗得道長

年乃迎就錢塘師敬之勤切時朗已一百五十餘歲童顏輕健玄孫數人皆以明經進身仕為宰輔已皓首矣而朗猶如稚穉之子錢鏐逼傳秘術朗駐泊錢塘二十餘年忽一日告別言我處世多年適為上清所召今須去矣俄氣絕數日顏色怡暢如生異香滿室舉之就棺已為尸解玄孫謂人曰吾之高祖年一百七十歲矣

續仙傳卷中

續仙傳卷下

海十

朝請郎前行深永縣令沈汾編

隱化八人

司馬承禎

司馬承禎字子微博學能文政篆迥為一體號曰金剪刀書隱於天台山玉霄峯自號白雲子有服餌之術唐則天累徵不起睿宗雅尚道教屢加尊異承禎方赴召睿宗問陰陽術數之事承禎對曰老子經云損之又損以至於無為且心目所見知每損之尚未能已○豈復攻乎異端而增智慮哉睿宗曰理身無為則清高矣理國無為如之何對曰國猶身也老子云留心於澹氣合於漠順物自然乃無私焉而天下理易曰聖人者與天地合其德是知天不言而信不為而成無為之旨理國之要也睿宗深賞異留之欲加寵位固辭無何告歸山乃賜賚寶琴花帳以遣之公卿多賦詩送之常侍徐彥伯攝其美者二十餘篇為製序名曰白雲記見傳於世盧藏用早隱終南山後登朝居要官見承禎將還天台

藏用指終南謂之曰此中大有佳處何必天台承禎徐對曰以僕所觀乃仕宦之捷徑耳藏用有慚色明皇詔於王屋山置壇室以居之承禎善篆隸金剪刀書自成一家體帝命以三體寫老子刊正文句嘗鑄合象鑑震景劍進之命光祿卿韋浩至所居按金錄設祠厚錫上封泰山回問承禎五嶽何神主之對曰嶽者山之巨鎮而能出雲降雨為國之望然靈仙所隱別有仙官主之於是詔五嶽別立仙官廟時女真焦靜真泛海詣蓬萊求師至一山見道者指言曰天台山司馬承禎名在丹臺身居赤城真良師也靜真既還詣承禎求度未幾昇天嘗降謂薛季昌曰先生得道高於陶都水之任當為東華上清真人開元中文靖天師與承禎赴長生殿千秋節齋直中夜行道畢隔雲屏各就枕斯須忽聞小兒誦經聲玲玲如金玉響天師乃褰裳躡步而窺之見承禎額上有小日如鏡光耀一席逼而聽之乃承禎腦中之聲也天師退謂其徒曰黃庭經云泥丸九真皆有方圓一寸處

此中又云左神公子發神語先生之謂有弟子七十餘人忽曰吾玉霄峯東望蓬萊有靈真降駕今為東海一青童君東華君所召必須往俄頃化去如蟬蛻虬弟子整其衣冠焉時年八十有九詔贈銀青光祿大夫謚正一先生帝親文其碑韋渠牟作傳嘗撰修真秘旨天地宮府圖坐忘論登真系等行於世

曹德休

曹德休自言從東海青嶼山來遊江西人見之三十餘年顏貌不改常行民間有疾者以符藥救之無不愈人有一女子年二十餘將聘於人忽有邪物為魅百方治之益甚其父詣德休具陳病狀德休曰汝家居近山溪有潭穴否父言有之德休又曰女子春時閑步溪側為蛟所窺已拘攝精魂在其穴矣汝可將吾一符往彼投於潭中少頃有驗投符之後忽見潭水翻涌水霧霍聲須臾一物浮出長二丈餘形如烏蛇頭若大杓已劈裂腦流血斃矣其父還家見女精神明爽全失其病乃以財帛往謝德休曰本以救病何以此為

終不肯受德休常謂人曰若家有疾苦不必財帛就德休求符藥以江魚為餽一盤并美酒一壺饗吾告之其疾自痊如其言鄉里為之無不應驗人皆神事之後忽告人曰我捨此入西山天寶洞去然來春牛疫頗甚我留一姓名與汝傳寫牛疫之時以餽饗吾書其字帖牛角上自當無苦其後牛果大疫一境之內帖其字者免災不帖者斃人咸思之無復見者

王元芝傳云曹德休西晉大史官後梁尚書郎得不死之道

間丘方遠

間丘方遠字大方舒州宿松人也幼而辯慧年十六通經史學易於廬山陳元悟二十九問大丹於杏林左元澤元澤奇之謂方遠曰子不聞老子云吾有大患為吾有身蓋身從無為而生有為今却反本是曰無為夫無為者言無即著空言有則成礙執有無即成滯但於有無一致泯然無心則庶幾乎道且釋氏以此為禪宗顏子以此為坐忘易云無思也無為也寂然不動感而遂通天下之故其歸一揆又經云迎之不見其首隨之不見其

後是何物也子若默契神證又何求焉所惜者子之才器高邁直可爲真門之標表也方遠稽首致謝而去復詣仙都山隱真巖事劉處靜學修真出世之術三十四歲受法錄於天台山玉霄宮葉藏質真文秘訣盡蒙付授而方遠守一行氣之暇篤好子史羣書每披卷必一覽之不遺於心常自言葛稚川陶貞白吾之師友也銓太平經爲三十篇備盡樞要其聲名愈播於江淮間唐昭宗景福二年錢塘彭城王錢鏐深慕方遠道德訪於餘杭大滌洞築室宇以安之昭宗累徵之方遠以天文推尋秦地將欲荆榛唐祚必當革易俾之園綺不出山林竟不赴召乃降詔褒異就頒命服俾耀玄風賜號妙有大師玄同先生闡揚聖化啓發蒙昧真靈事跡顯聞吳楚由是從而學者無遠不至弟子二百餘人會稽夏隱言燕國戴隱虞榮陽鄭隱瑤吳郡凌隱周廣陵盛隱林武都章隱之皆傳道要而陞堂與者也廣平程紫霄應召於秦宮新安聶師遠行教於吳國安定胡謙光魯國孔宗魯

十人皆受思真鍊神之妙旨其餘遊於聖迹藏於名山不復得而記矣天復二年二月十四沐浴焚香端拱而坐俟停午而化顏色怡暢屈伸自遂異香芬馥三日不散弟子以從俗葬舉以就棺但空衣而尸解矣葬於大滌洞之傍白鹿山復有通俗於仙都山及廬山累見之自言我捨大滌洞歸隱瀟山天柱源也

聶師道

聶師道字通微新安歙人也性聰淳直言行謙謹養親以孝聞深爲鄉里所敬少師事于方外即德誨之從兄也德誨自省郎出牧新安乃於郡之東山選勝地構室宇以居之目爲問政山房而師道事之辛勤年十三披戴冠裳十五傳法錄修真之要後出遊績溪山自言嘗覽內傳見服松脂法乃與道侶上百丈山採松脂崖石迴聳百丈遂以名之其四望高千餘仞夜宿於崖頂松下天清月朗忽聞仙樂起自東南紫雲上遙遙而來遲緩過於石金山石金與百丈其高相等雖平地隔

三十餘里山頂相望咫尺間乃聞仙樂到彼較少時擊小鼓三通復通奏金石笙簫絲篳響亮擊鼓而拍莫審其曲調聲揚而清特異人間之樂自三更及雞鳴而止後問於山下人是夜皆聞之其同侶嘆曰方採靈藥遽聞仙樂豈非有感此亦君得道之嘉兆矣其後遊行歸南岳禮王清及先天碧玉二壇後泊招仙觀入洞靈源時當春景聞蔡真人舊隱處不遠有花木甚異採樵者時或見蔡真人在其間師道喜之乃辟穀七日晨起獨往山中徐行聞花有異香不覺日晚忽到大溪傍見一樵人臨水坐於沙上師道驟欲親近方乃負樵將下溪回顧師道却駐樵檐問獨此何往應之曰學道尋仙深心自切聞蔡真人隱此山願一禮謁爾樵人曰蔡君所居極深人不可到師道曰攀蘿登崖已及於此有山通行豈憚遠近樵人又曰日將暮矣且行過此山東有人家可宿師道欲隨樵人去樵人遽入溪水甚淺及師道入水極深而急不敢涉樵人曰汝五十年後方過得此溪目送樵

人涉水面而去不見師道回山東十餘里遙望見草舍三間有籬落雞犬漸近見一人青白色似農人年可三十獨居見師道到甚訝師道深山自行主人又問師道此來何之應曰尋蔡真人居主人曰路上見樵人否曰見主人曰此蔡道者適過也師道聞之禮祝曰凡愚見仙聖不識亦命也已過夜山林深黑投宿無地又問曰從何來具以發迹新安尋真之由以對乃許入其舍復指師道令近火爐邊牀上坐曰山中偶食盡求之未歸師道曰絕粒多時却不以食為念見火側有湯鼎復有數箇黃磁合主人曰合內物可喫任意取之乃揭一合是茶主人曰以湯潑喫及喫氣味頗異於常茶久之復思茶更揭之合不可開徧揭諸合皆不能開師道心訝不似村人家而不敢言主人別屋睡日高不起又無火燭睡中曰此孤寂之處忽病無以相待前村人家甚多可以往彼師道遂行數里不見人家悉是崖險乃回已迷向宿之處復行約三十餘里忽逢見一老人欣喜邀於石上坐

問入山之意具以前事對之老人曰蔡君父子俱隱此山昨夜所宿之處即其子也又曰爾道氣甚濃仙骨未就入山饑渴易能久留此哉俄折草一莖與師道形若薑苗而長尺餘嚼味甘美復令取泉水喫次舉頭已失老人所在師道悲嘆不已而覺食茶草之後氣力輕健愈於來時却欲沿山路尋宿處其路已為棘蔓蔽塞前去不通却回招仙觀衆道士驚異曰此觀雖靈岳側近虫獸甚多人罕能獨行何忽去月餘日實久憂望師道曰昨日方去始經一宿具言見樵人及宿處又逢老人道士皆嘆曰吾輩雖同居此觀徒為學道知有蔡真人無緣一見吾子夙有仙分已見蔡君父子其老人者昔聞彭真人亦隱此山豈非彭君子乎一入山遽逢三仙人一宿一宿人間月餘矣其實積習之命也師道深自嘆異駐招仙觀修鍊餘年後以親老思歸却回問政山每入諸山拾薪斫藥或逢虎豹見師道則垂耳搖尾俯伏於地師道以手撫而呼之乃起隨行或以薪藥附於背上負之

送歸而去昔郭文舉居大潯洞伏虎亦如之歛之近山頗有猛獸而不為人之害者自師道之感也其親時問師道遊學所益具陳其事親聞之而喜曰汝以孝養我以道實亦幸為汝母失此蓋宿慶之及也後又出遊復思往南岳九嶷山早聞梅真人蕭侍郎皆隱玉笥山時人多見之梅即南昌尉梅福也蕭即梁之公子蕭子雲也自東陽太守避侯景之亂全家入山二人俱得道於此師道且止玉笥清虛觀思慕梅蕭三遊郁木坑或冀一見堅心而去山行極深忽見一人布衣烏紗帽顏若五十許人師道禮敬問之初自稱行者問師道何往乃以尋梅蕭為答行者曰聞爾精勤慕道徧訪名山誠亦非易欲見二君行者可以相引爾宿業甚淨已應玉籍有名雖未便飛昇當亦度世爾行者又曰我謝通修也恐爾未識故以自言本居南嶽與彭蔡同隱已三百年知爾嘗遊洞靈源我適為東華君命主玉笥山林地仙兼掌清虛觀境土社今爾與我素有道緣是得相見然梅蕭日中

為小有洞王所召恐未便還未可俟也師道於是度拜曰凡世內人誤探大道凝神注想以朝繼夕未知要妙若浮于海詎識其涯不期今日獲見道君實曠劫之幸也通修曰丹心懸苦深可憫哉爾世事未了且當送爾出

山路往我所止第十隨行數里忽見草舍兩間甚新潔有床席小鑪然火煎湯儼若書生所居而無人通修命師道入坐於木馬上通修自坐於白石鹿上俄有一髻童童以湯一盆與師道叩之神氣爽然又指令架上取書一卷通修曰此素書也但習之無怠當得真旨師道意欲求住師學之未啟言而通修已知曰爾有親老雖有兄能養若欲更南遊此未可言住我有弟子曰紫芝在九嶷山若往彼見之為我傳語兼出素書示之得盡其旨矣或

入都木坑到舊處巖石草樹歷歷宛然但失其草舍竟日悵望而迴師道得素書文字可識皆說龜山王母理化衆仙秘要真訣地仙習此當得昇天世人授之跡叅洞府其間疑義不可究也後南遊到九嶷山湘真觀月餘尋問紫芝蹤跡咸言毛如溪有一隱士莫知姓名人或見者師道累入山尋之不見遂如通修言投書題石後嘗夢神仙稱紫芝教之以疑義意乃醒焉經歲餘復還問政居三十餘年每變化即以二蔡彭謝真形像貌瞻禮仍自以管輅編異傳於道俗其後吳太祖霸有江淮聞師道名跡冀其道德獲於軍庶繼發微召及至廣陵建玄元宮以居之每昇壇祈恩禱福水旱無不致天地感動煙雲呈祥是以人情咸依道化境若華胥俗皆可封第十一雖古今異時實大帝之介君也遂降褒美為

朝廷皆命以紫衣光其玄門道中有秦吳齊荆燕梁閩蜀之士咸來逾紀勤苦奉事師道常謂之曰我無道術何以遠來若此弟子皆曰昔張君居蜀天下之人悉往事之隨其所修各授以道焉羣弟子執奴僕之役久而不去者方得成仙今悉是枯骨子孫日逼朽腐思避短景希度長生願無却懇切也然師以仁慈接衆言不阻違隨其性適指以道要若久行霧露餘潤漬衣近蘿沉檀輕香襲體由是居廣陵三十年有弟子五百餘人而師道胎息已久鍊丹有成一旦告弟子曰我適為黑幘朱衣一符吏告我為仙官所召必須去矣頃之異香滿室雲鶴近庭若有真靈所集爽然言別而化弟子歛之棺忽有聲視之若蟬蛻尸解矣弟子葬其衣冠爾後數十人自豫章來見之領一丫童行道俗多識之咸問何為遠遊曰離南嶽多年今暫往耳所在多宿泊舊遊宮觀而去半年後人自長沙來亦如豫章所見復見衡陽路見歸洞靈源去燕人言五十年後過溪適足驗矣詳其由來是

二蔡彭謝之儔侶也隱化而往絕世思望神仙皆然其後將二十年問政山屢有雲鶴呈祥盤旋竟之歛之鄉里親族以爲師道之還故鄉若令威華表之驗也弟子范可保數十人復發所藏衣冠遷歸于問政山之陽狀列羣情聲以上聞乃降詔曰詢諸贈典繫乃章啓有厥由于何不舉淮浙宣歙管内道門威儀道逸大師問政先生爲國焚修大德賜紫聶師道早通玄理夙契真風野鶴不羣孤雲自在昔太祖創基之際已命焚修及元勳匡國之初早曾瞻敬眷言道行寔冠玄關雖昇遐屢歷於光陰而遺懿益隆於寰宇况教門一請台輔奏陳且將啓玄墟即迴故里是用加之峻秩錫以崇階式表休息庶昭往行可贈銀青光祿大夫鴻臚卿問政先生自王戲歸欽涉江山千有餘里朝行暮止皆有雲彩映野鶴聲響空若迎引隨覆及問政山三日而散

穀文祥

穀七七名文祥又名道筌常自稱七七俗多

呼之不知何所人也遊行天下人久見之不一測其年壽而光白若四十許人到處或易其姓名不定曾於涇州賣藥時靈臺著漢疫病俱甚得藥者入口即愈皆謂之神聖得錢却施於人而嘗醉於城市間周實舊於長安識之尋爲涇源節度廷之禮重慕之道術還元之事及實移鎮浙西後數年七七忽到復賣藥實聞之驚喜召之師敬益甚每自醉歌曰琴彈碧玉調藥鍊白玉砂解醒逡巡酒能開頃刻花實常試之悉有驗復求種瓜釣魚若葛仙公也鶴林寺杜鵑高丈餘每春末花爛熳寺僧相傳言貞元年中有外國僧自天台鉢孟中以藥養其根來種之自後構飾花院鏤閉人或窺見女子紅裳艷麗遊於樹下有輒採花折枝者必爲所崇俗傳女子花神也是以人共保惜故繁盛異於常花其花欲開探報分數節使實僚官屬繼日賞翫其後一城士庶四方之人無不酒樂遊從連春入夏自旦及昏閭里之間殆于廢業實一日謂七七曰鶴林之花天下奇花常聞能開頃刻花

此花可開否七七曰可也實曰今重九將近能開此日乎七七乃前二日往鶴林宿焉中夜女子來謂七七曰道者欲開此花耶七七乃問女子何人深夜到此女子曰妾爲上玄所命下司此花然此花在人間已逾百年非久即開聞花去今與道者共開之非道者無以感妾於是女子瞥然不見來日晨起寺僧忽訝花漸拆藥及九日爛熳如春乃以聞實一城士庶驚異之遊賞復如春夏間數日花俄不見亦無花落在地七七偶到官僚家適值賓會次主與賓起而迎奉之有佐酒倡優共輕侮之七七乃白主人欲以二粟爲令可乎咸喜謂必有戲術資於歡笑乃以粟巡行接者皆聞異香驚歎唯佐酒笑七七者二人化作石綴在於鼻掣拽不落但言穢氣不可堪聞二人共起狂舞花鈿委地相次悲啼粉黛交下及優伶輩一時亂舞鼓樂皆自作聲頗合節奏曲止而舞不已一席之人笑皆絕倒久之祈謝於七七有頃石自鼻落復爲粟傳之異香及花鈿粉黛悉如舊略無所損咸

敬事之七七酌水爲酒削木爲脯使人退行
指船即駐呼鳥自墜唾魚却活撮土畫地狀
山川形勢折茅聚蟻變城市人物有曾經行
處見之言歷歷皆似但小狹耳凡諸術不可
勝紀後二年薛朗劉浩作亂竄南奔杭州而
寶總戎爲政刑及無辜前上饒牧陳全裕經
其境構之以禍斥其盡族寶八十三筋力尤
壯女妓百數蓋得七七之術後爲無辜及全
裕作屬一旦忽殂七七劉浩軍變之時在甘
露寺爲衆僧推落北崖墮江死矣其後人見
在江西十餘年賣藥入蜀莫知所在鶴林寺
花兵火焚寺樹失根株信歸闕苑矣

譚峭

譚峭字景昇國子司業洙之子幼而聰明及
長頗涉經史強記問無不知屬文清麗洙訓
以進士業而峭不然迥好黃老諸子及周穆
漢武茅君列仙內傳靡不精究一旦告父出
遊終南山父以終南山近京都許之自終南
遊太白太行王屋嵩華泰嶽迤邐遊歷名山
不復歸寧父馳書委曲責之復謝曰茅君昔

爲人子亦辭父學仙今峭慕之冀其有益父
以其堅心求道豈以世事拘之乃聽其所從
而峭師於嵩山道士十餘年得辟穀養氣之
術唯以酒爲樂常醉騰騰周遊無所不之夏
服烏裘冬則絛布衫或卧於風霜雪中經日

人謂其已斃視之氣出休休然父常念之每
遣家童尋訪春冬必寄之以衣及錢帛捧之
且喜復書遽厚遣家童迴纔去便以父所寄
衣出街路見貧寒者與之及寄於酒家一無
所留人或問之何爲如此曰何能看得盜之
所竊必累於人不衣不食固無憂矣常欣欣
如也或謂風狂行吟曰線作長江扇作天靱
鞋拋向海東邊蓬萊信道無多地祗在譚生
拄杖前爾後居南嶽鍊丹成服之入水不濡
入火不灼亦能隱形變化復入青城山而不
出矣

杜昇

杜昇字可雲自言京兆杜陵人也莫測其年
壽不食常飲酒三斗不醉顏甚悅澤若三十
許人裹方巾破幘頭冬則常着絛布衫而言

談甚高有文學人或有不換新布衫必受之舊
者堅不脫新者出門逢人便與之常遊城市
間醉行能沙書好於水枕及盆中以沙書龍
字浮而左右轉或叱之飛起高丈餘隱隱若
雲霧作小龍形呼之復下水中頃刻之間得

錢甚多便散與貧人及酒家如此到處日日
爲之人皆不厭無錢與之人疑以術惑於衆
也冬則卧於雪中三兩日人以爲僵斃矣或
撥看之徐起抖擻雪而行猶醉酣而醒爾氣
出如夏醉睡醒也杜孺休邠國公琮之子爲
蘇州牧忽聞可雲在城市極喜乃延入州拜
之呼爲道翁賓客察屬皆訝之孺休曰先君
出鎮西川日與此道翁深相善常來去書齋
中時孺休纔十餘歲今五十餘別道翁四十
年而裝飾顏貌一如常時遂留之郡齋咨以
道術可雲曰但以政化及人慈愛爲意況今
多事由在保身未能脫徒塵世委家林野宜
遠於兵傷道術詎可問也時入郡中則孺休
必以錢帛與之阻讓不可出城便散與人孺
休敬之愈甚可雲或與孺休賓客聚飲有唱

和者而可雲出口成章意思深遠多神仙旨趣人無以繼之後軍亂孺休果為兵傷而斃可雲人見亦被傷但有舊布衫一領作三四段破痕在地後數日人多見過松江浙江經杭越衢信入江西市中醉吟沙書如舊又一年人於湖南見之問蘇州事歷歷話如目擊復笑而言曰吾曾居南嶽今在人世已久即當歸矣其後更不復見詳其由是得隱形解化之道世人莫可知也

羊情

羊情者泰山人也以世緣官家於縉雲明經擢第解褐嘉州夾江尉罷歸縉雲兄忱為台州樂安令而情幽棲括蒼山性唯沉靜薄於世榮雅尚逍遙常慕道術一旦妻暴亡曰莊生鼓盆深為達者今樂矣葬之不亦宜乎男且有業女以有歸永無累也後遊阮郎亭崖上去地十餘丈有篆書刻石字極大世傳云漢阮肇題詩入石模塌驗之乃是李陽水嘗為縉雲令遊此亭題詩曰阮客身何在仙雲洞口橫人間不到處今日此中行惜於亭側

與縉雲觀道士數人花時飲酒日午忽仆地若斃氣息猶煖乃昇還家七日方醒鄉里之人與道士俱往問之情曰初為一人青幘絳服自稱靈英邀入洞府中見樓觀宏麗鸞鶴迴翔天清景暖異於人間須臾一石穴中有物飛出狀如鰲青色柄長靈英指之曰此青雲芝也可食之得仙情覺饑方甚取坐於石上食之味甘美俄而都盡靈英曰爾宿有仙分今日遽得見仙官乃引見遠遊冠雲霞帔三人文武侍從極多靈英曰一人小有天王君一人華陽大茅君一人隱玄天佐命君情歷階過拜之咸曰有仙骨未得飛昇猶宜地上修鍊俄頃靈英送出乃括蒼洞西門也情方悟此身後不喜穀氣但飲水三升日食百合一盞身輕骨節皆動抖擻如竹片拍板聲又多言語吟詠若與人談話相詰晝夜不停或以紙三二百張書之頃刻皆徧文字人莫之識情讀之悉是文章道俗好事者依口錄之實亦清詞麗句多神仙瀛洲閬苑之意如此經一年清瘦輕健有不信者謂之妖物所

魅又二年不喜百合唯飲水與酒三年後贅疑如漆面有童顏行輕似飛飲酒三斗不醉始衣布褐人或問之三年無師何似學情曰凡所為者非自能皆神人教之後乃往樂安省兄一日而別又往天台亦一日而到日行三四百里復歸仙都餌藥養氣二十餘年後南入委羽山而去

續仙傳卷下

歷世真仙體道通鑑序

賦一

白海瓊先生曰晉抱朴子作神仙傳所紀千有餘人劉綱法師復綴一千六百爲續仙傳宋朝王太初集仙者九百人爲集仙傳宣和間考古校今述所得仙者五萬人謂之仙史盛矣哉太上無爲之教也每觀超俗至士潔己高人或孝子忠臣或烈婦貞女傲節於清虛之地游心於玄妙之鄉欲隱晦以韜光慕超凡而躋聖故乃嚙渾沌握洪濛日月之精參天地之化澡心而浴性養素以存真探虛無以爲立鼎之根基究妙有以爲煉丹之藥物鉛升汞降賴水火以烹煎虎躍龍騰仗陰陽而制伏故有金翁姹女之號黃婆丁老之名是皆修煉之祕事昇玄之密旨也太上垂教字曰金丹得人則傳誓盟授受其始也煉精爲氣煉氣成神煉神合道以至羣陰剝盡體變純陽身外有身胎仙變化方曰丹圓九轉法契大成以至積陰功而至三千修德行而逮八百太一符召移居蓬島之間上帝詔徵飛步大羅之境其次功行則四種

尸解百變神遊更且師資有殊有分修習不一或念經持呪飲水吞符或存思運用燕津服氣或餌草木之藥或烹金石之丹萬法千門總歸一道所謂處處垂楊堪繫馬家家有路到長安然惟內煉金丹該括萬化如遵正

路如水朝宗故凡尸解飛昇莫不由此超度方其修煉之時也忘世榮華甘心寂澹灰頭垢面破服弊衣或露宿而雨眠或松餐而澗飲或和光而混俗或臥世而避塵散處山林徧遊湖海宴息洞府涉覽世途其庸輩凡流輕耳賤目者以告稚甲以諭乙此貧道人也此丐子流也近之者轉身觀之者回盼其有能尊而事之者幾希有如貴官者恃圭爵以爲高富豪者懷金貲以爲重其笑而恥爲之似者紛紛皆是矣及其潛功外修精心內煉乘雲馭氣策空駕浮名紀上清身栖碧落則旒冕屈尊而下拜金紫仰慕而驚心吁吾於道又何損益哉惟我元始天尊在昔大浮黎土寶珠說經都竟天人廓散十方當此之時道演羣黎恩霑萬有

茂開劫運啓迪真風逮至

無上道君

太上老君繼演斯玄迭振其化暨我昊天上帝符曆開極真道凝虛梯級羣仙陶冶萬類白日飛昇之士尸解神變之人自古迄今益盛而益隆也愚者一介渺微苦耽玄學欲希度世頗厭俗紛常觀儒家有資治通鑑釋門有釋氏通鑑惟吾道教斯文獨闕白海瓊先生之所謂傳所謂史皆不見行於世間因錄集古今得道仙真事跡究其踐履觀其是非論之以大道而開化後人進之以忠言而皈依太上務遵至理不詫虛文但真仙玩世顯少隱多其所留名百不逮一且傳記行藏每有聞見之先後蹤跡變化難以次序而鋪舒是故不可例世間作史編年紀事論也如得一名真仙證道須是詳審校定嚴行筆削不敢妄書庶幾剖判仙凡垂名者貴人間天上普見愚衷惟萬劫至人上士鑒之焉編成名之曰歷世真仙體道通鑑浮雲山聖壽萬年宮道士趙道一再拜焚香謹序

傳聞異辭所傳聞異辭況神仙狡獪或亡氏名變氏名不可知如張子房傳黃石公即赤松子赤松子即圯上老人圯上老人即四皓四皓即東海君東海君即力士人自不悟當時若非此一老人變化豈有平沙曠野能自蔽并蔽力士又豈有路傍兵革間有四老同處爲上所知而人無聞焉從是而推八公能老能少眇道士遽如許遽如許皆意生身一不足怪又從是而推真誥所稱聖賢忠孝文人才士古今一氣有隨化而無誠死蓋天地一人之身也吾天地之身也嘗欲效班孟堅人名表譜軒轅以來得道之士雖有精有麤有真有僞然此爲天仙此爲地仙此爲栖隱如此而修煉成如此而服食效如此而無成與不幸可師可慕可警可懼不得於其萃則得於其類如趙文子冠而受教如諸菩薩一時對佛說法至言滿眼諸門洞開要爲有益於無窮無量非特記姓名事迹而已古瑞趙全陽高士乃能會聚劉子政葛稚川至近年諸書罷精竭力朱紫細字如蟲蝕葉不可

爲萬計雖傳聞所傳聞異而大畧具是矣予因是又見北方所謂作者皆不爲詭怪方伎與不可知而自不可及殆真教也有靈魚者不可謂知然得仙字食之如髮人者得其髮食之亦仙全陽寤寐是間食仙也多矣非直蟬比也儻得其一髮足與老仙共傳敬哉吾題是集爲顧將軍人物點眼凡質已飛復欲疑武陵人云我則不暇甲午五月廬陵劉辰翁書

自昔得仙者皆云名應圖史此圖史在天上地下名山洞府不係世間度人經言元始說法始青天中十方無極無量品至真大神無執之衆浮空而至曰無極曰無量曰無執數衆正猶佛書說三世十方河沙數百千萬億那由他不可說不可說諸佛菩薩欲人人而注名姓字之竹帛殆不堪紀更生列仙始赤松終玄俗上不及黃帝稚川神仙始廣成至封君達下不及晉代沈玠續仙謂人間得仙之人猶千不得聞其一真誥載楊君肇受地下主者謂有職位粗相識其無位者不可一

二盡知如此散者無限數也要知玄間有仙籍人間有史籍人不能知仙不求聞於人故數目懸而詳畧異耳浮雲山道士趙全陽著仙鑑編纂詳考訂核可謂仙之董狐矣抑余有疑焉稚川傳淮南王八公事甚偉謂漢史祕之可矣更生父德治淮南獄得鴻寶枕中書誦之以爲奇及著列仙乃損淮南八公而不列江鄉間相傳旌陽事迹煥曜耳目及考真誥載諸許真冑家世譜系諱行伯仲羣從上自司徒下至虎牙王斧獨一語不及旌陽名不挂譜真誥作於梁距東晉不遠未應墮史之闕文良可爲怪今全陽所紀劉安許太史風績相望於列仙真誥得無間然否若天真列聖玄間地位已在經藏若存之仙鑑之目反似挂一漏萬一一具述不可勝書全陽筆削間試重思之閱逢敦粹歲三月中澣中齋吏鄧光薦書于本一庵

舊見儒家有夫子禮文史四明斥之曰尊之乃所以小之此考亭所以於白鹿洞亦不欲塑夫子像止於祭時設位也然夫子世系竟

未有過而問者此止齋老因觀復實錄重爲儒教感也浮雲山道士趙全陽編仙鑑可謂能人所不能者敢問夫子非海上廣桑山主宰邪此載之韓滉傳列之金錄懸位者君重遠之何也豈君所編施仙名存者即孔門三千之徒而夫子之尊固已隱於辭之所不及邪噫塵塵刹刹玉皇身總入無邊明鏡裏請以斯語爲君贊云

進表

臣道一言伏以大道無爲先天地之始真仙垂教亘今古以同爰自三皇以前世代綿邈結繩爲政無文字之可稽逮至伏羲氏始立書契後世則而效之而歷年滋多竹簡湮沒太古之事後世十不得聞其一人心不古深可歎也賴有太上之化身歷世出而闡教是以世降俗末之際猶存還淳返樸之風不亦偉歟臣道一誠惶誠恐稽首頓首恭惟太上昊天金闕至尊玉皇上帝陛下真常湛寂智慧妙圓作三界之師尊總十方之玄範永弘至道無量度人臣不揆愚昧採撫經傳

所載得上聖高仙真修實行之可紀者編爲歷世真仙體道通鑑一部于以公評論於道德于以揭仙聖之範模用顯真宗贊揚大化將昭先覺遠詔方來但真仙住世每隱景潛形變化莫測留名於傳記者百不得一焉請以淺近之見爲陛下陳之謂如三清之境十方諸天海上神山海外五嶽天真上帝真人神王威如雷霆明如星斗皆莫不有攸司而度人經所謂十方無極無量品至真大神無軟數衆有非人世之所能盡述今據真經所載前列高真上聖數位以舉綱維其次義農軒三皇之世得真仙名於世者數十人以顯天人交通之始自三皇以降雖真仙脉絡傳授接踵於其間然多尚隱逸不立文字其聲迹亦間聞於人今自歷五帝三代得真仙名於世者幾百人然亦不能究其出沒變化之詳盡逮至殷周太上復化身下降大道闡揚故自歷秦漢三國大晉南北朝隋唐五代宋朝中間垂教立法莫盛於此然而洞天福地朝市林泉或和光同塵或隱形韜迹有傳記

之所不能盡載耳目之所不能周知所得真仙名於世者幾千人而已外如世人之感遇或飛仙下降或神仙戲遊隱姓潛名倏忽遇邁者多不與筆所編者特真仙躬行踐履之接於人之間見者爾然而綿歷今古編載豈無差訛臣賦稟凡愚述作豈無謬戾伏冀陛下察其微悃念其嚮慕而省覽焉然後頒付人間以爲方來證真仙子之監戒此臣區區之至願也臣干冒天威不勝戰慄所以編成歷世真仙體道通鑑謹奉表陳進以聞臣道一誠惶誠恐稽首頓首謹言

浮雲山聖壽萬年宮道士小兆臣趙道一上表

幸無疑焉

歷世真仙體道通鑑卷之一

軒轅黃帝

軒轅黃帝姓公孫自周制五等諸侯後乃有姬水合以姬為姓有熊國君少典之次子也伏義生少典少典生神農及黃帝黃帝居有熊之封焉其母西喬氏女

名附寶賤見大電光繞北斗樞星照于郊野附寶感之而有娠以樞星降又名天樞懷之

二十四月生軒轅於壽丘地名在魯東門之外帝生而神靈幼而徇齊疾而速也弱而能言長而敦敏成而聰明龍顏日角河目隆額蒼色大肩始學

於大項長於姬水帝年十五心慮無所不通乃受國於有熊襲封君之地在鄭州析縣縣以制作

軒冕乃號軒轅以土德王曰黃帝得奢龍辨

手東方解在得祝融辨乎南方心星以火在正南大明也

也融光明也主火之官號祝融字從南從火求也求為正對為明為暗則南為陽北為陰

也得火封辨乎西方居西也西陽也也望東而身

也時名之西得后土辨乎北方北陰也背也故

也半為西也得后土辨乎北方北陰也背也故

妃生二子玄囂昌意初喜天下之戴己也養

正娛命自取安而順之為鴻黃之代以一民

也時人未使而自化未賞而自勸其心愉而

不偽其事素而不飾謂太清之始也耕者不

侵畔漁者不爭岸抵市不預價市不閉鄙商

旅之人相讓以財外戶不閉是謂大同帝理

天下十五年憂念黎庶之不理竭聰明進智

力以營百姓具修德也考其功德而務其法

教時元妃西陵氏始養蠶為絲今禮記皇后

帝取伏羲氏之卦象法而用之據神農所重

六十四卦之義帝乃作八卦之說謂之八索

求其重卦之義也時有臣曹胡造衣臣伯余

造裳臣於則造履帝因之作冠冕冠者則服

前下有僂仰之形因曰冠冕也始代毛革之

弊所謂黃帝垂衣裳而天下理也帝因以別

尊卑令男女異處而居取法乾坤天尊地卑

之義帝見浮葉方為舟即有共鼓化狀三臣

助作舟楫所謂剡木為舟剡木為楫也蓋取

諸渙渙散也物大通也所以濟不通也帝又

觀轉蓬之象以作車時有神馬出生澤中因

名澤馬一曰吉光二曰吉良出大封國

東夷古

國文馬縞身朱鬣乘之壽千歲以聖人為政

應而出今飛龍司有吉良處因此也薛綜曰

曰騰黃之馬吉光之獸則騰黃各異今

騰黃之獸其色黃狀如狐背上有兩角龍翼

一本云龍翼而馬身一名乘若一名飛黃或曰古黃又曰翠黃出日本國壽三千歲日行萬里乘川令出日本國壽二千歲六典曰宋有車府乘黃之官今太僕黃帝得而乘之遂周遊六合所謂乘八翼之龍遊天下也故遷徒往來無常帝始教人乘馬有臣胥作服牛以用之世本云所謂服牛乘馬引重致遠以取諸隨得隨所宜也有臣黃雅父始作春所謂斷木為杵掘地為臼以濟萬人取諸小過也小過者過而通也帝作竈以著經始令鑄釜造飯乃蒸飯而烹粥以易茹毛飲血之弊有臣揮始作弓臣夷牟作矢所謂強木為弧刻木為矢也史記云黃雅矢之利以威天下以取諸朕朕乘也制不順也帝始作屋築官室以避寒暑燥濕謂之官官言處於中也所謂上棟下宇以待風雨取諸大壯大者壯也

帝又令築城邑以居之始改巢居穴處之弊又重門擊柝以待暴客以取諸豫備不虞也又易古之衣薪葬以棺槨以取諸大過有服齋於中宮於洛水上坐玄扈石室與容光等內觀忽有大鳥銜圖置於帝前帝再拜受之是鳥狀如鵠而雞頭燕喙龜頸龍形駢翼魚尾體備五色三文成字首文曰慎德背文曰信義齊文曰仁智天老曰是鳥麟前鹿後蛇頸背有龍文足履正尾擊武有九苞一曰包命二心合度三耳聰達四舌屈伸五采色備六冠鉅銳鈎七金目鮮明八音激揚九腹大一名鵬其雄曰鳳其雌曰凰高五六尺朝鳴曰登晨晝鳴曰上祥夕鳴曰歸昌昏鳴曰固常夜鳴曰保長皆應律呂見則天下安寧黃帝曰此鳥遇亂則去居九夷矣出於東方君子之國又出丹穴之山有臣沮頌蒼頡觀鳥跡以作文字此文字之始也

先儒論文字之始不同或始於三皇或始於伏羲或云與天地並興今據司馬遷班固韋延夫等云蒼頡黃帝臣今據此載之諸家說黃帝修德義天下大理蒼頡亦無定據也乃召天老謂之曰吾夢兩龍挺白圖出於河

以授予敢問於子天老對曰此河圖洛書將出之狀天其授帝乎試齋戒觀之黃帝乃齋于中宮衣黃服戴黃冕駕黃龍之乘載交龍之旂與天老五聖遊於河洛之間求夢未得帝遂沉璧於河乃大霧三日又至翠嬀之泉有大鱸魚於河中游流而至殺三牲以醢之即其雨七日七夜有黃龍負圖而出於河黃帝謂天老五聖曰子見河中者乎天老五聖乃前跪受之其圖五色畢具白圖蘭葉而朱文以授黃帝乃舒視之名曰錄錯圖令侍臣寫之以示天下黃帝曰此謂之河圖書是歲之秋也帝既得龍鳳之圖書蒼頡之文即制文字以代結繩之政以作書契蓋取諸夬夬決也決斷萬事

自垂衣裳至制文字凡事皆黃帝之功今各以當時事及衆書所載列之如前以明之然於易繫說九事則上自黃帝下至堯舜以其先儒說者或以為不獨黃帝若以皇甫所載及今所引衆書則九事皆黃帝始創之以服周後代聖於是黃帝定百物之名作八卦之說謂之八索一號帝鴻氏一號歸藏氏乃名所制曰歸藏書此易之始也黃帝垂衣裳之後作龍衣之服畫日月星

辰於衣上以象天故有龍象之頌帝納女節
為妃其後女節見大星如虹下臨華渚女節
感而接之生少皞代紀云女節帝又納醜女
號嫫母使訓宮人而有淑德奏六德之頌又
納費修氏為夫人是時庶民甘其食美其服
樂其俗安其居無羨欲之心鄰國相望雞犬
之音相聞至老而不相往來無求故也所謂
黃帝理天下便民心謂之至理之代是時風
不鳴條謂之天下之喜風也雨不破塊謂十
日一小雨應天下文十五日一大雨以協運
也。以嘉禾為種謂之大禾也其穗異常以醴
泉為漿謂泉水美味如酒可以養老也以五
芝為芳謂有異草生於圓則芝英紫芝黑芝
五芝草生皆神仙上藥時有水物洋洋山車
滿野於是德感上天故有黃星之祥謂之異
星形狀似月助月為光名曰景星又有赤方
氣與青方氣相連赤方中有二星青方中有
一星凡三星又有異草生於庭月一日生一
葉至十五日生十五葉至十六日一葉落至
三十日落盡若小月即一葉厭而不落謂之

黃英以明於月也亦曰曆黃帝因鑄鏡以象
之為十五面神鏡實鏡也于時大撓能探五
行之情占北斗術所指乃作甲乙十干以名
日立子丑十二辰以名月以鳥獸配為十二
辰屬之以成六旬謂造甲子也黃帝觀伏羲
之三畫成卦八卦合成二十四氣即作紀曆
以定年也帝敬大撓以為師因每方配三辰
立孟仲季自是有陰陽之法焉黃帝聞之乃
服黃衣帶黃紳首黃冠齋于中宮即有鳳凰
蔽日而至帝乃降階東面再拜稽首曰天降
丕祐敢不承命鳳乃止帝東園集於梧桐又
巢于阿閣非竹實不食非醴泉不飲其飲也
則自鳴舞音如笙簫帝即使伶倫漢書律
大夏之西大夏國在西阮檣之谿崑崙之陰
懈谷采鍾龍之竹取其竅厚均者斷而節間
長七寸七分吹之為黃鍾之音十一月律為
一陽生萬物以本至理之代天地之風氣所謂
黃帝能理日月之行調陰陽之氣為十二律
呂雄雌各六也晉書云律管長尺六孔十二
聖也。以玉取時有女媧之後容成氏善知音

律始造律曆元起丁亥本紀作辛卯今準
推冬至日在之星南斗後又問天老得天元
日月星辰之書以紀時有臣隸首善算法始
作數著算術焉臣伶倫作權量權秤也黃帝
得蚩尤始明乎天文據管子言云蚩尤帝又獲
寶鼎乃迎日推策於是順天地之紀旁羅日
月星辰作蓋天儀測玄象推分星度以二十
八宿為十二次角亢為壽星之次房心為大
火之次尾箕為析木之次斗女為星紀之次
虛危為玄枵之次室壁為諏訔之次奎婁為
降婁之次昂畢為大梁之次觜參為實沉之
次左傳昭元年子產曰昔高辛氏有二子伯
次曰閼伯季曰實沉居于廣林不相能也日
居干戈以相征討后不藏遠閼伯于商丘主
辰商人因故辰為商星遷實沉于大夏主
參唐人是因以辰事夏商由此觀之至高辛
氏時方有實沉之名不知軒轅氏時何先有
實沉之名也豈非後人以分計井鬼為鶉首
之名易十二宮分以明古事耶井鬼為鶉首
之次星張為鶉火之次翼轸為鶉尾之次立
中外之星作占日月之書此始為觀象之法
皆自河圖而演之又使羲和占日常儀占月
鬼史區占星帝作占候之法占日之書以明
休咎焉黃帝有茂德感真人來遊王池至德

所致也有瑞獸在圓玄枹之獸也尚書中候云麋身牛尾狼蹄一角角端有肉示不傷物也音中黃鍾文章彬彬然壯曰麒麟曰麟生於火遊於土春鳴曰歸木夏鳴曰扶幼秋冬鳴曰養信帝又得微蟲蛭蟪有大如羊者大如牛者蟲名蟪大如虹者應土德之王也有獸名蟋如獅子食虎而循常近人或來入室人畏而患之帝乃上奏于天徙之北荒帝以景雲之瑞慶雲之祥即以雲紀官官以雲為名故有緡雲之官或云帝煉金丹有緡雲之名故有緡雲之官瑞自號緡雲氏亦多白少也○於是設官分職以雲命官春為青雲官夏為緡雲官秋為白雲官冬為黑雲官帝以雲為師也帝置四史官令沮誦蒼頡隸首孔甲居其職主圖籍也周禮掌版圖人戶版籍也又令蒼頡主人儀孔甲始作盤盂以代四尊杯飲之樸著盤盂篇盤盂之誠也帝作巾凡之法以著經黃帝書中通理黃帝史謂之墳墳大也孔安國曰不可闕也有臣史玉始造畫又濟南人公玉帶上黃帝明堂圖有複道上有樓從西南入此樓之始也帝依圖制之曰合官可以觀其

行也乃立明堂之議以觀於賢也時有仙伯出於岐山下號岐伯善說草木之藥性味為大醫帝請主方藥帝乃修神農所嘗百草性味以理疾者作內外經又有雷公述炮炙方定藥性之善惡扁鵲俞附二臣定脉經療萬姓所疾帝與扁鵲論脉法撰素書上下經漢里陽公淳于意能知帝問岐伯脉法又制素問等書及內經今有二帙各九卷後來就修數大約缺少其八十一難後來增修又云帝天降素女以治人疾帝問之遂作素問也帝問少俞鍼注乃制鍼經明堂圖灸之法此鍼藥之始也黃帝理天下始以中央之色稱號初居有熊之國曰有熊帝如顓頊為高辛帝帝為陶不好戰爭當神農氏之八代榆罔始衰諸侯相侵以黃帝稱中央故四方僭號亦各以方色稱史載而不言名號即青帝大皞赤帝神農白帝少昊黑帝顓頊時有四帝之號子孫僭越而妄稱也僉共謀之邊城日駭帝乃罷臺榭之役省靡麗之財周成士築營壘帝問於首陽山在河中部不安其居令來首山之金始鑄刀造弩又於東海流波山得奇獸狀如牛蒼身无角一足能出入水吐水則生風兩目光

如日月其音如雷名曰夔牛帝令殺之以其皮冒之而為鼓擊之聲聞五百里世本云夔非也帝令軍人吹角為龍鳴此鼓角之始也於是又令作蹴鞠之戲以練武士今擊毬也西京記曰蹴鞠也黃帝云日中必萑操刀必割狂屈賢聞之曰黃帝之言也帝有天下之二十有二年忽有蚩尤氏不恭帝命諸侯中強暴者也兄弟八十人並獸身人語銅頭鐵額不食五穀啗沙吞石蚩尤始作鐵甲時人不識謂是見北地人所食麥飯糗糧李太白曰南人兵不識謂之白沙吞石故也不用帝命作五虐之刑以害黎庶於葛盧山發金作冶制為鎧甲及劍造立兵仗刀戟大弩等威震天下不順帝命帝欲伐之徵諸侯一十五旬未克敵思念賢哲以輔佐將征不義乃夢見大風吹天下塵垢又夢一人執千鈞之弩驅羊數萬羣覺而思曰風號令執政者也垢去土解化清者也天下當有姓風名后者夫千鈞之弩莫力能遠者也驅羊數萬羣是牧人為善者也豈非有姓力名牧者乎帝作此二夢及前數夢龍神之驗帝作釋夢之書今依二夢求

燦千載舒萬齡暫死餌飛魚有務光子者身
長八尺七寸神仙者也至夏時無藥養性有
赤將子與不食五穀啗百草而長年先時為
隨風上下即有容成公善補導之術守生養
氣谷神不死能使白髮復黑齒落復生黃帝
慕其道乃造五城十二樓以候神人即訪道
遊華山首山東之泰山時致怪物而與神仙
通接訪神人於蓬萊回乃接萬靈於明庭京
兆仲山甘泉寒門谷口在長安北黃帝於是
祭天圓丘將求至道即師事九元子以地皇
元年正月上寅日齋於首山在河東復周
遊以訪真道令方明為御昌寓驂乘張若謬
房導焉此皆一作明昆閭滑稽從車而至襄
城之野七聖俱迷見牧馬童子黃帝問曰為
天下若何童子曰理天下何異牧馬去其害
馬而已黃帝稱天師而退至于閼丘其國有
不死樹食其子與藥人皆不死有丹竈之泉
飲之而壽有巨蛇害人黃帝以雄黃却逐之
其蛇留一時而反外傳云帝令三子習服
之皆壽三百歲比到洪隄上具茨山在崑崙見

大隄君姓大又見黃蓋童子受神芝圖七
十二卷適中岱見黃子中受九茹之方至空
同之山見中黃真人一云其方為登崆峒山
州方空同之山應即云龍右并也司馬彪注
見廣成子問至道莊子作空同山也云龍
云在梁國廣城東三十里是也一云天下空
同山三說時空同山乃黃帝問道處一云龍
右空同山正黃帝問道之所今山上有問道
宮山下有軒轅轅轅存為黃帝見廣成子問
至道亦非止一處復廣成子不答帝退捐天
下築特室藉白茅間居三月方往再問修身
之道廣成子乃授以自然經一卷黃帝捨帝
王之尊託假豚之文登雞山陟王屋山開石
函發玉笈得九鼎神丹注訣南至江登熊湘
山熊山在長沙益陽縣往天台山受金液神
丹東到青丘山見紫府先生受三皇內文大
字抱朴子云以劾召萬神南寘五芝玄淵登園
壠有二十卷建木觀百靈所登降采若乾之芝一云
飲丹竈之水南至青城山禮謁中黃丈人乃
間登雲臺山見甯先生受龍蹻經閱真一之
道於中黃丈人丈人曰子既君海內復欲求
長生不死不亦貪乎頻相及復而復授帝
拜謝訖東過廬山祠使者以次青城丈人廬

山使者秩比御史主總仙官之道是五嶽監
司也又封潛山君為九天司命主生死之錄
黃帝以四嶽皆有佐命之山而南嶽孤特無
輔乃章詞三天太上道君命霍山為儲君命
潛山為衡嶽之副以成之時參政事以輔佐
之帝乃造山躬寫形象以為五嶽真形圖黃
帝往煉石於緡雲堂於地煉丹時有非紅非
紫之雲見是日緡雲因名緡雲山帝藏兵法
勝負之圖六甲陰陽之書於苗山黃帝合符
瑞於釜山得不死之道奉事太一元君受要
記修道養生之法於玄女素女受還精補腦
之術玄女授帝如意神方即藏之崆峒山帝
精推步之術于山稽力牧著體用之訣於岐
伯雷公講占候於風后先生黃帝得玄女授
陰符經義能內合天機外合人事帝所理天
下南及交趾北至幽陵西至流沙東及蟠木
帝欲棄天下曰吾聞在宥天下不聞理天下
我勞天下久矣將息駕於玄圃以返吾真矣
黃帝修興封禪禮畢采首山之銅鑄九鼎於
荆山之下以象太一於州是鼎神質文精也

孫壽三百六十歲入九嶷山仙去後三千六百歲堯理天下洪水既甚人民墊溺禹念之乃化生於石紐山曰女狄暮汲水得石子如珠愛而吞之有娠十四月而生子及長能知泉源乃賜號禹後人稱曰神禹是也今石泉軍石紐金簡玉字黃帝之遺誠也帝又以所佩靈寶五符真文書金簡一通藏於宛委之山帝嘗以金鑄器皆有銘題上古之字以記年月或有祠也時有薰風至神人集成狀代之志即留冠劍珮舄於鼎湖極峻處崑崙之上立館其下崑崙山之軒轅臺也時馬師皇善醫馬有神通之妙思有龍下于庭伏地張口師皇視之曰此龍病求我醫也師皇乃引鍼於龍一上下以牛乳煎甘草灌之龍病愈師皇乘此龍仙去黃帝聞之自擇日卜還宅昇仙之日得戊午果有龍來垂胡髯下迎黃帝乃乘龍與友人無爲子及臣僚等從上者七十二人小臣不得上者將龍髯拔侈及帝之弓小臣抱其弓與龍髯而號泣弓因曰烏號鑄鼎之地後曰鼎湖其後有臣左徹削木爲黃帝

像率諸侯朝奉之臣僚追慕罔極或取几杖立廟而祭或取衣冠寢墓而守是以有喬山之塚黃帝曾遊處皆有祠五百年後喬山墓崩惟劍與赤舄在焉一旦亦失黃帝居代總一百二十年云云在位一百五年自上仙後昇天爲太一君其神爲軒轅之宿在南宮黃龍之體象後來享之列爲五帝之中方君以配天黃帝土德中央之位以主四方以鎮星配爲子名樞紐之神爲佐配享於黃帝帝之子少昊名摯字青陽號金天氏居帝位八十年帝王世紀云八十四年都曲阜今兗州劉慆作外紀無少昊孫相承共四百年黃帝之孫顓頊號高陽氏母蜀山氏所生有聖德居帝位七十八年云八十四年外紀都商丘濮陽今濮州縣項同壽九十八歲都商丘濮陽今濮州縣項以來以所與之地帝嘗高辛氏黃帝之曾孫也黃帝子玄鳥名帝嘗生而神靈自言其名居帝位七十年外紀云七都偃師今亳州河南壽一百五歲外紀云壽帝堯陶唐氏黃帝之玄孫帝嘗之子也姓伊祈字放勳興於定陶以唐侯爲帝齊陸定陶又都平陽今冀在位七十年壽一云定州陶縣

百一十八歲考之尚書當是七十三年在位一云堯十歲即位帝在位七十載特選試舜三載傳位與舜又二十八歲乃殂落當是一百一十七歲外紀在位九十八年年壽一百帝舜有虞氏黃帝九代孫姓申屠姓攝帝位三十年正居位五十年壽一百一十二歲外紀在位五十年壽一百一十歲史紀云舜年六十二代堯踐帝位三十九年壽正一百歲一云舜生三十歲庸三十在位服喪三年其一在三十之數鳥天子一百一十歲都蒲坂今河夏禹亦黃帝之玄孫也姓姁居帝位都安邑今蒲州在位九年子孫相承共四百三十二年外紀按遁甲開山圖曰禹得道仙人也古有禹女嫫十九代知吉凶知存知亡能輕能重能息能行不灼而沸不汲自滿中生五味真神物也黃帝煉九鼎丹服之逮至煉丹成後以法傳於玄子此道至重盟以誠之帝以中經所紀藏於九嶷山東號委羽承以文玉覆以盤石其書山下江邊有大禹廟世紀云鮪納有莘氏媿留折而生禹於石紐六月六日生郡人常以是日煮鰲湯黃帝二十代孫黃帝子玄孫生是日高辛生矣又十三世姓子居帝位都亳後即天乙爲殷王湯也在位一十三年子孫相承共六百二十三年外紀年作六周發黃帝二十二代孫姓姬

黃帝孫顓頊以黃帝居姬水姓姬故帝嘗居
子后稷亦姬姓又十六代發為周武王

帝位六年都鎬京今永後平王遷洛邑子孫

相承共八百七十三年外紀年譜差多作黃

帝子孫各得姓於事帝推律定姓者十二在

前九子各封一國總三十三氏出黃帝之後

先天紀云子孫相承凡一千五百二十年紀世

云一千二百五十年

臣道一曰軒轅屈黃帝之尊禮七十二師

然後垂衣裳而天下治當是時也君明臣

良民淳俗樸以有天下而不恥下問是故

神人悉願歸之民到于今稱之此後世所

以有黃帝王霸之品者於此乎可見矣道

德經曰是以聖人處無爲之事行不言之

教萬物作焉而不辭生而不有爲而不恃

功成而弗居夫惟不居是以弗去豈非軒

轅之謂乎

歷世真仙體道通鑑卷之一

歷世真仙體道通鑑卷之二

臧二

浮雲山聖壽萬年宮道士趙道一編

通玄天師

通玄天師一號玄中大法師在天皇時出洞
真經一十二部以無極大道下教人間

有古大先生

有古大先生於地皇時出洞玄經一十二部
化人以無上正真之道

盤古先生

盤古先生在人皇時出洞神經一十二部化
人以太平無爲之道

鬱華子

鬱華子在宓戲時降于田野授天皇內文又
降河圖八卦之文教人以順性之道一號宛
華稱田野子作元陽經三十四卷

廣壽子

廣壽子在祝融時降于恒山授人皇內文教
人以安神之通俾陶鑄爲器以變生冷一號
傳豫子作按摩通精經九十卷

大成子

大成子又號傳豫子在神農時降于洛陰授
地皇內文教人以好生之道俾播殖穀果以
代烹殺和合方藥救疾養性一云作太一元
精經三十六卷

廣成子

廣成子居崆峒之山石室之中黃帝聞而造
焉曰敢問至道之要廣成子曰爾治天下雲
不待族而雨木不待黃而落矣足以語至道
哉黃帝退而閑居三月復往見之膝行而前
再拜請問治身之道答曰至道之精窈冥
冥至道之極昏昏默默無視無聽抱神以靜
形將自正必靜必清毋勞毋爾毋搖爾精乃
可長生慎內閉外多知爲敗我守其一而處
其和故千二百年未嘗衰老得吾道者上爲
皇失吾道者下爲土予將去汝入無窮之間
遊無極之野與日月齊光與天地爲常人其
盡死我獨存焉乃授帝陰陽經黃帝紀云一授自然經一

號力默子作道成經七十卷

臣道一曰廣成子謂我守其一而處其和
故千二百年未嘗衰老道德經曰昔之得

一者天得一以清地得一以寧神得一以靈
谷得一以盈萬物得一以生侯王得一爲
天下正其殆以此乎廣成之意欲軒轅抱
一爲天下式而已厥後軒轅得道白日昇
天後世帝王卒未能及廣成之功妙矣哉

隨應子

隨應子一號太極先生在少皞時降于崆峒
山說莊敬經教以順時行令

赤精子

赤精子在顓頊時說微言經教以忠順之道
南嶽總聖集云芙蓉峯今有傳經壇晉咸和
中山南見數童子與羣白鶴遊翔其上

錄圖子

錄圖子在帝嚳時降于江涓說黃庭經教以
清和之道又命九天真王三天真皇執八光
之節景雲之符下牧德臺授帝嚳以九天真
靈三天寶符上以奉天使二儀無遺下以管
人使年命無墜帝乃祭天於北河之壇藏符
於鍾山之峯後昇天爲玄宮真人錄圖子是
時傳道與赤松子被衣子王倪鬻狄一云作

黃庭經五十卷

務成子

務成子在唐堯時降于姑射山說玄德經教
以謙遜之道一云作政事宣化經四十卷

尹壽子

尹壽子在虞舜時降于河陽說道德經教以
無爲之道又傳道與彭祖一云作通玄真一
經七十卷道德經十二百卷

真行子

真行子一號甯真子在夏禹時降于商山教
以勤儉之道授九疇書又命宛委之神玄夷
使者授禹玉書靈寶五符治水真文及罡步
劾召鬼神之法玉笥山太秀法樂洞天即授
禹靈寶真文之所遺迹存焉今太湖中洞庭
山林屋洞天即禹藏真文之所一名包山吳
王闔閭十二年正月登包山之上命隱者龍
威丈人入包山之洞究其深遠見金城玉屋
題曰天后別宮太陰之堂於玉室几上得素
書一卷凡一百七十四字而還闔閭不識其
書使使問仲尼云赤烏喻書以授於王仲尼

曰吾昔遊於西海之上聞童謠曰吳王出遊
觀震湖龍威丈人名隱居北上包山入靈墟
乃造洞庭竊禹書天帝大文不可舒此文長
傳百六初今強取出喪國廬丘按謠言乃龍
威丈人洞中得之赤烏所喻非丘所知也吳
王懼復歸其書一云夏禹時出爲師號季子
肯作元始經四十六卷復作妙樂經七十卷
復作德戒經三十卷

錫則子

錫則子在商湯時降于潛山說長生經教以
恭愛之道今潛山天祚宮前龍堂之址即其
所也一號錫壽子或稱戒子肯作道元經七
十卷

樊邑子

樊邑子亦稱赤精子降于岐山之陽說赤精
經教以仁信之道西伯聞之召爲守藏史

育成子

育成子周武王克商踐祚以守藏史遷爲柱
下史作璇璣經一云周武王時出爲師號郭
叔子亦稱續成子或號天老公復稱爲老君

圓泥塗門戶終不可開

錢鏐

錢鏐帝顯頊之玄孫因進雉羹於堯堯封於彭城後謂之彭祖有子二人長名武次名夷其所隱山後人名曰武夷山一云虞舜時尹壽子傳道與彭祖一云錢鏐即彭祖有導引術有疾則閉氣以攻所患運行體中下達指末即體如常云上士異牀中士異被服藥百裏不如獨卧人集其術為彭祖經列仙傳云彭祖歷夏至殷末八百餘歲常食桂善導引行氣歷陽有彭祖仙室前世禱請風雨莫不報應常有兩虎在祠左右祠訖地即有虎迹云後昇仙而去一云鏐隱山中編竹為戶餐松為糧能乘風御氣騰身踏空至殷之末世已七百餘歲後七百七十七歲解化趙次公云徐州彭城縣以彭祖而得名按家字記殷之賢臣彭祖顯帝玄孫至殷末壽七百六十七歲今墓北故邑號大彭廬山名賢傳云彭鏐曾過彭蠡之濱造其名嶽今廬山是也徧遊洞府以窺聖迹已而把釣於臺上雙鯉

化為雙龍冲天而去或云今江濱有釣魚臺本彭祖遺迹也

嘯父

嘯父冀州人少在西周市上補履數十年人不知也後奇其不老好事者造求其術不能得惟梁母得其作火法臨上三亮山與梁母別列數十火而昇天西邑多奉祀之焉

師門

師門者嘯父之弟子也亦能使火食桃李能為夏孔甲龍師孔甲不能順其心意殺而埋之野外一旦風雨迎之訖則山木皆焚孔甲祀而禱焉還而道死

按劉恕通鑑外紀云孔甲好鬼神之事不務修德諸侯多叛時天降乘龍有雌雄孔甲不能食而未獲蔡龍氏陶唐氏既喪其后有劉累學擾龍於蔡龍氏事孔甲能飲食之夏后嘉之賜氏曰御龍以更承韋之後龍一雌死潛醢以食夏后夏后享之既而使求之累懼而遷于魯縣據道一之見劉累恐即是師門未審是否因注於下以

俟後之高人討論

臣道一曰師門得道而仕於有夏遇君之不幸也孔甲始則殺而埋之終則感悟而祀之卒還而道死是猶孫策殺于吉而創裂姚萇斬王嘉而尋亡然王嘉即達於龍右于吉復見於鏡中師門且迎於風雨於道何損焉為人上者可不謹諸使有道之君尊賢樂士寧得有此道德經曰奈何萬乘之主而以身輕天下輕則失臣躁則失君此之謂也

務光

務光莊子務光作晉夏時人耳長七寸好琴服蒲韭根商湯伐桀因光而謀光曰非吾事也湯曰孰可曰吾不知也湯曰伊尹如何曰強力忍垢吾不知他湯既克桀以天下讓於光曰智者謀之武者遂之仁者居之古之道也吾子胡不遂之請相吾子光辭曰廢上非義也殺人非仁也人犯其難我享其利非廉也吾聞非義不受其祿無道之世不踐其位莊子任作土況於尊我我不忍也遂負石自沈蓼水莊子盧云

水司馬作盧水在遼東西界一云在北平郡界已而自匿後四歲至武丁時復見武丁欲以為相不從武丁以與迎而從逼不以禮遂投河浮山後海尚父山

臣道一曰太僕既散而後有湯誓之師鳴條之戰儻非有道至人出於其間則千載而下網常蕩然矣以務光折湯之非明君臣之分至於負石沈水處生死之際不改其操其所以立萬世忠義之標杓者端在於此其後有盟津之會伯夷叔齊叩馬而諫餓死首陽豈非本於光之道歟道德經曰國家昏亂有忠臣愚則曰其不幸而有昏亂也其亦幸而有忠臣也

仇生

仇生者不知何許人湯時為木正三十餘年而更壯皆知其壽人也咸共師奉之其人云常食松脂在鄉北山上自作石室至周武王時幸其室祠之

容成公

容成公者自稱為黃帝之師見周穆王善補

導之事煉精於玄牝其要谷神不死守生養氣髮白反黑齒落更生事與老子同亦云老子師之焉或曰容成公得御女之術經世不絕也

臣道一曰道德經曰谷神不死是謂玄牝

玄牝之門是謂天地根綿綿若存用之不勤夫得是道者上為仙失是道者下為鬼容成公得此道眾妙之門也後世不得其道而流於傍蹊曲徑抑末矣又極而至於為御女之術乃託容成公以為辭誤也

呂尚

呂尚者冀州人也生而內智預見存亡避紂之亂隱於遼東四十年西適周匿於南山釣於磻溪三年不獲魚比間皆曰可已矣尚曰非爾所及也已而果得兵鈴於魚腹中文王夢得聖人聞尚遂載而歸至周武王伐紂尚作陰謀百餘篇服澤芝地髓且二百年而告亡有難而不葬後子伋葬之無尸唯有玉鈴六篇在棺中云

葛由

葛由者堯人也周成王時好刻木羊賣之一旦騎羊入蜀蜀中王侯貴人追之上綏山綏山在峨眉山西南高無極也隨之者不復還皆得仙道故里謠曰若得綏山一桃雖不得仙亦足以豪

范蠡

范蠡字少伯徐人也事周師太公望好服桂飲水為越大夫佐勾踐破吳後乘輕舟入海變名姓適齊為鴟夷子更後百餘年見於陶為陶朱君財累億萬號陶朱公復棄之

賣藥後人世世識見之云李元膺記范蠡學州二十四化志云范蠡於北邱山得仙

叩疏

叩疏者周封史也能行氣煉形養石髓而服之謂之石鍾乳至數百年往來入太室山中有卧石牀枕焉

介子推

介子推者姓王名光晉人也隱而無名悅趙宣子與遊旦有黃雀在門上晉公重耳異之與出居外十餘年勞苦不辭及還介山伯子

震晨來呼推曰可去矣推辭母入山中從伯子常遊後文公遣數千人以玉帛禮之不出後三十年見東海邊為王俗賣扇後數十年莫知所在

涓子

涓子齊人好餌木接食其精至三百年乃見於齊著天地人經四十八篇後釣於河澤得鯉腹中有符隱於宕山能制風雨受伯陽九仙法淮南王安少得其文不能解其旨也其琴心三篇有條理焉

馬丹

馬丹者晉狄人也當文侯時為大夫至獻公時復為幕正獻公滅狄殺恭太子丹去至趙宣子時乘安車入晉都候諸大夫靈公欲仕之逼不以禮有迅風發丹入迴風中而去北方人尊而祠之

平常生

穀城平常生不知何所人也數死復生時人以為不然後大水出所害非一而平輒在缺門山頭大呼言平常生在此云復水雨五日

必止止則上山求祠之但見平衣被革帶後數十年復為華陰門卒

陸通

陸通楚狂接輿一本作與同音餘也好養生食素盧木實及蕪菁子遊諸名山在蜀我眉山上人

世世見之孔子適楚楚狂接輿遊其門曰鳳兮鳳兮何如德之衰也來世不可待往世不可追也天下有道聖人成焉天下無道聖人生焉方今之時僅免刑焉福輕乎羽莫之知載禍重乎地莫之知避已乎已乎臨人以德殆乎殆乎畫地而趨迷陽迷陽無傷吾行吾行卻曲無傷吾足山木自寇也膏火自煎也桂可食故伐之漆可用故割之人皆知有用之用而莫知無用之用也肩吾見狂接輿接輿曰日中始何以語汝肩吾曰告我君人者以已出經式義度人孰敢不聽而化諸狂接輿曰是欺德也其於治天下也猶涉海鑿河而使蚤負山也夫聖人之治也治外乎正而後行確乎能其事者而已矣且鳥高飛以避矰弋之害鼯鼠深穴乎神丘之下以避重鑿

之患而曾二蟲之無知肩吾問平連叔曰吾聞言於接輿大而無當往而不及吾驚怖其言猶河漢而無極也大有逕庭不近人情焉連叔曰其言謂何哉曰藐姑射之山有神人居焉肌膚若冰雪綽約若處子不食五穀吸風飲露乘雲氣御飛龍而遊乎四海之外其神凝使物不疵癘而年穀熟吾以是狂而不信也連叔曰然瞽者無以與乎文章之觀聾者無以與乎鍾鼓之聲豈非形骸有瞽盲哉是其言也猶時女也之人也之德也將旁礴萬物以為一世斬乎亂孰弊焉以天下為事之人也物莫之傷大浸稽天而不溺大旱金石流土山焦而不熱是其塵垢秕糠將猶陶鑄堯舜者也孰肯以物為事皇甫謐云接輿躬耕楚王遣使以黃金百鎰車二駟聘之不至

琴高

琴高趙人能鼓琴為宋康王舍人行涓彭之術浮游冀州涿一作郡間二百餘年後辭入涿水取龍子與諸弟子期期日皆齋潔待於

水傍設祀果乘赤鯉來至祠中且有萬人觀之留一月入水去今宜州有琴高釣臺

冠先

冠先者宋人也釣魚爲業居睢水傍百餘年得魚或放或賣或食者冠帶好種荔枝其葩實焉宋景公問其道不告即殺之後數十年踞宋城門鼓琴數十日而去宋人家奉祀焉

王子喬

王君名晉字子喬亦名喬字子晉周靈王有子三十八人子晉太子也生而神異幼而好道雖燕居宮掖往往不食端默之際累有神仙降之雖左右之人弗知也常好吹笙作鸞鳳之音聲貫行雲響滿宮掖白鸞朱鳳延頸鼓翼集而聽之奇禽異鳥率舞庭砌以爲常也一日天台山浮丘公降授道要使修石精金光藏景錄神之法是時靈王二十二年穀洛閭將毀王宮太子晉累諫不聽以其忤旨遂退居別宮齋戒思道浮丘公密降其室賜以靈藥接以登高山後數年友人林良遇子

晉於緱山之上謂良曰七月七日我當昇天可與故人會別也至是良與故人羣官登山見子晉棄所乘馬於澗下飲醢如初子晉乘白鶴揮手謝時人昇天而去遠近觀之咸曰王子登仙遂言曰王即吾姓也因以爲王氏

是時羣官拜別迴拜所乘馬焉亦飛空而去今有拜馬澗在焉子晉昇天爲右弼主領五嶽司侍帝晨號桐栢真人理金庭洞天楚辭離騷天問篇云白蜺嬰茀胡爲此堂安得夫良藥不能固藏天式從橫陽離爰死大鳥何鳴夫焉喪厥體註引仙傳云崔文子學道於王子喬子喬化爲白蜺而嬰茀持藥與之文子驚怪引戈擊蜺因墮其藥俯而視之子喬之尸也須臾化爲大鳥飛鳴而去方輿記云西山中峰最高頂即王子喬之遺壇在嶺側今隸隆興府

幼伯子

幼伯子者周蘇氏客也冬嘗著單衣盛暑著襦袴形貌歲異後數十年更壯時人莫知世世來誠枯蘇氏子孫得其福力焉

桂父

桂父者象林人也時黑而時白時黃而時赤南海人見而尊事之常服桂及葵以龜腦和之千九用十斤桂累世見之今荊州之南尚有桂丸焉

瑕丘仲

瑕丘仲甯人也賣藥於甯百餘年人以爲壽而因地動舍壞仲及里中數十家屋臨水皆敗仲死民或取仲尸棄水中收其藥賣之仲被衷而從詣之取藥棄仲者懼叩頭求哀仲曰非恨汝也使人知我爾後自北復來至甯北方謂之謫仙人

酒客

酒客梁市上酒家人也作酒常美售人日得萬錢有過而逐之主人酒常酢敗貧窮梁市中賈人多欲以女妻而迎之或去或來後百餘歲來爲梁丞使民益種芋菜三年當大饑果如其言梁民不死後五年解印綬去莫知所終

任光

任光上蔡人善餌丹賣於都里間積八十九年乃知是故時任光也稱說如故後數十年間頃後長老識之趙簡子聘與俱歸常在柏梯山上三世不知所在晉人常服其丹

蕭史

戰三

十二

蕭受姓於殷至周宣王時有蕭欽者妻王氏皆富好道老君曾降其家以宣王十七年五月五日生即蕭仙也生而不事家業遊終南山遇異人授長生術且教以吹簫歸家告父母願入道父母強為娶妻蕭仙云異人教我勿娶當得帝女父母聽之宣王末史籍散亂蕭仙能文著本末以備史之不及人以史目之實無名也行第三浪迹入秦孟明之師從軍引敗歸秦侯過而哭之史在孟明側立甚恭秦侯問敗師狀孟明不能答史代對甚悉孟明免罪史之力也孟明歸史又放浪山水間時秦侯有女名弄玉善吹簫無和者求得吹簫者以配孟明以代對故為史因召見秦侯問史云善簫侯曰吾女好簫子簫也奈何史以不稱旨退女在屏間呼曰試使吹之一

聲而清風生再吹而彩雲起三吹而鳳凰來女曰是吾夫也願嫁之史曰女亦且吹簫且三吹之如史所感於是孟明為媒娶叔為賓合宴於西殿座中不奏他樂惟二人自以簫笙間奏曲未終鳳凰來下二仙乘之而去秦侯惘然咎孟明孟明遣人四方尋之至楚尾吳頭有人見西山高峰男女坐而吹簫蕭蕭者鳳栖其傍使者聞急訪之又冲昇矣後不知其所之此其大略也

赤須子

赤須子者鄴中傳世見之云秦穆公主魚史也數言鄴界災害水旱十不失一張君房迎而師之從受業以長好食松實天門冬石脂齒落更生髮白還黑服霞絕粒後住吳山下十餘年莫知所之

祝雞翁

祝雞翁洛人居尸鄉北山下養雞百餘年雞皆有名字千餘羣暮栖樹上晝放散之欲引呼名即種別而至賣雞及子得千餘萬錢輒置錢去之吳作養魚池後昇吳山白鶴孔雀

常止其傍

崔文子

崔文子秦時泰山人世好黃老事居潛山下後作黃散赤丸成石父祠賣藥都市自言三百歲後有疫氣民死者萬計長吏告之請救文子擁朱幡繫黃散以詢民間飲散服丸者輒愈所愈萬計後去蜀賣藥故世寶崔文赤丸黃散近於神焉

朱仲

朱仲會稽人漢高后時下書募三寸珠仲讀書曰真值汝矣齋三寸珠詣關上書珠好過度即賜五百金魯元公主復私以七白金從仲求珠仲獻四寸珠送至關即去帝下書會稽徵聘不知所在景帝時復來獻三寸珠數十枚輒去不知所之

東方朔

十四

東方朔字曼倩平原厭次人也朔生三日而父母俱亡後遊澤中有黃眉壽指朔曰此吾兒也吾却食使氣三千年一反骨洗髓二千年一易皮伐毛吾生已三洗髓三伐毛矣漢

武帝初即位徵天下賢良文學材力之士待以不次之位四方士多上書言得失自街黨者以千數其不足采者輒報罷朔初來上書曰臣朔少失父母長養兄嫂年十三學書三冬文史足用十五學擊劍十六學詩誦二十二萬言十九學孫吳兵法戰陳之具鉦鼓之教亦誦二十二萬言凡臣朔已誦四十四萬言又常服子路之言二十長九尺三寸目若懸珠齒若編貝勇若孟賁捷若慶忌廉若鮑叔信若尾生若此可以爲天子大臣矣臣朔昧死再拜上聞朔文辭不遜高自稱譽帝偉之令待詔公車祿薄未得省見久之朔始鄒侏儒曰上以汝曹無益於縣官耕田力作固不及人臨衆處官不能治民從軍擊虜不任兵事無益於國用徒索衣食今欲盡殺若曹侏儒大恐啼泣朔教曰上即過叩頭請罪居有頃聞帝過侏儒皆號泣頓首帝問何爲曰東方朔云上欲盡誅臣等召問朔何恐侏儒爲對曰臣朔生亦言死亦言侏儒三尺餘奉一囊粟錢二百四十侏儒飽欲死臣朔饑

欲死臣言可用幸異其禮臣言不可用罷之無令但索長安米價上大笑因使待詔金馬門稍得親近上常使諸數家射覆置守宮孟下射之皆不能中朔自贊曰臣嘗受易請射之乃別著布卦而對曰臣以爲龍又無角臣以爲蛇又有足是非守宮即蜥蜴也帝曰善復使連射他物皆中輒賜帛時有倖倡郭舍人滑稽不窮舍人所問朔應聲輒對變詐鋒出莫能窮者左右大驚帝以朔爲常侍郎遂得愛倖後帝與越王爲親乃使朔泛海求寶委令一周回朔經二載乃至未至問帝問左右朔久而不至今囊中何人善卜對曰惟有孫賓者極明易筮帝乃更庶服潛行與左右齋絹二匹往叩賓門賓出門而延坐未之識也賓乃啓卜卦成知是帝惶恐起拜帝曰朕來覓物卿勿言賓曰陛下非卜他物乃卜東方朔也朔行七日必至今在海中面西招水大歎到請詰之至日朔至帝曰卿約一年何故二載朔曰臣不敢稽探寶未得也帝曰七日前卿在海中面西招水大歎何也朔曰臣

非歎別事孫賓不識天子與帝對坐帝深異之朔後與友人書云不可使塵網名韁拘鎖怡然長笑脫去十洲三島相期拾瑤草吞日月之光華共輕舉爾王母嘗指朔與帝曰此我鄰家小兒性多滑稽曾三來偷桃此子昔爲太上仙官太上令到方丈山但務遊戲擅動雷電激波揚風致令蛟螭陸行山崩海竭太上斥謫使在人間近金華二仙及九嶷君陳乞原之帝乃知朔非世俗之徒乃信天下神仙之事而淫色自縱殺伐不休受書六年意旨自暢以爲神真見降必獲度世興起臺館勞弊百姓每事不從王母之微言上元之妙戒二真遂不復來太初二年柏梁臺災真相圖六甲五帝靈飛十二事靈光生經並燒失不存但帝先承王母言以五嶽圖授董仲君又承上元夫人言以六甲授李少君書遂行於世帝既焚書自知道喪其後朔一旦乘龍飛昇而去劉向列仙傳云東方朔至昭帝時時人或謂神人或謂凡人作深淺顯默之行或忠言或戲語莫知其旨至宣帝初棄郎

以避亂世置憤官舍風飄之而去後見於會稽賣藥五湖智者疑其歲星精也西京雜記曰東方朔曰天下無和我者惟曆官太史知之武帝嘗召問之曰諸星皆在惟歲星不見

脩羊公

脩羊公魏人華陰山石室中有懸石榻卧其上石盡穿陷略不動時取黃精食後以道聞于上漢景帝禮之使止王邸中數歲道不可得有詔問公何日發語未幾牀上化為白石羊題其脇曰脩羊公謝天子後寘石羊於通靈臺上羊後復去不知所在

臣道一曰道德經曰天地之間其猶橐籥乎靜而不屈動而愈出多言數窮不如守中脩羊公得之矣且化白石羊題其脇曰脩羊公謝天子此又見其不忘知遇之意道之深義之盡也

稷丘君

稷丘君者泰山中道士漢武帝時以道術受賞賜髮白返黑齒落更生後罷去上東巡泰山君乃冠章甫衣黃衣擁琴來迎武帝曰陛下勿上必傷足指及數里左足果折上諱之

但祠而還為君立祠復寘百戶使承奉之

犢子

犢子鄴人也少在黑山採松子茯苓餌服之且數百年時壯時老時美時醜乃知是仙人常過沽酒於陽都家都女者眉生而運耳細而長眾以為異皆言此天人也會犢子牽一黃犢來過都女悅之遂相奉侍都女隨犢子出取桃李一宿而返皆連寃甘美邑中隨伺逐之出門共牽犢耳而走不能追也旦復在市中數十年乃去見蟠山下冬賣桃李也

騎龍鳴

騎龍鳴者渾亭人年二十於池中求得龍子狀如守宮者十餘頭養食結草廬以守之龍長大稍稍去後五十餘年水壞其廬而去一旦騎龍來至渾亭下語云我馮伯昌孫也此間人不去五百里必當死不信之者以為妖言至八月果水至死者萬計

主柱

主柱不知何所人與道士共上宕山言此有丹砂可得數萬斤宕長吏知而上山封之砂

流出飛如火乃聽柱取焉邑令章君明餌砂三年得神砂飛雪服之五年能飛行與柱俱去

鹿皮翁

鹿皮翁菑川人也少為府小吏木工精巧舉手能成器械岑山上有神泉人不能至小吏白府君請木斤斧三十人作轉輪懸閣意思橫生數十日梯道四間成上其巔作祠舍留山其傍絕其二間以自固食芝草飲神泉且七十年蓄水來三下呼宗族家室得六十餘人令上山半水盡漂一郡沒者萬計小吏乃辭遣宗族家室令下山著鹿皮冠遂去復上閣後百餘年下賣藥於市

溪父

溪父南郡廬人居山間有仙人常止其家從買瓜教之煉瓜子與桂附枳實共藏而對分食之二十餘年能飛走昇山入水後百餘年絕居山頂呼溪下父老與道生時事

山圖

山圖隴西人少好乘馬馬踏之折脚山中道

人教以雌黃當歸羌活獨活苦參服之一歲而不嗜食病愈身輕道士問之自言五嶽使之名山採藥能隨吾使汝不死山圖追隨之六十餘年一旦歸來行母服於家春年復去莫知所之

谷春

谷春櫟陽人漢成帝時為郎疫死而尸不冷家發喪行服猶不敢下釘三年更著冠幘坐縣門上邑中人大驚家人迎之不肯歸發棺有衣無尸留門上三宿去之長安止橫門上人知而追之復去之太白山立祠於山上時來至其祠中止宿焉

陰生

陰生常求乞於長安市中市人厭之有以糞洒其衣者其衣不汙如故長吏聞之試收繫著桎梏而復在市中又試欲殺之乃去洒糞之人家室自壞殺十餘人

臣道一曰陰生之道為萬世困窮無告者設也彼市人家室自壞者蓋惡之貴盈殃及之爾觀其為惡不悛以凌辱孤貧為意

可見其不仁之甚者如陰生特因其事以示其化也非陰生害之也又如曹國舅之隱悲曰王通甲之墮臼者類皆此意道德經曰是以聖人常善救人故無棄人陰生之道非以是乎

子英

二十三

子英者舒鄉人也善入水捕魚得赤鯉愛其色好持歸著池中數以米穀食之一年長丈餘遂生角有翅翼子英怪異拜謝之魚言我來迎汝汝上背與汝俱昇天即大雨子英上其魚背騰昇而去歲歲來歸故舍食飲見其子魚復來迎之如此七十年故吳中門戶皆作神魚遂立子英祠云

服閭子

服閭子不知何所人也常止莒往來海邊諸祠中有三仙人於祠中博賭瓜顧閭令擔黃白瓜數十頭令瞋目及覺乃在方丈山山在蓬萊山南後往來莒取方丈山上珍寶珠玉貴之久久一旦髡髮著赭衣貌更老人問之言坐取廟中物云復數年貌更壯好鬚髮如

往日時矣

文賓

文賓太丘鄉人也賣草履為業數取姬數十年輒棄之後時故姬壽老年九十餘續見賓更壯他時姬拜賓涕泣謝賓曰不宜至正月朝臘見會鄉亭西社中邪姬老夜從兒孫行十餘里坐社中待之須臾到賓大驚曰汝好道邪知汝爾爾不去汝也教令服菊地膚桑上寄生松子取以益氣姬亦更壯復百年見云

商丘子胥

商丘子胥者高邑人也好牧豕吹竽年七十不要婦而不老邑人多奇之從受道問其要言但食木薑蒲根飲水不饑不老如此傳世見之三百餘年貴戚富室問之取而服之不能終歲輒心怠慢矣謂將復有匿術也

子主

子主楚語而細音不知何所人也詣漢江都王自言甯先生雇我作客三百年不得作直以為狂人也問先生所在云在龍眉山上王

遣吏將上龍眉山巔見甯先生毛身廣耳披髮鼓琴主見之叩頭吏致王命先生曰此子主吾比舍九世孫且念汝家當暴死女子三人勿預吾事語竟大風發吏走下山比歸宮中相殺三人王遣三柱立祠焉

陶安公

陶安公六安鑄冶師數行火火一旦散上行紫氣衝天安公伏冶下求哀領吏朱雀止治上曰安公安公治與天通七月七日迎汝赤龍至期赤龍降大雨而公騎之東南上一城邑數萬人衆共送視之皆與辭決也

赤斧

赤斧者已戒人爲碧雞祠主簿能作水瀆煉丹與消石服之三十年反如童子毛髮生皆赤後數十年上華山取禹餘糧餌及賣之於蒼梧漢江間累世傳之手掌中有赤斧焉

呼子先

呼子先漢中關下卜師老壽百餘歲臨去呼酒家老嫗曰急裝當與嫗共應中陵王夜有仙人持二茅狗來至呼子先子先持一與酒

家嫗得而騎之乃龍也上華陰山常於山上大呼言子先酒家母在此矣

負局先生

負局先生不知何許人語似燕代間人常負磨鏡局巡吳市中銜磨鏡一錢因磨之輒問主人得無有疾苦者輒出紫丸藥以貽之得莫不愈如此數十年後大疫家至戶到與藥活者萬計不取一錢吳人乃知其真人也後上吳山絕崖頭懸藥下與人將欲去時語下人曰吾還蓬萊爲汝曹下神水崖頭一旦有水白色流從石間來下服之多愈疾立祠十餘處

阮丘

阮丘者睢山上道士衣裘被髮耳長七寸口中無齒日行四百里於山中種葱薤百餘年人不知時下賣藥廣陽人朱璜有毒瘕疾丘與七物藥服之而去三尸後與璜俱入浮陽山朱璜發明之乃知是神仙也

朱璜

朱璜者廣陵人也少病毒瘕就睢山道士阮

丘丘憐之言卿除腹中三尸有真人之業可度世也璜曰病愈當爲君作客三十年不敢自還丘與璜七物藥日服九九百日病下如肝脾者數斗養之數十日肥健心意日更開朗與老君黃庭經令讀日三過通之能思其意丘遂與璜俱入浮陽山王女祠且八十年復見故處白髮盡黑鬚更長三尺餘過家食止數年復去如此至武帝末故在焉

陵陽子明

陵陽子明鉅鄉人好釣魚於旋溪得白龍子明懼解釣拜而放之後得白魚腹中有書教子明服食之法子明遂上黃山採五石脂佛水而服之三年龍來迎去止陵陽山上今屬宜州百餘年山去地千餘丈大呼下人令上山半所言溪中子安當來問子明釣車在否後二十餘年子明死人取葬著山中有黃鸞來栖其冢樹上鳴呼子安武昌黃鸞山上有黃鸞棲焉黃鸞過此

邾子

邾子自言蜀人好放犬知相犬犬走入山穴

邦子隨入十餘宿行度數百里上出山頭上有臺殿官府青松森然仙吏侍衛甚嚴見故婦主洗魚與邦子符一函使還與成都令喬君君發函有魚子也著池中養之一年皆爲龍邦子復送符還山上大色吏亦有長翰常隨邦子往來百餘年遂留止山上時下來護其宗族蜀人立祠於穴口常有鼓吹傳呼聲西南數十里共奉祠焉

木羽

木羽鉅鹿南和平鄉人母貧賤主助產嘗探產婦兒生便開目視母大笑母怖懼夜夢見大寇赤幘守兒言我司令君也當報汝恩使汝子木羽得仙母陰言識之後母生兒字爲木羽所探兒生年十五夜有車馬來迎去遂過母家呼木羽爲我御來遂俱去後二十餘年鴉雀旦旦銜二三魚著母戶上母匿不說而賣其魚三十年乃發云母至百年乃終

玄俗

玄俗稱河間人服巴英賣藥都市七九一錢善治百病漢河間王惠服藥服之下蛇十

餘條問藥意俗曰王瘕乃六世餘殃下墮情非王之所招王嘗放乳鹿麟母也仁心感天故遭俗爾王家老舍人自言父世見俗俗之身無影王乃呼著日中看實無影王以女聘之俗夜亡去後人見於常山下

藏三

二十五

歷世真仙體道通鑑卷之三

歷世真仙體道通鑑卷之四

藏四

浮雲山聖壽萬年宮道士趙進一編修

天真皇人

天真皇人不知其得道之始然是前劫修真極道之人也身長九尺玄毛被體皆長尺餘黃帝時在藐姑絕陰之下蒼玉爲屋黃金爲座張華羅幡然百和香侍者仙童玉女座賓三人皆稱泰清仙王黃帝再拜問道授以五牙三一之文又在藐姑山以太上靈寶度人經授黃帝又授帝書於牧德之臺一云蜀岷山江北有慈母山天真皇人修鍊之所山有龍池池中有金銀銅鐵魚各從其色得食者味同乾薑服之可以長生謂之肉芝龍池一在山中一在空中澄潔如鏡纖芥不汙或乾條槁葉飛墮其上即有五色凡鷲嚙去

白石生

白石生者中黃丈人之弟子也至彭祖時已二千餘歲矣不肯修昇仙之道但取於不死而已不失人間之樂所行者正以金液之藥爲上也初患家貧身賤不能得藥乃養猪牧

半十數年約依節用致貨萬金乃實藥服之
常煮白石為糧因就白石山居時人號白石
生亦時食脯飲酒亦時穀食日能行三四百
里視之色如三十許人性好朝拜存神又好
讀仙經及太素傳彭祖問之何以不食藥昇
天乎答曰天上無復能樂於此間也但莫能
使老死爾天上多有至尊相奉事更苦於人
間爾故時人號白石生為隱遯仙人以其不
汲汲於昇天為仙官而不求聞達故也

王倪

上古神仙王倪君即老君弟子也得道於羲
農之間黃帝遇之以傳道要歷少昊顓頊世
常遊人間帝嘗以前為齧缺師行飛步之道
堯舜之時猶有見者後一旦昇天

洪崖先生

洪崖先生者或曰黃帝之臣伶倫也得道仙
去姓張氏或曰帝堯時已三千歲矣漢武帝
時有術度世者入華山尋其父叔卿叔卿在
絕岩中與數人博戲於石上問之為誰曰洪
崖先生許由巢父大低公飛黃子王子晉薛

容也東漢時班孟堅作西京賦云洪崖立而
指麾紛羽毛之纖縷是先生為眾仙之長久
矣陶弘景真誥云洪崖先生今為青城洞真
故青城山今亦有洪崖郭景純遊仙詩云左
把浮丘袂右拍洪崖肩又云垣娥揚妙音洪

崖領下頭蓋先生當時與垣娥浮丘之徒
學仙者尚皆可得而見也洪崖山在豫章之
西山是先生隱焉隋文帝開皇九年改豫章
郡為洪州以先生所居山名之今洪井在伏
龍山北岩左右石崖陡起峻絕春夏飛湍奔
注洪洪如雷入井則陡殺餘流為小竅注為
陂有古壇臨井上相傳為先生鍊丹處歲旱
禱焉有赤蛇浮水面兩為立靈井北一里許
於石磧上得五春日色渥如丹各圓深二尺
餘相傳為先生搗藥處土人云每歲端午日
未明或聞搗藥聲樵夫往往遇其餘津井南
二里許為壩岡四周有水即陂陂是也相傳
陂岡為先生乘鶴所憩處岡側舊有鵲山觀
司馬天師五嶽朝儀云青城山洞周回二千
里昔洪崖先生服琅玕之花而隱代為青城

真人

展上公

展上公者高辛時仙人也學道於伏龍地乃
值李彌滿上公得道今為九宮內右司保常
向諸仙人云昔在華陽下食白李美憶之未
久忽已三千歲矣郭四朝後於其處種五果
又此地可種柰所謂福鄉之柰可以除災癘
玉匱記云嶠珠山俗呼獨女山也仙人展上
公昇天後云昔在華陽下食白李倏忽三千
年矣有碧柰茅君監植白李漢在小茅山北
真誥注云諸歷檢課謂堯元年戊戌至齊之
己卯歲二千八百三年高辛即堯父說此語
時又應在晉世而已云三千年即是堯至今
不啻二千八百年外曆容或不定如此丁亥
之數不將已過平考汲冢紀年正二千六百
四十三年彌復大懸也

何侯

何侯者堯時隱蒼梧山慕長生三百餘口耕
耘舜南狩止何侯家天帝五老來謂舜曰昇
舉有期翌日五帝下迎舜白日昇天至夏禹

時五帝以藥一器與何侯使投酒中一家三百餘口飲不竭以餘酒灑屋宇拔宅上昇天位爲太極仙人今嶽山有何侯廟在齊廟側

文子

文子姓辛名鉞一名計然葵丘濮土人其先晉公子也學道於老君周一作楚平王問於文子曰聞子得道於老聃今賢人雖有道而遭淫亂之世以一人之權而欲化久亂之民其庸能乎文子對曰道德匡邪以爲正振亂以爲治化淫敗以爲樸淳使德復生天下安寧要在一人故積德成王積怨成亡堯舜以是昌桀紂以是亡平王用其言而天下治後南遊吳越范蠡師之越欲伐吳范蠡諫曰臣聞之師曰兵凶器戰逆德爭者事之末也陰謀逆德好用凶器試身於所未不可勾踐不聽敗於夫椒後位以上大夫弗就隱吳興餘英禺山相傳以爲登雲而昇按寰宇記吳興志俱載餘英東南三十里有計畚山越大夫計然嘗登此山籌度地形因名焉今山陽白石頂通玄觀乃故隱處也其紫雲關昇元觀即

古常清觀宋孝宗乾道間改賜今額山之半有曰登雲石者在唐明皇追號爲通玄真人其著書號通玄真經

亢倉子

亢倉子者姓庚桑名楚陳人也得老君之道能以耳視而目聽叔孫告魯君聞之大驚使上卿厚禮以致之亢倉子至魯君卑辭請問亢倉子曰傳之者妄也我能視聽不用耳目而不能易耳目之用魯君曰增異矣其道奈何亢倉子曰體合於心心合於氣氣合於無其有介然之有唯然之音雖遠在八荒之外近在眉睫之間我必知之乃不知我七孔四肢之所覺心腹六府之所知其自知而已矣魯君大說一云居畏壘之山其臣之畫然知者去之其妻之絮然仁者遠之擁腫之與居歎掌之爲使居六年畏壘大穰後遊吳興隱毗陵孟峯道成仙去後有漢張道陵唐張果老相繼隱脩因號張公壇福地古建洞靈觀宋改大甲萬壽宮

浮丘公

李浮丘伯世號浮丘公居嵩山脩道白日飛昇嘗作原道歌云虎伏龍亦藏龍藏先伏虎但畢河車功不用隄防拒諸子學飛仙狂迷不得住左右得君臣四物相念護乾坤法象成自有真人顧又以相鶴經授王子晉崔文子學道於子晉得其文藏嵩山石室淮南公採藥得之遂傳於世相鶴經云鶴者陽鳥也而遊於陰因金氣乘火精以自養金數九火數七故七年小變十六年大變百六十年變止千六百年形體尚潔故其色白聲聞於天故頭赤食於水故喙長軒於前故後指短栖於陸故足高而尾凋翔於雲故毛豐而肉踈大喉以吐故脩頸以納新故夭壽不可量所以體無青黃二色者木土之氣內養故不表於外是以行必依洲渚止必集林木蓋羽族之宗長仙人之驂騭也鶴之上相瘦頭朱頂露眼黑睛高鼻短喙故解頰能宅耳長頸疎身鸞膺鳳翼故解頰能宅毛龜背龜腹軒前垂後高頸初節洪解纖指此相之備者也鳴則聞于天飛則一舉千里鶴二年落子毛易黑點

三年產伏復七年羽翮具復七年飛薄雲漢
復七年舞應節復七年晝夜十二時鳴中律
復七年不食生物大毛落茸毛生乃潔白如
雪或純黑泥水不能汙復百六十年雌雄相
視而孕一千六百年飲而不食胎化產鸞鳳
同爲羣聖人在位則與鳳凰翔于旬今湖北
澧州有獨浮山圖經云昔浮丘子修真於此
山今有石室存焉

宋來子

宋來子楚莊公時市長宋來子常洒掃一市
久之時有乞食公入市經日乞歌曰天度發
雙華山源影陰邪清晨接天馬來詣太真家
常歌此句乞食一市人無解歌者獨來子忽
悟疑是仙人然未能解其歌耳遂乃師此乞
食公棄官追逐積十三年此公遂授以中仙
之道來子今在中嶽乞食公者西嶽真人馮
延壽周宣王時史官也

沈義

沈義者吳郡人也學道於蜀中但能消災除
病救濟百姓百姓服藥功德感天天神識之

周赧王十年丙辰老君遣使召隱士沈義義
一日與妻賈氏共載詣子婦卓孔寧家道達
龍車虎車白鹿車各一乘從騎數十人皆朱
衣仗矛帶劍輝赫滿道問義曰君是道士沈
義否義愕然答曰是也騎曰義有功於民心
不忘道從生以來履行無過受命不長壽將
盡矣黃老今遣仙官相迎之侍郎薄延白鹿
車是也度世君司馬生青龍車是也送迎使
者徐福白虎車是也須臾三仙羽衣持節以
白玉冊青玉界丹玉字授義碧落侍郎義不
能讀遂載昇天爾時道間耕鋤人共見之須
臾大霧霧解失其所在但見義所乘車牛在
田中食苗或有識是車牛以語義家子弟數
百人恐是邪魅將義入山谷間乃將數百人
分布於百里之間求之不得至後漢殤帝延
平元年丙午凡四百一十二年乃還鄉里推
求得數十世孫名懷喜懷喜曰聞先世相傳
有祖仙人仙人今來留數十日說初上天時
不見天帝惟謁老君老君東向坐宮殿鬱鬱
有如雲氣五色玄黃不可名字侍從數百多

女少男庭中有珠玉之樹衆芝叢土龍虎辟
邪遊戲其間但聞琅琅如銅鐵聲不可知測
四壁熠熠有符書著之老君身形長可丈身
體有光不可正視老君令玉女持金粟玉杯
盛藥賜義曰此是神丹飲者不死夫妻各得
一刀圭告言飲畢復賜棗二枚大如雞子復
以符一道及仙方一道賜義令且還人間救
治百姓之疾苦者若欲昇上界書此符懸之
竿杪仙吏當迎汝也語已義奄忽如睡已在
地上實太后疾嘗遣使請義安帝時猶在人
間後復昇天

王傳

王傳字恭確周人也五十棄家學道服黃連
一百四十年耳目聰明智慧目廣髮白返黑
齒落更生有兒名神精其父子並得道後昇
天而去

劉奉林

劉奉林周時人學道於嵩高山四百年三合
神丹爲邪魔所敗乃入委羽山能閉氣三日
不息至千餘年猶未昇仙但服黃連得不死

爾

成連先生

伯牙學琴於成連先生乃與遊蓬萊山留伯牙曰君習之我將迎師刺船而去伯牙凝望但見海水涵洞山林寒杳鳥獸悲號歎曰吾師將移我情乃援琴而歌曲終成連至遂為天妙操成連乃仙也

武夷君

武夷山有神人自稱武夷君曰吾居此山因而為名焉又云混沌初開有神曰聖姥母子二人居占此山秦時人號為聖姥眾仙立為大姥聖母今人祝廟呼大元夫人是也又云天台山元靈老君華真仙師遺第七仙子名屬仁乘雲駕鶴遊歷此山安排地仙今人號為控鶴仙人是也或云昔有魏王名子騫在同州立王城對大石東去十里今即城基尚在此人是墜地仙人後於此山得道又云昔有張湛孫綽趙元奇彭令昭劉景顧思遠白石先生馬鳴先生并胡氏李氏魚氏王氏女子四人通成十二人同詣此山求道偕至

謁魏王為地主會天亢旱魏王真酒醺祭仙祈雨時控鶴仙人乘雲鶴白馬從空中而下遂霽雨澤張湛等因獲見時張湛獻仙人詩一絕云武夷山下武夷君白馬垂鞭入紫雲空裏只聞三奠酒龍潭波上雨霧霧仙人得詩甚喜又見張湛等骨氣不常訪道精確意其各有仙分乃遣何鳳兒往天台山取仙籍一卷到山檢視其謫下凡間為庶類合居此山八百年後方得道換骨歸天仙人既見仙籍各有姓名乃安排魏王而下一十三人同居此山各賜胡麻一合湯藥半合遂令魏王開筵置酒張湛遣元亨打羯鼓彭令昭吹橫笛顧思遠立色李三娘彈琵琶歡宴而罷羣仙會散仙人語云魏王公等至八百年後可所取黃心木為棺於此岩中玄化魂魄便得歸天至期果然玄化乃於小藏岩中安排長挺材觀一十三具挿木壓於岩中挂其靈骨迄今在焉又云秦始皇二年八月十五日武夷君置穀酒會鄉人幔亭峯上初男女千餘人齋戒如期而往乃見虹梁跨溪制度精巧

飛梯四級傍設閣中體輕心喜不覺其倦至山頂有幔亭綠屋玲瓏掩映前後可數百間夾幔亭立八綵幢八枚銀龍銜玉蘊情金鳳翠毛其幔亭可坐千餘人設東西地席各有長座如今之僧尼位施綠油紅卷花食卓自北競南無接續其幔亭北壁當中設一虛牀謂之太極玉皇座北壁西厦設一虛牀謂之太姥魏真座北壁東設一虛牀謂之武夷君座悉施紅雲茵紫霞褥各一銅盃貯花水初鄉人至幔亭峯衙門外聞擊鼓聲少頃空中有告云悉呼鄉人為曾孫乃曰汝等男孫先入東序而進女孫後入西序而進既而聞讚告曰有太極玉皇大帝降臨山數曾孫可拜謝又曰太姥魏真人曾孫可拜又聞嗷咳之聲乃武夷君焉高聲而言曰汝等曾孫若男若女皆平安好男孫東座女孫西座中亭有青綾帳幔各設一牀陳諸樂具又聞讚告曰命鼓師張安陵打引鼓趙元奇拍副鼓劉小禽坎鈴鼓曾少重擺鼓鼓喬知滿振曾鼓高子春持短鼓管師鮑公希吹橫笛板頭何鳳

兒撫等散如此處東幄奏停雲左仙之曲命
弦師董嬌娘彈箏後謝英妃撫長琴呂荷香
憂圓琵琶管師其次姑梁畢策秀淡鳴洞簫
朱小娥運笙金師羅妙容打銅鈸如此處西
幄奏賓雲右仙之曲見樂具空間橫豎自響
精妙命及行酒須臾酒至無謝禮酒味甘香
而醇酒醴百味珍奇並皆殊越又命行酒乃
令歌師彭令昭唱人間可哀之曲辭曰天上
人間今會合稀疎日落西山夕鳥歸飛百
年一餉今志與願違天宮咫尺恨不相隨
歌罷忽彩雲四合環珮人馬之音竟空而至
又聞讚告云玉靈太姥與大姥與曾孫別再
拜又云汝等宜速下山間久即有蛇螭虎
豹之伍不可遭逢乃下山俄而風雨暴至各
回顧山頂無復一物鄉人相喚曰我等凡賤
得與仙等共宴後致祠其山號曰同山云爾
侍郎劉夢序云山在建寧北二百里外崇安
縣南三十里按茅君內傳云仙家有三十六
洞天武夷山乃第十六洞昇真玄化之天

王瑋玄

王瑋玄不知何所人也其語云是楚莊王得
侍郎劉夢序云山在建寧北二百里外崇安
縣南三十里按茅君內傳云仙家有三十六
洞天武夷山乃第十六洞昇真玄化之天
道居林屋山洞室中吳國韓崇好道遊名山
採方術於林屋遇瑋玄求度世之道瑋玄以
流珠丹授之謂崇曰子行此道無妨居世功
成之日自當仙舉也崇行之大驗住為汝南
太守在郡十四年政化自洽著為天下最年
七十四瑋玄又降之授崇隱遁解形之法入
大霍山又授崇道化泥丸紫戶之術而昇天
矣

韓衆

韓衆漢州德陽縣秦中化學道天真皇人授
以金書玉字行住得駕紫煙白日昇天楚辭
離騷經云奇傳說之託星辰為羨韓衆之得
一形穆穆以寢遠兮離羣人而退逸

王次仲

王次仲者古之神仙也當周末戰國之時合
縱連衡之際隱居范陽大夏小夏之山以為
蒼頡篆文工多而用寡難於達就四海之事
筆札為先乃變篆籀之體始為隸書秦始皇
既定天下以其功利於人三詔之使入秦不

至復命使謂之曰吾削平六合一統天下孰
敢不賓者次仲一書生而違天子之命以輜
車載之不爾當殺之持其首來以正風俗無
肆其悖慢詔使至山致命載輜車中次仲忽
化一大鳥翩然出車使者驚曰無復命必
見誅惟神人憫之鳥徘徊空中拔墮三翻使
者得之以進始皇素好神仙之道聞其變化
亦甚悔恨因名其地為落鴈山鄉里祀之不
絕

若士

若士者古之仙人也莫知其姓名燕人盧敖
者以秦時遊乎北海經乎太陰入乎玄闕至
於蒙穀之山而見若士焉其為人也深目而
玄準鵠肩而脩頸豐上而教下欣欣然方迎
風而舞顧見盧敖因遁逃乎碑下盧仍而視
之方蹠龜殼而食螭蛤盧敖乃與之語曰唯
以教焉昔羣離黨窮觀六合之外幼而好遊
長而不逾周行四極唯北極之未窺今觀夫
子於此殆可與教為友乎若士淡然而笑曰
嘻子中州之民不宜遠而至此此猶光乎日

月而載乎列星此乎不名之地猶突與也昔我南遊乎涸涸之野北息乎沉默之鄉西窮杳冥之室東貫涸涸之光其下無地其上無天視焉無見聽焉無聞其外由有沃沃之泥其行一舉而千萬餘里吾猶未之能究也今子遊始至於此乃語窮觀豈不陋哉然子處矣吾與汗漫期於九垓之上不可以久駐乃舉臂躡身遂入雲中盧敖仰而視之不見乃止恍恍若有所喪也敖曰吾比夫子也猶黃鵠之與壤蟲也終日行不離咫尺而自以為遠不亦悲夫

臣道一曰盧敖遊乎北海而見若士語及窮觀是誠陋矣惟若士遊乎六合之外無止極之處而猶未能盡其妙後世固有不盧敖之若有得一法得一術而自以為大道虛無不過如此能不淺哉道德經曰視之不見名曰夷聽之不聞名曰希得之不得名曰微此三者不可致詰故渾而為一其上不皦其下不昧繩繩不可名復歸於無物是謂無狀之狀無象之象是謂恍惚

若亡其庶幾於道乎

古丈夫

恂大曰尹子虛同遊嵩華松下見古丈夫一女子二公曰神仙何以至此古丈夫曰予秦之役夫此毛女亦秦之宮人合為徇者同脫驪山之禍匿此不知今幾甲子二公曰幸遇大仙願求金丹大藥丈夫曰予本凡人初餌栢子後食松脂歲久凌虛毛髮紺綠不知金丹大藥果何物也毛女詩曰誰知古是與今非閑躡青霞繞翠微蕭管秦樓應寂寂彩雲空惹薜蘿衣丈夫曰有萬歲松脂千年栢子汝可餌之亦應出世二公後巢蓮花峯上

行門子

行門子得道尸解墓在漁陽潞縣見在蒙山大洞黃金之庭受書為中元仙卿行門即義門也紫陽真人周義山間有藥先生得道在蒙山能讀龍蹠經乃追尋之蒙山遇義門子乘白鶴執羽蓋佩青毛之節侍從十餘玉女義山乃再拜叩頭乞長生要訣義門子曰名在丹臺玉室之中何憂不仙遠越江河來登

此何素

沈文泰

沈文泰九疑人也得紅泉神丹法土符延年益命之道服之有效欲之崑崙留安息二千餘年以傳李文淵曰土符却不去服藥行道無益也文淵遂受秘要後亦昇仙後以竹根汁煮丹及黃白去三尸法出此二人矣

董謁

董謁字仲玄武都郁邑人少好學常遊山澤負挾圖書惠其繁重家拾樹葉以代書簡言其易卷也嘗為人傭牧或採薪貨之見野地有書皆鬼神所化更本寫之以為卷帙縱誕不仕遊於屠肆或乞犬羊皮為衣所居不過客膝編荆為牀聚鳥獸毛而寢夏則露宿草石之上年一百九十歲鬚髮如童子出隱無常或乘牛驢或躡履無家去長安三百里不日能至常息人家以題掌還家以片簿寫之則紙掌之字少來勤苦舌為之黑掌為之爛世人謂仲玄掌錄而舌學常疾世人慕煩著依其之說數萬言以周孔之徒感蕩末世屈

曲爲禮樂令後人多以此自失夫人稟五常之氣爲萬物之秀自然知禮樂何勞之教以裁情者乎伏羲軒轅唐堯夏禹殷湯爲上聖周孔爲通人何以言之伏羲取鳥獸以充庖後知腥羶之變黃帝教人乘舟後有廬室之居唐堯夏禹殷湯三聖或能治水穰旱爲人除害至周孔強拘人以禮亂人以樂樂極則彌哀禮逸則臻亂皆非治國之大統漢武帝聞其不拘於俗乃徵至西京與帝言皆協會精理後莫知所在

李充

李充馮翊人自言三百歲從秦始皇發會稽望江海少好學爲博士門徒萬人伏生時年十歲乃就充石壁中受尚書以口傳授伏子四代之事略無遺脫伏子因而誦之常以繩十餘尋縛腰誦一遍一結十尋之繩皆繩結矣誦記之數萬遍但云食穀損人精慧故有遺失伏子今所傳百卷得其一矣堯舜二典闕弘多充在漢世常餌菊水人問先生何以不語至經旬曰世間無可食亦無可語者

精神往來採雲霄霞液身中惟心在爾豈能言乎正恐煩神使舌爾帝聞神異乃聘徵充衣荷草蒼負五嶽真形圖而至帝禮待之亦號負圖先生

孟岐

孟岐清河逸人也尋師不避險阻年七百歲記及周初時事了了如目前或云見周公旦抱成王以朝於周廟岐時侍周公陞壇公上岐以手摩成王足周公以王笏遺岐岐常實執每以衣袂拂拭笏笏今銳欲折耳嘗餌桂葉在華陰山下拾藥聞帝好仙披草萊而出

郭瓊

郭瓊東方郡人也其形貌醜劣而意度過人扶杖遊行每寄宿人家輒乞薪自照讀書不眠主人有笥中祕書識緯絨藤甚密而瓊已聞知悉覽莫不服其神異聞瓊寄宿則閉戶塞門有不得之書悉焚之乃開門進瓊人恐知其陰謀瓊常袖中出一把筭子散置膝前測人家隱事皆知或晝卧不閉目行地無蹤袒裼如狂漢武帝尚其異之

黃安

黃安代郡人自云卑陬不敢處人間執鞭推荆誦書畫地以計舌數一夕地成池明復移處亦然也時人謂之舌耕可八十餘視若童子常服朱砂舉身皆赤不著衣坐一神龜廣三尺時人問子坐龜幾年曰昔伏羲氏始造網罟有此龜以授吾背已平此龜畏日月之光三千歲一出頭我得此龜來已五過出頭矣行則負龜而趨世人謂安年萬歲漢武帝聞有異跡乃進與論虛無神仙之事帝往屈焉及封泰山詔董謂李充孟岐郭瓊黃安五人同輩謂之五仙臣帝崩後即去不知所之

歷世真仙體道通鑑卷之四

十八

歷世真仙體道通鑑卷之五

藏五

浮雲山聖壽萬年宮道士趙道一編修

皇初平

皇初平丹溪^{一云蘭溪}人年十五家使牧羊有道士見其良謹將至金華山石室之中四十餘

年脩然不復念家其兄初起尋索初平歷年不得後見市中有一道士善易而問之曰吾弟牧羊失之四十餘年不知存亡之在願君與占之道士曰昔見金華山中有一皇初平非君弟乎初起聞之驚喜即隨道士去求弟果得相見悲喜語畢兄問初平曰牧羊何在答曰近在山東初起往視之杳無所見但有白石壘壘復謂弟曰山東無羊也初平曰羊在耳兄自不見兄與初平偕往尋之初平言叱叱羊起於是白石皆起成羊數萬頭兄曰我弟獨得神仙之道如此可學否弟曰唯唯好道則得爾初起於是便捨妻子留就初平共服松脂茯苓至五萬日坐在立亡日中無影頗有童子之色乃俱還鄉里親戚死方畧盡乃復還去臨行以方教南伯逢易姓爲赤

松子也初起改字爲魯班初平改字爲松子此後服此藥仙者有數十人金華山今屬婺州見有石羊存焉一云茶陵雲陽山黃初平號赤松子治南嶽之陽即此地有松高萬丈

沈建

沈建者丹陽人也世爲長吏而建獨好道不肯仕宦學導引服食之術還年却老之法又能理病病無輕因見建者愈奉之者數千家每遠行寄奴侍三五人驢一頭羊數十口各與藥一丸謂主人曰但累屋舍不煩飲食也便辭去主人大怪之云此君所寄奴畜十五餘口並不留寸資當如何建去之後主人飲食奴侍奴侍間食氣皆吐逆不視又以草與驢羊亦避去不食更欲抵觸人主人乃驚異之後百餘日而奴侍身體光澤異於食時驢羊俱肥健建三年乃返各復以一丸藥與奴侍驢羊乃還飲食如故建遂斷穀不食能舉身飛行或去或還如此三百餘年乃絕迹不知所在也

華子期

華子期者淮南人也師角里先生受山隱靈寶方一曰伊洛飛龜訣二曰白鳥正機三曰平衡按合服之日以還少一日行五百里能舉千斤一歲十易皮後得仙去所居名子期山今屬建寧府

王遠

王遠者字方平東海人也舉孝廉除郎中稍加至中散大夫博學五經兼明天文圖讖河洛之要逆知天下盛衰之期九州吉凶之事漢孝桓帝聞之連徵不出使郡國通載以詣京師低頭閉口不肯答詔乃題宮門扇四百餘字皆紀方來帝惡之使人削之外字適去內字復見墨皆徹入木裏方平無復還子孫鄉里人累世傳事之同郡太尉公陳耽爲方平架道室旦夕朝拜之但乞福願從學道也方平在耽家三十餘年耽家無疾病死喪奴婢皆安然六畜繁息田蠶數倍仕宦高遷後語耽云吾期運當去不復停明日日中當發至時方平死耽知其化去不敢下著地但悲啼而歎息曰先生捨我去我將何怙具棺器

燒香就牀衣裝至三日三夜忽然失其所在
衣帶不解如蛇蛻也方平去後百餘日耽寢
或謂耽得方平之道化去或謂方平和耽將
終故委耽去也方平東入括蒼山遇吳往胥
門蔡經家方平得道位西極西城真人領仙
士萬五千人鎮青城山九仙寶室之天

忠州圖經云禹廟景德觀前漢王方平得道之山舊名仙都宮宋真宗咸平元年賜太宗皇帝御書一百二十卷景德元年賜今額

蔡經

蔡經者小民爾而骨相當得仙方平知之故
往其家平江府有蔡經宅謂經曰汝生命應得度世
故來取汝補官僚然汝少不知道今氣少肉
多不得上天去當作尸解須臾如從狗竇中
過爾告以要言乃委經去經後忽身發熱
如火欲得水灌之如伏焦狀如此三日中消
耗骨盡乃入室以被自覆忽然失其所在視
其被中有皮頭足具存如蟬蛻也去後十餘
年忽還家去時已老還更少壯頭髮皆黑語
家人曰七月七日王君當來過到其日可作
數百斛飲以供從官乃去其家依其言假借

魔器作酒數百斛羅列覆置庭間以候之其
日方平果來未至經家一時但聞金鼓蕭管
之聲比近皆驚不知何等及至經舉家皆見
之方平著遠游之冠朱衣虎頭鞶囊五色之
綬帶劔黃色少鬚長短中人也乘五蓋之車
駕五龍龍各異色前後廣節旌旗導從威儀
如大將軍出也有十二隊五百士皆以蜜蠟
封其口鼓吹皆乘麟從天上來下懸集不從
人道行也既至從官皆不復知所在惟見方
平身坐須臾引見經父兄因遣人與麻姑相
問亦莫知麻姑是何神也言王方平敬報久
不行民間今來在此想姑能暫來語否有頃
信還但聞其語不見其所使人也答言麻姑
再拜但不相見忽以五百餘年尊卑有序修
敬無階思念久煩承來在彼故當躬到而先
被詔當按行蓬萊今便暫往如是當還便宜
親觀願未即去爾如此兩時間麻姑來也來
時亦先聞人馬之聲既至從官半於方平也
麻姑至蔡經亦舉家見之是好女子年可十
八許於頂中作髻餘髮散垂之至腰其衣有

文章而非錦綺光采曜目不可得名字皆世
所無有也入拜方平方平為起立坐定各進
行廚皆金盤玉杯餽膳多是諸花而香氣達
於內外臂脯而行之如有栢炙云是麟脯也
麻姑自說接待以來已見東海三為桑田向
到達萊水乃復於往者會將減半也宜將復
為陵陸乎方平笑曰聖人皆言海中行復揚
塵也麻姑欲見蔡經母及經婦而經之婦新
產數十日麻姑望見乃知之曰噫且止勿前
索少許米來便以擲之視米墮地皆成丹砂
方平笑曰麻姑故作少年戲也吾老矣不復
喜作此狡獪變化也方平語經家人曰吾欲
賜汝輩酒此酒乃出天廚其味醇醲非俗人
所宜飲之或能爛人腸胃今當以水添之汝
輩勿怪也乃以水一斗合酒一升攪之以賜
經家人飲一斗許皆醉良久酒盡方平語左
右曰不足還復取也以一貫錢與餘杭姥求
沽酒須臾信還得一油囊酒五斗許傳餘杭
姥答言恐地上酒不中尊飲爾又麻姑手爪
不似人形皆似鳥爪蔡經心言背痒時得此

爪以爬背當佳也方平已知經心中所言即使人牽經鞭之曰麻姑神人也汝謂其爪可爬背何也但見鞭著經背亦不見有人持鞭者方平告經曰吾之鞭可妄得也經家比舍有姓陳者失其名字嘗罷尉聞經家有神人乃詣門叩頭求乞拜見於是方平引前與語此人便乞得隨從驅使比於蔡經方平曰君但起向日立方平從後視之言意君心針不正不可教以仙道也當授君地上主者之職臨去以一符并一傳著小箱中以與陳尉告言此不能令君度世能令君延壽本壽自出百歲也可以禳災治病病者命未終及無罪過者君以符到其家便愈矣若有邪鬼血食作禍祟者君使帶此符以敕社吏當收送其鬼君心當亦知其輕重臨時以意治之陳尉以此符治病有^{職五}效事之者數百家壽一百一十歲而死死後子孫行其符不復效方平去後經家所作數百斛酒在庭中者皆盡亦不見人飲之也經父母私問經曰王君常在何處經答言常治崑崙往來羅浮山括蒼山此

三山上皆有宮室王君常平天曹事一日之中與天上往復者數十過地上五嶽生死之事皆先來關王君王君出入惟乘一黃麟道從甚肅所至則山海之神皆來奉迎拜謁也或者於道白言者後數十年經復暫歸省家方平有書與陳尉書字廓落大而不楷先是人無知方平名遠者至此乃知之陳尉家今四世存錄王君手書及其符傳小箱也

涉正

涉正者字玄真已東人也說秦始皇時事了似及見也漢末從二十弟子入吳而正常閉目雖行猶不開也弟子隨之二十年莫有見其開目者有一弟子固請之正乃為開目目開時有音如霹靂而光如電照于弟子皆不覺頓伏良久乃能起正已復還閉目正道成莫見其所服食施行而授諸弟子皆以行氣絕房室及服石腦小丹云李八百呼正為四百歲兒

^臣道一曰道德經曰五色令人目盲又曰聖人為腹不為目古仙亦云魂在肝而不

在眼漏又曰閉目見自己之目使人能神守於內不為物轉則泰山在前而目不見矣今涉正乃常閉目雖行猶不開也豈非故以聖人為腹不為目之意神其教以開化其弟子乎後之學道者合於此乎有悟

孫博

孫博者河東人有清才能屬文著詩百篇誦經數萬言晚乃學道能治墨子之術能使草木金石皆為火光照耀數十里中亦能令身成火口中吐火指樹火生葉即焦枯更指之即復故亦能使三軍之眾各成一聚火有藏人亡奴在軍中累日求之不得博語奴主曰吾為卿燒其營舍奴必走出卿但當諦伺捉取之於是博以赤丸擲軍營中須臾火起張天奴果走出而得之博乃更以一青丸擲火火即滅所燔屋舍百物已焦枯者皆悉如故博每作火有所燒他人雖以水灌之終不可滅須自止之乃止耳行大水中不但己身不沾及能使在己者皆不沾又能將人於水上布席坐飲食作樂使眾人舞於水上不沒不

儒終日盡歡其疾病者就博自治亦無所云
爲直指之言愈即愈又山間石壁及地上磐
石博乃入其中去初猶見背及兩耳出石間
良久乃沒又能吞刀劍數十枚及從壁中出
入如有孔穴也引鏡爲刀屈刀爲鏡可積時
不改須博指之乃復故形爾後入林隱山中
合神丹仙去矣

班孟

班孟者不知何許人或云女子也能飛行終
日又能坐空虛之中與人言語又能入地中
初沒足至腰及胃漸漸但餘冠帽良久而盡
沒不見又以指刺地即成泉井而可汲引又
吸人屋上瓦瓦即飛入人家人家有桑果數
千株皆聚之成積如山如此十餘日吹之各
還其本處如常又能含墨舒紙著前嘴墨亦
噴之皆成文字滿紙各有意義後服酒餌丹
年四百歲更少容後入大冶山中仙去也

王剛

天門子姓王名剛尤明補養之訣故其經曰
陽生立於寅純木之精陰生立於申純金之

精夫以木投金無往不傷故陰能滅陽也陰
人著脂粉法金之白也是以真人道士莫不
留心住意精其微妙審其盛衰我行青龍彼
行白虎取彼朱雀前我玄武不死之道也又
陰人之情有急於陽而外自收抑不肯請陽
者明金之不爲木屈也陽性氣剛躁志節疏
畧至於遊宴聲氣和柔言辭卑下明木之畏
於金也天門子既明此道年二百八十歲猶
有童女之色乃服珠醞得仙入玄洲中去

皇化

九靈子姓皇名化得還年却老胎息內視之
要五行之道其經曰此術可以辟五兵却虎
狼安全己身營護家門保子宜孫內外和穆
人見則喜不見則思既宜從軍又利遠客他
人謀已消滅不成千殃萬禍伏而不起杜奸
邪之路絕妖怪之門呪咀之者其災不成獸
蟲之者其禍不行天下諸賢皆來宗已傾神
靈之心得百姓之意田蠶大行六畜繁孳奴
婢安家疾病得愈縣官道解事理得勝百事
皆利世有專世行此道者大得其妙在人間

五百餘年顏容益少復後煉丹乃登仙去

陰恒

北極子姓陰名恒其經曰治身之道受神爲
寶養性之術死入生出常能行之與天相畢
因生求生真生矣以鐵治鐵之謂真以人治
人之謂神後服神丹而仙去

李修

絕洞子姓李名修其經曰弱能制強陰能弊
陽常若臨深履危御奔乘駕長生之道也年
四百餘歲顏色不衰著書四十篇名曰道源
服還丹昇天也

柳融

南極子姓柳名融能含粉成雞子吐之數十
枚煮而啖之與雞子無異黃中皆餘粉少許
如指端者取杯呪之即成龜煮之可食腸臟
皆具而杯成龜殼煮取肉則殼還成杯矣取
水呪之即成美酒飲之醉人舉手即成大樹
人或折其細枝以刺屋間連日猶在以漸萎
壞與真木無異也服雲霜丹得仙去

葛越

黃盧子姓葛名越甚能治病千里寄姓名與治之皆愈不必見病人身也善氣禁之道禁虎狼百蟲皆不得動飛鳥不得去水爲逆流一里年二百八十歲力舉千鈞行及走馬頭上常有五色氣高丈餘天下大旱時能到淵中召龍出催促便昇天使作雨數數如此一旦與親故別乘龍而去遂不復還

劉安

淮南王劉安漢高皇帝之孫好儒學方技作內書二十一篇又著鴻寶萬年三卷論變化之道有八公往詣之門吏自以意難問之曰王上欲得延年却期不老之道中欲得博物洽聞精義入微之大儒下欲得勇敢武力扛鼎暴死橫行之壯士今先生皆耆老矣自無註書之術貴育之氣豈能究三墳五典八索九丘鉤深致遠窮理盡性乎三者並乏不敢相通公笑曰聞王欽賢好士吐握不倦苟有一介莫不畢至古人貴九九之學養鳴吠之士誠欲市馬骨以致騏驎師郭生以招羣芳吾等雖鄙不合所求故遠致身欲一見王就

令無益亦不爲損云何限之逆見嫌擇若王必欲見少年則謂之有道見垂白則謂之庸人恐非發石取玉探淵索珠之謂也薄吾等老謹以少矣言畢八公變爲十五歲童子露髻青鬢色如桃花於是門吏驚悚馳走白王王聞之不及履即徒跣出迎以登思仙之臺列錦綺之帷設象牙之牀燭百和之香進金玉之凡穿弟子之履北面拱手而言曰安以凡才少好道德羈鎖世業沉淪流俗不能遺累放逸山林然夙夜飢渴思願神明沐浴垢穢誠革浮薄抱情不暢邀若雲泥不圖厚幸道君降屈是安祿命當蒙拔擢喜懼屏營不知所措惟乞道君哀而教之則螟蛉假翼去地飛矣八公便已成老人矣告王曰雖復淺識且備先學知王好道故來相從不知意何所欲吾一人能坐致風雨立起雲霧畫地爲江河撮土爲山岳一人能崩萬塞洲牧虎豹致龍蛇役神鬼一人能分形易貌坐在立亡隱蔽三軍白日盡暝一人能乘虛步空起海凌煙出入無間呼吸千里一人能入火不焦

入水不濡刀之不傷射之不中冬凍不寒夏暑不汗一人能千變萬化恣意所爲禽獸草木立成轉徙山川陵岳一人能防災度厄辟邪却害延年益壽長生久視一人能煎泥成金煅鉛爲銀水煉八石飛騰流珠乘龍駕雲浮游太清任王所欲安於是旦夕朝拜身進酒果先乞試之變化風雨雲霧無不有效遂授丹經及三十六水銀等方藥成未服而安有子名遷好劍自謂莫及也郎中雷被與戲而被誤中於遷遷怒被乃求擊匈奴以贖罪安不聽被懼爲遷所殺乃上書於天子是時漢法諸侯壅關奮擊匈奴者罪死安當誅武帝素敬重安但削其二縣雷被與伍被素親伍被亦以奸私得罪於安安怒之而未發被恐誅乃誣告安謀反天子使宗正持節治安八公告安曰可以去矣此乃天所以發遣王願王勿疑乃與安登山大祭埋金於地即白日昇天八公與安所踐石上皆陷于今人馬之迹存焉與地志云八公山在淝水北淮水南淮南王與八公居此白曰昇天今屬壽州一云北非也乃有壁望草木爲兵處八公山有淮南八公祠石漢屬九江郡今

陽州來安縣之西南一云八公山上八公
有淮南王安廟今屬無為軍縣西

告安曰雖復天使有此然伍被為臣誣告君
父夫有神仙之籍者人謀之者死犯之者滅
被今當受誅也於是宗正既至失安所在推
問云王仙去矣天子聞之悵然乃諷使廷尉
張湯奏伍被為安畫謀反計遂族誅二被如
八公言矣漢史秘之不欲言神仙之事恐後
世人主常廢棄萬機以求不死故言安自殺
一云王同八公昇天乃棄置藥鼎雞犬舐之
並得輕舉雞鳴雲中大吠天上一云安得鴻
寶萬年之術仙去位太極真人

劉圖

漢安帝永初三年己酉二月老君降于泰山
遣泰山使者羽以車騎召江夏善士劉圖欲
使校定天下簿籍圖至見老君當殿南面而
坐泰山君居東西向九天仙君居南北向八
極天君居西東向命圖與官屬校定天下名
籍三日而畢老君欲示圖以罪福報應乃令
羽將圖至天堂見太清宮中金臺玉殿音樂
自然仙真多著青衣執金簡歌詠經文觀畢

遣回圖因此得道遂為道士後亦仙去

介琰

介琰者不知何許人也往建安方山師白羊
公杜必受玄一之道能變化隱形常隨師入
東海暫過吳吳主孫權禮之為琰起靜堂一
日之中數過遣人問起居琰或為童子或為
老翁無所食琰不受餉遺吳王欲學其術琰
以吳王內御遂不傳道法吳主大怒執縛琰
著甲棘引弩射之發而繩索獨存不知琰所
之耳

臣道一曰道之在人靜默虛無恬淡質樸

聲色不能挽其志名利不可汨其心彼吳
主安足與言道哉惟此時介琰道成已能
變化隱形返老復少可謂入軍不避甲兵
矣吳主以一旦之忿欲殺之何其陋邪道
德經曰兵無所容其刃夫何故以其無死
地學者省之

龍述

龍述不知何許人也於金山得神芝實如梧
桐子大泊而服之日餌刀圭服二年得仙尸

解而去真詰云龍伯高者後漢時人漢伏波

將軍馬援戒其兄子稱此人之佳可法即其
人也伯高後從仙人刁道林受服受胎氣之
法又常服青氈方託形醉亡隱處方臺師定
錄君也注云伯高名述京兆人漢建武中為
山都長推至零陵太守馬援征南日遣兄子
嚴書曰龍伯高敦厚周慎口無擇言謙約節
儉廉公有威吾愛之重之願汝曹效之效伯
高不得猶為謹飭之士所謂刻鵠不成尚類
鶩者也

趙丙

趙丙後漢東陽人曾遊行道遇故人便酌水
為酒前一揖為脯皆得醉飽又曾至渡頭求
船不得乃布席於水而坐乘風而過又呪枯
樹便生花葉

折象

折象字伯式廣漢人也少好黃老之業後師
東平先生虞叔雅亦得道者也為尚養生玄
默無言家世豐財以為多藏厚亡無益散千
金以賑貧苦或諫之象曰昔實子文有言我

之施物乃逃禍非避時也知者咸服焉自剋
亡日尸解如蛇蛻而去

王遙

王遙字伯遼鄱陽人也有妻無子頗行治病
病無不愈亦不祭祀不用符水鍼藥其行治
病但以八尺布敷地坐不飲不食須臾病差
便起去其有邪鬼作禍者遙畫地作獄因召
呼之皆見其形物在獄中或狐狸龜蛇之類
也乃斬之燔燒病者即愈遙有竹篋子長數
尺有一童子姓錢以九節竹杖擔篋將出冒
雨行遙及弟子皆不沾濕及夕嘗有兩火炬
導前約當行三十里許登一小山入石室石
室中先有二人遙既至取弟子擔篋發之中
有五竹簣三枚遙自鼓一枚以一枚與石室
中二人並鼓之良久遙辭去三簣皆納篋中
使錢擔之室中二人並送遙與遙言卿當早
來何爲久在俗間遙答言我如是來也遙還
家百餘日一夜天復雨然燈火治裝遙先有
葛單衣及葛巾五十餘年未嘗著之此衣皆
取著其妻即問遙欲捨我去也遙曰暫行爾

妻涕泣曰旦復留少時遙曰如是即當還後
三十餘年弟子又見遙在馬迹山中顏色更
少如向年蓋已爲仙矣

陳永伯

陳永伯者南陽人也得淮南王七星散方試
按合服之二十一日忽然不知所在永伯有
兄子名增族年十七亦服之其父繫其足閉
於密戶中晝夜使人守視之二十八日亦復
不見不知所之本方云服之三十日得仙陳
氏二子服之未三十日而失所在後人不
敢服仙去必有仙官來迎但人不見之耳

劉政

劉政沛國人也高才博物學無不覽深惟居
世榮貴須臾不如學道可得長生乃絕進取
之路求養性之術勤尋異聞不遠千里苟有
勝己雖奴客必師事之後治墨子五行記兼
服朱英丸年一百八十餘歲色如童子好爲
變化隱形又能以一身作百人百人作千人
千人作萬人又能隱三軍之衆使人化成一
叢林木亦能使成鳥獸試取他人器物以置

其處人不覺之又能種五果之木使華實可
食坐致行廚供數百人又能吹氣爲風飛沙
揚石以手指屋宇山林壺器便欲傾壞更指
之則還如故又能化作美女之形及作木人
能一日之中行數千里噓水成雲奮手起霧
聚壤成山刺地成淵能忽老忽少乍大乍小
入水不濕步行水上石江海魚鼈蛟龍龜鼉
即皆登岸又口吐五色之氣方廣十里氣上
連天又能騰躍上下去地數百丈後不知所
在

王喬

王喬健爲武陽人也武陽有北平山在益州
南一百四十七里高一千三百丈上有白蝦
蟇謂之肉芝食者長生非仙材靈骨莫能致
也喬好道望山朝拜積十餘年登山感致因
得食之身輕力倍行及走馬後爲栢人令遂
於東嶠山得道今武陽有喬仙祠王喬有三
同姓名有太子晉王喬有葉令王喬食肉芝
王喬乃蜀中神仙也

成君平

成君平者長沙郡人也年十五兄使牧鵝羊忽遇一仙翁將入東華山兄後尋至山中見君平因問所牧鵝羊何在君平指白石曰此是也遂驅起令隨兄去旬日却還山下復化為石今猶存焉因名此山為鵝羊山此山在長沙縣北二十里本名東華山亦謂之石寶山上有仙壇丹竈畢田詩云羽客何年此煉丹尚留空竈鎮彝顏雲中雞犬仙應有山下鵝羊石轉顧湘渚幾回滄海變連城無復令威還何年仙馭重來此盡遣飛騰上九關。

丁約

異人丁約隱於卒伍韋子威師事之一日辭去謂子威曰郎君得道尚隔兩塵

歷世真仙體道通鑑卷之五

職五

十八

歷世真仙體道通鑑卷之六

職六

浮雲山聖壽萬年宮道士趙道一編修

木公

木公亦云東陽公亦云東王父蓋青陽之元炁萬神之先也冠三維之冠服九色雲霞之服亦號玉皇君居於雲房之間以紫雲為蓋青雲為城仙童侍立玉女散香真僚仙友巨億萬計各有所職皆稟其命故男子得道者名籍所隸焉校定功行上奏元始以稟命於老君也一云木公即青童君治方諸山在東海中

九元子

九元子者煉紫金合神丹登仙其經曰庚辛經

上黃先生

上黃先生者修步斗之道得隱形法

常生子

常生子者常漱水和玉屑服之以昇

長存子

長存子者學道成為玄洲仙伯

張穆子

張穆子修太極上元年紀昇仙後以此法授龔叔進王文卿尹子房皆得道

高丘子

高丘子殷人也好道入六景山中積五百二十餘歲但讀黃素道經服餌木後合鴻丹以得陸仙遊行五嶽二百餘年後得金液以昇太清也今為中嶽真人真誥云墓在中山開事縣開喜乃屬河東

蒲先生

蒲先生者常乘白鹿採芝草於茅山

童子先生

童子先生者於狄山學道修浴契鈴經得仙

九源丈人

九源丈人者為方丈宮主領天下水神及陰

精水獸蛟鯨之類

宛丘先生

宛丘先生服制命九得道至殷湯之末世已千餘歲以方傳弟子姜若春服之三百年視之如十五歲童子彭祖師之受其方三首

青鳥公

青鳥公者彭祖之弟子也身受明師之教精審仙妙之理乃入華陰山中學道積四百七十一歲十二試之有三不過後服金液而昇天太極道君以爲三試不過仙人而已不得爲真人

長桑公子

長桑公子者常散髮行歌曰巾金巾入天門呼長精吸玄泉鳴天鼓養丹田柱下史聞之曰彼長桑公子所歌之詞得服五星守洞房之道

蔡瓊

蔡瓊字伯瑤師老子受太玄陽生符還丹方合服得道白日昇天常以陽生符活已死之人但骸骨存者以符投之即起

列子

列子鄭人也姓列名禦寇問道於關尹子復師壺丘子林又師老商氏友伯高子進二子之道九年之後能御風兩行弟子嚴恢問曰所謂問道者爲富乎列子曰桀紂爲輕道而

重利是以亡嘗隱居鄭圃四十年人無知者得道之後著書名列子見行世唐玄宗追號爲沖虛真人其書號沖虛真經宋徽宗封致虛觀妙真君

莊子

莊子宋人也姓莊名周字子休生於睢陽蒙縣學老氏之道梁惠王時爲蒙縣漆園吏以卑賤不肯仕楚威王以玉帛聘之欲以爲相使大夫二人往先焉曰欲以境土累矣莊子方釣於濮水之上持竿不顧曰楚有神龜死已三千歲矣王中笥而藏之廟堂之上此龜者寧其死爲留骨而貴乎寧其生而曳尾於塗中乎二大夫曰寧生而曳尾於塗中莊子曰子往矣吾將曳尾於塗中二大夫遂去宋王遣使聘於莊子莊子曰子見夫犧牛乎衣以文繡食以芻菽及其牽而入於太廟雖欲爲孤犢其可得乎子亟去無汗我我孰爲有國者所羈遂終身不復仕後得道著書名莊子真誥云莊子師長桑公子受其微言謂之莊子也隱於抱犢山中服北育火丹白日昇

天補太極闡編即下注云長桑即是扁鵲師事見魏傳及史記世人苟知莊生如此者其書彌足可重矣唐玄宗追號爲南華真人其書號南華真經宋徽宗封微妙元通真君

劉越

周時有匡先生名績修道於南嶂山後有一少年數來相訪言論奇偉先生異之問曰熟子風猷有日矣借問鄉邦姓字答曰予姓劉名越居在山之左山下有石高二尺許叩之即當相延先生如其語訪之叩石已石忽自開雙戶洞啓一小鬟迎先生行數十步繼有二青衣絳節前導漸見臺榭參差金碧掩映珍禽奇獸草木殊異真人冠玉冠朱紱劍佩來迎先生意欲留居之真人已覺謂先生曰子陰功易滿後會可期他日相從不晚也飲玉酒三爵延齡保命湯一啜而出先生返顧所叩石宛然如初他日復叩無所應矣今廬山太平宮三門外即石建亭局曰仙石石上自有劉仙二字存焉

王果

王果楚之賢人也賦穢風塵騰耀名利遁隱

山林靜退諸行一旦乘雲而去

鬼谷先生

鬼谷先生晉平公時人姓王名詡不知何所人受道於老君入雲氣山採藥合服得道顏如少童居青溪之鬼谷因以為號蘇秦張儀問道於先生先生曰聞道易修道難二子世心未冥可學游說以適今時之宜必得相其國矣必不得相其死矣若不懼之當相傳二子請學之三年辭去先生云二子輕松喬之永壽貴一旦之浮榮惜哉後復遺其書曰二君足下勤勞駟馬功名赫赫九州稽首春榮到秋不得久茂日數將盡時訖將老子不見河邊之木乎僕馬折其枝波浪漱其根此所居者然也子不見崧岱之松栢乎華霍之梓檀乎葉干青雲根洞三泉千秋萬歲無斤斧之患元狐疫死者有鳥如鳥噉草覆其面遂活有司上聞秦始皇遣使齋草以問先生先生曰巨海中有十洲祖洲有不死之草生於瓊田之中亦名養神芝其葉似菰而不叢生一株可活一人耳先生在人間數百歲後不

知所之或曰鬼谷在嵩高之陽城也

茅濛

茅濛字初成咸陽南關人也即東卿司命君盈之高祖師鬼谷先生入華山修道後乘雲駕龍白日昇天先是其邑歌曰神仙得者茅初成駕龍上昇入泰清時下玄洲戲赤城繼世而往在我盈帝若學之臘嘉平秦始皇聞之改臘曰嘉平以希慕得仙

西門君

西門君者少好道明諸識緯以開山圖授秦始皇而不能用

徐福

徐福字君房不知何許人也秦始皇時大宛中多枉死者橫道數有鳥如鳥狀噉草覆死人面皆登時而活持草以問北郭鬼谷先生而云祖洲上養神芝始皇乃謂可索得因訪求精誠得道士徐福發童男童女各五百人一云各率樓船等入海尋祖洲不返不知所在逮沈義得道黃老遺福為使者乘白虎車來迎由是後人知福得道仙傳拾遺云唐開

元中有士人患半身枯黑御醫張上客等不能活其人聚族言曰形體如是寧可久全聞大海中有神仙正當求仙方可愈疾宗族留之不可因與侍者齋粮至登州大海側遇空舟乃實所攜掛帆隨風可行十餘日近一孤島上有數百人如朝謁狀須臾至岸岸側有婦人洗藥問彼皆何者婦人指云中心牀坐鬚髮白者徐君也又問徐君是誰婦人云君知秦始皇時徐福耶曰知之曰此則是也頃之衆各散去士人遂登岸致謁具語始末求其醫理徐君曰汝之疾遇我即生初以羹飯哺之器物皆奇小士人嫌其薄徐君曰能盡此為佳食也但恐不盡爾士人連啖如數既物至飽而竭復以一小器盛酒飲之至醉翌日又以黑藥數丸與食利黑汁數斗其病乃愈士人求住奉事徐君云爾有祿位未宜即留當以東風相送毋愁歸路遠也復與黃藥一袋云此藥善治一切病還遇疾者可以刀圭飲之士人還數日至登州以藥奏聞時玄宗令有疾者服之皆愈

郭四朝

郭四朝者周時無人也兄弟四人同學道四朝居長秦時得道來句曲山南所住處作塘過澗水令深基遮垣墉今猶可識處真誥云今有塘乃郭四朝所造也高其壩岸蓋水得深但歷代久遠塘壩頽下耳注云今含語似是許長史宅宅前今乃有塘近西為堤壩即是過柳汴水而去郭千善遠郭千在北洞西北今有大陂塘四朝先應在此未解舍前之意恐長史於後復立田業又有說在後四朝乘小船遊戲其中每扣舷而歌歌曰清池帶靈岫長林鬱青蔥玄鳥藏幽野悟言出從容鼓櫂乘神波稽首希晨風未獲解脫期逍遙林丘中晨風謂上清玉晨之風非毛詩所謂鳴鵲晨風之鳥也浪神九垓外研道遂全真載此靈鳳羽藏我華龍麟高舉方寸物萬吹皆垢塵願承朝生惠孰盡汝車輪女龍不避席男受不盡輪朝生婦也遊空落飛颺虛步無形方圓景煥明霞九鳳唱朝陽揮扇扇天津掩靄慶雲翔遂造太微宇挹此金梨漿逍遙玄垓表不存亦不亡玄垓皆八極之外九霞之頂名也飛登木星亦名玄明東陽之垓蓋若士語虛教云吾與汗漫期於九垓之上矣駕欵舞神霄披霞帶九日高皇齊龍輪遂造北華室神虎動瓊林香風合成

一開闢幽冥戶靈變玄滅迹四朝為五臺執齊龍輪又云真法其司三官者六百年無違生起運之四朝職滿上補九宮在仙公領玉臺執蓋即中間久闕無人後以思和代四朝也山在居氏今猶呼一平澤地為郭千者是過請此地以遺思和遊看原阜下注云此行皆茅傳中原也按如此郭千止是種植處非居止也住處則長史宅果應是矣今塘壩既頽決水不復甚偉人皆以為田耳然其地過關小壩猶自成池可得舟而歌但無人能遊蹤迹上可欺如何復云自四朝年行過良常春盼明好

周太賓

周太賓秦時道士也同姜叔茂學道在句曲山種五果五辛菜貨之以市丹砂今山間多有韭蒹即其遺種也今呼為韭山在大茅西蔞蘿耳韭山二人並得仙太賓有才藝善鼓琴能彈獨絃而八音和以教糜長生孫廣田廣田即蔞蘿也

姜叔茂

姜叔茂不知何許人常與周太賓為友學道修仙今在蓬萊為左卿南鄭諸姜則叔茂之後也叔茂曾作書與太極宮僚云昔學道於鬼谷道成於少室養嗣於華陽待舉於逸咸

時乘鸞輪宴於句曲悟言永歎代謝之速物存人亡我勞如何真誥曰秦時道士周太賓及巴陵侯姜叔茂者來住句曲山下又種五果并五辛菜叔茂以秦孝王時封侯今名此地為姜巴者是矣以其因叔茂而名地焉下注云地號今亦存有大路從小茅後通延陵即呼為姜巴路也但秦孝公時未併楚置郡巴陵縣始晉初不知那有巴陵之封恐是巴蜀之巴故也

龔仲陽

龔仲陽者受嵩山少童步六紀之法

谷希子

谷希子者學道得仙為太上真官東方朔師之受閭風鍾山蓬萊及神州真形圖真誥云為太極右仙公

王仲高

王仲高不知何所人也常在淮南市卜父老傳世見之面有童顏伍被言於淮南王劉安安聞之欣然即使召至被曰仲高常在張猛家臣與猛善每云仲高性簡正難請求不可

以勢屈臣當因猛致之安今具車乘遣被至猛所招焉猛曰王先生昨云當暫行在近耳亦時得相見今已出卜晚間還被待之須臾便返見被大笑謂猛曰吾昨云近別正在此客也即隨被之安安出門迎之東面請受道便執弟子之禮仲高曰某庸人耳僅得長生不死之道他無所能懼所知淺不足以獻大王殿下非有愛悵之心安因請彌至仲高謂被曰吾欲授大王道王心志浮淺既不能行亦不宜聞又曰黃帝吾父之長也昔師朱裏君受長生之訣又師黃洞君受不死之道於今已六千餘歲矣遂以道傳安仲高後莫知其所之

公孫卿

公孫卿者學道於東梁甫山一云滋液山山宮中有合成仙藥得服之人立仙日月之神並在宮中合藥時頌曰玉女斷分割蟾蜍主和擣一丸煉人形二丸顏色好漢武帝時方士入海求蓬萊公孫卿先行見一老父牽狗武帝以爲仙人也冀獲其真

李少君

李少君字雲翼好道入泰山採藥修絕穀全身之術遇安期生少君疾困扣頭乞活安期生以神樓散一匕與服之即愈漢武帝初至雍郊見五時後常三歲一郊是時少君以祠竈辟穀却老方見上常自謂七十能使物却老上有故銅器問少君對曰此器齊桓公十年陳於柏寝臺已而按其刻果齊桓公器一宮盡駭以少君神數百歲人也少君言上祠竈皆可致物而丹砂可化爲黃金黃金成可以爲飲食器則益壽益壽而蓬萊仙乃可見以封禪則不死黃帝是也臣嘗遊海上見安期生安期生食臣棗大如瓜於是天子始祠竈遣方士入海求蓬萊安期生之屬一云少君上言臣能凝汞成銀飛丹砂成黃金服之白日昇天身鍊則凌空伏入無間控飛龍而八遐徧乘白鴻而九垓周溟海之棗大如瓜鍾山之李大如餅臣食之遂生奇光師安期授臣口訣是以保萬物之可成也於是上甚尊敬爲立屋第抱樓子曰按董仲舒所撰李

少君家傳云少君有不死之方而家貧無有市以藥物故出於幕以假途見錢通成而去又按漢楚中起居注云少君將去也武帝夢與之共登嵩山逢繡衣使者乘龍自雲中下云太一請少君帝覺語左右曰如我夢少君捨我去也數日而少君病死入棺帝令發棺無尸獨衣冠在焉

歷世真仙體道通鑑卷之六

歷世真仙體道通鑑卷之七

醜七

得雲山聖壽與年宮道士趙道一編修

董仲君

董仲君者臨淮人也少行氣煉形年百餘歲不老常見証繫獄伴死臭爛生蟲獄家舉出而後復生尸解而去

車子侯

車子侯扶風人也漢武帝愛其清靜稍遷其位至侍中一朝語家云我今補仙官此春當去至夏中當暫還少時復去果如其言武帝思之乃作歌曰嘉幽蘭兮延秀華妖姪兮中臧日斐斐兮麗景風徘徊兮流芳皇天兮無慧至人迹兮仙鄉天路遠兮無期不覺涕下兮沾裳

王興

王興者陽城人也常居宛谷中本凡民不知無學道之意也漢武帝元封二年正月甲子上嵩高山登大虞石起道宮使董仲君東方朔等齋潔思神忽見仙人長及二丈餘耳出頭頂下垂至肩武帝禮而問之仙人曰吾九

嶽山人也關中嶽石山菖蒲一寸九節服之可以長生故來採之言訖忽失所在武帝顧謂侍臣曰彼非學道服食之徒也恐是中嶽之神以此諭朕耳乃採菖蒲服之二年武帝性好熱食服菖蒲每食熱輒煩悶不快乃止

時從官亦多服之然莫能持久惟王興聞仙人服菖蒲之言乃採服之不息後為蒲江主簿聞縣境有神仙靈化每瞻望雲際歸心達誠遂罷官隱於秋長山即二十二化也下有洞穴中有千歲金蟾古老相傳有見之者當即得道又有瓊花木在山之頂徑八九尺葉若白檀終冬常茂云此木花開即有於此昇天得道者花如芙蓉香聞數里興居此山存神抱一吸景內修又以乘龍躡紀之道九載修煉忽有瓊花吐艷又見金蟾跳躍引入洞中遇金液之丹拜而服之後雲車迎之白日昇天後人因興得道遂相傳為主簿化

壽光侯

壽光侯者能劾百鬼眾魅令自縛見形其鄉人有婦為魅所病侯為効之得大蛇數丈死

於門外又有神樹人止者輒死鳥過必墜侯復効之樹盛夏枯落見大蛇長七八丈懸死其間漢武帝聞而召見乃試問之曰吾殿下夜半後常有數人絳衣被髮持火相隨豈能効之乎曰此小怪易消爾帝偽使三人為之侯効三人登時仆地無氣帝大驚曰非魅也朕相試耳解之而甦

衛叔卿

衛叔卿者服雲母得仙漢武帝天漢二年八月壬辰老君復遣衛叔卿來見帝時帝閑居殿上忽見羽衣星冠乘雲車駕白鹿而至帝驚問為誰答曰中山衛叔卿也帝曰子若是中山之民乃朕臣也可前共語叔卿忽焉不知所在帝甚悔恨即遣梁伯至中山求之不得見但將其子度世還見帝帝問云汝父今在何所對曰臣父少好道不交人事委家而去已四十五年云當入華山也帝復遣梁伯與度世共之華山尋之至絕巖之下望見叔卿與數人博戲於巖上紫雲覆之白玉為牀又有數仙人持幢節立其後度世望而再拜

叔卿曰汝何為來度世曰帝甚恨前日倉卒不得與父言今故遣使者梁伯與度世共來願更得見父也叔卿曰我前為太上所遣欲告帝以大災之期及救危厄之法國祚可延而帝乃驕慢自貴不識真道是以去耳今當與中黃太一共定天元吾終不復往也梁伯還奏帝悔之當時度世問叔卿曰不審與父並坐是誰也叔卿曰洪崖先生許由巢父太玄公飛黃子王子晉薛容也今世向大亂後數百年間土滅金亡汝歸當取吾齋室西北隅大柱下玉函中有神素書取而按合服之一年則能乘雲而行道成來就於此度世拜辭而去後以神方為梁伯之師合而服之與梁伯俱得仙

戴孟

戴孟武當山道士字成子武威人也漢武帝時為殿中將軍本姓燕名濟字仲微得道後改姓名又云漢明帝時人少孤養母甚至復好神仙學周遊四方母既即世入華陽山服白朮黃精兼能種植及服雲母雄黃丹砂芝

草篤志於道久而愈勤一日授玉珮金璫經并石精金光符於清靈裴真人精思修之則自覺體輕透名山訪真境日行七百里得不死之道腰間有十數卷書即太微黃書也仙人郭子華張季連趙叔達山世遠常與之遊處謝允常師事之允字道通歷陽人幼時為人所掠賣往東陽久之告官被誣陷為傷獄將入死夜有老翁授其符又有黃衣童子往來於是得免晉成帝咸康中至襄陽武當山見戴孟觀其風骨即先來獄中授符者乃孟耳遂執弟子禮求授道要後出仕作歷陽新豐西道三縣所至多神驗允年七十猶不老孟則或隱或顯莫知所之真誥云黃衣童子者即玉珮金璫之官耳

山世遠

山世遠授戴孟先生法暮卧先讀黃庭內景經一過乃眠使人魂魄自制煉嘗行此二十一年亦仙矣是為合萬過夕得三四過乃佳世遠得道為太和真人

毛伯道

毛伯道劉道恭謝稚堅張兆期皆後漢時人也同於王屋山學道四十餘年共合神丹成伯道先服即死次道恭服之又死稚堅兆期不敢服藥藥而歸未出山忽見伯道道恭各乘白鹿在山上仙人執節以從之二人悲愕悔謝道恭授以服茯苓方二人後亦度世

注云謝稚堅有三處出一云與葛玄相隨一云在鹿跡洞中即是此為詳為是一人當同姓名

蘇林

蘇君諱林字子玄濮陽曲水人也少稟異操獨逸無倫訪真之志與日彌篤嘗負簪至趙師琴高先生時年二十一受煉氣益命之道琴高初為周康王門下舍人以内行補精術及丹法能水遊時已九百歲唯不死而已非飛仙也後乘赤鯉入水或出入人間而林託景丹霄志不終此後改師華山仙人仇先生仇先生者湯王時木正也服胎食之法還神守魂之事大得其益先生曰子真人也當學真道我迹不足躡矣乃致林於涓子涓子者真人也既見之遂授以真訣告林曰欲作地

上真人必先服食藥物除去三尸殺滅殺蟲三尸者一名青古伐人眼是故目暗面黧口臭齒落由是青古之氣穿鑿泥丸也二名白姑伐人五臟是故心氣少喜忘荒悶由白姑貫穿六腑之液也三名血尸伐人胃管是故腸輪煩滿骨枯肉焦志意不開所思不固失食則飢悲愁感歎精神昏怠神爽雜錯由血尸流莖魂胎之關也若不去三尸而服藥者穀食雖斷蟲猶不死也徒絕五味雖勤吐納亦無益焉蓋其蟲生而求人不死不可得也是故服食不辟於死生由青古白姑血尸三鬼不去所致爾雖復斷穀人體重滯淹淹淡悶又所悶非真顛倒錯邪淫不除由蟲在內搖動五神故也凡欲求真當先服制蟲丸制蟲丸者一名初神去本丸也欲作真人當先服制仙丸制仙丸者太上八瓊飛精之丹也夫求長生不死仙真之初固不先服制蟲丸以除尸蟲建長生之根也若人腹中有蟲寧得仙乎形中饒鬼安得真乎其蟲凶惡速人之死故當除之消子告林曰我被帝召

上補中黃四司大夫領北海公去世無復日也後林詣消子寢靜之室得書一幅以遺林也其文曰五斗三一大帝所秘精思二十年三一相見授子書矣但有三一長生不滅況復守之手能存三一名刊玉札況與三一相見手加存洞房為上清公加知三元為五帝君後聖金闕帝君所以乘景迅雷周行十天實由洞房三元真一之道吾領本精三百年服氣五百年精思六百年守三一三百年守洞房六百年守玄丹五百年中間復周遊名山看望八海回翔五嶽休息洞室樂林草之垂條與鳥獸而相激川瀆吐精丘陵鬱鬱萬物之秀寒暑之節弋釣長流遨遊玄籟靜心山岫念真養氣呼召六丁玉女見衛展轉六合無所羈束守形思真二千八百餘年實樂中仙不求聞達今卒被召上補天位徘徊世澤惆悵絕氣吾其去矣請從此別子勤勗之相隨室也林省書流涕徬徨拜空消師之迹亦絕矣夫玄丹者泥丸之神也其法出太上素靈訣守三一為地真守洞房為真人守玄

丹為太微宮也林謹奉法術修行道成周觀天下遊騰名山分形散景寢息丹陵賣履市巷醜形試真得意而棲遯化不倫時人莫能識也以漢元帝神爵二年三月六日告弟子周季通曰我昨被玄洲召為真人上領太極中候大夫今與汝別比明旦有雲車羽蓋駢龍駕虎侍從數千人迎林林即日登天冉冉西北而去良久雲氣覆之遂絕林未去之時先是大極遣使者下拜為中嶽真人後太上又遣王郎下拜為五嶽地真人宮在丹陵也弟子周季通曰予見先師得道為仙已三被拜授乃登昇蓋洪德高妙玄韻宿感靈化虛源神澄八方龍昇鳳逐飛步真門隱顯津梁觀試風塵其道神矣其法珍矣非紙札麤意所能述宣今聊撰其標略爾所冀將來有道之士以遊目也

陽生

王思真

王思真者不知其得道年代位爲太上侍經仙郎漢靈帝光和二年己未正月一日太上老君降於天台山命思真披九色之韞出洞玄大洞等經三十六卷以授太極左宮仙公葛玄

王仲都

王仲都漢人也一云道士學道於梁山遇太白真人授以虹丹能禦寒暑已二百許年漢元帝召至京師試其方術嘗以嚴冬之月從帝而遊令仲都單衣乘駟馬車於上林昆明池環水馳走帝御狐裘而猶覺寒仲都貌無變色背上氣蒸然然又當盛夏曝之日中圍以十爐火口不稱熱身不流汗後亦仙去孫思邈嘗於峨眉山棲真習道仲都與三五人假爲獵夫過其居試之因論長生之旨遂授道思邈而去

上成公

上成公密縣人其初出行久不還家後歸語其家人曰我已得仙因辭家而去人見其舉步稍高出虛空中良久乃沒後漢時人也

桐君

漢獻帝建安三年晉國獻鳴石雞其色如丹大如燕常在地中應時而鳴聲能遠徹其國聞其鳴乃殺牲以祠之當聲處掘則得此雞若天下太平翔飛頡頏以爲佳瑞亦謂之寶雞人聽地中以候畧刻道士云仙人桐君採石入穴數里得丹石雞舂碎爲藥服令人有聲氣後天而死吳寶鼎元年四方貢珍怪有琥珀燕置之靜室自於室內鳴翔此之類也

劉晨

劉晨阮肇剡縣人也漢明帝永安十五年二人往天台山採藥迷失道路糧食之盡望山頭有一桃木共取食之如覺少健下山得澗水飲之并各澡浴又望見萋萋菜從山腹出次又有一杯流出中有胡麻飯屑二人相謂曰去人間不遠矣因過水深四尺許行一里又度一山出大溪見二女顏容絕妙世所未有便喚劉阮姓名如有交舊也喜悅因語曰郎等來何晚也因邀過家廳館服飾無不精

華東西各有牀帳帷幔七寶璽珍非世所有左右直息青衣悉皆端正都無男女須臾下胡麻飯山羊脯食之甚美又設甘酒又有數仙客將三五桃至女家云來慶女婿各出樂器歌調作樂日既向暮仙客各還去劉阮就所邀女家止宿駐留十五日求還女答曰今來此是宿福所招得至仙館比之流俗何有此樂遂住半年天氣和適常如三二月百鳥哀鳴無不悲思求歸甚切女曰罪根未滅使令君等如此更喚諸仙女共作鼓吹送劉阮從此山洞口去不遠至大道隨其言而得還家鄉並無相識也鄉里怪異乃驗得七代子孫傳上祖公入山不知何在既無親屬棲泊無所却欲還女家尋當年所往山路迷莫知其處至晉武帝太康八年竟失二公不知其所之也

武丁

桂陽城武丁有仙道常在人間忽謂其弟曰七月七日織女渡河諸仙悉還宮吾已被召不得停與爾別矣弟問織女何事渡河兄何

時當還答曰織女暫詣牽牛吾去後三千年當還耳明旦失武丁所在世人至今猶云七月七日織女嫁牽牛云

玄都先生

玄都先生者授仙人黑玉天地鈴經行而得道

蔡長孺

蔡長孺者蜀郡人服十精九年三百歲色如少童

延明子高

延明子高者服麋角得仙

崔野子

崔野子者服朮以度世

靈子真

靈子真者服桃膠以得仙

任敦

任敦博昌人也少在羅浮學道後居茅山南洞行斗步之道及洞玄五符能役召鬼神隱身分形居山舍虎狼不敢觸犯

敬玄子

敬玄子修行中部之道存道守三一常歌曰遙望崑崙山下有三頃田借問田者誰赤子字元先土生二靈木雙關俠兩邊日月互相照神路帶中天採藥三微嶺飲漱華池泉遊遊十二樓偃蹇步中原意欲觀絳宮正值子

丹眠金樓凭玉几華蓋與相連顧見雙使者博著太行山長谷何崢嶸齊城相接鄰縱我飛龍轡忽臨無極淵黃精生泉底芝草披岐川我欲將黃精流丹在眼前徘徊飲流丹羽翼奮迅鮮意猶未策外子喬提臂肩所經信

自險所貴得神仙

帛舉

帛舉字子高嘗入山採薪見二白鶴飛下石上即成兩仙人共語云頃合陰丹就河北王母索九釭酒服之至良子高聞仙人言就訪王母者得九釭酒還告仙人乞陰丹服之即翻然昇虛治於雲中掌雲雨之任魏晉間有此王母未審是此人否

徐季道

徐季道少住鵠鳴山後遇真人謂曰夫學道

當中天青詠大歷真語作雙白徊二赤此太素五神道之祕事也其語隱也大歷者三皇文是也季道修行得道

趙叔期

趙叔期不知何許人學道於王屋山中時時出民間聞有卜者在市叔期往見之卜者謂叔期曰欲入天門調三關存朱衣正崑崙叔期知是神人因拜扣頭請其要道因以一卷書與之是胎中記拜受之後合神丹而昇天

莊伯微

莊伯微者漢時人少好道不知求道之方惟以日入時正西北向閉目握固想崑崙山積三十年後見崑崙山人授以金液方合服得道真語云想崑崙山二十一年後服食入中山學道得存此法當復十許年後閉目乃見崑崙存之不止遂見仙人授以金液之方遂以得道

瞿武

瞿武後漢人也七歲絕粒服黃精紫芝入峨眉山天竺真人授以真訣乘白龍而去今蜀州有瞿君祠

匡俗

匡俗字子希少以孝悌著稱召聘不起至心學真遊諸名山至覆笥山上有湖周迴數里多生靈草異物不可識其傍有石井泉通湖中又有石鴈至春秋時皆能羣飛復有小石笥中有玉諫多記山名福地及得道人姓名後服食得道

賦七

十三

盧耽

盧耽者少學道得仙後復仕為州治中每時乘空歸家到晚則反州嘗元會期賀在列時耽後至迴翔閣前欲下次為威儀以箒拂耽得一隻履墜地耽由是飛去

傅先生

傅先生者學道於焦山中精思七年遇太極真人真誥云太極真人與以木鑽使之穿一石盤厚五尺許戒云石盤穿仙可得也於是晝夜鑽之積四十七年鑽盡石穿仙人來曰立志若斯寧有不得道者即授以金液還丹服之度世丹臺錄云昇太清為南嶽真人

黃觀子

黃觀子少好道家奉佛道朝朝拜叩求乞長

生如此積四十九年後遂服食入焦山太極真人以百四十事試之皆過遂服金丹而詠大洞真經今補官為太極左仙卿

石坦

石坦字洪孫渤海人也遊趙魏諸名山得道能分身同時請十餘家各家有一坦所言各異

張巨君

張巨君者不知何許人也許季山得病不愈清齋祭泰山請命晝夜所訴忽有神人來問曰汝是何人何事告告幽冥天帝使我問汝可以實對季山曰僕是汝南平輿許季山抱疾三年不知罪之所在故到靈山請決死生神人曰我是仙人張巨君君有易道卜筮射知汝禍祟所從季山因再拜請曰幸蒙神仙迂降願垂告示巨君為筮卦遇震之恒初九六二六三有變巨君曰汝是無狀之人病安得愈乎季山曰願為發之巨君曰汝曾將客東行為父執仇於道殺客內空井中大石蓋其上此人上訴天府以此病譴汝也季山曰

實有此罪巨君曰何故爾邪季山曰父為人搏恥蒙此以終身時與客報之未至客欲告怨主所以害之巨君曰冥理難欺汝勤自首吾還山當為汝請命也季山漸愈巨君傳季山筮卦卜喜於易占但不得巨君度世之方

歷世真仙體道通鑑卷之七

歷世真仙體道通鑑卷之八

賦八

浮雲山聖壽萬年宮道士趙道一編修

尹喜

無上真人尹喜字公文初母氏嘗晝寢夢天下絳霄流繞其身及喜生時家內陸地自生蓮花光色鮮盛服有日精姿形長雅垂臂下膝堂堂有天人貌少好學墳索善於天文祕緯仰觀俯察莫不洞徹雖鬼神無以匿其情大度恢條不修俗禮損身濟物不求聞達逸響遐宣周康王時為大夫後召為東宮賓友結草為樓仰觀乾象精思至道號為樓觀喜於是時瞻見東方有紫氣西邁天文顯瑞知有聖人當度關而西乃求出為函谷關令王從之昔在浩劫有聖人名太上老君自開闢以來傳弘大道歷世降為帝者師詳見前卷之二

自天皇氏通玄天師至周郭叔至殷陽甲十子以從降世詳見混元寶錄

詳見後卷無至辛紂二十一年文王再降於岐山之陽周文王為西伯召為守藏史周武王時遷為柱下史成王時仍為柱下史乃遊西極大秦竺乾等國號古先生化導其國在崑崙之西非天竺之天竺也至康王時還歸于周復為柱下史昭王時去官歸亳隱焉老君復欲開化西域乃以昭王二十三年癸丑極天上之無五月壬午駕青牛之車薄版為隆霄徐甲為御將西度函關喜至關曰夫陽數極九星宿值金歲月並王法應九十日內有大聖人經過京邑乃敕關吏孫景曰若有形容殊俗車服異常者勿聽過喜即預期齋戒使掃路四十里夾道燒香以俟天真入境至七月十二日甲子果有一老人皓首聃耳乘白輿駕青牛而至關吏曰明府有教願公少留乃入白喜喜曰道今來矣我得見聖人矣即具朝服出迎跪伏扣頭邀之曰願大人暫留神駕老君謝曰吾貧賤老翁居在關東田在關西今暫往取薪何故見留幸聽度喜復稽首曰大人豈是取薪久承大聖當來西遊勞神暴露願

少憩神駕老君曰聞開導世乾有古先生善入無為永存綿綿是以昇就道經歷關子何苦留邪喜又曰今觀大人聖姿超絕乃天上之至尊邊夷何足往觀願不託言少垂哀愍老君曰子何所見而知吾喜曰去冬十月天理星西行過昴斗中有天理四星主統理萬物自今月朔融風三至東方真氣狀如龍蛇而西度此大聖人之徵喜少好墳易及天文祕緯凡仰觀俯察未嘗不驗故知必有聖人度關夙夜存思未嘗暫息今以有緣果遇仙駕願垂慈誨開濟沉冥老君既三試之皆過乃怡然笑曰善哉子之知吾吾亦已知子矣子有通神之見當得度世也喜忻躍叩頭再拜曰敢問大聖姓字可得聞乎老君曰吾姓字渺渺從劫至劫非可悉說也吾今姓李字伯陽號曰老聃聃與詹同喜於是就官舍設座供養進盟擗行弟子之禮老君之御者徐甲少負於老君約日雇百錢至出關時計當七百三十萬錢甲見老君去官遠適亟來索錢老君謂曰吾往西海大秦屬宿天竺安息諸國今汝御車

還當以黃金計直價汝甲如約及至關飯青牛于野老君欲試之乃以吉祥草化為一美女行至牧牛之所輒以言戲甲甲惑之欲留遂負前約乃詣關令訟老君索備錢老君謂甲曰汝隨我二百餘年汝久應死吾以太玄生符與汝所以得至今日汝奚不念此而訟吾言訖符自甲口中飛出丹篆如新甲即成一聚白骨喜憫甲違心致死乃為甲叩頭請命願赦其罪賜以更生乞為出錢償之老君重喜慈捨曰善乃復以太玄生符投之甲即立生老君曰吾不責汝汝負本約道自去汝故死耳今償汝錢喜即以錢給甲而禮遣之甲請留不許伏地搏頰曰已沐聖恩曲赦罪戾今此枯骨復見光明刻骨銘心願從雲駕老君竟弗許老君為喜留關下百有餘日喜齋戒叩頭再拜跪請曰塵凡孺子幸遇聖人投身委命願聞大道老君曰微哉子之問也夫大道守真三品為則以一為度以正為德喜曰道品有三要得昇仙其可行乎老君曰子能知一萬事畢閉塞情欲入與室煉金食

氣為第一子能知之守勿失喜踊躍稽首曰煉金奈何曰神方也自至真上帝莫不由金丹而得道履九幽而入杳冥上下虛無因神明而俱升喜稽首曰願聞其旨老君曰紅鉛黑錫大丹頭從紅入黑是真修黑中取精赤取髓解取赤黑藥無比用赤入黑保長生用黑入赤天仙矣喜曰道則高矣妙矣末學未究願賜指示老君曰一者是鉛鉛為君二者是汞汞是臣若鉛不真其汞難親若鉛是親不失家臣青腰使者赤血將軍和合兩姓異族同羣白汞作腦黃芽為根化鉛為粉煉汞成塵陰居陽位陽數陰句曰盈月是寒暑區分開設法象赫然有文惟吾此道天地常存喜拜曰藥物之旨敬聞命矣爐鼎之制水火之候奈何老君歌曰圓三五寸一分口四八兩寸唇長二寸厚薄均腹三齊坐垂溫陰在上陽下奔首尾武中間文始七十終三旬內二百善調勻陰火白黃芽銀兩朵聚輔翼人子處宮得安存來去遊不出門漸成大性精純即歸一還本原至一周甚棲勤密防護莫

迷昏途路遠甚幽玄若達此會乾坤子午沾淨鬼覓得長壽入山村樂道者尋其文諦思之勿須論又歌曰日月本是乾坤精卦象周迴甚著明前三五今後三五五六三十又還生生兮滅兮周十二中分二十四二十四氣內推遷萬象交鋒都在此水銀一味翻為二變化陰陽成既未既未却配為夫婦始覺壺中有天地又歌曰金液還丹仙華流高飛雲翔登天丘赤黃之物成須臾當得雌雄紛亂珠可以騰變致行廚靈人玉女我與俱出入無間天同符其精凝霜善沉浮汝其震敬必來游金液之訣盡於此矣丹成作金以為食器亦得長生先試作金金成乃可服故曰金可作世可度也於是投喜太清八符經太清觀天經九都經神丹經金液經及八煉九轉還丹伏火之訣焉老君復謂曰審欲神仙當先服還丹金液汝不服還丹金液虛自苦爾為寒溫風濕鬼氣所擊司命不能救也可不勉哉努力作丹早自防衛勿示愚人今訕毀神道益子之過嗟乎行尸雖富有萬物

貴爲王侯不滿百年成土一寶甚可哀也合
作神丹勞苦須臾一成便仙與天相畢恣心
所欲樂可央乎喜曰煉金食氣道有二乎老
君曰天地之精華陰陽之根本二氣之謂也
陽龍陰虎木液金精二氣交會煉而成者謂
之外丹舍和煉藏吐故納新上入泥丸下注
丹田循環不息朝于絳宮採於五府以哺百
神此內丹也修道之士得內丹者可以延年
得外丹者可以昇天三一九思者內修之要
也九丹金液者外煉之極也合而修之道成
決矣喜重請曰煉金之法既奉教矣敢問食
氣奈何老君曰食氣固精受明玄經生道要
妙出幽入冥上固雲門下固靈根知之甚易
行之甚難夫形動德散氣越道判精消氣損
目動鬼亂是以聖人靜形固氣蓄精愛視則
道德虛凝鬼固守形一神萬道乃成就常
以半夜之後偃卧握固鼻納清氣口徐吐之
復守三一入室九思神定氣安仙道近矣因
授喜玉曆中經三十五章喜曰三一之旨願
賜指示老君曰三一之道神仙所重世莫得

聞子其秘之兩眉間却入一寸爲明堂二寸
爲洞房三寸爲泥丸上丹田宮也中有赤子
字元先名帝卿心中爲絳宮中丹田宮也中
有真人字子丹名光堅臍却入三寸爲命門
下丹田宮也中有嬰兒字元陽名玄谷皆長
三寸同服赤憤赤衣赤履此三一也一赤上
中一赤下
一嬰兒之狀下一座金牀玉几常以金
爐玉匕攪精華以哺上一中一下一當晝夜
存之也子欲長生三一當明子能守一一亦
守子矣氣變爲精精變爲神神化爲嬰兒嬰
兒上爲真人真人然後爲赤子此真一也又
曰偽道養形真道養神神真道道能亡能存
神能飛形亦能移山形爲灰土其何識焉耳
目聲色爲子留戀鼻口所喜香味是寃身爲
惱本痛痒寒溫意爲形累愁憂煩弗疾去
之則志氣日耗壽命不延其來久矣子當先
損諸欲莫令意逸閑居靜處精思齋室丹書
萬卷不如守一常以虛爲身以無爲心無身
之身無心之心可謂守神守神玄通是謂道
同其猶高山大澤非欲蟲魚鳥獸而蟲魚鳥

獸歸之人能虛無無爲非欲於道道自歸之
矣見西乃授喜太陽金真九煉之法謂之
九室存思第一無邪思第二正身思第三致
正思第四大正思第五極正思第六深正思
第七正真思第八洞玄思第九大洞思入此
九室行此九思即與太陽合形同鑠於道喜
皆得其秘再拜稽首敬佩玄思喜於是辭疾
去官十二月二十五日奉選老君歸其家他
日請曰愚愚不知所問願請益老君曰子欲
修身養性行道紀形結氣成神終始無窮者
莫先以靜故天靜以爲定神靜以爲變人靜
以爲生將靜之時反聽內觀心不妄念口不
妄言形不妄動無色之色爲之見無聲之聲
爲之聞無味之味爲之甘不言之言爲之教
神景爲之降福德爲之臻和氣爲之應矣子
欲靜神先沐浴齋戒二十五日然後精煉已
身鬼魅和平乃可入室入室之後或丹蛇來
著子心或玉母來降或道身應見此皆身中
之神試子爾但勿驚怖有問不對有所傷犯
應勿爲懼但安心定志其物自去經二十五

日四十五日六十日八十五日一百五日一百二十五日一百五十日一百八十日並有神來皆是試子安心勿對不能為害若生怖懼為試不過則失道矣戒之謹之百八十日後室內自明安危存亡之事無不預知身中

顯八

官府一顯見二百八十日後眾病皆除一年之後癰疽皆滅千日之後形神俱妙為真人矣即授喜妙真內解等太清上法三洞真經靈寶符圖太玄等法俾教授至精仁者羽化神仙令毋斷絕喜稽首禮謝乃謂喜曰吾重告爾古先生者即吾之身嘗化乎竺乾今將返神還乎無名綿綿若存吾今逝矣亦反一源老君將欲西適喜叩頭乞請侍行老君曰吾遊乎天地之表戲乎玄冥之間四維八極上下無邊子欲隨吾烏何得焉喜曰入火入洲入地上天灰身沒命願隨大仙老君曰得道之士目能洞視耳能洞聽變化不測隱顯莫定尚未可隨吾遠適子雖骨相合道法當成真然受道日淺未能通神安得變化隨吾聖身喜再拜曰通神變化之道可得聞乎

老君曰有生之氣有形之狀盡幻也造化之所始陰陽之所變者謂之生謂之死窮數達變因形移易者謂之化謂之幻造物者其巧妙其功深故難窮難終因形者其巧顯其功淺故隨起隨滅知幻化之不異生死也始可

顯八

與語變化之道子能精修此道體入自然斯可與子行化諸國爾越二十有八日喜復焚香再拜請曰喜幸聞至道欣慶難言願賜著書開揚道旨以語後世老君曰善汝應為眾真之長當於此宛利天下棄賢世界傳弘大道即以道德五千言授之曰吾此文未嘗輕以授人凡經千載方一傳爾子其勉之喜拜受欣躍持誦奉行道成已遂傳後學云老君次年甲寅歲四月二十八日將於喜宅南山阜上辭決昇天老君所以未西適而復昇天者姑俟闕尹道成同往化西喜悲戀請留老君重告喜以除垢止念靜心守一之旨戒喜曰千日之外可尋吾於蜀青羊之肆也言訖從身空中坐雲華之上面放五明身見金光洞照十方冉冉昇空光燭館舍五色玄黃良久乃沒喜目斷雲霄涕泣

攀戀其日江河汎漲山川震動有五色光貫太微史記作太微紫微徧及四方自殷高宗九年至此凡二百七十四年喜遂以老君所說理國修身之要去奢滅欲之言敘而編之為三十六章以將昇西極之際所演故名西昇經老君所乘薄板車歷代至今猶存其昇天

臺在樓觀之南今人相傳呼為老君陵當昇天之時五色光貫紫微徧及四方昭玉問太史以吉凶之徵太史云當有聖人西去千年之外聲教遠此昭玉命誌於郊壇焉此乃西化之兆也自昭玉甲寅喜乃於草樓清齋屏絕人事三年之內修煉俱畢心凝形釋無有飢渴不畏寒暑窮數達變之微形一神萬之旨悉臻其妙乃自著書九篇號闕尹子至丁巳歲即往西蜀尋訪青羊之肆老君以甲寅年昇天至乙卯歲復從太微宮分身降生於蜀國大官李氏之家已先敕青帝之青龍化生為羊毛體華潔色如青金常在嬰兒之側愛翫無數忽一日失羊童子尋覓得於市肆喜至蜀徧問居人無識青羊肆者忽見童子牽羊因自解云既有青羊復在市肆聖師所約其在是邪因問此誰家羊牽欲何往童子答曰我家夫人生一兒愛翫此羊失來兩日

兒啼不止令却尋得欲還家喜即囑曰煩爲告夫人之子云尹喜至矣童子如其言入白兒即振衣而起曰令喜來前喜既入其家庭宇忽然高廣湧出蓮花之座老君化數丈白金之身光明如日項有圓光建七曜之冠衣晨精之服披九色雜羅之帔坐於花座之上舉家見之皆驚怪老君曰吾太微是宅真一爲身太和降精耀鬼爲人主客相因何乃怪邪尹喜匍匐獻歡悲啼踊躍喜慰無量稽首言曰不謂慶會復奉天顏未審慈尊出無入有起居安否老君從容告曰與子別後何得何喪汝存道守一亦有益乎喜稽首曰自奉祕要粗得其妙恩濟祖先咸受無極之慶老君曰善吾所以留子者以子居世來久深滌恩愛初受經訣未克成功是以待子於此今子保形煉氣三年功畢已造真妙心結紫絡面有神光金名表於玄圖玉札係於紫房氣參太微解形合真矣喜再拜稽首謝曰聖師德重天地恩過父母天地能覆載喜不能令喜得道父母能生育喜不能令喜長存老君

曰亦汝之玄分致然即命召三界眾真時詣天帝君十方神王洎諸仙眾倏忽之頃浮空而至各執香花稽首聽命老君敕五老上帝四極監真授喜玉冊金文號文始先生位爲無上真人賜紫芙蓉冠飛青羽裙丹褐綠袖交泰霓裳羅紋黃綬九色之節及玉童玉女各五千人居二十四天王之上統領八萬仙士喜降拜俯伏曰塵凡孺子得遇大聖使枯骨再肉千生慶幸俾居則執掃除之役行則備僕御之徒喜之願也亦喜之榮也位號崇高禮文優渥愧何德以祇承敢辭老君曰子慕道積久隱德昇聞修煉勤勞玄功已遂非吾有私於子也子其勉之喜辭不獲乃再拜受命自此方得飛騰虛空參侍龍駕遊行八方老君遂爲大官聖母說元陽經其家長幼二百餘口即時拔宅昇天

老君乘輿駕五色神龍建流霄皇天丹節廢九光鶴蓋前導十二衛官神丁執麾後有九萬飛仙駢控鸞輪獅子啓途鳳凰翼軒策空東遊真人與四天王從焉至日窟常賜之山椒搏桑之丹棋散若木之朱華觀碧海挹東井過鬱池宮賜谷神王東海青童衆仙陳丹楹朱實金津碧醴次登祖山觀芝田採養神草息蓬萊宮復南遊風山登青丘過紫府太元真人紫府先生獻九光甘液白文玉英青林白子此山亦名蕭丘出九光之英火浣之布次登長離山越赤津入太丹宮南極夫人設瓊花玉酒赤靈火棗至絳山觀流火之鄉息朱陵之闕太和玉真華蓋上公列炎岡朱髓飛丹紫桃雲浪之液而奉焉乃西遊龜臺入七寶園觀飛玄紫文過流精闕九靈金母太素元君進玉文之棗其實如餅命侍女陳反魂靈香玄光碧桃金紫交梨次汎弱水登鳳山入玉池息昆吾山白帝天君採七明石芝流精玉膏金光丹醴進焉北遊空洞山過洞陰宮北極真公獻十結神草玄雲李空洞

瓜其小四登玄丘觀朔陰八鍊池息廣寒墟

太玄仙伯奉絳樹丹寶三玄紫柰進焉復登

中嶽崑崙山此非人間之五嶽乃海外之神

西嶽曰靈臺北嶽曰常山東嶽曰泰山南嶽曰衡山遊玄圃瑤臺觀七寶瓊

林聆九苞鳴鳳聆日月星辰交暉下覽四天

下如指掌其上有金臺玉樓七寶宮殿晝夜

光明天帝神王之下遊處也一面有二百四

十門有珠玉七寶之林紫華丹寶碧葉瑤音

如琴瑟和韻皆應律呂大玄九宮仙人居焉

皆自然天廚出入在意天伎雅絕樂難可勝

實寓內之清都神真之盛觀也尹真人初受

童真之任隨侍老君遊此究利天下五嶽名

山洞天宮館及四海江河洞泉水府其主者

或稱聖帝或號真王或公或侯有所咨啓多

論二儀三景陰陽氣候劫運賒促及帝王命

錄脩短安危興廢兆人禍福并學道進仙階

級黜陟之事調和氣序抑消陽九百六災會

之法或請問道德宗源希夷之旨老君皆如

所請酬答言辭隱奧世莫得傳老君謂喜曰

吾將與汝上朝玉宸遊歷帝鄉作是語時靈

音八會雲騎四合并昇虛遂徧歷九天諸

天帝皆來迎老君入其宮宇設瓊英玉實月

液雲漿靈芝仙果光華映席天樂繁會靈唱

妙絕諸天帝仙真皆禮拜請問自然無上玄

妙至真帝一之道已而上元太有真公中元

太極仙公下元太清仙伯乘碧霞黃素雲輿

駕蒼虬麒麟獅子張交輝流霞鸞鳳飛鶴之

蓋仗日精命真之旃月華命魔之節星光命

仙之旗侍從神仙靈官十五萬謂上元七萬中元五萬下元三萬所乘駕及蓋旛各持香花稽首拜迎

老君上昇上清日闕丹城藥珠宮老君乃命

喜朝禮高聖玉晨太上大道君於是道君賜

喜環剛丹果隱伏龍芝珠英玉醴共十二事

乃從老君下降于天水之靈山遂之西域今

州啓靈山也見有西昇臺聖容殿並在巖下初老君去周嘗西化

大秦安息月氏烏弋竺乾等國號古先生其

國王及臣民皆奉教戒乃還中國復與無上

真人尹喜至罽賓國行化次及條支于闐等

國行化且降伏九十五種外道焉至穆王四

年甲申老君降遊東海至博桑會大帝校集

諸仙名位高下復分身降于西海至蘇隣國

行化俄復昇天穆王少好神仙之道登春山

瑤池而歸在位五十四年年一百四歲時尹

喜既適流沙其草樓在終南之陰王追慕靈

迹命駕詣焉為修觀建祠延杜沖等七人為

道士以奉祠事夷王之世老君與玄古三師

降于蜀綿竹之三學山授李真多以飛昇之

道今號真厲王二十一年甲辰老君降于樓

觀授道士宋倫以中景之道通真之經并靈

飛六甲素奏丹符平王二十三年癸卯十二

月老君復出關開化諸國遂遊西海至流麟

等洲考校羣仙功行乃復昇天定王之世王

問老君以在世神仙老君對以東嶽有展禽

先生南嶽有匡續先生西嶽有尹喜北嶽有

皇人中嶽有古先生即予是也顯王八年庚

申秦孝公時老君東還又與尹真人等遊於

上虞赤城蒙山重過博桑大帝之所校集羣

仙已而隱於洛中景室山時有黃髮老叟五

人或乘鶴或衣羽握青筠之杖相與共談天

地之數世無知者老君著述經書垂十萬言

傍有二神人捧金壺盛墨狀若淳漆以寫之其墨寫木石皆成篆籀之文報王九年乙卯老君與尹真人諸仙遊女凡地肺天柱諸山復西出散關渡流沙昇崑崙還紫微上宮返手太玄之鄉秦昭王聞之恨不及見乃於西麓下老君所經由處爲修城邑以表聖迹今有老停驛尹喜城故墟尚存焉

尹軌

太和真人尹軌字公度太原人也乃文始先生之從弟少學天文兼通識緯來事先生因教服黃精花及授諸道經凡百餘篇皆蒙口訣先生登真之後即與隱士杜沖等同於先生宅修學時年二十八絕粒養氣專修上法太上哀之賜任太和真人仍下統仙僚於杜陽宮軌時出遊帶神丹十餘筒周歷天下濟護有緣或煉金銀以賑貧苦或行丹藥以救危厄求哀之人咸得其福利焉其出入有無隱顯莫測故上清瓊文帝章曰太和真人與太華真人三天長生君南極總司君西臺中候北帝中真九靈王子太靈仙妃赤精玉童

玄谷先生南嶽赤松子中山王喬紫陽真人西城王君中黃先生趙伯玄山仲宗等並修行三真實經上法皆面發金容項負圓光乘虛登霄遊宴紫庭變化無方適意邀翔嘯命立到微召萬靈攝制羣魔決斷死生駕霄乘煙出入帝庭焉晉惠帝永興二年建通天之冠佩攝神之策服絳章之裙披黃文之帔從東來止于尹真人之觀時道士梁謨叩頭願陳其所習謂謨曰吾是無上真人文始先生之從弟先生登真時吾年二十八已絕粒養氣專修上道太上哀吾乃賜登太和下統仙僚於杜陽宮其宮東西四千里南北七百里有金城九重玉樓十所宮殿服玩神芝靈草不可具名其上清元陽大洞諸經百萬卷皆有金童玉女衛之自然有日月星辰雲氣伏光流精洞照其下神仙畧有萬計皆神光虛映長生不死無爲自在或出遊天下或上朝玉京宣校一切行業善惡報應宿命之期或論天地日月星辰運度賒促之分或宴諸天參訂神仙圖錄品位部御之方或定童真始

仙威儀俯仰之格或臨諸地鎮察兆人建功立行齋醮之福或監度學道男女經方藥餌之術或遊百山千川檢閱神司鬼官考錄罪福之因或論風雨雷電水旱豐歉之事吾所爲無常相或爲道士或爲儒生或爲童愚或爲長老不可以一途限也或與羣真衆仙驂龍勒鳳策空駕虛雲馳電邁出有入無分形散影處處遊集或巡五嶽之洞或適十洲之島或出入荒之域或入九幽之府或釣碧海之津或挹玄丘之雪或採丹華於閬苑或授絳實於玉圓斯並由己身累功研習靈文勤勞甘辛所致爾吾至今已及一千三百餘歲所歷事頗多非爾曹短札所能記錄畧舉其大舉爾八月一日忽躡身騰空冉冉昇天而去猶聞宛然笙簫之音唯餘器服細素存焉

戶道一曰尹軌道高德妙功行絕倫散景分形神通浩博道德經曰古之善爲士者微妙玄通深不可識夫惟不可識故強之爲容如尹軌者真得其旨也

歷世真仙體道通鑑卷之八

歷世真仙體道通鑑卷之九

臧九

修雲山聖母萬年宮道士趙道一編修

杜冲

太極真人杜冲字玄逸錫京人也以周昭王二十七年丁巳聞文始先生登真乃于茲靈宅棲玄學道于時幽人逸士自遠而來者有五人焉云混元實錄云七人並沉默虛遠方雅高系道術相志共弘不伐之則也先生本第周原王時賜金百鎰重加完茸賜號曰樓觀冲居之吟諷道德營護神氣至是穆王聞之為修觀建祠置冲為道士焉將以氣均巢許德焉物範故天子禮之而不臣諸侯敬之而不爵也冲居樓觀經二十餘年幽感真人展先生降于寢靖侍者二人捧碧玉函立于左右冲乃拜首求哀蒙授九華丹經二函謂冲曰老君與尹先生於東海八濤山召大帝校集羣真天下山川洞室仙人無遠不至時有地司保舉子之勤勞老君教我付爾仙經也冲依方合服而身生玉腴五臟堅潤僅容氣息又感真人李君授以太上素靈洞玄大有妙經冲

復修之甚得其驗遂乃解胞釋結保命疑真

領攝羣神洞觀衆妙焉移王親崇道教以祈

神仙共策追風之駿日馳千里中到崑崙山

昇玄圖之宮西詣龜山謁王母於青琳之室

東遊碧海展敬丈人採若木之華北適玄壘

南邁長離同挹絳山之醴驅策虎豹役使百

靈通冥達幽其測其涯年一百二十餘以懿

王十二年己亥上清元君遣仙官下迎授書

為太極真人下任王屋山仙王混元實錄云十

餘歲穆王十九年己亥老君遣上清元君下迎授書考究傳記則實錄所載誤

○臣道一曰杜冲究道德之妙輕富貴之微

故天子禮之而不臣諸侯敬之而不爵道

德經曰道常無名樸雖小天下不敢臣侯

王若能守萬物將自賓杜冲豈非以斯道

自任而納王侯為道之歸乎

彭宗

太清真人彭宗字法先彭城人也年二十服

業於杜冲真人深蒙賞接周穆王好尚黃老

景慕神真因詣冲遂繕完珍館崇建靈壇立

廟置老君及尹真人像廣延天下學道之士

以紹仙風仍立典司四時掃飾後西遊崑崙

復拜謁而去宗乃棲真味道精貫人神嘗從

師採藥忽墮深谷手足傷損逮至危困良久

蘇息肅恭如初又行山使之採樵乃被蛇中

曾無懼色冲憫之為立壇盟誓丹經五千文

玄一之道宗實而修之日臻幽妙霄宵中有

神燈數枚浮空映席凝暉留耀洞暢幽冥或

晨起脩檢則氣象高明常有五色雲霞霏霏

臨遠能三晝三夜通為一息或自沒水底竟

日方出若瞑目僵卧輒一年許不動塵委其

上積厚如紙見者皆疑已殞及起顏色愈鮮

澤能以一氣誦五千文通為兩遍言聲清暢

與出入常人無異山中毒蛇猛虎宗每以氣

禁之潛伏盤辟人雖磨觸終不得動宗解之

方去嘗有獵者遙想誘毀或及門欲相凌辱

宗用氣禁之其人手足不覺自拘蠢然尸立

或使幽靈擊之傍門惟聞叩頭之聲莫測其

所以俟其悔過宗即為釋之年一百五十餘

歲常如二十年少至厲王十三年丙申正月

太上道君遣仙官下迎授書為太清真人治

赤城宮

宋倫

太清真人宋倫字德玄洛陽

洛源人也

也以周

厲王二十一年甲辰歲入道棲止樓觀於是

凝心寢景抱一冲和不交人事獨步虛曠日

誦五千文數遍服黃菁白木積二十餘年乃

密感老君項負圓明面放金光披九色離羅

之帔建七暎暉晨之冠有仙童六人輔真執

錄倫匍匐乞哀乃告倫曰吾有景中之道通

真之經生乎三元之始出乎九玄之庭五德

合慶六氣凝精分真散景保固遐齡子能修

之立致雲輿出有入無徹幽洞冥三光並耀

二氣齊靈變化適意飛昇上清也倫於是五

體據地聲淚悲咽老君止之乃開寶籙出靈

飛六甲素奏丹符以付於倫又曰爾能精修

上道味真想玄行之無隙修之能堅保爾昇

度凌空駕雲敬則福降慢則禍纏道與能行

慎勿輕傳也倫得經修行遂自然通感嘗有

玉童六人更遞侍之凡有未萌之事預知其

吉凶察物如神言無不驗或與五帝內真寢

息神仙接汝遊宴山林飄然飛步一日能行

三千里凌波涉險即會津路時或逍遙川澤

試人之心變爲鳥獸馴其左右或化麋鹿有

獵者逐之常相去百步五十步不能至善射

者射之亦不至或化鳩鵲之類翱翔原陸弋

者羅之莫得而維之或化蠱賴之人方便開

示令其了悟而病者頓差年九十餘以宣王三十二年丁巳七月太上遣仙官下迎授書爲太清真人下司中嶽嵩高山神仙之錄焉

馮長

西嶽真人馮長字延壽驪山人也年十五即

通陰陽占候之書周宣王聞之辟爲柱下史

常內澄外混懼涉興衰觀天文之錯亂恐禍

將及己乃退居託疾潛光幽遜損棄財帛絕

去交遊味道攝生研神保氣日誦五千文兼

服天門冬五六年稍覺其益精勤勇決著延

天算乃感真人鄧先生授以靈書紫文寶神

之道長乃嚮晨登景御氣遊元於終南靈草

栽巖架遠呼景列曜煉鬼赤竟迴黃轉赤而

面生玉澤經十餘年芳華鬱暢自然青精凝

液紫雲結泉百絕皆榮三關流潤復遇真人

彭宗駕白虎將侍者二人降于室中長設弟

子之禮側侍下風宵氣累息從求道要真人

曰爾德音幽妙神氣遐清道必歸真當得度

世爾欲鵬飛雲路玉璫琅玕可精勤無退自

當有以相召也乃出太上隱書以授於長長

又注真八景味玄九元寓景流霄冥葆太漢爾乃遊邁元隰觀覽安危時逢有疾無不垂護嘗有狂者陰爲治之或十日五日而差或癩人求哀不過一月便愈有人失火簷棟相連風焰交馳無能撲滅長以意救之猛火自止年八十餘以平王二十年庚寅春三月昇化時天帝遣仙官下迎授書爲西嶽真人上遊上清出入無爲矣

姚坦

玄洲真人姚坦字元泰平陽人也周平王元

年遷洛晉襄公送周有功封爲諸侯詔使致

禮幣於祠庭重修觀廟給戶五十人及度碩

儒一十七人坦時年十九以其稽古偏蒙賞

接裏公乃屈膝頓首北面稱師飡風味道彌

歷年載坦之精確儼若神明羣下咸所畏服其子文公亦修欽仰時因四年東遊涇渭復親存慶勞供承藥物坦以紛擾乃遠憩幽岩常誦五千文精思不出時忽岩竇傾噴擊折林木若自天下直度其頂驚沙飛石不可稱

數坦凝注不顧頃又大蛇羣出奔集其居口吸目視將若吞噬之狀或縈繞其身坦終不怖時又山神率羣鬼擎一巨石聳若高峯風馳電激垂相逼迫坦乃張目徐叱之曰爾何物小醜欲爲非理吾宿植真果誠心如玉非爾妖惑可得遇吾真路也於是冥心一往斯須自滅乃有三人形貌端偉謂坦曰吾是此山之正神也天帝敕吾故來相試試今過矣言訖而去坦乃服煉松脂數十年中常有青衣童子遊於寢室室中漸明通見諸物後密降靈人許君授以玄白回形之道及天關三圖飛行之經坦運心克己妙獲靈感雨中行不需衣蹈泥塗不汙履目有神光開如電發行常閉目有弟子請之微爲小開便流光迅裂衆人驚悸不能自持合之則止年二百一

十餘歲以簡王十一年丙戌夏五月忽風雨晦冥雷電奔激人不敢輒出雷聲漸歇弟子出見天雨銀花繽紛委地良久方銷其日太素元君遣仙人下迎授書爲玄洲真人蒞於白水宮

周亮

八素真人周亮字泰宜太原人也母曾寢見五色流霄羅覆其宅因感有妊經十五月而生年十九形長八尺堂堂然有古人之風滿牖高放不欣榮祿尤明易經子史雖寓言世典而期心真極師事姚坦授五千文及八素真經亮修之甚有通感人家有鬼怪振動宅宇或化水爲血或傷人及畜亮爲誦五千文及行隱呪其凶禍自然消滅有遭狐狸龜蛇爲魅穢人飲食竊人財物以瓦礫戲人莫能遣者亮爲誦經持呪邪物各復其真形或死于左右周靈王太子晉聞之召與相見或鼓琴吹笙同遊商洛亮乃以武絃孤彈八音諧暢百禽率舞太子嘉之賜九光七明之芝及飛解脫網之道亮修道服芝日覺神驗帝密

與仙人遊行寶洞挹漱玉酒彈琴弄棋嘯歌終日或年如七十髮白齒落經一宿兩宿不出則變爲年少姿容更好或被克人執之戲以糞壤須臾已隱莫知所在其人不覺已自纏縛因於考擊或有惡言向之罵者口中自然流血謝過求哀乃釋年一百九十餘歲以威烈王二十四年己卯天帝遣天官下迎授書爲秦隴宮真人出入太清宴遊諸天矣

尹澄

太微真人尹澄字初默汾陽人也年二十八以周安王三年壬午冬十月於樓觀寄慧煉神宅心虛曠清靜諷經不雜人事衣如帶索食纔充口常市香燈列於壇靖初奩中香盡忽有靈薰滿爐焚之皆名香也又嘗然燈無光自然有神光空映此皆精理感發神靈營助也曾行山中遇鹿有傷足躓頓不前者澄哀其苦乃以藥封之後因入山忽遇洪雨食盡衣單困於林藪時有羣鹿掩至相依而止飢則吮其乳安則卧其懷相隨累日不返又於絕巖之上寓居小穴夜中忽有山火炎煙

滿谷欲避無所乃有羣獾連肱而下相攜直上越度危難此又神祇之垂護也至秦始皇聞之屢垂詔致請攝生之術焉至三十年有華山得道茅濛白日昇天有謠歌及帝始皇聞之彌發信仙之意及遣使齎金帛以憑心時欲往蓬瀛乃詔回老君像向東於真人廟南別建廟安著并置道士二十七人賜香田三十頃給戶一百詔云大道汎兮其可左右老君迹雖西遊返則東顧朕方造蓬瀛願垂影響至漢高祖呂太后及惠帝景帝竇太后並相承注心靈域每召幽人逸士常使滿二七八人仍賜弟子各一人增廟戶至一百五十加典司營護禮給優厚祈謁不絕時人崇敬歸者如雲澄以其喧擾乃密告弟子曰吾仙功未就德實今運要以山林爲家作幽居之子也遂改名林字遠巡山谷遁遁岩壑食柏漱流循危蹈朽契闊林阜形容憔悴幽訪神師備嘗艱苦雖崢嶸巨塗靡不投赴於太一山遇石像芝懸映青岩夜望有光乃採服方七便日行六七百里後於我眉山中遇仙人

宋君授以三皇內文及九丹秘訣澄修之大驗遂能封山掌嶽生骸護病曾臨水以投符符水逆流數步洪濤頓絕以藥救暴死皆得生活數年有血食鬼神効之皆自縛而來或擊殺者或自求哀放者及有遭疾風壞其林屋爲制之他處皆被飛颺其家獨免曾行達山崩木折奔墜溪谷以符法封之應手而止年三百四十餘歲以漢昭帝始元年乙未六月間太微帝君遣仙官下迎授書爲太微真人上遊九天矣。

王探

黃庭真人王探字養伯太原人也瑋貌瑰態雲英霞輝洞洽元津深窮道本仕漢爲中常侍中郎以呂后專政探抗迹南山居於樓觀常以朝元煉藏吐故納新爲務至文帝即位遇仰其風以逸人見禮時年三十六常誦五千文知名與身疎德爲道本乃廣行賑惠念及蒼生仙人趙先生託以狂人形容毀弊從探求乞施與不已而求取無厭探欣然秘之未嘗疑怪乃密告之曰我試子爾子可教者

也遂授以黃庭內修之訣及澤瀉丸方依按累月頓覺神異入南山採藥復止於樓觀後遇太元玉女西靈子都授以藏景錄形之道即能變身化景倏忽萬端或立叢林或坐泉石或化水火或成鳥獸而探之本身與人言笑宛然無異復師司馬季主得其神化無方之術常與人同行忽探身散爲雲霧或屹立平地即爲崇山觀者戰駭而其貌儼然猶在舊處年九十一歲以漢武帝元朔六年戊午正月西靈金母遣仙官下迎授書爲太極真人理於大有宮。

李翼

西嶽仙卿李翼師真人王探得道仙去以道傳河上公授道德五千文深究谷神玄牝之旨又遇異人傳易洞曉天地陰陽造化是故探曠索隱鈎深致遠與天地合其德與鬼神合其吉凶用能尸居而龍見淵默而雷聲神動而天隨登天遊霧撓挑無極一日功成道備玄德升聞天帝授書爲西嶽仙卿歷世真仙體道通鑑卷之九

歷世真仙體道通鑑卷之十

賦十

浮雲聖壽萬年宮道士趙道一編修

李八百

李八百蜀人也莫知其名初來卜居於筠陽之五龍岡又名赤岡寨今高安郡治是也有淬劍池七星井存焉歷夏商周年八百歲又動則行八百里時人因號為李八百或隱山林或居廛市後修行於華林山石室丹成道備還蜀中至秦時知唐公房有志而不遇明師欲教授之乃先往試之為公房作傭客公房乃不知仙人也驅使八百任意過於他人公房甚愛之後八百詐為病困欲卒公房乃命醫合藥費用數萬錢不以為損憂念之意形於顏色八百又轉作惡瘡周徧身體潰爛臭濁不可近也公房乃流涕曰汝為吾家勤苦歷年而得篤疾吾甚要汝得愈無所吝惜而今正爾當奈若何八百曰吾瘡可愈須得紙之公房令三婢舐之八百又曰婢舐不能使吾愈若得君舐之應愈耳公房即自舐之八百言君舐復不能使吾愈若得君妻舐

之當差公房乃復使妻舐之八百曰吾瘡已差欲得三十斛膏酒以沐浴乃當都愈耳公房即為具酒三十斛致於器中浴瘡即愈體如凝脂亦無餘痕乃告公房曰吾是仙人子有至心故來相試子定可教也今真相授度世之訣矣使公房夫妻及舐瘡三婢以其浴餘酒漂洗即皆更少顏色美悅以丹經一卷授公房入雲臺山中合作丹丹成乃服之仙去也一傳載公房作公昉云唐公昉與元府人也飲李八百仙酒後拔宅飛昇今有斗山觀是其遺迹混元寶錄云李脫學長生之道周穆王時來居蜀之金堂山龍橋峯下合九華丹丹成去遊五嶽十洞二百餘年於海上遇飛陽君授水玉之道還歸此山煉藥成又去數百年或隱或顯遊於市朝後復曰龍橋峯下煉金鼎還丹丹成已八百歲矣蜀人歷代見之因號曰李八百凡三於此山學道故世人號此山為三學山今據懷安軍九域志仙居觀圖經云李八百於此上昇華林山實錄云李八百於漢州金堂縣三學山白日沖

昇石室在浮雲觀西一百步中峯下開一丈高如之號八百洞天東南角又有洞門繞容人入行經數丈漸漸高廣其深莫測唐玄宗開元初年孫天師授得張天師秘訣藏於此洞人又呼為孫天師洞武宗會昌中邑人龔氏入此洞獲得六丁祈雨訣一卷每遇亢旱祈禱立應懿宗咸通五年高安道士朱元整入此洞於石函中獲經二卷上有題云真風顯色性元整思曰性姓也色性必朱氏也遂還高安闢授經教盛行於時此洞前後入者甚眾經歷之狀各異惟穢濁之人自有阻障信乎神仙窟宅不容無道者妄入窺測也浮雲觀宋改浮雲山聖壽萬年觀隸隆興府奉新縣

匡續

匡阜先生姓匡名續字君平云子孝南楚人也或曰本夏禹之裔生而神靈兒時便有物外志周武王時師柱下史老聃得長生之道遂結茅於南嶠山虎溪之上隱焉室中無所有唯置一榻簡策數編而已武王聞其名

屢加徵聘不起居歲月之久有少年數詣之自通曰姓劉名越家在前山之左邀先生過之且曰至山下有石高二尺許即予舍續後如約而往至山下四顧無居室果唯一石乃扣之石爲之開若雙扉然有二青衣執絳節前導先生漸見樓臺參差金碧輝映禽鳥翔翔花木珍異其少年頂玄玉冠朱紱劍佩陞堂接引先生悟非人世心欲求駐少年謂先生曰子陰功未滿後會可期遂飯以玉酒三爵繼索延齡保命湯一啜先生告別而出反顧其所惟巨石宛然先生自得遇之後神觀日益精明而功行不輟定王嘗問杜史伯陽父方今神仙之在世者伯陽父舉五嶽諸仙以對先生其一也王乃召之先生遜不見至威烈王時復遣使以安車迎之未至之先先生曰時至矣遂白日騰空而去使者訪其所隱空存靖廬使回因奏請以南嶂山爲靖廬山邦人亦以先生姓氏呼爲匡山曰匡阜曰匡廬其後避宋太祖諱改匡曰康至今其鄉若社皆因先生而命名虎溪由是爲三十六

福地混元寶錄云按晉書釋名土山曰阜此山本名南嶂言土有三天子嶂也古祀潛山爲南嶂而南嶂先生飛昇之後上帝命爲諸副故亦呼南嶂先生飛昇之後上帝命司吳楚水旱及賜以主溫之印統攝八部溫神俗因號爲和溫康阜先生先生高弟二人一號白鹿真人一號洪子真今廬山有煉丹洪井白鹿洞是其遺迹漢武帝元封元年南巡狩登祀天柱嘗望秩焉繼而射蛟潯陽江中顧問此山何神主之博士劉歆奏曰匡續先生得道於此帝由是封先生爲南極大明公仍命立祠於虎溪舊隱列於祀典迨至東晉鴈門僧慧遠遊羅浮回夜宿祠下愛其溪山之勝謁郡守桓伊曰昨夢匡先生願捨祠爲寺伊從之今東西二而遷先生祠于山口之乾維唐開元間再加興建天寶初明皇命使致齋專爲仙廟土民水旱癘疫禱之皆應南唐保大中相國周宗控節南服而臨九江觀廟貌殘廢復加興建始召道士闕元隱主之以備香火之奉復奏賜田莊一所永充齋贍宋英宗治平中賜額爲觀錫名壽聖行郊祀降祝版州遣貳車酌獻永爲盛典建中靖

國元年徽宗詔封先生爲靖明真人高宗紹興三十二年避德壽殿尊號改賜額廣福壇山白玉蟾題古風云武王笑騎青玉驪生絜老紂而磔之四海蒼生盡札瘥林下招人甘忍饑有人著書嵩山下亦有首陽采薇者八藏十魁流瘟毒赤子八紘風車吹火馬吾聞康續隱靖廬青牛老人授以書紫皇錫之欽瘟靈天下蒼生漸痊枯既聞人間爵十亂膠志茹芝飲春潤定王烈王呼不起秦王船到峭函岸及其望夷已蒼苔中原一鹿走之漢好仙天子天江龍遂封先生大明公晉僧愛地裁白蓮許夢給牧樹佛宮吾疑老聃昔化龍公意無乃與聃同虎溪之水塘青龍虎溪之山摩蒼穹後人因笑葛洪錯既到廬山運動脚葛洪去後幾人來滿洞白雲寒漠漠

臣道一曰匡續以周王屢徵之不起礪志於道其親王侯之貴金玉之富曾土芥之不如矣卒能功成行滿白日沖昇道德經曰雖有拱壁以先駟馬不如坐進此道此誠匡續以之後世得道之士不事王侯高

尚其事或飛昇或尸解不知其幾千人矣
其殆本于巨績乎

王子

王子者姓章名震南郡人也少學衆經周幽
王徵之不出乃歎曰人生世間去生遠去死

轉近矣但貪富貴不如養性命盡氣絕則死
位爲王侯金玉如山何益形爲灰土乎獨有
神仙度世可以無窮爾乃師桑子具受衆經
乃別造一家之法著道書百有餘篇其術以
務魁爲主而精於五行之意演其微妙以養
性治病消災散禍能起飄風伐屋折木作雷
雨雲霧能以草芥爲石爲六畜龍虎立便成
行分形爲數百千人能步涉江海含水噴之
皆成珠玉遂亦不變也或時閉氣不息舉之
不起推之不動屈之不曲伸之不直百日數
十日乃復起與弟子行各九泥爲馬與之皆
令閉目須臾皆成大馬乘之一日行千里又
能吐氣五色起數百丈飛鳥過指之即墮地
臨淵投符召魚鼈即皆上岸又能使諸弟子
舉眼即見千里之物但不能久也其務魁時

以器盛水著兩魁之間吹而噓之水上直有
赤光輝輝起一二丈以此水治百病病在內
者飲之在外者漂之皆便立愈後入崆峒山
合丹曰昇天

離明

太陽子姓離名明本王子同年之親友也王
子學道已成太陽子乃事王子盡弟子之禮
不敢懈怠然王子特親愛之有門人三千餘
人莫與其比也而好酒常醉頗以此見責然
善爲五行之道雖鬢髮斑白而肌膚豐盛面
目光華三百餘歲猶自不改王子謂之曰汝
當理身養性而爲衆賢法師而低迷大醉功
業不修大藥不合雖得千歲猶未足以免死
況數百歲者乎此凡庸所不爲況於達者乎
對曰晚學性剛俗態未除故以酒自驅其驕
慢如此著七寶樹之術深得道要服丹得仙
時時在世間五百歲中面如少童多酒故其
鬢髮皓白也

杜宇

杜宇蜀主也蜀嘗大水宇與居人避水於長

平山在青城味江之上去縣八十里築城壘居第後龍靈開
峽治水人得陸處宇禪位與之自居西山得
道昇天龍靈子孫世有蜀土傳十二葉至開
明尚爲秦所并乃通中國

李冰

李冰楊廣皆蜀川得道之士役禦鬼神驅斥
雲龍無所不能當開明氏時游息於蜀故嘗
佐開明氏理水爲蜀除患至秦孝文王時冰
爲蜀郡守開江灌田萬頃時巫言每歲江伯
取童女一人爲婦冰至江祠責之忽不見良
久有二蒼牛聞於岸上有頃冰還流汗謂官
屬曰吾聞大因能相助邪南向腰中白者我
變也頃復聞主簿刺北向者江伯乃死江水
不復爲災亦不復娶矣冰琢五石犀以厭水
一在青城二在犀浦一在成都市橋一在江
中又於縣北玉女房下白沙堆立三石人於
水中與江神誓曰涸不出足漲不至肩今如
其誓石人今在江左岸上蜀人世世紀水唐
玄宗幸蜀以冰功及於人命飾祠宇追加司
空相國今諸有水泛之處鄉里爲冰立廟水

勢即止楊磨亦有神術能伏龍虎亦於大旱江側決水灌田與龍為誓

魯般

魯般燬煌人功倖造化嘗怨吳人殺其父於肅州城南作一木仙人手指吳地吳地大旱三年卜曰般所為也齋物謝之般為斷其手其月吳中地大雨

馬成子

周秦之間天下鼎沸強侵弱眾暴寡輪轉征伐人不遑安扶風人馬成子觀而歎曰百年之命六尺之身不能自保者舉世然也天既生我必有可延之道何為自投於死乎我聞道者萬物之祖稟生之元化生之本天地之根歷世不變湛然常存我何由得明師而示我修道之門乎興此念歷年遂棄家訪師求道聞岐山之陽汧渭之側有伯陽川是老君與尹喜經行之所有老君授西伯至道之靈乃往尋焉至伯陽川適遇一童子問成子曰何求而登山邪成子告以求道童子笑曰我事老君萬二千歲矣尚未聞大洞希微之道

今子幾歲遽隨陋跡降之內而欲求道不亦難乎成子異其言再拜稽首求哀請命曰朝菌之生瞬息之命非聖人延之將復委朽壤淪糞土一失此身何時復得聞道乞聖人哀而教之童子曰我太上之侍童爾年且幼眇未聞大道無以教子但子苦志丘泉勞迹損神孜孜念道亦甚可念然我聞太上老君昔謂鬱單天王曰道生萬物物不離道得道者生失道者死道在於身不在他人今子勞涉山川履此險艱蓋為有志然去道遠矣成子復拜問道之在身何門修之童子因授以胎元煉氣之法乃入蜀臨邛鵠鳴山隱居石洞中有一人身長丈餘鹿裘毛憤策杖而至詣成子話隱地之術因謂成子曰此山有石鵠三百年一鳴鳴則此山之中有得道昇天者此鵠頻鳴子當昇天矣乃授以神丹告之曰太上道氣為內丹藥為外丹陰功為內丹金石為外丹子煉氣胎元受於黃蓋童子黃蓋玄天太陽之子與金華玉女侍太上左右歷億劫之數而常若童顏子遭值此師與親

朝太上亦無異矣內丹既然吾外丹亦可太上所教太微帝君太微帝君乃授後聖太平君太平君以訣授我我於中玄之山鼓八風之索煉五緯之精運日月之爐合乾坤之氣役三元召萬神煉之及九九之年而丹成今以授子朝九天而服之當拜太上太極上卿九華侍郎入侍玉晨列為萬真矣言訖衆雲而去成子敬受服之謂門人曰此山道氣非常常有大功高真功冠三天者於此得道三百年應爾遂白日昇天後天師張道陵亦居此山太上降之授三天大法師領太玄都省果三百餘年也

楚康王

楚康王未見名本懷王之後也素有賢行服眾故國人立之秦始皇吞併六國為三十六郡康王窮蹙乃逃奔於廬山遂入山東南深谷以避難於是潛禱於山神冀有陰助時將軍王翦領兵至谷口見煙霧濛濛雷雨暴集洞壑滿溢不辨道路翦始懼退師康王得免遙見人馬之迹其去甚速今山側有馬到嶺

是也康王乃歎曰昔舜南巡不返吾得隱廬山老林泉足矣愈入深谷不復出久之遇異人得道後人入山時有見之者顧其舉動異常問之得其髣髴或自言其名氏梁大同初乃立觀其側武帝詔爲康王觀戴師食贊曰陳舜俞廬山記稱楚康王昭以春秋魯襄公二十一年卒魯陳鄭許之君送葬于西門之外諸侯之大夫皆至于墓時楚方強去王前滅楚者凡三百二十六年其間容復有康王邪殊不知周前有定王瑜後有定王介魯前有文公興後有文公賈則是周有二定王魯有二文公也審此則康王昭之後復有康王固無足怪偶太史公不之載爾況廬山名賢多不見於正史而雜出於傳記邪

唐建威

秦三將軍者一名建威姓唐氏一名德及姓李氏一名雲刀姓宋氏悉不知何許人始皇時三人皆武士有大功於國爵位崇重既而見秦政日亂乃相與謀曰時勢去矣英雄起矣方今小人滿朝正言不用王道失序政事

乖錯不早爲之所吾徒其魚肉矣時有名宦十人皆正人君子亦相率而去之於是十有三人皆棄官學道訪名山入煙蘿如鹿脫獵場無復反顧之意遂經廬山之陽至紫霄峯下愛其山水之勝三人欲遂栖焉十人曰不然初志歸羣玉洞府豈可中道而廢言訖未行一夕雷電奄至洪流泛湧旦視廬舍左右化成二溪溪中盤石上有玉簡天篆云神化靈溪金簡標題真人受真玉洞潛棲十人莫知所往三武士遂棲于溪側種桃茹芝爲養真之具建威曰當惠以施貧德及曰當藥以濟病雲刀曰當言以豁迷異術同功而遠近蒙其福久之但見祥雲遊空雙鶴飛舞自是三人得道仙去矣後人指其居曰三將軍洞而置祠焉至漢武帝時賜名靈溪觀

歷世真仙體道通鑑卷之十

歷世真仙體道通鑑卷之十一

河一

浮雲山聖壽萬年宮道士趙道一編

孔丘明

孔丘明略法通吳天印張法樞謝志空周仙用鄭武君謝幽曲楊元中何紫霄輩十三人當秦之二世惡聞其亂因相與交結浩志罷官遠訪大道內三武弁李德及宋雲刀唐建威莫詳氏族爵里初至廬山便欲休息一夕疾風甚雨結成一溪中得石刻云神化靈溪金簡標題真人受真玉洞潛棲三人遂留溪今靈溪觀是也十人者孔公家玉簡山西南吳公家淦江之西孔曰江南群玉峯係第七洞天號大秀法樂之天山秀洞靈可踵棲選初志如此豈得中道而廢十人結束前趨群玉孔曰洞天之西奇峯聳秀必有靈巖總息朝元果於東南石壁之前達一幽穴壁上

紫霄好速遊而多簡慢衆勉之而不聽九人知不死可學而行之愈力漢景帝時修煉道備神降於庵自稱洞天司命告九人曰子等精誠至矣今北鄧落籍名鏤南宮遂傳還丹之祕而去丹成服之神又至曰上帝詔且至

速之選仙臺以須時偕登而衆仙已至肆筵祖餞頗如君臣之會酒行畢清風穆然雲物駢集香氣襲人九龍控馭鸞鳳前舞玉帝初遣繡衣使者青衣童子齎玉冊十道霞衣十箱金丹一合霓旌羽節俱至臺上獨有何紫霄遠遊未回從辰至已九真服丹更水整駕相待不至留玉冊與霞衣一箱及一素冊在飛仙石上以遺之仙樂宴清群仙趣駕孔真歎曰仙良仙良于何之鄉吾今往矣子獨異亡俄而氣勢漸高杳不復見九龍駕乃當年所養之魚耳九真於東陽治石臺煉十寶劍未仙去時一與仙良佩一埋送仙臺餘鎮洞天八門矣

何紫霄

何紫霄字仙良或云姓鄧九真已飛昇而仙

良方歸神清飄蕩泣對煙雲上飛仙石受箱與冊司命真君至曰真人有違王詔不得同昇九真元會功行未圓可隱元龜洞發箱掛衣視素冊其中有服太清草法云可以成地仙亦言山之東北有洞在平野此地仙之府

可居仙良已覆其箱於峯頂俄化為石後人因以名峯而狀亦酷似又放白猿犬各一以食仙藥皆得騰身而去仙良餌太清草行素冊秘法不決日已能凌虛殘山之巨石飛入石洞所謂地仙初神道魚鱗之池變九龍以騰九真復視之池無有矣獨一魚乍出乍沒後亦化龍潛伏幽洞耳

唐公昉

唐公昉一作昉興元府人也興元有斗山觀自平川內聳一山四面壁立其上方如斗底故號之開山經云斗山五穴通崑崙諸山中薛蘿杉檜景象尤奇上有唐公昉飲李八百仙酒全家拔宅之迹其宅基三畝許陷為坑此蓋連地上昇也一云公房舉宅昇仙雞犬皆去唯鼠惡其不淨不將去鼠自悔一月三吐

易其腸東廣微所謂唐鼠是也有前人題詩云霞衣欲舉醉陶陶不覺全家住絳霄沁宅只知雞犬在上天誰信路岐遙三清寥廓地塵夢八景雲霓事早朝惟有故林蒼柏秀靈華煙靄鎖鸞廳又洋州有寒泉山漢中記云秦唐公房師事仙人李八百公房中渴八百以杖指崖出湧泉即此山登之者必加嚴肅或誼譁立有風雷暴起因此為名

丁令威

丁令威者遼東人也少隨師學得仙道分身任意所欲常暫歸化為白鶴集郡城門華表柱言曰我是丁令威去家千載今來歸城郭如舊人民非何不學仙離家累遂高飛冲天而去夫左元放為羊令威為鶴斯並一時變化之迹爾非永為羊鶴也遼東諸丁譜載令威漢初學道得仙

張良

張良字子房其先韓人也秦滅韓良以家財求客刺秦王為韓報仇以五世相韓故良嘗學禮淮陽於滄洲得力士為鐵椎重一百二

十斤秦皇東遊至博狼音沙中良與客狙于
初本作觀擊秦皇誤中副車秦皇怒求賊急
客伺之甚良乃更姓名亡匿下邳良嘗間從步游下
邳音順楚人邳音順楚人謂音順楚人橋曰音順楚人地音順楚人上有一老父衣褐至良所音順楚人
若直墮其履圯下故也正也顧謂良曰孺子
下取履良愕然欲歐之爲其老乃彊忍下取
履因跪進父以足受之良殊大驚父曰孺子
可教矣後五日平明與我期此良因恠跪曰
諾五日明良徃父先在怒曰後何也五日難
鳴徃父又先在復怒曰後何也後五日夜半
徃有頃父亦來喜曰當如是出一編書曰讀
是則爲王者師後十年興十三年孺子見我
濟北穀城下黃石即我矣遂去不見旦日視
其書乃太公兵法良因異之常習誦居下邳
爲任俠數以太公兵法說沛公沛公喜常用
其策爲他人言皆不省也良曰沛公殆天授
遂從不去沛公欲擊秦燒關軍良曰臣聞其
將屠者子賈豎易動以利願且留壁益張旗
幟諸山上爲疑兵令郡食其持重寶取秦將
秦將欲和因其解音擊之秦兵敗遂至咸陽

秦王子嬰降沛公入秦宮室帷帳狗馬重寶婦女以千數意欲留君之樊噲諫不聽良曰秦爲無道故沛公得至此爲天下除殘去賊宜縞素爲質今始入秦即安其樂此所謂助桀爲虐且忠言逆耳利於行毒藥苦口利於病願聽噲言沛公乃還軍霸上見羽鴻門漢書紀沛公爲漢王良因說王燒絕棧道示天下無還心固項王意漢王還定三秦良遺項羽書曰漢王失職欲得關中如約即止不敢東又以齊反書遺羽曰齊與趙欲併滅楚羽以故北擊齊漢王以良爲成信侯從東擊楚兵敗而還下馬踞鞍而問曰吾欲捐關以東棄之誰可與共功者顏曰捐關以東謂不自有其地將以與人今其破楚良曰九江王布楚秦將與項王有隙彭越與齊王反梁地此兩人可急使而漢王之將獨韓信可屬大事當一面即欲捐之捐之此三人楚可破也漢王乃遣隨何說布連彭卒破楚者此三人也良多病嘗爲畫策臣時時從漢三年羽急圍漢王於滎陽漢王與酈食其謀撓楚權酈生曰昔湯伐桀封其後杞

武王誅紂封其後宋今秦滅六國陛下誠立六國後皆爭戴陛下德義願爲臣妾德義已行南面稱伯楚必斂衽而朝漢王曰善趣刺印先生因行佩之未行良從外來謁漢王方食曰客有爲我計撓楚權者具以卿生計告良良曰請借前箸以籌之見西文一卷言誠六國不可者入誠用此謀陛下事去矣漢王輟食吐哺罵曰豎儒幾敗乃公事韓信破齊欲爲齊王漢王怒良說漢王諡傳五年漢王壁固陵諸侯不至良說漢王諸侯皆至諡傳六年封功臣良未嘗有戰聞功帝曰運籌帷幄中決勝千里外子房功也自擇齊三萬戶良曰始臣起下邳與上會留此天以臣授陛下陛下用臣計幸而時中願封留足矣乃封爲留侯與蕭何等俱封其餘爭功未得行封上居維陽云云見西

顧上有不能致者四人。四年老皆以上。燬
侮士故逃匿山中。義不為漢臣。然上高此四
人。固請宜來。來以為客。時從入朝。令上見之。
則一助也。於是呂后令呂澤使人奉太子書。
卑辭厚禮。迎此四人。至十一年。燕布反。上疾
欲使太子擊之。四人乃說建成侯曰。太子將
兵有功。即位不益。無功則從此受禍。諸將皆
與上定天下。皇將也使太子將之。無異使羊
將狼。臣聞母愛者子抱。今戚夫人日夜侍御。
趙王常居前。明其代太子位必矣。吾何不急
請呂后。承間為上泣言。布天下猛將。善用兵。
今諸將皆陛下等夷。乃令太子將此屬。莫肯
為用。且布聞之。鼓行而西。爾上雖疾。彊載輜
車。卧而護之。不敢不盡力。上雖苦彊為妻子
計。后如四人意。上曰。堅子不足遣。乃公自行。
耳。上自將而東。良疾彊起見上。曰。楚人剽疾。
願無與爭鋒。因說上令太子為將軍。監關中
兵。上謂子房。雖疾彊傳太子時。叔孫通為太
傅。良行少傳。事上從破布。歸疾益甚。愈欲易
太子。良諫不聽。因疾不視事。叔孫通引古以

死爭。上陽許之。猶欲易之。及宴置酒。太子侍
四人者。從太子年皆八十有餘。鬚眉皓白。衣
冠甚偉。上恠問曰。何為者。四人各言其姓名。
上驚曰。吾求公避逃。我今何從。吾兒遊乎四
人曰。陛下輕士。善罵臣等。義不辱。今聞太子
仁孝恭敬。愛士。天下莫不延頸願為太子死。
者。故臣等來。上曰。煩公卒調護太子。四人為
壽畢。趨去。上目送之。召戚夫人指示曰。我欲
易之。彼四人為之輔。羽翼已成。難動搖矣。戚
夫人泣涕上曰。為我楚舞。吾為若楚歌。歌曰。
鴻鵠高飛。一舉千里。羽翼已就。橫截四海。橫
截四海。又可奈何。雖有繒繳。尚安所施。歌數
闕。戚夫人歔歔流涕。罷酒。竟不易太子者。良
本招四人之力也。良所與從容言天下事。甚
衆。良乃稱曰。家世相韓。韓滅。不愛萬金之資。
為韓報仇。今以三寸舌為帝者師。封萬戶。此
布衣之極於良足矣。願棄人間事。從赤松子
遊耳。乃學道。欲輕舉。後六歲。薨。謚文成侯。良
始見圯上老父。後十三歲。從高帝過濟北。果
得穀城山下黃石。取而寶祠之。及良薨。并葬。

黃石每上冢。伏臘祠黃石子。不疑。嗣出前道
書云。良仙去至八世孫道陵。得道飛昇。太上
遣良下為詔使焉。

道一曰。至人隱則上仙。顯則瑞世。是故
獨善其身。則誠意正心。修身兼善。天下則

齊家治國平天下。其道未嘗不兩存。顧所
遇窮達隱顯如何。爾張良可謂兩存其道
者也。道德經曰。修之於身。其德乃真。修之
於家。其德乃餘。修之於鄉。其德乃長。修之
於國。其德乃豐。修之天下。其德乃溥。此正
張良之忠於韓而成漢之功業也。然神仙
雖以功名成就於世。是豈圖富貴。以自榮
蓋亦行其志也。故終為遯世之歸焉。經又
曰。功成名遂。身退。天之道。非此之謂乎。

蘇耽

蘇耽桂陽人也。耽之母李氏。因江中浣帛。偶
沉木而感孕焉。耽生有雙鵲飛於庭。白光貫
戶牖。及生。數歲。寡言語。不為兒戲。一云。得仙
供。載觀常。明。腹。腹。亦。如。常。然。遇。險。絕。之。處。皆
能。起。越。眾。兒。問。曰。何。得。此。處。而。不。與。眾。兒。也。
答。曰。少。以。至。孝。著。稱。年。已。十。四。母。方。食。葷。曰。

吾偶思資興鮓鮓患遠不可得也。耽曰：今往市之，乃去母以爲戲。言見悅，爾食未竟，鮓來鮓於前曰：此資興鮓鮓也。母曰：汝最爲謹厚，資興鮓去此二百餘里，汝不一時往還，何詐也？耽曰：市鮓時見舅兒來，言致意，母不數日

亦來謁母矣。母舉鮓而食，具資興鮓鮓也不數日，舅至具言市中見耽母亦大神，其事一

母食欲得鮓鮓，耽出湘州市買去，家一千四百里，俄頃便還。耽故父爲州吏，於市見兒，因書還家。耽一日告母道果已圓，昇舉有日，期

翔雲水之鄉，脫落塵泥之外，命蒂胎根已爲

我有現臺，府本是各家陰陽不能陶鑄，天

地不能管轄，陵谷遷而此不可遷，日月老而

吾不可老，真元一氣萬古長存。母曰：吾恃爾

也，爾去吾何依？何言去？手耽曰：常聞師曰：一

人昇仙，九族受庇，雖過去者亦不爲下鬼。今

雖去母之動息皆可知也，乃留一櫃封鎖，甚

固。願母母開若有所需，告之如所言也。云：因

謂鄉人曰：更後二年，柳人大疫，乃疽，橘繫井

曰：受病但食一橘，葉飲泉水，一盞自愈。云：將

去時云：今年大疫，死者若半。汲此井水飲之，無恙。後果如所言，語已有五色

雲下庭中，蕭鼓隱隱而至。耽乃昇雲泣別，母與鄉人冉冉東南而去。鄉人數百，郡官悉見之時，漢文帝三年也。一云：鮓道成一日有數漢而去。爾後母凡有乏，禱其櫃，皆如所求。一日母思耽，謂在其中，乃發櫃，了不見物，惟見

二鶴凌空而去。蘇仙冲昇之後，二年，鄉人果

大疫，乃取橘泉治病，即時皆愈。所存活者千

百人，郡將與僚佐郡人悉拜祭橘泉之下。常

若市焉，不數年，耽母有疾，耽嘗來問疾，不久

耽母傾喪，壽百餘歲。朝廷乃命郡守送喪，遂

葬蘇山之南。於時，後鶯鶯悲風慘煙，昏愁雲

不散，悲雨自冷山頂，聞哀泣遠聽而近近聽

而遠，郡守率郡僚郡人詣山慰耽，雖聞仙泣

而不見其形。郡守盧獻可乃曰：不因慰問，無

由拜仙，願得一見仙容，以消塵障，非某一身

之幸，乃九族之幸也。耽曰：仙凡異道，升沉殊

塗，吾不惜命，汝見但恐汝輩福壽不能盡見

吾也。乃曰：吾令汝見吾之半，耽乃出半面一

臂示獻可等。郡官見面若真玉，豔而有光，臂

亦紺毛，與日氣相射。郡官再拜，跪慰仙。耽曰：

山路絕險，遠勞郡官，吾欲造一橋，今汝等安

然至家，慎勿回顧也。乃取玉軸金庭經一卷

對空擲之，俄成巨橋，若玉虹之架空欄，皆

金寶爲飾。盧獻可率郡官隱隱而陞，不久到

郡，惟判官張信臣回顧墜絕，潤爲朽木，敗

葉藉地，不曾損三日。方到郡，耽母之終山上

哭聲服除乃止。後郡守以其事聞於上，封其

山爲蘇仙山，名其觀爲蘇仙觀。郡守以時嚴

潔，醮祭焉。元結詩云：靈橘無根井有泉，世間

如夢又千年。鄉關不見重歸鶴，姓字今爲第

幾仙。風冷露壇人悄悄，地闊荒徑草綿綿。如

何躡得蘇君迹，白日霓旌擁上天。又沈彬詠

蘇仙山詩云：眼穿林樾見郴州，井裏交連側

局揪，味道不來閑處坐，勞生更欲幾時休。蘇

仙宅古煙霞，老叢帝墳荒草木，愁千古是非

無處問。夕陽西下水東流，宋初儀有一鶴棲

郡齋屋脊，久而不去。郡僚子弟輩聚觀，乃拜

之，鶴乃舉足，盡屋若書字焉。柳屋皆以板爲

瓦也。鶴乃奮翼昇雲而去。郡將乃遣人陞屋

即見所書字曰：柳原一別重來事，非甲子不

記陵谷遷移白骨蔽野青山舊時翹足高屋
下見群兒我是蘇仙彈我何爲翻身雲外却
返吾居一云飛騎白鶴來止郡城東北樓上
書云城郭雖是人民非二百甲郡將取其板
子一來歸我是蘇仙彈我何爲郡將取其板
藏之府中後乃歸之本觀仙亦不復再來高
宗紹興間賜蘇仙爲冲素普應真人

司馬季主

司馬季主者楚人也卜於長安市漢文帝時
賈誼宋忠爲大夫曰吾聞聖人不在朝廷或
遊屢肆試往觀之焉見季主閑坐弟子侍而
誦陰陽之紀二人曰望先生之狀聽先生之
辭未嘗見也尊官高位賢者舉之君何行之
迂也季主笑曰觀大夫類有道術何言之陋
令變夷不服四時不和徒起超而言相引以
勢相延以利賢者乃可羞爾夫內無饑寒之
累外無劫奪之憂處上而人敬居下而無害
君子之道也卜之爲業所謂上德不德也鳳
凰不與燕雀爲群公等瑣瑣不足知長者乎
二人忽爾自失後相謂曰道尊者安勢高者
危卜而不審不見奪稱爲人生計而不審身

無所處其後宋忠抵罪賈誼感鵬不逃季主
之鑒季主入委羽山大有宮中師西靈子都
西靈子都者受石精金光藏景化形之道臨
太玄仙也去之際留枕席以代形粗如其真身家人葬
之於蜀盤山之南諸葛亮爲其碑橫云玄漢
大寂渾合陰陽天地交津萬品滋彰先生理
著分別柔剛鬼神以觀六度顯明季主得道
後常讀玉經服明丹之華挹扶晨之輝顏如
少女鬚三尺黑如墨有子二人男名法育女
名濟華乃俱在委羽山並讀三十九章

歷世真仙體道通鑑卷之十一

歷世真仙體道通鑑卷之十二 河二

浮雲山聖壽萬年宮道士趙道一編

劉諷

劉諷字偉惠潁川人也師季主服日月精華
得道後歸鄉里託形杖履而去其語云潁川
劉偉惠漢帝時公車司馬劉諷也事司馬季
主爲入室弟子道成晚歸鄉里託形杖履身
隱桑樹之下遺蹟在汝南安成縣

鮑叔陽

鮑叔陽者廣寧人漢高帝時趙王張耳張敖
之大夫也少好養生服桂屑與司馬季主俱
在委羽山師西靈子都得尸解之道其語曰
遺蹟在遼東薊城之北山

劉京

劉京者本漢文帝時侍郎也從邯鄲張君學
道受餌雲母朱英方服之百三十餘歲視之
如三十許人能知吉凶之期又能爲人祭天
益命或延得十年五年至魏武帝時京遊諸
弟子家皇甫隆聞而隨事之以雲母九子方
散隆隆合服之得三百歲不能盡其道法故

不得度世又有王公看於京得九子丸時王公已七十歲乃服之御八十奏生二十兒騎馬獵行日二百里飲酒一斛不醉得壽二百歲

劉愷

劉愷者不知何許人也長大多鬚垂手下膝久住武當山去襄陽五百里旦發夕至不見有所修為頗以藥術救治百姓能勞而不倦用藥多自採所識草石皆窮於藥性雍州刺史劉道產忌其臂長於襄陽錄送京師文帝每旦檻車載將往山採藥暮還廷尉愷後以兩短卷書與獄吏吏不敢取愷焚之一夜失愷開鑰如故閭闔門吏行夜得愷送廷尉愷語獄吏云官尋殺我殯後幸勿釘棺也後果被殺死數日文帝疑此言使開棺驗之果不見尸但有竹杖爾

臣道一曰劉愷以臂長而解於兵以身而殺身也使劉愷知有身則不知有道知有道則不知有身惟其不知有身則得道之妙身外之身非一日矣此其所以被殺之

後開棺惟竹杖也道德經曰吾所以有大患為吾有身及吾無身吾有何患學者當深究其旨

嚴青

嚴青者會稽人也居貧常於山作炭忽遇一人與青語青不知其神人也臨行以一卷書與青曰汝骨應得長生吾以神方授汝青言我不識書當索何神人曰不須讀也但以漂器盛之置高處爾并教青服石髓法青受之僑居山中無他佳器唯有飲壺乃用以盛所授書即便見其左右常有數十人侍之青船載炭時出山下此神便為青挽船也人但見青船自行又治病救患但以所授之書到其人家所病便愈百姓多尊奉之青常從弟子家夜歸都巡夜逢青呵問何人夜行青亦厲聲問曰汝是何人而夜行都督怒其應對不恭因叱從兵使收錄犯行人青復叱其從神曰皆錄其夜行人青徑去而都督及從者數十人馬皆不復得去明旦行人見都督問何為住此都督就事狀如此行人曰此必是

嚴公也都督曰我今不能動可報吾家速往叩頭謝青自說昨實不知是先生乞得放遣青乃大聲曰遣放昨所錄夜行人人都督乃得去其後夜行者每見行人皆先問非嚴公乎青後斷穀不食一年而入小霍山仙去今吳會多奉事青為嚴家道但不復知食藥物以求長生惟存其祭祀爾

王谷神

王谷神皮玄耀者西漢蜀青城山道士勿而穎悟不居榮寵通老莊文列妙於星緯周遊名山渡荆渚泛瀟湘至南嶽卜庵於金母殿後修胎息還元數年道成東遊群玉訪九仙值武帝南巡見之神氣不群乃延之卜隱於西峯帝厚賜兼封王為太微先生皮為太素先生以上卿禮待之三年控碧騾上昇

太山老父

太山老父者莫知其姓名漢武帝東巡將見老父鋤於道間頭白光高數尺惟而呼問之老父狀如年五十許人而面有童子之色肌體光華不與俗人同帝問有何道術邪老父

答曰臣年八十五時衰老垂死頭白齒落有道士教臣絕穀服水飲水并作神枕枕中有三十二物其二十四物以象二十四氣其八物以應八風臣行之轉老為少黑髮更生齒隨復出日行三百里臣今年百八十矣武帝受其方賜之金帛老父得入岱山中去十年五年時還鄉里三百餘年乃不復還也

巫炎

巫炎者字子都北海人也漢武帝出見子都於渭橋其頭上鬱鬱有紫氣高丈餘帝召而問之君年幾何所得何術而有異氣乎子都答曰臣年今已百三十八歲亦無所得將行帝召東方朔相此君有何道術朔對曰此君有陰術武帝屏左右而問之子都對曰臣昔年二十五時苦腰脊疼痛脚冷不能自溫口中乾苦舌燥涕出百節四肢各各疼痛又足痺不能久立得此道以來已七十三年有子三十六人身體強健無所疾患氣力乃如壯時帝曰卿不仁有道而不聞於朕非忠臣也子都頓首曰臣誠知此道為真然陰陽之事

公中之私臣子之所難言也又行之皆逆人情能為之者少故不敢以聞帝曰勿謝戲君爾遂受其法子都年二百餘歲服餌水銀白日昇天武帝後頗行其法不能盡用之然得壽最勝於他帝遠矣

李奉仙

李奉仙者東蜀人自幼不語年十八常欲寒棲以避臭茹人問之曰知白守黑道貴昏默我師南嶽公云吾周靈王太子吹笙者也子三生奉道而所試由功之不著也今授子朱綱之法將昇度南宮吾師浮丘公授子今付於子子宜勤焉若更遲此生萬劫不度吾將為南嶽司命侍帝晨又補桐柏真人言訖遂隱漢宣帝詔不起

清平吉

清平吉沛國人漢高皇帝時衛平也至光武時容色不老後尸解去百餘年復還鄉里數日間又尸解而去

黃山君

黃山君者修彭祖之術年數百歲猶有少容

亦治地仙不取飛昇彭祖既去乃追論其言為彭祖經得彭祖經者便為木中之松柏也

呂恭

呂恭字文敬少好服食將一奴一婢於太行山採藥忽有三人山谷中因問恭曰子好長生乎而乃勤苦艱險如是邪恭曰實好長生而不遇良方故採服此物冀有微益也一人曰我姓呂字文起一人曰我姓孫字文陽一人曰我姓李字文上皆太清太和府仙人也時來採藥當以授新學者公既與同姓又字吾半是公命應長生也若能隨我採藥語公不死之方恭即拜曰有幸得遇神人但恐聞塞多罪不足教授若見來救是更生之願也即隨仙人去二日乃授恭秘方一通因遣恭還曰可歸省鄉里恭即拜辭仙人語恭曰公來雖二日今人間已二百年恭歸到家但見空野無復子孫乃見鄉里數世後人趙光輔遂問呂恭家何在恭恠之曰君自何來乃問此久遠之人吾聞先世傳有呂恭將一奴一婢入山採藥不復歸還以為虎狼所傷爾

經今已二百餘年君何問乎呂恭後世孫呂習者在城東北十里作道士人多奉事之推求易得爾恭承光輔言往到習家叩門而呼之奴出問曰公何來恭曰此是吾家也我昔採藥隨仙人去至今二百餘年今復歸矣習舉家驚喜徒跣而出拜曰仙人來歸流涕不能自勝居久之乃以神方授習而去時習已年八十服之轉轉還少至二百歲乃入山去其子孫世世服此藥無復老死皆得仙也

陳安世

陳安世者京兆人也為灌叔平客性慈仁行見鳥獸下道避之不欲驚動不踐生蟲未嘗殺物年三十而叔平好道思神忽有二仙人託為書生從叔平行遊以觀試之叔平不覺其是仙人也久而轉懈怠叔平在內方作美食二仙人復來詣門問安世曰叔平在否答曰在入白叔平叔平即欲出其妻止之曰餓書生輩復欲求腹飽爾勿與食於是叔平使安世出言不在二人曰汝向言在今言不在何也答曰大家使我云爾二人益嘉之以

實對乃相謂曰叔平動亦有年今日值吾二人而反懈怠是其不遇我幾成而敗之乃問安世曰汝好遊戲邪答曰不好又曰汝好道希仙邪答曰好道然無緣知耳二人曰汝審好道明日早會道北大樹下安世早往期處

到日西而不見二人乃起將去曰書生定欺我爾二人已在其耳邊呼曰安世汝來何晚邪答曰早且來但不見君爾二人曰我端傳汝道爾頻三期之而安世輒早至知其可教乃以藥兩丸與之誠曰汝歸家勿復飲食別止一處安世依誠二人常往其處叔平怪之曰安世處空室何得有人語往復不見何也答曰我獨語爾叔平見安世不復食但飲水止息別位疑非常人自知失賢乃歎曰夫道尊德貴不在年齒父母生我然非師莫能使我長生也先聞道者則為師矣乃自執弟子之禮朝夕拜事安世為之洒掃安世道成白曰昇天臨去遂以要道傳叔平後亦得仙也

靈壽光

靈壽光者扶風人也年七十餘而得朱英九

方合而服之致得其效轉更少壯年如二十時漢獻帝建安元年光已年二百二十歲常寄寓於江陵胡田家無疾而卒田殯埋之百餘日人復見在小黃寄書與田田得書掘發棺之中無所有釘亦不脫唯履在棺中

張禮正

張禮正始明期二人昔衡山中學道者禮正以漢末入山服黃精顏色丁壯常如年四十時明期以魏末入山服澤瀉柏實丸共止巖中後俱受西城王君傳虹景丹方從來服此丹已四十年其語云四中患丹砂之難得俱出廣州為沙門是滕舍為刺史時也遂得內外洞徹眼明身輕日行五百里後入九嶷山其語云又兼守一亦已三十年以三月一日東華遣迎以其日乘雲昇天今在方諸故室俱為土山下注云滕舍以永和十年甲寅年為廣州刺史此得仙乙丑歲十二年是為前

服丹已三十年猶更出查也

李根

李根字子源許昌人也有趙買者聞其父粗言傳世見根也買為兒時便隨事根至買年八十四而根年少不老昔住壽春吳大文家

大文從之學道作金銀法立成根能變化入水火中坐致行厨能供二十人皆精細之饌四方奇異之物非當地所有也忽告大文曰王陵當敗壽春當陷兵中不復居可急徙去大文竊以語弟第無意泄之王陵聞之以爲妖言惑衆乃使人收根欲殺之根時乃方欲書疏查聞外有千餘人圍吳家求根根語大文父曰勿勿但語吾不知官自來搜之昨日去矣大文出戶還顧窺根失所在左右書器物皆不復見於是官兵入索困食衣篋之中無處不徧不得根及良久大文出見根故在○向坐儼然如故根語大文曰王太尉當族誅卿弟泄語十日中當卒死皆果如言弟子家又有以女給根者此女知書根出行竊取根素書一卷讀之得根自記其學道經疏云以漢元封中學道於某甲時年計根已七百餘年也又大文說根兩目童子皆方按仙經云八百歲人童子方也根告諸弟子言我不得神丹大道之訣唯得地仙方爾壽畢天地然不爲下土之士也

黃敬

黃敬字伯嚴武陵人也少讀誦經書仕州爲都從事後棄世學道於霍山八十餘年復入中嶽專行服氣斷穀爲吞吐之事胎息內視召六甲玉女吞陰陽符又思赤星在洞房前轉大如火周身至二百歲轉還少壯道士王紫陽數往見之求要言敬告紫陽曰吾不修服藥之道但守自然蓋地仙耳何足詰問問新野陰君神丹昇天之法此真大道之極也子可從之人能除遺嗜欲如我者不可以學我所爲也紫陽固請不止敬告紫陽曰大關之中有輔星想而見之翕習成赤童在焉指朱庭指而撫之煉身形消遣三尸除死名害能守之可長生失之不久淪窈冥紫陽受之得長生之道也

甘始

甘始者太原人也善行氣不飲食又服天門冬行房中之事依容成玄素之法更演益之爲一卷用之甚有近效治病不用針灸湯藥在世百餘歲乃入王屋山仙去也

黃子陽

黃子陽後魏人知長生之妙學道在博落山中九十餘年但食桃皮飲石中黃水司馬季主以導仙八方與之遂能度世

河上公

河上公莫知其姓名也亦號河上丈人漢文帝時結草爲廬于河之濱常讀老子道德經文帝好老子之言詔命諸王公大臣州牧二千石皆令誦之有所不解者數句時天下莫能通者聞侍郎裴楷說河上公讀老子乃遣使齋所不了義問之公曰道尊德貴非可遙問也文帝即駕從詣之帝曰晉天之下莫非王土率土之濱莫非王臣域中四大王居其一也子雖有道猶朕民也不能自屈何乃高乎朕足使人富貴貧賤須臾河上公即拊掌坐躍冉冉在虛空中如雲之升去地百餘丈而止於玄虛良久俛而答曰今上不至天中不累人下不居地何民之有陛下焉能使乎富貴貧賤乎帝乃悟知是神人方下輩稽首禮謝曰朕以不德忝統先業才不任大憂於

不堪雖治世事而心敬道德直以暗昧多所
不了惟蒙道君宏慈有以濟之則幽夕睹太
陽之光曜河上公即授素書老子章句二卷
謂帝曰熟研此則所疑自解予註是經以來
七千餘年凡傳三人連子四矣勿傳非人文
帝跪受經言畢失所在一云起霧而去今有
河上公廟在陝府之北并文帝望仙臺遺迹
存焉

臣道一曰河上公結廬於河上淡然不謀
泊然無爲其出有入無隱顯聖凡非一日

矣道德經曰道之尊德之貴夫莫之爵而
常自然是誠河上公也一旦漢文帝聞其
有道親駕詣之河上公乃授素書老子章
句二卷厥後文帝以恭儉化天下後世議
者謂漢文帝有三代之風豈非河上公道

德之化邪

歷世真仙體道通鑑卷之十二

歷世真仙體道通鑑卷之十三

河三

浮雲山聖壽萬年宮道士趙道一編修

安期生

安期生瑯琊阜鄉人賣藥於東海邊時人皆
言千歲翁秦始皇東遊請見與語三日三夜
始皇異之賜金壁度數千萬出於阜鄉亭皆
置去以赤玉舄一輛爲報留書曰後千年求
我於蓬萊下始皇即遣使者徐市盧生等數
百人入海未至蓬萊山輒逢風波而還立祠
阜鄉亭海邊數十處也漢郊祀志云安期生
仙者通蓬萊中合則見人不合則隱顏師古
註云合謂道相合也混元寶錄云安期生後
以道授馬明生馬授陰長生陰授爾朱先生
又按史記云樂毅之族有樂臣公善修黃老
言其本師曰河上丈人不知其所出河上丈
人教安期生安期生教毛翁公毛翁公教樂
瑕公樂瑕公教樂臣公樂臣公教蓋公蓋公
教於高密膠西爲曹相國師又曰惠帝元年
曹參相齊盡召長老諸生問所以安集百姓
諸儒以百數言人人殊參未知所定聞蓋公

善治黃老言使人厚幣請之公爲言治道貴
清靜而民自定推此類具言之參用其術故
相齊九年齊國安集仙傳云有王老者不知
其名與魯女生封君達爲友訪道遊名山於
東嶽之陽遇神仙乘白鹿與侍女十許人自
山中而下知是神人再拜以求延生之道神
仙曰子知有安期生乎即我是也子精誠動
天太上使我授汝度世之訣因謂之曰仙道
不遠近取諸身無思無爲不吐不納真一充
於內而長生飛昇矣勿使汝思慮營營勞爾
之生也太上曰絲絲若存用之不勤是真道
矣言訖昇天而去又抱樸子云安期生龍眉
顙以修養服金液長生其止世間或延千歲
而後去爾

臣道一曰秦始皇以窮奢極侈慘刻之君
安足以語道安期生委金壁而去者所以
示之廉曰後千年求我於蓬萊所以示之
仙不可學矣乃欲強一時之力入海以求
蓬萊其可得乎安期生非秘其道也秦始皇
皇不可至於道也道德經曰天地不仁以

萬物為芻狗聖人不仁以百姓為芻狗素
始皇繼耳目之欲以勞動天下曾不休息
與天地聖人之心相違亦甚矣舍道而求
長生道外豈有仙也哉此安期生所以不
容迹於海內而去之蓬萊也

馬明生

馬明生一作齊國臨淄人也本姓和字君實

一作實少為縣吏捕賊為賊所傷遇太真夫

人適東嶽見而憫之當時殆死良久忽見一
女子年可十六七服飾奇麗姿容絕世行步

其傍問君實曰汝何傷血也君實以實對夫

人曰汝所傷乃重刃關於肺五臟泄漏血凝

絳府氣激腸外此將死之急也奈何君實知

是神人叩頭求哀乞賜救護夫人於肘後筒

中出藥一丸大如小豆即令服之登時而愈

血絕瘡合無復慘痛君實再拜跪曰家財不

足以謝不知何以奉報恩施惟當自展筋力

以報所受爾夫人曰汝必欲以謝我意亦可

嘉可見隨去否君實乃易名姓自號為馬明

生隨夫人執役夫人入東嶽岱宗山峭壁石

室之中上下懸絕重巖深隱去地千餘丈石
室中有金牀玉几珍物奇偉乃人迹所不能
至處也明生初但欲學金瘡方既見其神仙
來往乃知有不死之道朝夕供給灑掃不敢
懈倦夫人亦以鬼怪狼虎眩惑衆變試之明

生神清澄正略不恐懼又使明生他行別宿

因以好女於卧息之間調戲令接之明生心

堅志靜固無邪念夫人或行去十日五日還

或一月二十日輒見有仙人賓客乘龍駕鳳

往來或有拜謁者真仙彌日盈坐客到輒令

明生出外別室或立致精細厨食殺果非常

香酒奇漿不覺而至不可目名或呼明生坐

與之同飲食又聞空中有琴瑟之音歌聲宛

妙夫人亦時自彈琴瑟有一絃五音並奏高

玄響激聞于數里衆鳥皆為集于岫室之間

徘徊飛翔驅之不去蓋天人之樂自然之妙

音也夫人棲止常與明生同石室中而異榻

爾幽寂之所都惟二人或行去亦不道所往

之處但見常有一白龍來迎夫人即著雲光

繡袍乘白龍而去袍上專是明月珠綴著衣

縫帶玉佩戴金華太玄之冠亦不見有從者
既還即龍自去不知所在石室玉牀之上有
紫錦被褥緋羅之帳中有服玩之物現金函
英玄黃羅列非世所有不能一一知其名也
有兩卷素書上題曰九天太上道經明生亦

竟不敢發舒視其文也惟供給灑掃守巖室

而已至於服玩亦不敢竊視之亦不敢有所

請問如此五年愈加勤肅輒不怠惰夫人數

而謂之曰汝真可教也必能得道者也以子

俗人而不淫不慢恭仰靈氣而莫之廢雖欲

求長生不死亦焉有不得乎因以姓字本末

告之曰我姓王名婉羅字勃遂事玄都太真

有子為三天太上府都官司直總糾天曹官

秩此人間卿佐也年少數委官遊逸虛廢事

任有司奏劾降生東嶽退真王之編司鬼神

之師五百年一代其職因來視之勵其後使

修守政事以補其過我久在人間今奉君王

命又被太上召不得復停念汝專謹故以相

語欲教汝長生之方延年之術而我所受服

以太和自然龍胎之體適可授三天真人不

可以教始學之者固非汝所得聞矣縱或聞之亦必不能用以持身也有安期生曉金液還丹之法其方秘要是九君太一之道白日昇天者矣安期生明日來吾將以汝付囑之焉相隨稍久其術必傳明日安期生至乘駭麟身著緋衣頭戴遠遊冠帶玉佩及虎頭鞶囊視之可年二十許潔白嚴整從六七仙人皆執節奉衛見夫人揖之甚謹稱下官須臾設酒菓厨膳飲宴半日許夫人語明生曰吾不復得停汝隨此君去勿憂念也我亦時時當往視汝因以五言詩二篇贈之可以相存。明生流涕而辭擬隨安期生受九丹之道夫人贈詩其一曰暫舍壙城內命駕岱山阿仰盼太清闕雲樓鬱嵯峨虛中有真人來往何紛葩煉形保自然俯仰食太和朝朝九天王夕館還西華流精可飛騰吐納養青牙至藥非金石風生自然歌上下凌景霄羽衣何娑娑五嶽非吾室玄都是我家下看榮競子篤似蝸與蟻顧盼塵濁中憂患自相羅苟未悟玄旨安事於琢磨禍漢由道泄密慎福臻多

其二曰昔住崑崙宮共講天年延金液雖可還未若太和仙仰登冥靈臺虛想詠靈人忽遇博桑王九老仙都真駕驂紫虬輩靈顏亦何鮮啓我尋長塗邀我自然津告以鴻飛術授以玉胎篇瓊膏凝玄氣素女爲我陳俯挹琳鳳腴仰上飄三天雲網立爾步五嶽可暫還玄都安足遠蓬萊山脚間傳受相親愛結友爲天人替即游刑對禍必無愚賢秘則享無傾泄則軀身願明生受詩訖乃隨安期生負笈西至女几北到圓丘南至秦廬潛及青城九嶷周遊天下二十年中勤苦備嘗安期生乃曰子真有仙骨專恭之甚吾所不及也遂授以太清金液神丹方而告之曰子若未欲昇天但先服半劑得明生相別而去明生乃入華陰山依方合金丹服之半劑得仙而與俗人無異人莫識其非凡漢靈帝時惟太傅胡廣知其有道嘗訪明生以國祚大期問之明生初不對後亦告焉無不驗者後人恠其不老遂復餌金丹半劑白日昇天臨去著詩三首以示將來時光和三年也其一曰太

和何久長人命將不永翕如朝露晞奄忽睡覺醒生生世所悟傷生由莫靜我將尋真人澄神挹容景盤桓崑陵宮玄都可馳聘消子牽我遊太真來見省朝朝王母前夕歸鍾岳嶺仰採瓊瑤葩俯漱琳琅井千齡猶一刻萬紀如電頃其二曰天地自有常人命最險幾年若驚絃發時猶輕矢逝雖有灼灼姿玉爲塵生穢林草無秋耀綠葉豈終歲惜彼繁茂摧哀彼寒霜厲有存理必亡有興必有廢真君戲玄津與物無凝滯神冲紫霄內形棲山水際對虛忘有懷遊目託容裔風塵將何來真道故可大其三曰濁塗諒爲歎世樂豈足預振楊掃塵遐飄飄獨遠舉寥寥巖嶽際蕭蕭縱萬慮靈真與我遊落景乘鴻御朝乘雲輪來夕駕扶搖去嗽嚕天地中囂聲安得附

陰長生

陰長生新野人漢和帝永元八年三月己丑立皇后陰氏即長生之曾孫也少處富貴之門而不好榮位潛居隱身專務道術末聞有馬明生得度世法乃入諸名山求之到南陽

太和山中得與相見乃執奴僕之役親運履
賜之勞明生不教以度世之道但旦夕與之
高談榮華當世之事治生園圃之業十有餘
年長生未嘗懈怠同時有共事明生者十二
人皆怨恚而去獨長生禮敬彌篤而明生數
因言語得失之際屢責罵之長生乃和顏悅
心奉謝不及如此積二十年後清閑之日明
生問其所欲長生跪曰惟乞生爾今以糞草
之身委質天匠不敢有所汲汲憚於遲速也
明生哀其語而告之曰子真是能得道者也
乃將長生入青城山黃黃土為金以示之立
壇軟血即日以太清金液神丹授之欲別去
長生乃叩頭陳謝暫留仙駕拜辭曰弟子少
長豪樂希執卑遜克身勵已若臨水谷不能
弘道讚德宣暢妙味徒尸素壁立而耄及之
是以心存生契捨身尋真天賜嘉會有幸遭
逢自執帚二十二年心力莫植常懼毀替筋
力弱薄微效靡騁恩養不酬夙夜感悅告以
更生頓受靈方是將灰之質蒙延續之年炎
林焦草惠膏澤之霑所謂絕氣與其蘇息暫

暗開其視聽感荷殊戴非陋詞所謝昔太歲
庚辰聞先生與南嶽真人洪崖君雲成公瀛
洲仙女數人共坐論傳度當委綰之誓教授
有交帶之盟應祭九老仙都九炁丈人諸君
禱祠受之大藥必行下祭而受為之不成弟
子預在典室嘗僭惟側亦具聞諸仙起末得
道之言說昔授丹節度矣先生今日見諭不
復陳此或非先生所授之不盡將恐示弟子
困窮矣明生慰諭之曰非有不盡汝性耽玄
味專然而和靈官出鑒以相察矣不復煩委
俗人之信耳於是長生入武當山石室中合
丹先服半劑不即昇天而大作黃金數萬斤
以布施天下窮乏不問識與不識周行天下
不與妻息相隨舉門皆壽後與委之入忠州
平都山修煉服丹白日昇天臨去著書九篇
言上古仙者多矣不可具記而論但漢興以
來高士得仙四十五人迨千為六矣二十八
人是尸解去餘者白日昇天焉又自作序云
惟漢延光元年新野山之北受仙若神丹要
訣道成去世副藏名山如有得者列為吳人

行乎去來可為俗間不死之道要在神丹行
氣導引悅仰屈伸服食草木可得小道不能
永度於世以至天仙子欲聞道此是要言積
學所致不為有神上士為之勉力加勸下愚
大笑以為不然能知神丹久視長存於是以
黃素及金簡焉丹經三通各藏於嵩華及緱
山錄書一通付弟子世世當有所復有四言
詩三章遺世詩云維予之先佐命唐虞爰連
漢世紫文重紆予獨好道而為匹夫高堂素
志不事王侯會生得生亦又何求超迹蒼霄
乘飛駕浮青要乘翼與我為仇火不灼蹈
水不濡逍遙太極何慮何憂遊戲仙都顧盼
羣愚年命之逝如彼川流奄忽未幾泥土為
傳馳走索死不肯暫休予之聖師體道之真
果騰變化松喬為鄰惟予同學十有二人寒暑
求道歷二十年中多怠惰志行不堅痛乎諸
子命也自天天不妄授道必歸賢身投幽壤
何時可還嗟爾將來勤加精研勿為流俗富
貴所牽神丹一成昇彼九天壽同三光何但
億千維予垂髮少好道德棄家隨師東西南

比委放五經避世自適二十餘年名山之側
寒不遑衣饑不暇食思不敢歸勞不敢息奉
事聖師承顏悅色面垢足胝乃見哀誠遂傳
要訣恩深不測妻子延年咸享無極黃白已
成財貨千億役使鬼神玉女侍側予得度世
神丹之力今平都山景德觀刻碑傳世晉丹陽葛洪曰嘗
聞謠言有云不夜行則不知道上有夜行人
今不得仙者安知天下山林間密自有學道
得仙者邪陰君已服神藥雖未昇天然方嚴
屬同聲相應便自與仙人相尋求聞見故知
此近世諸仙人之數爾而俗人謂為不然已
所不聞則謂之無有不亦悲哉夫草澤閑士
以隱逸得志經籍自娛不耀文彩不揚名聲
不修求友不營文達猶且不能識之又況仙
人亦何急令朝菌之徒知其所云為哉

臣道一曰陰長生艱難事師不得其道而
不倦誠之至矣非常人之所可及也故同
時事馬明生者十有二人皆怨恚而去獨
長生禮敬彌篤而卒得其道焉道德經曰
學不學復衆人之所過以輔萬物之自然

而不敢為長生之謂也

魏伯陽

魏伯陽吳人也高門之子而性好道術不肯
仕宦閑居養性時人莫知其所從來謂之治
民養身而已入山作神丹將三弟子知兩弟
子心不盡誠丹成而誡之曰金丹雖成當先
設之飼於白犬犬能飛者人可服之若犬死
者即不可服也伯陽入山時將一白犬自隨
又丹轉數未足和合未至自有毒丹毒丹服
之皆暫死伯陽故便以毒丹與白犬食之犬
即死伯陽乃復問諸弟子曰作丹恐不成今
成而與犬食犬又死恐是未得神明之意服
之恐復如犬為之奈何弟子曰先生當服之
否伯陽曰吾背違世路委家入山不得仙道
吾亦恥歸死之與生吾當服之耳伯陽便服
丹丹入口即死弟子相顧謂曰所以作丹者
欲求長生耳而服之即死當索此何惟一弟
子曰師非凡人也服丹而死得無有意邪又
服之入口復死餘二弟子乃相謂曰作丹求
長生耳今服丹即死當用此何為若不服此

自可得數十年在世間活也遂不服乃共出
山欲為伯陽及死弟子求棺木殯具二人去
後伯陽即起將所服丹內弟子及白犬口中
須臾皆起將服丹弟子姓虞及白犬而去逢
入山伐薪人作手書與鄉里人寄謝二弟子
弟子見書始大懊惱伯陽作參同契五相類
凡二卷其說似解周易其實假借爻象以論
作丹之意一云東漢魏伯陽會稽上虞人也
世襲舊裾惟公不仕修真潛默養志虛無每
視軒裳如糠粃焉不知師授誰氏得古人龍
虎經盡獲妙旨乃約周易撰參同契三篇又
云未盡纖微復作補塞遺脫一篇繼演丹經
之奧所述多以寓言借事隱顯與文公撰參
同契者謂修丹與造化同途故託易象而論
之今行於世後來解註者數家惟真一子彭
曉所解最正丹成仙去書幸流傳

臣道一曰道德經曰道者萬物之與善人
之寶魏伯陽善人也不私其實而與天下
共之善之至也蓋自廣成子發三丹九鼎
之秘以明至道歷五帝有夏之世雖神仙

服胎傳授聞於人丹道之玄幾絕響遠至殷周太上復化身降生世間斯道再揚至前漢諸仙微寓歌詩斯道猶未大闡至伯陽假易道作參同契至道之微盡之爲法於天下可傳於無窮善人之寶其泄矣此其教隆於漢晉盛於隋唐以迄于今豈非伯陽之功乎

歷世真仙體道通鑑卷之十三

歷世真仙體道通鑑卷之十四

河四

許雲山聖壽萬年宮道士趙道一編修

周義山

紫陽真人姓周名義山字季通汝陰人也漢丞相勃七世之孫以冠族播流世居貴官祖玄漢昭帝元鳳元年爲青州刺史父秘爲范陽令時君始生焉父後積秩累遷官至陳留刺史君時年十六隨從在郡始讀孝經論語周易爲人沉重少言笑喜怒不形於色好獨坐靜處不結名好然精細微密所存必感常以平旦之後日出之前正東向立漱口咽液服氣百數向日再拜旦旦如此爲之經年父恠而問之所行何等事君長跪對曰義山中心好日光長景之暉是以拜之爾至月朔旦之日輒遊市及閭閻陋巷之中見窮乏饑餓之人解衣給食時時登陟名山喟然悲歎或入石室中默然獨笑時陳留大儒名士聞君盛德體性沉美咸往詣焉君輒稱疾不見賓客漢侍中蔡咸陳留高士亦頗知道聞君德行數往詣君每稱疾不欲見之父乃大恠怒

責之督切使出見之既不得已遂出相見咸大發清談及論神仙之道變化之事君乃凝默內閉斂神虛靜領而和之一不答也是歲大旱斗米千錢路多饑莩君乃傾財竭家以濟其困陰行之人亦不知是君之慈施也對萬物如臨赤子斯積德仁愛之施矣後遇陳留黃泰告君曰聞君好道陰德流行用思微妙誠感於我是以相詣吾是中嶽仙人須林字子玄也本衛人靈公末年生少好道德受學於岑先生見授煉身消災之道術後又遇仇公見教以服氣之法還神守魂之事吾行之甚驗大得其益子少知還陽精髓不泄又知導引伏氣吞景咽漿不復須陰丹內術補胎之益也然猶三蟲未壞三尸未死故導引服氣不得其理可先服制蟲細丸以殺穀蟲蟲有三名一名青古二名白姑三名血尸謂之三蟲三蟲在內令人心煩滿意志不開所思不固失食則饑悲愁感動精志不至仍以飲食不節斷故也雖復斷穀人體重滯淹淹淡悶所夢非眞顛倒反錯邪俗不除皆由此

蟲在內搖動五臟故也其方用附子五兩麻子七升地黃六兩木七兩茱萸根大者七寸桂四兩雲芝英五兩凡七種先取菖蒲根煮濃作酒使清淳重煮一斗半以七種藥吹咀內器中漬之亦可不用吹咀三宿乃出暴之之燥又取前酒汁漬之三宿又出暴之須酒盡止暴令燥內鐵臼中搗之極細徒令成粉取白蜜和之令可丸以平旦東向初服二丸如小豆漸益一丸乃可至十餘丸也治腹內弦實上氣心胃結塞益肌膚令體輕有光華○盡一劑則蟲死蟲死則三尸枯三尸枯則自然落矣亦可數作不限一劑也然後合四銀九加曾青黃精各一兩以斷穀畢若導引服氣不得其理可先服食衆草莖勝茯苓木桂天門冬黃連地黃大黃桃欖及皮任擇焉雖服此藥以得其力然不得九轉神丹金液之道不能飛仙也但可為延年益壽爾君按次為之服食術五年身生光澤徹視內見五臟乃就仙人求飛仙要訣仙人曰藥有數種仙有數品有乘雲駕龍白日昇天與太極真人

為友拜為仙宮之主其位可同真公定元公大生公及中黃大夫九氣丈人仙都公此皆上仙也或為仙卿大夫上仙之次也遊行五嶽或造太清役使鬼神中仙也或受封一山總領鬼神或遊翔小有群集清虛之宮中仙之次也若食穀不死日中無影下仙也或白日尸解過死太陰然後乃仙下仙之次也我受消子秘要是中仙耳子名上金書當為真人我之道非子真人所學也今以守三一之法靈妙小有之書二百事傳子石菌朱柯若乾芝與子服之吾道畢矣子可遠索師也君再拜受教退而服神芝五年目視千里外日行五百里遂巡行名山尋索仙人問蒙山樂先生能讀龍蹠經遂往尋之遇衍門子於是授龍蹠經及三皇內文登王屋山遇趙陀子授芝圖十六首及五行祕符又遇黃先生受黃素神方五帝六甲左右靈飛之書四十四訣登幡冢山遇上衛君授太素傳左乙混沌東蒙之錄石庚素文攝殺之律登嵩高山遇中央黃老君合會仙人在其上太室洞門之

內君頻首拜乞長生度世老君曰子存洞房之內見白元君邪君對曰實存洞房嘗見白元君黃老君曰子道未足未見無英君也且復游行受諸要訣當以上真道經授子矣見白元君下仙之事可壽三千年見無英君乃為真也可壽一萬年矣君再拜受教而退遊行天下名山大澤西登白空山遇沙野帛先生授太清上經登我崑山入空洞金府遇寧先生授大丹隱書八稟十訣登峨嵋山遇陰先生授九赤斑符登岐山遇臧延甫授憂樂曲○素訣登梁山遇淮南子成受天關三圖登牛首山遇張子房授太清真經登九嶷山遇李伯陽授李氏幽經登鍾山遇高丘子授金丹方二十七首登鶴鳴山遇陽安君授金液丹經九鼎神丹登猛山遇青精先生授黃素傳登陸渾山潛入伊水洞室遇李子耳授隱地八術登戎山遇趙伯玄授二九素女術登陽洛山遇幼陽君授青要素書登霍山遇司命君授經命青圖上皇民籍登鳥鼠山遇墨翟子授紫度炎光內視圖中經登曜名山遇大

帝候夜神童授金根之經登委羽山遇司馬季主授石精金光藏景化形登大度山遇劉子先授七變神法登都廣建木遇谷希子授黃氣之法太空之術陽精三道之要登桐柏山遇王喬授素奏丹符登太華山遇南嶽赤松子授上元真書登太冥山遇九老仙都君授黃水月華四真法登合黎山遇皇人授八素真經太上隱書登景山遇黃臺萬畢先生授九真中經登玄壘羽山遇玉童十人九氣丈人授白羽紫蓋服黃水月華法到桑木登扶廣山遇青真小童君授金書秘字南行朱火登丹陵山遇龔仲陽授仙忌真記西遊登空山見無英君視西服洞房中無英君處其左白元君處其右黃老君處其中無英君服金精朱碧玉綾之袍光赤朝霞流景曜天要太上靈氣之章佩九帝驅邪之策戴翠上紫靈之冠蓋太玄丹靈上元赤子之祖父也左連青宮之氣氣冠萬神乃未有天地先自虛空而生矣白元君服丹王之錦雲羅重袍白光內朱流景參天垂暉映神玄黃徹虛要太

上靈精之章佩玄元攝魔之策戴招龍皂冠蓋玉房雲庭上元赤子之父右英皓青之室朝運生者也中央黃老君是太極四真王之師老矣上攝九天中游崑崙黃闕來其外紫戶在其內下與二君入洞房圓三寸威儀具焉夫至思神見得爲真人若見白元君得爲下真壽三千歲若見無英君得爲中真壽萬歲若見黃老與天相傾上爲真人列名金臺君既詣之乃再拜頓首乞與上要訣黃老君曰可還視子洞房中君乃瞑目內視良久果見洞房之中有二神人無英白元君也被服狀如在空山中者黃老君笑言曰微乎深哉子用意思之精也白曰昇天之道子還登常山授子上真之道君乃還常山石室中齋戒念道復積九十餘年中白元君無英君黃老君遂使授之大洞真經三十九篇有玉童二十一人玉女二十一人皆侍真燒香晝夜習之積十一年遂乘雲駕龍白日昇天上詣太微宮受書爲紫陽真人佩黃旄之節八威之策帶流金之鈴服自然之衣食玉醴之飴飲

金液之漿治葛衍山金庭銅城所謂紫陽宮也紫陽有八真人君處其右一日三登崑崙一朝太微帝君以壻家爲紫陽別宮所謂洞庭潛宮也壻冢山有洞穴潛行通王屋清虛小有天亦潛通閭風也

臣道一曰周義山稱疾養晦積德累仁終始一誠廣參衆妙真神仙之博學者也觀漢侍中蔡咸陳留高士詣之咸大發清談論神仙之道變化之事義山乃凝默內閉欽神虛靜頷而和之一不答也道德經曰信言不美美言不信善者不辯辯者不善知者不博博者不知義山之意也

王褒

清虛真人王君名褒字子登范陽襄平人也安國侯七世之孫君以漢元帝建昭三年九月二十七日誕焉洪基大業世籍貴盛君父諱楷以德行懿美比州所稱舉茂才除議郎轉中壘大夫上黨太守黃門侍郎侍中左將軍鴈門太守楷正色彤管坦誠獻替納言推謨披襟拔領率職莅民政以禮成捨刑寬賦

不肅而敬天子賢之遷殿上三老使賓皇太子講春秋尚書論語禮易恢恢仁長循循善誘遂名沸絕圓聲馳京夏君即開夜之感喟然悲數曰人間塵謁趨競得失利害相攻有踰鵠雞之視老燕矣遂決志辭親入華山中九年一日夜半忽聞林澤中有人馬蕭鼓之聲須臾漸近仰而望之見千乘萬騎浮空而至神人乘三素雲車手把虎符朱戟啓途握節執旄曲晨傾陰錦旗蔽虛神人暫停駕而言曰吾太極真人西梁子文也聞子好道勸勞山林未該真要誠可慙也勤企長生實爲至矣君乃馳詣輪轂之下扣頭自搏而言曰寢以內人愚頑庸賤少好生道莫知隱訣真人曰夫學道無師無緣自解我太極真人神仙之司主試校學者領舉正直爾子玄錄上清金書東華名編清虛位登小有必當掌括寶籍爲天王之任但注心四景勤慕上素道自成也後隱陽洛山中感南極夫人西城真人授君以太上寶文八素隱書大洞真經靈書八道紫度炎光石精玉馬神真虎文高仙

羽玄凡三十一卷依科立盟結誓而付乃將君觀玄洲須臾而至四面大海懸濤千丈洲上宮闕樓觀瓊室瑤房不可稱記西城真人曰此仙都之府太上丈人處之乃將君入紫桂宮見丈人著流霞羽袍冠芙蓉之冠腰帶神光手把火鈴侍女數百龍虎衛階太上丈人與西城真人相禮而已相携共坐君時侍側焉太上丈人曰彼所謂王子登乎學道遭逢良師將得之矣西城真人笑因命君拜拜畢太上丈人使坐北向丈人乃設厨膳呼吸立具靈散千種丹醴湛溢燔煙震檀飛節玄香陳鈞天之大樂擊金璇於七芒崆峒啓音徹朗天丘於是龍騰雲崖飛鳳鳴嘯山阜洪鯨湧波凌濤雲起太虛風生廣遠靈歌九真雅吟空無玉華作唱西妃折腰爾乃衆仙揮袂萬神遷延羽童拊節慶雲纏錦於是太上丈人會二十九真人皆玄洲之太真公也其第一真人自稱主仙道君指君而向西城真人言曰視此子心眸澄邈神停形凝圓晨丕渙六景發華殆真人之美者小有之賢王也

西城真人答曰蓋聞性稜乎天而命成乎人也於是主仙道君命侍女范運華趙峻珠王抱臺等發瓊笈披綠韞出上清隱書龍文八靈真經二卷授君又以雲碧陽水晨飛丹腴二升賜君君拜服之真人遂將君還西城九年道成給飛騰之車東行渡啓明滄海登廣桑山入始暉庭詣大帝君稽首再拜大帝授以龍景九文紫鳳赤書上清神圖八道玉籙次南行渡渤海丹海登長離山詣南極紫元夫人華蓋上公授以五雲夜光雲琅水霜次西行渡度丘巨海沈羽之津登麗農山詣紫蓋晨夫人景真三皇道君授以玉道綠字迴曜太真隱書次北遊渡彫素玄海濟飲龍上阿龜瓜津登廣夜山詣高上虛皇大道玉君會其出遊駕日月之晨乘紫始之光鬱靄黃素之雲勃蔚八景之曜飛真萬億不可稱數君再拜道側乃詣上清玉晨帝君玄清六微元君二君授以寶洞飛霄絕玄金章及賜太極隱書龍明寶珠絳和雲芝君拜而飲之即身金色項映圓光七曜散華流煥映形又退

登閭風之野玄圃之宮詣中皇玉帝受解形
通變流景玉經乃越鬱絕濟弱河西詣龜臺
謁九靈太真上清夫人退更清齋三月受三
華寶曜瓊文琅書靈暉上錄七晨素經退又
清齋三年浮浩汗之河登白空虞山山周迴
三萬里遊行翌日趨詣紫清太素瓊闕即太
素三元上道君所治焉處丹靈白玉宮飛映
絕曜紫霞落煥七光交陳結於雲宇之上奇
麗玄黃不可名字仙童玉女侍右真人蓋無
數也君稽首再拜詣瓊闕之下久時太素三
元上道君乃使繡衣命者西林藻授君金真
王光流金火鈴豁落七元八景飛霞又使清
真左夫人郭靈蓋右陽玉華仲飛姬齋神策
玉璽授君以爲太素清虛真人領小有天王
三元四司右保上公治玉屋山洞天之中給
玉童玉女各三百人主領上清玉章太素寶
玄太極上品九天靈文六合秘籍山海妙經
悉主之又總括洞內明景三寶得乘虎拏龍
輦金蓋瓊輪八景飛輿出入上清受事太素
寢宴太極也

梅福

梅福字子真九江壽春人也少學長安明尚
書穀梁春秋爲郡文學補南昌尉漢成帝委
任大將軍王鳳鳳專執擅權而京兆尹三章
素忠直譏刺鳳爲鳳所誅王氏浸盛災異數
見群下莫敢正言福復上書譏切王氏上不
納又成帝久亡繼嗣福以爲立建三統封孔
子之世以爲殷後復上書終不見納是時福
居家讀書養性爲事至平帝元始中王莽專
政福一朝棄妻子去九江爲吳市門卒云
漢書道家云梅福得道仙去豫章職方乘云梅
嶺在西山極崇峻羊腸而上五里至頂山下
有梅仙觀今號陽靈觀觀之上有梅仙壇舊
說梅子真棄南昌尉學道於此梅嶺之下白
石源水出焉又云墨池在南昌縣治東漢南
昌縣尉梅福故宅基因立爲觀水竹幽茂晉
王右軍羲之典臨川郡日每過此盤礴久之
不能去因號墨池宋謝靈運亦嘗居此一年
著老子經隱述并疏一部唐太宗貞觀中號
太一觀禮迎萬天師居之高宗龍朔二年來




致醮祭夜有雲降殿上至曉而散壇上有仙
燈之祥玄宗開元間即爲開元觀玄宗自書
額宋徽宗崇寧二年爲崇寧萬壽觀後又曰
天寧十道四蕃志載梅福池福種蓮華池中
數曰生爲我酷身爲我枯形爲我辱妻爲我
妻遂棄妻入洪崖山豈墨池即此池與如撫
州之梅山梅仙觀隆興府豐城縣之梅仙觀
有仙壇丹井在焉臨江軍新淦縣之王筍山
永天宮瑞州新昌縣之梅墩宅仙觀梅仙觀
皆梅福經由修真之地建寧府梅山在城南
三里方輿記梅福嘗煉丹於此有昇仙壇梅
仙事實云梅君求師慕道訪鴈蕩諸山遊南
閩入支提山又入仙霞山乃武夷之東也遂
於巖上結庵積年遇空同仙君授以內外丹
法乃至雞籠山修煉不成次至毛竹洞入演
仙山復往玉華山次至烏石山至劔江西嶺
再遇空同仙君降謂曰汝之道緣在飛鴻山
也梅君遂至飛鴻山結菴修煉千日功成神
遊體外丹光燭天梅君服丹訖趨裝登途復
四九江只見祥光射日紫霧浮空雲中仙樂

嘹亮金童執節玉女持幡力士控鸞侍仙捧
詔梅君拜詔謝恩乘青鸞飛昇而去自後飛
鴻山號曰梅仙山也宋神宗元豐五年七月
勅梅福在漢之際以孤遠極言天下之事其
志壯哉晚而家居讀書養性卒於遺化高蹈
世傳為仙今大江之西實存廟像禱祠輒應
能澤吾民有司上聞是用錫茲顯號光靈不
泯其服朕恩宜特封壽春真人高宗紹興二
年閏四月勅朕嚮巡狩於南國以豫章為東
朝母后率掖庭而行舟楫冒風波之險凡所
經涉必有護持爰錫褒恩以答神貺洪州豐
城縣大江北岸梅福昇仙壇觀壽春真人正
諫不用高名獨存憫漢室之不綱去吳市而
莫返既嚴祠館亦錫封名茲復益以美稱蓋
少敷於新渥其散異數少慰平生可特封壽
春吏隱真人

臣道一曰道德經曰將欲取天下而為之
吾見其不得已此如湯武革命順天而應
人者也又曰天下神器不可為也為者敗
之此如新室王莽犯分而竊位者也以湯

武之仁猶不免見譏議於後世况以亂臣
賊子專權擅柄以謀篡弒之事乎善乎梅
福之上書諫詆王氏朝夕之漸其慮患也
深矣其為網常之計密矣惜乎當時人主
不能用其言卒成其禍為姦偽之倡遂使
後世如桓玄侯景之徒紛紛皆是也道德
經曰為之於未有治之於未亂豈非梅福
欲以斯道增乎三綱五常之重而不幸乎
道德經又曰大道廢有仁義智慧出有大
偽斯言盡之矣

歷世真仙體道通鑒卷之十四



歷世真仙體道通鑒卷之十五

河五

壽雲山聖壽萬年宮道士趙道一編修

裴君

清寧真人裴君字玄仁右扶風夏陽人也以
漢明帝二年君始生焉為人清明顏儀整素
善於言笑自有精光垂臂下膝聲氣高徹呼
如鍾鳴家奉佛道年十餘歲晝夜不寐精思
讀經嘗於四月八日與馮翊趙康子上黨皓
季成共載詣佛圖時天陰雨忽有賤人著故
布單衣巾黃巾詣君車後索載君禮而問之
不答君下車以載之康子季成並大怒呵問
何等而上吾車乎君乃陳諭遂聽俱載君
自徒行在後顏無變色寄載人自若亦不以
為漸也將至佛圖乃曰吾家近在此乃下車
奄然失之佛圖中道人支子元者頗知道宿
舊人傳之已年一百七十歲見君而歎曰吾
從少至老見人多矣而未嘗見如子者乃延
君入曲室之中幽靜之房大設豐饌飲食既
畢將君更移隱處呼之共坐乃謂曰吾善相
人莫如爾者子目中珠子正似北斗瑤光星

自背已下象如何魁既有貴爵又當為神仙
天下志願子保享焉然津梁未啓七氣未淳
不見妙事亦無緣而成也因以所修秘術以
告君道人曰此長生內術世莫得知吾昔遊
焦山及驚祖之阿遇仙人蔣先生者乃赤將

子興也以神訣五首授吾奉而行之於今一
百七十年矣氣力輕壯不覺衰老但行之不
勤多失其志不能去世故雖延年不得神仙
也猶是行之多違精思不至之罪也今以教
子於是授之以諸皆存思運用持呪等法及

授諸高真經書符文并授服茯苓胡麻二法
○子元服茯苓法焦山蔣先生所傳茯苓五
斤盛治去外皮乃將下細篋以漬白蜜三斗
中盛之以銅器耐熱白瓦器以此器著大
釜中著水幾半於所盛藥器腹微火燒釜令
水沸煮藥器數反側藥令相和合良久蜜消
竭魚出著鐵口中搗三萬杵令可丸旦服三
十丸如梧子大百病除二日可服三
讀書二年可使鬼神四年王女侍衛十年夜
視有光能隱影長生久視服此一年百害
不能傷疾病不能十色反嬰兒肌膚充悅白
髮再黑眼有流光凡合藥齋三日黃之於室
室盛藥勿令婦人雞犬見及穢慢之也五斤
茯苓三斗白蜜為一劑當作木蓋蓋之黃藥
器上勿露也黃之時反側藥熟乃開之耳大
為意欲併合多少在當意用候料視恒以
蜜器可經十歲不敗支子元服胡麻法蔣先
生於黃金龍祖山中授支公也胡麻三斗肥

者黃黑無拘可擇之使清潔於微火熱令香
氣極令燥細搗以為散令沒沒爾勿下符白
蜜三斗以胡麻散漬會室中攪令相和候調
適安器著釜水中乃煮如前法胡麻子大旦
服三斗九盡一劑勝化為筋不知寒熱面退
使眾靈蔣先生惟服此二方已凌煙化昇呼
吸立至出入無間與衆群龍上朝帝真位為
仙宗也

樂巴

樂巴字叔元內黃人仙傳云蜀郡人事漢桓帝四遷
桂陽太守甚有政聲後遷豫章太守郡土多
山川鬼恠小人常破貨產以祈禱巴素有道
術能使鬼神乃悉毀壞房祀剪理姦巫於
是妖異自消百姓始頗以為懼終皆安之桓
帝崩後靈帝即位陳蕃被誅巴坐黨復謫為
永昌太守以功自劾辭病不行上書極諫理
陳寶之寃帝怒下詔切責收付廷尉巴自殺
出後記墓淵海云後一旦大風天霧暗失巴
所在尋問之其日還成都與親戚別去而昇
天矣仙傳云樂巴蜀成都人也少好道不修
俗事時太守詣巴請屈為功曹待以師友之
禮巴到太守曰聞功曹有道可試見一奇乎

巴唯唯乃平坐即入壁中去冉冉如雲氣之
狀須臾失巴所在壁外人見化成一虎虎乃
巴矣後舉孝廉除郎中遷豫章太守廬山廟
有神能於帳中共外人語飲酒空中投杯人
往乞福能使江湖之中分風舉帆船行相逢
巴至郡往廟中便失神所在巴曰廟神詐為
天官損百姓日久罪當治之以事付功曹巴
自行捕逐若不時討恐其後遊行天下所在
血食枉害良民責以重禱乃下所在推問山
林杜櫻求鬼蹤迹此鬼於是走至齊郡化為
書生善談五經太守即以女妻之巴知其所
在上表請解郡守往捕其鬼巴到詣太守曰
聞君有賢婿願見之鬼已知巴來託病不出
巴謂太守曰今婿非人也是老鬼詐為廟神
今走至此故來取之太守召之不出巴曰出
之甚易請太守筆硯奏案乃作符符成長嘯
空中忽有人將符去亦不見人形一座皆驚
待至書生向婦泣曰去必死矣須臾書生自
携符來至庭下見巴不敢前巴叱曰老鬼何
不復爾形應聲即變為狸扣頭乞活巴勅殺

之皆見空中刀下狸頭墮地太守女已生一兒復化為狸亦殺之巴去還豫章豫章郡多鬼又多獨足鬼為百姓害巴到後更無此患妖邪一時消滅後徵為尚書郎正旦大會巴後到有酒客賜百官酒又不飲向西南三嘆之有司奏巴不敬詔問巴曰臣鄉里以臣能治鬼護病生為臣立廟今旦且有耆老皆來臣廟中享臣不能早委之是以有酒客臣適見成都市上火臣故嘆酒為雨以救之非敢不敬當請詔問虛抵罪乃發驛書問成都成都奏言正旦食後失火須臾有大雨三陣從東北來火乃止雨著人皆作酒氣後一旦忽大風雨天地晦冥對坐不相見因失巴所在尋聞巴還成都與親故別稱不更還老幼皆於廟中送之云送時因風雨晦冥莫知去處也真誥云昔巴作兵解去入林滬山中積十三年而後還家今在鶴鳴赤石山中

左慈

左慈字元放廬江人也少明五經兼通星緯見漢祚將盡天下向亂乃歎曰值此衰運官

高者危財多者死當世榮華不足貪矣乃學道術尤明六甲能使鬼神坐致行厨精思於天柱山中得石室內九丹金液經能變化萬端不可勝紀曹公操聞名召取關一室中使人守視斷穀日與二升水暮年乃出之顏色如故操欲學道慈曰學道當清靜無為操怒謀殺之慈知之乃求乞骸骨歸操曰何忽爾慈曰知公欲見殺故求去爾操曰固無此意公欲高尚其志亦當不久留乃為設飲慈曰今將分贖願乞分杯飲酒操曰善慈拔簪以畫杯酒酒即中斷其間相去一分許慈即飲其半送與操操不喜未即為飲慈乞盡飲之以杯擲屋椽杯便懸著椽動搖似飛鳥之俯仰若欲落而復不落舉坐莫不屬目杯良久乃墮地諸人乃視杯已失慈所在後操一日宴賓慈亦預坐操顧謂眾賓曰今日高會珍羞略備所少吳松江鱸魚爾慈因求銅盤貯水以竹竿餌釣於盤中須臾引一鱸魚出操曰一魚不足以供坐客慈更以釣沉之復引鱸出皆三尺餘操又曰既已得魚恨無蜀

中生薑爾慈曰易得操恐近取之曰吾前遣人至蜀買錦可報增二匹語頃即得薑并獲使報後返驗問增錦之狀若符契焉操出近郊士大夫從者百許人慈乃齋酒一升脯一斤手目斟酌百官莫不醉飽操懷不意因坐上欲殺之慈乃卻入壁中霍然不知所在後有人見慈住處乃往白操操又遣人收之得慈慈非不能隱故令世人知其神爾於是收執下獄獄吏欲拷諸戶中有一慈戶外有一慈不知當考何者操聞而惡使將軍引出市殺之須臾有七慈相始一官收得六慈失一慈有頃六慈俱失操乃令閉四市門而索之或不識慈問慈何如人曰眇一目著葛巾青單衣無非慈者竟不知所收操令捕得遂人便斬後數日見慈便斬頭斷以白操操大喜言果左慈頭也就而視之一束茅爾還視其尸亦失所在人有從荊州來者見慈在荊州矣後人逢慈於陽城山頭因復逐之遂走入羊群操知不可得令自羊中告之曰不復相殺本試君術爾忽有一老羖屈前兩膝人

立而言曰遠如許即競往赴之而群羊數百皆變爲老羝屈前膝立云遠如許遂莫知所取焉上文所載多同後漢書刺史劉表亦以慈爲感衆擬救害之表出耀兵慈意知欲見其術乃詣表云有薄醴願以餉軍表曰道人單僑吾軍人衆安能爲濟乎慈重道之表使視之有酒一斗器盛之脯一束而十人共舉不勝慈乃自出取之以刀削脯投地請百人奉酒及脯以賜兵士酒三杯脯一片食之如常酒脯味凡萬餘人皆周足而器中酒如故脯亦不盡坐上賓客千人皆大醉表乃大驚無復有害慈之意慈委表去入東吳丹徒徐璜有道術慈過之墮門下有宿客牛車六七乘慈云徐公不在慈知客欺之使去客即見牛在楊樹梢行適上樹即不見下即復見行樹上又車轂皆生荆棘長一尺斫之不斷推之不動客大懼即報徐公有一老翁眇目吾見其不急之人因欺之云公不在去後須臾牛皆如此不知何等意公曰咄咄此是左公過我汝曹那得欺之急迫可及諸客分布逐之及慈

羅布扣頭謝之慈意解即遣還去及至車牛等各復如故慈往見孫討逆討逆復欲殺之後出遊請慈俱行使慈行於馬前欲自後刺之慈著木履拄一竹杖徐徐而行討逆鞭馬逐之終不能及乃止慈後入霍山合九華丹丹成仙去真誥云左慈今在小括山常行來數在此下尋更受職也慈顏色甚少正得爐火九華之益其下注云左慈字元放李仲甫弟即葛玄之師也魏武父子招集諸方士慈亦同在漢獻帝建安末渡江尋山乃得入洞又乞丹砂合九華丹九華丹是太清中經法小括即小括蒼山在永嘉溪橋之北

孔元方

孔元方者許昌人也常服松脂茯苓實始得此藥時年已老自後歲歲更少常如四十許人郡元節左元放皆爲親友俱業五經及當世之事專修道術元方仁慈惡衣蔬食飲酒不過一升年一百七十餘歲道家或時請元方會飲人作一酒令次至元方元方無所說直以杖拄地乃手抱杖倒豎頭在下足向上

焦先

以一手持酒杯倒飲之人莫能爲也元方有一妻一子不積餘財頗種五穀嘗遭火發諸人並來救之出屋下衣糧牀几元方了不之顧惟露坐籬下視火其妻催使元方助之元方大笑曰何用此爲憂惜又別於水邊鑿岸作一窟室方廣大餘元方入其中斷穀數月乃復還家家人亦不得往來室前有一柏樹往復從棘草間行委曲弟子有急欲詣其居處終莫能得後東方有一少年姓馮名愚好道伺見元方入室愚尋得之元方曰人未嘗得見我汝今日見我似可教也乃以素書二卷授之曰此道之要言也四十年得傳一人世若無人不得以年限足故而妄授也若四十年無所授八十年如有二人可授者則頻授之與二人也可授不授爲閑天道不可授而授爲泄天寶閑道泄寶殃及子孫我已得所傳吾今去也乃委妻子入西巖後五十年暫還鄉里時人當有識之者

焦先者字孝然河東大陽人也在鄉里累歲

年一百七十常食白石似今之熟者大半也
先日入山伐薪以施人先從村頭一家起
周而復始始擔薪以置人門外人見之時布
席與坐為設食先便坐食亦不與人語若人
不見便秘置薪於人門間便去連年如此及
魏受禪居河之湄結草為庵獨止其中不設
牀席以草蓐觀坐其身垢濁如泥漆或數旦
一食行不由徑不與女人交遊衣弊則於市
賣薪以買故衣著之冬常著單衣太守董經
往視之亦不肯語經亦以為賢後野火起燒
其庵屋人往視之見先危坐於庵下不動火
過庵燒盡先乃徐起其衣服亦不焦灼又更
作庵時天大雪人屋多壞先庵倒人往不見
先所在恐已凍死乃共拆庵索之見先熟卧
於雪下顏色赫然氣息休休如暑夏醉卧之
狀人莫知其異多欲從學道先曰我無道也
或老或少如此三百餘年乃與人別去不知
所適所請者竟不得一言也經書云自叢皇
以來一人而已

陽翁伯

陽翁伯事親孝養父母神感之泉出墓側有
飲焉者以白石一升與之令種生莢玉一日
有青童引至海山仙人曰汝孝於親當夫婦
仙後徐氏有女以白璧成婚數年夫婦俱昇
天又搜神記云陽翁伯常以漿給行旅一日
有人飲訖懷中出白子一升與之曰種生莢
玉并得好婦如言種之有徐氏女極愛求之
徐公曰得莢玉一雙即可以所種得玉璧遂
妻之

李意期

李意期者蜀郡人也乃漢文帝時人至蜀先
主時尚在也有人說四方郡國宮觀市里者
意期即為撮土成之郡國人物皆是也但纖
微爾須臾消滅不知所之先主欲東伐吳報
關羽之怨使人迎意期意期至先主問以吉
凶意期不答索紙筆畫作兵馬器仗十數便
以手裂壞之又畫一大人掘土埋之便徑還
去先主不悅果出軍為陸伯言所敗師屠十
餘萬衆僅得數百人還兵甲芻粟略無存者
先主慚悲發病而卒於永安諸人乃追念意

期所畫大人埋之正是先主之死像也一傳
云李意期於城角中作一土窟居其中冬夏
單衣但飲酒食脯及棗或百日或二百日不

杜契

杜契字廣平京兆杜陵人也漢靈帝建安初

渡江依孫策後孫權真語誤作用為信校尉

黃武二年契學道師介琰受玄白術居茅山
之東久之能隱形遁迹時與弟子採伐貨易
衣糧而人不能知之數入洞中得仙真語云

二人一人孫貴孫女葉華也一人
陳世京也世京孫休時作侍郎

李阿

李阿者三國時蜀人也傳世見之不老如故
常乞食於成都市所得隨多少盡皆施與貧
窮者夜去朝還市人莫知其還宿有古強者
疑阿是異人常親事之試隨阿還所宿乃去
青城山中強後復隨阿去然未知道恐有虎
狼私持其父大刀阿見而怒強曰汝隨我行
那畏虎也取強刀以擊石刀折敗強切憂刀
折至旦復出阿問強曰汝憂刀敗邪曰實恐
父怒阿即收刀以左右擊地刀復如故以還

強強逐阿還成都未至道逢人奔車阿以脚置車下轢其骨皆折阿即死強守視之須臾阿復起以抑脚而復如常強時年十八見阿如五十許人至強年八十餘而阿猶如故語人言被崑崙召當去遂不復還

九域志資州城山昔李

阿其人修練於此後於蜀州新津上昇

臣道一曰李阿得道已深歷年已久觀其汲汲以濟孤貧為念且屑身乞食以行其教其意亦深矣觀其語古強曰爾隨吾行那畏虎也此正道德經所謂陸行不遇兇虎之意彼古強者雖能具眼力識阿是異人又豈能知兇無所投其角虎無所指其爪哉

介象

介象字元則會稽人也學通五經博覽百家之言能屬文陰修道法入東嶽受禁制之術能茅上然火煮雞雞熟而茅不焦能令一里內不炊不蒸雞犬三日不鳴不吠能令一市人皆坐不起能隱形變化為草木鳥獸聞九丹之經同遊數千里求之不值明師乃入山

精思冀遇神仙疲極卧石上有一虎往噬象象睡寤見虎乃謂之曰天使汝來侍衛我者汝且停若山神使汝來試我汝疾去象入山見谷中有石子紫色光彩大如雞子不可稱數乃取兩枚而遊谷深不得度乃還於山中

河五

十二

見一美女年十五六許顏色非常衣服五彩蓋仙人也象扣頭乞長生之方女子曰汝急送手中物還故處乃來吾於此待汝象以石送於谷中而還見女子在舊處象復扣頭女曰汝血食之氣未盡斷穀三年更來吾止此象歸斷穀三年乃復往見此女故在前處乃以丹方一首授象告曰得此便仙勿他為也象未得合作藥常住第樂延雅舍惟下平牀中有書生數人共論書傳事不判象傍聞之不能忍乃為決解之書生知象非凡人密表奏象於吳主象知之欲去曰恐官事拘束我爾延雅固留吳主詔徵象到武昌甚敬重之稱為介君為象起第宅以御帳給之賜遺前後累千金從象學隱形之術試還後宮及出入殿門莫有見者又令象變化種瓜菜百果

皆立生與先主共論鱸魚何者最上象曰鱸魚為上先主曰此魚乃在海中安可得乎象曰可得爾但今於殿中庭方埒著水滿之象即索鉤餌起釣之垂綸於埒中不食頃得鰕魚先主驚喜問象曰可食否象曰故為陛下取作鱸安不可食仍使厨人切之先主曰蜀使不來得薑作鱸至美此間薑不及也何由得乎象曰易得爾願差一人并以錢五十文付之象書一符以著竹杖中令其人閉目騎杖杖止便買薑買薑畢復閉目此人如言騎杖須臾已到成都不知何處問人言是蜀中也乃買薑于時吳使張溫在蜀從人恰與買薑人相見於是甚驚作書寄家此人買薑還厨中繪始就矣象又能讀諸符文如讀書無誤謬者或不信之取諸雜符除其注以示象象皆一一別之又有一人種黍於山中常患獼猴食之聞象有道從乞辟猴法象告無他汝明日往看黍若見猴群不大喚語之曰吾已告介君介君教汝莫食黍此人倉卒直言象欺弄之明日往見群猴欲下樹試告象言

語後即各還樹絕迹矣象在吳連求去先主不許象言某月日病先主使左右以梨一盞賜象象食之須臾便死先主殯埋之以日中死其日晡時已至建鄴以所賜梨付苑吏種之吏後以表聞先主視其棺中唯一奏版符爾先主思象便以所住屋為廟時躬往祭之常有白鵠來集座上良久乃去後弟子見象在蓋竹山中顏色更少焉

歷世真仙體道通鑑卷之十五

歷世真仙體道通鑑卷之十六

河六

淳雲山聖壽萬年宮道士趙道修

董奉

董奉字君異福州侯官縣人也昔吳先主時有年少作本縣長見君異年三十餘不知其有道也罷去五十餘年復為他職以經侯官諸故吏人皆往見故長君異亦往顏色如昔了不異故長宿識之問曰君無有道邪昔在縣時年紀如君輩今已皓白而君猶少也君異曰偶爾杜變為交州刺史得妻病死已三日君異時在南方乃往以三九藥內死人口中令人舉死人頭搖而消之食頃變開目動手足顏色漸還半日中能起坐遂活後四日乃能語云死時奄然如夢見有數十烏衣人來收之將載露車上去入大赤門徑以付獄獄各一戶戶繞容一人以變內一戶中乃以土從外封之不復見外恍惚間有一人言太一遣使者來召杜變急開出之聞人以鉤振其所居戶良久引出之見外有車馬赤蓋三人共坐車上一人持節呼杜變上車將還至

門而覺變既活乃為君異起高樓於中庭君異不飲食唯啖脯棗多喜飲酒一日三為君異設之君異輒來就變處飲食下樓時忽如飛鳥便來到座不覺其下上樓亦耳如此三年從變求去變涕泣留之不許變問曰君欲何所之當為具大船也君異曰不用船宜得一棺器耳變即為具之至明日日中時君異死變使人殯埋之七日人有從宕昌來者見君異因謝杜侯好自愛重變乃開視君異棺中但見一帛一面丹書符君異後還廬山下居有一人少便病癰垂死自載詣君異扣頭乞哀君異使病者坐一戶中以五重布韜其目使勿動搖乃勸家人莫近病人云聞有一物來舐之痛不可堪無處不匝度此物舌當一尺許其氣息大小如牛竟不知何物良久乃去君異乃往解病人之中以水與飲遣去云不久當愈且勿當風十數日間病者身體通赤無皮甚痛得水浴即不復痛二十餘日即皮生瘡愈身如凝脂後嘗大旱百穀焦枯縣令丁士彥謂綱紀曰董君有道必能致雨

乃自齋酒脯見君異說大旱之患君異曰雨
易得耳因仰視其屋曰貧家屋皆見天不可
以得雨如何縣令解其意因曰先生但為祈
雨當為架好屋於是明日士彥自將吏人乃
運竹木為起屋屋成當泥塗使人掘土取壤
欲取水作泥君異曰不煩運水日暮自當雨
也其夜大雨高下皆足又君異居山間呪水
治病不取錢物使人重病愈者栽杏五株輕
者一株如此數年計得七萬餘株鬱然成林
而山中百蟲群獸遊戲杏下竟不生草有如
新治也於是杏子大熟君異於杏林下作簞
倉語時人曰欲買杏者不須來報徑自取之
得將穀一器置倉中即自往取一器杏每有
以穀少而取杏多者即有三四頭虎散逐之
此人怖懼而走杏即傾覆虎即還去到家量
杏一如穀少又有人空往偷杏到家人死遂
送杏還扣頭謝過死者即活自是買杏皆於
林中自平量之不敢有欺者君異以其所得
糧穀賑救貧窮供給行旅歲消三千斛尚餘
甚多縣令親故家有女為精邪所魅百不能

治以語君異若能得女愈當以待中擲君異
即為召勅諸鬼有大白鼉長丈六尺陸行詣
病者門君異使人斬之女病即愈遂以女妻
之久無兒息君異每出行妻不能獨住乃乞
女養之女年十歲君異一旦受上帝錫命位
碧虛上監太一真人白日飛昇婦及養女猶
守其宅賣杏取給有欺之者虎逐之如故養
女長大納壻同居其壻克徒也常取諸祠廟
中神衣物廟中神下巫語云某甲侍是仙人
女壻奪吾衣物吾不在此但羞人爾當為仙
人故無用為問君異在民間住百年其顏色
常如三十許冲昇之後人即杏林之故地置
祠曰太一宮宋真宗賜額大中祥符觀徽宗
宣和間勅封昇元真人一云濠州鍾離縣南有杏山董奉種杏之所

姚光

姚光者不知何許人也得神丹之道能分形
散影坐在立亡火之不焦刀之不傷吳主身
臨試之積荻數千束令光坐其中四面發火
焚之煙焰驕日觀者盈都咸謂光為煥燼矣

火息後見光從灰中振衣而起神容晏如也
手把一卷書吳主讀不能解後不知所之

徐鬱

徐鬱者吳郡海鹽人也少有道術能收束邪
精錢塘人杜氏女患邪鬱為作法召鬼即見
一丈夫著白夾葛裘衣入門鬱一叱即成白
龜一旦與群從兄弟數人登石崎山斫春柴
日暮鬱不返明旦尋不見忽見鬱在山上腋
挾鐵倚樹而不動遂乃抱鬱惟存空殼

茅盈

真人姓茅諱盈字叔中咸陽南關人也姬胃
分根氏族於茅積德累仁祚流百世誕縱明
賢繼踵相承高祖父諱濛字初成深識玄遠
察覽興亡知周之衰不仕諸侯乃師於北郭
北阿鬼谷先生遂隱遁華山盤西靈峯逍遙
幽岫靜念神仙高抗蕭寥絕塵人間也盈曾
祖父諱偃字泰能濛之第四子也仕秦昭襄
王之世位為舍人稍遷車騎校尉長平恭信
侯毗弼霸正有功業於時焉盈祖父諱嘉字
正倫仕秦莊襄王為廣信侯當是時也秦地

已并巴蜀漢中宛鄧置南郡矣北收上郡以東為河東太原上黨東至滎陽城二周置三川郡以呂不韋為丞相號文信侯使招至賓客遊士欲併天下始皇即位嘉輔帝室以嘉為德信侯六年韓魏趙衛楚共擊秦趙魏韓燕五國伐秦取壽陵始皇使嘉將兵攻之有功焉衛迫東都嘉又克討皆平之始皇壯嘉志節賜金五千斤二十五年秦大興兵使嘉攻燕遼東得燕王而還又遣嘉定荆江南地皆降是年置會稽郡嘉將兵於會稽而亡始皇哀其忠因以相國禮葬之於長安龍首山西南嘉有六子並知名於時始皇皆官爵承先並各賜姓其第六子諱祚字彥英不仕不學志願農巷即盈之父也祚有三子長子諱盈字叔申次子諱固字季偉小子諱衷字思和盈生於漢景帝中元五年丙申歲少秉異操天才穎燥矯志蕭抗行邁遠逸不營聞達不交非類獨味清虛恬心玄漠盈時年十八遂棄家離親入于恒山讀老子道德經周易傳採取山木而餌之潛景絕崖素挺靈岫仰希

標玄與世永違始皇三十年九月庚子盈高祖父蒙師鬼谷先生於華山之中乘雲駕龍白日昇天先是時其邑誦曰神仙得者茅初成駕龍上昇入太清時下玄洲戲赤城繼世而往在我盈帝若學之臘嘉平始皇聞謠歌而問其故父老具對曰此仙人之謠勸帝求長生之事於是始皇欣然乃有尋仙之志因改臘曰嘉平盈於恒山積六年思念至道誠感寤應寢興妙論通於神夢髮鬚見太玄玉女把玉札而謂之曰西城有王君得道可為君師子莫不尋而受教乎盈乃感悟登危陟峻徑到西城齋戒三月沐浴向望遂越榛冒險稽首靈域卒見王君後二十年從王君西至龜山見王母盈乃扣頭再拜自陳於王母曰盈小醜賤生枯骨之餘敢以不肖之軀而慕龍鳳之年欲以朝菌之質而求積朔之期雖仰遠流莫不知濟津塗堅塞所要無寄常恐一旦死於鑽故之難取笑於世俗之夫是以昔日負笈幽林貪師所生遂遇王君哀盈丹書見授治身之要服氣之法於是靜齋深

室進行其事師重見告以盈身非玉石而無主於常氣非四時常生於內正當率御出入呼吸中適和液得修形神靡錯感應思積則魂魄不滯理合其分氣甄其適乃可形精不枯宅不可廢也若使精神疲於往反津液勞於出入則形當日凋神亦枯落歲減其始月虧其昔矣宜妙訪求長易之益西王母曰子心至矣吾昔先師元始天王及皇天扶桑大帝君見遺以要言汝願聞之邪於是口告盈以玉珮金璫之道太極玄真之經盈拜受所言稽首而立又告盈曰夫金璫者上清之華蓋陰景之內真玉珮者太上之隱玄洞飛之寶章得其道者皆上陟霄霞登遐八極寢宴高空游行紫虛也向說元始天王大帝君言是太霄二景隱書玉珮金璫之文章也又有陰陽二景內真文與本文相隨太上法惟令授諸司命子玉札玄挺錄字刊金黃映內曜素書上清似當為上卿之君司命之任矣此道後別當付於子也然不先聞明堂玄真之道亦無由得太霄隱書也盈於是辭師乃歸

紫素混俗亦不矯於世自說入恒山北谷學儒俗之業時年四十九也。盈父母尚存父見大怒為子不孝不親供養尋逐妖妄流走四方。吾當喻汝為不生之子也。欲杖罰之。盈長跪謝曰。盈受命應當得道。道法世事兩不相濟。雖遠達供養無旦夕之益。能使家門平安。父母老壽。盈已受聖師符籙見營助者。以天丁之兵見侍衛者。以仙童玉女。今道已成。不可打擊。恐三官考察非小故也。父外信禮度未該。內秀道德玄域。意有未釋。故驗盈情狀。俾眾不惑。於是操杖向盈。適欲舉杖。杖即摧折。成數十段。皆飛揚如弓矢之發。中壁壁穿中柱。柱陷。父悟不几。真意乃止。盈曰。向所啓正慮如此。邂逅中人則有所傷。故爾。至漢宣帝時。二弟俱貴。襄為五官大夫。西河太守。固為執金吾。並當之官。鄉里送者數百人。時盈亦在座。謂賓曰。吾雖不作二千石。亦有仙靈之職矣。來年四月三日。當知諸君能如今日之集會不。眾許之。時元帝初元四年也。明年送客如斯。而集至期。日盈門前數頃地忽自

平治。無復寸芥。皆青綠。屋屋下鋪數重白氈。容數百人坐。遠近翕赫。相語來者。塞道客乃有數陪。於送弟時。眾賓並集。爾乃大作。主人不見使人。但見金盤玉杯。自至人前。奇穀異果。不可名。字酒更美。好復有妓樂絲竹。金石聲動天地。香麝之芳。達于數里。飲食隨益。六百餘人莫不醉飽。明日迎官來至。文官則朱衣素帶。數百人。武官則甲兵牙旗。器仗。曜日。盈與家人及親族辭決。而語宗室子弟曰。夫真仙道隱貴有迹。窮不應表。光曲飾動耀。視聽吾所以不得。默道藏景。潛舉空同者。蓋欲以此道誘勸二弟子。追慕也。亦何但固衷之返迷邪。天下有心者。盡當往向神仙之冀。獲爾言訖。遂歸。白曲邦人因改白曲為茅君之山。時二弟在官。聞盈玄迹。渺邁。白日神仙。乘飛步虛。越波凌津。靈官奉從。著於民口。節蓋旌旗。光耀天下。始乃信仙化可學。神靈可致。然後明松喬不虛。鼎湖實有。於是並各棄官還家。以日具之年。方修盈。稽粕遺事。不得口訣。未為補益。乃相與共歎。而相謂曰。吾兄

得道非他人也。今不往從。親問密訣。而留此按云云。方書以規度世乎。縱往而不達。兄之神仙終不使吾等死於非所也。遂共棄家。扶輿自載。以尋斯舉。以漢元帝永光二年三月六日。渡江求兄於東山。遂與相見。悲欣流涕。告二弟曰。悟何晚矣。二弟跪曰。固衷頑下。不達道德。願賜長生濟第云云。盈曰。卿已老矣。難可補復。縱得真訣。適可成地上仙耳。其昇霄大術。非老夫所學。今且當漸階其易行。以自住。於是並教二弟服青牙始生咽液之道。以往血斷補焦枯。攝筋骨之益。亦停年不死之法也。因以長齋三年。授以上道。使存明堂玄真之氣。以攝運生精理和魂神。三年之內。竭誠精思。神光乃見。於是六丁奉侍。天兵衛護。盈又各賜九轉還丹一劑。并神方一首。各拜而服之。仙道成矣。後授紫素之書。各百字。以付固。固哀拜受。其時亦有執疑者。以啓正之。紫素文曰。太上有命。天載真書。言成陽茅固家子。南關厭字季偉。受命當仙。位為定錄。兼統地真。使保舉有道年命。相關勤恭。

所治四極法令官館洞臺治丹陽句曲之山
國其曷之動靜察聞又曰盈固第哀徒業該
清雖曉反正思微微誠斷六天方顯標明
今屈三官保命建名總括低宗領死記生位
為地仙九宮之英勸教童蒙開道乃成教訓

女官授諸妙靈治百鬼典崇校精開察水
源江海流傾封掌金谷藏錄玉漿監殖龍芝
洞草夜光治于良常之山帶北洞之口鎮陰
宮之門也使者授書訖而去至漢哀帝元壽
二年八月己酉五帝各乘方面車從群官來
下受大帝之命授盈為東嶽上卿司命神君
丈以紫玉為板黃金刻之其文曰惟盈虛挺
遠朗幽眇妙玄爰自童蒙散髮北山靜心林
澤精思求神登峻履谷艱尋師門擲形絕崕
投軀萬津丹誠率任肆其天然遂造明匠九
授靈篇剪髮祝曉殘首截身帶索自樂不恥
餓寒所適惟道所保以真情昭上帝感激太
玄今敬授盈為大元真人領東嶽上卿司命
神君君平心正格秉操金石丹心獨東樓神
高映故報盈以玉鉞綠桂八威之策使盈在

伐源澤折衝萬神君寒凍林谷味玄仰真思
激窮岫啓心精誠今故報盈以紫旄之節藕
數華冠使盈招驅萬靈封山召雲君素家獨
往離親樂仙契閑嶮嶮冬祖山川今故賜盈
綉羽紫帔丹青飛裙使盈從容霄階奪命玉

真君步驟深藪足履危仞心耽志尚會不怠
憚今故報盈以班龍之輿素虎之輶使盈浮
景太空飛輪帝庭君披榛併景寒凌霜雪心
求明真不戰不慄今故報盈以曲晨寶蓋瓊
幃綠室使盈遊眇九宮靜神溫密君遠秀通
榮無疲於心潛形幽嶽靜思萬林今故報盈
以流金火鈴雙珠月明可以上聞太極通音
上清君真心高靜涵累不經素挺浩映內外
坦平今故報盈以錦旌綉幡白羽玄竿可以
呼召六陰玉女侍軒君慈向觸物陰德萬生
蠢動之毛皆念經營今故報盈以鳳鸞之簫
金鐘玉磬可以和神虛館樂真舞靈君饒渴
養神艱辛求真萬物不能致其惑千邪不能
毀其淳今故報盈以紫琳之腴玉漿金甕可
以壽同三光刻簡丹瓊也盈標領清玄紫瑋

八映心暉重離神耀太霞實真人之長者故
賜以大元為號君九德既備威積太微天人
虛白不期同歸今酬九事以報往懷盈心神
方朗四靈所棲丹神啓煥乘直不迴正任全
固監無照微今屈宰上卿總括東嶽又加司

命之任以領錄圖籍給玉童玉女各四十人
以出入太微受事太極也治宮赤城玉洞之
府盈其治之動靜以聞於是盈與二弟決別
而與王君俱去到赤城玉洞之府道次諸山
川神靈有司迎啓引從者以千萬矣臨去告
二弟曰吾今去矣便有局任不得復數相往
來旦夕相見要當一千年再過來於此山三
月十八日十二月一日期要吾師及南嶽太
虛赤城真人遊眇於二弟處也將可記識之
及有好道者待我於是吾自當料理之以相
教訓未悟於是季偉思和遂留治此山洞內
立宮結構於外將道著萬物流潤蒼生德加
鳥獸各獲其情神驗福禍罪惡必明內法既
融外教坦平爾乃風雨以時五禾成熟疾癘
不起暴害不行也真誥云固位句曲真人定

錄右禁郎袁位三官保命司父老歌曰茅山連金陵江湖據下流三神乘白鶴各治一山頭甘雨灌旱稻陸田苗亦柔妻子咸保室使我無百憂白鶴翔青雲何時復來遊

臣道一曰茅盈以真仙之裔識仙人之靈

藐鍾鼎之榮慕玄元之教故其刻志於道精感神明玄功克成榮踰富貴彼二弟之崇爵顯秩而盈略不動心盈蓋視二弟之榮華特一夢幻泡影而已然猶未之悟故示神變以悟之焉終使二弟爲道之歸也道德經曰樂與餌過客止道之出口淡乎其無味視之不足見聽之不足聞用之不可既茅盈之意其旨若此

韓崇

韓崇者字長季吳郡毗陵人也少好道林屋仙人王璋玄曾授之以流珠丹一法崇奉而修之大有驗璋玄語之曰子行此道亦可以出身仕宦無妨仙舉也崇遂仕至宛陵令行仁以爲政用道以撫民虎狼深避蝗不集界還汝南太守拔書佐袁安安後位至司徒時

人通以崇有識物之鑒也崇獨居清素上青之加崇俸祿秩中二千石後漢孝明皇帝巡狩汝南上治崇府崇使妻出住孤獨老嫗家上聞歎韓崇可謂百鍊不消也賜緣五十匹崇在郡積十四年政化洽著舉天下最年七十四璋玄乃授以隱解法得去入大霍山受璋玄遁化泥丸紫戶術以度世今在洞中爲左理中監漢書所載事跡亦略同而置辭小舉歷仕遂至三公和帝時卒即東歸高祖也解世又有馮異亦爲太常名位同耳韓既隱來相呼爲韓家如挑君或即是此虛乘而世呼爲孫家將韓當家也

歷世真仙體道通鑑卷之十六

歷世真仙體道通鑑卷之十七

河七

浮雲山聖壽萬年宮道士趙道一編修

馮良

馮良南陽冠軍軍人少作縣吏年三十爲尉從佐迎督郵自恥無志因毀車轄裂敗衣憤遂去從師受詩傳禮易復學道術占候家中謂已死十五年乃還整修志節抗操嚴恪州郡禮辟不就詔特徵賢良高第半道委之還家時三公爭讓位於良遂不降就年六十七乃棄世東渡入山今在鹿迹洞中後漢安帝時人也

郎宗

郎宗者字仲綏北海安丘人少仕宦爲具縣令學精道術占候風氣後一旦有暴風經牕間占知京師大火燒大夏門遣人往參果爾諸公聞之以博士徵宗宗恥以占事就夜解印綬負笈遁去居華山下服胡麻丸得道今在茅山鹿迹洞中後漢書載郎宗事云理京分能望氣占候古山常賣卜自奉安帝徵對策爲諸儒表後拜郎宗時卒有暴風宗占知京師當有大火記識歲月遣人參候果如其言諸公聞而表上以博士徵之宗恥以占驗

見知徵書到乃懸印鍍於縣庑而遁去遂終
身不仕子顛字稔元傳父業研精學徒常數
百人順帝陽嘉二年徵詣闕上書十一
事拜郎中還家後為同縣孫禮所害

淳于斟

淳于斟字叔顯會稽上虞人漢桓帝時作徐州縣令靈帝時大將軍辟掾少好道明術數服食胡麻黃精餌後入吳烏目山中隱居遇仙人慧車子授以虹景丹經修行得道今在洞中定錄府爲典柄執法郎易參同契三桓有通受符於徐從事仰觀乾象以處災異數效驗以知術故郡舉方士遷洛陽市井如此亦爲小異吳無烏目山妻及吳興並有天目山或即是也

桃俊

桃俊字翁仲係錢塘人少爲郡幹佐末負笈
 到大學受業明經銜災異晚爲交趾太守漢
 末棄世入增城山中學道遇東郭幼平幼平
 秦時人久隱增城得道者也幼平教俊服九
 精煉氣輔星在心之術俊修之道成今在洞
 中兼北河司命主水官之考罰此位雖跡定
 錄其實受事於東宮中節度漢書無此事今
采在錢塘時平
 境壇歷然苗裔猶存鄉近時聞肇角之鄉言故
 人不救侵毀之皆知呼爲桃司命家錢塘杜
 微士事宋差先典隱居共有詩詠以贊
 述斯德則在集中幼平亦無所顯云

劉翊

劉翊字子翔潁川人少好道德而家世大富常周窮困爲事好行陰德密惠陳留張季札當弔師喪車敗牛困翊於汝南界逢之與語不示名字即推車牛與乘之恤死救窮非一

人矣後都長安翊舉計掾到都帝嘉其心拜
郎中遷陳留太守出長安五百里中歛死恤
窮損已分人行達陽平遂遇馬皇先生告翊
曰子仁心感天陰德神鬼太上將嘉子之用
情矣使我來携汝以長生之道吾仙官也爾

乃能隨我去不朔於是扣頭自搏曰少好長
生幸遇神仙乞願侍給馬皇先生因將朔入
桐栢山中授以隱地八術服五星之華法今
度名東華來在洞中爲定錄右理中監漢書
字子期潁陰人家世世當常能用施不以爲
意會行汝南界中有陳留張季札遠赴師喪
過寒水車敗頻溝道路朔見而謂曰君慎終
赴義行宜速連即下車與之不告姓名冀爲
而去季札意其子期也後故到潁陰還於假
衆鄉閭門辭行不與相見常守志卧疾不屈
時今河南神鄉引爲功曾使黃巾賊起
朔救急乏絕資其食者數百人鄉族死亡則
爲殯殮歸葬則助其要與獻帝還都西京舉
上計操備時道路寇阻朔夜行晝伏乃到長
安上嘉其忠勤拜議郎遷中郎太守朔又徵
珍寶唯餘車馬自載東歸出關數百里見士

大 夫 病 死 道 傍 仍 又 以 馬 易 棺 脫 衣 歛 之 又
達 知 故 飢 困 於 路 不 忍 委 去 因 殺 所 駕 牛 以
教 其 乏 衆 人 止 之 烟 曰 視 沒 不 救 非 志 士 也
達 俱 歛 死 此 說 大 同 小 異 故 備 載 之 論 烟 字
子 翔 於 字 例 相 得 而 相 義
亦 是 相 當 但 未 詳 孰 正

呂子華

呂子華者山陽人也陰君弟子已服紅丹之液而未讀內經來從東鄉受太霄隱書而誦之常以幽隱方臺為樂不願造于仙位也

蔡天生

蔡天生者上谷人也小爲孺父賣雜香於野
外以自業瞻情性仁篤口不言惡道逢河北
少女從天生市香天生知是異人再拜上一
擔香少女感之乃教其朝天帝玉皇之法遂
以獲仙託形屣杖隱存方臺少女今猶往來
訪之也天生師之

劉平阿

劉平阿者無名姓不示人也漢末爲九江平
阿長故以爲號行醫術有功德救人疾病如
已之病行遇仙人周正時授以隱存之道託
形履帽而來居茅山方臺大茅山之西南有
四年山俗中所謂
方山者也其下有常服日月晨氣顏色如玉
洞宣名曰方臺

似年三十許人

張激子

張激子者河南張奉者也字公先少時名激子耳此人亦少發名字太傅素隗歎其高操妻以女女服飾奢麗奉不顧貲無異路人婦

改服然後成室家也後棄世入剡山遇山圖

公子山圖公子周哀王時大夫仙人者也授

激子九雲強梁煉玉法激子修此得道今在

東華宮行爲太極所署也或領九宮尚書與

北河侯對職治水考北河司命或爲禁侯侯

亦併共業故也北河司命亦治在洞天之中

與張激子對局魏書張範字公儀河內修武人祖敬爲漢司徒父延太尉

袁隱欲以女妻範範辭不受性恬靜樂道微命不就後爲議郎參丞相掾武庫事是敬

重好難殺窮乏家無餘財以建安十七年卒諡承字公先亦知名以方正拜議郎諡

諡議大夫趙郡太守後隨魏武西征至長安病亡此說名字舊覆大異承與奉乃相類而

非素壻若是範又其字不同詳按事述恐多

是兄也範書王傳又云修往來南陽多止

張奉舍奉舉家病修營救之按張範兄弟乃

陽二也

爲疑也

趙廣信

則小白山中有學道者趙廣信陽城人魏末

來渡江入此山受李法成服氣法又受師左

君守玄中之道內見五臟微視法如此七八

十年周旋郡國或賣藥出入人間人莫知也

多來都下市丹砂作九華丹丹成一服太一

道君以晉穆帝永和元年六月十七日遣迎

傳三日與山中同志別去遂乘雲駕龍白日

登天今在東華海中

張祖常

張祖常者彭城人也吳時從北來得入茅山

方臺洞祖常託形墮車而死故隱身幽館而

修守一之業師事上黨鮑察者漢司徒鮑宣

五世孫也察受道於王君鮑宣漢司徒鮑宣子

承永子呈

呈子呈

後五山中有學道者虞翁生會稽人也昔受

仙人介君食日精法以吳時來隱此山兼行

雲氣迴形之道精思積久形體更少如童子

晉穆帝永和元年七月二十三日東大帝遣

迎即日乘雲昇天今在陽谷山中後五山有

章并谷直

朱孺子

赤水山中學道者朱孺子吳末入山服菊花

及木餌後遇西歸子授以要言入室存泥丸

法三十年遂能致雲雨於洞房中晉穆帝永

和元年八月五日西王母遣迎即日乘五色

雲車登天今在積石臺赤水山云鄭縣南千

里山正赤周迴五十里高千餘丈如此則應

是臨海永嘉東北有所謂赤巖者也許先生

所住赤山一名燒山即此

尹虔子

華陰山中有學道者尹虔子張石生李方白

並晉武帝時人受仙人管城子蒸丹餌木法

俱服得延年健行又受蘇門周壽陵服丹霞

之道行已五十年精心內視不復飲食體骨

輕健色如童子以晉穆帝永和元年二月十

二日太一遣迎以其日乘雲昇天今在玄洲

受書爲高山真人張石生爲東源伯

鄭景世

廬江潛山中有學道者鄭景世張重華並以

晉初受仙人孟德然口訣以入山行守五臟

舍日法兼服胡麻又服玄丹久久不復飲食

而身體輕強及易故形以晉穆帝永和元年四月十九日北玄老太一迎以雲耕白日昇天今在玄洲

平仲節

括蒼山有學道者平仲節河中人以大胡亂中國時來渡江入括蒼山受師宋君存心鏡之道具百神行洞房事如此積四十五年中精思身形更少體有其氣晉穆帝永和元年五月一日中央黃老遣迎即日乘雲駕龍白日昇天今在滄浪雲臺大胡亂者劉淵劉聰時也石勒為小胡

吳睦

吳睦者長安人也少為縣吏掌局枉剋人民人民訟之法應入死睦登委叛遠遁山林餓經日行至石室遇見孫先生在室中隱學左右種黍及胡麻室中恒盈食睦至乞食經月不去孫先生知是叛人初不問之與食料理及誦經講道說及禍福睦聞之於是心開意悟因扣頭自搏列其事源立身所行自首事實求得改往還留石室為先生掃除驅使經四十年後先生授其道俱採藥服食胡麻精

修經教得三百二十年服丹白日昇天

郭靜

郭靜者潁川人也少孤無父母兄弟窮苦依棲無所年十六縣召為吏後得罪仍逃伏經二月日不出遇見郭先生救度一切以法勸化之靜遂隨郭負擔驅使經七年不敢懈怠遂受其導引之要餌服山术茯苓得壽三百歲復於天維山赤松子降授其二人真道今在大有洞中為真人

范伯慈

范伯慈者桂陽人也家本土族而忽得狂邪因成邪勞病頓卧牀席經年迎師解事費用家資漸盡病故不愈聞大道清約無所用於是意變聞沈敬作道士精進理病多驗乃棄俗師之得五十日病疾都愈後遇陸玩之受真內道玩之不能入山伯慈不樂於世遂辭去入天目山服食胡麻精思十七年大洞真仙司命君下降受三十六篇經得服還丹白日昇天今為玄一真人

韓偉遠

九嶷真人韓偉遠昔受於中嶽宋德玄德玄者周宣時人服此靈飛六甲得道能一日行三千里數變形為鳥獸得玄靈之道今在嵩高偉遠久隨之乃得受法行之道成今處九嶷山

劉少翁

昔有劉少翁曾數入太華山中拜禮向山如此二十年忽一旦見西嶽丈人授其仙道

歷世真仙體道通鑑卷之十七

歷世真仙體道通鑑卷之十八 河八

得雲山聖壽萬年宮道士趙道一編修

張天師

天師真人姓張氏諱道陵字輔漢沛豐邑人留侯子房八世孫也子房初遊下邳遇黃石公授以素書後從漢高帝有功封侯養真辟穀師友赤松得東園公飛步之訣謚文成侯陰功隱行流芳後葉有子名不疑不疑次子高子通子無妄無妄子里仁里仁子覺覺子起子大順真人乃大順之長子也母初夢天人自北斗魁星中降至地長丈餘衣繡衣以荷荷香授之既覺衣服居室皆有異香經月而不散感而有孕於東漢光武建武十年甲午正月望日生於吳地天目山時黃雲覆室紫氣盈庭室中光氣如日月復聞昔日之香決日方散年及冠身長九尺二寸尾眉廣額綠睛朱頂隆準方頤目有三角伏犀貫腦玉枕峯起垂手過膝美鬚龍蹠虎步豐下銳上望之儼然雖親友見之肅如也七歲讀道德二篇十許遍而達其旨於天天地

理河洛圖緯之書皆極其妙通習墳典所覽無遺從學者千餘人天目山南三十里西北八十里皆有講誦之堂臨安神仙觀餘杭通仙觀即其地也後舉賢良方正直言極諫科中之一云天師聖性嚴直經明行修學道有方漢平帝永平二年詔書拜巴郡江州今時年二身雖仕而志修煉形輕舉久之退隱北邙山北邙治在洛陽三年有白虎銜符文置座傍朝廷就徵為博士稱疾不起和帝即位聞其有道以三品印綬駟馬車等徵為太傅後封冀縣侯三詔不就語使者曰為我謝天子人生百歲光陰瞬息間父母妻子恩愛隆厚豈能長保哉九天之上無何有之鄉金闕帝君將詔吾以為臣矣惟清靜寡慾則天下自治何以臣為時永元四年壬辰歲也遂自河洛樂蜀之溪嶺深秀遂隱其山苦節學道畜氣養神謂弟子曰吾少嗜學研窮六籍大抵皆經世具也夫通爵顯秩蓋金穀玉比吾身中一毫執重然四體百骸又豈吾所固有也皆游塵聚沫耳剎心煉形與道合真乘雲駕龍白晝上賓豈不快哉人生有會則離有生

則死死者精神冥冥不可復還惟昔軒轅味道松喬食霞並白日飛騰永劫無窮不亦美乎古人辭萬乘之貴千駟之富良有以矣既不能兼才通俗與世俱濟請從所學各宜及時於此分別不亦可乎夫人情亦無極聚極則散去樂極則悲來豈可逃也吾今將遊涉山海遠離塵境棲寓幽渺以究所學與汝等別離子等固如何也弟子有王長者習天文通黃老留侍左右遂散學徒以清虛淡薄為務不交人事王長負書行歌同往雲錦山居而真人修玄玄之道後乃按方煉龍虎大丹一年有紅光照室二年有五雲覆鼎夜不假燭髣髴有青龍白虎各一常遶丹鼎三年丹成真人年六十餘餌之而容貌益少若三十許人行及奔馬又得秘書秘文制命山嶽檄召萬靈一日謂王長曰五嶽多仙子三蜀足名山吾將能偕遊乎遂與北入嵩山崖嶺石居數年精思感徹有繡衣使者告曰中峯石室藏上三皇內文黃帝九鼎太清丹經得而修之者昇天也真人感其言乃齋戒七日入

其室足所履處楚然有聲即坎其地取之果得丹書進而受之遂復尋西極名山一作西其地勝多名物因入陽平山一作成都精思服煉能飛行遠聽得分形散影之妙通神變化坐在立亡每泛舟池中

誦經堂上隱几對客杖藜行吟一時並赴人皆莫測其靈異也真人惟讀五千文晝夜無倦色後往西城山築壇朝真以降五帝忽一鄉夫告曰西城房陵間有白虎神好飲人血每歲其民殺人祭之真人召其神戒之遂滅又告梓州有大蛇藏山穴中鳴則山石振動時吐毒霧行人未及三五里率中毒而死真人以法禁之不復為害青城山記云望龍臺每夏秋山水暴發水怪在葛瓊山在蜀彭州九隱形巖舍服氣調神在秦中山在秦中漢州修九真秘法在昌利山昌利治在漢州採服五芝衆藥在隸上山隸上治在漢州弟子養形輕身法在湧泉山一作平則山湧泉治在漢州陽州新津縣得入水火之術於是度人救物已著陰功矣在真多山真多治在漢州

神念真在北平山一云野山野山治在蜀州新津縣有猛獸數百馴擾戶外在稠稷山稠稷治在蜀州有一老翁化為猱鬼來恐真人誦經不顧遂連自退在鶴鳴山鶴鳴治在蜀州服五雲氣其間石鶴鳴則有昇天者先是章和間其鶴鳴焉清

山記云華陽臺在赤石城崖上是天師與鬼相如羊馬或云羊馬自鳴則有昇天者天師居鶴鳴山後居渠亭山成都記云廣都縣此平馬頭鳴後居渠亭山天師觀壇下有井名曰伏鬼井其怪藏其中漢中微人鬼交混中蜀之閭人故其害方天師被漢家之詔而居蜀之聖亭石室因命神人運青修煉九鼎遊玄石以鍊其井鬼妖遂乃絕神丹三年將成未敢服謂王長曰冲天之士當功及生靈佐國立家興利除害然後輕舉臣事三境則無愧焉苟利一身功不及民非大道弘濟之旨吾觀蜀中蛇毒鬼氣綿亘山谷生民不知潛罹其害吾甚憫之今且修行清靜之化輔贊大道撫育元元爾於是精思上徹金闕後聖時順帝漢安元年壬午歲正月十五日午夜月明真人在鶴鳴山寢方酣熟老君一云道君按金闕後聖駕飛雲綠軒駐山東南顧謂衆真曰道陵修行因苦吾感其志將授以治身秘錄飛騰長生之道而遇

其休息神遊物外卿等多驚今自覺也時真人夢見一人帶夜光之甲冠通天之憤執命魔三氣之憤謂真人曰咄咄道陵子何心生疲倦聖駕久駐待子夢覺真人忽然驚起攘袂振衣疑為外邪所亂良久鑒佩珊珊天樂

隱隱香花覆地紫雲滿空瞻目東瞻紫雲之上有素車一乘駕五白龍青袖朱衣金甲執戟者二十四人在右環列車前對立玉女綵衣花被雲髮顏肩各執一幢上有玉榜金文曰命魔之憤次列二童青衣紺首垂環曳裾各執一幡上左青龍右白虎金榜朱文曰召仙之幡復次二人朱袖金甲各執三氣十絕旌節上有丹榜素文曰倒景之節前立一人繡衣玉冠捧三五斬邪雌雄二神劍上各有星斗日月之文車右一人霞衣金冠捧一玉印文曰陽平治都功印其餘翼衛侍從莫知其數素車之上九色輕霞濛濛然須臾光景澄微見車中一人容儀若冰玉手執五明寶扇項負八景圓光身六丈餘神光照人不

老君也真人歛簡前拜不敢仰視老君告曰
吾昔降蜀山立二十四治成都記云道經二
十四治應二十四
氣六十甲子分隸其間
避唐高宗諱始改爲化乃二十八宿之下圖
實陰景異簿之司分掌人世死生罪福吾懲
下元生人繫繼苦魂延累祖考積成幽孽今
人凶折終不成道即在此獄之中吾已更置
福庭經今數劫仙僚不充職任墮廢近有六
天鬼神血食之輩侵奪以居晝夜不分人鬼
無別枉暴生民安罹災害深可痛惜子何爲
吾攝邪歸正分別人鬼各守晝夜復典此治
以福生民則子功無量矣吾以汝名在丹臺
當爲真人故委汝也真人叩頭謝曰道陵性
識愚慧萬劫幸遇遺會大道死魂再生枯骨
重肉欽佩道旨謹當奉行不敢懈怠老君遙
召三五功曹須臾西方有五色之氣勃勃而
起其中有二仙乘龍虎二騎皆長數丈黑憤
朱衣佩劍執圭從官百二十人皆黑憤縹衣
持劍執戟侍衛進拜老君曰卿等三五功曹
手速爲吾開紫陽南宮玉宸內殿取正一盟
威秘錄吾欲傳授俄頃之間南方起二十四

生氣祥光瑞彩決然滿空其中各列玉童捧
一玉函貯錄一品皆玉札金文及都功版券
職錄以授真人謂真人曰與卿千日爲期後
會閭苑老君復以三清衆經九百三十卷符
錄丹竈秘訣七十二卷一千二百官章雖雄
二劍青城山記云降劍埋青道君都功印二
儀交泰冠驅邪帔褐魚鬚衣方裙朱履等賜
之令制科律佐國行化行之千日則邪鬼不
敢正視傳度已訖於鶴鳴山研味祕文按法
遵行修之千日內顧五臟外集三萬六千神
又感清和玉女教以吐納清和之氣攝伏精
邪行錄中三步九跡交乾履斗之道即魁罡
七元隨兵所指隱遁出沒皆得自然遂依告
命戰鬼於蜀時有八部鬼帥各領鬼兵動億
萬數周行人間劉元達領鬼行雜病張元伯
行瘟病趙公明行下痢鍾子季行癰腫史文
業行暴汗寒瘡范巨卿行酸瘡姚公伯行五
毒李公仲行狂魅赤眼皆五行不正殃禍之
氣隨時更名在東方爲魔王在南方爲鬼帥
在西方爲外道在北方爲鬼王在中央爲神

鬼春三月百鳥鳴叫之時作構誼五墓之鬼
直入秋作人家觀土部土公宅龍伏尸之鬼
冬作塚墓攻食之鬼隨月建胎生或作畜類
之形噬毒爾禍暴殺萬民枉大無數其八部
鬼帥領鬼衆居西蜀青城山巔有鬼城鬼市
分形變化混雜人間布行疫殄人莫知之人
鬼合雜市利交易真人以漢安二年七月一
日佩盟威秘錄往青城山青城山石室天師館道處
唐書蜀州青城山置瑠璃高座左供大道元始
天尊右置三十六部真經立十絕靈幡周市
法席鳴鐘扣磬燒香行道及誦道德諸經布
龍虎神兵於城市衆鬼即持兵刃矢石來害
真人真人舉手一指化為一大蓮花拒之鬼
衆持火千餘炬來真人舉手一指鬼反自燒
不能前進遙語真人曰師自住我嘉州有
嘉州何爲來奪我居處師等速下山須臾必
殺師真人曰汝等兇毒殘害衆生所以吾不
使汝居此當擯於西方不毛之地元達等聞
此語即會鬼帥兵馬各千萬衆精甲犀刃上
山圍繞王長驚怖啓真人曰魔王衆來作何

計術真人曰小鬼何足驚怖取丹筆來王長以進真人執筆遙畫鬼陣其衆皆死小帥校一時僵仆八大鬼王因卧扣頭搏頰求乞殘生真人聞語良久不言再以丹筆倒畫之鬼衆復蘇即呼鬼王曰汝等進前吾有處分鬼王各各前立真人曰汝等可速遠避自今勿復行病妄有殺害今之民庶皆吾子弟之家尔不然誅無留種鬼王曰天下人民本自隸我云何盡奪當分一半真人不許叱咄之鬼王復會六大魔王領百萬鬼兵再來攻戰圍繞此山王長曰鬼衆不可當復何作計真人笑曰子勿驚吾自能却之復以丹筆一畫鬼衆悉死惟六大魔王仆地不能起叩頭搏頰乞殘生而去真人不顧復以丹筆一擬此山遂中分為二摩霄徹泉青城山記云山有營石天師與鬼為誓朱筆畫山清崖中絕險斷處並丹色闊二寸丈深六七丈又云戒鬼筆迹在大龍橋側昔天師以正一之法制伏鬼神誓曰人生於畫鬼行於陰陽分判各有司存違之者正一存誅教加鬼兵欲度不能大聲求哀自今而去不敢復來乞往西方婆羅之國而居止焉真人怒許到筆再畫八帥六魔悉起呼之使前

趙進不得真人乃令王長有一大石為橋度之鬼王方得進拱立侍前真人謂曰汝能以筆畫石得破亦當與汝分民若不破汝可急馳萬里也元達等執筆交畫石皆不破青城記云寅玄觀後有試筆時雖攝伏鬼衆更欲盡制迹有降魔圖法石其心謂之曰汝等既欲與吾分民當與汝輩各盡法力以分勝負元達等曰惟命是聽真人投身入大火中即足履青蓮而出鬼帥接身為火所燒真人入木身度木外木即隨合鬼帥投身即墜於地真人入水乘黃龍而出鬼帥入水為水所溺真人以身入石透石而出鬼帥投身繞入一寸真人以身入鐵山透鐵而出鬼帥繞入半寸真人咒神符一道左手指之鬼斃右手指之後生鬼帥舉手指之無復生死元達等乃化八大虎奔攫而來真人化二獅子逐之奔走無地鬼帥又化八大龍欲來擒師真人再化金翅鳥啄龍目睛其龍乃走又化作大神最尊震吼雙持大槌欲擊真人真人化金剛身長七十二萬丈廣五十萬圍戴大冠負圓光踏蓮花寶臺具十二

種無量相一杵一拳一擬大神退走鬼帥等騰身十二丈即墜真人騰空高百餘丈上無所攀下無所乘鬼帥作五色雲昏暗天地不見光明真人化五色瑞日炎光暉灼雲即流散鬼帥變見窮盡更無所為真人化一大石可重千餘斤以藕絲懸之徧滿鬼帥營上令二鼠爭噉其絲欲壓殺其衆鬼帥等無所逃避同聲哀告願乞餘生即當遠去不敢害及生民真人遂命五方八部六天鬼神會盟於青城山黃帝壇下使人處陽明鬼行幽暗使六天鬼王歸於北鄴八部鬼帥領衆竄于西域五行之毒又戒而釋之乃執丹筆曰吾筆所指鬼衆盡滅要之人鬼分治幽明異境不欲盡滅汝類即與盟誓折石為契刻作天地日月之形于黃帝壇下絕崖之上青城山記云有石天地上下方闊一丈二尺有十二角又有石日月各開五文厚一丈二寸相對柱上為虎虎身方圓可觀焉昔天師書鬼石天地日月俱日月天地重明方得人身也誠都記云青城山有石在玉局觀前一本云真人於平岡山誓曰天地交日月合汝等若復行必盡誅之勿留種矣乃以

神印封鬼營市使不得相通盟誓之後鬼衆躊躇不去真人口勅神符一道飛上層霄于時風雨天仙兵馬風刀立至諸鬼滅影而走於是戰鬼一十四敗蕩滌區藪奪鬼幽獄復爲二十四福庭立二十四陰官降二十八宿正氣以通地中一云又於公慕山中立二十四氣治更除山中化二十四氣合大法却復諸虛按公慕治在漢州每治立陰州什邡縣更除治在漢州每治立陰官一人仙官一人分掌世人罪福有立功立行修齋設醮騰章拜表謝過祈福遷拔祖考者則仙官錄其功行奏名於上宮增其福壽如不孝不忠欺詐狠戾常行惡事不能改過者則陰官錄其罪聞於地府損其福壽或絕其後由是善惡報應如影響焉真人既行正一之化攝三萬六千種外道惡魔誅絕邪僞於是百姓翕然奉以爲師居弟子數萬家立諸祭酒分領民戶有如官長并立條制令民隨事輸出粟帛器物紙物薦席樵薪所在貯之以備齋醮及供給行旅而人稟行無敢欺竊教民立橋梁修道路置義井謂之立功或有州縣官及人民疾病者持一手狀來投真

人檢察其所犯罪愆二條列之令設齋醮布施謝過其疾即愈又教以廉勤理民不煩刑罰蜀民畏罪遷善盜賊不作物無疵癘皆天師之化也真人因至蒼溪縣雲臺山雲臺山在漢州西縣唐書開州君溪縣有雲臺山觀山水秀異群峯朝挹地無邪毒乃謂王長曰此山乃吾成功飛騰之地遂卜居以修九還七返之功一心存念大道經四十九日復聆昔日鑾佩天樂之音真人整衣扣伏乃見老君如前導從千乘萬騎來集空際久之徘徊不下真人再拜悲泣踊仆言曰臣昔者自念夙承實陰親授秘文乃依天憲戰鬼行化功成退居今臆駕再臨不我下降意者大道離臣其爲尸敗乎遂舉手以身自仆老君乃命使者告曰卿之功業合得九真上仙吾往使卿入蜀奪鬼幽獄區別人鬼布清靜之化而卿殺鬼過當擅興風雨役使鬼神驅馳星斗震蕩山川陰景翳晝殺氣穢空此非大道好生之意上帝責子之過所以吾不得近子矣吾未能與子論功且當退居世間待吾於下元之主當與申叙

罪戾以雪重責真人悲泣請死于今日老君復告曰子可開目東視乃見一人黃衣黑幘捧一玉函中有素書三卷題曰三八謝罪滅黑簿超度玄祖章真人再拜受訖老君告曰子可勤行修謝日月二十八宿二十四氣陰陽本命主者罪滅黑簿名昇紫清七祖父母同爲上仙謝過之後更修之三十六百日吾待子於無何有之鄉上清八景宮中言訖聖駕已回真人遂依告文領弟子遷鶴鳴山築壇以醮太陽太陰遇三元八節本命元辰庚申甲子三會五臘修齋設醮轉經懺懺懺謝日月星辰天地陰陽自己九玄七祖所犯之罪三年之後玄祖生天從學弟子再聚數日同往主簿山主簿山在江陰縣隱功齋聞衆瑞符應一夕神人授以玉璧謂曰群仙使我以此光子居本竹山本竹山在蜀州新津縣衆真授靈寶上經居蒙泰山蒙泰山在秦州有神人夜召具人以俱往三日乃返領弟子遷渠亭山是時從真人遊者數十人一日告其徒曰諸弟子謝爾輩勤事我奈爾輩俗態未除不能棄世正

可得吾行氣導引之術或可得服食草木數百數之方爾業重緣薄未可遽議成道更三世可與吾會第往之乃指王長曰惟爾累世種善可以成就矣又曰東方有男子走小月者亦當飛昇不遠千里明年正月七日當來矣具說容貌長短形色及期真人曰日且午趙子其至乎言卒而昇至皆如所言門人以告真人曰意此人來矣未可遽納乃七試之初不受謁今人雖辱遣之不去露宿四十日志益確乃見之又使入山守柩驅獸夕有美女言遠行遇夜願寄宿昇與接席端坐達早明日又告病足逗留治容挑昇昇終不失正又行道見遺金在數十餅過而不取又令伐薪有三虎哮吼而前昇色自若曰吾遠從聖人求不死之道汝為山鬼試我邪虎乃去又使令入肆市帛付直訖而物主誣以未得昇了無所爭更貿衣以償之又令守稻有弊衣瘡容瘡瘍遍膚口齒臭敗扣頭乞食昇惕然動容解衣餉飯以餘糧遺之凡六試皆動心感色之事昇執心無二真人又領登雲臺絕

崖之上道遙嘯咏下臨萬仞之壑有桃生絕壁間其實甚異真人謂諸弟子有能得此實者當告之以道於是俯而窺者將二百餘人莫不股慄戰汗謝曰此桃不可得也惟昇進曰聖師所護何峻險之有師在終不使昇殞於此谷分若可教此桃可得矣於是投身而下正及桃上足不蹉跌摘滿懷攀緣石壁欲上不可即仰而擲之二百餘顆真人分諸弟子留一待昇臨谷以手援之衆見其臂不加長歛虛引而上徐曰昇猶以正心得桃不致殞墜吾今試自投之當應大得桃也衆言不可惟昇長不諫遂投身而下因失所在久而不上衆驚莫測昇長默然良久乃曰師則父也父既往矣吾將安歸言訖俱投谷中正墜師前見真人在瓊林寶帳之中七寶臺上瞑目端坐笑曰吾知汝二人當至也遂授以神丹及寶經秘訣其諸弟子守於雲臺絕崖之上二日各散去真人與王趙三日復還治中一日領弟子遙見陽山白氣屬天謂長昇曰彼處必有妖怪當往除之遂至其地值十二

神女於山前姿態妖艷因詰其由神女答曰妾等實土地陰靈也真人遂問鹹泉何在神女曰前有大湫毒龍處之真人以法召之不出遂書一符化為金翅鳳向湫上盤旋毒龍驚懼捨湫而走出其湫即竭遂得鹹泉煎之成鹽金翅鳳泊於南山之上後人呼為鳳凰臺鳥雀至今不敢棲其上十二神女各捧一玉環來獻曰妾等願事箕箒真人受其環以手揖之十二環合而為一謂曰吾投此環於井中能得之者應吾夙命也神女聞語競解衣而入爭取玉環真人遂掩之盟曰今作井神勿得復出免為生人之患真人方治鹹泉有一獵者至真人戒其好殺因授以煮鹽之法其井深五百四十尺闊一丈日得鹹泉四十餘函其利甚博真人遂指西北山上曰此處可以築城又指城南下曰此處川嶽相朝可建福庭後人感真人之言因而立祠至今崇奉祈禱不絕真人領昇長往閭中居一日思神之際謂二子曰吾向取神女衣深慮神女復取之出為人害遂再詣其所取衣藏於

高峯石室中勅地神守護即燭陽洞也彼方之民至今不罹神女之害而獲鹽井之利後以真人之諱旌其事今陵州是也蜀中鹽池皆於其傍立清河府君之祠清河乃張氏郡也其山下無江及井居人乏水真人以神劍挿地因而成井遣神衛之使之不竭真人謂昇長曰此山多巖人民居焉慮山崖或墜落遂召其神誓之使不傷人真人與弟子過宋江其中多異物爲人害真人置石函於江中錄神姦之名以法召入鎖之復以大山篆符以鎮焉其性遂絕後人呼爲擒鬼符每水涸人多見之募歸供養以屏妖惡真人復領昇長往鶴鳴山亭午之際忽見一人朱衣青襟曳履執版一人黑幘綃衣佩劍捧一玉函從朱衣使者進曰奉上清真符召真人遊於閼苑須臾東北有十四人皆龍虎鸞鶴龜鱗魚鳥之騎執節持幢前後從引千乘萬騎獅子辟邪天丁甲卒無執騎吏來迎真人次有黑龍駕一紫輦玉女二人引真人登車旋踵至閼闕前榜云擬太玄都正一真人闕真人既

至群仙禮謁良久二黑衣吏持天符佩劍執圖籍而上上云超度先祖之籍即皆上朱陵府矣真人親事訖領弟子居渠亭山石室中調太真之氣一日忽有二青童引群仙皆朱衣絳節前導曰老君至矣中有一人長丈餘素髮朱顏項圓光從者二人可二十許或指曰此子房也此子淵也坐頃乃引青車一輛別遣二人翼真人登車騰空而上至一處臺殿巍巍金塔玉砌或謂真人曰將朝太上元始天尊也真人整衣趨進望見殿上圓光照人不可正視或語曰左侍無上大道君右侍太極真人前侍虛微元君後侍太上真人金童玉女侍香散花妙行真人執經俯而前立班成羣真皆謂曰今子等皆成真矣由汝一念而萬劫業緣皆盡於今日移時殿上勅青童諭真人以正一盟威之法使傳世世宣布爲人天之師拜真人爲太玄都正一平炁三天扶教輔元大法師勅還人間勸度未悟仍密諭飛昇之期真人受命復返渠亭赤石崖舍出三天正一秘法付長昇

一云於後城山中投誠王

長超昇玉陽山中投昇長超復於清沅山中改號後城治在漢州什邡縣輕舉之法付嗣師又入鹿堂山中鹿堂治在漢州綿竹縣煉九鼎神丹還平蓋山平蓋治在蜀州新津縣合九華大藥時有東治禁氣師姚徐二姓能收社廟之鬼回喪車起死口周流九州之內常統陰鬼甲馬萬數聞師在蜀乃求見焉曰大道一氣兩神靈之間寧有隆卑邪吾等統八極陰兵萬億假令有道其如吾何麾其徒至戶外真人不納顧謂長昇曰此乃六天邪神不合與正氣相見令立道傍三晝夜不與進退弟子恠而問之真人曰此與群精大邪共來試我今令立於門外亦無害也姚徐呼曰聞師有道故來求見既蒙不納復令之立我何罪也真人乃令弟子語曰今赦原汝不問往罪其衆乃得辭去真人領弟子還鶴鳴山於桓帝永壽元年乙未正月七日五更之初長昇見空中神仙騎吏一人駕雲車徘徊於山之東南大聲言曰張道陵功行已就將授以秘錄言訖老君駕龍輿真人乘白鶴自渠亭

山會于成都城下老君同至萬神湊迎湧出
一玉局高丈餘玉局治在益州成都縣今玉局觀是也老君昇
座為真人再授道要重演正一盟威之旨說
北斗延生經以十五日上元再會于成都說
南斗經及演說諸經真人聽畢老君已回玉
局消散因成空洞成都記云老君既去空虛與青城第五洞又相連道陵以玉局上應鬼宿不宜開穴通氣將不利於分野乃鑿石以閉真人往鹿堂治召四鎮太歲五嶽四瀆社稷神祇群仙悉集是時山前有一石荀可高丈餘真人執起以警衆神曰太上有勅令吾
○警衆當崇奉正道好生惡殺佐國安民其有不稟恭者吾遣萬神誅之乃擲石荀於巖下立於治側遂與定三十六靖廬七十二福地三百六十名山高低品秩各置一正神主守如世間郡邑之治遂領昇長往雲臺治於西北隅築壇安爐煉大丹丹成服之浴於水有神光亘天永壽二年丙申真人自以功成道著乃於治之西北半崖間舉身躍入石壁中自崖頂而出因成二洞今崖半曰峻仙洞崖上曰平仙洞是年九月九日在巴西亦城渠

亭山中太上遣使者并五帝都從持玉冊授正一真人之號真人將以盟威都功等諸品秘籙斬邪二劔玉冊玉印以授其長子衛戒之曰此文總統三五步罡正一之樞要世世一子紹吾之位非吾家宗親子孫不傳青城赤城山有天師觀經處一云於灌口山謂長中封藏經諸按灌口治在閬州蒼溪縣
昇曰吾有餘丹在煉丹亭上金盃之中汝二子可分餌今日當隨吾矣是日亭午之際復見一人朱衣青襟曳履持版一人黑幘綃衣結履佩劍各捧玉函從朱衣使者趨前拜曰奉上清真符迎真人於閬苑須臾東北有二十四人皆龍虎鸞鶴之騎各執青幢絳節獅子辟邪天驕甲卒皆至稱景陽吏即有黑龍駕一紫輿玉女二人引真人與夫人雍氏一云登車前導後從天樂引迎於雲臺峯白
日昇天時真人年一百二十三歲也唐玄宗黃云邀彼炎漢天圖中缺萬彙消殘三靈蕩越惟師廣運神威迅發躬侍真元親傳秘訣妖毒雲驅崇山劔裂大布聲教全清盡尊一振無為永光有截鸞鶴斯邁丹霄是故玉相

真儀傳芳不歇又黃云邀矣真仙孤高峻節氣貫穹冥玄元示訣落落神儀亭亭皓月誅邪斬精懸驅鬼徹漢代盟威流傳不絕肅宗黃云德自清虛聖教之實或隱或見是朴是質靜處瓊堂焚香玉室道心不二為正一宋徽宗進封真君玉冊文維大觀二年歲次戊子十月丁丑朔十有六日壬辰皇帝御名謹再拜言曰惟道無方待人而成若昔至真以道興世功被萬物則為神明主務稱其休夫何敢不崇恭惟漢天師正一真人三天扶教輔元大法師體妙闡幽有大利於天下劉氏之季厥績甚茂遂挾光景上超人群秘籙真圖孚條於後珥除妖孽攘禦不祥陰陽有民既久彌著不有微稱何以極報典揚嘉惠謹遣朝奉大夫知信州軍州事劉晏上尊號正一靜應真君大道藏於幽顯于明功施於遠著于近匪我能然惟常弗息則能尚鑒觀茲以行其餘佑我邦家延及我民懋昭無疆之休俾嗣于永世理宗嘉熙三年封正一靜應顯佑真君

臣道一曰鬼神變化從古以之人鬼混殽道將違矣張天師乃稟符籙之教通天地之情分隸陰陽區別人鬼至於奪鬼幽獄立二十四治其與太上之降九十五種外道不殊正一之教流傳後世實非小補且德垂後裔世襲真風以至于今亦天之報功也道德經曰以道莅天下其鬼不神非其鬼不神其神不傷人非其神不傷人聖人亦不傷張天師必能深究其旨

歷世真仙體道通鑑卷之十八

歷世真仙體道通鑑卷之十九

河元

浮雲山夏壽萬年宮道士趙道一編修

王長

真人王長不知何所人也從張正一真人學真人往雲錦山散群弟子惟王長習天文通黃老留侍左右長遂負書行歌同真人往雲錦山日侍真人服丹戰鬼積行累功後於渠亭山真人一日指長曰惟爾累世種善宿有仙骨可與成就矣遂盡得真人九鼎之要白日飛昇

趙昇

真人趙昇號鹿堂子不知何所人也始張正一真人在蜀昇不遠千里而來願執弟子禮真人試以難者七事而昇終始如一第七試因取桃同王長投谷中見真人坐瓊林寶帳遂拜授神丹寶經後事真人功行滿備白日昇天

臣道一曰趙昇不遠千里而求師守一誠而不變志於道忘其身忍辱含垢堅節礪操卒能得明師之旨授參道德之玄微積

行累功煉形輕舉觀其志其與傳先生之穿盤石不殊後之學仙者真可爲軌範也道德經曰強行者有志其斯之謂夫

張衡

嗣師張衡字靈真張正一真人長子也字子平順精元象學道繼出仕漢為豫西刺史遷侍中少博學隱居不仕有大名於天下時帝聞其有道徵爲黃門侍郎不就不關世務吐納不食於漢靈帝光和二年己未正月二十三日以真人之法付子師與妻盧氏得道陽平山白日飛昇

張魯

系師張魯字公期漢書載字公祺嗣師長子也好道守真人之法仕漢歷典農校尉安民中即將漢中南鄭二郡太守後隱身學道以符法治病致米一斗疾苦立愈久之積米鉅萬魏王聞之遣使統兵來討弟子告師師曰慎勿爲懼遂同弟子登嶺而望見兵馬四合師以手版畫地成河怒濤洶湧下臨不測兵不得度使者復統水師至岸師又以手版畫其河中輒出一峯高千餘丈兵不能進使者回具述

其事一云建安中曹操權將不利於漢室伯鸞封會稽扶魏王遣使追謝齋印綬拜為義公正以此也魏王遣使追謝齋印綬拜為梁益二州刺史鎮南將軍封關中侯食邑三萬戶師固辭不受謂使者曰吾修道之士世慕沖舉今裂地之封非所願也請還印綬無復再來後修煉白日乘龍昇天一云魯於太山與魯相見在天露中良久失之師有第二人長曰衛次曰僊衛歷招義將軍好道於嘉陵飛昇僊歷南郡太守棄官學道之白日飛昇

張滋

張滋漢書字元微系師長子也辟丞相掾給事黃門侍郎歷漢中太守封昌亭侯久之得道尸解而去四弟曰永曰盛曰溢曰巨永字齡宗歷奉車都尉議郎封樓亭侯得道尸解盛字元宗歷奉車都尉散騎侍郎封都亭侯嘗喟然歎曰吾先世教法常以長子傳授而諸兄皆不娶可使至此遂無傳乎西晉永嘉中夜望大江之東有瑞氣徹天謂其妻曰是可成吾丹矣乃棄官南遊至鄱陽郡望之曰

近矣即山行五日至一處山嶺秀麗登無喜曰吾得之矣山頂有真人丹穴并窻存焉乃昔日煉丹修養之地遂就其井穴左右結廬居一年盧氏來尋之遂與同居此山得一子一云盧氏之子居九年丹成一日尸解而去人呼其為龍虎子孫多居山之東北溢字立宗仕歷牙門將軍駙馬都尉討寇將軍漢中南鄭太守關中侯久之得道尸解巨字儒宗仕歷侍御史安南正參義陽太守久之得道尸解一云第四弟盛得字文宗歷豫章太守巨第七弟夢得字文宗歷豫章太守

張昭成字道融威之長子也學道不懈每端坐室中出神數百里外能馴虎豹年一百十九歲卒而尸溫溫如生既葬塚上生菌數千一日居人見鶴穿墓而出有彩雲威之後開墓視之唯冠履在焉一云晉初得道至成帝咸康年中仙去

張椒

張椒字德馨道融長子也得真人治鬼之法以真人所授諸階秘錄傳度世人晉帝累徵不起得道年一百餘歲告別門弟子道然而化

張仲回

張仲回字德昌德馨之長子也傳授父法能辟穀日行數百里後入蜀山不歸不知所終

張迥

張迥字彥超德昌之長子也幼年得道義奉姿善裁鑒日列真人諸階品錄於淨室中嚴奉六時香火終身無怠治病驅邪無不安愈世人仰之年九十而卒一云齊太祖召赴闕

張符

張符字德信彥超之長子好道傳守真之法年九十二歲而卒

張子祥

張子祥字麟伯德信之長子博覽諸經究探今古襲儒衣冠仕隋歷洛陽尉未幾棄官與妻子退隱龍虎山一云齊自散曰隋雖混一後從學者數百人志在修養顏容益少常若

二十歲人能吐腹中丹置掌中說弄或夜投器中光芒穿屋乃復吞之久之得道年一百二歲一云百歲而卒舉棺甚輕葬之夕墓忽有穴其塚開視所存唯衣服爾

張通

張通一云下字字仲達何元麟伯之長子傳守真人之法常閉戶不出四十年妻子非時不見久之得道年九十七歲而卒經數月入棺尸竟不壞通高順皆其祖名未詳其說

張仲常

張仲常字德潤仲達之長子通覽儒書亦有神異唐高宗召至闕階歸歎曰吾幾落世網學道於家傳守真人之法能分形變化嘗推寢於室中與妻茹葷飲酒夜醉於寢傍吐其中經日不壞年九十八歲卒一云日埋寢於室中對妻子茹葷飲酒夜醉寢於寢中經日不壞

張光

張光字德昭德潤之長子少傳授真人之法久之棄妻與次子悟入山修行二十餘載乃出見其妻又同處五年後終於家年一百二

歲而悟亦能辟穀

張慈正

張慈正字子明德昭之長子博學群書最精於易從學者百餘人久之學道隱山與妻子不相見傳守真人之法歲以三元傳度諸階祕錄四方歸之所積法信備荒歲以助貧乏之士亦能煅煉黃白之法百餘歲卒於山中空中有仙樂隱隱焉一云能以藥點無為金而後為元銀煅成露投水中火過

張高

張高字士龍一云字士隆後避子明長子也學道守真人之法飲酒至一石而不醉唐明皇召見于京師置壇受錄降賜金帛仍免租稅冊封漢祖天師之號肅宗降香建醮觀灑宸翰以贊天師貞元中降供養供養金銀香爐香合緋羅銷金帕及黃複器物年九十歲卒家

張應韶

張應韶字治鳳士龍之長子博學經典後隱山中辟穀能百日不食與妻子躬耕能吹鐵

笛數里外聞之一日告其子曰吾世傳真人之教功及於人多矣吾今垂年汝當傳守言訖兀然端坐瞑目而化年九十九

張順

張順字仲孚一云中字治鳳之長子少事母孝曰不孝不忠而欲學道求仙是猶捨舟楫而涉大川也仕為本縣貴水尉後棄官并妻子結茅以居年八十七歲童顏皓齒不疾而化

張士元

張士元字仲良仲孚之長子少博習群書年四十餘始學道習夜坐久之能通臂上下出入如飛以符法傳人治病能種桃李頃刻而實時君聞其有道屢以美官徵之固辭不起終于家年九十二

張修

張修字德真仲良之長子為人質朴常衣布素不喜華飾與妻耕于野不與鄉人交通歲以符法傳人治病應時而驗所得法信皆施貧士甘於寂寞無所貪慕先二年自營墳郭曰吾二年當去至期乃沐浴更衣端坐而化

時年八十五歲靈驗記云劉遵者江西南大賈蘇明年卒于金陵兩少而蘇云冥官所追念有金先自天而下黃衣使者乘空而至執素簡讀曰劉遵身保正一蘇名在上天非地司所籍大限既足可延三十年由是拔擢修道入龍虎山師奉天師焉

張謐

張謐字子堅德真之長子博學為當時通儒攻草隸晚年好道能辟穀一云唐文宗召見賜官不受而歸降金建康一日三飲大醉而化年一百餘歲

張秉一

張秉一一作字溫甫子堅之長子母初夢金龜入腹覺而有孕少年學道能洞窺牆壁外嘗累千金遇凶年市穀救施貧乏年九十二歲一日語妻曰吾死後地震則歛而葬之言訖乃正坐執簡而化七日果地震乃歛而葬焉體尚溫而不壞

張善

張善字元長溫甫之長子幼不茹葷長好道遊歷名山大川二十年方還即不出戶深居內養年八十七歲而終一云八十一

張季文

張季文字仲歸元長之子歲以諸階秘錄傳度弟子之能修行者用符水治病立愈年八十七歲而卒

張正隨

張正隨字實神仲歸長子也為人質直淳朴不與俗人交遇諸途則趨而避之歲以傳度法信救施貧乏雖家貧而不顧年八十七歲而終追封真靜先生

張乾曜

張乾曜實神之長子也好道守真人之教法會要云大中祥符八年召信州道士張宋仁宗聞其有道天聖八年五月召赴闕賜澄素先生之號上問以飛昇之事沉吟久之對曰此非可以輔政教也上嘉之又問幾子對以長子傳道次業儒遂以次子見素為將作監主簿見素雖仕而志尤慕道以衛尉寺丞休官隱居鄱陽東湖至今子孫家焉

張嗣宗

張嗣宗澄素先生之長子襲真人之教傳度秘錄得吐納之法年七十容貌如童孩年八

十一歲而卒封虛白先生會要云至和三年八月賜號冲靜先生

張象中

張象中字拱辰虛白先生之長子七歲賜紫承襲一云年十三順慈非帝時通經史尤有特賜紫衣親覽宸翰以銀編復賜束帛金臨自後朝廷寵貴拜至師承襲真人之教終身不

張敦復

張敦復字延之拱辰長子少儒服有聲場屋後以嫡子承正一二十八世丕闡祖風四方宗之年五十三而卒追封葆光先生

張景端

張景端字子仁乃二十四代之後名迪第五子也好道承襲真人之教年三十一歲一云五十二卒追封葆真先生

張繼先

張繼先字遵正乃二十六代之後宣教郎臨川知縣名處仁字德玄第二子也九歲承襲真人之教宋徽宗崇寧以來凡四召至闕賜號虛靜先生規軼中散大夫初神宗以真人

印文陽平治都功印凡六字用崑玉刻之藏於三清儲祥官法從軍將以界有道者至是以賜繼先已而進封真人爲正一靜應顯佑真君仍詔有司就國之東建下院以居之賜額曰崇道又賜緡錢修龍虎山上清宮撥半

口莊五萬以飯其衆改賜上清正一宮額追封其祖及父先生號度其祖母陳氏馮氏妹葆真皆爲道士建真觀以居之復用澄素先生例官其兄紹先假將仕郎恩賚甚厚先生志在冲淡引辭以歸嘗作靜通庵于上清宮後爲心齋坐忘之所又因祖師雲錦山龍虎丹竈而修煉焉瑞彩祥光照耀山谷有降祥堂濯鼎池遺迹猶存後著心說及大道歌以貽于世丁未年三十六歲欽宗詔赴闕至泗州解化已酉年冬赴杭州薛門下生日齋是年大盜入境先生預告衆而去至今道侶往還多見在羅浮西蜀隱顯不定云

人自歸州來附天師謝張侯書乃知不死復有人見在惠州羅浮者

張時修

張時修字朝英虛白先生之後也素習儒術累舉不第乃恬然靜退志慕修煉以虛靜不娶無嗣衆推承襲年六十一歲於龍虎故居解化

張守真

張守真字遵一朝英長子也母吳氏嘗夢昇以仙果曰汝食之生子當主陽平治都功印生而純素守靜長而寡慾宋紹興十年庚申承襲世教每歲三元傳度四方輻湊除邪截毒道化盛行二十九年二月七日高宗賜號正應先生孝宗乾道六年十月十三日高宗召命十一月十三日詔赴德壽宮館于養魚莊越三日引見賜坐咨訪道法甚款十九日

孝宗召見賜坐賜金錫齋退就館舍錫齋頻蕃十二月十九日高宗命醮月臺所禱有異應越明年復召見以上清三洞諸品寶錄流傳寢久乃錫金委道錄院鈐木成書就廷祥觀傳度且命以其版歸及賜象簡景震劍并

手書陰符經以界之先生既歸林下儵然自得不以世俗介意每云嘗收兄虛靜先生書有川蜀之約吾將往遵焉於淳熙三年十月三十日無疾羽解

張伯璟

張伯璟字德瑩正應先生長子也儀冠軒偉豐玉枕義鬚髯人皆謂有正一之風宋孝宗乾道中侍正應先生赴召高宗賜坐賜齋御筆更名景淵又見南內宣演道法甚嘉納焉越月高宗命正應大醮月臺正應以景淵隸其事每獲殊應上加錫資併賜象簡以歸遂掌三元之教符錄受者尤盛初皇子魏王鎮明州以玉壇召師相得尤厚一日遣人荐來邀逐忽謂其徒曰人間之寵雖至然吾自有仙期不可與矣遂隱几而化

張慶先

張慶先字紹祖德瑩嫡子也慶先未生時德瑩嘗鞠幼弟嗣先爲子既而攝祖教慶先降世天姿閑雅賦性簡默蓋如列子之居鄭圃時人無知者久而聲名方馨神異煥發道俗

宗鶴不謀同辭曰真正一先生之裔也遂鳴于有司以宋寧宗嘉泰元年辛酉五月正襲三十四代之位三元傳錄奉香火者雲至師常以真純自守儉素居家慈仁接物見貧乏寒棲之士尤加惻隱而賙濟之無他嗜好惟喜飲而不為酒困至嘉定二年下元開壇越七日有綠袍幅巾之士神風偉岸類有道者衆莫詰其所從來師一見之開樽下榻如平生歡既別猶附耳語移時乃去師自是焚香絕粒不交人事家人意其蟬蛻有日請遺法訣聞而不言至是月二十九日晨興盥櫛如平時備然宴坐而逝

張可大

張可大字子賢乃正應先生第二子伯瑞之孫仁靜先生天麟之次子也初景淵羽化時伯瑞嘗攝三十四代事至慶先羽化嫡子成大幼天麟復攝行三十五代教法嘗被宋寧宗召賜號仁靜先生未幾成大早化遂以可大為慶先後理宗紹定三年仁靜仙去可大年方十三正承三十五代之教豐神秀異性

識不凡四方參受法錄者動數萬計道化威行端平三年奉聖旨賜錢重刊先朝元賜錄板嘉熙二年加封正一靜應顯佑真君助法鳴山玉泉龍井之神咸加封焉三年四月奉聖旨召赴行都退潮橋兩樓煌保邊威有感格七月召見賜坐賜齋賜號觀妙先生褒嘉甚至錫資便著仍賜錢重興先朝元賜真銘觀俾為母子同居之地錫以土田免其租賦御書觀額及真風之殿紫微之閣以賜又賜扇一握觀灑宸翰曰神與道而為一天與人而相連苟精守以專密必駕景而凌烟先生又為助法鳴山玉泉龍井之神請于朝咸加封爵自是簡眷愈隆時有宣賜降香建醮無虛歲每禱輒應至寶祐二年復奉聖旨召赴行在住持龍翔宮以親老故辭準勅提舉三山符錄兼御前諸官觀教門公事主領龍翔宮事至今遙領自是既得請有逍遙物外之志景定三年乃以教法授次子宗演具表奏聞至四月初十日羽解上與東宮各有賜賻至產劔宣賜尤厚丞相江萬里為撰碑銘

歷世真仙體道通鑑卷之十九

歷世真仙體道通鑑卷之二十

河十

許雲山聖壽萬年宮道士趙道一編修

千吉

千吉者鄉郡人也一云北先名室後改名吉其父祖世有道術不殺生命吉精苦有踰於

昔人常遊曲陽流水上得神書百餘卷皆赤界白素青首朱目號曰太平青領書時漢成帝河平二年甲午也蓋吉親受於老君今道家太平經也其經以甲乙丙丁戊己庚辛壬癸為部每部一十七卷一云吉忽得痼疾經

十餘年百藥不愈乃晨夕焚香哀告上天願賜救度老君感其精誠乃令仙人帛和為賣藥翁行市中授之經且曰卿得此書非但愈疾而已當得長生化行天下吉乃拜受其疾頓除老君復降親授其旨遂編前經成一

七十卷吉得其旨遂以修身養性消災治疾無不驗者其要曰夫人之生也天付之以神地付之以精神神和付之以氣人能保精愛神護氣內則致身長生外則致國太平又曰人臣之行當上愛其君欲其長生為人子者當

念父母畏其將老風化其意使之入道常為求索奇方殊術以奉君親為人弟子者當念錄師恩夫人生於父母成道德於師得尊榮於君每念君父師將老無以復之或行學更事賢明求奇方異法而資益之此乃應太古

上皇最善忠臣孝子順弟子也人皆為之則天下太平矣有心之人所作皆善言行精實心自克責灑心易行感動於上受天施恩輒言報謝精專不怠得致神仙其方曰吾字十一名為士丙午丁巳為祖始四口治事萬物

理子中用角治其右潛龍勿用坎為巳人得見之壽長久居天地間浩而已治萬百人仙可待善理病者勿輕給藥莫藥於長安市使人壽若西王母比若四時周反始九十字策傳方士蓋神丹奇藥可以奉君父師者焉又

出科戒祭酒之法以付吉吉後奉經行道分布弟子置男官女官廣化人民四方歸儒後孝章皇帝元和二年老君復降詰責吉曰吾前授汝道助國扶命憂念萬兆而自頃以來諸男女弟子託吾位號貪財縱欲驕倨自大

嫉賢妬才更相是非皆不當爾故來語汝吉稽首伏地叩頭百下曰唯唯願太上赦既往之罪容臣修將來之善從今日已往不知當何以救諸男女弟子之譴責老君曰汝善聽教人生雖壽萬年不持戒律與老木久石何

異寧一日持戒為道德而死不忍犯戒而生持戒者上補天官尸解昇仙世人雖為王公上至帝皇脫有重罪無益魂神可不痛邪明奉吾戒以教授之乃為說一百八十戒訖又語吉曰往古先聖皆從此得道道本無形從

師得成道不可廢師不可輕吉稽首受命再拜而謝吉後寓居會稽孫策平江東進襲會稽見士民皆呼吉為千郎事之如神策招吉為客在軍中將士多疾病請吉嚙水輒差策將兵數萬人欲迎獻帝討曹公使吉占風色

每有神驗將士咸崇仰吉且先拜吉後朝策策見將士多在吉所因怒曰吾不如千君邪乃收吉責數吉曰天久旱水道不通君不同人憂安坐船中作鬼態東吞將士敗吾部曲今當相除即縛吉暴日中使請雨若能感天

今日中大雨則相原不爾加誅俄而雲興雨
霽江中漂泛將士共賀吉策遂殺之將士涕
泣收葬明旦往視俄失其尸策大憤恨從此
常見吉在其前後後策尋為許真伏客所傷
照鏡見吉在鏡中策大驚因捨鏡大斗自創
裂而死混元寶錄云吉尚周旋人間百餘年
然後仙去

道一曰道德經曰夫佳兵不祥之器物
或惡之故有道者不處千吉祖父慕道而
躬自勤苦有踰前人乃致身軍旅之中而
為孫策所殺雖曰兵解也然使千吉退藏
於密積行累功又安知不證飛昇之品乎
後之學仙者當以處佳兵為深戒

官嵩

官嵩者琅琊人也文才著書百餘卷師事
仙人千吉漢元帝時嵩隨吉於曲陽泉上遇
天仙授吉青練朱字太平經十部吉行之得
道以付嵩後上此書書多論陰陽否泰災青
之事有天道地道人道云治國者用之可以
長生此其旨也嵩服雲母數百歲有童子之

色後出入紆嶼山仙去矣

王道真

王道真漢時人得道於鬼谷山東古柏臺常
有白雲出於臺中遠望如百尺樓道真常乘
此雲遊戲山頂暮歸臺中白雲亦歛入此臺
中即荊州北清溪鬼谷山也或謂此為臺非
也

王玄甫

上仙姓王名玄甫漢代東海人也師白雲上
真得道一號華陽真人六月十五日降世十
月十六日上昇不記是何朝代後傳道與鍾
離覺即正陽子鍾離權也所著文辭隱而不
傳世有詩一章載混成集其詩曰華陽山裏
多芝田華陽山更復延年青松巖畔高柯下
白雲堆裏飲飛泉不寒不熱神蕩蕩東來西
往氣綿綿三千功行好歸去休向人間說洞
天大元至元六年正月褒贈東華紫府少陽
帝君

荊子訓

荊子訓二百餘年顏色不老曾抱鄰舍嬰兒

誤墮地死兒家即埋之子訓自外來抱兒還
之家恐是鬼子訓掘視所埋但泥而已漢時
京師貴人莫不虛心欲見既到京師公卿以
下候之者座上常數百人皆為設酒脯終日
不置一日太學諸生詣請子訓子訓以食時

發日中到未半日行千餘里往二十三處諸
貴人喜自謂先詣之明日相問各言子訓衣
服顏色如一遠近驚異後因遜去遂不知所
止初去之日惟見白雲騰起數十處行人於
長安東霸城見之與一老公共摩娑銅人相
謂曰適見鑄此而已近五百歲矣見者呼之
曰荊先生小住並行視若遲徐而走馬不及
出後仙傳云荊子訓齊人舉孝廉除郎中又
為都尉人莫知其有道所載他事畧同

王喬

王喬者河東人也漢明帝為尚書郎出為葉
縣令漢法畿內長吏即朔還朝喬每月初旦
常自縣詣臺朝帝恠其來數而不見車騎密
令太史伺望之言其臨至輒有雙鳧從東南
飛來於是候鳧至舉羅網之得一隻焉焉乃

詔尚方診視則四年中所賜尚書官屬履也每當朝時葉門下鼓不擊自鳴聞於京師後天下王棺於堂前吏人推排終不搖動喬曰天帝獨召我邪乃沐浴服飾寢其中蓋便立覆宿昔莫于成東自成貢其夕縣中牛皆流汗喘乏而人無知者百姓爲之立廟號葉君祠吏人祈禱無不如應若有違犯亦便見禍或云即古仙人王子喬漢書祠後改雙鳧觀屬汝州

壺公

壺公不知何許人也常賣藥懸一壺於肆頭及市罷跳入壺中市人莫之見惟汝南人費長房於樓上觀之異焉因往再拜奉酒脯公知長房之意其神也謂曰子明日更來長房一日復詣與俱入壺中惟見玉堂華麗旨酒嘉穀盈衍其中共飲畢而出公曰我神仙之人以過見謫今當去能相隨乎樓下有少酒與卿爲別長房令十人扛之猶不舉翁笑以一指提上視器如一升許二人終日飲不盡長房遂欲求道而顧家人爲憂翁乃斷一青

竹度與長房身齊使懸之舍後家人見之即長房形也以爲縊死大小驚號遂殯葬之長房立其傍而莫之見也於是遂隨從入深山踐荆棘於群虎之中留使獨處長房不恐又卧於空室以朽索懸一千斤石於心上衆蛇共來齧索且斷長房亦不移翁還撫之曰子可救也復使食糞糞中有三蟲臭穢特甚長房意惡之翁曰子幾得道恨於此不成如何長房辭歸翁與一竹杖曰騎此任所之則自至矣可以杖投葛陂中也陂今在豫州新建縣又爲作一符曰以此主地上鬼神長房杖須更來歸自謂去家適經旬日而已十餘年矣即以杖投葛陂觀視則龍也家人謂其久死不信之長房曰往日所獲竹杖爾乃發塚剖棺杖猶存焉遂能醫療衆病報告百鬼至驅使社公或在坐獨自恚怒人間其故曰吾責鬼惡之犯法者爾又嘗坐客而使至宛市鮮須臾還乃飯或一日之間人見其在千里之外者數處焉後失符爲鬼所殺漢書道傳云汝南藏藏常有惡偽作太守章服詣府門建鼓者

郡中患之時鬼適來而達長房爲褐府君惶懼不得退便前解衣扣頭乞活長房呵之云便於中庭正汝故形即成老嫗大如車輪頭長一丈長房付其一札以勒葛陂君魁即扣頭流涕持札植於陂邊以頸繞之而死後東海君來謁葛陂君因淫其夫人於是長房勅繫之三年而東海大旱長房至海上見其人請雨乃謂之曰東海君有罪吾前繫於葛陂今出之使作雨也於是雨立霽長房會與人共行見一書生黃巾被裘無鞍騎馬而下扣頭長房曰還他馬被汝罪問其故長房曰此狸也盜社公馬爾長房又能縮地脉數千里牽至前宛然具足吳均續齊諧志云汝南桓景從費長房學長房謂曰九月九日汝家當有災急令家人縫絳囊盛茱萸繫臂上登高飲菊花酒此禍乃消景從其言舉家登山夕還見雞犬一時暴死今人九月九日登高蓋本是也今建寧府有登高山存焉丹臺錄云壺公姓謝名元一又興化軍有壺公山昔有人遇壺公引至山頂見宮闕樓殿曰此壺中

日月也又有臺公廟存焉一云蔡州懸壺觀
即費長房舊隱有懸壺樹信州靈陽觀亦云
費長房竹杖化龍處未知其故也

華陀

華陀字元化漢時沛國譙人通數經曉養生
之術年且百歲而猶有壯容時人以爲仙沛
相陳珪舉孝廉太尉黃琬辟皆不就精於方
藥處劑不過數種心識分錄不假稱量針灸
不過數處若疾結於內針藥所不能及者乃
今以酒服麻沸散既醉無所覺因割破腹背
抽割積聚若在腸胃則斷截澣洗除去疾穢
而縫合付以神膏四五日創愈一月之間皆
平復廣陵吳普彭城樊阿皆從他學並依準
他療多所全濟出後漢書

青谷先生

青谷先生者不知何許人也常修行九息服
氣之道後合爐火大丹服之得道

劉文饒

劉文饒者私農劉寬也少好道曾舉漢方正
稍遷南陽太守視民如子恕不形顏口不疾

言行陰德拯寒困萬民悅而附之如父母焉
後爲司徒太尉上賜酒伏地睡詔問故乃答
曰臣任重責大恒憂心如醉曰使奴至市買
菜而奴盜用錢飲酒晏乃還卧於閣內又不
得菜既醒乃罵之爲死狗罵畢即束帶來入

恐奴從後自殺所以慮之不覺忽然睡爾願
見哀恕寬用心仁愛觸類如此矣年七十三
一旦遇青谷先生降之於寢室授其杖解法

去入太華山行九息服氣及授以爐火丹方
修之道成今在洞中作童初府帥上侯主始

學道者出真誥注云劉寬字文饒私農華陰
學道者人父名嶠嶠帝時爲司徒寬爲人
厚常行有人失牛乃就寬車中視之寬無言
解駕牛與之步歸項有詔得牛而送還漸
懼寬乃謝遣之極帝延禧八年爲南陽太守
恒用蒲鞭責罰大尉五年爲太尉嘗於御座
前被酒睡伏帝問大尉醉邪寬仰答臣不敢
醉但任重責大憂心如醉而還客罵爲畜產
寬遂奴市酒還久大醉而還客罵爲畜產
辱教甚故吾懼其死耳後封還客罵爲畜產
爲

中平二年亡年六十六贈車騎將軍諡曰
曰忠討侯子松嗣案此說復爲同異故詳載
之

道一曰劉文饒仕於漢朝視民如子蓋
道德之發越於外也觀其爲政恕不形顏
口不疾言好行陰德拯濟寒困其可爲萬

世隱朝市而修仙者之標表大抵積功累
行亦在茲也道德經曰聖人無常心以百
姓心爲心善者吾善之不善者吾亦善之
德善豈非劉文饒之謂乎

趙威伯

趙威伯東郡人也少好道受業於邯鄲張先
生晚在中嶽授玉佩金璫經於范止林乃是
漢樓船將軍衛行道婦也學道得仙遂授行
挹日月之道服九靈明鏡之華得道來入華
陽內爲保命丞河圖云吳楚多有得見太平
者語人云此語不虛此驗不久其所存明鏡
非世間常法又善彌聲若衝風之擊長林衆
鳥之群鳴時在天市壇上長彌呼風須臾雲
翔其上或冥霧四合零雨其濛保命有四丞
威伯主仙籍并記學道者并暴雨水靈芝草

樂長治

樂長治東鄉司命君鄉里人也仕漢桓帝至
中書侍郎後師中嶽李先受步七元法修
之得道入華陽內爲保命丞

劉根

劉根穎川人能令見鬼隱於嵩山穎川太守杜新聞之以為妖訛召至郡新謂根曰君有何能而常惑眾根曰僕能令人見鬼新曰今即試看若無鬼汝當見誅於是根左顧而笑須臾新之亡父母悉反縛於伊前鬼乃責曰

汝為人子不能先益我因何累及亡人仍語新曰可急謝過於劉先生新乃泣涕扣頭謝根俄頃根與鬼俱不見莫知所之不日新亦卒或云劉根常服棗核中仁百邪疾不復干後漢時人皮日休與毛公泉詩云劉根昔成

道故塢四百年純純被其體號為綠毛仙因

思清冷汲鑿彼半嶺巔五色既煉矣一勾方鏗然既用文武火俄窮雄雉篇赤鹽撲紅霧日華飛素煙服之生羽翼倏爾冲玄天真隱尚有迹厥祀將近千我來討靈勝到此期終

焉滴若破寶淨蘇深餘梵圓澄如玉髓潔泛

若金精鮮顏色半帶乳氣味全和鉛飲之融痞塞灌之神俱變有時觀者觸候忽風雷顛素纓絲不短越嬰腹甚便汲時月液動檐處水漿旋大獻大司諫置之鈴閣前清如介潔

性滌此掃蕩權委背野人興亦思侯伯憐也知飲水苦願受一鉶泉南嶽總勝集云劉根先生修大洞帝乙之道遊官四方為政有德晚歸南嶽之東峯煉真朝斗服氣祭神而玄化

劉偉道

中山劉偉道漢時人學仙在嵯塚山積十二年仙人試之以石重十萬斤一白髮繫垂之使偉道卧其下偉道心安體悅了無憂怖卧在其下十二年仙人數試之無所不至遂賜神丹白日昇天

夏護

夏護字子治陳留人也少好道常服術和雲母後入具山從赤須先生授煉理法又遇桐柏真人授之黃水雲漿法行之得道護少時被公府辟召懸辟書於桑樹乃去其高邁如此道成為明晨侍郎後漢及高士傳並云陳留國人少為書生桓帝時舉直言不就性實直不同時黨為閭人所疾陷於黨網之限避歸山後漢書杜門不出不與人相見黨禁未解而亡

范幼冲

范幼冲遼西人也曾為漢尚書郎善解地理受胎化易形之道常旦旦存青白赤三氣各如縱從東方日下直入口中挹之九十過自飽便止行之十年身中自有三色之氣遂得神仙此高元君太素內景法真誥云范監者即其人也昔得為重初監今在華陽中

鍾離簡

鍾離簡後漢人為郎中與弟權俱入華山三峯得道後道備白日昇天歷世真仙體道通鑑卷之二十

歷世真僊體道通鑑卷之二十一 漢一

許雲山聖壽萬年宮道士趙道一編修

封衡

封衡字君達隴西人也幼學道通老莊學勤訪真訣初服黃連五十年後入鳥獸山採藥又服木百餘年還鄉里如二十許人間有病死者識與不識便以腰間竹管藥與之或下針應手立愈愛蓄精氣不極視大言凡圖籍傳記无不習誦復遇魯女生授還丹訣及五嶽真形圖遂周遊天下故山官水神潛相迎伺而凶鬼怪物无不竄避人或疑之以矢刃刺禦皆不能害常駕一青牛人莫知其名因號青牛道士魏武帝問養性大略師曰體欲常勞食欲常少勞勿過極少勿過虛去肥濃節酸鹹減思慮損喜怒除馳逐慎房室則幾於道矣故聖人春夏養陽秋冬養陰以順其根以契造化之妙有二侍者一負書笈一攜藥笥有客成養氣術十二卷墨子隱形法一篇靈寶衛生經一卷笥有煉成水銀霜黃連屑等在人間僅二百餘年後入元丘山不見

王老

王老不知其名與魯女生封君達為友訪道遊名山於東嶽之陽遇神仙乘白鹿與侍女十許人自山中而下知是神人再拜以求長生之道神仙曰子知有安期君乎即我是也子精誠動天太上使我授汝度世之訣經云綿綿若存用之不勤是真道矣言訖昇天而去王老行之愈力三年行及奔馬肌膚充澤狀若處子能分形變化坐在立亡周遊人間四海之內時有見之者

張皓

張皓字文明汝南人東漢安帝永初中嘗詔逸人為道士皓年二十歲與選一日封衡召至皓望風服膺求啓未悟衡因觀其心遣涉于深淵則遇蛟鯨迫之而貌不變誘之以色試之以財而心不動衡曰可教也於是付以青要紫書金根上經及神丹半兩從而戒之曰勤則得之替則失之皓俯伏受命遂入赤城山服丹行道久之耳能洞聽目能徹視常有學道者來訪則或為白鶴或為飛雲搏空

遊虛隱沒而莫之見至魏明帝太和初登真

王少道

王少道與同志李伯山常以陰德密惠拯救於人皆積世有道至行所鍾累功積德以至成仙少道常謂人曰功滿三千白日沖天修養有餘坐降雲車弘道不已自致不死斯言信哉昔太極真人一日八身展轉得道葛玄七世方證仙公之任然積善之功上濟玄祖下流後世豈止一身長生而已勉哉勸哉吾匪虛言也俱得神仙矣王少道其童初府有山皆童府之標者少道漢時人王少道兒也漢時山陽太守范叔勝北地人也魏文帝黃門郎李伯山李沖父也沖父漢時為白馬令行陰德或積世有道中行所鍾此二府仙人皆一進再進得入此府耳

路大安

真人姓路名光又名大安西蜀大寧軍內黃縣人也後徙居婁州乃漢路溫舒九世孫於順帝漢安元年九月十五日子時誕生神清骨秀髮疎眼青襲世箕裘博通經史歷三國鼎分晉室肇造科目不公仕途艱進乃自歎曰僕幼寒滯時運與廢雖有濟世之才奈何

時與命違所謀弗就功名之念頓息遂舍家修道遊至河陽假舍驛亭吏曰不可宿驛中有妖僮或不信必有禍害真人曰吾有神劔能斬邪怪不必多言遂投宿夜半風寒凜凜瞑目視之庭隅妖氣中有婦人悲告曰真官乞賜救拔此乃張氏古宅向為寇劫掠殺妻張氏而埋此也若得收葬方遂往生翌日掘之果得連環白骨遂葬之於高陵真人因此堅心慕道廣求濟生度死之術尋訪名山於晉武帝太康五年甲辰歲五月五日縱步姑射忽於古檣下見一老叟衣黃裘踞石而坐進揖之曰先生何獨在此仰而長吁久而不答真人禮貌尤至久之老叟謂真人曰久立我傍果何求哉觀子祿氣薄道氣重異日名與年同事俱終矣真人聞此語如夢得覺乃再拜告之弟子所求者道也叟曰道者杳杳冥冥无形无像何以求之再拜告曰道固難言願得濟生度死之術以救世可乎叟曰道者妙萬物而為言常應常靜不可聲求亦不容索惟在留神恬淡集性希夷元氣長存外

物不擾然後行功布氣激液煉神可以超凡入聖真人曰今日得聞誨語心如死灰乞望先生明教一術度人修己叟曰子可教矣遂以六天如意大法經錄謂之曰依此行持濟生度死妙用難思子宜秘之叟就拂袖而去追之莫及復反顧謂真人曰修半紀相會真人自是往華山仙掌峰修煉至惠帝永熙二年十月十五日夜半夢太上老君命右侍玉童賜玉鑰匙十事而參合前老叟法書夢覺神開意解自此書符行功布氣治病驅邪无不應驗至永康元年三月秦地血雨降妖星晝見疫毒流行民遭橫夭真人敬施符水點混元燈越三旬間方息至永康二年正月虎兇入城民心搖動莫能禁止時王戎知相位惠帝責之曰卿任輔弼之重何致此物搔我生靈今降勅召人勦治真人於戎甥舅也真人遂往揭榜謂戎曰某有術可禁此戎見其甥言遂奏帝召入內奏對乞與民除害奉勅命任便行持依混元法攝召虎兇自空飛至帝愕然真人呪水唵之化為蠅蟻布氣吞之

一城安靜帝喜褒詢之曰子乃吾朝真天師也與漢天師殊時同號異世同功賜以綠純朱服青絲綰碧玉環及以金帛贈之真人笑而不受奏曰助國救民忍以財賄汙身遂居華山以混元錄傳之丁義以混元經傳之郭璞以混元法傳之許旌陽以混元針灸傳之妙通朱仙大安元年八月十二日夜夢太上老君謂曰年與名同可以沖天佐紫微北極大帝職充司命真君更宜每月三九日下降人間察其功過應有災患急難應聲度之夢覺身輕倏忽飛舉昇天而去其混元之法今行於世焉

王真

王真者上黨人也年七十九乃學道行胎息之術斷穀三十餘年容少而色美行及走馬力兼數人魏武帝聞之召相見似三十許人意疑其詐遂驗問其鄉里皆異口同辭多自兒童時見之者真年已四百歲矣武帝乃信其道甚加欽禮焉

陳長

陳長在紵嶼山上已六百餘歲紵嶼山中人為架屋每四時烹殺以祭之長亦不飲食顏色如六十歲人諸奉事者每有疾病即以器詣長乞祭水飲之皆愈紵嶼山上累世相承事之莫知其所來及服食本末紵嶼在東海中吳中周詳者誤到其上留三年乃得還具說之如此紵嶼其山地方圓千里上有千餘家有五穀成熟莫知其年紀風俗與吳同

王暉

道士王暉者魏時人白羊公子之弟子也居華嶽熊耳嶺洞真觀常種黃精於溪側則虎為之耕豹為之耘出入亦乘虎豹具鸛轡行鞭策如人乘馬无異餌黃精蒼术積有歲時其後以道術傳王法冲乃尸解而去門人葬冠履於巖左有黃雲覆其上嘗著秘訣百餘言以教人而人莫能曉其辭曰黃帝昇鼎湖乘素入紫煙明精陰不久運往馳龍旋枯悴林將凋鮮鮮沉深淵遊仙騰霞觀喜作歲月綿晝占多龜兆夕唱良有緣中嶽鎮和氣般輪共成篇若能思得之賜與金一餅餅音

昌季

昌季不知何許人也入山擔柴崖巔墮山下尚有微氣其婦來見之涕泣哀慟仙人尹伊聞之愴然謂婦曰吾是仙人能治汝天即以藥賜之并付其方藥盡未差可隨合作也能長服之令人成仙婦以藥治季即愈季食藥服之十日忽然飛昇婦流涕追之顧謂婦曰道與世殊卿善自愛敬婦慨然復合藥服之三年便復飛去至蓬萊山見季季曰知卿當來爾

張玄賓

張玄賓者定襄人也魏武帝時曾舉茂才歸鄉里師事西河蒯公受服術行洞房白元之事後遇樊子明於少室山授以遁變隱景之道昔在天柱山中今在華陽為理禁伯理禁伯者主諸水兩官也具諸云理禁伯官也玄賓善談空云无者大有之宅小有所以生焉積小有以養小无見大有以本大无有有亦无无焉无无亦有有焉所以我目都不見物物亦不見无寄有以成无寄无以得无於是无

則无宅也太空亦无矣我未生時天下皆无无也其所論端極如此桐栢諸仙亦不能折也自云昔曾詣蓬萊宋晨生宋晨生者蓬萊左仙翁也與其論无粗得大意

巨道一曰夫以无之一字論道是誠得道之妙矣道德經曰无名天地之始有名萬物之母故常无欲以觀其妙常有欲以觀其微此兩者同出而異名同謂之玄又曰天下萬物生於有有生於无張玄賓必深得其旨而略寓於言也

王中倫

高唐縣鳴石山高百餘仞人以物扣巖石聲甚清越晉武帝太康中逸士田宣隱於巖下葉風霜月常拊石自娛每見一人著白單衣徘徊巖上及曉方去宣後令人擊石乃於巖中潛伺果來因遽執袂詰之自言姓王字中倫衛人周宣王時入少室山學道此來頻適方山去來經此愛此石響故輒留聽宣乃怨乞長生訣遂留一石如雀卵遺之云可辟殺初別凌空百餘步猶見漸漸煙霧障之宣得

石舍輒百日不飢

蓬球

蓬球字伯堅北海人也晉武帝大始中入具丘西玉女山中伐木忽覺異香球迎風尋之此山廓然自開宮殿盤鬱樓臺博敞球入門窺之見五株玉樹復稍前有四仙女彈棋堂上見球俱驚起謂曰蓬君何故得來球曰尋香而至焉言訖復彈棋如初有一小者登樓彈琴戲曰元暉何為獨升樓球於樹下立飢以舌舐葉上垂露俄有一女乘鶴而至曰玉華云汝等何故有此俗人王母即令王方平按行諸仙室可令速去球懼出門迴頭忽然不見及還家已是建中矣舊居廬舍皆為墟墓因復周遊名山訪道不返

鮑靚

鮑靚字太玄陳留人也少有密鑒洞於幽玄深心冥肆人莫之知一云為南海太守得秘法悟真理受真仙要訣於謫母按洞天記云靚及妹並是先身七世祖李湛張慮者俱杜陵北鄉人同在渭橋為客舍居積行陰德好

道希生故福遠於靚等使易世變族改氏更生合為天倫報育雖異德蔭並同靚學明經術緯候師左元放受中部法及三皇五嶽劾召之要行之神驗能使鬼神封山制魔晉元帝大興元年靚暫往江東於蔣山北道見一人年可十六七許好顏色俱行數里其人徐徐動足靚奔馬不及以漸而遠因問曰相觀行步必有道者其人曰吾仙人陰長生也太上使赤城君有心於道故得見我爾靚即下馬拜問寒溫未及有所陳陰君曰此地復十年當交兵流血後蘇峻之亂果足十年又云君慕道久矣吾當度爾仙法考得仙者尸解為妙上尸解用刀下尸解用竹木皆以神丹染筆書太上太玄陰生符於刀刀左右須臾便滅所書者面目死於牀上矣其身遁去勿復還家家人謂刀是其人也用竹木如刀之法陰君乃傳靚此道又與靚論晉室脩短之期皆演一為十為百以表元帝託云推步所知不言見陰君所說是陰君戒其然矣羅浮圖志云稚川居羅浮時靚為南海太守

以道術見稱嘗行部入海遇風飢甚取白石煮食之與稚川善常往來山中或語論達旦乃去人見其來門元車馬獨雙燕往還或怪而問之則雙履也壩城集仙錄云靚以女妻葛洪靚後還丹陽卒葬于石子岡後遇蘇峻亂發棺无尸但有大刀而已賊欲取刀聞眾左右有兵馬之聲顧之驚駭中間其刀鞠然有聲若雷震之音眾賊奔走賊平之後收刀別復葬之真誥云靚為地下主者帶紫山真云鮑靚字太玄東海人年五歲語父母云本是曲陽李家兒九歲墮井死其父母尋訪得

許邁

許邁字叔玄小名映丹陽句曲人也世為胃族冠冕相承映總角好道潛志幽契真誥云道經稱世外故自改名邁遊吳王右軍父子周旋子猷乃修壽三之敬按子猷授六甲陰陽符云永昌元年二十三歲則是永昌元年庚申歲生也而譜云永和四年秋絕跡於臨安西山年四十八此則元年辛酉為少一年今以自記為正絕迹時年四十九矣吳郡孫龍字彥達女孫曾從郭璞筮卦遇大壯之大即驛騎秀之孫曾從郭璞筮卦遇大壯之大有上六爻發璞謂映曰君元吉自天宜學輕

李氏推問皆符驗靚學兼內外明天文河洛書後為南海太守嘗行部入海遇風飢甚取白石煮食之以自濟嘗見仙人陰君授道訣百餘歲卒

舉之道初鮑靚授以中部之法及三皇內文
一旦辭家往而不返東入臨安懸雷山中散
髮去累改名遠遊服木黃精漸得其益注心
希微日夜無間數年之中密感玄虛太一真
人定錄茅君降授上法遂善於胎息內觀步

斗隱逸每一感通將超越雲漢後移臨安赤
城遇王世龍趙道玄傳太初映因師世龍受
解束反行之道服玉液朝腦精三年之中面
有童顏臨映得道三官都禁遣典柄侯周紡
主非使者嚴白虎出丹簡罪簿各執一通詰

映諸愆如其无答便當執也賴得龔幼節李
開林相助映甚怖懼強長笑叱訖而答曰大
道無親惟善是與天地無私隨德乃於是以
版泉流血無遺龍髯之舉三苗丹野涿鹿絳
草豈妨大聖靈化高通上達邪吾七世祖許

子阿者積仁蘊德陰加鳥獸遇凶荒疫癘之
年百遺一口子阿散財拯救自營方藥已死
之命懸於子阿手得濟者四百八人德隆我
等應得仙者五人皆錄字青宮豈是爾輩可
以豫乎真誥云長史七世祖華字子阿有願
惠之功今檢譜七世祖名敬字鳴卿

後安帝時為光祿順帝永建元年拜司徒名
字與真誥不同未詳所以外異安帝永初二
年大飢斗米二十文人相食若所救活四百
八人必應在此時也應劭漢官儀載崔瑗表
云許敬年且百歲居相位如此非惟陰德
流後漢敬自陽功著世所以年永身安位至
台鼎子訓孫相連為三公光言畢會司命君
來過仁安世不逐逐至神仙

世東宮為地仙中品映第五弟穆亦同時得
道晉書列傳云許邁字叔玄丹陽句容人
世仕族而邁少恬靜不慕仕進時父尚存
未忍遣邁親餘杭隱雷山近延陵之茅山是
洞庭西門潛通五嶽於是立精舍於懸壺洞
望時節運來定省而已父母既終乃遺婦孫
氏還家邁編遊名山採藥於相廬縣之常山
解術涉三年微斷數以此山近人不得專一
四面藩之好道之徒欲相見者莫得也常服

氣一氣千餘息後移入臨安西山乃改名玄
字遠遊與婦書告別義之遠之未嘗不彌日
忘歸相與為世外之交玄遺義之書云自山
陰南至臨安多有金堂玉室仙人芝草左元
救之徒漢末諸得道者皆在焉玄自
後其測所終好道者皆謂之羽化

許穆字思玄一名謚祖尚父副穆少知名晉
簡文在藩為世表之交起家為太學博士累
遷位散騎常侍護軍長史雖居蟬冕心慕道
德以第四兄遠遊嘉邇不返遂表辭榮太宗
不奪其志穆乃宅於茅山與楊羲編該靈輿
天降玉札授為上清真人年七十二解駕遺

世真誥云魯儒雅情素博學有才華簡文皇
帝久垂俗素之顧與時賢多所結結少仕
卿主簿功曹史王導慕謫臨川辟從事不赴
運補太學博士出為餘姚令入為尚書郎卿
中正護軍長史給事中散騎常侍外混俗務
而內修真學密受教記通行上道提分所得
乃為上清真人爵登侯伯位偏卿司仙佐
治助聖教民孝成太康元年年去世年七十
妻同郡陶成女名科十與梁高祖為於山別
亭中亡亦入易遷中受學

立祠真館長史本宅天監十三年立為宗陽
觀今之紫陽觀是也宅南一井即長史所穿
南一塘郭四朝築以壅柳谷曰公泉茅山記
云小茅山北有一山名雷平山山西北有上
清真人許長史宅今為觀觀前有真人靈壇

危謙魏郡人也性縱誕不恥惡衣食好飲酒
不擇精麤常吟曰風從牖中入酒在杯中搖
手握四十九靈光在上照我我發著下獨向
冥理笑又曰進不登龍門退不求名位無以

消白日常作魏我醉精於易占常在建康後
巷許新婦店前筮一卦一百錢日限錢五百
止次卦千錢不為也謙母住尚方門外路西
謙日送錢三百供養母餘錢二百謙以飲酒
乞與貧寒晉海西公旦出見赤蛇蟠於御牀

俄爾失蛇詔謙筮卦易林曰晉室有磐石之固陛下有出宮之象海西曰可消伏否謙曰後年應有大將北征失利以三萬人逆之於壽春北此災可消明年秋桓溫北討敗績於豫州刺史袁真不為後援誅真還鎮石頭廢海西立簡文溫妻產息玄至艱難謙筮曰公第西北六間馬廐壞竟便差是男兒聲氣雄烈當震動四海溫賜謙錢三十萬謙云謙用筮錢常患不盡且無容錢處請還公庫溫不聽許氏以空櫃借謙貯錢俄而夫人復送錢三十萬謙從得溫錢後日筮三卦以供養母以溫錢飲酒求能酣客不問識與不識群聚極飲客隨謙者眾許氏常以賢人禮待謙不計求酒之多少謙後斷不復詣許氏訪覓經年忽於譙溝遇謙曰家中欲得櫃用先生幸還家中取去先所寄錢謙笑曰三年所飲數千斗唯四十日纔足相補止餘一百半許有耳大夫不復足顧矣吾以爪刻壁記之寫算便知也許氏試依其言算之不差一文後謙母夜亡謙旦還云因緣盡矣安葬而去不知

所之數日許氏家人於落星路邊見謙卧地始謂其醉捉手牽引唯空衣無尸

臣道一曰應謙以孝養母不干名利內修至道外混光塵每筮一卦百錢日限錢五百止多以奉母少以自贍次卦則須千錢不為非廉而不割者寧得至此道德經曰名與身孰親身與貨孰多得與亡孰病是故甚愛必大費多藏必厚亡知足不辱知止不殆可以長久應謙誠熟究此道也

歷世真僊體道通鑑卷之二十一

歷世真僊體道通鑑卷之二十二 漢二

許雲山聖壽萬年宮道士趙道二編修

杜曷

杜曷字叔恭吳國錢塘人也年十八歲與時輩戲北郭有父老召曷曰此童子有不凡之相惜吾已老不及見之曷早孤事後母至孝名聞鄉郡三辟命仕不就歎曰方當人鬼淆亂非正一之氣无以鎮之於是師餘杭陳丈子受治為正一弟子救治有效百姓咸附焉從夜中有神人降云我張鎮南也汝應傳吾道法故來相授諸秘要方典陽平治曷每入靜燒香能見百姓三五世禍福說之了然章書符水應手即驗遠近道俗歸化如雲十年之內操米戶數萬晉太傅謝安時為吳興太守見黃白先以問曷曷曰君先世有陰德於物慶流後嗣君當位極人臣尚書令陸納世世臨終而並患浸淫瘴納時年始出三十忽得奏章云令君大危得過授納靈飛散方納服之云年可七十九司馬桓溫北伐問以捷不曷曰公明年三月專征當挫其鋒溫至枋

頭石門不開水涸糧盡為鮮卑所攝謂弟子
枕葉云恨不從杜先生之言遂致此敗符堅
未至壽春車騎將軍謝玄領兵伐堅問以勝
負昂曰我不可往往必元功彼不可來來必
覆敗是將軍効命之秋也堅果敗散盧鯨自
稱先生常從弟子三百餘人昂以白桓溫鯨
乃協東治老木之精術惑百姓比當逼突宮
闕然後乃死耳晉簡文帝咸安中鯨夜半男
女數百人直入宮稱海西復位一時官軍誅
勦溫方歎服後桓沖欲引昂息該為從事昂
辭曰吾兒孫並短命不欲令進仕至玄孫方
得吾福爾昂曰吾去世後當有假吾法以破
大道者亦是小驅除也與黃巾相似少時消
滅素書此言函封付妻馮氏若有災異可開
示子姪勤修德自守安帝隆安中琅琊孫泰
以妖惑陷於及禍延者衆昂忽滿日聚集縱
樂無厭使書吏崇桃生市山具令家人作木
象云吾至三月二十六日中當行體尋小
惡至期於寢不覺尸柔氣絕諸道民弟子為
立碑謚曰明師

朱庫

朱庫者不知何許人也久服石春辟穀符水
不飢不渴強壯不老庫忽云應得仙剋日發
與親舊別云當有迎者單衣白鞋須更有兩
黃鶴下中庭庫便度世中庭仍有三黃鶴相
隨飛向東郭外三黃衣道士攜手東行因鄉
人附書與家人家人看尸惟有空殼

姜伯真

姜伯真者不知何許人也少好道在猛山採
藥忽值仙人史伯真平立日中背後觀之其
心不正仙人曰勤學之至而不知心之不正
為失因教之服石腦石腦色斑柔軀形如小
石處所皆有久服身熱而不渴後遂得仙繁
陽子服之亦得道

王霸

王霸梁時人在福州三山怡山飛昇今沖虛
宮是也有皂角樹猶存霸嘗以金板鑿丹訣
埋於山後有掘得之人亦得道其訣曰金是
砂精牙是鈿脚但了宗枝用即不錯一周既
濟開戶方得紅紫射人光澤奪目研如粉膩

粒若胡麻日服其一不可妄加骨換金質容
改童華如欲點制一粒之功乾汞十兩立成
馬牙後蔡君謨留題云真人玉骨輕御氣昇
瑤臺俯首視下方萬落腥塵埃香火久寂寞
山川空徘徊舊樹絡青蔓虛墳生紫苔冥坐
白晝永長吟清風來飛花亂棋子游蜂依酒
杯嘉月多醉飲上客誠珍才神仙那可冀金
鼎何時開

元藏幾

隋處士元藏幾為海使判官遇風船壞破木
載至洲島人曰此乃滄洲去國數萬里洲方
千里花木常如三二月人多不死產分蒂瓜
長二尺碧棗丹栗皆大如梨池中有四足魚
金蓮花婦人採為首飾曰不戴金蓮花不得
在仙家藏幾忽思中國洲人製凌風舸送之
激水如箭旬日達東萊問其國乃唐自大業
至貞元二百年矣

王獻

進士王獻漁經躡史之士也孜孜矻矻窮古
人之所未窮得先儒之所未得著炙轂子三

十卷六經得失史冊差謬未有不針其膏而藥其肯者所有二種之篇釋喻之說則古人高識洞鑒之士有所不逮焉嗜酒自娛不拘於俗酣暢之外必切磋義府研覈詞樞亦猶劉闢之詒諸古人矣然其咀吸風露呼嘯嵐霞因而成疹積年苦冷而莫能愈遊燕中道逢櫻杖棕笠者鶴貌高古異諸其儕名曰希道笑謂之曰少年有三惑之累耶何苦瘠若斯戲語其故希道曰予有爐鼎之功何疾不除也戲委質以師之齋于漳水之濱三日而授其訣曰木精天竟金液地鬼坎離運行寬猛無成金木有數秦晉合宜近效六旬遠期三載爾歌曰鬼微入鬼牝牡結陽吻陰滋神鬼滅千歌萬讚皆未決古往今來拋日月受而製焉餌之周星彥且廖矣乃隱晦自處佯狂混時年八十殆於彭山道中識者瘞之未幾又在成都市常寓止樂溫縣時擊獸結尾爲害尤甚戲醉宿草莽露身林野無所憚焉斯亦蟬蛻之流也

李筌

李筌號達觀子居少室山好神仙之道常歷名山博採方術至嵩山虎口巖得黃帝陰符本經素書朱漆玉緘以玉匣題曰大魏太平真君二年七月七日上清道士寇謙之藏諸名山用傳同好其本糜爛筌抄讀數千遍竟不曉其義理因入秦至驪山下逢一老姥髮髻當頂餘髮半垂弊衣扶杖狀貌甚異路傍見遺火燒樹因自言曰火生於木禍發必剋筌驚而問之曰此黃帝陰符老姥何得而言之姥曰吾受此經已三元六周甲子矣少年從何而得之筌稽首再拜具告所得姥曰少年顧骨貫於生門命門齊於日角血腦未滅心影不偏德賢而好法神勇而樂智真吾弟子也然四十五當有大危因出丹書符一道貫於杖端令筌跪而受之姥於是坐於石上與筌說陰符之義曰陰符凡三百言一百言演道一百言演法一百言演術上有神仙抱一之道中有富國安民之法下有強兵戰勝之術皆內出心機外合人事觀其精微黃庭八景不足以爲玄察其至要經傳子史不足

以爲文任其巧智孫吳韓白不足以爲奇非有道之士不可使聞之故至人用之得其道賢人用之得其法正人用人得其術識分不同也如傳同好必清齋而授之有本者爲師無本者爲弟子也不得以富貴爲重貧賤爲輕達者奪紀二十本命日誦七遍益心機加年壽每年七月七日寫一本藏於名山石巖中得加筭久之姥曰日已晡矣吾有麥飯相與爲食袖中出一瓢令筌谷中取水既滿矣瓢忽重百餘斤力不能制而沉於泉及還已失姥所在但留麥飯數升而已筌食之自此絕粒唐玄宗開元中爲江陵節度副使御史中丞筌有將略作太白陰經十卷又著中台志十卷時爲李林甫所排位不顯竟入名山訪道後不知所之也

王可交

王可交蘇州崑山人也本農畝之夫素不知道年數歲眼有五色光起夜則愈甚寢室之中可以鑒物或人謂其所親曰此疾也光盡則喪其目矣父母愚召庸醫以炙之光乃絕

唐懿宗咸通十年十一月可交自市還家於河邊見大舫一艘絡其金練飾以珠翠張樂而遊可交立而觀之舫艤於岸中有一青童引之登舫見十餘人我冠羽服衣文班駁雲霞山水之狀各執樂器一人唱言曰三三叔欲與汝相見亦不知何許人也傍一人言曰好仙骨爲火所損未可與酒但不食十年方可得道爾以菓子一枚與之令食可交食一半留一半在手中遂奏樂飲酒童子復引之上岸忽如夢中足纔及地已墜於大台山瀑布之巖下頃刻之中水陸千里台州刺史袁從疑其詐妄移牒驗其鄉里自失可交之日泊到天台之時已三十日矣可交自此不食顏狀鮮瑩衣以羽褐授之使居紫極宮越州廉察御史大夫王諷奏曰姑以神遊天上之簫韶一曲俄如夢覺人間之甲子三旬雖云十載爲期終恐一朝飛去詔曰神仙之迹具載縑緇靈異可稱忽詳聽鑒既升凡骨況在名山今古不殊蓬瀛何遠委本道切加安期先生棲隱於是任其遊息數年猶在江表間

陳簡

陳簡婺州金華縣小吏也早入縣未啓關躊躇以候忽逢一道流其行甚急簡不覺隨之行三五里忽及一宮觀殿宇森聳傍有大山道流引之至一室內有几案筆墨之屬以黃素書一卷紙十餘幅授之曰以汝有書性爲我書之發標規之皆古篆文素不識篆字亦未嘗攻學心甚難之道流已去無可推遜試按本書之甚易半日已畢道流以一杯湯與之曰此金華神液不可妄得飲之者壽不可限味甚甘美因勞謝而遣之曰世難即復來此金華洞天也出門恍如夢覺已三日矣還家習篆書通勁異常而不復飲食太守解梓方將受錄頗異其事以爲神仙嘉應判縣狀曰方得秘錄有此嘉祥既彰悟道之階允協登真之兆簡尋復入金華山去後不知其所終

盧鈞

相國盧鈞進士射策爲尚書郎以疾求出爲均州刺史到郡疾稍加羸瘠而不耐見人常

於郡後山齋養性獨處左右接待亦皆遠去非公召莫敢前也忽有一人衣飾故弊踰垣而入公詰之云姓王問其所自云山中來公笑而謂之曰即王山人也公曰此來何以相教曰公之高貴位極人臣而壽不永災運方染由是爲沉綿之疾故來相救爾山齋無水公欲呼人取湯茶之屬王止之以腰巾蘸於井中解丹一粒裂腰中之水以丹與之因約曰此後五日疾當康愈倍常復三年當有大厄勸立陰功救人憫物爲意此時當再來相會。在夏之初也自是盧公疾愈旬日平復明年解印還京署鹽鐵判官夏四月於務本東門道左忽見山人尋至盧宅會而言曰君今年第二限終爲災極重以君在郡去年雪冤獄活三人之命災已息矣只此月內三五日小不康已困無憂也翌日山人令使二僕持錢十千於狗脊坡分施貧病而已而後復去云二十三年五月五日午時可令一道士於萬山頂候此時君節制漢上當有丹華相授勿愆期也自是盧公歷任清顯便蕃貴盛而

後出鎮漢南之明年已二十三年矣及期命道士牛知微五月五日午時登萬山之頂山人在焉以金丹二粒使知微吞之謂曰子有道氣而無陰功未契仙品更宜勤修也以金丹十粒授與盧公曰當享上壽無怠修煉世限既畢佇還蓬宮矣與知微揖別忽不復見其後知微年八十餘狀貌常如三十許盧公年方九十耳目聰明氣力不衰既終之後異香盈室

王子芝

王子芝字仙苗自云河南緱山人常遊京洛間耆老云五十年來見之狀貌常如四十許莫知其甲子也好養氣而嗜酒故蒲師琅琊公重盈作鎮之初年子芝解宇紫極宮公令待之甚厚又聞其嗜酒日以二榼餉之子芝因出遇一樵者荷擔於宮門貌非常也意甚異焉因市其薪厚償厥價樵者得金亦不讓而去子芝令人躡其後以問之樵者徑趨酒肆盡飲酒以歸他日復來謂子芝曰是酒佳則佳矣然殊不及解縣石氏之醞也子適自

彼來恨向者無侶不果盡於斟酌子芝因降階執手與之擁爐祈於樵者曰石氏芳醞可致不樵者許之因丹筆書符一置於火上煙未絕有小豎立侍樵者命之曰爾領導師之僕挈此二榼徑往石家取酒吾待以尊師一醉時既昏夜門已扃禁小豎謂子芝僕曰可閉目因搭其頭人與酒壺皆出自門隙已及解縣買酒而還因與子芝共傾焉其甘醇郁冽非世所傳中宵樵者謂子芝曰子已醉矣子召一客坐子旁可乎子芝曰可樵者復書朱符致火上瞬息間異香滿室有一人貌堂堂美鬚眉紫袍束簡揖坐於是共飲良久樵者燒一鐵筋以煖紫衣者曰子可去時東方明矣遂各起別樵者因謂子芝曰識向來人不少頃可造河濱廟睹之子芝送樵者訖因過廟所睹夜來共飲者乃神耳鐵筋之驗宛然其後子芝再遇樵仙別傳修煉之訣遂為地仙

王廓

布衣王廓唐懿宗咸通中自荆渚隨船將過

洞庭風甚泊舟君山下與數人沿岸尋山徑登山而行忽聞酒香問諸同行皆曰無良久香愈甚路側崖間見有洞穴廓心疑焉遂入穴中行十許步平石上有窪穴中有酒掬而飲之味極醇美飲可半斗餘陶然如醉坐歇窪穴之側稍醒乃歸舟中話於同侶眾人爭往求之無復所見自此充悅無疾漸狀五穀乃入名山學道去後看仙書云君山有天酒飲之昇仙廓之所遇者乃此酒也歷世具僊體道通鑑卷之二十二

浮雲山聖壽萬年宮道士趙道一編修

葛仙公

仙公姓葛名玄字孝先家本瑯琊世傳著組高祖盧為漢驃騎大將軍封下邳侯後讓國與弟文托遂南遊江左逍遙丘壑適丹陽句容見其山水秀麗風俗淳厚深合雅意偶會仲弟孫來為別駕一日參侍而言曰吾從祖既為泰伯而弟孫可為仲雍之後乎因是同居焉仙公祖矩仕漢為黃門侍郎父孝儒歷大鴻臚登尚書其先裔出葛天氏食封于葛遂以國為姓世載忠德歷代諸侯也仙公本大羅真人下降以後漢桓帝延禧七年甲辰歲四月八日誕世仙公父素奉道法即遣使齋香華錢詣本里玄靜觀求香水浴兒時有自然道士支道紀莫知其所由來問尚書得男乃欣然與來使曰吾昨宵夢見通玄真人從大羅天下降與吾言昔別已經劫子將忘我耶子作禮稱弟子願得無上正真道服汝歸悉告尚書明日當往賀君生奇男使者歸

以實聞越一日道紀果來賀尚書告曰始有此子圖為宗嗣計式副願望道紀求兄者母有難色父令抱兒出道紀見兒不覺起敬尚書驚問道紀曰吉之先見敢以為賀此兒有紫氣覆之狀如寶蓋神光流轉煥耀當為神仙非世間常見比尚書曰仙聖寥邈變化茫昧深不可測願得壽考以為宗嗣足矣道紀曰聰明智慧暫經人世九天稱慶七祖同歡生者被福死者登天道紀遂念真人宿世之功因作禮十方仙聖永保元吉禮竟為仙公作讚其辭曰身雖輪聖化鬼神無暫滅宿福積重緣昔願非今日大羅真人降仙聖含真出天龍漱香花濯我煉胎質微言將誰信靈期玄佑畢道心超不二混成表元一獨悟本無想放朗大乘遠頌畢道紀長揖而出倏然不見仙公年八歲失怙恃已能好學自立生而穎秀英姿振發天才超質性識明茂至十三通古今九經傳子史靡不該覽有父手澤履跡必仰天號泣飛鳥為之悽鳴慨然曰山川不改色嚴父已歸空天下有長生不死之

道何不修之因遁迹靈嶽遐求異人常好彈琴誦莊老安閑澹泊內足無求年十五六名振江左時賢欲辟為掾仙公曰蔬食被褐枕石漱流吾所樂也豈能以此而易彼哉乃衣道家服入天台赤城上虞山精思念道所願有得遂遇真人左元放授以九丹金液仙經煉炁保形之術治病勸鬼秘法三元真一妙經行持三年廣積功效靈帝光和二年正月朔感太上老君勅太極真人徐來勒等同降于天台山老君乘八景玉輿從官千萬正一真人侍焉老君自號太上玄一真人曰丹定光為洞經高玄法師命侍經仙郎王思并披九光玉輶出洞玄大洞靈寶經凡三十八部以授仙人葛玄及上清齋法二等并三鍊七品齋法三錄者曰金錄齋謂保鎮國祚曰玉錄齋保佑后妃公侯貴族曰黃錄齋按度九玄七祖永辭長夜之苦七品者曰明真齋超度幽爽解諸冤對也曰自然齋普為眾生請福謝罪學仙修行之法也曰三元齋自謝犯戒之罪解考於三官也曰八節齋謝玄祖及已

身之罪滅黑簿之法也曰洞神齋以精簡爲上求仙保國之法也曰持教齋以清素爲貴救疾禳災之法也曰塗炭齋以苦節爲功悔過請福之法也并勸戒法輪經四十五卷無量通玄轉神入定等經以授仙公俾行教於世曰子應常思虛无真人高上大法王大千世界號曰老子是玄中大法師焉又示以天府所定世人罪福篇目曰感應篇又曰功滿三千白曰昇天修善有餘坐降雲車弘道不已自致不死仙公稽首禮謝今天台山桐栢觀有法輪院三真降經之處及仙公夜鬼所築受誥壇存焉仙公年十八九歲仙道漸成乃遨遊山海倏忽去來遂東入括蒼自侍其叔叔諱彌字孝公時授業橫經四方才肩摩袂接立講堂於其居仙公歸拜之彌旁問翱翔之意曰子嘗念子幽窈與人事疎闊仰盼青雲俯臨滄海險阻艱難備嘗之矣古人所憚子能爲之今天下文明三國求士子才博術奇必是出也仙公告曰玄稟性愚鈍不通世用負辜先緒謝干祿之客辭負罪之士

嘗絕志巖穴棲心煙霞流浪山水以此爲樂庶期與消子爲交赤松結友惟叔父遠弘道藝講論五經洙泗之風翕然復振詩雅之道盛於今日三國隆平必尚無爲之化如玄曠遠固謝時榮願叔父策名委質亮天燕載垂裕後昆彌答曰子絕類離倫超凡入聖吾所不及當勤衛生之經思慎終之語然後鼎湖之舉何足爲難仙公辭謝而去復周旋於括蒼南嶽羅浮諸山以下修煉金丹之地遂遷選經由玉笥詣閭皂乃登東嶽高峯之上而望焉曰彤閣色阜土良水清此真仙之住宅吾金丹之地得之矣然丹成之後必須廣積陰功超度群品庶幾三天書名九宵列職無愧於心矣乃慨念漢家傾覆三國戰爭早潦凶荒兵傷殍死不可紀極窮冤滯魄沉淪惡趣難出輪迴於是刪集靈寶經誥撰成祭煉大法生天寶籙靈符秘訣等奏聞天帝建立法壇每於三元八節吉日良宵普召十方諸大地獄窮冤滯魄來詣壇前俱受祭煉祇承符籙各遂超生行持之後屢有感格時常甲

午歲下元令節之夕正值祭煉之時有一鬼王形長五丈身衣緋袍誓首再拜前進而言曰某爲下鬼統管窮冤動經累劫沉淪惡道無有出期每蒙真仙普設法筵祭拔冤孽給賜符籙濟度幽冥數百萬衆俱獲超生我等悉沾善利同聽法音感德難言徑來朝謝且聞玄天北帝勅示諸獄鬼冤云葛真人祭煉年深功積玉書名標金簡五年之後宜三天降詔錫命同頒上列天書矣言訖辭謝而退於是仙公以祭煉經法寶籙符文款目等付閭阜宗壇及沖虛壇流傳後學廣度沉淪仙公再念群生得遂人身生於樂國恣情縱慾不修正道罪愆既積業報難酬惟靈寶三乘秘典可以開導衆生懺悔罪尤拔濟苦爽俾悟正真遂總括上清靈寶諸部真經撮其樞要集爲慈悲道場九幽大懺法一部十卷流傳天下善信男女或有宅舍生災眷親亡歿廣建道場嚴陳真像禮誦九幽大懺當得見存獲慶過去超生宿業新愆盡皆消滅寒庭罷對苦爽沾恩此懺法流傳四海惠利無邊

仙公佩受上清靈寶諸部真經精心研誦復於洞神太清部內增廣道德注釋撰成經序冠於篇首仍品題清淨經云吾得真道曾誦此經萬遍昔受之於東華帝君東華帝君受之於金闕帝君金闕帝君受之於西王母皆口口相傳不記文字吾今於世書而錄之則此經流傳實自仙公始昔仙公遇真師授以分形萬化之術靈感應變之法能坐薪縱火而衣冠不焦酣飲臥泉而身體不濕途次遇親朋輒邀止折草刺樹汁以杯盛之流通如泉杯滿即止勸客飲皆旨酒也取瓦礫草木之實勸客曰此乃穀核食之皆脯棗也嘗有客從仙公泛舟見箱中有十數符客曰此符之驗可得見不仙翁即取一符投水中逐水而下仙公曰何如客曰常人投之亦爾仙公復取一符投水中逆水而上仙公曰何如客曰異矣仙公復取一符投之符即不上不下須臾上符下下符上會於中流三符聚而止良久而收之又於水濱見需大魚者謂魚主曰欲假此魚到河伯魚主曰此已死矣曰

亦可以丹書紙內口中投於水則躍然而去嘗有客來謁既坐有繼至者復見仙公迎與俱入而座上仙公自與客談笑不動時苦寒謂客曰居貧不能設爐以致暖試作火以待諸君於是口中吐氣火赫然而出須臾屋中火滿又感暑中卧次使人傳粉腹上謂客曰苦熱不能作他戲乃以腹徐徐上摩屋梁而粉著梁上又與客對食因言神變之事客曰食畢當作一奇戲食未已仙公曰諸君得無欲速見乎即吐口中飯盡成飛蜂滿室或集客身莫不震悚但不螫人良久張口蜂却飛入為飯復食之復指牀使行指蝦蟆及諸蟲使飛燕雀龜之屬使舞應節如人也復以冬為客設生瓜棗夏致冰雪又以數十錢使人散投井中仙公以一器於井上呼錢出於是錢一一飛從井出皆向所投也又為客設酒無人傳之杯自至前如或不盡杯不去也又仙公嘗行遇一神廟凡過者離百步下車否則有警廟傍有大樹數十株上有數禽人畏莫犯仙公乘車直趨俄然大風驟起塵埃障

天從者驚怖仙公怒曰小邪敢爾舉手指風風即止以一符令人投廟中禽鳥皆墜死廟屋自焚仙公過武康見一人家病作命巫祀妖邪其邪附巫者令仙公飲仙公不飲而精邪出語不遜仙公厲聲叱曰茲鬼敢爾救社伯搜精人頭付柱鞭背但聞鞭聲出血流地精人怖謝曰忤犯真人願乞赦原仙公曰汝是何等邪精速自首告曰是後山鬼仙公曰赦汝罪要病者愈限三日為期否則痛治無赦仙公嘗過華陰見一士人溺於蛇精之家仙翁化作一田夫驅黃犢而耕因說士人曰汝陷身於非地此婦人乃蛇精也前後啖食生人不計其數引士人看古井中皆是白骨盈積遂教士人密窺之即望東而走吾當救護士人如其言窺之果蛇精也張牙弩目在網帳中附一小蛇兒在身傍仙公誅而斬之即有無數小蛇來救援仙公盡數誅戮畢以一符與士人服即吐出蚯蚓蝦蟆之類遂得全生昔仙公感太上老君授以霹靂火府雷法策役雷神誅伐不道吳赤烏二年正月一

日仙公登勞威山精思念道是時日中感太
上授以千真科戒乃與衆真演說勸戒未悟
流傳於世仙公又嘗在荆門軍紫蓋山修煉
值天寒大凍仙公跣足衣衫藍縷時有屈家
二女窺見憐其忍冷黃夜促成雙履次日欲
獻之往煉丹之所仙公已去但存爐灰尚溫
二女撥灰而得丹一粒姊妹分而服之自後
神氣沖沖不飢不渴惟慕清靜後隱去時人
謂得仙矣見司馬子微馬仙觀記仙公與天師相爲表
裏遺蹤逸跡亦多在蜀中歷世家邈時人無
能知者難以備舉仙公嘗在盱江麻姑山小
有洞天修煉鑿五井以應五行上應五星至
今其泉消息盈虛以一至五周而復始若有
度數其井在麻姑山前是時吳主以賓禮待遇仙公
一日與仙公坐危樓遙望道間人奉土神禱
兩吳主曰百姓思雨寧可得乎仙公曰可即
書符令人焚社中頃刻天地晦冥風雷驟起
澍雨立至大蘇苗稼仙公嘗從吳主船行至
三江口阻風船多漂沒仙公船亦不知所在
吳主嘆曰葛仙公有道何不能免此這使求

之踰宿忽見仙公水上步來既至尚有酒態
乃謝曰昨伍子胥強邀留飲淹屈陛下于此
上忻然曰先生常爲神靈所延道德所至爾
一日遊會稽間道遙自適有會稽賈人自海
中還過一神廟忽睹廟吏延賈人曰欲寄一
箋與會稽山葛仙公漢三即以書函擲賈人船中
函蓋如釘拔之不動及還會稽白仙公仙公
接書函即自發乃東華小童書題曰太極
左宮仙公閣下字皆科斗古文人因見其書
乃知仙公名在天闕久矣吳主一日請仙公
陞殿焚香清齋弟子張泰孔龍鄭思遠等侍
側焉吳主曰朕以暗昧未達玄旨好聞神仙
之說願師指教秘典齋直及修真之捷徑道
經之品何者爲先符圖秘要何者爲妙開發
未悟以副願望仙公避席曰既蒙聖主特賜
垂問敢有所隱但非國君所篤好若萬機之
餘能靜心守一其則不遠矣夫神仙之道微
妙各載丹經學道修仙先修戒行方見漸階
道行既立乃可服食靈藥導引元氣嚙納太
和呼吸陰陽固煉內丹可以爲地仙入火不

灼入水不濡過度榮尼却禍來祥然須齋直
得成此經出太上靈寶洞玄大道元極自然
真一五稱文中古三皇內書論其神仙事衆
妙悉歸於靈寶大法昔張天師得仙親遇太
上授以正一盟威修真秘訣及靈寶五稱文
出齋事爲首如靈寶大法其文簡要義趣弘
深難可舉舉夫地仙先登靈山爲山神主大
期六百年或三百年者後皆補天仙惟於九
轉金液還丹金液玉醴皆得乘雲駕龍白日
昇天如大洞真經誦之便可昇舉坐見十方
不須服御丹液風有仙骨得見斯文盜竊靈
文者如有翅不能飛須要從師授受口訣告
盟天地真仙乃可傳也三皇內文五嶽十地
神洲七變七寶靈圖內篇皆上仙之所寶夫
學道者從微至著自邇陟遐不可越略靈寶
符圖至尊至重漢三可度大陽九百六之災真人
超邁三界者皆由此道矣吳主曰宿緣流慶
得爲人君仰遇仙姿既聞好音雖沈湎浮華
然持敬在心輒書之於金簡封之於玉函不
敢輕示非人當終身欽奉仙公曰陛下能爾

善哉于時有釋道微遠聞仙公得道故來求師焉作禮請問曰我聞道無先後無古今不審其道同異仙公曰本無高下貴賤形名之殊是以字之曰道老子生於天地之先應化於商宗之世廣宣道教化誘華戎應物自然永無生滅也仙公曰左為陽陽主生右為陰陰主滅至陰無生至陽無滅自然之理也但大道深秘不傳流俗非天下至人莫得而聞之也道微再拜稱嘆曰善哉願聞其道仙公曰夫人功德未備不求仙子等宿命功滿德備我先世已為子等師夤緣會遇汝將度世矣乃於天台山立壇授道微五嶽真形圖告曰此太上傳命之信執之遊八方名山三界奉迎又以太上金丹經靈寶自然五稱寶曜文三皇內文大有妙經金書玉光靈書紫文大洞三十九章太霄隱書明鏡圖錄等并太極龍騰芝草一莖告盟仙官各令佩身命弟子鄭思遠具宣口訣又告思遠等曰吾昔從左元放先生於赤城山受五嶽圖及金丹經今付於汝其於諸品符籙洞真洞玄洞神真

經等是太極真人徐來勒於會稽授我已流傳於大江之西閭阜福地此乃上方禁文自有飛仙守衛今付汝等宗奉大法然九天禁重勿示非人若有至心之士依四極明科年劫傳授思遠等再拜承戒命又與道微仙藥一粒令辟穀除五味食嗜之類可以速遊名山絕人世事道微受服及流明七曜紫九之丹即覺體輕心神怡然無所思欲及百日齋竟仙公又告道微曰子當還嵩山齋三年後往王屋山清齋精思大法道微既受指要寶經靈藥不飢不渴願少留侍左右仙公曰子心存我我即可見不必依戀今子凡軀始學未得洞視子當登高到彼見諸真當復教子矣後五年又當付子秘訣成子之道方得洞見無形觀十方如指掌若明鏡中物爾子等當處閭風臺三百年應昇天也夫仙道有即世白日昇天者亦有十年數十年數百年者三千歲五千歲一萬歲乃得昇天者其未得昇舉之時權舍諸五嶽名山洞天福地及八海中復有十洲三島皆七寶宮殿瓊樓

玉房自然金銀珠玉神仙之藥珍奇異寶百千萬種不可名狀自然音樂聲發太虛鸞鳳麒麟交羅戲舞玉樹瓊林之中清風雅韻皆如九韶之音凡仙人未得昇度者居此山內外宮殿宴樂從容子輩同遊豈不幸耶但廣積善功當遊五嶽謁諸真公吾今不得侍此諸山與眾真游息子齋七日可服前芝不須飲食和氣怡然未有毫期況進修大經乎又於天台山告鄭思遠曰我所授上清三洞靈寶中盟諸品經籙吾昇舉之日一通付閭洪三阜名山一通付吾家門弟子世世錄傳至人不可輕授非人勿示若得其人宜傳勿秘又論門人曰吾按行五嶽稅駕蓬萊時暫還京都謁謝吳主因會從弟吏部郎吳言曰今吾門弟子有通才博學馳譽朝廷克昌門祚恐未有學仙者但篤修文義威德安身樂天下憂亦不失為君子官爵亦何以加焉若真道未絕吾昇舉之後當生唐哲雅素通玄之子遊世高尚曠志清虛振起仙裔矣後即有稚川出焉晉書列傳葛洪究竟典籍尤好神仙

之道修養之法歷仕晉朝身居仕版留意仙道乃求為句漏令欲就丹砂之便修煉大丹冀得成就却就仙公弟子鄭思遠傳受上清三洞靈寶中盟諸階秘錄九丹指要後攜妻子登羅浮山立壇昭謝天地服餌大丹舉室昇仙果符仙公先知之徵矣十三一日仙公辭吳主曰山林微賤久藉恩庇今者暫違丹陛未有再見之期願陛下息兵字民推誠及物永安宗社長享太平吳主曰卿性識高尚道行尊貴名隸丹臺豈容久淹塵世矣於是太子登聞仙公得道乃築別室招延日親訪問仙公曰至道之精杳冥冥至道之極昏昏默然無視無聽抱神以靜形將自正必靜必清毋勞汝形毋搖汝精乃可長生此廣成子答軒轅黃帝所請也今殿下位居儲宮將嗣大寶要在清心寡慾遠佞尊賢拔擢英豪先宅天下爰調四序撫育群黎此乃四海無疆之休豈特一身之福也太子曰觀卿所陳允合時論然子意亦欲修身以及國且丹經非造次可聞至道精微非萬機之餘能悉研究又

問仙公莊周云六合之外聖人存而不論六合之內聖人論而不議何也仙公曰六合之內圓於形象陰陽之數猶可致詰六合之外人所希見渺茫之中太虛之表聖人固述故存而不論也太子稱善至嘉禾二年正月朔日仙公辭太子而去出京謂弟子曰比為主上淹留而光陰迅速老之將至功用雖積金丹未煉不可徒費歲月徑往閭阜福地於東峯之側建庵曰卧雲築壇立竈居其中謝絕人事修煉九轉金丹時有瑞氣祥光映照山谷越三載大丹成熟遂於洞口金沙池中浴丹其泉忽然湧漲金沙騰沸仙公曰是丹火力尚炎未可便服遂藏之東崖石室中以待醮謝天地然後服之迄今丹池之內金沙自沸靈迹可驗仙公凡經二十二處修煉未見功效如近境有赤城長生招仙十四杯山麻嶺西山冲虛皆有仙壇煉丹靈迹惟於閭阜方得成就遂作流珠歌云流珠流珠役我形軀奔馳四海歷覽群書披尋不悟情思若愚焚徧金石燒竭汞珠貲財蕩盡拊膝長吁吾年六

十功效躊躇賴師指授元氣虛無窮冥中起恍惚中居真陰真陽一吸一呼先存金鼎次認玉爐離火激海坎水升虛玉液灌溉洞房流酥天機真露萬類難如真人度人要大丈夫天長地久同看仙都念茲在茲語吾記吾仙公煉丹之時常於西峯石壁上石曰之中搗藥因遺墜一粟許有飛禽過而食之遂得不死至今夜靜月白風清之時其禽乃作丁當杵臼之聲名之曰搗藥鳥有琴高仙聞仙公得道自東海跨雙鯉而來訪仙公於卧雲庵翁與之酣飲既醉而高卧白雲間酒醒則雙鯉化為石矣仙公遂以雙鶴贈之乘跨而往其石至今存後山之間仙公於赤烏元年太歲戊午十一月初一日蒙太上節次三頒錫命遣天吏告下福庭第一錫命曰太上玉書勅無上學仙弟子葛玄先世苦行累劫立功損身布施濟度危亡積感太上遂令名注玄都上仙定籍是故英明智慧誕降德門所引才質玉秀聲蘭清發天姿逸穎卓然挺拔道模淵偉獨步羣萃高辭世榮抱樸尚質注

意仙經含光守一徜徉林麓不戀朝市慈心
度人拳拳不輟道德既充宜有錫命今賜子
天寶羽服丹霞綉帔飛羅之裙矣芙蓉寶冠
金真神虎伏命魔幢役海召山所為任意第
二錫命曰勅無上學仙弟子葛玄索隱繙經
長齋靜念存思專精苦而不倦再賜子八景
玉輿駕龍乘雲項生圓光金章玉文以酬宿
德紀綱道門後賢仰止東持法輪太上尊教
三天所銓矣第三錫命曰勅無上學仙弟子
葛玄體德弘道開化未悟普濟群品俱超方
覺功成名揚高真信服三界群靈尊奉穆穆
恩盈十方威濟所欲也宜錫子位為太上玉
京太極左宮仙公總統三界六大魔王之
官主行三洞經籙給真仙玉童玉女各五百
人侍直左執九耀之華幡右捧洞玄之真經
龍旂虎節遊行上清九宮一年三朝太上玄
都玉京金闕太上錫命天帝承書一如三天
故典奉行赤鳥元年太歲戊午十一月一日
甲子日中天帝諱遠奉勅命告行於霍童山
又曰仙公金丹已熟又蒙玉帝三頒錫命不

得久住人世當立壇醮謝天地山川百靈方
可服餌乃於福庭之中築壇一所名曰八景
乃擇吉日登壇告謝天地大醮三日跪服金
丹于時天花飄地神光燭天仙公再謂門人
弟子曰金丹既服當有勅命自天而降吾輕
舉有日矣乃將三洞四輔經籙秘藏於靈壇
之上後當有吾門弟子精心宗奉於此流傳
秘典靈文福被四海矣於吳赤鳥七年八月
十五日日中忽聞仙樂嘹亮旌幢翳天麟駕
羽車浮空香至仙童玉女靈官翊衛先後下
降壇所時有飛天神王捧持玉詔仙公端簡
長跪面天門聽宣詔曰勅無上學仙弟子靈
寶經籙大法宗師葛玄久專至道善養胎精
演真經祭煉於沉寃集仙典開明於後學可
謂陰功濟世密行齊真名隸玉都身歸天界
可特賜子位為太上玉京太極左宮仙公總
統三界六大魔王之職主行三洞四輔經
籙事可於甲子歲八月十五日午時飛昇徑
赴闕庭仍賜玉函金丹仙衣等太上詔命天
帝承書依法啓迎一如三天舊典勅天帝諱

遠奉旨告行於閭阜福庭仙公望天門再拜
受詔訖遂與弟子鄉朋分別於東峯之側登
著衣臺身披離羅之服頭戴芙蓉之冠項負
圓光手執玉簡絳裙朱履玉珮鳴珂坐八景
琅輿霓旌絳節前後導從仙童玉女左右衛
迎祥雲白鶴盤繞空碧冉冉而昇弟子鄉朋
攀戀不已於是仙公暫停仙駕賦五言歌詩
三篇降付鄉朋普令歌誦開悟方來升天之
年八十有一三篇之詩次列于後其一曰真
人昔遺教愍念孤癡子墜邪不信道禍亂由
斯起身隨朝露晞悔何有已罪大不可撿
流毒將誰理冥冥未出期劫盡方當止轉輪
貧賤家仍復為役使四體或不完整躄行乞
市不知積罪報怨天神不恃大道常無為弘
之由善始吾今獲輕舉修行立功爾三界盡
誓首從容紫宮裏停駕虛無中人生若流水
臨別屬素翰粗標靈妙紀其二曰我今便昇
天愍念諸儒英大道體虛無寂寂中有精視
之若冥昧窈窕中昭明莫言道虛誕所志不
至誠奚不登名山誦是洞真經一諷而一詠

玄音徹太清太上輝金容衆仙齊應聲十方
散香花燐煙栴檀馨皇娥奏九韶鸞鳳諧和
鳴龍駕翳空迎華蓋耀杳冥脩閑劫仞臺帝
釋條降庭八王奉丹液挹漱身騰輕逍遙有
無間流朗絕形名神重俠侍側自然朝萬靈
飄飄八景輿遊宴白玉京七祖昇福堂先亡
悉超生王侯能篤信必爲天下貞大人體至
德一切兼其成其三曰散誕遊山水吐納和
靈津鍊氣同希夷靜誦道德篇至心宗玄一
冥感今乃宣飛駕御九龍飄飄乘紫煙華景
耀空衢紅雲擁帝前暫迂蓬萊宮倏忽已賓
天偉偉衆真會渺渺凌重玄體固無終劫金
顏隨日鮮懽樂忘上境悲念一切人誰能離
死壤結是冥中緣悠悠成至道無有人無間
微妙良難測智者謂我賢若能弘衆妙輕舉
昇神仙歌畢雲輿冉冉昇天而去仙公所著
老子道德經序及斷穀服食方三卷入山精
思經十九卷泊神仙歌詩令遺世間吳書云
先帝好道術有事仙者葛玄嘗與遊處帝重
之特爲於方山立洞玄觀後仙公於閭阜白

日昇天至今方山猶有煮藥鑪及丹臼在焉
按輿地志於赤烏二年建立方山觀也宋徽
宗崇寧三年二月二十八日奉勅臨江軍清
江縣閭阜山葛仙公壇山川勝境仙聖所居
其盛德茂功顯聞于世者朕必秩而祀之惟
真人寄言立稱咸造宗極出入無畛與道翺
翔壇于琳宮積有年所祈禳休息美利在民
賜嘉褒榮特建崇號尚祈歆懌永福此邦可
特封冲應真人理宗淳祐六年三月十七日
奉勅臨江軍清江縣管下閭阜山葛仙公冲
應真人莊周氏云神人使物不疵癘而年穀
熟仙之謂歟爾修于名山以成妙道世傳飛
昇尚矣在崇寧間固已錫封迺者部使者從
邦祀之請復以祈禱應響歲事屢豐之狀來
上朕於方士說無所嗜嘉其有功於民爰命
禮官用衍稱謂若夫乘雲御風游乎八極之
表何有於名然姑以見朕褒表之忱也可特
封冲應孚佑真人

歷世真僊體道通鑑卷之二十三

歷世真僊體道通鑑卷之二十四

淳雲山聖壽萬年宮道士趙道一繕修

鄭思遠

鄭思遠少爲書生善律曆候緯晚師葛孝先
受正一法文三皇內文五嶽真形圖太清金
液經洞玄五符入廬江馬迹山居仁及鳥獸
所住山虎生二子山下人格得虎母虎父驚
逸虎子未能得食思遠見之將還山舍養飼
虎父尋還依思遠後思遠每出行乘騎虎父
二虎子負經書衣藥以從時於永康橫江橋
逢相識許隱具煖藥酒虎即拾柴然火隱患
齒痛從思遠求虎鬚欲求熱挿齒間得愈思
遠爲之拔之虎伏不動

臣道一曰道德經曰上善若水水善利萬
物而不爭思遠可謂上善者也至於養道
林泉仁及鳥獸且虎乃害人之獸人共惡
之思遠乃憐虎子之失母收而飼之古人
所謂養虎自患者此必然之理而思遠不
見其爲患且負經書衣藥以從及拾薪而
然火可謂道之高德之厚上善之感也

葛洪

葛洪字稚川丹陽句容人少好學家貧躬自伐薪以貨紙墨夜輒寫書誦習遂以儒學知名性寡慾無所愛玩不知棋局幾道博蒲齒名為人木訥不好榮利閉門却掃未嘗交遊時或尋書問義不遠千里崎嶇冒涉期於必得遂覽究典籍尤好神仙導養之法從祖玄吳時學道得仙號曰葛仙公以其煉丹秘術授弟子鄭隱洪就隱學悉得其法焉晉成帝咸和初司徒王導召補州主簿後選為散騎常侍領大著作洪固辭不就以年老欲煉丹以期遐壽聞交趾出丹砂乃求為句漏令帝以洪資高不許洪曰非欲為榮以有丹爾帝從之洪遂將子姪俱行至廣州刺史鄧嶽留不聽去洪乃止羅浮山煉丹在山積年優游閑養著述不輟其自序云洪體乏進趣之才偶好無為之業假令奮翅則能凌厲玄霄騁足則能追風躡景猶欲戰勁翻於斥鷃之群藏逸迹於跛驢之伍何況大塊稟我以尋常之短羽造化假我以至驚之蹇足自卜者審

不能者止豈敢力蒼蠅而慕沖天之舉策蹠蹠而追飛兔之軌哉是以望絕於榮華之塗而志安乎窮圯之域藜藿有八珍之甘蓬華有藻枕之樂也世儒徒知服膺周孔莫信神仙之書不但大而笑之又將謗毀真正故予所著子言黃白之事名曰內篇其餘剝難通釋名曰外篇內外凡一百一十六篇雖不足藏之名山且欲緘之金匱以示識者自號抱朴子因以名書洪博聞深洽江左絕倫著述篇章富於班馬又精辨玄曠析理深微後忽與嶽疏云當遊行尋師剋期便發嶽得疏狼狽往別而洪坐至日中兀然若睡而卒嶽至遂不及見年八十一視其顏色如生體亦柔輒舉尸入棺甚輕如空衣世以為尸解得仙云史臣曰稚川束髮從師老而忘倦納奇冊府總百代之遺編紀化仙都窮九丹之秘術謝浮榮而捐雜藝賤尺寶而惜分陰游德棲真超然方外全生之道其最優乎出晉眉山唐庚子西贊云江左日陋無復德輝翔而不集翩然南飛鄧嶽細兒處仲餘黨豈有識知

亦復瞻仰吾緣內丹遂居羅浮宜以嶽故而議去留所就者大寧邨其小吾與嶽遊如狎鷗鳥出羅浮志

臣道一曰道德經云寵辱若驚貴大患若身葛洪以才學之優棄功名之貴夫豈無其故哉蓋晉室自東遷之後斯臣構禍王道衰微奇士異人不一二作紛紛江左何時定乎葛洪之見可謂出於類拔乎萃矣是以遯世無悶樂道全真遺寵而辱不及忘身而患不至卒能終始于學仙道克成後之道者宜取則焉

黃野人

黃野人葛仙之弟子也或云葛稚川樓山煉丹野人隨之葛既仙去留丹於柱石之間野人自外至得一粒服之為地行仙今肉身常在世間有緣者或遇之出羅浮志後有人遊羅浮宿留巖谷間中夜見一人身無衣而紺毛覆體意必仙也乃再拜問道其人了不顧但長笑數聲響振林木歌詩云雲來萬嶺動雲去天一色長笑兩三聲空山秋月白其即野

人明矣又宋度宗咸淳中客有戴鳥方帽著
韓往來羅浮山中見人則大笑反走三年不
言姓名它日醉歸忽取煤書壁上云雲意不
知滄海春光欲上翠微人間一墮千劫猶愛
梅花未歸書畢度海而去豈非野人之儔侶
乎

楊羲

真人楊君名羲晉成帝咸和五年庚寅九月
生似是吳人來居句容學道於茅山為人潔
白美姿容善言笑攻書好學該涉經史性淵
懿沉厚幼有通靈之鑒與二許早結神明之
交二許者遠遊許邁長史許穆也長史薦於
相王用為公府舍人以穆帝永和初受中黃
制虎豹法六年又就劉璞傳靈寶五符璞即
魏夫人長子也君淵沉應感虛抱自得若燥
濕之引水火冥默幽歛相襲無朕矣年三十
六以哀帝興寧三年乙丑歲衆真降授道要
有若上相青童君太虛真人赤君上宰西城
王君太元茅真人清靈裴真人桐栢王真人
紫陽周真人中茅君小茅君范中候荀中候

紫光夫人南嶽夫人右英夫人紫微夫人九
華安妃昭靈夫人中候夫人莫不霓旌暗曳
神轡潛竦紛紛屬乎煙霄淪蹤收於俗躋讌
聲金響於君月無曠日歲不虛矣君師魏夫
人儼九華而朋於諸真故九華安妃云明君
靈質虛閑祕構玉朗蘭洲高流清響金宮必
高佐四輔承制聖君理生斷死賞罰鬼神攝
命千靈封山召雲主察陰陽之和氣為吳越
鬼神之君也後二十二年將乘龍駕雲白日
昇天矣今若不耐風火之煙可尋劍解作告
終之術也又玄清真人謂羲曰大學道當如
射箭箭直往不顧乃造棚的標志入山惟往
勿疑乃獲至真羲恭受勤行得仙晉簡文帝
後師羲得道義後果劍解隱化真誥纂以孝
武帝太元十二年丙戌去世弟子許翹嗣父
穆亦因君遇真故許氏九人雖道慶自先數
至神發如塵鑑凝照輝瑩之功並歸于君矣
太元十三年君乃乘雲駕龍西謁太素北朝
玉清輔佐東華總括具越人鬼神靈之司丹
臺錄云為東華上佐

許翹

雷平山真人許翹字道翔小名玉斧父穆晉
護軍長史其位上清左卿母陶氏名科斗先
於長史入洞為易遷宮夫人真人幼獨標挺
含真淵凝長史器異之郡舉上計掾主簿並
不赴清秀瑩潔穠穠塵務如泉去蒙盈其科
而自進居雷平山下師楊君傳三天正法曲
素鳳文後定錄真人授其上道告之曰學道
當如穿井井愈深土愈難出若不堅心正行
豈得見泉源耶真人常願早遊洞室不欲久
停人間遂詣北地告終即居方隅山洞方原
館中常去來四平方臺故真誥云幽人在世
時心常樂居焉又楊君與長史書亦云不審
方隅真人設座於易遷戶中後十六年當度
東華授書為上清仙公上相帝晨譜云年三
十而不記去歲按二錄晉海西公太和二年
丁卯時年二十七歲則是成帝咸康七年辛
丑生真誥注云咸和六年生自太和三年以
後無復顯迹依譜年三十則庚午年去世者
舊傳云在北洞北石壇上燒香禮拜因伏而

不起明旦視形如生壇今猶在又云從張鎮南受衣解法蓋夜於壇上去耳娶建康令黃演女生男黃民乃還家

許黃民

臨沮令許仙人名黃民字玄文上清仙公翹之子。上清左卿穆之孫以晉穆帝昇平五年辛酉生娶西陽令葛萬安女萬安是地村子第二孫也時掾年二十一仕郡主簿察孝廉司農丞南蠻參軍臨沮令惠帝永興三年京畿紛亂令乃奉經入剡為馬朗所翹敬朗從父弟罕亦相周給時人咸知許先生得道又父祖皆有名稱各加崇敬宋文帝元嘉六年欲移居錢塘乃封其真經一厨作朗靜中語此是仙靈之迹縱有書亦勿與人及至杜道鞠家停以時而終時年六十九真經言黃民及伯祖穆姑弟孫女璣輝並得度世馬朗敬經若若父每有神光靈氣見於堂宇朗妻數見有青衣玉女空中去來其家皆保富壽朗念山陰何道竊書泄意復洋銅灌廚餘今家人不得復開朗終于洪嘉興父李真又復宗事廢帝景和元年居士樓惠明諷父李真於勸取李真善道術為當時所知及至奉皇於華林園既見真迹璣輝朱黃缺赫不取窮覽至明帝登祚季真乃落還私廨陸簡寂南下立崇虛館經亦歸于館何神具巧運既聞於焉又發於

足於後於陸君馬史籍中凡責籍畢之宗而無容入其妙焉

陸修靜

廬山陸先生吳興懿族陸氏之子諱修靜道降元氣生而異俗其色怡怡其德熙熙明以啓著虛以貫幽少宗儒氏墳索識緯靡不總該以為先天輔化混一精氣與真宰為徒者載在金編玉宇逮收迹寰中冥搜潛衡熊湘暨九疑羅浮西至巫峽我眉如雲映松風麗乎山而映乎水功成叩玄感神授神靈訣適然自得通交於仙真之間矣宋元嘉末因市藥京邑文帝素欽其道風作傳霞寶車使左僕射徐湛宣旨留之先生固辭弗顧拂水而去後帝有太初之難人咸異之先生時沂江南尤嗜丘阜之勝樂孝武帝大明五年爰攝精廬於白雲峯下太始三年明帝復加詔命使刺史王景文敦勸不得已而就焉及登車日乃有熊虎猿鳥悲鳴滿路出山而止先生既至闕帝設崇虛館通仙臺以待之於是順風問道妙沃帝心朝野識真之士若水奔壑如風應虎其誰能禦之先生撥霧開日汰沙

引金指方以倒之中人已上皆自盈其分司徒袁粲之流是也既立崇虛館又氏所寶經訣並歸於彼由是翕然一變頽俗朝野宗師焉明年帝不豫詔請先生修塗炭之齋是夕壇宇間卿雲紛紛翌日疾瘳桂陽王用兵暴白骨徧野先生具棺櫬收而瘞之其陰德密運蓋多此類先生屢求還山帝不許迨蒼梧王元徽五年春正月忽謂門人曰吾迫於恩命違其宿尚今將還舊山爾可飭裝整駕弟子皆逐之至三月二日忽偃然解化其膚體暉映異香芬馥後三日廬山諸徒共見先生霓旌靄然還止舊隱斯須不知所在相與驚而異之遺命盛以布囊投所在崖谷門人不忍遂奉還廬山時春秋七十二所謂煉形幽壤騰景太微者矣有詔謚曰簡寂先生始以故居為簡寂觀宗有道也先是洞真之部具偽混淆先生刊而正之涇渭乃判故齋戒儀範為將來典式凡撰記論議百有餘篇並行於世門徒得道者孫遊嶽李果之最著稱首後孔德彰與果之書論先生云先生道冠中

都化流東國帝王稟其規人靈宗其法微言
既絕大法將謝法師稟神定之資居入室之
品學悟之美門徒所歸宜其整葺遺蹤提綱
振紀先師之餘化慕妙道之遺風可以導
引末俗開曉後途者矣初先生之赴詔也嘗
曳布囊及逝而歸忽有布囊挂於巖樹今所
居西澗一峯名布囊巖有醮石高六七尺方
廣丈餘其向乾亥亦名禮斗石門外有煉丹
井有連理樹其幹合抱其根蟠罩又有石磬
其聲清越又有藥苗苦竹豆於山谷皆遺跡
也唐天后太極元年勅醮於觀有黑龍群鶴
之異降詔褒崇仍付史館宋徽宗宣和元年
七月一日封丹元真人其詞曰朕惟前古高
蹈之士名迹不泯而稱號未稱者議所以追
顯之簡寂先生陸修靜精真內得是正道經
垂範一時脫然超世廬阜故隱有祠至今考
實定名禮以真人之號非特用褒往躅亦俾
後之聞風者知道之所在而加勉焉可特封
丹元真人陸修靜字叔純號雲龍子
修靜等初為梁武帝所遣奔入魏至是其徒
頗盛而齊帝事佛靜等嫉之詣開請與釋子

猶法且以年代考之元徽去紹泰
六十餘年其所載事迹豈非謬乎

孫遊嶽

先生姓孫名遊嶽字穎達東陽人吳之裔也
幼而恭長而和其靜如淵其氣如春甄汰凡
流潛神希微嘗步赤松澗縉雲臺卜終焉之
地宋文帝太初中簡寂先生至廬嶽乃執籍
事之遂授三洞經法及楊許二真人墨迹其
後茹芝却粒又專服穀仙丸六十七年顏色
精爽久而愈少暨簡寂羽化還舊隱研味真
趣至齊武帝永明二年詔主興世館由是奇
逸之士爭相趨赴若孔德璋劉孝標輩皆結
方外之好雖常以病求歸詔命未允以七年
五月中忽沐浴安坐而終門弟子數百人惟
陶弘景為入室以三洞經及楊許墨迹竭篋
相付後弘景因撰真誥行於世

陶弘景

隱居先生姓陶名弘景字通明丹陽人也宅
在白楊巷南岡之東宋初土斷仍割秣陵縣
西鄉之桐下里至今居之陶氏本冀州平陽
人帝堯陶唐之苗裔也堯治冀州平陽故因

居焉漢興有陶舍為高祖司馬子青權位至
丞相十三世祖超漢末渡江始居丹陽七世
祖濟交州刺史璜之弟仕吳為鎮南將軍封
句容侯食邑二千戶與孫皓俱降晉拜議郎
散騎常侍尚書六世祖謨濟之第三子懷帝
永嘉中為東海王越司馬領屯軍隨王出許
昌因敗仍復過江為大將軍王敦參軍敦為
丞相轉軍諮祭酒後隨敦南下而情懼禍及
乃啓分屬籍禁錮積年晚起為車騎丞相參
軍不就穆帝昇平四年卒始別葬白石山之
陽瞻湖北高祖毗有理識器幹高奇以文被
黜不肯遊宦州郡辟命並不就後授受南安
正佐亦不起安帝元興三年卒曾祖興公多
才藝頗營產植舉郡功曹察孝廉除廣晉縣
令義熙二年卒祖隆身長七尺五寸美姿狀
有氣力便鞍馬善射好學讀書善寫兼解藥
性常行拯救為務行參征南中郎軍事侍從
宋孝武伐逆有功封晉安侯除正佐固辭顏
峻侍寵就求宅以易佛寺弗與因辭官見諧
削爵徙廣州後被恩除南海西平縣令後監

新會郡宋孝武帝大明五年卒於彼父護貞寶字國重司徒建安王劉體仁辟為侍御連南臺侍御史除江夏孝昌相亦開騎射並兼隸書家貧以寫經為業一紙直價四十書體以羊欣蕭思話法深解藥術博涉子史好文章美豐儀凡遊從與蕭思話王劉劉秉周旋多為諸貴勝所賞遇蒼梧王元微四年冬奉使虜庭通鄰國之好甚得雅稱順帝昇明元年還都具撰遊歷記并詩數千字及所造文章等劉秉索看後值石頭事亡失無復別本不得傳世先是貞實攜家隨蕭之郢州宋武帝孝建二年蕭亡其年九月母覺有娠仍夢見一小青龍忽從身中出直東向而昇天遂視之不見尾南史云母郝氏夢兩天人手執香爐來至其所已而有娠唐李渤作傳云母初娠夢日精在懷并二大人執金爐下降既覺密語左右云我當孕男子非凡人也然恐無後時年二十五其冬仍隨蕭部伍還都住東府射堂前參左解中以孝建三年太歲丙申四月三十日甲戌夜半先生誕焉是年乃閏三月明旦即夏至也先生及生神儀明秀朗目蹙眉細

形長額聳耳右膝有數十黑子作七星文勿而聰識成而博達年四五歲便好書今猶有六歲時書已方幅成就九歲漸偏誦六經頗究屬文至十歲得葛洪神仙傳晝夜研尋使有養生之志謂人曰仰青雲觀白日不覺為遠矣讀書萬餘卷一事不知以為深恥善琴棋攻草隸年十一為司徒左長史王劉子吳博士十三父移宅席卷隨吏部尚書劉秉之淮南郡十五歸都寓憇中外除胃舍後仍立別宅從此不復還舊廬十七乃冠常隨劉秉尹之丹陽郡得給帳下食出入乘廐馬秉第二男俱少知名時為司徒祭酒俱雅好文籍與先生日夜搜尋常共味而食同車而遊俱與江數楮玄劉侯俱為順帝四友故最以才學得名俱作宋德頌連珠七警當世稱絕俱既亡後文章皆零落先生欲為纂集竟不能得是歲昇明元年冬先生年二十二隨劉秉入石頭城就東萊建事先生與韓貴廣談同掌文檄及事敗城潰即得奔出俱及弟俊為沙門以逃為人所獲建康獄死人莫敢視先

生躬自收殮瘞瘞查刑舊墓管理都畢自此棄世尋山而止值宋齊之際物情未安既結劉宗常懷幽惕父乃因紀僧真求事齊高帝於新亭即蒙帳內驅使二月沈攸之平從還東府公仍遣使侍第五息暉六息嵩侍讀兼助公間管記事先生時年二十三除巴陵王侍郎先生云革運之際頗有微勛何處不容三兩階級遂不拜又明年隨安城王出鎮石頭次歲夏丁孝昌府君憂南史云未弱冠齊王侍讀除朝奉諸雖在東門閉影不交外世物惟以披閱為務朝職故事多所取則焉世祖武帝即位以振武將軍起侍宜都王侍讀齊世侍讀任皆總知記室手筆事選須大才者先生於吉凶內外儀禮表章爰及踐踰啓牒莫不絕衆數王書佐典書皆承授以為准格諸侍讀多有慚憚頗致讒嫉先生亦任之不以介意年二十八服闋詔拜左衛殿中將軍頗慰時望先生驚亦不解所以即告虔道敏論諸屈滯度為面啓武帝帝云先帝昔親命此官卿不知耶其何辭之虔告先生先生喟然歎曰昔不受豫章王侍郎于今五年反

為此職驛馬非驥騄猶欲固辭度切言之云
大元以來此官皆用名家如裴松之從此轉
員外郎但問人才若官何所枉君恐為爾誤
我事于時正被委任總知諸王府事先生不
獲已而拜矣年二十九清溪宮新成帝宴樂
之先生拜表獻頌又有伏曼容亦上賦於是
勅遣中書省舍人劉係宣旨褒贊并勅豫舊
宮金石會于時上意欲刻此頌於石碑王儉
沮議而止時獻賦者五人惟以先生為最將
欲遷擢會丁母憂去職尋授振武將軍起特
賜酒食省祿隨宜都王赴京帝欲幸武進宮
先生復作頌頌成而車駕廢不復得奏云此
頌體制美絕倍勝舊格三年還都除奉朝請
拜竟快與從兄書云昔仕宦應以體中打
斷必期四十左右作尚書郎出為浙東一好
名縣粗得山水便投簪高邁宿昔之志謂言
指掌今年三十六矣方除奉朝請此頭顧可
知矣不如早去無自勞辱明年五月遂拜表
解職求託山林青雲之志於斯始矣是歲武
帝永明十一年壬申歲也先生初隱不欲辭

省出乃脫朝服掛神虎門鹿巾徑出東亭已
約語左右曰勿令人知爾乃往與王晏語別
晏云主上性至嚴治不許人作高奇事脫致
忤旨坐貶罪欲便恐違卿此志詎可作先生
默思良久答云予本徇志非為名若有此慮
奚為所宜於是即不詣省直上表陳誠南史
明十年脫朝服掛神虎門上表辭祿詔賜帛十四疋燭二十錠又
別勅月給茯苓五斤白蜜二升以供服餌先
生既遂命理舳東下公卿餞於征虜亭供帳
甚盛車馬填咽咸云江東比來未有斯事乃
見今日爾於是止於句容之句曲山先生云
此山是金壇洞宮周迴百五十里名曰華陽
之天有三茅司命之府故名曰茅山乃中山
立館自號華陽隱居亦猶士安之玄晏雅川
之抱樸凡人間書疏皆以此號代名先生善
誓古訓誥七經大義備解而不好立義異於
先儒議論惟著紙不甚口談尤好五行陰陽
風角氣候太一道甲星曆算山川地理方
國所產及醫方香藥分割蟲鳥草木考校名
類莫不該悉善隸書不類常式別作一家骨

體勁媚琴棋騎射亦皆領括為性圓通謙謹
出入冥會心知明鏡遇物便了言無煩僻有
亦隨覺為人少憂戚無嫉競淡哀樂夷喜怒
先生以甲子乙丑丙寅三年之中就興世館
主東陽孫遊處咨稟道家符圖經法雖相承
皆是真本而經歷摹寫有意所未愜者於是
更博訪斤以正之戊辰年始往茅山便得楊
許手書真迹欣然感激至庚午年又啟假東
行浙越處處尋求靈異至會稽大洪山謁居
士婁慧明又到餘姚太平山謁居士杜京產
又到始寧剡山謁法師鍾義山又到始豐天
台山謁朱僧標及諸處宿舊道士并得真人
遺跡十餘卷遊歷山水二百餘日乃還爰及
東陽長山吳興天目山於潛臨海安固諸名
山無不畢踐身本輕捷登陟無艱南史云
訪仙藥身既輕捷性愛山水每經澗谷必坐
卧其間吟詠盤桓不能已已謂門人曰吾見
朱門廣廈雖識其華樂而無欲往之心望瞻
高危瞰大澤知此難立止自恒欲就之
恤寒棲拯救危急救療疾恙朝夕無倦其別
有陰恩密惠人莫得而知之雖借人書隨誤
治定東昏侯永元初更築三層樓先生處其

上弟子居其中賓客至其下與物遂絕惟一家僅得至其所本便鞍馬善射晚皆不為惟聽吹笙而已特愛松風庭院皆植松每聞其響欣然為樂有時獨遊泉石望見者以為仙人性好著述高奇異顧惜光景老而彌篤尤

漢四

十六

明陰陽五行風角星算山川地理方國產物醫術本草帝代歷年以算推知漢熹平二年丁丑冬至加時在日中而先天實以乙亥冬至加時在夜半凡差三十八刻是漢曆後天二日十二刻也又作渾天象高三尺許地居中央天轉而地不動二十八宿度數七曜行道分明中星見伏早晚以機轉之悉與天相會云此修道所須非但史官家用又欲因流水作自然漏刻使十二時輪轉循環不須守視而患山澗水易生苔垢參差不定是故未立先生行步舉動翩翩輕利顏儀和明不嚴殺小大見之皆樂悅附而自令人畏服門徒胥附承奉祇肅有如宮庭小來與人有隔數歲便不與人共既著飲食及長遊處宿息常安性不嘲調世中戲謔一切不為為人惡精

塊夜行獨宿無所疑畏深慕張良之為人云古賢無比率任輕虛飄飄然有雲霞氣其所修為皆自得於心非傍識能及至永元二年深託向晦及梁武帝革命議國號未定先生乃引諸識記梁是應運之符又擇郊壇日靈

漢四

十七

驗昭著初使入山宣旨酬謝帝既早與之遊及即位後恩禮彌篤書問不絕冠蓋相望既得秘訣以為神丹可成每苦無藥帝皆給之帝每得其書燒香虔受帝使造年曆至己己歲而加朱點實太清三年也帝手詔招之錫以鹿皮巾後屢加禮聘先生乃畫兩牛一牛散放水草之間一牛著金絡頭有人執繩以杖驅之帝笑曰此人無所求欲效曳尾龜豈有可致之理耶國家有大事無不前以諮詢時人謂之山中宰相武帝天監四年移居積金東澗先生行辟穀導引之法自隱處四十許年逾八十而有壯容大通初獻刀二口一名善勝一名成勝為佳寶大同二年剋日告化時年八十五顏色不變屈伸如常屋中香氣積日不散詔贈中散大夫謚貞白先生仍

遣舍人監護後事弟子數十人唯王遠知稱上足焉先生妙解術數逆知梁祚覆沒預制詩云夷甫任散誕平叔坐談空不意昭陽殿化作單于宮詩秘在篋裏化後門人稍出之大同末士人競談玄理不習武事後侯景篡

位果在昭陽殿所著學苑百卷孝經論語集註帝代年曆本草集註效驗方肘後百一方

古今州郡記圖象集要及玉匱記七曜新舊

術疏占疏合丹法式其秘密不傳及撰而未訖又十部惟弟子得之梁帝金樓子云於隱

士重陶貞白於士大夫重周弘正其於義理

情轉無窮真一時之名士也馬樞得道傳云

陶弘景授蓬萊仙監上文所載多同南史

臣道一曰道德經云以正治國以奇用兵

以無事取天下又曰兵者不祥之器非君

子之器不得已而用之恬惓為上勝而不

美而美之者是樂殺人夫樂殺人者不可

得志於天下矣老氏之意蓋欲追遠太古

義黃唐虞之風務質樸而不尚虛華使君

臣上下遠聲色去奢侈而成清靜之化不

至於窮兵黷武而滅無爲之治也後世之人不省厥旨乃以清談縱誕爲奇其蒞政或偏於姑息而不明賞罰或放於怠惰而不務勤恪或病於疎鹵而不究精微或恃高才而驕傲忽略其弊不一至大敗於晉朝君臣之間淪及後來有臨兵而講老子道德經者至是老子之道爲之受汙使能深識老氏之道者果如是乎陶弘景遭逢亂世棲逸山林其觀朝政之弊有詩曰夷甫任散誕平叔坐談空不意昭陽殿化作單于宮時梁武以釋學治天下朝臣亦競談玄理爲政乖繆武備不修漸至覆亡其國故弘景之詩及之弘景學老氏之學者也後世學老氏之學而立人之朝者可不深味其旨哉

淡四

十九

歷世真僊體道通鑑卷之二十四

歷世真僊體道通鑑卷之二十五

淡五

浮雲山聖壽萬年宮道士趙道一編修

王遠知

道士瑯琊王遠知陳揚州刺史曇首之子外祖丁超梁駕部郎中其母因夢靈鳳有娠僧寶誌曰生子當爲神仙宗伯也年七歲日覽萬言博總羣書心冥至道年十五入華陽事陶貞白先生授三洞法又從宗道先生臧稔傳諸秘訣陳主召入重陽殿特加禮敬賞資送還茅山先生乃於洞西北嶺上結靖室以居研味玄秘陳宣帝大建末靖室中忽有一神人醉卧嘔吐先生然香禮候神人曰吾將遊天台山卿能去否先生即隨出上東嶺至山半忽思未二三弟子付囑經書背行十餘步迴望神人化爲鶴飛去隋晉王廣鎮揚州王子相柳顧言相續奉請先生既至斯須而鬚髮變白王懼而歸之少選復舊王踐祚勅崔鳳舉諮近帝親執弟子禮勅江都起玉清玄壇以處之仍令代王越師馬唐高祖龍潛時先生嘗密告符命秦王與房玄齡微服

淡五

淡五

就謁先生迎謂曰此中有聖人秦王請以實告先生曰方作太平天子願自愛也秦王詣先生受三洞法及登極將加重位固辭歸山至太宗貞觀九年勅潤州於茅山置太平觀并度七人降璽書曰朕昔在藩朝早獲問道眷言風範無忘寤寐近覽來奏請歸舊山已有別敕不違高志所令置觀用表宿心先生浩氣虛懷語默一致涵煦如鏡應物無私時有寶德玄先經揚州遇司命使者言其有重祿以九九之數當終命德玄求哀使者云具人王法主是少室仙伯檢錄人鬼之任關奏天曹無不即應德玄遂懇祈於先生先生不得已因與請命使者報曰更延十三年至高宗朝德玄爲左相捐館舍之日言皆如之故舉世呼先生爲法主又知已授仙職後謂潘師正曰吾昨見仙格以小時誤傷一童子唇不得白日昇天署少室仙伯將行有近翌日沐浴加冠衣焚香而寐告化時年一百二十一歲潘師正徐道邈同得秘訣爲入室弟子陳羽王軌次之其餘各棲洞府終身無替高

宗調露二年贈太中大夫謚曰昇玄先生乃勅置太平觀度道四十九人天后嗣聖初又贈金紫光祿大夫改謚昇真先生明皇天寶中勅李含光於太平觀造影堂寫真像用旌仙迹焉一云先生善易知人死生禍福作易

總十五卷一日雷雨雲霧中一老叱先生曰所泄者書何在上帝命吾攝六丁雷電追取先生惶懼據地傍有六人青衣已捧書立矣老人責曰上方禁文自有飛天保衛金科秘於玄都汝何敢輒藏細帙先生對曰青溪之

老傳授老人曰上帝勅下汝仙品已及受度期展四年二紀數也先生化後有人過海爲風飄蕩忽見葉舟自天未來乃先生也且曰君涉險何至如此此洋海之東十萬里也借子迅風一夕可到登州既去舟如飛羽覺風

老毫而過明日果至登州

王軌

道士王軌者字洪範臨沂人也曾祖筠梁散騎常侍少府卿度支尚書大父銍梁簡文太子洗馬招遠將軍父瑜陳著作郎鄱陽王常

侍執年二十歲事法主王遠知執巾瓶之禮凡十六年每座下聽道德西昇靈寶南華諸經退席爲人曲講又摹寫上清尊法洞玄洞神符圖秘寶封於石室以鎮山嶽餌木食松積有日矣齋講傳授有所得惟造像周急爲

先唐太宗知其名常咨訪道要高宗乾封二年十一月旦謂門人曰吾昨夜夢三人羽衣執簡前曰華陽天官用師爲神仙主者兼知校領省官吾昔在桐栢山已感斯夢辭不獲今乃復然殆將去矣戒門人修道之要經書秘訣各有所付至八日沐浴衣冠翌日坐笏而化及就櫬但空衣結帶而已春秋八十八河南于信之刻石于華陽洞

潘師正

潘師正者字子真貝州宗城人祖居常周楚州刺史父寔隋通州刺史母魯氏善言名理師正始生有光鄰母善骨法謂此兒不仙即貴及能言授六經皆通且曰此書外有過此者乎母曰惟道德五千文爾遂誦之及母病將危謂師正曰死者人之大期期至而往吾

何恨哉然汝尚幼不免爲吾念師正泣血捧母手曰若天奪慈顏某亦不能生母曰汝若毀滅非盡終始之孝也師正殞絕良久曰忍死強生當絕粒從道庶憑真教以爲津梁母摩其頂勉之既葬廬於墓以孝聞隋煬帝大

洪五

業中有道士劉愛道見而器之曰三清之驥非爾誰乘之時茅山王遠知爲煬帝所重每詔入禁中躬薦松水以祈福慶愛道謂師正曰吾非不欲爾相從然成就功道非遠知不可遠知既見忻然謂愛道曰今日復有潘仙吾教之幸也由是隸道士籍授三洞隱訣真文未幾遠知請還茅山師正侍行渡揚子江飲穢水痢下如凝脂遂夢見一人衣冠皓鮮乘空而下授白藥一粒飲之及寤而愈既至遠知謂曰吾雖欲留汝於此而嵩陽乃汝修真之地當亟還也於是與劉愛道合居雙泉頂間二十餘年復廬於逍遙谷食飲惟青松澗水而已洗心忘形與草木俱所修經法有太清之道三中真之道六下真之道八唐高宗幸東都召見請作符書辭不解復問山中

所須對曰茂松清泉臣之所須此山中不乏矣帝異之遂莫留即其廬作崇唐觀父奉天宮又敕其道遙谷作門南曰僊遊北曰尋真時太常獻新樂帝更名析仙望仙翹仙曲調露初高宗狩嵩嶽以車輿迎師正入嵩陽觀問道復遂至道遙谷見薛荔繩牀將朽敗餘無火粒之具惟有兩大瓢問何所用對曰臣有青飣飯昔西城王君以南燭為之服食得道既還都命使江東造青飣飯以賜之每手詔撫問皆具弟子姓名咨白而法服香燭金帛繼奉不絕其感遇之盛如此謂弟子曰吾實無用天恩濫加為道士衣皆上之所賜復處以崇構興動土工屠害草木驚擾禽獸吾罪人也必招冥譴汝等少年學道當求深山窮谷絕迹之處則無累矣上在洛陽又詔許不獲遂館於天苑逮還山帝以詩送永淳元年正月一日谷之東巖忽有簫管空歌之音弟子來白先生曰吾無所聞汝勿為名以眩俗也忽謂弟子韓文禮曰為吾造石室於北巖之下夏末當遷居文禮未忍為而促之不

已白曰北巖通靈嶽可乎曰吾居此五十餘年降真者三語要者七各能精一當自知之至六月十四日索沐浴書青符置湯中云終身淨也翌日將旦聞猿鶴悲鳴徘徊不去至晚聞石室未成則曰果不濟吾用遠云去文

禮問何去曰泰山檢校功德至十六日復曰石室未成權作瓦屋以冀我無改衣服復百日還石室中是日雲氣覆庭異香滿室須臾解化年九十八詔贈太中大夫諡曰體玄先生先生神標仙骨雅似隱居夫階具韜真練景遊化者其有類乎弟子凡八人並皆殊秀然鸞姿鳳態渺映雲松者有韋法昭司馬子微郭崇真皆稟訓瑤庭密受瓊室專玉清之業遺下仙之傳矣時陳子昂作頌

司馬承禎

後周瑯琊公司馬裔玄孫名承禎字子微洛州溫人也事諸師正傳辟穀導引術無不通師正異之曰我得陶隱居正一法速汝四世矣久之辭几席徧遊名山廬天台構層軒於壇上目為衆妙臺唐武后嘗召之未幾去與

陳子昂廬藏用宋之問王適畢構李白孟浩然王維賀知章為仙宗十友睿宗復命其兄承禎就之詔曰鍊師德超河上逍遙浮丘高游碧落之庭獨步清源之境朕初登寶位久藉微猷雖堯帝丕圖翹心蓄缺軒皇御曆遠想崆峒緬惟彼懷寧妨此顧朝欽夕佇述滯心飛欲遣使者專迎或慮鍊師嘉遯故令梓往顧與同來披遂不延先此母慮既至引入中掖延問其術對曰為道日損損之又損以至於無為夫心目所知見每損之尚不能已況攻異端而增智慮哉帝曰治身則爾治國若何對曰國猶身也故游心於淡合氣於漠與物自然而無容私焉則天下治帝嘆詠曰廣成之言何以加此賜寶琴霞帔以還公卿賦詩送之常恒徐彥坦總而為之序曰白雲記後復遣使迎至京師親授符籙賞賜甚厚每因辭請歸廬藏用早隱終南山後登朝居要官見承禎將還天台藏用指終南山曰此中大有佳處何必天台對曰以僕觀之乃仕宦之捷徑爾藏用有慚色明皇詔於王屋山

置壇室以居之承禎善篆隸金籀刀書自成一家體帝命以三體寫老子刊正文句嘗鑄金象鑑震景劔進之命光祿卿韋滄至所居按金籀設祠厚賜上封泰山回問承禎五嶽何神主之對曰嶽者山之巨鎮而能出雲降

雨為國之望然靈仙所隱別有仙官主之於是詔五嶽別立仙官廟時女真焦靜真泛海詣蓬萊求師至一山見道者指言曰天台山司馬承禎名在丹臺身居赤城真良師也靜真既還詣承禎求度未幾昇天嘗降謂薛李

昌曰先生得道高於陶都水之任當為東華上清真人開元中文靖天師與承禎赴長生殿千秋節齋直中夜行道畢隔雲屏各就枕斯須忽聞小兒誦經聲玲玲如金玉響天師乃褰裳蹣跚而窺之見承禎額上有小日如錢光耀一席遍而聽之乃承禎腦中之聲也天師退謂其徒曰黃庭經云泥丸九真皆有房方圓一寸處此中又云左神公子發神語其先生之謂有弟子七十餘人忽曰吾玉霄峯東望蓬萊有靈真降駕今為東海小青童

君東華君所召必須往俄頃化去如蟬脫蛻弟子築其衣冠焉時年八十有九詔贈銀青光祿大夫謚正一先生帝親文其碑韋滄奉作傳嘗撰修真秘旨天地官府圖坐忘論登真系等行於世

臣道一曰司馬承禎貌視軒裳棲身洞府心地之高邁學問之淵源不易及也其答唐睿宗之問曰國猶身也故游心於淡合悉於漠與物自然而無容私焉則天下治此誠得太上之深旨道德經云我無為而

民自化我好靜而民自正我無事而民自富我無欲而民自樸即此義也

李含光

晉陵人也弘孝威家本淳儒州里號貞隱先生後避唐敬宗諱改為李氏其子曰含光年十三篤好道學雖處暗室如對君父然人見之神色皆歛工篆隸或稱過其父一聞之終身不書後師正一先生雲篆寶書傾囊相付且曰具玉清之客也抱虛無而行功則其道不窮託幽阜而滅迹則於德亦淺承教雖遠

宜先救人含光既稟真訓乃忘情於身周急於物每啓章奏則齋心潔已未始少怠唐明皇召見問理化對曰道德經者君王之師也昔漢文帝行之躋民於仁壽之域又問金鼎曰道德者公也輕舉者公中之私也雖見其私亦聖人之存教若求生徇欲類於繁風不亦難乎帝嘉之優禮以待未幾以疾辭東歸句曲詔為紫陽觀以居之帝受楊許真經請為師復以疾不赴遂於大同殿具詞遙請加號文靖先生手詔屢降給奉相續嘗撰仙學傳及論三玄異同并本草音義又詔補楊真人手迹數紙代宗大曆四年十一月謂弟子韋景昭孟湛然曰吾將順化有頃顏色怡然而往於是祥雲降芝草生享年八十七歷世真僊體道通鑑卷之二十五

歷世真僊體道通鑑卷之二十六 漢

浮雲山聖壽萬年宮道士趙道綸修

許太史

太史真君姓許氏名遜字敬之曾祖琰祖王父肅世居許昌高節不仕潁陽由之後也父漢末避地於豫章之南昌因家焉吳赤烏二年己未母夫人夢金鳳嘶珠墜於掌中玩而吞之及覺腹動因是有娠而生真君焉句曲山遠遊君邁晉護軍長史穆皆真君再從昆弟也真君生而穎悟姿容秀偉少小通疎與物無竹嘗從獵射一鹿鹿中之子墮鹿母猶顧眄之未竟而斃因感悟即折棄弓矢刺意為學博通經史天文地理音律五行讖緯之書尤嗜神僊修煉之術頗臻其妙聞西安吳猛得至人丁義神方乃往師之悉傳其秘遂與郭璞訪名山求善地為栖真之所得西山之陽逍遙山金氏宅遂徙居之今道遠福地玉隆萬壽宮是也日以修煉為事今有丹井不求聞達鄉黨化其孝友交游服其德義嘗有售鐵燈檠者因夜然燈見有漆刺處視之乃金也翼日

訪主還之人有饋遺苟非其義一介不取郡舉孝廉不就朝廷屢加禮命不得已乃以晉武帝太康元年起為蜀郡旌陽縣令時年四十二視事之初誠吏胥去貪鄙除煩細脫因繫悉開諭以道吏民悅服咸願自新發憤如神吏不敢欺其聽訟必先教以忠孝慈仁忍慎勤儉近賢遠奸去貪戢暴具載文誠言甚詳悉復患百里之遠難於戶曉乃擇秀民之有德望與耆老之可語者委之勸率故爭競之風日銷久而至於無訟先是歲饑民無以輸租郡邑繩以法率民多流移真君乃以靈丹點瓦礫為金令人潛瘞於縣園一日籍民之未輸納者咸造于庭使服力於後園民獲地獲金得以輸納遂悉安堵鄰境流民慕其德惠來依附者甚眾遂至戶口增衍屬歲大疫死者十七八真君以所授神方拯治之符呪所及登時而愈至於沉痾之疾無不痊者傳聞他郡病民相繼而至者日旦千計於是標竹於郭外十里之江置符水於其中俾就竹下飲之皆瘥其悼老羸疾不能自至者汲

歸飲之亦獲痊安蜀民為之謠曰人無盜竊更無奸欺我君活人病無能為後江左之民亦來汲水於旌陽真君乃呪水一器置符其中令持歸置之江濱亦植竹以標其所俾病者飲之江左之民亦良愈今號蜀江水亦名歸安縣真君任旌陽既久知晉室將亂乃棄官東歸旌陽縣屬漢州真君飛昇之後詔改縣治於西就以故址蜀民感其德化無計惜留所在立生祠家傳畫像敬事如神明焉啓行之日贏糧而送者蔽野有至千里始還者有隨至其宅願服役而不返者乃於宅東之隙地結茭以居狀如營壘多改氏族以從真君之姓故號許家營焉其遺愛及民有如此者真君嘗至新吳憩于栢林忽有女童五人各持寶劍來獻真君異而受之其地今為栢林觀既而偕至真君之第惟日擊劍自娛人莫能測真君識其劍僊也常禮遇之卒獲神劍之用真君飛昇之後遂隱于栢林觀下因號栢樹仙童既而與吳君游於嵩陽聞金陵丹陽縣黃堂靖有女師謚姆多道術遂同往致敬叩以道妙姆曰君等皆風

稟靈骨僊名在天然昔孝悌王自上清下降
化度人世示陳孝道初降兗州曲阜縣蘭公
家謂公曰後晉代當有神仙許遜傳吾此道
是為衆真之長留下金丹寶經銅符鐵券令
公授吾使掌之以俟子積有年矣吾復受孝
道明王之法亦以孝為本予今來矣吾當授
子乃擇日登壇依科盟授闡明孝道誓戒丁
寧出銅符鐵券金丹寶經并正一斬邪之法
三五飛步之術諸階秘法悉以傳付許君顧
謂吳君曰君昔以神方為許君之師今孝道
明王之道獨許君得傳君當返師之也況玉
皇玄譜君位玄都御史許君位高明大使總
領仙籍品秩相察又所主十二辰配十二國
之分許君司玄枵之野於辰為子統攝十二
分野君領星紀之邦於辰為丑爾自今宜以
許君為長也二君禮謝訖辭行真君方心期
每歲必來謁姆姆覺之曰子勿來吾即還帝
鄉矣因取香茅一根南望擲之曰子歸認茅
落處立吾祠歲秋一至足矣二君還首訪飛
茅之迹尋於所居之南四十餘里得之已叢

生矣遂建祠宇亦以黃堂名之崇道觀每歲
仲秋之三日必往朝謁焉初真君往訪飛茅
路傍見陂水清徹為之少憇曰憇真靖今青陂村
是也又見鄉民盛烹宰以祀神且相訛曰
祭不腆則神怒降禍矣真君曰怪崇敢爾耶
夜宿於逆旅召風雷伐之拔其林木明日告
其里人曰妖社已驅毋用祭也今其地有廢社人不祭也
又見負擔遠汲者滿道乃以杖刺社前涸澤
出泉以濟之雖旱不竭今大澤村井也明日登
山巔指山腰之泉罅曰是有異物藏焉後將
為孽遂立壇靖以鎮之今每歲朝謁必乃
渡小蜀江今號黃湖抵江干之肆主人朱氏雖
貧而迎接甚敬真君戲畫一松于其壁而去
其家即日市利加倍後江漲潰堤市舍俱漂
惟松壁不壞今名松湖中朱氏建廟食于其地真君嘗煉神
丹于艾城之黃龍山山嶽有蛟魅護為淵藪
輒作洪水欲漂丹室真君遣神兵擒之釘于
石壁今有釘蛟石猶在焉丹成祭于幕阜葛仙翁石室
遂至脩川愛其湍急而味堅乃取神劍磨於
澗傍之石今在脩川梅山後人於其處尋渡主觀以表聖迹今號桂陽觀

水登秀峰今號桂陽山為壇於峰頂以獻謝上帝
乃服仙丹具君居近焉漢南有吳仙村其仙觀即具君故居也
遂造具君之宅過西安縣今分縣社伯出謁
真君詰其地分有妖物為民害者其神匿之
真君行過一小廟廟神其神姓毛兄弟五人
東四迎告曰此有蛟物害民知仙君來故往
邪渚逃避矣後將復還願為斯民除之真君
如其言躡跡追之至邪渚路傍逢三老人今
王廟詢其蛟孽所在皆指曰見伏於前橋下
龍橋今號伏真君至橋側仗劍叱之蛟驚奔入大
江匿于淵今號下乃勅吏兵驅之蛟從上流
奔出遂誅之今號上具君怒西安社伯之不
職錮其祠門止民事祀今分寧縣城隍廟正
入居民祭祀者亦少令祀小廟今封協佑侯
感也已而還郡城真君曰此地水陸衝要人
物繁夥宜無分合得僊之人試以丹數雜
他藥貨之令其信緣而取繼而贖者雖多竟
無一人過者真君吁嘆以世間仙才之難得
也具君聞新具有蛟為孽因持劍捕逐之所
經行處日龍泉蛟懼竄入溪穴至今號真君
觀今改曰仙遊蛟懼竄入溪穴至今號真君

乃以巨石書符及作鎮蛟文以禁之。鎮蛟文石碣尚存今爲僧院曰延真傍有甕時海昏之上遼亦曰延真在奉新縣西十里有巨蛇據山爲穴吐氣成雲亘四十里人畜在其氣中者即被吸吞無得免者江湖舟船亦遭覆溺大爲民害真君聞之乃登北嶺之

十餘丈目若火炬吐毒銜天鄉民咸鼓譟相
助是時眞君嘯命風雷指呼神兵以攝伏之
使不得動吳君乃飛步踏其首以劒劈其額
蛇始低伏弟子施岑甘戰等引兵揮之蛇腹
裂有小蛇自腹中出長數丈甘君欲斬之眞

城山甚重宋朝封靈順昭應大蛇既死其骨
安濟惠澤王俗呼曰小龍廟聚而成洲今號蛇真君於海昏經行之所皆
留壇井凡六處通候時之地為七其勢布若
斗星之狀蓋以鎮弭後患七靖者謂進化靖
御奏靖丹符靖華
表靖紫陽靖霍陽靖劉真靖今皆為官觀或為寺院官舍復至邑之西北
見山泉清冽乃投符其中與民療疾其效亦
比蜀江今號冷巨蟒既誅妖血汙劍於是磨
洗之且削石以試其鋒今建昌縣有磨
劍池試劍石在告其
徒曰大蛇雖滅蛟精未誅彼物通靈必知吾
有除害意恐其伺隙潰郡城吾歸郡乎戰岑
二子從我焉時懷帝永嘉六年也真君道術
高妙著聞遠邇求為弟子者數百人却之不
可得乃化炭為美婦人夜散群弟子處以試
之明且閱之其不為所染汙者惟十人耳即
異時上昇諸高第也自是凡周遊江湖誅蛟
斬蛇不無從焉其餘多自愧而去今建昌縣
西津名炭
婦市立觀
曰妙明真君乃與甘施二君歸郡周覽城
邑適有一少年美風度衣冠甚偉通謁自稱
姓慎禮貌勤恪應對捷給遽告去真君謂弟
子曰適者非人老蛟之精故來見試也體貌

雖是而腥風襲人吾故愚之庶盡其醜類耳

迹其所之乃在江潯化為黃牛卧郡城沙磧

今號黃牛洲

具君乃翦紙化黑牛往闕之令

施奉潛持劔往俟其闕即揮之施君一揮

中其左股牛奔入城南之井中

井名橫泉今在上監寺東

至長沙於賈誼井中出化為人即入賈玉使

君之家先是蛟精膏慕玉之女美化為一美

少年謁之玉大愛其才許妻以女因厚賂玉

之親信皆稱譽焉遂成婚居數歲生二子常

以春夏之交子然而出周游江湖若營賈者

至秋則乘巨艦重載而歸所資皆寶貨蓋乘

春夏大水覆舟所獲也是秋徒還給玉云財

貨為盜所劫且傷左股王舉族嘆惋求醫療

之具君乃為醫士謁玉玉喜召其婿出求醫

蛟精覺之懼不敢出玉自起召之具君隨至

其堂厲聲叱曰江湖蛟精害物非一吾尋蹤

至此豈容逃遁速出速出蛟精計窮乃見本

形蜿蜒堂下為吏兵所誅具君以法水嘆其

二子亦皆為小蛟併誅之賈女亦幾變形其

父母為哀求具君給以神符故得不變具君

謂玉曰蛟精所居其下即水今居舍下深不

踰尺皆洪波也可速徙居毋自蹈禍玉舉家

駭惶遷居高原其地不日陷為淵潭深不可

測

今長沙昭潭是也

具君復還豫章而蛟之餘黨甚

盛慮具君誅之心不自安乃化為人散遊城

市訪具君弟子詭言曰僕家長安積世崇善

遠聞賢師許君有神劍願聞其功弟子語之

曰吾師神劍指天天裂指地地坼指星辰則

失度指江河則逆流萬邪不敢當神聖之寶

也又曰抑有不能傷者乎弟子戲之曰惟不

能傷冬瓜葫蘆爾蛟以為誠然繼而盡化其

屬為葫蘆冬瓜連枝帶蔓浮泛滿江擬流出

境具君晨興覺妖氛甚盛乃顧江中見蛟精

所化即以劍授施奉使履水斬之黨屬如連

悉無噍類江流為之變色具君曰此地蛟螭

所穴不有以鎮之後且復出為患人不能制

也乃役鬼神於牙城南并鑄鐵為柱出井外

數尺下施八索鈎鎖地脉

今延真宮是也

祝之曰鐵

柱若亞其妖再興吾當復出鐵柱若正其妖

永除由是水妖屏迹城邑無虞復慮後世奸

雄妄作故因鐵柱以為識記有地勝人心善

永不出奸離縱有興謀者終須不到頭之言

具君之慮後世也深有如此者次年具君以

蛟蜃之屬有散入鄱陽潯陽界者慮其復還

乃周行江湖以殄滅之至蒼雋山頂有蛟湖

三所其孔穴透大江通饒信具君誅其蛟魅

立玉陽府靖以鎮之其西北石壁下灣立開

化靖以鎮之更立太城府靖

靖傳有大潭深不可測且多蛟

通走故立此靖以斷之

又鑄鐵符鎮鄱陽

湖口杜其所入之路

今在湖口縣上鑄鐵蓋

覆廬陵元潭制其所藏之數仍以鐵符鎮之

有說飛符鎮一劍在焉

其劍長尺有咫似玉石又似銅鐵人不可

明年永嘉七復遊長沙遂至韶陽又明

年至柳衡諸郡所至皆為民誅毒除害乃還

豫章前後凡立府靖七十餘所皆所以鎮郡

邑辟凶災也明帝太寧二年大將軍王敦

字仲舉兵內向次於湖真君與吳君同往上謁

真君止之時郭璞先生在幕府乃因璞與俱

見處仲喜延之飲而問曰子第一本破天君

等以為如何真君曰非嘉兆也吳君曰木上破天未字也公宜未可妄動處仲色變令璞筮之璞曰無成處仲不悅曰予壽幾何璞曰公若舉事禍將不久若還武昌則壽未可量也處仲怒曰君壽幾何璞曰予壽在今日日

中處仲大怒令武士擒璞斬之洞仙傳云璞備送終之具在行刑之所命即定於江側西松間後三日南州人見璞貨其服飾偏與相識共語處仲聞之不信問指真君乃舉杯

擲起化為白鶴飛繞梁棟處仲一舉目已失二君所在處仲竟敗處仲兵敗遂憤憤而二君所在處仲竟敗更卒有跡尸之刑

君還至金陵欲賃舟至豫章而船主告以乏操舟者真君曰爾等但瞑目安坐切勿覘視吾自為爾駕之乃召二龍挾舟而行因以印

印西岸之崖壁以辟水怪今印文猶在舟漸凌空俄過廬山頂至紫霄峰金闕洞二君欲遊洞中故其舟稍低林梢憂憂有聲舟人不能忍竊窺之龍即捨舟於層岫之上折桅於深澗之下後皆為鐵石今號鐵船峯真君謂舟人曰汝不聽吾言將何所歸舟人拜求濟度真君教以服餌靈草遂得辟穀不死

盡隱於此山後推伊刺江州道人訪廬山真君亦稱魚鰲白馬一少年女二君各乘一龍潛聲聞數百步疑是舟人輩分水陸還會於北嶺之天寶洞遂歸舊隱日與弟子講究真詮數十年間不復以時事關意惟精修至道作醉思仙之歌又著八寶垂訓曰忠孝廉謹寬裕容忍忠則不欺孝則不悖廉而固貪謹而勿失修身如此可以成德寬則得衆裕然有餘容而翁受忍則安舒接人以此怨欲消除凡我法子勤靜勤篤念茲在茲常守其獨有爽厥心三官考我鄉黨化之皆遷善遠罪孝悌興行平時出處隨機應物不異常人但所居之處鳴鶴翔飛景雲旋遶而已自東晉亂離江左頻擾真君所居環百餘里盜賊不入閭里晏安年數屢登人無災害其福彼生靈人莫知其所以然也至孝

武寧康二年甲戌真君年一百三十六歲八月朔旦有雲仗自天而下二仙乘輦導從甚都降于真君之庭真君降階迎拜二仙曰奉玉皇命賜子詔真君俯伏以聽乃宣詔曰上詔學仙童子許遜卿在多劫之前積修至道勤苦備悉經緯逾深萬法千門罔不師歷救災拔難除害蕩妖功濟生靈名高玉籍衆真推仰宜有甄昇可授九州都仙太史高明大使賜紫綵羽袍瓊旌寶節玉膏金丹各一合詔至奉行真君再拜登階受詔一仙曰子乃玉真上公崔子丈一仙曰子乃元真大卿瑕丘仲言畢揖真君坐告以沖舉之日遂乘雲車而去真君乃召門弟子與鄉曲耆老諭以行期自此朝夕會于真君之第日設宴飲共叙惜別且教以行善立功以致神仙之旨著靈劍子等書又與十一弟子各為五言二韻勸誡詩十首以遺世以大功如意丹方傳衆弟子之不與上昇者此方即丁義神方中也其訣必先擇日齋戒設位醮十八種藥之神然後書符誦誦呪而修合之其治眾疾如意而愈是月望日大營齋會遍召里人長少畢集至日中遙聞音樂之聲祥雲彌望須臾漸至會所羽蓋龍車從官兵衛僊童綵女前後導從紅霞紫氣舒布環遶前二詔使又至真君率皆拜迎二仙復宣詔曰上詔學仙

勤苦備悉經緯逾深萬法千門罔不師歷救災拔難除害蕩妖功濟生靈名高玉籍衆真推仰宜有甄昇可授九州都仙太史高明大使賜紫綵羽袍瓊旌寶節玉膏金丹各一合詔至奉行真君再拜登階受詔一仙曰子乃玉真上公崔子丈一仙曰子乃元真大卿瑕丘仲言畢揖真君坐告以沖舉之日遂乘雲車而去真君乃召門弟子與鄉曲耆老諭以行期自此朝夕會于真君之第日設宴飲共叙惜別且教以行善立功以致神仙之旨著靈劍子等書又與十一弟子各為五言二韻勸誡詩十首以遺世以大功如意丹方傳衆弟子之不與上昇者此方即丁義神方中也其訣必先擇日齋戒設位醮十八種藥之神然後書符誦誦呪而修合之其治眾疾如意而愈是月望日大營齋會遍召里人長少畢集至日中遙聞音樂之聲祥雲彌望須臾漸至會所羽蓋龍車從官兵衛僊童綵女前後導從紅霞紫氣舒布環遶前二詔使又至真君率皆拜迎二仙復宣詔曰上詔學仙

童子許遜脫子前世貪殺匿不祀祖先之罪
錄子今生呪水行符治病罰惡馘毒之功已
仰潛山司命官傳金丹於下界閉債封形迴
子身及家口廚宅百好歸三天子急淨穢皆
土凌空左大力天丁與流金大鈴照辟中黃
無或散慢告行仍封遠祖由玉虛僕射曾祖
瑛太微兵衛大夫先祖王太極把業錄籍典
者父蕭中獄仙官賜所居宅曰仙曹左府王
真上公曰卿門弟子雖衆唯六人合從行餘
各自有超舉之日不得偕往也乃揖真君真
君昇龍車命陳勲時荷持冊前導周廣會事
驂御黃仁覽與其父族侍從肝烈與母部從
仙眷四十二口同時昇舉雞犬亦隨逐飛騰
里人攀戀投地悲號不忍別真君曰僂凡路
殊悲懼自切執奉孝慈恭順天地何患無報
耶乃留下修行鐘一口并一石函謂之曰世
變時遷即為陳迹矣聊以此為異時之記有
僕許大者與其妻市米於西嶺聞真君將飛
昇即奔馳而歸倉忙車覆遺米于地米皆復
生今地名覆米比至哀泣求從行真君以其

分未應仙乃授以地仙之術夫婦俱隱于西
山其詳見仙傳仙仗既舉有頃墜下藥曰卑轂各
一又墜一雞籠于宅之東南十里餘舊名雞籠今
元日崇并鼠數枚墜地雖拖腸而不死意其嘗得竊食仙藥也後人或見之者必為瑞應
焉仙駕凌空向遠望之不可見唯祥雲綵霞
瀾漫山谷百里之內異香芬馥經月不散初
真君迴自旌陽奉蜀錦質信于譙姆姆製以
為殿帷至是忽飛來周游故宅之上竟日復
飛入雲霄後置觀故以游惟為名初真君與郭璞尋真
選勝至宜春栖梧山王長史之子朔迎真君
居西亭久之真君謂朔曰吾視子可傳吾術
乃密授仙方復云此居山川秀麗兼有靈泉
出於道南前對洞天俯臨袁水宜為道院朔
從之真君書一三字于壁而去飛
昇之日雲輦過其上遣二青衣下告朔以被
玉皇詔命因來別子朔泊闔家瞻拜祈度真
君俯告曰子輩仙骨未充但可延年乃飛仙
茅一根授朔曰此茅味異殖於茲地久服長
生甘能養肉辛能養節苦能養氣鹹能養骨

滑能養膚酸能養筋宜和苦酒服之必效言
訖而別自後王族如言服餌各壽百齡焉其地仙亦存焉真君所從游者三百餘人其
功行傑出通吳君十有一人真君飛昇之後
里人與真君之族孫簡就其地立祠以所遺
詩一百二十首寫竹簡之上載之巨甬令人
採取以決休咎名曰聖籤其鐘車詠曰並寶
藏于祠中後改祠為觀因并蜀旌陽之民競
齋金帛負碑屢來堯堞井以報功德各鐫姓
名于上蜀民碑錄改宮修蓋始撤去之今間有存隋煬帝時焚修
中觀觀亦尋廢至唐高宗永淳中天師胡惠
超重興建之明皇尤加寅奉宋太宗真宗仁
宗皆賜御書真宗又遣中使賜香燭花椿旌
節舞偶改賜額曰玉隆取度人經太釋玉隆
騰勝天之義仍禁名山樵採蠲租賦之役復
置官提舉為優異老臣之地徽宗皇帝降玉
冊上尊號醮告詞文云政和二年太歲壬辰
五月丁巳朔十七日癸酉皇帝御名謹遣入
內侍省內殿程奇請道士三七人於洪州
玉隆觀建道場七晝夜罷散日設醮一座三

百六十分位上啓神功妙濟真君伏以至神無像雖莫能名成德在人姑從所示式褒顯蹟肇薦徽稱莫享欽崇永綏福地其無任誠惶誠恐懇禱之至謹詞御降真君冊告表文臣某祇奉高真肇揚顯蹟仰太霄之在望枝靈宇以申虔美利所加既作黎民之福純熙來被更延景曆之昌臣無任精虔激切之至謹奉表奏告以聞臣某誠惶誠恐頓首謹言玉冊文曰維政和二年歲次壬辰五月丁巳朔十七日癸酉皇帝再拜言曰天眷用懋寵綏四方爰有至真克相上帝烜威赫德錫美降康而名號弗宣曷彰報典迺詔有司考循秘牒發揮遺懿垂示無窮共惟真君躬擢元圖密庸妙契繇魏迄晉嗣休炳靈服之獨病一方攸賴翦妖馘毒三氣獲分肆膚謫姆之符榮啓都仙之籍超昇璇極載紀綿邈廟像屹崇風烈如在矧炎暉之有赫方呈運之邇隆荐降嘉祥章彰幽贊禮饗答民物阜寧宜極微稱以昭嚴奉謹遣朝奉大夫充集賢殿修撰知洪州軍州管幹學事兼管内勸農

使充江南西路兵馬鈐轄護軍賜紫金魚袋王勇上尊號曰神功妙濟真君洪惟降鑒誕受丕章佑我無疆保茲景命俾緝熙於純嘏用敷錫於群倫謹言政和六年改觀爲宮真君昭靈著驗非一屢承恩寵事跡詳載道遠山玉隆萬壽宮志

臣道一曰許太史辭棄官榮潛心道法活民則行符咒水除害則誅蛟斬蛇行滿功成高隱仙品然而鄉黨化其孝友交游服其德義隨機應物不異常人但所居之處常有鳴鶴翔飛景雲旋遶而已其在仕也政有可觀其歸隱也內則修丹外則混俗真神仙之雄傑者也道德經曰道沖而用之或不盈淵乎似萬物之宗挫其銳解其紛和其光同其塵湛兮似若存吾不知誰之子象帝之先許太史得之也

歷世真僊體道通鑑卷之二十六

歷世真僊體道通鑑卷之二十七

浮雲山聖壽萬年宮道士趙道一編修

吳猛

吳君名猛字世雲漢陽人仕吳爲西安令因家焉今分寧縣是也性至孝齠髫時夏月手不驅蚊懼其去已而嗜親也年四十得至人丁義神方繼師南海太守鮑靚復得秘法吳黃龍中天降白雲符授之遂以道術大行於吳晉之間晉武帝時許真君從世雲傳法世雲盡以秘要授之永嘉末杜弢寇蜀攻陷州縣真君既誅大蛇世雲曰蛇是蜀精蛇死則杜弢滅矣卒如其言嘗見暴風大作書符擲屋上有青鳥嘶去風即止或問其故答曰南湖有舟遇此風中有二道士呼天求救故以此止之驗之果然西安令于慶死已三日世雲曰令長數未盡當爲訟之于天遂卧於屍傍數日與慶俱起慶第著作郎寶威其異遂作搜神記行於世嘗渡豫章江值風濤之舟世雲以所執白羽扇畫水而渡觀者駭異書云吳猛豫章人少有孝行夏日常手不驅蚊懼其去已而嗜親也年四十邑人丁義始授

其神方因還豫章江波深急猛不假晉孝武帝寧康二年真君上昇世雲復還西安是年十月十五日上帝命真人周廣捧詔召世雲遂乘白鹿車與弟子四人白晝冲昇宅號紫雲府今分寧縣吳仙村西宋徽宗政和二年

五月準誥封真人詞曰洪都福地紫府列真既靈異之有聞豈褒崇之可後以爾早學至道嘗悟秘言道化施行世稱慈父功行甫就飛昇帝鄉大江之西尚存故宅凡禱輒應吾民是依錫之新封用彰德懿朕命惟允其鑒于茲可特封神烈真人

陳勳

陳勳字孝舉蜀川人博學洽聞時魏道鍾會鄧艾伐蜀劉桓降孝舉時尚少已有出塵之志入青城山師谷元子永度世之法繼聞許真君在旌陽仁政及民走謁公庭願充書吏真君嘉之付以吏職凡表率革流設化民俗撫字之術裨益為多遂引為門弟子而託以腹心典司經籍守視藥爐真君冲肅命執筆導前焉昔玉隆宮西廡有孝舉道院號承仙

府手植巨柏一株其院面北而居宋徽宗政和二年誥封正真人其詞略曰以爾早以誠懇師事道君門人之中獨掌秘典功行甫就撫恤而昇大江之西儼有遺像錄同吳君誥

周廣

周廣字惠常廬陵人大將軍瑜之後少好天大音律之學長通元為清靜之教嘗與同志遊巴蜀雲臺山得漢天師驅翦精邪之法救民疾苦聞許真君在旌陽徑詣公庭願備下執真君納之令供侍杖屨夙夜惟勤導行道

法始終不怠還居私第左右無違乃就宅西百餘步間築室以居真君飛舉惠常與曾興國同驂龍車宅號宣詔府唐保太中州牧周修營其宅改曰宣詔府有今公如真人為祖碑刻尚存焉今曰太虛觀宋徽宗政和二年封元通真人其詞略曰以爾早契山宇師事仙君元化通神能得其道功行甫就偕昇帝鄉大江之西儼有故迹首尾同吳君誥

曾亨

曾亨字興國泗水人參之後也少為道士天資明敏博學多能修三天師之教逆知來物

名山列嶽有路必通妙訣靈符無治不愈神人孫登見之曰子骨秀神慧砥礪精勤必作霄外人矣子勉之後隱居豫章之豐城間許真君道譽投謁門下願侍巾几真君雅器重之神方秘訣無不備傳後驂龍車昇天今豐城縣真陽觀是其遺跡宋徽宗政和二年誥封神惠真人其詞略曰以爾骨秀神惠天稟殊姿師事仙君雅與道合功行甫就偕遊帝鄉大江之西尚存壇井首尾同吳君誥

時荷

時荷字道陽鉅鹿人少為道士入四明山遇神人教以胎息衆妙之術用能却寐絕粒役使鬼神驅除邪魅點化金玉調濟窮苦民受其賜聲聞遠邇惠懷之世聞許真君孝道法盛行江左徒步踵門願充弟子真君納之授以秘訣復遣還山教導徒衆晉明帝詔赴闕師問之堅不願留竟歸依棲侍側孝武帝寧康二年與陳孝舉執冊導從昇天有遺迹在豫章城號紫蓋府今南昌縣是也東海休陽縣奉仙觀乃其舊隱宋政和二年封洪施

真人其詞略曰以爾系出東海世稱仙材能自得師以有洪範前驅龍節參駕同昇大江之西尚存故宅首尾同吳君語

甘戰

甘戰字伯武豐城人以孝行見推於鄉里遭時亂離晦迹草澤喜神仙父視之術聞許真君行孝道法除害利物遂造門懇請願備驅役真君異其材器可其所請至真君上昇復付以金丹秘訣伯武後歸豐城布德行惠至陳宣帝大建元年正月七日亭午天詔下乃駕麟車乘雲而去今縣中清都觀其故宅號華陽亭有飛黃觀爲之奉祀宋徽宗政和二年封精行真人其詞略曰以爾幼耽道教長事仙君驅妖除邪厥功甚茂精行既備昇遊帝鄉大江之西尚存故宅首尾同吳君語

施岑

施岑字太玉沛郡人祖州仕吳因徙居九江赤烏縣太玉狀貌雄傑勇健多力弓劍絕倫許真君初領徒衆誅海昏大蛇會鄉壯三百餘人來助力太玉預焉致恭懇乞願充役者

真君納之與甘伯武常執劍侍左右晉孝武帝寧康二年十月二十八日晨見東方日有一童子乘綵雲執素策驅蒼虬降其所居宣玉帝詔遂御蒼虬乘雲而去真君宅東南二里間有壇曰紫玉府即其所栖之地西鎮鎮江干石上有觀今額爲太玉眺臺南昌之地亦有之皆所以眺望水妖也唐神仙記有約亦稱宋徽宗政和二年封勇悟真人其詞略曰以爾性勇而悟能自得師授以至言俾之入室神童指妙飛昇帝鄉大江之西故宅猶在首尾同吳君語

彭抗

彭抗字武陽蘭陵人舉孝廉仕晉累遷尚書左丞密修仙業以病辭朝師事許真君仍納愛女爲真君子婦舊以彭女爲夫人非也故帝永嘉末化飛婦誅蛇而彭君在計其年已七十六矣宜復觀匹偶乎要聞真君夫人因氏今考孝道讚有周女史答時母問一篇絕妙疑是夫人謙稱故曰女史新藏經稱聖母也真君念其恪誠應諸秘要纖悉付之連遣還朝至穆帝永和二年致政南遊挈家居豫章城中再詣門下朝夕叩問道益精進宋高

祖永初二年義熙二年八月二十四日舉家二十六口白日昇天今郡城是也宋徽宗政和二年封潛思真人其詞略曰以爾絕名去利潛默內修竭誠親師授以祕要功行甫就飛昇帝鄉大江之西尚存故宅仙室靈壇儼有陳迹首尾同吳君語

盱烈

盱烈字道微南昌人少孤事母以孝聞母蓋許真君之姊也真君九二姊盱母爲之五道居乃築室宅西數十步間俾居之故母子日聞道妙真君每出則盱母代掌其家事仙賓隱客咸獲見之胡天師石蕊詞曰吾昔嘗到此則客於盱母母子並受玉皇詔部分仙眷昇天今塙西道院乃其舊居號合宋徽宗政和二年詔封和靖真人其詞略曰以爾學真君之道悟五煉之源惟性閑和動合大化卒與其母偕昇帝鄉大江之西尚存故宅首尾同吳君語

鍾離嘉

鍾離嘉字公陽一字超木南昌人真君仲姊之子

少喪父母植性簡淡真君嘗嘆其有受道之資乃授之神方能拯救付之妙訣能役逐真君昇天首有金丹之賜是年十月十五日中午碧霞寶車自天來迎公陽拜詔昇車而去新建象牙山西源是其所居也有觀曰丹陵石藥曰尚存號鍾玉府宋徽宗政和二年詔封普惠真人其詞略曰以爾持修煉之術善符禁之能普惠通遐功行昭著真君付訣昇遊帝鄉大江之西尚存故宅首尾同吳君語

黃仁覽

黃仁覽字紫庭高安人父輔字萬石舉孝廉仕至御史紫庭神彩英秀局量凝遠真君以女妻之盡得真君之道任青州從事單騎之官留妻侍父母然每夜輒歸人莫得知一夕家僮報許氏院中夜有語笑聲姑訊之許氏曰黃郎耳姑曰吾子從仕數千里安得至此許氏曰彼已得仙道能頃刻千里戒在漏語故不敢令姑知姑曰若然當使我見之是夕紫庭歸許氏告以故比明紫庭不得已出謁父母曰仁覽雖從宦遠鄉夜必潛歸膝下仙

道秘密不可泄言恐招譴累言訖取竹杖化為青龍乘之而去故萬石亦知仙道足慕執弟子之禮以事真君惟紫庭二弟勇健不檢日事遊畋雖父兄奉詔飛昇而二人尚在獵所自言受性縱逸不堪作仙任兄舉族飛騰

容我二弟捕鹿紫庭嘆其賦分復折草化鹿以止其妄心遂與父母三十二口乘雲而東從真君仙駕昇天二弟後隱於西山今方門黃朝四郎仙仗既行雲間墜下石嵇藥曰各五郎是也仙仗既行雲間墜下石嵇藥曰各一瑞州高安縣祥符觀舊一曰析仙觀是其故居也傍有許氏墜釵洲

宋徽宗政和二年詔封沖道真人其詞略曰以爾襲初平之慶稟非常之資師事道君洞該至妙功行甫就昇遊帝鄉大江之西尚存故宅首尾同吳君語仁覽父輔亦求為真君弟子真君以其懿戚待以客禮故不與十一人之數諸弟子受法皆許傳族壇靖各立府亭之名其教大儀曰府小儀曰亭行持道法以人數多寡名之

蘭公

昔有異人姓蘭名期人莫敢呼其名稱之曰蘭公初居兗州曲阜縣高平鄉九原里其家

百餘口精修孝行致斗中真人下降其家自稱孝悌王諱弘康字伯中語蘭公曰始氣為大道於日中為孝道仙王元氣為至道於月中為孝道明王玄氣為孝道於斗中為孝悌王夫孝至於天日月為之明孝至於地萬物

為之生孝至於民王道為之成吾於上清以下託化人間示陳孝道之教後晉代當有真仙許遜傳吾孝道之宗是為衆仙之長因付蘭公秘旨及金丹寶經銅符鐵券令傳授丹陽黃堂靖女真諶姆且戒之曰將來有學仙者許遜汝當以此授之孝弟王遂將蘭公遊於郊野道傍忽有三古塚指以示蘭公此是汝三生解化之迹其第一塚乃昔尸解所遺仙而已第二塚乃太陰煉形形體已就今當起矣第三塚藏蛻骨耳宜移塚傍之路勿令人物踐履也孝悌王言訖昇天蘭公乃榜示行人斷其舊路人謂其妖妄擅移路逕執以詣官官吏拘公而詰其驗公具以前事對官吏云必若妄言將加誅公曰吾言得之孝悌王安得妄官吏遂引蘭公與地分對開其塚

其第一塚果有黃衣一領其第二塚見一人童顏弱質如睡初覺之狀第三塚見有連環骨一具衆咸驚嘆吏乃持衣還獻府君著衣著衣不能勝還與蘭公公服之即同塚中之人合爲一體竦身輕舉官吏悔謝虔懇拜問

何時再降人間後七蘭公俯語之曰我自北或十日或百日一降施行孝道以濟迷塗其後吳

都有十五歲童子丹陽三歲靈童並是真仙之化身也將弘孝道之教以授合仙之士焉

臣道一曰蘭期積世修真念不忘道至感

斗中真人下降示陳孝道以開來證具仙子如蘭期者誠之至焉者觀其三生解化之迹昭然動人至於妙合形神竦身輕舉蓋以一誠而歷四世仙道竟成豈旦夕之功行哉道德經曰不失其所者久死而不

亡者壽豈非蘭期之謂乎

許大

許大真君之役夫也真君上昇之日適與其妻運米出市今西聞真君昇天夫婦推覆米車奔馳而歸至則仙仗已興夫婦撫膺哀號

乞從行真君告以善功未備不應飛昇乃授以地仙之術夫婦俱隱于西山其覆車之未在地復生今地名蘇車岡生既隱不欲人識改姓曰午又爲人所知復改曰千夫婦各有詩留於世千君詩曰自從明府昇天後出入

塵寰直至今不是藏名混世俗賣柴沽酒貴

忘心其妻詩云醉舞狂歌踏落花綠羅裙帶

有丹砂往來城市賣生藥祇箇西山是我家

又詩云出入仙鄉不記春豈知塵世有寒溫

兒家祇在西山裏除却白雲誰到門因千君

出遊經時不歸獨步醺壇有感而作昨日因

遊到翠微醺壇風冷杏花稀碧桃爲我傳消

息何事人間去不歸許大夫婦聞真君將上

昇苦求隨行真君以詔使告合從昇天人數

已有定命難徇其請故預期使之出幹雖覆

車而歸已無及矣後七今時人有見之者誓神錄

云洪州西山中有樵人自稱千大衆莫知其

名時出村落與人相接拱揖而已未嘗交一

言人欲問之輒揖而去有少年者俟其出拜

之曰願事先生千大驚欲去少年急捉其衣

褐隨之而往千大曰爾何爲者輒對曰願事先生且拜且行經歷險絕輒不暫捨久之乃坐澗水傍曰爾欲茶不少年曰諾即解衣襟間取茶末置少年掌中使掬水吞之訖因卧良久而寤遂失千大尋樵路而出乃分寧縣界數日還家少年自此輕健無疾

胡惠超

天師胡惠超字拔俗不知何許人也莫知其年壽唐高宗上元間來自廬山栖於豫章西山之洪井幅巾布褐徒行負杖至游惟觀見同輩手不執板擎拳而已美鬚眉體貌瓌偉類四十許歲人身不甚長然每處稠人中其首獨出其上雖至長者止及其肩故時人稱爲胡長仙人問其年幾何曰五十二歲逾數十載問之亦復云然至論晉宋已來治亂興廢纖毫不差喜談晉司空張華文博物如其友或云許吳君嘗授其延生煉化超三元九紀之道能檄召神靈驅奮雷雨至陶弘景校茅山華陽洞太清經七十卷天師亦與焉背縫盡朱書其姓名覽之者皆見之又曰吾昔

到此客於肝姆用是不知為何代人物也每
逢路傍暴骨遺骸悉為瘞之地有古物寶器
掘之如其言而獲聞邪怪之物疾之如寇讎
即務翦除之時豫章西門有樟木精為獨足
神大興怪祟邀人淫祀天師一見叱罵書符
禁制即命斬伐積薪灌油以火焚燎妖祟遂
滅以地為觀舊名信果昔游帷觀唐初荒廢
因問主觀胡不修葺答以乏材力天師奮然
而往不逾月以木棧至高安樟木江口距觀
九十里命戕人緊繫縛各就宿江岸臨暮飛
黑符一道中夜烈風雷雨比明棧已在壇下
矣凌抹嶺谷所當之路林木披靡摧折又於
山下發一窖出錢三百千為工役之需應殿
宇非人所居者皆夜役鬼神為之門外鑿三
井以辟火災俗號曰禁火井故久之異迹顯
著唐高宗時偶抵京邑詔除壽春宮狐妖賜
洞真先生至是天后以蒲輪召之天師深隱
巖谷州縣搜求之急不得已而出至都引見
於武成殿后臨問仙事天師止陳道德帝王
治化之源后大喜又欲留於都下委以煉丹

之事天師辭請還山修煉勅遣使齎金璧送
歸行次單父賜書曰先生道位高尚早出塵
俗如軒曆之廣成漢朝之河上遂能不遠千
里來赴三川日御先開望霓裳之漸遠天津
後渡瞻鶴蓋以方遙空睇風雲惆悵無已儻
蒙九轉之餘希遺一丸之藥天師乃於洪崖
先生古壇之際煉丹首尾三年降詔趣召詣
闕至則館於禁中天師辭歸固留不許天師
一朝遁去上聞嘆恨久之遣使齎贈甚厚兼
贈詩一篇云高人協高志山服往山家迢迢
聞風月去去隔煙霞碧岫窺玄洞玉竈煉丹
砂今日呈津上延首望靈樞天師歸西山居
於盱母靖觀有三清中門真君橫堂仙井在今
上舊亭皆鬼工所造平柱眠枋疊至春新削之
工人或可侔至植立不斜堅固不朽非人可
及梁牌親題年號筆力遒勁又自寫其真容
於後殿之壁其居西山人皆師事之千里之
內無疫癘水旱之災無猛鷙大枉之苦遠近
賴焉長安三年二月十六日命弟子於遊惟
觀之西北伏龍岡造磚壇藏太玄真符二七

星神劍靈寶策杖各一三日而訖天師正衣
冠坐繩床異香滿室空中雲鶴鳴外人馬之
聲紛紛不絕視之已解脫矣州具以聞賜錢
帛修齋醮復謚曰洞真先生姑蘇先生司馬
貞撰碑具載詳悉開元中天師復出為明皇
所重以詩送還山云仙客猷人間孤雲比性
閑話離情未已煙水萬重山又世傳明皇三
公主從之學道一日玉真長公主二曰玉真
次公主三曰真一公主其後道成皆隱翔鸞
洞師亦隱去今伏龍山凌雲觀乃師還山所
居公主從之學道處凌雲南去十餘里平地
有山為冢三又師再藏劍印符錄處俗呼曰
三榔至今屬籍凌雲觀其門人高第甚多最
顯者曰萬天師蘭天師臨川井山黃花姑云
游帷觀有胡天師畫真像壁一日將頽忽有
一雲水道士至以木板模寫之儼然復前狀
越夕而壁倒道士亦不知所往門堂以宋徽
宗政和六年奉旨重造始撤去今惟真板存
焉

歷世真仙體道通鑑卷之二十七

歷世真僊體道通鑑卷之二十八 淡八

游雲山聖壽萬年宮道士趙道一編修

王纂

道士王纂者金壇人居馬跡山常以陰功救物值西晉末中原亂離饑饉疫交作民多斃無救纂憫之遂於靜室飛章告天而泣涕不已後三日室中有光如晝已而祥風景雲紛紛空際異香天樂下集于庭先有介金執銳之士三十餘人斯須珠幢寶幡霓旌羽節導從前後又四青童執花捧香二侍女捧案地舒雲錦前立巨屏左右龍虎將軍侍從官將各二十餘人立屏左右若有備衛復有金甲大將軍二十六人神王十人次龍虎二君之外班列肅如也俄而笙簧之音自西北至五色祥光灼燦流映一人佩劍持簡而前告纂曰太上道君至于是百寶大座自空而下道君據坐有二真人二天帝立侍焉纂拜手跪伏而前道君曰子憫生民形于章奏剴心投血感動幽明地司列言吾得以鑒盼於子纂禮謝畢道君告曰夫一陰一陽化育萬物

而五行爲之君五行互有勝負各有盛衰代謝推遷氣與生之相續間不容息億劫已來未始暫輟得其生者合於至陽昇天而爲仙得其死者淪於至陰在地而爲鬼鬼物之中有優劣強弱剛柔善惡與人世無異玉皇天尊慮鬼神之肆橫害於人常命五帝三官檢制部御律令刑章罔不明備然而季世之民淳源既散澆偽日生不忠於君不孝於親違三綱五常之教自投死地由是六天故忤魔鬼之徒與歷世以來敗軍死將戕害生民駕雨乘風因衰伺隙爲種種病中傷極多亦有不終天年如王翦白起從來將領生爲兵統死爲鬼帥有功者還爲陰官殘害者由居魔屬乘五行敗氣爲瘵爲癘然吾以陽威憚之神呪伏之自當弭戢今以昔於杜陽宮所授真唐平神化神呪二經復授子行之可拯萬民即命侍童披九光韞以二經及三五大齋訣授之曰勉而行之陰功可成真階可冀也言訖千乘萬騎西北而舉纂按經品齋科行世江表自是疫癘不復作矣

單道開

單道開敦煌人常衣粗衣或贈以繒服皆不著不畏寒暑晝夜不卧常服細石子一吞數枚日一服或多或少好山居而山樹諸神見異形試之初無懼色石季龍時從西平來一日行七百里至秦州表送到鄴釋教書云晉穆帝永和三年太史奏虎云仙人星現當有高士入境虎初州郡有異人今啓開十一月秦州刺史上奏送單道季龍令佛圖澄與語不能屈也澄曰此道士觀國興衰若去者其境有大亂及季龍末道開南渡許昌尋而鄴中大亂晉穆帝昇平三年至京師後至南海羅浮山獨處茅茨蕭然物外年百餘歲卒于山舍教弟子以屍置石穴中弟子乃移入石室陳郡袁宏爲南海太守登羅浮山至石室口見道開形骸如生香大瓦器猶存宏曰法師業行殊群正當蟬蛻爾乃爲之贊云云淡八宋眉山唐子西序云葛稚川化去三十餘年單道開始來羅浮今山中人知有稚川而不知有單道蓋稚川既爲鄧嶽所留居山燒煉著書數年丹竈具存而道開平日惟食細石子數枚淡

無所為以故後世莫得而考陳郡袁宏雖作道開贊然宏嘗為桓溫作九錫文矣此乎豈宜復弄世外事而贊文亦不復見於世遂作二贊書之山谷而不顯其處以貽後世之好奇者云作道開贊曰世人茹柔剛則吐之起抄爛飯口如牛呵至人忘物剛柔一致其視食石如嚼餅餌北平飲羽出於無心食石之理於此可尋我雖不能而識其理庶幾漱之以礪厥齒出歷志

王嘉

王嘉字子年隴西安陽人輕舉止醜形貌滑稽好語笑不食五穀不衣美麗清虛服燕不與世人交游隱于東陽谷鑿崖穴居弟子數百人亦穴處一云嘉御六燕守三一冬夏不改其服顏色日少季龍之末棄其徒潛于終南山結菴而止門人復隨之乃遷於倒獸山好尚之士師宗問當世之事隨問而對好為譬喻如調戲者言未然之事辭如識記當時人莫能曉過皆有驗人候之至心則見不至心則隱形不見衣服在架履杖猶存或欲取

其水者終不及企而取水架愈高而屋亦不大履杖諸物亦然秦符堅累徵不就堅等大舉南征以茅融為大將軍遣人問嘉嘉曰金堅火強仍乘使者馬正衣冠徐徐東行數百步而策馬馳反脫衣服棄冠履而歸下馬踞床而不言堅又不解更遣人問世祚如何嘉曰未央堅欣然以為吉徵明年歲在癸未堅大敗於壽春遂亡秦國是矣在末年也以秦居西為金晉都南為大火能鑠金也嘉尋移嵩高山姚萇與符登相持問嘉曰吾將殺登定天下否嘉曰略得之萇大怒曰得當云得何略之有遂斬之及二弟子萇先使人隴右逢嘉將兩弟子已千餘里正是誅嘉日也嘉使書與萇萇令發嘉及二弟子棺並無屍各有竹杖一枚萇尋亡嘉著拾遺記十卷多紀異事見行世

孟欽

孟欽洛陽人有左慈劉根之術百姓慕而趨之符堅召詣長安惡其惑眾命符融誅之俄而欽至融留之遂大燕官僚酒酣目左右收

欽欽化為旋風飛出第外頃之有告在城東者融遣騎追之垂及已遠或有兵眾拒戰或前有溪澗騎不得過遂不知所往堅末復見於青州符朗尋之入于海島

郭志生

郭志生字通明朱提郡人晉元帝時云已四百歲見之如五十許人有短卷書滿兩篋中常負之多止烏場張績家每嘆曰兵荒方生流毒生民將以溝瀆為棺材蒼蠅為孝子必然之期可為痛心後二年孫恩妖亂冬夏殺害及餓死者十不遺一忽謂績曰應亡為吾備藏村器殯不須埋但送山巖中以石鎮村上後少日而死績謹依斯教經數日績親人自富陽還見志生騎白鹿山中行作書與績

郭璞

郭璞字景純河東人也好經術博學有高材而訥於言論詞賦為晉中興之冠好古文奇字妙於陰陽算曆有郭公者客居於河東精於卜筮璞從之受業公以青囊中書九卷與之由是遂洞五行天文卜筮之術攘災轉禍

通致無方雖京房管輅不能過也璞門人趙載嘗竊青囊書未及讀而為火所焚惠懷之際河東先擾璞筮之知難將作於是避地東南抵將軍趙固會固所乘良馬死固惜之不接賓客璞至門吏不為通璞曰吾能活馬吏驚入白固固趨出曰君能活吾馬乎璞曰得健夫二三十人皆持長竿東行三十里有立林杜廟者便以竿打拍當得一物宜急持歸得此馬活矣固如其言果得一物似猴將歸此物見死馬便啞吸其鼻頃之馬起奮迅嘶鳴食如常不復見向物固奇之厚加資給璞過江王導深重之引參已軍事元帝初鎮建鄴導使璞筮之所言皆驗遷著作佐郎時陰陽錯繆而刑獄繁興璞上疏云夫寅畏者所以享福怠傲者所以招患宜蕩除瑕累贊陽布惠建武四年三月癸亥日中有黑子璞以帝用刑過差陰陽錯繆皆繁刑所致赦不欲數然子產鑄刑書非政之善不得不作須以救弊故也今之宜赦理亦如之頃之還尚書郎永昌元年春正月璞復上疏請因皇孫生

下赦令帝從之大赦改元王敦以璞為記室參軍璞善卜筮知數必作亂已預其禍甚憂之大將軍掾陳述卒璞哭之極哀曰嗣祖焉知非福也元帝崩璞以母憂去職卜葬地于暨陽去水百許步人以近水為言璞曰當即為陸矣其後沙漲掩墓數十里皆為桑田璞嘗為人葬明帝微服往觀之因問主人何以葬龍角此法當滅族主人曰郭璞云此葬龍耳不出三年當致天子也帝曰出天子耶答曰能致天子問耳帝甚異之明帝大寧元年三月王敦謀篡位諷朝廷徵已帝手詔徵之敦移鎮姑熟二年五月將舉兵向京師令璞占夢璞筮之曰無成敦曰子壽幾何璞曰公若舉事禍將不久若還武昌則壽未可量也敦怒曰卿壽幾何璞曰壽盡今日日中敦大怒令伍伯縛之璞謂伍伯曰吾年十三時於柵塘脫袍與汝言吾命應在汝手中汝可用吾刀伍伯感昔深惠涕行法璞未筮夢之先已預報家人備送終之具在行刑之所命即寔於江側兩松之間後三日南州市人見

璞貨其平生服飾與相識共語敦聞之不信開棺無屍乃兵解也後為水府仙伯璞生平與桓彝友善彝每造之或值璞在卧內便直入璞曰卿來他處自可徑前但不可廁上相尋耳必客主有殃彝後因醉詣璞正逢在廁掩而觀之見璞裸身被髮銜刀設餌見彝撫心大驚曰吾囑卿勿來反更如是非但禍吾卿亦不免矣璞終嬰王敦之禍彝亦死於蘇峻之難璞撰前後筮驗六十餘事名為洞林又抄京費諸家要最更撰新林十篇卜韻一篇注釋爾雅又注三蒼方言穆天子傳山海經楚辭皆傳於世所作詩賦誄亦數萬言所載多同晉書文上

臣道一曰郭璞之答王敦止奸臣賊子之心也王敦處大將軍之貴窺晉室之微欲行反噬可謂可欲而不知足者璞冀說止之觀其辭曰若將舉事禍將不久若還武昌則壽未可量也郭璞豈非以斯道自任而冀回奸臣賊子之心乎道德經曰罪莫大於可欲禍莫大於知足欲莫大於欲

得故知足之足常足此誠郭璞止王敦之意也

郭文舉

郭文舉河內軹人少愛山水常游名山觀華陰石室洛陽陷入吳居大辟山停木於樹苦獲而止時猛獸為暴文舉居之十餘年無患丞相王導使迎至京師朝士咸共觀之文舉頽然箕踞傍若無人周顗問曰猛獸害人先生獨不畏耶文舉曰吾無害獸之心故獸不害人周顗庾亮桓溫劉恢共歎曰文舉雖無賢人之才而有賢人之德晉成帝咸和元年懇求還山導不許復少日遁入臨安白土山明年蘇峻作亂時人謂文舉逆知故去也有老子經二卷輟威懸屋未嘗見讀之山人徐凱師事文舉受錄錄上將軍吏兵見形於凱使役之又令凱見社竈神戒凱曰不可有房室不復為卿使凱後娶暨氏女諸神即隱惟餘錄吏二人不復從命語凱云汝違師約天曹已攝吏兵留我等守太上錄不復可使文舉亡如蟬蛻山下人為之立碑文舉書著

葉上著金雄詩金雌記後人於其所住床席下得之次第尋看識緯相似乃傳于世

臣道一曰郭文舉棲隱山林不畏猛獸觀其答周顗之問曰吾無害獸之心故獸不害人其所養所學可知矣此所以起人之嘆服道德經曰含德之厚比於赤子毒蟲不螫猛獸不據攫鳥不搏豈非郭文舉之謂乎

王質

王質晉時東陽人也入山伐木至信安郡石室山遇見石室中有數童子圍棋歌笑_{一云云}。松子與安質置斧柯觀之童子以物如棗核與質令含咽其汁便不覺飢渴童子云汝來已久可還質取斧柯爛已盡質便歸家計已數百年親舊零落無復存者復入山得道百餘年人往往見之後亦昇天而去浙東信安有爛柯山即其地也一名斧柯山今屬衢州西安縣又廣東信安亦有爛柯山今屬肇慶府

董幼

董幼者海陵人也兄弟三人幼最小早喪父幼母偏念其多病不能治家年十八謂母曰幼病困不可卒愈徒累二兄終不得活欲依道門灑掃以度一世母許之幼在師家恭謹勤修長齋篤學未嘗暫怠遂洞明道術年四十一夜有真人降授幼水行不漏之道以一馬鞭與幼令幼以鞭水行於水上如行平地晉安帝義熙中幼還家辭母云幼已得道不復留人間今還與家別母曰汝應在何處去復幾時可還幼曰應在峨嵋山更受業未有歸期中表鄉鄰共送幼至區陽西江見幼鞭水而行漸漸而遠顧謂二兄曰世世傳道業矣

范豹

范豹者巴西閬中人久住支江百里洲修太平無為之道臨目噓漱項有五色光起冬夏惟單布衣至桓溫時頭已斑白至宋文帝元嘉中狀貌不變其占吉凶雖萬里外事皆如指掌咸問先生是謫仙耶云東方朔乃黠我我小兒時數與之狡獪又云我見周武王伐

紂洛城頭戰前歌後舞宋文帝召見豹答詔稱我或稱吾元兇爲太子豹從東宮過指宮門曰此中有博勞鳥奈何養賊不知文帝惡之豹豹自盡江夏王使埋於新亭赤岸岡文帝令發其棺看柩無尸乃悔之越明年豹弟子陳忠夜起忽見光明如晝而見豹入門就榻坐又一老翁後至豹起迎之忠問是誰豹笑而不答須臾俱出門豹問忠比復還東鄉善護我宅即百里洲也

馮伯達

馮伯達者豫章建昌人世奉孝道精進濟物道民陳辭得旨與戴矜相似又是同時人也宋文帝元嘉中伯達下都後寄戴鄉人還南行至梅根阻風連日伯達謂船主曰欲得速至家但安眠慎勿開眼其夜聞舫下刺樹抄而不危抗竊有窺者見兩龍挾梁翼船迅若電逝未曉到舍伯達尋入廬山不返

馬榮

馬榮者住梁國穀城中兩眼赤爛瞳子不見物而能明察洞視北方多病癩鄉里不容者

輒來投榮榮爲治之悉差榮云患脚常乘白鹿車行無遠近不見人手推引而車自至或一日赴數十處請而各有一榮凡與人語自稱厄子作牽車三詩類乎識緯宋武帝孝建二年三月初作書與兩國人別至十六日中時果化

韓越

韓越者南陵冠軍人也心慕神仙形類狂愚隨師長齋誦誅口不輟響常著屐行無遠近入山或百日五十日輒還家人問越未嘗實對後鄉人斫枯木作弓於大陽山絕崖石室中見越與六七仙人讀經越後自山中還於密村暴亡家迎喪覺棺輕疑非真尸發看惟竹杖爾宋孝武帝大明中越鄉人爲臺將北使於青州南門遇越容貌更少共語移時訪問親表存亡悲欣慨然越云吾婦患嗽未差今因與卿散一裹令溫酒頓服之臺將還都具傳越言越婦服散嗽即愈

嚴東

道士嚴東不知何許人年四十餘齊高帝建

元中詣晉陵依道士李景遊嘗自悔若愚衣弊履穿惟齋一瓢亦無經書及與之談論所造深微而聲音清徹聽者駭異其爲笑傲歌謠和光混迹時人皆知非常而欽尚之在晉陵五六年一日將別援筆註靈寶度人經辭不停翰窮日而終乃入溧陽甌山中後亦不知所止

王靈輿

王靈輿者九江道士性和緩而勤於道始居五老峯夜有神人謂曰得道者各有其地如植五穀於沙石中則不能成既有飛昇之骨當得福地靈墟可以變化雖累德以爲土地積行以爲羽翼苟非其所則魔壞其功道無由冀矣靈輿問可棲者何地曰朱陵之上峯紫蓋之鄰岫可以沖天矣遂遷衡嶽中宮凡一紀梁武帝天監十一年七月十三日群仙下迎於壇所而昇天宋徽宗賜號通微集虛大師

雙襲祖

道士雙襲祖字仲遠梁時吳人也始居南嶽

後遷九嶷山潛心於道以求度世嘗謂誠素所至高真必通遂刻志誦黃庭玉篇因作黃庭觀使弟子居之自棲於白馬巖一日歸觀沐浴閉室而坐凡七日不出弟子驚異開視之忽然輕舉遺仙帔於木杪時唐太宗貞觀

元年夏四月也巖中卧席後百餘年皆不壞

詳見南嶽總集

桓閭

桓閭者不知何許人事陶隱居居茅山華陽館十餘年立性端謹執役之外寂寂然若無所為一日有二青童一白鶴自空而下集於庭隱居欣然而接謂已當之青童曰太上所召者桓先生也隱居默計門人皆無姓桓者索之惟得執役桓閭焉詰其所致則曰常修默朝之道親朝大帝已九年矣故有今日之召將昇天隱居欲師之閭執謙固辭隱居不獲請且謂曰某行教修道勤亦至矣尚淹於世俗得非有過致然幸為我訪之他日見諭閭於是服天衣駕白鶴昇虛而去後三日密降而言曰先生之陰功固已著矣然所修本

草以蠱蟲水經之類為藥功雖及人而反害物命以此更一紀當解形去授蓬萊都水監隱居復以金石草木藥可代物命者別著本草三卷以贖其過後果解形而去歷世真僊體道通鑑卷之二十八

歷世真僊體道通鑑卷之二十九

淳熙山聖壽萬年宮道士趙道一編修

冠謙之

天師冠謙之字輔真上谷平昌人後魏刺史讚之弟也遠祖仁漢成帝時隱王屋山白日飛昇號明真先生仁之孫曰雋亦乘龍而去父馮翊為河東太守以秦符堅建元乙丑歲七月七日生天師年十六長八尺有餘至十八歲乃傾心慕道幽感上達有仙人成公興傭於謙之從母家因易之使墾田一日於林下算周髀不合公興因教之應手而成謙之乃嘆賞有頃忽謂謙之曰法師有意學道可相與為隱乎遂與之遊華山常採藥食謙之自此不復飢又隱於嵩山數年一日謂謙之曰某出當有人將藥相遺但食之果如所言視其藥皆毒蟲臭惡物乃恐懼而出公興還具對公興嘆曰法師未易得仙但可為王者師後曰某不久留翼日午時當去公興亡後先生幸為沐浴自當有人見迎公興乃入第三重石室而卒謙之躬自沐浴明日日中有

叩石室者謙之出視見兩童子一持法服一持鉢及杖謙之引入至公興尸所公興倏然而起著衣持鉢執杖而去謙之遂守志嵩陽不復出後魏明元帝神瑞二年夏四月一日遽有二人衣翠衣羽服冠洞雲冠乘龍持麾來曰老君至徐聞音樂之聲斯須太上乘白玉車九龍騶駕威儀赫奕神仙導從集上山頂謙之虔心作禮見開五宮門臺殿岌然太上坐白銀華林下勅仙伯王方平引謙之前立曰吾得中嶽集仙宮主表稱張道陵登真以來修真之人無所師授今有中嶽道士冠謙之行合自然宜處師位故吾授汝以天師之任及雲中音誦新科經戒自開闢以來不傳于世今運數當出汝宜修之佐國扶命以化生靈遂出新科經戒九卷謙之受訖五雲臺殿俱隱太常二年正月十五日太上復降又賜新科符籙十餘卷且戒之曰前後符籙得人可授授非其人罪及汝身謙之誓首奉教而後志行日新太武帝始先中朝廷遣洛州刺史梁公率官千餘人詣山迎師至闕而

朝野未甚信奉惟司徒崔浩師事之上疏曰臣聞聖主受命則天應以瑞河圖洛書皆寄言蟲獸未若今日神人對接也昔漢高帝雖曰英聖四皓猶不屈之上悟其言乃命使奉玉帛告祭嵩嶽及賜師宮館前席問道禮遇益恭復欲授輔弼之位師固辭曰我今聖師太上四臨神仙六降并授天經科法量其威感乃真聖也遂建都壇初靜輪天宮制作威儀一如經戒於是天下歸仰焉至庚辰歲師請為帝祈福於中嶽精誠通感太上冥授帝以太平真君之號并冠服符籙師還具奏是歲改為太平真君元年二年謙之奏曰今陛下以真君御世建靜輪天宮自古未有當受符籙以彰聖德上然其言乃登壇受之九年正月七日謂弟子曰吾昨夢成公與召我於中嶽仙宮五月二十五日果羽化有青炁若煙出口中至天半乃消其體漸縮識者謂之尸解降年八十四至七月十五日東郡沈猷採藥於嵩嶽頂見謙之身作銀色光明如日由是知為仙人

李皎

李皎為冠謙之弟子遂服氣絕粒數十年隱於常山年九十餘顏如少童一旦沐浴冠帶家人異之俄而坐化道士咸稱其得仙尸解

韋節

法師韋節者字處元京兆杜陵人其族名家藏書萬餘卷節幼而好古通經傳子史傍及占候之術靡不精索十四歲後魏武帝擢為東宮侍書及孝明帝初即位太后視朝出守於魯郡莊帝立復為陽夏守以可近嵩山隱真道士趙靜通法師也既至遂還舊絃於朝而謁法師受三洞靈文神方秘訣靜通曰嵩高是神仙福地項浮屠氏棲於此非有絕俗之行直欲託名嶽以驚風聲由是積尸沈魄穢濁靈山比者天文氣候怨戾失中恐災流於此尚宜安居耶汝可抵商洛岷益間吾當遊泰山或乘桴浮海節乃卜居華山之陽人因號華陽子餌黃精白朮胡麻茯苓丹砂雄黃修三一雌一八道九真又行黃庭內景智慧消魔經法撰為三洞儀序註妙真西昇等

經及莊列中庸孝經論語惟老子周易有別論八十餘卷又讀太和真人樓觀先生內傳復為一卷周武帝嘗請受靈寶五符赤書真文有白鶴臨壇徘徊而去帝嘉之屢有錫賜復詔為修真之曲遂撰精思法上嘆仰再四因賜號精思法師時有陳國使周洪正聞師名欲即問道帝召與之對剖析深微抑揚三教洪正美而嘆曰此三界傑人非止二國之可仰而已帝特改號玄中大法師已而廬於山之東嶺屏諸喧雜以宅清曠上聞之復賜太元精舍武帝太和四年外紀作天康忽彩雲如蓋覆其廬且曰子當乘此而去遂不出戶十有二日乃寂然解化降年七十三

田仕文

田法師名仕文右鄆人也隋文帝開皇七年試業入道事韋節法師傳授三洞經法及符訣又誦靈寶生神章二經居常餌服白朮茯苓久而有益每煉氣於靜室或一句半月而出顏色愈光澤凡八節十直庚申日齋戒修奉未嘗少輟為人祈福無不通感或為人救

病無不平愈陳綱常請懸忽袖降表數顆在壇食之則非人間所有者又道士尹漆一日令佩符籙函忽墜水驕然有聲漆已在岸其真籙神符之靈皆此類常語人曰世之人有苦必授之然未之信時有里人賀蘭開者受戒於師一夕忽卒為鬼吏所執至一府庭如人間有司之所掌簿者閱之謂開曰汝有受戒之名可復還由是重蘇其通幽達冥之效如此四方之際信尚者多而受賜不可勝紀唐太宗貞觀十七年六月十九日羽化人皆見幡花羽節迎師而去且曰吾今登南宮福堂矣降年七十有五門弟子惟尹文操為入室者

徐則

道士徐則者東海郛人沉靜寡慾常懷棲隱之志乃入縉雲山修道久之太極徐真人降謂曰汝出八十當為王者師然後得道因廬天台山絕粒養浩所資惟松水而已隋煬帝為晉王鎮揚州以書召之謂門人曰吾今年八十一王召我徐真人之言驗矣既至晉王

請授道法則辭以日不利其夕雖香火如常朝禮至五更寂然返真王命使送還天台時自江都道中人或見師徒步云得還及至舊隱以經書道法遺弟子仍掃一室曰有客至宜延之於此有頃跨石梁而去不知所在翌日果使至時年八十有二晉王追嘆三遣使圖其形又命柳詵為贊曰可道非道常道無名上德不德至德無營真風扇矣粵有夙煉金骨怡神玉清石髓方漱靈丹欲成言念葛稚將從茅盈我王遙屬爰感虛誠柱下暫啓河上沈精留符信在化杖龍輕求思靈迹曷用摠情

岐暉

法師岐暉字平定京兆人也周武帝太和五年入道未幾會武帝沙汰釋老之徒因復流俗至隋道法重興時年二十六景行之心愈固遂事蘇法師於通道觀久之傳授三洞經法修按未嘗少怠內以希夷全其真外以逍遙適其趣歷年之久湛然自得隋大業七年煬帝親駕征遼暉謂門弟子曰天道將改吾

猶及見之不過數歲矣或問曰不知來者若何曰富有老君子孫治世此後吾教大興後數年隋果亂至唐高祖欽異其德遣使齋龍絲以祈福醮多有白雲覆壇雙鹿馴矧其精感如此上嘉之詔修樓觀壇宇尊像一皆鼎新仍以藍田充焚修之費命師主之一日上躬詣祠庭謂左右曰老君乃吾聖祖也今為社稷主不有洪建其可已乎因改觀為宗聖詔賜粟帛以充齋給師每為國祈謝之外修存三守一及卧斗之法嘗以仙經云欲為仙客入太白於是擇門人志道者俱往既至而返則室中常有神仙談笑唐太宗貞觀四年七月十八日忽謂門人曰翌日巳時吾當去世及期果羽化春秋七十三

孫思邈

孫思邈京兆華原人七歲就學日誦千言洛州總管獨孤信見其少異之曰聖童也顧器大難為用耳及長好談莊老百家之說周宣帝時以王室多事隱於太白山學道煉氣養形求度世之術洞曉天文推步精究醫藥審

察聲色常蘊仁慈凡所舉動務行陰德濟物為功偶出路行見牧牛童子殺小蛇已傷血出思邈求其童脫衣贖而救之以藥封裹放於草內復月餘出行見一白衣少年僕馬甚整下馬拜思邈謝以言曰小弟家道者所救思邈聞之不以為意少年復拜思邈請以別馬載之偕行如飛到一城郭花木正春景色和媚門庭煥赫人物繁雜儼若王者之居少年延思邈入見一人端正美貌帽絳衣侍從甚眾欣喜相接謝思邈曰深思道者故遣兒子相迎前者小兒獨出忽為愚人所傷賴脫衣贖救獲全其命此中血屬非少共感再生之恩今得面道者榮幸足矣俄頃延入若宮闈內中見少年女子領一青衣小兒出再三拜謝思邈曰此兒癡騃為人傷損賴救象害思邈省記嘗救青蛇即訝此何所也又見左右皆閭人宮妓呼帽君王呼女子為后妃心異之潛問於左右曰此涇陽水府也王者乃命賓僚設酒饌妓樂以宴思邈辭以辟穀服氣惟飲酒爾留連三日問其所欲對曰

山居樂道思真煉神目雖所視心固無欲乃以輕綃珠金贈行思邈堅辭不受曰道者不以此為意耶何以相報乃命其子取龍宮藥方三十首與思邈曰此真道者可以濟世救人俄復命僕馬送道者歸山思邈既歸深自以為異歷試諸方皆若神效後著千金方三十卷散龍宮方在其內又以聲色診人之疾著脉經一卷大行於世隋文帝輔政徵為國子博士不就嘗謂人曰過此五十年當有聖人出吾方助之以濟生人至唐太宗時召詣京師上訝其容貌甚少曰故知有道者誠可尊重美門之徒豈虛言哉將授以爵位固辭不受高宗初即位拜諫議大夫復固辭時年九十有九視聽不衰范陽盧照鄰有時名而染惡疾嗟累受之不同味遐天之殊致問於思邈曰名醫愈疾其道如何對曰吾聞善言天者必質於人善言人者必本於天夫天有四時五行寒暑迭代其轉運也和而為雨怒而為風凝而為霜雪張而為虹霓天地之常數也人有四肢五藏一覺一寐呼吸吐納動

而為往來流而為榮衛彰而為氣色發而為音聲此人之常數也陽用其精陰用其形天地之所同也及其失也蒸則生熱否則生寒結而為疣贅陷而為癰疽奔而為喘息竭此而為焦枯診發手面變動手形推此以及天地則亦如彼故五緯盈縮星辰失度日月錯行彗孛流飛此天地之疾疹也寒暑不時此天地之蒸否也石立土湧此天地之疣贅也山崩地陷此天地之癰疽也奔風暴雨此天地之喘息也兩澤不時川源涸竭此天地之焦枯也良醫遵之以藥石救之以砭劑和之以道德輔之以人事故人有可愈之疾天地有可消之災照鄰曰人事奈何曰心之為君君尚恭故欲小詩曰如臨深淵如履薄冰小之謂也膽為之將以果決為務故欲大詩曰

人有屯危不自慎不能濟也故養性必先知自慎也慎以畏為本士無畏則簡仁義農無畏則惰稼穡工無畏則慢規矩商無畏則貨不殖子無畏則忘孝父無畏則廢慈臣無畏則勳不立君無畏則亂不治是以太上畏道其次畏天其次畏物其次畏人其次畏身憂於身者不拘於人慎於小者不懼於大戒於近者不悔於遠如此則人事畢矣高宗後無何制授承務郎致之尚藥局不就永徽三年二月十五日時年已百有餘歲晨沐浴儼其水冠端拱以坐謂子孫曰我為世人所逼隱於洞府修煉將昇無何有之鄉臣於金闕不能應召往來俄而氣絕遺命令薄葬不設明器姓牢之真月餘顏色不變舉尸入棺如空衣焉已尸解矣合唐書載年百餘歲釋氏通鑑載唐永淳元年隱士孫思邈卒善老陰陽醫藥之術尤重釋典世稱孫真人馬全祿所載解化年月則又後三十餘年則是一百二十餘歲合準信史所載釋氏通鑑所載非至唐明皇幸蜀夢思邈乞雄黃乃命中使齎十斤送峨嵋山頂上中使上山見老人幅巾被褐二青衣重夾侍曰有表錄上皇帝中使

視石上朱書百餘字遂錄之隨錄隨滅須臾白氣漫起因忽不見後成都有一僧誦法華經甚專雖經兵亂卒不能害忽一日有山僕至云先生請師誦經遂引行過溪嶺數重煙嵐中入一山居僕曰先生老病起晚請誦經至寶塔品欲一聽之至此先生果出野服杖藜兩耳垂肩焚香聽經罷入不復出遂供僧以藤盤竹箸林飯一盃杞菊數甌僧食之無鹽酪味美若甘露并得贖錢一銀僕送出路口僧因問曰先生何姓曰姓孫問何名僕於僧掌中手書思邈二字僧大駭迴視僕遽失不見僧乃於山中尋求竟迷舊路歸視贖資乃金錢一百文也由茲一飯身輕無疾至宋真宗天禧中僧已一百餘歲後隱去莫知所之

臣道一曰孫思邈煉氣養神精究醫藥務行陰德常蘊仁慈汲汲以善為務小蛇之傷昆蟲之微爾思邈以藥封而放之其德及昆蟲非人可及至於龍宮之報感靈異之若此道德經曰常善救物故無棄物孫

思邈以之

胡隱遙

胡隱遙者洞庭山道士也。自云角里先生之孫。其山有月里村。角里廟。累世多得道。隱遙居焦山。學太陰煉形之法。死於巖中。囑弟子曰。常視吾體。無令物犯。六年後若再生。當復我以衣冠。弟子視之。肌體爛壞。惟五臟不變。乃復閉護。及期果再生。遂備湯沐浴。加新衣。其髮鬆而黑。其髯粗而直。後十六年如前死。更七年復生。如此凡三度。約八十歲狀貌。如三十許人。隋煬帝聞之。召見。恩禮隆異。唐貞觀中。太宗詔入內殿。問攝生之道。對曰。臣所修者。匹夫之志。功不及物。帝王修道。一言之利。萬國蒙福。得道之効。尤速。臣區區之學。非九重萬乘之所修也。請歸山。後不知所之。

劉道合

劉道合者。一名愛道。陳宛丘人也。幼懷隱逸。志住壽春安陽山。隋末遷蘇山。從仙堂觀道士孟詵。傳道復入霍山。春分日。啓誓文於谷中。返數里。聞雷電而雨。遂止於巖。是多夢有

人召覺。則恍然有光。見一神人身長丈餘。衣冠劍佩。持符從介甲士六七人。謂道合曰。吾

爲黃神大威使者。今六天醜類。賊害民物。聞子好道。志節不屈。可制魔群。吾以三天正一

盟威攝召。符契授于道合。受而吞之。自是道

法所施。無不驗。唐高祖武德中。入嵩山。與潘

師正同居。高宗聞之。降詔於所隱。立太一觀。

使居之。時將封泰山。雨不止。帝使道合禳呪。

俄霽。得寵。賜輶散。貧乏。洛邑苦飛蝗。道合以

符示官吏。仰散貼境內。則立消。唐高宗咸亨

中。上召作符。既成。未克進。忽料簡書汲汲然。

似有行意。弟子問之。則曰。廬山司命君召吾

有頃沐浴。具冠褐。而化。調露中。創奉天宮。遷

道合墓。發棺見骸骨。拆若蟬蛻者。一云蟬有

若蟬蛻者帝聞之。曰。爲我合丹。而乃自服去

耶

歷世真僊體道通鑑卷之三十 漢

浮雲山聖壽萬年宮道士趙道通編修

梁湛

道士梁湛者。字考成。京兆扶風人也。博通經史。雖陰陽占候之術。靡不精究。外聲利。薄滋味。唯以安閑自適。一日相者見之。且曰。此子

目流白光。貌集真氣。非常人也。後果樂神仙

道。大魏元帝咸熙初。事鄭法師於樓觀。時年

十七。仁不勝生。和不好勝。人皆樂之。常夢與

仙人遊。或登山。或酌石髓。由是自有所娛。

至晉惠帝永興二年乙丑五月五日。老君命

真人尹軌降于樓觀。乃盡弟子禮事之。踰月

遂授煉氣隱形之法。次授水石還丹術。卒授

六甲符及采服日月黃華法。後隱於終南山。

食悉吞符。大盡其妙。又廣索丹砂。還而爲餌。

凡辭氣之出。則音韻清徹。自是欽奉者多。乃

深入巖谷。嘗阻大雪。鳥獸俱斃。而湛獨守寂。

其志堅篤。故靈真自集。目能視地中物。耳能

聽數里聲。一日忽謂門人曰。有朋友待吾於

南峰。今須往矣。乃冠服而出。則雲氣迷紈。不

歷世真仙體道通鑑卷之二十九

見其形惟聞鼓吹之音隱隱於空時元帝大興元年戊寅歲混元寶錄云能飛行變化三年丹成白日昇天

孫微

道士孫微者字仲宣不知何許人即尹通之籍師也性端直寡言語外視若愚而中養素人莫能測之前趙初先中師事王先生方十八歲先生與之出處人皆呼先生為大煉師微為小煉師先生為時所望請訪益多而遂隱遁惟微住樓觀或宿於木杪與人迹罕及之地居常編葛為席合目端坐若有所思人或侮之謙以自牧故皆歉然自失而退每觀人顏色不待人語言而已知人吉凶年七十餘秦建元八年春忽謂侍者曰吾須暫行乃拂衣而去終莫知其所適其友馬儉思之乃取葛席置靜室中供養凡數日輒聞席上有人語其靈異如此

臣道一曰孫微疎絕塵俗樂道養真人或慢之謙以自牧故人皆自為之歉然矣道德經曰夫惟不爭故天下莫能與之爭又

曰聖人之道為而不爭孫微之謂矣

馬儉

法師馬儉字元約京兆右扶風人尹通之度師也年十六歲長八尺耳大而厚垂手過膝額有伏犀手有縱理損聲色外名利博通經史尤長於風騷郡邑異之有辟命不就秦甘靈中諫道士籍於樓觀從孫微學道時十七歲遂授以道要其經史之贍則五符真文三皇內文道德靈寶衆經遁甲占候之法其藥術之妙則斷穀服水餌棗膏天門煎木煎商陸酒五方雲牙六甲符諸天內音行氣導引之方其役使萬靈制御群邪則有八吏六丁二十四神三皇衆要之科無施不驗姚萇聞而奇之遣使往召辭以疾萇嘉其節乃給香燭欵尚加厚儉志道益堅仁惠周物人所奔湊日以滋多一日天神降而言曰法師夙有功德今復勤修道業丹名玉屑白簡玄臺積有日矣但保其天年必得度世何區區於祈禱役役於召劾者哉自可優游三素混合五神絕諸聞見獨保清曠由是怡神養素不復

出而仙真時降年九十八後魏太武帝大延五年冬十月一日謂弟子尹通曰吾平生所修所感當祕之勿泄也頃有白雲從西北來覆寢室須臾返真惟聞香氣不絕而白雲南舉焉

尹通

道士尹通者字靈鑒真人軌之後也幼從儒學群經子史博無不覽常嗟幻化非固每仰天而歎父母未之達迫以婚宦通乃跪伏曰切聞張真昇天鎮南嗣美茅君得道太守投誠況高祖太極真人之遺德可無隆紹願從所志父母許之遂飄然而去時天下寇難縱橫通履艱危冒驚險而至樓觀年二十六後魏太武始光初事馬儉法師服勤歷年方授真人秘韞玉字金書及侍怙已失孝禮既盡而希真守一之心與日俱往香火朝謁無或少怠服黃精雄黃天門冬數十年體漸清爽性亦敏慧尤急於療疾可愈者治之言不可者決不可救太武好道欽聞其名常遣使致香燭俾之建齋行道自是四方請謁不絕而

通惟以功德為懷與而無求散而無積時有姪法興及牛文侯王道義與其徒七人繼踵而來共希靈迹故仙風真教自此復彰年一百一歲耳聰目明尤能夜書至孝文太和二十三年承明二年改太和夏四月八日忽與門弟子為終天之別有頃奄忽而化顏色如常藏劍之久老子昇真降之西有神燈數枚光映其上而後漸散

牛文侯

道士牛文侯隴西人也性識穎拔學洞古今尤深於莊老至於天文地理無微不綜又善誨人隨其性導以忠孝其勸戒則示罪福之理其威禁則以符籙之科由是法教重興人多化惡為善嘗為人講說未始措意於利財至于不得已則受小而辭大訪人貧乏密遣致物於其家欲人不知其所從來也每冬寒則布穀於地使禽蟲有所食陰功密惠大以及於人小以及於物修身積德久而愈篤西魏文帝大統五年八月二十八日夢青衣道童告云上帝有命宜早治裝明旦當發覺

乃與門人別翌日澡浴訖果化降年八十二

王道義

道士王道義者魏時人博覽群書兼明緯候知終南有尹喜登真之所後魏孝文帝太和中自姑射山將門弟子六七人來居之初道士牛文侯尹靈鑒等四十餘人教弘道化朝野欽奉時歲歉常住之資殆不充給道義大修觀宇與土木工丁匠就役日常百數而用度不乏人訝而窺之則倉庫皆備取多而益不窮咸知師之神化陰有靈助由是樓殿壇宇一皆鼎新惟秦始皇所造老子殿以其宏麗不加修飾令門人購集真經萬餘卷皆自捐己力未始求於人其性浩然無係累室中常有人語弟子輩潛往伺之乃真仙之降會也後魏宣武永平中將反真之際白雲滿室異香盈庭踰日方散里人有見道義乘鹿而去

陳寶熾

正懿先生陳寶熾潁川人也年二十一不樂婚宦後魏孝文帝太和十八年隸籍樓觀事法

師王道義未幾羽化遂遊華陰復遇陸景真

人授秘法而歸於是端誠虛已依按修持及誦大洞經久之通感故珍禽奇獸常來侍衛每朝老子祠及八節投龍簡則白虎馴近左右導從往來人或有意惡意則咆哮奮鬪觀左之槐使彼惡者驚畏自匿人因號曰老虎木其德感如此通幽達冥無所不至事有未兆則先知其崇妖害人禁之立止西魏文帝欽異之召入延英殿問道時太師安定公及朝士大夫皆從而師之年七十有六大統十五年三月十七日告門人曰吾昨夢仙官召不果久留來何為欣去何為愴生死道一夢覺理均爾等體之無或悲矣言訖奄忽而化詔謚正懿先生

王延

道士王延字子元扶風人也纔九歲好道西魏孝文帝大統三年丁巳入道師正懿先生陳寶熾至十八肄業於樓觀與真人李順與相交善未幾訪華山雲臺觀復師焦曠真人授三洞秘訣真經惟松餐澗飲以希真理後

周武帝欽聞乃遣使召之焦真人謂曰道教陵夷久失拯援可應詔出弘大道教吾自此逝矣至都久之得請還西嶽雲臺觀復詔增修以居之然山石無土致之極勞因虛默禱于天忽涌土出於觀側取多而不竭嘗苦乏

油乃置一器經夕自滿久用而有餘凡賓客將至則先有二青鳥其狀如鳥飛鳴報之每登仙掌陟蓮峰如履平地居常出處有猛虎馴遠若相保衛是時天下溺於浮屠氏且其徒不能維持禪律之學務以罪福駭俗其弊

浸盛故行沙汰道教亦從而幾絕時師之名獨爲上所欽召至闕咨問道要復欲建通道觀命校讐三洞經法科儀戒律飛符錄凡八十餘卷又撰三洞珠囊七卷詔頒於通道觀由是道教復興朝廷以大象紀號至隋文帝禪位置玄都觀詔延主之開皇六年丙午特召見於大興殿上齋誠受智慧大戒於是祥風景雲羅覆壇所因職以道門威儀威儀之名自茲始矣時公卿大夫翕然欽附仁壽四年春三月吉日告門人曰吾欲歸西嶽但恐

上未許至九日羽化於仙都觀有白鶴飛鳴徘徊庭戶上異之遣使護葬西嶽及就墳但空棺而已

臣道一曰王延幼年學道能得明師扶教立宗通靈感物觀武帝詔修雲臺觀則患勞於致土默禱于天地忽湧土出取多不竭此積誠動天夫豈易致哉道德經曰天道無親常與善人此之謂也

李順興

道士李順興京兆人母因夢明星自天而降遂有娠及生有一道士來曰此子乃前生得道人暫寄胞胎也纔九歲好清虛常端坐湛然不動父母諭其意俾師正懿先生年十一與道士籍常誦大洞經勤久不怠正懿乃爲立壇授五千文及黃庭經且曰汝雖尚幼心已合真考之隱訣三年誦之白日昇天爾宜勉之遂即所居虔懇修誦不三年忽於秋分之夕有飛仙千數集空中神光照室出望則有二人曰上帝有命遣仙官於紫閣巖室中相待吾直日之神也以命來召遂與乘鳳馭

忽爾而至乃見三仙人各據一床有五色雲霞羅覆其上侍從幢羽殆不可名乃誓首請飛昇之道且曰子有宿德位階真人欲形神同舉不爲難也但太上命子下生以積功勤今子齋心誦經積有日矣然功未及人可遽得乎於是湮^湮懇以告冀勵凡庸且曰積功累行以償前過未知可乎仙曰善哉是心良可愍也子雖骨氣合真而胎形未脫命侍經仙郎開九色流霞之輶出經三卷置三仙之前長仙乃手發太上玉真金光經謂曰吾是上清真人趙伯元昔受是經於東華青童君學以成真今付子宜修之次仙又出神洲七轉七變傳天經謂曰吾是上清真人張仲遠昔受此經於小有天王修之得爲真人今授子宜勉之三仙乃於二仙之手中傳取真經復囑曰吾是上清真人李少君昔奉此經遂獲昇真吾與子有緣故來監度若依四極體科行之七年身得飛騰七百年中聽傳三人無其人則當封之名山今所授仙經真術能精修不已則化俗成功可指日而仙矣苟無此

道則神不洞察體不清虛寔為八帝之所錄
六天之所傾則何足以化俗哉真道盡此子
能勤修自當神會從而為頌曰至道本無形
因物以為名人能勤上學仙道自然成玉帝
召赤子金真總黃庭六覺既玄會八難於是
冥熙神光七轉虛襟明四清呼吸能萬變俛
仰朝百靈混化遊塵路迅轡撫雲旌契我諸
賓友與子期蓬瀛已而三仙命駕而去遂復
所居歸誦其經按其術年十七道成變化無
方應機接物未嘗凝滯正懿知而待之愈厚
有疑者密試之以湯又加之火終不云熱使
之蹈火赴水不能焚溺時西魏文帝聞其名
詔都城凡百餘坊同日作齋皆能赴之上雖
知其能分形化影尚疑能近而不能遠復詔
岐寧同華四州同日為齋請又能徧赴由是
朝野欽信其始人未知之但稱為李煉師及
其通感靈變則號曰李聖師年三十八大統
六年託疾告終既葬之日有姪遇於驪山道
中謂曰若天子尚未忘我則於此作吾像以
北向居之當為國家辟北方之淫俗也姪還

家方知已化遂以實奏遣使發視則空棺而
已乃立祠於沙苑

侯楷

道士侯楷字法先京兆人也年十四力究經
典尤精老莊之學趣向孤高不畢婚宦遂就
學於正懿先生年十九後魏宣武正始中為
道士授玄文秘訣晨夕之奉久而愈勤正懿
曰汝雖秉心勵節於道不懈苟非栖隱山林
未易有得也楷曰道在方寸何必山林曰吾
亦知道無不在然人間修之時亦有得但古
來仙者多託巖藪成真之後出而同塵上真
亦曰大洞真經不得人間詠之詠之則大魔
敗之也又葛仙翁將登真別弟子鄭思遠云
何不登名山誦大洞真經一諷而一詠玄音
徹太清由是知入山非惟不是可欲抑亦自
然與經道相符汝今景慕希夷入山乃其宜
也曰入山雖可存真然遠遶几席寧違科律
之責耶師嘉其言且曰道非知之難行之難
也果能始卒無替道在中矣逮正懿羽化乃
卜居於寒谷行三奔術三奔術者乃黃帝三
奔御女之術後世遂

以傳述神仙之所深戒侯楷受學於陳寶
其神仙源流有自來矣未必三奔之術也然
神仙日月高奔之法頗契大道恐是誦大
奔非三奔必後世作傳之人誤書也
洞經及三皇內文勅召之法其居有清泉環
流三松偃覆灑然幽寂是為栖真之所遂號
三松觀人有為魑魅之害者無有遠近皆乞
救於楷或持之以禁呪或示之以符術則無
不立除之將去無他疾謂門弟子曰昔費長
房失符為鬼所殺吾非失符也終歸道真苟
世俗不達以謂吾為長房者也春秋八十六
周武帝建德二年冬十月解化

嚴達

法師嚴達字道通扶風人也自髫髻已有方
外志每得一花一果輒羞獻於像前樓觀侯
法師見而器之後魏明元帝永興中入道年
始二十齋真之暇常請問大經遂學窮瓊韞
博通妙術周武帝建德中詔法師及王延於
便殿是時已沙汰浮屠氏又下議於公卿復
欲去道家者流上問法師道與釋孰優曰主
優而客劣上曰主客奚辯曰釋出西方得非
客乎道出中夏得非主乎上曰客既西歸主

無送耶曰客歸則有益胡土主在則無損中華去者不追居者自保又何送乎上嘉其對然不免有所減損自五嶽觀廟外悉廢之特為法師建通道觀於田谷之左復選樓觀之士十人俾共弘真教時王延更欲多得之法師曰古之達者先存諸己而後存諸人今上不欲廢道教而意則去繁但道貴得人玄綱自振何必多人耶蓋多人則多累反為吾道之玷夫道不欲雜雜則多多則惑惑則亂亂則真理喪矣詎有益哉遂與王延蘇道標程法明周化生王真微史道樂于長文張法成伏道崇等十人以道術相忘同乎出處世號曰田谷十老至隋室道教復振文帝開皇中詔重修二廟精擇羽流累致墨詞以祈景福於是朝野宗奉焉煬帝大業五年三月十七日聽周法師鼓琴乃曰琴聲感神當有神降更奏一曲吾聽之曲未徹奄然返真春秋九十一

于章

法師于章字長文右扶風人年七歲父母教

讀孝經數日乃曰聞有道德經意願習誦父母異之隨其所好令習于侯法師至西魏大統九年披度服巾瓶之勞凡十有四載法師憇之為開三洞衆真要法倒篋相付嘗自謂曰真人符命非俗可傳今吾得之固所寶也於是靜室圖寫雲篆龍章精嚴其事而施之於人靡不神驗適會詔選戒潔之士十人居通道觀而師與焉然常懷希真之心期居幽寂至周靜帝大象二年遂卜觀之下西嶺下誅茅累石嘯詠林泉餌黃精茯苓山地黃又服氣吞符飛章設醮如此積勤歷年無輟隋文帝開皇十七年復受皇化丈人太極真公六十甲子及五帝五嶽符印凡一百三十六首并論天地源流符之本末置壇法式乃錄授符日月及真仙誥訣次第記之名為起序由是通真之心與日俱進故除妖翦崇其神變不可量而流俗霑惠日益多矣煬帝大業十年六月十四日羽化春秋八十有二臨窆之日有一白鳥自棺而去人謂得蛻形之道

張法樂

道士張法樂者南陽人幼而學道性悅泉石纔及成童之年託迹樓觀事尹起法師竭誠致力於左右積有歲月感其勤苦遂付道要露盟之夕神燈發輝慶雲流彩而後巾瓶之奉几案之勞禮盡始末遂尋幽訪奇卜居於耿谷之西水樊茹蔬謝絕人事日誦五千文及修雌一之道煉形養炁抱一守真凡三十載雲生梁棟霞集牕扉人號為雲居觀久而道業已著靈感自通有虎踞躍虺震視之而不畏後乃往來馴伏似有所衛人或請謁褻慢無誠心則皆為所逼而不得至旦夕常聞有神鐘聲隱隱於耳然莫測其遠近每齋日有草衣人二十許常送薰陸香及乾棗數枚出戶襲視之遂不見西魏廢帝三年三月謂弟子張通曰我雖幽感奈功德未就近有神告必不久留當委形厚土二百餘年冥事貴密汝可略知至四月十五日清旦凭几而化時有白炁如雲穿牖而出長丈餘食頃方散

巨國珍

巨法師名國珍武功人性淳厚好神仙學年

三十斷俗緣而事游法師於樓觀時隋文帝仁壽之四年也焚修之外口必誦經心常存一名利兩忘喜怒哀樂俱遣食蔬衣弊所守彌篤或有遺物者隨得隨散或有輕侮者終不恚怒法師嘉其行乃授以思微戒錄封召符章依按而修勤亦備至每臨壇誦經遍未及數則雖冬風夏日未嘗輒廢一日因感疾人勉之以藥曰道勝則疾除何慮之有其自信之如此由是遠近之俗嚮風而至不可勝計春秋六十唐太宗貞觀八年夏五月十三日晝寢門人忽聞車馬之聲有頃瓦屋皆震法師遂化

歷世真像體道通鑑卷之三十

漢十

十四

歷世真仙體道通鑑卷之三十一

漢十一

浮雲山聖壽萬年宮道士趙道一編修

鍾離權

真人姓鍾離名權後改名覺字寂道號和谷子一號正陽子又號雲房先生燕臺人也

京兆咸陽人曾祖諱朴祖諱守道父諱源皆漢代著名

父列侯至雲中府生仙誕之時異光數丈狀若烈火侍衛皆驚真人之相頂圓額廣耳厚肩長目深鼻聳口方頰大唇臉如丹乳遠臂垂如三歲兒晝夜不哭不食第七日躍而有聲曰身遊紫府

名書玉京其音如鐘行如奔馬童稚莫之能

及一云少攻文學仕漢至諫議大夫因表李聖達事謫官江南漢祚既終歷魏仕晉

及壯仕晉為大將統兵出戰西北土蕃兩軍交鋒忽天大雷電風雨晦冥人不相覩兩軍不戰自潰

漢十一

將軍周處攻征失利

真人獨騎

奔逃山谷迷失道路夜進深林幽澗期以全生乃遇一胡僧鬚頭拂額體掛草結之衣引行數里到一村莊曰此東華先生成道之所將軍可以歇泊揖別而退

一云遇一僧人逆指東南廟宇門前見二本青道者遂問此何方也答曰此紫府少陽帝君所居也

人未敢驚動莊中良久忽聞人語云此碧眼胡僧饒舌相撓莊中一老人披白鹿裘扶青藜杖抗聲前曰來者非大將軍鍾離權不真人應曰是老人復曰爾何事不寄宿山僧之所真人聞而大驚心想曰必異人也是時已失虎狼之威遠有鸞鶴之志不覺回心向道哀求度世之方於是老人授以長生真訣赤符玉篆金科靈文金丹火候青龍劍法囑之勤行真人告辭出門迴顧莊居不見其處自是領悟玄旨一云自知夙有仙骨故擺脫世緣莫紹仙果首遇上仙王玄甫得長生訣再遇華陽真人傳太乙刀圭火符內丹洞曉玄玄之道一云昔軒轅黃帝得金丹秘訣以玉匣藏於壽春縣東紫金山懸鐘洞真人得遇師傳之後復遊雲水至魯居鄒城入崆峒於紫金山四皓峯居之遇仙人引入洞獲玉匣秘訣至德內全遂終妙道

漢十一

晉朝五月二十日後有唐進士呂紹先屢舉不第乃縱遊天下首於廬山遇大龍真人傳劍法後於長安道中遇真人題壁間云坐卧

常將酒一壺不教雙眼看東都乾坤世界無名姓疎散人間大丈夫紹先乃再拜真人令紹先作言志詩紹先詩云生在儒家遇太平懸纓垂帶布衣輕誰能世上爭名利臣侍玉皇歸上清真人喜曰予所居在終南山鶴頂有洞子可予此行真人乃神示變化頃刻輒到一峯洞門霞彩三虎踞門真人叱之虎下絕澗遂飲紹先以元和之酒坐石談玄須臾有青童持蓬萊山書云群仙宴聚邀先生赴天池論五元真人神遊記真人臨去謂紹先曰爾既到此從吾奉道今予當名岳字洞賓吾今去矣汝但解屏塵勞肅清仙骨吾不晚即還以三虎守門於是冉冉白鶴前望東南雲際渺渺而沒岳遂將真人所付洞中之書朝夕親閱次日真人還謂曰得無憶歸否岳曰塵緣既斷俗骨已清幸從真人得探妙道豈敢再生塵累耶真人曰善哉汝等守陰者惟知是魄有陽只是冥魂世人不知分離陰陽之異若能全陽而聚其冥魂以合陰魄使陰陽相合魂魄成真是謂真人岳問曰至理

甚深何以全形真人曰慧發冥冥泰定神靈神既混合豈不契真金形玉質本出精誠大藥既成身乃飛輕是夕賜以上真玄訣俄有扣戶者乃清溪鄭思遠與泰華真人由東南而來緩步凌虛體凝金碧相揖共坐少頃適尹思逸煉丹之所遂造仙扉施真人曰此侍者何人也真人曰今朝呂海州讓之子本習儒墨失意上國邂逅長安酒肆從吾奉道通陰陽制煉形神入妙之微岳乃拜二仙鄭真人曰形清神在目秀精藏子欲脫塵網可示一詩授岳金管霞箋靈膠犀硯岳立獻一詩云萬劫千生到此生生身始得飛輕拋家別國雲山趣煉魄全魂日月精比見世人論九鼎欲窮大藥訪三清如今獲遇神仙面紫府仙扉得姓名三仙相視嘆其才清句麗時春禽啾啾真人謂岳曰可於洞口題云春氣塞空花露滴朝陽拍海嶽雲收又謂岳曰吾朝元有期十洲羽客至玉京奏功行以陞仙階恐汝不可久居此洞後十年洞庭湖相見取筆於洞中石壁草書一十六字曰晝日

高明夜月圓清陰陽魂神混合上昇擲筆告岳曰世間遊行當施利濟之道行滿功成復當際會即見數仙子綃衣露彩手捧金簡靈符云上帝召鍾離權於是翔鸞飛鳳金幢玉節僊吹嘹亮冉冉而去岳不勝依戀久之客遊江淮洞庭荆湖鄂岳及汴洛兩都道成仙去其問答玄妙神仙施肩吾編之為鍾呂傳道集今行於世宋欽宗靖康初封真人為正陽真人元至元六年正月褒贈正陽開悟傳道真君。

劉綱

劉綱晉時下邳人也初居四明山後為上虞令師事帛君受道治中部事歷年道成作續仙傳行於世一日邀諸親故人會別飲食畢上縣廳側大皂筵樹上去地十餘丈舉手而別忽然飛入雲中而去其妻亦得道同時昇舉。

王烈

王烈字長休邯鄲人也烈入海東抱嶺山中嘗與稽叔夜同遊烈得石髓如飴即自服半

餘半與叔夜叔夜既至皆凝為石又入一石室室中有兩卷素書烈讀不知其字不敢取頗記十數字形體歸書之以示叔夜叔夜盡知其字烈喜乃將叔夜同往識其徑分明了了往至矢石所在烈因語弟子曰叔夜未應得仙也

淡十二

五

劉道成

劉道成豫章新吳人也學黃老術晉懷帝永嘉中以明經入仕累遷陳州刺史後歸鄉里精持香火奉大羅真符後數十年全家白日

昇天徐鉉作開業觀碑云永嘉二年八月十五日舉族上昇里中數千人望雲送別梁武帝大同中立宅為開業觀今名昭德去縣治百餘步白玉塘訪昭德陳靈寶詩云我見鄉仙不是誇面顏玉鍊燦丹霞新開天上圖書府舊是雲中雞大家三十七年心勝鐵百千萬事眼無花而今漸覺逢迎嬾每日兩番蜂報衙

項蔓都

項蔓都河東蒲坂人入山求仙十年而歸家

人問其故蔓都曰在山中精思三年有仙人來迎我共乘龍而昇天良久低頭視地冥冥窈窕上未有涯去地絕遠龍行甚疾頭尾低昂令在背上危怖嶮巖乃到天上先見紫府金床玉几晃晃昱昱真貴處也仙人但以流霞一杯與我飲之忽然忘家對天之前失儀見斥遂還人間更自反責乃可得更往昔淮南王劉安見大清仙伯以坐起不恭責守天厠三年之後學道者可不謹哉河東因號蔓都為斥仙人

徐啓玄

道士徐啓玄宋文章元嘉中居終南山道德尊人皆欽之能通法術遂知吉凶前世之事歷歷可聞時有王大夫只養一女可初笄乃世之極色也憐愛頗甚名曰金英啓玄一日閑遊之次經過其門見其宅上有宿世冤讎怨氣亘天啓玄問閭者曰大夫在否答云在啓玄曰可與予報之云終南山道士徐啓玄有少事欲見大夫閭人入告大夫聞語即出見之啓玄曰勿迂造次起居然有事咨白

未知可否答曰望示及啓玄曰適觀大夫宅上有宿世重冤欲伺便報怨大夫知否對曰非尊師無緣知之某凡俗肉眼豈明此事啓玄白請童僕男女等徧觀之皆言不是又曰宅內更有何人大夫曰某有一女小字金英每憐惜之頗自羞報啓玄曰只此小娘子便是大夫之冤家矣可令出來大夫聞語將謂謬言令夫人召來夫人因往喚之已見其女偏其房門面壁而坐歎曰我之宿世冤結未解方欲伺便報讎無奈道士顯我世事夫人聞之驚告大夫大夫惶懼無計乃禮啓玄曰此宿世冤對相會如何脫免啓玄曰比小事爾大夫曰儻蒙尊師慈憫特垂救拔以生死何敢忘之又復再拜啓玄曰勿在多言即為驅遣啓玄遂取劍一口索水一甌仗劍喚水隨大夫至閭內令可開門金英曰是我之冤于爾何事啓玄曰道門以救拔為功濟人為上汝可速變本形無更居此呪訖乃令備棺槨逡巡而至啓玄乃開門視之已化為白骨即令左右斂之致靈車誠曰可送出都門

行十里餘遇大林木中棄之急奔勿更迴顧左右依言送出都門可十里果有大林木便安其下急奔而歸迴至都門方始迴望見大林紅焰亘天悉為灰燼大夫與夫人驚哭拜謝仍備珍寶錢帛酬之啓玄悉不顧而去

萬振

萬天師名振字長生洪都之南昌人得長生久視之道顯晦齊梁間人莫知其年有符呪濟物治人疾苦立効當時以為旌陽樂巴之徒隋文帝聞其名聲重之詔於洪崖山為精舍即今栖真觀是也唐太宗貞觀十五年太守周遜請於梅福宅建太乙觀禮迎天師居之即今天寧萬壽觀是也先是漁者得青石長七尺扣之有音樂聲郡以獻于朝高宗命碎之得二劍鐔上刻天師姓名帝異之顯慶二年高宗召見光曜日殿帝問治國養生之道振答曰無思無為清靜以為天下正治國猶治身也帝尊待之如師友賜予無所受龍朔元年尸解於京師數日啓棺惟有一劍一杖而已詔以銅函盛劍杖葬于西山天寶洞

之側今洞陽觀是也天師有德業碑乃唐滕王元嬰文在開元觀中云

曹德休

曹德休自言從東海青嶼山來遊江西人見之三十餘年顏貌不改常行民間有疾者以符藥救之無不愈者人有一女子年二十餘將聘於人忽有邪物為魅百方治之益甚其父詣德休具陳病狀德休曰汝家居近山溪有潭穴否父言有之德休又曰女子春時開步溪側為蛟所窺已拘攝精魂在其穴矣汝可將吾一符往彼投於潭中少頃有驗投符之後忽見潭水翻涌水有霹靂之聲須臾一物浮出長二丈餘形如烏蛇頭若大杓已劈裂腦流血斃矣其父還家見女精神明爽全失其病乃以財帛往謝德休曰本以救病何以此為終不肯受德休常謂人曰若家有疾苦不必財帛就德休求符藥以江魚為鱸一盤并美酒一壺饗吾告之其疾自痊如其言鄉里為之無不應驗人皆神事之後忽告人曰我捨此入西山天寶去然來春牛疫頗甚

我留一姓名與汝傳寫牛疫之時以餽饗吾書其字貼牛角上自當無苦其後牛果大疫一境之貼其字者免災不貼者斃矣人咸思之無復見者王元之傳云曹德休帶太史官後梁尚書郎得不死之道

杜曇永

杜曇永字元老或云道名元老三輔京兆人也世業蟬聯鼎命南遷寓家吳郡之錢塘縣釋褐為大司馬豫章王國左常侍郎蕭子雲侍郎南齊之故寮外勤儒學內修道真因齊梁革命慨然興嘆以珥筆曳裾同之維繫脫迹繁華振衣長往遠游岷隴臨洮峨嵋復還舊山已逾二載後過句曲訪道尋真精專法門謙虛靖默人莫知其所修梁武帝天監十二年歲在甲子放杖出谷自錢塘輕舟載家南上廬陵郡玉笥山重建清虛館以處于時林木陰森鄉民遠甚可謂虎兕之穴而居之不疑向道之輩稍稍獻工助成其事自是門人受道繼踵而來次年入大秀法樂洞天出所攜資起居室數十椽重營宮殿親製豐碑紀述洞天之勝置洞西還駕谷及洞側山西

大壠南坑大標瓜源等曰以待修真養道之人取題洞天石臺是入洞之年也武帝聞其風賜號金闕先生蕭真亦自江表與骨肉掛帆而來以師事之得其祕道親製一碑以紀杜德即普通七年也其後先生在洞中與人錢員外修九鼎還丹之祕靈真屢降喻以昇舉有期丹成與錢服之於太白峰頂白日飛昇尤為顯著家屬為地仙隱於後洞云

蕭子雲

蕭子雲字景慕南齊高帝之孫豫京文獻王嶷之子漢相國何之後兄弟十六人皆封郡公梁武受禪天監初年十二降爵為子弱冠撰晉書百餘卷進之幼而好道志尚正靜不樂仕進雖為名宦每有異人密與談笑累遷丹陽郡丞尋遷黃門侍郎司徒左長史常攜家遊江表名山一日掛帆來訪廬陵玉笥初至清虛館時杜元老已於玉笥得道乃南齊故寮相值情好如舊以師事之往來洞人間頗得其祕親製之刻石仲言杜德後過玉笥之東南連山重崖間今號蕭山是也壇爐藥

曰遺迹猶在會梁武璽書來召與子特委家入朝既至遷侍中復以善草隸取重於時子特亦善書位太子舍人先父而卒太清元年侯景之亂募獲朝臣景慕儀狀奇偉雖年逾六十而神彩超邁恐不免禍遂急還蕭山後再徙居清虛五年忽神人降言曰館之東北有郁木坑水自東注可以久居蕭又徙家寓焉歷二紀一旦上帝賜玉冊封元洲長史仍司郁木福庭之籍神仙之府八十二口同隱世不復見其事亦祕罕有知者後人入洞往往見居宅若專志求訪則不可得矣

丁玄真

丁法師名玄真字仲誠潯陽人也天資恪敏嚴於持戒為鄉里推仰嘗遇野人得法其要精妙能攝鬼神而驅役之無不如意每以康王谷地最靈秀其谷口有銅馬廟云漢王莽嘗造銅馬歲久有物附之肆為妖怪食民物畜稼苗之類為害弗堪居人乃為立廟以祈之玄真惡其事即毀其廟乃取是地置真宇焉遂送銅馬於南江人未迴而馬已復其

舊處玄真又斷馬之左足而馬乃化人形泣曰願得一食之所玄真遂移其祠于澗之西許其弗為害也前又有毒龍潭因風雨晦冥忽見二龍出而弄珠光彩照燦玄真叱之輒取其珠置真殿內而龍又入殿取珠既而弗得乃吐涎滿地復見殿柱有張僧繇所畫二龍即與之聞風雨震吼衝倒檐楹玄真遂書鐵符燒鐵鍾鎮其潭龍龍穿山西而去又復以鐵釘釘殿柱畫龍之目其患乃止於是神怪避地始為福庭時隋文帝開皇十年也江州刺史狀其事封章朝廷帝聞而異之降詔褒崇命州郡加禮遇焉煬帝大業三年解化其夕有白光亘於天之東南及玄真既逝方沒春秋七十八

張公弼

有劉法師者不詳其名唐太宗貞觀中居華陰雲臺觀煉氣絕粒二十年每歲三元齋有一人衣縫掖衣貌陋而黧來居坐末齋畢亦無言而去如此凡十餘年衣服顏色累不改法師異而問之則曰予姓張名公弼住蓮華

峰東北隅法師意彼無人所居試問同往公
弼諾之曰此中甚樂師能住亦無間法師從
之約二十餘里援蘿攀葛纔有鳥徑其崖谷
險絕雖猿狖不過履之若夷途法師從行亦
無難苦至一石壁高千餘仞下臨無底之谷
一徑闊數寸惟側足而立公弼以指扣石壁
中有人問爲誰曰某遂忽然開一門有天地
森羅萬象公弼將法師欲入其人怒爲公弼
曰何故引外人來乃闔門則又成石壁矣公
弼曰此非他人乃雲臺觀劉法師與吾有舊
故同來即開門而納之公弼曰法師來此君
可具食其人問法師便住否法師請以後期
遂取一盂水以肘後青囊中刀圭粉和之以
飲法師其味甘且香公弼曰子嘗云山中甚
樂君盍爲戲令法師觀之其人乃以水嚙東
谷中俄有蒼龍白象各一對舞舞甚妙丹鳳
青鸞各一對歌歌甚清公弼與法師別之出
門行數十步返顧但巨崖深壑而已將及觀
公弼辭去法師歸處置畢再訪公弼則步步
險阻不可前其後公弼亦不復至矣

李元基

李元基唐高祖武德初人隱嵩山中有道術
能坐在立亡人莫測之時時經行以待樂救
人探虎骨針鵲影活魚鱉甚衆每晝出達夜
則止露宿草野中代宗末在建昌縣中樟松
柏滿身飛去後有人採藥葛山見元基踏青
鹿行若飛問之不應莫知所在焉

陳道沖

法師姓陳氏名道沖潯陽人母方娠夢天仙
入其室及生有殊相兒時便不飲酒茹葷每
聞人講經論道則傾耳諦聽暨長戒行高潔
傳法錄於異人遂結庵于紫霄之別峰即勝
絕處也有弟子八九人亦戒行有學門庭甚
峻不妄接人當時蒙其容與者名爲登龍門
以比漢李膺焉道沖酷嗜老莊非徒誦其文
能徹其理虛嘗以謂吾教本宗老莊而老莊
之意本是悟明性地故其言每每云莫若以
明此其的也後人但知習術而泥迹失之遠
矣晨暮必爲群弟子講說有著論一篇傳于
世時唐太宗貞觀二十一年春忽爲弟子曰

吾欲一遊名岳衆以其老觀止之道沖曰必
行至日中解化春秋一百一十四視其顏色
如生體亦柔輒舉棺如無物人以其爲仙去

王守一

王守一者唐太宗貞觀初於洛陽自稱終南
山人王布衣賣藥於洛陽市富人柳信唯有
一子眉上生一肉塊布衣壺中探藥一丸付
之須臾塊破小蛇突出五色爛然漸及一丈
許布衣叱之蛇躍起雲霧昏暗布衣乘蛇而
飛騰去矣

歷世真仙體道通鑑卷之三十一

歷世真僊體道通鑑卷之三十二

淡十三

浮雲山聖壽萬年宮道士趙道一編修

何尊師

何尊師不知何許人唐高宗龍朔中居衡岳不顯名氏其顏若四十歲人行步如風常往

來蒼梧五嶺間來無所慕去無所數僅百數餘年人常見之狀貌不改或問氏族但云何何或詰其鄉里及修證亦云何何時人因號曰何尊師衣弊履穿其心浩如也道士田虛應鄧中虛嘗請曰尊師卒無言何以開悟學者則曰知不知者上也不知知者下也誰能整混沌之竅悟自然之理耶遂杖藜入林而去須臾群虎隨之不復見矣唐明皇開元中司馬承禎遊衡岳望祝融峰曰當有高仙處之何氣色秀異之若此已而見尊師於林中承禎致禮造問則據石而坐若無所覩不見答而退數曰此可謂全而德不形言者也乃構廬於祝融峰延之尊師就此不復出觀察使呂渭即其廬請受符籙雖張太玄田虛應鄧中虛師事之皆不得其旨天寶二年下元

日雲鶴翔空異香芬郁謂弟子曰吾去之後當舉於紫蓋南峰盤石上遂化顏色不變弟子乃環衛行遷神之法中夕聞雷震之聲即失其所在衡陽太守蘇務廉文其碑

劉知古

道士劉知古字光玄其先彭城沛人也自中山靖王而下凡十二世皆顯達曾祖英隋朝以孝廉登科歷官臨中令故大父與其考因家于臨中母太夫人吳氏感異夢而生知古生而慧幼而明長而秀壯而正視名利若仇。雖惟從事於道唐高宗龍朔中出家為太清觀三洞道士至於八公寶章三簡秘錄丹經脉訣之旨出死人生之術罔不洞曉肅宗召見問道家事稱旨特加崇錫送還山明皇開元中天災流行疾疫者十有八九上召知古治之乃歎曰火德星君聖人亦瀉下法煉藥上醫察聲至于鍼艾不其速矣遂以色代脉用氣獨病故能膏肓河決腰理雪散其精妙之如此上寵錫皆不受天寶十九年詔知古兼內史田恩崇醮二十四位久之乞還蜀請

以居第為大千秋觀上親書額賜之李邕文其碑知古以兄為儒弟為釋因設三教像以事燕國公張說聞其風而悅之作三教銘其辭曰正氣生神結虛為實上清尊帝中黃守出華彩衣裳虛無宮室紫炁乘斗赤籙飲日

十天從此萬靈受役蓮華釋門麟角儒術法共不二心同得一道心惟微守而勿失而後因天長節改觀為天長嘗有客授以黃白術雖輩屢連構頗極壯麗所費萬計未嘗資於人工畢客復至約於東陽伏牛山其下有古觀因葺而居之又授神虎寶經上清隱文高奔上道之要行之十年忽然室中見有光產丹芝一莖扣之有金石之聲夢神人謂曰後山石壁中有金魚跨之可以沖天非此芝扣石不可致遲明訪金魚茫然不知其所是夕復夢曰滴泉之下是也既至以芝扣如風雷之震巨石迸裂得金魚長三尺許乘之飛空雲霧旋擁而去矣

王旻

王旻者居洛陽青羅山鄉里見之已數百歲

常有少容葺居幽勝多殖芝朮藥苗栽培花木皆有方法著山居雜錄三篇每日蔬饌多是粉芝英充估青氈其術行於世或遊名山或寓荆渚唐高宗朝諸武擅權威傾海內惟太子賓客武攸緒天后之姪退身遠禍結宇

于嵩陽師模於是得其導養煉氣之訣是謂之曰捨人爵而慕仙階誠爲難事必在堅志林谷以周其義母爲之檢鶴書以易其操明皇開元中召旻至京師頗優恩禮明皇先於茅山併得楊許七真及陶隱居所寫上清諸經真跡旻詣司馬白雲受三洞寶籙後遙詣李元靖受真跡上經其所關楊君筆札十數幅遣旻齎詔書信幣就紫陽觀請元靖先生補之曰朕不欲命小臣干冒於先生委茲專往必冀神仙手筆今古相續爾到山之日靈鶴翔鳴補經之時異香芬烈有神人降于元靖之室皆精誠所應也及還京歲餘請歸舊山不復遊於城闕旻與達奚侍郎往還旻死後杖屨詣達奚方知其尸解矣

吳道元

吳道子得神仙術周遊人間後改名道元雅好畫其妙入神唐玄宗聞之詔入宮庭有粉牆數尋俾畫山水宣問道子所欲何物道子曰用帳幙蒙茈其牆用墨漿一盞上命如之須臾揭起帳幙捧墨漿於粉牆上用力一潑

卷十二

復以幕覆之頃刻間問畫山水何似道子對曰已畫畢請陛下觀之上臨視之山水林木人煙鳥獸無不備具而且精妙奇好雖國中畫工有所不及上觀顧久之歎羨無已道子乃徐步指點曰此處山巖之下有一小洞其中多有仙人扣之必應於是手指擊之忽然門開有童子在側道子奏曰此洞可入其中甚有佳致臣今先入請陛下繼來道子遂一躍而入在洞中以手招上上不能入於是復閉其門須臾牆外守卒奏云吳道子越禁城躍出莫知所之上再往視畫牆處乃瑩白如舊無有山水矣

顏真卿

魯公顏真卿字清臣師古五世孫博學工辭章事親孝唐玄宗開元舉進士又擢制科再

遷監察御史其後德業詳載唐書歐陽脩集古目錄云
顏真卿撰府姑壇記并書公忠義之節皎如
日月不免惑於神仙之說老釋爲斯民患也
深矣青鎖高議云歐永叔與梅聖俞遊嵩山
醉望西峰巨崖有丹青四大字云神清之洞
永叔指示聖俞聞無所見公乃不言洎乞身
告世作詩曰四字丹青萬仞崖神清之洞鎖
樓臺煙霞柱目無人到驚鶴今應待我來後
數日覺公平生不言神仙事主張吾道當如

漢十二

五

是建中四年德宗命真卿問罪李希烈內外知公不還親族餞於長樂坡公醉跳躑前楹曰吾早遇道士云陶八八授刀圭碧霞丹至今不衰又曰七十有厄即吉他日待我於羅浮山得非今日之厄乎公至大梁希烈命縊殺之瘞于城南希烈敗家人落樞見狀貌如生遍身金色爪甲出手背鬚髮長數尺歸葬偃師北山

明皇十七年事顏真卿嘗得神丹服之後爲李希烈所殺希烈平後改葬發其棺顏目如生隱士曹庸曰後三十年掌裂飛騰而出被羽衣行山澤間即所謂地仙也

後有商人至羅浮山有二道士樹下圍棋一曰何人至此對曰小客洛陽人道士笑曰幸寄一書達吾家遣童子取紙筆作書至北山顏家子孫得書大驚曰先太師親翰也發塚開棺已空矣徑往羅浮求之竟無蹤跡又曰先太師書法蠶頭馬尾之勢是真得仙

也白玉蟾云顏真卿今為北極驅邪院左判官

鄧紫陽

道士鄧紫陽建昌南城縣人初隱麻姑壇之西北後因省親路獲神劍佩之性頗剛毅自負濟世之材每憇溪壑之間誦天蓬呪不輟遂感北帝遣神人授以劍法遠訪南岳朱陵謁青玉光天二壇禮鄧真人夢有所感唐明皇開元中蒙召入大同殿建醮胡籙封為天師修功德二十七年忽見虎駕龍車二人執節於庭中顧謂其友竹務猷曰此迎我也可為吾奏願欲歸葬本山仍謂立廟於壇側明皇從之後尸解

伊祁玄解

伊祁玄解髮童顏氣息香潔常乘一黃牝馬不啖芻粟不施韁勒唯以青氍藉其背常遊青兗間與人話千年事皆如目擊唐憲宗聞其異遂召入宮處九華之室設紫芝席飲龍膏酒每日親自訪問頗加敬仰而玄解魯朴未嘗聞人臣之禮上因問先生年高顏色

不老何也玄解曰海上種靈草餌之因種於殿前一曰雙麟芝二曰六合葵三曰萬根藤上餌之覺神驗時西域進方圓二美玉玄解曰此龍虎玉也圓生於水龍寶之方生於山虎寶之詢使人果得之於漁獵者玄解欲還

東海請於上未之許遇宮中刻木作海上三山綵繪華麗間以珠玉上因元日與玄解視之上指蓬萊曰若非上仙無由得及此境玄解笑曰三島咫尺誰曰難及臣雖無能試為陛下一遊以採物象妍醜即湧體空漸覺微小俄而入於金銀閣內左右連聲呼之竟不復見上追思嘆恨幾成羸疾因號其山為藏真島後經旬日青州奏玄解乘牝馬過海矣

許栖巖

許栖巖秀才家于岐山下唐德宗貞元中舉進士不第於長安吳天觀習業月餘併獲三馬不可塗行而更選良駿有蕃人牽馬來稱是逸足栖巖欲市尚且疑之是觀有道士能易栖巖請筮之遇乾曰飛龍在天利見大人曰此馬龍種也當因此馬利見大人則事無

不諧矣人皆晒其妄獨栖巖信而市之雖加意秣飼而膚革不充後值韋令公鎮西蜀栖巖舊出其門下自詣坤維而謁道經劍閣馬驚失足俱墜於巖壑之間幾萬丈底為槁葉所積俱不能損仰觀峭絕無計攀援良久祝

曰我非劉備爾非的盧無計躍出吁道士之占何其謬耶遂與馬解其銜勒去其羈席縱其所欲似經一晝栖巖捫石竅漸能踰足因躡巨栗如拳取而食之甚濟飢渴如此又約數十里竅漸明朗忽若出洞口見平地數里春景爛然瑠璃桃萬有餘株花間有青石池池傍有石屋屋中有道士白髮丹臉偃卧於石榻之上傍見二玉女栖巖因之叩首再拜玉女大駭曰爾何人遽至太一元君之室栖巖具陳本末二女遂白元君元君召栖巖栖巖拜手稽顙元君曰爾在人間何好曰好道多讀莊老黃庭經元君曰爾於三道書各得何句請一一說之栖巖曰莊子云真人息之以踵老子云其精甚真黃庭經云但思一部壽無窮元君曰子近道矣乃命坐玉女酌石

髓而飲之曰嵇康不能得今爾得之乃數也
栖巖乃跪謝而飲之玉女前曰願道士至矣
元君命設榻而坐有道士長眉巨唇恢形古
貌執筭而跪禮之元君勞之曰君何遠來曰
故來相謁元君曰請與吾筭二事且勞大華
何神也立海橋何鬼也吾不能達道士遂布
筭藪藪披閱三才討論六合上窮蒼昊下抵
幽泉良父擘大華者雖云巨靈實夸父之神
也立海橋者雖云醜怪乃五丁之鬼也元君
點首曰然又曰筭吾今夕何為又布筭曰元
君今夕合東遊三萬里元君曰何太遠乎栖
巖因熟視道士乃昔卜馬者大驚其事道士
曰昔日乾卦合今日矣栖巖叩首而謝之遂
巡有仙童馭鹿龍而至曰東皇君使迎元君
今宵於曲龍山既月元君撫掌而吟曰道士
卜中矣道士敬謝而告去元君曰為我語邢
和璞道士曰諾元君與栖巖曰可同遊曲龍
山便令浴於池而同跨鹿龍去頃刻而抵曲
龍山但見危橋千步聳柱萬尋若長虹之亘
青天如曳練之橫碧落勢連河漢影入滄溟

玉瑩無塵雲凝不散元君命栖巖拜東皇東
皇曰爾許長史之孫也栖巖曰某少孤不知
先祖何官也東皇曰吾昨宵與汝祖同飲亦
知汝當來東皇遂命仙童酌醴而進與元君
三人而飲元君問東皇曰近來海水如何東
皇曰比前時之會淺已減半吁知桑田亦應
不久爾東皇命玉女歌青城丈人詞送元君
酒歌曰月砌瑤階泉滴乳玉簫催鳳和煙舞
青城丈人何處遊玄鶴喚天雲一縷仙童
玉繼而和之宴極東皇索玉簡而題詩曰造
化天橋碧海東玉輪還過報晴虹霓襟似拂
瀛洲頂顯氣潛消橐籥中元君繼曰危橋橫
石架雲端跨鹿登臨景象寬顯魄洗煙澄碧
落桂花低拂玉簪寒亦請栖巖繼之曰曲龍
橋頂翫瀛洲凡骨空陪汗漫遊不假丹梯躡
霄漢水晶盤冷桂花秋於是紅鸞舌歌彩鳳
羽舞笙簫響徹於天外絲桐韻落於人間仙
侶盡歡各治命駕索與今栖巖俱乘鹿龍而
返下視大城郭栖巖曰此何處元君曰此新
羅國也又至海畔小城邑又問此何處曰此

唐國登州也俄頃到舊洞府栖巖再拜辭歸
元君曰爾能飲石髓已得人間千歲無漏泄
無荒淫能如此猶更得一見吾也命玉女牽
栖巖馬來曰雖是君馬本即吾洞之龍子因
無由作怨傷稼謫於人間負荷亦偶去與君
緣合爾馬至昔日解鞍處毛色如故翅逸爽
瘦如八駿之狀元君曰汝到人間無用此馬
但於渭溪解之當化為龍不異昔日費長房
投青竹杖於葛陂也栖巖驚躍稽首拜辭玉
女謂栖巖曰龍子迴日號縣田婆鍼與寄少
許來遂跨馬如飛食頃已達號縣之舊莊田
園蕪沒井邑凋殘詢之時代已六十年矣時
宣宗大中五年也栖巖體已清虛性兼淡泊
既無所欲焉有用乎遂不問舊產惟謀田婆
鍼一日訪詢田婆婆曰太一家紫霄姊妹常
寄信買鍼來詰之其他即結舌噤齒而不對
遂取鍼繫於馬鬣放之渭濱果化為龍而入
水去栖巖後隱匡廬間多有人見之者

摸先生

摸先生不知何所人遊京師手攜小竹筍貨

藥人有疾者則以手摸之輒愈人故呼為摸先生其姓名則不知也或與之錢則受不與之亦不索東雙髻於頂其容甚野然眸子明白顧眄動人一日遇雨求宿於茶肆李生家生客之自是比夜來宿畫則方去他日又與一客俱求宿於李生生亦不拒中夜生起望其牖中則若有光曜生驚俯而視見先生坐火焰中他一客則以肩抵床斜身歪力而已生驚而呼之乃不復見火室中暗矣惟聞鼾睡之聲明日生詢先生曰君昨夜何為而若此二人俱笑而不答自此先生亦辭去後不復有人見之矣

王君

真人王君少好道術與妻俱入山精思修道屏絕人事常以八節日隨四時朝拜後遇太虛真人夫婦俱拜之就其請道真人以素書二十五卷乃九天皇仙太上靈丹之道告王君曰爾有至相應當得仙汝今仙名已定但欽守此道勿示人也併以經授之復七年太一中黃以靈華丹與之遂有龍車羽駕天仙

來迎白日昇天為太和真人初不知授書人姓名昇天之後朝謁授書之師乃太虛真人南嶽赤松子也

梁須

道士梁須不知何所人為道士間於檣赤者服之却老還少令人夜間徹視見鬼等須時年七十乃服之轉更少壯年至一百四十歲能夜看書行及走馬入青雲山去也

王元芝

王元芝鍾陵人也十數歲時夜出門見一道士與語因隨之在江中水底月光中行不見有泥沙水隨步自開路傍見一物如龍又若蛇形長十丈許有五色光問道士答曰此水母也見者長生明日方還自是好遊山間多飲酒亦無服餌每言洪崖西山蕭史增匡廬玉笥麻姑諸仙洞無不徧歷其間嘗於江右識仙人曹德休德休西晉太史官後梁尚書郎即得不死之道泛舟西江與元芝往來元芝嘗為縣吏被繫獄中德休知之來其家令取水少許禁呪之令人餉元芝元芝飲訖械

繫已脫遂歸同德休而去來往九江金陵江都四十餘年方歸年益少先是鍾陵多山魃元芝欲到山魃避之謂人曰王處士來人有於道衢見兵士旗幟千人至其前乃元芝行也或逆風掛帆或泛水安坐唐懿宗咸通末元芝遊玉笥山雲水道士皮元休舊與之友善忽於郁木坑見元芝與道者數輩游覽因問所適答曰是蕭子雲吳世雲梅福大儔諸仙約我將登玉梁山候蓬萊范仙伯爾言已不見即雲霧溟濛風振林谷元休悵仰而歸

一本芝作之字未知孰是

賣藥翁

賣藥翁莫知其姓名人或詰之稱此是姓名有自童稚見者至于暮齒復見其顏狀不改常提一大葫蘆賣藥人告疾求藥得錢不得錢悉與無阻藥皆神効或無疾戲求藥者得必失之由是人不敵妄求藥敬之如神明常醉於城市間得錢亦與貧人或戲問之有大還丹賣否曰有一粒要賣一千貫錢人皆笑之以為風狂多於城市笑罵人曰有錢不買

藥喫盡作土饅頭去人莫曉其意亦笑之後
於長安賣藥抖擻葫蘆已空內只有一丸出
極有大光明安在掌中謂人曰百年人間賣
藥過却億兆人無一人肯把錢買藥喫深可
哀哉今須自喫却藥入口足下五雲生風起
飄飄飛騰而去矣

袁亢

先生袁亢不知何所人也葛藁草履徧遊天
下所至終日沉醉遊齊州長青縣市有李生
以財豪所邑下先生日過其門則引手謂李
生曰日乞我百金為酒費生不礙其請即時
遺之比日而來凡經歲生無倦色一日先生
別生曰久此擾子吾將遠遊子能觴我則主
人之意盡矣亦將有以教子曰方將為饒別
與先生出郊外酒半酣先生云子有大尼能
慎之乃免不然禍來不測生云先生如賜教
敢不從命先生取筆於生手掌中書慎字曰
子慎勿毆人否則人死于手出一月乃無患
生歸日夕思慮不敢出經旬浹一日忽聞門
外誼競生忘先生之言遽出視焉有跛而丐

者在生庫前出言甚穢生忿然毆之跛者仆
地首觸戶限奄奄然無氣生大悔泣謂其母曰
不聽先生之教果有大禍逃則不忍去侍下
住則當受極法生性至孝於是大慟母曰可
竄以偷生母坐而待縛乃由居之後戶而去
方出忽見先生生泣拜云別未踰月滅裂教
誨今果如先生言為之奈何先生曰子復歸
吾為子別圖之先生坐一靜室為生曰子出
受繫吾自有計先生乃闔戶閉目而坐生出
戶觀者如堵吏乃執生俄而跛者起坐少頃
乃行去甚速吏乃捨生令歸生入室視先生
尚閉目端坐入定翌日乃開眼謂生曰跛者
固已死矣吾出神入其屍使之行今置其屍
在靈巖山澗澗傍人迹所不至處矣先生又
曰子能至孝宜有善報子之壽期合有七十
四今以毆跛者促其四年矣先生將去生曰
死生再造之賜罄家所有不足以報德不識
先生意欲何物先生笑曰吾方與星辰出沒
同天地長久安用世貨為哉乃去矣

歷世真仙體道通鑑卷之三十二

歷世真仙體道通鑑卷之三十三

一

浮雲山聖壽萬年宮道士趙延編修

陳興明

真人陳興明修行於南嶽元陽宮宮在廟東
北登山五里與上清中宮如鼎峙時晉武帝
太始中也真人少遊名山因訪真迹於天柱
峯上遇二神人年十八九自云吾歷行四海
度有志之士世人修道暫能精專中道而廢
不至勤久何得擢形雲天飛冲霄衢汝之積
功亦可佳也第勿退轉何慮不列名金闕玉
堂前苦後樂者苦則有極樂則無窮何者林
谷幽棲禽畜為侶飢渴必至寒暑辛勤割世
離榮辭親舍愛可謂苦矣壽同天地變化無
窮策空乘虛坐生羽翼可謂樂也得免於
修勵手興明拜手曰永佩聖言必至於道不
敢怠忽也神人遂授以明鏡之道修之十有
八年二仙降而告之曰吾昔授子至道果能
勤行今則登躡九天游宴八極積功之報也
前昔後樂今子至矣晉武帝太康元年三月
初一日煙霞遶室天樂浮空山下居人競往

觀之惟有空室至於雞犬悉皆騰舉至重和元年宋徽宗賜號致虛守靜真人

尹道全

真人姓尹氏名道全天水人也修洞真還神之道佩五帝六甲左右靈飛之符天仙降而謂之曰飛昇者當有其材而後成其造昔漢武帝親受金母靈飛十二事及五嶽真形圖縱得尸解而不能使形骨俱飛爾得一而有昇天之望豈非積功宿分所植耶道全曰淺學無聞願示十二事之目天真曰一者五帝六甲左右靈飛之符二者太一混洞東蒙之文三者丙丁入火九赤班符四者太陰六丁通真通靈玉女之錄五者六戊太陽招真天光策精之書六者六已石精金光藏景錄形之訣七者六庚素招攝役之律八者六辛致黃水月華之法九者壬癸六遁隱地八術十者子午卯酉八稟十訣六虛威儀十一者丑辰戌未地真曲素訣辭三五順行十二者寅巳申亥紫度炎光內視中央也一者五嶽山符安鎮方嶽檄召萬靈太上真文也二者五

嶽山藏神仙倒景俯視山川之跡寫其曲折蟠薄在地之勢也三者五嶽山形取其峯巒洞室之所在神芝靈草之所生高下丈尺等級之數東西南北里舍之限也四者五嶽山骨取其骨體之所像枝幹之所分上法星文下主人事之所起也五者五嶽山水穴貫之圖取其泉液之所出金寶之所藏地脉之所通而為之圖也主符圖吏兵官屬各數萬人五嶽之所總大山三百六十小山千二百並列仙曹職宰可謂衆矣武帝雖得其法而不能專其戒窮武玩兵自毀其福故不得與黃帝同功今爾遇之乃知文始之裔大和之族世有其人吾當與汝期於九清之上太無之中言訖而去真人以晉懷帝永嘉元年三月九日有白雲起於室中三日不散散而視之已失真人所在但聞香氣襲人宋徽宗重和元年賜號通真觀妙真人知潭州張茂宗留題衡岳觀詩云靈嶽峯前遊古觀此中何別藥珠宮五雲仙客形皆異十洞煙華景不同鍊藥爐香金石氣熊星壇冷薜蘿風因聞大

道修真訣咫尺三清路可通

施存

衡嶽洞門觀在石廩峯西石榴峯南下去廟二十里昔施真人諱存自號胡浮先生或云婉盆子師黃盧子得三皇內文役御虎豹之術遁變化景之法或隱或顯數百年慕石廩洞門是其沖真之地乃居之又於峯西石室造閣亘空十餘丈出乘白豹或步還山豹即迎之海嶽神仙時來聚會里域有景慕之者罕得親迎以晉惠帝永康元年四月七日乘豹昇天宋徽宗重和元年賜號沖和見素真人又有蜀人李昌利棲隱數年而遊天寶洞今但有控豹岩餘基真結云施存者齊人也景之道今在中嶽或少室往有壺公者正其人也然未受太上書猶未成真焉其行玉斧軍大符具其所受之校條也施存是孔子弟子三千之數

了然子

了然子者遼東人也不顯名氏因遊西蜀二十四治後居太白山出入虎豹馴繞亦不知其所修後遊三楚僅百餘年友善者吳猛陸修靜孫璞謝靈運僧慧遠前後相繼更亮嘗

師之謂曰先生觀諸賢者可以脫於濁世乎
曰功有淺深道則一致雖各得其趣未能了
然曰先生如何又曰子出此月再為汝道後
亮不逾月卒先生自西山訪南嶽謁青玉白
壁二壇尋於前洞門訪李昌利先生劇飲數
日而李前之蜀山先生歸隱前洞宋高僧宗
炳訪之不遇

鄧欽之

鄧欽之字彥達隱於南嶽洞臺夜誦大洞經
上感魏夫人降告之曰君有仙分特來相訪
○一日忽見三青鳥如鸛鼓舞飛鳴移時方去
欲之謂弟子曰青鳥既來期會至矣遂解化

徐靈期

徐真人名靈期吳人也隱衡嶽上清宮修行
官去廟東北七里真人勿遇神人授以玄丹
之要舍日暉之法守泥丸之道服胡麻飯故
得周遊海嶽來往南山積有年矣採訪山洞
巖谷作衡嶽記叙其洞府靈異言紫蓋雲密
二峯皆高五千餘丈而雲密有禹治水碑皆
科斗之字碑下有石壇流水縈之最為勝地

而紫蓋常有鸛集其頂而神芝靈草生焉下
有石室室有香爐杵臼丹竈祝融峯上有碧
玉壇方五尺東有紫黎高三百尺乃夏禹所
植實大如斗赤如日若得食長生不死晉安
帝義熙中山人潘覺至峰西石裂有物出如
紫泥香輒可食覺不知其石髓竟不食棄去
忽悟而還已不見此君之所記聖異又能役
使鬼神降伏龍虎以宋蒼梧王元徽元年九
月九日沖真唐代宗大曆七年玄和先生張
大空者李泌之師居之得道後入元陽宮尸
解大中元年韓威儀慕其風而居之修行亦
得道重和元年宋徽宗賜號明真洞微真人
今宮基見存石碑傳云舊有仙雞報曉因與
仙草不死間有樵人見之而不能捕

鄧郁之

衡嶽紫蓋峯石壇九仙宮鄧郁之字元達南
陽新野人也幼有飛鳥嚙印之夢後得驅邪
馘毒之符即救治無不愈與徐靈期結方外
友周遊名山尋訪上士遇至人傳金鼎火符
之術於宋蒼梧王元徽二年徐既上昇郁之

隱洞門久之乃徘徊湖外洞天福地無不徧
歷所患丹材無力可致因採藥夜宿石穴夢
神人曰汝有功將徵召宜應時出衆仙候汝
覺而驚喜於梁天監初臺司奏少微星見南
楚長沙分武帝勅監軍採訪詔之問所修曰
貧道修煉金液而闕丹材帝賜金帛許於南
嶽洞真福地選其幽勝置上中下三宮以修
內外丹一夕神人謂之曰大洞之鄰乃招福
之鄉延生之里蓋記勿忘後君丹成復還紫
蓋之東以天監末十二月三十日有八真人
乘羽蓋雲車降于室中即前得道者八真人
也於是就自然石壇昇天重和元年宋徽宗
賜號超真集妙真人衡州刺史張觀具奏置
觀額

陳惠度

陳真人諱惠度潁川人初居茅山採靈異草
貨之飲酒不食僅數年南遊桃兩及盡是金
石之類至南嶽選其幽勝居玉清觀在石廩
峯南去廟登山二十五里乃告天而盟鍊丹
深夜被鬼所擾三搥丹爐運石摧壓唯冥心

蟠坐石上誦黃庭經佩五嶽真形圖其志愈
恪陰有感通道力潛扶獲擒魑魅妖氣漸散
其鬼散懷悲號真人復令肩石爲誓免戮鬼
形遠逐他界後丹成光氣滿山明徹遠近後
服之以齊武帝永明三年五月十三日沖天

唐張九齡題丹臺詩云雞頭西畔便門開陳
氏丹昇劫後臺觀影昔年誠誓否至今猶說
鬼肩我宋徽宗重和元年賜號沖虛元妙真
人今觀基頂有丹臺鬼我石雷泓風穴誦經
壇浴丹泉近代有僧於觀基創寺號光明不
久復廢之孝宗乾道中有道士鄧時永道人
黃守正開山伐木誅茅募化賢善之士新創
殿宇祈雨攘災並有感格野人庵居重洽道
化

張曇要

衡陽招仙觀在廟東八里舊記云啓基劉宗
卜字蕭齊又記云晉武帝咸寧中建昔張真
人諱曇要居之感通天真密降傳內養元和
默朝大帝之道行之十二年神遊太空面朝
皇極大帝賜以瓊寶琅膏混神合景之液餌

之變化莫測神用無方以齊廢帝延興元年
七月初三日忽然雷吼天地震動俄有鸞鶴
丹詔迎之昇天重和元年宋徽宗賜號葆光
襲明真人

張如珍

衡嶽九真觀在廟東十里舊記云晉大康中
新野先生建梁武帝天監初有如珍真人居
之張乃先生鄉人鄰也幼而少語淡泊不群
壯歲幽棲而宿稟靈骨遇神人降於岳室傳
明鏡洞鑑之道曰夫燭物理者天也鑒物形
者道也天之道以清鏡之道以明審而無差
形定於此物應於彼故川嶽之狀鬼神之情
無所逃而隱矣天以清而容萬物鏡以明而
鑒衆形若修天清鏡明澄心靜神而得內外
洞徹則至道成矣倘外役於物內勞於神神
心昏濁不能澄清則去道遠矣此法吾昔受
之於長桑公子長桑公子受之於太微天帝
君得之者能洞達玄通遐照八極夫洞真法
中有四規之道依四時而行亦與此同體矣
古人所謂虛其室白自生定其心道自至信

矣哉如珍修之九年徹視千里無一物可隱
以梁天監十三年十一月十八日獨行遊山
三日不反弟子求之見如珍方衣仙衣駕雲
輿蕭鼓擁之縹渺而昇天宋徽宗重和元年
賜號全真達道真人

廖沖

廖沖字清虛梁武帝大通三年居連山郡以
才德見稱爲本郡主簿後辭其印綬遊探道
要居嵩高山久之過荆渚公安二神作妖起
風浪阻船因除伏之令護船而渡至南嶽於
祝融頂遇太平真君傳道要復謂二神曰吾
居荆陽作丹可爲吾守爐他日丹就汝亦有
分丹成歸鄉常乘一虎執蛇爲鞭年一百餘
唐睿宗先天二年風雲晦冥而昇

由吾道榮

此齊由吾道榮幼而少語不通文常愛獨處
因遊南嶽遇赤君授符水禁呪緯候之數無
不畢備一云少爲道士聞晉陽有人大明法
術尋訪得之其人道家符水禁呪陰陽曆數
天文藥性無不通曉悉授道榮歲餘謂曰我

本恒嶽仙人有少過天官所謫今限滿將歸鄉送吾至汾水至遇水暴漲橋壞是人乃臨水禹步以一符投水中流便絕俄頃水即至二人徐自沙上過道榮爲文宣追至晉陽遼陽山中夜初馬驚有猛獸去馬止十餘步道榮徐以杖畫地成火坑猛獸遽走

賈自然

賈自然於衡嶽太平觀焚修遇南嶽真人陳少微自子明而禮之真人曰子之所修吾知之矣將有高真必傳其妙後遇青城丈人降室授九一飛仙之祕白日冲舉

蕭靈護

蕭靈護字天佑廬陵人也生而七歲能詩凡所作皆塵外意十五好道壯遇至人傳金液丹胎息周訪名山負道書百餘卷常云欲昇南宮先度朱陵迺還訪洞陽過岳麓瞻鄧真人之像曰此山乃朱陵之一福地夜遇真人傳火鼎之術唐太宗貞觀二年沂瀟湘躬禮注生行法驅邪邪鄉得濟者不可勝計後居招仙觀煉火鼎之術化黃白而外鬻之修理

觀宇爲之一新侯王禮敬請爲法主皆北面事之五年創尋真閣六年壬辰於桂州鑄銅鐘一口重五百斤歸觀凡五更不敢扣擊蓋驚地神故也後遷其幽勝煉神丹於山北凡經三壇方始煉就後服之於高宗弘道二年中秋謂門人曰吾行期已至當有所適不可淹留汝等精勤將有所繼遂尸解香氣滿室似有清音騰於戶外經時而止宋太宗端拱末一日五更初觀中忽聞鐘聲衆皆驚訝起而視之鐘破裂不旬日有一道人以掌心銘銅汁就其裂處換之其紅燄自暗衆視之而憚道人入溪洗手忽失所在其鐘至今有模之迹此爲靈異

張惠明

張惠明趙郡人結廬於中條山受法於元真觀常行呪禁驅馳精魅後往長安遇混元子受高奔之道行之功濟德備道學超群凡諸就席皆章甫之徒唐太宗詔之內殿致醺有感後乞歸山林上允勅住南嶽封妙濟大師忽一夕遇南嶽石英夫人傳抱一守真三五

混合之要行之一紀復詔之西嶽以便問事後尸解

李思慕

李思慕成紀人與東楚董練師白先生結煙霞之友周遊三湘名山後訪南嶽五峯雖師範不同而各有指歸白既於石鼓上昇思慕入京師高力士嫉吳筠而進之於明皇答問稱旨後乞歸山上厚賜餞行註清靜經行於世後玄化於紫蓋峯惟董混迹於衡陽後洞常以呪術治人病苦有酬之者惟酒一醉爲妙於是無醒時醉卧衢路或溪谷遇雨而衣不需凌嚴霜而皓如也數年巡門告人曰各好將息人皆訝之亦於洞後尸解如蟬蛻也唐杜甫有憶昔行詩末句云更訪衡陽董練師南游早鼓瀟湘柈

申泰芝

申泰芝字廣祥其先洛陽人也因守官湖外世代寓居長沙後散徙四方其遠近欽慕泰芝卜居邵州仁風村柳塘數世皆修慈惠自幼負處不與親友交好讀書常清儉遊息南

嶽訪神仙之事一夕於祝融頂遇真人傳金丹大龍之術歸煉丹雲山北余胡之頂積有年矣大藥已成功行俱備而能乘虛神遊隱顯出入綽有神異人不可測唐開元二十六年歲在戊寅八月十六日明皇詔近臣曰朕昨宵中秋夜寢夢神人告朕言湖南邵州雲山有道人煉丹得仙若禮遇之可為國師

張太空

先生姓張名太空隱衡嶽上清宮修行得道唐代宗大曆七年為唐相李泌之師後隱元陽宮於德宗貞元四年六月十三日尸解於靈隱峯御製詞文云夫至道無名強假名而崇道至真無謚必求謚以明真惟其可稱實在全德故南嶽元陽宮道士張太空混元育粹玄之又玄煉骨三清存神八景衡峯養德時近百年依罔象以冥搜挾鴻濛而沖用棲遲浩氣太古真形頃在先皇敷崇道妙魯寧玄鶴之駕錫以紫霓之裳我有輔臣格言高躅永懷仙子恨不同時聊申嘉尚之情式降昭旌之命策名表德庶永無窮可贈玄和先

生其官宋淳化天聖政和三經修葺宣和元年徽宗改賜崇明觀後三里有伏虎岩

柳實

唐憲宗元和中^{十一}有柳實元微者居於衡嶽二公俱有從父為官浙方為理庶人連累各寬于驩愛之州二公俱結行邁而往省焉至於廉州白浦縣登舟而欲越海將抵交趾艤舟合浦岸夜有村人饗神簫鼓喧譁舟人與二公僕使咸往觀焉夜將半俄颺風起斷纜飄于大海莫之所適俄抵孤島而風止二公愁沮而陟焉見玉天尊像瑩然于案所有金香爐而別無一物二公周覽次忽覩東海上有巨獸出首四顧若有密聽良久乃沒去逡巡有紫雲自海而湧出蔓衍數百步有五色芙蕖高百餘尺葉葉而綻內有帳幄若綺繡雜錯耀奪人目見虹橋忽展直抵于島上俄有雙鬟侍女如捧玉合持金爐似蓮華而至于天尊所易其殘燼炷以異香二公見雙鬟叩頭再拜辭理哀酸求及人世女不答二子請益良久女曰子何人而至此二子以事告女

田小頃有玉虛尊師當降此島與南溟夫人會約子堅請之將有所遂言訖有道士乘白鹿馭彩霞直降于島上二子拜而泣告尊師憫之曰子隨此女而謁南溟夫人當有歸期無慮尊師告女曰子暫修真畢當詣彼二子受教至帳前行拜謁之禮見女子未笄衣五色文章二子告以姓字夫人哂之曰昔時天台有劉晨今有柳實昔有阮肇今有元微莫非天也設二榻而坐俄頃尊師至夫人迎拜遂還坐有仙娥數輩奏以笙簫笛篳篥引鸞鳳雅合節奏二子恍惚若夢中人世罕聞見也遂命飛觴忽有玄鶴嚙彩牋自空而下曰安期先生知尊師赴南溟會暫請枉駕尊師讀之謂玄鶴曰尋當至彼尊師語夫人曰安期先生聞闕千載不值南遊無因訪話夫人趣侍女進饌玉器光潔與夫人對食而二子不得饗尊師曰二客未合餐然為致人間之食而食之夫人曰然別進饌乃人間常味也尊師食畢懷出丹篆一卷而授夫人夫人拜而捧之遂告回謂二子曰子有道骨歸不難

然邂逅相遇合有靈藥相贈但子宿分自有師吾不合爲子師爾二子拜尊師遂去夫人命侍女曰可送二客去曰所來者何侍女曰有百華橋可馭二子感謝拜別夫人贈以玉壺一枚高尺餘夫人命筆題玉壺詩云來從

一葉舟中來去向百華橋上去若到人間扣玉壺鴛鴦自解分明語俄有橋長數百步欄檻之上皆有異華二子於華間潛窺見千龍萬虬迴相繚繞爲橋柱石有使者曰吾不當爲使而送子蓋有深意欲奉託強爲此行出襟帶間一合子中有物隱隱然如蜘蛛形狀謂二子曰吾輩水仙也水仙則陰也而無男子吾昔道遇番禺少年情之至則有子未三歲合棄之夫人命與南嶽神爲子其來久矣中間南嶽回鴈峯使者有事于水府回日憑寄吾子所弄玉環往而使者隱之吾頗爲恨二君子爲持此合子到回鴈峯下訪使者廟而投之當有異變儻得玉環爲送吾子吾子亦當有報效爾慎勿啓之二子受之謂使者曰夫人詩云若到人間扣玉壺鴛鴦自解分

明語何也曰子歸有事但扣玉壺當有禽應之事無不從意又曰玉虛尊師云吾輩自有師師復是誰曰南嶽太極先生爾當自遇之遂與使者別橋之已盡達昔日合浦維舟處回視之無橋矣二子詢時代已十年也驅愛

二州親屬殂矣二子惆悵問道將歸衡山中途因以手扣玉壺遂有鴛鴦語曰當飲食前行自遇俄頃道左有孟饋饌羅列二子食而飽數日尋即達家昔日童稚已弱冠然二子要各謝世已三日家人輩悲喜不自勝人云郎君已沒大海服闋已九秋也二子似厭世體亦清虛觀妻之喪不甚悲戚因相共抵回鴈峯下訪使者廟以合子投之倏有黑龍長數丈激風噴電折木拔屋霹靂一聲廟宇立碎二子戰慄不敢熟視室中乃有擲玉環者二子取之而送于南嶽廟及歸有黃衣少年持二金合子各到二子家曰郎君持此藥曰返魂膏二君子家有幾者雖一甲子猶可塗頂而活已而少年忽不見二子遂以活妻後共尋雲水訪太極先生無有其人因雪中見

老叟負薪而賣二子哀其年老而寒飲之以酒睹薪檐上有刻太極二字乃疑異之禮爲師持玉壺以告之叟曰吾貯玉液者此壺也甚喜遂拉二子同上祝融峯更不復出矣歷世真仙體道通鑑卷之三十三

歷世真仙體道通鑑卷之三十四

鱗二

浮雲山聖壽萬年宮道士趙道編修

陳法明

衡嶽洞陽宮在石廩峯西北乃施真人伏鬼會真之所唐陳法明應詔回於此峯下開岩建壇山人爲之陰助南望雲陽旦夕朝真誦大洞經後服丹而玄化今尚存基舊亦有庵宇

王十八

唐宰相劉公名晏少好道術精懇不倦而無所遇嘗聞異人多在市肆間以其誼雜可混迹也因遊長安至一藥鋪偶聞人曰常有三四老人紗帽拄杖來取酒飲訖即去兼覓藥看亦不多買某意非凡俗者劉公曰早晚至否曰明日合來劉公平旦輒往俟之少頃果有道流三人到引滿飲酒談詡極歡傍若無人良久曰世間還有得似我輩否一人云王十八遂去自後每記之不可求及作刺史往南中過衡山縣時初春風景和暖喫冷淘一盤香菜茵陳之類甚爲芳潔劉公異之問鄰

吏曰側近莫有衣冠否此某何所得答曰縣有官園子王十八能種所以館中常有好菜蔬劉公忽驚記所遇道人之說乃曰園近遠去得否曰即館後是遂往問之見王十八衣犢鼻袴灌畦狀貌山野望劉公趨拜戰慄漸次問其鄉里家屬曰飄蓬不省亦無親族劉公益異之令坐索酒與喫固不肯受及歸乃詣縣自請同往嶺外縣令不解其意當時發遣之王十八破衣草履登舟而行劉公漸與之熟令妻子見拜之同坐茶飯王十八形容衣服日益穢弊家人並竊惡之夫人曰豈得有異何爲如此劉公不懈去所詣數百里患痢朝夕困極舟船隘窄不離劉公之所左右掩鼻罷食不勝其苦劉公更無厭忌之色但憂慘而已勸就湯粥數日遂斃劉公嗟嘆涕泣送終之禮無不備焉乃葬於路隅後年官替歸朝却至衡山縣令郊迎既坐曰使君所將園子去尋却來應是不堪驅使劉公驚問何時歸曰後月餘日即歸云奉處分放回劉公大駭當時步至園中茅屋雖存皆無所睹

隣人曰王十八昨夜去矣劉公怨恨加甚向屋再拜泣涕而反審其到縣之日乃途中疾卒之辰也遣人往發冢瘞空存衣服爾數月至京城官居朝列偶得重疾近至屬續家人妻子圍侍號咷俄聞扣門甚急問者走呼曰有人稱王十八令報家人權躍迎拜王十八微笑而入其卧所盡令去其障蔽及湯藥等乃自於腰間一葫蘆中出藥三九如小豆大用葦筒引水半甌灌而搖之少頃腹中如雷鳴逡巡開眼展然而起都不似先有疾時夫人曰王十八乃涕泗交下再拜若不勝情妻女及僕使並泣王十八悽然曰奉愧舊情故來相救此藥一圓可延十載至期某却再來遂啜茶一椀而去劉公因請少留不可又欲與之金帛復大笑後劉公拜相兼領鹽鐵坐事貶忠州三十年一旦有疾王十八復來曰要見相公劉公感嘆頗極延入閣中又懇求之王十八曰所疾即愈且還某藥乃以鹽一兩投水中飲之遂吐出藥三圓顏色與三十年前服者無異王十八索香湯洗之劉公堂

姪侍疾在側遂攫其二圓吞之王十八熟視笑曰汝有道氣我固知爲汝掠也趨出而去不復言別劉公尋瘞復數月有詔至乃卒

孫登

孫登字公和汲郡人無家屬於郡北山爲土窟居之善長嘯好讀易撫一絃琴性無恙怒嘗往宜陽山有作炭人見之知非常人與語登不應晉文帝聞之使阮籍往觀既見與語亦不應嵇康又從之遊三年問其所圖終不答康將別謂曰先生竟無言乎登曰子識火乎火生而有光而不用其光果在於用光乎人生而有才而不用其才果在於用才乎故用光在乎得薪所以保其耀用才在乎識真所以全其年康又請學琴登不教之曰子才多識寡難乎免於今之世矣康辭去登遂白日昇天晉書阮籍傳云籍嘗於蘇門山遇孫登與商畧終古及棲神導氣之術登皆不應籍因長嘯而退至半嶺聞有聲若鸞鳳之音響乎岩谷乃登之嘯也南嶽總勝集云孫登昇棄榮位棲遁求仙以至露寢忍凍茹草

充飢切求至道感赤君得玉砂膏久之入會稽改記云孫登居之祝版留之於虎山也

嵇康

嵇康字叔夜向北山從道士孫登學琴登不教之曰子有逸郡之才必當戮於市康遂別去登乃冲昇康向南行至會稽王伯通家求宿伯通造得一館未得三年每夜有人宿者不至天明即死伯通見此凶遂嘗閉之至是康留宿館中一更後乃取琴彈二更時見有八鬼從後館出康懼之微祝乾元亨利貞三遍乃問鬼曰王伯通造得此館成來三年每夜有人宿者死總是汝八鬼殺之鬼曰我非殺人鬼是舜時掌樂官兄弟八人號曰伶倫舜受佞臣之言枉殺我兄弟在此處理主人王伯通造館不知向我上築牆壓我聞我見有人宿者出擬告之彼見我等自懼而死即非我等殺之今願先生與主人就取我等骸骨遷別處埋葬期半年主人封爲本郡太守今賞先生一廣陵曲天下妙絕康聞知大悅遂以琴與鬼鬼彈一遍康即能彈彈至夜深

伯通向宅中忽聞琴聲美麗乃披衣起坐聽琴音深怪之乃問康康答曰主人館中殺人鬼我今見之矣伯通曰何以見之康具言其事明日伯通使人掘地果見八具骸骨遂別造棺就高潔處遷埋後晉文帝時伯通果爲太守康爲中散大夫帝令康北面受詔教官人曲康不肯教帝後聽佞臣之言殺康於市中康遂抱琴而死葬後開棺空不見尸晉書云嵇康字叔夜譙國鉅人其先姓奚會稽上虞人以避怨徙焉鉅有嵇山家于其側因而命氏康早孤有奇才遠邁不負群身長七尺八寸美詞氣有風儀而土木形骸不自藻飾人以爲龍章鳳姿天質自然博覽無不該通與魏宗室婚拜中散大夫常修養性服食之事彈琴詠詩自足於懷以爲神仙票之自然非積學所得至於導養得理則安期彭祖之倫可及乃著養生論每思鄧質惟陳留阮籍河內山濤豫其流者向秀劉伶籍兄子咸王戎遂爲竹林之遊世所謂竹林七賢也戎自言與康居山陽二十年未嘗見其喜愠之色

康嘗採藥遊山澤會其得意忽焉忘反時有樵蘇者遇之咸謂爲神至汲郡山中見孫登康遂從之遊登沈默自守無所言說康臨別去登曰君性烈而才雋其能免乎康又遇王烈共入山烈嘗得石髓如飴即自服半餘年與康皆凝而爲石又入石室中見一卷素書遽呼康往取輒不復見烈乃嘆曰叔夜志趣非常而輒不遇命也山濤將去選官舉康自代康乃與濤書告絕大略云聞道士遺言餌木黃精令人久壽意甚信之游山澤觀魚鳥心甚樂之一行作吏此事便廢安能舍其所樂而從其所懼哉今但欲守陋巷教養子孫時時與親舊叙離闊陳說平生濁酒一盃彈琴一曲志意畢矣此書旣行知其不可羈屈也康性絕巧而好鍛宅中有一柳樹甚茂乃激水園之每夏月居其下以鍛東平呂安服康高致每一相思輒千里命駕康友而善之後安爲兄所枉訴以事繫獄辭相證引遂復收康康性慎言行一旦縲紲乃作幽憤詩曰雖曰義直神辱忠沮澡身滄浪曷云能補初

康居貧嘗與向秀共鍛于大樹之下以自贖
給頴川鍾會貴公子也精練有才辯故枉造
焉康不爲之禮而鍛不輟良久會去康曰何
所聞而來何所見而去會曰聞所聞而來見
所見而去會以此憾之及是言於文帝曰嵇
康卧龍也不可起公無憂天下顧以康爲慮
爾因譖康欲助毋丘儉帝遂害之康將形東
市太學生三千人請以爲師弗許康顧視日
影索琴彈之曰昔袁孝宏嘗從吾學廣陵散
吾每靳固之廣陵散於今絕矣時年四十海
內之士莫不痛之帝尋悟而恨焉初康嘗遊
洛西暮宿華陽亭引琴而彈夜分忽有客詣
之稱是古人與康共談音律辭致清辯因索
琴彈之而爲廣陵散聲調絕倫遂以授康仍
誓不傳人亦不言其姓字康善談理又能屬
文撰上古以來高士爲之傳贊又作太師箴
記纂淵海云南海太守鮑靚通靈士也東海
徐寧師之寧夜聞靜室有琴聲怪其妙而問
焉靚曰嵇叔夜寧曰嵇臨命東市何得在此
靚曰叔夜雖示終而實尸解也

東郭延

東郭延者山陽人也服靈飛散能夜書在冥
室中身皆生光照耀一室又能望見平地數
十里小物知真形色又凡見人不計識與不
識能逆知其生死一如其言在鄉至四百歲
不老一旦有數十人乘迎之比隣盡見與親
故辭別而去云詣崑崙山也

樂子長

潛山真君是樂史之遠祖按總仙記曰真君
名子長齊人也少好道到霍林遇仙人韓衆
受靈寶符傳巨勝赤松散真君服藥年一百
八十歲色如少女妻子九人皆服此藥入勞
盛山昇仙住方丈之室於神州受太玄生籙
以五芝爲糧太上補爲修門卽位亞神次唐
玄宗夢二十八仙稱星二十八宿內真君是
星宿於潛山得道號潛山真君

鳳網

鳳網者漁陽人常採百草華以水漬封泥之
自正月始盡九月末止埋之百日煎而丸之
卒死者以藥納口中皆立活網長服此藥至

數百歲不老後入地肺山中仙去

趙翟

趙翟者字子榮上黨人也得癩病將死人或告翟家云及其生棄之若使死於家則後世子孫常有此病於是家人為辦一年糧送之置於深山石室中又恐虎狼食之外以木砮欄之子榮悲傷自恨晝夜泣涕如此百餘日夜中忽見石室前有兩人並立問子榮曰子何人也子榮度深山窮林之中非人所行之處必是神靈乃自陳說叩頭乞哀其人行諸砮中有如雲氣了無所礙於是問子榮曰汝必欲疾愈者即當服藥能服藥否子榮曰宿業多罪嬰此惡疾已見流棄死在旦夕若則足割鼻而可得活猶所甘心況於服藥乎唯乞神人丐其餘生神人乃以松子脂五升賜之語曰服不惟愈疾而已得長度世矣子榮服之未盡癩瘡盡愈身體輕強乃歸家家人疑之是鬼具陳說其由乃喜遂更服之經二載顏色轉少膚肌光澤走及鳥獸時已年七十餘食雉兔皆嚼其骨能負重擔終日不瘦

極百七十歲夜卧忽見屋間光大如鏡者以問左右左右云不見後夕漸大數十日間一室盡明能夜書後夜卧見面上有二人長三寸許乃美女也甚端正但小耳戲真鼻口之間如是復一年許此女稍長大至於如人不復東面上出在其側又常聞琴瑟之聲欣欣然獨樂在民間三百餘年色如童子乃入抱犢山仙去

王玄甫

王玄甫沛人也同吳人鄧伯元學道於赤城霍山受服青精石飯吞日精丹景之法內思洞房積三十四年乃內見五藏冥夜中能書晉穆帝永和元年正月十五日大帝遣羽車迎之玄甫與鄧伯元乘雲駕龍白日昇天今在北玄圖臺受書為中嶽真人

尹思

尹思晉人正月十五夜坐室中遣兒視月中有異物否兒曰今年當水月中有人披簾帶劍思出視之曰非水也將有兵亂月中人帶甲仗矛爾

張岳

司空姓張名岳字巴玉齊廣南封州封川縣人也少習儒業衆所推伏以才干祿明帝用之位至司空及東昏嗣位嘆曰夫榮必辱妨我之神遂具表投進退官南歸誓慕長生久視之方願卜棲真養性之地帝留不遂文武百僚餞送司空於東門之上數旬至攸縣文清驛值霖雨月餘忽天色晴霽出驛庭四顧瞥見邑之東有一山首出於衆獨秀標奇平生罕見再三嘆羨遂召驛吏遵問之對云晚生不知今呼市老毛國華至乃言古老相傳云名溫水山又名紫麟山司空聞而異之次日至山下語鄉人曰余在邑中見此山上有瑞雲蓋頂紫氣凝天山中必隱神仙適予平生之志也遂入溫水源放光峯下初草舍三十餘間居焉韓二全家齋戒誦大洞真經三十章外日與鄉人治水陰田持三百大戒僅二十年忽一日見神人持藜杖從山而出來語司空曰吾葛洪子也奉上帝命令授子金丹火鼎之訣汝可秘而行之密濟貧苦他時

功滿相見未遲出門復語司空曰吾常與浮丘洪崖赤松子王喬蘇耽丁令威蘇隱嚴真等九人仙侶時時期會仙峯之上嶺有會以琴棊酒果用樂元和去住匪常非塵俗所知也大藥金丹得度世為神仙汝受之勿得輕泄司空蒙教俯伏而謝忽爾神人隱形莫知其所在司空是時勤行齋戒後成火鼎之功點瓦礫為黃金寒濟孤老貧病至梁武帝天監二年至八月十四日夜半忽聞空中有神人喚名云絕早可領家入山惟留女盧瓊在家至辰巳間女使見有一道流從空而下身生疥癩問曰司空在否曰司空今早入山未歸問酒庫何在女使指示之道流脫衣入酒庫甕中以酒浴身上疥癩及出庫整衣冠出門而去次門首與女使曰司空歸時可與傳語但道葛道士特來相訪司空聞之喜聞庫中酒有異香遂令家僮陳席於廳上一宅良賤悉取庫內香酒均飲悉竭唯守宅女使潛見道流浴瘡托疾不飲司空飲罷乃令家僮備湯沐浴更衣而坐令召鄉老諸門徒

司空乃再入山焚香升壇語鄉老門徒曰天將詔予非予厭世言訖鸞鶴舞于空中祥雲霽於壇上舉家八十餘口白日輕舉而去惟守宅女使半空從雲而墜司空嘆曰汝無仙分且住下土待吾見上帝為汝陳奏至十八日帝勅玄武神下降鎮守山界以女使為土地守護山壇是日鄉老門徒陳昂等遠具狀申縣縣申州備錄諸事實狀奏聞奏頒下所司自此故號司空山焉至陳文帝永嘉初有丹陽章馬二先生不通名字來山前語鄉人曰予張司空弟子也特來尋司空住處人曰司空已於梁天監二年八月十五日拔宅冲天去矣空有遺宅人不敢住二先生聞之悅喜入山齋戒修道一旦功就異香滿山樵者聞之莫知其兆唯聆絲竹響亮遙空舉目視之二先生各乘瑞雲白鶴冲天而去今有白鶴仁唐天寶七年五月十二夜明皇見夢於司空山仙壇立祠堂選差道流有德行者住持焚修賜額朱陽觀宋徽宗政和三年七月改賜額陽升封張仙為太素真人是年八月又

特封冲昇真人

王仲甫

王仲甫者不知何所人少有意好事神明常吸二景冷霞之法四十餘年都不覺益其子亦服之足十八年白日昇天後南嶽真人忽降仲甫而教之曰子所以不得昇度者子身有大病腦宮虧滅筋液不注靈津赤溢雖復接景冷霞故未為身益仲甫遂依教服藥治病兼修其事又十八年白日昇天今在玄州受書為中嶽真人

王先生

王先生不知何所人有楊晦之者長自安東遊吳楚至烏江聞王先生頗有道術因就門謁之先生玄中褐衣隱几而坐風骨清美晦之再拜備禮先生拱揖其側語議高暢不覺至夕即八月十二日也先生召其女曰七娘者乃一老嫗年七十餘齒髮盡衰行步俯偻而至先生謂晦之曰此吾女也情不好道今且老矣既而謂七娘曰爾為吾刻紙作今夕之月置于室之東垣上頃之七娘如其言俄

而奇光煥發一室之內纖毫盡辨先生與晦之翫談於室內寒氣逼人如在半天矣及曉將別先生以杖畫其庭塵土晦視其所居則崖壑萬仞叢林參天前有積水目之無極晦之與先生立于水濱驚悸嘆駭今日之觀豈非仙家一夕人世千年先生笑曰吾以為娛耳振衣揮斥逡巡即門庭如舊晦之馳去莫敢顧盼矣

趙即

趙即左慈等皆以氣禁水水為之逆流一二丈又於茅屋然火煮物物熟而茅屋不然以一大釘釘入柱七八寸以氣吹之釘即踊射而出燒百沸湯以百許錢投中令人一一探渡取錢而手不灼爛禁水者中庭露之大寒不冰又能禁一里中使灼者不熱

歷世真仙體道通鑑卷之三十四

歷世真仙體道通鑑卷之三十五

鑰三

浮雲山聖壽萬年宮道士趙道編修

王履冰

王履冰本未明大道亦不知修行大丹之法惟偶得上清寶經太素真人隱朝禮願上法常以每月各日其夕入靜室燒香北面修行祝之秘行之三十年得乘雲駕欲昇入玄洲其李仲子趙雙成范叔及管平阿李順賢延安生等皆得此道修勤不替俱為真仙或處玄洲或昇崑崙之傍或登三元之宮矣

岑道願

岑道願江陵人也萬州兩傍多大山江之南林壑尤虛邃有巖磴然甚大隋末先生避難泝三峽至此愛之遂隱巖下常食黃精時百餘歲膚若冰雪浩然莫見喜溫積二十年蛻迹而去唐太宗貞觀十八年臨江商人至廣陵將還見老人儀冠甚偉以香鉢兩囑商人往先生巖然之商人歸偶忘焉舟抵湖灘濤波雷怒不可止商人方驚悟返詣巖然香已而鼓柁平行更無留礙德宗貞元中監察御

史段文昌曰先生浩劫士也何乃疎動觀聽為神奇探其贖當以浮世聾聵不省至道故以感發之宋神宗熙寧十年本州禱雨即應太守聞於朝詔封虛鑒真人

王順

王順採藥於終南山得道今終南山有王順峯靈應昭彰至今不絕

吉留馨

膠東有異人不知姓名常歌舞於市曰吉留馨後於市中白日乘雲而去

王賈

王賈在東海山中詣神仙胡毋丘力君受太極上元年紀之術服朱草神芝得仙其山在海中望之甚近而不可到山上多木芝靈木神草蒼靈龍龜天地奇物不可名字洞中有

河洛元命曆等書

王叔明

王叔明不知何所人也少好道居華陽山北與鮑元治同志修道不知感遇何仙修習何術未顯其事皆得仙去

唐若山

唐若山魯郡人也唐睿宗先天中歷官尚書
郎連典劇郡玄宗開元中出守潤州頗有惠
政遠近稱之若山常好長生之道弟若水爲
衡嶽道士得胎元谷神之要常召入內殿懇
求歸山詔許之若山素好方術所至之處必
會爐鼎之客雖術用無取者皆禮而接之家
財殆盡俸祿所入未嘗有餘金石所費不知
紀極晚歲尤篤志焉以潤之府庫官錢以市
藥賓佐骨肉每加切諫若山俱不聽納一旦
有老叟形容羸瘠狀貌枯槁詣門款謁自言
有長生之道見者皆笑其衰藹若山見之盡
禮加恭留止月餘所論皆非丹石之旨若山
博採萬訣歌誦圖記無不研考問更所長皆
蔑如也復好肥鮮美酒珍饌品膳雖瘦老劣
而所食敵三四人若山欽奉承事曾無倦色
一旦從容謂若山曰君家百口所給常若不
足貴爲方伯力尚多闕一旦居閑何以爲贍
況帑藏錢帛頗有侵用誠爲憂之若山驚曰
某此不久將有交代亦常爲憂而計無所出

若緣此獲譴固所甘心但虞一家有凍餒之
苦爾更曰無多慮也促命酒連舉數日若山
飲酒素少是日亦飲三四爵殊不覺醉心甚
異之泊夜月甚明撤觴徐步庭下良久更謂
若山曰可命一僕運鑪鍋鐵器十數事於藥
室間使僕布炭壘爐曰鼎鉗之屬爲一聚熾
炭加之烘然如蜜不可向視更於帶間解小
瓢出丹二丸投於火中闔扉而出謂若山曰
子有道骨法當度世加以爲尚正真性無念
惠仙家尤重此行吾太上真人也遊觀人間
以度有心之士憫子勤志故來相度爾吾所
化黃白之物一以留遺子孫旁濟貧乏一以
支納帑藏無貽後憂便可命棹遊江爲去世
之計翌日相俟於中流也言訖失其所在若
山凌晨開閣所化之物爛然照屋復扁閉之
即與寮吏賓客三五人整棹浮江將金山寺
既及中流江霧晦冥咫尺不辨若山獨見老
叟棹漁舟直抵舫側招揖若山遂入漁舟中
超然而去久之風波稍定昏霧開霽已失若
山矣郡中几案收得若山訣別之書指揮家

事又得遺表因以奏聞其大旨以世祿暫榮
浮生難保惟是登真脫屣可以後天爲期昔
范丞相泛舟五湖是知其主不堪同樂也張
留侯之去師赤松是畏其生不可久存也二
子之志與臣不同臣運屬休明累叨榮爵早
悟昇沈之理深知止足之規棲心玄關偶得
丹訣黃金可作信淮南之昔言白日可延察
真經之妙用既得之矣餘復何求是用揮手
紅塵騰神碧海扶桑在望蓬島非遙遐瞻帝
闈不勝犬馬戀軒之至玄宗省表異之運命
優恤其家促召唐若水與內臣齋詔江表海
濱尋訪杳無音塵矣其後二十年有若山知
舊自浙西奉使淮南於魚肆中見若山鰻魚
於市混同常人睨其使而延之入陋巷中榮
迴數百步乃及華第止使與食哀其久貧市
鐵二十銚明日復相遇已化金矣盡以遺之
使姓劉令劉子孫世居金陵亦有修道者南
嶽總真集云其弟若水尸解於南嶽

王向

王君諱向杜陵人也生而持操奇操曰久望

終南高峯謂父母曰兒長大必居此山以求出世鄉里異之博採墳典經目即誦之年既冠與里人鄭爽業文舉進士二年末中第退居南山石門谷以坐忘返照爲事累年神仙孟先生降授三一五千之道能變化飛行分形散影唐明皇開元末其友人鄭爽爲御史奉使揚州既至於途中見向弊衣偃僕側立道隅鄭惻然憫之使人召至傳舍問其遊息向以旅寓因悴爲答明日復來謂鄭曰吾子眷眷有故人之情能易服降貴過予弊廬乎鄭然之即更衣潛往經歷闌闌復入陋巷若由荒徑殆無人蹤葉榛隘弱者數里乃及所居入門則向請先入爲席久之使侍者引鄭即進見金樓寶臺朱甍翠殿非人世所睹向霞冠雲衣羽衛嚴盛勢若王者鄭悚悸不敢仰視留宴一夕奇饌仙樂不可目名及曉相送于門謂鄭曰子雖名遂功成而力尚清因使左右樵僮持弊蓋引還傳舍即以此蓋於市質錢百萬以贈於鄭自此不知所之復往追訪無復舊迹使回京師具以密奏時明皇

棲心神仙亦詔淮海節度使物色訪求竟不能得向與鄭話舊之時云已爲太一仙人矣

羅子房

沖虛子姓羅名子房唐玄宗開元中父子修行於玉笥元貞觀其父尸解葬空棺於觀側沖虛子久亦功成駕空舟於門外杉表騰空而去

王實

小有洞真人王君諱實嘗有過謫於人間五年當執房效役南陽張茂實家華山下唐代宗大曆中偶遊洛中假僕於南市因得實焉年可四十餘勤幹無私出於深誠苟有可爲者不待指使茂實器之易其名曰大實將厚賞之不受其家益憐之居五年一旦辭茂實曰實本居山家業不薄運於厄會須執役以樣之今厄盡也請從此辭茂實不測其言不留聽之今暮當去迨暮入白茂實曰感君深思恩有以奉報實家去此甚近其中景象可觀能相從一遊可乎茂實曰可實於是截竹數尺於上書符授茂實曰君杖此入室稱腹

痛左右悉令去取藥既去潛置杖於衾中抽身出來可也茂實依言爲之實曰君可遊吾居者也相與南行一里餘有黃頭執鞭驅青麟一赤文虎二侯於道左茂實欲退實曰無苦但前行既到實乘麟令茂實與黃頭各乘虎茂實懼不敢前實曰既相信信必復畏且此物人間之極駿者但試乘之遂僥其上穩不可言於是奴引茂實從上仙掌越壑陵山舉意而過殊不覺險峻如到三更計數百里程矣下一山物象鮮媚松石可愛樓臺宮觀非人間所見將入門揮鞭曰阿即來紫衣吏數百人羅列道側漸入青衣數十人容色皆殊衣服鮮華不可名狀各執樂器前引遂入中堂宴食畢令茂實坐實入更衣反坐衣裳冠冕儀貌堂堂實真仙之風度也其隱戶增闔屏幃牀榻茵褥之盛人世非有鸞歌鳳舞及諸聲樂皆所未聞情意高逸不復思人寰之事歡極實曰此乃仙居非人世所到此君宿緣合得見此故有逃厄之遇仙路殊靜塵難雜君宜歸修心三五劫當復相見實比

者塵緣將盡上界有名得遇太清真人召入小有洞中示以九天之樂復令下視生死之海且曰樂非難求苦亦易遣如爲山者掘土增高也自是修歷五六劫及證此身迴認委骸積若山嶽念念修心修已一世形骸雖改此心不忘修致其功則亦非遠亦時有心達氣清一言而悟者子勉之黃金百鎰爲修身之助令黃頭與茂實等從到乘麟處復令黃頭執之復步送到家人方環泣茂實投金井中復抽去竹杖令茂實潛卧余中復曰我當蓬萊謁大仙伯明且蓮華峯上有彩雲東去我乘之也遂揖而去茂實忽呻吟衆驚而問茂實給之曰初腹痛忽若人召遂奄然爾不知其多少時也家人曰取藥既來呼之不應已七日矣惟心尚暖故未能殮爾明晨望蓮華峯上果有彩雲東去茂實遂去遊名山後不知復所在因號復爲麒麟客焉

王四郎

王處士第行四郎洛陽尉王琚之孽姪也少時隨母他適自後或至琚家不復錄矣唐憲

宗元和中琚常調自鄭入京過東都大津橋四郎於馬前拜布衣草履形貌山野琚不之識因言其名琚哀愍之四郎乃曰叔今赴選姪有少物奉獻即於懷內出金五兩色如鷄冠曰此不可與常者等之到京於金市訪張蓮子付之當領二百千琚異之即請曰爾頃在何處今復何適對曰比居王屋小有洞天今有家往義嶺山知叔到此故來拜候琚曰爾今停泊何處曰中橋逆旅席家琚曰吾即看爾曰行里有期恐不得祇候琚徑歸易服而往則已行矣因詢席氏乃曰妻妾四五人皆殊色至於此宿鞍馬華侈非常其王處士肩昇先行去往劍南琚私奇之然未甚信重及至上都謂家奴吉兒曰爾將四郎所留金一訪於市果有張蓮子出金示之蓮子驚喜曰何從得此所要幾緡吉兒曰二百千蓮子遂依前而付曰若更要則可再來吉兒遂以錢歸琚大異之明日自詣蓮子蓮子曰此道者王四郎所貨化金也西域商胡專此伺買且無定價但四郎本約多少爾適則不可售

也琚遂更不取焉自後訪問不復見之

葉千韶

葉千韶字魯聰洪州建昌人少師事西山道士學十二真君道術辟穀服氣嘗獨居忽大風雷雨電有一白衣人拜千韶言君道德臻備仙籍褒陞當在人間役使鬼神更顯功績今神人將降君可以見之無所畏也於是千韶焚香拱默以坐俄頃雲中有速遊朱衣真官一人降又神將十餘人皆帶劍佩龍虎符部從鬼神甚衆有黃衣綠衣吏各執簿一卷神將皆列拜千韶真官謂千韶曰天命授君此簿神將吏兵幸備役使以救世人千韶拜授天書捧其簿閱之若人間兵籍也更掌其簿書請召則應命後自長嘯則風生林壑嘯水則雨流原野足擦地則雷鳴轆轤手畫空則電光爍爍乃遊行天下每狂醉傲於城市間忽驅叱以振威人問之則曰我見某處火災某處亢旱使雨以救之耳人驗之果然常經過州縣適逢亢旱人請千韶祈雨即備香案啓祝須臾雨降有請致雷者脚踏地便

三

八

三

九

鳴從地底發，轆轤聲或苦雨祈請不應，千韶立爲止。雨冬中或旱祈雪，千韶乃單衣跣足，立於日中，嘯詠俄頃，風雲會合，降雪連宵。又以符救人疾苦，不俟人之求，請見疾者無不憫而救之。有邪病者聞千韶之名，自愈得符。

者終身病不再發。唐懿宗咸通十一年，千韶遊及濠州，聞刺史劉昉忽中風，垂命，名醫莫療。千韶策杖入州，曰：「感我此來，使君再生矣。」於是書符三道，貼於肩、脇、腿，曰：「驅風從脚出。」三日當愈。於是風颺颺從脚心出，三日平復。如故。昉博通文學，素好道術，歷官得郡，善政及人。乃謂賓吏曰：「昉平生師道，忽中暴風，遽感異人以相救度，董奉還杜樊之魂，今可俾矣。」實道力之所報也。郡人皆神於千韶，昉乃迎之於郡齋，以師事之，厚以金帛謝之。千韶遽捨昉而去，尋之無蹤矣。後有人於荆湘間見千韶，語濠州事而笑，十餘年後隱於西山，時有人見之者。

王璩

王璩一作本唐懿宗咸通十三年壬辰歲爲王

屋令嘗念黃庭經六千遍，欲自註解而未了。深義罷官居山之下，絕穀咽氣，乃入洞中行。三二十里，忽然平闊，壁立萬仞，下嵌室石牀。案几儼然，若有人居。案上古經一軸，不敢輒取。再拜言曰：「臣慕長生，竊入洞天，是萬劫良會。今睹玉案玄經，願真仙許塵目一披，良久忽有一人坐於案側，曰：『子勤至也。』吾東極真人王太虛與子同姓，黃庭經吾了所註，便授於子。復以桃核一片，予之大如數斗器，此桃出融皇澤中，食之者白日飛行，此核磨而服之，不惟愈疾，可以延年。子未可居此，更二十年期，言訖不見。璩乃攜核與經而歸，服核誦經，狀貌益少，東極真人註黃庭經世或有之。

李珣

李珣廣陵江陽人也。世居城市，販羅自業，而珣性迥端謹，異於常輩。年十五，隨父販羅，父年老，珣繼之。人有糴之與糴，珣即授之以升斗，俾令自量，不計時之貴賤，一升只取兩文，利以資父母歲月。既深，水物甚豐，父怪而問之，具以實對。父曰：「吾之所業同流者衆，無不

用出入升斗，出輕入重，以規厚利。雖官司以春秋較權，莫斷其弊也。吾早悟之，但一升斗出入皆用之，自以爲無偏矣。汝今更出入任之自量，吾不可及也。然衣食豐給，豈非神明之助邪？後父母歿，世及珣年八十餘，不改其業。值唐李珣出相，節制淮南，而珣以新節制同姓名避之，乃改名寬。李珣下車後數月，修道齋次，夜夢入洞府中，見景色正，春煙花爛熳，翔鸞舞鶴，彩雲瑞霞，樓閣連延。珣獨步其下，見石壁光瑩，填金書字，列人姓名，內有李珣字長二尺餘，珣視之極喜，自謂生於明代。

久歷顯官，又陞宰輔，能無功德及於天下？洞府有名我仙人也。再三爲喜。方喜之際，有二仙童自石壁左右出，珣問此何所也。曰：「華陽洞天，此姓名非相公也。」珣驚復問，非珣何人也。仙童曰：「此相公江陽部民也。珣及曉，歷歷記前事，益驚嘆。問於道士，無有知者。始召江陽官屬詰之，亦莫知也。乃令府城內求訪同姓名者數日，軍營里巷相推，乃得李寬舊名。珣乃以車迎之入府，致淨室齋沐，拜爲道兄。

一家欽事朝夕參禮李寬情性素澹道貌秀異鬚長尺餘皓然可愛年六十時曾有道者教以胎息亦久不食珏愈欽之及月餘乃問道兄平生得何道術服煉何藥珏曾入夢洞府見石壁姓名仙童所指是以迎請師事願

麟三

十二

以相授寬辭以不知道術服煉之事珏復虔拜以問寬所修如何寬以愚民不知所修遂具販糴以對珏再三審問咨嗟曰此常人之難事陰功不可及也復曰乃知富貴之盡有損貧賤用之獲祐名書仙籍以警塵俗之流胎息不食之事亦以實對珏日師其胎息後李寬一百餘歲輕健異常忽告子孫曰吾寄世多年雖然養氣亦無益汝輩一夕而卒三日棺裂有聲視之衣帶不解如蟬蛻焉已尸解矣

許仲源

唐蜀中酒閣一日有道人過飲童顏漆髮眉宇疎秀酒酣據局自歌歌曰尾閭不禁滄溟竭九轉神丹都謾說惟有班龍頂上珠能補玉堂關下穴時隣坐有許仲源者見之顧其

傳曰此非塵俗間人也乃起致敬願解所歌之辭道人曰今日未當說汝必欲知此可於重九日文人觀相尋許因移席與飲未終而先去許至日絕早往觀中而道人先已在焉乃探懷中出一短卷授許曰此老君返老還

麟三

十五

童之術也吾餌此藥今壽四百二十三年矣緣汝宿骨有分加之至懇故以相授若能以陰功成就之即當仙矣言訖化白鶴飛去許乃再拜受歸煉服不怠歲數百而有少容行及奔馬力兼數人後入青城山遂不復見弟子有得其術者因以傳人其歌曰尾閭不禁滄溟竭者謂尾閭乃東海泄水穴也人身泄氣之所亦名尾閭若此不禁雖滄溟亦竭矣九轉神丹都謾說者謂龍虎鉛汞陰陽日月黃芽白雪嬰兒姹女皆不歸一也惟有班龍頂上珠能補玉堂關下穴者謂取鹿角一雙每三寸截之東流河水浸刮去土每一斤用楮實子一兩黃臘桑白皮各二兩盛以金石之器慢火煮三日三夜旋添熱水日足則去黑皮服之

施無疾

施先生名無疾不知何地人也時往來京素間多不食動經歲月惟日飲少酒人強使之食一飯能盡斗米體有青毛人見則運氣頂髮直立治病以水代藥教人行禮義有狂生馬存隨之數日先生云汝於吾何求存曰某留心爐火有日矣終不有所成願先生略言大槩先生始則仰面長歎終則俛首責存曰子家貨不啻千萬金玉堆積貫朽於庫粟陳於倉然日食不過數盂身衣不過盈疋尚不知足無厭之心可知也有好者給汝曰得大藥燒異物為黃金用以為飲器則神仙可學也乃誑者之私言非通人之至論昔昌黎翁洞賓初學道有人謂之云當得助道之術我有術用藥煮銅為銀翁曰有變乎其人曰後五百年乃變歸其元翁曰吾不願學恐誤五百年後人一語感通高厚名藏真府迄今為神仙存再拜乃去先生多在華山

麟三

十四

歷世真仙體道通鑑卷之三十五

歷世真仙體道通鑑卷之三十六

鱗四

浮雲山聖壽萬年宮道士趙道一編修

宋愚

宋愚京師人也父願為遊商多往來湖湘間願經三歲不歸其母與愚曰汝父去何久若無故必回吾日夜憂也子可往求之愚乃下入楚至潭州遇跛者與飲跛者取巨甕備酌既飲留半以授愚曰可飲此酒愚乃飲即聞酒有異香愚一飲而盡跛者喜為愚曰汝來求父還知音否愚拜對以未知跛者曰吾知之愚乃再拜而請所知跛者曰子明日出清泰門數里有新茅屋數間乃吾屋也吾指示子父所在處乃各散去愚坐以待旦乃出清泰門行十餘里見道左有新屋數間亦甚潔雅有二小青衣童立於門曰子非宋君乎曰是矣乃引入既陞堂即見跛者戴冠紫袍有狼虎之姿揖愚坐迺進酒羅列珍品異集雖王公之家不若也既久跛者曰無以為樂取大飛飛小飛飛來一童自一器中取二彈丸光彩若白銀一置跛前一置愚前跛者喝

云二子各小呈伎藝以悅坐客二丸或飛起兩兩相擊即為長劍互相擊不止即為千餘劍俱利若秋水或散若列星或聚如束帛或驚若駭電或緩若引索或旋若規火或去若流波移時跛者曰汝欲得此道乎即可吞一

丸其變化亦如此愚曰本來求父不願求此跛者曰汝久客甚倦當乏日用吾有一藥銀法可授子愚曰賦命淺薄升斗之限常恐已不任亦不願學跛者驚曰子之道又在吾上乃命左右搬去杯皿曰子之父客死於湘州汝往求之可知矣異日子可復來此愚歸翌日再去即其室已空矣愚入湘果得父骨愚後舉進士即遊雲水面色紅瑩至今存焉意其飲餘杯之力也

韋善俊

韋善俊者其先出京兆高祖逍遙不仕祖宣敏嘗為葦縣令因家於葦父昂好山水母王氏初妊每嗽血食則連夕腹痛遂蔬食既生年十三歲長齋誦道德度人西昇昇玄等經人有所患悉為賑救之用及壯詣嵩陽觀事

黃元廣參佩道法又從臨汝洞元觀道士韓元最復授秘要常有二青童侍左右唐高宗調露初有劉文兒過山之西見神人長丈餘介甲而坐見善俊來起迎之文兒因訪識者曰此奉戒道士也文兒欽異遂從善俊歸

嵩陽天后嗣聖中寓籍昇仙觀一日復見神人厲聲曰子何人輒來此請速去不爾傷子善俊曰神人試我耶何相逼太甚神人遂遜謝而去又嘗過壇墟店東過黑馱犬繞旋不去因畜之呼為烏龍如意中將遊少林寺以齋食食之僧曰人未食而食犬可乎謝曰吾過矣尋出寺而去望之愈遠而犬愈大長數丈化為龍善俊乘之歸嵩陽絕迹不復出長壽中忽謂弟子曰吾學道已九十九年今則百矣太上召我當往遂乘龍去

張惠感

張惠感字智元高安人正一真人第十四代孫自崇元觀遷隱于浮雲志修神仙之道時唐武后朝也有游帷觀道士胡惠超壽數百歲因遊高安吳田瀑布致敬吳仙壇道浮雲

師惠感長安五年武后召惠感為國師齋于明堂感慶雲見神龍黃鶴翔集詔往亳州太清宮修金籙齋醮九井井久枯時冰雪凝涸忽有聲如雷水暴湧二龍出戲后異之賜絹五百疋歸浮雲游吳田瀑布東林二賢廟三元觀祭六丁謝七元煉丹浮雲明皇天寶中有神人降于壇曰子修行勤苦諸仙保舉明旦雞鳴當飛昇矣如期雲物異降白日冲昇武后久視元年庚子所鑄鐘記惠感姓名可考高安調露鄉今有惠感故里張氏坊存焉

張志和

玄真子姓張名志和字子同會稽山陰人一云婺州金華人始名龜齡十六擢明經以策于唐肅宗特見賞重命待詔翰林因賜名以親既喪不復仕居江湖自稱煙波釣徒著玄真子亦以自號有章詣者為撰內解志和又著太易十五篇其卦三百六十五兄鶴齡恐其遐世不還為築室越州東郭茨以生草椽棟不施斤斧躬席校屨每垂釣不設餌志不在魚也觀察使陳少游往見為終日留表其

居曰玄真坊以門隘大其閤號回軒巷先是門阻流水無梁少游為構之人號大夫橋帝嘗賜奴婢各一志和配為夫婦號漁童樵青陸羽嘗問孰為往來對曰太虛為室明月為燭與四海諸公共處孰為往來志和善畫飲酒三斗不醉守真養氣卧雪不寒入水不濡天下山水皆所遊覽魯公顏真卿與之友善真卿為湖州刺史與門客會飲乃唱和為漁父詞其首唱即志和之詞曰西塞山邊白鳥飛桃華流水鰕魚肥青箬笠綠蓑衣斜風細雨不須歸真卿與陸鴻漸徐士衡李成矩共唱和二十五首遞相誇賞而志和命丹青剪素寫景夾詞須臾成五本華木禽魚山水景色奇絕踪跡今古無倫而真卿與諸賓客傳翫嘆服不已其後真卿東遊平望驛志和酒酣為戲水鋪席於水上獨坐飲酌笑詠其席來去遲速如利舟聲復有雲鶴隨覆其上真卿親賓參佐觀者莫不驚異尋於水上揮手以謝真卿上昇而去今猶傳實在人間者

朱孺子

朱孺子永嘉固人也幼而師道士王玄真居大箬巖巖師陶隱居修真誥于此亦名真諸巖巖之西有陶山在焉勤苦事於玄真深慕仙道常登山嶺採黃精服餌歷十餘年一日就溪濯蔬見岸側有二小花犬孺子異之乃尋逐枸杞下玄真與孺子共尋掘乃得二枸杞根形狀如花大堅若石洗潔歸以煮之而孺子益新看火三晝夜不離竈側試嘗汁味取啖不已及見根爛以告玄真共取食之俄頃孺子忽飛昇在前峯上玄真驚異久之孺子謝別玄真昇雲而去到今歸其峯為童子峯玄真後餌其根盡不知其年壽亦隱於巖之西陶山有採捕者時或見之

王老

王老坊州宜君縣人也居于村野頗好道愛客務行陰德意其妻亦同心不倦一日有縑縷道士造其門王老與妻俱迎禮居月餘間日與王老玄談杯酌甚相歡洽俄患惡瘡偏身王老乃求醫藥看療益加勤切而瘡甚大將逾年道士曰此不煩以凡藥相療但將

數斗酒浸之自愈於是王老爲精潔釀酒及熟道士言以大瓮盛酒吾自加藥浸之遂脫衣入瓮三日方出鬚髮俱黑而顏復少年肌若凝脂王老闔家視之驚異道士謂王老曰此酒可飲能令人飛昇上天王老信之初覓酒五斛餘及窺三三斗在爾清冷香美異於常酒時方與二人打麥次遂共飲皆大醉道士亦飲云上天去否王老曰願隨師所適於是祥風忽起絳雲如蒸屋舍草樹全家人物雞犬一時飛去空中猶聞打麥聲數村人共觀望驚嘆惟猫鼠棄而不去風定其賃打麥二人乃遺在別村樹下後亦不食皆得長年今宜君縣西三十里有昇仙鄉存焉

侯道華

侯道華自言我崑山來泊於河中永樂縣道靜院若風狂人衆道士皆輕易之又云陝州芮城人詣中條山道靖觀事周尊師名悟仙居常如風狂人凡觀舍有所損自持斤補完之登危立險人所難及處皆到又爲事賤劣有客來不問道俗凡庶悉爲擔水汲湯濯足

浣衣又淘濯灌園辛苦備歷以資於衆衆益賤之驅叱甚於僕隸而道華愈忻然又常好子史手不釋卷一覽必誦之於口衆或問之要此何爲答曰天上無愚情仙人衆咸笑之經十餘年殿梁上或有神光人每見之相傳

云唐開元中有劉天師嘗煉丹成試犬死而人不敢服藏之於殿梁人皆謂妄言矣元德實錄云按宣室志云唐文宗時道士鄧志玄煉丹成留一合藏於院內因殿宇損壞道華葺之登梁陷中得小金合有丹遂吞之擲下其合吞丹訖遽無變動忽一日入

市醉歸其觀素有松樹偃蓋甚爲勝景道華乃著木履上樹悉斫去松枝釋道士屢止之不可但斫曰他日破我上昇處衆人以其爲風狂怒之且甚適永樂縣令至其吏人觀其斫松深訝之衆具白於官官於是責辱之道華亦忻然後七日道華晨起沐浴妝飾焚香曰我當有仙使來相迎但望空拜不已衆猶未信須臾人言見觀前松上有雲鶴盤旋簫笙響亮道華忽飛在松頂坐久之衆甚驚忙永樂縣官道俗奔馳瞻禮其責辱道華縣官扣

磻流血道華揮手以謝道華云我受玉皇詔授仙臺郎知上清宮善信院今去矣復留一詩云帖裏大還丹多年色不移前宵謾與却今日碧空飛慚愧深珍重珍重鄧天師昔年煉得藥留著與內芝吾師知此術速鍊莫遲

爲三清相對侍大羅的有期俄頃雲中音樂聲幢幡隱隱凌空而去時唐宣宗大中五年也一云韓衆降賜姓李名內芝配住上清善信院乃脫履松上下古松鄭雲叟題中條道靖觀詩云松頂留衣上玉霄永傳聖迹化中條

不知揖徧諸仙否豈累如今隔兩宵節度使鄭公光按視以事聞奏詔賜絹五百匹并賜御衣修飾殿廊賜名昇仙院

臣道一曰侯道華勞謙養道屈已事人觀其躬持斧斤完葺宇舍至於汲湯灌園等事若僕隸以實於衆倘其後來不獲飛昇人肯以仙視之乎蓋真仙闡化必有深旨道德經曰天長地久天地所以能長且久者以其不自生故能長生是以聖人後其身而身先外其形而形存非以其無私邪

故能成其私侯道華以之

馬湘

馬湘字自然杭州鹽官縣人也世爲縣之小吏而湘獨好經史攻文學一日縣宰令湘往西川湘方以爲憂行至縣北一十二里忽遇一道人與同入一石井中移時已到西川取訖回書不覺又從石井出矣至縣投落回書莫不駭異人因號爲石井仙井見存馬乃隨道士天下徧遊後歸江南而常醉於湖州墮雲溪經日而出衣不濕坐於水上而來言適爲項王相召飲酒欲醉方返溪濱觀者如雲酒氣猶衝人狀若風狂路人多隨看之又時復以拳入鼻及出拳鼻如故又指溪水令逆流食頃指柳樹隨溪水走來去指橋令斷復續後遊常州遇馬植出相任常州刺史素聞湘名乃邀相見迎禮甚異之植問道兄幸同宗姓欲爲兄弟冀師道術可乎湘曰相公何望曰扶風湘戲曰相公扶風馬湘則風馬牛但且相知毋徵同姓意言與植風馬牛不相及也然植留之郡齋益敬之或飲會次植請見小

術湘乃於席上以瓷器盛土種瓜須臾引蔓生華結實取食衆賓皆稱香美異於常瓜又於徧身及襪上摸錢所出不計多少擲之皆青銅錢撮投井中呼之一一飛出人有取者頃復失之又植言此城中鼠極多湘書一符令人貼於南壁下以筋繫盤長嘯鼠成群而來走就符下俯伏湘乃呼鼠有一大者近塔前湘戒曰汝毛蟲微物天與粒食何得穿穴屋宇晝夜擾於相公且以慈憫爲心未欲殺汝宜便率衆離此大鼠乃回群鼠前皆扣頭謝罪遂作隊莫知其數出城門去自此城內便絕鼠後南遊越州經洞巖禪院僧三四百人方齋而湘與婺州永康縣牧馬巖道士王知微弟子王延叟同行僧見湘知微到踞而食畧無揖者但使人以飯湘不食趣知微延叟速食而起僧齋未畢及出門又趣速行到諸暨縣南店中約去禪院七十餘里深夜聞尋道士聲主人遽應之乃二僧願求見道士及引見湘但禮拜哀鳴曰僧衆不識道者昨失迎奉致貽怒責三數百僧到今不能下牀

其二僧是主事且不坐所以得來願乞捨之湘惟睡而不對知微延叟但笑之僧愈哀乞湘起曰此後毋以輕慢人爲意回去入門僧輩當能下牀僧回果如其言湘翌日又南行時方春見一人家好菰菜求之不得仍問惡言命延叟取紙筆知微言求菜見阻應無訟理況在道門詎宜施之湘笑曰我非訟者也作小戲爾於是延叟捧紙筆湘畫一白鷺鷥以水噴之飛入菜畦中啄菜其主人趕起又飛下再三湘又畫一鴉子走趕捉白鷺鷥共踐其菜碎盡不已其主人見道士戲笑求菜致此慮復爲他術即來哀求湘曰非求菜也固相戲爾於是呼鷺鷥及鴉子皆飛走入湘懷中視菜如故悉無所損又南遊霍童山入長溪縣界夜投旅店宿舍少而行旅已多主人戲言無宿處道士能壁上睡即相容已逼日暮知微延叟曰祇能舍宿事會壁上睡湘曰爾但俗林中睡我坐可到明衆皆睡而湘躍身梁上一脚挂梁倒睡適主人夜起燭火照見大驚異湘曰梁上猶能壁上何難而入

壁久之不出主人祈謝移時請知微延更入
家內淨處睡卧及旦主人留連嘆悔不已知
微延更辭行及數里間見湘已在路傍候之
自霍童回永康縣東天寶觀駐泊觀前有大
枯松湘指之曰此松已三千年餘將化為石
自後果化為石忽大風雷震石倒山側作數
截揚發自廣州節度黃授婺州刺史發性尚
奇異知之乃徙兩截就郡齋又致之龍興寺
九松院各高六七八尺徑三尺餘其石松皮鱗
皴今猶存焉或有告疾者湘無藥但以竹杖
打病處腹內及身上百病以竹杖指之口吹
杖頭如雷鳴便愈有患腰駝脚曲持拄杖而
來者亦以杖打之今放拄杖應手便伸展時
有以財帛與湘阻讓不免留之後散與貧人
所遊行之處或官觀岩洞多題詩句其登杭
州秦望山詩云太一初分何處尋空留歷數
變人心九天日月移朝夕萬里山川換古今
風動水光吞遠嶠雨添嵐氣沒高林秦皇護
作驢山計滄海茫茫轉更深後歸故鄉省兄
適兄逃出嫂姪喜見湘歸湘告曰我與兄共

此宅今歸要分我惟愛東園爾嫂姪異之曰
小叔久離家歸來兄猶未見面何言分地骨
肉之情必不忍如此駐留三日嫂姪訝之湘
不食但飲酒而待兄不歸及夜遽卒明日兄
歸問妻子具以實對兄感慟乃曰弟學道多
年非歸要分宅是歸託化於我以絕思望爾
乃棺殮之其夕棺忽然有聲一家驚異乃葬
于東園去縣北九里今名馬墓唐宣宗大中十年也明
年東川秦劍州梓桐縣道士馬自然白日上
昇湘於東川謂人曰我鹽官縣人也新羽化
於浙西今又為玉皇所詔於此上昇以其事
奏之遂勅浙西道覆之發塚視棺乃一竹杖
爾

鄔通微

鄔通微不知何許人也為道士神氣清美靜
默虛夷或吟或醉多遊於洪州名山人見之
多年或十數年不見則顏狀益少於當時人
莫測其服煉丹藥遊行定止後於酒樓乘醉
飛昇而去

許碯

許碯自稱高陽人少為進士累舉不第晚學
道於王屋山周遊五嶽名山洞府後從峨嵋
山經兩京復自荆襄汴宋抵江淮茅山天台
四明仙都委羽武夷霍童羅浮無不徧歷到
處皆於懸崖峭壁人不及處題云許碯自峨
嵋山尋偃月子到此觀筆蹤者莫不嘆其神
異竟莫詳偃月子也後多遊廬山嘗醉吟曰
闌苑華前是醉鄉以舟切翻王母九霞鵬群
仙拍點嫌輕薄謫向人間作酒狂好事者詰
之曰我天仙也方在崑崙就宴失儀見謫人
皆笑之以為風狂後當春景插花滿頭把花
作舞上酒樓醉歌昇雲而去

金可記

金可記新羅人也唐宣宗朝以文章賓于國
性沈靜好道不尚華侈或服氣煉形自以為
樂博學強記屬文清麗美姿容舉動言談迥
有中華之風俄以進士擢第不仕隱於終南
山子午谷葺居懷逸之趣手殖奇花異菓
極多常焚香靜坐若有念思又誦道德及諸
仙經不輟後三年思歸本國航海而去復來

衣道服復入終南務行陰德人有所求無有阻者精勤為事人不可偕也大中十一年十二月上表言臣奉玉皇詔為英文臺侍郎明年二月十五日當上昇時宣宗頗以為異遣中使徵入內固辭不就又求見玉皇詔辭以為別仙所掌不留人間遂賜宮女四人香藥金線又遣中使二人專看侍然可記獨房靜室宮女中使皆不接近每夜聞室內常有人談笑聲中使竊窺但見仙官仙女各坐龍鳳之上儼然相對復有侍衛非少而宮女中使不敢輒驚二月十五日春景妍媚花卉爛熳果有五雲咲鶴翔鸞白鶴笙簫金石羽蓋瓊輪幡幢滿空迎之昇天而去朝列士庶觀者填溢山谷莫不瞻禮歎異焉

宋玄白

續四

十三

宋玄白不知何許人也為道士身長七尺餘眉目如畫端美肥白言談秀麗人見皆愛之頗有道術夏則衣綿冬則單衣臥於雪中去身一丈餘周匝氣出如蒸而雪不凝又指燈即滅指人若隙風所吹颼颼然指庭間花草

颼颼而動多遊名山自茅山出潤州希玄觀入括蒼洞辟穀服氣或時食羖肉五斤以蒜滿一盆撮喫畢即飲酒二斗用一白梅人有求得其一片蒜食之者言不作蒜氣味如異香終日在齒舌間香不散得食之者頗多而畢身無病壽皆八九十玄白到處住則以金帛求置二三美妾行則捨之人皆以為得補腦還元之術宋玄白證飛昇之術非真仙所學況妻一事蓋陳人之疑然決非御女之術明矣必玄白之意欲示和光混俗故使人之不明玄白又遊越州適大旱方暴庭樂龍以祈雨涉旬亢陽愈甚玄白見之以為凡所祈雨須候天命非上奏無以致之乃於所止觀焚香上祝經夕大霽雨告足越人大神異之後復到信州又逢天旱祈禱有道士知玄白能致雨州人乃請之遽作術飛釘釘城隍神雙目刺史韋德鄰誑其財婦女復釘城隍神比妖怪也將加責辱使健部輩欲向之手脚皆不動悉自仆倒枷鎖亦自摧折玄白笑謂德隣曰使君忤觸劉根欲誅罰祖稱邪德鄰方懼祈謝須臾禮而遣之其靈異屢試不可備錄

後於撫州南城縣白日上昇南城縣今屬建昌府也

賀自真

賀自真莫究其所從來為道士居嵩山有文學為事高古常焚修精勤年少人亦不知其甲子然道俗相傳見之多年矣皆不知其所修一日雲鶴滿空聲樂清亮自真忽飛昇而去時有處士陳陶在東都見洛城人觀望瞻禮驚嘆不已乃為詩曰子晉鸞飛古洛川金桃再熟賀郎仙三清樂奏高丘下五色雲屯御苑前朱頂舞翻迎絳節青鬟歌對駐香驂誰能白晝相悲泣太極光陰幾萬年

歷世真仙體道通鑑卷之三十六

續四

十五

歷世真仙體道通鑑卷之三十七

續五

浮雲山聖壽萬年宮道士陳進一編修

鄭去奢

鄭去奢衢州龍立人也家住於九峯山下少入道遊學道術精思忘疲年三十餘便居處州嵩陽縣安和觀其觀即葉靜能故鄉學道之所而觀北五里有卯山高五十餘丈相傳云張天師及葉靜能皆居此山修道去奢慕前事登其山結庵以居後觀中道士相率山下居人為構屋及造堂殿設老君張天師像及葉靜能真影朝夕焚修朝禮山東南有一方石潤二丈餘平若砥蓋天然也去奢常坐其上拱默靜想一旦感神人謂之曰張天師有新邪劍二口并餅貯丹在此石下可以取之去奢謝神人曰此石天設非人力可加自惟荒謬守真而已託茲山棲獲安久蒙聖佑丹之與劍詎可輒取神人曰但勤修無怠劍丹自可立致後三年神人以劍丹送於去奢劍乃張天師七星劍丹以石匣藏之一餅貯之傾藥有斗餘如麻子紅色光明去奢自服

及施人皆愈時麗水縣人華造因中和年荒亂之後擁土人據岩守浙東連帥具以上聞朝廷議欲息兵乃投造以刺史而造先險聞去奢神與劍丹乃以兵圍其山取去奢并劍丹到州奪其劍丹而因鑲去奢於空室時方炎暑一月日不與之水造謂去奢已斃矣及開室見神色儼然顏狀紅白愈於來時造驚異乃却送去奢歸山劍丹留之一夜風雷飛鳴失所在去奢聞劍却歸石下爾後居山十五年餘每言常見龍虎異鳥行於庭際安和觀道士多寄山頂燒香見龍虎鳥迹咸驚異之去奢不食多年或有穢觸其山春冬則猛獸來驚秋夏則毒蛇所螫去奢又言每雷雨只在山半常見雲龍雷公電姥神鬼甚衆或到此相見咸有禮焉又寄宿道士夜聞去奢所居靜室若與人談話竊窺之惟聞異香滿室及環佩聲或見有戴遠遊冠絳服螺髻垂髮碧銷衣男女四人對坐侍從皆玉童玉女光明照身復有神明遠立於側而道士皆不敢驚但虔敬而已一日去奢告道士曰恐當

離此山去不長相見也後數日有絳雲鸞鶴聲樂滿空徘徊山頂後有輶輿幡幢靈官駕龍虎皆五色亦騎鸞鳳迎去奢昇天而去山下道俗觀望者甚衆

藍采和

藍采和不知何許人也常衣破藍衫六銖黑木腰帶闊三寸餘一脚著鞞一脚跣行夏則衫內加絮冬則卧於雪中氣出如蒸每行歌於城市乞索持大拍板長三尺餘常醉踏歌老少皆隨看之機捷諧謔人門應聲答之笑皆絕倒似狂非狂行則振鞋踏歌云踏踏歌藍采和世界能幾何紅顏一春樹流光一擲梭古人混混去不返今人紛紛來更多朝騎鸞鳳到碧落暮見桑田生白波長景明暉在空際金銀宮闕高嵯峨歌詞多率爾而作皆神仙意人莫之測但以錢與之繩穿拖行或散失亦不迴顧或見貧人即與之或與酒家周遊天下人有為兒童時見之者及斑白見之類狀如故後踏歌濠梁間於酒樓上乘醉有雲鶴笙簫聲忽然輕舉於雲中擲下鞞衫

腰帶拍板冉冉而去其韉衫等旋亦失亡

張果

張果隱於恒州條山往來汾晉間時人傳果有長生秘籙耆老云爲兒童時人見之已言數百歲常乘一白驢日行數萬里休則疊之

其厚如紙置於巾箱中乘則以水噀之復成驢矣唐太宗高宗徵之不起則天皇后召之出山佯死於妬女廟前時方炎暑須臾臭爛生蟲於是則天信其死矣夏居恒山冬居驚鵲山明皇時不至後有人於恒州山中復見之開元

二十三年明皇詔通事舍人裴晤馳驛於恒州迎之果對晤氣絕而死晤乃焚香宣天子求遊之意俄頃漸蘇晤不敢逼馳還奏之乃命中書舍人徐嶠通事舍人盧重玄齋書迎果果隨嶠到東京其唐明皇遊溫泉辛未年於集賢院

安置肩輿入宮備加禮敬公卿皆往拜謁帝問神仙不答善息氣能累日不食數飲酒上賜之酒辭以小臣飲不過二升有一弟子可飲一斗明皇聞之喜令召之俄頃一小道士自殿簷飛下年可十六七美姿容旨趣雅淡

謁見上言辭清爽禮貌臻備明皇命坐果曰弟子當侍立於側不可賜坐明皇愈喜賜酒飲及一斗不醉果辭曰不可更賜過度必有所失致龍顏一笑爾明皇又遍賜之酒忽從頂湧出冠子撲落地化爲榼蓋上及嬪御皆驚笑視之失道士矣但金榼在地覆之榼貯一斗酒驗之乃集賢院中榼也累試仙術不可窮紀果嘗云我生堯丙子歲位侍中其貌若六七十許邢和璞者善知人夭壽帥夜光者善視鬼帝令和璞推果壽則懵然莫知密使夜光視之不見果所在帝謂高力士曰吾聞飲董而無苦者奇士也時天寒因取以飲果三進頽然曰非佳酒也乃寢頃視齒焦縮顧左右取鐵如意擊墮之藏帶中出藥付其齒良久齒復生粲然駢潔上狩咸陽獲一大鹿令庖人欲烹之果曰此仙鹿也已滿千歲昔漢武元狩五年臣曾侍從畋于上林獲此鹿乃放之上曰鹿多矣時遷代變豈不爲獵者所獲乎果曰武帝放之時以銅牌誌于左角下遂命驗之果有銅牌二寸許但文字凋

暗爾上曰元狩是何甲子至此凡幾年果曰是歲癸亥武帝始開昆明池今甲戌歲八百五十二年矣上命太史校其曆略無差焉上問葉法善曰果何人耶答曰臣知之然臣言之即死今不敢言若陛下免冠跣足救臣臣即得活上許之法善曰混沌初分白蝙蝠精言訖七竅流血僵仆於地上遂詣果所免冠跣足自稱其罪果徐曰此兒多口過不責之恐泄天地之機爾上復哀懇久之果以水噀其面法善即期復生帝益神之詔圖形集賢院下詔曰恒州張果先生遊方之外者也述先高尚心入杳冥是混光塵應召至闕莫知甲子之數且謂羲皇上人問以道樞盡會宗極今則將行朝禮爰升寵命可銀青光祿大夫號通玄先生果屢陳老病乞歸恒州賜絹三百疋隨從弟子二人給驛肩輿到恒州弟子一人放回一人相隨入山天寶初明皇遣徵詔果聞示卒弟子葬之後發之但空棺而已帝爲立樓霞觀

臣道一曰張果超凡入聖坐在立亡變化

無窮道德純粹觀其留形住世與廣成子
錢鏐輩不相殊得神仙者未易到也道德
經曰治人事天莫若嗇嗇夫惟嗇是謂早服
早服謂之重積德重積德則無不克無不
克則莫知其極莫知其極則可以有國有
國之母可以長久是謂深根固蒂長生久
視之道張果是也

許宣平

許宣平新安歙人也唐睿宗景雲中隱於城
陽山南塢結庵以居不知服餌但見不食顏
若四十許人輕健行疾奔馬時或負薪以賣
薪擔常挂一花瓢及曲竹杖每醉行騰騰以
歸吟曰負薪朝出賣沽酒日西歸時人莫問
我穿雲入翠微邇來三十餘年或施人危急
或救人疾苦城市人多訪之不見但覽庵
壁題詩云隱居三十載築室南山巔靜夜
明月閣朝飲碧泉蕉人歌隴上谷鳥戲岩前
樂矣不知老都忘甲子年好事者多誦其詩
有抵長安者於驛路洛陽桐華間傳舍是處
題之明皇天寶中李白自翰林出東遊經傳

舍覽詩吟之嘆曰此仙人詩也詰之於人得
宣平之實白於是遊及新安涉溪登山屢訪
之不得見乃題詩於庵壁曰我吟傳舍詩來
訪仙人居煙嶺迷高迹雲林隔太虛窺庭但
蕭索倚杖空躊躇應化遼天鶴歸當千歲餘
宣平歸庵見壁詩又吟曰一池荷葉衣無盡
兩畝黃精食有餘又被人來尋討著移庵不
免更深居其庵後為野火燒之莫知宣平蹤
跡後百餘歲至懿宗咸通十二年郡人許明
恕家有婢嘗逐伴入山採樵一日獨於南山
中見一人坐石上方食桃甚大問婢曰汝許
明恕家人邪婢曰是其人曰我即明恕之祖
宣平也婢言曰常聞家內說祖翁得仙多年
無由尋訪宣平謂婢曰汝歸為我向明恕道
我在此山中與汝一桃食之不得將出山內
虎狼甚多山神惜此桃婢乃食之甚美頃之
而盡遣婢隨樵人歸家言之婢歸覺擔樵輕
健到家具言入山逢祖翁宣平其明恕嗔婢
將上祖之名牽呼取杖扑之其婢隨杖身起
不知所之後有人入山內逢見婢童顏輕身

衣樹皮行疾如風遂入昇林木而去

薛昌

道士薛昌幽薊人唐天寶間棲止于蜀青城
洞天觀忽得商陸酒飲之耳鼻血流死經三
日麗然而蘇肌膚潔白容狀頓少身輕目明
勢欲飛舉數日之外洞見遠近雖山林崖巘
不隔視聽時玄宗尚至道節度使延致賓
館欲乘以駟騎送京師忽失所在或有見在
大面山者

吳筠

吳筠字正節華陰人也通經義美文辭舉進
士不中性高耿不能與時俯仰去居南陽倚
常山唐明皇天寶初召至京師諫為道士籍
入嵩山依潘師正究其術南遊天台觀滄海
與有名士相娛樂文辭傳京師明皇遣使召
見大同殿與語甚悅勅待詔翰林獻玄綱論
三篇嘗問道對曰深於道者無如老子五千
言復問神仙冶鍊法對曰此野人事積歲月
求之非人主宜留意筠每開陳皆名教世務
以微言諷天子天子重之群沙門嫉其見遇

而高力士素事浮屠共短筠於帝筠亦以天下將不治求還嵩山詔為立館未幾漁陽事作乃往茅山復東入會稽刺中嘗論谷神之妙則有玄綱論哀蓬心蒿目之遠於道則有神仙可學論疏淪淪雪使無落吾事則有洗心棲岩賦修習中之誠而休乎天君則有心目論契神頌至若遊仙步虛王化雜感之作凡四百五十餘篇禮部侍郎權得與集而為序始筠見惡於力士而斥故文章深詆釋氏筠所喜孔巢父歌詩畧相甲乙代宗大曆十三年於宣城道觀中忽焚香返真弟子郡冀元與其徒葬天柱之西麓私謚宗元先生

李白

李白字太白唐興聖皇帝九世孫白之母夢長庚星而孕因而命之生於天后聖曆二年已亥五歲誦六甲十歲通詩書觀百家蘇頲異之曰是子天才英特少益以學可比相如十五好劍術游神仙多居岷山游說山水數有吟詠復登峨嵋游江淮觀雲夢娶許相國師孫女留雲夢三年喜縱橫術擊劍為任俠

輕財重施去之齊魯更客任城與孔巢父韓準裴政張叔明陶沔居徂徠山耽飲號竹溪六逸玄宗開元十六年上裴史書云制作不倦迄今三十春矣天寶三載甲申白與吳筠善筠待詔翰林白亦至長安見太子賓客賀知章於紫極宮因解金貂換酒為樂知章見其文嘆曰子謫仙人也薦于明皇召見金鑾殿論當世事奏頌一篇帝賜食親為調羹有詔供奉翰林白猶與飲徒醉於市帝坐沈香亭意有所感欲得白為樂章召入白已醉左右以水頰^切面稍解援筆成文婉麗精切無留思帝愛其才白嘗侍帝醉使高力士脫鞵力士恥之摘其詩以激楊妃帝欲官白妃輒沮白益驚放與賀知章李適之汝陽王璵崔宗之蘇晉張旭焦遂為酒八仙人懇求還山帝賜金放還初出金門尋侍御不遇遂詠鸛鵲詩云落羽辭金殿飛鳴叱繡衣能言終見棄還向隴山飛遂就從祖陳留採訪大使彥允請北海高天師授籙傳籙畢歸北海自此抵趙魏燕晉岐邠商於洛陽游梁最久復

之齊魯淮泗再入吳轉徙金陵上秋浦尋陽皆有詩文不記歲月白浮游四方嘗乘舟與崔宗之自來石至金陵著宮錦袍坐舟中傍若無人又常一日游華山過縣宰方開門決事白乘醉跨驢過門宰怒不知白也引至庭下曰汝何人輒敢無禮白乞供狀曰曾以龍巾拭唾御手調羹貴妃捧硯力士脫鞵天子門前尚容吾走馬華陰縣裏不得我騎驢宰驚悸起揖謝曰不意翰林至此白跨驢而去天寶十四載安祿山反永王璘東巡白避地廬山為璘脅行永王璘兵敗當誅罪連及白郭子儀請解官以贖白罪白遂得流夜郎時肅宗乾元元年也白先有詩自叙云半夜水軍來潯陽滿旌旆空名適自誤迫脅上樓船從賜五百金棄之若浮煙解官不受賞反謫夜郎天至是半道承恩放還遂登巫山下瞿塘後過江夏潯陽金陵歷陽宣城二郡皆有詩詠不復可考白生平志慕神仙學宗老氏嘗有仙學古風云太白何蒼蒼星辰上森列去天三百里邈爾與世絕中有綠髮翁披雲

卧松雪不笑亦不語真棲在岩穴我來問真人長跪問寶訣粲然忽自哂授以鍊藥說銘骨傳其語疎身已電滅仰望不可及愴然五情熱吾將營丹砂永與世人別又一篇云五鶴西北來飛飛凌太清仙人綠雲上自道安期生兩兩白玉童雙吹紫鸞笙飄然下倒影倏忽無留行遺我金光草服之四體輕將隨赤松子對博坐蓬瀛後於寶應元年十一月自金陵濟采石訪族人李陽冰因捉月赴水而終人謂之水解享年六十四代宗立以拾遺召而白已解化有唐李太白文集行於世序云李白字太白隴西成紀人梁武昭王高九世孫蟬聯珪組世為顯著中葉非罪謫居條支易姓與名然自窮蟬至舜五世為庶累世不大耀亦可嘆焉神龍之始逃歸於蜀復指李樹而生伯陽驚姜之夕長庚入夢故生而名白以太白字亡世稱太白之精得之矣不讀非聖之書恥為鄭衛之作故其言多似天仙之辭凡所著述言多諷興三代以來風騷之後馳驅屈宋鞭撻揚馬千載獨步惟公

一人故王公趨風列岳結執群賢翕習如鳥歸鳳虞黃門云陳拾遺橫制頽波天下質文翕然一變至今朝詩體尚有梁陳宮掖之風至公大變掃地并盡古今文集遇而不行惟公文章橫被六合可謂力敵造化歟天寶中皇祖下詔徵就金馬降輦步迎如見綺皓以七寶牀賜食御手調羹以飯之謂曰卿是布衣名為朕知非素畜道義何以及此置于金鑒殿出入翰林中間以國政潛草詔誥醜正同列害能成謗格言不入帝用疎之公乃浪迹縱酒以自昏穢詠歌之際屢稱東山與賀知章崔宗之等自為八仙之遊謂公謫仙人朝列賦謫仙之歌凡數百首多言公之不得意天子知其不可留乃賜金歸之遂就從祖陳留採訪大使彥允請北海高天師授道錄於齊州紫極宮將東歸蓬萊仍羽人駕丹丘耳陽冰試紋歌於當塗心非所好公遐不棄我扁舟而相歡臨當挂冠公又疾殛草萊百卷手集未修枕上授簡俾予為序論闕雖之義始愧卜商明春秋之辭終慚杜預自中原

有事避地八年當時著述十喪有九今所存者皆得之他人焉寶應元年十一月己酉也憲宗元和初有人海上見李太白與一道士在高山山笑語久之道士於碧霧中跨赤虬而去太白聳身健步追及共乘之而去其後白龜年至嵩山遙望東岩古木蕭瑟地步至其傍尊祖羅列有一人前曰李翰林相召龜年趨進其人袞衣博帶色澤秀發曰吾李白也子之祖乃白居易也雖不同代亦一時人以其道同今相往復吾自水解放遁山水之間因思故鄉西歸嵩峯中帝飛章上奏見辟於此掌殿奏已百年矣近過潼關有詞曰曾向桃源深洞一曲妙歌舞鳳凰常記欲別時明月落花煙重如夢如夢和淚出門相送龜年曰吾祖今在何處曰在五臺掌功德所從昔日之志也又出書一卷道龜年曰讀之可辨九天禽語大地獸言更修功行可得仙也後龜年遊潞州太守知有異術召而詢之庭下有二雀啾唧而過太守曰彼何言也龜年曰彼城西家開廩有餘粟在地共食之守使

人驗之果然又見廐馬仰首而嘶問曰此又何言龜年曰彼言槽中料熟不可食復驗之亦然時近清明人吏驅羊二十餘口後一羊不行鞭之有聲守曰羊不行有說手龜年曰羊言腹有羔將產乞生然復就死守乃留羊月餘果產子後龜年放迹方外不知所之白海瓊云李白今為東華上清監清逸真人白樂天今為蓬萊長仙主

歷世真仙體道通鑑卷之三十七

歷世真仙體道通鑑卷之三十八

麟六

浮雲山聖壽萬年宮道士趙道一編修

劉玄和

先生姓劉名玄和號混成子其先彭城人也因晉南遷起家寄于九江之都昌今屬南康軍父祖儒學樂道丘園於唐明皇開元二年先生降誕幼即穎悟長而不群及盡孝養終親之禮年幾四十有拔俗出塵之志遂入匡廬之龍興觀觀今白鶴觀也禮住持三洞法師何子玉為師天寶二載得度為道士繼有異遇一棲五老峯石室五十二年苦節霜露餐餌松檜咽二景之流霞養三田之玉醴真璞不琢大器晚成猛獸衛庵靈鶴如畜斯乃道氣真淳物我莫干情識兩忘和之至也山之北隅有岩峯然而高先生手植木瓜於其下至今號為木瓜岩其地險峻先生忽一日下觀之西自殖松檜鑿井汲水以療人之疾多獲痊愈庭有老杉其高百尺亦先生之手植德宗貞元中吳元濟不臣亂兵淮上洪帥命幕府王邁奉表京師為淮寇所掠邁家人詣山悲叩

先生乃曰觀中有司命司錄二真君者乃玉皇之侍臣汝可精禱當即為拜章未幾有二神人導邁車騎疾馳千里由是脫難歸家此先生拜章之驗也自是朝野景慕當代名賢順風稽首先生惟夷心靜默虛已濟人他無求於世年八十六於貞元十年十月十八日忽顧謂門弟子范仙舟曰吾久住五老峰將遊金華玄譜有名吾即往矣汝等各宜勤苦學道無自沈墜言訖而化治命藏劍於栢壇門人稟其遺旨當往之日白鶴翔鳴晴天雷震異香芬馥驗之則尸逝柩空乃葬其履舄後范仙舟等崇立殿堂以昭嚴奉仙舟後亦得道莫知所終

楊泰明

楊孝子名泰明不知何許人也本儒生事父母極孝時呼為楊孝子嘗為汾陽王郭子儀幕客性恬淡不貪爵祿每勸子儀曰軍政雖曰尚嚴然人命至重不可輕殺以故子儀掌兵二十餘年不妄誅戮軍士愛之如父兄皆泰明之力也嘗謂終日戰鬪有傷慈心遂出

為長安令唐代宗永泰元年乃易道士衣棄官潛遁初隱茅山以其淺近遂來廬山峯頂結庵造青精飯辟穀造松栢為香檣于九天使者真王求長生之道積十四年當秋晴月滿之夜天宇清霽忽於虔禮之地見神人金冠絳袍白珠結璘傍有一人執玉斧一人捧玉函神人曰我乃九天使者採訪人間善惡以汝積世有功於民秉心清苦精持道行誠達九天玉清太素三元君命我授汝九天太真道經泰明伏地稱謝神人徐啓玉函授以寶書仍告戒曰始終精勤不替道成之日吾當召汝語訖風雲驟起已失所在開經觀之乃高上大洞經三十九章一號九天太真道經泰明從此依經行持屏迹塵世凡三十六年憲宗元和八年正月一日日中祥雲迎繞於庵前泰明遂乘雲昇騰而去

李賀

李賀字長吉系出鄭王後唐之宗子也七歲能辭章韓愈皇甫湜始聞未信過其家使賦詩援筆輒就自目曰高軒過二人大驚自是

有名為人纖瘦通眉長指爪能疾書每山窮弱馬從小奚奴背古錦囊遇所得書投囊中暮歸母探囊見所書多即怒曰是兒要嘔出心乃已以父名晉肅不肯舉進士愈為作諱辯然卒亦不就舉辭尚奇詭所得皆驚邁絕

去翰墨畦逕當時無能效者樂府數十篇雲韶諸工皆合之絃管為協律郎卒年二十七

一云卒年二十四賀將終忽晝見一緋衣人駕赤虬持一版書若太古篆或霹靂石文者云今奉上命召李長吉賀了不能讀歛下榻

扣頭言阿彌老且病賀不願去緋衣人笑曰帝成白玉樓立召君為記天上差樂不苦也賀獨泣邊人盡見之少之賀氣絕常所居隱中勃勃有煙氣聞行車轆轤之聲太夫人急止人哭待之如炊五斗黍許馬宣至志云李賀卒其母夢賀曰上帝近都丹園建白瑤宮召我為新宮記又作疑虛殿使我等纂集樂章

衡山道士軒輊彌明者不知何許人在衡湘

軒輊彌明

衡山道士軒輊彌明者不知何許人在衡湘

間九十餘年南岳勝集云靈麓茅即岳麓福地宋朝改賜景德觀廟朝改為岳善捕鬼麓萬壽宮唐軒輊彌明嘗隱于此嘗於湘南遇之唐憲宗元和七年十二月四日彌明自衡山過太白知師服在哀夜抵其

居宿校書郎侯喜新有詩名與師服擁爐說詩彌明在坐貌極陋又作楚語喜視之蔑如也彌明軒衣張目指爐中石鼎謂喜曰子既能詩可與我賦此乎師服以衡湘舊識見其老但貌事之不知其有文也喜其說先題首

句云巧匠斲山骨剝中事烹煎次傳喜喜踊躍綴其下曰直柄未當權塞口且吞聲彌明

啞然笑曰子詩如是而已子即袖手竦肩倚北牆坐謂師服曰吾不解世俗書子為吾書之因高吟曰龍頭縮菌蠢豕腹脹彭亨初非似經意其旨有譏於喜二子相顧慚駭復以多窮之師服又曰外苞乾蘚文中有暗淚驚喜曰在冷足自安遭焚意彌明復令師服書曰謬當鼎鼐間安使水火爭師服曰大似烈士膽圓如鐵馬纓喜曰上比香爐尖下

比鑑面平彌明曰秋瓜未落蒂凍半強抽萌
師服曰一塊元氣閉細泉幽實傾喜曰不值
輸瀉處焉知懷抱清彌明曰方當洪爐然益
見小器盈師服曰眈眈無刃迹團團類天成
喜曰遙疑龜負圖出曝曉正晴彌明曰旁有
雙耳穿上為孤髻師服曰或訝短尾銚又
似無足鑄喜曰可惜寒食毬擲此傍路坑彌
明曰何當出灰池無計離餅盟師服曰陋質
荷斟酌狹中愧提擎喜曰豈能煮仙藥但未
汗羊羹彌明曰形模婦女笑度量兒童輕師
服曰徒爾堅重性不過升合盛喜曰傍似廢
轂仰側見折軸橫彌明曰時於蚯蚓竅微作
蒼蠅鳴師服曰以滋翻溢衍實負任使誠喜
曰常居顛眊地敢有漏泄情彌明曰寧依煖
熱弊不與寒涼并師服曰區區徒自效瑣瑣
不足呈喜曰回旋但兀兀開闔自鏗鏗喜思
益苦務欲勝彌明每搜索欲出口而聲益悲
筆欲下則復止卒亦不奇二子賦十餘韻彌
明應之如響皆穎脫含譏諷夜將闌二子思
竭不能續起謝曰尊師非世人能屈也某輩

服矣願就弟子列不敢更論詩彌明奮然曰
此篇不可不成也謂師服曰把筆吾與汝就
之乃曰全勝瑚璉貴空有口傳名雖此俎豆
古不為手所振磨礪去圭角浸潤著光晶願
君勿謝謂此物方施行師服書訖俾讀之謂
二子曰章不已就乎二子齊應曰就矣彌明
曰子皆不足與語此寧為文耶吾就子所能
而作爾非吾之所學於師而能者也吾所聞
者子皆不足以聞也獨文乎哉吾語亦不常
聞也吾閉口矣二子大懼起立而拜曰不敢
他有問也願聞一聲而已先生稱不解人間
書敢問解何書卒不應不自得即退就坐彌
明倚牆睡鼻息如雷二子怛然失色不敢少
喘斯須二子亦困睡及覺已失彌明聞童僕
曰天將明道士出門覓之已不見二子驚異
攜詩詣韓愈訪其人愈曰聞有隱君子彌明
豈其人耶遂為石鼎聯句序彌明嘗過八桂
堯廟有題墨在焉後人已刻諸石云宋理宗
朝國史蕭山則撰衡山新勅彌明隱居記云
水簾洞南嶽清絕境端平二年七月晦江西

蕭山則晨遊嗜其清過午不能去同遊三道
人欲困僕色欲食皆棄子坐天旒亭獨吟得
老樹仙休影寒泉客漱飢之句有椎結叟援
壺來叩所吟以前句對即續云此中山廣大
輕易莫吟詩貌吟而言暮問所自曰西方白
龜所宅白水國問姓名不應拾墮松畫崖石
云唐天降我日月照我韓愈知我忽袖出草
一株珊瑚狀白子飢乎啗此徑行疑其異人
亟追及問適留我何藥不顧子按本草經赤
芝生衡山殆芝類會道士羅志真邀詭白龜
泉方悟白水泉也愈彌也日月明也必彌明
因諗志真泉有是叟否曰無有然詎知不隱
此屋於泉上像而祠之或曰彌明即愈非他
人意更告我矣或曰叟之傳以石鼎詩以退
之序不以祠噫叟迹幾劫語業之結習猶未
化高踞傲劉侯之氣亦未除而由唐元和後
到今此山乃不知有叟予幸遇叟志真幸聽
予安神子棲一也補山闕典二也其數邪諫
彌明隱居為之榜且用楚歌招之詞曰鸞先
驅兮駕鴻之太白兮道誰逢石鼎小兮語大

名高出兮衡峯仙歸來兮曷年吟不老兮楚
天詩藏山兮卷幾木羽秘兮無傳鼎中函兮
仙餘凡骨晚兮仙如薦玉英兮丹溜浩揚靈
兮起予淳祐二年又書石鼎聯句圖後云唐
人謨賈岳碣云石鼎聯句所稱彌明即君也
患乃浮屠范陽人彌明則道士衡山人全不
合碣妄寧可信

劉商

劉商彭城人也家於長安好學強記攻文有
胡笳十八拍頗行於世兒童婦女悉誦之進
士擢第歷臺省為郎中性耽道術逢道士即
師資之煉丹服氣靡不動切每嘆光景甚促
筋骸漸衰朝馳暮止但自勞苦浮榮世宦何
益於已古賢皆棄官以求道多得度世章畢
婚嫁不為俗累豈劣於許遠遊哉是以託病
免官入道遊及廣陵於城街逢一道士賣藥
聚翫頗衆人言多有靈效衆中見商目之甚
相異乃罷藥攜手登樓以酒為歡道士所談
自秦漢歷代事皆如目覩商頗驚異即師敬
之復言神仙道術不可得也及暮商歸僑止

道士下樓閃然不見商益訝之翌日又於街
市訪之道士仍賣藥見商愈喜復挈上酒樓
劇談歡醉出一小藥囊贈商并戲吟曰無事
到楊州相攜上酒樓藥囊為贈別千載更何
求商記詞得囊暮乃別去後商尋之不復見
也商乃開囊視重重紙裹一葫蘆得九粒藥
如麻子依道士口訣吞之頓覺神爽不飢身
輕飄然過江遊茅山久之復往宜興張公洞
當春之時愛罨畫溪之景乃入胡父渚葺居
隱於山中近樵者猶見之曰我劉郎中也莫
知所止蓋已為地仙矣

劉瞻

劉瞻字小字宜歌兄瞻也瞻家貧好道常有
道士經其居見瞻異之問知道否曰知然瞻
性饒俗氣業應未淨詎可強學道士曰能相
師乎瞻曰何敢於是師事之隨道士入羅浮
山瞻與瞻俱讀書瞻山棲求道無巾裹髮角
布衣事道士為文而瞻性慕榮達瞻謂瞻曰
彼必不第則逸於山野爾得第則勞於塵俗
矣然慎於富貴四十年當有驗瞻曰神仙還

遠難求秦皇漢武非不區區也廊廟咫尺易
致馬周張喜貞可以繼踵矣自後瞻愈精思
於道乃隱於羅浮山瞻進士登科屢歷清顯
及陞輔相頗著獎調之稱俄謫南行次廣州
潮臺泊舟江濱忽有髮角布衣少年衝暴雨
而來衣履不濕欲見瞻左右皆訝乃語之但
言宜哥來也以白瞻問形狀具以對瞻驚嘆
乃迎而見之瞻顏貌可二十來許瞻已瞠然
衰朽為逐臣悲喜不勝瞻復勉之與爾為兄
弟手足所痛曩日之言今四十年矣瞻益感
嘆謂瞻曰可復修之否瞻曰兄身邀榮寵職
和陰陽用心動靜能無損乎自非弟奈何況
是已昇天仙詎能相救爾今惟來相別非來
相救也於是同舟行別話平生隔閡一夕失
瞻所在今羅浮山中時有見者瞻乃南行歿
於貶所矣

羅萬象

羅萬象不知何許人有文學明天文洞精於
易節操奇特惟布衣遊行天下居王屋山久
之後遊羅浮山歎曰此朱明洞天昔葛稚川

曾棲此以煉丹今雖無鄧嶽相留聊自駐泊爾於是愛石樓之景乃於山下結庵以居常餌黃精結庵服氣數十年或出遊曾城泉山布水下採藥及入福廣城市賣藥飲酒來往無定或一食則十數人之食或不食則莫知歲月光悅輕健日行三四百里緩行奔馬莫及後却歸石樓庵竟不復出隱於山中矣

殷文祥

殷七七名文祥又名道荃常自稱七七俗多呼之不知何所人也遊行天下人言久見之不測其年壽面光白若四十許人到處或易其姓名不定也曾於涇州賣藥時靈臺蕃漢疫癘俱甚得藥入口即愈皆謂之神聖得錢則施之於人而常醉於城市間周寶於長安識之尋為涇原節度迎之禮重慕其道術運元之事及寶移鎮浙西數年後七七忽到復賣藥寶聞之驚喜遽召之師敬益甚每醉自歌曰解醺須更酒能開頃刻花琴彈碧玉調爐煉白朱砂寶嘗試之悉有驗其餘種瓜釣魚若葛仙公術也鵲林寺杜鵑花高丈餘每

春末花爛熳僧傳言唐德宗貞元中有外國僧自天台鉢盂中以藥養其根來種之自後建飾花院鎖閉人或窺見女子紅裳艷麗遊於樹下有輒採花折枝者必為所害俗傳女子花神也所以人共保惜故繁艷異於常花其花欲開探報分數節度使賓寮官屬繼日賞翫其後一城士女四方之人無不以酒樂從遊連春入夏自旦及暮間里之間殆于廢業寶一日謂七七曰鵲林之花天下奇絕常聞能開非時之花此可開否七七曰可也寶曰今重九將近能副此日否七七諾之乃前三日往鵲林寺宿焉中夜女子來謂七七曰道者欲開此花乎七七乃問何人深夜到此女子曰妾為上玄所命下司此花在人間已逾百年非久即歸閨苑去今與道者共開之非道者無以感妾於是女子倏然不見來日晨起寺僧或訝花漸折葉及九日爛熳如春夏間數日花俄不見亦無落花在地後七七偶到官寮家適值會賓次主與賓趨而迎之有佐酒娼優共輕侮之七七乃白主人欲

以二粟為令可乎咸喜謂必有戲術資於歡笑乃以粟巡行嗅者皆聞異香驚嘆唯佐酒笑七七者二人嗅之化作石綴於鼻掣不落但言穢氣不可堪二人共起狂舞花鈿委地相次悲啼粉黛交下優伶輩一時亂舞鼓樂自作聲頗合節奏曲止而舞不已一席之人笑皆絕倒久之主人祈謝於七七有頃石自鼻落復為粟傳之皆有異香及花鈿粉黛悉如舊略無所損或敬事之又七七酌水為酒削木為脯使人退行止船即住呼鳥自隨唾魚即活撮土畫地狀山川形勢折節聚蟻變城市人物有人曾經行處見之言歷歷皆似但小憊爾凡諸術不可勝紀後二年薛玄劉浩作亂寶南奔杭州而寶總戎為政刑或無辜前上饒牧陳全裕經其竟作之以禍赤其盡族寶八十三筋力猶壯女妓百數蓋得七七之術後為無辜及全裕作厲一旦忽殂七七劉浩軍變之時甘露寺為眾推落北崖謂墮江死矣其後人見在江西十餘年賣藥入蜀莫知所止其鵲林寺花兵火焚寺失其根

株信歸闕苑矣

譚峭岩

譚峭岩茅山道士唐敬宗寶曆中遊天台江浙間年貌如二十許人人亦不知其有道務以陰功救物常遺金于途以拯貧乏或報殊不認問其故則曰陰真君化土為金以賑不足吾恨未能且無用之物以邀人亦何怪久而知其有術神丹以化瓦礫符篆以制鬼神或者詰隋煬帝東巡事峭岩忽失言曰大業年中開丹陽河斷三岡脉其下血流吾嘗往觀之由此知峭岩之壽蓋數百年矣弟子鄧甲久事之授以丹訣符術則不能盡其妙但陸擒兇虎水縛蛟螭而已峭岩謂曰人賦分有定水石能致其熱火不能致其寒雖盡吾之道而汝則止是矣文宗開成中輕舉於南嶽矣

歷世真仙體道通鑑卷之三十八

歷世真仙體道通鑑卷之三十九

續七

浮雲山聖壽萬年宮道士趙道一編修

葉法善

葉法善字道元處州括蒼人世為道士母留氏晝寢夢流星入口吞之有娠十五月而生七歲溺大江三年而還父母詢其故曰青童引我飲以雲漿復朝太上故少留爾及冠長九尺性淳厚天然不茹葷遇青城趙元陽授遁甲嵩陽韋善俊授八史由是自能厭劾鬼佐因卜居卯酉山有巨石當路行者迂徑避之遂投符石自起嘗遊白馬山石室中遇三神人皆錦衣寶冠謂法善曰我奉太上命以密旨告子子乃太極紫微左仙卿以校錄不勤謫於人世速宜立功濟人佐國當復元任今以正一三五之法今授於子宜勉而行之言訖而去而後滅妖凶靡所不驗唐高宗聞之故寵以官不拜請度為道士留內齋禮賜于甚厚時帝悉召方士化黃金治丹法善上言丹不遽就徒費財與日請覈真偽帝然之凡百餘人皆罷嘗在東都凌空祠為壇以

祭都人悉往觀有數十人自奔火中眾大驚救而方免法善笑曰此為魅所憑吾法攝之爾詢之果然病亦皆愈歷高宗中宗朝五十年往來山中時時召入惟不愛浮屠法常力詆之議者淺其好憎然以術高卒莫之測中宗景龍四年三月九日三神人復降傳太上命云汝當輔我睿宗及開元帝曰未可隱迹山岩以曠委任時二帝未立而廟號年號已先知之所以於睿宗明皇陰有助力士著進寶函封題曰請陛下自開無令人知法善奏曰此不祥也宜令蕃使自開之既開果有弩箭自函而發中蕃使而死睿宗先天中拜鴈臚卿負外置越國公舍景龍觀祖國重謚有道先生父惠明贈欽州刺史寵映當時僚庶受錄者不可勝數叔祖靖能有道術仍善屬文高祖時直翰林為國子祭酒汝陽王嘗飲靖能靖能曰有生徒能飲當令上謁翌日有通謁者曰道士常持滿見之休儒也談胚潭之道飲以酒至五斗許忽醉倒乃一甕也錢塘有巨蜃溺舟經涉者苦之法善以符投

水其蠶自斃開元初明皇以元夕觀燈於上元陽宮謂無如此之盛法善曰西涼府今夕之燈亦可亞明皇異之求往則俾合目頃刻而至因以鐵鐵如意貴酒翌日遣使求之果在又中秋夜與上遊月宮聞天樂問其名曰紫雲曲上素曉音律默記之遂著樂府更名曰霓裳羽衣曲時月官還過潞州俯視城郭悄然但月色如晝法善取玉笛請上奏一曲仍投金錢子城中僅旬浹潞州奏中秋夜有天樂臨城兼獲金錢以進師居四明之下天台之東數年忽於五月一日有一老叟詣門號泣求救門人謂其有疾白于師引而問之曰某東海之龍也天帝勅我守八海之寶一千年一更任無過者則籍于仙品某已九百七十年矣微勸垂成近有波羅門逞幻術居于海岸晨夕禁呪積三十年法將成五月五日海告竭矣其統天鎮海之寶上帝制靈之物必為波羅門所取至日乞以丹符相救師既飛符海水復舊其人愧嘆赴海水而死翌日龍輦寶貨以謝師師曰林野棲神之所珠

璣寶貨無所用之遂不受謂龍曰岩石之上去水稍遠若致一清泉即為佳惠爾是夕聞瀟瀟風雨聲達旦繞山齋石渠泉水環流至今謂之天師渠燕國公張說常與師會飲師曰此有麴處士性謹而訥頗耽酒鍾石可也召至其形侏儒腰數圍拜揖之禮頗樸拙酒至輒盡而神色不動師忽叱之曰曾無高談雅論惟務耽酒何所用哉因扶之乃一巨榼爾至開元八年尸解于景龍觀或言生隋大業丙子卒壬戌蓋百有七歲解化之後明皇思之降制曰故道士具官葉某天真精密妙理幽暢包括秘要發揮靈符固以冥默難言希夷罕測而情棲蓬閣迹浪朝伍保黃冠而不拔加紫綬以非榮卓爾孤芳冷然獨往勝氣絕俗貞風無塵金骨外聳珠光內映斯乃體應中仙名升上德朕嘗聽政之暇屈詢至道公以理國之法屢奏昌言謀參隱諷事宜洪益嘆微音之未泯悲縣解而俄留何莫愁遺穢良奄及永惟平昔感愴予懷宜申禮命式賁泉壤可贈越州都督勅葬于松陽百官

縞素泣送國門之外仍度其姪潤州司馬為道士師有弟子百餘人惟暨齊物尹惜為入室矣

邢和璞

邢和璞不知何許人隱居瀛海間善筭心術凡人心之所計布筭而知之卜居嵩穎間著穎陽書三篇有筭心旋空之訣復能以法活死者唐明皇開元十二年至都朝貴候之其門如市有友人居白馬坡下和璞至死已踰日當其母哀之和璞遂置尸于牀引其衾同卧開戶良久起具湯沐而猶未甦復與之寢須臾即活又崔司馬者與和璞善因疾篤曰先生何棄我耶已而聞寢壁有穿穴聲窺之有微隙漸大見導從數百人一人紫衣大冠坐車中謂崔曰邢先生合太乙相教言訖而去其疾遂愈隙穴亦尋失矣房瑄為桐廬宰待和璞甚善暇日因攜手出城不覺行十數里至夏谷村有廢佛堂松竹森映共坐其下和璞以杖擊地令侍者掘之深數尺得一瓦瓶中有婁師德與永公書和璞笑謂瑄曰省

此乎瑄髮髯前世嘗為僧名永和璞曰君當為宰輔善自愛然其終必食繪棺以龜茲不在私第不在公館不在寺宇不在外家瑄後果踐台輔謫居閬州卧疾紫極宮稍愈太守召會郡齋進繪食畢疾復作夢神人曰邢真人之言信矣翌日果終前有賈者拖龜茲板為老君帳因假以為棺和璞廬終南學道者多依之時崔晤與其友恭事左右一日謂其徒曰旦夕有異客子等為予設具又戒曰謹毋窺伺翌日果一人至其長五尺闊三尺首居其半衣緋執笏鼓髯大笑吻角侵耳作劇談多非人間語崔晤欲見不自正遂趨而過客熟視謂和璞曰此非泰山老師乎曰然食訖而去和璞謂晤曰此上帝戲臣也言泰山老師子能省乎晤垂涕曰少聞先人言某實老師之後身然前身不甚記和璞後亦不知所之

申元之

申元之者不知何許人游名山博採方術得內修度世之道唐明皇開元中召入上都開

元觀時張果邢和璞羅公遠葉法善尹愔何思遠史崇祿希言同左佑真風翼戴人主帝游溫泉幸東都元之常扈從善談清靜上每延問動移晷刻惟貴妃與內人趙雲容侍晨衣得聞其論雲容嘗侍茶乘間輒乞藥以

希延生元之曰我所惜但汝不久世雲容復懇乞不已元之慙其恭勤乃與絳雲丹一粒曰汝服此死必不壞但大其棺廣其穴含以珠玉疏而有風使魂不蕩空魄不淪潛百年外可以復生此太陰煉形之道即為地仙復

百年當遷洞天矣雲容從幸東洛病于蘭昌宮特以元之之言問貴妃上命中人陳元造如其所請而瘞之至憲宗元和末已百年雲容果再生元之亦隱顯無常自號田先生識者相傳魏時人已數百歲龍城錄云八月望日唐明皇與申天師遊月宮寒氣逼人清露漙漙過一大門在玉光中見一大府榜曰廣寒清虛府少前見素娥十餘人皓衣素白驚笑舞於廣庭大桂木下樂音清麗上皇歸製霓裳羽衣曲此一

事與葉法善稍同今併存之又逸史見羅公遠傳大槩如此

羅公遠

道士羅公遠一名鄂州人也一云彭州九隴

縣人修道宇于漓沅化常往青城羅川間歷周隋唐年數百歲乍老乍少輒晦名迹唐明皇開元中春三月鄂州刺史燕屬吏于郡之園亭士庶遊覽者無不至有一白衣長八九尺容儀端偉門吏初疑之俄有一小童見而

叱之曰汝何故離本處輒來此宜速去白衣遂攝衣而走吏乃執小童白刺史因問其族云姓羅名公遠幼學道術適見守江龍來此與明公逐之刺史未之信曰須令我見其形曰請俟後日及期於江干穿一小圳僅尺餘

以引江水刺史與郡人皆至須臾有一白魚長五六寸隨流而入騰躍漸大煙如線頃之黑氣橫空咫尺不辨公遠白刺史與郡人速上津亭未至雷電而雨既少霽見一白龍於江心頭與雲連食頃方隱時明皇好方外士

刺史具以聞因召見每問無不稱旨劔南有菓謂之日熟子張果葉法善與上以術取之曰午後必至其日擁爐公遠始與坐抵暮不

至張與葉相顧曰莫是羅君不公遠笑於爐中撥出一火筋斯須使者持日熟子至葉詰

之曰到京城烈焰巨天無路可過通稍息方得到此諸公皆失色上每召公遠與法善金剛三藏試法而公遠常勝凡出入禁中或以微言規諷或以直道獻替猷崇驅妖召龍致雨无善自隱上欲傳其術公遠曰陛下玉書金簡已格九清宜襲唐虞之無爲繼文景之儉約豈可以四海之尊萬乘之貴宗廟之重社稷之大而輕徇小術耶若盡臣術必懷璽入民間困於魚服也上不悟遂辱罵公遠公遠走入殿柱中數上過上愈怒劈柱追之既見復入五碣中又擊碣爲數十塊皆有公遠之形上謝之乃如故上強之不已因教焉然不肯盡其術試自隱常餘衣帶不爾影迹及公遠其試則駢厚賜金帛然卒不得其妙上怒遂斬之有中使輔仙玉自蜀還速公遠駕而西謂仙玉曰吾晉成帝咸和年間入蜀棲息林泉以修真爲務聞天子好道乃捨煙霞之樂冒於塵世欲以至道教人王上延我於別殿而素靈藥我告以人間之府藏董血充積三田未虛六氣未潔請以十年爲約而受

乃不能守因小術加我以丹頸之戮一何虐焉然得道之人形氣混合豈能以世俗兵刃水火害於我哉但念主上列丹華之籍有玉系之舊而眷眷之情不能已因袖出一書謂仙玉曰可以此達上云我姓羅名公達靜真先生弟子也上必悟焉仍涼曰小隱居山食菓飲水度流年而已赴闕治道惟食三素上嘆息送肅明觀遣內侍郭道贊送棗二盤六月再召見上引入內閣賜坐與觀寢殿蓮池問比地亢陽有秋失望奈何智涼曰誠能動天願陛下東誠賜臣夜黥必致甘雨制可醺竟雷雨隨應上大悅因問治國之要對以聖人道在心不在他求賜紫衣一襲度爲道士自是凶辭闕庭奉詔歸舊隱煉丹賜絹五百疋二十七年丹成詔詣闕賜餐優渥肅宗至德二載召不起乾元初享年百有四月解于浮雲觀

薛幽棲

薛幽棲蒲州寶鼎人也性沈靜有敏識卓見修舉業之暇好聞方外事唐明皇開元中及

進士第年始弱冠調官陵郡尉秩未滿有林泉之興遂拂衣去服冠褐出入青城峨嵋間久之遊鶴鳴山訪漢天師治所修行僅一紀而道氣愈充天寶初復遊南嶽卜棲真之地乃晦其名氏於五老峯之下遊心於自得之場曠然無所係而能和光混俗毀方瓦合其於三洞真誥靡不該覽故幽人逸客嚮風稟受日集于左右而師辯論宏博隨其根性各有所發明進玄微論三卷上稱賞其達悟未幾尸解于墨山嘗註靈寶度人經見行世衡嶽總勝集云今凌虛宮有天香臺乃註經之所曉夕雲煙如香繚繞

王柯

王柯字仙柯青城橫源人也一云蜀州永康縣華陽山下人母丁氏夢大星照身及覺室內有光因而有孕生而紫胞綠脉形狀異常幼穎異拔俗家巨富不以經意長則仁慈好善見老弱窮困者惻然哀之形於顏色周急施惠每大雪時施粒食以濟禽鳥後遇至人傳丹訣於乃居側洞中修煉歷年無成鼎忽破丹乃化爲金

線石後因徧行山園一日至味江龍潭又上西峯遇道士煉丹柯乃助其薪炭奉事三年寒暑不移道士嘉其志授以祕訣今內修上道外積陰功丹成復分遺之柯服丹漸覺神爽氣逸身輕意暢門側有大栢數株騰身而舉已在栢杪因此昇天而去今栢猶在乃唐高宗儀鳳三年中得道也其地即今羅家山道士乃羅公遠云

李聿

李聿唐宗室也羅公遠於明星燕閒講論道妙出入含元殿曾試之後授歙州刺史與家屬之官甫過大江乃爲鼉所崇拘聿之魂而附其形自其家赴任一日公遠校錄水府見之於是飛符誅鼉而還聿之魂聿乃棄官入青城山太一洞請符以救其室遂依公遠學道後證仙果今列侍左右云

杜昇

杜昇字可雲自言京兆杜陵人也莫測其年壽不食常飲酒三斗不醉顏甚悅澤若三十許人裹大方巾破帽冬夏常着綠布衫而言

談甚高頗有文學人有與換新巾衫必受之舊者竟不脫得新者出門逢人便與常遊城市間醉行能沙書好於水碗及盆內以沙書龍字浮而左右轉或叱之則飛起高丈餘隱隱若雲霧作小龍形呼之復下水中不就人求錢人自以錢予之召人穿檐行少頃之間得錢甚多便散與貧人及酒家如此到處日日爲之人皆不厭以錢予之疑以術惑於衆也冬則卧於雪中三兩日人以爲殭斃矣或撥看之徐起抖擻雪而行猶若醺酣氣出如夏醉睡醒也杜孺休郊園公琮之子也爲蘇州牧或聞可雲在城市極喜乃延入拜之呼爲道翁賓客僚屬皆訝之孺休曰先君出鎮西川日與此道翁深相喜重常來去書齋中時孺休纔年十餘歲今五十餘歲別道翁四十年而妝飾顏貌一如當時乃留之郡齋咨以道術可雲曰但以政化及人慈愛爲意況今多事尤在保身未能脫屣世塵委家林野宜遠於兵傷道術未可問也時郡人以錢帛與之阻讓不可出城便散與人孺休敬之愈

甚可雲或與孺休賓僚聚飲有倡和者而可雲出口成章屬意深遠多神仙旨趣人無以繼之後軍亂孺休果爲兵傷而死人見可雲亦被傷殺頃之但有舊衫一領作三四段斫破痕在地後數日人多見可雲過松江浙江經抗越衢信入江西市醉吟沙書如故又一年人於湖南見之問蘇州事歷歷語而笑復言曾居南嶽即當去矣詳而究之是得隱形解化之道人莫知也

道一曰杜昇得道彌深混俗處世忘情詩酒絕粒麤衣觀其方巾布衫雖舊不脫人手新者必以遺人冬則卧於雪中常日遊於城市蓋亦莫考其年壽幾何矣倘以當時中服觀其人未必知其得道也真仙隱顯孰世豈易窺哉故道德經曰是以聖人被褐懷玉

羊愔

羊愔泰山人也以世祿官家子縉雲明經擢第解褐喜州夾江縣尉罷歸縉雲兄忻爲台州樂安令愔幽棲括蒼山性惟沈靜薄於世

榮志尚道遙常慕道術一旦妻暴亡曰莊生鼓盆以爲遠者今樂矣葬之不亦宜乎男且有業女已有歸永無累也後遊阮郎亭崖上去地十餘丈有篆書刻石字極大世傳阮肇題後盛成使匠人鑿石摸拓之乃唐李陽冰嘗爲縉雲令遊此亭題詩曰阮客身何在仙雲洞口橫人間不到處今日此中行惜於亭側與縉雲觀道士數人花時飲酒日午忽仆地若斃氣息猶暖乃昇還家七日後方醒鄉里之人與道士俱往問之惜曰初爲一人青幘絳服自稱靈英邀入洞府中見樓觀宏麗鸞鶴徘徊天清景暖異於人間須臾一石穴中有物飛出狀如蒼青色柄長靈英指之曰此青靈芝也可食之得仙惜覺飢方甚取坐於石上食之味甘美俄而都盡靈英曰爾夙有仙分今日遽得見仙官乃引見仙官戴遠遊冠霞帔羽衣三人文武侍從極多靈英謂惜曰一人小有天王君一人華陽大茅君一人隱玄天佐命君惜歷拜之咸曰有仙骨未能飛昇猶宜地上修煉俄而靈英送出乃括

蒼洞西門也惜方悟此身後不喜穀氣而飲水三升日食百合一盞身輕骨節皆動抖擻如竹片及拍板聲又多言語吟詠若與人談話晝夜不已時或以紙二三百幅書之頃刻皆成文字人莫能識惜讀之悉是文章道侶

十三

好事者依口錄之實亦清辭麗句多神仙瀛洲閬苑之意如此經年清瘦輕健及二年漸肥白不食百谷惟飲水三年漆髮童顏行輕似飛飲酒三斗不醉居常衣布褐後往崇安省兄一日到又往天台亦一日到日行二四百里復歸仙都山餌藥養氣二十餘年後南行入委羽山人莫得見矣

譚峭

譚峭字景升唐國子司業洙之子幼而聰明及長頗涉經史強記問無不知屬文清麗洙訓以進士爲業而峭不然迥好黃老諸子及周穆漢武茅君列仙內傳靡不精究一旦告父出遊終南山父以南山近京都許之自經終南太白大行王屋嵩華泰岳遙遊歷名山不復歸寧父馳書責之復謝曰茅君昔爲

人子亦辭父學仙今峭慕之冀其有益於父母父母以其堅心求道不以世事拘之乃聽其所從而峭師於嵩山道士十餘年得辟穀養氣之術惟以酒爲樂常醉騰騰周遊無所不之夏則服烏裘冬則綠布衫或卧於風雪霜中經日人謂已斃視之氣怵怵然父常念之每遣家僮尋訪春冬必寄之衣及錢帛峭捧之且喜復書遠遣家僮乃厚遺之纔去便以父所寄衣出街路見貧寒者與之及寄於酒家一無所留人或問之何爲如此曰何能看得爲盜所竊必累於人不衣不食故無憂也常欣然或謂風狂每行吟曰綠作長江扇作天靱鞋拋向海東邊蓬萊信道無多路只在譚生拄杖前爾後居南嶽煉丹成服之入水不濡入火不灼亦能隱化復入青城山去也峭嘗作化書南唐宋齊丘竊其名爲已作見行世宋仁宗嘉祐五年夏四月碧虛子題化書後序云鴻濛君曰吾嘗問希夷先生誦此書至稚子篇掩冊而語吾曰吾師友譚景升始於終南山著化書因遊三茅經歷建康

十四

歷世真仙體道通鑑卷之四十

解八

浮雲山聖壽萬年宮道士趙道一編修

薛季昌

薛季昌者河東人

南嶽總勝集云漢州綿竹人也

家世皆以

官顯季昌自幼不好榮不茹葷衣常布素酷

好山水一日遊青城遂南如桃源後遇正一

先生司馬承禎於南嶽授三洞經籙研真窮

妙動久不懈故高真屢降異香妙樂時聞於

靜室中唐明皇召入禁掖延問道德乃談極

精微上喜恩寵優異尋即還山上命賦詩贈

序曰練師志慕玄門栖心南嶽及登道錄忽

然來辭願歸舊山以守虛白不違雅志且重

精修若遇至人神藥時來城闕也詩曰洞府

修真客衡陽念舊居將成金闕要願奉玉清

書雲路三天近松溪萬籟虛猶宜傳秘訣來

往候仙輿季昌嘗撰道德玄樞以總順真妙

注九真降聖觀復華蓋舊隱修煉丹成一日

忽謂弟子曰祝融峯今夕有天真之會予被

召當往遂凌虛而去不復返後建凌虛宮

田虛應

道士田虛應者字良逸齊國人為性樸拙吐

露無忌諱隋文帝開皇中侍親於攸縣以喧

究遷南嶽躬耕於紫蓋峯以盡子職凡五十

餘年母既去世乃遊五峯放志自適唐高宗

龍朔中州牧田侯於嶽觀構降真堂以居之

田千乘贊以粉壁所授上清大洞秘法自正

一先生傳薛季昌季昌傳虛應既承道要涉

歷雲水為友善者惟蔣含洪而已時呂渭揚

馮皆使湖南嘗就訪高論潭州早祈之久不

獲召虛應虛應擊髮弊衣至郡無言而雨自

降又嘗久雨不止郡守建壇于嶽觀亦默然

岸幘而坐泊升壇即霽憲宗元和中東入天

台不復出憲宗詔不起有歐陽平者道學亦

高嘗兄事之一夕夢三神人各持金爐自天

而降若有所召密謂人曰二先生不久去矣

我必繼之未幾虛應果羽化蔣亦繼往門弟

子達者三人栖瑤馮惟良香林陳寡言方瀛

徐靈府

馮惟良

道士馮惟良字雲翼相人也修道於衡嶽中

見宋齊丘有仙風道骨雖溺機智而異黃埃稠人遂引此篇云稚子弄影不知為影所弄狂夫侮像不知為像所侮化家者不知為家所化化國者不知為國所化醉者負醉者者療亦其勢彌顯其病彌篤而無反者也齊丘終不悟景升乃出化書授齊丘曰是書目之化其化無窮願子序之流于後世於是執鞭而去齊丘奪為己有而序之耳噫昔向秀述南華解義未傳而死郭象偷改成注誠罪人也今譚君名刻於白簡身不老於人間齊丘敢縱其盜心蔽其仙迹其罪大者也果不得其死宜乎哉

歷世真仙體道通鑑卷之三十九

續七

上五

官與徐靈府陳寡言為煙蘿友香火之外悲
酒自娛久之就降真堂師田虛應授三洞秘
訣唐憲宗元和中東入天台會稽廉訪使元
稹聞其風而悅之常造請方外事桐栢觀自
正一先生完葺以來湮廢之久惟良乃再締
構作上清閣降真堂白雲亭脩閣院復正一
先生之迹以三洞之道行于江表憲宗詔不
赴即華林谷創栖瑤隱居以止桃源金陵常
脩然獨往累月一歸忽一日命湯沐浴冠簡
降庭若有所對召須臾陞階遂化年九十傳
授弟子僅百數唯應夷節葉藏質沈觀外他
無得其要

陳寡言

道士陳寡言字大初越州暨陽人隱居於玉
霄峯號曰華林天台科法有闕遺者拾而補
之居常以琴酒為耽每吟詠放情自任未嘗
加飾其山居詩曰醉卧茅堂不閉關覺來開
眼見青山松花落處宿猿在麋鹿群群林際
還又曰照水冰如鑑掃雪玉為塵何須問今
古便是上皇人寡言雖補闕科教而不躬行

惟傳度弟子有劉介者字處靜捨明經業即
婺州蘭谿事靈瑞觀主吳守素為道士聞寡
言之名遂就華林請教奉几杖香火凡二十
年盡寡言之道寡言將尸解謂處靜曰當盛
我以布囊置石室中慎勿以木為也享年六
十四處靜與葉藏質應夷節為方外友久之
將坐化以詩示其徒乃返真其辭曰我本無
形暫有形偶來人世逐管管輪迴債負今還
了搔首索然歸上清別有詩十篇今在天台
道元院

徐靈府

道士徐靈府號默希子錢塘天目山人通儒
學無意於名利居天台雲蓋峯虎頭岩石室
中凡十餘年門人建草堂請居之弗往而後
自廬於石層上喬松脩竹森然在目有環池
方百餘步中多怪石若島嶼因名之曰方瀛
日以修煉自樂於其間嘗為詩曰寂寂凝神
太極初無心應物自雲與性修自性非求得
欲識真人祇是渠又曰學道全真在此生迷
徒待死更求生今生不了無生理縱復生知

何處生唐會昌初武宗詔浙東廉訪使以起
之辭不獲出見廉使獻言志詩曰野性歌三
樂皇恩出九重求傳紫宸命免下白雲峯多
愧書傳鶴深慚紙畫龍將何佐明主甘老在
岩松廉訪奏以衰槁免命由此絕粒久之凝
寂而化享年八十二著玄鑑五篇注通玄真
經十二篇及撰天台山記三洞要略門人得
其道惟左元澤

劉元靖

道士劉元靖者武昌人師王道宗授正一錄
未幾道宗將告寂所有均遺諸門人元靖惟
收圖書既葬於東山晴夜有氣出墓中高數
丈元靖異之遂改葬及發棺但遺衣衾而已
始知其師得道元靖感悟泛洞庭遊武陵復
入南嶽師田良逸因登魏夫人仙壇乃有卜
居意自壇尋峻峯而上六十五里南嶽總真集云十數
里見一石穴南向因闢以為居引泉環流伐
木誅茅前構小閣棋局茶竈鑿石而成史君
韓曄遊此命其閭曰會仙常以百草芽為蔬
醢酒雖絕粒煉氣而一飲斗餘唐敬宗寶曆

初詔入思政殿問長生事曰無利無營少私寡慾修身世之旨也上不悅而難作放令歸山明州刺史唐仲妻病求符於元靖元靖戒來使曰此符當示史君毋先於夫人使還仲已殂夫人自愈武宗會昌中復召入禁中

麟八

五

上請授法錄問三盟歎血事對曰世之所重者髮膚天子之尊止可飲丹以代之齋戒陞壇授籙賜銀青光祿大夫崇玄館大學士號廣成先生別築崇玄觀以居之乞還山詔許宣宗大中五年冬十月有雲鶴屢降未幾去世聞天樂浮空及遷神日惟杖屨在弟子呂志真得其道兵部侍郎萬鄴文碑吏部員外郎趙櫓為傳盧播作石室銘道士張堅白為內傳

葉藏質

道士葉藏質字含象處州松陽人法善之裔也初隸安和觀為道士詣天台馮惟良授三洞經錄於玉霄峯選勝創道齋號石門山居其前有二峯聳峭對峙故曰石門日誦道德度人二經晚年尤精符術請之者如織髮州

牧為邪物所撓詣請符至中路犯以穢忌失之牧親造見案上有筒封檢甚固乃前之符也因焚香置匣捧歸祟物遂絕由是獲驗之家有所施不得已則少留之悉為葺壇宇功德之費牧乃表其賢唐懿宗優詔石門山居為玉霄觀忽命酒召其友應夷節同飲語及生平事然後告以行日及期題於門曰鷄鳴時去門人遂聞珠珮雜鼓樂聲于空中須臾鷄唱視之已化矣年七十四

應夷節

應夷節字適中汝南人也唐明皇開元中高士應凝之曾孫累世不仕窮道養性母何氏夢流星入牖驚覺室有光因而孕焉既生不喜茹葷年七歲而性敏慧詣蘭谿靈瑞觀吳尊師受老莊文列及周易十三歲與道士籍持十戒而勤焚誦師友見之肅如也久之遊天台龍虎山受正一紫虛都功等錄而後復受昇玄上清迴車畢道及紫文素帶藉地騰天符且上清大法自陶隱居傳王遠知王傳潘先生潘傳司馬練師司馬傳薛季昌等傳

田良逸田傳馮惟良馮傳夷節也師行之精謹故動有神靈之默助與葉藏質劉處靜為林泉友唐武宗會昌中就天台桐栢觀之西南別建淨壇以居觀察使李褒問來問道因奏請院額因詔以道元為名拾遺張穎撰記

而栖真此地五十餘年吳越之人瞻風稽首願侍中凡者莫知其數每入靜行道登壇閱籙或為人致福數有感應居常誦黃庭大洞二經至於八道望雲三元受事迴風隱地攀斗藏天之術尤勤行之時公卿以師名聞奏詔賜服號固辭嘗謂門弟子曰吾以維持教法不能滅迹匿端雖道不違人而勤行方至然玉京金闕泉曲鄴都相去幾何唯心所召爾等勉之昭宗乾寧中忽一日沐浴入靜凝神如有所待至翌日昧爽解化春秋八十有五歲夕清香馥郁猿鳥悲鳴及遷神就窆但空棺而已東陽羅隱為贊

左元澤

道士左元澤永嘉人也賦性耿介不俯仰於時事方瀛徐靈府因卜居香林峯石室中去

方瀛一里許晨夕省奉雖和寒暑熱未始不至靈府應其勤恪遂授以祕要後陟玉霄峯有人設黃籙齋元澤列篆以草屨登壇或詰之曰三境尚擬去此何土堆也後歸松房絕粒不語忽攜一布囊貯木屑古鑑入山莫知其所止或一月兩月即出訪其友應夷節談論清虛外嘗言所居有一岩室左右有大竹數十根前有池於曲渚中有碧芙蓉數十朵又有文禽數十隻類鸚鵡游泳其間嘉其趣因宿室中至夜有物環其身既覺惟瞑目坐忘達旦方解去視其布褐惟聞涎腥是夕復坐室中布網步以伺之果一物自池中出長數丈兩目光射人若蛟螭之狀俯岩呵喻徐而蹙縮入池因戒曰後學輩無術謹勿栖岩穴也溫州青障觀有土地里人常以血食祀之苟祀不至則為祟元澤以杖咎神背三下翌日有大狸死于庭背有杖痕者三里人復夢神告曰託附吾者為仙官皆死謹勿血食祀我也元澤一日忽謂主觀者曰某將他適請置湯沐復祝之掩蓋日但請隨香氣而去

盡處即止是夕有風雨雷電交作光中有兵衛皆介甲將曉聞唱珍重聲往視之已化矣遂襲香氣盡處如其言瘞之果得一自然石壙不知其甲子嘗製真一頌題於方瀛石壁曰大道杳冥不可致詰舍太虛為廣舍總萬宇于真一以道守真真亦非一言之以自然任之以萬物胎根既斷三界迥出九祖得度三官息筆實賴無功之功其功妙而難匹

呂志真

呂志真者不知何許人廣成先生劉元靖之弟子也內潔而外和似不能言者居石室中十餘年其後每歲一至京師遊瀟湘訪諸門人之家常荷二大瓢藥物服飾經錄道具皆貯之喜以藥石救人入林谷則有虎豹隨之人問其道則默然無所對出南山道中忽失色不前人皆訝之且者前有剽掠者來果見兵刃志真謂賊曰此行者皆吾弟子毋得干之其徒斂衽避路不復敢前又至一谷口曰此有害人之物同行遂入林中以繩繫二虎而出由是知志真深得廣成之道嘗云先初

居石室時所處甚隘一夕致醺忽山間數十步其中平敞復有黑豹馴繞其側

杜光庭

道士杜光庭字賓聖號東瀛子本處州人山記云京兆杜陵人博極群書志趣超邁唐懿宗朝與

鄭雲叟賦萬言不中乃奮然入道事天台道士應夷節常謂道法科教自漢天師暨陸脩靜撰集以來歲月綿邈幾將廢墜遂考真偽條列始末故天下羽檣永遠受其賜鄭歟為其文於朝僖宗召見賜以紫服象簡充麟德殿文章應制為道門領袖當時推服皆曰學海千尋辭林萬葉扶宗立教海內一人而已中和初從駕興元道遊西縣適遇術士陳七子名休復灑然異之披榛穴地取瓢酒酌之曰以此換子五藏爾先生知國難未靖上表勾游成都喜青城山白雲溪氣象盤礴遂結茅居之溪蓋薛昌真人飛昇之地也未幾駕將復都詔光庭應二十四位會王建霸蜀召為皇子師建謂曰昔漢有四皓不如吾一先生足矣光庭不樂官中薦許寂徐簡天自代

因老于成都相國徐光傳志學之年執弟子
禮事之光庭嘗謂曰予初學於上庠而國子
監書籍皆備先讀天文神仙之書次覽經史
子集一月之內分布定日而習之一日誦經
書二日覽子史三日學為四日記故事五日
遊息凡五事每月各六日如此不五七年經
史備熟韋謁學士以兄之相國莊之文集請
為序光庭曰相國富有文辭若集中不刪落
小悼浮豔等詩不敢聞命建用張格乃唐相
濟之子其才術高於時而於故實未通治蜀
初小大事每令咨稟蓋光庭非止善辭藻而
已有經國之大才時有道士感庭秋詞之而
不過一日忽謂門人曰青城方創真宮工未
畢昨夢朝上帝以吾作岷峨主司恐不久於
世門人皆露襟及真宮成時後唐莊宗長興
四年癸巳十一月光庭八十四歲一旦披法
服作禮辭天陞臺趺坐而化顏色溫粹宛若
其生異香滿室久之乃散光庭有一白犬目
之曰吠雲令以麻油塗足繪布裹之曰吾聞
油塗犬足可日行萬里遂巡吠雲亦號叫數

聲而薨光庭嘗撰混元圖紀聖賦廣聖義歷
帝記暨歌詩雜文僅百餘卷行于世凡所著
述未嘗不以經濟為意蜀檇杭云有文千餘
卷皆本無為之旨如
山居百韻詩及紀道德懷古今二篇蜀主王
建初賜號廣德先生又欲優於名秩詢于故
事毛文錫獻言唐武德初和平定為金紫大
夫開元中尹愔居諫省於是以為諫議大夫
封蔡國公進號廣成先生延之玉局化通正
初遷戶部侍郎衍襲位尊為傳真天師特進
檢校太傅太子賓客兼崇文館大學士

問丘方遠

問丘方遠字大方舒州宿松人也幼而辯慧
年十六通經史學易於廬山陳元昭二十九
歲問大丹於香林左元澤元澤奇之謂方遠
曰子不聞老子云吾有大患為吾有身蓋身
從無為而生有為今却反本是曰無為夫無
為者言無即著空言有則成礙執有無即成
滯但於有無一致泯然無心則庶幾乎道且
釋氏以此為禪宗顏子以此為坐忘易云無
思也無為也寂然不動感而遂通天下之故

其歸一揆又經云迎之不見其首隨之不見
其後是何物也子若默契神證又何求焉所
惜者子之才器高邁直可為真門之標表也
方遠稽首致謝而去復詣仙都山隱真岩事
劉處靜學修真出世之術三十四歲受法錄
於天台山玉霄宮葉藏質真文祕訣盡蒙付
授而方遠守一行氣之暇篤好子史群書每
披卷必一覽之不遺於心常自言葛稚川陶
貞白吾之師友也銓太平經為三十篇備盡
樞要其聲名愈播於江淮間唐昭宗景福二
年錢塘彭城王錢鏐深慕方遠道德訪於餘
杭大滌洞築室宇以安之昭宗累徵之不起
方遠以天文推尋秦地將欲荆榛唐祚必當
革易倖之園綺不出山林竟不赴召乃降詔
褒異就頒命服俾耀玄風賜號妙有大師玄
同先生聞揚聖化啓發蒙昧真靈事跡顯聞
吳楚由是從而學者無遠不至弟子二百餘
人會稽夏隱言譙國戴隱虞虞陽鄭隱瑤吳
郡陵隱周廣陵盛隱林武都章隱之皆傳道
要而陞堂奧者也廣平程紫霄應召於秦宮

新安聶師道行教於吳國安定胡謙光魯國孔宗曾十人皆受思真煉神之妙旨其餘遊於聖迹藏於名山不復得而記矣天復二年二月十四日沐浴焚香端拱而坐俟停午而化顏色怡暢屈伸自遂異香芬馥三日不散弟子以從俗葬舉以就棺但空衣而尸解矣葬於大滌洞之傍白鹿山復有道俗於仙都山及廬山累見之自言我捨大滌洞歸隱瀟山天柱源也

○道一曰左元澤答問立方遠之間善則善矣然末云但於有無一致泯然無心則學者猶未知有無之辨也夫能識無中不無有中不有方契乎道方遠之所得度不止此也道德經曰三十輻共一轂當其無有車之用埏埴以為器當其無有器之用鑿戶牖以為室當其無有室之用故有之以為利無之以為用此論無也又曰孔德之容惟道是從道之為物唯恍唯惚惚兮恍兮其中有象恍兮惚兮其中有物惚兮冥兮其中有精其精甚真其中有信又曰

有物混成先天天地生寂兮寥兮獨立而不改周行而不殆可以為天下母吾不知其名字之曰道此論有也知此則親見左元澤亦必曰斯言盡之矣

歷世真仙體道通鑑卷之四十一
浮雲山聖壽萬年宮道士趙道一編修
聶師道
聶師道字通微新安歙人也性聰淳直言行謙謹養親以孝聞深為鄉里所敬少師事于方外即德誨之從兄也德誨自省郎出牧新安乃於郡之東山選勝地構室宇以居之目為問政山房而師道事之辛勤年十三披戴冠裳十五傳法籙修真之要後出遊績溪山自言嘗覽內傳見服松脂法乃與道侶上百丈山採松脂崖石迥聳百丈遂以名之其四望高千餘仞夜宿於崖頂松下天清月朗忽聞仙樂起自東南紫雲上遙遙而來遲緩過於石金山石金與百丈其高相等雖平地隔三十餘里山頂相望咫尺間乃聞仙樂到彼輟少時戲小鼓三通復通奏金石笙簫絲匏響亮擊鼓而拍莫審其曲調聲揭而清特異人間之樂自三更及雞鳴而止後問於山下人是夜皆聞之其同侶嘆曰方採靈藥遽聞仙樂豈非有感此亦君得道之嘉兆矣其後

遊行歸南岳禮玉清及光天碧玉二壇後泊招仙觀入洞靈源時當春景聞蔡真人舊隱處不遠有花木甚異採樵者時或見蔡真人在其間師道喜之乃辟穀七日晨起獨往山中漸行聞花有異香不覺日晚忽到大溪傍見一樵人臨水坐於沙上師道驟欲親近方乃負樵將下溪迴顧師道却駐樵擔問獨此何往應之曰學道尋仙深心自切聞蔡真人隱此山願一禮謁爾樵人曰蔡君所居極深人不可到師道曰攀蘿登崖已及於此有山通行豈憚遠近樵人又曰日將暮矣且行過此山東有人家可宿師道欲隨樵人去樵人遽入溪水甚淺及師道入水極深而急不敢涉樵人曰汝五十年後方過得此溪目送樵人步水面而去不見師道迴山東十餘里遙望見草舍三間有雞犬漸近見一人青白色似農人年可三十獨居見師道到甚訝師道深山自行忽曰家累俱出何爲主人又問師道此來何之應曰尋蔡真人隱居主人曰路上見樵人否曰見主人曰此蔡道者過

過也師道聞之禮祝曰凡愚見仙聖不識亦命也已過夜山林深黑投宿無地又問曰從何來具以發迹新安尋真之由以對乃許入其舍復指師道令近火爐邊牀上坐曰山中偶食盡求之未歸師道曰絕粒多時却不以食爲念見火側有湯鼎復有數箇黃磁合主人曰合內物可與任意取之乃揭一合是茶主人曰以湯潑喫及喫氣味頗異於常茶久之復思茶更揭之合不可開徧揭諸合皆不能開師道心訝不似村人家而不敢言主人別屋睡日高不起又無火燭睡中曰此孤寂之處忽病無以相待前村人家甚多可以往彼師道遂行數里不見人家悉是崖險乃迴盼已迷向宿之處復行約三十餘里忽逢見一老人欣喜邀於石上坐問入山之意具以前事對之老人曰蔡君父子俱隱此山昨夜所宿之處即其子也又曰爾道氣甚濃仙骨未就入山饑渴曷能久留此哉俄折草一莖與師道形若薑苗而長尺餘嚼味甘美復令取水喫次舉頭已失老人所在師道悲嘆

不已而覺食茶草之後氣力輕健愈於來時却欲沿山路尋宿處其路已爲棘蔓蔽塞前去不通却迴招仙觀衆道士驚異曰此觀雖靈岳側近蟲獸甚多人罕能獨行何忽去月餘日實久憂望師道曰昨日方去始經一宿具言見樵人及宿處又逢老人道士皆嘆曰吾輩雖同居此觀徒爲學道知有蔡真人無緣一見吾子夙有仙分已見蔡君父子其老人者昔聞彭真人亦隱此山豈非彭君子乎一入山遽逢三仙人一日一宿人間月餘矣其實積習之命也師道深自嘆異駐招仙觀修煉逾年後以親老思歸却迴問政山每入諸山拾薪斲藥或逢虎豹見師道則垂耳搖尾俯伏於地師道以手撫而呼之乃起隨行或以薪藥附於背上負之送歸而去昔郭文舉居大滌洞伏虎亦如之歟之近山頗有猛獸而不爲人之害者自師道之感也其親時問師道遊學所益具陳其事親聞之而喜曰汝以孝養我以道資亦幸爲汝母矣此蓋宿慶之及也後又出遊復思往南岳九嶷山早

聞梅真人蕭侍郎皆隱玉笥山時人多見之
梅即南昌尉梅福也蕭即梁之公子蕭子雲
也自東陽太守避侯景之亂全家入山二人
俱得道於此師道且止玉笥清虛觀思慕梅
蕭特遊郁木坑或異一見堅心而去山行極
深忽見一人布衣烏紗帽類若五十許人師
道禮敬問之初自稱行者問師道何往乃以
尋梅蕭為答行者曰聞爾精勤慕道遍訪名
山誠亦非易欲見二君行者可以相引爾宿
業甚淨已應玉籍有名雖未便飛昇當亦度
世爾行者又曰我謝通修也恐爾未識故以
自言本居南岳與彭蔡同隱已三百年知爾
嘗遊洞靈源我適為東華君命主玉笥山林
地仙兼掌清虛觀境土社令爾與我素有道
緣是得相見然梅蕭日中為小有天王所召
恐未便還未可俟也師道於是虔拜曰凡世
肉人謬探大道凝神注想以朝繼夕未知要
妙若浮于海詎識其涯不期今日獲見道君
實曠劫之幸也通修曰丹心懇苦深可憫哉
爾世事未了且當送爾出山路往我所止隨

行數里忽見草舍兩間甚新潔有床席小鑪
然火煎湯儼若書生所居而無人通修命師
道入坐於木馬上通修自坐於白石鹿上俄
有一髮角童以湯一盞與師道呷之神氣爽
然又指令架上取書一卷通修曰此素書也
但習之無怠當得真旨師道意欲求住師學
之未啓言而通修已知曰爾有親垂老雖有
兄能養若欲更南遊此未可言住我有弟子
號紫芝在九嶷山若往彼見之為我傳語兼
出素書示之得盡其旨矣或不見但投素書
於毛如溪上洞中仍題石壁記我傳語之意
紫芝當自授爾要道言訖乃發遣師道迴俄
不見通修已在郁木坑外師道入清虛觀矣眾
道士驚之曰一去七日而返何之也師道具
以對之有道士二人欣躍乞與師道共入郁
木坑到舊處岩石草樹歷歷宛然但失其草
舍竟日悵望而迴師道得素書文字可識皆
說龜山王母理化眾仙秘要真訣也他仙習
此當得昇天世人授之跡參洞府其間有疑
義不可究者後到南嶽九嶷山湘真觀月餘

尋問紫芝蹤迹咸言毛如溪有一隱士莫知
姓名人或見者師道累入山尋之不見乃如
通修之言投書題石壁後嘗夢神人稱紫芝
教之以釋凝滯意乃醒然經歲餘復還問政
居二十餘年每焚修即以二蔡彭謝真形畫
像瞻禮仍自以管幅編異傳於道俗其後吳
太祖霸江淮間聞師道名跡其六道德乃勅
廣陵建玄元宮以居之每陞壇祈恩禱福水
旱無不應致感動天地慶雲呈祥乃降褒美
為逍遙大師問政先生師道道以資孝遠不
違親親之在堂九十有五丁憂之日匍匐奔
喪負土成墳絕漿過禮便謀遁迹冀遂初心
無何駟騎繼來詔命難拒太祖目待益重舉
國莫不傾依門人鄒得匡王處訥楊匡翼汪
用真程守朴曾景霄王可儒崔縉然杜崇真
鄧啓遐吳知古范可保劉日祥唐可久王栖
霞等皆為入室弟子傳上清法散於諸州府
襲真風而行教朝廷皆命以紫衣光其玄門
至秦吳荆齊燕梁閩蜀之士咸來逾紀勤苦
奉事師道常謂之曰我無道術何以遠來若

此弟子皆曰若張君居蜀天下之人悉往師之隨其所修各授以道要群弟子執奴僕之役久而不去者方得成仙今悉是枯骨子孫日逼朽腐思避短景希度長生願無却懇切也然師道以仁慈接衆言不阻違隨其性識指以道要若久行霧露餘潤漬衣近羅沈檀輕香襲體由是居廣陵三十餘年有弟子五百餘人而師道胎息已久煉丹有成常欲歸彼故山爲逼瘠思有違宿願遂幸歲在辛未秋月夢一人黑幘朱衣曰先生道成久矣天命迎之先生寤而爽然乃謂門人曰我爲仙官所召處世非久以其年十月二十三日異香滿室雲鶴立庭若真靈所集言則解化於都下紫極宮春秋六十有八朔玄墟於太平門外弟子欽之棺忽有聲視之若蟬蛻矣後數日人自豫章見之領一髮角童隨行道俗多識之咸問何爲遠遊曰離南嶽多年今暫往爾所在多泊舊遊官觀半年後有人自長沙來亦如豫章所見復言衡陽路見歸洞靈源去樵人言五十年後過此溪果足驗矣順

義丁亥三月大丞太師東海王恭按典禮奉還新安立玄壇給田莊改故居爲歸真院仍表薦追贈鴻臚卿賜冠劍法服等恩禮優渥

張龜

張龜晉州神山縣人一名蘊字藏真父居欽母楊氏感黑光而娠十有八月乃生於唐高宗永徽四年四月十六日身長七尺五寸風神秀逸志性脩閑眉目如畫語言若鍾工琴書善長嘯好黃老方士之說父死有欲以女妻之即棄去曰吾慕古洪崖仙人遂自號洪崖子游青蓋山遇褐衣老人曰此岩景成子汝師也如其言訪之有被髮卉服踞盤石者龜再拜景成子曰誰遣汝來龜具道老人語遂盡傳其方又曰姑射之南有古洞汝當居之若得五藥童役之則仙去遂往姑射有神人指洞所果得五童曰摘栗木葛樛役使左右隱洞中十五年仙書祕典九經百氏靡所不通有樵夫窺而嘆者龜酌杯水覆之石上視之錢也往輒獲之書生劉會怪之與俱來失龜所在龜常乘青驢從五童入靈夏訪崑崙

崑崙終南泰華往來青城王屋太行之間與葉羅二天師爲侶每究金丹華池之事易形煉化之術人莫能究其妙聖曆中武后召之不至嘗醉卧洞口酒欲醒髮髯見神人長丈餘形甚偉衣冠儼然指之曰子何不學大隱碑九曰何謂大隱神人曰九衢三市稠人翕然譁於前復問曰何謂小隱神人曰獨卧林泉曠然自適昔夷齊居首陽是曰小隱耽伏混世俗是曰大隱龜稽首從命而神人忽隱已而寓洛陽給事李嶠家凡十三年詞人逸客爭相求見明皇開元七年屢召辭不獲乃來見於湛露殿上問曰先生善長嘯如何得聞於是應聲而發則幽韻蕭蕭清人心耳上曰朕何如堯帝先生何似許由曰陛下道超堯帝臣則德謝許由昔堯帝召許由而不至今陛下召臣而臣來上嘉之拜龜太常卿累遷至司徒皆不受曰陛下何惜一山一水不令臣追迹巢由是歲八月聽還山龜嘗在禁中指白驢云此乃千歲雪精也因賜之詔本州葺其孝義里居名其鄉曰洪崖里曰徵君仍

賜牧驢草地於汾水郊王守禮嘗問曰淮南
雞犬皆仙去有之乎氲曰學道求仙如同睡
異夢父子夫婦莫相及也守禮曰神丹可餌
黃金可成乎氲曰富貴聲色伐性之斧點化
烹煉夫命之斤草木金石腐腸之藥不可學

也守禮曰我輩非仙材邪氲曰毋勞汝形毋
搖汝精恬淡寡慾可以久生可以盡年守禮
曰謹奉教氲雅好古物時天下名賢往往有
所贈開國公李太一遺書曰僕聞先生有好
古之癖欽仰之久近有張生者晉司馬華九
世孫不遠千里以孔子木履一枚見遺云傳
寶已二百年觀其先聖所踐之物非敢匿之
是用馳獻太子洗馬田遊岩贈尹喜龜王戎
如意杖侍御史郭翰贈王烈石髓孔子二儀
履楊炯贈孔子石硯楊雄鐵硯僧惟恭贈筇
竹杖楊齊哲贈嵇康鍛鋌陳平和階元亭贈
謝靈運鬚數莖僧智遠贈蔡邕焦尾琴葛洪
刮樂篋僧倫然贈迦葉陀頭鉢秦休莊贈河
上公註五千言草本劉守章贈四皓鹿角枕
司馬子微贈淮南王藥曰杵周子恭贈古帝

王圖一卷節度使張守珪贈海蝦蟆牙長一尺八寸魏肅贈陶潛鳴琴芙蓉冠劉長新贈王喬笙篴竟入山絕粒服氣隱姑射山不復出久之河東巡撫使李嗣真與晉牧郭正一往姑射尋之數日方過於松下戴角巾披氅

裘而卧乃曰朝客何用逼野人乎二子嘆曰
真高士巢由之輩也嘗註老子周易三禮穀
梁又著高士傳十卷神仙記二十卷河東記
三十卷大周昌言十卷皆未行世十六年洪
州大疫有狂道人跨驢從五童施藥市中病
者立愈州以上聞土意其氲驛召之果氲也
然三召卒不至乃栖息於洪崖先生之古壇
出入跨雪精常服烏方帽紅蕉衣黑犀帶短
鞞靴五童分執六角扇鐵如意筇竹杖長盈
壺常滿杯文榴酒榼自然榴杓一云常服櫬
榛中六角扇
垂雲笠方木莞二玄書葛木如意
純惠壺木杓杓五童出入隨之往來城市
酣笑自若人莫知其所言二十五年范陽人
得二大牙皆一尺八寸以獻上上遣使就問
氲答曰頃見崑崙之下有蝦蟇大者踰百尺
殆是邪天寶四載年九十三以四月八日黎

明大霧尸解榻上郡人見其從五童冉冉上騰而去是歲八月復於晉州與里人劇飲留衣履爲別至六日尸解騰去亦如之晉人藏其屍於北源祿山之亂以靈響助肅宗乾元中因申泰芝言豫章伏龍山有異氣詔立應聖宮塑肅宗像以先生配焉今紫清宮是也德宗時繼於晉州即其宅立廟又於洪崖山尸解處立廟祀之今皆爲棲真觀蓋有詩三章傳于世其一曰去歲無田種今春乏酒材從他花鳥笑佯醉卧樓臺其二三下調人無采高心又被嗔不知時俗意教我若爲人其三曰入市非求利過朝不爲名有時陪俗物相伴且營營今自豫章水西沿洄數里至隋唐西昌縣故此數百武間爲小石頭有石磯曰洪崖釣臺有石池曰洪崖硯池相傳爲蓋書堂處蓋蓋來豫章十八年舊跡可考僅如此太平廣記云唐憲宗時韓愈謫潮州行次商山有甥慕雲水得道久不知所之忽迎立馬前送至鄧州曰某師在此山玄扈倚帝峯爲東園公柔金玉作九華丹火候精微難

於暫捨請從此辭問其師曰洪崖先生也丹霞翁曰洪崖先生聞於古洪崖子生於唐其為二人明甚然洪崖子者玄宗亦嘗稱先生矣韓甥所遇果洪崖子耶抑古洪崖耶是未可知也世必有知之者

臣道一曰張氤混俗養真名動朝野觀其答明皇之問曰陛下道超堯帝臣則德謝許由謙之至也夫自五帝官天下三王家天下而帝王殊品明皇豈真道超堯帝張氤豈真德謝許由哉道德經曰江海所以能為百谷王者以其善下之故能為百谷王是以聖人欲上人必以言下之欲先人必以言後之張氤之謂也

傳仙宗

練師傅仙宗長安人父倫資陽令仙宗幼聰明而好道家學年十二隱資陽山未幾有神人告玉案山乃福地可往修行既至建玄齡觀以居之僅一紀一日又有介甲士數人告曰某主山神也自師居此身不遑安況此未為修真之所即州之西有平岡山可居仙宗

然其說乘青驪赴平岡山聞鬼神侍衛而至建星壇靜室創老君殿於其間唐明皇詔赴關利州栢栢江每年舟楫為水所害仙宗抵其江津人說其苦難仙宗乃以二石板篆符投水中翌日果有^{十二}二大魚曝於灘腹下有丹

字曰赤鯉赤鯉生居河水不避仙官宜得其死刺史具以聞詔立仙宗祠於其溪已而至都所對稱旨命賜優厚俾于上清宮設醮上躬詣之仙宗拜請東方青帝青童從官將神及諸位列宿等皆儼然來降上恐懼既罷問卿修何道而致此曰臣修道務以安人利物節食儉衣守之以恬淡行之以簡易澄之不清撓之不濁以此自勝故一切神靈應召而至又問金丹曰金液之丹未可便服須功滿行圓惠及民物然後服之即長生也上大悅久之乞還山詔修葺舊觀賜額為應真上親書之後亦遣使齋香燭就設醮席不絕唐肅宗乾元三年十月十四日忽聞空中云太上^九有勅乃索沐浴遂登榻而化邑人王念自成都還道中見仙宗乘青驪入簡州去而後亦

莫知其所之御史中丞宋渾撰碑

成道士

成道士者不知何許人晦名隱迹唐明皇開元末中使謁金天廟聞成真人之名遽候之有道士弊衣負布囊而來詢其氏曰姓成延於傳舍問所習不答以騎與之至成都密奏之明皇異其說召入館于蓬萊院問道術及所修皆不對未幾乞歸山上允乃挈布囊而去人見皆笑之而後因徹幙壁上有題曰蜀路西行燕師北至本擬白日昇天且看黑龍飲渭其字刮洗愈明上聞之亦莫知其意不數月果狩蜀

趙惠宗

道士趙惠宗者硤州宜都人隸籍久之得九天仙錄三洞秘法皆通曉後居郭道山唐明皇天寶末還硤忽於郡之東北積薪自焚僚庶悉往觀之惠宗怡然坐火中誦度人經斯須化為瑞雲仙鶴而去火既燼其下草猶綠得遺簡有詩二首其一曰生我於虛置我於無至精為神元氣為軀散陽為明合陰為符

形爲灰土神與僊居衆垢將畢萬事永除其
二曰吾駕時馬日月爲衛洞曜九霄上謁天
帝明明我衆及我門人僞道養形真道養神
懋哉懋哉餘無所陳

翟法言

翟法言字乾祐夔州雲安人也身長六尺少
喜老子說志清脩斤五辛不食居玉石鄉之
精舍唐玄宗天寶十四載乾祐年四十一矣
忽夢一童子曰二真人令我語汝翌日可至
溪上乾祐遽悟質明至溪上則是有偶坐磐
石者神宇超然乃二真人也乾祐趨謁恭甚
俄而雲霧晦冥真人乘之而去顧乾祐曰吾
近閱靈異經知有若名故持錄來至往雲昇
宮吾授若也乾祐即往真人乃授以寶笈靈
文三科一曰三將軍祕術二曰紫虛祕術三
曰太上正一盟威祕法并賜神圖一百二十
使正月朔旦取一餌之壽當如其數且戒曰
西有瀝池五龍居之若可召而役焉以利濟
群生乾祐拜受其言已乃更築靜居恪行三
科於是真人與日月星君夜數降其室邑人

取汲於江夏苦渴飲乾祐鑿井其廬傍召一
龍主之雖隆暑水亦甘冽乾祐以考召著名
每念雲安一邑江流之險有一十五處一日
作法召其灘神俾悉平之是夕應召而至者
一十四灘獨有一灘召不能至乾祐大怒必
欲召之既至乃一女人我冠大袖慨然進辭
曰天師稟天行化妾乃一水神何敢抗拒第
有未安不容不稟觀君之意不過欲便舟楫
而不知從事舟楫者日常倍利縱有少費不
足爲損沿江小民三四百家無田可耕無桑
可織全仰爲人挽負以資其生今若盡平灘
險在舟楫固甚便在彼小民其於衣食爲如
何太上之意必不如此深恐異時獲罪不免
負累更宜裁之乾祐嘆曰汝之所慮非吾所
及於是復命十四灘之神各復其險是夕風
雨哮吼雷霆震擊明日視之一十五灘驚波
怒濤宛然如故荆南節度使王玘者聞其名
親從受錄是夕代宗夢玘從三神人遊即遣
黃門謁者馬承靜問狀玘以乾祐對代宗因
曰朕有六甲殿七寶所成中有金箱玉簡煩

使法師啓之而鑰不可動乾祐有道者宜能
啓也詔玘趣延乾祐辨裝既至長安以酒饗
六甲殿門即洞開代宗悅賜乾祐號通靈大
師少焉辭歸代宗會其流餞之乾祐取悅置
玉几上他道士不知所所以乾祐曰吾法高者
爲先有能舉是悅者吾師也衆道士莫能舉
乾祐徐取置諸道士盡皆不能興代宗曰奈
何乾祐曰今起不難聊爲諸公少覲爾即叱
之遂起代宗大異之乾祐遂去三日至江陵
及歸所舍則母已死於虎乾祐召虎至地神
從之曰天師母九厄八難天符殺之爾乾祐
鞭虎數十釋之自是尤務拯人疾苦煉黃白
遇窮者施之文宗太和十年十二月朔告其
徒曰後五日吾將朝天至時而化其徒葬之
晡時聞雲中有鐘鐸之音雲五色爛然乾祐
在其上俯謂其徒曰勉旃毋忘吾道尋冉冉
而去發視其棺惟有衣履而已後十五年有
李文盛見乾祐於益都曰吾暫遊青城行返
雲昇矣益州新津縣繫龍江有繫龍樹方輿
記云仙人程石自峨嵋山來繫一龍於此恐

即乾祐也俟後博覽者幸訂其是非焉

歷世真仙體道通鑑卷之四十一

歷世真仙體道通鑑卷之四十二

鱗十

浮雲山聖壽萬年宮道士趙道一編修

舒虛寂

舒虛寂字得真開州人也世業農虛寂獨喜林泉好黃老街事建陽翟乾祐天師天師嘗沂江游仙都觀洞中得鎮光策靈書乃葛稚川於羅浮山神仙降授之文也乾祐謂虛寂曰吾先師宋冲元所祕得者名在仙格汝雖得之未知其要因指授之且曰二氣之前道為祖道以一氣生三才故天有九陽人有九元地有九陰人之稟生苟能歸其祖守其元則感通變化無所不適此書昔西靈金母授漢武帝武帝傳李少君而後太極左仙公得之葛稚川又得之於羅浮山先師於洞庭君山復得之於葛仙公因戒曰鎮元之道乘大魁履此極視瑤光蹕丹元倚靈田臨闔陽運元綱握天樞執持六氣指揮萬靈外可以召神內可以延生虛寂如所戒而修之無不神驗忽謂人曰蜀多名山為神仙所會吾將遊焉既至則常持尺數寸貯紙囊中或問之曰

此可治百病有請者以津液調與之疾無不愈又嘗患口瘡謂人曰視吾口中乃張之如箕五藏悉露視之者無不驚訝後入新繁銅馬觀久之常與人言昔黃帝與竇先生天真皇人會衆真於此號其地為三會臺有銅馬隱於林間今龍橋乃其舊迹後之人於銅馬隱處築臺以誌之秋夕澄霽銅馬忽騰躍嘶鳴見之者得道予往來此三十年幸一見之居歲餘忽謂鄰母曰旦夕將他適欲以後事相託因指視其地囑曰瘞我於此當深三尺餘吾必有厚報是夕卒鄰母如其言而瘞之果得金一鎰以聞官驗所瘞但杖屨而已乃知神仙解化報答鄰母遂復予之母有子自臨叩歸見虛寂以二甘瓜於新津上命坐分食其一又一使遺其母謝曰積年所擾一旦遽別再會無期寧免憶快其子還舍始知化去進士馮道為傳

向道榮

道士向道榮不知何許人為入朴略事虛寂授鎮元策靈書而名聞於蜀嘗欲以金三十

兩鑄白馬老君三分已備其二嘗以未成功未解意一日焚誦忽有物墮地開視之乃十兩金也遂畢其願與華陽丞呂翼友善置酒數斗令翼飲達曉不醉自言去世月日謂平生之故當送我於東郊巨松之下以薪火燎棺爲惠翼異其記託時語其友章昇常榮數十輩共誌其日以伺之前一夕道榮徧詣知友家飲酒言笑至暮宿於逆旅翼使人密視之見寢處如常黎明則已化而顏色不變翼與昇祭具棺櫬於砂坎之西巨松下致薪舉火已發棺中烈焰不可近見道榮出煙焰上冉冉凌虛而去矣

任可居

道士任可居不知何許人年四十木訥願慙負囊及事向道榮道榮憐其志以鎮元策靈書訣付之戒曰十八年後方可以示人災福之驗勿窺宗利母妄傳授此道得之者神仙泄之者天枉昔宋冲元傳翟乾祐乾祐傳舒虛寂虛寂傳于子今傳汝五世矣必付人則當察其志行而後授之母自貽咎可居遂秘

之常以他術自給人亦莫能知凡二十年漸言人休咎或爲禳醮每占先令人齋戒向壁列燈爲斗魁之像坐其前禍福吉凶歷歷如見唐昭宗大順中忽謂華陽令高魯思曰某旬日間當去世公爲我戒門弟子母爲俗禮蓋道家之所忌及期無疾而終魯思如其言而戒之其鎮元策靈書不復傳焉

程太虛

程太虛者果州西充人幼好道節操不類於常人年十五登所居之東山飄然有凌虛意尋有五色雲霞擁其身俄而天樂羽蓋合沓而至太虛默念未辭親友忽雷震一聲竟無所睹退而刻志修誦愈勤年十八恃怙俱失棄家產居南岷山絕粒坐忘動逾歲月有二虎侍左右若備呼使因名爲善言善行乃撫皆授以三歸之戒遂跪伏而聽自是呼名則至忽一夕大風拔木雷電而雨砌下坎陷中水如沸湧因以杖攪之得碧玉印兩鈕每歲農人乞符籙祈年以印印之則授者愈豐草凡有得以惠施之外皆以構祠設像無所私

已有女道士謝自然授法籙印訖則密收之一日失所在唐德宗貞元十年自然白日昇天憲宗元和四年太虛解化五年二月還神子玄官貌不變而輕若空衣所化之地忽生皂筴一本柯葉下垂俗謂之披頭皂筴宣宗大中十年有命使自峽入蜀道由南岷訪太虛之祠謂其門人曰去年冬過商山宿逆旅出門見嶺上花木稍繁忽忽躋石躡險幾五六十步至其下異花夾道約一里餘有居第如公館青童引入見一道士自云姓程名太虛祖居西充今憇此已而留連極勤厚囑曰明年君自蜀入岷無忘訪我今熱視其像果與見者無異

俞靈瓚

俞靈瓚者河間人居衡山九真觀學道十餘年南岳赤君異之授迴風之道及守明梁之法行之二十年能坐見天上事如視諸掌然自晦不爲異以驚俗而人亦不知其有靈也與人談說多及四海九州遊歷事跡其貌常若三十許人唐憲宗元和中郴州官吏見靈

瓚說其祖父名氏狀貌嗜性職掌年壽皆中
衆驚異而禮之但曰我偶然爾非所知也遂
入閉關不出雖懇請亦不復有言方知其是
異人常誦大洞經或絕粒或飲酒有潘老仙
遊岳與瓚交甚密養一元龜廣四五尺力
可敵十人見者畏之瓚因乘入九疑山去
採樵者時見之

趙知微

道士趙知微不知何許人結廬於九華山鳳
凰嶺日誦道書草木食數十年由此得道
人多從之皇甫元真為弟子凡十五年唐懿
宗咸通中知微煉丹遣元真市藥於京師寓
玉清觀之上清院時皇甫枚日相訪詢及知
微事元真曰門人自事師以來未嘗有惰容
嘗云分杯結霧及化竹釣鰻之術吾皆得之
但小戲術爾去歲中秋霖雨門人皆歎佳夕
不得賞月吾師忽命侍童備酒徧召諸生謂
曰能昇天柱峯哉月否諸生雖應諾而切訝
之少頃吾師曳杖而出諸生從行既闢扉天
已廓清皓月如晝捫蘿援絛立峯之巔吾師

危坐諸生列侍舉酒詠郭景純遊仙詩數篇
諸生有清嘯者步虛者鼓琴者以至月落方
歸既就榻而風雨如初元真善棋無敵得點
化術久之歸九華山不復出矣

劉道平

劉仙師名道平居玉笥崇仙觀即今乾元觀
也漢武帝時東方朔已奏云後有當天曹選
舉者唯彭城劉道平爾以此知劉仙非偶然
者仙師幼時趣造出處已異於常人每有疫
癘之家則以竹為角以弱書符奮臂時叱頃
刻皆愈以至旱暵蟲蝗叩之輒應于時黃巢
竊發銳然南來所至皆破邑人懼其殘賊故
布寨峯固然而患形勢兵刃之弱奔赴崇仙
告急於仙師仙師愍之為出峯岡之陰遣神
兵以禦不揮一戈不發一矢而大敗巢賊此
神仙之力明驗也爾後靈感尤多已而輕舉
今岡頭上昇處有黃石世傳為飛仙石唯存
雙履痕作白色以表異云

聶紹元

練師聶紹元字伯祖母程氏有娠畏葦茹嘗

夢天人指其腹曰此子當證道果及生而穎
達自不與童稚群既長雅好書史尤精老莊
文列一日詣金陵師道士高朗昭受戒錄是
夕夢入一城官府甚嚴肅中有朱衣者凭几
謂紹元曰此司祿之所也可自閱籍籍云聶

紹元十八入道二十授上清畢法二十六又
往南岳遂掩卷而寤久之自金陵還問政山
築室以居不偶世俗自號無名子作無名子
草堂記世多以練師稱之是時南唐後主酷
好事佛待縉纔加禮怒冠褐輩苟其榮利往
往落鬚髮以趨之練師上疏切諫厥後以母
老侍溫清極勤悴一日晨起沐浴曰我伯祖
有云吾家世世宜修煉可各率勵勿忘太上
教俄有四鶴集于屋又神光從空而下赫赫
四照城中望見者疑為火所焚即之則聞然
無他但紹元已化矣四鶴與神光冉冉而去
先一夕告其母曰胡將軍至可備二七人酒
果已而影響間若有就坐者及旦莊隸來云
練師與三道士衣緋綠乘馬從者數十輩冠
帶聯聯南去練師迴首曰五往南岳矣常撰

宗性論修真秘訣學士徐鉉徐鉉俱稱數言
曰吾爲施肩吾無以加焉

徐左卿

徐左卿者不知何許人唐天寶十三年重陽
日明皇獵于沙苑雲間有孤鶴徊翔上親射
之其鶴帶箭而墜將及地丈許欻然矯翼首
于西南衆極目久之不見益州城西十五里
有道觀其流非修習者莫得居之東廊第一
院尤爲幽寂左卿常自稱青城山道士風格
清古一歲凡三四至觀宿於德虛正堂以俟
其來至則三五日或旬朔言歸青城甚爲人
所仰一日忽自外至神采不怡攜一箭謂人
曰吾山中偶爲此物所加已無恙矣然此箭
非人所有越明年箭主到此當付之遂留於
後壁復題其時云十三載九月九日也明皇
狩蜀至觀因幸道院見其箭命取閱之即御
箭爾上驚異詢之道士以實對即前歲沙苑
中所射之鶴乃徐左卿也復覽其題則又知
當日自沙苑一箭而至此後蜀人亦無復有
遇左卿者武興之東勤三十里溪山可愛而

南北之峯峙然聳秀名之曰飛仙嶺者舊相
傳云昔左卿帶流矢飛泊之所今嶺之下有
飛仙觀遺址存焉宋仁宗皇祐中北作訪使
郭諮題云翠嶺標仙迹雲間碧樹開每聞岩
鶴過疑是羽衣來絕嶠時飛石寒潭忽起雷
必應苑中箭猶寄在丹臺

李遐周

李遐周者不知何許人有道術隱顯不能測
唐明皇開元中嘗召入禁掖久之求出住玄
都觀宰相李林甫往謁之遐周謂曰公在則
家大歿則家亡林甫拜泣求救遐周笑而不
答則曰戲之爾天寶末祿山豪橫跋扈遠近
憂之而上意未悟一旦遐周遁去不知所之
但於其居壁上題詩數篇識祿山僭竊及幸
蜀之事人莫能曉而後皆有所驗其末云燕
市人皆去函關馬不歸若逢山下鬼環上繫
羅衣燕市人皆去者祿山假幽薊之衆而起
也函關馬不歸者哥舒翰潼關之敗匹馬不
還也若逢山下鬼者即鬼字馬驛名也環上
繫羅衣者貴妃小字玉環馬鬼時高力士以

羅巾縊之其所先見者皆此類

謝通修

謝通修者本宜春郡人稟性和雅不好妝飾
聞善則喜見惡如探湯奉母至孝常懷悅色
唐代宗太曆初一夕忽夢一人冠褐而至謂
通修曰子骨非凡何不學道既覺以其語白
母氏母氏然其言許訪道乃詣衡岳求度爲
道士久之歸寧而值荒歉凡五載親屬離散
知識流亡忽一夕又夢嚮之冠褐者謂通修
曰廬陵分野有玉笥山是洞天福地中有清
虛館乃司命之別府即真人遊宴之境子宜
往彼修行翌日母復諾之因肩輿入玉笥山
不構庵室而居于岩穴林木之下甘旨之奉
即榛栗桃李芝朮而已如此僅半紀母老乃
棄世塋葬封埴訖草屨筇杖歷覽群峯尋訪
靈迹不出山洞惟草木食或有人見者必
解衣衣之凡三十餘年林宿岩居謝絕人世
一日深入溪源見一碑石長三尺許苔封雨
漬披剝而視之字不磨滅乃蕭侍郎清虛館
之文也復行百餘步遇一舊址碎瓦殘磚雜

然在地林泉清潔花卉芳馨乃於此結庵卜
為登真之所未幾里人知之相率為觀觀宇
榜曰清居或云清虛由此探玄扶輿開傳道
法而四方門人接迹而至者莫知其數通修
入山洞或五日或旬日而歸所說者皆異事

穆宗長慶初因入郁木坑忽見一宅重簷廣
厦粉壁修廊異木靈禽非人世之有不覺精
神頓爽瞻望徘徊斯須有一青衣童子出曰
子乃謝通修乎曰然曰蕭梅二真待子久矣
乃引入見一人紫綬冠劍坐堂之左一人碧

綬冠簡坐堂之右通修輒再拜啓曰某塵世
螻蟻貪慕生道辛勤三紀願謁仙府豈期今
日忽逢靈境面朝仙真朽骨重生獲期玄會
蕭曰子雖心慕仙道迹託山林而葦辛之氣
未消焉能住此通修小時曾食小葦通修悲咽伏地堅

求不已二真憫其誠乃賜嘉禾五穗松葉半
斤令頓服之通修跪受而食其半餘不能盡
服二真曰子宜還所居當俟後命既歸自宣
宗大中八年患血痢至明年春方愈此洗葦
穢之驗也其年四月七日忽謂門人曰吾昨

夜夢洞府有神仙之命吾將往矣翌日遂解
化門人以棺殮之是夕夢其師曰吾有寶劍
何不隨吾還明以劍入于棺不見師之蛻質
乃葬空棺于觀之東北隅時年九十八歲至
懿宗咸通初有問政山道士聶師道游郁木
坑遇之乃知通修果為真人矣

韓湘

韓湘字清夫韓文公愈之猶子也落魄不羈
文公勉之學湘曰湘之所學非公知之公令
作詩以觀其志詩曰青山雲水窟此地是吾

家後夜流瓊液凌晨咀絳霞琴彈碧玉調煙
煉白砂寶鼎存金虎元田養白鵝一瓢藏
世界三尺斬妖邪解造逡巡酒能開頃刻花
有人能學我同共看仙葩公覽而戲之曰子
能奪造化耶湘曰此甚易事公為開樽湘娶

土以盆覆之良久花開乃碧花二朵似牡丹
差太顏色豔麗於花間攤出金字一聯云雲
橫秦嶺家何在雪擁藍關馬不前公未曉其
意湘曰事久可驗遂告去未幾公以佛骨事
謫官潮州一日途中遇雪俄有一人冒雪而

來乃湘也湘曰憶花上之句乎正今日事也
公詢其地即藍關也嗟數久之曰吾為汝足
此詩詩曰一封朝奏九重天夕貶潮陽路八
千本為聖明除弊事豈將衰朽惜殘年雲橫
秦嶺家何在雪擁藍關馬不前知汝遠來應

有意好收吾骨瘴江邊遂與湘宿藍關傳舍
方信此道之不誣及湘辭去公留之不可乃
作別湘詩云才為世用古來多如子雄文世
孰過好待功名成就日却收身去卧煙蘿湘
別公詩云舉世都為名利醉伊予獨向道中

醒他時定是飛昇去衝破秋空一點青湘謂
公曰公往瘴毒之鄉難於保育乃出藥一瓢
曰服一粒可以禦瘴煙之毒公謂湘曰吾實
慮不脫死魂遊海外一思至此不覺垂淚吾
不敢復希富貴但得生入鬼門關足矣湘曰

公非久即西不惟全家無恙公當復用於朝
公曰此後復有相見之期乎湘曰前約未可
知也後皆如所說焉

軒轅集

羅浮山先生軒轅集者不知何許人居羅浮

山人傳數百歲顏色不老髮長垂地坐暗室則目有光長數丈每採藥於岩谷則毒龍猛獸隨之若有所衛護居常民家請齋者雖百餘處無不分身而至與人飲酒則神出一壺才容一二升賓客滿座傾之彌日不竭人命飲百升不醉夜則垂髮於盆中其酒漚漚而出麴蘖之香略無減耗或飛朱篆則可致千里遇病者以布巾拂之即應手而愈唐宣宗召入問長生可致手答曰絕聲色薄滋味哀樂一致德施無偏自然與天地合德日月齊明雖堯舜禹湯之道可致況長生久視乎又問先生與張果孰愈曰臣不知他但年少於果耳及退又以金盆覆白鵲試之時集方休于外謂中人曰皇帝安能更令老夫射覆乎中人不諭其意上復召令速至集纔及玉陛謂上曰盆下白鵲宜放之上笑曰先生早知矣命坐御榻前令宮人侍茶湯集貌古而布素有笑之者則鬚髮朱唇年方二八須臾變為老嫗雞皮鮐背鬚髮皓然皆泣涕不已上令謝之却復故京師素無豆蔻荔枝上因

語及俄頃二花皆至各數百朵枝葉方茂如新剪者又嘗相子集曰臣山下有者味踰於此上曰朕無緣得矣集遂取御座前碧玉甌以寶盤覆之俄頃徹盤相子在其下上食之歎其甘美無比又問曰朕得幾年天子即取筆書四十字但十字一起上笑曰朕安敢望四十年乎及晏駕乃十四年也久之辭還山命中使送之每見其於一布囊探錢以施貧者比至江陵數十萬取益不竭未及山忽亡其所在中使惶恐不日南海奏先生已歸羅浮山矣

熊德融

熊尊師名德融字大光荊州人也幼稟淡泊不餌腥羶銳然有出塵志年十三辭家訪道千里苦志勞形人咸異之後至九嶷山忽遇一人於道左綠髮朱顏眸子瑩然德融疑其非常進而問之則唯唯無語因相與攜手入山漸造幽深至一石室引德融坐謂曰夫道不欲雜雜則擾擾則憂憂則不救故聖人先存諸己而後存諸人又曰綿綿若存用之不

勤子之骨法終成仙道今猶未也因腰間取一葫蘆傾酒飲之云他日相會勉旃旃遂入德融伺候數日竟不復出因悵然而返自失者累月唐宣宗太中初遂遊廬山居于簡寂觀常宴坐一室終日寂然人莫測其所為至懿宗咸通二年解化葬訖後數日有道士南歸道逢德融幅巾藜杖獨步因問何往曰吾之九疑尋師矣道士既歸語其事發棺視之唯有一簪而已先是從游者如李相國崔相國植于刺史德誨諸公皆奉其遺像其門人焉

劉德本

劉德本字孝叔鄂州人也好古多能嘗蒙書六經子史家豪貴不求進仕乃往來大江商販唐僖宗乾符二年黃巢陷鄂州沿江警擾德本自度不能還鄉遂攜家捨舟陸行時歲大饑餓殍甚多德本以所販米數萬石盡散饑民活者萬餘家死者葬之遠近推仰已而避地五老峯下廬山之陽也一日有道士擊頭鹿來訪之不通姓字德本與之詩酒甚

歡久之因把臂入深澗忽見石頭中有老人倚杖而立德本再拜老人不答徐云何因到此德本具述行止老人似有語云可到後院遂從行約四五里再見一門丹碧煥耀上有金篆題曰紫元景耀之門見樓臺層列宮室

相連守衛之士呵禁甚嚴不許德本前進德本但震恐不敢仰視欲退之間老人曰此詠真洞天也九天使者真王採訪人間以汝善行故許到此汝當籍名九天仙錄度世不死矣德本再拜曰九天使者真王見居何處老人曰汝為人方歷四世宿業猶多骨相未清未可問也汝宜嚴持戒行以澄瑩心神濟物利生真王洞鑒隱微他日必垂拔度德本再拜謝老人曾未踰閭恍然不見已還舊止德本問道者曰老仙何人曰即詠真洞之靈官十一九天使者真王之侍衛也爾既一造神府躬受嚴訓吾與爾請從此別矣德本自後徧遊五嶽名山福地忽一日綠雲瑞鶴環繞所止德本遂翺飛而去當時呼爲劉仙翁云

厲歸真

道士厲歸真者不知何許人唐末遊洪州信果觀見三官殿功德塑像有明皇詔以夾紵製作甚妙然主者不甚嚴護常多雀鴿糞穢點汚歸真遂於壁畫一鷗自此雀鴿無復栖止後有人見歸真於羅浮山登真矣

歷世真仙體道通鑑卷之四十二

歷世真仙體道通鑑卷之四十三 鱗十一

浮雲山聖壽萬年宮道士趙道一編修

朱桃椎

益之靈泉分嶺山朱祭酒名桃椎得道證果不樂飛昇混跡樵牧往來城市山林間以救世度人爲念異事接乎耳目者未易殫紀一云得道於蜀中玉珍山有養生銘茅茨賦水調歌賦庭秋等作遺世大較自述隱遁之樂與內丹訣云蜀檣杭云道士朱桃椎一日謁王處回於堦前以劒撥土取花子三粒種之須更成花三朵謂處回曰此仙人旌節花公富貴之兆也處回終歷蜀三鎮以太子太傅致仕果如其言蜀人多敬事之後有人令畫工許其姓者畫其像許素不知桃椎爲何人久之不能著筆忽一日有一叟弊衣憔悴引二童子至曰我即朱真人也於是解童子所負囊中出黃道服鹿皮冠白玉簪頂冠易衣巍坐以手摩面則童顏矣引其鬚應手而黑乃一美丈夫也丰神飄逸仙風俊邁二童子一甚奇怪一甚秀美頃刻變相畫者驚異曰

不知神仙臨降道人曰君傳吾神置肆中有求售者止取千錢後有識者云此唐神仙傳朱桃椎也後求畫者輻湊許增價至二千乃夢道人曰汝福有限安得過取乃掌其左頰既寤其頭遂偏許復於所畫像前拜謝悔罪不敢增價後蜀中以許偏頭所畫朱真人爲名畫云真人受封爲妙通感應真人

感庭秋

唐末有狂道士不知何許人又晦其名氏遊成都忽詣紫極宮謁杜光庭先生求寓泊之所先生諾之而不與之見道士日貨藥于市所得錢隨多少沽酒飲之惟唱感庭秋之詞其意亦感蜀之將亡如庭秋之哀殺然人未之曉但呼爲感庭秋道士凡半年亦不知其異一夕大醉歸夜將闌尚聞唱聲愈高有訝之者隔戶窺之見燈燭綠綉筵具器皿羅列甚盛狂道士左右二青童立侍時酌酒而唱窺者具以白先生乃歎其戶曰光庭量識膚淺不意上仙降鑒深爲罪戾然不揆愚昧而匍匐門下真一拜光靈以消塵障道士曰何

辱勤拳之若是當出奉見乃令二童收筵具器皿及陳設致於前疊之則隨手而小如符子狀置冠中又將二童按之如木偶可寸許入置冠中及啓戶先生忻然而入但空室而已先生乃下拜問道道士曰子之行業未至更宜修煉真心今遺子三隻酒杯玉燭二條此杯者南海蟠桃之核也大小如盞以物擊之清聲如金其上紋彩攢如百花霞光透明內外瑩白收此爲信更候三年方得際會言訖化一道火光乘空而去矣

邊洞元

邊洞元者洛陽人幼慕老莊學因隸籍爲道士凡遊四方貨藥以自給一日登嵩山夢嶺遇一書生以木簡負數冊書又一大壺同憩於古松之下洞元問曰君何往曰往嵩陽肆業若有相識願尊師示一書爲先容洞元諾之復曰壺中酒命師飲之可乎曰卑性素好飲蒙見召幸矣於是連飲十數杯洞元乃醉書生曰小子有術可與師醒酒然慎勿懼之遂取水簡摩拭俄而化爲劍復曰欲借師之

肝膾之可乎洞元懼而醒乃俯伏乞命書生曰觀子有仙風道骨然未有所遇遂揮劍騰空而去擲下一卷書謂洞元曰收之請相訪五雲溪既展看即數幅紙五彩畫研茶槌二十枚殊不曉其意紙尾有絕句詩云邂逅相逢夢嶺邊對傾浮蟻共談玄擬將劍法親傳授却爲迷人未有緣洞元感嘆不遇皇皇若有所亡遺所至處見人問曰君莫知五雲去處否人以爲風狂多不答久之歸洛陽乘醉入水不復出而後有客自衡湘來洞元於南嶽觀中託附書至洛陽其法屬交友親舊辭其墨迹乃洞元親染時好事者皆曰水解

李真

道士李真者不知何許人隱華山岐州之西王祐者家鉅萬計常設館以待四方士嘉穀旨酒無不備具真攜琴負藥壺謁祐遂迎于館真問曰君之富有侯伯之樂然如不賢何祐笑而唯唯真復曰君虛館置饌以俟賢者耶以待饑者耶苟以待饑者則方今天下幸無闕食者苟以俟賢者則未聞君得賢以是

知君不賢爾毋訝我言也正恐君徒尚虛名而無待賢之實君若能悟則吾言不惟無益矣祐輒動容再拜又曰我聞人之樂皆有以師事縱橫者必有游說之志讀韜略者必有戰敵之心吾攜一張琴一壺藥豈無旨哉攜琴者我知琴有古風欲使人還淳朴省澆浮也負藥壺者我知人之多病欲使人之少疾苦而常安平也且我之琴非正自化也化人也我之藥非正自保也保人也君雖能以有餘濟於人固與不義而誅剝以富者則異矣然此乃古之豪貴待士則未也要在賢不肖有別則君之身可保無累矣祐復再拜真乃命酒自酌遲晚遽醉而去王潛伺之見真化一大鹿西走不知所之

鄭遨

鄭遨字雲叟滑州白馬人避唐明宗祖諱故世行其字遨少學敏於文詞唐末舉進士不第天下將亂有拂衣遠去之意欲攜妻子與俱隱其妻非而不行遨乃入少室山為道士其妻數以書勸還家遨未嘗一覽輒投之於

火其絕累如此妻子繼謝每聞訃一哭而止有二青童一鶴一琴從之遨與梁室權臣李振友善振欲祿之拒而不諾既而振得罪南遷遨徒步千里往省之由是聞者益高其行遨聞華山有五粒松脂淪於地千年化為藥能去三尸因徙居華山之陰求之與道士李

道盛羅隱之為煙蘿友世自以為三高士遨則種田隱之貨藥以自給道盛有釣魚術釣而不餌又能化石為金遨嘗驗之信而不求俱好酒能詩善奕棋長嘯有大瓢云可辟寒暑置酒於其中經時味不壞日攜就花木水石間一酌一詠嘗因酒酣聯句鄭曰一壺天上有名物兩箇世間無事人羅曰醉却隱之雲叟外不知何處是天真後晉高祖即位遣使詔為諫議大夫雲叟稱疾不起以表謝上益嘉之賜號逍遙先生以諫議大夫致仕給月俸嘗為酒詠詩千三百言海內好名者書于縑緡以贈賂復有越千里之外使畫工潛寫其容於屏障者其為天下所重如此天福末年七十有四以壽終所著詩修史薛居正

錄而為序目曰擬峯集行世

李守微

道士李守微者不知何許人常遊蜀善養氣不食行疾如風好飲酒談論多滑稽不拘小節人常輕侮之忽謂人曰予欲遊五嶽諸山今往矣或問求利術則曰浮生瞬息間當尋真訪道脫酒塵網至若服氣煉丹茹芝絕粒皆有益也何區區於利術哉遂遁去或者憾之聞于偽蜀主俾求之卒不得久之有人見於梁宋間或在吳楚顏狀殊不改謂人曰我適自東海來又欲南岳去後不復見與祠部韓嶼友善嶼贈詩云一定童顏老歲華貧寒遊歷貴人家煉成正氣功應大養得元神道不差烏曳鶴毛乾髭髯節攜杖瘦似槎牙如何驚隱不歸去落盡蟠桃幾處花

程曉

昌利化飛鶴山彭曉本姓程西蜀永康人少好修煉自號真一子與擊竹子何五雲善孟蜀時明經登第累遷金堂令遇異人得丹訣注陰符經參同契金鑰匙真一訣篆符以施

病者號鐵扇符能長嘯為鸞鳳聲飛鳥聞而皆至蜀王孟昶屢召問以長生久視曉曰以仁義治國名如堯舜萬古不死長生之道也累遷祠部員外郎蜀州判官權軍州事廣政十七年十二月卒十日顏狀如生後有人見於青城山立松柏之上飛去出蜀檇杭

譚紫霄

金門羽客姓譚氏名紫霄一云子雷其先北海人也高祖在唐為達士紫霄生於金陵骨法魁梧神識秀麗龜形鶴步圓目方喙日角有吉字人關有井文舉以其殊相異之六經百氏祕典靈書多所該通南之玉笥山為道士後遇異人授以魁罡斗極觀燈飛符之術行之靈驗自是名傾江湖依之如流遂入閩中閩主王審知禮加勤厚一命洞玄天師或玄師再命左街道門威儀貞一先生降札曰慈能育物鑒可通神未歸十洞三天且佐宵衣旰食閩亡歸金陵南唐烈祖聞之遣使勞問旁午於道召見應對鋒辯上悅服乃授左街道門威儀及錫命服加真曜先生曜或觀降札

曰養德林中栖神象外遺華世網絕利道腴保大中又賜金門羽客紫霄素愛廬山勝槩於是卜白雲峯之栖隱洞即梁昭明太子書堂今栖隱觀是也又於星渚之城南門創別館以備出入今壽聖觀是也後主久欽其高風復召至金陵未幾還山宋太祖開寶六年夏四月一日沐浴上堂端坐而逝春秋一百五十時洞側人見其有雲氣如龍冲昇而去及葬又有彩雲白鶴盤繞其上後主遣使贈贈彌渥初紫霄得術精妙能離星象事果殺禹步指訣禁詛鬼魅為人燒奏禳祈災祥頗知壽夭人或召之則澣沐至暮獨登一閣焚爐刺關奏法事然後焚燈為驗遲明盡能言人算數長短靡不應者武昌軍節度使何敬殊寵婢獲怒置井中死人無知者建隆初何遇疾召紫霄紫霄中夜被髮然燈於靜室見女厲自訴為祟之由紫霄具言之何曰信然乃丹書符送之其疾即愈又有奇術一隣僧於溪澣創亭子且為頑石所阻致工百倍不能平之紫霄適見曰斯固易爾以指搗訣含

水嘆之命鎚其石如粉紫霄自彼累朝寵過其禮皆比蜀杜光庭然多辭而不受凡所獲饋醮祭之資皆以延賢達賑貧寒及待四方賓客室無囊箱焉紫霄居洞時道流聞風而至者百餘人每為其徒講莊列曰莊列吾教也熟其書本是悟明真性要見本來無物其說正與釋氏合若能以釋氏之書參而觀之則莊列之意較然易明吾幼時於金剛圓覺諸經無所不讀以是吾於本來真性無不了悟今時人自謂道家便與釋氏互相矛盾不知真心求道者不如是也況但拾其緒餘土苴有迹為之事以是為道非惟不悟真性亦且背老莊之本意萬萬矣以故紫霄室中道釋儒書皆有之南唐列傳載譚紫霄泉州人幼為道士初有陳守元者亦道士嘗鋤地得木札數十貯銅盎中皆張道陵符篆朱墨如新藏去而不能用以授紫霄紫霄盡能通之遂自言得道陵天心正法覈鬼魅治產病多効閩王孟昶尊重之號金門羽客正一先生閩亡避居廬山栖隱洞學者百餘人後主聞

其名召見賜官皆辭不受俄而疾卒年百餘歲今言天心正法者皆祖於紫霄

黃損

連州有僕射黃損者五代時人僕射蓋事南漢末老退歸一日忽遁去莫知其存亡子孫畫像事之凡三十二年復歸坐階上呼家人其子適不在孫出見之索筆書壁上云一別人間歲月多歸來人事已消磨惟有門前鑑池水春風不改舊時波投筆竟去不可留子歸問其狀貌孫云甚似影堂老人至今連人相傳如此後裔頗有仕進者

王老

王老者莫知何代人唐玄宗天寶中有士人崔姓者尉於巴蜀纔至成都而卒時連帥章仇兼瓊哀其妻少而無所投止因為於青城山中置一別墅又以其色美有娉約之意計無所出因謂其夫人曰貴為諸侯妻何不盛陳宴席以邀女客五百里內盡可迎至夫人甚悅兼瓊因命衙官徧報五百里內女郎尅日會成都意欲因會便留亡尉妻也不謂已

為盧舅納之訖盧舅密知兼瓊意令尉妻辭疾不行兼瓊大怒促左右百騎收捕盧舅時方食兵騎繞宅已合盧談笑自若殊不介懷食訖謂尉妻曰兼瓊之意可知矣夫人不可不行少頃即當送素色衣來便可服之而往言訖乘驛出門兵騎前攬不得徐徐而去追之不能及俄使一小童捧箱內有故青裙白衫子綠帔子緋羅縠絹皆世人所未見者尉妻服之至成都諸女即皆先期而至兼瓊覘於帷下及尉妻入光彩繞身美色傍射不可正視坐者皆懾氣不覺起拜會訖歸三日而卒兼瓊大駭具狀奏聞玄宗問張果果云知之不敢言請問青城王老玄宗即詔兼瓊來訪王老進之兼瓊搜索青城山前後並無此人惟草市藥肆云常有二人日來賣山藥稱王老所使二人至兼瓊即令衙官隨之入山數里至草堂老人皓然隱足而坐衙官即入宣詔致兼瓊之意王老曰此必多言小仙張果也因與兼瓊赴到京師之期先令發表不肯乘傳兼瓊從之使纔到銀臺王老亦到玄

宗即召問之時張果侍在玄宗之側見王老惶恐再拜王老叱果曰小子何不若是又遣速取吾來果言小仙不敢專俟仙伯言耳王老即復曰盧二舅即太元夫人庫子因言下遊以亡尉妻微有仙骨故納為媵無何盜大元夫人衣服與著已受責至冥亡尉妻以衣太元夫人衣服墮無間獄矣奏訖苦不願從事果命放還後不知所在

採藥民

採藥民者唐高宗顯慶中有蜀郡青城民不得姓名採藥嘗於青城山下遇一豬藥斲之深數丈其根漸大如甕器民斲之不已漸深五六丈而地陷不止乃至十丈餘民因而墮其中無由而出仰視穴口大如星焉分必死矣忽傍見一穴既入稍大漸漸匍匐可數十步前視如有明狀尋之而行一里餘此穴漸高纔容行立可二里許乃出一洞口有水闊數十步岸上見有數十人家村落桑柘花柳草木如二三月男女衣服不似今人耕夫釣童往往相遇一人驚問得來之由遂告所以

乃將小艇子渡之民告之以不食已經三日矣遂食以胡麻飯栢子湯諸道止留數日民覺身漸輕問主人云此是何所兼求還蜀之路主人相與笑曰汝世人不知此境汝得到此當是合有仙分可且留此吾當引汝謁玉皇又其中相呼云明日上巳也可往朝謁遂將民往諸人或乘雲氣或駕龍鶴民亦在雲中徒步須臾至一城金玉爲飾其中宮闕皆是金寶諸人皆以次入謁獨留民於宮門外門側有一大牛赤色形狀甚異閉目吐涎沫主人令民禮拜牛求仙道如牛吐寶物即取服之民如言拜乞少頃牛吐一赤珠大圓徑寸民方能起身忽有赤衣童子捧之而去民又求得青珠又爲青衣童子收領之又有黃者白者皆有童子奪之民遂急以手近于口須臾得黑珠還自吞之黑衣童子至無所見珠止民一人遂引謁玉皇玉皇居殿如王者之像侍者七人分布列左右玉女數百侍衛殿庭奇異花果馨香非世所有玉皇遂問民以實對民白玉皇求歸玉皇賜以黃金一錠

又謂有藥在金錠中可取餌之忽見一群鴻鵠天際飛翔衆謂民曰汝見此否但從之而去衆捧民舉之民亦騰身而上便至鴻鵠群亦不相驚擾同飛空迴顧猶見岸上人拱手相送可百里來許民乃至一城人物甚衆問其地曰臨海縣也去蜀已甚遠矣經歲乃至蜀時玄宗開元末歸其家無人知者有一人年九十餘云吾祖父往年因採藥不知所之至今九十年乃民之孫也相持而泣云姑翁皆已亡矣時所生女已適人身死其孫已年五十餘矣又尋故居皆爲瓦礫荒榛惟故碓尚在民乃毀金求藥而吞之忽失藥所在遂舉碓石得一玉合有金丹在焉即吞之而心中明了却記去路此民爲仙洞中得道之由庸俗都不能詳問其事時羅天師在蜀見民說其出處乃云是第五洞寶仙九室之天玉皇即天皇也大牛乃驪龍也所吐珠赤者吞之壽與天地齊青者五萬歲白者一萬歲黑者五千歲此民黑者雖不能學道但於人世上亦得五千歲爾至是前立七人輩乃北

斗七星也民得藥服後却入山中竟不知其所之

楊通幽

楊通幽者本名什伍廣漢什邡人幼遇道士教以微召之術受三皇天文役命鬼神無不

精十二

十三

立應驅毒厲剪氛邪攘水旱致風雨是法皆能之而木訥疎傲不拘於俗其術數變異遠近稱之唐玄宗賜名通幽問其所受之道曰臣師乃南極王君青城真人昔於後城山中教以召命之術曰可以輔贊太平之君然後

方得飛昇之道戒以護氣希言目不妄視絕聲利遠器塵則可以凌三界登太清矣又問昇天入地何所爲破曰得道之人入火不灼入水不濡躡虛如履實觸實如蹈虛雖九地之厚巨海之廣八極之遠萬天之大應念歛至何所拘破乎所以然者形與道合也上善其對通幽居數載乃登後城山葺靜室於其頂時還其家門人言天真累降於靜室一旦與群仙俱去矣

崔偉

進士崔偉嘗遊青城山乘驢歇鞍牧放無僕從驢走趕不及約行三十餘里及一洞口日已昏黑驢復走入偉畏懼兼困遂寢及曉覺洞中微明遂入去又十里出洞門望見長樹巖壑悉非人間惟有金城絳闕被甲者數百

見偉呵問對曰塵埃賤士願謁仙翁守吏趨報良久召見一人居千殿中羽衣身可長丈餘鬚髮皓素侍女滿側皆有所執命偉升殿共語甚喜留宿酒饌備極珍豐明日謂偉曰此非人世乃仙府也偉曰偉血屬願求一訣

非有戀著也請乞歸仙翁曰不得淹留謹罪極大與符一道云恐遇禍患可以隱形然慎不得遊官禁中臨別更與符一道云甚急時開却令取所乘驢付之到京都試住人家皆不見便入禁園大內會劍南進太妃生日錦繡乃竊其尤者以獻上治盡日計無賊至此乃召羅公遠作法訖持朱書照之殿戶外後果得偉言其本末上不信令答死偉忽記仙翁臨行之符遽廢之公遠與捉者皆僵仆良久能起即奏玄宗曰此已居上界殺之不得

假使得之臣輩便受禍亦非國家之福玄宗乃釋之親召與語曰汝莫妄否遂令百人具兵仗送偉至山中且覘其故却至洞口復見金城絳闕仙翁嚴侍衛出門呼曰崔郎不相信我語幾致顛躓偉拜訖將前送者亦欲隨至仙翁即以杖畫成澗深闊各數丈擲一領巾遂作五色虹橋令偉登之隨步即滅既渡偉回首曰即於此可以歸矣須臾雲霧四起咫尺不見惟聞鸞鶴笙歌之聲半日方散遙望空山而已不復有物

韋古

韋古字老師疎勒國人身衣毳袍腰懸數百葫蘆頂戴紗巾手持藜杖常以一黑犬同行唐玄宗時入中國每施藥餌以救人疾病行莫不愈玄宗重之敬稱藥王厥後其犬化為黑龍乘之冲天而去時開元二十五年也

徭狂道士

蜀有道士徭狂俗號為灰袋郎翟乾祐晚年弟子也乾祐每戒其徒曰勿欺此人吾所不及嘗大雪中衣布褐入青城山暮投蘭若求

僧寄宿僧曰貧僧一衲而已天寒如此恐不能相活道士但言容一牀足矣至夜半雪深風起僧慮道士已死就視之去牀數尺氣蒸如炊流汗袒寢僧始知其異人未明不辭而去多住村落每住人愈信之曾病口瘡不食數月狀如將死村人素神之因為赴道齋齋散忽起就為衆人曰試窺吾口中有何物也乃張口如箕五藏悉露同類驚異作禮問之惟曰此足惡此足惡後不知所終

韋老

唐代宗時韋侍御奉使往華山拜黃帝壇至山下邸中見一父老問壇所在老人知之且云姓韋家亦仕宦自述世系乃侍御之高祖行也相與入山老人策杖先行韋鞭馬追之不及至一石室見老嫗曰爾之祖母祖姑也俱雙鬟以木葉為衣喜曰年代遷變一朝遂見子孫拜壇訖再造其室已不見山下人云此老三二年一來不知所居

歷世真仙體道通鑑卷之四十三

歷世真仙體道通鑑卷之四十四

潛一

浮雲山聖壽萬年宮道士趙道一編修

盧生

盧生者唐敬宗寶曆中常販燒朴石灰往來於白湫南草市時時微露奇迹人不之測賈人趙元卿好事將從之遊乃頻市其貨設藥茗詐放其息利之術盧覺竟謂曰觀子意似不在所市意有何也趙乃言切知長者埋光隱德洞徹著龜顧垂一言盧笑曰今且驗子主人家午時有非常之禍也若是吾言當免君可告之將午有匠餅者負囊而至囊中有錢二千餘而必非意相干也可閉門戒妻季勿輕應對及午必極罵須盡家臨水避之若然則僅枉費三千一百錢爾時趙停於百姓張家即遽歸語之張亦素神盧慎乃閉門伺欲午果有人來扣門求糴怒其不應因蹴其戶張重簣捍之頃聚人數百張乃自後率妻孥迴避及午時許行去數百步忽蹶而死其妻至衆人具告其所爲妻謂必遇張所誣其天死有司官不能評衆人言張閉門之故觀

者謂張曰汝固無罪可爲辯其死張欣然從斷其妻乃言及市樓僦譽正當三千四百文因是人赴之如市盧生不耐煩潛至復州淮州於陸秀才莊門或語陸云盧山人非常人也陸乃謁盧陸時將入京投相知因請決疑盧曰君今年不可動憂旦夕禍作君所居堂後有錢一甕覆以板非君有也今始三歲慎勿用一錢用必成禍能從戒乎陸欣然謝之及盧生去水波未定陸笑謂妻子曰盧生言者從吾更何求乎乃命家童鋤其地未數尺果遇極微之真有瓦散錢陸喜妻以裙運紐草貫之將及一萬兒女忽哭切痛不可忍陸曰豈盧生言將微乎因奔馬追及且謝且戒盧怒曰君用之必禍骨肉骨肉與利輕重君其自度乃棹舟去不顧陸馳歸而遷焉見女豁愈盧生至復常與數人閑行途遇六七人盛服俱帶酒氣逆鼻盧忽叱之曰汝等所爲不俊性命無幾其人悉羅拜塵中曰不敢不皈其侶訝之盧曰此盡劫江賊也趙元卿言盧生狀貌老少不常亦不常見其飲食嘗

語趙曰道者得隱形之術能不試二十年可易形名曰脫離後二十年名籍於地仙矣所爲多奇事蓋神仙也

劉無名

劉無名成都人也本蜀先主之後居於蜀生而聰悟八九歲道士過其家見而嘆曰此兒若學道當長生神仙矣自是好道探玄不樂名利弱冠閱道德經學啞氣朝拜存真修煉之事常以庚申守三尸存神默呪服黃精白水以希延生或見古方言草木之藥但愈疾微效見火輒爲灰燼自不能固豈有延年之力哉乃涉經山川訪師求道數年入霧中山嘗遇異人教其服餌雄黃凡三十餘年入青城山北崖之下得一洞行數里忽覺平博殆非人世遇神仙居其間云青城真人劉祈叩不已願示道要以拯拔沈淪賜度生死之苦真人指以岩室便栖止其中復令齋心七日而示其陽爐陰鼎黍金煉化水玉之方伏水煉鉛成永髓之訣謂之曰胡剛子陰長生皆得此道亦名金液九變神丹之經丹分三品

以鉛為君以汞為臣八石為使黃芽為用君臣相得運火功全七日為輕水二七日變紫粉三七日五彩具內赤上黃狀如曉塵復運火二年日周六百再經四時重履長至初則十月離其胞胎已成初品即能乾汞成銀丸而服之可以驅疾二年之外服者延年益壽髮白反黑三年後服之刀圭蕭散名山周遊四海初品地仙服之半劑變化萬端坐在立亡駕馭飛龍白日昇天大都此藥經十六節已為中品便使人長生藥成之日五金八石黃芽諸物與君臣二藥不相離亂矣千日功畢名上品還丹謹而藏之勿示非人世有其人視形氣功行合道者而傳之劉受丹訣還於霧中山築室修煉三年乃成唐玄宗開成三年猶在蜀自述無名傳以示後人入青城山中不知所終

李終南

李德裕好餌雄朱有道士自云李終南住羅浮山曰相公可服丹砂丸大但促壽耳懷中出小玉象子如拳許大曰要求勾漏瑩者致

象鼻下象服其砂復吐出方可餌此乃太陽之精凝結已三萬年今以奉借忠孝是念無致其咎又出金象曰此是雌者與玉為偶贊皇一一驗之無差服之顏色愈少鬚鬢如漆乃求採殊異凡數百人其後南遷職鬼門關達道士怒索二象曰不誌吾言固當如此公偶拜下予至鱷魚潭風雨晦冥玉象自船飛去光焰燭天金象從而入水公至朱崖惜恨而卒乃知象者南方大獸勾漏者朱崖之寶羅浮者海濱之山李終南者贊皇不及也皇

李德裕也宣宗大中二年春德裕任潮州司馬秋九月為崖州司戶而卒其道士

竟莫知是何仙人

柳條青

唐宣宗大中末有異人號柳條青一日暴卒既葬其冢上見有紫氣發視之棺中惟有一青杖耳

李浩

李浩字太素不知何許人也隱青城山牡丹坪嘗與爾朱先生同游游注爾朱菩薩蠻詞作大丹詩百首行于世其後不知所終人或

傳舉家仙去其詩有云混沌未分我獨存包舍四象立乾坤還丹須向此中覓得此方為至妙門黃石烹金煉太元神仙不肯等閑傳人能認得無中理奪盡乾坤造化權百首荒辭義亦深因傳同道決疑心華池本是真神水神水元來是白金又將白金為鼎器鼎成潛伏永來侵汞入金鼎終年盡產出靈砂似太陰

張辭

唐懿宗咸通初進士張辭不第後多遊江淮有遺術養氣絕粒有詩曰爭奈一金烏頭上飛不住紅爐謾燒藥玉顏安可駐今年花發枝明年葉落樹不如且飲酒朝暮復朝暮人或召飲合意則剪紙蛺蝶二三枚以氣吹之成列而飛後至江南上昇去留詩云張辭張辭自不會天下經書在腹內身即騰騰處世間心即飄飄出天外

李老

李老世業醫善鼓琴自言得嵇康之妙因醉誤墜枯井中行至洞門題曰玄都洞見一道

士便鼓琴奏廣陵散操道士曰爾所製也叔夜即爾前身命酌石髓飲之又抽架上素書展視乃療治三十六種風白九子方道士曰將歸配合徧療世人功滿此來令李閑目乃在青州北門外到家妻子已除服矣乃唐僖宗乾符三年也遂合藥治病無不痊愈後數年不喜食乃斷穀因訪枯井一旦不歸疑得路而仙去矣

陳允升

陳允升者入龍虎山唐哀帝天祐中人見於麻姑山計去家七十年矣顏貌如初刺史迎置郡中夜坐嘗曰豐城橘美頗思之允升少頃攜數百枚至時人謂之仙矣

許鵲

許鵲真人唐末遊南嶽招仙觀壁上留歌一首云洪爐烹煨人性命器用不同分皆定妖精鬼魅闖神通只自干邪不干正黃口小兒初學行誰知日月東西生還爲萬靈感聖力移月在南日在北玉是玉時石是石蘊棄深泥終不識鄧通餓死嚴陵貧帝王豈是無人

力丈夫未達莫相親攀龍附鳳損精神題後數日上昇矣

橘叟

叟巴邛人不知姓家有橘園霜後諸橘盡收餘二大橘如若四斗盎巴人即令攀摘輕重亦如常橘割開每橘有二叟髮鬚眉瞠然肌體紅明皆相對象戲身長尺餘談笑自若與其決賭訖一叟曰君輸與我海龍神第七女髮十兩智黃十二枝紫錦幘一幅絳臺山霞寶散二劑一叟曰爾輸我瀛州玉塵九斛阿母療髓凝酒四鍾阿母女熊盈子濟虛龍縞機八綳後曰於先生青城草堂還我爾有一叟曰王先生許來竟待不得橘中之樂不減商山但不得深根固蒂於橘中爾一叟曰僕饑虛矣須龍根脯食之於袖中抽出一草根方圓徑寸形狀宛轉如龍毫厘固間悉因削食之隨削復滿食訖以水嚙之化爲一龍四人乘之足下泄雲起須臾風雨晦冥不知所

道左老人

老人司馬裴沆從伯自洛中往鄭州中路下馬覺道左人以其聲因搜蒿萊尋之荆叢下見一病鶴垂翅俛味翅關天若壞無毛且異其聲忽有老人白衣曳杖數十步而至問曰郎君年少豈解哀此鶴耶若得人血以塗則能飛矣裴素知道性甚高逸遽曰某請利此臂血不難老人曰君此心且勁然須三世是人其血方中郎君前生非人唯洛中葫蘆生三世人矣郎君此行非有急切可能至洛中千葫蘆生下裴欣然而往未信宿至洛訪葫蘆生具陳其事且曰葫蘆生無難開撲取一石合大若兩指援針刺臂滴血果得其合授裴曰無多言也及至鶴處老人已至喜曰固可信士乃令盡其血塗鶴言與之結緣邀裴曰我所居去此不遠可少留也裴覺非常人以丈人呼之因隨數里行至一莊竹落草舍庭廡狼藉裴渴甚求若老人指一土龕曰此中有少漿可就取裴視龕中有杏核一扇如笠滿中取求漿色正白乃力舉之飲不復飢渴味如杏酪裴知隱仙拜請爲僕老人曰君

有世間微祿縱任亦不終其志賢者果有所得吾久與之遊君自不知今有一信憑君必達因將一襖大如碗戒無竊開復引裴視鶴所損處毛已生復謂裴曰君向飲杏漿當哭九族親戚耳以犯酒色為戒後還洛中路問其附信將發襖四角各有赤蛇出頭乃見其叔得信聞之有物如乾大麥飯升餘叔後遊王屋山不知所終裴壽至九十七

終南山翁

陳季卿者江南人舉進士至長安十年不歸一日於青龍寺謁僧不遇憩於火閣有終南山翁亦候僧偶坐久之壁上有篆瀛圖季卿尋江南路太息曰得此歸不悔無成翁對曰何難折塔前竹葉置圖上渭水中謂陳曰注目於此即到矣季卿熟視即渭水波濤洶湧一舟甚大恍然登舟進棹極速行次禪窟寺題詩云霜鶴鳴時夕風急亂鴉又向寒林集此時輟棹悲且吟獨對蓮華一峯立明日次潼關又題詩末句云已作羞歸計猶勝羞不歸旬餘至家兄弟妻子迎見甚喜信宿謂妻

曰我試期已逼不可久留乃復進棹作詩別妻云酒至添愁飲詩成和淚吟乃飄然而去家人輩皆驚異之倏忽復至渭水徑趨青龍寺山翁尚擁褐而坐僧猶未歸季卿謝曰豈非夢耶翁曰他日自知之經月家人來訪具述其事所題詩皆在

段穀

段穀累舉進士後忽如狂市中謳吟云一間茅屋尚自修治任狂風吹連簷破碎料拱斜敬看看倒也墻壁作散土一堆主人翁永未來歸後病死及葬發視但空棺耳

鹿人

唐州有人獵於深山射中一鹿視之乃人也呼獵者曰我隋初隱此山今日合死於子之手但置我於石間獵者諾之遂巡而絕獵人旬日再往即亡其尸矣

劉棟

劉棟涪州人有道之士也布裘縵巾詐為愚情無知之狀養母甚孝所居臨池一旦忽扶其母登山是夕大水平地丈餘人始疑而異

之其後去城數里作窟室以居別築小室以居其母朝暮惟出視母寢食訖復還窟室默坐如是十餘年士大夫欲見者入窟室中相對不交一談問亦不對但云速修速修而已母卒營葬訖一旦飛空棄去不知所在

白衣人

江陵李副使因落第至華陰見白衣人曰要知向後事否乃書之分為三封曰急難則開後五六舉落第貧甚曰仙兄書可開也焚香啓之書曰可於青州院前坐副使遂往少頃見主僧曰松滋李長官識否即君酷似其貌李曰某先人也僧曰昔年賢先人有錢二千貫在此院如負在心今付即君子無事矣遂載錢而歸數年不第曰此一生事第二書可啓也書云某年月日可西市接轡行坐至日遂往樓下有人云主司侍郎要錢千緡與致及第李即上樓見之面邀的約明年果及第後官至殿職副使一日患心痛頗甚遂啓第三封曰某年某月某日江陵副使患心痛可處置家事後兩日而卒

房州工人

房州竹山縣陰隱客家浚井千餘尺無水工人捫壁別一天地日月世界署牌曰天桂山門內兩童皓齒鬢髮跣足未冠問汝胡爲至此工人具陳本末須臾有緋衣傳勅曰以禮遣之引泉洗浴白泉漱飲甘美似醉行半日有一國其宮室皆金玉城樓題云梯仙國工人詢曰此國何如是對曰諸初得仙者關送此國修行七十萬日然後至諸天遊玉京蓬萊崐閼姑射遂上山尋路門人曰汝來此頃刻之間已十數年却出舊穴應不可得當奏請通天關鑰匙與卿歸引上天門須臾雲間已在房州詢陰家云已三四年矣工人自後不食五穀莫知所在

江叟

江叟善吹長笛能作龍吟後適閩鄉玉盤豆館道傍大槐樹下寢夜見一人數丈曰將謂槐畔鉏魔乃是甕邊畢卓又指槐曰荆山館中二郎來看大兄便聞槐上有人下來候至凌明到荆山館中見庭槐十圍疑附神物乃

曰某好道不逢師樹神有靈乞與指教神曰但入荆山求鮑仙師必獲度世叟入山果遇仙師令叟吹笛一氣清虛五音激越驅泉迸出引鴈行低槁葉辭柯輕雲出岫仙師曰子之藝至矣但所吹者竹笛今贈子美玉笛吹三年可致洞中龍必獲水丹吞之使爲水仙無煩吾藥蓋子有琴高之相爾叟後三年岳陽寺樓吹之果有龍化爲人持丹而來叟受餌之遂變童顏入水不濡乃成水仙

洪志

道士姓洪名志不知何許人也少博學通經兼明星緯醫藥之書能極其妙然未知名或勉之趨權門以假借者答曰良金美玉不知以賁賣之竟不往既而以身世夢幻非堅牢物乃出家爲道士遂隱廬山常乘青牛往來人謂青牛道士居山草衣木食勤行苦志久之忽遇異人與處授以神方自是能明六甲役使鬼神變化萬端不可勝紀一日遂及故里手攜一小籃小人不知其有道也或要之飲盡盤盤殮志遂於籃內取脯炙棗栗之物

以供坐人盡輒飽取人皆厭食莫不驚而問之志笑而不答及宿旅舍時天寒人見其單服又無他衾褥衣物之類乃於戶密窺其所爲見其於小籃內取枕褥覆卧物物皆足暨復攜而出於是人知其有道矣皆曰洪郎非若我輩皆尊異之後丹成仙去人名其處曰青牛谷壇場猶存焉

桑俱鳳

白鹿洞隱者姓桑名俱鳳不知何許人也自稱進士聞其性嚚不近人情嘗寄閬州紫極宮一日買猪腸充饌就醋鑪汲水洗滌道士怪之不借其鑪釜乃生噉之時冬夜齋堂唯施一榻四面隙隙風霜切骨俱鳳乃脫布衫於架上裸露酣寢衆人大駭次至諸宮謁南平王一足草履一隻麻鞋自號野人或問左傳藻繅鞞鞞是何等物答曰以棗安盤揮而食之言論他皆倣此後到江夏依前狂率節度使簡俾虞候曉之出界至星子潭邊躡身騰空而去荊州客將奉使武昌備見告報自後又多在北地每參謁題榜云廬山白鹿

洞鄉貢進士桑俱鳳人多戲之竟莫知其所止云

司馬郊

道士司馬郊一名凝正一名守中不知何許人也常遊江上披冠褐躡屐而行日可千里衣服不改而常新所為猶撞竟無敢近之者能詐死以至青腫臭腐俄而復活嘗止於池州開元觀自宣之歛時有道士邵脩默亦往歛至城中約之與同行脩默避之先往至一鎮戍方息於逆旅而郊先至脩默隱身潛窺之見郊入別店中召主人與飲酒旋即辱之主人初敬謝不得已而擊之既而互相毆擊郊忽踣於地視之已死體冷色變一市聚觀乃集鄉里縛其主人檢身責詞將送於州時已向夕欲明旦乃行至夜半後聞店中諠然曰已失司馬矣人方悟郊詐死乃釋主人脩默明日乃行至前百餘里詰問人曰司馬專師何時過去曰今早已過矣明日復行百里問之曰昨早已過及到數間之亦然每往來江上諸州至一旅舍安泊久之將去告其主

人曰我所有竹器不能將行取火焚之主人阻曰風高且竹屋低隘不可舉火郊不已衆共勸之郊怒乃發火於室中持一大杖立於門側敢至者擊之郊有力皆莫敢前俄而火盛燄出於竹凡之隙衆惶駭既而火滅郊竹器皆盡所卧床皆熏灼而薦席無焦者有朱翔爲池州法曹郊過詣之謂朱曰君色惡當病我即去君病中能呼我本名當有所應翔不之信後十餘日果然病熱甚重忽憶郊之言意甚神之因稽首思念垂祐初朱有病惡見人在床前有小吏陳某者指使如意令入室侍疾亦叱去家人于之外戶無得入者至是朱恍惚見陳某持一甌藥進朱飲之便覺意爽體佳呼家人曰適陳某所持來藥甚效當再將來服家人驚曰此不令入室陳某安得至此朱乃悟郊之垂祐也自是朱病漸愈郊嘗居歛州某觀病痢困甚衆擬欲白官司先以意問郊郊怒曰吾疾方愈何勞若此爲而益篤主觀不得已乃口白縣令令使人候之郊曰長者何故知吾病也來者以告郊郊

怒忽起結束徑入山中步行如飛後十餘日持一大杖求主觀將杖之觀道士共拜求救乃免又至洪州市中探買鮓食小兒呼曰道士突鮓郊怒以物擊小兒中額流血巡人執郊送於虞候虞候乃問其名方喜勸說之郊乃極口怒罵虞候虞候忿杖之數十郊謂人曰彼杖我十五可得十五日活杖我十十日活矣未幾果然自是入廬山居簡寂觀無日不游覽雖深山峻嶺人跡所不可到者等閑一造如平地後醉卧數日弗起臨終置一杖於棺中及葬覺棺空發之惟杖在焉

歷世真仙體道通鑑卷之四十四

歷世真仙體道通鑑卷之四十五

潛二

浮雲山聖壽萬年宮道士趙道一編修

呂岳

先生呂岳字洞賓號純陽子世傳以爲東平人一云西京河南府蒲城縣永樂鎮人即今河東河中府也曾祖延之仕唐終浙東節度使祖渭第進士德宗貞元中官至禮部侍郎晚爲潭州刺史有四子曰溫字化光官至衛州刺史曰恭嶺南府判官曰儉爲御史曰讓歷太子右庶子或曰終於海州刺史先生乃讓之子也貞元十二年丙子四月十四日生於林檎樹下少聰敏日誦萬言至文宗開成二年丁巳擢舉進士擢第時年四十二歲龍姿鳳目鬚髮疎秀金水之相頂華陽巾衣逍遙服貌似張良又似太史公之狀後因遊廬山遇異人得長生訣一云武宗會昌中兩舉進士不第因於長安道中擬遊華山酒肆憩息俄有一人長髯碧眼自西而來亦憩此肆遂與共炊髯者親愛先生因就日負暄不覺睡著夢舉進士登科第歷任顯官奏對稱旨

遂除翰林入臺閣擢侍從俄拜執政居朝三十餘年偶上殿應對差誤被罪謫官南遷江表路值風雪僕馬俱瘁一身無聊方自嘆息忽然夢覺髯者飯猶未熟悠然笑曰黃糧猶未熟一夢到華胥先生驚曰公安知我有夢耶髯者曰公適來之夢富貴不足喜貧賤不足憂大抵窮通榮辱壽夭得喪往古來今皆如一夢富貴則爲好夢貧賤則爲惡夢壽長則爲好夢夭折則爲惡夢如公適來之夢誠好夢也一失到底轉爲惡夢公備知之矣貴即虛名富猶孽火金珠外物子孫他人一息不來四大不顧把甚物爲堅固即復題詩壁間先生大悟因拜曰公真異人也敢問貴姓居何鄉邦髯者曰吾乃天下都散漢鍾離權也居終南山公若省悟可從吾去先生於是棄儒業而從游師事之而得道復於僖宗廣明元年遇崔公傳入藥鏡即知修行性命不差毫髮後多遊湘潭岳鄂之間人莫之識嘗題岳陽樓詩云朝遊北嶽暮蒼梧袖裏青蛇膽氣粗三入岳陽人不識明吟飛過洞庭湖

外多有詩文留世略見真常集又著丹訣演正論述劍集各有玄旨以遺後學後南遊巴陵西還關中冲昇於紫極山一云歷江州登黃鶴樓以五月二十日午刻昇天而去不知何年其自作傳云吾乃京兆人唐末累舉進士不第因遊華山遇鍾離子傳授延命之術尋遇苦竹真人傳授日月交并之法再遇鍾離盡獲金丹之妙吾得年五十道始成第一度郭上竈第二度趙仙姑法名何二人性通利吾授之以歸根復命法吾惟是風清月白神仙會遇之時嘗遊兩浙京汴燕郡身長五尺二寸面黃白鼻聳直左眼下有一痣如人間使者筋頭大常著白欄衫繫卓絕變化不可度世言吾賣墨飛劍取人頭吾聞哂之實有三劍一斷煩惱二斷貪嗔三斷色慾是吾之劍法也世有傳吾之神不若傳吾之法傳吾之法不若傳吾之行何以見爲人若反是雖攜手接武終不成道先生自冲昇之後時降人間化度有緣學仙之士出入隱顯不可測識其先後游戲人間事迹詳載諸書宋徽

宗宣和元年七月二十八日勅封告詞云朕嘉與斯民偕之大道凡厥仙隱有載冊書司存未析寵褒必下呂仙翁隱景藏采遠迹遐方連建福庭適當爰舍嘆茲符契錫以號名神明不亡尚鑒休渥可特封妙通真人及太元至元六年正月襲贈純陽演正警化真君

施肩吾

施君名肩吾字希聖號華陽睦之分水人世家嚴陵七里瀨少舉進士習禮記有能詩聲趣尚煙霞慕神仙輕舉之學唐憲宗元和十五年登進士第主文太常卿李建賦太天不和詩早春殘雪一榜如姚康元晦後皆頗以詩文顯君獨不仕張司業籍贈之詩云雖得空名不著身又送東歸詩有折得高名到處閑之句故希聖詩自謂元和進士長慶隱淪者蓋登科之明年改元長慶希聖遂引不

復來文宗太和申乃自嚴陵入西山訪道棲靜真矣初希聖遇旌陽授以五種內丹訣及外丹神方後再遇呂洞賓傳授內煉金液還丹大道於是終隱西山今觀西一里許為芭蕉源浴山梯級而上有書堂舊址石室故在

附二

希聖手植老栢尚有一二存者其所為詩文甚多山中所傳未十之四有得其告勅於嚴陵云觀已刻之石瓊山白玉蟾跋施華陽文集云李真多以太乙刀圭大符之訣傳之鍾離權鍾離權傳之呂洞賓呂即施之師也施

有上足李文英昔施君授李一十六字世罕知者一靈妙有法界圓通離種種邊允執厥中予偶得之故併以告胡棲真使補其遺云

揚無為題石室詩云玉京高謝黃金榜石室歸來白鹿車山後暗通天寶洞眼前便是地

仙家時聞清夜雪中犬迴視紅塵井裏蛙五百年前人未到芭蕉源上鎖煙霞

徐鉞

徐鉞者自稱東海蓬萊鄉人也言談清爽皆引子史捷而能文每自吟曰曾見秦皇架石

橋海神忙迫漲驚潮蓬萊隔海難到直上三清却不通腰常掛一葫蘆棹扁舟泛於鄂渚上及三湘下經五湖每將魚就沿江市井博酒與人吟話而去垂白好事者言識之數十年矣而顏貌不改或戲留之約名目斤數

附二

釣魚須更得魚如其約人皆異之又見人有疾即葫蘆內取藥救之其藥如麻粟大不許人服食惟以酒研塗心腹間其疾便愈無不神驗人有問之藥可服食不曰可只是入口便憎飯去好道者服其藥一粒十年絕食而

常須飲酒哭水助之顏亦紅白齒髮不衰得其藥者甚多壽皆八九十廬山錢朗累服其藥極得長年今江湖漁人時有見者逐之舟去如飛不可近乃水仙也

錢朗

錢隱居名朗字內光洪州南昌人也少居西山讀書精勤有節操五經登科累歷世宦清直著稱去有遺愛時論美之唐文宗朝開成初為安南都護副使後為光祿卿歸隱廬山情澹好道師東嶽道士徐鉞得補腦還元服

煉長生之術昭宗世錢塘彭城王錢鏐慕明得道長年乃迎就錢塘師事之時明已一百五十餘歲童顏輕健玄孫數人皆以明經進身仕為宰官已皓首矣朗忽一日告別言我處世多年適為上清所召今須去矣俄氣絕數日顏色怡暢如生舉之就棺身輕若空衣然已尸解矣其玄孫謂人曰我之高祖年一百七十餘歲

楊雲外

楊雲外字慕仙徐州人也世官軍中慕仙生而秀穎獨不喜介冑事年幾冠即白其父母丐為道士父母不能奪其志時荒山有廢精廬舍因往居之俄有異人指示一所曰下有瘞錢爾之食可以取給尋復以道授慕仙於是神鑒頓超悟能辟穀馴擾虎狼父母時念之慕仙即還家而人見慕仙固自處精廬也皆大駭焉居久之去遊廬山亦止群虎中往來遊歷洞府甚多唐宣宗大中末始止硤抵萬州石城山尤多虎夙夕燕坐其間山高無水已而泉忽涌出未幾來雲安之雲昇宮懿

宗咸通中語人曰吾鄉有災是歲十月龐勛亂彭城僖宗乾符後黃巢興曹濮漫淫徧天下硤內險遠民恃以無恐慕仙醉卧市道上悲吒曰此地多殺奈何其後硤內兵起慕仙所卧之地適肆屠戮血流諸土光啓二年慕仙過邑子表生告之曰吾於白水王氏有宿負未盡償行當償之二月王果作難剽雲昇慕仙觸強刃以死表生取瘞之色如平常後有人見其往來於房陵雲安監使李文表從子亦遇於成都表生發瘞視之但存短褐而已雲安雲昇宮有碑杜光庭文存焉

王昌遇

王昌遇梓州人也為州治獄吏嘗晨食豬蹄不盡而藏之已而妻妻匿之至夕將取食焉婢紅蓮以不獲告昌遇意其盜也答掠之不勝痛遂誣服妻徐出豚蹄曰我試君耳君勒獄得無類是乎昌遇大感悟自是多所平反而所為亦寢近道矣俄有老父賣藥於市能除鼠暴終日無售者昌遇憐之每遇老父輒鬻以歸如是久之老父怪曰君家多鼠乎昌

遇曰吾憐丈人不售故鬻之非求素鼠也藥具在老父曰第用之鼠未必死爾昌遇歸投藥食中鼠大集食已皆化鴿飛去昌遇大驚往求老父不見也未幾有道人日醉於市卧道上人呼之為落魄仙時白昭嗣節度東川劉闢方阻兵禁夜行者得輒死昌遇為牙校治右廂夜過所部見有卧道上者視之乃落魄仙也匿不發掖歸其家落魄既寤詎曰吾有二縑白金三兩錢二千今失之必汝也昌遇不復辯如數償之落魄仙持以去曰他日見子瀘上踰數年官府追舊吏解綱昌遇當解綯綱於瀘州至江安道中遇二道士執兵刃挾弓矢昌遇股慄不敢進道士曰乃爾耶慎勿恐吾落魄仙也挽昌遇至其居為其設酒已還其元來所償金帛曰正為今日設也後昌遇得此以償綯綱虧折之數遂得交收公文迴歸道士復告昌遇曰爾知陽精魂立陰精魄成兩精相傳而成神明神以形用形以神生神去則形斃矣昌遇曰不知也願受教之道士曰神以道全形以術延爾因授以

赤龍大丹訣曰昔者毒鼠藥乃外丹之本也
大養之三年服之仙矣遂名昌遇為易玄子
呼左右取馬今昌遇乘以歸馬無轡而行若
奔電直凌霄漢間俄爾至高峯若蹶然則轟
立平地矣馬忽言曰吾乃潭中龍也子所聞
丹方尚能省乎復為之開說既已即躍入潭
中化為龍沫去尋有負樵者至昌遇問此何
地曰東川也昌遇因問途而還即詣府丐免
後來差發遂煉丹於北郊之長平山西郊之
鳳凰山丹成輕舉時唐宣宗大中十三年九
月九日也

爾朱洞

爾朱洞字通微不知何許人也少遇異人授
還元抱一之道煉大丹不死之方因自號歸
元子唐懿宗朝至蓬州州有大小蓬山世傳
周穆王時有人於此刻木為羊蹄而仙去通
微曰是與海上三山名同又有跨羊仙迹吾
期成道於茲乎乃援脩蔓躡絕壁得石室喜
甚曰足辦吾事矣久之復捨去賣藥於蜀漢
之間其行飄然如乘太虛時時白猪血灌腸

飲酒哦詩人莫之測所舍逆旅主人每夕怪
其室中膈膈有聲問窺之則其身自榻而昇
觸棟而止後伺其醉以粉塗其腹黎明視其
棟著其上皓然或者於枯骸中得物如雀卵
持以問通微通微曰殆服神丹而不能修煉
故純陰剝消無陽與俱獨就丹田成此爾女
子吞之當生異兒果有吞卵者生兒神光燦
日異香滿室唐昭宗大順中王建圍成都通
微亦在焉館通微者憂憊曰建約城陷日夷
戮無噍類奈何通微曰勿憂也施席籠攝建
及其三軍入其中有如聚蟻建與軍皆見神
人乘黑雲叱其軍曰敢有一毫傷吾民若等
禍且及建等怖伏曰不敢建入成都果東兵
市不改肆民既全濟矣通微則又往客果州
嘗大醉天封精舍嘔丹於其井中曰後當為
良藥至今炎夏病瘴者飲之必差果州朱鳳
山州之南爾朱仙及李淳風養煉之地通微
一日謂所善郡人張洪之曰吾久不朝元今
欲往謝氏仙山趨宸極時冬夜晴澈漏方中
大雪暴集洪之念通微凍踣漏甬盡即出求

之見其衣單衣卧道上舉碧玉簡示洪之曰
吾朝元誤墜此溪上盤石有聲爾視之石必
斷矣視之信然鄰有斃於酒者通微以藥灌
之即蹶然起言已入陰府主者令亟還曰真
人有命延壽一紀洪之因是大駭請授以道
通微曰爾股上天魚首倒無益也更一生乃
可爾洪之股有瘕若魚形首素上向至是果
倒矣通微謂丹陽一粒需錢十二萬太守召
鬻之曰太守金多非一百二十萬錢不可售
太守怒以為惑眾納之竹簍沈於江至涪陵
上流有二人乘舟而漁舉網怪其重出之乃
通微貌如常漁者曰必異人也入定乎叩銅
金籍之少焉通微開目視二漁者曰子等何
人此去銅梁幾何有三都乎曰我白石二江
人漁水上此去銅梁四百里自是而東即鄭
都縣平都山仙都觀也通微曰吾師謂吾遇
三都白石浮水乃仙去殆此即先是通微至
江濱多投白石待其浮人不解也通微既登
岸從容語二漁者曰子類有道者有所傳乎
二漁曰我昔從海山仙人得三一之旨煉陽

銷陰亦有年矣通微於是索酒與劇飲取丹分餌之至荔枝園下旌節自天降導三人昇雲而去涪州松屏出石山間爾朱先生種松於此映山之石皆有松文采者祈禱得佳天然成文其後通微再見於世有成都胡二郎仙井道士遇焉據五代史補云爾朱先生功行甚至遇異人與藥一九云君見浮石而後服之則仙道成矣先生如教每遇一石必投諸水後遊峽上將渡江有吏載舟相待問其姓曰石氏問地所屬曰涪州先生豁然而悟遂服其藥即時輕舉矣

應靖

應靖不知何所人也唐僖宗時為登封令有惠政黃巢犯東都分兵徇屬邑登封吏民惶懼無計長官曰吾邑無郭庫無兵廩無粟可以守乎即空一邑之保嵩高山自為殿賊追及長官身搏戰以死捍之賊解去登封之人獲全長官既而棄官學道遂仙去隱其姓以名顯故謂之靖長官宋哲宗元祐中劉几常遇嵩高山中天安踈散浩然也長官嘗以道

授黃蓬石已載蓬石語中蓬池人何格非仕至二千石少慕清高亡何亦見長官於大蓬山飛仙岩自是數至長官喜抵掌談笑飲酒至斗餘然坐在立亡倏忽千里不可測度一日長官過格非呂真人尋浮空而至並坐語格非遽起再拜求指教真人曰子自有師矣格非志不篤已而不能悉如長官言以疾終焉

歷世真仙體道通鑑卷之四十五

歷世真仙體道通鑑卷之四十六 潛三

浮雲山聖壽萬年宮道士趙道一編修

王仙君

王仙君以唐昭宗天復初自上黨雲遊經北邙緱氏入嵩山曠度虛懷澹然無迹雖與同侶相接莫知其所為飄忽無滯希夷自得因放志林谷迷其所之時人亦未為異也歲餘其門人道士與其弟姪自壺關太行南池嵩少歷問所經宮觀物色求之乃於嵩山西北絕崖中見仙君端居嵌竇之內宴坐凝然高聳且百仞壁立懸絕非攀援所到門人等炷香瞻禮涕泣戀慕不忍去舍仙君忽謂門人曰太上以我夙有微功署為少室仙伯仙凡路隔勿復悲戀言訖騰空而去時嵩陽道士焦隱黃孫玄明費靖言羅應之同奉香花瞻望崖室虔奉敬禮而已

李昇

李昇字雲舉自言江夏人生唐德宗朝幼而聰悟及長博通群書能文機捷出口成章為性高古師於少室山道士學煉氣養形之術

常布衣遊行天下時元稹廉察浙東白居易出牧錢塘以昇舊友皆慕昇之文學道術邀致於賓席間問昇生當太平之世何不受榮

祿而久爲布衣乎對曰不爲世累召之亦不就乃吟曰生在儒家遇太平玄纁重帶布

衣輕誰能世路趨名利臣事玉皇歸上清元與白奇之詩酒延留歲餘復去他遊莫知所

之僖宗廣明元年黃巢犯關之後天下怪然

惟江左稍安宛陵主帥田頌常好道術而昇五十年前宛陵有耆老爲童稚時識之言狀

貌不改於當時人甚異之昇至頌乃延之師

事益厚光澤輕健若四十餘許鬚髮甚黑目

矐且方牙齒尖銳如排棗核好喫石蓮須更

咬一升皆作兩截人不可學飲酒二斗不醉

絕糧養氣雪中單衣而顏貌益紅時自引中

指指燈文餘若隙風所吹莫知其服餌人問

其道術長生之事皆託辭以對忽告人曰我厭此兵革紛紛不如去矣時昭宗爲朱全忠

所篡昇聞而不平翌日俄氣絕顏色不變舉之就棺空衣而已年一百四十七歲未月餘

間田頌兵敗禍及昇已先覺而去亦嘗言於人咸思之異人也後累有於蜀中見之如舊者焉

伊用昌

伊用昌不知何許人唐末披羽褐往來江右

縱酒狂逸世人呼爲伊風子妻年甚少善音律女工皆盡其妙豪家子以言笑調之毅然

有不可犯之色用昌好作望江南詞夫婦唱

和而歌傍若無人夜多宿古寺廢廟中嘗死於醴陵又於哀帝天祐年間至建昌南城縣

夫婦一夕俱斃鎮將丁其姓以遂條墓葬路

傍後一年鎮將抵鍾陵一旦於北市棚下見

用昌夫婦唱望江南詞用昌同鎮將登旗亭

痛飲大醉夫婦連臂高唱出城渡江至海惟

觀題殿壁自稱上方赤龍神王因入西山後

不復出焉

胡二郎嘗見一道士於成都醉卧通衢二郎

憐之每值其醉輒取石支其首道士一日醒

見二郎在傍感之因勸修遁且歌以諷曰欲

究丹砂理幽玄無處尋不離鉛與汞無出水

中金金欲煉時須得水水遇土兮終不起但

知火候不參差自得還丹微妙旨人世分明

知有死剛只留心戀朱紫豈知光景片時間

將謂人生長似此何不迴心師至道免逐年

光虛自老臨樽只解醉醺酣對鏡方知漸枯

槁二郎切切聽我語仙鄉咫尺無寒暑與君

說盡只如斯莫戀驕奢不肯去感君恩義言

方苦火急迴心求出路吟成數句贈君辭不

覺便成今與古二郎曰願聞君姓字曰吾爾

朱也乃即屠肆市猪血灌腸置渡中使二郎

食二郎食之甘美方知其異人也道士既去

二郎亦化其家將葬怪其棺輕發之有竹竿

存焉

張鼇

張鼇不知何許人也唐末得道既仙去常至

成都玉局化洞微大師李乘應之室宋神宗

熙寧五年九月亦賣藥于市中人莫識也士

大夫過於途怪其安坐不爲禮而神丰峻發

與他人賣藥者異也翌日始知爲先生而不

知所之乘應字應之能語人休咎趙清獻公
抃為江源令乘應嘗言某年公當入蜀後如
期轉漕梓中復曰徙成都果然漢州太守聶
仲友深欲致乘應乘應不肯往曰斯人天獄
星動矣卒不能致其言無一不驗者蓋有得
於先生云

李夢符

李夢符不知何許人後梁太祖開平初寓南
昌放蕩不羈常以釣竿懸一魚歌漁父引其
詞曰新人爭買之得錢即入酒家或敲冰入
水及出則氣如蒸遇人與語應口成詩時鍾
傳鎮南昌桂州刺史李瓊以書囑傳云夢符
吾弟也幸為遣歸傳令訪於市郎已不知其
所在

樂子長

樂先生名子長海陵人也後梁太祖開平中
家醅釀而性好道人至即飲以酒或詭為道
士服者先生亦輒飲之後有道人來說曰人
至以三升飲之豈能足我乎先生問曰其飲
幾何曰吾飲不可涯也乃縱使飲至夕視之

則醉墮盎中死矣先生懼潛昇盎并瘞之後
三日香發越自瘞所出發其瘞則酒滿盎色
渥如丹而芬列異常先生喜曰是異人者使
吾室偕仙乎與其家畢飲已悉昇雲而去獨
從子墜地云茹蒜不可以往也然亦壽百餘
歲後即其地築天慶觀

吳涵虛

道士吳涵虛字合靈居然風采未嘗下山終
日沈湎亦無煙火之具俗呼為吳孫好睡經
旬不食常言人若要閑即須懶如勤即不開
也素不攻文忽作上昇歌曰玉皇有詔登仙
職龍吐雲兮鳳著力眼前驚地見樓臺異草
奇花不可識我向大羅觀世界世界如同指
掌大當時不為上昇忙一時攜向瀛洲邁至
於後唐潞王清泰二年上昇又有荆臺隱士
鐵冠先生樊氏慕合靈之道常騎白牛訪之
楚王馬希範常師之後馬希範嗣位先生不
知所之

李雲卿

李雲卿不知何許人也博通經史尤善作詩

有山房集二十卷當時名公辟舉皆謝不拜
每云上真高仙必須精持戒行陰功濟物遂
留心醫道以救人命心神穎悟凡用藥不犯
生命止以金石草木乃謂古仙製方術傳於
後世其間有以蟲魚為藥緣此不得輕舉者
有之可以為戒也先隱西山後徙居廬山北
阜數州千里之地求醫者盈門皆不受金帛
之贈絕慾斷葷其所居近九天使者廟每旦
暮祝曰某以醫藥救民病苦不圖權利盡未
來世永無退志明神靈通必能加護凡居山
六十餘年顏色黃潤目光射人有識者皆云
陰功所致也一日因隨採藥人至深山中忽
睹一人圓冠紫袍相揖曰我乃此山之神也
九天使者真王傳命以汝救物有功使我授
汝大清九華神丹太微天帝君飛天綱步地
紀金簡玉字一通自此當絕迹人間精專修
持雲卿再拜告曰九天使者不審可得見否
神曰汝雖絕慾斷葷猶接迹人間穢氣未除
未可見也方以手授神丹玉字隱沒不見雲
卿由此遠離世俗乃於聖治峯空為室自大

唐穆宗至後唐莊宗同光二年八月一日白
日仙去

張薦明

張薦明者燕人也少以儒學遊河朔後去為道士通老子莊周之說後晉高祖天福四年己亥九月辛卯上召見問道家可以治國乎對曰道也者妙萬物而為言總兩儀而稱德得其極者尸居枉席之間可以治天地高祖大其言延入內殿講道德經拜以為師忽一日薦明聞禁中奏時鼓曰陛下聞鼓乎其聲一而已五聲十二律鼓無一焉然和之者鼓也夫一萬事之本也能守一者可以治天下高祖善之五年五日賜號通玄先生後不知所之

臣道一曰張薦明可謂造道之深者觀其答高祖之問曰得其極者尸居枉席之間可以治天地道德經曰不出戶知天下不窺牖見天道其出彌遠其知彌少是以聖人不行而知不見而名正以此意又答曰能守一者可以治天下皆本於道德經

賀元

賀元不知何許人也仕後晉為水部員外郎得道不死宋真宗東封泰山水部謁道左稽首而去至暮行宮問謁奏之帝大驚謁尾有詩其一曰醒日常稀醉日多吟風味道鬱嵯峨深宮不及孤臣慮世事紛紛奈酒何其二曰三朝功業獨巍巍老去憂民志不衰欲得八方同一醉此心那許世人知詔有司物色不可得仁宗天聖初使弟子喻澄詣闕獻浮屠老子像直數十萬又有喬全者少得大風疾因去家自縊荒山遇水部教之曰松腰稍使學道年八十上下山如飛數從水部東遊過維却水上哲宗元祐初全來東都見蘇軾子瞻曰吾師嘗游密州識君於常山道中意若喜君者子瞻留之不可曰吾師以上元期我於蒙山矣子瞻作詩送全并以絕句五解寄水部自是世莫有見水部者

郭恕先

郭恕先洛陽人也五代時人少能屬文善史書小學通九經七歲舉童子後漢湘陰公辟

從事前與記室董商事拂衣去後周太祖召為周易博士宋國初與監察御史符昭文爭忿於朝堂貶乾州司戶秩滿去官遂不復仕縱放岐雍陝洛之間達人無貴賤常口稱苗值山水即旬日不去幾絕穀數旬不食盛夏暴體日中衣不沾汗大寒鑿冰而浴方冰漸釋太宗素聞其名召歸闕入館於內侍省押班實神興舍恕先長髯而美忽盡剃之神興驚問其故恕先曰聊以效顰爾神興大恚太宗以其少檢除國子監主簿出館于大學益縱酒肆言時政黜登州至齊州臨邑謂部送吏曰我逝矣因踣地為穴度可容面俯窺焉而卒就藁葬道左後數月故舊取其尸改葬但衣衾存焉蓋尸解也

陳陶

陳陶潯浦人少好學善天文長於歌頌知兩唐李氏運祚不振遂絕搢紳之望乃築室西山以吟詠自樂及以修煉為事有閑居雜興詩傳世宋太祖開寶中人見一吏角髻披褐與一煉師入城鬻藥得錢即市鮓就爐相對

飲啗傍若無人醉即歌唱人以爲陶走婦焉
或云已得仙今西山香城寺有讀書堂

孫成

孫成不知何許人善爲詩預知休咎至廬山
以詩題九天使者廟云獨入玄宮禮至真焚
香不爲賤貧身秦淮兩岸沙堆骨湓浦千家
血染壘廬阜雲煙誰是主虎溪風月屬何人
九江太守勤王事好放天兵渡要津不數年
金陵板蕩九江重圍人受塗炭竟應詩誠後
歿於南昌人棄之江中尸乃泝流而上莫不
異之以爲得道尸解仙云矣

許堅

許堅字介石廬江人也或曰本晉長史穆之
裔形陋而怪長滿七尺幘巾芒鞋短襦至髡
亦無齋裝惟自負布囊而已性嗜酒善屬文
尤好吟詠嘗以策干江南主及以詩上舍人
徐鉉竟拂衣去居常無冬夏常持一大扇自
號江南野人書一絕于扇云哦吟但寫胸中
妙飲酒能忘身後名但願長閑有詩酒一溪
風月共清明又題簡寂觀云常恨真風千載

隱洞天還得悠遊邀松楸古色一壇靜鸞鶴
不來清漢高茅氏井寒丹已化玄宗碑斷夢
魂勞分明有箇長生路不向紅塵嘆二毛宋
太祖乾德中其文集頗行於世爲人靜默不
苟名聲所居無常多往簡寂觀或白鹿洞人
莫知其趨向也時須濯浴便就溪澗不解衣
帶出而曝衣於石今簡寂大澗中有許堅晒
衣石尚存堅有鼎容三升每得魚不去鱗腸
或烹或炙不加醯鹽熟處旋啗素與樊若水
善樊北渡至大宋太平興國中因漕江南會
堅于簡寂勉以祿仕則鑿感不答乃割漆金
三百緡爲酒資以券授之堅准而不謝既半
暮未嘗一言或爲之請之則飲酒市魚歡然
醉舞或有借券而往公府亦從之至樊將解
職就索襄券亦亡其所之其曠達自任如此
後往茅山或之九華隨意所適人不能測亦
未嘗見其釜爨又嘗至陽羨一日涉西津忽
凌波闊步而行衆方驚以爲神真宗景德末
卒於金陵歲餘其部負外郎陳靖職舟秦淮
謂兩日前於洪井見堅來謁門刺尚在及發

其瘞無所復睹人以爲尸解云

沈麟

沈麟字廷瑞筠陽人唐吏部郎中彬之仲子
幼而執操已異雅好希夷之理性至孝父死
廬墓三年應鳥集其墓後棄妻學道于麻姑
山一云玉筍山常衣單褐風雪不易人道新
衣多轉以遺貧乏或棄之嗜酒工詩時人呼
爲沈道者直造州縣徑入坐階一日宰正聽
訟麟醉至宰戲之曰沈道者何日道成麟即
書几曰何須問我道成時紫府清都自有期
手掘藥苗人不識體含仙骨俗安知書符解
遣龍蛇走動印還教海嶽移他日丹青誰是
侶青童引駕紫雲隨既足日行數百里往來
玉筍浮雲林栖野宿南唐保大中詣玉筍精
思院隸籍冠褐入室養氣人罕得見宋太宗
雍熙二年上元日禺中整冠褐閉戶焚香燕
坐握固而化同志爲藏蛻於群玉峯之西鐵
柱岡之東後月二十日有閭山道士曾昭瑩
來訪玉筍途中遇之因問曰道者何之答曰
暫到玄都尋當入廬山遺度人經二卷詩一

石之鋪草為水面汭流而上一日至成都

歷世真仙體道通鑑卷之四十六

篇與昭瑩云南北東西事人間會也無昔曾
栖玉筍今也返玄都雲片隨天闊泉聲落石
孤丹霄人有約去採石舊蒲昭瑩訝其語不
凡人宮首訪之其徒云羽化去矣昭瑩出示
經與詩衆識其字畫殊以驚駭昭瑩與其弟
至其墓所觀之得片紙於墓側有詩云虛勞
瑩殞玉山前脫跡誰知已脫蟬應是元神歸
紫府更無遺魄在黃泉藥囊止有修丹訣塵
世空留悟道篇堪嘆浮生今古事北却山下
草芊芊驗其墓有穴可尺餘向左畔開空棺
而已或謂尸解焉有南中人多識之嘗有詩
寄其故人陳智周云與君相別後別後會難
期金鼎消紅日丹田養紫芝訪君難可約懷
我豈無詩休羨繁華事百年能幾時智周尋
於端拱間及第授衡陽尉終南唐列傳沈彬
次子廷瑞有道術嗜酒却粒寒暑一單褐數
十年不易跣行日數百里林栖露宿多在玉
筍浮雲二山老而不衰後不知所終

黃萬護

巫山道士黃萬護常以符藥救人蜀主王建

歷世真仙體道通鑑卷之四十七

潛四

浮雲山聖壽萬年宮道士趙道一編修

陳搏

先生姓陳名搏字圖南號扶搖子亳州真源
人也與老子同鄉里一云晉州崇龕人恐是後來隱居之所生
而不能言始四五歲戲渦水之濱有青衣媼
召置懷中乳之自是能言聰悟過人及長經
史一覽無遺一云自束髮不為兒戲年十五詩禮書數
至方藥之書莫不通究親喪先生曰吾向所
學足以記姓名而已吾將棄此遊泰山之巔
長松之下與安期黃石輩論出世法合不死
藥安能與世俗輩脂韋汨沒出入生死輪迴
間哉乃盡其家業散以遺人惟攜一石鐺而
去唐士大夫挹其清風欲識先生面如景星
彩雲之出爭先睹之為快先生皆不與之友
由是謝絕人事野冠草服行歌坐樂日遊市
肆若入無人之境或上酒樓或宿野店多游
京國間後唐明宗聞先生名親為手詔召先
生至長揖人主明宗待之愈謹賜先生號清
虛處士仍以宮女三人賜先生先生為表謝

上云趙國名姬漢庭淑女行尤婉美身本良
家一入深宮久膺富貴昔居天上今落人間
臣不敢納於私家謹用安之別館臣性如麋
鹿迹若萍蓬飄若從風之雲泛如無纜之舸
臣送彼復歸清禁及有詩上浼聽覽詩云雪

為肌體玉為顙多謝君王送到來處士不生
巫峽夢空煩雲雨下陽臺以書奏付官使即
時遞去因肆意山水間自言嘗遇孫君仿鹿
皮處士二人謂武當山九室岩可以隱居遂
往棲焉服氣辟穀以恬默自處凡二十餘年
撰指玄篇八十一章入室還丹詩五十首又
作釣潭集萬餘字皆羅縷道妙包括至真嘗
夜立庭間見金人持劍呼曰子道成矣當有
歸成之地先生曰金人云歸成之地蓋秋為
萬物之所斂而歸者也吾其隱於西方乎是
時年已七十餘徙居華山得古雲臺觀基
闢荆榛而居之以契歸成之語時境內有虎
食人先生至叱虎令去自是不為害唐開元
中李奇者隱於華陽顏有童色斯須行數百
里與先生遊更相酬倡先生常閉門臥累月

不起周世宗顯德中有尋訪者窺其戶問其
無人惟獸跡鳥聲而已有樵於山麓者見有
遺骸塵壓迫而視之乃先生也捫其心獨暖
良久氣還而起曰膳酣寤為擾我州將羅彥
威以聞世宗召見禁中月餘方起因問以黃

白事對曰陛下為四海之主當以政治為念
夫何留意於小道邪資治通鑑云陛下為天
子以治天下為務安用

此世宗不以為忤拜諫議大夫固辭賜號白
雲先生遣還山詔州縣長吏常存問之先生

負經濟之才歷五季亂每聞一朝革命輒擊
眉數日常作詩云十年蹤跡走紅塵回首青

山入夢頻紫陌縱榮華及睡朱門雖貴不如
貧愁聞劍戟扶危主問聽笙歌聒醉人攜取

舊書歸舊隱野花啼鳥一般春一日乘驢遊
華陰聞宋太祖登極大笑曰天下自此定矣

遂隱華山不復出太祖召不至興國初始赴
召太宗賜詩云曾向前朝出白雲後來蹤跡

杳無聞如今若肯隨朝詔總把三拳賜與君

先生將至闕上言求一靜室休息乃賜觀於
建隆觀局戶熟寐月餘方起詔服華陽巾草

屨垂條以賓禮見於延英殿賜坐延問甚久
時上方欲征河東先生諫止之會軍已興上
不樂其言詔復令寐於御苑及兵還不利經
百餘日乞歸山太平興國四年復來始云河
東可取暨王師再舉果執劉繼元年并州上

謂宰相宋琪等曰博方外之士在華山已四
十餘載度其年蓋百餘歲語論甚高因遣中
使送至中書琪等從容問曰先生得玄默之
道可以教人乎對曰博不知吐納養生之理
神仙黃白之事非有方術可傳假令白日沖

天亦何益於世教聖上博達今古深究治亂
真有道仁明之主是君臣同德致理之時勤

行修煉無以加此琪等稱善以其語白上上
益重之下詔曰華山隱士陳搏晦迹丘樊棲

心岩穴跌宕世表涵味道腴往在周朝物色
幽遐嘗應鸛板之詔終逐鴻冥之心自爾以

來多歷年所今復言過高邈來儀帝庭不有
嘉名昌彰清範可賜號希夷先生上屢與之

屬和詩什上問曰若昔堯舜之為天下今可
至否先生云土階三尺茅茨不剪其迹似不

幽遐嘗應鸛板之詔終逐鴻冥之心自爾以
來多歷年所今復言過高邈來儀帝庭不有

嘉名昌彰清範可賜號希夷先生上屢與之
屬和詩什上問曰若昔堯舜之為天下今可

至否先生云土階三尺茅茨不剪其迹似不

幽遐嘗應鸛板之詔終逐鴻冥之心自爾以
來多歷年所今復言過高邈來儀帝庭不有

可及然能以清靜為治即今之堯舜也上善其對因出諸子使視之先生密陳天命實在章聖上亦欲拜諫議大夫固辭乞歸山進詩云草澤吾皇詔圖南樽姓陳三峯十載客四海一閑人世態從來薄詩情自得真乞金集鹿性何處不稱臣上知其不可留即賜宴便殿詔宰臣兩禁赴宴為詩以寵行仍賜龜鶴鞍馬束帛又詔華陽刺史王祚時就存問其願操几杖以師事者不可勝數其後再遣中使就山宣召先生先生曰極荷聖恩臣且乞居華山先生意甚堅使回具奏其事上又遣中使齎手詔茶藥等物賜之仍仰所屬太守縣令以禮遺之安車輓輪之異數迎先生先生乃為表謝上曰丁寧溫詔盡一札之細書曲軫宸恩賜萬金之良藥仰佩聖慈俯恭增感臣明時閑客唐室書生堯道昌而優容許由漢世盛而善存四皓嘉遜之士何代無之再念臣形如槁木心若死灰不曉仁義之淺深安識禮儀之去就敢荷作服脫簪為冠體有青毛足無草履倘臨軒降貽笑聖明願回

天聽得隱此山聖世優賢不忝前古數行丹詔徒煩彩鳳嘶來一片關心已被白雲留住獲飲舊溪之水飽聆松下之風詠味日月之清笑傲雲霞之表遂性所樂得意何言精神超於物外肌體浮乎雲煙雖潛至道之根芽盡陶聖域之水土敢祈睿眷俯順愚衷謹此以聞先生經史浩博尤精易學鑒人察物辨別聖凡宋太祖太宗龍潛時與趙忠獻公遊長安市先生與之同入酒肆公因坐右席先生曰汝紫微帝垣一小星爾敢據上次平周世宗宋太祖同行先生則云城外有三天子氣神故初從先生先生曰若當逢明主名動天庭名者古今之羨器造物者所忌子名將有物敗之卒如其言忠定張公詠為布衣時先生一見而奇之公曰願分華山一半居可乎先生於公固可及別去贈以毫楮公解其意曰是將嬰我以世務贈詩云征吾入蜀是尋常鼎沸笙歌救火忙乞得東南佳麗地亦應多謝賢邊蒼後果登第以名動天下將赴劍南有詩寄先生云性愚不肯林泉住剛要

清流擬致君今日星馳劍南去回頭慚愧華山雲及還有詩云人生大抵重官榮見我東歸夾道迎應被華山高士笑天真喪盡得浮名忠定晚年疽發於首乃出守昇州所贈詩無有不驗者陳康肅公堯咨既登第過謁先生坐中有道人髻髻意象軒傲目康肅公連言曰南庵語已徑去康肅公深異之問曰向來何人先生曰鍾離子也康肅公惘然欲去追之先生笑曰已在數千里外矣康肅公曰南庵何謂也先生曰他日自知之其後康肅公轉漕閩中巡行過墟里間聞田婦呼其子曰汝去南庵趣汝父歸康肅公大驚問南庵所在視之則廢伽藍也有碣云某年月日南庵主人滅祠其真身于此乃康肅公生時也清源王世則與韓見素趙諫議同詣先生世則為僕隸拜階下先生曰侮人者自侮也揖世則使坐於諸公之右曰將來君獨首冠諸公盡如此會也明年世則果第一餘皆列于次又能逆知人意齋中有大瓢挂壁上道士賈休復心欲得之而不言先生謂休復曰子來

非他蓋欲吾瓢爾呼侍者取與之有郭沈者少居華陰嘗宿觀下中夜先生呼令趣歸沈憚其遠先生與之俱往一二里有人號呼以報其母卒沈始悟其言先生因遺以藥使急去可救既至果卒灌其藥遂甦許諫議仲宣罷成都牧致書幣以問休咎先生召門人賈得昇曰爾爲我答書云給事此去更不出未幾果卒後先生稀到人間或然遊華陰華陰令王睦聞先生來倒履門迎既坐先生曰久不飲思得少酒睦曰適有美酒似知先生之來命滌器具饌既飲睦謂先生曰先生居溪岩寢止何室出使何人守之也先生微笑乃索筆爲詩曰華山高處是吾宮出即凌空跨曉風臺榭不將金鎖閉來時自有白雲封睦得詩愧謝先生曰子更一年有大災吾之此來有意救子子守官如是雖有鬼神理亦祐焉睦居守廉潔清慎視民如子不忍鞭扑人性又明敏故也先生乃出藥一粒曰可以禦來歲之禍睦起再拜受藥服之飲至中夜先生如廁久而不回遂不見睦替回都下忽馬

驚隨汴水善沒者救之得不死先生亦時時來山下民家至今尚有人見者今西華有先生宮觀存焉昔先生多與山下崔古往還有衣冠子金礪多遊山水之間謁古曰願因子一見希夷先生古曰更待之先生方睡俟其覺方可見礪曰何時也古云或半歲或三四月近亦不暇月餘子有所之且去他日復來礪乃去後歲餘再遊華山見古適會先生繼至礪伏謁甚恭乃請於先生曰礪向遊華山欲見先生會先生睡未覺睡亦有道乎願先生誨之聞其所未悟先生啞然有聲聳肩收足昂面頰然曰不意子孱瑣若是也於起居寢處尚不能識欲脫離生死躍出輪迴難矣今飽食逸居汲汲惟患衣食之不豐飢而食倦而卧軒聲聞於四遠一夕輒數覺者名利聲色汨其神識酒醴膏粱昏其心志此世俗之睡也若至人之睡留藏金息飲納玉液金門牢而不可開土戶閉而不可啓蒼龍守乎青宮素虎伏於西室真氣運轉於丹田神水循環乎五內呼甲丁以直其時召百靈以衛

其室然後吾神出於九宮恣遊青碧履虛如履實昇上若就下冉冉與祥風遨遊飄飄共閑雲出沒坐至崑崙紫府徧履福地洞天咀日月之精華翫煙霞之絕景訪真人論方外之理期仙子爲異域之遊看滄海以成塵指陰陽而舒嘯興欲返則足躡清風身浮落景故其睡也不知歲月之遷移安慈陵谷之改變因予請問爲子成詩曰常人無所重惟睡乃爲重舉世以爲息魄離形不動覺來無所知貪求心愈動堪笑塵地中不知身是夢又詩云至人本無夢其夢乃遊仙真人亦無睡睡則浮雲煙爐裏長存藥壺中別有天欲知睡夢裏人間第一玄夫大夢大覺也小夢小覺也吾睡真睡也吾夢真夢也非世夢也先生曰吾非久復睡子無所往他日訪吾令子見真睡先生乃去礪塊然如醉者之醒不知出門遂歸其家他日再訪先生先生論攝生秘訣敷演至妙之門發明太玄之奧曰吾某日睡子可來礪如期而往至則先生已睡矣見先生仰卧出入無息面色紅瑩礪拜禮於

床下而去又一日有一客訪先生適值其睡傍有一仙人諦聽其息聲則以墨筆烏塗於紙如是數次滿紙烏塗莫辨客怪而請問之仙人曰彼先生華胥調此混沌譜也先生暇日間喜遨遊得與吟詠遇景成句嘗題西峯詩云為愛西峯好吟頭盡日昂岩花紅作陣溪水綠成行幾夜礙新月半川無夕陽寄言嘉遯客此處是仙鄉又餘臘半夜天香入岩谷西風吹落嶺頭蓮空愛掌痕侵碧漢無人增嘆巨靈神先生時遇毛女因贈之詩云藥苗不滿筍又更上危巔回指歸去路相將入翠煙又詩云曾折松枝為寶拂又編薜蘿作羅襦有時問著秦宮事笑煞仙花望太虛關中逸人呂洞賓有道術雖數百里頃刻輒到世以為神仙常數至先生齋酬倡如交友先生曾當春月於華山水邊石上閑步見壺公赤松子呂洞賓相繼而至四仙言語未久有地神獻一菓盤酒一器四仙飲酌半酣各賦詩一首先生曰春暖群花半開道遠石上徘徊曾垂玉勒金闕閑踏青沙碧苔洞中睡來

幾載流霞獨飲千杯逢人莫說人事笑指白雲去來壺公曰壺中自有樓臺四季群花競開開時即飲瓊液醉後或卧青苔逍遙非關名利落魄不樂塵埃逢人莫說人事笑指白雲去來赤松子曰乍離南山竹籬因過舊隱天台洞中美酒饒熟路上群花半開我肯非是凡骨君才亦是仙才逢人莫說人事笑指白雲去來呂洞賓曰落魄直至此來曾經幾度花開悶便著錢沽酒恣意千杯萬杯開遊八十一天醉上茅君驪臺逢人莫說人事笑指白雲去來先生一日謂賈得昇曰今日有佳客至當速見報少頃一人衣短褐青巾叩門賈未及報其人倏爾而去先生遽令出追之一里餘復遇老人衣鹿皮因問曰前去者尚未逐否老人曰此神仙李八百也動則行八百里言竟老人亦失所在又悟老人鹿衣者乃太清得道白鹿先生李阮也先生曰吾其不可名留世矣瑞拱元年一日語門人曰吾來歲中元後當遊幾嶠明年遣門人鑿石室於張超谷既成先生往造之曰錢石太華

斯谷猶為勝處吾其歸於此乎即草遺表其畧云臣大數有期聖朝難戀已於今年十月二十二日化形於蓮華峯下張超谷中又草奏疏人莫見其言遣賈得昇并龜鶴鞍馬詣關以進上獨覽久之以龜鶴鞍馬復賜得昇仍賜紫服并賜號曰悟真又予錢五百萬俾營北極殿以終其志先生初欲示化使盡夜然燈燭於石室中至期以左手支頤而終逮七日容色不變其肢體尚溫有五色雲蔽其谷口彌月不散享年一百一十八歲使得昇繼其觀事先生明易以數字授穆伯長穆伯長授種放種放授廣江許堅許堅授後有中使至我嶺山有客入謁衣冠甚偉自稱東明專相然多語華山事數日方悟曰此華山陳先生遠令召之已不知其所往矣祥符中真宗紀汾雖回舟幸雲臺瞻先生之遺像詔除其觀田租召對道士賈得昇并賜武子華等紫服俾建聖祖并真宗本命星宮元辰三殿又繪睥容於北壁先是雍熙中先生謂賈得昇曰吾行老君殿後見神人服黑衣冠云北極閣同

紫微帝君汝可以前後所賜市材立北極殿又曰昔唐金仙公主以此為新真之館今吾復遇北辰此觀其興矣惟汝當得之速真宗臨幸果三十年得昇當之其逆知來物多類此

臣道一曰陳搏粹於道德以睡說世樵者捫心則曰睡酣奚為擾我宋太后召至闕則局戶熟寐月餘希夷之號雅稱其旨然託迹於睡其意必有在也道德經曰眾人昭昭我獨若昏眾人察察我獨悶悶豈非陳搏睡之義乎

蘇澄隱

鎮陽龍興觀道士蘇澄隱者通老莊又善攝養宋開寶二年閏五月太祖駐鎮陽召之掖殿上曰師踰八十容貌甚少是能養生宜以術教朕澄隱曰臣之養生不過精思煉氣而已帝王之養生則異於是老子曰我無為而民自化我無欲而民自正無為無欲凝神太和帝軒帝堯享國永年皆得此道上嘉之寵賜殊厚

出皇朝通鑑

劉若拙

宋開寶五年冬十月癸卯太祖詔功德使與左街道錄劉若拙集京師道士試驗其學業未至而不修飾者皆斥之若拙蜀人自號華蓋先生善服氣年九十餘不衰步履輕疾每水旱必召於禁中設壇教禱其法精審

出皇朝通鑑

張白

張白字虛白自稱白雲子清河人也沈靜博學能文兩舉進士不第會親喪乃泣而自謂曰稷以養親今親不逮千祿何為遂辟穀不食以養氣全神為事道家之書無不研讀宋太祖問寶中南海判諸時卿人韓可玘為通守延納甚懽會朝廷弔伐江吳軍國多事因號儒服為道士適武陵寓龍興觀郡守劉侍郎堦監兵張延福深加禮重嘗以方鑑遺延福曰收之可以辟邪白輒負自晦窮日沈湎于酒落魄無所拘每醉於市上不問親疏輒指而慢罵而其言切中人微隱之事有識者多異之每遇風雪若寒則必破冰深入安坐

水中永日方出水襦沾濕氣如蒸炊指顧之間悉已乾燥或與為戲仰視正立令惡少數輩盡力推曳略不少偃又或仰舒一足令三四人舉之衆但面頰而足不動居常入崔家酒肆貫飲無量一日力欲償酒直崔氏之酒保白其主曰尊師每來即酒客倍如常日而所獲之息不少崔氏聞之即不敢算分文忽一日於酒肆中題壁云武陵溪畔崔家酒地上應無天上有南來道士飲數斗醉卧白雲深洞口自是沽者猶倍南嶽道士唐允昇魏應時亦當時有道之士慕其人常與之遊白天才敏瞻思如湧泉數日間賦武陵春色詩三百篇皆以武陵春色裏為首句一篇云武陵春色裏十二酒家樓大醉方回首達人懶點頭是非都不管名利頓然休戴箇星冠子浮沈逐世流白出語成章卒皆平易有道理故不類尋常狂醉人言也後一旦稱疾亟語主觀者曰我必不起慎勿焚我恐里中親識來尋但依俗禮葬於西門外言訖神逝經數夕肢體如生異香滿室傾城士庶觀累日

崔氏爲買棺監兵張延福出已俸如其言瘞之僅月餘瘡所有一穴未幾延福復奉使江淮有老僕夫於維揚開明橋上遇白問方鑑在否又云斯鑑亦不久留僕歸具道延福疑曰渠死久矣汝何見邪尋索鑑熟視應手而碎又鼎之步奏官余安者以公事至揚州亦遇白攜大葫蘆貨藥亟召安飲于酒肆話武陵舊遊數日安告行白曰爲我附書謝崔氏余歸致書崔覽之大驚遽發棺視之已空矣白註昇玄消災護命經夾著頌其首篇云太上本來真虛無中有神若能心解悟頭上更無人末篇云心疑隨萬境隨境認心緣道非有爲有方名離種邊又著指玄篇暨七言歌詩名爲丹臺集並傳於世

混沌道士

宋太祖太宗潛耀日嘗與一道士游無定姓名自曰混沌或曰真無自太祖御極不復見上已被楔西沼道士揖太祖曰別來喜安上亟見之一如平昔抵掌浩飲上曰我壽還得幾多對曰但今年十月二十夜晴則可延一

紀不爾當速措置上留之後苑或見宿於木鳥窠中數日不見至所期之日上御太清閣以望氣是夕果晴星斗明燦上心方喜俄而陰雲四起天地陡變雷電驟降移杖下閣急傳宮鑰開端門召開封王則太宗也廷入大宴酌酒對飲悉屏宦官遙見燭影下太宗時時避席有不可勝之狀飲訖禁漏三鼓雪已數寸帝引柱斧散雪顧太宗曰好做好做遂解帶就寢鼻息如雷將五鼓寂無所聞帝已萌矣太宗受遺詔即位

丁少微

宋太宗太平興國三年四月乙卯召華山道士真源丁少微至闕少微善服氣引年與陳搏齊名然少微志尚清潔博嗜酒放曠雖居室密邇未嘗往來少微以金丹巨勝南芝玄芝等獻上留數月遣還

出聖朝通鑑

陳花子

陳花子在青城山得道常剪紙花子於市中賣之只買酒與陳搏爲友往來青城山人常見之

歷世真仙體道通鑑卷之四十七

歷世真仙體道通鑑卷之四十八

潛五

浮雲山聖壽宮道士趙道一編修

張契真

張契真字齊一錢塘人也幼孤遂依上清宮胡法師浮游江浙上會稽探禹穴歷踏雲邊

赤城以訪仙道契真皆負篋從之時朱天師居天台目而器之以其有清骨方瞳因度爲道士久之還錢塘居吳山真聖宮周世宗顯德五年受正一盟威靈寶法錄於大元樊先生由是紫綬玉笈之書無不歷覽而名振江浙

○所忠懿王精崇道法每三籙齋俾總其事王公貴人亦從而欽尚宋太平興國中太宗命有司即國之東南建太一宮詔天下戒潔之士以居之而契真與選未幾禁中清醮因召見款對稱旨賜紫衣而上以道書魚書未定詔兩街道錄選優學者列正而契真復與既畢賜元靜大師之號真宗景德三年正月十一日夜就寢髮髯間有朱衣吏持符而至曰奉命張某宜速淨穢往彼職事遲曉召門人徐思簡曰吾且行矣子其志之越二十五日

沐浴訖泊然返真享年七十一翼日遷神于城之東肢體柔輭而汗露露于面及火化得青黑色珠可升餘丞相錢惟演謂其徒曰此浮屠氏所謂舍利在仙經則曰精氣凝結而成步虛經云舍利耀金姿麗駕欲來迎是也師爲性沈默聲利不容於心惟嗜好文老而不倦手抄經史子集凡五百餘卷善草隸奕棋而隱晦自抑嘗獨坐軒砌鳥集于懷其忘機感物如此

張元化

○道士張元化者不知何許人稱華蓋先生弟游汝墳汝人因請主北極觀焚修外以慈愛及物而汝人無不悅之獨不知其密修何道但混俗和光未始自異於人有施油燈於北極殿者元化以大盆貯水泛八燈而自成星斗之列构建所指隨曉昏而轉郡人有請齋者老少無異志而預議之然未之請而師黎明必至其間有意欲請而夫妻忽反目者有男女不承順顏色者雖來請而逆知其意拒而不往但勸諭而使之去觀之側有菓園蔬

園里人俟其出而竊之至其園而師已在彼其先知之見多此類郡中周司馬與師最相善然不知授之以何術師嘗因歲旦秉葦炬遶巷陌雖數刻方匝而炬之燼若初人訝而詢之對曰有行瘟鬼吾故逐去人以是爲狂而不信及夏城外果疾疫暴作而城中貧賤富貴皆無恙每以符藥救人有所得悉爲焚修之費一日有客召入酒肆元化辭以素不飲後欲與茹葷又辭以佩法錄客稍怒元化熟視之知其非人也謂曰暫歸觀中願子少待即再相見因取劍而誘出郊叱使坐而戮之即鬼也朱髮藍面脊薄如五七歲小兒攜其首以視人曰此鬼輒敗吾故戮之以去民害遂積薪於通衢焚之而腥氣累日不散一夕郡人皆夢元化見別云暫遠遊希善愛是夕寢中忽羽化達旦人有疑而來訪者大小皆同宋太宗太平興國初進士安鴻漸寓郡中恃才傲物自謂無人可意見元化則擊跽服從而就弟子列旣葬及舉觀甚重君有鐵石物圓轉於其中鴻漸遂命酒致禱則漸覺

輕臨墳發視之則頂上有一竅可容臂識者曰此蟬蛻矣未幾有客自河陰來貨石榴于汝墳途中遇一道士自云我乃汝墳張觀主託附一書仍市石榴數十顆獻于北極殿客諾之既至其徒曰此書乃師之真墨迹也引客至影堂客曰向所見者與此像畧無異至今汝人圖像而事之嘗撰還丹訣并小詞二閱叙修行事傳於世

張齊物

李臻燕人也性溫約未嘗失於人遊荆湘間宋太宗淳化中至江陵偶疾作僑居公安門外雖貧窶未嘗絕客忽有道士訪門自稱姓張名齊物隴西人謁臻以求寓泊臻諾之但愧貧乏無所待齊物曰貧道不食可日得酒數升為厚賜爾臻諾之齊物曰飲於市雖屠沽輩亦不問至夜後方歸忽醉罵臻臻畧不介意待之益厚又一日大醉歸抵臻寢所至晚方醒嘔吐狼籍卧具皆汙童僕輩怒欲扶之臻止之曰醉人何足責齊物遂明告行謂臻曰感君之顧厚矣今則復能相送數里乎

臻遂與之偕行可十里間齊物曰某非滔滔者薄有所負焉周遊人間五十年未嘗見仁厚如君者願有小術為獻臻問何術曰黃白術也臻曰賦命淺薄不敢當願先生察之齊物茫然自笑曰君之道非某所及也於是抽簪引以為劍執之曰請自此別乃割地隨手而裂投身入於地地亦隨合臻嘆異之由是遂晦迹不復見

張無夢

張無夢字靈隱號鵲濠子鳳翔監軍人也身長六尺風格俊爽居常好清閑窮老易父為儒肥遁不仕有二子無夢即其長也篤孝聞於鄉里及冠以資產委其弟遂入華山與种放劉海蟾結方外友事陳希夷先生無夢多得微旨久之遊天台登赤城廬於瓊臺觀行赤松導引安期還丹之法僅十餘載間以修煉內事形于歌詠累成百首題曰還元篇夏英公倅台州入山見之得此篇歸輩下時王冀公執政訪隱逸人英公以還元篇獻之未幾以聞于上宋真宗特召對問以長久之策

無夢曰臣野人也但於山中嘗誦老子周易而已不知其他也上令講易即說謙卦上問曰獨說謙卦何也曰方大有之時宜守之以謙上喜其說除著作左郎無夢固辭曰陛下德如堯舜山林中豈不容一巢父許由邪因舍建隆之翊聖院復召講還元篇無夢曰國猶身也心無為則氣和氣和則萬寶結矣心有為則氣亂氣亂則英華散矣此還元之大旨也畧說十數篇而退遣使賜金帛皆不受乞還山復賜處士賜飲先生號亦不受上以歌一闕賜行其辭曰混元為教含醇精視之不見聽無聲惟有達人臻此理逍遙物外自沈冥浮雲舒卷絕常勢流水方圓靡定形乘興偶然辭澗谷談真俄爾謁王庭順風已得聞宗旨枕石還期適性情玉帛簪纓非所重長歌聊復寵歸程冀公邀入私第意欲款延無夢曰萬乘且辭矣相公人臣徒煩見留明日遂行有旨令台州給著作郎俸以養老至山亦不請其始卒守節如此有黃白術祕而不言居瓊臺又十餘年復隱於終南鶴池久

之遊嵩山泛湘漢抵金陵保寧壽寧佛舍社門不出士人或見而請問者則對之以龔而後人事幾廢然博通古今百家之學至于圖經小史記之歷歷無遺有二經生侍几案久之因度爲道士無夢年九十九終于金陵經三日頂中有白氣勃然出高三尺餘移時乃散乃就棺肢體柔輒指甲不青心胃尚暖史君玉琪遣吏藏于悟空禪師塔前有瓊臺詩集行於世碧虛子陳景元嘗預弟子列得老莊之深旨

程仙翁

程仙翁不知何許人在梓州白日昇天那奇爲州主具奏真宗令子孫見存焉

塗定辭

塗定辭者蓬之良山龍謀里人也塗氏之先自孟知祥據蜀時已數世居此躬耕植產家累百金宋真宗咸平中定辭隸役于郡因羣帛入關遇夜舍華陰客邸偶有書生自稱東粵者指定辭而坐相得甚懽遂留飲浹日及告行書生曰吾陳搏也以君非凡骨故特邂

逅于此定辭喜懼不自勝因懇求異術書生曰術不貴異但蓄精神不以好惡內傷則善矣於是袖出藥一刀圭曰君但餌此當壽百年翌日再訪之則不復見既而西歸落魄不事生產遂鑿所居之南山爲石室陰絕數十仞觀者毛髮皆聳定辭梯木登陟如履平地初石室乾燥每患乏水輒呪之甘泉應期而出居常好飼群鳥或臨風一呼則千數翔集馴狎左右每暑則挾纈自曝石上謂之迎涼或寒沍則衣單繒而已嘗遊成都謁僧希白因命饌食鹽一器僅數片坐客皆驚異術士王鶴與之款飲定辭獨飲數斗不亂又屑薑蔥數升雜茹之凡賓客之來忽言好飲食何物者則必與之取足同食客雖屬饜而不肯止嘗以田產爲人訟移鞠于岩渠幾一歲獄中未始具糧而訟不敢敵典獄之官亦以拒抗不得情因散禁定辭定辭遽往城北羅漢院之江上絕崖之巔有古木輒登其上不肯下凡七日人呼之則曰我不下爾輩但以箭射老夫不能彈之亦可然人卒不敢逼之至

第八日不呼而自下復居就鞠所而教書至久之請爲道士每到仲春人服疏藥時渠即臨流於小灘下體露從水自七竅中入謂之溺腸嘗有二小商於脫白溪一人中暑暴死定辭持鐵針於額上以一槌擊之入一寸許須臾復活明年以物來爲報則不受嘗貯五十萬錢扁鋪甚固飲家人無妄取用然子孫亦莫知其意去世之前月自室歸謂家人曰吾平生市物凡直百錢者必過所售之數與之儻其間有以多爲辭者以是錢賞其廉然終吾之身卒無一人嘆世俗之貪冒如此一日呼家人於前曰我九十三歲不死何待索巴豆食之於是喫二百粒不動移刻更喫百粒微微溘泄乃平坐而化人環而哭之却復活乃曰坐去恐汝輩難作葬具言訖則卧化也經數夕童顏儼然如生及就壙而棺甚輕識者以爲尸解所居之石室時聞簫鼓之聲其子爲左侍禁孫數人舉進士

郭上竈

郭上竈者不知何許人宋真宗天禧中嘗以

僦雇淪湯滌器于汴州橋茶肆間一日有青
巾布袍而啜茶者形貌瓌偉神采凜然矚目
於郭郭亦疑其異人又竊覘於袖間引出利
劍郭思念曰必呂先生也伺其出即走拜于
前曰際遇先生願爲僕廝呂不顧而去郭乃

增五

尾後至一閭處呂回顧曰若真欲事我邪可
受吾一劍郭唯唯延頸以俟引劍將擊郭大
呼已失呂所在郭乃在百萬倉中巡卒擒送
官杖而遣去自此京城裏外幽僻之處無不
至見人必熟視良久方去問之則曰我尋呂
先生自此十年餘不知所在仁宗天聖末有
趙長官家居磁州邑城鎮之別業忽有丐者
縕袍而來見趙再拜曰某郭上竈也趙亦嘗
識之遂問見呂先生否郭曰周天下不知見
今爲大數垂盡故來求一小棺以藏遺骸趙
大以爲妄問曰何日當盡曰來日午時趙曰
若然當爲汝買棺郭又曰并乞棺首開一穴
將一竹竿通其節挿穴中庶得通氣趙雖唯
之殊謂不然明日午時汲水浣身卧槐下遂
絕趙大異之爲造棺河朔乏竹取故傘柄通

其中挿棺首瘞之于河岸仍恐爲狐犬所發
植棘累石以固焉其年秋大雨河水泛漲數
日乃退趙慮其柩爲水所漂策杖臨視棺開
無尸

趙抱一

增五

先生名抱一鳳州兩當人也父徙居梁泉蒲
池世以農桑爲業先生年十二因牧牛遇一
老人問之曰子飢否先生不應但點頭而已
老人探手囊中取食與之其狀如蘿蔔而味
甘又與拄杖一條瓢子一枚中有藥乃豌豆
也論之令人服食於是沈痾新疾得服者無
不愈先生自食蘿蔔不復思煙火食久之信
步至京城之西把樓院之三門下有一僧曰
子無乃要出家邪曰然僧曰子去見參頭託
渠引援於是至院之後門草亭子上恍然睡
數日復有一僧至見之問其所從來乃引入
自涅槃堂過聞有呻吟聲先生曰何人若此
僧曰數日童行時疫方甚先生自瓢中傾碗
豆藥令以新汲水燕之即時汗如新沐人經
夕而愈僧果異之傳於裏外然後請藥者如

市而瓢中之藥愈出不竭人所餽之物皆不
受悉與主僧巡警官按察雖知非幻惑人然
見人來日多不可禁止於是具以申朝廷時
宋真宗車駕東封未還丞相向公留守京師
陰遣人驗其實飛奏詣行在以聞尋有旨令
辟簡寂宮觀以居之乃得東太一之宮齋館
先生既就止有司嚴其扃鑰擊柝以固護復
令道士胡太易等以飲食伺候日夕所食者
但棗栗三兩枚而已凡月餘車駕方還召見
真宗拊其背曰卿朕同姓也遂即披度爲道
士賜名抱一未幾求歸上賜金鍍銀龍頭拄
杖銅朱記鸚鵡杯香藥等仍差中使張茂先
道士胡太易送至石門山特與建真寂觀以
爲登真之所每年賜披度及紫衣仁宗慶曆
中忽行寢罷至宣和年間先生復來京師寓
太乙宮之舊隱具章以聞乞復先帝所賜恩
澤仁宗素知先生名覽章悉許仍舊召見而
臺諫力止之先生兩到京凡盡日飲酒不醉
止食少許蔬果而已嘉祐年間汲汲求歸但
言恐有水阻既歸至中秋果有大水忽一日

遣門人曾惟甫入郡中市藥過期未還先生集門弟子謂曰我欲入奏庭謁張尚書牀而惟甫未還忽覺疫困言訖就寢而化享年七十八歲百日肢體尚暖久之精舍黃瘦如此三年門人乃葬之始遇之拄杖即真宗以龍頭者易之其餘所賜物並存識者謂所遇老人乃張果先生也蓋有洞于郡之西世傳張果隱於此

武抱一

武抱一建康人也始從茅道士為僮精舍有鐘蕭眾道士命僅以時擊撞宋太祖建隆中忽遇至人乃得道去來不可測人因謂之仙童華陽道士朱自英通丹經真宗詔封觀妙先生厚禮聘之仙童聞自英將行貽書曰抱一啓切以笑傲昇平輕欺富貴扶疎丹桂難藏明月之光峭絕青山莫滯白雲之迹言之不足道在其中形神別隱於三山名姓已彰於四海歲月何定鉛汞何求如或因循空成潦倒真珠圓而美之美矣絳雪凝而自然而然在市孰非在山孰是水積成海氣積成

神匪我相知少言休語抱一貨棄而利名何有和光而道俗罕殊輕舉行修長生道在多是道過於雲水未嘗暴露於天機知者難言行者自見聊書懸惻以代笑談一日二秋咫尺萬里陽氣如烟荒郊似水更保沖和別休請問今因魚鴈聊附寸心書到山前以申鶴望謹啓又為詩曰聖主搜羅物外人總來金闕見靈真惟予不願彰名姓綠水青山道可親自英讀未竟已失持書者心因異之

朱自英

先生朱自英字隱芝句曲朱陽里人生八九歲牧牛郭干村時能致鶴或謂不祥父母遂棄之入道師王晨觀道士朱文吉十一歲度為道士與張線師紹英居積金峯却穀常屨滿戶外先生曰北其絕迹而躡我屨不太多事予於是旦疊壇而夕渡江將拜混元於亳社禮天師於青城逢一叟命先生閉目曰謹執子裾惟覺林梢拂足開目乃坐青城山下遂授以金鼎九轉飛精劍法事曰世號陳鐵脚即我矣言訖失叟所在先生思三茅道藏

闕偽乃載游瀨鄉校雖太清古本歲餘有道人武姓相訊問先生曰能往否先生曰敢不從命藏睛少選觸耳聞然忽睹闕闕顧謂先生曰此河中府也侵尋及河截流安涉先生踵之若蹈平陸接岸欣然曰信士可教吾水星童子也此一行已抵度形太陰然雖幽屏不厭深渺殊時復會遠背而去先生還故山得九老仙都君印濟人不倦未幾玉清昭應宮詔選名行工部侍郎薛映以先生名上朝廷遣使詔先生表辭時主尚未建儲遣中使任文慶齋香設醮命先生奏章求嗣章聖明肅皇后乃夢羽衣數十從一仙官下降云此宋第四帝見聖政錄及仁宗嗣服使兩至州縣教迫不得已遂受命館昭應宮待遇甚渥昭應宮使王欽若喜先生暫朝玉闕有詩酬倡及累表獲辭節度太尉知昇州丁謂亦賦詩送歸山自是隱居稱疾不起明肅太后時遣使降香設醮為保聖躬及親札賜金注梳一副云是主上小時用底為道者置莊一所寶墨猶存及受上清經法還尊先生為度師

賜號觀妙武仙童復寄書并詩一首勉更韜
晦今章壇丹竈賜鐘猶存茅山方隅洞側乾
元觀舊隱也有幽光顯揚碑備詳仙蹟

李仙人

樂史仕宋為西京留臺御史嘗夢天帝召俄
見宮闕壯麗帝曰主求嗣吾為擇之少選一
人至帝曰中原求嗣汝往勿辭頓首祈免者
再三帝曰往哉遂唯而去傍拱立者曰此南
嶽赤脚李仙人也常酣于酒明年果生仁宗
又會聖宮在洛陽之東祖宗神御在焉仁宗
嘉祐八年三月二十九日晝漏盡人見羽衛
陳布道中最後一人衣赭袍張黃蓋乘馬至
宮前不見明日宮門大敞諸殿門鎖不鑰自
啓俄頃仁宗上仙

劉從善

劉從善字順天號浩然子西洛人也家世不
仕厥考因籍於汴之祥符從善幼而明敏雅
好道學宋真宗祥符中師道士王太和子建
隆觀五年試業為道士以貧窶惟求化給其
親雖初寒暑熱未嘗有怠人皆稱其孝仁宗

天聖初以乾元節賜紫衣二年六月承旨充
景靈宮住持三年八月上與太后欲授法錄
詔三茅大洞法師觀妙先生朱自英於玉清
昭應宮金籙壇又降旨選明經教勳謹焚修
之士五十餘人同曾傳授從善首與焉復宣
賜正一法服冠履劍佩等而後上嚴于孝享
以時追慕特遣使諭以先帝忌辰令於神御
前呪食持課乃編集三洞經偈頌以薦仙駕
尋進呪食文上嘉之賜號全素大師仍以其
文頒諸宮觀呪食之科自從善始時延寧宮
告成詔撰聖像五藏銘應制者衆惟從善稱
旨遂以金玉牌刻其文景祐中乞還本觀未
幾章獻章惠靈駕出都充法師沿路講贊至
和二年乙未正月仁宗不豫召從善於大慶
殿設醮奏章命執政代拜至夜伏章次帝忽
大漸瞑目已數刻中外驚懼而從善遲久方
起曰章已達太上有勅令聖駕回矣俄而帝
甦即傳宣問葛將軍何神也從善對曰三天
門下有神曰葛將軍復傳宣曰速令設位供
養翌日聖體遂康諭左右曰朕昨夜夢至天

門有葛將軍者云皇帝未合來急借馬送回
遂寤久之有旨令內侍麥承信建葛將軍觀
於郊壇之西南賜金雅飾仍賜從善御服祔
席金帛等欲賜先生號固辭嘉祐初左右街
道錄薦為道官上可其奏授右街守闕監議
辭不獲乃承命五年夏民苦大水復拜章于
福寧殿而免昏墊從善自守闕監議累遷右
街副錄居常誦玉清本際西昇黃庭等經至
若服氣煉形亦勤而行之英宗臨御丞相韓
魏公復乞賜先生號又辭之神宗熙寧三年
七月二十八日沐浴訖集弟子于前曰吾俟
大風來即當去須臾果如所說而化降年八
十一後有客見從善白馬如蜀託云見吾徒
弟煩為言之由是知其尸解嘗撰集齋科及
拜章式行于世

藍方

先生姓藍名方字元道亳州父老言自兒童
時見先生狀貌迄今如一先生髮委地黑光
可愛肌若截膏眉目踈遠唇若積朱齒如排
玉舉動溫厚接物以和小大皆得其歡心或

醉遊旗亭遇廢人句於道路探懷出錢盈掬遺之頗好施藥拯救疾苦宋仁宗聞先生之名特詔上殿賜坐及賜茶藥館於芳林園未幾告去賜號南嶽養素先生住南嶽招仙觀是時學士賈公昌朝贈先生詩云聖澤濃霑隱逸身道裝宜用葛為巾祝融峯下醉明月湘水源頭釣紫鱗曾見海桃三結子不知叩豆幾回春他年我若功成去願作靈橋跪履人先生和曰近告明君乞得身不妨林下戴緇巾滿斟野酒浮瓊蟻旋釣溪魚繪錦鱗元府烏雞飛後夜洞中龍子養長春吾宮僅若為同志續有臺天兩箇人先生有弟子陳通叟問無功行即不至神仙之地先生曰古之為功行恐人知今之為功行恐人不知此所以功行膚淺卒無所成就也尚書郎李觀為進士時游南嶽過長沙飲旗亭中忽有負竹奩持釘鉸具者謂曰子往南嶽為我問養素先生十月懷胎如何出得觀至南嶽以語先生先生大驚曰其人眉間有白痣乎曰然先生嘆曰是海蟾子也吾養聖胎已成患無以

出之非斯人不足以成吾道也先生獨宿閣上一夕與人言語侍者穴牖窺伺見紅光滿室明日客詢之先生曰吾師劉道君行雨過此留話少刻也先生一日沐浴竟召侍者謂之曰吾今一百七十二歲安可復顧先生位號但不欲拒聖君之意今當捨去矣乃奄然而逝先生多遊西川亦時來湖湘間今人時復見之一云玉谿叟李觀遊南嶽欲見養素道中逢一人荷釘鉸之具謂觀曰子非李觀往嶽山見養素乎曰然其人又曰煩公寄一信於藍公云劉處士奉問先生十月懷胎如何出得觀既見藍具述所言藍曰眉間有白痣乎公曰有之藍曰此劉海蟾也吾養聖胎已成非斯人不能證果觀曰劉處士奉問先生十月懷胎如何出得藍拊掌大笑惟聞頂雷隱然見一人如雪月之輝與藍無異直上沖霄而藍已逝矣觀焚香歎息而退今嶽山長嘯先生是也肉身塑像存焉

歷世真仙體道通鑑卷之四十八

歷世真仙體道通鑑卷之四十九 潛夫

澤雲山聖壽寺年宮道士趙道一編修

侯先生

侯先生莫知何處人也宋仁宗慶曆年間貨藥於京師先生年四十餘無鬚眉若患風疾者身有瘤贅隱起徧於肌體周遊市里行以貨藥藥亦少人買多見半醉夜即與丐者同處有馬元者好修養切疑之一日隨之時盛夏先生出閭闔門至池上以數金與門吏而入元遠望之先生至西北岸解衣入水出沒頗甚自得元乃就視見一蝦蟆其大如席目光如火元遽引退不久先生出著衣而去元乃揖之先生笑曰適子見吾乎元曰然乃召元於酒肆中曰吾乃服氣者也戀帝鄉美酒久未能去乃瓢中出藥一粒曰服之令子壽百歲飲至夜各散去自此不復見有自蜀中來者云見先生貨藥於市

張九哥

張九哥不知何地人也宋仁宗慶曆中間在京師書則閑行於市或問人化錢有餘則復

與人夜多宿空閑室宇或囊壤中雖盛冬單布裘汪流覆面人亦多言其有道者燕王一日登樓看見小兒輩隨九哥行於道王命召

之曰汝有道乎曰不也王曰有何伎藝曰惟學得快活術王笑與之卮酒他日又見復與

之酒一壺歲餘九哥詣宮門謂門吏曰但道張九哥來別大王門吏不爲通九哥趨入王

間諠譁召門吏更以九哥對王遽呼九哥九哥曰嘗蒙賜酒將遠遊故來別也王命左右

酌酒飲之九哥曰某有小伎欲以悅王可乎王曰何伎也九哥曰借帛一匹金剪一柄王

命取黃羅一匹及剪刀九哥取羅重疊而剪爲蜂蝶狀隨剪皆飛去少頃羅無了遺蜂蝶

莫知其數或習王之衣袂或聚美人釵髻他皆散飛庭中王驚顧大喜少選九哥曰恐失

王之帛乃呼之一一皆來復爲羅一端羅中間一缺似一蝶之痕乃一蝶爲宮人所捕也

王曰此蝶可歸乎九哥曰不可也若隨呼而來可既久即已亦留此爲記異也王曰吾壽

幾何九哥曰王壽與開寶寺浮圖齊堅又飲

酒乃去後浮圖災王亦覺其先見之驗如此自此湖湘有人見之豐神如舊

安昌期

安昌期昭州恭城人少舉進士宋仁宗皇祐中朝廷平僂智高推恩二廣凡進士曾試禮

部者皆特試于庭昌期因是得官爲橫州永定尉以事去官遂不復仕獨與一童遊廣東

放浪山水間同年有胡濬者曲江人嘉祐中爲惠州海豐令昌期往過之留甚久杯酒間

多爲嬉戲小伎娛悅坐人因結紙數紐覆而咒之良久器遂動徐徐啓之皆爲鼠矣咀嚼

舉動如真復覆之則依然結紙也時採山藥嚼而吐之以示人皆如膠飴或通夕不寐嘗

指其童謂人曰勿輕此童他日與吾偕隱英宗治平二年復攜童遊廣州清源縣峽山寺

謂僧曰久聞峽山有和光洞故來遊遂與童俱往數日不返僧疑其爲虎所噬率僧僕數

輩徧求之了無所見洞前見有詩石壁上曰蕙帳相辭去猿猴不忍啼琴書自爲樂朋友

孰相攜丹竈非無藥青雲別有梯峽山子暫

隱人莫擬夷齊後題云前橫州永定縣尉安昌期筆

陳景元

道士陳景元字太虛師號真靖自稱碧虛子建昌之南城人師高郵道士韓知止已而別其

師遊天台山遇鴻濛先生張無夢授秘術自幼讀書至老不倦凡道書皆手自校寫積日窮

年初遊京師居醴泉觀衆請開講宋神宗聞其名詔即其地設普天大醮命撰青詞以進既

奏稱善得旨賜對天章閣遂得令師名又改章服累遷左右街副道錄已卯乞歸廬山基親

詔賜白金助之行行李無他物百擔皆經史也所居道儒賢書各爲齋館而區別之四方學者

若果從其遊則隨所類齋館相與校讎於是人得盡其學所役二奴曰黃精枸杞馴而不

狡真有道之役也大臣王安石王珪喜與之遊初歸廬山與安石別安石問其乞歸之意

景元云本野人而今爲官身有吏責觸事遇嫌猜不若歸廬山爲佳安石韻其語書几間

曰官身有吏責觸事遇嫌猜野性難堪此廬

山歸去來復書其後云真靖自言如此景元
喜作正書祖述義之樂毅論黃庭經下逮歐
陽詢化度寺碑耳年七十沐浴改衣韻語長
嘯一聲正坐而逝其語云昔之委和今之蛻
質非化非生復吾真宅世乃悟其尸解有注
道經二卷老氏藏室纂微二卷注莊子十卷
高士傳百卷文集二十卷大洞經音義集注
靈寶度人經傳于世

劉玄英

劉玄英字宗成號海蟾子初名操字昭遠後
得道改稱焉燕地廣陵人也^{一云大}以明經
擢第仕燕主劉守光為相素喜性命之說欽
崇黃老之教一日忽有道人來謁海蟾乃邀
坐堂上待以賓禮問其氏族名字俱不對但
自稱正陽子海蟾順風請益道人為演清靜
無為之宗金液還丹之要既竟乃索雞卵十
枚金錢十文以一文置之几上累十卵於錢
若浮圖之狀海蟾驚異之嘆曰危哉道人曰
人居榮祿之場履憂患之地其危有甚於此
者復以盡其錢擊破為二擲之遂辭而去海

蟾因此大悟是夜命家人設宴棄擲金玉玳
瑁解印辭朝易服從道有詩云拋離火宅三
千指屏去門兵十萬家紀當時之實也一旦
遽辭燕地遠泛秦川陶真於秦華之前遁跡
於終南之下韜光隱晦人莫測其所以然一
云為燕丞相一旦遽悟棄官學道後遇呂洞
賓得金丹之秘旨自此往來終南秦華間復
結張無夢种放訪陳希夷先生為方外友亦
間作詩有詩集行於世其詠修煉則有還金
篇行於世後隱代州之鳳凰山宋仁宗天聖
九年遊歷名山所至多有遺迹一日於州壽
寧觀題古詩十韻云醉走白雲來倒提銅尾
索引箇碧眼奴擔著獨壺癭自言秦世事家
住葛洪井不讀黃庭經豈燒龍虎鼎獨立都
市中不受俗人請欲攜霹靂琴去上芙蓉頂
吳牛買十箇溪田耕半頃種秫釀白醪抱是
仙家境醉卧松陰下閑過白雲嶺要去即便
去直入秋霞影仍自寫真其傍撮襟書龜鶴
齊壽四字題云廣陵閑民劉某書至鳳凰山
來儀觀亦自寫真飛白清安福壽四字所畫

五星惟土宿尚存其所寫真幅巾黃衣右肩
挑酒瓢左肩提布囊破綻處補之氣韻言澹
人望之知為有道者又寄於成都府青羊宮
澄墨成壽山福海四字二處相隔地里甚寧
至來儀僅兩舍西蜀至代數千里皆同日時
而書之以示分形散景神變無方之妙丹成
尸解有白氣自頂門出化而為鶴飛而冲天
全真傳云十二月二十四日降世十一月二
十七日上昇不記何年大元至元六年正月
褒贈海蟾明悟弘道真君

張用成

張伯端天台人也少無所不學浪迹雲水晚
傳混元之道而未備孜孜訪問徧歷四方宋
神宗熙寧二年陸龍圖公就鎮益都乃依以
遊蜀遂遇劉海蟾授金液還丹火候之訣乃
改名用成字平叔號紫陽修煉功成作悟真
篇行於世嘗有一僧修戒定慧自以為得最
上乘禪旨能入定出神數百里間頃刻輒到
一日與紫陽相遇雅志契合紫陽曰禪師今
日能與同遊遠方乎僧曰可也紫陽曰唯命

是聽僧曰願同往楊州觀瓊花紫陽曰諾於是紫陽與僧處一淨室相對瞑目趺坐皆出神遊紫陽纔至其地僧已先至遶花三匝紫陽曰今日與禪師至此各折一花為記僧與紫陽各折一花歸少頃紫陽與僧欠伸而覺紫陽云禪師瓊花何在僧袖手皆空紫陽於手中拈出瓊花與僧笑翫紫陽曰今世人學禪學仙如吾二人者亦間見矣紫陽遂與僧為莫逆之交後弟子問紫陽曰彼禪師者與吾師同此神遊何以有折花之異紫陽曰我金丹大道性命兼修是故聚則成形散則成氣所至之地真神見形謂之陽神彼之所修欲速見功不復修命直修性宗故所至之地人見無復形影謂之陰神弟子曰唯紫陽常云道家以命宗立教故詳言命而畧言性釋氏以性宗立教故詳言性而畧言命性命本不相離道釋本無二致彼釋迦生于西土亦得金丹之道性命兼修是為最上乘法故號曰金仙傳大士詩云六年雪嶺為何因只為調和氣與神一百刻中為一息方知大道是

全身鍾離正陽亦云達磨面壁九年方起內院世尊冥心六載始出凡籠以此知釋迦性命兼修分曉其定中出陰神乃二乘坐禪之法奈何其神屬陰宅舍難固不免常用遷徙一念差誤則透靈別殼異胎安能成佛是即我教第五等鬼仙也其鬼仙者五仙之下一也陰中超脫神像不明鬼關無姓三山無名雖不入輪迴又難返蓬瀛終無所歸止於投胎奪舍而已其修持之人始也不悟大道而欲於速成形如槁木心若死灰神識內守一志不散定中以出陰神乃清靈之鬼非純陽之仙以其一志陰靈不散故曰鬼仙雖曰仙其實鬼也故神仙不取釋迦亦云惟以佛乘得滅度無有餘乘又曰世間無有二乘得滅度惟一佛乘得滅度爾釋迦之不取二乘即我教之不取鬼仙也奈何人之根器分量不同所以釋氏說三乘之法道家分五等仙三千六百傍門法也鍾離真人云妙法三千六百門學人各執一為根豈知些子神仙訣不在三千六百門此正釋迦所謂惟一佛乘得

滅度之意也一云英宗治平中龍圖陸公帥桂林取紫陽帳下典機事公移他鎮皆以自隨最後公薨於成都紫陽轉徙秦隴久之事扶風馬默處厚於河東處厚被召臨行紫陽以悟真篇授之曰平生所學盡在是矣公流布此書當有因書而會意者後處厚出為廣南漕紫陽復從之遊於元豐五年三月十五日跌坐而化住世九十九歲有尸解頌云四大欲散浮雲已空一靈妙有法界圓通一好禪弟子用火燒化得舍利千百大者如笑實烏色皆紺碧群弟子至遂指謂曰此道書所謂舍利耀金姿也後七年劉奉真遇紫陽於王屋山留詩一章而去徽宗政和中紫陽一日通名姓謁黃公冕仲尚書於延平黃公素傳容成之道且酷嗜爐火年加耄矣語不契而去繼後寓書於黃敘述甚異其孫銓見其書秘不盡言其中大略紫陽自謂昔與黃皆紫微天宮號九皇真人因誤校勘劫運之籍遂謫於人間今垣中可見者六星而已潛耀者三用成見仲洎維揚子先生也用成為

紫陽真人冕仲曰紫元子公曰紫華一時被謫官吏皆已復于清都矣今用成又證仙品獨冕仲沈淪於宦海凡當爲人十世今九世矣來世苟復迷妄合塵別淪異趣無復昇遷之期紫陽故叙仙契力欲推拔而黃公竟不契以歿惟自號紫元翁而已九皇不載于天官即微星也度弟子不一其弟子白龍洞劉道人名奉真白日飛昇即建康府劉斗子也

馬自然

馬自然不知何許人也少習修真煉氣之方年六十有四至建昌酒壚見四道人衣百結而儀觀甚偉有童在傍自然問其氏名答曰鍾離先生呂先生劉海蟾陳七子也自然大驚僕僕往拜之鍾離真人曰汝骨氣異凡曹吾數十年求可教者莫爾及也俄與呂陳二公偕去曰爾有師矣獨海蟾留乃爲自然演金丹之秘曰杳杳冥冥其中有精恍惚惚其中有物非常物也精非常精也天得之以清地得之以寧人得之以靈夫能抱元守一回天關轉地軸則陰陽會而乾坤合矣於

是開坎離之戶使龍虎交媾入戊己之變化此上天之靈寶妙中之妙者也是法者人皆有分焉惟其識昧神昏沈溺愛欲或知之而未達閑息孤坐存神入妄激津則嚙唾導引則勞形辟穀則中餒吐納則召風邪外荒則燒鉛汞內荒則淫陰丹如是不煉而神不存矣自壯而趨老自老而趨死如六驥扶隙亦可哀哉爾當求精於杳冥求物於恍惚形神洞達與道合真自然聞其言而師之遂得道後遊廬山酣寢石上踰六旬堯者過始驚寤之俄去入閭阜山登紫房訪清虛時復往來市道上著蓑裳冠笠持大鐵杓化錢市酒醉則徜徉山澤間其後不知所終

石泰

石泰常州人字得之號杏林一號翠玄子遇張紫陽得金丹之道初紫陽得道於劉海蟾海蟾曰異日有爲汝脫羶解鎖者當以此道授之餘皆不許其後紫陽三傳非人三遭禍患誓不敢妄傳乃作悟真篇行於世曰使宿有仙風道骨之人讀之自悟則是天之所授

非人之輒傳矣中罹鳳州太守怒按以事坐黥寬經由邠境會大雪與護送者俱飲酒村肆杏林適肆中既揖而坐見邀同席杏林笑顧爲此衆客方懼彼客未成飲盍來相就於是會飲酒酣問其故具以告杏林念之曰邠守故人也樂善忘勢不遠千里能迂玉趾有因緣可免此行紫陽懇請護送者許之諾相與於邠杏林爲之先容一見獲免紫陽德之曰此恩不報豈人也哉子平生學道無所得聞今將丹法用傳於子杏林拜謝仰受付囑苦志修煉道成作還元篇行於世壽一百三十七於宋高宗紹興二十八年八月十五日尸解作頌云雷破泥丸穴真身駕火龍不知誰下手打破太虛空後二年易介復見杏林於羅浮山

薛道光

薛道光一名式一名道源陝府雞足山人也一云閬州人字太原嘗爲僧法號紫賢一號毗陵禪師雲遊長安留開福寺參長老修嚴巖與道眼因緣金雞未鳴時如何沒這音響

又參僧如環得如何是超佛祖之談糊餅圓陀陀地因枯樺頗有省悟有頌曰軋軋相從響發時不從他得豁然知枯樺說盡無生曲井裏泥蛇舞柘枝二老然之自爾頓悟無上圓明真實法要機鋒迅捷宗說兼通且復雅意金丹導養宋徽宗崇寧五年丙戌冬寓郡縣之青鎮聽講佛寺適遇鳳翔府扶風縣杏林驛道人石泰字得之年八十五矣髮綠朱顏神宇非凡夜事縫紉紫賢心因異之偶舉張平叔詩曲石矍然曰識斯人乎吾師也備言紫陽傳道之由紫賢乃稽首皈依請因受業卒學還丹傳受口訣真要且戒令往通邑大都依有力者即可圖之紫賢遂來京師棄僧迦黎幅巾縫掖和光混俗顯了此事乃註解悟真篇作復命篇及丹髓歌行世紫賢遁成壽一十四歲於光宗紹熙二年九月初九日尸解作頌云鐵馬奔入海泥蛇飛上天蓬萊三島路元不在西邊明年沙道昭復覓紫賢於霍童山

陳楠

陳楠字南木號翠虛惠州博羅縣白水巖人以盤纏箍桶為生浮湛俗間人無知者作盤纏箍桶頌盤纏頌云終日盤盤圓又圓中間一位土為尊磨來磨去知多少箇裏全無斧鑿痕箍桶頌云有漏教無漏如何水泄通既能圓密了內外一真空其言下超悟如此根器繁可想見也後得太乙刀圭金丹法訣於毗陵禪師得景霄大雷琅書於黎姥山神人每人未符水翠虛拾土付之病多輒愈故人呼之為陳泥丸宋徽宗政和中提舉道錄院事後歸羅浮以道法行於世所至與人治鬼潮陽民家女苦狐厭狂易無度翠虛用雷符熏狐魅殺之時披髮走日行四五百里雞衣百結塵垢滿身間食犬肉終日爛醉莫測所如而濟人利物效驗有不可殫者嘗之蒼梧遇郡禱旱人憂喝死翠虛執鐵鞭下淵潭驅龍起須臾陰雲四合雷雨交作境內霑足遂為豐年過三山大義渡洪流湍悍舟不敢行翠虛浮笠而濟行欽管道上遇群盜拉殺瘞之後三日盜散復難遊長沙衡帥節制拘

送邕州去數夕又回長沙矣中夜坐或舍水銀越宿吐視已成白金乞與其徒不顧翠虛常自言閱世四十三然有四世見之者湖廣中人常問翠虛覓詩但自口縷縷而出皆成文理第不肯親書竟未解其故有翠虛妙悟全集行世及作羅浮翠虛吟以丹法授瓊山白玉蟾其出入玉蟾常侍左右翠虛於寧宗嘉定六年四月十四日在漳州赴鶴會罷說與會主云我當來會裏尸解會主不以為事遂留四句命玉蟾題之曰頂上雷聲霹靂混沌落地無蹤今朝得路便行騎箇無角火龍彼時玉蟾隨侍在漳州梁山翠虛與一箍桶老子倚角入水而逝其箍桶老子先有一斧在地再尋其斧斧亦不見玉蟾嘆曰此水解也當日有葛縣尉在漳州寧鄉縣見之翠虛與尉之父為久契因寄一書使尉歸潮達其父後方知當日在此尸解在彼見也翠虛度弟子三人鞠九思沙蟄虛白玉蟾

白玉蟾

先生姓白母以玉蟾名之應夢也字以閱衆

甫一字如晦世爲閩人以其祖任瓊州之日
故生於海南乃自號爲海瓊子或號海南翁
或號瓊山道人或號蟾庵或號武夷散人或
號神霄散吏幼舉童子長遊方外得翠虛陳
泥丸先生之道當時士大夫欲以異科薦之
弗就也自得道之後蔬勝絕粒凡九年而四
方學者如牛毛若夫出處之大槩與其著書
立言之畧及所行有神異靈奇之處備見諸
書其初先生事翠虛九年始得其道翠虛遊
方外必與先生俱逮翠虛解化于臨漳先生
乃獨往還於羅浮霍童武夷龍虎天台金華
九日諸山擊頭跣足一衲弊甚而神清氣爽
與弱冠少年無異喜飲酒不見其醉博洽儒
書究竟禪理出言成章文不加點隨身無片
紙落筆滿四方大字草書視之若龍蛇飛動
兼善篆隸尤妙梅竹而不輕作間自寫其容
數筆立就工畫者不能及受上清籙行諸階
法於都天大雷最著所用雷印常佩肘間所
至祈禳輒有異應時言休咎警動輿俗姓名
達於九重養素之褒笑而不受有願從之遊

者莫得也嘗在京都遊西湖至暮墮水舟人
甚驚遙湖而尋不見逮旦則先生在水上猶
飄然也一日有持刃追脅者先生叱之其人
不覺墜刃而走先生召之曰爾來勿驚遽以
刃還之鄙人有稱先生入水不濡逢兵不害
者後縱遊名山莫知所之劉後村序工隱六
死非或云尸解於海豐縣

彭耜

彭耜字季益世爲三山人奕世顯宦自其少
時早有文聲自中銓後恬不問仕事海瓊先
生白玉蟾得太一丹圭火符之傳九鼎金丹
砂汞之書紫霄嘯命風霆之文歸作鶴林賦
復作詩曰買得螺江一葉舟功名如蠟阿休
休我無曳尾乞憐態早作灰心不仕謀已學
漆園耕白兆甘爲閑令候青牛刀圭底事憑
誰會明月清風爲點頭其所居立鶴林靖日
以孔老娛其心以符治疾多所全濟鄉邦得
之一時富貴多勉其仕宰不可破然而學問
博洽趣尚清遠須古之孝廉不是過也當路
欲以隱逸薦之于朝君聞而遜謝之終日杜

門與世絕交遊凡生產家人之事嘗不經意
其內子潘藻珠厥志一也晨夕惟薰修而已
耜得興則賦詩或亦飲酒飲必大醉冥然後
止遇有鬼神加害者則以丹符療之遂愈其
沈酣道法呼嘯風雷人所敬慕後尸解於福
州今城東有鳳丘山鶴林道院存焉

朱橘

朱橘號翠陽世居淮西安慶之望江其先世
皆無聞於時橘之生也母嚴氏夢吞一星光
大如斗已有娠十五月母常憂焉一日遇道
人於門首手持一物如橘謂其母曰食此子
生矣母喜而受之請問名氏道人乃出神中
一扇示之上有鞠君子三字曰吾姓名也言
訖遂失其所移時而橘誕時壬戌仲冬二十
有六日也父異之因命名橘子及六歲而怙
恃俱失橘生而聰慧有志儒業尤精易數且
謂丹道造化之妙無出於此嘗兩領鄉薦未
遂科第之志喜聞道釋之書後因臨池顧影
倏然驚悟乃厭薄名利欽慕修煉所至名山
勝地必遂登覽意在得師以證入道歲在戊

子因往惠之博羅一日屋中遇一道人手握一橘狀若風狂且行歌笑而吟曰橘橘橘無人識惟有姓朱人方知是端的衆皆駭之莫曉其意獨橘有所感隨至郊外無人之境乃拜而問曰真人非鞠君子乎道人驚曰子何人也橘以姓名告乃悟昔之時事道人曰子自謂平日所欲者何或富或貴惟汝擇之吾從所請橘笑而答曰人生富貴如海上蜃空中雲聚散何有定據惟聞神仙有長生不死之旨換骨回陽之妙可得聞乎道人默然弗答橘乃涕泣而復請曰宿生慶幸獲遇仙君不揣愚蒙願垂點化道人因為之說曰夫息者自心也元氣也乃虛無之根造化之主升降離合悉從心起衆生所以迷失本真輪迴六道流浪四生者爲不能了此心爾故古仙人上人惟欲人明了此心了心則見自性見自性則去聖不遠若此心不明了皆非正覺無上至真之妙道也橘一瞬斯語恍如自失道人乃指山前一大石約以明日早至吾當度汝橘一再往道人已先坐于石上曰子來何

遲橘乃愧謝而退及夜半而往焉道人曰子之來今其時矣遂與之盟天誓地即以九鼎刀圭火符之訣五雷金書玉篆之文九八飛神陽道之法心傳口訣悉以付之且誠令往皖公山築室依法修煉後當有一小兒至宜以道法傳之繼汝後也餘皆勿許功成之日吾當保舉汝登雲天矣橘拜謝訖道人乘雲冉冉而去道人者即橘母所遇之鞠君子號九霞九霞之師則翠虛陳泥丸也橘敬遵其教入皖公山築室修煉後有登山者見一小兒潔白如玉洗手庵前皖水之上其行如流星之速及隨其所之入庵而不知其所止惟橘儼然端坐人皆謂橘嬰兒之顯相也橘後爲寇所撓入閩至惠之博羅有鄉人陳六者在彼因爲少留與之終日醉酒爲樂茹葷食肉無所忌擇或訝而問曰先生平日齋戒如此今反嗜如彼何邪橘答曰吾所以混俗和光同塵不欲自異爾子不聞魚之與虎乎魚若異群棄水躍岸則死虎若異群棄山入市則擒吾但心與道冥超乎萬幻至理之妙身

外有身故非世俗所得而知也橘留惠三載一日天氣嚴寒忽謂鄉人陳六曰吾將去矣汝盍爲我國之陳莫能測翌日橘乃坐化於旅館中陳乃與其館主謀之扛擡橘於門首緣化得錢十餘貫爲殯埋之奉及次日橘乃復甦越數日入城中又謂陳六曰吾今當立化於縣衙前陳從其言化後用泥塑之駁而聚觀者千餘人忽博羅狼吏醉呼而前曰汝前日假爲坐化今復假爲立化遂執梵鞭之惟見堆泥墮地而已衆人方知橘示神變而尸解云時宋理宗淳祐二年十一月十三日也橘有弟子姓鄭名孺子號翠房

歷世真仙體道通鑑卷之四十九

歷世真仙體道通鑑卷之五十

潛七

浮雲山聖壽萬年宮道士趙道一編修

楊宸

楊宸榮德人也隱居不仕人謂之隱君父漢瓊周世宗顯德中守合陽罷歸疽發于腠隱

君自吮疽歲餘漢瓊良愈由是以孝聞隱君深重有奇志能殖其財至鉅萬謂其子見素曰三分吾產一以奉老佛一以賑窮之一以贖吾宗汝任吾事吾將有所適於是徑去謁希夷先生於華山先生授以道要臨別餌以

丹大如芥子遂返其里中因不復食一日取

囊中金百斤投之江曰財不足貪也願生賢

厚子孫其後益沈默每天大雨仰屋溜以

灌其首雨止乃已冬寒涸汲水沐浴氣上如

蒸年八十八而化踰五十年忽來見從子籍

云爾命將終已而果然

李鑒夫

李鑒夫不知何許人也宋太宗太平興國初來遊蓬池居開元精舍都寺未之奇也一日間窺先生劍出眉間燦燦如電先生彈其缺

且歌且舞已復納於眉間都寺大駭始厚禮之俄醉踣於路以卒官為瘞之未幾或見於傍郡歸告與先生雅游者發其瘞失其所在

趙靈運

趙靈運不知何許人也宋太宗雍熙中為莫

州莫縣令歲大旱祈禱不應慨然嘆曰吾為

令而旱如是如將不得粒食吾何以生為耶

積薪于庭着道士服執簡焚香請于上帝曰

三日不雨以此自焚居三日天晴無纖雲乃

趨薪所方舉火而雲起雷電大雨大即滅有

五色雲覆薪上俄與所侍邑小吏乘雲而去

後人即其地築趙仙壇焉

屈突無為

屈突無為字無不為世不知其里諺但云五

代時得道教書號神和子言保護鉛精可以

成變化者也張忠定公少游東都與神和子

同逆旅初不知也神和子意喜忠定公日會

飲酒家將別去復崇飲且醉忠定公曰與子

傾蓋於此而不知子為誰異日巨識奈何神

和子曰吾隱者何有姓名為哉苦問之則云

神和子也後當見子成都至宋徽宗時忠定

公出守成都始思其言異之凡再入蜀物色

神和子不可得後營繕天慶觀築望仙閣間

輟游焉燕坐終日莫有所遇終不克也逼交

符復一往將意絕於此矣薄暮步出東廡得

微徑而入稍探抵精舍周四墉皆畫古人像

而埃塵黢黢掃牆視之中有一羽服者恍然

似逆旅中所覩也題曰神和子忠定公悵然

自失神和子後亦莫有見者

利州綿谷縣鳥

率子康

率子康衡山農夫也愚朴不遜眾謂之率牛

後入南嶽觀為道士觀西南七里紫虛閣

故魏夫人壇也他道士惡荒寂莫肯居先生

獨樂居之人莫見其所為頗嗜酒往往醉卧

山林間大風雨至不知也虎狼過前亦莫之

害故禮部侍郎王公祐出守長沙奉詔檇南

嶽訪魏夫人壇先生方醉不能起直視曰村

道士愛酒不能常得輒徑醉官人怒之王公

察其異載而與歸居月餘落漠無所言復還

還山曰尊師翁光內晦所不測也今當以詩奉贈既而忘慮晝寢夢來索詩乃作二絕句

書板置閣上衆道士驚曰率牛何以得此宋

太宗太平興國五年六月二十七日忽謂觀

中人曰吾將有所適閣不可無人當速追繼

我者衆益驚曰天暑如此率牛安往耶狼狽

視之則已死矣始大異之曰率牛乃知死者

即葬嶽下未幾南臺寺沙門守澄自東都還

見先生南薰門外神氣清逸守澄問何故出

山曰閑遊爾因寄一書致謝衡嶽李尊師歸

乃知其死日見先生時也遂發其冢觀之杖

屨而已

劉希嶽

劉希嶽字秀峯漳州人也少業儒三以進士

舉於鄉宋太宗端拱中乃去爲道士居西都

老子觀中六十四歲始遇異人得道因號明

然子嘗自言辛勤未逾十年人驚不老歲月

俄經一紀自覺如新亦有詩云夾脊雙關至

頂門修行逕路此爲根一日辭去其衆曰汝

老矣尚何之耶秀峯不答沐浴更衣室中陳

席而卧斯須其卧內有聲飛出一金蟬遂失

秀峯所在嘗著詩三十餘篇行於世

穆若拙

穆若拙莫詳其里諜與所以登仕版者宋太

宗端拱中爲涪州肥縣令八月既望宴客縣

庭既罷獨處便坐忽管絃之音出雲霄間少

焉有童子持玉函乘雲而至曰上帝有詔穆

若拙有陰德無缺行召昇南宮列仙若拙乃

焚香下拜登受與童子同昇天而去其吏奔

告其家至已無及矣但聞天香馥郁空中樂

音尚嘈嘈也邑人圖像其容奉祠甚謹

音尚嘈嘈也邑人圖像其容奉祠甚謹

呂大郎

呂大郎大名成安人也家始饒財大郎既壯

落魄盡費貲然無毫髮恨意宋真宗景德中

忽發狂同章市遇餅餅輒奪食見黎核棄道

上亦取啗之後有道人接入山大郎口許諾

而意不能忘其家也道人曰汝可去將葫蘆

十數衣冠寘諸榻夜以劍斷葫蘆已則挂劍

扉上亟去無旋顧大郎既還如道人所誠斷

葫蘆矣已試旋顧則見家人皆斷首泣涕而

去及旦家人復見大郎投環扉上死矣遂瘞

之居數月鄉人自安陽以大郎書來家人大

駭往啓其瘞則前所挂劍焉

王鼎

王鼎襄陽人也其初蓋寄迹醫卜中以養妻

子嘗有詩云也有山妻也有兒也爲卜筮也

爲醫後遇鍾離先生得道作詩云假裏淘真

十八年今朝始遇漢朝賢遂自號王同子人

不見其飲食也一日行江干或見二影在水

中怪而問其故曰若欲更見之乎斯須十餘

久乃沒宋真宗祥符中召至禁中麻衣草履

長揖而已後去不知所之著修真書行於世

劉昉

劉昉字中明酸棗人也初爲丞相府卒吏積

勞出爲左殿直已而歎曰爲吏徒勞爾吾將

清吾中扁脫履塵垢之外與安期羨門並游

乃屏居東都委巷中惟務衣食其凍餒而樂

石其疾苦然未嘗出也達官要人稍稍聞其

名願見中明不可得多就見之中明久頗不

樂繼而阿保死中明遂飄然有遠引意曰吾

無累矣即南游衡山訪養素先生藍元道繼又往郴州時從弟質為青州從事舍中明於家中明曰吾惡簿書敲朴而逃之豈能復從爾居乎乃止於東山僧坊沙門道覺詫中明曰吾然膏油於如來前二十年矣勝利富無涯中明曰異乎吾所聞修行子以身為禁戒行為膏油以心為然器照一切無明古有然燈佛是也道覺大歎異之居百餘日別質而去曰吾方放志宇內以好山為所棲白雲為故鄉恨子不得俱爾後於南康伽藍戶解其徒定子伽藍傍有邑令拜其寔寔中呼曰上暴珍斷無明勿冒賄勿枉刑令愕然而去侯用賢至閩州見中明葛屨賣藥於市簡有從亦嘗見於東都問曰先生尸解何至此耶中明曰無則入有解乃歸真吾家常事耳子何訝焉有從曰居與先生同開先生面若紅瓊有從將為朽骨獨不念之乎中明曰踰五十年雖志於道如敗屋然枝傾漏苴第可延歲月況子行年七十平生好法律佐人爭訟損子陰德多矣尚何言遂徑去有從追之中

明曰子歸可矣吾孤雲野鶴子焉能及我哉遂去不知所之

羅道成

宋仁宗慶曆年間有處士遊東嶽謁主簿郭及甫既坐視其刺乃羅道成詢其鄉里曰郴人及甫留飲處士曰久思東州之遊前日至泰山已歷徧也旦夕回南方乃借紙筆為詩曰因思靈秀偶東遊碧玉寒堆可疊秋直上太平高處望根盤連接十餘州復自和云水雲蹤跡日閑遊夏谷陰寒冷勝秋猿鳥性情猶戀舊翻身却去海邊州及去及甫遣人送之至即又為詩付吏曰白驢代步若奔雲閑人所至留詩迹欲知名姓問源流請看柳陽山下石後詢郴人曰地有羅真君觀因得道跨白驢行石壁上其驢迹至今存焉

曾志靜

曾志靜廬陵人也少不飲酒食肉端毅寡言既勝冠去為道士益玄默不與世接忽有異人過之授以道自是杜門辟穀者達五六年異人來視之曰未也與之語而去踰數年復

至曰可矣志靜遂徹關闢人窺之神觀五立矣宋仁宗至和二年春忽告其徒曰吾九月為衡山之遊世外之期不可失也至期正坐而化既葬方首冬傍有桃灼然放華俄有自衡山持志靜書來勉其徒學道云

歸真子

唐子正桂州人宋英宗治平中赴京調舉至全州途中雇一夫挈重檐動若健羽雖鞭馬疾追常先百步外恐其逸去遂遣之其僕即日自全二千七百里日午已到唐州留書寄驛吏曰候桂州唐秀才至即付之唐後月餘方抵唐驛吏出書題云呈桂州唐秀才歸真子謹封及開緘惟一詩曰袁州相見又之全不過先生道未圓大抵有心求富貴到頭無分學神仙篋中靈藥宜頻施竈裏朱砂莫妄傳待得角龍為宴會好來黃壁卧林泉唐詰其狀貌乃所雇僕也留書之日即全州所遣之日後倖邕州神宗熙寧三年丙辰交賊寇邕唐盡室遇害所謂角龍也

孫希齡

孫希齡不知其里居亦莫詳何代人也宋英宗治平中供奉官陳允監衢州酒務時已七十餘髮禿齒脫孫往候之衣服縑縷允意少之孫俄出一刀圭令允拭齒允未之信他日取以索上齒家人見而笑曰何用黑鬚耶允驚取鑑照之^七髮果黦如也去巾視重首則髮已數寸脫齒亦隱然有生者孫則不復知其所之矣

周貫

周貫自言膠東人年八十歲常稱不爲子善屬文游於洪州西山嗜酒不羈布褐粗全人或贈之錢則詣酒家取醉餘皆散墜不顧西山之人見貫往來者五十餘年而顏如初至有以道術訪之則必報以惡聲使之親近不得也常蓄一瓢置酒其中喜作詩一日止奉新龍泉觀道士合門鼓琴貫以箒自覆忽叩扉大呼道士驚問笑曰偶得佳句告子爾道士殊不意問之因使口誦貫以手指畫吟曰彈琴傷指甲蓋箒損髮鬚又至袁州見市人李生爲其遠韻欲與俱飲李生有難色貫指

焚藥鑪歌以譏之云頑鈍天教合作鑪縱生三脚不能行雖然有耳不聽法只愛人間戀火坑宋神宗熙寧元年至豫章石頭市遇故人張生爲具酒食而宿旅邸中夜主人聞戶外車馬合沓聲起而視之無有也惟貫所卧室戶正開猶奄奄^七然喘息就而察之貫已死矣明日告新建縣吳景即往按之貫身柔索如生扶而轉之腹中汨汨有聲縣主簿劉純臣使人棺斂埋之張生還家其弟出迎門曰周翁凌晨見過云今往雙嶺矣衆乃知貫非實死也貫所著華陽集三篇坐卧不離懷袖人莫得見死之日純臣取而有之純臣稱其文險絕而有條理純臣以詩記之曰八十西山作酒仙麻鞋乳斷布衣穿形骸一脫塵緣去太極光陰不記年後又有人見之於東都貫令持書約李生云我明年中秋夕當上謁也至期果造李生家時李生以事出貫乃以白土大書其門而去曰今年中秋夕來赴去年約不見折脚鑪彈指空剝剝李生後竟墮馬折一足也

劉元真

劉元真字子直葉原人也世爲農夫與客奕棋子直方毀亂卧杏下忽寤驚告其父曰適夢道師譴兒爽且以杏啗兒自是不復食既長棄家徜徉終南山水間俄於莎嶺谷得淨屠廢祠居之盛冬而裸惟以木葉蔽後前時有笙簫鍾磬之音群仙下其室嘗與人同行道中見有騎而過者子直語之曰幸以吾民爲念騎者去同行者問其故子直曰華山神也上帝以麥有秋民不之愛使收什二吾爲民請焉且曰宜亟行前得道傍舍方休而天暴雨大雷以風麥敗什二人稍稍異之相率立庵廬子直因爲煉丹嶺上踰九年戒其傍居人曰吾丹將成爾爲吾伐鉦鼓助之傍居人爭持鉦鼓往果有異獸駭而去子直取丹沈於泉居一年出之以施傍居人餌之者皆壽百餘歲宋神宗元豐中子直辭其鄰曰上帝召我當與爾別於是晝有雲彩如虹垂庵廬前子直乘之而去有劉益者師子直得守一存三之道

陳太初

陳太初眉山市井人子也與蘇東坡同學八歲師道士張易簡易簡稱之東坡擢第進二而太初爲郡小吏其後東坡謫居黃州有眉山道士陸惟忠自蜀來云太初已乃解矣蜀人吳師道爲漢州太守太初往客焉正旦日見師道求水食錢物且告別持所得盡與市人貧者返坐於戰門下遂化師道使卒昇往野外焚之卒罵曰何物道士使我正旦昇死人太初微笑開目曰不復煩汝昇乃步自戕門至金鴈橋下趺坐而逝一城人見煙焰上渺渺然一陳道人沖虛而去

馬宣德

馬宣德不知何許人也嘗仕至宣德郎宋神宗熙寧中宋若谷通判奇嵐軍一日宴坐宣德遣蒼頭奴持謁入宣德繼至冠三山幘披紫鶴氅坐定言曰吾謝事久矣聞君世慕道所以來吾居抱犢山君後一月當往彼幸訪我若谷莫之測姑嚙然應曰諾既去如其期若谷果彼命按牧馬地至抱犢山尚不省宣

德與有約也吏曰蹊蹊險遠不可往若谷曰上命也可辭乎叱馭驥之抵其岑絕見一童子道周致宣德意召若谷若谷始大驚披蓐莽從之道上皆虎狼交迹其深有茅廬一區宣德肅於門延入具盤殮散數多藥苗也室有鍾光景赫然指示若谷曰吾煉大丹已有成者子遇此殆有緣乎取二丸遺若谷餌之若谷俄趨出回顧蒼崖喬木煙雲鬱鬱而已若谷時已六十二鬚鬢蒼白歸所舍攬鏡視之則返黑矣尋去奇嵐來東都遊湘國伽藍稠衆中有道人呼曰君腹有大丹厚護持言已不見若谷家饒財多蓄侍女不能如道人戒至八十餘歲口吻忽吐赤光而卒

胡用琮

道士胡用琮號沖真子幼脫俗緣留心修煉隸籍於廬山太平興國宮宋神宗熙寧中有道人破衫弊履自稱姓名突入庫堂傍若無人道士見者不顧而去獨胡揖坐小床從容款話驚其仙風不凡待遇加禮既而索酒再飲復與胡出飲于邸胡辭以日暮回掀髯一

笑而別翌早胡入城謁郡侯抵關未啓鑰道人又自城而出笑以相顧關吏去未三鼓時有回道人在此候門開不知何人也胡心因異之後數年革帶麻屨挑二壺號大宋客訪胡于道院談論清雅胡問此壺何用答曰行李也傾壺視之皆黃白之物問胡欲此否胡答不願但得長生之術足矣就取碎銀鬻酒與胡飲口授至道及日暮以刀刺土瀝酒漱津和土嚥呵成墨擲之几上鏗然有聲語胡曰服此可愈疾入仙矣再飲胡醉倒及醒來但聞異香滿室剝土處有泉透出不知客之所在胡以墨研酒飲宿疾頓蘇年逾七旬貌若處子酒量如初由是漸厭人間一旦留詩說形而去今宮有墨仙泉掬飲味甘冬夏不竭王左丞東宋侍郎伯友及諸名公皆有酬倡留題並載本宮名賢詩集并有胡公遇仙傳載舊記碑刻

黃知微

黃知微字明道廬山太平興國宮道士也果性冲淡賦形豐偉宋神宗元豐間充知殿奉

香火一日潛山體道先生崔君來訪因語泥丸萬神刀圭一粒之妙遂授一九谷神之道金液淪景之旨從此若伴若蹶散誕靡常時人呼為黃風子遂自賦黃顛歌賦本性嗜酒每醉則浩歌罷顛狂常在官前朝真橋上

疾聲大呼若有所呵一衲百結裸露不顧隆冬盛夏恬無寒暑士夫間有施惠者隨手散去或居山間或遊城市常挈兩布囊每遇餅餌藥物之屬雜貯囊中了無穢氣號曰錦香

時有大雪林壑變白獨先生所居之屋無雪常指室傍壁鐫示人曰此吾遊蜀之路也初不知書所談多史傳素不能文而所出皆高妙之句猴溪蔡子高司馬知白崔風子高赤脚皆與交游徽宗崇寧末年逾九十貌若處子肌膚如玉狂態如初酒量不減宣和末詔

徵不起有司強之至九江曰今二天子矣我往何為繼而淵聖登極敕至本宮未回祿日先生於採訪殿揭覽殖蒿曰明年了來次年韓世清賊馬果焚宮庭乃殖蒿之日也談人禍福歷歷皆驗先生羽化瘞于官側後數年

有自蜀中回者曰黃風子今在蜀昨於成都相會寄家書在此衆疑之開械乃是喪亂後所存道士姓名於是發棺視之惟衣履在

畢道寧

廬山太平興國宮道士畢道寧字康叔幼穎

悟貌清奇經書一見成誦宋哲宗紹聖間遊

江浙一日到潛山遇方士默會其意乃曰學

道貴乎鍊神氣丹書乃是入道梯媒公若

屏絕俗紛精煉神氣自然通真達靈矣因臨

水指謂曰水定則形直心靜則神寧不可不

鐵達以丹授之曰異日與子再會於聖治峯

下一揖而去恍無所睹畢即日還山適遇宮

副廬席州命帖充未幾巧閑築道院于官之

右鑿池瀦水名曰清新每日杜門存神誦度

人經一卷至徽宗宣和七年正月三日有衣

白山人來訪詰其授沁園春云一粒金丹大

如黍米定中降胎運陰陽根本東龍西虎結

疑金水擇地深栽九載無虧三田功滿卦氣

周圍爐鼎開倫元化用自然宗祖全在靈臺

真才休戀塵埃況頓悟明堂嬰未孩幸淮濱

相遇靈丹付了親留玄旨期進仙階此去何時水雲高會更上煙霞岐路哉人間世任王侯貴顯同委蒿萊畢得此詞越四日整襟危坐而逝今宮之養素堂右軒扁曰清新有沼存焉

田端彥

田端彥齊魯間人也少登進士第宋徽宗崇

寧中簽書判南節度府亡何獄有死囚與太

守呂嘉問議不合即掛衣冠府門去入遠安

山止於清溪精舍率常旦入溪谷抵夕乃歸

居百數十日忽不歸清溪沙門道人求之見

其寢石上二虎守其傍不敢近也自是不知

所之後數年短褐蹣跚負鋤謁妻兄邢恕和

叔於洛時蓋已八十餘而面有少色鬚髮郁

然洛之士大夫皆從之游先生與人談笑傾

蓋或問所以得道者則不對也政和末有遇

於襄鄧之郊其形容不象

劉跛子

劉跛子青州人也往一拐每一歲必一至洛

中看花張丞相召自京湖時跛子與客飲市

橋客聞車騎過甚盛起觀之跛子挽其衣使且飲作詩曰蓬客湖湘召赴京輪蹄相送一何榮爭如與子市橋飲且免人間寵辱驚陳瑩中素愛之作長短句贈之曰槁木形骸浮雲身世一年兩到京華又還來興閑看洛陽花聞道鞋紅最好春歸後終委泥沙忘言處花開花謝不似我生涯年華留不住飢飡困卧觸處為家這一輪明月本自無瑕隨分冬裘夏葛都不會赤水黃芽誰知我春風一拂談笑有丹砂宋徽宗政和中寓興國寺人計其壽百四五十許嘗館于京師新門張大郎店三十年日坐相國寺東書邸中人無識之者

水丘子

水丘子真州人也始業儒已而遇至人乃棄家放蕩嗜酒人未之知也有徐文中者宋徽宗宣和中居東都所役兵忽為車轢臂甚遇道者以藥付之即能行臂兵求道者謝之自是陽狂日啗濕紙冬瓜子曰冬瓜易化濕紙難消或問其道曰清靜是也簡易為上爾文

中由是畧聞其說而心好之未幾遇水丘子再拜求授教水丘子曰人四大假合雜乎芒忽之間變而有氣氣變而有形形以心為君心者神之所舍也神從志無志則從意志致一之謂精惟天下至精能合天下之志神精與神一而不離則變化在我矣此長生久視之道也故不可以心湊泊焉但情不附物物自不能礙爾文中因大悟曰意在脾胃數五為土水得土則止火得土則息精神意所以合而為一手水丘子後登天慶精舍木上仙去文中官至六品後不知所終

歷世真仙體道通鑑卷之五十

歷世真仙體道通鑑卷之五十一 潛八

浮雲山聖壽萬年宮道士趙道一編修

張虛白

張虛白字致祥鄧州南陽人也諱道士籍於太一官身長六尺美鬚髯性靜重通太一六壬術留心丹竈遇異人得妙訣自言前身乃武陵張白先生其徒推武陵尸解年月及虛白誕生之時若合符節武陵平生好酒有詩云武陵溪畔崔家酒地上應無天上雨來道士飲一斗醉卧白雲深洞口虛白亦善飲宋徽宗知其道行過人每召見必飲數觥雖醉益恭上愛之俾管轄龍德太一官宮中增飾四堂曰洪道真學會賓隱真又創諸庵如超然致道運機與十餘小軒皆宸翰榜之悉橫牌額面緣以古錦幽遠華麗田於諸宮雖被眷甚久未嘗少自矜耀凡恩賚無虛日一日快行六人昇三朱函以賜啓封皆麋金拜受之際無喜色曰此朝廷物非道流所可用也但藏之而已宣和末夏大雷雨宣和殿角枝三龍騰躍而去上驚召虛白問曰得非怪

耶虛白曰願陛下修德以禳之虛白少學醫病者求治多立愈上既內禪欽宗召見待遇尤厚凡御前所印經典及三亭所積符籙盡賜之牛車載數日不絕金人犯闕聞其名搜訪甚急初得之肩輿至南薰門諸番爭有與以行悉以神仙事之既陷虜四年金人再至睢陽遊騎入城天慶觀道士皆奔走金人止之曰汝輩多異人無敢傷也因問道衆識張虛白先生否昨至吾境忽一日徧謂諸酋領曰某年月日吾當化去汝俗行釋氏茶毗法道家忌之幸得棺柩瘞深土中至期果化虛白自遭遇官至太虛大夫冲和殿侍宸金門羽客出入禁中以玉牌爲號侍宸之名九人林靈素王允誠徐知常董南運李得柔王冲道若愚王文卿金門羽客惟林靈素王允誠虛白三人而已居龍德太一宮凡十年非宣召不出有就見者必問衆賓禮見於堂上未嘗到權貴人門下侍上前終日論道無一言及時事或問之曰朝廷事有宰相在非臣等所知也

劉卞功

先生劉卞功濱州人也自少好道家居有老父過其門曰善補鐵先生曰我曷能補否老父曰人破尚能補況曷乎先生知其非常人遽再拜老父因以丹餌之自是盡棄世事穿窬室以居人欲見者由竇中入然未有真契者也宋徽宗三遣使召之堅卧不應詔徽宗益欽重之賜號高尚先生先生於書無所不通而初未嘗苦學也與人談必中庸要道大槩云清靜無爲不以外物累心則神全而守固蜂蠆不能毒寒暑不能侵世之人若之何以嗜慾害身以貨財害子孫以政事害人以學術害天下後世致忘其壽命之宗終不覺悟曷若吾上下與天地同流獨不快於心哉欽宗靖康初先生始去其鄉游巴蜀浮江浙窺衡湘蓋有意於接物矣在蜀得二士曰却曰柴自是常從之先生至吳又得桐廬李季次仲授以方書次仲行之甚篤道亦成先生嘗以告鍾離先生求援度次仲云鼻通三劒腦煉九丹次仲妻故盲先生過次仲唾手

拭之乃復明嘗與次仲約明年春赴茅山鶴會次仲如期往有鶴數百飛集山上而物色先生不見獨卻柴二士在焉從而問之則望衆中一人神宇軒舉者曰先生也次仲曰何與昔異乎方士曰先生已換骨矣出一脛骨示次仲次仲至今藏之山有華陽洞石若屏者曲折數重其下陂池不測先生因與入曰吾自此從黃真人游羅浮矣遂不出或云今在蜀之青城山人不得而見之也

劉元道

劉元道字景初開封府人世武弁獨元道慕莊老幼投道士李居演出家服黃冠性簡薄靜厚犯而不較喜讀書道藏之外九經子史歷歷成誦每接賓友似不能言者以事扣之其應如響宋徽宗初興道教詔天下搜訪道家遺書就書藝局令道士校定元道首與茲選自是稍遷簽書道錄院事以至左右街道錄無不徧歷官至太虛大夫紫珠殿校籍繩校之外未嘗更革一事以動人士大夫多以此喜之凡赴內道場或宣至便殿論道賜予

甚厚獨元道所得隨即散之一日林靈鑑以下道官數人侍上側上出寶貨使各隨所欲而取之元道獨取銅器香奩而已金人犯闕多貪金幣道流平日所得官悉搜檢間有抵刑獄者惟元道官知其實無亦不問也性雅不喜釋氏金人犯順之後有溺於浮屠者問云主上好道如此且承襲既今乃爾何也元道答曰梁武捨身為僧奴鑄兵器為道具竟不免侯景所迫是亦事佛所致耶或者唯唯而退元道後隱去民間時有見之者

董南運

道錄董南運字宣明道行高潔其徒素所推伏金人犯闕前一年忽云吾夢仙童齋黃書召我為炎峯主者翌日無疾羽化壽七十餘顏貌如四五十歲人

王秉文

道士王秉文字彥衡隸籍於廬山太平興國宮成道後遊京師時朝廷方建神霄萬壽宮賜紫衣命充典客忽有方士來訪見几間有周易就布算數云此地當有兵厄子非數中

人宜避之因授以存三守一之要黃帝和扁之訣遂辭職還山宋高宗建炎四年本宮燬于賊兵次年寇退募有任其責者王乃領副職於灰燼之餘經營數載金碧像煥然一新遂謝宮事杜門燕居三十餘年即其居曰三

著八

一堂因號三一先生日閱道藏究竟秘訣留心醫藥此外無他嗜好至孝宗乾道二年上元夜夢神人告曰上帝命汝主華大滌洞賜汝返魂丹一粒復汝精神還汝元氣當以神充白馬諸司官吏迎送入洞言訖覺悟翌旦語諸徒曰塵世不足住吾將往矣因取所著聖治顯驗集十四卷西山真君籤解一部十全脉訣一部朝斗紫庭秘訣一卷授與徒孫秦致祥等至二月朔旦沐浴更衣凝然而逝本州太守康敷文以文祭之見太平興國宮

事實

劉烈

道士劉烈號虛谷子初生時母感異夢長而有起卓之才肄業於廬山太平興國宮交遊不雜王公大人嘆其貌有太古淳風必異日

之道器也宋高宗紹興六年初草庵扁曰真一每日端然檢閱道藏經史一覽隨記士大夫願納交焉如晦庵朱文公與談易論還丹之旨留詩云細讀還丹一百篇先生信筆亦多言元機謾向經書覓至理端於目睫存二

馬果能為我馭五芽應自長家園明朝駕鶴登山去此話更從誰與論張于胡孝祥一見贈詩云福地中藏小洞天洞天幽處煉神仙箇中得趣惟虛谷火候參同妙自然羅樞密點王參政炎曹兩府勛風鳳溪順嶽吏部甫諸名公皆往來談易酬倡吟詠至孝宗隆興元年註解周易正經及六壬摠括機要一部詣京投進蒙宣見問道賜宴後居山十載至乾道九年六月不食四十餘日惟飲冷水至七月十四日將親書登真隱訣二十五卷并上經九卷送入本宮藏史次日中元節親筆留詩頌有云虛谷子茲欲遺形棄世掃迹人間趨煙霞廣莫之鄉與道真一焉十六夜步月登廬山青牛洞絕頂端坐而化有還丹百篇雜著詩文周易解義及歷代君臣括要圖

並行于世

藍喬

藍喬字子升，循州龍川人。母陳氏無子，棲於羅浮山而孕。及期，夢仙鶴集其居，是夕生喬。室中有異光，年十二已能為詩，章有相者謂陳曰：爾子有奇骨，仕宦當至將相，學道必為神仙。喬曰：將相不足為，乃所願則輕舉爾。自是求道，嘗讀之，患獨學無友，因辭母之江淮，抵京師。七年而歸，語母曰：兒本飄然江湖，所以復反者，念母故也。瓢中出丹一粒，醜馬曰：服之可長年無疾，留歲餘復有所往，以黃金數斤遺母，曰：真氣虛治所成，母實用之。兒不歸矣。潮人吳子野遇之於京師，方大暑，同登汴橋，買瓜。喬曰：塵埃汚吾瓜，當於水中漱爾。自擲於河。吳注目以視，時有瓜皮浮出水，面醜迹儼然。至夜不出，具往候其歸，則已酣寢，鼻間氣如雷。徐開目，云：波中待子食瓜，久之不至，何也？吳始知喬已得道，再拜，愧謝。遂與執轡後遊洛陽，布衣百結，每入酒肆，輒飲數斗，能置紙百幅於足下，令人片片拽之，無

一破者，蓋身輕乃爾。語人曰：吾羅浮仙人也。由此昇天矣。一日，貨藥郊外，復置紙足底，令觀者取之，紙盡足浮，風雲脩脩，蹶而上昇。仙鶴成群，自南來起，望之隱然，歷歷聞空中笙簫之音。猶長誦李太白詩云：下窺夫子不可及。矯首相思，空斷腸。母壽九十七而終，葬之日，樵牧者聞墟墓間哭聲，識者知其來去云。英州人鄭摠作傳。

沈東老

吳興之東林沈東老，能釀八仙白酒。一日有客自號回道人，長揖於門，曰：知公白酒新熟，遠來相訪，願求一醉。宋神宗熙寧元年八月十九日也。公見其風骨秀偉，蹇然起迎，徐觀其碧眼有光，與之語，其聲清圓於古今，治亂老莊浮屠之理，無所不通，知其非塵埃中人。也因出酒器十數於席間，公曰：聞道人善飲，欲以鼎先為壽。如何？道人曰：飲器中惟鐘鼎為大，屈卮螺杯次之，而梨花蕉葉最小。請戒侍人次第，連斟當為公自小至大以飲之。笑曰：有如顧愷之食蔗漸入佳境也。又約周而

復始，常易器滿斟於前，笑曰：所謂杯中酒不空也。酒至前，即盡飲，更相酬勸。道人因命東老鼓琴，乃浩歌而和之。又嘗圍碁以相娛，止更數子，輒拂去，笑曰：祇恐碁終爛斧柯，道人自日中至暮，已飲數斗，無酒色。是夕月微明，秋暑未退，蚊蚋尚多，侍人秉燭，毆拂偶滅一燭，道人乃命取竹枝以餘酒，喫之，挿於連壁須臾，蚊蚋盡趨壁間所飲之地，灑然無有。東老欲有所叩請，學毆蚊之法，道人曰：且飲小術，烏足道哉？聞公自能黃白之術，未嘗妄用。且篤於孝義，又多陰功。此予今自所以來尋訪而將以發之也。東老因叩長生，輕舉之術。道人曰：以四大假合之身，未可離形而頓去。惟死生去住為大事，死知所往，則神生於彼矣。東老攝衣起謝，有以諭之。道人曰：此古今所謂最上極則處也。此去五年復遇今日，公當化去。然公之所鍾愛者，子偕也。治命時不得見之，當此之際，公亦先期而知，謹勿動念。恐喪失公之真性。東老頷而悟之，飲將達旦，則瓮中所釀止留，糟粕而無飲，歷矣。道人曰：

久不留浙中今日為公而來當留詩以贈因
辟手席上榴皮畫字題于庵壁其色微黃漸加
黑詩云西鄰已富憂不足東老雖貧樂有餘
白酒釀來因好客黃金散盡為收書已而告
別東老啓關送之天漸明矣握手並行笑約

異時之集至舍西石橋今名回仙橋道人先度乘

風而去莫之所適後四年中秋之夕東老微

恙乃囑其族人而告之曰回道人曩年間此

月十九日嘗誦予曰此去五年復遇今日當

化去意在明年今乃熙寧之五年也子偕又

適在京師于薦道人之言其在今日乎及期

捐館凡道人所言皆驗今湖州有回仙觀仙迹存焉

車四

蔡元長初登第為錢塘尉巡捕至湯村薄晚

休舍有道人狀貌甚偉求見蔡平日喜接方

士亟延與語飲之酒而去明日宿他所復見

之又明日泊新村道人復至飲酒數盡斗慙

曰夜不能歸願託宿可乎蔡始猶不可其請

至再不得已許之且同榻命蔡居外已處於

內戒曰中夜有相尋覓者告勿言蔡意其茲

盜亡命將有捕者身為尉故匿之不便也然
無可奈何輾轉至三更目不交睫聞舍外人
聲俄頃漸聚遂排戶入曰車四元在此何由
巨耐欲就牀擒之或云恐并損床外人帝必
怒恐獲罪蔡大恐起坐呼從吏無一應者道

人安寢自如撼之不動外人云又被渠縛了

六十年可怪可怪咨嗟良久聞室內如揭竹

紙數萬番之聲雞鳴乃寂乎從者始應問所

見皆不知道人瞿然起謝曰某乃車四也賴

公脫此大厄又可活一甲子已度第三次矣

自此無所患公當貴極人爵吾是以得免如

甚不然與公皆死矣念無以報吾有藥能化

銅鐵為金銀公欲之否蔡拒不受強與乾未

一訣曰他日有急當用之天且明別去後不

復見蔡以其說傳中子脩蔡死脩家寬廣西

賴是以濟蔡之客陳丙嘗為象郡守亦知其

詳

章啓

章啓字隱之成都人自幼不群天才卓異修
舉業之暇精妙於易註太玄經至九卷忽畫

寢夢見楊子雲曰太玄猶如一浮圖有十三
卷汝註至九天機豈容易泄耶啓覺甚疑異
之後略註至十卷進上宋神宗喜賜爵不受
封為沖退處士嘗與邵雍康節友善因遊廣

漢金鴈橋見一童年十二鬻詩啓喜之拉同

歸更名經童啓常看黃庭經凡看罷童竊窺

之一日有青衣童持書至啓接書已失青童

觀書皮云南嶽布衣真一子書至西州沖退

處士處及開但一章詩云未遂山中吟時聞

世上音笑言失真詮塵穢濁神襟歸殖南國

芝點化北溟金千日勤耕耘自然生瑤琳

因遊西溪偶濯足有異人李士寧訪之啓遽

云足濯西溪流水去李速應云手持南嶽寄

來詩啓驚而笑曰何以知之李云久矣李辭

云吾先往南嶽君宜早來自後李不復見經

童一日告去啓曰汝欲何往童曰先往南嶽

候先生啓曰汝何以知之童曰久矣童坐亡

逾月啓別相知而尸解啓嘗煉丹後服丹化

如蟬蛻也今人時見之於南嶽段願言吊之
詩略云尸解去難尋空留一鼎金西州大隱

沒北極少微沈又張賢良詩云西海從來鎮大名或聞蟬蛻棄遐齡青城已結神仙侶碧落俄沈處士星金鼎煉成真永樂玉堂傳授太玄經平生是我深投分自愧無才與勒銘

邢仙翁

宋神宗熙寧四年辛亥歲有武人李官衡州捕鹽深入九疑山路不可上捨營民舍望前嶺青煙貫空凝然指問村人人曰見之不知為何所李識其處告舉子李彥高彥高因場屋久好奇去學黃老不死術聞之心悅裹糧偕李同行攀緣而上忽得平地草堂數間入見老人燕坐驚曰子何能至此此非人可到答以慕道來耳老人笑揖之坐問姓字曰吾唐末人避世來此姓邢氏名不欲聞世間彥高意其邢和璞曰非也因言聞今國為宋不知天子姓氏彥高以熙寧天子傳序年月對老人頷之彥高詰其地皆不答歸益糧復至老人笑勞之留五日惟授以吐納煉氣術語倦援琴作操堂上驚雷怒濤餘韻不絕自此繼往老人延如故人無間矣遂參問內事

曰此事秘密未易言也因曰吾校天上書自有程限子妨吾事勿更來吾亦不久徙去彥高顧書曰仙矣猶用此耶曰豈有不知書神仙此皆著自瓊房繫玉籍者分讎已則歸之再給也徘徊竟別去出十二詩贈彥高今記

其二云無言隱几閑松局萬古襟懷獨自靈箋契時鋪三卷篆彈冠常動一簪星青童去斲南山木野客來尋北帝經天道不須窺牖見滿門山嶽目青青事業功名不足論好乘年少入真門渾如一夢莊生蝶況是千年柱史孫須向黃庭分內外不交周易秘乾坤他年陵谷還遷變家住蓬瀛我尚存篆皆古文彥高莫識後不復再往討尋其字十八年始究彥高頗得道今往來湘衡人無知者王性之為作邢仙翁記

賈善翔

道士賈善翔蓬州人字鴻舉善談笑好琴嗜酒混俗和光默究修煉蘇東坡嘗過之獻書問曰身如芭蕉心似蓮花百節疎通萬竅玲瓏來時一去時八萬四千末云鴻舉下語善

翔答曰老道士這裏沒許多般數善翔於宋哲宗朝作猶龍記暨高道傳行於世一日在亳州太清宮眾請講太上洞玄靈寶度人經至說經二遍盲者目明時會中有一媼年七十餘喪明已三十年一聞經義豁然自明後啓醮之夕夢眾靈官傳太上命賜其仙服以善翔為太清宮主者數日後竟返真張商英作真遊記編載其事

周史卿

周史卿建州浦城人宋哲宗元祐初如京師赴省試中途遇道者云云即與弟子入由果山鍊丹聲價籍籍士大夫經山下無不往見呂吉甫自建安移宣州苦足疾不能行來謁周周請呂伸足直前為布氣令人以扇搦之少頃足疾火熱炎上徹心良久痛遂已凡在山二十年丹垂成一夕風雷大作霹靂甚震曉視藥爐丹已失矣周不意遂出神求之謂妻曰我當畧往七日且復回未死也切勿焚我妻如其言周平生與一僧善僧亦在他山結廬聞周死來吊力勸其妻曰學道之人視

形骸如糞土既去矣安足惜妻信僧言泣而焚之明日而周回則已無形體可生矣空中咄咄責其妻而去異日僧復來妻以前事告之僧曰吾適方聞訃故來前日未嘗至乃悟魔所化也其家復置周影像於僧舍日輪一行者奉香火必於地得四錢又留醋一甕至久不敗

劉大頭

松校邇齊徐誼秦人也宋哲宗紹聖中赴調京師過洛中時盛寒旬者卧道側誼惻然憫之探篋中得錢三百文盡以畀之旬者初不謝既行數十步始於馬後追呼云荷官人仁惠濟此餘生官人他日到京城願訪竹冊巷劉大頭家誼許之到京已忘前語一日詣親故過小巷問左右云此竹冊巷也誼乃憶旬者之言扣門呼劉大頭者三大頭出迎曰官人信士乃肯訪此賤老揖坐小軒中呼其妻出迎拜曰我前日不遇官人且爲餓殍亟命具酒盤中惟貯大桃數枚酒三行誼辭退旬者曰貧賤無以爲意願獻此桃而已誼袖之

以歸及至所居覺漸重不能勝取視皆真金也復往則其室虛矣

歷世真仙體道通鑑卷之五十一

歷世真仙體道通鑑卷之五十二

潛元

浮雲山聖壽萬年宮道士趙道一編修

劉混康

劉混康字志通晉陵人其上世皆不仕母朱氏於宋仁宗景祐二年十二月二日茅君下降之夕夢一羽士入其室覺而生混康年十三依本郡太和觀道士湯含象受業嘉祐五年試經爲道士脫落世故日閱道書於洞經妙旨獨心得之患世無明師乃散髮登壇以天爲宗已而聞三茅道士毛奉柔偏得觀妙朱君之道遂往依焉毛一見而奇之悉授以大洞經錄乃結庵於積金峯居一日有羽人同造其廬指庵之東隅謂之曰汝即此居抱神守中德惠及人當無愧於前人矣又顧混康額間曰此無作之地道之所尚非可以有疵也以手捫之明日瘕滅混康由是勤行利人遠近宗仰哲宗時召至京師賜所居庵爲元符觀徽宗即位召赴闕皇朝通鑑紀事云混康有節行頗爲神宗所敬重崇寧二年乞歸山七月有旨用觀妙先生朱自英奏草九老仙都君即文琢

玉賜之仍賜號葆真觀妙先生五年七月加號葆真觀妙沖和先生大觀二年四月同泰州道士徐神翁天師張虛靜一時復會上清儲祥宮各賜道院以居未幾羽解五月特賜太中大夫始末優異備載豐碑

王荃

王荃字子真鳳翔陽平人其父登科兄弟皆為進士荃獨閑居樂道一日郊行憩瓜圃間野婦從乞瓜乳齊於腹荃知非常人問其姓曰吾蕭三娘也荃取瓜置諸橐以遺之婦就食輟其餘曰爾可嘗乎荃接取而食無難色婦曰可教矣神仙海蟾子今居此當度後學吾明日挾汝往見及見海蟾海蟾曰汝以夙契得遇我命長跪傳至道授丹訣戒以積功累行遂還家白母遣妻歸周游名山一時大臣薦其賢賜封沖虛處士宋哲宗元符三年再游茅山先是中峯石洞忽開真誥所謂華陽洞天便門者也一開千歲矣又甘露符降道士劉混康曰必有異人既而荃乃來受上清錄是夕仙樂聞于空浮之上留踰歲書夢

二天人與黃衣使者數百乘擁白虎來迎跨虎而行登危躡險由中峯入石洞向所開便門顧視左右金庭玉室兩青衣童子入通見茅君再拜謁君問勞甚厚白帝已勅汝華陽洞天司命府丞因賜金勒以還及寤別混康曰吾數將盡且有所授從此逝矣下投道人葛沖曰敢以死累公預言八月十七日當解化及期具衣冠端坐而逝時徽宗建中靖國歲春秋六十一

徐守信

神翁徐守信海陵人也為天慶觀備役服弊衣曳繩屨或時跣足而行終日無為惟執箕洒掃且誦度人經不絕口有道士徐元吉他方來病癩甚惡眾厭惡之斥居觀後茅廬中神翁獨睦事之元吉已而死神翁丐錢為飲廬既已歸茅廬哭三日出而得狂稍稍有異事人神之因稱焉神翁始知得道於癩道士也觀中或絕食神翁曰吾當為汝求之即入殿上卧久而出語眾道士曰至矣頃之負米而至者肩相摩也有以白金為奉神翁置之

床盜闖其亡方發闢而入則見神翁正色坐床上盜懼而走自是四方多來問災異呂惠卿吉甫除喪赴闕枉道過神翁神翁驚奔吉甫追之神翁顧謂曰善守善守吉甫拜而去既還朝俄以事黜知單州蔣之奇穎叔主發

運江淮議鑿漕渠而憂有石不可跡導疑未決以訪神翁神翁望其來道諭之曰開即開何許人也穎叔嘆服曰異人也漕渠遂果開宋哲宗不豫遣哲甫降香至神翁書符吉甫以進未幾徽宗嗣位崇寧初召之不肯往強與至東都復不可留乃禮歸之即海陵為建仙源萬壽宮使居焉大觀末尸解去

張潤子

張潤子不知何許人也往來嵩高山中常為役於諸道士精舍而不肯受其一錢躡屩而衣楮寒暑不易也每語人曰人身要滋潤人不領其旨但呼為潤子或叩其言則復謬亂其辭不可詰世傳其詩曰溟津深藏大道根槁形存志默然昏霍霏雨洒崑崙路浩浩風轟瀚海門日月氣交金鼎暖乾坤又動玉爐

溫須將此理生前煉真學凡夫死後論久之去備於鄭州之新鄭李氏宋徽宗崇寧三年辭李氏留頌曰學勤于初成之有餘一身常潤百海不枯道隱元冥擊食鵝居精成功畢復我清都是日語其徒曰玉皇有詔吾昇天矣頃之舍東南巨槐上有五色雲天樂之音潤子乘雲而去

王吉

王吉單州老兵也盛夏常坐卧烈日中隆冬沒溪水惟見其首邦人多稱其有道宋徽宗崇寧初萬俟卨從其父爲單州太守吉時過虛虛延之書館飲以酒酒竟吉輒取案上筆書精方用藥纔一二以治奇疾無不愈者虛方少年未之重率隨手棄之一日吉來語虛曰貴人頻以酒食害脾胃遂致恙吾以按摩法授君然慎無漏吾言已而忽告虛曰吾將去矣翌日而化或爲瘞之居數月有見於傍郡者歸發瘞惟所躡躡存焉虛自是年垂七十頰如桃花益能加餐每劇飲至夜分而用其所授之法有驗虛始悔恨少時不能知其

異人求學其所以長生久視者虛所受雖其兄亦不得傳兄參知政事也

祝大伯

祝大伯不知何許人也嘗爲備於信州貴溪桂安時家大伯外若椎頓者而服役唯謹一日忽自外來舉止異常且曰適有道人以藥遺我今能不食矣安時驗之果然自是盛夏暴烈日中冬偃冰上然爲備如故桂氏稍重之欲以爲客大伯辭曰吾當爲人傭歲滿乃去爾久之當宋徽宗大觀三年忽告安時曰去此十餘里白花岩有人召我主翁能俱往乎安時即從之未至已聞管絃之音彤雲郁然覆山安時方愕眙而大伯辭去言未卒已不見

劉益

劉益京兆藍田人也隱居子直庵廬六十年膚如玉面有壯容飲酒數斗不亂上下峻坂若履夷途宋宣和初京兆以聞徽宗遣使召之方秋劇雨泥淖沒踝益徒步而使者騎不能及既至東都徽宗禮之厚然非所樂也力

求還山常止於華嚴川浮屠精舍宣和末告其徒曰山川草木何腥膻之甚耶吾惡之遂尸解去將葬體如蛻焉已而戎難作其徒始異其言

魏二翁

魏二翁濮州雷澤世農也鄉父老自幼見之狀貌常如七十餘身一布裘手持蒲篲曳杖而行素不知書矐子若眊然而能蠅頭細書時時語人禍福里閭稍重之方嚴冬或製續奉二翁竊盜間知之夕至所止廬傍二翁逆呼其名曰爾需我續手遂投與之盜驚謝再拜而去先是鄆城有王老志者徽宗嘗夢見之即召至東都少焉復聞二翁名遣使即所在起之使者訪得其廬但聞二翁鼻息齁齁如雷而不見其形影使者懼無以復命請甚至二翁只在其廬也迫之行則又不知所竟不能致惟得頌一章以歸其辭曰我今入山避此囂煩衛以卒史聘以達官豈易我樂物外清閑養真存氣七返九還金丹既就遂陟仙壇蓬萊絳闕玉戶金關有能學我雲

路非難宣和初忽尸解去鄉人爲歛葬之舉棺若空遂啓視之惟有藏頭詩云火田心主須防慎行方成後世傳守坎離爲要妙題名利作憂煎程若識丹霞法路應歸紫府仙

王老志

先生姓王名老志濮州之臨泉人也嘗遇鍾離真人授內丹要訣以道術知名沂州有公吏欲求事左右寄所親致意先生答之詩曰多年退罷老公人手種桑麻數百根蓋是筆頭接燃得一枝枝上有冤魂竟拒不見濮有

士人饒口欲以語窮之往造焉其居四面環以高墻但開狗竇出入士人匍匐就之方談辭如雲忽見地有旋渦處俄已盈數尺中有鱗甲如斗大先生謂士人曰子亟歸稍緩必致奇禍士人遽出行未五里雷電雨雹倏起馬蹶局不行乃入土室避之望生生庵廬百拜乞命僅得免宋徽宗政和三年九月詔州縣敦遣至京師賜號洞微先生四年正月加號觀妙明真洞微先生先生雖掉頭碌泰然時出危言諷天子一日徽宗召之入禁藥顯

肅皇后在坐先生卒然出幅紙曰陛下他日與中宮皆有難臣行死不及見矣臣有乾坤鑑法可以厭穰然尤當修德始可回天意請如臣法鑄乾坤鑑各以五色流蘇垂寢於寢殿臣死後當時坐鑑下記憶臣語日微一日

思所以消變於未形者上疎受其說有詔庀工鑑成進御而先生歸濮解化皇朝通鑑紀事本末辛未觀妙明真洞微先生王老志卒賜金以葬贈正議大夫宣和錄云先生所居地必生花錦靖康陟方之禍二宮每寶持之且嘆其先識納君於正道也

李思廣

李思廣字景淵廬陵之吉水人也幼歲肄業開明觀後策經受冠褐志操特異每放意山水間得錢即易酒或獨飲于市年逾七十容貌不衰少與人言不知其何修證也宋徽宗政和四年浮游螺川常駐于習溪橋酒家一老嫗頗以爲異常以倩酒飲之不問酒直有無歲久不替一日忽謂嫗曰我將有所往謝爾厚顧別得奉書爲報又留飲至醉宿于肆中次晨起視則已化去形體溫然若生香滿

一室復聞于外遽報所親殮葬後園月餘有客自衡嶽來者云途中邂逅景淵樵亦熟識見衣冠如故寄書謝酒嫗及親族後聚衆發冢開棺不見其尸唯存條繫竹杖而已

榮陽

榮陽東平人也常鬻墨於市人稱之爲二郎其後遊蜀至尤縣與郡從事登越王樓夜有屋瓦墮二郎曰一敗鬼爲之爾從事以問守卒云日者繕修樓時有梓人墮敗而死從事大驚二郎俄謂太守趙某曰宜亟去不然禍將及明年南蠻毀障候深入蜀以下皆得罪宋徽宗宣和初詔求異人部刺史以名聞詔乘傳至東都二郎曰時方如是我尚何爲哉部使者強之不得已遂就道既至徽宗訪以所學不對因賜錢十萬遣歸二郎復還蜀手居不食惟時飲酒與成都諸生馬倩飲闌中飲已二郎舉袂若有所招者頃之錢出於袂盈凡上而去會其數則與酒直相當也見病者則取木枝尺許噓之置病處尋取擲于地踐之或又棄之病者輒愈或苦目眊二郎曰

吾分汝以目光即張目令眊者視之二郎目
无注射殆不能視其眊亦減一日携鄭子成
墨過劉長源父所長源父調之則爛爛成金
矣長源云見二郎四十年有壯色未嘗衰多
言隋唐五代事或曰二郎蓋善移精變氣之
術高宗紹興中榮凝以提舉茶馬入蜀云二
郎其曾大父行也蓋其先五世曰譚者轉漕
益都二郎從之當時殆百數十歲居青城山
小麻溪於紹興間化去

雍廣莫

汪叔詹字致道徽州歙人宋高宗紹興十八
年以司農少卿總領湖北財賦嘗赴大將田
師中宴集適最後至漕使鄂守已先在與田
奕棋一道人曰木先生者亦坐於傍見汪揖
曰久別健否汪愕然曰相與昧平生何言久
別道人曰公已為貴人忘之矣獨不記宣州
道店說牛奇章事中汪覆然起謝道人去汪
謂諸客曰徽宗崇寧五年初登第得宣州教
授以冬月單騎之官投宿小村邸惟有一室
一秀才已先居之曰甚暮不可前不得已推

戶徑入曰值暮至此與公同其室可乎秀才
方踞火坐顧曰唯唯良久忽言曰公曾讀唐
書否某慍曰某雖寡學寧鄙陋至是又笑曰
記牛僧儒傳否某以其言無序怒不答秀才
曰吾言非他公乃僧儒後身前生為武昌節
度使緣未盡今生當再往異時官祿多在彼
土矣某亦異之疑為相師問其姓字徐對曰
公知有雍孝聞者乎吾是也自崇寧之初殿
廷駁放浪迹山林偶有所遇爾叩其術不肯
言終夕相對論大道而已至曉別去不復再
見蜀人皆言其已死適睹道人之貌蓋雍君
也豐采與四十年前不異真得道者也坐客
莫不驚嘆汪再漕湖北又守鄂州為總領累
年皆在武昌木生名廣莫往來河汜間見人
惟談文墨殊不及他事無有知其為異人者
沈濬字道源亦識之云政和中以道士說法
徽宗謂其得林靈素之半故以木為姓

皇甫渙

皇甫渙字致遠開封人也賦性閑淡有敏識
卓見修舉業之暇尤妙於三玄知命不負學

作黃冠在京東太乙宮受業舉止狀義而不
明宋徽宗政和初朝廷興道學先生向化次
年試辟雍作魁聖覽程文賜金壇郎不就
乞換自在公憑野裝游歷尋訪於西洛遇至
人馮野人得其道要後遊南嶽棲凌虛臺嘗
真觀恩真未幾詔赴闕居太一宮高士寮後
乞還山居汝水而坐亡

尚香道人

宋徽宗政和末林靈素開講於寶籙宮道俗
會者數千人皆擎蹠致敬獨一道人瞋目在
前立林訝其不拜叱曰汝有何能答曰無所
能林曰既無所能何以在此復答曰君無所
不能亦何以在此徽宗時在幕中聽竊異之
宣問實有何能對曰臣能生養萬物即命下
道院取可以布種者得尚香一掬以付之俾
二衛卒監視種於艮嶽之趾仍護宿於院中
及三鼓失所在明日視苗香蔚然成叢

鄒葆光

鄒葆光少隸羅浮山冲虛觀道士籍宋徽宗
宣和中名聞九重召至凝神殿試以道術有

七道士從之倏不見上問為誰葆光對曰臣居山習劍術此七人者古松也上異之拜金壇郎

龔元正

龔元正字端本武陵人家貧好學帶經而鋤後去為道士天性淳慈向道精專初建新宮大殿巍樓傑閣廣厦重廊金碧輝映手植松杉數十萬株宮成賜額萬壽賜號冲逸大師住持四十年未嘗背衆一食一日召其徒曰不出五日吾逝矣四日端坐誦老子道德經達明儼然而化時宋徽宗宣和年

沈若濟

沈若濟臨安人結庵茅山以施藥為務宋徽宗宣和間蒙召對賜封洞元先生嘗指華陽洞之東隙地曰死必葬我於是其徒以地勢汙下為言不聽高宗紹興十五年解化其徒奉治命掘地六尺許得石板大書六字曰沈公瘞劍于此觀者異焉

張淡

衢州人徐達原居郡之峽山少年時好與方

外人處有張淡道人過之留館其門中服蕭然惟著青布夾道衣中無所有雖盛冬不益也每月夕則攜鐵笛入山間吹之徹曉乃止達原學易嘗閉戶探大衍數不得其法張隔室呼之曰一秀才此非君所解明日當語子

明日授以軌析等步之術凡人生死日時與什器草木禽畜成壞壽夭皆坐因持以驗之不少差最好飲酒時時入市竟日必酣醉而返而囊無一錢人皆云能點良以自給達原欲測其量召善飲者四人更迭與飲自朝至暮皆大醉張元自如夜入室中外人望見其倒壁下以足掛壁散髮垂瓦盆內酒從髮際滴瀝而出達原之祖德詮年七十餘矣張曰十八翁明年五月有大危速用我法禳禱可復延十歲徐氏不信以為道人善以言相恐勿聽也語纔出口張已知之即捨去入城中羅漢寺明年五月德詮病達原始請之不肯行因死其徒有頭陀一人又秘藏紙畫中一頭每與客戲則曰圖掛壁劉生草其傍良久草或食盡或騎斃過半遺棄土地可掃也後

以牛與頭陀而令買大麻四十九斤紐為大索囑之曰吾將死死時勿棺殮只以索從肩至足通纏之掘寺後空地為塋埋我過七日輒一發視頭陀謹奉戒既死七日發其穴面色如渥丹至四十九日凡七發但餘麻索在并敗履一雙尸不見矣達原嘗贈之詩曰鐵笛愛吹風月夜夾衣能禦雪霜天伊子試問行年看笑指松筠未是堅張以匹絹大書之筆跡甚偉又以匹絹書煉汞法授達原達原死鄉人多求所書法其子夢良不欲泄舉而焚之

張拱

汴人張拱舉進士不第家甚貧母黨龔氏世為醫故拱亦能方術置藥肆於宜春門後坊仍不售嘗晨起披衣櫛髮沐浴洗額有道士迎日而來目光炯然射日不瞬徑造肆中顧而不揖振衣上坐拱頗忿其倨傲作色問所來答曰汝無詰吾所從來正欲見汝耳拱意此妄人京師固多其比擲一錢與之麾使去笑曰吾無求於人以汝有道實故來誨汝何相

拒之甚邪拱悟取冠中而出與之語及仙家事理致精微聞所未聞於是始愧悔曰拱鄙人眼凡心惑仙君幸見臨願終教之道士曰汝何求曰家貧飭粥不繼儻使不食可飽俗上願也俄而鬻蒸棗者來道士取先所擲視錢買之得七枚顧謂拱曰神仙以辟穀爲不然却粒則無滓濁無滓濁則不漏由此亦可入道張子房諸人乃以丹藥療飢固已迂矣汝欲得此道自此不淫色可乎人能不淫俗念自息俗念既息則仙才也乃取七棗熟視而噓之曰汝啗此可終身不食人或強使之食亦無禁復欲不食則如初但汝有老母妻子未可相從然既啗七棗當應七夢豫爲汝言汝事親既終婚嫁既畢已能不食復又何求宜脫身詣名山於懸絕處尋石穴深廣有容者自累石塞門一念不起坐卧行立於其間自有佳趣僅及半紀則汝之身如蟬出殼逍遙乎六合之外矣過此非今日可語汝也言竟攝衣而起拱固留之不可起出門無所見拱乃知其非常人悵然有所失者累月聞

飲食輒嘔遂不食踰二年糞溺俱絕神氣明爽步履輕利每自試其力從旦至暮緣京城外郭可匝者五反蓋數百里也前後得七夢如道士言不少差母病瘳二十年衆藥不驗謾以七棗餘核進之一夕而愈拱既不御內視其妻如路人妻郭氏性剛果忿恚而卒家人益憂疑之逼而餽之食食逆而吐前後或食或不食朋友疑其詐者扁諸室試之不以爲苦人或召醫則攜藥而往至則登病者之席坐于旁雖逾旬涉月杯水粒無所需喜飲好作詩行年六十而顏色如壯者後其母歿不知所終李方叔作傳

李筌

濟南李筌字定國寓臨安軍營中以聚學自給暇則縱遊湖山嘗詣淨慈寺過長橋於竹徑迷路見青衣道人林下斲筌笑揖之道人問所往曰將往淨慈瞻禮五百羅漢道人曰未須去且來同食燒笋食之甚美俄風雨晦冥失道人所在筌惶懼伏林間少頃雨止尋徑而出至寺門下覺身輕神逸行步如飛洎

歸舍不復飲食其從兄名莫字大猷爲諸王宮教授將之任遣僕致書見其顏如桃紅且能辟穀以語大猷及大猷至則已去云辨茅山矣後又聞入蜀隱青城山大猷爲梓路提刑使人至眉訪所在眉守復書報數年前已輕舉乘雲而去今惟繪像存

蔣風子

蔣風子者本邵陽之居民賦性愚直言無忌憚人事不入或有小疵不拘貴賤面而伸之周遊南嶽見中嶺陟峻出意修之亦不知其宿食之所忽日有樵者頂青巾負薪而過南之曰千辛萬苦而食用不給與子一粒藥吞之力可陪笑自此但飲水而已衣衫盡棄寒暑不問衆稱之曰風子周游湖湘常便卧衢路雖勢位不能屈毒藥不能加虎狼無所損獨行自語人莫之測

莫道人

莫道人者容州人居石峒入山不知其幾年問之亦自不言歲數山下父老或有八九十歲者言自小年已見其豐姿令其容貌鬚鬢

不異於昔精力甚健登山如飛遇飲而飲遇食而食或辟穀數日不避寒暑蕭然一庵傍無侍者常夜坐於飛雲頂石巖間有虎侍傍不叱遣之達旦乃去貴宦遊山求見之多不遇遺之詩者不一宋理宗末年猶在

附九

十六

歷世真仙體道通鑑卷之五十二

歷世真仙體道通鑑卷之五十三

附十

浮雲山聖壽萬年宮道士趙道一編修

林靈蘊

先生姓林本名靈蘊字通叟温州永嘉人也家業寒微其母夜歸覺紅雲覆身因而有孕

懷胎二十四月一夕夢日光入室有神人衣綠袍玉帶眼出日光執筆告曰來日借此居也翌日陰雲四合霹靂三聲先生即降誕金光滿室相貌殊倫長五歲不語時五月五日風雨大作有道士頂青玉冠衣霞衣不告而入見先生喜曰久不相覩特來上謁相顧撫掌大笑出門追之不及自此能言出語有據不雜兒戲七歲讀書粗能作詩日記萬字蘇東坡軼來見以曆日與讀一覽了無遺誤東坡驚異曰子聰明過我富貴可立待先生笑而答曰我之志則異於先生矣東坡云子當如何先生曰生封侯死立廟未為貴也封侯虛名廟食不離下鬼願作神仙予之志也先生年將三十博通儒道經典志慕清虛語論孤高迥脫塵俗初先生遊西洛遇一道人姓

趙交游數載忽一日道人云我大數將至與子暫別後事望子主之七日果死乃在客舍先生竟為沐浴安葬遺下青錢二十五貫盡其數用不餘不聞及遺衣囊中有書三冊細字如珠間有天篆人莫能識分為十九篇盛以絳紗題云付與林某冊上題曰神霄天壇玉書皆有神仙變化法言與雲致雨符咒驅遣下鬼役使萬靈冊尾有支使二十五貫錢數逐項皆合先生自受其玉書豁然神悟察見鬼神誦呪書符策役雷電追捕邪魔與人禁治疾苦立見功驗驅瘟伐廟無施不靈先生次年至岳陽酒肆復見趙道人云子乃漢天師弟子趙昇也向者所授五雷玉書謹而行之不可輕泄即日為神霄教主雷霆大判官東華帝君有難力當救之崇寧五年中秋夜徽宗皇帝夢遊神霄府赴玉帝所召乘車輦侍衛森列騰空而上遙望金闕門仙官玉童金甲力士備守之次見一人星冠法服執圭前引帝入闕門上有朱牌金字曰神霄玉闕之門次向西有一門殿上牌曰碧霞之殿

殿上金光如日不能仰視次過一小院金釘朱戶曰玉樞院分司列局官吏嚴肅有一朱衣吏迎引而入揖云此帝君舊居請坐東位少待須臾有一玉童引帝朝見玉皇帝稽首再拜惟見金光中傳旨下云修國事去茲臣任忠賢守宗社帝即再拜出見朱衣吏送出金闕門復以七寶華車及侍衛官吏送帝自天門而下約百餘步見一道人青服青中踏青牛而上從者皆鬼面若錢二鬼面四目執幡而前仗劍持戈導從甚肅至御駕前揚鞭呼萬歲帝急駐車按問道人奏曰今日代觀天顏臣之萬幸言訖駕青牛自天門而上帝夢覺錄記之大觀二年四月詔求天下有道之士茅山宗師劉混康奏曰臣以愚蒙無可副聖意有在世神仙林靈蘊生居永嘉何下詔之晚也帝即遣使求之不起至政和六年十月駕幸於太乙東宮敕委道錄徐知常奏所有温州道士林靈蘊在道院安下言貌異常累言神霄事人莫能曉嘗作神霄誥題于壁今錄奏呈帝覽讀其文皆神仙妙語喜甚

乃令徐知常引林靈蘊入見帝曰卿有何法術先生奏云臣上知天上中識人間下知地府等事帝視先生風貌如舊日識之帝曰卿昔仕平舊曾面朕乎先生奏對臣往年中秋上朝玉帝瞻見陛下天顏曾起居聖駕帝曰朕方省之記得卿乘青牛今牛何在先生奏曰青牛寄牧外國非久進來帝甚奇之御書改名靈素賜號通真達靈先生非時宣召入內刑定道史經錄靈壇等事帝以師事之特建通真宮為居興寶錄宮建仁濟亭散施符藥次開神霄錄壇神霄宮成帝領群臣蔡京等慶宮早齋罷帝引百官遊行曰宣德五門來萬國蔡京等沈思無以答帝顧林曰師能對否先生應聲曰神霄一府總諸天帝大喜先生被旨修正一黃錄青醮科儀編排三界聖位校正丹經子書每月初七日陞座泊親王內貴文武百官皆集聽講三洞道經或御駕親臨亦于座下自此東京人方知奉道也

書龍章鳳篆九等雷法集成玉篇進上昔漢天師有神霄雷書二十卷并天部靈司八角雷印六顆至第八代天師藏十卷并六印文并晉大痕印文國初張守真遇翔聖真君傳賜五卷帝欲得雷書金經全足收入道藏求訪不得先生靜夜飛神從玉華天尊奏告上帝乞賜觀看雷文并靈司等印帝遣六丁玉女以印授之一天壇玉印一神霄嗣教宗師印一都管雷公印一天部靈司印皆堅如鐵石非金非玉及以雷書五卷賜靈素看先生拜謝懷印而還省錄雷書進奏遂得全集政和七年七月高麗國果進青牛到京帝不勝欣喜百官拜賀帝即賜先生乘騎入朝先生遂作青牛歌一篇首句有云政和丁酉西風秋天子賜以騎青牛成篇進奏帝大悅八月先生復撰明點網紀錄進帝賜錢梓重和元年華山因開三清殿基巨石匣中有雷文法書一冊乃金地蘭紙進至御前與先生上年所進雷書不差一字帝喜曰何靈素神聖應明記之如此帝又於禁中自書青詞實封密

奏翌日宣先生問曰卿嘗言能知天上事朕昨夜奏青詞達否對曰青詞不達緣誤寫一字為靈官所收歷歷讀奏帝撫先生背曰真人聰明神仙也奉勅賜玉真教主神霄宮林公伴饌帝嘆曰每思皇后英魂何歸朕嘗聞

唐明皇令葉先生追揚太真相見師能致否先生應云謹領聖諭至夜設醮飛符召之奏云皇后見在五華宮與西王母宴集聞宣召頃刻駕青鸞而至移時聞異香襲人天花亂墜仙樂滿空皇后即至矣帝執視與存日無異但仙服主履與人間不同后見帝曰臣妾昔為仙官主者因神霄相會思凡得罪謫下人間今業緣已滿還舊職荷帝寵召聞命即臨願陛下知丙午之亂奉大道去華飾任忠良滅姦黨修德行誅童蔡此禍可免他時玉府再會天顏不然則大禍將臨因循沈墜切為陛下憂之帝問卿昔在仙班是何職位曰臣妾即紫虛元君陰神也陛下即東華帝君也帝曰禁中諸人并臣僚等無惜一言曰明節乃紫虛玄靈夫人王皇后乃獻花菩薩

太子乃龜山羅漢尊者蔡京乃北都六洞魔王第二洞大鬼頭童貫是飛天大鬼母林先生是神霄教主兼雷靈大判官徐知常是東海巨蟾精帝又問國祚如何默然不答良久云天數有限不敢久留言訖漸漸不見先生

嘗與帝飛神遊青華宮上遊月府福地洞天靡所不到凡有醮告多致景雲仙鶴之翔亢旱祈禳則肅命風雷興雲降雨五月賜金門羽客通真達靈元妙先生侍中大夫九月特授本品真官免視法十月天寧節前三日建祝壽大醮奏邀御駕候三更瞻見鬱羅蕭臺天仙衆真俱從太上道君親降與陛下增壽帝聞之齋沐同三殿九宮宰執親王同觀勝事是夜天無浮翳月朗風清初聞天香滿席仙鶴翔翔五色彩雲四合而上仙樂聲喧環佩振響去地丑文餘虛光明中閃出樓臺宮殿天丁力士玉女金童建節捧香進於臺畔上有玉牌金篆鬱羅蕭臺四字衆人皆不見惟帝與張虛靜見之帝上香再拜宣皇太子看良久太子曰泗州大聖寶塔也帝怒勅內

侍策出奉聖旨皇太子不得再與神霄醮會上謂先生曰太子元是龜山尊者亦曰聖賢何如此不通正教先生對曰羅漢生前持齋執戒忍辱修行既墮凡間合為貴人但有孝慈不通玄旨願陛下勿責太子也十一月賜

沖和殿侍宸十二月奉修佑聖殿帝曰願見真武聖像先生曰容臣同虛靜天師奏請宿殿致齋於正午時黑雲蔽日大雷霹靂火光中現蒼龜巨蛇塞于殿下帝祝香再拜告曰願見真君幸垂降鑒霹靂一聲龜蛇不見但見一巨足塞于帝殿下帝又上香再拜云伏願玄元聖祖應化慈悲既沐降臨得見一小身不勝慶幸須臾遂現身長文餘端嚴妙相披髮皂袍垂地金甲大袖玉帶腕劍跣足頂有圓光結帶飛繞立一時久帝自能寫真更宣畫院寫成間忽不見次日安奉醮謝蔡京奏云切恐真君未易降于人間昔日太宗皇帝曾命張守真請降亦有畫本用匣御封藏于閣下群臣皆不許見之乞取對之可見真偽奉聖旨宣取太宗御封尚在拆展看與今

來現本一同更無差殊帝愈悅又請北斗七真二使者乘金橋而降此不盡錄帝瞻拜七真聞斗中降語云幸速避地勿尚奢華當出聖斷毋聽姦邪所敗言訖迤邐昇空此夜帝喜邀虛靜與先生同宴宴罷同遊禁中一閣下見碑題曰元祐姦黨之碑先生與虛靜看之各俛首致敬因請紙筆題詩云蘇黃不作文章客童蔡反爲社稷臣三十年來無定論不知姦黨是何人帝翌日以詩示太師蔡京京惶恐無地乞出不允先生有一室兩面牕前門後壁乃入靖之處中有二椅外常封鎖不許一切人入雖駕到亦不引入其室蔡京疑遣八廂密探之有黃羅帳上銷金龍床及朱紅椅卓奏上林公有僭意願陛下親往臣當從駕指示敢有不實臣當萬死帝即幸通真宮先生迎駕起居帝與京徑入其室啓封關鎖但見粉壁明窗椅卓二隻他無一物蔡京驚惶戰懼叩頭請罪先生請問其因帝曰蔡京可誅先生奏乞赦之乃指室中壁上請帝近觀帝子細看之有一小符乃金樓玉殿

符也下畫黃羅帳如錢大上有細字書云天尊御座先生曰臣每請玉華天尊下降坐此臣焉敢僭帝笑曰卿游戲得好帝曰朕聞漢武帝嘗請西王母降見問道朕欲見西王母卿能致否先生云謹領聖諭乃於香爐上燒一小符少頃見王母領諸玉女乘雲而降一如常人與帝對坐顧先生曰今日何緣特蒙相召先生曰今天子慕道願見元君帝即起拈香再拜王母曰東華帝君免拜帝曰今觀仙顏萬劫千生實爲榮幸若有指教敢望聖慈王母曰凡事可請問侍宸林先生張虛靜天師可脫大難帝曰元君既降得無垂訓王母遂授帝神丹補益之術曰察姦臣遷都長安法太祖太宗行事雖見小災不爲大禍不然後悔無及矣言訖而去一日皇太子上殿奏曰林靈素妖術願陛下誅之臣每日念他自知法廣大不可思議如陛下不信乞宣法師等皆見在京可與林靈素問法別其邪正時有十四人會於凝神殿帝宣太子諸王暨群臣觀看先生嚥水一口化成五色雲中有

仙鶴百數飛繞殿前又有金龍獅子雜於雲間茶等奏曰此非也乃紙龍鶴耳容臣等諷大神呪即令龍鶴墜地化爲紙也太子聞之喜曰若果然則林靈素法僞當斬正誦呪間十四人中止有兩人能諷餘者皆不能語言面若死灰皇太子叱先生曰諸人若死教爾還命念呪訖仙鶴龍加百數蔽日遮雲帝曰此件無效別有何術十二人皆伏地戰懼其二人奏云臣能呪水百沸宣水令呪果然太子擊水盂向帝前呼先生看先生取氣一口吹水中水即清涼且結成冰帝責云本朝待汝等甚厚敢來妄言先生奏云乞燒木炭一千斤爲火洞裏通紅臣乞與二人同入試驗良久火洞已成先生云臣乞先入洞乞令二人隨入先生入火洞火不著衣諸人伏地哀鳴告太子曰乞救臣等性命情願戴冠執簡聽役施行皇太子下殿拜告乞納皇太子冊贖罪奉聖旨免罪惟道堅二人係中國人不應罔上遂開封府刺面決配於前令衆宣和元年正月八日上詔天下僧徒並改稱德

士先生上表云臣本山林之士誤蒙聖恩若更改僧徒必招衆怨乞依舊布衣還鄉聖旨不允不得再有陳請五月大水犯都城帝命先生治之先生奏曰此水難治乃天意以戒陛下兼比水自太子而得臣不敢漏泄天機但誠令太子拜之可信也即令太子上城降御香四拜水退一丈至夜水退盡京城人皆言太子德也先生上奏云臣初奉天命而來爲陛下去陰魔斷妖異興神霄建寶錄崇大道贊忠賢今蔡京鬼之首任之以重權重賞國之賊付之以兵衛國事不修奢華太甚其星所臨陛下不能積行以禳之太乙離宮陛下不能遷都以避之人心則天之舍皇天雖高人心易感也故修人事可應天心若言大數不可逃豈知有過期之曆臣今擬暫別龍顏無復再瞻天表切忌丙午丁未甲兵長驅血腥萬里天眷兩宮不能保守陛下豈不見衆天綱推背圖詩云兩朝天子笑欣欣引領群臣渡孟津拱手自然難進退欲去不去愁殺人臣靈素疾苦在身乞骸骨歸鄉又降詔

不允冬全臺上言林靈素妄議遷都妖惑聖聽改除釋教毀謗大臣先生聞之大笑呼諸弟子并監官官吏曰前後宣賜之物約三百權自去年用千字文字號封鎖籍書分明一無所用可迴納官中只喚一童子攜衣被行出國門宣喚不迴帝賜官溫州東都事考云宣和元年冬十一月乙卯祀昊天上帝于圓壇大赦天下赦林靈素歸山先生頃在京時雖軍親親王不與交談亦不接見賓客惟虛靜天師至即開門對話終日終宵此外則東西皇城使張如晦者舊在通真宮出則同行坐則同席宗師法教獨張一人得其妙也既還鄉則同居永嘉宣和元年八月忽一日攜表見太守乞爲進及別州官親族隣里曰塵世不可久戀況大禍將及即當辭去至十五日既望命如晦曰吾法門以付惟汝尚有六印九符并六丁妙用神機盡付與汝世代只傳一人無致輕泄并七寶素珠一串如主上來取即便分付汝將來當爲朝廷金節大忠今則別去他時神霄再會言訖索紙筆書頌云四十五歲芳生淳名滿世崢嶸只記神

霄舊路中秋月上三更書訖上香一炷時正三更月朗風清忽有霹靂一聲先生坐化而去先自指墳於郭外遺囑張公與諸弟子曰可於正穴下更開深五尺見龜蛇即遂下棺見五色氣出不候蓋土急走百步弟子依其言果見山崩石裂不知所在帝聞之驚嘆鳴噓御製祭文初嗚呼生者假有死者返真志道者爲洞達之士哀死者非悟解之倫脩爾而來洞然而去去住不以形骸爲己累存亡不以顯榮爲足珍乃超生死之道達幻化之理惟仙卿之能乎嗚呼仙卿之生非生也天將假手佐天行化助國濟民仙卿之死非死也復歸乎天大道成行群迷已覺故神凝粹乎天真尸解託乎世數乘雲氣騎日月遊蓬瀛之巔乎步紫虛之玉壺乎不可得而測之者也今仰守臣執人間之世禮致祭極前若精爽不昧歆此寵嘉高靈勅侍宸林公羽化仰守臣聞丘等如法致祭仰侍從官吏卜地安瘞將囊中金器出賣作黃錄大醮一月日欠錢將省庫錢支用錄奏呈不得觀望滅裂

千餘所天覺既罷狐鬼乃結成群入內盜竊器皿珍玩迷惑官人或登山嶽或遊殿閣種種作怪致卒寵女不少故先生到闕日上首諭之先生奏云願陛下淵默容臣驅治乞於京之東北門內築雷壇三層內安鐵甕至夜月明仗劍登壇飛符叱咤風雷大作天地晦冥中夜道官皆見將吏驅縛數鬼緋衣並入壇心先生以待紙蓋甕口作法埋之地皆震動凌晨入奏已禁狐怪此去無害但瑤池中梁朝有一黑魚在池成怪狐鬼乘此魚如龍形出入禁中驚害宮嬪今誅死已訖乞差中官併取往鬼門殞之永得斷絕上親幸瑤池果有死魚長一丈餘嘆服久之即於禁狐壇所造殿堂道院圍繞其壇賜額司命府勅先生往來提舉五日一次降香壇中建醮先生又進符一十二道用銅鐵石三物刊其符藏于大內十二方位驅斬花石草木之妖其後揚州久旱主上宣祈永雨澤先生奏乞劍水孟奉勅賜水孟并劍先生嚙水一口祝云大宋皇帝命臣祈雨雨要霽霽風要拔樹揚州

千里之內並要霽足借黃河三尺急急如律令過數日揚州守臣具奏皆已得雨雨皆黃濁上問先生所降甘雨何為黃濁先生曰江河淮濟上帝皆禁之惟黃河水不禁故爾上大喜曰神哉宣和七年七月下詔文勅沖虛妙道先生王文卿可特授太素大夫凝神殿校籍視朝請大夫右文修撰參聯從索木幾又勅凝神殿侍宸後加同管轄九陽總真宮提舉司命府事父肇始贈承事郎母江氏贈太宜人先生上表乞還山林徘徊靖室混合帝一之道誦誦大洞真經祝延睿筭上不允又勅先生五日一次佩金方符入大內諸宮閣呪水滌穢除邪治病講明道德復遣中使黃瑤命先生就廣德宮行持南昌受煉司大法板度亡魂是夜先生飛符追被狐鬼所害宮人一一現形又發生天寶籙遣趙度生上甚神之十一月有事于明堂又淫雨上召先生曰每遇明堂即雨雪凝凍傷損禁衛法物今次明堂專委仙卿就九陽總真宮祈晴先生許之自習儀日至明堂事畢果然大晴次

日上坐青華殿召先生入見上對宰臣曰今次明堂大晴實王文卿之力即命賜詰休前太素大夫凝神殿侍宸再降兩府侍宸沖虛通妙先生視太中大夫特進徽猷閣待制主管教門公事父再贈承議郎母太令人妻平氏宜人叔王深賜承信郎弟次卿迪功郎依幹當南郊出身先生又上表曰乞求仁智之帥預防西北妖氣仍乞還山養老御批玉府仙卿豈宜言歸所奏不允金賊猖獗王師敗績果合卿言為朕齋香二十合往中外降之保安宗社先生受香歸宮東上遣中使黃瑤齋御香札全封朱章一函詣九陽總真宮玉皇殿焚之次特宣命先生審奏纔及一時中使疊至宣先生入內上宣問所上朱章報應如何先生洒涕奏曰陛下奏章中願出有道之君臨蒞天下殺臣一身以謝奏聞報應奉旨云華則無悔上又問先生其理如何先生密奏上深然之十二月二十三日禪位東宮先生入賀又數日邊降香出京欽宗皇帝靖康元年四月先生復趨朝乞還鄉侍母親詞

旨懇切上聽其奏紹興十三年高宗皇帝詔書來召先生不赴一日御武太守徐德脩過邑訪先生先生曰御武頃大旱因默朝帝所見所謂惠應神叩玉陛為民計甚力帝諭以數當然惠應興言其州窮且瘠民不可一日無穀辭甚切至卒得請而歲有秋徐守迴府述其事與士民翕然鼎新增廣廟堂深加奉祀惠應錄中盡言其詳紹興二十二年先生一日與弟子朱智卿言曰吾將隱去乃自持法書印篆入軍峯石洞間藏之仍勅令地神守護聽候有道行者遇之二十三年癸酉八月二十一日先生辭縣宰別交游於二十三日早起作頌題棺木云我身是假松板非真牢籠俗眼跳出紅塵頌畢隱化於縣之清都觀許旌陽煉丹之堂其時雷震一聲師遂化去弟子熊山人平敬宗袁庭植等奉葬于烏龜岡次年三月龍虎山郭道士至邑云上元之夕奏錄道場侍宸在宮住三日方去後有客自成都府歸中途遇先生入蜀亦問有遇先生傳道法者

歷世真仙體道通鑑卷之五十三

歷世真仙體道通鑑續編卷之一

羽一

浮雲山聖壽萬年宮道士趙述一編修

王嘉

師名嘉字知名號重陽子京兆咸陽人遷終南之劉蔣村母感異夢而妊二十有四月始生時宋徽宗政和二年十二月二十二日也師自幼不群及長體貌雄偉而美鬚髯個儻尚義不拘小節弱冠業進士係學籍好屬文才思敏捷始名中孚字允卿後入道改稱焉齊政元阜昌初金太宗天會八年封劉豫為齊王國號齊是南宋建炎四年撫治河外不及於秦歲屢饑人至相食時咸陽醴泉惟師家富魁兩邑其大父乃出餘以賙之遠而不及者咸來劫取鄰里三百戶餘亦因而侵之家財為之一空有司率兵卒捕獲將寘之法師曰鄉人饑荒拾路所得吾不忍寘之死地有司賢之遂釋不問人服其德金海陵煬王正隆四年師忽自嘆曰孔子四十不惑孟子四十不動心予猶碌碌如此不亦愚乎自是之後性少檢束親戚惡之曰害風來師受而不辭關中謂狂者為害風因以

自呼是年六月師醉於甘河鎮會二人被髮披瓊其年貌同一師訝之從而懇請其人徐曰此子可教因授其修真口訣時年四十有八故遇師詩云四旬八上始遭逢口訣傳來便有功其所遇者蓋唐純陽子呂仙翁之化身也五年中秋再過於醴泉師趨拜之衆笑曰言是害風安得識真仙耶其人邀師飲師問其鄉閭年姓答曰濮州人年二十二而不告其姓留秘語五篇令師讀畢焚之且曰速去東海投譚捉馬已而俄失所在師乃捐棄妻孥送次女於姻家竟委而去行旬於鄆社終南間舉止亦若狂者人莫測也後別構庵於南時村起封高數尺壙深丈餘以活死人之又號曰行藏以方牌掛其上書云王害風靈位又於庵四隅各植海棠梨一株同庵和公怪而問之師曰吾欲使他日四方教風爲一亦如此殖三年遷居劉蔣北之水中夾肆口皆塵外語鄉人素待以害風故莫審其意時復自挈壺瓢以遊行歌且飲有不揆者恒隨拉飲師忻然不拒又嘗從甘河攜壺酒

歸一人呼曰害風肯與我否師即予之一吸而盡令師取甘河水飲之蓋仙酎也問師云子識劉海蟾否師云是何能識得但嘗見之畫像耳乃笑而去師自此不復飲酒人或招之惟飲水而已人醉師亦醉焉俄一夕自焚其庵村里驚救之師方舞躍而歌曰數載殷勤設居劉蔣庵中日日塵勞長豁然真火瞥然開便教燒了歸無上奉勸諸公莫生悵快我咱別有深深況惟留灰燼不重遊蓬萊路上知來往人問其故答曰三年之後便有人來修此遂東行師嘗留題甘河云問來矯首滄溟上釣出鯨鯢未是雄又題終南山資聖宮殿壁云終南山重陽子遠地肺別京兆指藍田經華嶽入南京遊海島得知友赴蓬瀛共禮本師之約嘗自寫真題其上曰來自何方去由何路一脚不移迴頭即悟又自畫雲松鶴爲一圖留醴泉弟子史公密收之及行辭諸道友皆與之歌詩所以寓其微意而人不悟也攜鐵罐乞食而行曰我於東方有緣耳迤邐出關抵登州夜歸觀中書陝西所作

詩於壁云一別終南水竹村家無兒女亦無孫三千里路尋知友引入長生不死門明旦拂衣東邁世宗大定七年七月抵寧海徑詣儒者范明叔家主人適與郡人馬宜甫邀館於私第既久重而遇之初宜甫夢其南園一鶴從地湧出師至同師擇地立庵師指鶴起之處命名全真全真之名始於此矣師欲挽西遊宜甫家貧鉅萬久而未決其室孫氏尤難之冬十月師乃入環堵約宜甫日饋一食鎖庵百日至於分梨與芋栗令宜甫夫婦食之各有其數每分送則必以詩詞或爲歌頌宜甫亦皆酬和又示神異罪福之報以警之既啓戶宜甫乃始屏去塵累改衣冠而執弟子之禮師名之曰鉅字玄寶號丹陽子衆師在宜甫宅會譚玉者以宿疾來見師始拒之玉固請爲弟子留宿庵中其疾頓愈玉遂黜其妻而從之師名以處端字通正號長真子繼有王公者居牛仙山聞師至來謁問答有黎遂師禮之後住鐵查山雲光洞師飛蓋致其名號名處一號傘陽子曰郝昇深於易

賣卜於市師入其肆背而坐焉昇曰請公迴頭師應聲曰君何為不迴頭耶昇悚然異之師出從至朝元觀師授之二詞以發至意昇大感悟乃執弟子禮後至煙霞洞賜名曰璘號恬然子且以無被衣昇之未幾師領馬鉦等住崐崙山始至指而言曰是有煙霞洞我先世修道之所也命鑿之其器具之朽者與玉池井尚在又因取石於嶺有巨塊將墜適當其庵師厲聲叱之屹然而止山間樵蘇見者駭之時栖霞丘公年十九雖已入道未知所從而盤桓崐崙喻聞師在全真庵因投謁於齋次師知其為遠器贈之以詩賜名處機字通密號長春子自此門人頗集師以罵詈笞捶磨煉之稍稍散去篤志不變者惟馬譚丘而已八年八月師自煙霞遷文登姜實庵九月居縣北蘇翁庵九年四月寧海周伯通請師至則立金蓮堂金蓮會其井水舊鹹呪之而甘美俄夜有光如畫人以為火函往視之見師行而光明隨之師嘗訓馬鉦之妻孫氏名不二號清靜散人又以天堂畫相示之

五月五日令不二燒誓狀仍贈以詩又於文登立七寶會福川立三光會至登州立玉華會間遊蓬萊閣觀海大風忽起人見師隨風入海中有頃復躍出惟墜朱簪冠尋於波面泛泛而至有介公者素好善事而請出家志甚懇切師竟不許介去師謂人曰今二人於此欲建大殿宇一則基址既立材木既豐未求匠者而匠者自至何哉材既備而功可成也一則指其立基之所窪坎未平一工未集匠者望之而去矣師在煙霞時張德昭有子聰明甫十六歲送之入山就學以其宿有深契前後所贈歌詩并畫一事理反復曉告者非一後出山省親而不復至師與德昭書又付以真實語其子內心領之雅之夙有仙分而不能自奮於塵凡師之度人也必審其才分淺深故於德昭之子呼小張哥而未嘗以名百方鐫誨而不能致介公孜孜切切而自請出家而卒不納其所處例如此在萊州立平等會自是遠近風動與會者千餘人其五會之勝畧云平等者道德之祖清靜之元為

玉華金蓮之根本作三光七寶之宗源普濟群生徧拔黎庶人人願吐於黃芽箇箇不遊於黑路玉華者乃氣之宗金蓮者乃神之祖神是氣之子氣是神之母子母相見得為神仙然則有真功真行澄心定意抱元守一存神固氣真功也修仁蘊德濟貧拔苦先人後己與物無私真行也又有金蓮定分疏開明疏三元疏玉華疏平等會規矩及諸詩篇文多不載師後往返於登萊寧海之間及行皆留詩為別九月挈馬譚立三人西邁過登州太守紀石烈名邀者待以師禮及辭曰再會何時師曰南京後師羽化而邀適除南京副留守又指望仙門外畫橋語郡人曰他年逢橋必壞復一紀太守何邦彥以橋勢雄峭不利車馬遂命改之其逆知類如此達掖城又得劉公者始隨其母來謁師一見輒契諭以出家母欣諾之名以處玄號長生子遂行至是所謂馬譚劉丘舉集席下矣故竹枝歌云海上專尋知友來元誰堪可教依託昨宵夢裏見諸虬內有四虬能跳躍蓋預指而言之

也所謂詩詞與其事迹始末各載於本傳師至南京憩於王氏旅邸時孟宗獻友之以同知單州丁母憂歸有神風先生杜哥者嘗預言友之四魁事凡所發莫不應友之以仙待之一日忽告友之曰元帥來我當參謁友之令童僕默踵其後杜徑入王氏邸中一膝跪見師方卧而閱書殊不少顧友之雅重杜及聞大驚杜再往始為一盼三往笑而視之杜乃雀躍而去友之因之就謁師閱書而不為禮問讀何書亦不答就視樂章集也問全乎師曰止一帙爾友之曰家有全集可觀也即為送至師自到京日使馬鈺等四人乞錢於市市及斤之鯉魚食之秤不及則不食友之頗惑默念道人看樂章集已非所宜又食魚必其斤重果何為哉他日問樂章集徵手師不言但付其舊本友之檢閱其空行間遂篇和訖不覺嘆曰神仙語也即還沐浴更衣焚香請教日益加敬師自是不復食魚蓋以友之為大鯉故示意爾師命馬鈺召匠者造獨坐風車工畢師云近日火燭我眼不能見使

燃燈徧照之鈺即頓悟又師自市四鯉穿而拖之入於邸中以羊肉二斤併煮之熟藏之月餘其魚肉皆臭敗今門人弟子食之時各戒殮輩莫有敢食者師徧問皆曰不敢馬鈺獨稽首曰師令食弟子食之師叱曰汝自不斷得欲託我耶遂與滿鉢師復曰到關西無此物與汝食之凡數朝先令鈺早食羊魚又令沽酒市天蒸棗蜜彈子師自食之詢鈺曰會得否鈺未悟即愈加痛教狂罵捶楚不分晝夜且曰汝一日自當悟矣鈺拜謝曰蒙師慈誨無所可報師曰惟修行則可報後入關始悟京中之事皆玄妙之教也臘月中時於鈺輩極煅煉之功踰往者百千錯行倒施一言一動悉受呵責以鈺等所乞錢物多市薪炭大然於所寢之室其室偏小令馬鈺譚處端入於內劉處玄丘處機立於外內則不任其熱外則不任其寒處玄不堪而遁去師將設三子立於床下師曰丹陽已得道長真已知道吾無慮矣處機所學一聽丹陽處玄長真嘗管領之又顧處機曰此子異日地位非

常必大開教門者也甫正月師與眾別曰今可赴師真之期矣馬鈺等乞遺言師曰吾昔已書京兆灤村呂道人庵之壁口占頌曰地肺重陽子呼為王害風來時長日月去後任西東作伴雲和水為隣虛與空一靈真性在不與眾心同且戒勿哭言訖而脫眾皆號慟師忽開目曰何至於此囑馬鈺以後事若達關西化我鄉人仍付之密語勿輕傳之鈺再拜而受又謂譚處端等曰汝輩前程皆在馬公手遂書物外觀春詩云一第一姪兩箇兒和子五逸做修持結為物外真親眷擺脫塵中假合屍周迴種成清靜景遞相傳授紫靈芝山頭並赴金華會我赴蓬萊先禮師書畢奄然而逝享年五十八時大定十年正月四日也友之謂眾曰我既為弟子當主喪事日祭謹甚至靈柩西還不少懈焉告其子曰五人受重陽王公點化我其一也馬鈺等至京兆灤村訪呂道人庵得所為之頌又唱和玉蟾李靈陽於終南師在南京以詩寄二公有首先一去三人同之句見醴泉史公密乃出

舊圖而皆應合相與葺師之故庵師素不為鄉里信重及馬鈺至秦人方始追悔後鈺輩復往南京取其靈柩歸葬於劉蔣結廬三年然後各從所志馬鈺嗣其教與譚劉丘者繼為宗盟而全真學者稱鍾呂劉為三祖又以師為祖師大元至元六年已巳正月國朝褒贈重陽全真開化真君其遺文全真前後韶光集行于世云

臣道一曰皇不足則帝帝不足則王王不足則霸霸又不足道之不幸也至哉全真傑生中土轉澆漓以宗太樸化頑穢以慕無為一師倡之七真和之猗歟盛哉時當今之有國也力不侔於五胡德弗逮於拓拔綿綿之運信固有矣然天啓玄元之教俾福被於群生斯道無喪以至今日全真之功也道德經曰大道汎兮其可左右萬物恃之以生而不辭功成不名有愛養萬物而不為主故常無欲可名於小萬物歸焉而不為主可名於大是以聖人終不為大故能成其大非全真之謂乎

馬鈺

師初名從義字宜甫一名鈺字玄寶更之也號丹陽子漢伏波將軍援之後本扶風人五代兵亂遷寧海世業儒祖覺字華叟至孝通五經父師揚字希賢儀觀秀偉沉靜有度量以孝義稱幼時客有驚走擲油褶於家者視之兼金也具白其父今藏之以待旬日客方至即付之客謝曰吾為呂仙住幽谷村世以陶採為業得金兩鎰將鬻於市適監稅者逼逐賴公獲免請中分以報希賢却而不受呂曰君有黃向風詎後當有高士出其家他日訪幽谷人無呂姓者始知其異有子五人以仁義禮智信名之時號五常馬氏師次子也母孕時夢麻姑賜丹一粒吞之覺而分瑞時金太宗天會元年五月二十日也師在兒時常誦乘雲駕鶴之語及長為儒而不樂進取父愛其才俾掌庫物好賙濟而無私心由是得輕財好施名李無夢見而奇之曰額有三山手垂過膝真大仙之材因贊之曰身體堂堂面圓耳長眉脩目俊準直口方相好具足

頂有神光宜甫受記同步蓮莊居無幾丹成忠顯孫君以女妻師生三子庭珍庭瑞庭珪師嘗補試郡庠偶夜夢二人衣皆褐色其一素補其兩肩泣告師曰我輩十萬餘命在公所主言訖而去逐之入屠者劉清猪圈中壁上有一字是我輩已亥十萬人大半已經辛巳殺此門若是不慈悲後世軸頭常厮抹既覺聞屠猪聲起視之則清之小子阿兒縛二猪其一肩白已殺之矣方悟已亥猪也辛巳清之歲屬也師疑其夢不祥使術者孫子元占之因以稽其壽子元曰公壽不過四十九師乃大感悟曰生死果不由人耶予欲親有道之士學長生久視又師與客奕棋常自誦云此一著不錯當不死矣世宗大定七年七月同遼陽高巨才鄉人戰師飲於范明叔怡老亭酒酣師題詩云抱元守一是工夫懶漢如今一也無終日嚙杯暢神思醉中却有那人扶皆不曉其意中元後一日重陽祖師自終南來徑入怡老亭戰師問布袍竹笠冒暑東來何勤如馬曰宿緣仙契有知己之尋既食

瓜即從蒂而食問其故曰甘向苦中來問從何方來曰路遠千里特來扶醉人師默念言予從前所作有醉中人扶之語此公何以得知因問何名爲道曰五行不到處父母未生時明叔曰此十字耳曲盡妙意非神仙能出此語乎坐間談論尤與師合師邀歸私第而師事之始師夢一鶴從地湧出至是立庵於南園祖師指鶴起之地名之曰全真祖師必欲挽師西遊師以家事所繫未易猛棄祖師乃盛陳遠離鄉之高不離鄉之累與之開釋師由是與祖師契義日深是歲十月初祖師命師鎖其庵日饋一食時隆冬在候風雪四入而庵之所有惟筆硯枕席布衾草屨而已然形神冲暢如在春風和氣中識者謂至人有寒谷迴春之妙鎖庵之一日賜師梨一枚令啖之每六日賜芋栗各六至是月十一日分梨爲二令夫婦共食後六日之芋栗旬日之梨爲常期也其芋栗如初之賜梨則每旬例增其一至於九旬而積數爲五十有五每分送則必以詩詞寓其微意師亦隨韻酬答

解者曰芋者遇也梨者離也立遇則離分之義又分者損之又損也五十有五者天地奇偶之數也欲使離其親戚里閭以至無所不離耳又於夢中以十犯十戒獄警之八年正月十有一日啓鎖祖師謂曰將行在三四日之間從我歸去乃作一場奇怪哉鎖害風百日師於是以資產付庭珍輩以離書付孫氏入市求乞祖師因師夢中歌燒得白煉得黃便是長生不死方之句賜今名號又夢隨入一山及旦祖師呼曰山侖因爲小字二月從祖師居崑崙之煙霞洞忽患頭痛殆不可忍祖師令醫於家一日語門人曰馬公破道問何以知之曰昨夜夢飲酒使人往詢之藥用酒引不覺過多由是疾益甚人迴報云馬公將死矣祖師鼓掌曰吾三千里外尋此知友寧復至於此極乎爲其信之不篤故感此疾與法水即可愈矣乃寄真言云凡人學道先須依此一十二字斷酒色財氣攀緣愛念憂愁思慮自今後更無言可說如不依此便做靈丹性命亦不能了八月祖師在文登姜實

庵預戒門人曰馬公來勿納九月朔師果至祖師傳語曰如今相見已後不相見要已後相見今不相見師乞已後相見遂居縣北蘇氏庵至十月初令師燒誓狀贈詩云擲下金鈎恰一年方吞香餌任綸牽玉京山上爲鵬化隨我扶搖入洞天五月五日祖師在金蓮堂令孫氏燒誓狀別庵居之十一日召師至范明叔宅以詞贈之亦不收領或容暫見又復逐出後至南京始得共處矣祖師欲令化錢於寧海師以有不還鄉之願辭之祖師怒自夜捷之至旦從西行抵汴梁寓於王氏旅舍者久之祖師於師等尤加煅煉責罵撻楚逆順莫測飲食起居悉示仙機是歲將終祖師辭衆云今可赴師真之期矣師乞頌曰我已書之關中矣十年春正月四日噶以後事而逝師於是同衆化錢負仙骨往京兆葬之劉蔣遺命也仍即祖師舊庵爲環頭分三髻居喪者三年夫三髻者三吉字祖師之諱也師尊而戴之故多自稱三髻山侖嘗與丘劉譚三人在秦渡真武廟月夜各言其志師曰

關貧諱曰關是劉曰關志丘曰關閑師與諸公雖同出於重陽之門以祖師嘗有一第一姪之語特稱師為師叔十五年弟運甫寄書邀師會葬其父母師答書云汝所葬者骨子所度者神所行之迹有以異而報德之心無以異也遂以煉丹砂詞答之師嘗作十勸百不歌一日示眾云此非出己意亦是祖師之言因而成之也又問門人曰一日一夜凡幾時對曰十二師曰十二時中天道運行斡旋造化還頃有停息否對曰無知師曰學道者切須法天之道斡旋身中造化十二時中常清常靜不起纖毫塵念日就月將工夫既到神仙必矣十八年就化華亭劉昭信李大乘十餘人不得其一焉乃作詩有云錦鱗不得空滂瀝收什瓊罕歸去來大乘還悟乃執弟子禮賜號曰靈陽子師環居華陽亭牆外有來禽一株枯已久矣四月四日師從環汲水以沃之俄有門人姚鉉攜純陽真人家譜告燕其句讀始知純陽四月十四日生於此樹之下師曰子生於五月二十日至日此樹生

葉矣大乘私謂人曰夏至不遠豈能復榮乎師作頌云天上三十六地下三十六天地入寶瓶七十二候足李請釋其旨師曰此隱語豈易知之其應有日矣至其日綠葉藹然始知四月十四日至五月二十日相去三十六日天地相合為七十二候大乘因作異本記芝陽道友崔公閱其文疑其過情遂於四月移竹兩叢松一株於金真庵以移殖不時枝葉皆黃萎崔啓師曰此松竹可活否師答詩云隄外不惟君子綠庵前又喜大夫青之句遂令門人于知一去其黃葉以潑面水溉之不旬日榮茂如初師率其徒欲西遊崆峒取道亭川官僚士庶請教者肩摩踵接惟恐其後師感其誠委曲開諭疊疊忘倦雖平日陸梁狂恣之徒率皆改心易慮以作非為恥二十年八月二十四日師往長安祈雨有詩云一犁霑足待何時五五不過二十五明日雨足二十一年師在京兆謂門人來靈玉曰關中謂衣裳舊重修潔者何名靈玉曰名拆洗師曰東方教門年深弊壞吾當拆洗之未踰

旬官中有牒發事陝右道衆不勝震懼惟長春謂大乘曰吾道東矣予雖在牒數不可出關若出關則關中教門掃地也師出關所至垂髫戴白迎送不絕至濟南有韓閭清甫者慕邵堯夫之爲人所居號安樂園邀師詣之乞師一語師曰夫道以無心爲體以忘言爲用柔弱爲本清靜爲基節飲食絕思慮靜坐以調息安寢以養氣心不馳則性定形不勞則精全神不擾則丹結然後滅情於虛寧神於極不出戶庭而妙道得矣韓謝曰大道鴻濛無所叩詰今聞至論得其門而入矣二十二年十二月師行化於文登漁者譚氏之壻于公輩焚網於瑯琊因召風迴雪霽海市忽見之應士大夫有借蘇東坡海市詩韻以贊之者師亦繼作焉金蓮堂水素鹹苦師臨井呪之其甘如醴郡人號曰靈液構亭立碑以記其異師在文登七寶庵門人鑿井九尺而大石障之師乃示洞中仙詞云穿鑿須加二尺深甘泉自有應清冷鑿之一尺八寸泉自湧出師一日謂門人曰今日當有非常之喜

乃歌舞自娛俄有報云壬寅十二月晦日孫仙姑化于河南府嘗為門人說內天地云人能常清靜天地悉歸人膈之上為天人膈之下為地若天氣下降地氣上騰上沖下和氣自圓矣又說四體用云行則措足於坦途住則凝神於太虛坐則勻鼻端之息卧則抱腹內之珠又聯句云水中談進三丹結火裏蓮生一性圓學道男兒無我相修真烈士沒人情石女吹簫鸞鳳舞泥牛入海虎龍和玲瓏玉蛇敲龍角惺灑金童跨虎腰此類甚多蓋道人身中事也師還海上初祖師嘗立五會師至則重闢焉至寧海一日為向屠者劉清舉及在家夢中事云計汝二十餘年所殺定數亦已足矣若不改業必入無間獄清悉焚屠猪之具於郭外二十三年四月師欲往芝陽高莊半途遇者百餘人或曰海市從旦至午見而未滅曩者雖間有之非清旦不可得而見也今師之來有此非常里之漁者鞠斌郭亨樂周輩不待勸誘聚網焚於桑島過午復有龍車鶴駕旌幢羽蓋之應洪儒鉅筆

成海市感應集下元日文山九幽離師夜聞空中報云重陽真人至明日晦時祖師青巾白袍坐白龜於碧蓮葉上龜搖其尾眾會歡呼拜於泥中祖師迴身側卧東南而去九月晦日與僧燭律師士人范壽卿於城北三教堂焚香宴坐鄜州王道師抱琴來鼓之曰吳鄉人雲集師作歸山操云能無為兮無不為能無知兮無不知此道兮誰不為為此道兮誰復知風蕭蕭兮木葉飛聲教教兮屬南飛嗟人世兮日月催老欲死兮猶貪癡傷人

蓬瀛手知一曰錄事浩大乞暫留於世師云堂堂歸去也作箇快活仙人呼劉真一囑曰汝等望作神仙須要積功累行縱遇千萬萬難慎勿退情然後可領吾言我開眼也見瞑目也見足來不在眼但心中了然則無所不見矣談話夜將二鼓風雨大雷震一聲師東首枕肱而逝是月二十有二日也是夜師叩酒監郭復中門郭素不相信出而邀之索筆書頌云長年六十一在世無人識烈雷吼一聲浩浩隨風逸書畢告別堅留之即趨而去又劉錫屋壁間留一頌云三陽會裏行功圓風馬乘風已作仙勸汝降伏龍與虎自然有分亦登天少頃人云師已逝矣方悟所見皆師之陽神也經七日神質不變遂葬于遊仙初師在崑崙紫金山東華庵傍有大松數十枝葉變白半載不青師嘆曰松之白殆為我乎二十四年正月長生主醮於昌陽十八日已午間進士徐紹祖等見空中卿雲鸞鶴變態飛舞不可名狀重陽雲冠絳服丹陽三髻素衣現於雲際移時乃去遂碑記之二十五

年已人疑陝西徒衆盜去仙骨萊陽寧劉公啓棺視之貌如生乃更衣於金玉堂而復葬之師之歌頌有新悟金玉摘微三寶行化圖成等集行于世大元至元六年己巳正月褒贈丹陽抱一無爲真人云

歷世真仙體道通鑑續編卷之一

歷世真仙體道通鑑續編卷之二

羽二

浮雲山聖壽萬壽宮道士趙道一編修

譚處端

師初名玉字伯玉後名處端字通正號長真子蓋祖師授之也世爲寧海人以金太宗天會元年三月一日生生而骨相不凡六歲偶墜井其家人急救之則安坐水上出之無所傷又所居遺火巨棟折於卧榻前師方熟寢呼而起之神情自若人已知其爲異既入學記誦敏給同輩罕及十歲學詩一日其所親指木架葡萄令作詩有云一朝行上青龍架見者人人仰面看衆喜其醜藉長而個儻不事邊幅以孝義見稱其於經史靡不涉獵尤工諸草隸因醉卧雪中即感風痺之疾自知非藥石可療乃暗誦北斗經以求濟急夢天帝橫空師飛起取之則諸星君坐其上師拜其下恍然而覺自是歸道之心遂決世宗大定七年間祖師在馬丹陽家徑往乞備門弟子列祖師留宿庵中時嚴冬在候藉以海藻而不任其寒祖師展足令抱之少頃汗出如

置身甌中黎明以盥手餘水滌其面宿疾頓愈由是願推誠心終身事之他日妻嚴氏惟師不歸就詰其所以師遂離之祖師復嘉其勇斷遂授以祕訣立今名號又贈詞有達真譚玉之語其許可也明矣八年從祖師隱崑崙之煙霞九年從至黃縣廬山延真觀觀有盧真君出世之迹師於玉皇殿西壁題詩有否否懸輪去不迴鸞驂鶴馭破雲堆之句是歲冬從祖師遊梁十年春祖師蟬蛻於王氏旅邸同丹陽輩負仙骨葬于終南之劉蔣村治喪三年十四年復關東至洛陽朝元宮題詩云紫詔師真歸去後未知孰繼大羅仙朝元宮寔朗然子登真之所故迤邐至懷之修武有張八哥者如狂如癡識者以爲有道一日唱言於市曰來者譚先生神仙之總管也後居新鄉府君廟之庵因往獲嘉縣尋復寓衛州北關邸中新鄉之廟官溫六忽夜見庵中燈火熒然竊視之則師面火獨坐溫拜於前師微答不言而出溫待久不至迹之而不知所在急呼道衆白其事衆令朱四者詣衛

質之主人曰先生自至未嘗出也朱迴告其衆乃知其陽神也十五年乞食於磁州二祖鎮一狂徒問爾從何來遂以拳擊師之口尋致血流齒折而容色不變吐齒於手舞躍而歸于邸中見者咸怒欲使訟于官師但云謝他慈悲教誨時丹陽在關中聞而贊之曰一奉消盡平生業師家所見其有如此十六年至洛州白家灘一農夫病累月治療無方夢中遇一道者軀軀魁偉與之紅藥服之立愈次日見師愕然曰此夢中賜藥之師也欲以物酬師不領而去嘗與濬州王四郎者同合寸金丸師之所分治無不效王之所分效十四五互易之其效與否如前始知非獨藥之神亦道氣法力之神也十七年過高唐縣以茶肆吳六者奉待往來道信甚勤乃遺龜蛇二字懸其肆初不知其為譚師真也一日鄰舍失火多所延及而吳肆獨存人以二字同純陽真人辟火符蓋純陽嘗留題於博興縣之酒館縣被火其館不災辟火符時人謂之耳又乞食宜村過渡新船就功將真諸水聚

人而挽之力不能動師因助之應手而去是後凡僧道渡者水工願設手駕東遊抵陽武縣北夜起見北斗交換星如車輪亟呼道衆觀之其星尚如雞卵動搖未定久之復故自後師念聖號甚謹衛州淇門鎮石孔曰問師持念之故師云衆亦宜念今歲當有大水之災衆莫之省是年河決王洪埽二十年復西遊至同州西里庵門人求親筆輒書龜蛇二字筆力遒勁有龍蛇盤屈之狀凡求書者亦多以二字與之蓋預指歸期人初不悟至乙巳四月一日仙蛻始應焉二十一年師在華陰純陽洞瘡生於首曰其將死乎衆莫知所對良久曰今我未死遽生於足則死矣因示衆云六年煉盡無明火十載修成換骨丹湛湛虛堂無罣碍已知跳出死生關又云恰十年來學得癡騰騰元元任東西欲詢風子修行事垢面鬚頭火滅時復至洛陽朝元宮之東得隙地數畝築庵居之二十五年夢過重陽丹陽報以仙飛之期即令門人預營葬事適足生瘡遂書長短句云交泰一聲雷迸出

靈光萬道輝龍遇迅雷重脫殼幽微射出金光透頂飛一性赴瑤池得與丹陽相從隨顯見長真真妙理無爲湧出陽神獨自歸書畢曲肱而逝矣大元至元六年己巳正月褒贈長真雲水蘊德真人有水雲前後集行于世

劉處玄

師名處玄字通妙長生其號也金熙宗皇統七年七月十二日生於東萊之武臣莊其先九世孝友相繼宋太宗太平興國間朝廷旌其門閭特免本郡諸役其存恤親舊賻贍貧乏祖父皆有先世之風母王氏夜夢白水翁呼出西南指之有玉樹而四枝枝各有一金葉令取其一曰他日必生異人意將取之其葉自墜於手視之則金蟬飛起而復投於口中翁失所在十有三月師乃生是夜紫氣二道從太基山橫貫其家師自幼而孤事母以孝聞母亦有栖隱之志太基在武官南二里許山之陽有道士谷乃光州太守鄭道昭成道之所師嘗盤桓其間弱冠母欲議娶師以素行學道之志竟弗許金世宗大定九年春

於鄰居壁間人所不及處得二頌其墨尚濡末句云武官養性真仙地須作長生不死人是歲九月祖師與其徒丹陽長真日東而來師與母俱往參謁祖師一見問之曰汝解壁間語否師不言四人相視而笑正所謂目擊道存之妙也祖師遺之詩云釣罷歸來又見鰲已知有分列仙曹鳴榔相喚知子意躍出洪波萬丈高乃授以名號未幾從祖師遊梁與馬譚立三子俱一日祖師以詩示四子有我趙蓬萊先禮師之句又云我之辭世之語已留長安灤村呂道人家十年祖師羽化師與三人同負柩歸葬終南廬於墓側三年各聽所之因與長真東入洛陽長真居朝元師居市中土地廟不語者三年俄遷城東北雲溪洞徒衆日集忽指地云中有井三鑿之二丈餘得知下貫泉源人問何以知之曰曩世所居也二十年師指庵右馮氏園曰此我身後之緣四十年園之松柏死灤水西流其地當不售而得乃磨一碑埋於中云此緣興而碑立明年東之萊迨長春真人西遊道出雲

溪門人陳其遺言其後東海郡侯大安二年運粟有司得長生觀額至宣宗興定三年四十年矣馮氏鬻其園圖蔡清臣以白金百兩得之請師之門人于離峯住持官伐松栢爲樓櫓之用又架雲橋取灤水經觀西流以護城師之言於斯皆驗師既至萊築庵居之十二年復居武官於是玄風大振四方受教者日益衆師遂註道德黃庭清靜等經是年丹陽自關中來師盛服見之丹陽責其侈師辯之曰予聞修行之人日消萬兩黃金丹陽曰日消萬兩黃金正好摘衣淡飯終薦證明萊州縣事二十三年十二月二十二日丹陽羽化明年正月姜守靜請師主醮於昌陽十八日巳午間胡瑋徐紹祖等忽見瑞鶴盤繞空際祖師雲冠絳服丹陽三髻現於彩雲之上四月十五日登州醮海市見於竹島丹陽既歿師與玉陽同主葬事守墳百日乃使門人張順真等持書詣洛請長真主教一日謂順真曰教門之事不在於我丹陽得遊仙吾得朝元後寄書中有歸逝之語兼委掌教事

是年五月旱登郡守請師祈雨海市復見於竹島明日丹陽現於應仙橋之西北是日雨足二十九年師嗣長真主教章宗明昌二年駙馬都尉出鎮萊州見歸向者甚衆而不見有異於人疑之命尉司樂武節追捕下獄俄頃市人見師於城南與道友接談如平日鄭押獄王受事亦見之意師逃出行視獄中師方熟睡二人驚駭具所見以白亟令出之又濰州溫迪罕明威來見留之三曰告之曰汝可速歸汝庵欲壞矣既歸其庵無故人以病卒承安二年冬召赴闕勅寓天長觀問以玄旨所對皆合上意臣庶見者無不敬焉就禮部給觀額五日靈虛曰太微曰龍翔曰集仙曰妙真明年三月得旨還山大興靈虛之緣吳六先高明速者憚師嚴厲密謀他日師令郝命清諭之曰我不了道而且性急請別尋師友二人相視而語曰我輩在心之事師能知之遂謝罪赤脚劉先生得疾一月不愈來乞早逝師振杖言曰汝向時有一年背道之愆世則以功準過陰理則功過各受其報前

日之愆一年可準今既相遇一月亦可也劉因自誓而疾頓愈泰和二年主濱州縣正月申旬小雪初霽古城壕水復冰上現瓊葩玉樹不啻千數若珊瑚之狀尤多又杏花約及二千其小枝橫卧者殆不可勝計觀之者皆

曰常人至誠尚可動天地感鬼神況有道之士乎有此感應也宜矣同知東京留守事劉昭毅定海軍節度使劉師魯致政之後與師往來甚相得三年正月二公請講師第禮師謝曰公等皆當代名臣深荷顧遇吾將逝矣不足爲公等友輒示頌云正到崢嶸處何如拂袖歸我今須繼踵迴首反希夷二公覽之愴然三月二十八日大師謫王請主醮稟師所赴之期師云越八日二月六日師羽化乃八日也師嘗哭之以詩云與君晚歲得相親相對忘形畧主賓日望師來虛正寢忽驚仙去泣同人聞溪聲憶廣長舌見山色思清靜身從此誰爲林下客靈虛寂寞鎖深春時春秋五十有六大元至元六年己巳正月褒贈長生輔化明德真人有太虛安閑仙集般陽

大成大同神光至真語錄等集行于世

丘處機

師名處機字通密號長春子登州栖霞人世爲顯姓金熙宗大定六年師甫十九歲居崑崙山七年間重陽祖師於寧海全真庵即往師焉重陽以詩贈之云細密金麟戲碧流能尋香餌會吞鈎被予緩緩收綸線拽入蓬萊永自由其器重可見八年春從祖師住煙霞秋冬居文登九年與丹陽長真長生從祖師遊梁祖師日夕訓誘比之餘人尤加切至未幾祖師羽化四人護喪葬之終南廬墓三年各任所適師居磻溪者六年龍門七年養真所受之於師者或時作歌詩以形容之由是聲名藉甚因京兆統軍夾谷公禮請遂復終南載揚祖教二十八年世宗召入見問以至道師首陳延生保命之要次及持盈守成之難又曰富貴驕淫人情所常當兢兢業業以自防爾誠能久而行之去仙道不遠謫詭幻怪非所聞也上嘉納之館於萬寧宮之西以便咨訪五月召見於長松島七月復召見師

剖析至理進瑤臺第一層曲又應制五明日賜上林桃師不食茶果十餘年至是一啖之因上賜也八月得旨還終南賜錢十萬辭不受二十九年世宗崩道逢哀詔挽之以詩章宗明昌元年東歸栖霞大建琳宮勅賜其額曰太虛三年十月芝陽醮忽塵中數騎西來衆驚以爲驛傳俄頃塵數騎無音迹三夜聖前之杯酒醕者十餘始悟塵中之騎神人也五年九月主醮於福山方請聖聞天關震響北辰下紅霄燭地可辯纖悉泰和七年元妃施道經一藏驛送栖霞東海郡侯大安改元作學仙記二年作開天記宣宗貞祐四年師居登州上命東平監軍王庭玉齎詔召師歸京師曰我循天理而行天使行則無敢違也歲在己卯時金宣宗興定三年居萊州昊天觀時齊魯陷於宋秋八月宋遣使召師命大師彭義斌差官衛行不起州牧以爲異師曰吾之出處非若輩所可知他日恐不能留耳是年五月元太祖聖武皇帝自奈蠻國遣侍臣劉仲祿請師其制畧曰七載之中成大業

六合之內爲一統是以南連蠻宋北接回紇東夏西戎悉稱臣佐任大守重懼有關政且夫剗舟剗楫將以濟江河也聘賢選佐將以安天下也朕踐祚以來勤心庶政三九之位未見其人伏聞先生體真履規博物洽聞探賸窮理道沖德著有古君子之遺風抱真上人之雅操今知猶隱山東舊境朕心仰懷無已山川懸闊有失躬迎之禮朕但避位側身齋戒沐浴選差近臣備輕素車不遠數千里謹邀先生暫屈仙步不以沙漠遠行爲念或憂民當世之務或恤朕保身之術令朕得親仙座惟先生將咳嗽之餘但授一言斯可矣八月仲祿抵燕聞師在萊州又得益都安撫司吳燕蔣元等願以二十騎從行至益都其帥張林助以駟騎次維州得清河尹公十二月送至東萊傳所以宣召之旨師慨然許行庚辰正月間弟子選可以從行者得一十八人二月入燕行省石抹公館於玉虛觀仲祿先遣人馳奏師亦奉表以聞四月作醮於太極宮師登寶玄堂傳戒有鶴自西北來焚簡

之際一簡飛空五鶴翔舞其上明日師北行道出居庸遇群盜皆稽顙以退且曰母驚師父五月至德興寓龍陽觀中元日醮午後傳戒衆露坐暑甚須臾雲覆其上狀若圓蓋移時方散觀中井水僅給百衆至是汲之不竭八月太傅移刺公請居宣德之朝元觀公構聖殿及祖堂欲畫其壁時當十月畫更以寒辭師不許曰鄒律尚能回春況聖賢有所扶持耶畢工果無沍寒之阻是月進表者曷刺迴有詔曰勅真人丘師省所奏應召而來者惟師道逾三子德重多方命臣奉厥玄纁馳傳訪諸滄海時與願適天不人違兩朝屢詔而弗行單使一邀而肯起謂朕天啓所以身歸不辭暴露於風霜自願跋涉於沙漠書章來上喜慰何言軍國之事非朕所期道德之心誠云可尚顧川途之難闊瞻几杖之非遙爰答來章有明朕意秋暑師比安好遣書指不多及又勅仲祿無使真人飢且勞可扶持緩來其禮敬如此辛巳二月遣友錢行於西郊至有擁馬首而泣者曰師去萬里外何時

復舊瞻禮師曰三載歸矣五月朔抵陸局河日食之既七月至阿不罕山鎮海來謁言前有大山高峻廣澤沮陷不可以車留門弟子宋道安九人立栖霞觀率趙虛靜輩輕騎以行中秋日抵金山白骨甸皆云此地天氣陰黯魑魅魍魎爲祟過者必以血塗馬首厭之師笑曰道人家何憂此過之卒無所見抵陰山王官士庶道釋數百來見師因問其故俗乃曰景龍三年楊何爲大都護有德政惠及後人於今賴之十一月至邪迷思干大城之北太師移刺國公及蒙古師等載酒以迎大設幃幄因駐車焉太師以回紇歎食復多盜賊恐變生不測師曰道人仕運逍遙以度歲月白刃臨頭猶不足畏況盜賊未至而預憂乎且善惡兩途必不相害衆遠安冬居等端氏之新宮壬午三月上旬阿里鮮至自行宮宣諭仲祿鎮海曰惟汝二人護從真人來仍勅萬戶播魯只以甲士千人衛之過鐵門達手行在舍館定入見上勞之曰他國徵聘皆不應今遠逾萬里而來朕甚嘉焉對曰山野

詔而起者天也。咨訪馬工重其誠實，設二帳於御臣之東，以居之。約四月十四日及期，有山賊之報，上欲親往。改卜十月，望吉。師乞還舊館，上曰：「再來不亦勞乎？」師曰：「兩旬可矣。」上又曰：「無護送者。」越三日，命宣差楊阿狗督回。統酋長一千餘騎，從行由他路迴。五月，達邪迷思千諸官迎師入館，時重五日也。師既還館，館據北崖，俯清流十餘丈，溪水自雪山來，甚寒。仲夏炎熱，就軒風臥，夜則寢屋顛之臺。六月，極暑浴溪中，師之在絕域也，自適如此。其館中賓客甚少，每以經書遊戲，有詩云：北出陰山萬里餘，西過大食半年居。遐荒鄙俗難論道，靜室幽嚴且看書。七月，遣阿里解奉表詣行宮，稟論道日期。八月七日，得上批答，八日即行。太師相送數十里，二十二日田鎮海來迎，及行宮上遣鎮海問曰：「便欲見邪？」且少憩。耶師曰：「入見是望。」既見，賜酒醑，竟乃辭。上曰：「師每日來就食，可乎？」師曰：「山野修道之人，惟愛靜處，上令從便。」二十七日，車駕北迴，在路屢賜葡萄酒、瓜茶等。九月，渡航橋而

北師奏話期將至上召大師阿海，其月既望是夕，上設庭燎，虛前席以延之。大師阿海里鮮入侍，上問以至道師曰：「夫道生天育地，日月星辰鬼神人物皆從道生，人止知天大，不知道之大也。輕清者為天，天陽也，屬火；重濁者為地，地陰也，屬水。人居其中，負陰而抱陽，故學道之人知修煉之術，去奢屏欲，固精守神，惟煉乎陽，是致陰消而陽全，則昇乎天而為仙，如火之炎上也。其愚昧者以酒為漿，以妄為常，恣情逐慾，耗精損神，是致陽衰而陰盛，則沉於地而為鬼，如水之流下也。修真者如轉石上山，山愈高而進愈難，跬步顛沛，前功俱廢，以其難為舉世莫之為也。道人修真煉心，一物不思，如太虛止水，水之風息也，靜而清，萬物照之，燦然悉見，水之風來也，動而濁，曷能鑑萬物乎？本來真性靜如止水，眼悅手色耳好，手聲舌嗜，手味意著，乎事此數者，續來而疊舉，若飄風之鼓浪也。道人治心之初，甚難，歲久功深，損之又損，至於無為，道人一身爾，治心猶難，矧夫天子富有四海，日

覽萬機，治心豈易哉？但能節色欲，減思慮，亦獲天祐，況復能全戒者乎？古之人以立嗣而娶嗣，立而戒欲，則孔子四十而不惑，孟子四十不動心，蓋人生四十以上，血氣漸衰，陸下春秋已高，宜修德保身，以介眉壽。論以服藥獨卧之理，藥為草精，為髓去髓，添草譬如囊中貯金，以金易鐵，久之金盡，囊之所存者鐵爾。夫何益哉？服藥者何以異此？飲食居處珍玩貨財，亦當依分，不宜稍過。四海之外所有國土，誠服奇珍異寶，其產雖多，然不如中原天垂經教，治國治身之術，為之大備，屢有異人成道昇天者。山東河北天下美地，多出良香美蔬，魚鹽絲枲以給四方之用，自古得之為大。所以歷代有國者，惟重此地，爾今盡為陛下所有，奈何？兵火相繼，流散未集，宜選清幹官為之規畫，量免稅賦，使軍國足布帛之用，黔黎復蘇息之期。一舉兩得，茲亦祈福之一端爾。苟授非其才，不徒無益，反為害也。初金國之得天下，以創起東土中原人情尚未諳悉，封劉豫於東平，使經營八年，然後取之。

亦開創之良策也山野微陳梗槩其用之捨之惟在宸衷之斷而已上悅令左右書之於策此其大略也其詳見慶會錄翌日上問以震雷事對曰山野聞國俗夏不浴於河不浣衣不造壇野有菌則禁其採畏天威也然非奉天之至道嘗聞三千之罪莫大於不孝今聞國俗於父母未知孝道帝宜教戒之上集太子諸王大臣諭以師前後之語且云天俾神仙為朕言此汝輩各銘於心神仙之名始於此矣西遊記云十月朔癸未二月七日因奏告乞還舊居入見而辭上曰少俟三五日前日道語有所未解者朕悟即行上獵東山射一大豕馬蹄失馭豕傍立不敢前左右進馬遂罷獵師聞之入諫曰天道好生今聖壽已高宜少出獵墜馬天成也豕不敢前天護之也上曰朕已十二深省以騎射少所習雖未能遽已神仙之言在我衷焉自是乃簡出三月七日又入辭制可而所賜備極豐腴皆辭之授尊重安慰之旨以寵其歸因命阿里鮮護師東行送者皆泣別至阿不罕山過栖霞觀至五月中師不

食但飲湯而已衆詣之曰師奚疾師曰予疾非爾輩所可測聖賢琢磨故爾是夕尹清和夢入謂之曰師之疾公輩勿憂至漢地當自愈六月晦抵豐州宣差俞公請止其家奉以湯藥輒飽食是後如故衆相謂曰清和之夢驗矣至雲中阿里鮮欲招諭山東請與清和行師曰天意未詳雖往何益阿里鮮再拜曰若國王臨以大軍生靈必遭殺戮師曰雖救之不得猶愈於坐視也從其請八月至宣德居州之朝元觀河朔州府王官將帥以書疏來請者若輻輳然師答云王室未寧道門先暢開度有緣恢弘無量郡方帥首志心歸向恨不化身分酬衆望甲申二月朔居縉山之秋陽觀燕京行省石抹威得不宣差便宜劉仲祿各持疏懇請住太極宮許之乃度居庸初師之出武川也衆請還期師曰三載歸至是如其言是月曷刺至自行在傳旨神仙至漢地凡朕所有之城其欲居者居之衆官咸曰師許太極矣請無他議是後道侶雲集玄教日興乃建八會曰平等曰長春曰靈寶曰

長生曰明真曰平安曰消災曰萬蓮求法名者日益衆常以歌頌示之時復出遊故園瓊華之上從者五六月人宴坐松陰或自賦詩或相屬和夕陽在山澹然忘歸乙酉春師折梨花一枝持賜寧玄居士張公去華公重其賜十六瓶以養之至秋結實二十有四無異其樹之生者時以為祥去華乃誠明之父也師之寓意微矣哉延祥觀枯槐一株師以杖遶而擊之云此槐生矣及今榮茂他槐莫及九月初宣撫王楫以焚燬犯尾宿主燕境災將醮以禳之問所費師曰一物失所猶懷不忍況闔境乎比年民苦徵役公私交困我當以常住物給之但令衆官齋戒以俟行禮醮竟之夕宣撫喜而賀曰焚燬已退數舍我輩無復憂矣師之德感何其速哉師曰予何德祈禱之事自古有之但恐其不誠爾丙戌五月京師大旱行省請師主醮雨乃足僉曰神仙雨也名公碩儒皆以詩賀丁亥五月復早在京奉道會衆請作醮師徐謂曰我方留意醮事公等亦建此議所謂好事不約而同也仍云一

日爲祈雨醮二日爲賀雨醮三日中有雨是
石隴家瑞應雨過三日非醮家雨也或曰天
意匪易度師對衆出是語萬一失期能無招
衆口之訾也師曰非爾所知也後皆如師言
是月門人王志明至自秦州奉旨改太極宮
爲長春瓊華島爲萬安宮仍賜以虎符凡道
家事一委神仙處置六月師不出明日雷雨
大作人報云太液之南岸崩裂水入東湖聲
聞數十里龜鼉魚鼈盡去池遂枯涸北口山
亦摧師初無言良久笑曰山摧池枯吾將與
之俱乎七月四日師謂門人曰昔丹陽嘗授
記於予云吾歿之後教門大興四方往往化
爲道鄉道院皆勅賜名額又當住持大宮觀
仍有使者佩符乘傳幹教門事此乃功成名
遂歸休之時也丹陽之言一一皆驗吾歸無
遺恨矣九日登寶玄堂留頌云生死朝昏事
一般幻泡出沒水長闊微光見處跳烏兔玄
量閑時納海山揮斤八絃如咫尺吹噓萬有
似機關狂辭落筆成塵垢寄在時人妄聽聞
書畢而逝春秋八十便宜劉仲祿揮涕而嘆

曰真人入觀以來君臣道合離闕之後上意
眷慕未嘗少忘今師既昇化速當聞奏自是
四方赴喪者哀慟如喪其親戊子三月朔清
和建議爲師構堂於白雲觀期以七月九日
大葬六月霖雨皆應有妨七月初廓然晴霽
及啓棺容色如生觀者如堵三日藏仙斃於
堂異香芬馥者移時既寧神大雨宣撫王楫
會葬自爲主盟親勝其堂曰處順至元六年
己巳正月復贈長春演道主教真人師之歌
文有磻溪鳴道集行于世

歷世真仙體道通鑑續編卷之二

歷世真仙體道通鑑續編卷之三

羽三

浮雲山聖壽萬年宮道士趙道一編修

王處一

師名處一寧海東牟人玉陽其號也金熙宗
皇統二年壬戌三月十八日母周氏夜夢紅
霞繞身驚寤是日乃生甫七歲膏氣絕仆地
移時方蘇母驚問曰汝何爲而若是曰但知
熟寐不知其他師因悟生死之理一日偶至
山中遇一老人坐大石謂之曰子異日揚名
帝闕爲道教宗主遂摩頂令去又嘗聞空中
人問云汝識我否對曰未識也曰我玄庭宮
主也是後狂歌謾舞冬寒跣足單衣顏色不
變忽作頌自歌云爭甚名競甚利不如聞早
修心地自家修證自前程自家不作爲群類
弱冠或告以婚事笑而不應世宗大定八年
師在文登牛仙山庵居人告以祖師至即詣
全真庵請爲門弟子祖師知其爲玄門大器
遂從其請二月晦從祖師至崑崙煙霞洞乃
授以正法及今名其母拜祖師亦願學道師
知其貞潔以德清名之號玄靖散人九年四

月師在鐵查山祖師與丹陽輩數人自文登將歸寧海取道龍泉時日方熾祖師執傘而行丹陽輩從之其傘忽騰空而去自辰及曉墮於師庵之前龍泉距查山幾二百里柄內得令號又曰傘陽子此字祖師撰之也暨有七人之名師在馬譚劉丘之次故祖師有云傘竹通爲七箇人以應金蓮之七數也又云結竹金丹出頂上五光射透彩雲棚九月祖師西邁師隱於雲光洞常臨危崖翹足駐立不移者數日人以鐵脚仙人目之師九年煅煉心地開明是後數往來於齊魯間二十二年秋居寧海丹陽真人來自關中同宿於金蓮堂從容謂師曰重陽祖師不遠數千里提挈吾儕吾儕殊無以報不愧於心歟且得道之士苟利其身功不及物恐非弘濟之旨誠欲光昭先師之德莫若彰玄應而福生靈公今抱道藏器而獨善其身無乃不可乎師曰且道無同異緣有行否先生道備一身德光四海使天下之人望風而敬服者無他是道興而緣行也今貧子緣之未行姑猖狂以混

世耳丹陽然之二十七年世宗微赴闕凡所應對大副宸衷館於天長觀者久之上聞有以鴆酒害師者遣使詢其酒之所自來雖至再三終不之告但託疾而已上聞益深嘉歎乞還山侍親從之二十八年二月復詔至闕建修真觀賜金書篆額俾居焉二月主萬春節醮事八月得旨歸仍賜金帛鉅萬辭不受十二月上弗豫遣使召師師謂使者曰何來之晚恐不及重親聖顏矣明年春達哀詔於涿郡固辭東還章宗承安二年七月徵見於便殿問以養生之道師以無爲清靜少私寡慾爲對又問性命之理師言內丹之說以心運氣是皆無爲自然斡旋造化玄元至道不爲而成者也上曰非朕所得而議乃問以治國及邊境事所對莫不允合上心又謂曰先生凡有所問而必知之何也師曰偶然爾上曰毋讓朕願聞之師曰鏡明猶能鑒萬物而況天地之鑒無幽不燭何物可得而逃所謂天地之鑒自己靈明之妙也上嘆曰清明在躬氣志如神嗟將至其兆必先先生之謂

也明年春奏母氏壽垂九袞乞還侍養上賜觀額及體玄大師號物禮甚厚三年癸亥上命亳州太清宮兩主普天醮事具戒度爲道士者千餘人得遇師之降日門人畢集師之母曰我今年耄如何得歸師言壽期或在今秋之七月也母因有不貪生不懼死之語及期得疾師乃速營葬事凡二十有五日而逝逝之日人皆聞異香馥郁莞絃清雅移時方止北京按察使前參政李本魯公久佩師旨訓名尊道凡與師遇或預言雨降之期或告以後會之處歷歷皆應一日詣聖水致懇而言曰尊道於神仙但聞其名自遇師之後凡伸祈禱必垂嘉應行止會遇示以預知深愧塵凡不能從雲水之游事與願違徒增悵然也七年元妃施道經一藏驛送聖水玉虛觀觀之水洞前有大石斜出數丈俯其下過者懼懾一日集衆謂之曰大石今宜去之鉅鑿具舉攻之數日師問云幾何對曰百分之一爾師笑曰汝等安能去此遂躬詣其傍運鉗三擊聲若雷霆響震岳谷其石乃墮見者莫

不悚然貞祐四年文登令溫迪罕龜壽迎師歸縣之天寶觀明年四月二十三日師語門人曰群仙已約我矣言訖沐浴冠帶焚香朝禮十方乃辭世師之歌詩有雲光集行于世大元至元六年己巳正月褒贈玉陽體玄廣度真人先是明昌改元重五日萊陽縣劉植以無嗣告師曰公富而好禮未應絕也然吾稟之上蒼六月望日詣其居而植爲置具師曰特來送嗣豈可以常酒相待耶庫之西北所封者妙醞也植往索之得美酒一器師曰不惟此酒嗣亦如之索紙書一頌後批四四應真四字明年四月十有四日而生子乞名師曰已與之矣植良久曰四四則人所共知應真二字是其名否師曰是日純陽降世非應真乎遂名之至於叱遣金愈歷年之疾爲潘信起兇徒之死卧凍雪於趙實之門復鳴難於羗仇之架冬單衣而奕棋瓶無底而貯酒傳道則有山鳴谷吼之應書符則有鬼怪潛出之靈此類甚多是皆師應世之迹具載別記茲不備錄焉

郝大通

師名大通字太古寧海人廣寧其號也金熙宗天眷三年正月初三日生世爲官族郝朝列之從弟少孤事母甚孝嘗夢神人示以周易秘義由是洞曉陰陽律曆卜筮之術厭紛華而樂淡薄隱德於卜筮中世宗大定七年祖師至寧海見其賢稟高古所習不凡遂以背坐之機感發之翌日晚於朝元觀付以二詞言下領悟如走萬里迷途一呼知返蓋其根本知覺分上夙有薰染之力故耳既接言論其相與固結日深一日八年三月從祖師至崑崙煙霞洞請列門弟中而求法焉祖師乃名之曰璘道號恬然子仍以璘去其袖界之曰勿患無袖汝當自成蓋傳法之意也今之名號自言遊鳳翔路中偶得之師在文登常攜瓦罐乞食經半載誤觸之碎祖師別賜之題頌於其上云撲碎真灰罐却得害風觀真待悟殘餘有箇人人喚九年秋馬譚劉丘四師從祖師西去留師與玉陽居香山後玉陽以師不立苦志忠告而勸激之師遂西

訪四師四師方廬於祖師墓喪禮終師欲與同處聞譚長真激以隨人脚跟轉之語明日遂行至岐山遇神人復授以易之大義十五年坐於沃州橋下而不語常爲小兒輩戲累磚石爲塔於頂囑以勿壞頭竟不側河水泛溢而不動而亦不傷如是者六年其所守蓋如此真定少尹郭長倩過之下車致拜禮所贈甚厚觀師一顧終不能得嗟異而去二十二年居真定每陞堂講演遠近來聽者常數百人有問答歌詩周易參同演說圖象總三萬餘言目曰太古集後至咸平與高士王繪賢佐遊賢佐相從亦常十數人占筮之應十得八九師則無不應者由是賢佐輩皆神之請當師席而受其秘義賢佐因之名動闕庭師嘗欲作易圖遽然索筆其徒范圓曦以粥熟告師曰速持來我方得意筆入手一朝揮三十圖至於天長預告侯子真之火恩州夜入王鎮國之夢人之休咎道之行否兵革所臨之期凡有言之於其前莫不驗之於其後史館張邦直子中所謂警動人之耳目其徒

往往能道之故不著云東海郡侯崇慶元年十二月三十日仙統於寧海先天觀春秋七十有三前此三年令預修葬事及期果然大元至元六年己巳正月褒贈廣寧通玄太古真人云

和德瑾

玉蟾子姓和名德瑾秦州甘泉人嘗爲州吏未嘗取非義財日與一道者談玄笑飲後道者臂梟而來曰此禽怪哉眼大而不識人玉蟾子不悟其旨忽道者以惡疾而殂玉蟾子備禮葬之不數旬有老嫗踵門而謁曰昔亡道者吾子也奈老無依何玉蟾子贈之金帛嫗曰但得發壙一視吾子誠無憾矣王蟾子率隣里與嫗發壙開棺失屍所在惟存贈嫗金帛迴視嫗亦失焉由是感悟棄家入山後遇至人得九還金液之妙游終南山行其所傳日益精進以至冲和周密妙用通神逮重陽王君遇真遂結爲仙林之友莫知所終

李靈陽

靈陽子姓李名字俱不聞京兆人也爲人沈

默寡慾學問該博而樂仙道遇道者授神仙抱一符火大丹之訣頗拋塵俗朝修暮煉積之歲年至乎大妙與玉蟾重陽二子爲終南林泉之友嘗謂重陽子曰子他日道化九圓教行四海非吾輩之可及金世宗太定己丑重陽攜四真人入汴有詩寄云和公與李公首先一志三人同逮重陽登真丹陽挈丘劉譚三子來謁一日二君預留錢於終南食肆曰今日有仙客丘劉譚焉者至則待之四師至食人道姓以邀之丹陽笑曰公何知予等姓氏曰和李二仙君預有付囑故知之時二君泊太平宮四子食畢就宮參謁自此真門之下咸以師叔稱之

皇甫坦

先生諱坦字履道皇甫其氏也其世代地里莫詳或云嘗居臨淄及瑕丘得三避五假之術後遷迹於蜀之峨嵋一夕行風雪中忽聞人呼曰子有道氣吾當度子先生一顧見一道人卧茅簷下令先生與之抵足而睡覺暖氣自足而達浹身徹頂如在春風和氣中比

曉其人振衣拂袖而去先生詢其姓字但云他日來靈泉相尋先生後往靈泉觀求之見唐隱士朱桃椎書藁蜀人稱妙通真人方知所遇乃朱真人也先生一日與一道人偕行復遇妙通於途授以冬瓜一截慈數莖曰前去伺我城中酒肆如其言而往抵暮及關視瓜輒爲人首而慈則髮也水所需衣皆血痕關吏執之併錄其同行者先生獨以身任咎初不辯所從來遲明將以解府瓜慈如故衣血亦亡官吏驚異慰諭而遣之出則妙通已伺於戶外笑曰子真可教也乃烹瓜對酌遂授以虛坎寶離之旨復引泛舟舉杖擊水以示波平復擊如是數次顧曰會麼先生唯唯而已遂傳內外二丹之訣自是隨在修持寒暑諠寂不問平居多宴坐而不寐兩足外踈皆平偃一日見頂門有珠光燄因歌曰山頭紅日出藥苗新欲將心事付瑤琴知音少絃斷有誰聽識者以爲丹成之驗方周遊海內救人利物以積功行宋高宗紹興二十七年顯仁皇太后得目疾國醫不能療忽夢黃衣

道人長髯廣耳太后問能醫眼否曰能太后曰若醫得我眼明即是我師父也覺而異之以語高宗皇帝有詔物色之時先生南遊自稱眼醫臨安守張僊見畫象以先生惟肖遣人求得於建康遂以名聞召對便殿問何以治身先生對曰臣之治身猶陛下之治天下也心無為則身安帝王無為則天下治上善其言即白太后明日宣入與俱至慈寧殿先生敬為皇太后嘘呵布氣良久翳開目明認見先生喜曰真昨夢中所見師父也由是官中皆呼先生為師父仙韶位有甄娘娘病寢累年踊而後能步太后命先生亦為布氣即釋踊而行及將還山留一扇於禁中曰有發寒熱者以此扇之當差未幾官中多患瘧用之皆驗陸辭之日兩宮賜賚甚厚先生止受香茶衣服而已上亦高之因其行命齋御香致禱于青城山丈人觀訖事還詣安靜觀焚香即妙通之舊隱也遂奏請重新觀宇且贊其像曰靈泉真人兩蜀鍾秀馬溪道成茅茨賦就歷世救物示迹不有惟我知師再拜稽

首明年迴至忠州仙都觀平都山巔有巨栢雷震枯死二十年矣先生呵氣祝之不逾月枝葉再榮王從道記其事刊于石繼而上遣使賜手詔慰勞且召之曰先生清襟孤映寄迹物外批糠塵俗嘯詠煙霞信可樂也去秋為別俯仰周歲興懷晤言馳神緬邈計青城會友於元覽白雲遂無心於帝鄉也秋涼甚邇不知何日可相見願早踐言則騎氣御風冷然無難行且湘雲橫素桂子吹香燕館超然下風問道虛懷結想久矣專此為問殘暑在序益保清虛先生得詔即行比至賜紫衫皂衫絲履令開門引見從容問長生久視之道先生對以清虛寡慾為先損諸欲莫令放逸丹經萬卷不如守一上嘉嘆久之曰真人也由是傳聞中外競以真人稱之他日又問先生對曰仙人道士非有靈積精累氣以成真深契聖意嘉嘆再三曰此其所以為真人也因書其語于扇以賜仍寫道德黃庭陰符經賜焉時姑蘇數道僧亦聞道之士召至先生已在座初不相識道僧入長揖萬乘而

見先生即拜賜坐辭問其故曰仙階有高下真人在上我不敢坐強之乃坐于地後先生乞還山上留過郊祀時久雨上以為慮問於先生以必晴對及將宿青城復遣問焉先生進詩曰夜靜天中星歷歷曉來壇上月娟娟皇圖鞏固中興業帝祚遐昌億萬年至夜果晴上命為先生設幕次嘉會門賜香燭飲食以御前金器排辦駕迺先生起居太上式車而微笑即曰宣押賜宴先生因賦每蒙天一笑遂與物為春之詩上大嘉尋復乞還山上固留不可乃命築庵廬阜以便於宣召又繪先生像御題其上為皇甫真人像而贊之曰皇甫高士眉宇列仙以道興世孰計其年閑雲在空孤鶴行天掀髯一笑同乎自然封以錦囊命內侍省都知張某去為持示先生復攜入留禁中後移置於德壽宮道院太后賜金為建庵費先生提所著道牒辭曰只此便是臣庵無所事金卒不受太后乃命幹辦御藥院董仲水袖金潛置於先生卧榻而去啓行見之即封付臨安府繳納比至廬山太

后復遣幕士仰立齋金就賜先生復固辭尋降付江州令鬻錢以給先生不得已而乃用太后旨意建普天大醮二壇祈福皇帝仍普及生靈復以餘錢繳納太后不許即命兩府曹勛白雲處士郝守寧以其錢仍益金爲先生置兩莊于山之南北北曰銅盤南曰丹桂收歲入以接待雲水之士先生始遂築庵于蓮華洞撥雲游之士而居焉孝宗皇帝隆興元年太上皇御札詔先生曰自退處別官日以順神養志爲事思見風采款親道話幸早命駕少同闊適尊信奉迂用伸至懷既至宣見於康壽殿乃命館于西湖顯應觀西齋堂以兩府曹勛館伴宜對錫宴至數次後先生遊天台康壽殿產靈芝復遣兩府傳宣撫問賜沈香二百兩併以畫芝草扇親書御寶于上賜之乾道改元初方遊武當上皇遣德壽宮使臣陳球宣召追及於襄陽繼命兩府曹勛迎勞於道乾道二年二月至行在所復命館伴於顯應觀明日即宣入賜宴又明日幸其館命登御舟泛湖游園後屢侍燕閒談修

真之旨遂賜御書靈寶度人經壽聖皇后書清靜妙經孝宗初登位嘗傳旨宣問先生迴奏凡百言大略請審刑德割嗜慾推衛生之理以爲治至是引對內殿賜曲燕宣勸至數十爵仍賜內府香茶乾道三年上皇元命之歲欲致禱于灊山及廬阜青城謂先生精誠足以感格即命捧兩宮御香以御舟津送至九江逮至青城焚香始祝黃龍爲見初欽宗靖康之難兩府曹勛自燕京持微廟御札迴至黃河無舟夜遇先生於河濱東葦筏與俱渡至岸僵且死先生然葦以燎之良久乃蘇問姓名不告曰朱真人以公爲安社稷計故令我來渡公後三十年當見公於錢塘言訖而別及先生應召與之相會語及舊約兩府追記風貌感泣下拜待以師禮其贈先生詞有云自嘆孤身早歲黃河渡口蒙情蓋存前事也上皇知之故每有宣問迎勞館伴必屬之先生建閣寶藏所賜御書上皇賜名紹興煥文之間亦命兩府書榜先是廬阜庵成道流衆食日衆而汲水於澗以爲苦先生一旦

荷鍾引人斷庵側之地不一二尺有泉湧出石隙間清冽而甘亢旱不涸及赴召上皇偶詢山居之事因以奏聞壽聖皇后在坐曰先生在此處必有神物護持也上皇即命爲神泉御書二字以賜乾道九年復賜御書清虛之庵四字爲門額仍歲賜勅牒度道士以奉香火先生前後四赴召命自上皇退居德壽恩眷益加每至宴勞外賜上尊珍膳無虛日先生再還自青城掃迹朝市惟德壽宮歲時遺問不絕屢遣中使至山宣喚皆力辭不赴淳熙五年秋忽言我將遠適不可不辭太上皇治裝欲如行在所中輟不行九月二十三日遂口授詞旨令門人作遺奏以進凡士夫道釋與厚善者亦具辭書明日晨興沐浴更新衣至日中陞堂集衆焚香取御書并宣賜衣物付弟子輩曰我將遊乎無何有之鄉此太上皇所賜當留以鎮名山汝等向後接續住持代相傳授寶而藏之母違吾訓又曰道不負人大家努力珍重珍重語已拱手垂足坐于繩床而化三日不斂不倚容色紅瑩髮

如漆人龕身猶柔暖於是弟子曹彌深謝守
灝等與其徒二十有四人以十二月壬辰奉
遺魄藏于庵側之左隴從遺訓也初治壙得
白蟾於數仞之下五色土中又得古斷碑有
冷翠凌舟四字將窆之夕天燈下燭比曉方
沒會葬者二千餘人及發紼有仙鶴隨之盤
旋其上窆已乃去

羅晏

羅赤脚名晏閬中人少時遇異人攜以出歸
而有所悟解宋徽宗宣和中或言於朝賜封
靜應處士張魏公宣撫陝蜀延致軍中金虜
攻擾鳳關精銳迭出大將吳玠禦之殺傷相
當猶堅持不去公以為憂羅曰相公勿恐明
日虜遁矣有不如然晏當伏斧鉞以受誤軍
之罪明日果引去公始敬異之連奏號太和
冲夷先生好游漢州每至必館於王志行朝
奉家王氏傳三世見之矣其事志行夫婦禮
甚敬曰吾前身父母也高宗紹興六年丙辰
蜀大饑志行買妾於流民中姿貌甚麗羅見
而駭曰此人安得在公家留之稍久得禍將

不細當為除之命煮水數斗取竈下灰一籃
喚妾前以巾蒙其首而注湯於灰上煙氣勃
勃然妾即仆地蓋枯骨一具也羅曰渠來時
經女僧否今安在曰在某處亟呼之俟且至
則又以巾蒙枯骨復為人形舉止姿態與初
時不異遂付與僧而取其值志行從弟志舉
登第歸羅見之他所授以書一卷緘其外戒
曰還家逢不如意事則啓之及家三日而聞
母訃試發書乃畫一官人綠袍騎馬前列賀
客最後與一樞凶服者隨之哭廣都龍華寺
宇文氏功德院也羅與主僧坐勿起曰房今
人來僧驚問何在曰入祠堂矣僧謂其怪誕
明日宇文時中信至其妻房氏正以前一日
死嘗往揚州鎮館於陳氏夜如廁奔而還曰
異事異事適四白衣人踰墻垣入園中陳氏
皆懼羅曰無預君事明晨當知之及旦國人
告羊生四子紹興三十年在鹽亭得疾寓訊
如溫江求迎於李芝提刑家李遣數僕來羅
病良愈即上道行戒其僕曰自此而左惟金
堂路近且易行然吾不欲往願從廣漢或他

塗以西幸無誤僕諾退而背其言乃抵古城
鎮及溫江而卒蜀人以為年一百七十八歲

歷世真仙體道通鑑續編卷之三

歷世真仙體道通鑑續編卷之四

羽四

浮雲山聖壽萬年宮道士趙道一編修

薩守堅

薩真人名守堅南華人也一云西河人自稱汾陽薩客少有濟人利物之心嘗學醫誤用藥殺人遂棄醫聞江南三十代天師虛靜先生及林王二侍宸道法之高欲求學法出蜀至陝行囊已盡方坐石間忽見三道人來薩問此去信州遠近道人問所欲薩云欲訪虛靜天師參學道法道人曰天師羽化矣薩方悵恨一道人云今天師道法亦高吾與之有舊當為作字可往訪之吾有一法相授日間可以自給遂授以呪囊之術曰呪一囊可取七文一日但呪十囊得七十文則有一日之資矣一道人云吾亦有一法相授與之授扇一柄曰有病者則搨之即愈一道人云吾亦有一法相授乃雷法也薩拜而受之用之皆驗一日凡呪百餘囊止取七十文為日用餘者復以濟貧及到信州見天師投信舉家慟哭乃三十代天師親筆也信中言吾與林侍

宸王侍宸遇薩某各以一法授之矣可授以未盡之文薩由是道法大顯嘗寓某處城隍廟數日太守夢城隍告之曰薩先生數日寓此令我起處不安幸為我善遣之太守至廟遂薩使去薩行數十里遇人舁豕往廟酬願薩以少香附之曰去酬願畢為置爐焚之其人如誠迅雷一聲火焚其廟更不延燒民居越三年薩至某渡無操舟者舉篙自渡置三文錢於舟中以償渡金因掬水浣手見一人鐵冠紅袍手執玉斧立於水中薩訶之曰汝乃何人速見形其人立於側曰我王善即某州城隍也昨真官焚我廟我家三百餘口無依我實無罪訴于上帝帝賜玉斧令我相隨遇真官有犯天律令得便宜施行後奏我隨真官三年並無犯律者今日渡舟真官乃置錢舟中則真官無可報之時矣今願為部將奉行法旨薩曰更相從三年亦只如是薩遂奏玉帝擢為部將每有行持報應若響嘗有詩云道法於身不等閑尋思戒行徹心寒千年鐵樹開花易一日鄧都出世難又詩云言清

行濁休談道不顧天條法謾行但依本分安神氣何慮仙都不掛名真人得道後遊國中一日端坐而化

趙麻衣

趙麻衣不知何許人也唐僖宗時黃巢盜起麻衣避於終南山見道人數十居山間麻衣無所得食願為傭役由是有所遇而得道宋高宗建炎初始來遊青城山久之乃入成都玉局化以蓮條為屋而居常服麻縷百結之衣人因號為麻衣形體如槁木而骨不露神采湛然晝出見凡草木之立者行授之暮歸則撥橫於道人莫究其意亦不見其有所飲食也人有具酒茗邀之或不顧或為留以飲餘者授人人飲之覺芬芳異常麻衣時時言及五代及本朝事疊疊有條理或窮詰之則於度上取圓覺經示之曰盡在是矣達官貴人招之未嘗往也或云五代嘗為兵已而免去帖尚存平生黧黑一旦趺坐而化尺宅肢體潔白如玉然

劉居中

劉居中京師人少時隱於嵩山居山巔最深處曰控鶴庵初與兩人同處率一兩月輒下山覓糧登陟極艱苦往往躋攀萬萬窮日力而至兩人不堪其苦皆舍去獨劉居之自若凡二十年遭亂南來宋高宗紹興間嘗召入宮賜沖靜處士後廬於豫章之東湖每為人言昔日事云嵩山峻極處有平地可爲田者百畝別有小山巖岫之屬常時雲雨只在半山間大蜥蜴數百皆長三四尺人以食就手飼之撫摩其體膩如脂一日聚繞盤邊各就取水繞入口即吐出已圓結如彈丸積之于側俄頃間累累滿地忽震雷一聲起彈丸皆失去明日山下人來言昨正午雷大作乃知蜥蜴所爲者此也又聞石壁間老人讀書聲逼而聽之寂然既退復爾其後石壁摧得異書甚多陰陽方技修真黃白之學無所不有既下山獨取其首尾全者數篇餘悉焚之又嘗聞異香滿室經日乃散不知所從來也劉生於神宗元豐七年甲子百餘歲矣不知所終

熊定

熊先生名定字天授涪州樂溫縣玉溪人深於易學隱青城大面山中得道宋高宗定炎初以經行召至揚州欲留之講筵不可拜通直郎直秘閣致仕今百數十餘歲巢居險絕人不能到而先生數年輒一出至山前人有見之者

姚平仲

隱青城大面山姚平仲字希晏宋欽宗靖康初在圍城中夜將死士攻敵營不利騎驃騾逸去高宗建炎初所在揭榜以觀察使召之竟不出孝宗淳熙甲午乙未間乃有人見之於青城山丈人觀道院年近九十髭髯長委地喜作草書蓋已得成仙云

崔羽

先生姓崔名羽唐州人少隸京師班直休官樂道自號紫霞宋高宗紹興間遊羅浮已老矣初不自言其年朱顏方瞳舉心林野性喜酒人具饌邀之飲則醉醉則歌然歌中所言休咎皆驗後居東莞數年一夕命道流設醮

于上清觀禮畢命酌西室酬酢笑語若對客者人問之曰鍾呂陳三先生會于此既徹爵奄然端坐而逝縣人共迎置于紫霞亭焚之有蝴蝶徑尺自烈焰中騰空而去是日鄉人有識之者於榴花渡見其東歸蓋歸羅浮也

劉浩然

宋高宗紹興中虞允文侍其父漕潼川父病允文齋戒浹日命道人劉浩然奏章請命劉亦素以精慈著名自子夜登壇遲明方與言曰適之帝所見几上書章內兩句云乞減臣之年增父之算帝指示曰虞允文至孝可與執政已而其父竟卒後有十八年允文果然參大政以符其言

段璵

段璵字德珣袁州萬載人略知書天性淳謹未嘗忤物然遇不平事則奮臂而前宋高宗建炎間寇盜充斥段氏族屬四十口皆爲所剽璵挺身持金帛往贖賊嘆其重義皆付之使歸紹興五年東南處處大旱斗米過千錢璵盡發宿藏止取常值又爲粥以食饑者賴

活者不可勝計後忽感人事結庵於嚴田之山中壁間多書坦蕩二字一旦召會親舊與叙訣曰不久天帝召我不以為然經數日陞樓鳴鐘欬然凌雲而去鄉人走視所居惟弊衣履存衆欲以其事上於朝而邑官不樂者止之遂已

饒廷直

饒廷直字朝弼建昌南城人第進士豪俊有氣節宋高宗紹興七年以事過武昌有所遇自是不過妻妾憐然端居如林下道人自作詩紀其事云丁巳中秋夜半偶遊黃鶴樓忽遇異人授以秘訣所恨尚牽世故未能從事於斯也因作詩以識之其辭曰黃鶴樓前秋月寒樓前江閣煙漫漫夜深雲散萬籟息獨對清影凭闌干一聲長嘯肅天宇知是飡霞御風侶多生曾結香火緣邂逅相逢竟相語脩然洗盡朝市忙直疑身在無何鄉迴看往事一破甌下視舉世俱亡羊嗟予局促猶軒冕知是盧敖游未遠他年有約願追隨共看蓬萊水清淺後二年歲在庚申朝廷復江南

以為鄧州通判金人叛盟鄧城陷死之後載其柩還鄉昇者覺甚輕然無敢發驗者人以爲尸解仙去云

蘇庠

丹陽蘇養直名庠居後湖暮年徙潤州太湖馬迹山宋高宗紹興十四年甲子十一月中病酒困卧所使村童徐行者持謁扣床曰有客稱江宣賢欲求見視其謁云惠州羅浮山水廉洞長生道人江觀潮兩畔各寫詩一句曰雷貴易逢日月短此中難過是長生蘇悅其語強起延之客曰羅浮黃真人黃真人晉太守棄官入羅浮山水廉洞以君不欲世間聲利姓名已書仙籍命我持丹授君蘇時年八十矣應之曰庠平生未識真人又形骸已壞何以丹為哉客曰此非五金八石之比蓋真人真氣所化也服之無嫌蘇視客衣服侈麗類貴游而言辭鄙俗無蘊藉甚惡之其速去曰雖然終不願得也老病缺於承迎當令兒曹奉陪客曰我專為君來君不欲丹當復持以歸但路絕遠願借一宿明旦晴即去不然須少留也

不獲已命館於松菊墅時天久晴五更大雨作蘇憶昨日語頗悔亟邀致具酒未及飲蘇曰丹可見否客喜便於腰間篋中取授蘇連云且延一紀藥僅如豆大黃紫色亦不作丸割客曰困篤則服之方可見効凡身有疾但敬想丹力所行至即愈餌此者當飛昇度世若情欲未畢故自延一紀壽壽終亦為仙官矣酒數行適既僕牽驢過前客曰此驢昔嘗為人叱令笑驢即笑又求青箬笠中鹽以飼之祝曰復為人去再叱令笑又笑坐皆驚異又諭蘇畫具人像蘇曰其狀何如曰一神仙中人服黃道衣繫皂條著琴鞋持水晶數珠掛玉瓢於右帶嘗有過之於羅浮鐵橋懸崖雲霧間服佩正如此遂別去約五年復來來時君異於今日矣蘇以丹并刺字置笥中歲未盡五日忽大病至除夕氣絕家人以項暖不忍殮及明諸子記前事發笥視之藥故在取投口中即能起酒然若無疾飲啗自如再令拾刺字并丹貼欲燒末飲之不復見後數日長子如京口以客言命圖黃像像成儼然

江君也始悟江即黃君云蘇雖髮如霜自是其半再黑初高宗建炎中喪右目矐子至此瞭然吳興陶安世聞其名往訪之得其所遺本末如此後二十年作書與鄉林向伯共云吾可中聞異音羅浮仙人期以數年相見應盡便盡餘不復較十二月往茅山別諸道友元日聚族歡飲達旦披衣曳杖出門曰黃真人至矣其行如馳婢僕驚奔僅能挽衣襟已立化未卒之前洪慶善嘗以書求其近詩答云頃得方士神藥奪命鬼手中服食以來識詩結字無復餘習慶善叙其詩文實載此語陶安世作記甚備焉

馮觀國

馮觀國邵武人幼敏悟讀書既冠意若有所厭即棄鄉里遊方外遇異人得導引內丹之法凡天文地理性命禍福之妙不學而精乃晦名氏自稱無町畦道人寓宜春二年挾術自養所言人吉凶及陰陽變化盡驗或有請其醉飲狂怪者觀國不與較以詩謝云踏徧紅塵四百州幾多風月是良儔朝來應笑頭

陀更道不相侔風馬牛又述懷詩云落魄塵懷觸處然深藏妙用散神仙筆端間作龍蛇走壺裏長挑日月懸謾假人倫來混世只將酒盞度流年潛修功行歸何處笑指瀛洲返洞天餘詩尚多皆脫塵離俗人亦多莫能曉也有瑞州上高縣麻塘李宣卿者一夕約束門僕黃卷曰明日要五更早起看門外有何動靜來報僕唯諾而去次早凌晨開門見門外甃上有一醉道人熟睡喚之不應遂通報宅堂宣卿尋令扶起請入書院少歇令左右供給盥漱畢即請相見問其姓名來自何方並不答但再索酒急進巨觥不計其數又告饑覓飯食愈不言飽時宣卿故妻唐氏新葬作庵已就而未有住庵者因領道人看庵道人即欣然肯住遂給米炭等送之入庵越三日往視則所給米炭略不曾動元送火種數塊亦如故問何故曰前日喫已飽矣但夜寒覓紙衾復與之又一日入庵則見所與紙衾已裂為四以青藤縛於床四脚又問何故答曰寒從上下後因酒間忽作詩曰南北東

西總是家自知身命屬煙霞只因貪戀一盃酒誤却碧桃千樹花人雖見其詩不凡然時弄小術如今之撮藥者又常喜顛酒未免以等閑待之久之但聞姓馮故眾呼之曰馮顛道宣卿諸子一日入庵拜掃竟不見道人何在但見墳塋中霞光徧地舉頭望之只見道人坐于樹杪仰面向天吐氣而下尋即光燦或謂其能吸太陽精也住庵凡十八年多與宣卿諸子歡笑戲狎或出言無狀或就席顛倒矢溺不禁似此可厭者諸子頗惡之一夕有倡女佐樽諸子飲方樂道人突入席間少醉所為及亂席散諸子戲舉倡女所攜之婢配之鎖二人置樓上翼早啓視則無道人矣惟婢云鑰門之後滿樓之熱如火不容近其身夜半稍涼聞虛空樂作近五更棟間簌簌有聲言訖諸子就怪所為舉目視梁間則有字題其棟云水非溝壑龍方卧本是梧桐鳳始栖真道男兒無去路碧霄雲外有仙梯翌早元僕黃卷在袁州遇道人于市云夜來眾官人取笑太惡五更我已過此就寄聲云後

會要相見可來宜春臺下相探是日午時滿城開傳臺下有道人坐化黃卷往視之即馮顛道也遂歸報其主宋高宗紹興三十二年三月十四日也先是道人遍往辭知舊且寄詩言別至日端坐作頌而逝頌云平生無町畦任真但落魄爛醉是生涯天地為棺槨其時儀真李觀民為袁州太守乃其舅氏方認得是其甥本姓馮名觀國年十八領薦往赴省後竟不歸於此方見遂命塑其身於城東之治平宮宣卿有子名德謙者往視之撫其背云道人何不分曉一別而去忽迴頭相顧至今塑像猶左顧也其師王蒙道人其侶方七道人往來詩詞甚多

趙縮手

趙縮手者不知其名本普州士人也少年時父母與錢令買書于成都及半途有方外之遇遂棄家出遊至宋高宗紹興末蓋百餘歲矣喜來彭漢間行則縮兩手於胸前以是得名人延之食不以多寡輒盡飲酒自一杯至百杯皆不辭或終日不飲食亦怡然自樂嘗

於醉中言文潞公入蜀中歷歷有本末他日復詢之曰不知也黃仲秉家寫其真事之成都人房偉為贊云養氣近術談道近禪被褐懷玉其樂也天欲去即去欲住即住縮手袖間孰測其故趙見而笑曰養氣安得謂之術禪與道一也安有二我縮手於袖非袖間也取筆續曰似驢無背似牛無角文殊普賢摸索不著又自贊曰紅塵白雲堆裏好箇道人活計無事東行西行有時半醒半醉相逢大笑一場不是胡歌虜涕除非同道方知同道世間有幾綿竹人表仲舉久病起遇趙過門邀入飲以酒問曰吾疾狀如此先生將奈何趙不答但歌詞一闕云我有屋三間柱用八山週迴四壁海遮圍萬象森羅為斗拱瓦蓋青天無漏得多年結就因緣修成功行滿三千降得火龍伏得虎陸地神仙云此呂洞賓所作也吾亦有一篇又歌曰損屋一間兒好與支持休教風雨等閑欺覓箇帶修安穩路莫遣人知休更著便宜下手知時要知險裏却防危透得玄關歸去路方步雲梯歌罷滿

飲數杯無言而去仲秉正與偕行徐問其故曰觀吾詞意可見矣後旬日表死什邡縣風俗每以正月作衛真人生日道眾畢會趙亦往寓於居人謝氏先一夕告之曰住君家不為便假我此榻吾將有所之拂旦徑趨對門小寺得一室正榻跌坐傍人怪其不言就視已化矣會者數千人爭先來觀以香火致敬越三日火化其骨鉤聯如鎖子云

寇子隆

青城山相去三十里麻姑洞相傳云亦姑修真處也丈人觀道士寇子隆獨往瞻謁至中途遇村婦數輩自山中擔蘿蔔而出施擔摩雲就道上清泉洗足洗菜見子隆至問尊師何往曰將謁麻姑一婦笑曰姑今日不在山無用去遂取蘿蔔一顆授子隆曰可食此子隆食之遂行竊自念曰彼皆村野愚婦豈識麻姑為何人得非戲我邪忽焉如悟迴首視之無所見矣自是神清氣全老無疾病每為人章醮自稱火部尚書壽過百歲宋孝宗隆興中羽化矣

傳得一

師諱得一字寧道又字齊賢清江新淦人也姓傅氏師之父某尤篤志道術偕師之母盧氏俱有隱操初聞邑之陽有護國劉仙師壇觀多靈異間有仙隱於其山中心竊慕之遂

卜居於山之下宋徽宗政和五年乙未九月歲生魄忽紅光遶舍鄰里驚而異之翌日而師降誕未及月而舉動岐嶷有若髫髻年十一失怙恃里人有嚴縣丞矜其少孤收育於家是年師以生朝往拜劉仙師迴至半山見

茂林脩竹中有六道人圍棋飲於磐石之上師欲就觀徘徊不得其徑而入忽一老者顧而指示之乃得至石傍頃之老人贈以一檀子厲聲謂曰酒不得飲師唯唯執檀子嚙之味苦澀不可食遂懷以歸行一里許乃擲于道傍其家以師久不迴遣人尋索經宿乃得之詢其所由師具以告其家與鄰里之好事者異之競隨師登山令指示其所惟見荆棘荒翳無復向時之境迴至所棄檀子之地則既夕矣紅光燦然人謂寶藏發見爭前取之

光亦尋滅猶聞異香芬馥師曰早間道人與我檀子尚在此復取而食味益苦還擲之而去自覺神氣清爽行步如飛遂能預知休咎所居去邑十里師嘗一日十往返語言狂怪歌笑自若或滿頭戴花或醉卧橋路人莫能

測市人有惡之者以毒酒推而溺諸縣橋之下師隨流出沒二里許登岸復入市笑謂溺之者曰何相戲之酷耶人始訝其異後屢試之復然衆乃驚服稱爲傳仙時師年十八忽起江湖之興被簑笠荷瓢囊徧走湖廣淮浙間名山福地靡不游歷或孤栖巖谷或露宿叢祠所至放誕不自檢束如在新淦時人皆謂之狂生然言人之災福輒應士大夫益多奇之張魏公浚留守建康召師與語即蒙殊遇丞相史公浩嘗有詩贈師云試問此行何所止烏有鄉中無住里醉時不覺醒時癡世人誰識顛道士異時又贈之詩曰相識三十年身顯心不顯有人還會得即是地行仙後所贈益多初史越王未富國時與同省諸公宴集師偶遇之衆中遽呼公曰傳道人獨許

你某年月日作相公他日幸無相忘後果如期拜相師一日進府門即延之上座酌以酒自是往來無間忽一日大醉踈而入府遽以泥足穿丞相履手作執板狀四顧懽呼公問其所欲師云要鶴髮著公識其意諾之會楊

和正適來謁公遂薦之和正是夕夢一異人來見翌日王招之見其儀狀儼如夢中王與語大喜即贈以敕牒衣號副馬遂禮管轄祖慶章爲師隸湖州武康縣常清觀觀王所建也忽一日持其度牒詣和正曰野鶴孤雲狂性復作不能坐受束縛請從此辭和正大笑乃貽書觀中以師散人當處之以規矩之外復月遺以醇酒居無何拂袖而去王遣藍輿遺贖之物追路與之師一無所受遂徑還清江時郡守嚴陵吳公聞師名久一見大悅舉家待以師禮師不肯留乃強延以玉筍山承天宮貳職非其好也未幾復請管轄問皂山崇真宮曾不月大師朱公以玉隆萬壽宮管轄招之已而顯謨沈公鎮豫章與漕使少卿曹公實文任公移管轄鐵柱延真宮孝宗

乾道九年癸巳晦庵朱文公為扁雲庵二大字及贈一絕句云到處逢人說傳顛相看知是幾生前直攜北斗傾天漢去作龍宮第二仙其後范石湖大參張公樞使諸賢題贈不可勝紀淳熙元年甲午史越王帥閩一日師遽呼徒弟葉永壽曰我欲福州見丞相次早遂行於時繪像求贊王在前師傍立竟諾所請書于三山郡齋留之數月因奏薦于德壽殿是年四月奉聖旨宣召師每自洪都至行在不三日可到三山距京將二千里師亦然躬詣內殿賜齋并銀絹物及御書寶扇一握靈寶大師度牒等是月十五日師上謝表師雖有此奇遇而略不動心未幾辭歸住延真凡二十載其臧否人物言必有中如龍圖韓公總江夏之師侍郎李公將江西之曹皆先期以告其預知多此類有自錢塘附師書至清江者亦三日而達師或一日應數家之供同時俱至人謂師得費長房縮地薊子訓分形之術未知其果然否耶師性曠達不親世務雖屢典殊庭充位而已夜多不寐亦有時

默坐不出盡月雖猖狂妄行而志尚清潔出入公卿之門每以為善自愛勸誘其人人亦以此敬之淳熙十五年戊申十一月二十二日呼其門人囑以後事命筆題頌曰平生膽氣清高抱道長樂逍遙天地陰陽反覆雲收霧捲丹霄頌竟擲筆而化享年七十有四凡度弟子門人以明年正月壬寅瘞劔于府東門之外朱砂岡會葬者千餘人謝觀復跋云初師之生人謂不孕而育其母亦自以為然嘗考之仙傳雖至人降世託跡同凡亦必假陰陽之氣三元育養以成茲有質之軀是故混元未誕先降日精於玄妙瞿曇將生必夢白象於莫耶固未聞不妊而字者如其異人託化於世母不自覺容或有之所以老子八十一年元君不覺其久莊公寤生姜氏疑非已產故師之處身應物皆非學門師承所得諒由是也嘗聞許碯有詩云閬苑花前是醉鄉滔飜阿母九霞觴群仙指點嫌輕薄謫向人間作酒狂師殆其庶幾乎不然老仙何以切戒其飲正慮其狂態復作耳謝守灝昔與

之游甚密謹略摭其大槩後之君子欲考其詳則有史越王之墓誌在云

張宗元

張宗元河北霸州人也入青城大面山中峯紫栢嶺結茅耿介有守居山五十年傍無給侍常與虎豹蛇虺雜居恬不為害宋孝宗淳熙十四年八月二十九日無疾而化

歷世真仙體道通鑑續編卷之四

歷世真仙體道通鑑續編卷之五

羽五

許雲山聖壽萬年宮道士趙道編修

張道清

真君姓張氏諱道清字得一蒲騷里中人母王氏感異夢而孕宋高宗紹興六年丙辰五月二十日毓真君於青牛山舍時紫氣騰空遠近咸以為異焉幼侍翁媼徙居郢之京山自為兒時氣宇澄清不茹葷醴達性命禍福或數日不食或一日入山半旬不反往覘之則見卧於岳中有兩虎踞于側里人驚而神之。又一日寢覺告母曰適往復州里女兄吳家方歸大一姐約以絲履果實來獻翌日果然由是父母亦信其神異二十七年上元日真君默坐前山見五雲縹緲間有萬神森衛中有帝君坐龍輿召真君授以秘訣靈文真君得之道望始顯後於其地建祠以記受道之所名曰已而鄉里旱澇祈禱輒應人有疾病符水立愈由是京漢嚮慕者衆孝宗乾道元年捨所居為祠立玉帝時容崇奉即光廟森時今焉歲觀是也二年真君幅巾藜杖徧覽襄漢名

山至洪山謁王寺僧木闍老因與之講究玄寂之道喜木闍有慧性定力聲所得鄉里酬施金帛回施之八年隨州旱禱雨弗應木闍以真君靈異聞于郡郡委佐官躬往長森禮請真君至郡惟書天授神章一紙焚之甘雨隨降官民感忭願留香火祠奉真君不諾重過洪山水闍告於真君曰道本乎一教分則三顧勿棄此山主張佛法真君曰一來一去各有定緣予昨受玉帝旨謂興建香火之地分應斗牛界連廬霍達九富興天命不可違也乃辭別木闍迴往長森淳熙元年七月真君至龍虎山瞻禮天師受上清大洞籙以歸四年有僧祖超自天台國清寺來請師即往彼說過去事僧衆神之真君歸郢而蒲騷里人益景慕其靈異士民捐舍於青牛山毓靈之地立祠宇一所以奉香火今崇寧萬壽觀是也十年真君有中都之遊時光宗在儲適齊安郡主病亟慈懿皇后念曰若得張先生來此病可療且地遠卒難至而李府御帶隨以真君見留府第聞于東宮有命召見真君呪粟水以

進郡主飲之遂甦光宗曰真哉神哉寵賜甚厚真君不受乃親灑真牧二字及鏤之牙牌以賜自此時一召見禮貌有加真君淡泊無為非問不答一日召次問起居之地對曰郢州長森灣光宗又親灑長森灣以賜十一年真君離京城迴舊隱活民命者衆真君視長森祠宇尚隘弗稱儲君寶畫之光命其徒楊宗華等營而新之既成白于衆曰昔奉玉帝密旨建立道場別有其地山川之靈俟命已久將有行焉乃自郢入蜀歷參井泛湖湘過洞庭而下益浦十四年春過康廬有仙翁揖于途曰拙者遁跡九宮遠來參謁願早訪彼山庶我輩有所倚藉真君唯之遂由富川上至通羊宿杉坑梵刹是夕山之阿有鄉耆張鎮者夜夢神人黃袍白馬直入其舍翌午真君至鎮異之傾意相嚮真君告之曰九宮靈壇湮廢已久吾將闢其基以為國家祈禱之地遂捫蘿登山數十里得其地於山之巔廣數十畝即圖誌載之曰平臺臺是也日暮就宿山中跌坐松下夜半山靈誼聲從者駭然

真君曰是山之神交相喜爾繼有赤蛇神龍之異平明從者告饑真君默坐方醒於袖中出齋醪各與其一異香猶熱食之且飽遂於臺臺之下定向子干標立道場而下曰吾且回長森秋期再來乃以符法授其徒楊宗華令先往開闢結茅爲居權以安憇十五年戊申真君至七衆惟迎入山四方之民抱病求安者雲集隨叩隨應貧者助力富者輸財繼而真君靈貺匪一九官開闢不日成之光宗紹熙元年召命不赴上遣使降香燭錦幡銀券入山設國醮徽福于民寧皇在儲亦有厚賚未幾朝命易庵爲欽天觀慶元元年寧宗臨御慈懿居內宮每歲遣使入山厚有錫賚三年真君返長森五年上賜真君爲真牧真人嘉泰四年寧皇親灑欽天瑞慶之宮六字敕修內司錢梓改觀爲官賜賚駢渥六月上復加封太平護國真牧真人開禧二年敕江西轉運司撥賜閑田又慈明皇后賜錢置莊供贍羽衆累降特旨免役蠲租等是年虜寇京西長森實據其要虜既入境羽衆奔逃真

君端坐堂上虜莫能犯及舉火焚祠煙焰自熄乃驚嘆曰此南朝得道仙子也三年夏初真君復還長森而九宮諸徒亦至省侍咸願請真君回九宮真君曰吾之行止非汝等所知吾創九宮道場乃奉天命爲保國寧家安集道衆而設汝等當以進道爲心勿以吾不歸爲慮至七月五日真君鳴鼓陞坐諭衆曰死生一晝夜也出入一乾坤也予自歷劫以來應時出世隨念度人身在塵凡名書仙譜今將歸矣洞然八荒了無罣碍汝等各守戒行循規蹈矩以扶教法以報君親及索紙書頌曰幻質塵芳方度六紀憫一切情如渴赴水踏破鐵鞋尋跟索底一剎那間衆流截止仰沐宸恩可謂終始今日逃形湛然脫屣嘆分明記得來時路乘彼白雲歸帝鄉領畢珍重端坐而蛻遺表奏上蒙寧皇御批太平護國真牧真人張道清志識清虛道行高潔先朝眷遇極爲優厚況祈禱雨暘累獲感應今已羽化朕甚憫之可於內帑降賜錢令徒弟往長森灣迎歸九宮崇奉仰九宮主者就禁

地內卜吉所安瘞不得滅裂仍不許所在遷阻付欽天瑞慶宮准此續降聖旨創下江西轉運司委都運趙龍圖督促其徒疾速迎回嚴奉徒衆承旨前往長森灣護念龍迎歸消吉入塔忽真君親附童子謂吾今神歸天府遺形何以葬爲惜諸方善信速來無以瞻敬於是立堂崇奉真相猶存嘉定三年續奉寧皇御書真牧堂三字鏤牌以賜理宗御極春遇有加紹定四年加封真牧普應真人其事述見龍溪詳載九官山真君全傳

謝守灝

先生姓謝名守灝字懷英永嘉人也生於宋高宗紹興四年甲寅三月二十二日午時先生少聰慧明敏年弱冠刻志於學一日有雲水道流訪其書齋道流曰貧道結緣先生與之揖就坐復起入內命茶道流驚首曰欽哉古學問神仙也道流坐先生默然似有覺悟自是諸經子史一覽無遺勵精儒業天才該瞻少年補中上庠後館于曹忠靖公府時清虛皇甫真人遣際主上每延問道德曹公感

真人渡黃河之恩時延于家先生仰慕真人道德遂脫儒冠參禮真人隸籍羽褐真入之道首付曹彌深次於先生爲入室弟子馬先生博學強記議論宏偉每優道劣釋間有惡其分別輕重先生每言儒家有云能言距楊墨者聖人之徒也吾於道家亦云一日有士人聰明記問志尚釋教問先生曰三教孰優耶先生曰天下無二道萬殊同一初至理昭然何疑之有先生究竟經史出言有據懸河之辯莫能屈之一日復有難者曰盡信書不如無書先生曰如是則校之經史尚不可信足下之言尚可信乎其人無答歛服而去孝宗淳熙十三年江西漕使牒請知西山玉隆萬壽宮光宗紹熙之初朝廷賜觀復大師充行在壽寧觀管轄高士先生惟是究覽三教諸子百家之書作太上老君混元皇帝寶錄一部七卷奏聞主上盛行於時學問淵源聲動朝野紹熙四年再任玉隆萬壽宮住持掌宗嘉泰元年復任焚修管轄官事一陞經座撥妙指玄勾引三教高人問話應答如響問

亦於寺院借座說法禪林尊宿亦多嘆服先生早遊江海多歷名山嘗遇至人授以旌陽石函記一部金丹之理愈造妙門內焉養真外焉混俗人莫知之也光寧兩朝眷遇優渥平生交友當代大賢超群拔俗人莫能及逮至晚年相貌清古鬚髮皓白人咸謂活老君出世閑中靜坐焚香誦書因親自著混元寶錄撫几長吟曰知我者其惟是書乎罪我者其惟是書乎門人請益先生曰吾志在修文輔教明辨正邪立見已定一言不易後世毀譽任之也老耄之年顏容悅澤耳自聰明清夜對燈解書蠅頭細字嘗以所隱石函記一篇此一篇名金丹法象論後有人作書字如篇一篇補遺法度華語恐誤學者栗刻于銀葉之上藏於岩穴以俟骨相合仙之士焉晚年復辭往永嘉郡瑞安縣紫華峰創宮請額于朝爲九星宮蓋先生湯沐之邑也住世引年七十有九於寧宗嘉定五年壬申二月十九夜忽夢天下降謂先生曰太上有命趣召修真仙史記翌日午時具香湯沐浴辭別道衆書頌云造物逆旅主天地

一遽廬還汝已生有還我未生無領畢正衣冠端坐奄忽而化後門人私謚修文輔教觀復先生

祖元君

元君姓祖諱舒又名遂道字昉仲唐廣西零陵永州祁陽縣人月孛化身九月九日生面黎黑色大圓眼露齒頭髮拳鬆挿竹節斂手足黑而有毫身長七尺壽一百三十二歲幼存節操生而神靈屬志修真父母莫能禁之遂徧遊名山師事許真君鄭真人靈光聖母一日於西京清虛洞神化溪遇太玄夫人降于溪濱又從而師之蒙與俱至洞中凡數日變現男女歷試諸難終無怠志乃授以元始大道俾乘枯木順流隨止少焉木至故處失夫人所在矣由是會四派而一之職位清微元上侍宸復化身爲清微察令昭化元君又號通化一輝元君統轄雷霆變相不一或紅巾搭膊跣足露腿威勢可畏或按劍坐石嘯命風霆或乘龍仗劍策役萬靈或金冠素服尊臨洞府性烈令嚴雖雷神亦加嚴勵功成

冲舉居金闕昭凝宮主清微洞照府又曰金闕中靈凝照府主持教法惠濟生靈嗣其道者脉脉相承瓊室洞清郭元君福和耀真傳元君龍光道明姚元君紫英玉惠高元君元勳皇靈清虛華真人青城山通慧朱真人雲山保一李真人至眉山混隱南真人而清微道法尤闢焉

大師汪真君

真君姓汪名子華字時美唐玄宗二年甲寅生于蔡州汝陽縣年四十而三舉不第嘆曰年逾不惑不登仕版何面目見朋友乎吾將學黃老之學而臣於帝鄉矣遂與顏真卿同師白雲先生張約再師赤城先生司馬承禎遇祿山之亂棄家雲遊經南嶽祝融峯下修道九年不下山真卿為廬祀所陷使淮西為李希烈縊死師再遇紫虛元君親幸南嶽授以至道再修二十八年丹成道備貞元五年庚午正月七日奉詔白日昇天

黃雷淵

真人姓黃名舜申福建建寧人幼而聰慧過

人三教九流無所不通仕廣西時憲使南公見而奇之悉以神書授焉真人鈎玄探賸集成大金登門之士如雲後承詔命入覲繼而得旨還山隱于紫霞滄洲之上制授丹山雷淵廣福普化真人其所度弟子皆立石題名立石之前者三十人立石之後者五人而已前者各得一法後者盡得其傳如武當洞淵張真人化行四海獨露孤峯其道則多行于北西山真息熊真人獨在諸立石題名之後道闢四方則尤多行乎南土傳之安城彭汝勵汝勵傳之安福曾塵外塵外傳之浚儀趙元陽如上授受者皆為一代宗匠道德冲融内外光霽焉

雷默庵

真人姓雷諱時中字可權號默庵其先本豫章人後家于湖廣之武昌金牛鎮所居溪水迴環東西二橋故又號雙橋老人生於宋嘉定辛巳年十一月初五日辰時幼習詞賦後通詩經三領鄉薦精心道學專務性理與九江吉甫親因已未庚申之難揭家依居吉甫

甲子歲殿帥往太平宮酬醮師從其行夜宿太平宮之聽雨軒恍惚間見上帝親謂語曰卿陽祿無分陰官有緣不須留意功名是夕本宮知宮亦夢採訪真君告曰來日午刻可精嚴祀事五百靈官中有一靈官親降于壇炷香次日午朝殿帥謂師曰我因甚師可代燒香及至壇中知宮大駭方知師五百靈官中人也後知宮白于師師愈留心道法絕念功名復回居金牛鎮置壇祀事庚午三月三日玄武誕辰師具表賀焚香朗誦度人經忽有一道人標格異常自外至謂曰貧道有一階道法特來授汝因出袖中書一卷曰可置此文於壇中齋戒七日後方可開看師受之置于香案回首道人已出不知所在方悟其為異人也入壇拜謝持誠齋戒七日焚香拜禮開看其文乃混元六天如意道法看畢壇中白晝如夜須臾雷火布滿雷霆辛天君立于案上曰吾奉天敕命付卿開闢雷霆之教普濟眾生吾教上帝為主以吾佐之以卿行之前日授卿之文者乃祖師路真君也卿

名在仙籍七世爲儒三世行法並無纖過當
大興吾教路祖師當晉時親遇太上老君授
以此法而是教專以度人經爲主師每化導
世人及開度弟子皆先令其精心誦經各獲
果報且嘗論度人經旨以開後學其要在十
迴度人非惟十遍可以度人乃在平日修鍊
自己以究返還之妙切須先度祖宗終得道
備飛昇上清經旨之明莫越是矣及儒釋二
家博采旁求貫徹融歸于一致四方聞其
道行卓異及其門者日衆弟子數千人分東
南西蜀二派首度盧李二宗師及南康查泰
宇由是盧李之道行于西蜀泰宇之道行乎
東南混元之教大行于世所著心法序要道
法直指原道歌皆發揚混元道化之妙以至
元乙未四月初五日沐浴更衣端坐臨午命
盧李二師率諸門人誦度人經一卷畢即索
筆紙書頌曰一輪明月照清宵萬里無雲光
霽中自在逍遙無一事圓融常與太虛同頌
畢凝然而逝是年冬弟子奉葬于郡之顏山
後雷霆累降筆云上帝已陞真人爲玄都上

相混元妙道普濟真君雷聲演教天尊

莫月鼎

月鼎真人姓莫氏諱洞一字起矣浙西霅川
人莫合之裔也生而聰慧英敏過人酷慕道
法神仙家之說乃與同郡西望沈震雷真人
同師事鐵壁鄒真人得侍宸王真君九天雷
晶隱書由是名著當時至若會稽混融韓公
錢塘楊和玉蟾川諸公望重當代爲道法所
宗皆炷香座下由是道法愈重真人落魄無
家隨所寓而止焉求其道者甚衆往往遺世
絕俗離倫飲酒輒醉自樂天真其接門人多
致叱咤試其誠怠之心而進止之有不堪者
中道而廢至元丁亥被召赴闕下符法闡揚
雷雨在指顧之間一時名動京師奔走後先
者如雲如堵有不遠數千里及門而求道者
有奉束脩五十緡師受之一日袖之而去遇
酒肆陋者乃入見貧寒者濟之有老病孤弱
者必以物與之及晡而還緡皆罄矣門人中
有道材法器者輒循循以進之其於雷霆之
興發揚底蘊開示來學者多矣使者一符形

每授門人各有不同是乃真人自立法以證
派源考其玄微同歸一致自侍宸王真君演
道以來惟真人與西望沈真人二派支流衍
迤盛于西江昌于東吳扶教澤民莫有甚焉
以延祐庚寅秋日方正午跌坐問弟子曰是
何時也弟子曰日卓午矣遂索紙筆作偈曰
七十四年明月也曾陰晴圓缺今日大地光
明三界虛空透徹書畢端坐而逝顏面如丹

金蓮頭

金蓮頭永嘉人也名志陽號楚庵素蓮頭一
髻世因以爲號生而不群自幼果敢大志不
羈甫長慕道棄世慮若焚溺遂師全真道士
李月溪月溪乃真常李真人之徒真常又長
春丘真人之高弟也一見器之命遊燕趙齊
楚求正乎先德焉得參事真常李真人南至
永州遇守城校尉顛軍子狀貌偉素日不與
世接夜宿神祠師知其異乃師事之亦有所
得歷遊武夷龍虎二山時龍虎主先天觀者
傳師正館師于蓬萊庵據微君聖井藐姑
諸峯之會師攀陟崖壑侶鹿豕藉雲霧視以

為常或夜坐盤石蛇虎值于前輒愕而逝去
命其徒李全正趙真純築天瑞庵于峯頂四
方聞其道者無遠通凡病者輒叩之即應
以所供果服之無不愈參禮者日集嘗天旱
登龍井召龍出語龍出聽踰時漸小躍入神
中乃警以偈龍騰入水少頃天大雨元統癸
酉復隱武夷山居玉蟾之止止庵浙東元帥
李太平聞而禮之謂曰命嚴則民治心清則
欲寡李益敬服或有妬者謀以藥毒之師預
知命其徒鑿池諸水果服浴而出之安然今
名吐丹井至元丙子歲正月一日其同學桂
心淵世稱桂風子坐解于廬山師聞之四月
十日令徒書一頌坐逝越十三日面頰若栗
肢體溫軟猶生瘞于庵側所受弟子則勞養
素郭處常李西來張天全殷破衲方方壺皆
以道聞于世

歷世真仙體道通鑑續編卷之五

歷世真仙體道通鑑後集目錄

羽六

崑崙山聖壽萬年宮道士趙道一編修

卷之一

無上元君
金母元君

太一元君

卷之二

九天玄女

雲華夫人

織女

女偶

歲女

太陰女

梅姑

孫氏

張文光

張芝

張玉蘭

譙姆

盱母

薛練師

蠶女

姮娥

昌容

李真多

太陽女

毛女

女几

張文姬

張賢

盧氏

屈女

劉仙姑

許氏

卷之三

上元夫人

右英王夫人

太真王夫人

中候王夫人

麻姑

郭勾藥

王魯連

九華安妃

韓西華

王妙想

王氏

卷之四

紫素元君

黃景華

張桃枝

張微子

韓太華

郭叔香

王進賢

南極王夫人

紫微王夫人

靈照李夫人

鈞翼趙夫人

南陽公主

趙愛兒

南嶽魏夫人

河北王母

王抱臺

王奉仙

趙素臺

周爰支

傅禮和

寶壇英

劉春龍

孫寒華

李奚子

7-61 8 4 (50)

樊夫人	晉	東陵聖母	晉
雲英	晉	鮑姑	晉
丁淑英	晉	黃仙姑	晉
廣陵茶姥	宋	羅女	晉
梁母	宋	徐仙姑	隋
花姑	唐	焦靜真	唐
王法進	唐	費妙行	唐
緱仙姑	唐	王女	
卷之五		江妃	
明星玉女	漢	西河少女	漢
太玄女		程偉妻	漢
園客妻		李惠姑	魏
張姜子	吳	鄭天生	蜀
施淑女	吳	裴元靜	
文女真	晉	何仙姑	唐
戚逍遙	晉	王氏	唐
謝自然	唐	麻媼	唐
蔡尋真	唐	吳綵鸞	唐
盧眉娘		諸葛氏	唐
杜蘭香			

韋女	五代	王保宗	南唐
無名氏			
卷之六			
錢女真	宋	曹文姬	宋
趙仙姑	宋	鄭仙姑	宋
劉妍	宋	虞真人	宋
莫州女	宋	于仙姑	宋
張仙姬	宋	徐道生	宋
陳瓊玉	宋	吳氏	
武元照	宋	孫仙姑	宋

是書甫成或者曰此不編年類傳何名通鑑愚曰通鑑者是通天下之人可得而照鑑也何必局於編年乎且神仙傳記每有不記年代者不可編年一也應世見身歷千百載倏前倏後難究始終不可編年一也茫茫四海目力難周安能盡搜傳記考校異同而使一傳一事無遺落者不可編年一也況一編年只可提其大要其事迹不載年代者難以鋪張若是削除母乃太略如是刪略事迹學者何以準繩深思熟慮不可編年紀事是故質諸淺見究觀諸家神仙傳記歷代史傳參考成書他日得暇又當效儒家資治通鑑體搜諸仙傳年代可考者編年紀事作歷世真仙傳道通鑑然其書但能提綱次序不能詳述事迹矣後有博學高人別立高見修撰是書者亦各從其志也趙道一再拜焚香謹跋

歷世真仙體道通鑑後集卷之一

得雲山聖壽萬年宮道士趙道一編修

無上元君

老君雖歷代應現而未有誕生之迹將欲和光同塵以立世教乃先命玄妙玉女降爲天水尹氏之女名益壽適仙人李靈飛玄妙玉女即無上元君也靈飛本臯陶之後至商時父子相承得修生之道父慶賓年百歲餘常有少容周遊五嶽諸山一旦雲龍下迎白日昇天靈飛感父昇天之事精修大道亦百有餘日當老君未誕而昇天至商十有八世王陽甲踐祚之十七年庚申之歲老君自大清境分神化氣乘日精駕九龍化爲五色流珠下降時尹氏晝寢夢天開數丈衆仙捧日出良久見日漸小從天而墜爲五色珠大如彈丸因捧而吞之覺而有娠今亳州天靜宮有流星壇即其處由是容顏益少神氣安閑所居之室六氣和平冬無凝寒夏無裨暑祥光照室衆惡不侵八十一年不覺其久至商二十一王武丁之九年庚辰歲二月建寅十五日卯時聖母因

攀李枝忽從左腋降生仙傳所載皆云在胎八十一一年唯內傳云上帝之師元君感日精入口因緣經七十二年剖左腋而生二說雖或不同然亦有由虞宣出塞紀云老子復命胎中七十是時陽景二年舉儀九年則亦八十一一年也是時陽景重耀祥雲蔭庭萬鶴翔空九天稱慶玉女跪捧九龍薦水以浴聖安龍出之地因成九井漢伏滔北征記云老君廟中有九井降生之初即行九步步步蓮華左手指天右手指地曰天上下惟道獨尊我當開揚無上道法普度一切動植衆生周徧十方及幽牢地獄應度未度咸悉度之隱顯人間爲國師範位登太極無上神仙號曰聃或作僊者俱名耳字伯陽或曰伯陽父者尊老之稱也一名雅字伯宗一名志字伯光一名石字孟公一名重字子文一名定字元陽一名元字伯始一名顯字元生一名德字伯文老君降上九日身有九變皆天冠天衣自然被體仍有七十二相八十一好七十二相者頭圓如天面光象日伏羲起玉枕穹隆皓髮如鶴長七尺餘眉如北斗其色翠綠虎髯龍鬚素結如絲耳有垂珠中有三門高平於項厚而且堅河目

日光方瞳綠筋鼻有雙柱準骨隆隆口方如海唇赤如丹氣有紫色其香若蘭齒如編貝其堅若銀數有六八上下均平舌長且廣形如錦紋其音如玉其響如金觀高而起順方若矩日角月淵金容玉姿龍顏肅肅鳳視開闔額有允象三午上達天庭平坦金匱充盈頗有白痣順有玉九項有三約鶴素昂昂垂臂過膝手握十紋其指纖長各有策文爪有玉甲身有綠毛背有偃骨背有河魁臍際逾寸腹軟如綿心有錦紋腹有玄誌眼有輪文足踏二屐指有乾坤身長丈二偏體芳者面方而澤上下三停體如金剛貌若琉璃行如虎步動若龍超此其相也左扶青龍右據白虎前導朱雀後從玄武頭陰紫雲足履蓮花項負雙景五明耀日身有圓象洞照九天兼前仙相光色奇妍總八十一謂之好也寄胎八十一一年極太陽九九之數生而皓首故號爲老古人稱師爲子又子者男子之通稱故號老子居於陳國苦縣瀕鄉曲仁里濁水之陰即今亳州聖母既誕育道身將近天闕復

元君之位欲示世人以師資傳授之道乃告老君曰夫人受生於天地中有清有濁氣之清者清明慈仁氣之濁者愚癡凶虐明者因修以成性昧者恣欲以傷命性者身之原也命者生之根也是故修學之人煉身於九丹解結於五神引氣於本生滅根於三關九煉十變百節開明胞結斷滅乃知本真而成上仙也若不修學則邪魔入身百病競生死不盡命痛乎難言夫仙由心學心誠則仙成道貴內求內密則道來能致靜以合真積虛以通神則取仙日近矣苟心競神勞體煩不專動靜喪精耳目廣明徒積稔索道愈遠也寄寓天地間少許時爾若能攝氣營神辛苦注真久將得道則與天地共寄寓太無中也○能洞虛體無則視之不見聽之不聞乃與道合真矣老子曰今混迹塵寰欲常存不死隨世度人可乎元君曰吾有秘寶非聖不傳有能修之可以長存老子曰願聞其致元君曰至道淵奧深不可識匪有匪無匪聲匪色視之不見搏之不得囊括天地至大無極近在

諸身莫之能測能知其則是謂玄德老子曰其道亦有術以致之乎元君曰道者虛通之至真術者變化之玄技道因術以濟人人因修而會道則變化無窮矣夫道之要者無為而自然術之祕者符與氣藥而已符者三光之靈文天之真性也藥者五行之華英地之精液也氣者陰陽之和粹萬物之靈爽也人雖得一事未畢要資符藥道乃訖此吾之祕寶爾能兼之可以長存度人無量矣老君曰身者得道之器也氣者致命之根也根拔則命終器敗則道去今欲修之令命固道隆可得聞乎元君曰人稟骨肉之資猶陶家坯也坯未冶則敗速身未煉則命促理固然也縱使德冠群有神疏太玄而身猶未免乎老死夫何故哉由化致然不得不然也惟藥能煉形符能致神神歸則心通而性逸形堅則氣固而命全然後化氣變精洞入無形飛行虛空存亡自然乃能長存得道之人雖遭劫交天地崩淪而災不能及所以貴乎符藥者由此也老君曰服神丹而長生者神靈佑之乎

將藥之力邪元君曰長生之功由於丹丹之成由於神故將合丹必正身心不履罪過神明祐之作丹必成神丹入口壽無窮已天地明察道歸仁人萬兆蠢蠢名曰行尸不信長生之可學謂為虛誕從朝至暮但作求死之事天豈能強生乎恣心盡欲奄忽輒死千金送葬何所益哉則神丹之道成不惟長生而亦可作世寶也知此道者亦安用天下為人○有以國易吾方而非其人不傳也老子稽首曰願聞其旨元君乃仰天而嘯條忽有紫雲如蓋自天奄至中有五色蘊光明八達仙人消子侍之元君披出神圖寶章變化之方還丹伏火水汞液金之術凡七十二篇以授老君其文曰一為玄白生金公太陽流珠入華池斤內五兩文華凝赤鹽白雪成雄雌五符九丹得之飛真道在此人不知五符者一曰玄白二曰金精三曰飛符四曰金華五曰三五青龍精九丹者一曰白雪九轉還丹二曰雌雄九轉還丹三曰黃華九轉還丹四曰白華九轉還丹五曰丹華九轉還丹六曰五色

九轉還丹七曰泥汞九轉還丹八曰金精九轉還丹九曰九鼎極耀還丹此九丹得一則可以長生不在徧作也神丹之道皆三化五轉至九而止得服之者與吾等矣神仙之道不在祭祀禱鬼神不在導引與屈伸不在呪願多語言不在精思自苦動長生之要在神丹知之甚易爲寔難子能行之可長存此之道存立得仙吾亦學得非自然老子再叩頭稽首曰九丹之道既奉慈訓矣竊聞求仙不得金液虛自苦辛願示其要元君曰大哉子之問也九丹金液同爲昇天之道然九丹中金液爲上所以爾者服九丹之人或三年或二年或一年或半年或百日六十日三十日三日乃有仙官雲龍來迎惟服金液者入口則身色紫金立生羽翼昇天爲仙官矣凡欲服之須先長齋斷穀一年乃得服之自非有玄中之錄及不死之名者終不得聞金液之道也其法依前合丹金成而液之其道畢矣此吾之祕寶也凡有千二百訣吾於往劫塵沙天地之先受之於元始天尊奉而行之得

居無上元君之位吾昔已傳至真大聖天帝上帝太微太一元君今又授爾爾其勉之老君受訖復請曰萬兆芸芸動之死地今以此廣濟如何元君曰悠悠之徒耽榮嗜欲死者若墜石投川往而不返甚可痛傷然道不虛

行必授其人此道高妙祕於九玄瓊臺雲笈萬年一行貽諸玄籙玉名耳自非宿命骨分及丹苦之人不得聞也愚人多過方向驅除烏得違天科而妄宣乎吾道盡此將去矣當遣太一元君語汝言訖即有千乘萬騎五帝

上真擁八景玉輿迎之昇天今太清神丹經上元君其神能調和陰陽役使風雨進退五星斟酌寒暑降駕九龍十二白虎天下衆仙皆仰瞻焉人之生死莫不由此猶言服丹所致也

太一元君
老君乃遠遊山澤求煉神丹行經勞山果遇太一元君乘五色斑麟侍官數十人老君從之問道元君曰道之要在乎還丹金液耳遂具授祕訣他年之歷山復會太一元君因謝神丹之方元君曰吾是群仙之尊萬道之主玄靈祕術本玄分也美辱謝焉老君曰凡民

無知死者甚衆撫心泣血見之傷悲欲給以神藥令皆得長生可乎元君曰不可生道至重必授大賢及孝順篤實之士天生萬物有善有惡善者宜生惡者宜除不足給藥令皆生也君已知之不可輕泄老君以神仙之道必假修煉欲垂法以勸來世故存真抱一煉丹服氣然後乘空凌虛出有入無隨意所適人莫能測一日乘白鹿復履庭檜而昇天

金母元君

金母元君者九靈太妙龜山金母也一號太靈九光龜臺金母一號曰西王母乃西華之至妙洞陰之極尊在昔道氣凝寂湛體無爲將欲啓迪玄功生化萬物先以東華至真之氣化而生木公焉木公生於碧海之上蒼靈之墟以生陽和之氣理於東方亦號曰王公焉又以西華至妙之氣化而生金母焉金母生於神洲伊川厥姓緱氏生而飛翔以主陰靈之氣理於西方亦號王母皆擬質大元毓神玄奧於西方渺莽之中分大道醇精之氣結氣成形與東王木公共理二氣而育養天

地陶鈞萬物矣體柔順之本為極陰之元位配西方母養群品天上天下三界十方女子之登仙得道者咸所隸焉所居宮闕在龜山之春山崑崙玄圃閼風之苑有金城九重玉樓十二瓊華之闕光碧之堂九層玄臺紫翠丹房左帶瑤池右環翠水其山之下弱水九重洪濤萬丈非飈車羽輪不可到也尚書帝西荒之野所謂玉闕既天綠臺承霄青琳之字朱紫之房連琳綵帳明月四朗戴華勝佩靈章左侍仙女右侍羽童寶蓋蒼映羽旒。陰庭軒砌之下殖以白環之樹丹剛之林空青萬條瑤幹千尋無風而神籟自韻琅然皆奏八會之音也神洲在崑崙之東南故爾雅云西王母日下是矣又云王母髮鬢戴勝虎齒善嘯者此乃王母之使金方白虎之神非王母之真形也十六元始天王授以萬天之統龜山九光之籙使制召萬靈統括真聖監盟證信總諸天之羽儀天尊上聖朝宴之會考校之所王母皆臨映焉上清寶經三洞玉書凡所授度咸所關與也昔黃帝討蚩尤之暴威

所未禁而蚩尤幻化多方微風召雨吹煙噴霧師衆大迷帝歸息太山之阿昏然憂寐王母遣使披玄狐之裘以符授帝曰太一在前得之者勝戰則克矣符廣三寸長一尺青瑩如玉丹血為文佩符既畢王母乃命一婦人首鳥身謂帝曰我九天玄女也授帝以三官五意陰陽之畧太一遁甲六壬步斗之術陰符之機靈寶玉符五勝之文遂克蚩尤於中冀剪神農之後誅榆罔於阪泉而天下大定都於上谷之涿鹿又數年王母遣使白虎之神乘白虎集帝之庭授以地圖晚年復授帝以清靜無為正真之道其辭曰飲啄不止身不輕思慮不止神不清聲色不止心不寧心不寧則神不靈神不靈則道不成其要妙也不在瞻星禮斗若已勞形貴在湛然方寸無所營管神仙之道乃可長生其後虞舜攝位王母遣使授舜白玉環又授益地圖遂廣黃帝之九州為十有二州王母又遣使授舜皇瑤吹之以和八風周昭王二十五年歲在乙卯老君與真人尹喜遊觀八紘之外西遊

龜臺為西王母說常清淨經故太極左官仙公葛玄序曰吾昔受之於東華帝君東華帝君受之於金闕帝君金闕帝君受之於西王母皆口口相傳不記文字吾今於世書而錄之逮至穆王命駕八駿之乘右服驂騮而左綠耳右駉赤驥而左白鵠主車則造父為御商周為右次車之乘右服渠黃而左踰輪左騶盜驪而右字栢大主車參百為御奔戎為右馳驅千里而至巨蒐氏之國巨蒐氏乃獻白鵠之血以飲王具牛馬之廩以洗王之足及二乘之人已飲而行道宿于崑崙之河赤水之陽別日昇崑崙之丘以觀黃帝之宮而封之以詒後世遂賓于西王母觴于瑤池之上西王母為王謠王和之其詞哀焉廼觀日之所入一日行萬里王乃歎曰予一人不盈於德後世其追數吾過乎又云王持白珪重錦以為王母壽歌白雲之謠刻石紀述于弁山之上而還紀年云穆王十七年西王母賓于昭宮世之昇天之仙凡有九品第一上仙號九天真王第二次仙號三天真皇第三號太上真人第四

號飛天真人第五號靈仙第六號真人第七號靈人第八號飛仙第九號仙人凡此品次不可差越然其昇天之時先拜木公後謁金母受事既訖方得昇九天入三清拜太上觀奉元始天尊耳故漢初有四五小兒戲於路中一兒歌曰著青裙入天門揖金母拜木公時人莫知之惟張子房知之乃往拜焉曰此乃東王公之玉童也仙人得道昇天當揖金母而拜木公也自非沖虛登真之子莫知其津矣漢武帝好長生之道以元封元年登嵩高之嶽築尋真之臺齋戒精思四月戊辰王母使瑤城玉女王子登來語帝曰聞子欲輕四海之祿迂萬乘之貴以求長生真乎勤哉七月七日吾來暫來也帝問東方朔審其神應乃清齋百日焚香宮中夜二唱後白雲起于西南鬱鬱而至徑趨宮庭漸近則雲霞九色蕭鼓震空龍鳳人馬之衆乘麟駕鹿之衛科車天馬霓旂羽幢千乘萬騎光耀闕大仙從官森羅億衆皆長丈餘既至從官所在王母乘紫雲之輦駕九色斑龍帶天真之策

佩金剛靈璽黃錦之服文彩鮮明金光奕奕腰分景色之劍結飛雲大綬頭上華髻戴太真晨縷之冠躡方瓊鳳文之履可年二十許天姿奪靄靈顏絕世真靈人也下車二女扶侍登牀東向而坐帝拜跪問寒溫侍立良久呼帝使坐設以天厨芳華百菓紫芝萐藥紛若瑱精珍異常非世所有帝不能名也又命侍女取桃玉盤盛七枚大如鵝音保與子四以與帝母自食三帝食桃輒收其核母問何為帝曰欲種之爾母曰此桃三千歲一實中國土地薄種之不生於是命王子登彈八珍之璫董雙成吹雲和之笙石公子擊昆廷之玉許飛瓊鼓震靈之簧燒凌華樹吾陵之石范成君拍洞陰之磬段安香作九天之鈞法嬰歌玄靈之曲衆聲激清朗音駭空歌畢帝下席叩頭以問長生之道王母曰汝能賤榮樂卑耽虛味道自復佳爾然汝性恣體慾淫亂過甚殺伐非法奢侈恣性夫侈者裂身之具也淫者破身之斧也殺者響對著者心爛積欲則神殞聚穢則命斷以子最爾之身而

宅殘形之賊盈尺之材而攻之者百刃欲以解脫三尸全身永久不可得也有似無翅之鷄願鼓天池朝生之菌而樂春秋者也若能蕩此衆亂撥穢易意保神氣於絳府閉瑤宮而不開靜著侈以寂室愛衆生而不危守慈務施煉氣惜精倘有若斯之事豈無髮髻邪若不爾者譬如抱石而濟長河爾帝跪受王母之誠曰微不才沈淪流俗承禪先業遂羈世累刑政乖繆罪積丘山今日之後請事斯語矣王母曰夫養性之道理身之要汝固知矣但在勤行不息也我師元始天王昔於嚴霄之臺授我要言曰欲長生者取諸身堅守三一保靈根玄谷華體灌沈珍既長清精入天門金室宛轉在中關青白分明適泥丸養液閉精具身神三宮備衛存絳宮黃庭戊己無流源徹通五藏十二輪吐納六府魂魄欣却此百病辟熱寒保精留命永長存此所謂呼太和保守自然真要道者也凡人爲之皆必長生亦可役使鬼神遊戲五嶽但不得飛空騰虛而已汝能爲之足可度世也夫學仙

者未有不由此而始也至若太上靈藥上帝
奇物也下陰生重雲妙草皆神仙之藥也得
上品者後天而老乃太上之所服非下仙之
所逮其次藥有九丹金液紫華虹英太清九
轉五雲之漿玄霜絳雪騰躍三黃東瀛白香
玄洲飛生八石千芝威喜九光西流石膽東
滄青錢高丘餘糧積石瓊田太虛還丹盛以
金蘭長光絳草雪童飛干有得服之白日昇
天此飛仙之所服非地仙之所聞其下藥有
松栢之膏山姜沈精菊華澤瀉枸杞茯苓菖
蒲門冬巨勝黃精靈飛赤板桃膠木英升麻
續斷威蕤黃連如此下藥略舉其端草類繁
多名數有千子得服之可以延年雖不能長
享無期上昇青天亦可以身生光澤返老童
顏役使群鬼得爲地仙求道之者要先憑此
階漸以入乎妙也若能呼吸御精保固神氣
精不脫則永久氣長存則不死不用藥石之
費又無營索之勞取之於身爾百姓日用不
知此故爲上品自然之要也且夫一人之身
天付之以神地付之以形道付之以氣氣存

則生氣去則死萬物草木亦皆知之身以道
爲本豈可不養神固氣全爾形也形神俱全
上聖所貴形滅神逝豈不痛哉一失此身萬
劫難復子其實爲我之所言乃我師元始天
王所授之辭也即勅玉女李慶孫書出之以
付於帝曰汝善修之焉王母命駕將去帝下
席叩頭請留王母即命侍女召上元夫人同
降帝宮良久上元夫人至復坐設天廚久之
王母命夫人出八會之書五嶽真形五帝六
甲靈飛之符凡十二事云此書天上四萬劫
一傳若存人間四十年可授有道之士王母
乃命侍女宋靈賓開雲錦之囊取一冊以授
帝王母執書起立以付帝王母呪曰天尊地
卑五嶽真形元真激氣大澤玄精天回九道
六和長平太上八會飛天之成真仙節信田
茲通靈泄墜滅府寶歸長齡微其慎之敢告
劉生祝畢帝拜受之王母曰夫始學道受符
者宜別祭川嶽諸真靈潔齋而佩之焉四十
年後若將傳付汝之所友董仲君李少君可
校之爾況爲帝王可勤祭川嶽以安國家授

簡真靈以安黎庶也言訖與上元夫人命車
言去從官互集將欲登天因笑指東方朔此
我鄰家小兒性多滑稽曾三來偷桃矣昔爲
太上仙官因沈湎于玉酒失部御之和謫佐
於汝非流俗之夫也其後武帝不能用王母
之戒爲酒色所惑殺伐不休征遼東擊朝鮮
通西南夷築臺榭興土木海內愁怨自此失
道幸回中臨東海三祠王母不復降焉所受
之書置于栢梁臺上爲天火所焚李少君解
形而去東方朔飛翥不還巫蠱事起帝愈悔
恨元始二年崩於五柞宮葬于茂陵其後茂
陵所藏道書五十餘卷一旦出抱犢山中又
玉箱玉杖出於扶風市驗茂陵宛然如故而
箱杖出於人間徑不知其果何爲邪茅君盈
字叔申從西城王君詣白玉龜臺朝謁王母
求乞長生之道曰盈以不肖之軀慕龍鳳之
年以朝菌之脆求積朔之期王母愍其動忘
告之曰吾昔師元始天王及皇天搏桑帝君
授我以玉珮金璫二景經練之道上行太極
下造十方漑月咀日以入天門名曰玄真之

經今以授爾宜勤修焉因勅西城王君一
解釋以授之并授寶書四章散方後茅君南
治句曲之山哀帝元壽二年八月己酉南嶽
真人赤君西城王君方諸青童君並從王母
降于茅君之室頃之天皇大帝遣繡衣使者
冷廣子期賜盈神璽玉策太微帝君遣三天左
宮御史管脩條賜盈八龍錦與紫羽華衣太
上大道君遣協晨大夫石叔門賜盈金虎真
符流金之鈴金闕聖君命太極真人使正一
上玄玉郎王忠鮑丘等賜盈以四節燕胎流
明神芝四使者授訖使盈佩璽服衣正冠帶
符握鈴而立四使者告盈曰食四節隱芝者
位爲真卿食金闕玉芝者位爲司命食流明
金英者位爲司祿食長曜雙飛者位爲真伯
食夜光洞草者總主左右御史之任子盡食
之矣壽齊天地位爲司命授東嶽上卿統吳
越之神仙綜江左之山源矣言畢使者俱去
五帝君各以方面車服降於其庭傳大帝之
命賜盈紫玉之版黃金刻書九錫之文拜盈
爲東嶽上卿司命真君太元真人授事訖俱

去王母及盈師西城王君爲盈設天厨酣宴
歌玄靈之曲宴罷王母攜王君及盈省顧盈
之二弟各授道要王母命上元夫人授茅固
東太霄隱書丹景道精等四部寶經王母執
太霄隱書命侍女張靈子執交信之盟以授
于盈固及衷事訖王母昇天而去至王褒字
子登張道陵字輔漢洎九聖七真人得受書
者皆朝王母於崑陵之闕焉其後紫虛元君
魏夫人華存清齋於陽洛隱元之臺王母於
金闕聖君降于臺中乘八景雲輿同詣清虛
上宮傳玉清隱書四卷以授華存是時三元
夫人馮雙禮紫陽左仙公石路成太極高仙
伯延蓋公子西城真人王方平太虛真人南
嶽赤松子桐柏真人王子喬三十餘真各歌
太極陰歌陽歌之曲王母爲之歌曰駕我八
景輿歛然入玉清龍旌拂霄上虎旂攝朱兵
逍遙玄津際萬流無暫停哀此去留會劫盡
天地傾當尋無中景不死亦不生體彼自然
道寂觀合太冥南嶽挺真幹玉暎輝穎精在
任靡其事虛心自受靈嘉會絳河曲相與樂

未央歌畢上元夫人答歌亦竟王母及上元
夫人紫陽左仙公太極仙伯清虛王君乃攜
南嶽魏華存同去東南行俱詣天台霍山洞
宮玉宇之下衆真皆從王母昇還龜臺矣王
母師匠萬品校領群真聖位崇高總錄幽顯
至若邊洞玄躬朝而受道謝自然景侍以登
仙故洞玄及自然傳謂金母師王母也玄經
所證事迹蓋多未能備錄

歷世真仙體道通鑑後集卷之一

歷世真仙體道通鑑後集卷之二

羽七

浮雲山聖壽萬年宮道士趙道一編修

九天玄女

九天玄女者黃帝之師聖母元君弟子也黃帝在昔為有熊之國君佐神農之孫榆罔既衰諸侯相伐干戈相尋各據方色自稱五行之號太皞之後自為青帝榆罔神農之後自號赤帝共工之族自號白帝葛天氏之後自號黑帝帝起有熊之墟自號黃帝帝乃恭已下士側身修德在位二十一年而蚩尤肆孽弟兄八十一人獸身人語銅頭鐵額敢吞石不殖五穀作五虐之刑以害黎庶鑄兵於葛嶺之山不用帝命帝欲征之博求賢能以為已助得風台於海隅得力牧於大澤以大鳴為佐天老為師置三公以象三台風后為上台天老為中台五聖為下台始獲寶鼎不爨而熟迎日推策以封胡為將以夫人費修之子為太子用張若隰朋力牧容光龍行蒼顏容成大撓奢龍眾臣以為羽翼戰蚩尤於涿鹿帝師不勝蚩尤作大霧三日內外皆迷

風后法斗機作大車以杓指南以正四方帝用憂憤齋于太山之下王母遣使披玄狐之裘以符授帝曰精思告天必有太上之應居數日大霧冥冥晝晦玄女降焉乘丹鳳御景雲服九色彩翠之衣集于帝前帝再拜受命

玄女曰吾行太上之教有疑可問也帝稽首曰蚩尤暴橫毒害烝黎四海嗷嗷莫保性命欲一戰必勝之術與人除害可乎玄女即授帝六甲六壬兵信之符靈寶五符策役鬼神之書制秋通靈五明之印五陰五陽逆甲之式太一十精四神勝負握機之圖五岳山河圖策精之訣九光玉節十絕靈旛命魔之劍霞冠火佩龍戰霓旂翠輦綠輶虬駝虎豹千花之蓋八鸞之輿羽籥玄竿虹旌玉越神仙之物五龍之印九明之珠九天之節以重兵信五色之幡以辨五方帝遂復率諸侯再戰蚩尤驅魃魃維杖以為陣兩師風伯以雲衛應龍蓄水以攻帝帝盡制之遂滅蚩尤於絕轡之野中冀之鄉冢分其四肢以葬之由是榆罔拒命又誅之於阪泉之野北逐獯鬻南大定

四方步四極凡二萬八千里乃鑄鼎立九州置九行九德之臣以觀天地祠百靈垂法設教然後擇首山之銅鑄鼎於荆山之下黃龍下迎帝乘龍昇天皆玄女之所授符籙圖局以佐成功業

蠶女

蜀之先有蠶叢帝又高辛時蜀有蠶女不知姓氏父為人所掠惟所乘馬在女念父不食其母因誓於眾曰有得父還者以此女嫁之馬聞其言驚躍振迅絕其拘絆而去數日父乃乘馬而歸自此馬嘶鳴不肯訖母以誓眾之言告父父曰誓於人不誓於馬安有人而偶非類乎能脫我於難功亦大矣所誓之言不可行也馬跑父怒欲殺之馬愈跑父射殺之曝其皮於庭皮蹶然而起捲女飛去旬日皮復棲于桑上女化為蠶食桑葉吐絲成繭以衣被於人間一日蠶女乘雲駕此馬侍衛數千人謂父母曰太上以我心不忘義授以九宮仙嬪矣母復憶念也今家在漢州什邡德陽三縣界每歲祈蠶者四方雲集蜀之風

俗宮觀諸化塑女像披馬皮謂之馬頭娘以
祈蠶馬則禮夏官馬質掌質馬云若有馬
其種是蠶與馬同氣物不能而大禁再蠶者
有深究其理者道一特書之以俟

雲華夫人

夏禹治水隨山濬川老君遣雲華夫人往陰
相之時禹駐巫山之下大風卒至崖谷振墮
力不可制忽遇雲華夫人禹拜而求助夫人
即勅侍女授禹策召鬼神之書因命其神狂
章虞余黃麾大翳庚辰童律巨靈神等助其
斬石疏波決塞導阨禹嘗謁雲華於崇嶽之
巔顧盼之際化而為石或倏然飛騰散為輕
雲油然而止聚為夕雨或為游龍或為翔鶴
千態萬狀不可親也禹疑其狡獪怪誕非真
仙也問諸童律童律曰天地之本者道也運
道之用者聖也聖之品次真人仙人也其有
稟氣成真不修而得道者木公金母是也蓋
二氣之祖宗陰陽之原本仙真之主宰造化
之元先雲華夫人者金母之女也總仙奇記
云名理姐
受書為雲華上宮夫人主領教童真之士理

在玉映之臺隱見變化蓋其常也亦由凝氣
成真與道合體非寓胎稟化之形乃西華少
陰之氣也且氣能彌綸天地經營動植大包
造化細入毫髮在人為人在物為物豈止為
雲雨龍鶴飛鳴騰鳳哉禹然之復往詣焉忽

見雲樓玉臺瓊闕森然靈官侍衛不可名識
師子抱關天馬啓途毒龍電獸八威備軒夫
人宴坐於瓊臺之上禹稽首問道召禹坐而
謂曰夫聖匠肇興剖大混之一樸判為億萬
之體發大蘊之一苞散為無窮之物故步三
光而立乎畧景封九域而制乎邦國刻漏以
分晝夜寒暑以定歲紀坎離以正方面山川
以分陰陽城郭以聚民器械以衛衆輿服以
表貴賤禾黍以備凶歉凡此之制上稟乎星
辰而取法乎神真下以養於有形之物是故
日月有幽明生殺有寒暑雷電有出入之期
風雨有動靜之常類氣浮乎上而衆精散於
下廢興之數治亂之運賢愚之質善惡之性
剛柔之氣壽夭之命貴賤之位尊卑之序吉
凶之感窮達之期此皆稟之於道懸之於天

而聖人為紀也性發乎天而命成乎人立之
者天行之者道道存則有道去則無非道則
物不可存也非修則道不可致也太上有言
致虛極守靜篤萬物將自復復謂歸於道常
存也道之用也變化萬端而不足其一是故
天參玄玄地參混黃人參道德去此之外非
道也哉長久之要者天保其玄地守其物人
養其氣所以全也則我命在我非天地殺之
鬼神害之失道而自逝也志乎哉勤乎哉子
之功及於物矣勤逮於我矣善格夫天矣而
未聞至道也吾昔於紫清之闕受書寶而勤
之我師三元道君曰上真內經天真所寶封
之金臺佩之太微則雲輪上往神虎抱關振
衣瑤房邀宴希林長招仙公右棲白山而下
盼太空汎乎天津則乘雲騁龍游此名山則
真人詣房萬神奉衛千精伺迎動有八景玉
輪靜則宴處金臺亦謂之太上玉珮金璫之
妙文也汝將欲越巨海而無颺輪渡飛沙而
無雲軒陟阨塗而無所舉涉泥波而無所乘
陸則困於遠絕水則懼於漂淪將欲以導百

谷而濬萬川也危乎悠哉太上懲汝之至將授汝以靈寶真文陸策虎豹水制蛟龍斬馘萬邪檢取群凶以成汝之功也其在乎陽明之天矣吾所授寶書亦可以出入水火嘯叱幽冥收策虎豹呼召六丁隱淪八地顛倒五星久視存身與天地相傾也因命侍女陵容華出丹玉之笈開上清寶文以授禹仍命狂章巨靈等神助禹誅為民害人力所不能制者戮防風氏於會稽鎖維渦之神無支祗於龜山皆其力也禹後入陽明洞天為紫庭真人。

姮娥

羿請不死之藥於西王母妻姮娥竊而服之奔月宮。

織女

織女上應天宿牽牛則河鼓是也舊說天河與海通漢時有人居海上者年年八月見有浮槎去來不失期人有奇志者立飛閣其上多齋粮乘槎而去十餘日至一處有城郭狀屋舍甚嚴遙望室中有織婦人又見一丈夫

牽牛飲之驚問曰何由至此其人與說來意因問此是何處答曰君至蜀郡訪嚴君平則知之因還後以問君平君平曰某年月日有客星犯牽牛宿計年月正是此人到天河時也東方朔神異記云郭翰嘗遇織女降其室

水玄霄之衣霜羅之帔戴翹鳳金冠躡瓊文九章之履張霜霧丹轂之情施九晶玉華之簾轉會風之扇有同心龍枕登日丹鉛書青練一幅以寄翰墨書董永少失母養父家貧傭力至農月以小車推父置田頭陰樹下而管農作父死後自主人貸錢一萬自賣身為奴遂得錢葬父還於路忽見一婦人姿容端正求為永妻永乃與俱詣主人主人令永妻織絹六百匹放汝夫妻乃當機織一月畢主人深怪其速疾遂放之相隨至舊相見之處而辭永曰我天之織女緣君至孝天帝令助君償債言訖凌空而去今秦州有漢董永所居天女絲絲井存焉又有織女嫁牽牛事見前卷武丁傳

昌容

昌容者商王女也修道於常山下食蓬萊根

往來上下人見之二百餘年顏色常如二十許能致紫草鬻於染工得錢即施於貧病者歷年如是奉祠者甚衆人竟不知其所修之道常行日中不見形影或云昌容能煉形者也未幾忽沖天而去仙傳

女偶

南伯子葵問乎女偶曰子之年長矣而色若孺子何也曰吾聞道矣南伯子葵曰可得學邪曰惡乎可子非其人也夫卜梁倚有聖人之才而無聖人之道我有聖人之道而無聖人之才吾欲以教之庶幾其為聖人乎不然以聖人之道告聖人之才亦易矣吾猶守而告之三日而後能外天下已外天下矣吾又守之七日而後能外物矣吾又守之九日而後能外生已外生矣而後能朝徹朝徹而後能見獨見獨而後能無古今無古今而後能入於不死不生殺生者不死生生者不生其為無不將也無不迎也無不毀也無不成也其名為撓寧撓寧也者撓撓而後成者也南伯子葵曰子獨惡乎聞之曰吾聞之副墨之子副

墨之子聞諸洛誦之孫洛誦之孫聞之瞻明瞻明聞之聶許聶許聞之需役需役聞之於誣於誣聞之玄冥玄冥聞之參寥參寥聞之疑始

李真多

李真多仙人李八百之妹也隨兄修道居綿竹中老君與玄古三師降授以飛昇之道先於八百白日昇天今有真多古迹猶在或來往浮山之側今號真多化即古浮山治也一去八百嘗與妹真多來卜居於筠陽之五龍岡又名赤商寨今復煉丹於華林山石室隆今興州州治是也與府奉新縣浮雲觀是也八百兄妹俱蜀人也雖卜居筠陽間往來蜀中一日真多自蜀至八百候之今瑞州望仙門是也見真多手持蓮花身似有孕八百怒意欲引劍揮之真多覺之倏爾凌空渡江產下童子經一卷遂乘雲氣冉冉昇天時人塑真多之像將奉祠焉像成而昇不動是夕真多見夢云吾祠宜在五龍岡翌日舉像甚輕乃祠于彼至唐玄宗天寶十年天師孫智涼始奏改元陽觀以顯聖迹憲宗元和七年

高安縣令謹貢以縣治觀基兩易今瑞州城西二里遺遙山妙真宮是也其產經之地今額儀天觀觀中女真世傳其經郡人每備香信詣觀看經以保產難焉真多今號明香元君

嬴女

秦繆公女嬴氏名弄玉善吹笙無和者欲求得吹笙者以配有蕭史者善吹簫能感風彩雲鳳凰嬴女願嫁之嬴女吹笙亦如人所感於是孟明爲媒蹇叔爲賓約而成婚宴於西殿座中不奏他樂惟二人自以笙簫間奏遂致鳳凰來儀二人乘之而去秦人因作鳳女祠

太陽女

太陽女者姓朱名翼敷演五行之道加思增益至爲微妙行用其道其驗甚速年二十八十歲色如桃華口如含丹肌膚充澤眉目如畫有如十七八歲者奉事絕洞子丹成以賜之亦得仙昇天也

太陰女

太陰女者姓盧名全爲人聰達智慧過人好玉子之道頗得其法未能精妙時無明師乃當道沽酒密欲求賢積年累久未得勝已會太陽子噲然嘆曰彼行白虎騰蛇我行青龍玄武天下悠悠知者爲誰女聞之大喜使妹問客主數爲幾對曰不知也但南三北五東九西七中一耳妹還報曰客大賢者至德道人也我始問一已至五矣遂請入道室改進妙饌盛設嘉珍而享之以自陳託太陽子曰共事天帝之朝俱飲神光之水身登玉子之魁體有五行之寶唯賢是親豈有所怪速教補導之要授以蒸丹之方合服得仙時年已二百歲而有少童之色也

毛女

毛女自玉姜玉姜一云玉美在華陰山中山客獵師世世見之形體生毛自言秦始皇宮人秦亡入山避難道士谷春教食松葉遂不飢寒身輕如飛百七十餘年所止岩中有鼓琴聲云出列舂抱樸子云漢成帝時獵者於終南山見一人無衣服身皆黑毛跳坑越澗如飛乃密伺

其所在合圍取得乃是一婦人問之言我是秦之宮人關東賊至秦王出降驚走入山飢無所食洎欲飢死有一老公教食松柏葉實初時苦澀後稍便喫遂不復飢冬不寒夏不熱此女是秦人至成帝時三百餘歲也一云有魚道起魚道遠者皆秦時之女真入武夷山隱焉後人常見之其地四圍皆生毛竹故人因毛竹而亦呼此二魚爲毛女

梅姑

梅姑秦時丹陽縣人有道術能著履行水上縣有梅姑廟尚存

女兒

女兒者陳氏酒家婦也有仙人過其家以素書五卷質酒几開視之乃仙方也私寫要訣依而修之數歲仙人復來笑曰竊學無師有翅不飛女兒隨仙人去今所居女兒山是也

孫氏

孫氏一云漢天師張道陵之妻也同隱龍虎山修道章帝元和二年俱到蜀居陽平化天師學道行滿功成至桓帝永壽二年九月九

日太上詔使至孫氏同天師於雲臺舉白日飛昇三洞珠囊云天師昇天後一年夫人復昇天

張文姬

張文姬天師張道陵之長女也適陳郡袁公子家豪好道久之白日抱五兒昇天

張文光

張文光天師張道陵之次女也一云第四女爲陵王妃以得封妃父諱不食數月白日昇天一云入門三日於殿上白日昇天

張賢

張賢一云名賢姬天師張道陵之第三女也一云第五女爲燕王妃好道集真人之法久之白日昇天

張芝

張芝一云名芳芝天師張道陵之第四女也一云第六女適魏公第二子夫故犯父諱遂鬱鬱不樂於家白日飛昇

盧氏

盧氏嗣漢第二代天師張衡之妻也張衡得道盧氏同於陽平山白日飛昇

張玉蘭

張玉蘭張衡之女也幼而潔素不食葷血年十七歲夢朱光入口因而有孕父母責之終不肯言惟侍婢知之一日謂侍婢曰我死爾當剖腹以明我心其夕遂歿父母不違其言剖腹得一物如蓮花初開其中有白素金書十卷乃本際經也十餘日間有大風雨晦冥遂失其經成都記云天師雲孫女無夫而孕父疑之欲殺焉既產有異光乃一軸書則本際經也父以爲神乃擲其刀其後於敦信村登仙即女即觀也今有聖女臺拋刀池洗經池存焉一云得素金書本際經十卷素長二尺許幅六七寸文明甚妙將非人工乃傳寫其經而葬玉蘭百餘日大風雷雨失經及玉蘭墳墳自開空棺而已

屈女

東吳葛仙公玄曾在荆門軍紫蓋山修煉值天寒大凍仙公跣足衣衫藍縷時有屈家二女窺見憐其忍冷黃夜促成雙履次日欲獻之往煉丹之所仙公已去但存爐灰尚溫二

女撥灰而得丹一粒妙殊分而服之自後神氣沖沖不飢不渴惟慕清靜後隱去時人謂得仙矣

謹姆

謹姆者不知何許人也其字曰嬰常居金陵丹陽郡之黃堂七潛修至道忘其甲子者老累世見之齒髮不衰容貌常少皆以謹姆呼之謂其可爲人師也吳大帝時行丹陽市中忽遇一男子年可十四五叩頭再拜願爲義子謹姆告曰汝既成長須侍養所生何得背其已親而事吾爲母既非其類不合大道於是童子跪謝而去又經旬月復過市中忽見孩兒年可三歲悲啼呼叫莫知誰氏之子因遇謹姆執衣不捨告云我母何來唯願哀憫謹姆憐其無告遂收歸撫育漸向成大供侍甘旨晨昏不虧心與道合行通神明聰慧過人博通經史天文地理百氏九流窮物極玄探微索奧年將弱冠姆謂之曰我修奉正道其來久矣汝以吾撫育暫此相因汝既無天將何以爲姓氏兒曰昔蒙天真授以靈章約爲

孝悌明王請以此爲名號可乎姆曰既天真付授吾何敢有違復議求婚兒跪姆前說贊曰我非世間人上界真高仙今與母爲兒乃是宿昔緣因得行孝道度脫諸神仙向前十五童亦是我化身今已道氣圓我將返吾身真凡自殊趣何爲議婚姻蓋於黃堂壇傳教付至人母既施吾教三清棲我神謹姆聞讚驚畏異常遂於黃堂建立壇靖嚴奉香火大闡孝道明王之教明王告姆修真之訣曰每須高處玄壇踈絕異黨僻閑丘阜餌服陽和委鑒太虛靜夷玄圓若非無英寶映黃老玉書大洞真經豁落七元太上隱玄之道不可偃息於流霞之車眷盼乎文昌之台也得此道者九鳳齊鳴萬萬萃止竦身御節八景浮空龍與虎旂遊翔八方矣每宜實之於是盡得妙訣兼授靈章已而辭母飛騰太空謹姆受訖實而秘之積數十年而人無知者至西晉之末許真君避吳真君猛聞姆有道遠詣丹陽求受道法姆知其名在圖籍應爲神仙於是授以孝道明王之教真仙飛舉之宗及

正一斬邪之法三五飛步之術仍以蘭公所授孝悌明王銅符鐵券金丹寶經一遵元戒傳付許君仍語二君玉皇玄譜仙籍品秩乃令許君以道授吳君二君禮謝將辭歸許君欲每歲來禮謁姆姆止之曰子勿來吾即還帝鄉矣乃取香茅一根南望擲之茅隨風飛去因謂日子歸於所居之南數十里認茅落處立吾祠歲秋一至足矣語訖忽有雲龍之駕來迎凌空而去今新建豐城二縣之界有黃堂觀乃真君訪丹陽黃堂所立祠每年八月三日朝謁謹姆之所也

劉仙姑

劉仙姑名懿靖安縣人年數百歲貌若童子謹姆嘗稱之真君往見則已飛昇矣遂留寶木華車遺之車因風飄舉三日而下因名其觀曰華車觀碑碣猶在今號棲霞觀十五

肝母

肝母者真君許遜之姊真君肝烈之母許遜以其孀居乃築室於宅西數十步間俾居之許遜隱西山修煉日夕講究真詮肝母與子

烈日得參其妙焉許遜每出則盱母代掌其家事仙賓隱客咸獲見之許遜飛昇之日盱母暨烈母子並受玉皇詔部分仙眷昇天

許氏

許氏者許真君遜之女也適建安黃仁覽盡得真君道妙日究神仙之學任青州從事單騎之官留許氏侍翁姑一夕家僮報許氏院中夜有語笑聲姑訊之許氏曰黃郎爾姑曰吾子從事數千里安得至此許氏曰彼已得仙道能頃刻千里戒在漏語故不敢令姑知姑曰若然當使我見之是夕仁覽歸許氏告以故比明仁覽不得已出謁父母曰仁覽雖從宦遠鄉夜必潛歸膝下仙道秘密不可泄言恐招譴累言訖取竹杖化為青龍乘之而去後許真君輕舉之日許氏同仁覽公姑三十二口白日飛昇仙仗既行許氏釵偶墜落今有許氏墜釵洲

薛練師

女真薛練師不知何許人也晉時世弊京邑不寧有道之士多棲寓山林以避世因居南

嶽尋真臺外示同塵內修至道常騎白豹遊

者聞峯黃鳥白猿不離左右後於雲龍峯尸

解出仙傳湘中記云晉女真薛練師冲舉之

處梁武帝天監五年建觀至後周武穆公主

周惠并者生而有異光滿室幼不茹葷長思

獨處慕魏夫人十六緱仙姑之志因居石室感西

靈聖母降傳經錄修三素之道潭衡之境士

女景慕者數百人世代將亂告諸學者曰我

當暫往約百餘年再來後學如市唐玄宗開

元初賜額西靈後有女冠李太真曹妙本接

踵得道即今常住乃周公主所捨觀廢久馬

氏復興宋朝特賜每歲度女冠一人以續焚

修

歷世真仙體道通鑑後集卷之二

歷世真仙體道通鑑後集卷之三 吳

浮雲山聖壽萬年宮道士趙通二編修

上元夫人

上元夫人道君弟子也亦太古以來得道仙籍亞於龜臺金母金母所降之處多使侍女與聞邀為賓侶漢孝武好神仙之道禱醮名山以求靈應元封元年辛未七月七夜二鼓後西王母降于漢宮帝迎拜稽首侍立久之王母令帝坐設以天厨言宴粗悉命駕將去帝下席叩頭請留殷勤王母復坐乃命侍女郭密香邀上元夫人同宴於漢宮事載金母宣帝地節四年乙卯咸陽茅盈受黃金九錫之命為東嶽上卿司命真君太元真人是時五帝君授策既畢各昇天而去茅君之師總真王君西靈王母與夫人降于句曲之山金壇之陵華陽天宮以宴茅君焉時茅中君名固小君名衷王母王君授以靈訣亦授錫命紫素之榮固為定錄君衷為保命君亦侍真會王君告二君曰夫人乃三天真皇之母上元之高尊統領十方玉女之籍汝可自陳二

君下席再拜求乞長生之要夫人憫其勤志命侍女宋辟非出紫錦之囊開綠金之笈以三元流珠之經丹景道精經隱仙八衍經太極錄景經凡四部以授二君王母復勅持地李方明出丹瓊函披雲珠之笈出玉佩金璫經太霄隱書經洞飛二景內書傳授二君各受書畢王母與夫人告去千乘萬騎昇還太虛矣

南極王夫人

南極王夫人西王母第四女也一云第名林

字容真一號紫元夫人或曰南極元君理太丹宮受書為金闕聖君上保司命漢平帝時降于陽洛山石室之中授清虛王君太上寶文等經三十卷夫人著錦帔青羽裙左佩虎書右帶揮靈可年十六七形貌真正天姿奄靄乘羽寶車駕以九龍女騎九千居渤海丹海長離山中主教當為真人者

右英王夫人

右英王夫人西王母第十三女名媚蘭字申林總仙奇紀治滄浪山受書為雲林夫人晉

哀帝興寧三年七月降句曲山真誥云滄浪雲林右英夫人

紫微王夫人

紫微王夫人名清娥字愈音真誥云王母第二十女也昔降授寶神經與清靈裴真人行之得道晉哀帝興寧三年乙丑六月與九華安妃二十三真人十五女仙降句曲投道於真人楊羲也夫人鎮羽野玄隴主教當成真人者也夫人作服水序在上清經

太真王夫人

太真王夫人王母之小女也衣服奇麗姿容絕世年可十六七時以兒為三天太上府都官司直彼降主東嶽夫人暫來往於岱宗山石室高崖重巖深隱人迹所不能到去地千餘丈中有玉几金牀珍物奇偉每彈一絃之琴即百禽飛集鼓舞聽之時乘一白龍周旋四海仙人馬明生嘗為縣吏為賊所傷瘡甚殆死遇夫人救之數年後夫人令明生師安期生受金液還丹修煉昇天

靈照李夫人

北元中玄道君李慶賓之女太保玉郎李靈飛之小妹受書為東宮靈照夫人治方丈臺第十三朱館中夫人著紫錦衣帶神虎符握流金鈴有兩侍女年可二十許夫人年可十三四許

中候王夫人

女仙王觀香字衆愛周靈王第三女也是宋姬所生於子喬為別生妹受子喬飛解脫網之道得去入綴外書作氏山中後俱與子喬入陸渾積三十九年道成白日冲天真誥云受書為紫清宮內傳妃領東宮中候真夫人子喬弟兄七人得道五男其眉壽是觀香之同生兄亦得道

鈎翼趙夫人

鈎翼夫人齊人也姓趙少好清靜病卧六年右手撻飲食少漢武帝時望氣者云東北有貴人氣推而得之召到婆色甚偉武帝發其手而得玉鈎手得展幸之生昭帝武帝尋害之殞尸不冷而香一月後昭帝即位更葬之棺空但有絲履故名其官曰鈎翼後避諱改

為弋

麻姑

麻姑乃王方平之妹修道得仙年可十八許於頂中作髻餘髮散垂至腰其衣有文章光彩耀日世所無有也按道書云老君歷觀無

八難示以豫除之法中有遺此方黑騎天官兵馬倉老麻姑五億萬騎等語則知麻姑治劫之高真乘運昔方平降蔡經家遣使邀麻姑同宴各進行厨皆金盤玉杯餽饌多是諸

花而香氣達于內外擘麟脯如行柏多進天酒如飲瓊漿麻姑曰接待以來見東海三為

桑田向到蓬萊水乃漫於往日會將減半也

將復揚塵也麻姑手爪頗似鳥爪蔡經心言背痒時得此爪以肥背當佳也方平已知經心中所言即使神吏鞭之曰麻姑神人也汝可萌妄想哉宣州有麻姑仙壇建昌軍有麻

姑山靈迹非止一處宋徽宗政和間寵褒麻姑為真寂冲應元君寧宗嘉泰間改封虛寂

冲應真人

南陽公主

漢時南陽公主出降王咸屬王莽秉政公主

風慕清虛崇尚至道每追慕文景之為理又知武帝之世累降神仙謂咸曰國危世亂非

女子可以扶持但當自保恬和退身修道稍速塵境必可延年若碌碌隨時與世進退恐不見免於支離之苦奔迫之患也咸僂俛世

祿未從其言公主遂於華山結廬棲止歲餘稽思丹道真靈感應遂捨廬室而去人或見之徐徐絕壁乘雲氣冉冉而去咸入山追之

越巨壑昇層巔涕泗瞻望漠然無迹忽於嶺上見遺朱履一雙前而取之已化為石矣因謂之公主峯潘安仁為記行於世

郭刁藥

郭刁藥漢度遠將軍東平郭襄女也少好道篤誠真人因授其六甲而得道今或遊玄洲或處東華方諸臺也

趙愛兒

趙愛兒者幽州刺史劉虞別駕趙該姊也好道得尸解後又受符見居東華方諸臺

王魯連

女仙王魯連魏明帝城門校尉范陽王剛女

也真誥云王伯綱剛得道於元洲魯連見父冲天遂勤志修道入陸沈山遇太一真人授以飛昇之法行之白日昇天

南嶽魏夫人

夫人姓魏名華存字賢安任成人即晉武帝

左僕射魏舒之女天才卓異性樂神仙年二十四父母強逼以事南陽劉又諱彥幼為修

武令夫人隨之遂因請開齋于別室謹修道法入室百日所期仙靈精思希感季冬夜半感四真人降于靖室而授道要後衆真再降

令夫人託疾尸解聽輪命訪王屋清虛洞天奉天帝君命傳玉札金文位為紫虛元君領

上真司命主諸學道生死圖籍攝御三官關較罪考又加南嶽夫人比秩仙公治大霍山洞臺後成帝咸和四年聽輪下迎昇天杜甫

望嶽詩云南嶽配朱雀秩禮自百王歛吸領地靈鴻洞半炎方邦家用祀典在德匪馨香

巡行何寂寥有虞今則亡泊五隘世網行邁越瀟湘渴日絕壁出淥舟清光旁祝融五峯

尊峯峯次低昂紫蓋獨不朝爭長衆相望恭

聞魏夫人群仙夾翺翔有時五峯氣散風如飛霜牽迫限修途未暇杖崇岡歸來觀命駕沐浴休玉堂三嘆問府主曷以贊我皇柱壁忍衰俗神其思降祥夫人壇在南嶽中峯之前巨石之上是一片大石方可丈餘其形方穩下圓上平浮寄他石之上嘗試一人推之以能轉動人多則屹然而定相傳以為靈異往往神仙幽人遊息其上奇靈靈氣彌覆其頂丹臺錄云魏夫人為紫虛元君治南嶽真誥云上真司命南嶽真人

九華安妃

九華安妃古之得道女仙也晉哀帝興寧三年六月十五夜紫微王夫人降授真人楊羲道要與一神女俱來著雲錦襦上丹下青文彩光鮮視之年可十三四許左右又有兩侍女一侍女手中持一錦囊長一尺二寸以盛書有十餘卷以白玉檢囊口見刻檢上字云玉清神虎內真紫元丹章其一侍女捧一白箱以絳帶束絡之白箱似象牙形也一侍女年可十七八皆整飾非常神女及侍者顏容

瑩潔鮮徹如玉香氣馥亂如燒香嬰也姓香紫微夫人曰此是太虛上真元君金臺李夫人之少女也昔嘗詣龜山學上清道道成受太上書命為紫清上宮九華真妃者也於是賜姓為安名鬱嬪字靈蕭真妃至良久手中先握三枚棗色如乾棗而形長大內無核其味甘美異常真妃以一枚與楊羲食之畢真妃作文相贈又紫微王夫人亦作文相曉諸真人皆受書畢各去獨真妃少留命侍女發檢囊中出上清玉霞紫映內觀隱書上清還晨歸童日暉中元共二卷皆三元八會之書也付楊羲令寫之又云君若不耐風火之煙欲抱真形於幽林者且可尋劍解之道作告終之術也楊羲後果劍解隱化後遂飛昇

河北王母

女仙河北王母蓋有道者莫知其年紀惟見重白和一人和字仲理魏朝仙人也和每拜王母常坐而止之語諸人言阿和是吾鄰家兒吾少所長者晉武之末和別去云被崑崙

召遂去不知所之惠帝元康二年相識人見和在華陰山中乘虎從王母四五人顏色更少寄謝其親甚分明

韓西華

韓西華者不知何許人也慈愛於物常行陰功至於蛸翹微命皆愛而護之學道得仙今在嵩山洞天之中

王抱臺

女仙王抱臺不知何所人得道為主仙道君之侍女居元洲之宮洲之四面元濤浚天非人跡所到昔清虛王真人隨西城王君登此洲上詣仙都關下朝謁主仙道君君命抱臺披綠韞璅爰出隱書龍文八靈真經以授清虛真人

王妙想

女真王妙想幼年入道居蒼梧山黃庭觀辟穀服氣結宇臨選水之傍五十餘年貌如十八九歲人每持念黃庭精誠感通一日忽有靈香郁烈祥雲滿庭天樂震空光燭壇殿千乘萬騎浮空而下旌幢鶴蓋導九龍之輦下

降壇前見一仙官羽衣寶冠劍佩曳履陞殿而坐身有五色光妙想即往瞻謁仙官謂妙想曰吾乃往昔有虞氏之君帝舜也勞厭萬國養道此山每欲誘教後人使之知道而世無可教授者夫道在於內不在於外道在爾身不在他人玄經所謂修之於身其德乃真也頃者地司奏汝居山三十餘載初終如一守道不邪存念精誠遵稟科戒若無所成證此乃道之棄人也玄經云常善救物故無棄物道之布惠周普物物皆欲成之人人皆欲度之但世人福果單微道氣膚淺不能精專勤久道氣未應而已中急是人自棄道非道棄人也汝精誠一志期以百生千生望於所證不急不退深可慰也吾昔遇太上老君示以道德真經理國理身度人行教可以通天

自驅則裁制之義無所施兼愛之慈無所措昭灼之聖無所用譏誦之智無所行天下混然歸乎大順此玄聖之大旨也吾以曆數既往歸理茲山常以久視無為之道分命仙官下教於人蓋上聖高真應劫曆不常代運流轉陰陽倚伏生死推還俄爾之間又及陽九百六之會孜孜下教以救於人尤切於世人之求道也世人求道若存若亡繫念存心萬中無一天真憫俗常在人間隱景化形隨方開悟此山九峯皆有宮室真官主之其下有寶玉五金靈芝神草三天所鎮之藥太上所藏之經或在石室洞臺雲崖巖谷皆有靈司主掌無毒螫驚擾之物可以度世可以養生可以修道可以登真也汝居山以來未嘗游覽四表俯瞻岑巒固不得而知也勉而修之佇駕景策空然後倒景而研其本末也於是命侍宸以道德二經及駐景靈文授之而去自是一年或三五降於黃庭觀後數年妙想向日昇天所居觀改為營道觀茲山以舜修道之所故曰道州老君嘗以道德經授舜於

此可驗故河上公云吾著此書已二千七百歲也

王奉仙

女仙王奉仙宣州人也家貧父母耕織為業奉仙年十四於田中忽見青衣童少女十許人與之嬉戲良久散去他日往田所見之如舊月餘諸女夜集其家終夕言笑達旦方去或攜珍果穀饌而來非世所有其房甚狹來眾雖多不覺其隘父母疑而伺之終無所見又疑妖物所惑詰責甚切每託他辭以對自是諸女書日往來與之遠遊無所不周及暮乃返奉仙自此不飲不食漸覺其異一日近父母見在庭竹之杪墜身投地因問其故方乃言所遇皆是仙女每周遊天上自此竹竿上昇往來諸女又剪奉仙之髮前齊眉目後垂到肩積年不復長而肌膚豐潔若冰玉明眸異貌天人之相也又智辯明悟人所不及言論之理契合要妙嘗與高遠之人言曰某所遇者道也所得者仙也所見之女皆女仙也每到天宮見上仙所居仙人多被服文繡雲冠霜簡執仙花靈草詠吟洞章或登雲門

芝田瑤宮瓊闕話長生度世之事行於星漢之上不知其幾千萬里也初到天上曰大有官天尊處廣殿之中萬真侍衛天人無數也奉仙謁見天尊命左右以玉漿一杯賜之謂奉仙曰汝有仙骨法當上仙由世運未滿五

十年方復還此百穀之實食之傷人真氣草木之果食之損人年壽汝宜辟穀養真自此不食二十年矣夫天尊化於天上主宰萬物若世人之父也世尊化於世上勸人以善若世人之母也儒興行於世間若世人之兄長也舉世人如嬰兒焉但識其母不知其父兄之尊故知道者少重儒者寡不足怪也奉仙所見天上事與今道無異了無菩薩佛僧之像也奉仙所圖畫功德多作天人帝王道君朝服之儀題云朝天圖遊於淮浙間所至之處觀者雲集奉仙唯以忠孝正直之道清淨儉約之言修身密行之要以教於士女故遠近欽仰金玉寶貨填委其前所施萬計皆委而不受奉仙與二女弟居洞庭山後居錢塘頃山二女弟子奉香火建殿宇華盛力未嘗

闕一旦而終年十八果符五十年之說也其平日宴坐居室則觀千里之事疑思遊神則朝九天之上將終雲鶴屢降異香盈室化後尸形柔澤肌膚如生識者以為尸解

王氏

女仙王氏王丞相王微之姪女也時值翰林王氏之父隨計入關王氏與所生劉及其母裴氏寓居義興山桂岩之下與洞靈觀為鄰王氏幼年慕道不飲酒不茹葷立志端莊常樂在幽靜或撫琴怡悅或詞翰自娛持大洞真經及度人道德章句居室之間時有異香氣與眾香氣不同父母欽而異之嘗密謂母曰洞官有召命當補仙官辭不獲免恐遠行耳母未解其意忽一旦微疾裴與劉皆所鍾愛為於洞靈觀禱祈是日稍愈亦同詣觀中偏謁真像處庭焚香若有所祝及晚歸所居其門右有巨石乃於石上題詩曰翫水登山無足時諸仙頻下聽琴詩此心不戀居塵業唯見天邊雙鶴飛是夕奄然而終及明有雙鶴棲於庭木音聲盈空異香滿野遠近驚異

奔共觀之舉形就本室衣而已自是一家潔志香火及長幼皆修道化

歷世真仙體道通鑑後集卷之三

三八

十三

歷世真仙體道通鑑後集卷之四

明允

浮雲山聖壽萬年宮道士趙道一編修

紫素元君

有任生者隱居嵩山一夕美女至留詩曰我居籍上清謫居遊五嶽以君無俗累來勸神仙學生拒不納後三日至曰僕非精魅名列上仙真數與君合為配偶又贈詩曰葛洪亦有婦王母亦有夫神仙盡靈匹君子意何如生竟不對女又曰阮郎迷不悟何以伸情素明月海上春綵弁却歸去後數月生病卒為吏所追道遇旌幢擁翠輦中有一女子笑曰是高山讀書薄命漢取吏所持文字視曰今既相遇不能無情索筆判云更與三年生再拜吏曰此乃紫素元君仙官之最貴者吏送回生乃活三年卒

此乃真仙下試於人也任生能不失正是以延壽三載

趙素臺

趙素臺者漢幽州刺史趙熙之女也熙少有善行常濟窮困救王惠等族誅有陰德數十事熙得身詣朱陵兒子得道形遊洞天素臺

在易遷宮中已四百年不肯徙自謂天下無復樂於此處也數微服遊行盼山澤以自服易遷夫人者乃其品也

黃景華

黃景華者漢司空黃瓊之女也景華少好仙道常密修至要後師韓終授其岷山丹方服之得入易遷宮位為協晨夫人領九宮諸神女亦總教授之

周爰支

周爰支漢河南尹周暢伯持之女也暢汝南安城人好行陰德功在不覺曾作河南尹遭大旱收葬洛陽城傍客死骸骨萬餘人為立義冢祭祀之應時大雨豐收所行多是此輩太上處以暢有陰行令爰支從南宮受化得仙今在洞中為明晨侍郎爰支亦少好道服茯苓三十年後遇石長生教之以化遁化遁上尸解也

暢即周嘉從弟也性仁慈和為某時大雨至先裸熱出真語

張桃枝

張桃枝者漢司隸校尉朱寓季陵母也沛人寓往與陳蕃俱誅寓母以陰德久聞在易遷始得為明晨侍郎耳

傅禮和

傅禮和者漢桓帝外甥侍中傅建之女也北地人舉家奉佛禮和常日日灑掃佛前勤勤祝誓心願仙化常服五星精身生光華得道仙去善為空同之歌歌則禽鳥相舞而集飛聚其前以聽之此乃至誠所感而獲道也久處易遷宮後主掌含真臺洞天

張微子

張微子者漢昭帝時將作大匠張慶之女不知何郡人也微子少好道因得尸解去先在易遷宮中後職掌華陽含真臺洞天微子自言師東海華玉妃淳文期受服霧氣之道云霧是山澤水火之華精金石之盈氣久服之則能散形入空與雲氣合體微子修之得其仙道也真誥云文期青童之妹也微子曾

精思於寢靜誠心感靈故文期降之

竇瓊英

竇瓊英者竇武之妹也其七代祖名峙常以葬枯骨爲事以活死爲心故祚及瓊英今得女仙在易遷宮

韓太華

韓太華者韓安國之妹也漢二師將軍李廣利之婦也得道在易遷宮中利宿世有功德今亦在南宮受化

劉春龍

劉春龍漢宗正劉奉仙之女以其先世有陰德故皆得道化煉景入華陽易遷宮中劉春龍竇瓊英韓太華李奚子郭叔香並天姿麗儀冠駭衆才識偉鑠皆得爲明晨侍郎以居洞中侍郎之任以良才舉之不限男女也

郭叔香

郭叔香者王修母得道在易遷宮中真誥注云王修字叔治北海人爲魏武郎中今年七歲喪母母以杜日亡不知郭誰女也

孫寒華

孫寒華者吳人孫奚之女也師杜契受玄白之要顏容日少周旋吳越諸山十餘年乃得仙道而去一云即吳大帝孫女也於茅山修道道成冲虛而去因號其山爲華姥山山在茅山崇禧觀前是也

王進賢

王進賢者晉武帝尚書令王衍女爲慈懷太子妃洛陽亂劉曜石勒掠晉賢渡孟津河於河中欲妻之進賢罵曰我皇太子婦司徒公之女而胡羗小子敢欲干我手言畢即投河

中其侍婢名六出復言曰大既有之小亦宜然復投河中時遇嵩高女真韓西華出遊而愍之撫接二人遂獲內救外示死形體實密濟便將入嵩高山今在華陽宮洞內易遷之中六出時年二十三歲體貌亦整善有心節本姓田漁陽人魏故浚儀令田諷之孫諷曾有陰德之行以及於六出耳

李奚子

李奚子者晉東平太守李忠祖母也不知姓氏忠祖父貞節立國性多慈憫以陰德爲事

奚子每專一志務於救人大雪寒凍每積稻布穀於園庭恐禽鳥餓死其用心如此今得道而居華陽洞中

樊夫人

樊夫人者晉天師劉綱之妻也嘗與夫較術俱坐堂上綱作火燒確屋從東起夫人禁之火即滅庭中兩株桃夫妻各呪一抅使相聞擊良久綱所呪者不勝數走出離外綱唾盤中即成鯉魚夫人唾盤中成鰕食魚綱與夫人入四明山路阻虎綱禁虎伏不敢動適欲往虎即喊之夫人徑前虎即面向地不敢仰視夫人以繩繫虎牽歸係于牀脚下夫妻將昇天綱仕上虞令縣廳先有大皂莢樹綱昇樹數丈方能飛舉夫人平坐舟舟如雲氣之昇同昇天而去唐德宗貞元中有湘姬者嘗以丹篆救疾一日告鄉人曰吾往洞庭救數百人性命至洞庭前一日有大風濤一巨舟若山所載百餘人居島上有一白鼉遊沙上殺食之明日城如雪圍島其城漸窄陸東人爲議其中不廣數丈岳陽人亦遙望雪城莫

能曉也。媼至岸飛劍刺之。白城一聲如霹靂。遂崩。乃一白龍長十餘丈。蜿蜒而薨。後有道士議湘媼是劉綱之妻樊夫人也。

東陵聖母

東陵聖母者廣陵人也。適杜氏。師事劉綱。學

道。能易形變化。隱見無方。行中部事。道成。能坐在立亡。杜公不信。道常恚聖母。聖母盛行治病救人。或有所詣。杜怒之愈甚。詆言聖母奸妖。告官使收聖母付獄。頃之即從牕中飛去。眾人皆望見之。轉高入雲中。遺所常著履一。納在牕下。於是遠近立廟祠之。民所奉事。積之甚有神效。常有一青鳥在祭所。有人失物者。乞問所在。青鳥便飛集盜物人頭上。故路無拾遺。後歲月稍久。亦不復爾。至今海陵縣中不得為奸盜之事。大者即風波沒溺。狼虎食之。小者即復病也。

雲英

裴航備舟於襄漢。同舟樊夫人。國色也。航賂婢晨煙。連詩曰。同舟胡越猶懷思。況遇天仙隔錦屏。倘若玉京朝會去。願隨鸞鶴入青冥。

夫人曰。妾有夫在漢南。幸毋以諧謔為意。但與郎君小有因緣。他日必為姻壻也。答詩曰。

一飲雲漿百感生。玄霜搗盡見雲英。藍橋便是神仙宅。何必崎嶇上玉京。航後經藍橋驛。渴甚。茅店老嫗緝麻。航揖之求漿。嫗曰。雲英

擊一甕漿來。航接飲之。真玉液也。航謂嫗曰。小娘子。艷麗驚人。願娶如何。嫗曰。老病有此女。孫神仙遺一刀圭。得玉杵曰。搗一百日。方就欲娶此女。但得玉杵曰。者許妻之。金帛吾無所用。航快快而去。月餘果獲杵。白翠抵藍

橋。嫗襟帶間解藥。搗航即搗之。嫗夜收藥。納室航窺之。有玉兔持杵。雪光耀室。百日足。嫗吞藥曰。吾入洞為裴郎具帷帳。俄見大第仙童侍女。引航入諸親多神仙中人。有一女子云。是妻姊。曰不記鄂渚同舟。抵襄漢乎。左右云。是雲翹夫人。劉綱天師之妻。為玉皇女史。航將妻入玉峯洞中。餌絳雪瓊英之丹。超為上仙。

鮑姑

鮑姑南海太守鮑靚之女。晉散騎常侍葛洪

之妻也。靚字太玄。陳留人也。少有密鑒洞於幽無。沈心冥思。人莫知之。靚及妹並先世累積陰德。福逮於靚。故皆得道。姑及小妹並登仙品。靚學通經緯。後師左元放。受中部法。及三皇五嶽劾召之要行之神驗。能使鬼神

封山制魔。東晉元帝大興元年戊寅。靚於蔣山遇真人陰長生。授刀解之術。累徵至黃門侍郎。求出為南海太守。以姑適焉。稚川稚川自散騎常侍為煉丹砂。求為勾漏縣令。太玄在南海小女及并無病。暴卒。太玄時對賓客略無悲悼。葬於羅浮山。容色若生。人皆謂為尸解。靚還丹陽卒。葬於石子岡。後遇蘇峻亂。發棺無尸。但有大刀而已。賊欲取刀。聞冢左右有兵馬之聲。顧之驚駭。中間有刀。冢然有聲。若雷震之音。眾賊奔走。賊平之後。收刀別復葬之。靚與妹亦得尸解之道。姑與稚川相次登仙。後有崔煒者。居南海時。中元日。番禺人多陳設珍異於神廟。煒往窺之。見一老嫗足蹶覆人酒甕。被當鑪者歐擊。煒趨解曰。酒值幾錢。當鑪者曰。值一貫。煒即脫衣為之代。

債老嫗不謝而去異日復遇諸途乃曰昨蒙爲吾解難不敢忘也吾善醫贅瘤今有越井岡艾少許聊爲君謝若遇贅瘤即可以治之不過一灼無不愈者後遇一僧人贅垂於耳一灼立愈僧因引至一大富室其人有贅一灼亦愈由是名顯延者甚衆一旦遂成富翁煒不敢忘日夕在念一日復遇一人告曰老嫗者乃鮑靚之女葛洪真人之妻也行此灸於南海者積有年矣

丁淑英

丁淑英者不知何許人也有救窮之陰德度趙阜之危難上感皇人授以黃庭秘要之訣而昇仙今爲朱陵仙嬪數遊三清司命亦令德政也

黃仙姑

黃仙姑者東晉神仙黃仁覽之妹也前是神仙吳猛葬母於臨江軍之新淦縣石壁峭立有仙墓仙井仙壇在焉壇墓至今無恙地因名大墓嶺一名吳嶺時仁覽兄妹皆在會葬仙姑雅愛其地山水依吳母墓修行煉丹後

白日飛昇留下煉丹石一片石受丹火歲久不冷每提餅水其上不大自湯名爲沸石宋哲宗旌異賜建仙姑觀後改爲黃仙靈應觀有沸石泉井至今存焉四方水旱疾疫祈禱輒應之

廣陵茶姥

廣陵茶姥者不知姓氏在鄉里間常如七十歲人而輕健有力耳聰目明頭髮俱黑晉元帝南渡之後耆舊相傳見之百餘年顏狀不改再持一器茗往市鬻之市人爭買自旦至暮所賣極多而器中茶常如新熟而未嘗減少人多異之州吏以冒法繫之於獄姥乃持所賣茗器自牖中飛去矣

羅女

愕練華仙自云南山人是一女子年可二十著青衣晉穆帝昇平三年降羊權家一月中輒六過來贈權詩一篇末句云所期豈朝華歲暮於吾子并致火浣布手巾金玉條脫各一云君慎勿輕泄言訪問此人云是九嶷山中得道女羅郁也與權尸解藥今在湘東山

此女已九百歲矣

梁母

梁母盱眙人也孀居無子舍逐旅于平原亭客來投憩咸若還家不異住客還錢多少未嘗有言客住經月亦無所厭摘衣隔食之外所得施諸貧病曾有一少年住經月舉動異於常人臨去云我是東海小童母亦不知小童何人也宋蒼梧王元徽四年丙辰馬耳山道士徐道盛至蒙陰於蜂城西遇一青羊車車自住見一小童喚云徐道士前來道盛行進去車三步許上又見二童年十二三許齊著黃衣絳裹頭上角髻容止端正世無比也車中人遣一童子傳語云我是平原客舍梁母也今被太上召還應過蓬萊尋子喬經泰山檢考召意欲相見果得子來靈轡飄飄玄綱嶮巖津驛有限日程三千待對在近我心憂勞便當乘煙三清此三子見送玄都國汝爲我謝東方清信士女太平在近十有餘一好相開度過此無憂危也舉手謝云太平相見馳車騰遊極目而沒道盛還逆旅訪之

正是梁母度世日相見也

徐仙姑

徐仙姑者隋朝僕射徐之才女也不知師奉何人已數百歲狀貌常如二十四五歲善禁呪之術獨遊海內三江五嶽天台四明羅浮括蒼名山勝境多所覽翫多宿巖麓林窟之中間寓止寺院一日忽有強數輩巧言挑侮姑輒叱之輩憤怒欲以刃制之詞色愈激姑笑曰我女子也而能棄家雲水不避蛟龍虎狼豈懼汝鼠輩乎即解衣而卧遽徹其燭輩喜以爲得志明日姑理策出山諸一夕皆殭立尸坐若被拘縛口禁不能言姑去數里乃如故姑來往江表吳人見之四十餘年顏色如舊其行若飛所至之處畏而敬之若神焉無敢以非正之意戲侮者唐懿宗咸通初因謂贍縣白鶴觀道士黃雲陶曰我先君仕歷周隋以方術聞名陰功及物今亦得道故我爲福所及亦延年長生爾以此詳之即實之才之女也

花姑

花姑者女道士黃靈微也年八十而有少女貌如嬰孺道行高潔世人號爲花姑踈履徐行奔馬莫及不知何許人也自唐初來往江浙湖嶺間名山靈洞無所不造經涉之處或宿於林野即有神靈衛之人或有不正之念欲凌侮者立致顛沛遠近畏而敬之奉事之若神明焉聞南嶽魏夫人平昔渡江脩道有壇靖在臨川郡臨汝水西石井山有仙壇遂訪求之歲月且久榛蕪淪翳時人莫得知之以唐則天長壽二年壬辰冬十月詣洪州西山謁道士胡惠超而問焉超字拔俗能通神明即爲指南郭六里許有烏龜原古有石龜每犯田苗被人擊其首折則其處也姑訪之見龜之左右壇迹宛然立處當壇中矣於其下得尊像油甕銚刀燈盞之類因葺而興之復夢夫人指九曲池於壇南訪而獲之塼砌尚在景雲中睿宗使道士葉善信將繡像幡花來修法事仍於壇西建洞靈觀度女道士七人住持洎玄宗繼祭祈禱不絕每有風雨或聞蕭管之聲凡是禮謁必須嚴潔不爾有

蛇虎驚乳之異時有雲物如鳥羣飛垂帶直下壇上倏忽西出如向井山前後非一而已花姑盼響靈通密有所告曰井山古迹汝須崇修俄聞異香從西來姑累得嘉兆躬身葺構行宿洞口聞聲馨之音雖荒梗多時若有人接導明九寓宿林莽怡然甚安達明入山果遇壇殿餘址遂立屋宇聞步虛仙梵之音環壇數里有樵採不精潔者必有怪異之驚有野象中箭來投花姑姑爲除之其後每齋前啣蓮藕以獻姑玄宗開元九年辛酉歲姑欲昇化謂其弟子曰吾仙程所促不可久住吾身化之後勿釘棺只以絳紗裹覆棺上而已明日無疾而終肌膚香潔形氣溫暖異香滿於庭堂之內弟子依所命棺不釘以絳紗覆之忽聞雷震聲紗上有孔大如雞子棺中惟有衾覆木簡屋上穿處可通人座中莫不數日生夢結實如挑者二馬每至忌日即風雲霧動直入室內玄宗聞而駭之使覆其事明日使道士蔡偉編入後仙傳開元二十八年庚辰三月乙酉勅道士齋龍壁來瞻忽有白鹿

自壇東出至姑冢間而滅即花姑葬木簡之處又有五色仙娥集于壇上刺史張景佚以爲聖德所感立碑頌述天寶八載己丑魏夫人上昇之所度女道士二人常修香火代宗大曆三年戊申魯郡開國公顏真卿爲撫州刺史見舊迹荒廢關人住持召仙靈觀道士黃道進二十七人住洞靈觀又以高行女道士黎瓊仙七人居仙壇院顏公述仙壇碑而自書之以紀其事述焉

焦靜真

唐女真焦靜真因精思間有人導至方丈山遇二仙女謂曰子欲爲真官可謁東華青童道君受三皇法請名氏則司馬承禎也歸而詣承禎求度未幾昇天嘗降謂薛季昌曰先生得道高於陶都水之任當爲東華上清真人

王法進

王法進劍州臨津縣人也孩孺之時自然好道家近古觀雖無道士居之其嬉戲未嘗輕侮其尊像見必歛手致敬焉至十餘歲有女

冠自劍州歷外邑過其家父母以其慕道託女冠以保護之與受正一延生錄因名曰法進而專勤香火護持齋戒亦茹柏絕粒時有感降是歲三川饑饉斛斗翔貴死者十有五六十多採山芋野葛充飢忽有二青童降于其庭宣上帝之命曰以汝宿稟仙骨歸心精誠不忘於道今以青童召汝受事於玉京也法進即隨青童騰身凌虛徑達天帝之所帝命以玉杯霞漿賜之飲訖帝謂之曰人稟三才之大體天地之和氣得爲人形復生中土其不易也而天運四時之氣地稟五行之秀生五穀百果以養人而人不體天地養育之恩輕棄五穀厭拾絲麻使耕農之夫紡織之婦身勤而不得飽力竭而不免寒徒施其勞曾不受惜斯固神明所責天地不祐也近者地司獄瀆各有奏言人厭賤五穀不貴衣食之本已勅太華之府收五穀之神令所種不成下民饑餓因示責罰以懲其心世愚悠悠曾未覺悟旋奉太上所勅以大道好生不可因彼惡民以害衆善雖天地神明罪之愚民亦

不知過之所因起無懺請首原之路虛受其苦爾汝當爲無上侍童入侍天府今且令汝下世告諭下民使其悔罪實愛衆賢敬農事惜五穀百果知大道之養人厚地之育物宗奉正道崇事神明至於水火之用不可厭棄衣食之養儉已約身皆能行此明戒天地愛之神明護之風雨順調家國安泰此乃增益汝之陰功也即命侍女披琅笈珠韞出靈寶清齋醮謝天地法一卷付之俾傳行於世曰世人可相率於清靜之處置齋悔謝一年之內春秋再爲春則祈於年豐秋則謝於道力如此則宿業可除穀父蠶母之神爲致豐稔也龍虎之年復當召汝矣命青童送還其家已三箇月也所受之書即今靈寶清齋告謝天地之法是也其法簡易與靈寶自然齋大都相類但人間行之立成徵效苟或几席器物小有輕慢濁汙者營奉之人有不公心者即飄風驟雨壞其壇庭迅霆疾雷毀其器用自是三川梁漢之人歲皆崇事雖愚朴之士狂暴之夫罔不戰慄兢戒肅恭擎跽知奉

其法焉又螟蝗旱潦害稼傷農之處有率衆誠勉於修奉炷香告天旦夕響應必臻其佑與不虔不信之徒立可較其徵驗矣里南謂之清齋蜀土謂之天功齋蓋一揆也法進以唐玄宗天寶十一載壬辰歲雲鶴迎之而昇天此乃亦符龍虎之運神人之言矣

費妙行

費妙行唐孫天師智涼之妻也玄宗天寶七年天師奏乞置觀度女道士七人立堂祠之五代亂觀遂廢宋初復興始命男道士居焉。遂立天師像并妙行並祠于觀今額真福屬隆興府奉新縣

緱仙姑

緱仙姑長沙人也入道居衡山年八十餘容色甚少於南嶽魏夫人仙壇精修香火十餘年孑然無侶壇側多虎狼常人遊者須結侶執兵器方敢入仙姑深隱其間曾無所畏數年後有一青鳥形如鳩鵲紅頂長尾飛來所居自語曰我南嶽夫人使也以姑修道精苦獨棲窮林命我爲伴爾他日又言西王母姓

緱乃姑之聖祖也聞姑修道勤至將有真官降而授道但時未至爾宜勉於修勵也每有人遊山必青鳥預說其姓字及其日一一皆驗又曰河南緱山王母修道之處故鄉之山也又一日青鳥飛來曰今夕當有暴客至勿以爲怖也其夕果有十餘人來魏夫人仙壇乃是一片巨石方可丈餘其下宛然浮寄他石之上或一人以手推之則搖動人多則屹然而住是夜群人持火杖刀將害仙姑入其室姑在牀上而不見既出門即推壞仙壇事轉然有聲山震谷裂謂已顛墜矣而終不能動相率奔去及明有至遠村者分散九爲虎所噬殺一推壇之時不同其惡免爲虎害夫人仙壇儼然無損如亦無恙歲餘青鳥語姑遷居因徙居湖南鳥亦隨之而他人未嘗會其語唐相國文昭鄭公畋自承旨學士在遷梧州牧師事於姑姑謂文昭公曰此後四海多難人間不可久居吾將卜隱九嶷矣一日遂去

王女

王保義爲荆南高從誨行軍司馬生女不食葷血五歲能誦黃庭及長夢渡水登山見金銀宮闕云是方丈山女仙數十人中一人曰麻姑相結姊妹授以琵琶數曲自是數夜一遇歲餘得百餘曲其尤者有獨指商以一指彈一曲後夢麻姑曰即當相邀明日庭中有雲鶴音樂女奄然而化去

歷世真仙體道通鑑後集卷之四

歷世真仙體道通鑑後集卷之五

浮雲山聖壽萬年宮道士趙道一編修

明星玉女

明星玉女者居華山服玉漿白日昇天山頂
有石龜其廣數畝高三仞其側有梯磴達背
見玉女祠前有五石曰號曰玉女洗頭盆其
中水色碧綠澄徹雨不加溢旱不減耗祠內
有玉石馬一疋焉

江妃

江妃二女者不知何所人也出遊於江漢之
湄逢鄭交甫見而悅之不知其神人也謂其
僕曰我欲下請其佩僕曰此間之人皆習於
辭不得恐懼悔焉交甫不聽遂下與之語曰
二女勞矣二女曰客子有勞妾何勞之有交
甫曰橘是柚也我盛之以筥令附漢水將流
而下我遵其傍採其芝而茹之以知吾爲不
遜也願請子之佩二女曰橘是柚也我盛之
以筥令附漢水將流而下我遵其傍采其芝
而茹之遂手解珮與交甫交甫受而懷之趨
去數十步視珮空懷無有顧二女忽不見詩

曰漢有游女不可求思此之謂也仙出列傳

太玄女

太玄女姓顯名和少喪父或相其母女皆不
壽惻然以爲憂常曰人之處世一失不可復
得一死不可復生壽限之促非修道不可延
其生也遂訪明師洗心求道得玉子之術行
之累年遂能入水不濡盛寒雪之時單衣水
上而顏色不變身體溫暖可至積日又能從
官府宮殿城市屋舍於他處視之無異指之
則失其所在門戶櫝櫃有關鎖者指之即開
指山山摧指木木折更指之即復故將弟子
行所到山間日暮以杖扣石即開門戶入其
中屋宇牀几幃帳廚廩供給酒食如常雖行
萬里所在常爾能令小物忽大大物忽小或
吐火漲天一壺即滅又能坐炎火之中衣服
不然須臾之間或化老翁或爲小兒或化車
馬乘騎出入三十六術甚著起死回生救人
無數不知其何所服食亦無得其術者顏色
益少鬢髮如鴉後白日昇天而去

西河少女

西河少女者神仙伯山甫外甥也山甫雍州人入華山學道精思服餌時還鄉里省親如此二百餘年容貌益少入人家舍知其家先世以來善惡功過有如目擊又知未來吉凶言無不效見其外甥女年老多病將藥與之女服藥時年已七十稍稍還少色如桃花漢遣使者經西河於城東見女子答一老翁頭髮皓白跪而受杖使者怪而問之女子答曰此是妾兒也昔妾舅氏伯山甫得神仙之道隱居華山慙妾多病以神藥授妾漸復少容今此兒不肯服藥致此衰老行不及妾妾患之故與杖爾使者問女及兒年各幾許女子答曰妾年百一十歲兒年七十爾此女尋入

園客妻

園客妻神女也園客者濟陰縣人也美姿貌
邑人多欲以女妻之客終不妻常採五色香
草積數十年服食其實一旦有五色蛾集香
草上客收而薦之以布生桑蠶焉至蠶時有
一女夜至自稱客妻道蠶狀助客養蠶亦以

香草飼之客與俱收蠶得一百二十頭爾皆如甕大繅一繭六十日始盡訖則俱去莫知所在故濟陰人祠桑蠶設祠室焉或云陳留濟陽氏

程偉妻

漢期門郎程偉妻得道者也能神通變化偉不甚異之偉當從駕出行而服飾未備甚以為憂妻曰止闕衣耳何愁之甚邪即為致兩匹縑忽然而至偉好黃白術連時不成妻乃出其囊中藥少許以器盛水銀投藥而煎之須臾成銀偉欲從求方終不可得云偉骨未應得之逼不得已妻遂魔然而化尸解而去

張姜子

張姜子西川人張濟妹也得道今在易遷館東廟中出真誥注云濟後漢末西涼州人為董卓將後改漢城被射死即張繡化

叔也其妹不願外書亦不知出適未

李惠姑

李惠姑齊人夏侯玄婦也得道今在易遷館東廟中出真誥注云玄魏末人與李豐俱為李豐乃是馮翊人非齊人不知此是李誰之女

施淑女

施淑女山陽人施績女也得道在易遷館東廟中施績吳興人孫皓時為驃騎將軍守西陵今云山陽恐女或出適取夫家郡不

鄭天生

鄭天生鄧芝母也得道在易遷館東廟中字伯苗南陽新野人在蜀為劉禪車騎將軍後行見蟻抱子行引弓射殺因感念而亡毋誰之女

文女真

廬山青霞觀後有石名黃龍云文女真跨黃龍昇天因得名焉又有文女真昇仙臺其世代名字事迹並不詳或云名惠通晉人

裴元靜

裴氏道名元靜緱氏縣令裴昇之女鄆縣尉李言之妻也幼而聰惠母以詩書示之覽誦不忘及笄不以華艷自飾迥然好道請於父母置一靜室披戴父母亦崇道深念許之日以香水瞻禮道像以女使伴之弗納也其獨居若別有女伴言語者父母窺之不見人詰之堅不言潔思閑澹雖骨肉常拘之以禮曾

無慢容及年二十父欲歸於李言聞之深以為不可唯願入道修真以求度世父母抑之曰女生有歸是為禮婦時不可失禮不可虧倘入道是畢世無所歸也南嶽魏夫人亦嘗從夫後為上仙遂逼之以事李言及奉箕箒婦禮臻備未一月間告於李言曰某素修道神人不許為君妻請絕俗李言早慕道聞妻之言甚異乃獨居靜室焚修夜中聞言笑聲李言稍疑之未敢驚乃壁隙窺之見光明滿室芬郁異香有二女子可十七八鳳髻霓裳恣態宛麗侍女數人皆雲鬟綠服綽約在側元靜與二女言笑李言異之而退及旦問於元靜曰有之此崑崙仙女相省更來慎勿窺也恐君為靈官所責且元靜與君宿緣薄會人間爾仙人亦念君未有後俟真仙再降當為祈請後一夕有天女降李言之宅經年復降送一兒與李言曰此君之子也元靜即當去矣後三日有雲盤旋仙女奏樂白鳳戴元靜冲天向西而去

戚道遙

戚氏道名道遙冀川南宮人也父教授生徒以自資而道遙十餘歲情願靜澹不爲兒戲有好道心父母亦知之常行陰德於人而父以女誠授於道遙道遙覽之曰此常人之事爾遂教老子山經誦之不輟及笄媒氏詣其家聞之以爲不祥迨二十歲父母以適同邑蒯潯耕織之家而舅姑嚴酷責之以蠶農怠惰而道遙晨暮以齋潔爲事殊不以家產經意蒯潯亦屢責之道遙白舅姑請退返父母亦逼回於是不能爲塵俗事願獨居靜室修道以資舅姑蒯潯與父母俱有他疑乃棄之於一室而道遙但以香水爲資絕食靜想自歌曰笑看滄海欲成塵王母花前別衆真千載却歸天上去一心珍重世間人蒯潯一家及鄰里悉以爲妖狂夜間室內有人言語聲及曉見其獨坐亦不驚之又三日晨起舉家聞屋裂如雷但見所服衣履在室內仰視半天有雲霞煙靄煥赫鸞鶴飛鳴復有仙樂香輶綵仗羅列道遙與衆仙俱在雲中歷歷聞分別言語蒯潯馳報道遙父母既至猶見

之也邑郭之人咸奔觀望無不驚嘆

何仙姑

何仙姑廣州增城縣何泰之女也唐天后時住雲母溪年十四五一夕夢神人教食雲母粉可得輕身不死因餌之誓不嫁常往來山頂其行如飛每朝去暮則持山菓歸遺其母後遂辟穀語言異常天后遣使召赴闕中路失之廣州會仙觀記云何仙姑居此食雲母唐中宗景龍中白日昇仙至玄宗天寶九載都虛觀會鄉人齋有五色雲起於麻姑壇衆皆見之有仙子縹緲而出道士蔡天一識其爲何仙姑也代宗大曆中又現身於小石樓廣州刺史高彥具上其事於朝

謝自然

謝自然蜀華陽女真也賦性穎異幼而入道其師以黃老仙經示之一覽皆如舊讀尋覽誦之不忘及長神氣清爽言談迥高好琴書善筆札能屬文常鄙卓之君之爲人每焚修瞻禱王母麻姑慕南嶽魏夫人之節操及年四十出遊遊往青城大面峨眉三十六靖廬

二十四治尋離蜀歷京洛抵江淮凡有名山洞府靈迹之所無不辛勤歷覽後聞天台道士司馬承禎居玉霄峯有道孤高遂詣焉師事承禎正三年別居山野終日採樵爲承禎執爨而歸又持香菓專切問道承禎訝其堅苦曰我無道德何以勝此然子何所欲自然曰萬里之外嚮師得度世之道故來求受上法以度爾非他求也承禎以女真罕傳上法恐泄慢大道但唯諾而已復經逾歲月自然乃嘆曰明師未錄母乃命邪以每登玉霄峯即見滄海蓬萊亦應非遠人間恐無可師者於是告別承禎言去蓬萊聲捨資裝布衣絕粒挈一席投于海泛之於波上適新羅船見執載及登船數日但見海水碧色日落則迷浪相蹙陰火連天船在火焰中行逾年船爲風飄入一色水如墨又一色水如粉又一色水如珠又一色水如硫黃氣忽風轉船乃投一澳中有山日照如金色亦有草木香霧走獸與禽皆黃色船人俱上山見無大小悉是硫黃實客遽棄別貨盡載其石凡經四色水

每遇一水皆三五日晝夜風帆所適莫知遠近復行月餘又橫風所飄海師惶戚舟人恐懼遙見水上湧出大山上列紅旗千餘面海師言是鯨魚揚鬣又晴天忽見氣直上高百餘丈傍若暴風雨此魚腦中噓吸氣如此復見海人怪獸鬼神千態萬狀自然乃焚香想蓮萊禱祝須臾俄到一山見林木花鳥煙嵐若春海師登山望有屋舍人家甚衆自然謂曰豈非仙山乎海師言船中人可登山歇泊以俟風便俄而人皆登山散遊而自然獨遊一處有道士數人侍者皆青衣有木風動如金石聲花草香薰人徹骨綠鸞霜鶴碧雞五色犬遊於庭除中有一人花冠霞帔狀貌端美青衣引見自然曰蓬萊尋師求度世法道士笑曰蓬萊隔弱水此去三十萬里非舟楫可行非飛仙莫及天台山司馬承禎名在丹臺身居赤城真良師也可以回去俄頃風起聞海師促人登船言風已便及揚帆又爲橫風飄三日却到台州岸自然欣然復往天台具言其實以告承禎并謝前過承禎曰俟擇

日陞壇以度於是爲傳授上清法後却歸蜀於果州南充縣金泉山修道功成唐德宗貞元十年甲戌十月十六日老君命召之白日飛昇節度使韋皋奏聞于朝一云自然臨昇天時書于堂之東壁云寄語諸眷屬莫生悲苦可勤修功德修立福田清齋念道百劫之後冀有善緣早會清源之鄉即得相見其書迹存焉上昇後三日再自天降謂刺史李堅曰天上有玉堂最高老君居焉白玉爲壁上皆金題神仙之名時有朱書注其下云降世爲帝王或爲宰輔凡神仙謁見老君皆四拜焉予恐世人不信有神仙之事故暫來語君語訖遂即昇天堅以表聞有詔褒美白紫清云謝自然今爲東極真人

王氏

王氏者中書舍人謝良弼之妻也東晉右將軍王逸少之後會稽人也良弼進士擢第爲浙東從事而婚焉歲餘良弼應詔入長安歷尚書郎中書舍人王氏幼而好道常誦黃庭經時方卧疾竟不果行疾且彌甚時天師吳

筠遊四明天台蘭亭禹穴駐策山陰王氏之族詣入師求救治遂得禁永吞符信宿即愈王氏感道力救護乃詣天師受籙精修焚香寂念獨處靜室志希昇飛因絕粒嚙氣神和體輕時有奇香異雲臨映居第髣髴真降密接靈仙而人不知也一日忽謂其侍女曰吾昔之所疾將近十年賴天師救之而續已盡之命悟道既晚修奉未精宿考往過懺之未盡吾平生以俗態之疾頗懷妬忌今猶心閉藏黑未通於道當須陰景煉形洗心易藏二十年後方得蟬蛻爾吾死勿用棺器可作朽木帳致尸於野中時委人檢校也是夕而卒家人如其言殯之凡事儉約置之園林間偃然如寐亦無變改二十有盜發殯棄形於地隆冬之月帳側忽聞雷震之聲舉家驚異馳行看之及舉其尸則身輕如空殼肌膚爪髮無不具備右脅有圻痕長尺餘即再收瘞焉南嶽夫人嘗言得道者上品白日昇天形骨俱飛上補真官次者蛻如蛇蟬亦形骨騰舉肉質登天皆爲仙人而居靈山矣良弼亦

執弟子之禮躬侍天師仍與天師立傳詳載其事

蔡尋真

蔡尋真侍郎蔡某之女也李騰空宰相李林甫之女也二人少有異越生長富貴無嗜好每欲出家學道父母不能奪其志唐德宗貞元中相友入廬山尋真居詠真洞天屏風疊南五老峯東騰空居屏風疊北凌雲峯下大溪噴激白雲蒼崖物象勝處咸有道德能以丹藥符籙救人疾苦遠近賴之每於三元八節會于詠真洞以相師資講道為事九江守許渾嘗聞於朝德宗加敬焉及其蛻解門人收替簡瘞于舊居鄉俗歲月祀之後渾入朝會昭德皇后崩因言二女真其故居可賜觀名以仲追奉乃詔以詠真洞為尋真觀騰空所居為昭德觀李白詩送李云羨君相門女愛道愛神仙素手掬秋露羅衣曳紫煙一往屏風疊乘鸞著玉鞭

麻媼

盧杞少時與麻媼者廢宅賃居一日見有金

積車子在麻媼門外杞窺之一女子年可十四五神仙人也明日潛訪之麻媼曰莫欲一見不杞然之麻媼曰諾後三日見樓臺華麗輜輶降空乃前女子也謂杞曰更七日奉見呼麻媼付藥二丸斲地種之頃刻生二葫蘆漸大如甕麻媼以刀剗其中與杞各處其一風雲忽起騰上碧霄杞謂麻媼曰此去洛陽多少路答曰八萬里良久葫蘆上見樓閣以水晶為牆女子居殿中從女數百麻媼立於諸衛之下女命杞坐具酒饌曰即君合得三事取一長者留此宮壽與天齊次為地仙時得至此下為人間宰相杞曰處此為上願女子喜曰此水晶宮也某為太陰夫人仙格已高即君處此便是白日飛昇乃為箋奏上帝少須朱衣使者宣帝命曰盧杞欲求水晶宮住否欲為地仙否欲為人間宰相否杞曰人間宰相朱衣趣出太陰夫人失色令麻媼速傾回推入葫蘆却至舊居塵榻儼然葫蘆與麻媼俱不復見

落

此乃女仙麻媼以神變開化於人而盧杞貪欲不悟遂致

盧眉娘

唐順宗朝南海貢盧眉娘稱北祖帝師之裔自大足中流落嶺表幼而慧悟工巧無比能於一尺絹上繡法華經字如粟米又作飛仙蓋以絲一縷為蓋五重中有十洲三島每日食胡麻飯二三合憲宗嘉其聰慧而奇巧遂賜金鳳環以束其腕知眉娘不願住禁中遂度為黃冠放歸南海仍賜號曰逍遙大師後神遷香氣滿室弟子將葬覺舉棺輕即徹其蓋惟存藕履焉其後有人見眉娘乘紫雲遊於海上時羅浮處士李象先作盧逍遙傳

吳綵鸞

唐文宗太和末有書生文蕭海內無家因萍梗抵鍾陵郡蕭性柔而治道貌清而出塵與紫極宮道士柳棲乾善遂止其宮三四年矣鍾陵西山有游帷觀即許真君遯上昇之第也每歲至中秋上昇日吳蜀楚越之人不遠千里而至多攜挈名香珍果繒繡金錢設齋醮以祈福時鍾陵人萬數車馬諠闐士女拂比連臂踏歌蕭因往觀之觀一姝歌唱稍異

因聽其詞理脫塵出俗意諸物外復歌詞有文蕭綵鸞之句蕭驚曰吾姓名其兆乎此必神仙之儔侶也竟植足而不能去蕭詰左右或云洪井青衣女子也其居洪崖壇側亦不得其實蕭伺之歌罷已四更矣殊與三四輩告別獨秉燭穿大松徑將陟山捫石冒險而昇焉蕭亦潛繼其蹤燭將盡有仙童數十輩持松炬出迎之蕭失聲殊乃覺回首而詰曰非文蕭邪蕭曰然殊曰吾與子數未合何遽至此因相引至絕頂待衛甚嚴有几案幃幔金爐國香與蕭坐定有二仙娥各持簿書而前其間多指射江湖覆溺之事適至一婦文名而殊意有不得所又云某日滄湖風濤亦有誤殺孩稚者殊怒曰豈容易而誤邪執簿書曰但嬰孩氣弱未足自不禁也非不救莫奈之何蕭聞之因詰其事殊竟不對蕭又請益堅殊答曰此陰機不合泄於子吾當與子受禍爾仙娥執書既去忽天地黯晦風雷震怒擺裂幃帳傾覆案几蕭恐悸不敢傍視殊倉惶著衣束簡叩齒蕭恭伏地待罪俄而風

雲貼息星宿陳布而仙童自天而降持天書宣曰吳綵鸞以私欲而泄天機謫為民妻一紀殊遂流涕與蕭相同下山竟許成婚而歸鍾陵遂止蕭所居之室蕭方知殊姓名因詰殊先世之譜系殊曰我父吳仙君諱猛豫章

人也晉書有傳濟人利物立正去邪今為仙官名標洞府吾昨為仙主陰籍六百年矣但無何得罪於帝俄遭謫也然子亦因吾可出世矣蕭處清貧不能自給殊寫孫恆唐韻日一部運筆如飛每篇之獲金五緡盡則復寫

如此僅十載至唐武宗會昌二年稍為人知遂與蕭潛往新吳縣越王山側百姓鄒舉村中夫婦共訓童子數十人忽一夜聞二虎咆哮於院外及明失二人所在凌晨有負薪者自越王山下見二人各跨一虎行步如風陟

峯巒而去

杜蘭香

湘江漁父於洞庭之岸得三歲女子憐之養十餘歲天姿奇偉非常忽有青童自空而降攜女昇天女謂其父曰我女仙杜蘭香也是

時不還家其後於洞庭忽出降張碩家碩乃修道之士蘭香初降時授玉簡玉唾孟紅火浣布以為登真之信又一夕命侍文蕭黃麟羽帔之服以授于碩曰此上仙之服也

諸葛氏

九華山樵者婦諸葛氏感時疾數日起白舅姑曰新婦不惟疾平復且得仙矣俄出門乘空而去又數日復降云天上樓觀皆碧玉琢成隱戶悉以珠玉綴絞絲帳幔五色相照仙女行明中然不死之香我今暫來相看俄有五色車駕雙龍力士御之女童為從婦示之冉冉而去

韋女

鄭德璘家長沙往江夏省親將返有醴陵韋生同宿洞庭湖畔韋氏女水牕中垂釣德璘以紅綃題詩曰纖手垂鉤對水牕紅渠秋色艷長江既能解佩投交甫更有明珠乞一雙以紅綃題詩曰纖手垂鉤對水牕紅渠秋色艷長江既能解佩投交甫更有明珠乞一雙暮漁人曰賈客巨舟沒於洞庭德璘悲悅為弔江殊詩曰洞庭風軟荻花秋新沒青娥細

浪愁淚滴白蘋君不見月明江上軟輕鷗
而投之水神持詣水府府君曰德璘異日吾
邑明宰召主者送章女事鄭生女視府君一
老人也德璘夜半覺有物觸舟極之乃章女
遂納為室後數年果為巴陵令至洞庭有老
叟曰昔日水府活爾性命章女拜謝曰父母
在水府可省覲否曰可須臾舟沒然無所苦
父母居止與常人無異向所溺之物皆至此
但無火化所食惟菱芡爾俄船出湖畔

楊保宗

女冠楊保宗不知何許人也自幼棄秀及笄
許聘矣忽有感悟遂乞為道士父母從之乃
入廬山棲於上霄峯崇善觀頤忘塵念達清
靜之源却粒煉形而勤行播于遠邇玄風大
振南唐元宗聞之特詔赴闕延入禁中俾妃
嬪之樂道者與之相見問其所欲保宗因言
舊宇湫弊不能容眾元宗乃命賜以金錢而
六宮競施服翫珍珠綵繡計逾千萬令新其
宇仍勅尚書郎韓熙載撰記賜觀額以真風
賜保宗以紫衣又詔臣下作詩頌以送之皆

所以旌道也保宗素慕蔡尋真李騰之為
人亦能以丹藥符籙救人疾苦暇日或至屏
風疊之南北瞻禮二祠焉保宗年已老而色
如孺子既歿容貌如生舉棺甚輕人以為尸
解先是崇善觀始於梁武帝大同初其後歷
四百年而名人高士寂無所聞暨保宗風聲
遠著學者大集而道門稱盛

無名氏

李定記宋徽宗宣和中太學士人會鈔于任
氏酒肆忽有一婦人妝飾甚古衣亦穿弊肌
膚雪色而無左臂執拍板乃鐵馬之唱詞云
闌干曲紅鸞繡簾旌花嫩不堪纖手捻被風
吹去意還驚眉恨慶山青敲鐵板閑引步虛
聲塵世無人知此曲却騎黃鶴上瑤京風冷
月華清諸公怪其詞異即問之曰此何詞也
答曰此是上清蔡夫人法駕導引也妻本唐
人遭五季之亂左手為賊所斷今遊人間諸
公飲酒願求一杯爾遂與之一杯飲畢而去
諸公送之出門杳無所見據資治通鑑歐陽
脩論曰予嘗聞五
代時有王凝者家青齊之間為魏州司戶參
軍以疾卒于官喪家素貧一子尚幼年氏攜

其子員其遺骸以歸東過開封止於旅舍主
人不納李氏顧天以暮不肯去主人牽其臂
而出之李氏仰天慟曰我為婦人不能守節
而此手為人執耶即引斧自斷其臂見者
為之嘆泣開封尹聞之白其事于朝厚恤其
李氏而答其主入也道一嘗閱道書見自
至忠至孝至貞至烈脫形出世俱為神仙
傳所載婦人隱其名氏豈非五代之李氏乎
歷世真仙體道通鑑後集卷之五

羽十

十七

歷世真仙體道通鑑後集卷之六

羽士

浮雲山聖壽萬年宮道士趙道一編修

錢女真

女真錢氏二姊妹依陶居誦黃庭經即茅山燕洞也至今有碧桃紫萼蒲焉其姊尋披白練衣得道入洞及妹至洞已蓋矣宋太宗淳化五年巡檢夏侯嘉貞與建隆道士五人往彼投龍是夜雷震其洞復開莫測深一廳吏深入遇道士與林擒一枚食之遂絕粒田霖有詩板在焉燕口龍泓氣象清錢真此處有遺靈仙鄉去後師猶在女弟回時洞已局雲片尚如飛白練泉聲猶似誦黃庭碧桃花發舊蒲紫萼與人間作話評

曹文姬

曹文姬本長安倡女也生四五歲妙文字戲每一卷書能通大義人疑其宿習也及笄姿貌絕倫允工翰墨自筮疏外至於羅綺牕戶可書處必書之日數萬字人號為書仙筆力為關中第一當時工書周郎中越馬監察端一見稱賞不已家人教以絲竹宮商則曰此

賤事吾豈樂為之哉惟墨池筆冢使吾老於其間足矣由是籍籍聲名豪傑之士願輸金委玉求與之為偶者不可勝計女曰皆非吾偶也欲偶吾者可先投詩當自裁擇自是長篇短句絕辭麗語日馳數百女悉無意有岷

山任生客於長安賦才敏捷聞之喜曰吾得偶矣或問之則曰鳳棲梧而魚躍淵物各有所歸爾遂以詩投之詩曰玉皇前殿掌書仙一染塵心謫九天莫怪濃香熏骨膩霞衣曾惹御爐煙女得詩喜曰此真吾夫也不然何以知吾行事邪吾願事之幸勿他顧家不能抑遂以為偶自此春朝秋夕夫婦相同微吟小酌以託一時之景如是五歲因三月晦日送春對飲女題詩曰仙家無夏亦無秋紅日清風滿翠樓況有碧霄歸路穩可能同駕五雲虬吟畢嘆曰吾本天上司書仙人以情愛謫居塵寰二紀又謂任曰子亦先世得道仙人謫於人世吾於子有宿緣故吾得託於子今日當偕行矣俄聞仙樂飄空異香滿室家人驚異共窺見朱衣吏持玉版朱書篆文降

曰李長吉新撰玉樓記就天帝召汝寫碑可速駕毋緩家人曰長吉唐之才人迄今三百年矣焉有此說必妖也女笑曰非爾所知人世三百年仙家猶頃刻爾女與任生易衣拜命舉步騰空但見雲霞燦燦鸞鶴繚繞于時觀者萬許以其所居地為書仙里宋仁宗慶曆四年甲申作記

趙仙姑

趙仙姑名何永州零陵人也家居墉下年十二因隨眾摘茶行未數里仙姑失伴又行里餘視東峯岩谷尤美泉石清澈花木相倚若鳥好音煙霞去來有一人行於其中殊遇也目星弁銖衣視仙姑而笑仙姑意其可居此因再拜求度願侍巾几髯仙曰汝未可居此速來必餒也因袖間出一桃令姑食之復曰汝若能食盡他日必當飛昇不然且居地中也仙姑啖之但能食其半因懷其半欲以為親髯仙曰汝可疾歸毋久留此仙姑因還母兄曰汝去何久也詢之則逾月矣仙姑自茲不食但果食暨水而已往往不喜與俗人語

話終日促膝靜坐默然不言母兄知其異乃建竹閣以居之仙姑惟兄嫂同居其所居閣至夜往往有人語話聲其兄一日登閣竊聽則見仙姑與一長髯秀目星弁銖衣相對而語仙姑呼長髯為仙翁因曰前日約下顧何事爽期仙翁曰適會符下當行雨彭蠡澤一千三百里雨三尺一夕要足以大暑一龍恐不足乃召弟子輩六人分道而去呼雲召龍驅雷走電故其事乃集是以爽前夕之約語方已復曰汝兄母竊聽玄言恐泄天機吾今去矣惟見白光透牖而去暨明仙姑謂兄曰幸毋再來聽伺恐於兄為不利耳兄曰當不復聽但願聞夜來之事既為仙又須行雨乎仙姑曰今之得仙未能居於天上者亦有數千百人皆在十洲三島名山洞府中積功累行方可昇舉或治江湖或主陰府或掌山嶽興萬世之利去天下之害救病除患振難扶傾拯濟柔弱陰功密施德行潛修非可以一端舉但神仙不自矜伐惟恐人知故世人莫得與聞兄曰如此則神仙功行何以計之仙

姑曰神仙功行亦有仙官主之故每歲籍其事進於帝所然後第其高下進補仙階矣道州知州周廉夫替回闕下道由零陵及見仙姑坐中有客風骨甚異顧望尤踞不揖廉夫廉夫意似怒其人乃引去廉夫曰彼何人而簡傲若此仙姑曰此乃呂仙翁也廉夫急遣人追之已不見矣仙姑曰仙翁意欲往何所即至其地不逾一刻身已千里廉夫因問仙姑曰仙翁今往何處仙姑四望曰仙翁已在荆南府矣又有士人夏鈞過永州問仙姑曰呂先生今何在曰今日在潭州興化寺設齋鈞至潭至寺取齋曆視之其日果有華州回客設供潭州李正臣多為遊商往來江湖間妻得疾腹中有物若巨塊時轉動於腹中即痛不可忍首術治之不愈正臣乃往見仙姑仙姑曰子之妻常殺有孕婢今腹中乃其冤也正臣求術救之仙姑曰事在有司已有冤對不可救也其腹塊後寢大或極痛楚復圻而死正臣視妻腹中乃有一女子身體間尚有鞭撻痕焉好事者時時往問過皆有

驗湘東士人翕然稱神會楊公作憲按行近郡至永聞之甚愠公剛正者也乃鎖局封號其間而去月餘復還開閣則仙姑貌如故公亦頗信無復害仙姑意滕子京謫守岳陽一夕大雷雨既霽華容西峯石壁上有謝仙火三字存焉字體怪異公命模字於廳壁使人往問仙姑仙姑曰此雷部中一鬼耳兄第二人好以銖筆書字其身各長三尺丁晉公之南遷道出永往見仙姑曰能復迴乎仙姑曰復迴再見聖人乎仙姑即不答後果如仙姑言狄方相之南征過永見仙姑曰奉詔討賊願知勝負今破賊乎仙姑曰賊必破曰能獲其兇首乎仙姑即不答後悉如仙姑言凡有事過永者無不見仙姑問休咎一日仙姑謂其兄嫂曰天地不先以禍福示人慮泄機也今賓客盈門問事既不可拒即將告之是泄天地之隱秘也寧免獲譴於上吾將有所往矣乃沐浴冠服端坐而化今其真身猶存閣上

鄭仙姑

鄭仙姑徽州人也父八郎學道仙姑自幼惟與父居一間上客至父見之閣下姑捧茶與湯而下率以為常人未嘗見其閣上有炊火父死殮檢中不葬曰吾父非死也仙姑初不出郭門而或有見於百里外者所居屋歲久

朽敗秋大風雨一夕屋仆傍側大驚人疑其壓死矣且往視之有一木椅榻上得不壓而仙姑尚未寤也蘇轍子由為續溪令見之云年已八十尚處子子由曰室家人理之常姑不嫁何也曰吾誦度人經故爾詰其故曰此

經元始所說元始生於天地先立於天地外安得不爾子由曰安有人能出天地乎曰道乃爾子由曰道何與乃事曰我身何者非道子由心異之翌日設饌禮致仙姑既至畧能飲酒食葷子由徐問以養生之事曰君器敗矣難以成道子由因就質導引諸方皆曰非是但當養成嬰兒爾子由曰嘗有見姑於百里外者豈非嬰兒往邪姑笑而不答其後不知所終

劉妍

仙姑劉妍代州妓女也宋哲宗紹聖中有老嫖至其門旬錢其家延之為設食食已嫖謂曰汝甘心在是乎曷不從我去我將誨汝道仙姑許之告其母曰大人橐中裝直萬金又有他女可奉養乞我去學道母不從即斷髮披布衣徑入太行山居庵廬日出乞食如是數年一日忽辭常所往乞食者曰久涸若等翌日吾行矣人如期往而視之見火發其庵廬仙姑跌坐火中而化世以為火解云

虞真人

虞真人本女流遊異人不食隱終南山士大夫多敬之宋徽宗崇寧初首於茅山詔劉混康海陵詔徐神翁終南詔虞真人弋陽詔張虛靜曰集秘殿講究道妙

莫州女

莫州任丘縣境有澹滌市積魚如阜宋徽宗大觀中有貧女不知所從來常居叢祠中晨入市鬻魚跳而燒啗之他不見有所食也或予之衣則以刀裂壞人近之輒詬罵甚者以刀刺傷以故莫敢近者其姿媚好膚理凝脂

州兵始萌意犯之忽見其座有大蟒懼而却走回視則座為寶蓮華貧女曰吾不可居此矣俄不知所在

于仙姑

于仙姑鳳翔人也始其家業淪茶居閭閻鶻之仙姑雖小家女少獨喜潔清不肉食日誦老子書父母子之錢輒儲之以市藥膏敗牘紐為衣施旬者無幾何於篋中得道家虛呵四吹噓之說行之久乃辟穀年十四不肯嫁傍近女子好神仙者爭來謁仙姑一日相與媒田華山有石室其深有玉函中貯丹方往聞人數求之手拊玉函而不能啓殆上清寶章非有道者不可往吾觀于氏女學道不嫁已能辟穀意者可以啓玉函焉遂往請仙姑仙姑許諾諸女子共俟其傍仙姑既入果見玉函發之而得大洞經懼為衆所奪出告其衆曰誠有之吾不能啓也衆悵悵云仙姑還家讀其經夙夜如其方遂得度世煉形之法能行於薰籠上或時卧橫中累月其徒開視之皆凝塵也仙姑徐振衣而起宋徽宗聞

之召至東都錫真人號且賜詩曰身是三山雲外侶心無一點世間塵欽宗靖康初語其徒曰吾將逝矣後六十年當還已而遷化其徒遵其言爲大棺兩傍通達置終南山谷人知之觀者狎至閱數月仙姑忽起語其徒曰吾戒汝毋使衆觀之今云何如是汝穿墳深二十尺置吾棺其徒既穿已仙姑即卧棺中命其徒瘞之曰衆復能撓我乎世傳有向湍者得其道

張仙姪

張仙姑南陽人也莫詳其所以得道者人有疾仙姑輒對坐瞑目潛爲布氣攻之疾者俄覺其臆溫溫然發緼火色已而鳴聲如雷雖沈痼者無不愈一時貴人多敬慕之宋徽宗嘗召至東都其後不知所之

徐道生

徐道生山陽軍婦也後入神光觀爲道士開徐神翁在海陵即往事之從容問神翁曰人之軀污穢集成爾而古有白日昇天者審能如是耶神翁曰吾聞太行山有換骨岩將輕

舉者先往換骨然後乃得登上清列仙籍也道生既得神翁語後即求換骨岩而觀焉至則峯頂崇崕殆不可陟道生志堅決雖委命不憚乃援葛藟蹈不測徑抵其危巔果有大屋渠渠四周有仙人鎖子骨千餘跌坐廡下道生以熏陸香各納之喙中而歸自是去不知所之

陳瓊玉

陳氏名瓊玉婺州金華縣人年十七一日邀兄遊四明海中兄乘舟而瓊玉行水上越數日衣裳不濡既還語人曰我水中遇婺女星君相導往蓬萊始知元是第十三洞主遂省悟從此絕粒更能詩詞及知人間禍福公卿士庶日往叩之戶外屢滿宋徽宗政和七年郡守劉安上部使者盧天驥王汝明等聞于朝召至京師賜號妙靜鍊師對訖即乞還山復賜肩輿郭崇師所居前而葛仙峯後枕仙姑壇獨處一室政和中邑宰何庭堅贈詩曰絕粒棲神是幾年閉關終日更脩然高峯默與麻姑契妙法親從婺女傳功行素超三界

外姓名清徹九重天憑誰與問西王母師是金華第幾仙人贈詩多師獨喜此篇師作詩前後不下數千首多預言人休咎其弟昭嘗曰詩詞所言其應如響何從而知師曰聲其里系即仙官持簿來五百年過去未來皆知恐泄天機故託風花雪月爲詠而吉凶寓其中耳非特知之又且掌之昨權無常尉管人間生死後權陰典管人間六犯事謂通官錢五逆不孝奸盜踰濫故殺也世人冒犯故多天屬不犯者三世中出神仙近又管月臺仙籍凡事夫聰明者皆上籍若有功行可作月臺仙大抵勉以忠孝誠信至八九十歲容貌不衰後不知其所終

吳氏

妙明真人吳氏句容縣士人女也幼遇異人得訣修煉不食雖水亦不飲宋徽宗宣和間召赴闕館之蔡京第京贈之詩有姑射神仙猶飲露龜臺玉母未忘桃之句既而得請復還錢塘未幾欲他往人或問之曰城中皆黑氣可速避去纔經旬決即有金人之禍真人

肌膚明秀語論歷歷可聽未嘗觀書質以古今無不知者後隱惠州羅浮

武元照

武真人名元照會稽蕭山民女也方在孩抱母或茹葷輒終日不乳及菜食則如初母異之疑年稍長議以妻邑之富人既受幣乃怏怏不樂訓以女工坐而假寐母乃笞之謝曰非敢怠也昨夢金甲神告以后土見召與之偕往入雲霄間廣殿下見高真坐殿上玉女列侍招我陞殿戒曰汝本玉女頃坐累暫謫塵世三紀復來汝歸休糧棄俗修道及覺欲不食而母見強又夢神怒曰命汝勿食違吾戒也剖腹取腸胃滌諸玉盆復納于腹而絨之因授靈寶大洞法及大洞大法師回風混合真人印俾治世之有疾者母聞言驚悟曰兒異人也予爲兒絕姻事俾遂乃志自是獨居靜室間以符水療人疾遠近奔湊求符或邀過家視病則命二僕肩輿以行不裹糧至中途從者餒但市桃兩顆呵氣授之人食一桃往數十里不飢侍御史陳某居錢塘以天

心法治人疾舍傍別園建層樓園人告有騎而行其上者陳叱去曰焉有是薄暮攜劍宿於下亦聞馬聲未幾家人扣門趨之歸曰幼女繫空巾如物羈縻狀視之信然女昏不知人累日陳詣樓設醮厭之火起壁間倉卒奔下火亦止又召道士攝治及門亡其中家人亦恐致書招元照元照衣冠造之陳女起迎門笑語若初無疾者元照攜之宿樓上越三晝夜咸無所睹女亦泰然韓子康太尉公肅官輩下嘗自書章擬奏于天遂遭遇太上興運事人無知者邀元照奏之俯伏良久乃起誦章中語無一非是且曰上帝嘉公恬靜無觀幸批答云謹守千二日辦曹賞厥功後皆應如元照言韓自幼患足疾每作至不得屈伸元照爲按摩覺腰間如火熱又摩其髀亦熱拂拂有氣從足指出登時履地疾遂瘳韓僕宿於廬側隘舍夜夢鬼物壓其身叫呼而出值元照至不告之故與縱步至其處元照及戶而返曰室有自縊者髻首出舌見吾求度即書符命僕焚之夜夢人謝過曰吾得

真官符起生不復來矣啓闕而出韓氏設榻留元照寢不聞喘息徐見青雲起鼻端一嬰兒長三寸許色如碧琉璃光射一榻盤旋腹上頃之不見張循王家婢有娠過期不產請元照往諸婢雜立元照獨視孕者皆嘆曰爾宿生爲樵夫掌擊殺大蛇今故讎汝在腹中食五藏盡乃已急白王出之書二符授婢婢如戒焚符以水飲訖產一大蛇王聞之大駭敬禮之贈以金繒不受復如韓氏留歲欲歸止之不可嘆息而別曰予不再至矣衆疑其將羽化旦日率舟歸蕭山至家無疾而卒先是邑中十餘家俱見元照衣道服各詣其家聚話移時乃去數日或詣元照家訪之家人云死矣邑人數輩先後至者同曰昨方至吾家何遽爾驗其訪諸人日乃尸解曰云宋高宗紹興十一年也

孫仙姑

仙姑孫氏名不二號清靜散人寧海豪族孫忠翊之幼女也金太祖天輔二年戊戌春母夢七鶴遶毬舞于家庭一鶴漸入于懷覺而

有振至三年己亥正月五日乃生生而聰慧
柔淑真懿之態擬乎自然擇配之時父忠翊
聞煉師無夢讚馬宜甫有真仙之材遂娶之
而生三子咸教以義方宜甫以家鉅富常濟
人貧乏仙姑必承順而輔之世宗太定七年
丁亥重陽祖師自終南來化宜甫泊仙姑入
道構全真庵以居之夫婦敬之若神事之苦
君嘗畫一枯體志期夫婦之從化題之以頌
云堪笑人人憂裏愁我今須畫一骷髏生前
只會貪寬棄不到如斯不肯休仙姑始然未
純信是冬祖師誓鎖庵百日約五日一食宜
甫親為供送屢示神變權以化之十回極於
地獄警三業之為愆十度十以交梨示九丹
之妙用又賜之以茅栗告之以道戒以見其
留連貨產之汨沒始終不悟一日見祖師大
辟徑造其宅卧於仙姑寢室姑責其非禮怒
鎖之門使家僕呼宜甫於市而告之宜甫曰
師與予談道不離几席寧有此事至家開鎖
其室已空窺所鎖之庵祖師睡正濃矣姑始
生敬信又一日祖師復畫天堂一軸示之曰

果能出家決有此報後一載己丑夏四月郡
人周伯通捨宅為金蓮堂邀祖師丹陽等住
持重五日仙姑拋棄三子屏絕萬緣詣堂以
期開度是旦祖師遂丹陽出堂姑至今燒誓
狀於道前賜名不二號清靜散人仍贈以詩
云分黎十化是前緣天與佳期本自然因甚
當時不出離元來只待結金蓮祖師導之上
街乞化令別作庵以居繼傳道要時仙姑年
五十一矣是年秋祖師挈丘劉譚馬歸汴梁
翌年祖師昇仙十二年壬辰丹陽歸仙極於
終南劉蔣乃祖師結庵之地裏事既終丹陽
持服守墳尸居環堵十六年丙申仙姑亦過
潼關將以參同至理而決疑情丹陽作浪淘
沙以寄仙姑致禮達謝二處環庵行其所傳
東遷洛陽有風仙姑者俗呼小二娘按進士
王宇作姑銘序云風仙姑始自皇統關西來
寓東周不顯姓氏壽亦不言何處人以語音
較之似秦人也乞食度日垢面髻頭以穢污
身而遠世魔畫則得狂於塵市夜則棲泊於
荒祠不起愛憎不言非是無為淡泊任性自

然蓋內修仙道外隱仙踪而能信口放言以
暢玄旨有云綠葉漫天長黃花滿地開千里
覓不得萬里捉將來又曰油盡盞乾燈自滅
隨風却見剔燈人若此語言不可殫錄仙姑
至洛陽依而居焉風仙姑之居有二洞命仙
姑居下洞已居上洞常積磚石於前凡男子
過下洞者必以磚石擊之而外魔不能作障
加之訓獎則六年道成行化度人而歸向者
甚眾嘗作卜筮子示眾云握固披衣候水火
頻交媾萬道霞光海底生一撞三關透仙樂
頻頻奏自飲醍醐酒妙藥都無頃刻間九轉
丹砂就二十二年壬寅季冬晦日忽謂門弟
子曰師真有命當赴瑤池期即至矣遂沐浴
更衣問曰左右以天道時刻對曰午刻矣命
具紙筆寫頌以遺世云三千功滿超三界跳
出陰陽色裏外隱顯縱橫得自由醉魂不復
歸寧海書畢跣趺而坐奄然而化香風散漫
瑞氣氤氳竟日不散時丹陽居寧海環堵中
聞仙樂駭空仰而視之見仙姑乘彩雲而過
仙童玉女旌節儀仗擁導前後俯而告丹陽

曰吾先歸蓬島矣連大元辛丑春京兆總管田侯將葬重陽祖師仙蛻清和宗師偕祖庭諸師洎總管僚屬於終南縣李舍人莊初慶真觀首發仙姑之墳移葬于觀之金蓮堂永爲十方女冠歸依之所甲辰歲奉朝命改觀爲宮至元己巳正月褒贈清靜淵貞順德真人

歷世真仙體道通鑑後集卷之六

疑仙傳卷上

同卷

隱夫

玉

商

撰

翔一

夫神仙之事自古有之其間混迹固不可容易而測也僕偶於朋友中錄得此事輒非潤色不敢便以神仙爲名今以諸傳構

成三卷目之爲疑仙傳爾

明皇時李元者常遊華山下唯採諸藥食之性復好酒山下人多以酒飲之忽一日騎一白鹿舉手謂山下人曰我今去遊天台有老父三人遮道欲留之乃問之曰君方與山下之人相親又何遽別元曰老父輩殊不知相親必離也我今不敢背時而固離耳老父曰君方食華山之藥又遊天台何所食也元曰我在華山即食華山之藥在天台即食天台之藥也老父知不可留遂命之藉草酌以醪以敘別元臨歧而留藥三丸與老父三人謂曰當速食之乃上白鹿而去尋不知所之後二老父即食其藥一老父不食之經數月果死其二老父後皆一百五十歲方卒故人皆疑李元是仙矣

蒲州賣藥翁者於蒲州手攜一藥囊賣藥不顯其姓名人皆呼爲賣藥翁人買藥不得則其疾必不愈蒲州富人王諭者性恬靜好善復長於醫術見此翁賣藥有異常流因其殮衆命之欲問焉賣藥翁既至諭家不指諭而反揖一蒼頭諭以爲山野性不怪訝之因酌一杯酒自起獻之賣藥翁大笑而接飲之訖乃謂諭曰君欲問我夫便問勿待多禮也諭因問翁曰翁不顯姓名何人也翁曰天覆地載之人也既稟天地之氣爲人即姓人也名人也又何妄爲姓名也諭曰攜一囊藥而治衆病何藥也賣藥翁曰人之病一也何衆病也人假氣託體而生氣和即體和體和即無病氣不和即體不和體不和即有病病本唯一也世人強名之是不達也我藥一也蓋達人之病由一也故但以一治之諭曰有買藥不得者何也翁曰人之生實難死實易常救之即生待病而救已難矣復又病久方救焉得生也我每人買藥不與之者蓋救之不及也夫我之藥者人間之藥也生發於人間而

欲餌之長生久視即不可不察也知生死以治人之病即亦有功矣亦我自幼好餌藥固頗識藥之性藥之性識即可使不識即必反害人論知其異因復問曰適者翁不揖我而揖蒼頭何也翁曰蒼頭是我輩之人也我見我輩固不覺揖也論曰今便以此蒼頭奉君爲一弟子可乎翁曰若能捨之與我我亦與君一卷書論因授此書令蒼頭隨賣藥翁去蒼頭忻然而去尋皆不知所在論讀此書大達醫術後有一道人詣之堅求此書一觀論既與觀之道人與此書忽然俱滅

張鬱者燕人也客於京洛多與京洛豪貴子弟遊狂歌醉舞近十載忽因獨步沿洛川鬱既觀是時也風景恬和花卉芬馥幽鳥翔集於喬木佳魚踴躍於長波因高吟曰浮生如夢能幾何浮生復更憂患多無人與我長生術洛川春日且狂歌吟纔罷忽舉目見一翠幄臨水絃管清亮鬱驚歎曰是何人之遊春也言未絕有一女郎自幄中而出緩步水濱獨吟獨歎鬱性放蕩不可羈束不覺徑至女

郎前問之曰是何神仙之女下陽臺耶來蓬瀛邪獨吟而又獨歎邪女郎駭然變色良久乃歛容而言曰兒自獨吟獨歎何少年踈狂不拘之甚也安得容易來問鬱曰我天地間不羈之流也少耽詩酒適披麗質詠歎固願聞一言耳女郎微笑指翠幄而言曰可同詣此也鬱因同至翠幄內女郎乃命張綺席復舉絃管與鬱談笑共酌芳樽及日之夕也女郎曰人世信短促邪春未足秋又來纔紅顏遽白髮設或知人世之不可居而好道之者實可與言也鬱低頭不對女郎乃歌曰彩雲入帝鄉白鶴又徊翔久留深不可蓬島路遐長又歌曰空愛長生術不是長生人今日洛川別可惜洞中春俄與鬱別乘洛波而去鬱大驚亦疑是水仙矣

負琴生者遊長安數年日在酒肆乞酒飲之常負一琴人不問即不語人亦以爲狂或臨水或月下即援琴撫弄必淒切感人李太白聞焉就酒肆攜手同出垆野臨水竹藉草命之對飲因請撫琴生乃作一調弄太白不覺

愴然生乃謂太白曰人間絲竹之音盡樂於人心唯琴之音而傷人心我本謂爾不傷心不知爾亦傷心邪足知爾放曠拔俗是身也非心之放曠拔俗也太白本疑是異人復聞此語乃拜而問之曰丈者奚落魄之甚也心落魄也身落魄也生曰我心不落魄身亦不落魄但世人以此爲落魄故我有落魄之迹太白曰丈者知世人惡此落魄何不知而改之生曰我惡之即當改之世人惡之我奚改邪太白又曰丈者負此琴祇欲自撫之以爲樂也欲人樂之也生曰我此琴古琴也負之者我自好古之音也又孰欲人之樂也我琴中之音雅而純直而哀知音之者聞之即爲樂不知音者聞之但傷耳亦猶君之爲文也輕浮若蝶舞花飄豔冶如處子佳人王孫公子以爲麗詞達士即不以爲文也太白曰我之文即輕浮豔冶不足觀我之風骨氣槩豈不肯仙才邪生曰君骨凡肉異非真仙也止一貴人爾復沉體穢氣卑亦貴不久但愛惜其身無以虛名爲累言罷與太白同醉而回

明日太白復欲引之於酒肆共飲不復見後數日太白於長安南大樹下見之方忻喜欲就問之忽然而滅

葛用者常牽一黃犬遊岐隴間人或以酒飲之即飲而不食好與僧徒道流談每至夜即宿於郊野道士王奉敬仰焉忽謂奉曰可共乘此犬一遊也奉曰此犬可乘也用曰此犬能行也因共乘之此犬忽然躍身有如飛翥頃刻之間出中華之外約餘萬里至一山峯巒奇秀風景澄靜有殊人間也俄共下犬攜手入一洞中見奇樹交陰名花爛然峻閣高臺多臨綠水俄又入一朱戶有三女子出迎之韶玉麗質實世希有皆宛若舊識既延之登一樓俯翠欄寒珠簾設碧玉牀命以瓊漿共酌仍三女子雜坐須臾之間彈箏吹簫盡去形迹及將日暮皆已半醉用乃謂奉曰此三女子者皆神仙之家也偶會於此山我知之故與爾一詣今既共懽飲當復歸此若久留不可不慮妨他女伴自遊戲也遂與奉俱出洞其三女子亦送之於洞門用顧謂女子

曰明年今日再相見既與女子別復共乘犬回至岐隴間已三載矣用又謂奉曰我一東遊耳君當住此言訖而不見爾後不復至矣西川彭知微者卓鄭之流也家累千金唯生一女自幼好道嘗白知微求讀道書仍欲奉道之教知微不聽至年十六忽有一童兒乘一白鶴飛入知微家謂其女曰我是道家人爾爾好道故來教爾女驚喜見之且又聞欲教焉乃密藏此童兒及白鶴後數日一侍婢知其事問女曰何妖也爭可密藏設或父知其事得不以為私乎女曰但勿泄我當速問道後遣之因至深夜齋戒捧香以禮童兒童兒謂曰爾好道之心不退必當得道女謂童兒曰夫人學道必先讀道書授法錄我且處閨閣間父不容如何也童兒曰爾能以心好道自然與好道之迹不殊也至於自古白日昇清天者又豈關讀道書授法錄也夫神仙之道本必在自然之神性亦在自然之骨氣故

昔西王母言漢武非仙骨而神慢也女又問曰處人之世衣人之衣食人之食欲歸神仙之道不亦難也童兒曰不然但能以心慕神仙之道其心一則已感動神仙也既感動而必錄之錄之者神仙錄其名氏焉知此則必潛有命故有餌木却粒而得之者苟修仙之侶深入空山遠離人寰草為衣裳日夜勤苦於焚修而其心乍進而乍退不一焉又雖餌木却粒亦何望哉女復禮而言曰然如是當以何教我童兒曰爾之神性已達神仙也爾之骨氣又非凡俗也爾今心若誓死而一必不久昇仙童兒言訖乃起辭曰神仙之道盡在此言也恭敬修之我今却去乃乘鶴飛去其女謂侍婢曰我達道也當得道耳尋絕滋味去鮮華常默然而坐忽一日失之不知所

在

劉簡者齊人也家富而好道每聞天下名山有神仙之迹必自策杖以一遊至於山中之藥無不服餌開元初遊八公山觀其異迹忽逢一人自稱虛無子謂簡曰我亦好道之流也偶此相遇當與君遊此後別遊一名山簡

得其侶深喜乃曰我好遊神仙之山不期逢君迹如是邪虛無子乃謂簡曰自此東不遠一名山甚有神仙之迹去遊乎簡因曰願隨之一遊尋與簡東行數日但見山川杳絕人迹及至一大山息之於山下虛無子謂簡曰

已出塵世萬餘里也今與君俱入此山君至此山必知與人間之山有殊也乃同前行遽見一大橋甚高峻及登陟之見兩邊欄檻並飾以珠翠俄至一宅四面皆山峯如畫門上有牌題之曰虛無子宅簡訝然謂虛無子曰何題吾子之名也虛無子笑曰但且入此宅及同入其門見樓閣臺榭非世間所有遽又引簡臨一流水閣內共坐須臾有青衣童子數人侍立樽俎間唯珠果香醪而已虛無子指水次一草謂簡曰只此草食之已與人間諸山之藥不同矣簡乃切求之虛無子令侍童撥一小艇過其水就水次取此草子以賜簡簡因藏於懷中起謂虛無子曰吾子必此住我當回虛無子起別謂簡曰君休遊名山訪神仙之迹但以此草子種之而以其苗食

之當得長生不必須待作神仙也虛無子仍曰君其訪來路以歸庶不迷悞簡乃依其言訪舊路得還其鄉乃以此草子臨水種之自採其苗服餌後百餘歲髮不白一日忽與家人及鄉黨別而去不知所之

疑仙傳卷上

疑仙傳卷中

隱夫玉簡撰

東方玄者荊州人也結一茅廬於南山下居之與其妻范氏俱好道忽因一道流過於山中玄與妻俱請至茅廬中玄乃削竹為脯汲水為酒以禮待道流道流甚驚之范氏又叱一竹杖為一大飛禽乘之而飛俄頃間復至攜一碁局來謂道流曰我欲與玄對碁道流大怪因問曰何處去取此碁局邪范氏曰我往南海邊女伴家取此碁局來道流曰女伴何人也范氏曰此女伴亦有小術往往來與我戲吾師能暫伺之即當至矣道流因又問玄曰此皆何術也君與妻何得此事玄曰我昔偶娶得此范氏為妻傳我以其術即終不知此范氏始自何傳之也道流方與玄語空中有絲竹之聲須臾見一女子容質佳麗自空而下笑謂范氏曰何又招他俗流也范氏曰此道流過於山前我偶命之不似東方玄也其女子曰何未對碁也玄乃曰女伴但自去遊戲我且與此道流談論其女子即便於

面前以手畫地變爲一大池周回皆長松翠竹隈其岸即菱荷芬郁中有一畫舸其女子即自登之范氏遽以一隻履投於池中又變爲一畫舸各自游泳仍自鼓棹而歌其歌聲清切甚傷感人道流乃泣下而歎曰我學道來十五餘年遊山訪藥未嘗敢怠終不遇人豈知此女郎皆有此神仙之事邪女子與范氏見之俱出畫舸而登岸似有不悅之色相顧良久其女子乃叱其池其池與松竹苦荷及畫舸皆應聲不見便仍與范氏俱各乘一竹昇空而去玄笑謂道流曰吾師且歸勿久住此道流乃謝而去之及來年道流又過此因訪焉山下人皆曰東方玄已移家入遠山也李陽者蜀人也學道十餘年志不退嘗於江邊見一大龜白色如玉異之收養焉後三載此龜忽乘虛而去七日復來陽乃祝之曰神仙之道玄之又玄固不可鑽仰也余一自聞三清之景覽十洲之事知塵世不可以依倚已十餘年苦心於虔禱也其如無髮髻之迹以堅我心忽一日江邊見爾龜其色潔白如

玉本異之收養何今日忽昇空去又復來爾是仙家之龜也當每去而復來若不然其永去勿復住其龜遽又昇空而去經七日又復至陽深疑是神仙變化因引之徐行於江邊遊賞忽有一老史遽問陽曰此龜我所失也君何得陽曰我昔年於此水濱收得養之老史曰此龜能乘虛空而遊又能入水底而不濡濕人若乘之可以遊萬里之外入四海之內也君既收養已久我今與君君當試乘之但自訪神仙乘此即可周游八極矣陽拜謝之其老史忽然不見陽乃以一足試踏龜背龜乃漸漸變身大如一牛陽因乘之龜負陽走入江中陽見水皆自分流略不濡濕乘之數日或入水或乘空約行萬里陽懼乃祝龜曰爾當負我歸須臾之間舉目已見却復舊隱也陽既知此龜有異因乘虛西邁又數日至一山上有瓊林瑤樹仍見一玉池聞山頂上有人歌聲陽不測其事又祝龜而回後又思仙境因乘此龜東邁倏忽間至一大川四望無際中有山山上有樓閣入雲陽又懼不

敢入水而祝龜回蜀人頗怪陽去而復來有訪之以問者陽曰我多在山中取藥耳人又問其龜者陽曰此龜長生之物也我昔日在江邊見之收得以養雖色奇而別無它異其問者又因至夜竊此龜去陽乃遠遊不知所之

長安樂人鄭文家生一女生而能言及年七歲容貌端莊而善於方響其親族皆呼爲方響女貴妃知之因欲取焉父母問之方響女曰我豈是宮人邪楊妃自與我同輩也那得如此其夜忽失之父母哀憫無以求尋後三年復至家父母驚問其由謂父母曰我暫到上清宮中人言我父母悲號不止而憶念我我故再來耳父母因曰爾若是仙家之人何來我家爲我女也女曰我上清方響妓女也因竊觀下界而罰我必不久住此人間父母當勿憶念父母曰爾仙家何樂我人間亦有富貴之樂爾奚不且住人間以慰我心女曰人間憂惱多而又奚樂邪我在上清無俗事以累我也無俗心以惱我也侍立之外即每

乘雲御氣駕鸞鳳嬉遊天外時酌瓊漿亦有
時詣蓬島上天台捐嫦娥於月宮戲織女於
銀河人間何樂也若以富貴為樂殊不知富
貴但多事也況纔見生俄見死邪父母乃
曰當且住以慰我心無優劣人間天上之事
且以生爾之父母為念女謂父母曰我若且
住必不得還上清之宮闕也父母悲言之次
忽不見其女不知所之

管革者趙人也少好道不事耕鑿多遊趙魏
之間性不好謙恭而復辯恚忽因遊偶遇張
果先生先生招之曰來管革革謂張果曰爾
誰邪張果曰我張果先生也革乃曰張果何
呼我也果因謂曰爾非不知人間之禮人間
帝王尚敬我也爾奚不敬我也革曰我且非
人間帝王又焉能敬爾也果因命之同遊恒
山革從之果乃令革閉目革曰閉目即可去
遊不閉目即不可去遊也果曰柰爾凡體邪
革曰爾凡體尚可去我又豈不能去果擲所
策之杖變一青牛令革乘之革既乘之與果
同入恒山果因引革登絕頂坐而問之曰人

間之囂雜塵中之苦惱春秋之榮謝少老之
逼促爾盡察之也何久遊趙魏不遠遊四極
趙魏戎馬之郊也非道人宜遊若夫滌慮蕩
煩欲先潔其形趙魏之地不可革對曰爾何
為出於趙魏之間也唯道人也不可隨土地
而化我遊趙魏之間與遊玉清蓬瀛不殊矣
若其以他帝王而為尊以我匹夫而為賤呼
我之名氏談帝王之敬待即朝在玉清蓬瀛
夕屆趙魏亦俗之情生矣我又奚遠遊爾當
遠遊以蟬蛻俗事苟不遠遊必死人間必不
能同我也果笑而不對革又曰爾命我遊恒
山者止欲一示我策杖為青牛邪爾豈不知
何物不可變化物之變化不可奇自人而化
仙者尚世世有之遽起不辭果而下絕頂因
便結草於山中居之後不知其終人或見
之於嵇山

或問其姓氏即對曰我自幼不識父亦猶方
朔也故亦不能作一姓氏也泗水邊皆潛察
其舉止革衣兒知之逃往漢江濱又垂釣江
濱人初以為漁者及又不見獲魚雖炎燠凜
冽但一革衣數年不易亦甚疑之又有問之
者曰爾何姓名也為釣在江濱已數年寒暄
但一革衣又不見得魚何也革衣兒曰我是
革衣兒曰人呼我為革衣兒來垂釣也釣不
必在魚也況我自得之又焉知我不得也我
既號為革衣兒又安能更須姓名也江濱人
亦潛察之革衣兒知之又逃往渭水垂釣水
濱人見其容貌美又唯披一革衣深以為隱
者後見其不獲魚乃疑之又有問之者曰君
何隱也來渭水何也欲繼呂望之名邪革衣
兒對曰我性好釣魚自幼便以垂釣為樂嘗
亦釣於數水皆不可釣故來此水人亦見我
披革衣呼我為革衣兒呂望者是他見紂不
可諫欲佐西伯來此而待非釣魚也方今明
主有天下無西伯可待又何繼呂望之名也
問者曰爾不待西伯待何人也革衣兒曰我

待一片石耳其人笑而不復問後數日有一片白石可長丈餘隨渭水流至草衣兒見之忻喜踴躍謂水邊人曰我本不釣魚待釣此石也數年間一身無所容今日可容此身也乃上此石乘流而去不知所之

朱子真者長安南山下有別墅焉家甚富松檜成陰花竹雜植小橋架流水高閣齊岫雲子真常戴一葛巾衣輕軟手攜一青竹杖自邀自遊以繡衣女子數人隨之遇興而便酌香醪獨醉人罕得見其面長安有少年趙穎者不羈之人也既聞之遂造謁焉及叩其門有一女僕出命之子真見穎問曰君何人也何遠來此相訪穎曰我愛歌喜酒之人也每恨天地不容花卉長春常恐平生有幽景不得一遊此外即雖貴列鼎鍾不關我心也子真喜乃延之於一小臺共酌金罍仍謂之曰君子遊狎之徒也多遊賞耳今欲不用絃管出一小妓共觀之乃令二侍女取一對木刻翦鳳飾之珠翠宛若其生仍有一女子金冠羅衣便舉聲而歌其鳳即舞故流風回雪之

態未及須臾金冠女子歌罷鳳亦止舞子真乃自歌曰人間幾日變桑田誰識神仙洞裏天短促共知有殊異且須懽醉在生前穎聞之不覺長歎子真乃令侍女於玉壺中取一丸丹以賜穎曰服此且更遊人間二百年穎拜謝之仍辭而回及鑒輿將幸蜀山下忽失其子真家穎服此藥果得二百餘歲矣

丁寔者多遊洛陽自稱嵩山隱人髮白如絲而貌若桃李華色或問之曰君應百歲也何時隱嵩山寔曰我本秦始皇時儒士也李斯勸始皇坑儒焚書以愚黔首我即逃入嵩山遇一老史謂我曰可令爾長生因授我一丸藥我吞之至於今雖髮白而容顏不變故不記多少歲也亦嘗識漢武時東方朔也方朔是仙家一小兒性顛狂在仙家惡之今出於人世我曾拜王母王母有是言我故訪方朔以問方朔亦笑而不詳我亦識劉晨阮肇之輩此皆俗人耳偶然誤入他桃源洞終亦有俗心故不得仙也爾後好仙者多白日昇天皆不復回我亦本非神仙故多不遇之人或又問

曰君既得靈丹何不為仙也寔曰我雖得長生之道而且不得乘虛御氣之道固不能昇仙也寔每歲至春和即必至洛陽城如此數十年人皆識焉祿山將起兵寔謂人曰我又須逃胡與儒異也言訖而去不復至人皆疑是地仙耳

疑仙傳卷中

疑仙傳卷下

隱夫玉簡撰

姜澄者不知何鄉人也常策一杖杖頭唯有一卷書客長安近一年每與輕薄之流遊處自稱得道人葉靜先生知之訪而責曰君何自稱得道人既不潔其身滌其神而又塵雜其遊處焉何哉澄曰我身無穢又奚潔也我神無撓又奚滌也不得道稱之即非得道稱之又何非也葉靜曰何謂身無穢何謂神無撓何謂得道邪澄曰夫荆玉溫潤自然也雖與衆石同處故不穢又何異我身也濟水澄清本異也雖與濁河共流亦不撓又何異我神也大道也固無欺詐我既得道言之即達大道也葉靜又曰何謂達大道澄曰可道之道非常道也常道即大道也我若以貴者爲貴以富者爲富以賤者爲賤以貧者爲貧即非道也我知天地間人自區別殊不識道之本也道之本而生一氣一氣而生天地人及萬物今三才備萬物觀其由道也我達之是以狎富貴不以爲尊處塵雜不以爲卑但兀

然混同而在人間此豈不謂達也葉靜笑曰我以為君久在人間不復能論道矣君其出塵寰塵寰不出隨君之迹澄曰我出塵寰非待君之言我已出之三百年也葉靜曰君既出塵寰何在塵寰也澄曰我暫來塵寰非不出也葉靜指而退澄牽其衣而謂曰君與今天子友也而友爲人主君不教人主之道而反以仙家之事誘之必欲使不治人而好仙也君之非故不得以我之爲非也葉靜復笑曰休飾狂詞澄曰君休信狂迹我嘗休飾狂詞焉言罷俱笑而分手後數日不知所在人有見之乘鶴度關而去者

沈敬浙右人也自幼學道後遊鍾山遇一老姥謂之曰爾骨秀神清心復正後十年當得道但修鍊之仍與一塊白石教之曰但以山泉煮此石不停火待軟如藥劑即食之若未軟不得停火言訖而不見老姥敬奇之因於山中結茅而居汲泉以煮此石不停火十載此石不軟敬乃不煮忽一夜此老姥復來謂敬曰始教爾以山泉煮此石今何不煮之敬曰我自奉教十載煮此石而不可食老姥曰此石非常石不可得也君既得之何不虔誠息慮以煮即不待十載而可食若信之與疑交生於心雖煮之十載亦不可食也敬曰此石何石也如非人間之石自然有異可食既有異又何必煮之然後可食也老姥曰此石是瓊樹之實也不知誰得遺於此山被人間深毒之風吹之故堅硬若以山泉虔誠煮之即復軟軟而食即得道矣敬乃拜謝之遽又不見其老姥敬遂齋戒汲山泉以煮之至明日其石忽軟仍香馥滿山敬沐浴而盡食之頓變童顏髭髮如漆仍心清體輕山人皆怪焉後數日不見所之

蕭寅吳人也儀貌瓌偉常遊天下之名山自幼食松柏仍餌生朮不交世人性復孤子忽因遊終南山山中有一少女來問之曰我亦學道之人也今欲少問道中之事君其爲我一剖析焉寅曰奚問邪少女曰我聞之自古修道之輩皆言去聲色而獨彭祖述陰陽交接之事何是非邪寅曰我平生未嘗接一

女子言論何逢女子此間也少女曰昔彭祖得道之人猶容姝女之問今君何不容我一問邪寅乃曰昔黃帝令姝女以問彭祖陰陽交會之道彭祖之對亦不非也蓋知黃帝未能去聲色故因而對之亦實非彭祖有九妻也自古學道者未有不云上士別牀中士別被服藥百裹不如獨卧也如此則豈獨彭祖之一言可信也夫神聖尚待至一而感況神仙之道未捨世慾而欲求也少女曰古之有全家昇青天者有與妻俱之仙者又豈無世慾也寅曰此即是神仙之家降於世而復歸神仙也非是百世修之而昇天之仙也少女曰知其然也我一女子可修習而得道乎寅曰可爾之身稟陰之氣而生託陰之氣而活如自守陰之道而不犯陽自然得其道也少女謝而去之寅遽出終南山以入蜀山山中人見其儀貌有異多來問之寅又惡之而出以遠遊終不知所在

波上見人即復沒業既來水邊人有謂之曰此水中有一異魚君識之邪業笑而謂曰非魚也須臾之間此魚浮出於波上五色燦爛其人復問曰此既非魚何物也業曰此即是琴高之所乘白龍也琴高以此龍來命友也人又謂曰琴高何人也業曰琴高者神仙也昔曾暫出於人世或乘此龍於水中琴高恐世人見龍懼故變此龍為魚由是世人以為琴高控魚也我今見此識之人又曰知琴高命友者何也業曰琴高好流水又遊於水今既出此龍於波上足知命友也業乃入水於波中抱得此魚便於岸上結草以覆之至其夜人復來觀之業與魚俱不見焉

於長安中間有神仙之女吹笙於此水故遠來欲一觀玉容少聽鳳笙不期水邊寂寂杳無人迹何今日不出蓬島而暫來此邪方欲盡興而回俄見此女獨乘小艇吹笙自遠而至俄又出小艇遊於水邊懿乃漸前進而言曰神仙女數年比遊何待也吹笙女回顧懿微笑而言曰待君也懿因謂之曰我常多憂患不喜人間欲遊物外又不知爾數年待我也吹笙女曰人間何足戀少年樂未極已老矣老又有終爭如他仙家僻在蓬萊處金銀宮闕之內駕鶴乘鸞以自嬉遊息芝田會瑤池而又本不老亦無終何憂患之能關慮也懿因戲之曰爾能容我為一攜笙之奴乎吹笙女笑曰君猶未省為老奴已多年也吹笙女即命懿同入小艇去之後經數日吹笙女與懿復同來此水邊遊水邊人有見之者懿謂人曰寄語長安中少年我今被吹笙女攜挈而遠遊不復遊長安也言訖與吹笙女復共入小艇吹笙而去自後不復來故不知所之也

景仲者鄭人也幼好道但遊諸山以採藥服之未嘗寧處後過陝州欲西訪藥焉陝州有一老父問之曰君何遊也仲曰我平生好服餌神仙之藥常遊名山以採藥今亦欲西訪藥也老父曰君不知神仙之藥在十洲也非人間之山內有之也奚訪之仲曰老父自不知古昔有餌木餌黃精而得道者木與黃精豈自十洲採得也夫人間諸山之內神仙之藥無限但人自不識復又不能一其志而服之且十洲之地爭如中華也中華在天地之中有天地中正之氣故萬物華而人不變夷中華之人得道世世有之且不聞蠻夷世世有得道之人也足以知十洲之事是漢武之時人妄說也又何信哉我誓於中華諸山內採藥餌之耳遂西行訪藥後二十年復東過陝州仲已鬢髮斑白未獲靈藥又有一老父問之仲曰我前西行過此一老父問我採藥之事今復有老父欲問我邪老父曰前老父問爾之藥今老父欲問爾鬢髮斑白又何怪仲曰我自幼好道為天地間人四十九年矣

訪山尋藥力倦心疲未能出人間故鬢髮斑白老父又奚問邪乃不顧而東行入泰山餌茯苓十餘年不出一夜忽鬢髮俱黑又體輕殊常因出山西行不覺一日至陝州乃復訪二老父尋皆偶之二老父俱笑曰訪藥老人已復少也仲方欲言遽不見二老父仲亦遽遊不知所之也何寧者西蜀富人之子也少好道棄家逖訪天台山學道十餘年復來家人問曰學得道邪何復來邪寧曰我自入天台山方悟道故不學而得之家人曰道可悟邪寧曰道不可學我今知之道止在悟我今亦知之矣道本在人之性也人之性有道即終得道人之性無道即終不得道我性有道固得之也既復在家唯食鮮果飲酒焉其後每至木葉落塞鴈來風悲日慘即歎曰人間須有此時以傷懷人也乃策杖而去及其春至景和紅花綠葉堆林積叢即又復來後因鄰人有死者聞哭之哀以問家人家人白之寧遽起於杖頭取一藥囊出一丸丹急使家人令納在死者

口中鄰人死者得藥尋復蘇寧乃辭家人曰我今復遊天台不來矣爾各當自愛又出囊中藥普與家人謂之曰且可百歲既去人有郊野見之乘一虎去者果不復還得藥者後皆及百歲焉姚基者魏人也性奢逸不拘少好道因遊洞庭逢一道人謂之曰爾奢逸不自檢束又好神仙之道何也基拜而言曰我好奢逸者身好道者心我終求奢逸之事以樂我身亦求神仙之道以副我心道人曰我今俱授之與爾爾當俱勿授人基再拜之道人因神中取一小玉匣內有書一卷以授基曰讀此盡得之也基因跪受以讀見九轉神丹之法復有燒金之術基問道人曰神丹服之得道信有之變銅鐵為金有之邪道人曰銅鐵皆可為金者亦猶人之賢與不肖皆可為仙沉銅鐵純一之物也君但鍊藥服餌以燒金焉基因復魏以居鍊藥燒金數年間家大富仍却老而少每至花時月夜即以旨酒佳釀命賓侶狂歌醉舞或選幽景以出遊即乘駿駟以女

妓絃管後隨盡興而方返至於家人亦被輕暖厭百味矣後忽因出遊復遇昔洞庭之道人基遽拜而問之曰吾師何久不來邪道人曰爾之奢逸未息固不來適過此偶覩君之面基曰我奢逸不見吾師來固未息道人曰今當息之基笑而與道人俱至家廣陳錦繡出珍寶命酒有絲竹盡其懽醉明日道人與基皆不知所在家人無以求尋焉

○ 疑仙傳卷下 ○

華陽陶隱居傳序

薛 華 孺 子 賈 嵩 撰

辨二

或曰貞白先生在梁書高士傳今而為傳何謂梁書云陶君諱弘景字通明丹陽秣陵人也母夢兩天人手執香爐云云齊高作相引為諸王侍讀雖在朱門不交外物永明十年脫朝服掛神虎門上表辭祿詔許之公卿送之征虜亭供帳甚盛咸云江東以來未有斯事於是歷名山尋訪仙藥每經閭谷必坐卧其間特愛松風庭院皆植及梁武即位書問不絕月常信教時人謂為山中宰相大同二年卒時年八十五顏色不變屈伸如常云云今具此傳於注者蓋明其簡略也此又兼鄭暉史傳陶傳同錄於此曰梁書之傳先生猶史記之述老氏也其叙事頗刪略俾仙聖行業不得昭著而紛綸其間韓非與老子同傳論之者多矣而梁書列先生在沈麟阮孝緒范元琰馬之問矣夫先生識洞古今事炳山世神棲寂泊精禱玄樞定三品以點浮偽分五域以鏡區貫著隱訣以析網目述真誥以

旌降峻激揚隱微之外馳騁清虛之際乃玄中之董狐道家之尼父也況發揮墳典游泳百家窮天地星辰之文究陰陽龜筮之術至於鯨死琴出麟闢月蝕銅山崩而鐘鐸響蠶珥絲而商絃絕龍吟雲起虎嘯風生此性理冥濛余謂之感先生商榷其微非感非應夫然將叔向子產京房郭璞擬先生以為博乎齊永明十年謝詹事淪自吳興聞先生棄官隱華陽乃於道中作傳謝詹事作傳云先生諱弘景丹陽人也幼標異操聰明多識五經子史皆悉詳究善書得古今法在人間便有乘雲御龍之志不肯婚宦以資營未立且薄游下位為宜都王侍讀雖處朱門恒獨居一室罕接外物晝夜尋寫研集奇奧二十餘年稍就服食殆通幽洞微其事多秘於是業用漸進乃拂衣止於茅山焉觀其神儀明秀眇眇有光形細長項耳間矯矯顯然異眾矣謝傳記此此傳並梁書彌為脫略吾不解謝論既聞先生隱山甚懷嗟賞乃忻然道中作傳所宜詳究功行而卒然如此也陶翊乃云王

右軍作許先生傳者正如此也傳疎略不用
陶翊乃作本起錄至齊末遂已亦事多遺闕
翊先生猶子也本起錄乃粗似詳究而惠文
氣太早叙述繁雜自云今此未便爲傳且撰
行業以備遺失耳不知何緣至宋元元年遂
絕也其後潘泉文復踵其作泉文先生門人
也自云陶翊本起錄記於齊末從此已後二
十餘年並未有趣記謹且隨年載錄後撰傳
人自更詳述始天監元年至七年夏四月于
時先生改名氏潛訪遐嶽天監七年夏四月
先生改名南遊其事具於傳中旁無知覺於
是泉文又絕筆於此嗚呼前二傳既太簡謂
梁書及謝詹事所作傳門人編錄復無條貫
俾君子辟世之道清真養嗣之跡其幾乎磨
滅歟乃於登真隱訣及真誥泰清經先生文
集揣摩事迹作三卷焉

華陽陶隱居內傳卷上

薛 華 撰 子 賈 爲 撰

先生諱弘景字通明丹陽秣陵人也

本起錄云宅在白楊巷

其命氏自帝堯帝堯治冀州世居平陽西漢

丞相青翟東漢司空敦皆赫赫有名論董卓

燒雒陽十三世祖超始渡江是爲丹陽人七

世祖溶仕吳爲鎮南將軍

本起錄云即交州刺史璜之弟也

封句容侯吳滅入北永嘉之亂南遷

本起錄云世祖溶第三子也

永嘉中爲東海王越司馬領屯兵隨王出許

昌因敗仍復過江爲大將軍王敦參軍敦乃

啓分屬籍晚乃起爲車騎丞相參軍不就高

祖毗清拔尚氣不肯仕曾祖興公爲郡功曹

本起錄云多才藝頗營產殖郡功曹察孝

廉除廣晉縣

祖隆長七尺五寸美姿表善樂術以拯救爲

勞從宋武帝破姚泓有功封晉安原豐侯

本起錄云顏峻就求宅以益寺弗與因解

官見諧削爵徙廣州後稍遷新會郡

父貞實字國重爲江東名人由南臺侍御史

作江夏孝昌相

本起錄云亦善騎射解藥術博涉子史美

風儀與蕭思話王劄劉秉友善元微四年

冬銜使虜庭通鄰國之好作游歷記并詩

初先生母郝夫人

本起錄云夫人東海人諱智湛及終有異

焉

夢青龍自懷而出擊空東上

本起錄云有青龍忽從身出直東向上昇

天梁書云夢兩天人手執香鑪來至其所

已而有娠與此頗異本起錄是先生猶子

翊所作其究詳事理豈漏於史官乎

逐視之無尾明日謂人曰當生非凡男然必

無後或對曰無乃爲仙乎

本起錄云既覺密語周旋必當生男兒應

出非凡也

以宋孝建三年四月三十日夜半先生誕焉

本起錄云歲丙申日甲戌此年閏五月明

旦便是夏至

詰旦母沐浴體忘微苦乃起先生始生無驚啼始坐殊整惠五六歲時酷愛學書雖戲弄羅前唯執筆硯八九歲時讀書千餘卷頗善屬文讀葛稚川神仙傳見淮南八公事

本起錄云鄉親鞠氏舍得葛洪神仙傳弟六一卷

夜抱卷與寢乃曰攀青雲白日其何云遠繇是就重信悟宵然有方外之志矣神表孤邁膚色哲澤每出路人輒聚觀咸曰陶郎是玉京中落仙乃執羽扇以自障蔽雖冬月不除年十一作王昊博士

本起錄云昊是司徒長史釗之子

作昊對答書啓如老成人十五自南州還

本起錄云先生年十三父隨吏部尚書劉秉之淮南十五歸都寓慈中外徐冑舍

作尋山誌

其誌云云具集中

先生既冠而不肯婚

先生澡潔去嗜慾蓋一生全不遁於聲色

也

且曰吾欲蕭條其魂也長七尺二寸疎眉長額右肩有紫誌如錢

按金闕後聖列紀青童君云此皆仙相也右股有數十黑子闕干如斗形不樂葷羶唯進青飢飯

清虛真人傳內有方以南燭為主蓋上仙所服餌也

酷愛松聲居必手植常嫌讀書未滿萬卷乃以內書兼之於是少出州府辟召皆不起初父與劉秉友善秉為丹陽尹其子侯少知名酷好文學先生復與之遊出則共載食乃同味于時宋氏失德蒼梧王遇害

宋書云廢帝昱明帝長子也既即位荒亂酷暴以齊高帝復為射的既遇害進謚蒼梧王

蕭道成立順帝仍執政荊州刺史沈攸之擁兵不從道成入守朝廷

宋書云順帝第三子齊高既專廢立不從者半齊高乃入守朝廷

司徒袁粲據石頭謀誅道成劉秉預焉遂奔石頭以其屬隨先生與韓資麋浚同管文檄道成勒兵攻破石頭

宋書云司徒袁粲據石頭謀誅道成不果旋見覆滅本起錄云先生年二十二隨劉丹陽入石頭就袁粲建事先生終始久要不遺舊故雖危疑患難不求自退也先生乃得出侯為沙門間行

本起錄云爾夕城潰侯與弟佺逃走向京為人所獲死建康獄人莫敢視先生哭其尸躬自收殮

本起錄云先生躬自殯瘞葬香硯舊墓先是侯與江敬緒炫等俱為順帝四友作宋德頌連珠七警當世稱絕至是遂亡其本先生乃喟然歎曰人無愚智同盡百年所貴身名遺芳寄世惜乎劉生名迹俱喪

本起錄云劉侯既石頭奔潰文章皆零落先生欲為纂集竟不能得明年道成封齊公假黃鉞天命識所歸矣先生既常結劉氏內懷憂傷

本起錄云先生自石頭出仍欲棄世尋山而正值宋齊之際物情未安既世結劉宗恒懷憂傷

乃因紀真末見於新亭大相推愛俾居帳內沈攸之平從還東府仍爲其子侍讀

本起錄云沈攸之平從還東府使爲第五息華第六息嵩侍讀兼知公間管記事時年二十三除巴陵王侍郎

齊高帝既登極除太尉豫章王侍郎

梁書云齊高帝作相引爲諸王侍讀誤矣

○先生知爲帝之左右者排逐并除不授明年隨安成王出鎮石頭世祖初拜振武將軍宜都王侍讀齊世侍讀皆總知記室參軍先生於吉凶內外踐啓疏牒莫不絕衆凡濡毫落紙人皆楷模之

本起錄云先生於吉凶內外儀體表筆委及踐疏啓牒莫不絕衆數王書佐典書皆來承受以爲准格

數王侍讀咸切齒讒忌先生處之怡怡如也桂陽王登雙霞臺置酒召宗室侯王兼其客

先生從宜都豫焉桂陽採名頌號各令爲賦寔十題器中先生探獲水仙大愜意

其賦云云具集中

沈約任昉讀之歎曰如清秋觀海第見瀟瀟寧測其深其心伏如此尋除左衛殿中將軍

時論稱屈處道經亟言於武帝帝曰先帝昔親作此官裴松之從此轉負外郎吾之重也卿那不知

本起錄云時年二十九青溪官新成帝銳

意遊宴先生拜表獻頌于時稱絕

○忽一日於石頭恍然若有所適無所覺知者七日乃豁然自差云觀見甚異事秘不得知本起錄云年二十九於石頭中忽得病不知人不服藥不飲食經七日乃豁然自差說多有所觀見從此容色疲悴言音亦既

宕闌緩者矣

是歲東陽孫遊嶽始授先生道家符圖雖云相承真本而歷經摹寫意所未愜明年遊茅山

本起錄云戊辰年始往茅山按先生本按

訪經法而拂衣長往經始於是行也

獲前真楊許興寧中手書

按真詰晉興寧三年太元真人茅君紫陽真人周君紫微夫人九華安妃及諸真仙並降楊君義於茅山及許長史父子皆同傳授而楊許感降皆有文迹炳然先生於是併獲蓋天付其人也

誠心感躍如親觀靈人乃尋三真往來書疏知所獲者猶多亡闕更搜訪遠近於是啓假而東謁樓惠明於大洪山遇杜京產於太平

山又尋沙門鍾義山於宛山皆卑辭膝請獲真人手跡十餘卷遊歷二百餘日乃還都

本起錄云遊歷山水二百餘日乃還

未幾復往更求遺迹多有所得爰及東陽長山吳興天目於潛臨海遂安諸名山無不探歷身本輕捷登陟無艱每遇崩崖斷壁但褰褐跳越或逢幽巖深澗便吟嘯盤桓盤桓坐卧採掘花藥泊猿鳥吟棲尚不能去往往獨宿麋鹿中常言曰見朱闌廣廈雖識是華樂而初無欲往之心望高巖廣澤亦知此難立

正自恒欲往就不解所以必是緣使之然還
都由振武將軍除奉朝請先生為兒時每言
朝市非樂既長大值宋齊相授見時之未可
遂棲下位盤桓風火及是知兵災紛起乃振
衣東顧曰去矣常言大天之內復有三十六

洞天

茅傳云大天之內有地中洞天三十六所
又八海中諸神山皆有洞宮或方千里
五百里非三十六之例

江左伏龍山乃其第八謂之金壇華陽洞漢
有三茅君得道實居之吾其長往於此仲尼
云隱居以求其志行義以達其道吾聞其語
未見其人我今日義達無復其方請從求志
之業乃自稱華陽隱居

本起錄云絳人間書疏皆以此號代名

亦猶士安之玄晏稚川之抱朴是歲永明十
年也

本起錄云壬申年時年三十七

行有日矣約左右令先出都吾辭省已乃抱
朝服掛神虎門襲鹿巾逕出東亭因與王晏

別語及此事晏云主上性至存嚴治不許人
作高奇事脫致忤旨坐自貽咎便恐違卿山
志如何先生默思良久曰吾本為身非為名
若有此慮亦奚如此為於是不詣省直表辭
而已

鄭暉史傳云先生永明十年脫朝服掛神
虎門上表辭祿詔許之此乃知其始而不
知其末也表云云具集中
表既入詔答

詔云云具集中

將行與宜都王別彼此嗚咽各不能發一言
左右莫能仰規或謂宜都王云王相愛重如
此即聽其去王云今為天下勝事天子許其
不臣吾何敢然以裘鏡贈別給在山吏役數
人

本起錄云先生昔為安成宜都二王侍讀
而通與諸王少長款狎武陵鄱陽桂陽衡
陽皆眷遇殊常每一往輒言話終日永泰
之世慎避形迹恒示踈退由是無聲累宜
都幼有識度且待受最久彌盡親密先生

亦竭誠陪贊及聞先生當辭世絕俗屢致
涕泗臨行告別云云或謂宜都郡卿聽其去
王曰近武陵欲引其領郡五官我苦論得
免慎之三日不與武陵相見今為天下勝
事我豈得以私情割其久仍停省餞集明

旦裘鏡九種贈別給衣書車乘出使親侍
左右五六人送至湖熟吏役數人長給在
山觸事營理書驛旬朔武陵桂陽鄱陽亦
各贈詩并諸致遺人力經紀云云

先生既命舳舻東川齊公卿並送於征虜亭舉
酒揮袂皆云江東比來未有此事乃今日見
之二踈聚金歸田園亦何得稱高先生乃曰
秦皇漢祖楚羽吳策並勢橫海外雄架天維
寸氣不續則為一丘之壤況乎二三子之徒
也高居雲嶺訪真幽府正為此耳日暮乃別
執御者亦獻款送者相謂曰孤鴻已摩天去
吾儕戀稻梁跳躑網羅中明年齊大亂西昌
侯蕭鸞弑其君於是乎知先生預見之明也

華陽陶隱居內傳卷上

初二

十三

華陽陶隱居內傳卷中

翔三

薛 離 孺子賈萬撰

初先生以大茅中茅間有積金嶺其地可修上道

真誥云大茅中茅相連長阿中有連石古

時名為積金山其處宜人住可索有水處

為居室靜舍乃住快可合丹以修上道也

乃於嶺西立華陽上下館

登真隱訣云上館以研虛守真下館以鍊

丹治藥

襲紫皮巾幘三易練條褐

集卷云有人遺紅絲幘先生責而還之乃

云近有人遺晉安三易練甚佳褐者著條

為之左九條右十條法二景也

神棲寂泊精驚玄極雖蕭蕭獨往眇眇真貴

而親舊書驛遠近參同蓋未能抑絕常題桐

葉作詩寄宜都王其末云願為雙白羽長拂

攀前塵未幾夜夢宜都云已亡復二年當受

生先生曰何往王曰未知也因問鬼神中事

云云乃相執悲別先生更留云指痛不得久

停明日俾出都參訪已遇害矣

本起錄云永明十一年宜都出為南豫州

鎮姑熟延興之末例非天命先生以十一

月十八日忽夢王云云先生眠覺悲怛驚

怪明日使人出都參訪云以此月十日致

斃矣

明帝即位深相喜賞詔勅日至備安車厚禮

迎出居蔣山先生拒之乃已

本起錄云宋明帝三年二月勅迎先生出

居蔣山先生固辭并因江祐陳啓乃得從

此使人往來月有數四餉賜重疊隨意所

求先生亦每事抑遣

乃於上館更建層樓永元初乃登樓長靜

本起錄云四年築架層樓規欲杜絕永元

元年移住便與物頓隔外間簡牘亦削去

於是便與物頓隔晨昏供侍一兩人而已潛

光隱耀盡無為而無不為也所居堂靜榛蕪

不生常患去水稍遠至是飛溜湧出靈芝秀

於下館甘露被於昭臺毛龜泳於前塘白鼠

見於藥屋皆致真之鉅符瑞聖之丕迹是歲

命弟子戴坦秉策執簡授門人吳郡陸敬游

建連石之邑并十齋

世謂之錫仙謂之齋九者陽極君之位也

十者陰終以之制焉孔子曰周有大齊善

人是富故以十齋稱焉

為棲靜處士

其文曰云云具集中

時東昏不君江表危動

齊書云廢帝東昏侯諱寶卷既即位殘忍

酷暴書契未聞剝剔孕婦格煞百姓每一

月凡三十餘出往無定處東行驅北明旦

應出却即驅逐吏司奔馳叫呼盈路鼓聲

所聞便徒跣奔走犯者皆手刃工商廢業

樵蘇路斷或委病棄屍不得殯葬萬姓嗷

嗷甚乎塗炭之上

征東將軍蕭衍軍次石頭東昏寶臺城義師

頗懷猶豫先生上觀天象知時運之變俯察

人心憫塗炭之苦乃亟陳圖讖貽書贊獎

本起錄云先生目永元已末深記向晦聞

義師西下日夕以觀及屆于新林便指麾

替遺弟子戴猛之假道傳送行達見焚橋不能得造至登石頭復使李嗣公仰素即獲聞答時十一月朔日也臺堞猶自嚴固時人懲崔氏覆轍多懷猶豫先生不疑庶事必決也

受封揖讓之際范雲沈約並秉策佐命未知建國之號先生引王子年歸來歌中水刀木處

王子年歸來歌亟論水刀木皆是美詞兼引王君回文識焉榮牽三詩並盛稱梁字為應運之符

及諸圖識並稱梁字為應運之符洎將昭告復令用四月丙寅

本起錄云至春末夏初當就昭告沈約宜旨又請尅日先生雖踈數日而正據四月

八日丙寅也

乙丑夜凝雲灑雨朝廷懼之詰朝昇曜既而復雨

本起錄云乙丑夜凝雲灑雨朝廷深慮致疑詰朝遂明登壇焚燎受終禮畢鑾駕還

宮百司陪慶冥夕之間雨復滂沛朝廷慨脫莫不謂天命矣

梁武帝即位彌加欽重使朱嗣之及舍人黃陸賁勅至山因召先生畫二牛一在野甚自得一衣以文繡有人扣刀執繩以隨帝曰是

將學曳尾龜寧有可致之理乃與先生書曰今萬乘為累欲東向修弟子禮其可得乎因問享國之期曰吾曆數奢促如何先生啓云

再環辰次又云光武一去四八今則直上七七然後乘彼白雲帝在祚四十九年其預軫來

先皆此類也先生眇尋上道先括綱領若梯景營雲之速無如刀圭潛心注想唯朱黃為關

營九轉丹砂雄黃最為主領于時後魏及宇文泰強盛武都路梗雄黃不可致也

天監三年夜夢有人云丹亦可得作是夕帝亦夢人云有志無具於何輕舉式歌漢武帝

久之方悟登使舍人黃陸告先生想刀圭未就三大丹有闕宜及真人真心無難言也先

生初難之吾寧學少君邪帝復以夢旨告焉乃命弟子陸逸冲潘淵文開積金嶺東以為

轉鍊之所鑿石通澗水東流矣先生以謂丹品蓋多黃帝九鼎九丹

登真隱訣云此方泰清中經而治變駁非後人能究也

王君虹景

王君即清虛小有真人也

左慈九華

真誥曰左慈得鑪火九華之益即是也方未顯於世

五靈七變神精召魂之屬

此例凡三十許種止還年及老遠為地仙耳

或方法外略難可應用或品例卑近不得高

通前所列諸丹皆泰清中小法非上清太極

冲虛控景之術也

復有二金液亦管含有礙

登真隱訣云一者太一金液抱朴子所注此乃可就而闕在消石兼無真人手跡彌

所未安二者即泰清金液此乃安期所傳

而用鹵鹹虜鹽此世難多兼祭法用牢俎
以為憚礙之也

高真上法有四而四藥未顯

世雖有其方疑有假附

琅玕淵重

登真隱註具有其經是上清法

曲晨精妙

登真隱訣具有經方是太極法二法非唯
下識未敢措心亦並須虜鹽消石為難致
也矣

○唯九轉所用藥石皆可尋求製方之體辭無
浮長歷然可解乃緘願畢志

登真隱訣云九轉神丹昇虛上經是太極

真人傳長里先生長里先生傳西城總真

王君王君傳太元真人也

四年春先生出居嶺東使王法明守上館陸
逸冲居下館潘淵文許靈真楊超遠從焉是
歲有事于鑪燹明年元日開鼎無成

集卷云天監五年春正月旦開鼎唯近上
二黃輕華已飛其餘丹青始緣邊煥赤也

重九復燧亟多不偶

本起錄云九月九日復營自起火鼎多細
圻兼山中雷震慮精華驚歇更加補治不
敢烈火也

限竟開鼎復無成

本起錄云年末限意開鼎下鼎繞

先生平居凜然如齋戒自攝心轉鍊彌能謹
萬至於燃鼎用陽燧日中取火蓋其精如此
性少睡未嘗晝寢夜坐往往及曉常於月明
讀書及是為積煙所薰

○登真隱訣云四年初營自起火至限竟用

礬穀糠凡一千二百斛藥屋入夜復慮精

物干觸必宜閉戶其煙氣蓬勃可知矣

火下欲不見字帝知之送波律燭

集卷云波律外國香名燒此可以明目也

先生以為營非常事宜聲迹曠絕而此山密
邇朝市巖林淺近人人皆云有望是丹家酷
忌

登真隱訣云此事朝野聲聞顯著人人皆
有望此最犯戒忌之大也

姑改服易氏遐邇東邁當去建晉中以其山
海深曠民不知道見所云為無關視聽吾若
委形枕杖非不可為是獨濟小道

委形枕杖此尸解下法蓋不得旋及故鄉
無由更議營合

若脫爾便逝不可以為教迹乃以意啓梁武
梁武難之

集卷有帝答書知欲徒卜想諮請幽勝謀
及著龜但遷徙之日為當使人為當使鬼
猶躡躡因地其不滅也

○先生撰意直往不復疑異唯是心計旁無知

覺稱靜齋五旬一皆斷絕乃以夜半出山天

大晦冥人莫能見負笈以從者二人改名氏

曰王整官稱外兵

真人所為非凡識所辨此名氏官位當有

玄旨耳

初欲入剡或度天台至浙江值潮波甚惡乃
上東陽仍停長山聞南路有海掠不可行稍
進赤巖宿瞿溪石室夢人告云欲求還丹三
永之間乃自思惟知是永嘉永寧永康之際

先生初造朱陽創立基址在永明永泰永元之中今夢旨當指此耳若是永嘉永寧永康何管理之不證耶

因是出訪村人咸云過此室上百餘里至永康蘭中山最為高絕詰朝乃往經紀山良可

居唯田少無議聚糠

集卷云此土居人合把稻旦旦持春以給日用收糠不可得也

後入楠溪青嶂山愛其稻田乃居會荒倫連歲不諧兼寇掠充斥

集卷云先生因此行皆不偶自緣海數郡從來晏如二三年來無山不寇先生亦就田自作復值歲飢

乃曰嘗聞五嶽圖云霍山是司命府必神仙所都

名山記云霍山在羅江縣高三千四百丈上方八百里東卿司命茅君所居

乃自海道往焉過牛岵出海口東望扶桑乃慨然歎曰所謂觀海難為水游聖難為言平生俠無學而不學今日一皆休矣霍山連略

當六七百里隱隱如陣雲巖嶇驚拔特異他處先生足躡真境心注玄關大有靈應感對事秘不書亦人稀田寡復以無糠為患

集卷云先生深歷四面無議投足復自海道還永嘉至太溜形勢殊好

登真隱訣云壬辰年六月便乘海還永嘉木溜嶼乃大有古舊田墟孤立海中都無人其甚可營合

會上使司徒慧明迎還舊嶺登真隱訣云八月至木溜見其可居始上岸起屋十月司徒慧明至于時願得且停

木溜與慧明商推往復積日永不敢許於是相隨而還也道中書勅相望仍欲先生至都下先生至晉陵辭以疾乃還華陽上使管朱陽館以居先生三讓之詔不從

登真隱訣云甲午年勅買故許長史宅宋長沙館仍使潘淵文與材官師匠營起朱陽館

自於館東建藥屋靜院云躡玄洲之跡

登真隱訣云昔李明於此下合九鼎丹以

外玄洲發掘基址屢得破瓦器乃其舊用自南霍還鼎事累管皆不諧乃非都無彷彿每開鼎皆獲霜華門人僉謂此為成先生驗丹家說云琅玕丹成其飛華光彩三十七種

曲晨丹成其飛華百雜亂色光照流煥玄炁徘徊太清金液丹成其飛華狀奔月墜星雲繡九色其氣似紫華之見太陽其精似青大之映景雲九轉丹成則飛精九色流光煥明不爾未成也累年所得皆輕華霏霏或光明

廉稜如霜雪無雜色十八年所獲嚴鐔光華過於前者皆似五六出華劍鋒鴈齒而下滓枯礧決黑碎之如星焚作朱黃煙炁當猶火勢或羸或猛朱黃不得飛翥時有鄧郁之居南嶽

登真隱訣云宣都夷陵人天監四年湘州刺史楊公則攜下都啓聞進見權住蔣山後勅給九轉藥具令還山營合

勅給九轉丹具令營合限竟開鼎上有鍾乳霜雪光明照耀永無雜色鄧不以獻奉自餌

之

丹經說云乙未正月開鼎云上有鐘乳霜雪下津作九紫黑色多分人服之而飛華都不與人亦無獻奉獨將往南巖間一皆藏之也

乃云病病八日云是夕衝嶽本風雷忽暫明朗

登真隱訣云鄧先生初云顏色如故後三日安與中停置積日尸不毀壞

丹訣云丹成無雜光彩是毒丹餌當暫死須史起去

丹經云丹數限未色診不全皆名毒丹故太清云頓服一兩亦即暫死昔魏伯陽與弟子合丹成共一人服服亦死餘人行走比還已去也

先生有乘雲御龍心自云年十二時於渠閣法書中見却惜以黃素寫太清諸丹法乃忻然有志及年二九授上道見上清太極法遂鄙而不為奚況餌毒丹求遁去乎累年所得一皆埋藏而十八年飛華雖無雜色光彩特

異欲試作黃白以驗成否

丹經云取鉛十斤著鐵器中猛火煎之三沸投丸轉之華一鉢於鉛中攪之須臾立成黃金也

是夕攝心乞感忽見有人來朦朧如煙雲中

語云不須試試亦不得今人多貪忽開金玉可作便求竟毀天禁正此是成但未都具足仍復作歎聲云世中豈復有白日昇天人漸服自可知言訖飄然東去於是乃不試先生常云去世之日如茅太元之發咸陽

太元真人傳云真人發咸陽時約親友鄉人其日皆至有珍饈異樂自空虛而至既而從千乘萬騎而南人皆瞻觀也趙廣信之著列白

葛稚川神仙傳云趙廣信於剡白山白日

昇天

欲以曉悟迷方永題竹史從來感遇正恐挺運潛嘿不得從志至是乃歎曰昔聞幽說云仙障有九名居其一使吾不白日登晨者蓋三朝有浮名乎南真高尊既非輕舉

南真紫虛元君魏夫人也以夜半解化矣

小採蕭龜復是變解

小採許長史子玉斧也因禮拜乃變趣

玄師舊轍誠宜仰遵也魯通五年復塗鼎起火明年正旦甲子開鼎光悉照燭動心煥目

形質似前者而加以彩虹雜色始天監四年初有志於此及是凡七營乃成先是吏部尚

書謝覽夢人告曰華陽先生得道未久職位且掌錄籍無幾何有女子姪錢亦居華陽師

事先生授經及符圖忽一日辭先生問何之錢曰上賓于金闕先生曰吾門人先吾去者

數矣錢曰師當為蓬萊都水監先生乃過嶺送之因贈詩云云先生晚歲眸子忽爾正方

紫陽周君傳云君常於市中遇黃泰者見其眸子正方乃知是仙人因求乞長生之

術乃自云是玄洲上卿蘇君也或云眸子方壽萬歲

顧盼皆有奇異光象文章氣調彌更英逸所居樓雖入室弟子不許窺伺也在世八十一年以梁大同二年丙辰三月十二日癸丑解

駕遠世其曰詰朝作告逝篇示其門人其篇云云具集中

已時恬然乃去文體柔弱顏色不變異香奇靈繚繞山谷將歛乃見空衣

變解之道初宛然見尸存存未幾但冠劍

及空衣存耳

十四日寔虛柩於雷平山梁武帝謚曰貞白先生先生以猶子松喬為嗣仍居華陽先生在世所著書

學苑一百卷

孝經論語序注十二卷

三禮序一卷

汪尚書毛詩序一卷

孝子內外集四卷

玉匱記三卷

三國志贊述一卷

抱朴子注二十卷

世語闕字二卷

古今州郡記三卷

續臨川康王世說二卷

撰太公孫吳書略注二卷

負儀集要三卷

七曜新舊術數二卷

風雨水旱飢疫占要一卷

卜筮略要一卷

靈奇秘奧一卷

舉百事吉凶曆一卷

算數藝術雜事一卷

右一百六十六卷

先生在山所著書

登真隱訣二十四卷

真誥十卷

本草經注七卷

肘後百一方三卷

夢書一卷

効驗施用藥方五卷

集金丹黃白方一卷

服雲母諸石方一卷

服食草木雜藥法一卷

斷穀秘方一卷

消除三尸要法一卷

服氣導引一卷

人間却災患法一卷

右五十七卷

○齊梁間侯王公卿從先生授業者數百人一皆拒絕唯徐勉江祐丘遲范雲江淹任昉蕭子雲沈約謝朓謝舉等在世日早中擁篲之禮絕迹之後提引不已沈約嘗因疾遂有挂冠志疾愈復留連簪紱先生封前書以激其志約啓云上不許陳乞先生歎曰此公乃爾寒薄

夫樂鍾鼎者以巖谷為損遂戀山林者視絃冕為桎梏若論臻其微鍾鼎不及巖谷明矣曾育於榮辱之途翹足於羅網之間

與夫嘯傲林澤咀嚙芝朮可同日而言即以沈休文之貴盛先生歎為寒薄是知道德貴矣

唯奇謝覽覽年少自疑壽不永先生曰我在此不使君子如此也

先生作渾天象高三尺許天轉地靜列宿度數七曜行道昏明中星見伏早晚以機轉之宛與天會云脩道所須非史官家事又因流水作自然漏刻十二時循環自轉無勞守視先生冲深粹和性不嚴毅小大見之皆忻然

○樂悅而真儀靈烝自令人畏服門人承奉祇肅有如宮廷入山之後巾褐未嘗離體每云人之稟挺命錄實自懸天相相之棄捨玉宮文成之褫片侯服三茅之違親絕衛二許之遺室損形未必正由識見兼是為運所引我從來遇諸機際垂幾成而失永明中五過啓祿得輒差舛若不爾豈得今日之事身中既有仙相益使人守信彌篤而思識精深凡所尋閱皆人不至尤好五行陰陽風角烝候太一遁甲星曆算數山川地理方國物產及醫

方香藥分劑蟲鳥草木考校名類莫不畢該
常言我自不能爲仲尼而能教人作仲尼猶
如管仲不能自霸能使齊桓霸也

華陽陶隱居內傳卷中

華陽陶隱居內傳卷下

翔四

薛 羅 孺 子 賈 萬 集

宋宣和封詔

朕膺琅霄之景命握龍漢之寶符蓋將敷暢
靈音恢隆道化闡微言於至教薦休命于列
真蓬萊都水監陶隱居振迹榮羅濯精華闕
神交無累迹雖相於山中誠感夙通賦已仙
於海上顧德名之莫擬豈妙庵之敢忘尚都
顯號之榮永介涵生之祉可特封宗元翊教
真人

解真碑銘

邵 陵 王 蕭 綸 撰

夫夜光結綠非眩篋之恒珍逸羽翔鱗豈園
池之近玩寧期心於遠大蓋不知其所以然
也是以潁陽高蹈洗耳於唐朝漢陰貞棲滅
跡於周代盛德流風有自來矣應期而曜質
者其在茲乎先生名弘景字通明本冀州平
陽人其先出自帝堯陶唐氏之後堯治冀州
平陽故因居此龍馬見五色之符欽明表八
采之瑞光被于天下允釐於庶職洪源夏遠

系緒綿長漢興舍爲高祖右司馬子青翟任
至丞相後漢末南渡始居丹陽七世祖潛仕
吳爲鎮南將軍荊州刺史祖隆宋南中郎參
軍事父貞實司徒建安王國侍郎並立履清
約博涉文史先生含元精之和氣蓄凌颺之
雅資兼宣七善總修九德行仁蹈義嶽峙淵
渟嚮仞無以覩清濁不能測道風與星漢同
高勝氣與煙霞共遠六歲便解書能屬文七
歲讀孝經毛詩論語數萬言曼倩幼習墳典
公幹少讀詩賦方之於古彼有多慚是以岐
嶷流聲中黃著頌有鄉人得葛洪神仙傳見
淮南八公諸仙事乃歎曰讀此書使人有凌
雲之氣於是寢興諷誦晨昏不輟年二十七
爲宜都王侍讀總知管記事勝道求賢禁林
招士朝難其選咸曰得人阮瑀之書記不足
扶衡孫楚之辭才何以捧轂齊代好治宮室
方修苑囿青谿舊館更就起築仍奏表上頌
辭事兼美邁彼樂職之篇踰乎景福之製帝
省覽久之益以爲善除奉朝請恪居官次夙
夜惟寅春朝秋請是謂揅揅者也先生本不

希榮常欲辭退乃與親友書曰疇昔之意不願處人間年登四十畢志山藪今已三十六矣時不我借知幾其神乎母為自苦也明年遂拜表自解抽簪東都之外解組北山之阿同稷丘之棲隱慕留侯之却粒便具舟楫永言東邁朝廷錫問時賢餞別祖以二疏括茲四隱超然輕舉異代同符爾乃杖策遐征遊踐名嶽既而至于句容登於茅嶺以此地神仙之官府靈異之棲托往不知返遂卜居焉先生曰夫子云隱居以求其志行義以達其道吾聞其語未見其人今我義達無復其方請同求志之業故自稱隱居亦猶稚川之抱朴士安之玄晏倚巖棲影依林遁跡交柯結宇剡徑爲門懸崖對溜悲吟灌木深壑嶺嶺組織煙霞枕石漱流山禽無撓採藥偶逢野獸不亂逍遙閑曠放浪丘陵嗒然若喪確乎難拔燭齊未道喪天命既否水闊洛谷地震甲辰先生靜思冥數預識其先於是近遠書問悉皆杜絕昔乃聞之夏甫今則見之先生我大梁休運應期受天明命三辰開朗四海

寧謐先生奉表稱慶於是信問復通自天監已來嘗有勅旨供給藥餌不乏歲時渥澤深恩莫之與比先生七年暫從南嶽茲山也關閭風之地軸若崑陵之天鎮八柱旁臨九純間設樹有琅玕草生車騎遺世獨往是用忘歸十一年有勅遣左右司徒惠明徵先生還茅山別給廨宇軒君之降情天老漢帝之致禮河上況於茲日弗能尚也養志山阿多歷年所攝生既善冥祥亦降猛獸不據魑魅莫逢庭無荆棘速同闕里階吐神泉遙扶疏勸於是羽人徘徊仙客上下鸞鳳游集芝英豐潤矣以大同二年歲次丙辰三月壬寅朔十二日癸丑告別遷化春秋八十有一天子嗟惜儲皇軫悼有詔稱譽追贈中散大夫謚曰貞白先生禮也以其月十四日安于丹陽郡句容縣之雷平山若軒轅之葬衣冠如子喬之藏劍舄比於茲日可得符焉先生器宇凝深思儀精瞻含章貞吉不修廉隅年將中壽匪踰於矩眉目踈朗儀貌鮮潔寔忘勸沮多行德惠實惜光景愛好墳籍篤志勵節白首

彌至若乃淮南鴻寶之訣隴西地動之儀太乙遁甲之書九章曆象之術幼安銀鈞之敏允南風角之妙太倉素問之方中散琴瑟之法咸悉搜求莫不精詣爰及羿射荀慕蘇卜管筮一見便曉皆不用心張華之博物馬均之巧思劉向之知微葛洪之養性兼此數賢一人而已門人桓法閻等慕遙風於維氏結遺想於喬陽勒玄碑而相質騰絳霄之流芳乃作銘曰

留鳥表化棄劍凝神徘徊紫炁照曜丹林厥跡猶在餘風可遵誰其嗣此淵哉淑人高行邁種威德日新朗猶懸鏡鬱似貞筠身以弘道行不違仁昔遊纓紱頡頏搢紳獸乎亡救勞彼問津亦既解組乃襲山中遠尋丘壑高蹈風塵情無緬世隱不隔真結宇崇巖貞棲茂草冰玉留年精華却老乃有令聞康莊耆考白水過庭危峯臨洞露綴蘭階雲生桂棟日斜欄席花落窻窻尚平未返王孫不旋海桑交易陵谷變遷豐碑有豎遺芳萬年

碑陰記

天台華峯白雲道士河內司馬道隱子撰述

大哉道元萬靈資其自自然也忽恍不測其生成也氤氲可知者夫稟習經法精思痛感調轉丹液形神鍊化歸同一致舉異三清自古所得罕能盡善兼而聚之鑒而辯之靜而居之勤而行之者寔惟貞白先生歟蓋其稟靈氣胎息見龍昇之夢卓秀神儀骨錄志鶴仙之狀心若明鏡洞鑒無遺器猶洪鍾虛受必應是以天經真傳備集於昭臺與義然言咸談於靈府纂類篇簡悉成部帙廣金書之鳳篆益琅函之龍章闡幽前秘擊蒙後學若諸真之下教為百代之明師焉觀先生寫貌之象則道存目擊覽先生著述之義則情見乎辭縱逾千載亦可得之一朝矣至於思神密感之妙鍊形化度之術非我不知理難詳據敬以修身德業受書道備按夫科格固超真階命分殊途顯默異軌應從解景不事登晨冥昇上清弗可得而測已然隱几云化虛室仍存代劍未飛陰丘尚閉道尊德貴終古不渝披文相質廼今無觀朝代累革山世轉

朕永懷仙烈久增誠慨子微將遊衡嶽暫憩茅山與諸法義聚謀刻石邵陵撰製美其當年今以書勒言全往行因運拙筆聊述真猷紀于碑陰式昭年世時大唐開元十二年甲子九月十三日己巳書

墓誌銘

梁昭明太子撰

維大同二年龍集景辰克明三月壬寅朔十二日癸丑巳時華陽洞陶先生蟬蛻于茅山朱陽館先生諱弘景字通明春秋八十有一屈申如恒顏色不變有制贈以中散大夫謚曰貞白先生遺舍人主書監護喪事十四日巳時寔于雷平之山若夫真以歸空為天道以無涯為真不知悅生大德所以為生不知惡死谷神所以不死妙矣哉隱顯變化物莫能測既而岫開析石天墜玉棺銀書息簡流珠罷竈九節麗於天中千和焚於地下仙官有得朋之喜受學振空谷之悲余昔在粉壤早逢圯上之術今遵元良屢稟浮丘之教握留符而惻愴思化杖而酸辛乃為銘曰

無名之道不死為仙亦有元放兼稱稚川逃形解化自昔同然猗歟夫子受籙歸元梨傳宛吏書因賈船虎車照景蜺拂凌煙餘花灼燦春澗潺湲鬱鬱茅嶺悠悠洞天三仙白鶴何時復旋

沈約酬華陽先生

三清未可覩一炁且空存所願迴光景拯難拔危魂若蒙九丹贈豈懼六龍奔
早欲尋名山須待婚嫁畢二事雖云已此外復非一忽聞龍圖至仍覩龍光溢副朝首八元開壤賦千室冠纓曾弗露風雨未嘗拂鳴玉響洞門金蟬映朝日慙無小人報徒叨令尹秩豈忘平生懷靡監不遑恤
側聞上士說尺木乃騰霄雲駢不展地仙居多麗樵卧待三芝秀坐對百神朝銜書必青鳥嘉客信龍鑣非止靈桃實方見大椿凋餐玉駐年齡吞霞反容質眇識青丘樹迴見扶桑日爛熳層雲舒嶽釜山海出
後湖蘇庠贊陶先生像
藥珠妙言字照編簡雲霧三館其人則遠世

衰道喪完節者鮮臨終之歎作世和扁

華陽陶隱居內傳卷下

桓真人升仙記

類五

西蜀華蓋山李桓仙君授道桓凱真人仙君以名授弟子爲姓故曰桓元非其姓也仙君一日謂弟子桓凱曰金丹大藥子得之矣飛步隱身諸訣汝皆曉了但汝未聞大道耳凱曰弟子從先生三十年矣素知先生妙處有三景真符五神總要八極羅圖默朝上帝諸弟子未敢請問伏望仙君指示弟子至道修證無爲早達玄理仙君曰三景真符乃吞帶延年之術五神總要八極羅圖乃天中之靈典默朝上帝乃昇舉之妙門登雲之真旨非子所可而聞於是凱洗心堅志香火愈專勤苦五年不敢請問一日仙君喟然歎曰天地交泰日月祥應妙理備焉山川秀發明珠生焉金玉露焉草木鬱茂芳草爭妍芝英出焉鸞鳳羣集瑞雲亘天賢聖理焉星文順序日有重輪景星出現瑞應國祚天地草木山用禽獸稟受冲粹淳和之氣發祥現瑞人生天地之間但待死而後已吾太上玄真之化元始清靜之間真仙留不死之術在乎人間百

千萬年或有學之者勞神役慮愛惜苦惱妄想緣業甘心而受不知煙霞之外有超真不夜之鄉溟海之中有返魂不死之藥又豈知乘六龍而升八極駕九鳳而遊崑崙玉樹千年如春金桃萬刻一結廣寒宮冷朱夏無搖扇之賓紫府庭溫窮冬少燒薪之士至於瓊臺蘭閣寶宇層樓鳳閣銀橋綵城爛苑珠光相射快樂無何之鄉翠蓋幢幡悅懌無憂之國凡夫行劣知而不修聲色六情迷而不返先君如是歎畢時凱進前稽首再拜告仙君曰切聞瑤池絳闕閬苑蓬丘紫府瓊宮崑崙方丈羣仙洞府自有長年之光景日月不夜之山川寶蓋層臺四時明媚金壺盛不死之酒琉璃藏延壽之丹桃樹花芳千年一謝雲英珍結萬載圓成又聞雪鶴舞階靈仙歌舞鸞翔翠羽綠女吹簫瑤池湧甘露之泉玉樹綴天香之粟玲瓏臺榭輝光晃曜瀟灑軒堂煙霞繡繡遊宴之處鼓樂天音鳳笛龍簫飛仙吹拍金烏玉兔水晶盤上遊行瑤馬青牛靈芝園中躍出長樂國土無變之鄉得如是

乎伏願仙君指引修何法門而登此果仙君曰王泉出崑崙之山東溟海上有三山之城中一萬七千天仙皆飲丹池由服玉泉而得升此但弱水阻隔飛仙可至凡人無能到者凱曰玉泉生於何國丹池出於甚山以何術得而採服仙君曰玉泉出於崑崙之山丹池出於日月之國其山高不滿尺大不盈升內有三帝子神共居九老羣仙咸虔天香之頂上生鬱草天樂自鳴中有七寶赤蓮引池之水不死之泉能動法音其音和雅書

皎潔光映三天萬象森羅悉皆照徹雲馭風龍舞鳳飛鸞善惡眾緣物物具足若能究此之域悟此之門可日採千萬朝真萬偏功滿行備飛行紫府凱曰此去遠近可能至焉仙君曰此去不遠在方寸兩眉之間神光之戶玉門金柱相間而不通得秘妙靈文方可至矣凱稽首再拜躍然忻慕願聞其旨仙君曰此去東南八千里有茅峯古跡楊許二仙山中有異人姓陶號隱居梁朝貞白先生陶弘景也有門弟子一千七百餘人入室者三百

人得吾道者七人謝錢汝其數也子亦此君之弟子吾當受汝至妙汝當披髮跣足執鋤為畊夫求為圃者滿一十二年修積陰功勿示其道保藏秘訣每如常流無使知覺異日吾當保舉上帝必詔子升雲天是時凱再拜立誓登壇散髮跣足受道仙君曰陶隱居聰明過人彫琢文詞勞神典藉窮究經旨好述異事酷愛山水栽種松筠心念太高望登雲天上帝雖念寔少真功徒勞陰力皆不及七弟子之學道耳又曰陶求真不一潛神二門好禪悅佛言菩提行修西天記作往生文道釋並修則上帝未見用也又曰陶有三是非天之罪也一曰潛心大道主教玄門梁國將傾為陶奉佛常祝帝祚有孝道心二曰博濟孤貧多行孝行紹述三茅揚許真風不負太上遺教三曰苦心忘食潔白精修採鍊藥餌研窮典教不忘上真覆載之恩有此三非將補之職緣有四非禁忌太甚四非者一曰註藥餌方書殺禽魚蟲獸救治病苦雖有救

天機潛厭鬼神言人休咎三曰種植花木畊鋤山林好卜幽奇伐木匠屋自持聲勢親近朝廷四曰妄想太重便望升仙創待仙樓造降真館雖有門人弟子之廣寔未有上天之緣汝今受吾秘言當服事陶君必登大極其陶徒眾皆修真之人若塵世積功未及此蓋學道之士立功成果之地其福甚速焉是夕仙君乃傳秘語分付桓凱立盟誓竟仙君乃告之曰經錄秘訣圖書汗漫無窮指要歸根之論只一二事而已吾昔言玉京之境日月之山崑崙之域子還解斯義否凱曰未知是義仙君曰人身中有三萬六千精光神一萬二千魂魄神泥丸之中有長生不死大君二儀四象八卦九宮崑崙方壺諸天宮闕並悉圓滿無多無少與天地混同以至風雲雷雨霜霧雪電煙霞草木山川靈椿壽幹魚龍人畜物化胎變天堂幽冥無不具足蓋俗人六情妄起三毒纏病入骨侵傷無知無識神昏識暗魂魄沉迷聲想色情思深愛染未能脫灑乃成異類不得超生轉增迷悶四百四病

八邪四生三災九橫王法天嘆是故太上開
三洞之典開四輔之門引諭舍生同歸靈域
豈不勞乎今子受吾太上真玄秘語勿泄常
懷生輕薄心枉遭罪責凱跪悚稽首再拜受
仙君秘語仙君曰夫日月者天地中妙極乾
坤中精光陰陽中獨曜在天為眼目在海為
精光在萬物為精華在人身為魂魄今汝身
中秘寶頭曰崑崙頂曰泥丸中曰腦門腦門
乃神遊之地天帝居焉自日月崑崙之下流
光散於金池與肝肺相通肺乃金中之鼎外
應鼻肝乃木中之華外應眼眼隨五色而欲
鼻隨五香而塞金與木隔流光於門神珠散
失遂至死地今吾授子不死之道太上登雲
之方實非小淺昔東華青童山紫玄仙伯教
吾此法今七百年矣須先修水火交接坎離
二門乃得長生心不通靈神不變化難升雲
天昔許真君得西山丈人授此上道即日乃
登碧落豈不樂乎夫人頂骨閉塞漏泄邪氣
鬼風吹合崑崙神附心中夜煎煎焚肝腎注
精施陽敗損金鼎神不能禁真仙不居上帝

不降甘受死地今子迴日月之華景照太極
之崑崙左目右眼乃天中之日月照於十二
時中仙君遂歌曰金鼎天門開反童復嬰孩
日月照崑崙真君自然來三年結黃雲千日
成聖胎九年登金闕一紀升三台龍虎自然
交上帝安金臺衆神仰天表忻慕心徘徊子
今受靈文專心如死灰積功十二年功畢登
雲梯白光生圓象紫氣冲雲霓端虛念太乙
浩劫天地齊是時桓凱心目如失喟然自歎
多劫生死不悟靈根但指心王便是真道恨
不識太空之表有無何有之鄉崑崙之間有
長生之景日月之下枉死無窮今識元精不
生不滅是水火之根本以心腎為宗道妙之
門實崑崙之上凱稽首再拜復進日月之精
光如何照其天門開崑崙之頂仙君曰以心
注目想丹田片時便回光直上返照天門天
門乃腦門也但於時中不問早晚幹事合光
默默不離頂中謂之默朝上帝法秘之秘之
凡人心目馳騁於外未嘗遊心於自己之內
又歌曰內照返靈光太乙含真芳馨香散華

容鬱鬱生紫房天門開上蒼默然朝玉皇仙
君又曰夫人入胎之時先生兩目如水泡餘
四肢並無亦無相貌次生兩腎內應精輪而
生天地亦然天地未分之時日月未照之日
混混之根太陽之始儒家佛氏不言此理但
云心為萬物之宗主象帝之先直是無下手
處只得功勤香火淡食去葷而已中有吞符
服藥禮月瞻星吐故納新皆不得已而為之
至於尸解逃形出神胎息絕愛忘情逍遙自
在坐脫立化托胎投胎奪陰逃數藏身隱形
吞日月精華星馳火候鍊精啖液食餌芝朮
修釋氏蟬蛻空景捨色行身布施忍辱種種
利益羣生各得而修之未證玄理百千萬門
惟向上乘修行大道須是靈光自照內境精
明今畫像多於頂門出白光中現端嚴相巍
巍而坐蓮花此理亦近乎此義但古人童禍
其間且妙有真空無想無愛法體本無生死
但不能修大定力遂致輪轉錯入別胎浪死
虛生億劫不了雖遇至人未肯遽然傳授無
上妙義大智圓通乃至生安樂家受報福田

為國王大臣大聰明人心地慧聖發明經典
不免隸成毒藥因慧生想流轉含識情愛牽
纏邪見生謗隨落魔境為魔所愛所以百千
萬劫不悟真理是故太上以慈悲之旨救度
生靈發明經論令解真諦度脫有情之衆悉
皈清淨之門如是默契玄宗大明心目若不
內發寂照定慧雙修真體圓明未免生死仙
君又曰今子往三茅山古跡華陽洞天與陶
氏家為使用藏真默守無漏玄機積行施功
默朝上帝一紀功畢須登雲天凱曰路遠水
隔江湖非舟楫安能得到仙君曰吾有通泉
地脉靈符子於今夜沐浴淨身立華元館中
閉目靜思令子可到此去華陽八千里有大
江水府帝君楊子江靈川谷紫金白玉洞春
屬三千六百人部領神兵一萬神龍五條雷
公風伯雷神使者共五百人下元水府都統
吳越馭閩仙源蓄水九千萬斛潮三十六頃
雄師八萬人雷鼓九百面壽命十萬歲與蓬
萊都水使者同職下元與中上水府皆主管
江潮天下水旱人間之事凱曰華陽三茅之

職何如仙君曰掌仙籍統吳越之罪福帝畿
列土分九州帝業事三仙君有主報力士仙
衆各萬人并職九州管天下學仙之士功行
過愆又曰華陽第八洞天與十大洞天三十
六小洞天皆通穿四海江濟蓬萊十洲崑崙
之峯下至酆都幽獄皆可往來但凡夫染穢
色欲妄想閉障若邪見不生聖凡路通乾坤
六合內外皆可遊也於是仙君用神鏡通泉
之術凱不可得而知之凱遂閉目不行而至
不速而往欻然之間如聞有人相問之聲已
渡江湖或聞官室異香或聞歌聲或聞仙樂
忽聞仙君曰開目如夢寐中遂乃登岸青山
孤聳碧海使人舟楫往來皆非舊所乃詢行
人曰此間之丹陽也遂問茅峯相去多少行
者曰尚有二百里凱問有官宇乎曰有大梁
陶隱居先生興建官祠招賢納士凱亟尋路
而往陶夜夢神光滿室彩雲連霄有金甲神
人指陶曰明日有異人至陶曰早晚曰午時
先生覺告弟子曰子當與吾掃門至午時有
好客至慎勿阻急來報我日當亭午果有客

至披髮跣足唱詩曰黃花生紫雲日月周天
輪混混太虛中不與衆生羣崑崙十二峯上
帝朝萬巡一日功行滿升空謁元君弟子其
識其語急走報陶公公喜請入乃見散髮跣
足狂怪異常陶曰子來有何意凱曰聞先生
高道來與先生種蔬陶曰適來歌聲甚異言
何事也凱曰聞人之言學人之歌豈得識之
陶乃止再問曰子姓何凱曰姓桓名凱川人
也陶曰幾日離家凱曰昨夜離家陶笑曰狂
生狂生又謂凱曰願為圖者莫不賤乎凱曰
願問道耳陶曰吾上中下三等弟子凱曰上
等弟子如何陶曰衣綾羅服芝朮撰文註經
掌書記合丹藥朝真陪貴出入朱門入吾室
也凱曰中等弟子何如陶曰掌書狀修問答
合湯藥衣綃帛服青飢飯飲松醪酒住吾庭
之左右授以法術陪有道之士凱曰下等弟
子如何陶曰衣綃帛食五穀合施藥住吾舍
掃室焚香禮星月教以服氣或與知識人往
還接賓客種蔬菜草藥陶曰三等弟子又有
數百凱曰弟子非三等弟子之列種圃以泉

伐薪燒香直廁陶井可乎陶曰但恐子不肯爲此耳再拜願爲燒香汲泉之人陶留之飢凡住陶家寒溫不問貴賤不分饑飽不嘆勞苦不歎弟子嘲弄不動役使不懶人未起先起人已睡未睡不燒香不禮拜不誦經不息葷無憎無妬不華不艷少言少語不喜不怒閑則掃地忙則斫薪動則燒火靜則浣衣由是在陶家一十二年陶亦不識雖在目前陶亦不顧亦不撓陶陶之宅有三層高樓最上層近松之梢每聽松韻以弟子居二層之下凡註書千餘卷梁武帝有休咎每遣中使來問先生或畫牛答詔又問社稷年祚先生解註知梁武社稷不遠至庚子辛丑之年以朱筆暈之武帝亦不曉朝士呼陶爲山中宰相先生道高德邁四海皈依弟子千餘人入室者三百人修朱陽館創待仙樓望閣精脩香火每常以扇遮面恐黑氣籠罩神光奪目上帝若來詔我當令此山爲瓊樓玉閣先生時年八十四歲矣筋力有餘動作不倦註解經書日未嘗忘好種竹栽藥鍊丹於永嘉大

弱巖木溜嶼陶山之巔先生生而有異面目光彩長鬚美容貌身長七尺秀目細眉而氣清可掬言語恬靜博通古今精於藝術天文曆象醫藥諸家所爲靡不洞曉至大梁天監元年八月十五日早大茅山上忽白光數條俄頃雲氣翳鬱林泉清明天樂嘹亮衆見紅霞五綵仙鶴一隻青衣童子執詔空中五色霞內現霓旌羽節仙童靈官百餘人侍一空車狀若龍駕童子與鶴俱至庭下陶意謂上帝召已仙童曰無煩勞神速令桓凱更衣飲丹宣詔仙童曰上帝與羣真正在通明金闕宮寒陽殿等凱至矣於是凱澡沐服丹宣詔曰念子默運有功陰德不怠明師妙旨速證仙家體妙太虛神遊金闕多生怨債消若春冰夙世過愆如風滅燭金丹鶴詔遣至茅峯紫府衆真勅來仙館辛勤勞苦早晚不悞志若喬松宜登仙位詔書到日即登雲天右遣茅李司命主者保舉奉行宣畢乘鶴登雲驚鳴節動飄飄而去初更衣之時陶祝凱曰與吾於天禁中檢尋仙籍幾時功畢尚少何

功行過愆有若干凱領師旨相別陶有依戀之色通夕如醉桓凱升天復留頌曰
存神養氣精 清靜心光明 妄想不虛起
求真道自成 日月照寔崙 晝夜透泥丸
靈真自然降 功畢登天門

十一

十一

桓真人升仙記

周氏冥通記卷之一

期六

玄人周子良字元蘇茅山陶隱居之弟子也本豫州汝南郡汝南縣都鄉吉遷里人寓居丹陽建康西鄉清化里世爲胄族江左有聞晚葉彫流淪胥以瘁祖文朗舉秀才宋江夏王國左常侍所生父耀宗小名金剛文朗第五子郡五官掾別住餘姚天監二年亡年三十四仍假葬焉所繼伯父耀旭本州主簿揚州議曹從事母永嘉徐淨光懷娠五月夢一切仙室中聖皆起行四面來繞己身乃以建武四年丁丑歲正月二日人定時生於餘姚明星里恭歲爲姨寶光所攝養同如母之義子良幼植端惠立性和雅家人未嘗見其愠色十歲隨其所養母還永嘉天監七年隱居東遊海嶽權住永寧青嶂山隱居入東本往餘姚乘海舫取晉安霍山平晚下浙江而潮來掣船直向定山非人力所能制因仍上東陽欲停永康忽值永嘉人談述彼山水甚美復相隨度嶠至郡投永寧令陸襄陸仍自送憇天師治堂而子良始已寄治內住於此相

識今討覈緣由如神靈所召故其得來此山不爾莫測其然于時子良年十二仍求入山伏節爲弟子始受仙靈錄老子五千文西嶽公禁虎豹符便專心於香燈之務凡好書畫人間雜伎經心則能後隨往南霍及反木溜旦夕承奉必盡恭勤十一年從還茅嶺此後進受五嶽圖三皇內文十二年秋其家中表親族來投山居乃出就西阿別廨住以十四年乙未歲五月二十三夏至日於廨忽寐中寢卧彌淪良久乃起出姨母不解所以深加辯切乃願說所見具如別記自爾於四五旬中大覺爲異恒垂簾掩扉斷人入室燒香獨住日中止進一升蜜餐周家本事俗神姨舅及道義咸恐是俗神所假或謂欲染邪氣亟相感問唯答云許終是婁羅夢無所知究自懷愁慮爲復斷隔耳於是衆人莫測可否相與縱置聽看趣向其七月中乃密受真旨令外混世迹勿使疑異從此趨走執事乃過於常日其年十月從移朱陽師後別居東山便專住西館掌理外任應接道俗莫不愛敬本

性君子訥言敏行所可云爲默而能濟清修公正纖毫無私去冬欲潛依冥旨逆須別宇託以方便冒求構立雖建三間齋屋經時未畢入此年十月便密自成辦窓戶牀簾至十九乃竟親屬道義齋其上果要往看之覺其潛形側容並莫知所以至二十六日密封題東西館諸戶閣廨處磨洗以文簿器物料付何文幸爾夕自移衾枕出所住廨云當暫齋或云暫行二十七旦獨在在家廨及還館中言色平然了無一異更香湯沐浴著諸淨衣與文幸恭博讀書而屢瞻景至日晡後便起云時至矣即束帶燒香往師經堂中遍禮道衆徑出還所住廨住廨屋惟有三間住者火也衆人正言應就齋去日晡間其弟名子平往看正見於仙屋燒香出還住戶問子平何以來答云姨孃氣發喚兄還合藥煮湯語云我體亦小惡即時欲服藥竟當還若未即還汝可更來仍見鑪中溫半升酒子平馳還說此姨母驚怪亟令走往已正見偃卧子平不敢便進俄頃所生母及姨母續至見

便悲叫問何意何意唯開眼舉手三彈指云
莫聲叫莫聲叫誤人事其母欲捧頭起而就
巾轉猶舉手再過正巾須臾氣絕時用香爐
燒一片薰陸如狸豆大煙猶未息計此正當
半食頃耳時年二十先已裝束內衣上止著
眠衣加以法服並堅結其帶脫羣襦褌之
容質鮮淨不異於生一切聞見莫不歎駭以
二十九日日昃後殯仍造確塚於東園十一
月三日丙寅日昃後窆即捧土成墳此後音
影寂寥未通寤寐將同人神之隔為機會俟
時乎其得道原由品號自具顯所受記中今
略疏在世事迹共所聞見如此故載之記前
又爾曰於書案上得四函書並封題上皆濕
一函與師一函與後屏姨母等一函與舅徐
普明一大函有四紙與南館東山諸道士並
是告別同云二十七日計此當時是從朱陽
還仍作書作書竟便燒香也又檢溫鐙中猶
如常酒氣瓦盆中已被水盪無氣都不見藥
蹤迹竟不測何所因託按記中得藥師既方或疑脫是此師既
慨此追恨不早研究函令人委曲科檢

諸篋蘊藏觀遺記而永無一札文幸云一十
六日燒兩束書可百餘紙不聽人見意疑此
必皆已焚毀懊惜彌切心猶未弭十一月且
甲子試自往燕口山洞尋看果見封投一大
函登崎嶇鉤取拜請將還開視即是從來受
旨五月唯附六有夏至日後四事六月七月並具
足從八月後至今年七月末止疏目錄略舉
事端稱云而已未測亦並有事如六七月而
不存錄為當不復備記止徑略如此邪今以
意求恐是不復疏之何知爾尋初降數旬中
已得閑靜後既混糅恒親紛務不展避人題
之紙墨直止錄條領耳想此十餘月中訓諭
何限惜乎弗問此師之咎矣所封山中皆散紙雜糅今依日
連月吹第相又從今年八月至十月都不復見
一條又尋所燒者定當非此例無容一封一
焚故也亦可疑是焚不又從來有令師及姨母
知者止有數條一者初夏至日晝眠內外怪
責不得不說二者斷不食脯肉亦被怪不得
不說三者與師共辭請雨真旨今改未用墨
此不得不說四者師得傳召真旨令告知此

不得不說所可指的唯此四事自餘或有訪
問皆依違末略初不顯詔又師經一過因辭
訪移朱陽及有所當事後屢問蒙答以不每
云未報遂不顯言今料視定已有答尋此當
是恐問便有酬者則人人因託不少若不為
問則被人責若悉為問便忤冥旨是以皆匿
隱之此記中多有真仙諱字并諸教或便同乃看之若欲傳寫亦應先開告衆真及吾人不傳皆應外書記也周所住解
庭壇有數株大栢樹其戶前一樹甚豐茂甲
午年臘月望日忽見有如糖灑徧樹上下中
間尤多于時瞽許華陽都講丁景達來看徐
普明並見之驚問見此甘露降下家人不欲
顯此事仍戲言向小兒以糖沃之耳因共摘
嘗正如蜜味亟折兩枝見示以插戶簾上十
餘日猶在按瑞國甘露降竹和乃是瑞氣降對戶者獨懷必當是欲顯已應有神靈降引之事故也又周所住屋南
步廊夾兩邊種竹竹根穿入廊下乙未年五
月十八日共其舅徐普明在中堂為謝家大
齋三日竟散齋日中後其舅暫還解忽見步
廊竹根生一筍三寸已上分為二條並抽筠

縛齊長九寸昨都不見而今忽有普明知是

異恐小兒拔弄仍折取來中堂遍示諸道士

咸共嗟歎未嘗有此隱居深恨不置今成竹

又恐爛壞乃炙乾錄之即日猶在

用湖州人作同心竹皆一竿竹中夾兩孔

此月二十三日至日便有感降事當是復

有枯竹之德也又周移朱陽館於東立屋積

茅在屋東蓋後屋後殘茅周往更斂積忽見

一白龜可長六寸許身形皮甲通白如滑石

唯厥上有四黑文狀如書字不可識提取就

弄良久乃欲將還意不敢遂放之還即向其

家說此按龜本靈物久壽先知又出積茅之

奇隱居開此欲表上之更尋覓不復見而

近道士多云柳谷間常有一白龜人欲取而

步去疑此龜當是而數百

右此追記憶見其經有此諸異事二條

啓事

臣弘景啓去十月將末忽有周氏事既在齋

禁無由即得啓聞今謹撰事迹凡四卷如別

上呈但某覆障疑網不早信悟追自咎悼分

貽刻責淵文口具陳述伏願宥以開情謹啓

十二月十六日

勅答

省疏并見周氏遺跡真言顯然符驗前詔二

三明白益為奇特四卷今留之見淵文并具

一一唯增讚歎十二月二十日

右此周去時先生正在鬱陶隱齋葉限下

獲即得啓聞後撰寫遺記畢方遣潘中正

出啓上呈

聖上登於內殿開讀四卷委曲備小事事

顧問亦隨事奉答

右周傳

五月事

應者今朱注詮詔

夏至日未中少許天監十四年乙未歲五

所住戶南牀眠始覺仍令善生下簾于時在

姨母病中善生是兩姨弟本姓朱七歲時在

永嘉病十餘日正爾就盡隱居若焉救治仍

捨給為又眠未熟忽見一人長可七尺面小

口鼻猛眉多少有鬚有白色年可四十許著

朱衣赤幘上戴蟬垂纓極長紫革帶廣七寸

許帶囊囊囊作龍頭足著兩頭烏烏紫色

行時有聲索索然從者十二人二人提裾作

兩髻髻如永嘉老姥髻此髻法寬極紫衫青

袴履縛袴極緩三人著紫袴褶平巾幘手各

執簡簡上有字不可識又七人並白布袴褶

自履屨悉有所執一人挾坐席一人把如意

五色毛扇一人把大卷書一人持紙筆大硯

硯黑色筆猶如世上筆一人捉纖纖狀如毛

羽又似絲帛斑駁可愛纖形圓深柄黑色極

長入屋後倚簷前其二人並持囊囊大如小

柱似有文書挾席人舒置書牀上席白色有

光明草縷如荻子但纖縷尤大耳侍者六人

入戶並倚子平牀前此人始入戶便皺面云

居太近後仍就座以臂隱書按于時筆及約

尺悉在按上便自捉內格中移格置北頭所

屋是西廂有兩間去堂屋止三間步廊子云

太近後是通堂而堂于時已被燒盡未解

西壁即所畫畫者頭百西故得見外又眠牀

尺安北壁即子平牀也一方五尺安窓下施

書按東向硯本在按北頭筆格在右頭故移

將來乃謂子良曰我是此山府丞嘉卿無德

故來相造子良乃起整衫未答云子時自覺

人見身猶卧仍問曰今是吉日日已欲中卿

齋不答依常朝拜中食耳未曉齋法又日中食亦足但夏月眠不益人莫恒貪眠又答體羸有小事竟覺倦倦如欲眠不能自禁曰小消息無苦因風起吹纖欲倒仍令左右看纖赤豆在庭中戲走來垂至纖邊左右以手

相六

格去郎善又來架子上取堰觸此左右善便倒地此左右以手接之此人間那得此小兒

子子良答家在錢塘姓俞權寄此住又曰勿

令裸身善神見之小男兒名志五歲是道士問夏月又問郎善何人子良答家在永

嘉依庵陶先生又曰陶有美志為人所歸投

即善姓徐樂成縣人年十六七又語子良曰

卿父昔不無小過釋來已三年今處無事地

自云墳塚在越雖自羈迴亦不願移之南頭

有一坎宜塞去其今欲同來有文書事未了

不果明年春當生王家以其前過未盡故復

出世子良本欲以甲午年迎父柩出西事不果周是爾家過此未申酉歲乃更議當

即往驗果有坎已塞竟卿前身有福得值

正法今生又不失人神之心按錄籍卿大命

乃猶餘四十六年夫生為人實依依於世上

死為神則戀戀於幽冥實而論之幽冥為勝

今府中關一仕欲以卿補之事目將定莫復

多言來年十月當相召可逆營辦具故來相

告若不從此命者則三官符至可不慎之子

良便有懼色此人曰卿趣欲住世種罪何為

相六

得補吾洞中之職面對天真遊行聖府自計

天下無勝此處子良乃曰唯仰由耳又曰卿

自幼至今不無小愆可自思悔謝若不爾者

亦為身累凡修道者皆不裸身露髻枉濫無

辜起止飲食悉應依科聊復相告言窮於此

今還所任方事猶疑冀非遠耳卿最吾言勿

示世中悠悠之人山中同燕知之無嫌便下

席未出戶見門上有令春劉白等今春是缺

劉白是乃又曰勿令小兒輩逼壇靖靖中有

真經前失火處大屋基今猶有吏兵防護莫

輕誇慢其輩無知事延家主門是前中隔間

外經堂被燒移經出安靜中堂屋四月二十

間作齋堂西二間都蕭娘母住始其年四月二十

三日遭燒及五獄三皇五符等所云真經當

指在此但未解守之卿姨病源乃重雖不能

致斃亦難除子良因問不審若為治療腹中

又有結病何當得除答曰不可即除歲月之

間不知若為耳腹中亦有卒可差別當向卿

言前云事延家主主即娘母所以自說病

事不由於請問也娘母年四十七素患風

冷恒上氣腹左邊有氣結如令春等去便下

塔而滅為神明出入無方乃並林不可疑而亦

右一條是夏至日書所受記書四篇曰紙

此水係別自是趙仙籍外風雨水領五芝

其夕三更中復聞一人扣戶云范帥來未應

已進脩壯形貌端嚴著大冠似如憤服緋從

者唯三人衣色黑曉曉不可別戶外有光狀

如把燭不見光形帥倚牀前而言曰僕姓范

為定錄府鬼神之司定錄保命二府同在一

域而名界有分各天真守之二君並姓茅是

兄弟兄弟定錄弟守保命卿亦應已知之向

有大丞遊行界域記人罪福過造卿聞二君

及府中諸監僚選卿為保籍承此位乃始立

以助領諸簿錄其任數小而高清為美兼得

宗庇真仙二三為宜卿向酬對承極不惡後

何以與姨議異遂使日司聞之以白丞又疑

是秋俗丞大不悅欲執卿為無信之過故令僕來相告觀卿俗意未審實塵易迷何以苟縱於七魄而拘制於三魂實由卿素履常家之事此輩小物亟稱其功而惑人意其為牧約之卿儻早議不乖則墨簡不書周家本俗事

種是帛家道許先生被試時亦云爾子良祖母姓杜為大師至故相乘述外氏徐家舊道
卿曰夫神聖有旨豈是辭訟所謹兼向承總領吳越任之大者自來宣諭何得不從尊府

君亦有訴於丞云無復嗣丞已不許幽冥面告尚不得傳而況機身投片辭亦自不達達亦不許徒勞紙墨耳于時機母欲奏章上言并令其作辭解辭故師

此語以卿朝夕燒香乞長生神仙今既果願
復何所言二真今中間往太元府至今未反恐還當問丞故令先來相實可依心答旨二君

兄是大司命太元真人治大霍之赤城當是夏至日往彼朝詳未反也
曰俗人童蒙不辯真正曲垂貸實敢迴異帥直云好又曰卿每禮拜先依科朝四方竟輒更禮拜司命定錄保命三真君既居鄉故

應爾于時子良撫展橫在牀前又不著衣服帥云作道士法不宜露眠不宜橫展橫展則邪不畏人子良唯應爾科戒云上牀脫履令正背牀蓋如小軍衣法亦不得露髮也子良又問既靈聖垂旨敢希久傳可得申延數年不帥

云下聲傍人聞前共疑議曰司已白今來取今下聲非必畏人聞于又曰向所言事不得爾自己已有定兼復此職不可久空所以勤勤重來者正此耳今又私與卿言勿洩之卿既無解術猶應栖質有所唯大嶺之南故園之

地可得安厝若其地多石則看北良常山左側應好地莫還本基本基既塵穢兼復蕪滿若墓之必不為卿益竟不測嶺南園地在何

里許山連岡亦至此間從來不聞其履行看地今日余幸便於此東岡營塚後得此記松壑不使尋其初作屋時欲近東大窠隱居嫌

窠大而遠今還西館明知今墓處已是開合先自雖非同此師良常之言而會定錄卜筮之告也既云無解術應栖質有所者則其餘棺柩法周猶依世法用凡所受經符可以自隨者則其神衛從人復宜須三師姓諱兼受法年月恐三官水神復更考問皆應答對不

得落漢留蹟與家令事亦如此是為依師並云佩隨身但不知五徽圖三皇傳及諸經符作籍師度師經師義為直見師相承之三世邪竟不問其尋覓此又經記所論人命終復下問仙之與鬼必皆由三官開過皆須有師資之結殊不容易僕今去矣勿忘此證卿雖緣質有定亦須用謹正謹者邪悉不干

神明衛護則招感易達卿既處此塵誼之中僕等難復數來仍手指壁上所疏桃竹湯方云脫覺體不快便依此方浴此方要卿那得子良答寫真詰中得帥曰此是南真告揚許者卿得之甚好二君亦標挺言未絕聞子平

覺便歛去右一條即夏至夜所受記細書一大度麻紙滿帥此范帥即係命四里帥范名疆五四之意

而卿人二十七日二更中開眼見一人在牀前容質端正有鬚鬚甚厚細眉目年可二十餘顏狀其可愛著芙蓉冠垂青纓甚長著衣狀如單衣而有朱青黃白相雜厠似錦復非素腰帶不知是何所著亦有光如前范帥來時燭光也隨自而已自云是中山人因言曰茅君用

也隨自而已自云是中山人因言曰茅君用

爾為承已遣丞帥來相報事已定吾今來教爾修道之方可從而言疏予仍起裝紙疏之

五月二十七日事此人見子良題此乃笑曰人見之知其何年子良曰前丞帥來已記年今誣須又曰紙紙記為好子良因而下作下

太歲乙未按如此人言便非禁留世未解字已揚許先述亦周封藏之意當示傳世不由放是此述故也夫作道士皆須知長生之要

爾既未能餐霞飲景克已求真徒在世上無益於體今所以相徵召者一以助時佐事二

以受業治身庶積年月得其力耳五藏全其髓填實方可以求道爾今四體虛羸精神惛

塞真期未可立待即亦可且伺二星以通其感子良因問不審此星在何方面形模若為

答曰北斗有九星今星七見二隱不出常以二十七日月生三日伺之其形煥耀異餘者

爾今可畫作七星當隱約示其首向子良因染筆作七星形此人曰我無容運手爾但安

二星置網之頭當相告也此非二又安此不答問答此是也當曉香爐心伺之見則祈乞隨心所願亦別有呪後當相告今夕三四更中可試看之勿令人知也又曰吾今去勿輕示時人知則不可見也

人世上亦有經子有宿業故口相受耳不聞開戶聲徘徊而滅

右一條二十七日夜所受記書一大度薄白麻相接續滿紙按別記此中山人姓洪名子清本中嶽人今來華陽中不顯何職後受洞房經亦是北君留是當教學者真浩中無此人也有北斗

二星法出方諸洞經中周從來都未窺上經性謹直亦不議求諸追恨不得以諸具經及揚許真令一見之已雖不復任此要自於師心有虧

凡此三條皆髮髻夢耳不正分明又別夢見懸巖峙壁巖然若似青嶂中某在

山下望見山上有二人一人著遠遊冠錦繡之衣其意言是保命君一人猶是向高座上

老子也相對而談某亦不解其語須臾便覺竟不知此二人後何所適

右一條二十八日晝寢夢記書兩麤小白紙

紙

按尋記凡標前云夢者是眠中所見其有直云某日見某事者皆是正耳覺時其見但未

知為生為卧耳從乙未年八月以後遊行諸處此皆是神去而身實不動也又諸記中往

往有難易字當是受旨時勿勿後更思憶改

之昔楊君迹中多如此

右初起五月二十三日至二十八日凡四條事大書小八白紙並與目錄相應無闕

周氏冥通記卷之一

周氏冥通記卷之二

期七

六月事

一依本寫即事有隱者今未法詮記

六月一日夜

凡此端皆題紙皆作乙未年

復見前承來乃

著進賢冠猶如前侍七白衣人所執持亦不

異舒坐席坐南牀復有二人年並十五六許

形服鮮麗皆作兩髮著衣似單衣復如袴似

縹而非承言曰一日有期差不為疑仍指東

邊一人曰此華陽之玉童定錄保命二君令

來相諭又指西邊人曰此紫陽之侍童二君

昨詣紫陽陳卿事原應作此源紫陽乃戲言大族

貞虛其中凌雲者理非一人定錄曰此蓋見

由耳紫陽笑曰東華紫微當焚錄邪丞曰吾

想此言實是實讚卿也華陽童乃言曰夫騰

龍駕霄之才理非涉世之用榮華應作略等字

之心豈會神真之想爾情無滯念曾臆蕭豁

是以果而速之若無此虛豁之心者則一志

而不及一向而不迴此二能得道爾既無才

學可稱又乏至德之美特是採錄訪命加以

迹少愆累心無沉滯故得耳勿區區於世間

流連於親識眷矜富貴希想味欲比並積罪

之山川養身之鼎鑊善思此辭勿足為樂若

必寫此則仙道諧矣又問曰陶氏才識何如

答曰德操淵深世無其比又曰然恐綠葉不

及如何紫陽童仍言曰君言君言是稱神仙

易致而人德難全是故二象雖分其間猶混

真道可聞而不可見人道可見而其行難聞

夫為人者皆貪虛誕欲恣情任美所以三惡

不離其心五情不節於體皆由先世種罪多

故耳若生在中國知有道德人身完備才明

行篤者皆宿命有福德也此言言爾宿世已

生周家君之餘嗣也今生又在周家雖出庸

俗先功未弭故得受學仙宮任襄神府君昨

歎云一與其別已數百年矣誠子之辭訖勸

子之言盡可善勗之方當往來不為久別又

仍曰君已改子名字因人相告二童便出戶

丞曰二人言盡此皆真君授其語令相論吾

不得停尋更來下席便滅

右一條一日夜所受記書兩小度麤白紙

丞備是趙丞華陽童依從記云姓景名本

期紫陽童云姓鳳名靈按此云已改子

名字別因人告而後八日來說所改名

字即猶是此童也當是其今未敢言耳

六月四日夜華陽童來授曰爾既挺思合神

必不會世心中人惟欲求利爾不能益則有

不悅爾今事人尊者若罵詈爾得罵時當存

念身神耳可得聞而心勿受爾莫口應若罵

畜生禽獸之屬皆當即沐浴此為賊身之大

穢穢則真神不降邪氣侵人昔有劉文長師

李少連少連苦酷不道鞭打罵詈無有時節

文長受而口對積十一年山神遂侵試之後

成邪注病今在保命丞間為散使緣前身有

忠朴之心故得為正神所使少連今猶在河

間晝夜辛苦不可得見譬如此事可不慎之

言此而去

右一條四日夜所受記書一白牋紙去歲

家說姨母常修服諸符恒令為書其既始

有通感於書符失時兼亦不謹姨母責罵

甚苦乃云人家養犬亦須守吠逐鼠養沙

已不得供養止書符寫書而不用意用汝

何為伊手時意色極不好今有此告當由

斯源也姨母以其年少伏事人恐過失每

課厲非一姨從此後得罵喜笑悅竟無冰

浴大小咸怪如此至於師長之間實未嘗

為警言以在三之義均耳

六月六日夜見一人來儀服甚整著丹衣青

帔芙蓉冠冠上又有小平蓋蓋青色紫綠邊

背上佩三青色鈴年可二十餘面甚白微有鬚侍者四人二男二女至良久乃言曰我是桐栢仙人鄧靈期聞子合道故來相慰子良曰凡庸下賤少樂正法幸藉緣會得在山宅隱作何期真聖曲垂啓降自顧腐穢無地自安若前緣可採願賜開度仙人曰善哉辭也子千生已來種福多矣自然而會何待開授度子者當自有人吾特嘉子緣德來結交耳幸無謙辭桐栢當復有來者當善相待吾今去矣下旬間更相過方事遊適兩念相存執手而去。

右一條六日夜所受記事一青紙依後別得爲桐栢帝晨執蓋御史領華陽學仙禁真結中所無云桐栢復有來者當謂後徐玄真也

六月八日夜紫陽童來裝服如前言曰欲知我姓字不子良曰願聞之童曰我本姓王字子遷太原人宿命時父爲陳留太守仍移居丹陽我年十五化前身有福得生爲人復修功德死爲神補紫陽內宮玉童賜姓鳳字雲芝君今改子名爲太玄字虛靈童凡所稱君者皆紫陽也

不改姓仍取問也此名字中皆有旨趣今略爲述之太者元始之極而質象含真玄者謂應虛無之炁挺分所至非修身立功所得虛者謂形同乎假志無苟滯蕭條而應真靈者謂在世而感神棄世而爲靈此表裏成功饗流後裔也略陳其綱紀如此別有幽奧處未可便及此名不施於世且莫顯示子良字元齡此乃世之善名亦不勝於世直是施於冥中耳言訖便去。

右一條八日夜所受記事一白藤紙其筆名皆以子字爲名子良是其本父字生便此無別小名也字元齡者是癸巳年十歲於華陽東嶺冠師爲作此字燒香告以受之按後記云所改名即是青錄玉文者當周名仍取以名之

六月九日夜夢聞人語不見人形聲氣高厲謂子良曰若披單紫蓋遊適偃房者神仙之漸也唯言此而已意而言須臾覺便見前丞丞曰向來者爾識之不答曰不識丞曰是真爾未宜見之故遙相告爾按此前輩華陽中而二君都未降今此又曰爾聞血臭不答不隱告方爲其始也又曰爾聞血臭不答不聞又曰爾體血流釋那不自知答曰自謂無

血唯汗耳丞曰汗之與血一何異乎汗者血之精華人血猶如水寒則上凝夏則上清清則流泄易凝則決冰而血出是爾陂塘虛微故不能止於流耳人血如淵水不厭其溢但患其竭吾有築塘之術當爲爾治之今但俟景挹華亦能微微爲效吾今且去外已有人來下席即見一人入侍者三人來至牀前而言曰我是張孝字子安榮陽梨井人也此直言誠見年可三十許中紫方冠著緋衣當是高仙人

右一條九日夜一夢聞一受記事一白藤紙依別記張子安是華陽中蕭關堂主上真語所無

六月十一日夜有一女人來嶺裏形貌妍麗作大髻通青衣言曰今夕易遷中有四人欲來爾所住處今既在此當不果至十九日只當來耳子良言侍從師還此不知今夕有垂降者欲還住處仰俟可得爾不女曰旣已在此已夜不須復還恐人相疑亦不須道今夕來此意子良問不審氏字可得示不女曰姓李字飛華淮陰人來易遷中已九十四年旣始受學未能超進今者之來乃趙夫人見使

便別曰十九日期君於西阿子良欽手而別

此女年可二十三十四許有兩人同來唯此女言耳一人當是侍者也

右一條十一日在夜所受記書一白藤紙

此師出冰館仍上山日役後還東嶺周送入口至住處已黃昏仍留其侍宿于時在冰口屋簷內清淨神女不集西顧混雜反欲相從未達此趣以為於色

六月十二日有五人來乃三更中

一人年可三十餘黃華冠雲錦毛衣侍者四人執紫

毛飾持流金鈴此

一人芙蓉冠絳繡衣侍者二人無所執則

一人芙蓉冠綠繡衣侍者二人則中山人

一人教憤朱衣紫草帶侍者六人皆公服悉

有諸

一人兩髻亦繡衣此華

右五人前三人列坐南牀丞及童坐書牀

子

細七

丞前進曰今夕有高真來可起可起子良因

起拜前者前者曰可坐子良還坐又曰周生

修功積德可謂不負其志乎張君曰明鑒鏡

察理當照其胃懷耳答曰如來辭洪君曰見

周生不中路怡發乎怡發字並應答曰不怡

發雖怡亦不能毀其金簡丞曰周生可謂保

仙之人前者乃問子良曰今日諸人來暢爾

懷抱不子良答曰枉蒙上真賜降腐穢欣懼

交心無以自厝乃笑而不言華陽童子曰此

諸真人君當不盡識今將相告上者高高真

人馮先生第二即蕭關仙卿張君第三即中

嶽仙人洪先生第四乃保命府丞樂道士第

五則我華陽之天司農玉童故令君悉知姓

位此中諸位任何如世上侍中公卿邪子良

答曰真仙高靈豈得以比於塵俗丞曰能祭

幽惻應作冥者冥者同生是也今者既曲紆真降

願各為其述一文真人曰卿是其明證可前

作答曰敢不聞旨但恐卑人居前非禮耳丞

乃令子良策紙染筆口授曰華景輝瓊林清

風散紫霄仰馮高真士凌空馭綠輶放彼朱

霞館造此塵中僚有緣自然會不待心翹翹

馮真人授曰

太霞鬱紫蓋景風飄羽輪直造塵滓際萬穢

澆我身自非保仙子安見今日人過此未申

歲控景朝太真冥緣雖有契執德故須勤

張仙卿授曰

寫我蕭關館遊彼塵喧際騁景蓋飛霄尋此

人間契周生一何奇能感玄人轍無使凌雲

幹中隨嚴霜折

洪先生授曰

靈風扇紫霞景雲散丹暉八素不為迴九垓

何足觀志業雖有口少一習之亦成微助此

今日事金闕方共歸

華陽童授曰

懸臺凌紫漢峻階登絳雲華景飛形燭七耀

亦殊分寫此步塵穢適彼超世君勗慈二祀

內無令邪世門方為去來會短辭何用紛詩

畢馮真人曰諸人所述足以相勸戒可自思

緣運尅列單心應作屬當復有來者若能

思入微飛龍轅於霞路奏鳳響於雲衢神童

啓節玉女侍軒豈待彌劫乎得道悉在方寸

之裏耳不必須形勞神損也世人唯知服食

吞符苟非其分亦為徒勤更不及專營功德

善積功滿道亦可議但於後生得之不施於

今身矣此言亦可告家人令知之唯奉從張

曰真君此言可謂至教若更能超躡往此則
二府希之難矣蕭閑堂子將爲周子之遊館
乎洪君曰仁功苟積則選爲真人府中小丞
其亦未必止此丞曰其功已定亦何必須勤
勤童曰二君亦適人所爲不必相逼若能積
業更深則成真人功夫若怠猶當不失此丞
言畢同辭別徘徊戶內而滅

右一條十二日所受記書四白紙此中五人三人
已經來過真人樂丞今降集真堂有西嶽
真人馮延壽疑比應仙之也樂玉字長治
成陽人主災害四岳中之一也夫仙真詩
詠才辭通皆相類真誥中有此甚多亦無
相越者尋此降集所受辭意
如似略示東華保晨之舉也

乙未年六月十三日夜見前帥來言曰比者
真仙遊降足致欣暢乎我比恒有事遂成冥
陽子良答曰近來乾坤澄澤七景齊明仰降
高靈稍蒙已數但滓穢無以克承耳帥曰是
卿千秋之功無嗟以滓穢爲辭但卿六世祖
眉爲譙郡時尤好射獵殺傷無數賴其中時
復營功德罪已得釋卿不宜復食肉食肉恐
先源違卿幸可慎之仙藥草自足何急嗟此
恐卿不悟故因暇來相報爾子良唯承受帥

便去

右一條十三日所受記書一小碧紙宋檢未汝南

周家語之咎誠爲莫大但身尚以蒙釋方慮殃延

苗裔福慶流子孫邪此帥一僕一我亦未領

至六月十五日夜中山人去後依別記目有六月十五日

中嶽洪先生授洞房經云云而檢函中不見此受恐當是修事與祕重不題文迹亦可已別投藏計此正應是斗法事與前二星相涉所以猶是洪先生授之聞其在西廡及移朱陽所賦一牀絕惡人近身少遊雜夕輒別牀卧如此必是修方諸卧斗之法此法是上清中品經理又一人來其華少白衣傳范師非下仙之品

○語云前故相告食肉事遂不能斷耶今旦何意往他人處食脯從今去勿復爾望採前言○

副今日懷子良答曰早至師間師賜食謂是甘果不以爲欺又奉今旨敢復近肉此人應爾而去

右一條十五日所受記一白藤紙其好全

斷之以成性
聖爲一體一向絕之以仙

六月十九日有五女人來此則是前十一夕李飛華於嶺裏所
告十九日期第一易遷領學仙妃趙夫人字
於西阿者第二易遷左嬪王夫人改字
臺年三十許緋編第三易遷右嬪
衣也真誥有此女第二易遷左嬪王夫人
太庚年二十許紫衣也真誥
有玉進賢恐是改名即是

劉夫人字玄微年二十許緋衣真誥有第
四易遷都司學陶夫人改字智安年四十許
許此改卽第五易遷受學李飛華年可二十
足許後母前云八易遷始九十四年來若七錄下碧衣真誥無此

右五人字位並李飛華所說說竟四人齊

坐李猶倚

又有八侍女一人捧巾箱箱上有題一人腰各帶大符符方一尺許黑書青
素上一人執一函以蓋致函下合執之函中
有囊囊有黃題應是經書四人各執一牙板
板上字極細不可識並皆
縹綾衣紫絳爲腰帶也
衆仙自共語良久
似論子良事不正了其旨趙夫人乃見告曰

子冥契久著故能招感真仙良助欣然子良
答曰不以猥俗少便依道藉以緣幸能棲林
谷豈期一旦真仙啓降喜懼交心無以自安
若前因可採願賜神仙要訣以見成就夫人
曰子名書繁簡何憂不仙而求於我我猶仙

人耳劉夫人曰周生爾知積業樹因從何而來得如今日子良答曰微塵下俗實所不究夫人曰今略爲說之爾生周達家時已應得道爲貪濁彌多遂不致獲次生劉偉家乃得學道精勤精勤之福方流今身爾已經三過上仙籍其中或犯非法而復落去今日之會上錄來已七十餘年故經生死乃遂吾經以此事諮受錄君君見告如此故爲宣說今知源由耳王夫人曰劉右嬪之言備說幽顯宿命爾可心自知之勿示凡俗悠悠之人陶夫人曰周年十九丁丑生水命人因謂趙曰此比何似趙曰亦無定總真王君丁丑生水命人位爲高真張酸亦丁丑生乃沉淪三官此不可爲定但論功業何如耳陶曰實如來告劉夫人又告子良曰夫神仙雖通玄感微則易但凡情虛微不能招其感耳我等今來者直尋有道者耳非浮遊無著泛濫而行也幸勿令人知知亦未然此事或生疑請以迴爾心我乃無怪於彼但恐自招其罪耳子良曰已蒙神降豈敢自有疑但欲時呈師母耳

不敢以告悠悠者又曰亦勿甲乙告之趙夫又告曰仙道有幽虛之趣今粗爲說之夫爲真仙之位者偃息玄官遊行紫漢動則二景舒明靜則風雲息氣服則翠羽飛靈乘則鸞輪靈輦浮海歷嶽遊眇八方進無水火之患退無木石之憂豈不足稱高貴乎人唯見軒冕之榮嬪房之樂便爲極矣所以真道不交乎世神仙罕遊人間正爲此耳縱有知者亦不能窮而修之或修而不久或久而不精諸如此事良亦可悲周生爾勿效此凡庸之疇也王夫人告曰夫一志直往無迴還應作之慮瀟灑任理無累著之心者此乃保賢之子也儻有窮幽測遠遠求師友晝夜辛勤積以歲月或直坐一山修經用法吞符翕景處七元者亦皆能致道終不及積業用功果之快耳爾可以此事告於來子令勤之也修此不止不患身後徒空爾自己定無煩於其間矣陶夫人曰若能守道不動服氣吞景以鎮五藏者亦能得地仙長生不死若無金丹五芝終不能飛遊太極動靜無方也吾今猶是

仙之中者未及上仙下真也前服氣諸事往亦爲之而得如今日子良周生爾營之乎言語粗悉入四更中趙曰星已疎矣行當應曙相與去和諸人同應去趙又曰方當去來不爲久別王曰趙夫人來當無不相隨劉曰來月三日當往東華呈學簿當學陶夫人相過子良問何學簿曰是易遠中教仙人學業有進退之簿三月日多一呈呈東華大司命入月三呈此二月之最至九月復呈如此周而復始陶曰且作十餘日別李曰其間動靜趙夫人當見使來去不復辭別便悉下牀而去侍女隨次而滅

右一條十九日夜所受記書六小青牋紙尋此諸夫人所說並無義旨非必止在周生亦以兼戒學者明智功德之義過於專修觀夫講理亦聞則其理可見也

六月二十一日夜夢一人年可三十許白布袴褶平上幘執手版版黑色形容乃端雅見敬自稱趙丞使下官相聞而言曰昨所與陶隱居共有辭欲須雨事國主憂民乃至但時運應爾比諸處屢有章辭皆不與報陶既有

功行周方來於此當爲驗二人之德不煩謙
謙恐悵望故遣報子良曰比風日赫烈塘湖
煇竭五穀焦枯草木彫落方慮飢乏故冒共
投辭希垂沾潤此人曰當不慮不雨恐不得
洪溢耳前辭言語乃好但請雨應墨書諸晴

應朱書並青紙上人唯言神重丹青不知丹青有不曾處諸如此者世間非一但無人報其此意其既不自知反云神而無靈願更作墨書辭勿同前語子良答輒從要旨又問聖靈何姓可得聞不此人曰問下官耶答曰姓黃字元平東海人猶散在保命趙丞間無位任仍曰不得久停或當更來歛手而去

右一條二十一日夜所受記書一白麻紙
按此年夏旱不雨積旬諸道士恒章奏永
無雲氣隱居是與周共作辭依常未書青
紙二十日晴後共周於靜中妾之故二十
一日夜得此夢周二十二日夜乃作呈辭
於其麻壇自奏二十三旦周向來云昨
夕有人報云今日中當雨爾旦天清赤熱
了無雨意至禺中周來入嶺至上俟見東
邊風雲卒起未達隱居間於路便雨地得
好潤唯在一山周迴左右耳此一事即共
宣願只踰云夢不知定夢定覺耶華隱隱
居陶甲道士周子良辭竊尋下氏之命粒
食爲本農功所資在於潤澤頃亢旱積旬
苗稼魚涸遶近嗷嗷瞻天雀息百姓祈請
永無感降伏聞水雨之任有所司存願哀

懸默首霽垂沾渥呼風召雲膚寸而合使
 洪濤溢川水陸咸濟則白鶴之詠復興於
 今共申至誠稽顙辭請謹辭

天監十四年太歲乙未六月二十一日
辭詣句曲華陽金壇洞天張理禁趙志
前此是前所朱書辭者隱居製周書
始檢得後近寫又尋覓周所易本末見

許著飄風冠披毛帔紫羅裳手執玉鈴腰帶
大符以丹書黃上不二未嘗來也侍者兩人
皆絳衣進坐乃言曰德秀之美感乎幽冥吾
久欲來碍以諸務遂不即果鄧生前亦應爲
說我來子良曰鄧仙人備述神靈應垂降意
比恒洗心潔念仰候真仙乃笑曰鄧亦尋應
來良久許乃自悲歎曰昔爲孤棲獨往賢莫
過焉我嘗學道於嵩高積八十餘年蒙得神
芝服之而化雖得神涉仙階而尸宅無寄今
猶在嵩高南石室中顧之眷戀心未能豁子
當不憂此事人言得道不復念形我念形之
切裂於肝心可得無棺槨乎吾今乃桐栢金
庭琳宮之師領蒼梧仙人鎮朱臺之內姓徐
字玄真故令知位字有在耳尋當與鄧生俱
來別更委曲不爲遠別便不須更復夢見二

人乃趙丞前所使黃元平者云昨雨恨不多
來月中當更作昨往太山見尊府君送人夕
來乃始得除君死錄更紀生名如此輩六人
尊府君言今還杜官君儻至子良處道我今
來此今故來爲宣之

右一條二十四日晝寢夢所受記書兩青
紙按鄧是此月六日來徐與鄧同在相
紙故相稱引後二十九日仍共來也惟如
徐說雖得化化猶戀於季形況在餘神鬼
中平指擲之事便弗無矣此徐君真誥所
無而不知何處人何時得道云周父還北
官則是隸鄧都所使去五月趙丞云明年
春當生王家今則已去一得受生便達達
絕也又按前劉夫人云爾名上仙蘇已七

乙未年六月二十九日夕桐栢有二人來一
則桐栢金庭宮上師蒼梧仙人徐玄真衣履如前
持玉鉢侍者無
二人莫諾無
一則桐栢仙人鄧靈期衣服亦如前但持玉鉢耳侍者亦二人真無
鄧先言曰久欲相詣碍以此二十七日蒙受
書為帝晨執蓋御史治桐栢山南青中館領

華陽學仙禁四官中事以此故致乖爽徐君前來善得接實耳子良答曰蒙徐君垂顧歡仰無已復蒙今降慶莫過此

徐君曰向過茅定錄處云始授子玄真經甚助欣然子良答曰謬荷靈啓垂授真法但肉

人頑疎修行多替又曰問子名已入東官青簡尚未審其事比當與鄧生往爲參之答曰

賜與參訪實是所希徐仍指鄧曰此君學道來已數百年始今得任子乃坐地獲之故知

功夫久有在鄧笑曰周生緣業果始韓侯所說當可言乎徐曰周子雖稟仙緣未得便知

前身之事子良因曰鄙塞塵陋豈得知此不韓侯是誰鄧曰是東華仙侯韓惠期領東官

諸簡錄治方丈第八玄官中向云欲參子事者正詣此人耳徐曰今日匆匆不得久停尋

當得與鄧生俱來不爲遠別下帟同出戶侍者隨從而減

右一條二十九夕所受記書一大度白麻

紙按徐玄定錄授子玄經檢別目云六月二十七日華陽童定錄君旨授太霄隱書玄真內訣云云而今中亦無此事恐與同房俱別封也論桐相中仙乃不應相與當謂男則童初蕭關女則易還含具官者當謂男則童初蕭關女則易還含具

也參簡之事別在七月中

右起六月一日至二十九日凡有十三條

事書青白大小合二十三紙其洞房玄真錄中唯闕此餘悉具足

錄中唯闕此餘悉具足

周氏冥通記卷之二

周氏冥通記卷之三

七月事一依本寫所事有隱者今未注詮記

翔八

乙未年七月二日夜七人來

一人姓周著玄華冠服綠毛帔丹霄飛囊佩

流金鈴年可五十許真語有侍者四人執黃毛節

一人姓王衣服似周服紫羽帔佩流金鈴年可四十許真語有侍者四人執綠毛節

一人姓茅著遠遊冠玄毛帔紫錦衣佩流金

鈴年可六十許真語有侍者三人執玄毛節又捧一白牙箱

一人亦姓茅著芙蓉冠丹毛帔玄繡衣佩玉

鈴年可六十許真語有侍者二人無所執

一人姓周著華蓋冠服雲錦衣佩玉鈴年可四十許真語有侍者五人執紫毛節

一人姓司馬著芙蓉冠服素羽帔紫錦衣佩

玉鈴年可四十許真語有侍者二人執青毛節

一人則樂丞公服如前侍者五人真語有凡此前衣服並垂後見

誥令丞曰今真人來何不拜子良即起再拜

頓首稽顙乞神仙之訣

茅定錄君曰功名已著無煩苦名並錄我所

關

周紫陽曰一與爾別便數百年我當知如一日爾紫之經生死一何苦哉

司馬括蒼曰學道不動而得道者乃周生手茅保命曰勤苦之弊何可備言所謂先苦後樂

王紫陽曰歲月易積功業難顯昔聞周生之名今見周生之德宿昔猶固良可知矣應是嘉字周大夫曰周生年稚而德與識淺而智深已三生如此我昔微遊於世數經詣之乃能傾襟布誠而施仁也我因欲示之要言而其未堪受法故不授之今得相見良亦為欣

周紫陽曰卿知其根由不乃吾之弟孫也昔與其於南海相遇便別別來已二百餘年矣承曰將告卿眾真之第一紫陽左真人治葛衍山周君第二紫陽古真人治嶠家山王君

周君傳乃云紫陽有左右真人第三定錄茅中君第四保命茅小君第五蓬萊右大夫周君第六括蒼真人司馬先生第七吾也此前六等並真人前後來者皆仙人唯馮君是黃庭真人治中嶽耳保命問曰粗悉此位不子

良答蒙承垂告已解定錄君曰前遣景上期授子玄真內訣遂未修之邪子良曰蒙賜玄

真經即應修用但洪君前受洞房欲且營之成業故未暇耳又告曰洞房乃好得益遲修玄真專勤者五年中便得太玄玉女侍猶勸

先營之併修亦不相妨子良應爾王君曰子勤勵之名籍雖定中間縱怠亦未必得全此功爾勿輕示人今夕來事周大夫曰得仙者年年月月皆有但人不知耳爾申年當得上拜太極不者則酉年也此期非遠而亦復為

遙子勤此中間也司馬君曰子保舉既強得業亦美道必可諧但其流行之必不急也子良受旨一二謹依丞曰陶隱居事近亦不無此議卿姨屢有賤請二君乃無異但恐餘處不必允耳定錄曰陶某名錄多闕穿處不的

由縱見由我我亦不得自任中甸間當與思和此保命往諸司命間論之意此必無苦勿卒憂悒仍云吾等今去或復尋更來其間有信書疏亦可相通因以相隨而去

右一條七月二日夜受記書四小青陵又

一片續後

按紫陽兩真句曲二君此日若始自降前六月唯遣侍童耳真誥云周太賓善鼓一絃琴是教孫登者為蓬萊右夫人即應是也司馬括蒼內外書傳都不見又不應是季主乃可

季主兒法育耳唯見此一來自後無復所出隱居此年四月自得夢應被召云官府已整唯作印未成意甚惻惻徑向周說周登向其姨母道如此姨母乃密營曉信告潘淵文為條疏作辭牒令周共奏請後天憲洞隱居都

不知後方問有此亦不復問周可否至七月十三日事訣十四日旦周疏受見示方具耳止聞此一過而云屢有賤請是所未究乙未年七月三日夜有九女人來齊著青衣絳綠衣下紫為腰帶佩金鈴鈴下有符黑

為文書青上手並執板板白色似玉見衣縫皆有如織文綴之每縫際並有小鈴子著之行輒有聲其一女則劉玄微一則陶智安餘者皆不識亦不見與語劉夫人曰比修學稍得新業邪吾旦往東華今始還文書事粗

得了見爾名已度上東華青簡甚助為慶陶夫人曰聞近齋而俟北斗大不可言訝爾標心乃至於此星亦未可卒見積以歲月所不論耳劉夫人因喚諸女曰此周生有凌雲之秀將可與共語一人應曰下仙未敢與高人

語劉曰高下未必可定伊猶沉滯塵喧共啓悟之耳何高之有此女笑曰別當相造今未容言陶曰此段易遷中有柳妙基音不得也孫芳華阮惠香此三女真字受口語此三子學

有功夫得度方諸第八朱臺中受書並為仙妃故今知之劉曰周生爾欲之乎答曰凡蟲鳥非所敢希曰爾得希之所以相告陶曰夜已深宜去便欲去諸女曰待儂因相隨而滅

右一條三日夜所受記書兩小青紙按此前月所云送學簿呈東華過而下見起玉乃更有餘人兼中朝議欲希之辭夫以

通育兩儀照臨日月山澤通氣陰陽離會莫不皆須此偶共相映協自高真以下咸周斯義既已久表皆記於今差非嫌燕但民幼貴賤年月賒促各有終運不心均耳如其道起端外心凝化表若時或應作非設體諧接文殊之感現淨名之室作賓友種寄對扶

七月九日夜見紫陽周王二真人定錄君三

人衣服並如前侍者共可有十許人紫陽童亦在中自共語良久定錄君乃語子良曰比勞用心吾天事頻煩以疲我神此六日往東華見爾名已上青簡乃位為保晨司始吾徒也不亦巍巍乎此乃冥符宿契雖非此間之

職要應先當成就周紫陽仍曰爾自應得此位諸局司故不以明德相顯直奏功夫事致使移時夫涉真境便多有試好固心力勿弱於其間王紫陽曰得如此甚好但恐以試為難耳子良因請問不審幾試試若大小恐肉

人邪僻能不憂懼王曰當兩小試或為虎狼或為殊聲異形以怖於人爾見此時但整心建意勿惶惶也若不過者怪應作人功夫俄頃耳周少來神聰強正小兒時獨宿空屋夜至移朱陽晨夜間路去未恒獨行耳始近聞人說從今八九月以來館解往反必須一兩

人相伴小侵則便執刀杖人問何忽爾亦為作伊鳴相答此當是去期近密防諸試只二十夕移東廡宿亦使一通士憲下伴眠

臨時猶慮有異於平日致驚怖定錄又曰昨耳而還得免過當由功力強

東華集諸司命及土地神靈典司之徒檢課簡錄見天下民人為善者五十分無一而況

於神仙萬萬之不過兩三耳其中功夫已成而復落除者亦不少吾將憂仙籍無復人也兼運度已逼災世益難見東華上簿紫錄內格中有上上真錄者五人已落二人補地解無復進補者上中真者二十八人一落七人

二人補下仙五人復還人中唯上一人補耳上下真者三百人一落二十六人十一人補地解十五人還民中都復上八人耳上上仙者二百十一人一落四十二人十二人補三官中職六人成尸解二十四人成賤民都成

五十人耳上中仙者二百九十三人一落七十人十人退成下仙八人得尸解五十一人還生民中復上十一人耳上下仙者四百三人一落七十八人二十人為鄴都所引四人被考三官五十四人還民間復上十九人耳

始今月標落此諸人須至分節當上言太極更記死錄於太山見此輩良為可悲並皆修

法不勤或先亡引逮所行乖道或先勤後怠失此功夫一何苦哉亦有垂登雲天者日月不空並下教真人降授之其或處在深山或

小目下刻急如不能遂回節取命兼挂辱於神鬼
蠟燭妻折花草唯日中一食而恨性過嚴治於
離至十有一年乃云小來手未嘗投蟲

然也學業既淺豈望今身有
果但兩三生得以爲幸矣

周君更問子良爾姓何等子良倉卒不得道
前賜名字直云姓周名子良君勃然曰何以

謬濫汝乃道士周太玄字虛靈而比於世中
周子良邪汝名書玉簡皆作周太玄勿復勝

應作子良唯於世上名子良耳勿以隱名示
稱字於俗人天下人應得道者何限而偏依依於

爾非直以挺命感真亦如以親逮故耳昔有

楊許者楊恒有神真往來而許永不得見所

以爾者許心徒勤謙猶欲想未除故不得見

楊位亦不大於許其神志安萬邪不能干

其正華總不能隨其心故受計方據今以示
許也爾今得見吾等亦如揚之行耳凡此

高世賢人行見年六十四

其言語令以示許喬商本谷民性氣虛疎不

能隱秘告其一法迴而加增逢人不問愚賢

輒敢便說之如此旣多便迴受於揚耳僑乃

流沉河水身沒異方得脫以來始十四年耳

1. The first step in the process of creating a new product is to identify a market need. This involves conducting market research to understand what customers want and what problems they are facing. Once a need is identified, the next step is to develop a concept that addresses this need. This is often done through brainstorming sessions and the creation of a prototype. The third step is to create a business plan that outlines the costs, revenue, and potential risks of the new product. This plan is then used to secure funding from investors or lenders. Finally, the product is launched into the market, and the company monitors its performance and makes adjustments as needed.

司甚助欣慶曰昨日已應有說此事者子良答爾諸真亦粗說其事但子良庸陋豈敢仰希恃蒙神真提拂不論耳

徐曰近見趙威伯作事上保命曰周子良字元鉢右一人改名太玄字虛靈以其生周達

家已上紫錄次生劉偉家復書玉編既經歷辛勤今謹依上科報以下仙為保籍丞羽儀衣服如故法

保命仍將往共定錄省察良久乃作讚上東華曰周玄秀德心志虛清謹按紫格可刻仙

名東華乃更命以七月七日會仙官檢名簿因得爾品目位合中仙更奏上仙為保晨司

韓侯仍作事曰周太玄字虛靈右一人昔標懷道之志今建蕩然之德上合乾綱下應地

紀依如仙格合中品之上伏見保晨司年限欲滿請選太玄以補之謹上青君命云如牒

仍作簡文曰惟周太玄因案樹茲刻名仙簡為保晨司

此為太玄上言太上也吾聞此位尋滿不出一二年中應相召也子

良問不審此位若為羽儀徐答曰亦不可為定更由功業之高下理有丹龍綠車玄羽之蓋素毛之節青衣玉女五人朱衣玉童七人執鴻圖之扇建扶靈之冠服紫羽之帔絳霄之衣帶寶玉之鈴六丁為使萬神受保知天

下神仙功夫之事教學之方非復人間保籍承也故指來相報未可示人身之遺迹乃後人之所效耳鄧曰桐相真君乃欲來須見太

虛司陰二真既累去後與兩小兒竟夕相語無知者以至於今唯密以啓聞尋於此見是前錄所招或使隨應至定錄通至灼然知見

而不可校也尋既未知應為此位那言不大欲其性理思此意自發上道心無復執著

與時求道之志便有濃淡故以推心知實不

大欲得耳今既忘言於取捨便亦不辭此任

但今得在能利忘言於取捨便亦不辭此任

之六云雖欲道中猶煩未定朝開此信忍望都

願周生既已見捨便欲促往尋之沐別記目

此月十五日保命授三天龍文并令且混

人勿異迹行來動靜但意云此一不顯出

十三日夜定錄趙丞俱來定錄曰昨與思和至太元府仍詣南夫人論陶某事乃得由少時子良問申幾時又曰未測幾時或五年十年事雖關我亦由上府繼東華隸司命未敢為定趙丞仍曰且已被東官命令且住召陶

某事子良問召為何職仙官鬼官丞答蓬萊都水監高光坐治水事被責似欲以陶代之

既且傳召當更選耳此是仙官隸司陰府掌

水事以陶有勞故得補之如陶意似不大欲為此位既仙陶當不知卿可以事白陶也少

許時又曰夫人生禍延福湊皆有因而至非神明之所如陶今夕心意復憶此雖云欲

蕩情散慮恐亦未能都去如何復言合丹事

云云弗聞可恨也又言青童大君月未當來

華陽字檢選仙事云云

右一條十三日夜所受記書一小白紙此

告即符前二日所云中旬間共為論也周

尸不眠此便開戶對呼進意所須
衣服物器一皆捨與別屋兩小兒並被錄
置既從來未嘗見此不能不潔而猶向其
道但各取重擔後去必無告討正恐君劫
好意相與使後也

十八日夜見定錄曰陶乃答吾前語年限猶
未定別更報爾所云欲住雷平山後此亦不

勝今居論災厲刀兵水火之事乃為好耳此
地本非可隱居寂處直可以避災害住與不
住無勝否也又論方託形何處此由人心心
既未發吾寧得知方將而言唯句曲可住吳
越名山乃不少未見有大勝地猶勸陶居此
山

右一條十八日夜所受記書一白藤紙
居既得周所宣事以十五日就作辭語
周令接觀之曰為申陳如此即是相酬之
告周竟不以此見向道當是無正可否以
宣也于時至尊垂恩為置家長沙道士二
兩并左右空地於此廨西復為起觀前左
右即是許長史舊基竊恐則近真縱或以

此據故二三因聞耳追恨不得作方岳
通辭方岳通辭則亦應方岳酬答也

二十五日夜夢見唐趙二丞來趙曰近何意
恒勞苦損人精神惜人耳眼今去勿復遇辛
苦子良問不審住此廨中好否比者恒憂與
監事趙迴頭曰此事關唐丞唐丞仍曰雖見

關亦不得自由夫災禍亦非鬼神所知此廨
自不須多憂疲人心慮子良言劫盜事深以
仰憑答曰自保最不須過憂便去君論期運
事竟應相造也我等且去尋復相過子良起
送相隨而滅

右一條二十五日夜夢所受記書一白官
紙此更早人情惡山有等長但慮驚怖云
一云主死生計劫盜事正應由樂承不知
關唐也記中從來見唐來事今若始運應
有始相識語恐前已有不存記耳西縣
北後至今領蒙史隱也依別記月錄此月
二十八日唐丞又云劫盜事不
令受云云此不顯恐是不錄也

右起七月三日至二十五日凡有七條事
書青白大小合十紙於目錄中開一

周氏冥通記卷之三

周氏冥通記卷之四

翔九

此卷從乙未年五月二十三日初通至丙申
年七月末月月悉記所通目錄其五六七月
別三卷自八月後至今年七月
末止有此年目錄無更別記

乙未年五月二十三日晝保命府趙丞告云云

乙未年五月二十三日晝保命范帥告云云

乙未年五月二十七日夜中嶽仙人洪先生
告同二星云云

乙未年五月二十八日晝夢食合金液醮云云

右四條五月中事今別撰在第一卷云見

一條云夢

乙未年六月一日保命趙丞華陽司農王童
紫陽內官玉童各告治身之行云云

乙未年六月四日華陽童告人罵辱令心勿
受云云

乙未年六月六日桐栢仙人鄧君來結冥友
云云

乙未年六月八日紫陽玉童宣周君旨改名
字云云

乙未年六月九日聞人隱告坐卧假房事云云

又保命趙丞告流汗事云云

乙未年六月十一日於東嶺宿易遷女仙李

飛華告有五女仙欲來云云

乙未年六月十二日中嶽真人馮君蕭關堂

主張君中嶽仙人洪君保命府樂丞華陽王

童凡五人告長生要言云云

乙未年六月十三日范帥告勿食肉事云云

乙未年六月十五日中嶽洪先生授洞房經

云云今

乙未年六月十五日范帥遣人來重責食肉

事云云○

乙未年六月十九日易遷五女仙來告生死

因緣根本云云

乙未年六月二十一日趙丞遣黃元平告請

雨事云云

乙未年六月二十四日蒼梧仙人徐君棺柳

事云云

乙未年六月二十四日趙丞又遣來告請兩

騰辭蒼梧去後云云今

乙未年六月二十五日黃元平告已落太山

死籍云云

乙未年六月二十七日華陽童宣定錄旨授

玄真經云云今

乙未年六月二十九日蒼梧徐君執蓋鄧君

告名已上東華云云

右十七條六月中事今別撰在第二卷凡

三條今見十四

乙未年七月二日紫陽周王二真人定錄保

命二真君周大夫司馬括蒼樂丞同來大論

語事云云又及隱晚事云云

乙未年七月三日易遷有女仙來云名已上

青簡云云

乙未年七月九日二紫陽定錄告已進焉保

晨司并論上落人數云云

乙未年七月十一日徐鄧二人來云參定東

華名說上事牒云云

乙未年七月十三日定錄君及趙丞告陶得

停召合及事云云

乙未年七月十五日保命君授三天龍文并

令但且混人世勿為異應行來動靜營焉出

入任意但勿違犯正法耳條真法時但默行

莫令人知神明不以萬里為遠不以山海為

難戀行應動任所趣勿以吾等為礙云云今

乙未年七月十八日見定錄君云陶答語及

問所住云云

乙未年七月二十五日趙唐二丞告勿過勞

神疲體云云

乙未年七月二十八日唐丞告劫盜災禍不

須防慎不令有憂云云今

右九條七月中事今別撰在第三卷凡

見有七條並

從此後並無別記實為深恨云云

乙未年八月一日范監來告云此日諸真相

就論說觀已畢自今已後欲令自來處處遊

觀云云來則非夢

八月五日夢從一朱門崇闕入見司命君見

授夜光芝云云句曲五種芝是

八月七日夢入華陽中先經保命府後至定

錄間次往蕭關採龍仙芝云云此則從北入

種芝見五

八月九日夢至定錄間見問云乃同人齋邪

云云爾日在中堂王法明為皇家鑒炭齋

八月十二日夢與定錄君於華陽內共乘車

侍玉女三十人奏天樂造南真於丹城南真

見告云因又告太元太元示以仙籍云云二其府並

在大

八月十五日夢與定錄保命共往紫微夫人

處云云紫微治玄龍宮應在北方

八月十六日夢至方諸見青君府不見青君

乃見韓太華丹青館宋夫人見告神仙之要

委形之術云韓太華始以今年度東宮受書朱官玉妃之寶文緯出真語也

八月十九日又夢造方諸正見青君出遊楊

君九華及許仙侯皆從因造韓侯見告簿籍

事云云韓即前卷所云東宮典錄籍者名惠期也

八月二十一日夢與保命至蓬萊見周大夫

又至一朱臺巨闕青軒紫房云是司陰府陶

某近正應治此東南一玄宮中因復行見一

人面金色長短中形人著飛霄衣冠見告道

法之事云云保命曰此是小天奉法人周大夫

仍告道業因緣甚多云云周大夫即大寶真詰亦云在蓬萊司陰府

主天下水事出馬君傳前不知邪治在蓬萊小方諸多事道事亦出真語

八月二十五日夢與范監趙丞至大衡山見

南陵薛大夫中黃杜大夫見授隱變方因爾

又行見一草屋甚高大絕有甘泉雜生眾華

范監云此是遊仙之廬因共入坐屋下談神

仙事云云薛杜二大其語中無也

八月二十五日夢入華陽造定錄諮來年十

月可保得申延不答云可爾云云此其猶欲此諸雖初云可爾恐後復相詰却

八月二十六日夜夢定錄保命來見告云明

當復往東華過司命間既是天事不復得同

當更為訪韓侯論爾不更迴異不此謂及復退皆復由功過故也

八月二十九日見上期來宣定錄旨云韓侯

甚有懷於爾爾錄猶因云云此云見來則非夢也上期是華陽重

姓景名上期也

右十三條八月中事二條是來十一條是

夢往

九月二日夢至華陽中見二君云云

九月五日夢又至蓬萊先過司命司命見告

服神丹應先須名上仙籍乃得服之云乃至

蓬萊見周大夫食一草狀如槐香而紫色見

告云子未得食此得食此便如吾耳及火藥

交梨事云云火藥交梨出真語中亦竟不知此果是何神奇

九月八日夢與趙丞共遊易遷童初二宮二

宮相去可五六里易遷童仙宮童初男仙宮而未知東西列為南北列也耳

九月十日夢與保命到一山山形平圓異於

人間山名為丹龍云中有洞多仙真丹龍云之南是南真所治之宮也

九月十五日夢獨往桐栢山見金庭館珠寶

煥麗宮室行列殊多亦有青黃盡相似復云

有金庭洞宮自所見者非其限乃眾仙之遊

憩典司之所治耳非王真人所居東方大君

來時別復有官雖云有而自不見桐栢右桐王所治之

處亦云山內外並有官府

九月二十三日夢定錄來於朱陽見攜到司

命府道逢玄清紫微二夫人乘雲輶從二十

餘玉女語定錄云司命紫陽正相遲塵生今

來亦是其冥意言見笑為塵生不言是陳生

定錄答語云當爾時亦不知在何所但覺不然而行耳到司命門即見紫陽共見告大有所言非可具記此應有奇事也

九月二十五日忽夢見張理禁令誦道德道德二篇實道書之宗極太極真人亦云誦之萬過曰日昇天

右從前來至此並墨書大度西府凡七百紙

九月二十九日夢見天西北有一物長數十丈青赤色首尾等大狀似虹因到張理禁處問此為何物答云名玄霞之獸或呼為水母乃可愁矣夫有中之無未若無中之無空無之理難可思議此九六之災顯矣人誰知之

張理為保命府禁伯主誦雨水故以問之事出真誥張既善談玄無每誦入斯境隱居謂有中無之無自性空也無中之無無中無之無但水解說此何指耳

右八條九月中事並記云夢

十月二日夢見洪先生見今誦太素祝此出何經

十月五日夢見定錄君云比來多諸進御善自禁節勿縱志也似應作恐字既玉有上落實宜恒加精勤也

十一日見紫陽定錄保命桐栢來及移朱陽

事此云不知論此可否云何

十八日見定錄云朱陽非爾所居處若不能速去只朱陽左側亦好良常為勝恐爾不能處之耳此月十九日隱居始移朱陽住同亦同來既是公館當慮有日之事以為妨碍也

二十日夢見南真紫微云云

二十七日夢見趙丞洪先生及星事云云

二十九日夢至一處名為陰城之宮大有仙人而自不識未見陰城官所出處

右七條十月中事二條云見五條云夢

十一月三日夢見洪君及唐丞言曰雲開星沒唯宜矚南山坐耳此雖可瞻而非求其之體三日應司二星既雲開亦不宜便眠耳

十一月八日夢見定錄因自陳欲寄朱陽東

為小屋未審可爾不答云東好所恨下墜為不便耳夫居當作四合舍不者不可不作堂東西廂若不爾名為孤凶宅但以意作之爾其去矣以遺來者吾見陶某比意大欲相試爾但浮此跡勿畏人不信得不信乃為吾之

快矣東因有兩大窠皆可營墓初本欲於西陽為好周今定東窠正南向

十三日夢見周君言曰陶某或信不信多好試人但爾比亦喧然多諸雜想可自節此頻云陶或信不信欲相試今追思不意的有不信事自從遠想來凡一切有為通無爾恨耳

於周事實亦謙尚亦不乖若正自慙然有時見其過元既幸慮嫌接神之體不應爾至於萬伊本願即作三間堂東西兩各二間林竹至而道士心未善者互與言說遂不成復作非已立意也此者微有準擬欲追為此明其留聲云止請留一問既為遊舊之所今則今無難也

十五日夢見洪君來告曰爾即欲所居西北面有故氣吾今共汝看之便往至彼處見一人形極醜陋君曰此即是大都畏人居之定無苦朱陽館及彼解以後乃有兩三卿狀似有丑場處所云故氣正當鬼爽耳可既曰無苦便不為害也

二十日見一女人形容殊麗上下青衣侍二女至戶內立而無言

二十六日夢見周蓬萊云北斗已復不見而祝於二星云云當是二十七應司二星今夕已陰晦必不見也

二十九日夢見第二君周二君並有控乘遊

於雷平直取伏龍定錄並舉手見向如謝去

狀雷平在館東南伏龍在西北便

十二月三日見徐陞應作二君言去二十九日桐栢府校籍頓誤上罪人典簿三人被責

七云云便不了日夢往司命處告玉清清玄事云云此所論殊高深

十一日夢見韓夫人云此者情志落落彌入真相云云應是韓太華始以七月度東宮為妃

十九日見一人駕大車形容甚壯從者十人直見拜溫涼而已

二十一日定錄告云前來拜者鄧都執法君蔡子遷也爾方綜其上官故來通報耳云云保命府職係皆總治鄧位位彌相關涉上官當保籍任也

二十五日見趙丞直云仙籍空矣爾勿憂矣故七月月中定錄所歎亦云方憂仙籍無人

二十八日夕見定錄趙丞范帥三人子良問所通辭仰呈君未君云適得君仍語丞云可速因直爾而已更別餘語云云此中似別有

應是為神見有辭存

右七條十二月中事五條云見二條云夢

閏月三日夢見韓夫人云世上方無復蹤如可云云韓猶應是大華

六日見洪先生云子勤之昂之前後事事也

十五日見保命云爾屋事勿以在懷傷人神氣其人尋來就上其正月發戴屋而所願師攝之師定尋自來當由此故有今告也

十八日夢大司命君問曰子欲仙不答實願

仙云願仙何不學仙云云

二十三日見洪先生云此所問泛舟者乃中嶽仙人于朴也其前生經識陶某耳非今生相識也豈復來於此邪去冬有人姓顧名道浪中來直呼顧姓名云下都去欲寄書與茅

山陶隱居隱居已與我欲助其功夫以戲主正爾見作書垂授與忽云罷君會不往

山我尋自下云此人自稱姓彭顧至都勿勿

二十五日見定錄保命二君保命曰年內多

勞扇削鬼神三官中奏爾云多罪吾已却之不宜三過如此云云伊蒙神真扶製如此不免三官所奏沈痛腐之徒邪

二十六日見周君云葛衍之東水已加八十

一丈南衡山西邊頓崩為淵云云

二十八日見徐君云韓眾已復有事今與鄧生往看之云云此語不衆字惠期

司命南真南真見授一子大如鵝卵今啟之司命云道未成不得九轉之華且食此亦足明爾云云

右八條閏月中事六條云見二條云夢

右從八月初至閏月末凡六月中合五十一條事十六條云見三十五條云夢從九色紙並紙黃書共一紙也

丙申年正月二日夢造小有天見王君云爾何違違於人間名已定勿虧頓於世路云云王屋山清虛王君為下教

十日見洪君范帥云明是戊寅上玄治建可戴屋云但宅不得其所洪云大象尚復無常

人生有何定邪只此亦好又及洞經事云云其本

欲取此日戴屋而師不來又小
雨遂不果至丁亥日方得戴耳

十一日見定錄保命桐栢周君周君云爾不
復說真道耶吾將去爾子良未得答定錄乃
云其心不然正是身廢耳紫陽試之耶保命
云爾何意頓取人三百斛穀子良答不取又

云見取何意頓取人三百斛穀子良答不取
又云見取何云不取已爾別當婢之餘別自
語所不能了其此數句中為起屋事惟憶
其此數句中為起屋事惟憶
其此數句中為起屋事惟憶

十四夕夢見許仙侯等五人自共語許云自
宅此字未足久使已近二百許年又聞一人
答兆劫尚復倏爾此何足為遠不知是許
宅

十七夕見定錄唐丞來中君云許侯近所言
亦深哉唐丞論北臺事極多非可書銘北臺
臺

二十四夕見定錄君云念真不密穢氣無辯
自云研瑩之云云

二十七日見保命及洪君洪君云勿輕說人
事云云此當有所
試不知是何耳

右七條起丙申年正月申事二條云見
三月三日夢見洪先生云北斗事
是司二星

七日夢見定錄云臨海燒山中有仙人遊在
人間自號彭先生實是鄭玄字子陰陸渾仙
人也朱交甫令其觀上人情及修道者其尋
或當來先昨已往建安臨海人書與道士鄒
堯云某人彭公在此不堯得而插靜極故人

得見之其人亟乘一刀小船而歌曰太霄何
冥冥靈真時下遊命我驚塗際探察雲中儔
世路多淫濁真誠不可搜促駕還陸嶺人間
無與酬步行亦詠此其若來可不接之其人
形中人面左邊有紫誌著黃綃帽多髯而前

齒缺是也書此一係獨委曲者當是或欲示
軍樂成三縣共界未知鄭堯是何處人顯明
形服如此便是可察正恐伊知人識更復改

九日見趙丞云此者情志何其索索云云
十四日見定錄云司命來月中旬當來西宮

東官人亦並來故逆示云云此當是云三月
十八日事見其此日
亦有辭
本存也

二十日夢見司命君君見令取青此一字章
識以呈司司命云此可耳心未真也當更
研瑩見景上期來云二君今往龜山聊過令

知如此所見意氣欲動前與人戲過致使時
魅相侵賴得高監相為不爾幾致變聞周在
輔病恐是此意高監不
知諱謂中不見此人也又曰裏屋人自稱不
道士者是北星鬼官所使勿信之以邪情亟
惑人壞人真氣可急詣許駕去已遠不得久

停便去周在許仍就王法明同住南度第道
事故得此告其還多有問本者
而都不說此事實能慎密也

二十五日見唐趙二丞來云遷於舊居便共
覺蕭然多論九轉事云并二君令告云云其
三日遷至山意殊不許遊行人
間九轉事無聞一何可數也

右六條二月中書一條云見
三月三日見保命告勿食草之正心及餘事
云云紫文仙忌云
爾止謂此一日耳

八日見趙丞云天下邪鬼之事令慎之諸云云
二十九日見保命云勿犯霧露云云

右三條事三月中事並云

四月九日見定錄云前疏文辭殊雅但恐心

不必然耳此云不見

十五日見三丞及洪君來云欲下都邪勿不

復反山諸人自共語多不了其手時欲出都

耳

右二條四月中事並云

五月九日夢見司命定錄保命及衆真並見

試以綠業事云云色不悅又及應

十五日夢到東宮拜青君見韓侯等雖不面

見青君而傳驛意氣大見憐愍韓侯接對如

常耳如此說者前韓

二十九日夢司命三君云前事遣赤城外衛

軍十人相助遂不能都此字草沒亦得可

耳不解此何若是前所云憂盜相救助者則

右三條五月中事並云從正月來至此

六月十日於道中眠夢見范帥云惡魅橫行

不可卒禁勿輕慢之雖無如人何交爾不好

云云周書出都以此月九日晚出山就塚宿

十日早發爾夕應在胡熟方山問此月中建

近多

十九日於第中夢斷肉乃食鵝膏未可解也

追拾此日王法明文子在館宿延陵松茂先

亦入其多責郭邑穀果食中必有鵝膏煎黃

二十八日夕夢見紫微遊行云云

右三條六月中事一條云見

七月一日見洪先生云八霞之表已陳爾居

處東萊可不裝束云云大多不可復載此中當

會

八日復夢見韓侯紫微揚君定錄等多為論

性命之致因緣罪福之源若疏此可三四紙

許不聞此亦

十七日見保命趙丞多論天地災橫之事亦

甚多不可記此事理

二十三日見衆真凡三十人多論人治身之

本謝殃之法甚多亦復論作九轉事條云此

最恨

右四條七月中事三條云見一條云夢從

白牋

右從丙申年正月初至七月末凡七月中

合二十八條十八條云見

右從目錄凡用墨朱黃三色書大度白及細

紙合十六番八番白并右從去乙未年五月

二十三日初通至今丙申年七月末合一百

九條六十三條云見從八月初至十月二十

七日捨世凡三月日中文書記不復顯出尋

入今年來月月所記自踈簡未知是不復悉

記為時近致希邪周紫陽記九真玉瀝丹方

轉此別一紙無日月

九莖紫菌琅葛芝一斤出南閩句

丹朱玉漿二斗出南閩此

右二物細切芝竟仍以玉漿一斗漬之一宿

埋陰垣之陽去垣三寸入土一尺以白瓦器

容四斗許盛仍以瓦盤蓋之蠟密封之上土

令厚二寸以今日午時埋至明日午時出之

持之南行取已所住戶十二步乃置眠牀頭

按上至明日午時又以銅器盛煎之令火齊

器底勿令火豔出器邊也得三沸竟又內玉

漿一斗又加火高初五分許可以蓬蒿為薪

煎令餘一斗漉滓乾之閉計三日三日竟開

視上當有紫光曜目夜不用然燈此即成矣
又以藥滓置木臼中搗三百二十杵紙裏令
寒若以投水水流即停若封屋室萬人不能
開若僂劫賊合衆不能動封山山開封人人
伏若欲速登天可併服之即死矣若欲且留
世當稍服之盡亦仙矣勿以分人及令人知
見也唯可心知口服而已若令人知空失此
藥也

右此一方無年月日不知何時書滿一白

○
賤紙謹正此藥名既又云唯可心知便是
或云不覺見垣內埋藥亦不聞本日鳴聲
恐或別處作不論耳既云服之即死故也
或以疑見溫酒亦可
或以疑以亂之耳

大凡四卷真本書雜色合六十五番或真或
草行

周氏冥通記卷之四

紫陽真人內傳

期十

紫陽真人本姓周諱義山字季通汝陰人也
漢丞相周勃七世之孫以冠族播流世居貴
官祖父玄元鳳元年為青州刺史父秘為范
陽令時君始生焉父後積秩累遷官至陳留
史君時年十六隨從在郡始讀孝經論語周
易為人沉重少於言笑喜怒不形於色好獨
坐靜處不結名好然精思微密所存必感常
以平旦之後日出之初正東向立漱口嚥液
服氣百數向日再拜旦旦如此為之經年父
怪而問之所行何等君長跪對曰義山中心
好此日光長景之暉是以拜之耳至月朔旦
之日輒遊行市及閭閻陋巷之中見貧乏飢
餓之人輒解衣與之時時登上名山喟然悲
歎或入石室之中歡然獨笑時陳留大多名
士聞君威德體性沉美咸修詣焉君輒稱疾
不見賓客漢侍中蔡咸陳留高士亦頗知道
聞君德行數往詣君輒辭疾不欲見之父乃
大怪怒責之督切使出逼不得已遂出相見
咸大發請問及論神仙之道變化之事君乃

凝然內閉歛神虛靜頷而和之一不答也是
歲大旱陳留大荒斗米千錢路多飢民君乃
傾財竭家以濟其困陰而行之人亦不知是
君之慈施也對萬物如臨赤子斯陰積善德
仁逮之施矣又有黃泰者寓在陳留婦兒無
有單身隻立了無親戚人亦不知其所從來
常著故敗皮袴角皮褶恒賣芒履在陳留市
中君常潛行經過市中見泰衣束殊弊君每
曾聞仙方說云仙人目瞳子正方而黃泰雖
復外形帶索目方面光密而奇之中心猶喜
還歸數使人買芒履因以金銀錢帛著其物
中陰以與之數數行之如此非一黃泰遂詣
君君見迎而拜之將入靜室乃是中嶽仙人
泰曰聞君好道陰德流行用思微妙感於我
是以相詣吾是中嶽仙人蘇林字子玄也本
衛人靈公末年生少好道德受學於岑先生
岑先生見授鍊身消災之近術後又傳仇公
仇公乃見教以服氣之法還神守魂之事吾
行之甚驗大得其益仇公見告云術謹盡此
不能使子白日升天上為真官也致吾於消

子消子者中仙人也守之彌年見教守三一之法曰三一者太微之玄真上清之元圖一曰洞真二曰妙經三曰素靈東海小童君藏之於靈景之城琳霄之室非有仙籍者不授矣此書淵秘非賢勿宣汝有至心故以相付八節存之一則消除萬害一則形軀不敗能守之致雲車羽蓋坐造風雨激電砰礮矣乃地仙之美術長生之真法吾因受之得以遊翔名山往來方諸之館寢息丹陵之丘看望八表得意而栖從容以來數百年中良為樂足樂足而思此居泰而不復否非順天行化與時消息之謂也故以投身臭濁觀化黃鶴賣履弊作唯下是居自謂庸庸不能甄識朱碧於凡壤之中矣而子猶有察真之鑒數獲惠遺非所悟也欣子有尚故來相詣君再拜頓首數十悲喜自搏膝行而進自陳少好長生唯願登仙度世夙夜靜思願與真人相遇沐浴素流稟受奇訣今靈落神降得接聖顏千秋志願慶莫大焉乃復頓頭請乞奇要仙人曰子坐吾將告子子少知還陽精髓不泄

又知導引服氣吞景嚙漿不復須陰丹內術補胎之益也然猶三蟲未壞三尸未死故導引服氣不得其理可先服制蟲細丸以殺穀蟲蟲有三名一名青古二名白姑三名血尸謂之三蟲在內令心煩滿意志不開所思不固失食則飢悲愁感動精志不至仍以飲食不節斷也雖復穀斷人體重滯奄奄淡悶所夢非真顛倒翻錯邪俗不除皆由於蟲在其內挫動五藏故也殺之方用附子五兩麻子七升地黃六兩茱萸根大者七寸木七兩桂四兩雲芝英五兩凡七種先取菖蒲根煮醱作酒使清醇重美一斗半以七種藥咬咀內器中漬之亦可用咬咀三宿乃出暴之令燥又取前酒汁漬之三宿又出暴之須酒盡乃止暴令燥內鐵臼中擣之下細篩令成粉取白蜜和之令可丸以平旦東向初服二丸如小豆漸益一丸乃可至十餘丸也治腹內痰實上氣心胃結塞益肌膚令體輕有華光盡一劑則穀蟲死蟲死則三尸枯枯則自然落矣亦可數作不限一劑也然後合四填丸

加曾青黃精各一兩以斷穀畢可導引服氣不得其理可先服食衆草巨勝茯苓木桂天門冬黃連地黃大黃桃棗及皮任擇焉雖服此藥以得其力不得九轉神丹金液之道不能飛仙矣為可延年益壽不辟其死也君按次為之服食附十術五年身生光澤徹視內見五藏乃就仙人求飛仙要訣仙人曰藥有數種仙有數品有乘雲駕龍白日昇天與太極真人為友拜為仙官之主其位可司真公定元公太生公及中黃大夫九氣丈人仙都公此位皆上仙也或為仙卿或為仙大夫上仙之次也遊行五嶽或造太清役使鬼神中仙也或受封一山總領鬼神或遊翔小有羣集清虛之宮中仙之次也若食穀不死日中無影下仙也或白日尸解過死太陰然後乃下仙之次也我受消子秘要善守三一之道役使鬼神受太極帝君真印封掌名山以得不死亦是金闕帝君真書之首眾妙之大訣但吾所學少成地仙人也子名上金書於方諸之宮命登青錄為字所謂金閤玉名已定於天

曹矣必能乘雲駕龍上造以紫陽太清金
真玉光龍衣虎帶拜爲真人我之道術可教
陸仙尸解之人耳非子真人所可學也且我
是中仙耳不足以爲子師然守一鍊神雖非
上真之道亦是中真地仙之好事亦能朝千
山之神攝川澤之精吐故於七華之下納新
於三宮之上禮乎赤子謁乎真人恭乎嬰兒
三真者乃身宅之帝君混二十四氣分入太
微又分號二十四真能善斯道於三寸之間
則三宮真人可見見則雲車羽蓋千乘萬騎
可見而得乘御也列名九圖飛行上清上元
用立春從東斗來還中元用立夏從南斗來
還下元用立冬從北斗來還三氣上昇身亦
存之日之四節一之往反也其法鮮矣其用
浩矣其事近矣其生長矣苟得其道亦變形
萬端身出水火收束虎豹役使鬼神也子亦
復宜知此道以漸升進耳今以守三一之法
靈妙小有之書二百事傳子石菌朱柯若乾
芝與子服之吾道畢矣不爲試子也吾行當
被玄洲召去三十日近比者之頃當時相詣

以啓子之未悟爾自行哉可速索師也必欲
該道真妙窮微極素當艱苦嶮試浮遊五嶽
雖遇真人未即授子真道也不百餘年雪車
羽蓋龍虎之袍未可得也君再拜受教還齋
沐浴五香七日七夜不寐但危坐接手持念
至道乃以平旦燒香北向再拜服此神芝五
年之間視見千里之外身輕能超十丈日步
行五百里能隱能彰坐在立亡能巡行名山
尋索仙人聞有樂先生者得道在蒙山能讀
龍蹻經乃追尋之入蒙山大洞黃庭之中遇
衍門子乘白鹿執羽蓋杖青毛之節侍從十
餘玉女遇於黃庭君乃再拜頓頭乞長生要
訣門子曰子名在丹臺之中何憂不仙乎王
屋清虛洞宮大多仙人子始學宜登此山乃
越江河登此何索君對曰聞有樂先生得道
此山能讀龍蹻經故來欲見而受之耳門子
曰樂先生仙之下耳子乃真人也以真問仙
不亦煩乎子遇真人乃子之師也中仙已下
非子所學乃出龍蹻經以授之三皇內文以
召神靈以効百鬼乃退齋少室山三月乃遊

登王屋山發洞門入丹室大遇仙人皆披素
讀經見君皆起立有趙他子授君芝圖十六
首受五行秘符而退齋復登王屋山遇黃先
生受黃素神方五帝六甲左右靈飛之書四
十四訣乃退登嶠冢山遇上魏君受太素傳
左乙混洞東蒙之籙右庚素文攝殺之律乃
退齋三月登嵩高山入洞門遇中央黃老君
游觀丹城潛行洞庭合會仙人在嵩高山太
室洞門之內以紫雲爲蓋柔玉爲床鳳衣神
冠佩真執節左帶流金之鈴右帶八光之策
神虎俠洞門靈符衛太室左侍者清真小童
右侍者太和玉女各百餘人捧神醴之琬詠
大洞真經三十九章誦大有妙經二十四章
修太上素靈三十一曲其中庭有青腰玉女
執玄玉南霞之燈散花燒香衛黃老君黃老
君巾三華九陽之巾手彈流徽雲珠素琴被
服金光天姿嚴峻眼有電精口含玉膏君既
至頓頭再拜乞長生度世願上佐仙官黃老
君曰子存洞房之內見白元君耶君對曰實
存洞房嘗見白元君黃老君曰子道未足矣

且復游行受諸要訣當以上真道經授子也
子見白元君未見无英君且復行也君再拜
受教復頓頭乞得侍接龍車為遊走之使黃
老君曰洞房之內至精之中有大神不可名
安出紫房遊戲丹田上通太微乃下洞玄小
有為白元君大有為无英君見白元君下仙
之事也可壽三十年若見无英君乃為真也
可壽一萬年可精更存之不試子也君再拜
受教而退游行天下名山大澤西登白空山
遇沙野帛先生受泰清上經退登峨嵋山入
中。空洞金府遇審先生受太丹隱書八示十
訣退登岷山遇陰先生受九赤斑符退登岐
山遇臧延甫受憂樂曲素訣辭乃登梁山遇
淮南子成受天關三圖乃退登牛首山遇張
子房受太清真經乃退登九嶷山遇李伯陽
受李氏幽經乃遊登鍾山遇高丘子受金丹
方二十七首乃登鶴鳴山遇陽安君受金液
丹經九鼎神丹圖乃登猛山遇青精先生受
黃素傳乃登陸渾山潛入伊水洞室遇李子
耳受隱地八術乃登戎山遇趙伯玄受三九

素語乃登陽洛山遇幼陽君受青要紫書三
五順行乃登霍山遇司命君受經命青圖上
皇氏紀籍乃登鳥鼠山遇墨翟子受紫度炎
光內視圖中經乃登曜名山遇太帝候夜神
童受金根之經乃登委羽山遇司馬季主受
石精金光藏景化形乃登大庭山遇劉子先
受七變神法乃登都廣登建木遇谷希子受
黃氣之法太空之術陽精三道之要乃登桐
栢山遇王喬受素奏丹符乃登太華山遇南
嶽赤松子受上元真書乃登太冥山遇九老
仙都君受黃水月華四真法乃至合梨山遇
皇人受八素真人經太上隱書乃登景山遇
黃臺萬畢先生受九真中經乃登玄壺羽野
遇玉童十人九氣丈人得白羽紫蓋服黃水
月華法乃到桑林登扶廣山遇青真小童君
受金書秘字乃退南行朱火登丹陵山遇龔
仲陽受仙忌真記乃西遊登空山見无英君
西眼洞房中无英君處其左白元君處其右
黃老君處其中无英君被服金精之錦朱碧
玉綾之袍光赤朝霞流景曜天腰太上靈氣

之章佩九帝祛邪之策著翠上紫龍之冠蓋
太玄丹靈上元赤子之祖父也左運青宮之
氣氣灌萬神乃未有天地先自虛空而生矣
白元君被服丹玉之錦雲羅重袍白光內朱
流景參天垂暉映神玄黃微虛腰太上靈精
之章佩玄元攝魔之策著招龍造冠蓋玉房
雲庭上元赤子之父右夾暗清之室朝運生
者也中央黃老君是太極四真王之師老矣
上攝九天中遊崑崙黃闕來其外紫戶在其
內下與二君入人洞房負三寸威儀具焉夫
至思神見得為真人若見白元得為下真壽
三千若見无英得為中真壽萬年若見黃老
與天相傾上為真人列名金臺君既見之乃
再拜頓首乞巧上真要訣黃老君可還視子
洞房中君乃瞑目內視良久果見洞房之中
有二大神无英白元君也被服狀如在空山
中者黃老君笑而言微乎深哉子用意思之
精也此白日昇天之道子還登常山授子上
真之道君乃還登常山石室中齋戒念道復
積九十餘年中无英君黃老君遂便授之大

洞真經三十九篇有玉童二十一人玉女二十一人皆侍直燒香晝夜習之積十一年遂乘雲駕龍白日昇天上詣太微宮受書爲紫陽真人佩黃旄之節八威之策帶流金之鈴服自然之衣食玉醴之飴飲金液之漿治葛衍山金庭銅城所謂紫陽宮也紫陽有八真人君處其右一月三登崑崙一朝太微帝君以嶠冢爲紫陽別宮所謂洞庭潛宮也嶠冢山有洞穴潛行通王屋清虛小有天亦潛通閭風也

真人曰天無謂之空山無謂之洞人無謂之房也山腹中空虛是爲洞庭人頭中空虛是爲洞房是以真人處天處山處人入無間以素米容蓬萊山包括六合天地不能載焉唯精思存真守三宮朝一神勤苦念之必見元英白元黃老在洞房焉雲車羽蓋既來便成真人先守三一乃可遊遨名山尋西眼洞房也此要言矣真人周君曰諸應得仙道皆先百過小試之皆過仙人所保舉者乃勅三宮乞除罪名下太山除死籍度名仙府仙府乃

十二大試太極真人下臨之上過爲上仙中過爲地仙下過白日尸解都不過者不失尸解也尸解土下主者耳不得稱仙也蘇子玄後亦被玄洲召爲真命上卿一旦於陳留乘雲車驂龍虎侍者羽蓋而昇天也同時多有

見者冉冉西北昇良久雲氣覆之遂絕教周君守三一法靈妙之言近二百事消子即子玄之師消子似齊人少好餌術接食其精精思感天後釣於河澤見東海小童語之曰釣得鯉者剖之後果得而剖魚腹獲金闕帝君

守三元真一之法於是遂隱於索山能致風雨學道在世二千七百年一旦告人云微大微召補仙公遂去而不知所終矣語子玄曰斗中三一宜以節日祀之爲二十年三一見矣見則長生成仙家有三一長生不滅能存三一一名上玉札能存洞房與天相望能存三元上爲真仙皇天上清金闕帝君所以乘雲迅龍周行九天者寔洞房三元真一之事也吾食木精三百年服氣五百年精思六百年守三一三百年守洞房六百年守玄丹五百

年周遊名山看望八海迴遊五嶽休息洞室樂林草之垂條忻鳥獸之相噉川瀆吐精丘陵蓄鬱百物之秀寒暑之節弋釣長流遨遊玄瀨靜心山岫念真養氣呼召六丁玉女見衛展轉六合無所不達守形思仙二千七百

餘歲實樂中仙不營當世今卒被召請從此別云消子是臨去之時著書與子玄別玄丹者泥丸也其義出太上素靈經守三一得爲地仙守洞房得爲真人守玄丹升太微宮也勤而行之自得此書此言信矣非賢慎泄之

真人之言不得見太平有志道而隱者可示此書耳子其慎之寧勿宣

夢召法主本本是晉隆安三年太歲己亥

正月七日甲子書畢

又注云周君後漢元鳳元年太歲辛丑七

月五日己卯生到元康元年太歲丙辰師

蘇君受三一貞白條例云有三千四百人

十八字今數有三千四百八十九字不知

何字是長不容輒試

周君所受道真書目錄

金闕帝君守三元真一法東海小童傳淳字

消子傳蘇子蘇子傳周子

尋樂先生龍蹻經於蒙山大洞黃庭之中遇

衍門子受龍蹻經并三皇內文在黃庭之中

趙他子芝圖十六首五行秘符在王屋洞門丹室中

王先生黃素神方五帝六甲左右靈飛之書

及二十四訣在王屋山中

上魏君太素傳左乙混洞東蒙之錄布市攝

殺之律在王屋山中

太和玉女大有妙經太上素靈經在丹城銅之內

沙野帛先生泰清上經在白雲山中

竊先生大丹隱書八稟十訣在峨嵋山金區府中

陰先生九赤斑符在峨嵋山中

臧延甫憂樂曲素訣在峨嵋山中

淮南子成天關三圖在梁山中

張子房泰清真經在牛首山中

李氏幽神經在九山山中

高丘子全方二十七首在鍾山中

陽安君金液丹經九鼎神圖在鶴鳴山中

青精先生八表黃素傳在猛山中

李子耳隱地八術在陸渾山潛入伊川洞室中

趙伯玄三九素語在峨嵋山中

勿陽君丹字紫書三五順行在陽洛山中

司命君經命青圖上皇籍在大雲山中

墨翟子受紫度炎光內視中方在鳥鼠山中

太帝候夜神童金根之經在羅冥山中

司馬季主石精金光藏景化形法在委羽山中

劉子先七變神法在大庭山中

谷希子黃氣之法泰空之術陽精三道之要在都廣建木山中

王子喬素奏丹符在桐栢山中

南嶽赤松子上元真書在太華山中

九老仙都君黃水月華四真法在太冥山中

皇人八素真經太上隱書在合梨山中

萬先生九真中經在景山中

玉童子十人九氣丈人得白羽紫雲黃水月

華在玄壘羽野

青真小童君金書秘字在扶廣山中

龔仲陽仙忌真記在朱火丹陸之室

中央黃老君大洞真經三十九篇在常山中

右洞君所受諸經書目

二真人作詩曰

策駕玄中漢底素扶瑞林妙微混茫遶長翻

朱煙岑八景停玉輪清軒曉明真左攝飛行

遊右顧凌八天洞豁辨協晨仰感發皇人至

暢理自會靈妙體豈珍

西玄鬱絕根高輝拂輝明眇眇流遐澄育光

拔皓清房素重離裏安妙寄蘭生命駕飛八

景迅集迴南傾凌屬陽羽野結彌八極城萬

里誰云遐我超不稽靈誘會有素娛端駕講

所精至道方明豁知來溫新齡

晨應載景陽攀暉德所鍾徘徊重玄顯翻焉

降飛龍參騰八絃外翺翔閭闔方集風生丹

室雲合窈窕中迭域谷希子值素潛太空長

錦中有景永煙被山容空絕廣寒宅混洞道

沌同積靜八朗豁素阿蒙長通我汎陽寒景

虛煙動清風

噉嚙太微觀峻嶒九玄所中有執寢賓洞嘯

靜寒處西有六領師尋輝與曉語來非皇人

賓去非飛仙旅我超騰羽蓋徘徊清泠渚豁

虛八極上清煙凌飄舉

命駕出三玄流鈴飛漢賓皇皇太和庭鬱儀
清虛觀結璘絕煙際尋輝七靈煥素邀凌紫
天洞遊無名館龍旂迴瓊輪四眼應景散聊
且期時通溫之至道旦

周裴二真叙

江乘令晉陵華僑世奉俗神忽夢見羣鬼神
與之遊行飲食羣鬼所與僑共飲酒僑亦至
醉還家輒吐所飲噉之物數年諸鬼遂課限
僑舉才僑不得已先後所舉十餘人皆至死
亡鬼以僑所舉得才有知人之識限課轉多
若小稽遠便彈治之僑自懼必為諸鬼所困
於是背俗入道詣祭酒丹陽許治受奉道之
法羣鬼各便消散不復來往奉道數年忽夢
見二人年可五十容儀衣服非常後遂二人
見或一月三十日時時往來僑家靖室中唯
僑得見一人姓周一人姓裴裴雅重才理非
僑所申周似不如比二人先後教授僑經書
書皆與五千文相參多說道家誠行養性事
亦有識緯所受二人經書皆隱秘不宣周自

作傳裴作未成裴所作樂序及周傳如別

紫陽真人內傳

茅山志序


龍一

皇慶改元制賜茅山四十五代宗師劉大彬
洞觀微妙玄應真人後五年褒封三茅真君
徽號各加二字曰真應曰妙應曰神應仍勅
三峯為觀曰聖祐曰德祐曰仁祐明年傳壇
之玉印久湮至是復出有司上其事奉旨嘉
昇本山於是渙渥沓臻靈芝挺瑞神人以和
凡經錄棟宇百廢之宜飭治繕完者宗師得
以悉其心力焉又病夫山志前約而後闕也
廼囑諸入室弟子集成書來徵予序閱其
所載詔誥之隆仙真之異洞府之邃壇錄之
傳人物之偉樓觀之盛山水之清草木之秀
碑刻之紀題詠之工莫不昉分類析繁然大
備按茅山本句曲山第八華陽洞天第一地
肺福地漢茅君昆季棲遁登晨于此山因氏
茅迨晉魏元君大暢厥緒真風靈蹟綿綿延
延鬱為寰宇之名山神靈之區奧也皇元治
尚清靜自版圖歸職方氏主壇席者徵至闕
下優降璽書金湯其教至宗師始顯被恩數
度越前躅於戲懿哉蓋山川之氣發舒於休

息既久亦宗師之道行升聞寂通之妙其在斯乎顧山志不可不輯而不貺不可無述也昔唐玄宗問理化於李玄靜玄靜對曰道德經君王之師也漢文帝行其言仁壽天下又諡以金鼎曰道德公也輕舉公中之私耳後之人盡體玄靜之格言踵宗師之誠感則庶幾休應是又可續志與茲山爲無窮也泰定甲子日南至集賢大學士光祿大夫西秦趙世延序

○欽惟皇元之有天下也首崇清靜之道以開泰平之基是以方外祠臣特蒙簡注心輝炫焯表章山林若不著爲成書後世何以考見顧余斯語名山實聞至大庚戌予以記事至茅山因閱其山之舊志遺闕甚多嘗以語之四十四代宗師牧齋王真人未幾真人傳真山志無所聞後五年復紀其山又以語之嗣宗師劉真人十又三年爲泰定丙寅天子用故事黜其山予實代禮始獲觀其成書凡十有五卷自漢晉而下及齊梁唐宋之書搜括

無遺噫何其詳哉其首篇曰詰副墨則國朝所封三真君制詞三峯觀賜額勅書具在皆予所奏請者其末篇曰雜著則有仁皇用先開府張公所奏還賜王章始末嗚呼是書前後凡二十年始成仙靈誠有所待耶不然國朝褒封錫額還賜王章諸異恩又將補闕拾遺於成書之後作者不無憾焉平章趙公既爲之序予嘉是書之傳有益斯道而予言之勉成者不徒然也故爲之書泰定丁卯春正月特進上卿玄教大宗師吳全節序



茅山志叙錄

句曲有記尚矣宋紹興二十年南豐曾伯子仲昭臺道士傳霄子昂修山記四卷所書山水祠宇粗錄名號而已考古述事則猶畧焉大彬登壇一紀始克修證傳宗經錄又五載而成是書凡十二篇十五卷題曰茅山志載惟茲山稟靈異於開闢之初應帝王於虛無之表夏禹巡幸秦始登崇漢元壽二年太帝九錫茅君白日神仙其名益大顯于天下及晉宋經道之興梁唐尊尚之篤真人道士代爲帝者師龍文鳳札積如雲霞慨乎年世曠邈璽書罕存追錄見聞百餘一二暨我皇元混一區宇世祖聖德神功文武皇帝首降明詔召嗣宗師蔣君宗瑛詣闕繇是累朝大護其教迺延祐三載加號三君改觀三峯光掩前古聖人以神道設教有自來矣作詰副墨第一加封明詔若曰茲山之靈以氏爲號茅君真曹蓋先傳焉按登真隱訣真傳例列聖道君稱紀餘真稱傳夫以三茅秦漢道君今日下

土仰述聖蹟何得稱傳作三神紀第二金壇
華陽洞天金陵地肺福地桐柏真人所謂養
真之福境成神之靈墟雖百世可知也集諸
山水洞穴作括神區第三觀方平海中揚塵
之論令威華表去家之語是知仙聖按行民
間亦嘗咄咄古今之異玄蹤所在不與陵谷
遷變者幾希作稽古蹟第四上清經法下教
出世始晉興寧二年紫虛魏元君降授瑯琊
王公府舍人楊君作隸字寫出以傳護軍長
史許君父子其圖錄秘非盟跪不傳今疏篇
目使學真之子略見曉焉書論附名其左作
道山冊第五初元始七傳而至紫虛自紫虛
積于今四十五代苟非其人道不虛行河東
柳識故云道門華陽亦儒門洙泗作上清品
第六劉向云天有神司仙人充之洞宮官僚
自真誥玄通記傳出時運變易應有遷補譬
如周禮漢儀不復相同神道幽遠非世所知
作仙曹署第七山源曲而有容高尚求志之
士棲適其間不可殫紀所未古今卓行之著
明者若夫深晦無為潛升晨景則曷得而名

作采真游第八魏晉六朝館宇散居林麓唐
宋始勅改宮觀之盛奉祠祝釐此其地也作
樓觀部第九丹砂寶氣金玉華津人服之而
引年易質其清潤積久發於芝英草木神異
而靈長信物理之固然乍靈植檢第十碑銘
書刻載道之舟車也真人手澤猶得模楷而
立德立功立言者文亦在茲乎作錄金石第
十一古人采詩蓋有關名教山中賦詠散逸
既多此皆絕妙好辭足麗於飛空謠歌之末
作金籙編第十二終焉是志之作不問今昔
一行一言錄其至善其或傳事謬撰辭蕪
惡如指一無所取非脫遺也於戲太史公
稱天下名山南華稱博大真人若句曲兼二
者蓋千數百年蒸鬱流光未有若斯之盛者
也後之學士無狹其所居無厭其所生無小
無大壹是皆以清靜為本尚有徵於斯文哉
大元天曆元年歲在戊辰十二月二日嗣上
清經籙四十五代宗師洞觀微妙玄應真人
劉大彬序

茅山志卷之一

上清嗣宗師劉大彬造

詰副墨

漢詔詰

天皇太帝授茅君九錫玉冊文

漢元

壽二年太歲庚申
八月十八日巳酉

惟盈虛挺遠朗幽眇玄爰自童蒙散髮北
山靜心林澤積思求神登峻履谷艱尋師門
櫛形絕嘒投軀萬津丹誠率往肆其天然遂
造明匠迺受靈篇翦髮祝跪殘首截身帶索
自樂不恥飢寒所適惟道所保以真情昭上
帝感激太玄今敬授盈位為太元真人領東
嶽上卿司命神君
君平心格正秉操金石丹心矯衆棲神高睨
今故報以玉鉞綠旌八威之策使征伐邪源
折衝萬神其君寒凍林谷味玄仰真思激窮
岫啓心精誠今故報以紫髦之節竊數華冠
使君招驅千靈封山召雲其君棄家獨往離
親樂仙契潤嶮試冬袒山川今故報以繡羽
紫帔丹青飛君使君從容霄階勞命玉真其

龍一

六

三

君步驟林藪足履危仞心耽志尚曾不憚
今故報以斑龍之興素虎之軒使以浮宴太
空飛輪帝庭賦君披榛併景寒露霜雪心求
明真不戰不慄今故報以曲晨寶蓋瓊闌綠
室使君游盼九宮靜神溫密其君遠適秀榮
無疲於心潛形幽嶽精思萬林今故報以執
神流火寶珠月明可以上聞太極通音上清
其君貞心高靜淫累不經素挺皓暎內外坦
平今故報以錦旌繡幡白羽玄竿可以呼召
六陰王女侍軒其君慈向卑物陰德萬生蠢
動之毛皆念經營今故報以鳳鸞之嘯金鐘
玉磬可以和神虛館樂真儔靈其君飢渴養
神艱辛求真萬物不能致其惑千邪不能毀
其淳今故報以紫琳之腴玉漿金嬰可以壽
同三光刻簡丹瑤其君標領清玄紫緯八暎
心暉重離神躍太霞實真人之長者故以太
元爲號九德既備積感太微天人虛因不期
同歸今酬九事以報往懷君心神方朗四靈
所棲丹真啓煥秉直不回正任全固鑒無照
微今屈宰上卿總括東嶽又加司命之主以

領錄圖籍給玉童玉女各四十人以出入太
微受事太極也治宮赤城玉洞之府盈其蒞
之動靜以聞

太上遣齋紫素之書策中君文曰永始
三年歲
在丁未

太上有命天真書言咸陽茅固家于南關厥
字季偉受名當仙位爲定錄兼統地真使保
舉有道年命相關勤恭所蒞四極法全官館
洞臺治丹陽句曲之山固其勛之動靜察聞

紫素策小君文曰

盈固弟秉挺素該清雖晚反正思微徹誠斷
馘六天才穎標明今屈司三官保命建名總
括岱宗領死記生位爲地仙九宮之英勸教
童蒙開導方成教訓女官授諸妙靈治法百
鬼典崇校精關察水源江河流傾封掌金谷
藏錄玉漿監植龍芝洞草夜光治良常之山
帶北洞之口鎖陰宮之門秉其勉之動靜以
聞
右文梁普通三年刻石華陽南洞九錫碑
見聞金石篇

齊梁詔詰表奏

齊武帝答陶隱居入山詔

卿遣累卻粒尚想清虛山中間靜得性所樂
當善遂嘉志也若有所須便可以聞仍賜帛
十疋燭二十挺

又別勅

朕月給上茯苓五斤白蜜二斗以供服餌

隱居解官表

臣聞堯風冲天穎陽振飲河之談漢德括
地商陰峻餐芝之氣臣棲遲早日簪帶久
年仕宜留榮學非待祿恒思縣纓象闕孤
耕壟下席月澗門橫琴雲際始奉中恩得
遂丘壑今便滅影桂庭神交松友一出東
關故鄉就望瞻言興念臨波瀉淚臣舟棹
已遙無緣躬詣不任攀戀之誠謹奉表以
聞

梁武帝答隱居論書

近二卷欲少留差不爲異紙卷是出裝書既
須見前所以付耳無正可取備於此及欲更
須細書如論箴例逸少書無甚極細書樂毅

論迺微羸健恐非真蹟太師歲小復方媚筆力過嫩書體乖異二者已經至鑒此外便無可付也

隱居與武帝論書表

奉旨左右中書復稍有能者惟周嘉贊夫以含心之芳實伺夾鍾吐氣今既自上體妙為下理用成工每惟中鍾王論於天下進藝方與所恨臣沉朽不能鑽仰高深自懷歎慕前奉神筆三紙并今為五非但字字注目迺畫畫抽心日覺勁媚轉不可說以酬昔歲不復相類正此即為措何復多尋鍾王臣心本自敬重今者彌增愛服俯仰恍惚不能不以啓適伏蒙二卷伏覽標帖皆如聖旨既不顯垂允少留不能久停已就摹索者一段未畢不赴今信紙卷先已經有兼多他雜無所復取亦請伺俱了日奉送兼此諸書是篇章體臣今不辯復得修習惟願細書如樂毅論太師歲例依倣以寫經傳永存冥題中精要而已

再答後啓

又省別疏云故當宜微以著賞此既勝事雖風訓非嫌云云然非所習聊試略言夫運筆邪則無芒角執手寬則書緩弱點畫短則法臃腫點筆長則法離漸畫促則字橫畫疎則形慢拘則之勢放又少則純骨無媚純肉無力少墨浮澀多墨筆鈍比並皆然任之所之自然之理也若抑揚得所趣舍無遠值筆連斷觸勢牽擲揚波折節中規合矩分間下注濃纖有方肥瘦相和骨力相稱婉婉曖曖視之不足稜稜凜凜常有生氣適眼合心便為甲科衆家可識亦當復貫串耳六文可工亦當由習耳一聞能持一見能記且古且今不無其人大抵為論終歸是習程邈所以能變書體為之舊也張芝所以能善書工學之積也既舊既積方可以肆其譚吾少來迺至不無嘗畫甲子無論於篇紙老而言之亦復何謂正足見嗤於當今貽笑於後代遂有獨冠之言覽之背熱隱具於是乎累真矣此直一藝之精非吾所謂勝事此通心之塵非吾所謂無欲也

一

十

一

十二

樂毅論愚心近甚疑是摹而不敢輕言今旨以為非真竊自信頗涉有悟歲贊過為論弱許靜素段遂蒙永給仰銘矜獎益無以喻如此書雖不在法例而致用理均背間細楷兼復兩玩先於都遇得飛白一卷云是逸少好蹟臣不啻別見無以能辨唯覺勢力驚絕謹以上聖於臣非用脫可充閣願仍以奉上臣昔於馬澄處見逸少正書目錄一卷澄云右軍勸進洛神賦諸書十餘首皆作今體唯急就章二篇古法緊細近脫憶此語當是零落已不復存澄又云帖註出裝者皆擬齊諸王及朝士臣近見三卷首帖亦謂已久分本不敢識此正復希於三卷中一二條更得預出裝之例耳天旨遂復頓給先卷下情益用悚息近初見卷題云二十三已欣其多今者賜書第至二百七十惋訝無已天府如海非一餅所汲良用息心前後都已蒙見大小五卷於野拙之分實以過幸若非殊恩豈可缺望愚固本博涉而不能精昔患無書

可看題願作主書史晚愛隸法又美典掌
之人嘗言人生數紀之內識解不能周流
天壤區區唯充恣五欲實可愧恥每以為
得作才鬼亦當勝於頑仙至今猶然始欲
翻之自無射以後國政方殷山心歉默不
敢復以虛閒塵觸謹於此題事遂成煩黷
伏願聖慈照錄誠慊

省區別諸書良有精賞所異同所未可知悉
可否耳給事黃門二紙為任靜書觀所送靜
書諸字相附近二紙靜書體解雜便當非靜
書復當以點畫波擊論極諸家之致此亦非
可倉卒運於豪楮且保拙守中也許任二蹟
并摹者並付反

一一卷中有雜蹟謹疏注如別恐未允愚
東并竊所摹者亦以上呈近十餘日精慮
悚悸無寧涉事遂至淹替不宜復待填畢
餘條並非用雅叔夜威聲二篇是經書體
式追以單郭為恨伏按卷上第數甚為不
少前旨唯有四卷此似是宋元嘉中撰集
當由自後多致散失逸少有名之迹不過

數首黃庭勸進像贊洛神此等不審猶得
存者

第二十三卷今見有十二條在別紙按此卷是右軍
書惟有八條前樂毅論書迺極勁利而非
甚用意故頗有壞字太師箴大雅吟用意
甚至而更成小拘束迺是書扇頭屏風好
體其餘五片無的可稱臣濤言一紙此書
應而非大軍又不給事黃門二紙治廉瀝
識誰迹又似是摹後又治瀝狸骨方一紙是
敬書亦
是摹迹

右四條非右軍書

第二十四卷今見有二條在按此卷是右軍書
者唯有十一條皆非甚合迹摹多後前黃
初二年一紙是後人謬襲告墓文一紙許
先生抱懷幽痛一紙是張五月十一日一
紙是摹王張尚想黃綺一紙遂結滯一紙
凡一篇孟侯不復展一紙敬書子便復改
所學甚拙惡月一紙是張五月十五日繇白一紙亦是
書治欬方一紙是謝
右十條非右軍書

伏恐未垂許以區別今謹上許先生任靜
書如別比方即可知王泯張澄張翼謝安
書公家應有

鍾王迺有一卷傳以為真意謂悉是摹學多
不足論有兩三行許似摹微得鍾體逸少學
鍾的可知近有二十許首此外字細畫短多
是鍾法今欲令人帖裝未便得付來月有竟
者當遣送也

啓伏覽書前意雖止二六而規矩必周後
書不出二百亦褒貶大備一言以蔽便書

情極頓使元常老骨更蒙榮造子敬濡肌
不沉泉夜唯逸少得進退其間則玉科顯
然可觀若非聖證品析恐愛附近習之風
永遂淪迷矣伯英既稱草聖元常亦自隸
絕論旨所謂殆同一機神寶曠世莫繼斯
理既明諸畫虎之徒當日就輟筆反古歸
真方弘盛世愚管見預聞喜佩無屈比世
皆尚子敬元末繼以齊代名實脫略海內
非唯不復知有元常於逸少亦然非排棄
所可黜沮而不淄不過數族今奉此論自

舞自跳未足逞恣願以所摹竊示洪遠思
曠此二人皆是均思者必當贊仰踴躍有
盈半之益臣與洪遠雖不相識從子翊以
學往來因之有會但既在閣恐或已應聞
知摹者所裝字大小不堪均調郭看迺尚
可恐筆意大殊此篇方傳千載故宜令跡
隨矣所奉三紙伏循字跡大覺勁密竊恐
既以言發意意則應言而心隨意運手與
筆會故益得諧稱下情歡仰實奉愈至世
論咸云江東無復鍾蹟常以歎息皆好望

中原廓清太丘之碑可就摹採今論旨云
真蹟雖少可得而推是猶有存者不審可
復幾字既無出見理冒願得工人摹填數
行脫蒙見賜實為過幸又逸少學鍾勢巧
形密勝於自運不審此例復有幾紙垂旨
以黃庭像贊等諸文可更有出給理自運
之蹟今不復希請學鍾妙仰惟殊思

又啓

逸少自吳興以前諸書猶未稱凡厥好述
皆是向會稽時永和十許年中者從失郡

龍一

十四

告靈不仕以後略不復自書皆使此一人
世中不能別見其緩異呼為末年書逸少
亡後子敬年十七八全做此人書故遂成
與之相似今聖旨標顯足使衆識頓悟於
逸少無末年之譏阮研近聞有一人學研
書遂不復可別臣比郭摹所得雖粗寫字
形而無復其用筆跡勢不審前後諸卷一
兩條謹密者可得在出裝之例復蒙垂給
至年末問否此澤自天直以啓審非敢必
觀

武帝答進玄通記手詔

省疏并見周氏遺蹟真言顯然符驗前詰二
三明白益為奇特四卷今留之見淵文并具
一二唯增降歎十二月二十日

隱居進周氏玄通記啓

某啓去十月將末忽有周氏事既在齋禁
無由即得啓聞今謹撰事蹟凡四卷如別
上呈但某覆鄣疑網不早信悟追自咎悼
分貽刻責淵文口具陳述伏願宥以闇情
謹啓

龍一

五

茅山志卷之一

茅山志卷之二

龍二

上清嗣宗師劉大彬造

詰副墨

唐詔詰

太宗賜王法主詔

先生操履夷簡德業沖粹屏棄塵雜棲志虛玄吐故納新食芝餌木會衆妙於三清之表返華髮於百齡之外道邁前烈聲高自古非夫得秘訣於金壇受幽文於玉笈者其孰能與此乎朕昔在藩朝早獲聞道眷言夙範無忘寤寐近覽來奏請歸故山已有別勅不違高志并許置觀用表宿心未知先生早晚以屆江外所管棟宇何當就功佇聞委曲副茲引領近已令太史令薛順往宣朕意貞觀九年事見舊唐書本傳

高宗贈王法主詰

門下故王清觀道士王遠知性含幾曠跡徇幽玄體茲縣解見稱先覺自締構之初迄光華之旦綢繆恩遇事昭綸綺仙化不追英靈浸遠眷言留易宜有褒崇可贈太中大夫謚

曰昇真先生主者施行調露二年二月七日

勅旨潤州太平觀道士宜準七寺等例度滿七人如後有缺隨即簡度訖申調露二年二月十一日

武后加贈王法主詰

門下子喬羽化或留連於故祠康成道存尚延佇於舊邑矧夫蹟膺仙錄名偶聖朝追想遺塵載嚴遠念故王清觀道士贈太中大夫昇真先生王遠知性與道合神從化游初窮帝解之微自得天倪之理時歷三代韞秘術以韜光年逾十紀屬睿圖之啓運藏往知來察幽鑒遠亟符先渥緬惟贈恤之恩聿申後命宜峻褒崇之禮可贈金紫光祿大夫昇真先生餘如故主者施行嗣聖元年正月二十八日

玄宗賜李玄靜先生勅書凡二十通

勅丹陽郡太守林洋及道俗父老百姓等朕遠遵玄妙載想靈仙眷茲茅山是為天洞瑤壇舊觀餘址尚存道要真經散落將盡永言法寶良用憮然今為黎元大崇道本故令清修之士建立真儀訪述靈山以新觀宇庶使

玄宗再聞瞻奉知歸降福宸瀛致之仁壽也又比年以來每遵清靜官吏有修良之美農桑屬豐稔之期百姓之間庶無乏絕也微寒卿及道俗父老百姓等並平安好遣書指不多及

勅江東道採訪處置使晉陵郡太守董琬山嶽上疏分野下鎮方隅降福祐於人施雲雨之惠且茅山神秀華陽洞天法教之所源羣仙之所宅固望秩之禮雖有典常而崇敬之心宜增精潔自今以後茅山中令斷採捕及漁獵四遠百姓有喫葷血者不須令入如有事式申祈禱當以香藥珍饈亦不得以牲牢等物卿與所由存心檢校漸寒卿得平安好勅廣陵李鍊師上清品人也抗志雲霞和光代俗為予修福靈迹將赴金壇故賦詩寵行以美其志龍二

紫府煙霞士玄宗道德師心將萬籟合志與九仙期絕俗遺塵境同人喜濟時訪經游玉洞敷教入瑤墀茅嶺追餘迹金壇赴遠思陰宮看舊記陽觀飭新祠緬想埋雙壁長懷採

五芝真靈若可遇鸞鶴佇來茲

尊師抱一守中探微昭遠能回貞潔發揮道門遂與太和先生啓是仙宗起予虔奉崇飭靈迹廣求真經則詩以寵行物將厚意永慰岐路以彰禮賢也所謝知

勅鍊師李含光道高紫府學總黃庭貴然來思式敷至妙既而屬念茅嶺言訪真經近出咸秦遠游方外朕載懷仙境延佇勤修將使九有之人同歸玄教三清之衆俯鑒遵行豈徒夢寐華胥馳誠碧落而已想尊師建立真儀所修壇宇初至經構殊用勞心甚寒得平安好遣書指不多及

勅鍊師李含光昨程元暹至得所進圖具規矩矣然崇飾仙觀祈望真游若不幽邃清閒豈降霓裳羽蓋且在科儀猶有差降至於仙真道衆故亦不可同居所置紫陽觀大院內更不須著人居止但作虛廊四合清潔殿堂以修香火用候雲駕其道衆等別院安置今具作圖往應所添加亦入支料矣尊師體真遠識舍和內融必能上合靈仙之心下副欽

崇之意也甚寒得平安好遣書指不多及

勅鍊師李含光尊師遠訪名山精求至教建立壇宇載寫真經庶事用心殊勞倦也朕志求道要緬想真仙將憑潔誠以修玄妙今以十八日清齋潔壇以受經誥靈仙降祐祈有證明今將詞及香信等往尊師當爲宣揚科儀奉詞陳謝庶上達仙宮下垂昭應甚暄尊師得平安好遣書指不多及

勅李鍊師道者是萬有之宗法者是九真之契大聖以垂教後學以進修弟子比欲敬受經法以未詳嚴秘又真經散逸糾繆處多近訪得天真遺蹟至於科儀無不條備加以摹寫一依戒旨喜風志之見遂荷真靈之降恩以今月十八日仰啓

三清尊君太師玄師真師潔齋受訖載捧真文恭披鳳篆將以運心太虛之境以養谷神之壽也其跪信具依經傳造足今并投詞封以附往尊師體道之要舍光之和清簡無爲與予合志請爲弟子以前件詞及跪信投茅山華陽洞天金壇靈府以爲明信用證勤精

夫有德者尊以美號則葛洪著抱朴之稱陶君有貞白之名永言前修事實不遠今號尊師爲玄靜先生以昭懿德彰高行也故令使往甚暄尊師平安好遣書指不多及

尊師東德之和探德之要爲弟子親藏跪信以啓靈真且加號以表精修衣服者所以展誠敬是申崇尚之意式贊仙階之美也所謝知

尊師所奏靈芝信殊詳也若彩雲繁布比芳蘭芬馥當紫陽之福地叶丹誠之吉徵遠與大同玉芝遙爲合應斯仙真上祐尊師潔誠是降休徵用深慶慰今令將詞及香投謝天洞式憑高德以達虔心也

靈芝者和氣以生真仙監植音軒轅至道三秀屢芳永惟楨符載瑞茲日黃輝朱采八十莖色叶金方數應陽吉或連跗並萼或雙本同枝出天洞以敷榮就藥壇而結秀實曠代嘉貺至感殊祥尊師既陳詞達誠遠致真錫弟子敬受元吉當服餌焉甚熱平安好勅春言仙府旁連洞宮青壇舊居緬然靈迹

紫臺新宇煥啓真宗式彰崇奉之誠爰置葺修之戶尊師等副朕茲意清靜實持也

勅尊師道德之重仙真所欽是以修齋必有精感況山惟地肺會司命之福庭壇邇天宮則真人之舊館寅弟子勤志致喜生壽域遐遙東望日夕傾心至于開春佇迴風馭以慰渴賢之想來敷玄妙之教也初秋尚熱尊師平安好遣書指不多及

勅爐開仙藥九真示傳院合靈芝三茅監植微之玄錄蓋未曾聞雅魏伯陽豫兆於前今李越成効之於此朕當齋心以伺專使往迎與尊師同承道錫也所賀知勅朕每重清真親乎有道而覽茲誠請義在難違俾遂迺懷以就醫藥亦既痊損當早來旋

詩送玄靜先生暫還廣陵并序

玄靜先生稟和清真樂道虛極頃來城闕善利同人緬思林泉洗心外俗予嘉焉重馬式遂其意言念于邁賦詩寵行楊許開真錄夫君密契傳九星連紫蓋霞景

合丹田玉簡龜臺職金壇洞府仙猶期御風便朝夕候冷然

敬問玄靜先生先生秉潔白之節得黃中通理學徧九流逾守玄默心游八景益混光塵則密行高迹良可歎矣然能屈獨往之心廣弘濟之道緬迪真祐深啓淳源知前後所修功德皆有感應瞻望東南馳心日夕今附物及香棗等尊師更爲九度修功德也庶使蒼生承日用之福外化有歸順之心天下和平惟道所庇修功德了當暫迂風馭一至京來甚寒尊師比清暢唐師回遣書指不多及齋醮之儀顧有模楷將致誠懇必仗精修故屈尊師敬申妙旨知己事畢良多愧也所謝知

尊師思慮就精虔心齋潔致福利物其功實多況擇高流同勤至道精修不怠嘉尚彌深香信之資用昭誠意也尊師以至道妙用精誠感真薦福朕躬居寧衆宇俯及長至來慶休祥履端之吉是與同也遲至來春共尊師相見

敬問玄靜先生昨弟子唐若倩至具知去月十一日功德事畢夫以至誠之心精修之感壇在仙境宜按沖科下庇蒼生上資宗社永求福應玄感昭然及知天地至和人神胥慶以降甘露以表休符則視履考祥其旋元吉

今歲律云暮璿璣運行不愧再勞事緣萬姓今附香信往至年下且請尊師於所居修功德以助履新至來載春和復請尊師於茅山上爲宗社下爲黎元修河圖大齋應緣功德之物觸新再造無以多勞所利者廣又道德相親氣味縣合諸山聖蹟多有異人若有訪尋尊師當爲弟子招致也甚寒尊師道體安和唐若倩還遣書指不多及

尊師上清真修下弘仙教爲朕致福以庇蒼生三皇秘文已承嘉應河圖內記祈延福祥虔誠之心遙屬茅嶺所寄少物宜答勤勞春景漸和尊師比如宜也

詩送玄靜先生歸廣陵并序

鍊師氣遠江山神清虛白道高八景而學兼九流每發揮玄宗啓迪仙錄延我玉皇之杵

保我以金丹之期敬焉重焉深惜此別因賦詩以餞行云耳

默受王倪道逾深尹喜師欣同八景會更叶九丹時鸞鶴遙煙境江山渺別思當遷洞府日留念上京期

尊師以道樞弘濟以真宗啓迪來致玄妙去還雲山詩以見懷用彰惜別也所謝知

肅宗賜玄靜先生勅書

勅李含光師久契真要深通玄微游逍遙之境得朝徹之道上皇疇日順風見知今題鍊質名山良多景慕也況茅君洞穴仙經所稱靈化往來神藥斯秘師當閱金錄之秘訣祈玄官以清修驗消災之方効長年之術尤宜精勵庶表齋功夏熱師得平安好遣書指不多及

勅李含光師深通道妙久著名聞昔茅君之山今洞真之典以師德行良景慕之朕頃總干戈掃除凶匿保全萬姓克定兩京上皇聖駕迎還宮闕得此定省慶慰自天仰荷玄元之祐再成宗社之業亦師精修願力有以助

之必須加意壇場潔精香火廣上皇之福壽俾六合之康寧靜正道門當在師也所謝知

修造紫陽觀勅牒

茅山紫陽觀右臣奉勅與修功德使玄靜先生李含光內謁者監程元暹等同檢校修造前件觀並了并設齋謝上訖去年九月二十二日錄奏奉勅宜付所司修造觀迴殘錢二百四貫二百八十五文右修造外有前件迴殘爲道觀成附奏奉勅便賜觀家充常住郡司已準數分付三綱訖臣又與觀主道士劉行矩等商量請於便近縣置一庫收質每月納息充常住其本伏望長存觀額及徒衆先受地頃畝並足今載所收納苗子支來載粮亦充并觀內先有奴婢四人小牛六頭車一乘見在右臣今對所管縣官及三綱檢責觀內先有前件產業數勘覆並同其粮食已有歲支來春請加營種觀內什物五行等右觀家先資什物數少昨修功德使程元暹奉勅支供黃錄齋外有迴殘銀一百兩令臣分付觀內徒衆將回市所欠什物等並令充足觀內

松竹果木等右臣伏以觀在茅山羣仙所集院宇雖則華壯松竹先多欠少比爲非時未由種植請至開春專令裁蒔并於南池種藕庶望周徧謹具以聞丹陽郡太守林洋奏件狀如前

中書門下牒丹陽郡牒奉勅宜依牒至準勅故牒天寶八載正月八日左相兵部尚書陳希列左僕射兼右相林甫

玄靜先生等表奏附

道士臣含光言今月十八日品官王遊仙宣口勅賜臣法衣六副又今日將軍高力士宣旨賜臣御製詩一首縑二百疋并香鑪等臣雖在道流素無深識因遇聖代仍荷國恩寬蒙羽服出自天府神筆膏藻頓集微軀臣之叨受實踰涯分臣自嬰風疾十載有餘形衰力弱觸事俱廢惟願香鑪致福上答聖躬終此餘生不敢有二無任恐懼之至天寶六載九月二十五日道士臣含光言今月二十四日中使啖庭瑤及道士唐若倩齋脫物并詞至山即以

二十五日與庭瑤若倩於華陽洞門燒香
讀詞兼藏貺信至暮事畢臣又奉勅書錫
號并賜法衣忽承聖旨進退惶懼臣以僥
倖頓忝國恩功微德薄寄情靡所不勝悚
荷之至因投跪已了謹遣楊慎奢奉表陳

述并謝以聞

天寶七載三月二十六日

臣舍光言竊見紫陽觀東隱居先生舊合
丹所忽生芝草八十一莖形狀瑰奇光采
秀麗根憑松石氣鬱蘭荃斯實曠代希有
當今罕見伏惟陛下推誠洞府展敬無虧

瞻言紫陽載興修葺是以神物繁植用表
吉祥凡與知聞僉云聖德所感莫不喜悅
臣不勝欣躍之至謹遣楊慎奢先奉表以
聞今圖寫芝形委曲詳辦事畢之日別差
使上聞

天寶七載五月二十日

臣舍光言今月十八日中使啖庭瑤齋御
詞并香至山臣即以十九日與庭瑤及同
法劉行矩等詣紫陽觀東大橫山石燒香
啓真密宣詞旨以今月依法採芝其芝草
大小八十一莖籠盛如列無任喜懼之至

因庭瑤謹奉表以聞

天寶七載六月二十日

道士臣礪俗等言伏奉五月十二日恩制
紫陽觀取側近百姓二百戶太平崇元兩
觀各一百戶並蠲免租稅差科長充修葺
灑掃者實以光昭洞府永構玄門掃飾開
清靜之場施力增人戶之福伏惟

開元天寶聖文神武應道皇帝陛下廣崇
道化克著真宗重闡徽猷彝倫法要遂使
靈山祠宇載葺類網茅許仙居咸蒙創述
臣等愚昧濫在法流叨沐殊恩曲霑濡澤
所以遠馳丹禁跼蹐天庭無任感荷喜抃
之至謹躍龍門奉表陳謝以聞

天寶七載八月十一日

丹陽郡紫陽觀道士楊礪俗葛冲虛
太平觀道士徐元沼等上表

臣舍光言臣弟子唐若倩與前句容縣令
李越成進芝并奏以今日到伏承芝生藥
院數表千莖丹化神鑪光踰九轉自非聖
德至重希代神物無由卒至謹按參同契
論此丹云帝王永御千秋常存既未聞於

往日實有徵於聖代不勝慶躍之三謹奉
表陳賀以聞

天寶十載八月二十七日

臣舍光言臣雖服膺道法而拙於理身久
患風疾脚膝無力入秋以來漸覺羸弊物
性所習南北異宜伏望天恩許還本土冀

漸醫藥稍延視息無任區區之至

天寶十載九月十日

臣舍光言昨十四日內侍袁思藝宣口勅
以御製送臣歸廣陵詩一首見賜伏惟陛
下虛已應物臣細無遺爰寄眷懷降茲神
筆翰兼雲篆之妙詞發玉晨之音顧慚優
渥捧對無倦臣行裝已辦即日戒途遠遠
闕廷但深愧戀

天寶十載九月十五日

臣舍光言季夏毒熱伏惟聖躬起居萬福
去月八日中使啖庭瑤至山宣口勅以所
齋練二百疋并香三合令臣於茅山用施
齋醮并賜臣衣兩副臣謹承聖旨於紫陽
觀東鬱岡山右別立靜院尅取今月二十
七日人定啓齋二十八日寅時為正齋之
始自此之後以漸遵行計至冬間法事適

畢務盡心力以求感通但臣無功每蒙賜

及伏增戰慄今供擬已辦謹遣弟子唐若

倩隨中使齊令訖奉表以聞天寶十一載六月十九日

臣舍光言畧度環周日長南至伏惟陛下

膺納乾祐慶無不宜臣等今於茅山爲國

焚修齋醮無任欣悅之至謹遣中使啖庭

瑤起居謹奉表以聞天寶十一載十一月二十五日

臣舍光言前所奏請紫陽觀東鬱岡山右

奉修齋醮自六月二十七日起首行道至

今月七日冬至日初出時緣是齋人及中

使齊令訖等咸見齊壇四遠松樹悉有甘

露其色白其氣香其味甘其松去壇漸遠

者而露亦漸少計今凡降甘露松樹都有

二百三十株謹按道德經稱天地相合以

降甘露人莫之令而自均焉玄聖著經以

爲嘉瑞齋醮遇此又爲吉祥敢不以聞謹

遣弟子唐若倩隨中使齊令訖奉表供進

甘露二合

臣舍光言孟春猶寒伏惟聖躬起居萬福

去載十二月二十五日中使啖庭瑤及臣

弟子唐若倩等至伏奉恩勅勞問臣蒙賜

絹百疋行道道士賜絹二百疋又奉聖旨

以本命紫紋七十疋五方紋繒各二十疋

銀五百兩令臣依河圖內篇奉修齋謝并

餘功德臣爰以去載十二月晦及今載元

正之日先於廣陵郡大唐廣業大龍興觀

謹修歲節吉齋以助履新之慶今又於茅

山紫陽觀中銓舉同法有戒行者共營齋

具講習之儀務令合法然後施用至夏齋

畢隨事上聞但臣自顧非材謬參道法不

以庸淺頻荷國恩雖竭愚誠宣酬萬一無

任悚懼之至天寶十三載正月二十五日

臣舍光言仲夏炎熱伏惟聖躬起居萬福

臣先奉聖旨令於茅山修奉河圖齋謝頻

屬霖雨遂闕施行至今月八日夜始就宿

啓次九日十日夜依法正齋并伸禮獻次

十二日江中投壁以望日設齋飯賢自始

及終頗爲周悉但臣等學非師授材愧聰

明雖謹按成規而所疑未洗不勝惶懼之

至謹遣唐若倩奉表以聞天寶十三載五月二十五日

臣舍光言昨十日中使孟游仙齋勅至茅

山修功德所仰感聖恩伏增恐懼先於此

山與諸道士能戒行者共遵香燈之務庶

以助國扶教消災致福但臣等雖班法任

愧之感通區區之心不敢有二因孟游仙

使回謹奉表上謝以聞至德二載六月十四日右勅書并表

秦唐貞元十四年刻石

大和禁山勅牒

潤州三茅山大茅山西面到平地路三里內

有太平觀南面到平地路三里內有華陽洞

南門崇元觀道祖院東面到平地路四里東

北長嶺緣嶺脚不斷接連並平路是界北面

連積金嶺內有華陽洞西門及祠宇中茅山

西面到平地路三里內有三茅廟及祠宇東

面到平地路三里南面連積金嶺北面連小

茅山小茅山西面到平地路三里西北至雷

平泰龍池郭真人塘紫陽觀南面連中茅山

東面到平地三里北面連大橫山內有燕口

洞并祠宇北至大橫山鍊丹院三里

右茅山三觀威儀道士孫智清等狀華陽

茅山志卷之三

龍三

上清嗣宗師劉大彬造

誥副墨

宋詔誥

勅禁山

洞天衆真靈宅先奉恩旨禁斷戈獵樵蘇
秋冬放火四時祭祀成絕姓牢自經艱難
失去元勅百姓不遵舊命侵占轉深採伐
山林妄稱久業伏請重賜禁斷準法護持
差置所由切加檢察庶得真場嚴整宮觀
獲安具元禁疆界如前

中書門下牒茅山三觀等奉勅句曲靈山洞
宮所在恭惟列聖嘗亦欽崇宜禁樵蘇以申
嚴敬其茅山界內並不得令百姓戈獵採伐
及焚燒山林仍委州縣切加禁止然至準勅
故牒大和七年十月四日中書侍郎平章事
李德裕檢校右僕射平章事牛使

茅山志卷之二

訪聞茅山界內祠宇宮觀之側樹木多有諸
色不顧修法擅行樵採及放野火焚燒山林
須議專行指揮國家方延景貺以祐蒸民眷
彼名山存於方志或仁慈所治或真侶收依
是為降福之場允謂棲神之所故宜加禮敬
答儲休豈可斤斧競臻樵蘇無節致嘉生之
罔植使靈蹟以何觀爰伸禁止之文用表肅
恭之意今下潤州昇州候宣命到於茅山四
面立定界止嚴行指揮斷絕諸色人并本山
宮觀祠宇主首以下自今後不得輒有樵採
斫伐及放野火焚燒常令地分巡檢官吏著
老壯丁覺察檢校如有違犯即便收捕押送
所屬州縣勘斷訖令衆半月滿日踈放如斫
伐數多情理難恕即仰收禁奏候指揮當行
決配如是逐處官觀祠宇之外無有供燒柴

薪不係古蹟之內久來存留樹木即仰本縣
官吏與官觀等主首同共指定界止緊立標
記方得採取若是已有斫伐延燒到樹行踈
處亦仰隨處州縣勒定數目去處常依時裁
種補填務要別無空闕即不得輒便搔擾仍
將此宣命指揮於宮觀門首及往來要路鐫
石曉示知委

大中祥符二年奉勅如右

明肅劉太后賜朱宗師御札

金注子底水一副共重三十兩是皇帝小時
使底與道者充買田土供贍道衆齋糧兼逐
日持課祝延皇帝聖壽長命安樂永離災障
與彼處知州同共商量買田土好莊子令任
文慶與知州同共收買回日畫取圖子來

崇寧加封三茅君誥

詔勅門下句曲洞天有真人焉變化無方靈
妙不測秦漢而降歷千餘年蹟祉發祥澤于
生民而隆名徽稱猶或未備非所以極崇奉
之誠也茅山大茅君今號太元真人東嶽上
卿司命神君可進號太元妙道真人東嶽上
卿司命神君中茅君今號定錄右禁真人可

進號定錄右禁沖靜真人小茅君今號三官保命真人可進號三官保命沖惠真人庶幾導和氣獲嘉應以助我國家太平無疆之福故茲詔示想宜知悉

崇寧元年四月二十七日

徽宗賜劉宗師勅書并詩崇寧凡四十一通大

凡三十一通

勅劉混康自別以來必守安靜爾沖和養氣得其妙道學術精深博通與旨救危難以積善觀德業以養高小大之事常所訪問盡規極慮頗勤忠恪濟人利物功莫大焉近覽所奏並皆惟允已差郝隨專董其事餘地土等亦一一應副更有所需依前奏來

崇寧元年七月六日

勅劉混康修真務本高道有常之士學業為心去執忘貪之德特守去病之術普設濟人之方爾自離闕下將周歲紀近覽來奏喜聞安靜所乞立木事已降指揮修建本觀所要疾速選定日期興工如逐旋有闕一一奏來春氣漸和自加調適謹奉天時以滋妙道

崇寧二年正月九日

勅劉混康爾自別京師修改歲華完修祠殿備悉勤勞近覽奏章具知安裕所云殿名以天寧萬福可也其清靜經並依所奏爾肅恭祀事達于上境所見災祥何不具奏此者年麥發生之際惟藉膏澤之力迺自春首以來

頗愆時雨未濟四郊之農甚慘千箱之望朕心憂懼夙夜匪遑爾當悉心體予至懷用斯懇切之誠精加祈禱之意以名非高道宣達清都餘宜將愛愈深妙理山林幽靜更保真常

崇寧二年三月二十一日

勅劉混康爾自別京師屢經歲時撫宣之意惟常累遣逮于仲夏畏日永長想爾山居清涼高爽道妙之餘動止臻常否修嚴秘宇構葺必已成就崇奉至真付委加于有德事更有闕典可縷縷敷陳如所見災祥須一一具奏時正暑炎宜自保鍊餘勤道業體予至懷

崇寧二年五月二十三日

勅劉混康卿昔寓處都闕延對禁廷每陳忠道之誠開益朕躬之志虛心采納豈泯嘉言賜號越常用昭衷顯所有誥一軸今遞付卿

至可領也秋氣爽肅燕居練養之餘宜加保護特賜葆真觀妙先生誥

勅江寧府句容縣茅山道士洞元通妙大師劉混康朕執古之道以御今之有嘉與希夷守一之士以正澆漓之習惟爾專氣致柔敦

龍三

其若朴雖道尊德貴莫之能爵而名實稱謂其可已乎宜申錫於命書庶激揚於後學尚推爾素以輔善民可特賜號葆真觀妙先生

崇寧二年七月二十五日中書舍人白時中行

朕以卿道備德隆陳誠助國特頒異號故顯高仁若以恤物濟功未殫嘉稱誥命宜當祗受勿復固辭想宜知悉

勅劉混康自達京國屢改歲華所思一德之可嘉在我三秋而不忘近收來奏喜知寧謐幸繼先猷緝熙秘宇殿成寶錄慶

以臻

嚴閣律崇寧仰上真之來格卿素守虛無超然高尚齋持秘宇能順育於炎涼靜樂茅峯自安怡於泉石來奏具悉已降指揮差御藥蘇珪提舉管勾應合須索一一中稟自可奏裁應副不致有闕也霜秋屆候氣律初寒更

臻道妙言不多及如見有何災異一一奏來
前者祈求事至今未得感應今次如何也崇寧三年九月十五日

勅劉混康自別京畿屢更歲為棲三茅而浩
志潔一已以全真寓迹山居潛心物外緬想
道妙沖靜植性清夷順穹壤以養高脫塵累
而悟理茲覽來奏良悉所懷涉冬而來動止
安否知中春詣闕已差使臣張翊津置其行
備委官司一切應副或尚有闕詳具奏來可
期觀爾預積欣悅方屆隆冬將迎朔易更在
博施真教協濟羣生餘加保練之功用體眷
勤之意姑此書諭指不多及崇寧三年十一月二十三日
勅劉混康省覽來奏備悉懇誠隆寒歲暮喜
獲安常葺構葆真尚闕緼用已降指揮應干
官吏責以近限併力就功上梁等事各有司
存何必告成迺離淵室及漕運經畫一一去
訖首春氣暖當先詣闕勿為稍稽以多高慮
竚聽舟楫來赴闕闕已差諸司官沿路管勾
在理當然難為寢罷體予眷待宜悉至懷崇寧四年正月十二日

勅劉混康省覽來奏備悉懇情春首峭寒喜
知寧謐爾心志通博絕塵慮以保真常識達
精微養靈臺而臻妙道自建三茅紫爾一心
茲者修完之役已至丹腹之工委付有司必
早周備沖靜是守毋勞神用迺眷爾益欲宣
趨對之懷厥意惟堅宜遂告成之請可依所
奏纔候工畢日速赴闕下其張翊已降指揮
專一催督應辦去訖并本命神像遷入法堂
權行奉安如更有闕一一奏來春寒屆候宜
加保毓用昭優渥體予至懷崇寧四年正月二十四日
勅劉混康覽卿來奏備悉懇懷欣富涉春益
聞保福中前赴色之書繼有告成之約以謂
君子不可以力致方士不可以拘縈載詳爾
意宜遂厥求俾從達者之道遙式副高人之
所請固非少拒勿致深疑況卿洞鑒真元默
垂道蔭植性衍沖淵之意稟材多介恪之仁
神符有濟順天地之生成法力無窮贊陰陽
之化育清高可尚塵俗難羈浩然守志於林
泉潔素以安於壽考宮宇修完應辦可集已
令促役必無緩時纔有畢工之奏速期赴闕

之行未即對聞更希加愛故茲詔示想宜知
悉崇寧四年閏二月三日

勅劉混康卿宅心道妙顯迹神功順四序以
凝和寓一身而永福靈符法水久推濟物之
仁保氣存神自得養生之主涉此景景想集
殊禧比詢入觀之期力有告成之請畢工在
邇重諾難渝宜促行裝正風帆可乘之便早
登畫鷁當江水善利之時暑炎在候更切保
順故茲書示言不多及崇寧四年五月二十九日
勅劉混康省觀來奏備悉所懷涉夏之中提
身益福歷知工築僅及於告成將伺舟維屆
臨於近甸其如服勤職事幹集善能顧惟激
勵之風當允誠忱之請指期良觀促日戒行
敷善利於羣生享微名於大道副茲至禮體
我眷懷夏熱卿比平安好遣書指不多及崇寧四年六月十七日
勅劉混康卿法大道之自然稽真詮之典則
順時樂性正一已之貞心闡教濟人保千齡
之上壽睽濶滋久懷想良多累召待來逮今
改歲尚有力難之奏猶屢固避之言況予疊

命有司當遂責成董集其工但勿貽慮餘者
完繕悉付規模漸可慶全夫何多遜宜速登
舟之備佇聆飛檣之音仙帆風靜秋水波平
乘茲清景勿辭來對存頒詔諭示我眷隆將
遂觀言遣書指不多及崇寧四年七月十八日

勅劉混康自遠皇都屢周星歲居名山而崇
秘殿竭丹懇以奉高真闡揚大道之源昭答
上靈之貺昔興觀宇廣集休祥壯一伐之弘
規衍萬年之景祚凡所陳述皆盡公忠顯須
來對從便船居其如退材已行處分畢役云
初慶成就緒當斯秋景促梓安流天高雲靜
蘸晴光千里之平波水翠煙溟蕩素色一帆
之輕吹尚測氣力自養清高故此詔示宜悉
眷懷非晚觀言茲惟簡及崇寧四年八月二十日
勅劉混康省所奏修造已就緒欲於九月中

乘船赴闕朝謝者欣聆畫鷁容與秦淮願伺
仙鳧翔翔魏闕佇聽希夷之妙誨欽教慈儉
之淳風治念烹鮮動趨正道霜秋屆候涉履
良勤爰命使華往加撫勞體茲春異益固冲
和宜速進舟慰予跂望秋冷卿比平安好遣

書指不多及崇寧四年九月十二日

勅劉混康心存道要夙契真元久處逍遙之
場自得沖和之旨昨迂芝蓋來叩楓宸遂欵
秘奧之名言乞還茅峯之舊隱志堅意切勉
從所陳遠邇以來倏爾經月每一思念寤寐

不忘扁舟高卧諒及淮楚之畿三秀棲真獲
出塵寰之表高風遐舉良景慕之時當梓暑
卿比平安好遣書指不多及

先生自離闕下倏忽閱月想以道妙動止冲
和每一南望愈增戀慕向者所託奏章之事
伺有天意可速奏來及求傷風符子數十道
附遞封進時方炎暑清虛自重想已到宮所
修如何潛神庵了與未一一奏來崇寧五年五月十三日

勅劉混康所奏拜章事具知夫至誠必通精
修有感事具存於典與儀昭著於真科卿虔
心請禱齋潔馳神默契高真獲通秘旨非夫
公忠之內充何得精誠而上達郵音忽至嘉
歎良深昨懇辭上京弓還舊里三茅勝槩允
資高尚之居列聖所棲克叶潛神之志更宜

保練以副虛懷畏暑在序卿比平安好遣書
指不多及崇寧五年六月二十日

先生離闕下來又復累月比日炎暑想以道
妙清勝所奏祥章不勝嘉歎自非先生高道
洞達何以臻此如更有所見附黃希叟來奏

得無隱幸也本官所闕亦可一一縷細開陳
潛神之役未見告功不知所修可意否同

勅劉混康徒弟傳希列齋到表章具知刻意
虛無宅心清靜得無為之妙理通大道之淵
源自抵萬寧矧多餘裕三茅紫府列聖福庭
真仙所棲靈答如響卿寶金籙而練氣秘玉
簡以清修想得優游必資香火上新宗社之
謚寧下濟黎元於仁壽所馳至意宜亮悉之
徒衆忽臨封章來上深嘉遠懇益表勤誠驟
爾朕達但渴名理溥暑尚熾善衛是宜卿比

平安好遣書指不多及
傳希列等齋到表章知卿已至元符萬寧宮
及知拜章事蒙上天慈恤敷錫嘉祥卿道慕
三茅行遵二許暫來魏闕還駐故山鶴馭難
留每深引嚮近煩慈念通拜寶章祗荷蒼旻

俯垂淵鑒丁寧天訓警悟不忘夙夜欽崇以酬昭貺矣暑方隆保愛是宜餘具詔意

所奏事逐一降指揮訖如更有所關但一一見示提舉官已差楊戩題額已書知之蔡卞亦已撰文先生自來賴直有所聞見災福但

詳細密奏花木已收瑞香尤佳傳希列回付詔書等及賜祠部餘各賜紫衣師號親書畫扇暑熱可以召風鎮心符子告求數貼傳希列等回附物下項沉檀箋香各二十斤生熟龍腦五斤降真香十斤四味果子二十簍御

書畫扇頭十箇香藥二分

崇寧五年七月初四日

勅劉混康卿夙臻要妙志尚清虛朕遐想高風無忘朝夕載披貢牘之勤心益表公忠於王室言念及斯良深嘉歎所陳情悃並即施行永勝先塋許焚修之徒衆潛神官屬第推

賞於階資成命已頒可悉亮也朕欽崇大道

景仰靈蹤是述志以昭功故開山而建宇畢工來上欣懌交懷所期大闡真風錫蕃禧於黎庶精治法錄永協贊於丕基諄誨尚遙冲襟善護秋涼卿比平安好遣書指不多及

五年七月二十日

勅劉混康省所上表乞差官撰述宮記事具

悉茅嶺幽棲積金舊址眷念靈迹旁連洞宮故瑤臺之新府大啓煥於真風宮宇落成豐碑可俟命碩儒以製文及親題於碑額非特

爲一時之盛事抑以彰前人之休聲卿當慎擇高流同勤至道精修不懈廼情所瞻每思心要常憶儀刑顧川塗之脩阻想會晤之尤除其親書碑額及蔡卞所撰書記今差使臣管押前去至可領也秋涼卿比平安好遣書指不多及

先生養素金壇策名紫府昨自仙舟東下日深懷想邇來秋氣頓清緬惟道體和裕未涯訪道惟切傾思保練潛神副予瞻矚其碑額等今已書畢遣人降賜餘有所陳俱具奏章

崇寧五年八月二十日

勅劉混康棲真有素守道無渝功行益隆聲華夙著即萬寧之燕處奉大錄以精勤博濟羣生咸趨善化擴爾無爲之妙相予可致之祥蓋名以實彰禮緣德稱宜錫褒嘉之寵用

延弘遠之休法號增崇食言惟允往即欽承母或遜避所有誥命今附遞賜至可領也時當素秋卿比平安好遣書指不多及

朕以先生棲真句曲養素潛神符水施功慈濟遠邇嘗招鶴馭論道宣和啓迪無爲輔成靜治欽承微妙寤寐不忘近以宮宇告成特加先生冲和二字其誥已入遞附賜當體春遇時貢至言造闕未涯尤希保蓄

宣師所奏宮門墻宇等事乞修治已令有司火急應副物料材木等責立近限速令畢集無致逗遛稽緩去訖如先生更有所關但具奏無隱也傷風符鎮心壓驚佩帶符子各求數十道幸甚

加冲和先生誥

勅江寧府茅山元符萬寧宮葆真觀妙先生

劉混康三茅靈境仙聖所棲比建新宮用仲

崇奉以爾心游澹漠道合元微俾宅其間闡

揚至化宜加美號以示眷懷可特授葆真觀

妙冲和先生

崇寧五年八月二十三日
中書舍人李國南行

勅劉混康奉教玄元宅心清靜造洞真之奧

隱茅峯之顛廼舊居緬然靈異構崇新宇
大壯宗風丹臺鮮麗演崆峒之道樞紫府鼎
新追汗漫之高躅按圖顯敞寔稱真游益彰
崇奉之勤用慶落成之美益增欣沃當形詠
歌御製慶成頌一軸今入遞賜至可領也高
秋氣肅比平安好遣書指不多及

御製元符萬寧宮慶成頌

茅山之麓元符中即隱者劉混康所廬建觀
號元符觀經始於元年初至崇寧五年秋宮
成大書其榜更號元符萬寧宮蓋以協成拓
宗之志以安妥明靈欽崇妙道昭示後世廼
為之頌曰

句曲之山有居其顛誰氏之子象帝之先啓
迪後人淑修其身守靜而篤是為葆真在昔
元符作室其下經始勿亟以遺來者我應受
之嗣紹厥緒我儀圖之繕此棟宇考彼宮宇
因心而友不日成之克相其後廼益其名曰
維萬寧書以揭之用妥明靈道大無方體用
有常以德則帝以業而王坐進此道與道無
極神之聽之洽此萬國

崇寧四年戊戌
宣和殿書

初夏之別幾半載矣坐阻顏角廼情悄想每
引領之動思阻修途而興歎還山以來景仰
何啻有詩寫懷今同附遞到並檢領極思晤
語邈未有期金風向勁天和善保符子已收
更求佩帶待數道推恩事已施行希知之

葆真觀妙沖和先生歸山以詩送之

當年問道屬高人曾攬霞衣到紫宸身是三
山雲外侶心無一點世間塵征鴻望極幽棲
遠賀燕歸飛洞府新多謝為傳心法妙此真
真外更無真

崇寧五年九月一日
御製并書

勅劉混康省累上表具悉卿道高二許德實
三茅為教法之宗師擴真風而濟物懸解輦
轂裕處名山濶清標之晤會思綺傳之與言
每觀貢章良嘉勤意所陳乞事皆已施行徒
弟師名錫凝和之美號豐碑刊勒許潛慕之
總提今者方外入寧兩賜時若荷上帝之降
康亦焚修之有助霜秋屆候良晤未期勉加
保願用慰傾想甚淨之勅今同遞附至可領
也卿比平安好遣書指不多及

崇寧五年十月十二日

朕阻以來復見窮秋引領南顧徒切坐馳每

得郵音大慰傾渴山林虛靜想神游沖漠以
適安耳所賜還山詩慶成頌並許刊模自餘
手詔等不可上石乍冷保持法錄外倍萬珍
齎

勅劉混康所進天寧節功德疏具悉卿養浩

山樊棲真方外忠惟體國志在愛君屬厥月
之誕彌被清場而薦祉疏言來上嘉歎良深
故茲詔示想宜知悉冬寒卿比平安好遣書
指不多及

崇寧五年十月二十四日

勅劉混康省所上表陳乞事具悉卿潛心淵
靜造道粹全涉茲冬律克保天倪存覽囊
備悉來懇蓋事功之就緒寔推賞之未周敷
陳是宜銓次匪濫並可其奏已即施行宣義
營田特從本宮之所請丹陽塘瀾不許他司
之占留事悉緣公物無私已載披勤至用歎
忠嘉宜樂真常之餘擴推上清之法相予福
祉永庇宸區更在精衷明體朕意初寒卿比
平安好遣書指不多及

崇寧五年十月二十四日

朕阻以來日月如馳景仰何及偃蹇白雲想
多佳致近陳乞所賜詩頌上石並自刊模頒

降次真本一一自收別有陳請附遞奏來胥會未期引向彌深冬序漸寒為道保育

勅劉混康省所上表本宮開建慶成道場有仙燈現事具悉卿心游蓬島坐揖崆峒守修真抱一之奧洞歸根復命之源是以慶成寶

齊仙燈示瑞蓋精衷之上達由至誠之內克嘉祥荐臻靈貺昭答舍生均被美利難云省覽以還良深歎獎兼聞仲冬擇日親詣永勝焚黃時當沍寒不無勞勩計想鶴馭今已還山俯適迎長生經善衛崇寧五年十一月十八日

朕異以來俄經冬序每思清誼時唯引領知道場有聖燈現於鸞輪峯誠為奇異自非先生精誠昭格孰能臻此伏紙增歎未期胥見尤積情企唯加自順良副所望也聞先生往常焚黃時當凝凜道途保愛歸庵日符子更

求數十道同前

勅劉混康克持真教慎保天倪棲巖允以逍遙奉法錄而寧燕顧其淵懿宜有褒崇既頒諭於詩篇復形容於善頌抗章來上刊石是期嘉爾丹誠勒于翠琰已令丹御宴彼宮垣

傳弟子而彰不泯昭著禮而示無窮當體朕心益崇法訓臘殘春及氣易序遷更勤保練之功頒示沖虛之訣已差使臣專一管押刻石前去至可領也凝寒卿比平安好遣書指不多及大觀元年正月二十七日

勅劉混康卿秉心無妄執道不回總持法源羣生所賴功庸昭著揭如日星使上清之教益隆而弗替者寔有力焉比以道釋混淆理宜區別斷自朕心重訂謬至如三清混居於水陸元命及祠于梵宮繪塑無倫不可驟舉朕方圖叙昇倫講明教法稽考後先之理推原積習之端申飭有司分別崇奉庶蒙休祉溥祐舍生諒在淵沖必惟允議更新歲律尚冀保綏故茲示諭想宜知悉寒沍卿比平安好遣書指不多及大觀元年二月九日

勅劉混康親身沖粹有道淵深秉志不回推心篤善省觀奏牘備悉至懷仍聞新歲以來法履泰定所進術煎靈方夙授仙餌今存雖神鼎金丹之妙無以加諸長生之理茲其大致乎披繹勤志忻愜于中妙術恭持必無畔

戾時傳郵命副以好音春序云初天和善護朕異晤言俄經新律渴想儀刑朝夕弗替近降勅書所諭道釋混淆已付外施行事恐未詳盡今錄元降全文付卿一看卿教門綱領人所視仰其諸傳授保執持之無吝念也所

修石橋道路事已委發運使曾孝蘊專一應副施行益遠會見千萬加慎鎮心神符子告求數十道恐有所見災福告先生示及尊師初春可令至昨降物往彼道場已到否有天下者尊事上帝勅命惟幾敢有弗虔而

釋氏之徒修營佛事妄以天帝次於鬼神之列潰神踰分莫此之甚其能克享上帝之心乎可令有司檢會削除以稱朕嚴恭寅畏之意大觀元年二月十五日

勅劉混康朕祗奉三元欽崇至道每念靈承之重庶臻可致之祥凡在幅員率興觀宇瞻三茅之名封集殊方之勝槩倚毗師法以召蕃釐卿夙資淵妙之功屢獲嘉休之應累迂鶴馭來叩楓宸欵名理之至言詢心法之要妙保神清靜闡闡厭聞旅寓儲祥殆非宜稱

已令董治 鳩工構宇即上清之東隅建
萬寧之別觀庶專靜館延處雲輶可預擇徒
弟來此住持故茲示諭想宜知悉

領所奏道教未便洎陳乞事卿道門宗師教
法網領凡所陳請皆合朕志朕達高論日馳

南顧遐想香火之餘高棲雲表保神練氣所
得多矣宣師淨之候黃冕到山可同赴闕春

序將暄為道加慎大觀元年二月十九日

勅劉混康省所奏辭免赴闕事具悉朕欽奉
真元夙崇高道眷彼棲真之侶常形夢寐之

思佇瞻每渴於儀刑朕濶倏更於歲籥再款
話言庶資妙理是用載馳使傳敷趣造朝忽

露封章引疾懇避夫豈不懷義非可強當止
召命更伺歲年尚慎寢養以副眷渥春和卿

比平安好遣書指不多及

相別周歲引領尤勤兩披奏牘以疾力辭赴
闕已具別勅可其所請宜亮悉之安處潛神
以保壽康想綽有餘裕也道場事前已報知
宣師陳請皆契勘施行候指揮到止可令宣
師赴闕會晤尚賒對時自衛治百病傷風符

子告求數十道夜分燈下發慮先生意不安
故也大觀元年四月七日

勅劉混康省覽累奏具悉卿擯棄人事遠去
塵寰既殫懇迫之誠勉徇便安之請遐想邇

來怡神昭曠持法崇高處寂以絕管蔭光而
不曜臨風東望一及緒益不無傾渴之勤也

宣澤之便可發來赴闕或有奏陳詳具無隱
初夏漸熱卿比平安好遣書指不多及大觀元年五月二日

別來一周星律傾渴話言未嘗替也志趣高
尚厭絕囂紛得以澄神靜慮為沖漠之游良

多慰浣愈遠高論徒深引向首夏清和為道
保育月末忽目告連發疎以書問宣師可令

速至有經數卷伺宣師到令附去皆親書
茅山志卷之三

茅山志卷之三

茅山志卷之四

上清嗣宗師劉大彬造

詰副墨

宋詔詰

勅劉混康朕異又見畏景殊積詠思想惟偃

塞雲山養高物外從容於自得之場健美無
窮有所諭言詎可謗口當伺颺馭西來面悉

至意彼中有目擊事毋憚煩碎並附郵傳以
聞使一方民瘼不壅於上聞茲所望也炎歊

隆熾善衛沖和

宣師至所奏事一一備曉謹齋沐寫成密詞

一通託先生拜章奏達即幸也伺得天語速
具奏來餘面諭宣師令於先生處開陳貴妃

表一通亦附於宣師回山御筆畫元始天尊
太上道君各一本可與去歲所畫太上老君

共三清潛神供養北斗等經五冊扇頭二十
箇果實一十件香華龍腦茶燭等各以數交

割付宣師空名祠部五十道紫衣三十道恐
要度徒弟宣師之下應徒弟賜以紫衣師號

隨行侍者十五人皆賜披度及賜束帛有差

大觀元年七月二十九日

累承所惠符子不敢自享人若有疾必與服之庶滋先生治病救人之意諸符子告求數十道附遞進納

勅劉混康所上表并錄奏具悉仍知所拜章

詞消辰已達得聞筌秘嘉歎良深倘非卿迪中觀妙契道育真志念蒼黔誠通淵默者孰能臻此欣沃可知涉此夏秋益崇慶善朕萬機之暇每覽道樞傾想話言何啻飢渴發春匪邈期必西來當體至懷毋執謙避秋高氣肅卿比平安好遣書指不多及

久阻德標雅勤引嚮累收郵中之奏聞安處潛神綽有餘裕淨之所奏各契勘施行來春赴闕別勅已諭此不多述當乘春水扁舟西上母固抑朕意也秋秋霜清保錄持教外善

衛為最大觀元年九月五日

勅劉混康省所上表進奉天章節功德疏具悉孟冬正候誕節屆期嚴道範於瑤壇祝後天之景福願惟方外之侶不忘事上之誠迺睦忠勤益用歎獎故茲示諭想宜知悉初冬

卿比平安好遣書指不多及大觀元年十月十四日

朕遠之久頃想惟勤喜知道履冲粹所奏辭免春首赴闕事朕未諭也誠欲再見儀刑欽導積潤而遜避再三詞情迫切遽見絕之若是況仙鷄安流何勞之有歲元後別降詔旨預此及之未間保練天和為祝來春遣人宣召母得推辭阻命

勅劉混康累上表事具悉卿養浩山樊棲真物外優游自得起處甚休存覽貢章深嘉勤至淮妙談之杳隔第馳情以瞻思累煩詔書來春赴闕尚遲他託苦厭塵諠當抑志而暫枉飛鳧毋養高以固違朕志尚體春過無忽予言冬序云初冲襟善保乍寒卿比平安好遣書指不多及大觀元年十月十九日

所奏增崇三茅徽號已契勘典禮施行至宜悉之春首會面不可拒命所期者欵密高妙而已冬候向嚴倍萬冲攝符子更求數十貼即感也宮門事常在念豈不懷耳

勅劉混康頴悟真機昭融至道每覽奏牘寔契朕心欽迺三茅懇求封冊緬懷道廕宜示

褒隆即付攸司俾加顯命今令頒錫至可領也各閭紀良保願何若阜流脩阻系想徒勤俯邇春和切期構止安然舟御勿憚一來密屆迎長精加澄練冬寒卿比平安好遣書指不多及

自別仙風起處佳否芝蓋東下每一念之未當不慨然耳雲水生涯逍遙自得真有出世無窮之樂極思講妙決在來春未間保錄持教外善當是待大觀元年閏十月二十一日

勅劉混康累收來奏備悉勤恪不啻與聲款接也順履時序食息何若來春飛船西上妙論可期貴妃所需符子當為應副未間善為輔養

三茅君聖像畫畢止同先生到闕專得面付治病佩帶符子告求數十貼大觀元年十一月六日

勅劉混康省所上表來春赴闕事具悉卿累造宸廷遽乞還山兩歷歲華每勤馳嚮且聞春初西上深契予懷極思談微講妙預當滌慮齋心以伺耳申遣使人計治舟御許從便道飛船安濟宜速辦裝慰此翹渴會晤伊邇

尚宜善衛已差入內西京在藏庫使殿中省尚輦局典御勾當龍圖天章寶文顯模閣黃希叟降勅召卿赴闕春寒卿比平安好遣書指不多及

獻歲發春順履時序起處安如陳乞事並依

所欲逐一施行若自京口而來極便思一見

之形于寤寐伺黃希叟到毋少稽留可乘春

水庶無阻滯有所需關一一奏來區區已具

勅書茲不多述黃希叟到便可促行大觀二年正月

勅劉混康卿近嬰微恙已遂痊平計惟保練

有方無勞藥餌近覽來奏力疾造朝足仍勤

確不替忠嘉披閱以還良深歎獎希叟到日

便可飛舫乘此春波安濟西上經過郡邑無

為滯留好伺鶴軒以款清論暄妍在序善輔

是宜中春卿比平安好遣書指不多及大觀二年

二月十五日

春色晴融仙舟偃息不妨高養浩然之氣良

自得也或有所需可計會希叟行當會見預

已忻快未聞尚宜保練為最

勅劉混康卿持心淵靜毓德冲和每造楓宸

居多啓沃不聞名理忽復累歲鄙吝之心生

焉申遣使人往趣馳馭宜輟白雲之游來赴

紫宸之會其諸旨意已具前詔當體眷想毋

復稽留今差入內文思使殿中省尚輦局典

御勾當龍圖天章寶文顯模閣黃希叟管押

舟船就茅山宣召卿赴闕故茲示諭想宜知

悉春暄卿比平安好遣書指不多及

思渴晤言何劇如之以日計程四月上旬必

達闕下春水安流想無阻節途中宜止絕人

事日惟東顧以伺將欲入汴宜速奏來未會

間尚須善護

贈太中大夫誥

朕惟至德之世無為而萬物化淵靜而百姓

定爰率是道納民泰和誠意感通異人皆至

眷遇之禮曲盡始終葆真觀妙冲和先生劉

混康虛一守真純白自得前知休咎能警群

迷或託呪符克愈衆疾雖身棲林谷而名振

京師朕用嘉歎召對閒宴屢聞至論深契予

心比復造廷燕居琳館了然委化不約而同

靜思所存宜加憫飾太中之秩視諫大夫茲為異恩尚期款享特贈太中大夫

謚靜一誥

勅朕惟曲水之穴北距岱宗南接羅浮證法

冊於河圖得嘉名於地肺抱道秘境惟昔高

人真風未忘前轍具在贈太中大夫劉混康

出塵累之表以虛靜為宗觀妙勾金之壇葆

光埋璧之地慕真風於南嶽窺奧義於西城

衆方有求忽若委蛻其頌美謚式昭正一之

功庶幾異時益振冲虛之教可特賜謚靜一

勅賜元符萬寧宮

尚書省牒江寧府茅山元符萬寧宮茅山元

符觀牒奉勅宜改賜元符萬寧宮為額牒至

準勅故牒崇寧五年正月日牒中大夫守

司空右僕射

建元符萬寧宮提舉等官推恩勅命

勅相觀福地肇建祠宮為彼羣黎導迎景貺

龍圖閣直學士左朝議大夫胡師文等克共

廼事逮茲落成嘉汝之勤叙進官品若時休

命亦既廼心可特授左中散大夫依前職差

遣宣義郎江東運判喬可特授宣德郎差遣如故承事郎知句容縣事鮑慎辭特授宣義郎差遣如故右侍禁監江寧府排岸高士遷特授左侍禁西頭供奉官高公鼎特授東頭供奉官借職張和特授奉職差使葉承特授借職三班差使孟忠特授三班借職知縣事鮑慎辭免三年磨勘

又別勅

江寧府茅山元符萬寧宮修蓋潛神庵宇等安排御書碑了畢事體非輕下項管勾催促部役官等可特依此推恩發運副使劉何與轉一官江寧府通判范希逸與減三年磨勘候今任滿日特令再任其部役巡檢內殿崇班孫明翼轉一官

勅賜藏真觀

尚書省牒江寧府藏真觀故劉混康葬所見修道院牒奉勅宜特賜藏真觀額牒至準勅故牒大觀二年十一月日牒中大

宣和封陸簡寂真人誥

朕惟前古高蹈之士名迹不泯而稱號未稱

者所以追顯之

簡寂先生陸修靜真精內得遺經垂範而脫然超世廬阜故隱有祠至今考實定名禮以真人之號非特用褒往躅亦俾後之聞風者知道之所在而勉焉可特封丹元真人

宣和封楊郭許陶五真人誥

勅朕存嬰霄府瞻景龍臺瞻三秀之神鄉企九華之妙誨欽厥列仙之躅昭茲闡化之功東華上佐司命楊真人積學洞微研心合漠得中黃之隱訣受南真之秘傳董司吳越之疆關總神靈之要方謂揚於至道宜褒極於隆名庶期沖鑒之臨永侈蕃祺之錫可特封洞靈顯化真人

勅三炁隱靈固非名言之測萬神變化莫容議擬之求凡褒叙於上真實恢張於至道玉臺侍郎郭真人功參十極位列九宮含景王璫已飛行於太極扶華晨蓋爰總侍於虛皇方丕闡於元綱宜致隆於顯號尚期沖格永祐昌圖可特封太微葆光真人

於元局以濟生于下土凡著功於道品咸進位於仙宗上清真人許長史清素外融神明內得靈音斐暢密參羣聖之游歛駕超遙高佐上清之理方流羅于大梵宜崇配於德名庶昭丕佑之臨益廣無為之化可特封太元廣德真人

勅紫極涵元雖瀕濠於一炁丹臺列籍實總括於萬真凡褒位於仙宗蓋恢功於道甫東華侍帝晨上清仙公許真人研三神以觀妙凝九緯以挺生北洞告終自適幽人之分東華躡景獨超上相之游雖高謝於世名其敢忘於仁蔭尚期沖祐益闡元綱可特封混化元一真人

勅朕膺琅霄之景命握龍漢之寶符蓋將敷暢靈音恢隆道化闡微言於至教薦休命于列真蓬萊都水監陶隱居振迹榮耀濯精華闕神交無累迹雖相於山中誠感風通賦已仙於海上顧德名之莫擬宣妙陰之敢忘尚都顯號之榮永介涵生之祉可特封宗元翊教真人

宣和六年八月三日太傅葉國公臣徽宣右副閤中書侍郎臣張邦

奉昌
中書舍人臣張志行
勅如右牒到奉行

乞封五真人奏劄

臣輒瀝愚懇仰瀆宸嚴退省賤庸甘伺朝典竊惟自古得道昇真之士先後相承為時宗仰皆以扶世立教為已任自三茅真君飛昇之後繼有楊郭二許眾真並於句曲精修上道天真降顧親受秘語上清經教漸降人間逮梁宋之際真風浹汨聖道不絕如帶惟陶隱居力扶宗教以微言與旨發明道要為天下後世之幸然而三茅兄弟頃蒙朝廷褒崇冊封聖位其餘眾真未聞有以旌異臣愚欲望聖慈特以楊郭許陶眾真並依三茅真君例就今仙職加崇美號除別具諸位仙品奏聞外如蒙俞允乞降睿旨下有司施行干冒天威取進

宣和六年七月日第落郎與神殿校
止籍同知右街道錄院事管轄江寧府王
晨觀臣丁
安行判子

寧宗賜號王景溫

王景溫履道清尚操行高潔眷寵三朝朕亦禮遇可賜號虛靜真人

寶慶易如剛先生勅牒

尚書省牒左右街都道錄主管教門公事太一宮都監兼高士易如剛奏么微野人頃在茅山於慶元改元蒙恩召充太一宮高士并都監住持專任祈禱每藉君相為國愛民靡不昭格越今三十餘年徧除道階昨於嘉定六年蒙恩特賜通妙先生續於嘉定十四年得旨降香設醮茅山訖事回奏乞老還山恭奉御筆高士易如剛祈禱有功未應告老宜加顯錫以重眷留特賜通妙葆真先生今繳連寧宗皇帝御書二軸伏望尚書省特頒勅命旌表名山以重新禱伏候指揮
寶慶元年七月十四日奉聖旨特令尚書省出給勅牒奉勅宜賜通妙葆真先生牒至準勅故牒
寶慶元年七月十四日

理宗金錄投龍玉簡詞

維嘉熙元年歲次丁酉九月己酉朔二十六日甲戌嗣天子臣昀伏為保延國祚恭祈嗣續敬齋香信祇建沖科命道士二十一員於建康府元符萬寧宮啓建靈寶道場一晝二

夜滿散設醮三百六十分位告盟天地誕集嘉祥謹依舊式詣上清宗壇華陽洞天投送金龍玉簡伏望至聖至真鑒茲丹悃乞為騰奏上聞九天臣昀伏以元儲虛位未開熊夢之祥邊關分屯尚調虎符之戍內欲隆於國本外思靖於兵氛仰惟祖宗積累之難深切朝夕繼承之懼是用肆類上帝徧禱名山願垂覆燾之仁弘賜扶持之力得男而應宸索茂延百世之期偃武而致太平坐底四方之治保基圖於鞏固措民物於教寧祇迓靈休永依大造臣昀無任懇禱之至謹言

加封廣濟廟龍神詔

勅數澤廣應侯惟龍質無體而神無方矧茅山至人所居彼其吐吞夫丹竈之日月猶足依憑而為靈乎有司上功雨暘日時其禦雷也實應祭義申衍侯號用侈褒章金陵予陪都其職而幽以服而侯甸之職可特封數澤廣應利濟侯奉勅如右牒到奉行
淳祐四年月日

淳祐加封三茅真君詔

勅朕聞真人馭風騎氣神游八極之表而一

念在生靈則猶數數然也太元妙道冲虛真
君東嶽上卿司命神君咸道於茅山登籍於
仙府三君之首者也奇驗見于歷代遠近以
為司命朕為黎元慕尚不已特命有司亟衍
嘉號以彰欽崇可特封太元妙道冲虛聖祐
真君東嶽上卿司命神君

勅朕聞句曲三峯神君顯甚遂有金壇洞天
之名歷代所慕尚豈獨於今乎定錄右禁至
道冲靜真君修真得道是謂中茅兩賜應禱
遠近德之亟命衍號以答鴻休其體朕意益
陰陽于下民可特封定錄右禁至道冲靜德
祐真君

勅朕聞漢武祀神君於禁中其祝甚秘蓋以
微福朕不為也三官保命微妙冲惠真君真
風道氣號小茅君祈眚敬事祭典褒崇蓋非

一日矣茲命衍號以昭朕拳拳慕尚之意益

閱貺施以惠生靈可特封三官保命微妙冲

惠仁祐真君奉勅如右牒至奉行淳祐九年三月九日

太傳左丞相兼國公清之右丞相參知政事方叔吏部尚書關

尚書清史

御賜沉香描金如意一事上獻大茅君白玉
圭二面上獻中茅君小茅君聖像東執旌節
幡幢威儀等一十二件沉香五十兩腦子五
兩銀一百兩綠錦幡二首各長二丈新茶五
十片官會十萬緡付茅山崇禧觀

協忠大夫保康軍承宣使入內內侍省都
知提點佑聖觀張左街道錄洞微真應
先生佑聖觀虛白齋高士主管教門公事
司徒師坦上表以臣三年祈禱感應微勞
乞回降恩命加封三茅真君奏可
元詔誥

世祖皇帝召蔣宗師詔

上天眷命

皇帝聖旨諭建康路三茅山三十八代宗師
蔣宗瑛聞汝年高德邵法錄精嚴思接道論

今遣使馳驛召赴闕廷仍勅有司如法律遣
便安就道毋致艱虞故茲詔示想宜知悉

十八年二月

金錄齋詞

至大三年庚戌歲五月三日

上清大洞經錄無上三洞法師元景真人臣
王道孟欽奉

皇帝聖旨伏以有國有家祗荷財成之造蓋
高蓋厚敢忘祈謝之誠緘辭遠叩於名山微
福永延於景運謹遣玄教嗣師總攝江淮荆

襄等處道教所事崇文弘道玄德真人吳全
節恭奉香幣詣三茅山元符萬寧宮上清宗
壇修建金錄寶齋三晝夜滿散祗陳三界眾
真清醮三百六十分位伏願覆育無私鑒觀
有赫天長地久三宮同康壽之祺兩順風調
四海樂雍熙之治

又

延祐元年甲寅歲五月二十六日

法位如前臣王道孟欽奉

皇帝聖旨伏以惟

天惟祖之垂祐有國有家之在躬修省彌深
報祈敢怠啓冲科於茅阜集景貺於籙圖諒
有欲以必從信無遠而弗届是以謹封香幣
遣玄教嗣師總攝江淮判襄等處道教崇文
弘道玄德真人吳全節詣元符萬寧宮上清

宗壇命宗師王道孟集法師道士一壇修建
福國裕民金錄寶齋三晝夜滿散祇陳三界
衆真清醮三百六十分位伏願
一人有慶萬福攸同兢業無曠庶官臻既醉
鳧鷖之治怡愉以奉太后介未央長樂之春
風雨順調民物康阜

又

延祐五年戊午歲正月五日
上清大洞三景經錄弟子四十五代嗣教宗
師元景真人臣劉大彬欽奉

皇帝聖旨伏以輯寧邦家嗣服修經於八載
欽崇天道封香爰至於三山當陽春發育之
初祈大德生成之廣俯殫素悃仰格鴻禧謹
遣元成文正中和真人江淮荆襄等處道教
都提點夏文泳詣三茅山元符萬寧宮上清
宗壇命臣集法師道士一壇修建福國裕民
金錄寶齋三晝夜滿散祇陳三界衆真清醮
三百六十分位伏願
皇天眷命洪範錫嘽九族睦而萬邦和兵寢
刑措六府修而三事治地久天長慈闈介康

壽之祺中間協和平之福慶延儲位澤被寰
區

又

泰定三年丙寅歲十月十二日
法位同前臣劉大彬欽奉

皇帝聖旨伏以誕膺景命祇紹丕圖保民無
疆思永安於宗社應天以實庸昭祀於山川
爰致清祠冀徵洪貺謹奉香幣遣特進上卿
玄教大宗師崇文弘道玄德廣化真人總攝
江淮荆襄等處道教知集賢院道教事吳全
節詣建康路三茅山元符萬寧宮上清宗壇
開建金錄寶齋祈天永命福國裕民伏望璿
霄委監寶祚延長邦家開太平之基三宮同
慶海寓樂雍熙之治萬國咸寧

又

天曆三年庚午歲正月九日
太上弟子嗣上清高玄大洞經錄四十五代
宗師三天法師上景真人行九老仙都君印
職臣劉大彬欽奉
皇帝聖旨伏以恭承明命克紹丕圖欽若昊

天荷皇天之簡眷敬哉有土冀率土以乂寧
爰闡沖科用徵洪貺謹奉香幣遣法師舒致
祥詣三茅山元符萬寧宮上清宗壇修建金
錄寶齋三晝夜滿散祇陳三界衆真清醮三
百六十分位伏願乾坤合德日月齊明海晏
河清開八荒之壽域時和歲稔得萬國之懽
心

延祐加號三君立觀三峯誥

上天眷命

皇帝聖旨靜慕玄風灼觀往事無爲曰道必
刻意繕性而始成修身迺真非積行累功而
莫就大茅君東嶽上卿司命太元妙道冲虛
聖祐真君奇操矯俗精思集虛一德齊心受
龜臺西華之祕旨萬靈授職開金陵句曲之
宗壇丹光千載以如新寶氣三峯而彌固發
祥肇社民到于今稱之逆雨寧風天之所助
順也豈惟作聖允合祐神孔蓋翠旌祀莫嚴
於司命瓊文藥簡禮爰舉於秩宗假茲聰明
佐予平治可賜茅山一峯聖祐觀特加封大
茅君東嶽上卿太元妙道冲虛聖祐真應真

君主者施行

上天眷命

皇帝聖旨合人心理萬物禮宜順於鬼神建
皇極錫庶民微有稽於陽雨大江以東之地
句曲為望之宗土樂昇平歲稱稔足二茅君

定錄石禁至道沖靜德祐真君中峯司命西

華鍊形作牧審煩擾之非修身得恬澹之要

騁鸞導從填虎儼奏於雲中化鶴來歸城郭

時看於華表朕方推仁以濟衆靈宜妙物以

祐民學道受之以神端有宗於李耳聖祀不

祈其福誠深慕於漢文嘉與舍生誕敷景命

可賜茅山二峯德祐觀特加封二茅君定錄

右禁至道沖靜德祐真君君主者施行

上天眷命

皇帝聖旨氣化為神握陰陽而執要物來能

應遇水旱以成功茲山之靈以氏為號三茅

君三官保命微妙沖惠仁祐真君不導引而

壽體純素為真密從蒼龍承左右而無間時

乘白鶴侍伯仲以遠游荷天之休為民請命

逍遙容與服光景以如新周流徜徉蒙福祉

而無極肆加惠錫不應隆平埋鼎高峯爰慕

軒轅之有道獻金空谷方薄光武而不為以

赫厥靈同歸于治可賜茅山三峯仁祐觀特

加封三茅君三官保命微妙沖惠仁祐神應

真君主者施行延祐三年七月翰林學士承

旨趙孟頫副

勅賜崇禧萬壽宮

上天眷命

皇帝聖旨朕流觀山圖夷考仙蹟曉曲林之

舊館實私景之故居原其建立之初以處高

第弟子及今千載猶想遺風朕將益崇神明

用著高尚其建康路三茅山崇禧觀可準玄

教嗣師掌教真人吳全節所請賜號曰崇禧

萬壽宮主者施行延祐六年三月

茅山志卷之四

茅山志卷之五

龍五

上清嗣宗師劉大彬造

三神紀

茅君真胃

曾祖

任秦昭王世
長平侯

高祖

隱華山遂成
乘龍昇天

祖

任秦昭王世
長平侯

父

任秦昭王世
長平侯

大司命

任秦昭王世
長平侯

姬胄

任秦昭王世
長平侯

祖諱

任秦昭王世
長平侯

字初成

任秦昭王世
長平侯

一字本初

任秦昭王世
長平侯

深識玄遠

任秦昭王世
長平侯

察覽興

任秦昭王世
長平侯

亡知周之

任秦昭王世
長平侯

衰不仕諸

任秦昭王世
長平侯

侯廼師於

任秦昭王世
長平侯

北郭北阿

任秦昭王世
長平侯

鬼

任秦昭王世
長平侯

谷先生

任秦昭王世
長平侯

生長往華

任秦昭王世
長平侯

山道成以

任秦昭王世
長平侯

秦始皇三

任秦昭王世
長平侯

十年九

任秦昭王世
長平侯

改臘曰嘉平曾祖偃字泰能濛之第四子仕秦昭王爲舍人遷車騎校尉長平恭侯祖諱憲字世倫仕莊襄王爲廣信侯始皇即位以爲德信侯生六子並知名於時其第六子諱祚字彥英不仕不學志慕農桑生三子長即大司命君也次子諱固字季偉第三子諱哀字思和司命君生于漢景帝中元五年丙申歲二弟於戊戌庚子歲三君少稟異操天才穎悟矯志蕭抗獨味清虛嘗謂二弟曰世務紛錯履水煖熾當慕高祖之逸舉唯願肥遁之利貞耳年十八棄家辭親入恒山中讀道德經周易傳米朮服餌潛景絕崖積六年精思誠感夢見太玄玉女把玉札而誘之曰西城有王君得真道可爲師君子奚不往尋而受教乎明晨覺悟徑造西城心齋三月沐浴向新卒見王君駕神虎之駟控轡神嶺翱翔繡巖於是投軀越阻歸命道真不覺而至君所王君默使衛官見攝將還玉宮洞臺之中良久引進叩頭頓首求乞長生匍匐肘行重陳無已王君顧謂左右曰形景空苦似有志

矣迺得接引誘問戒以勿怠遂留洞宮執巾履之役者十七年王君見君謹密稍使主領衣書圖錄復三年命駕造白玉龜山因勞君同詣王母於青琳宮母曰總真挾肉人以登靈臺不亦勞乎王君笑而不答目君再拜請乞奇要迺叩頭自陳曰盈小醜賤生枯骨之餘敢以不肖之軀慕龍鳳之年朝菌之質求積朔之期雖仰遠流莫之能濟常恐一旦死於鑽訪之難取笑於世俗之夫遭遇王君哀盈丹苦粗受治身之術豈圖今日一覩聖姿恍惚大象如淪神夢救生護死歸之乞丐願賜長生之要暫悟行尸之身母曰子心至哉吾昔師元始天王搏桑大帝君遺我要言所謂玉佩金璫之道太極玄真之經實天人之殊珍上帝之奇秘汝今日願聞之耶言畢勅王君解釋玄真之經自敷玉珮金璫之文復向說元始天王大帝君言是太霄二景隱書又有陰陽二景內真符與本文相隨太上法准令受諸司命子玉札玄挺素書上清當爲上卿之君司命之任此道後當別付於子

也然不先聞明堂玄真之道亦未由得太霄隱書玄真之道是食日月之法鍊五神之術耳非總真弟子不教司命之挺不傳受命言訖王君與君還西城依承真訣按而行之三年目有神光面生玉澤王君賜九轉還丹一劑神方一首立壇結誓不許宣泄迺使君歸仍告之曰子道已成後百年求我於南嶽授子仙任於吳越矣君既辭師帶索混迹不矯於世自說入恒山北谷學儒俗之業時年四十九君父母尚存父見怒曰爲子不孝不親供養游走四方吾當喻汝爲不生之子欲杖罰之君長跪謝曰盈受命應當得道道法遁世事不兩濟雖遠遠供養無旦夕之益能使家門平安父母老壽盈已受聖師符籙見營助者天丁之兵不可打擊恐三官考察非小故也父意未釋亦欲驗君情狀示衆不惑於是舉杖向君杖即摧折段段飛揚穿柱陷壁父悟不凡迺止君曰所啓正處如此邂逅中人即有所傷耳父又曰子言得道能起死人否對曰人有天祿終及積惡罪重者不可更

生其橫受夭折則可令起君廼召社公父聞在中庭問社公曰此村中已死者誰可召還社公答云某甲李乙君曰速約勑所關由使發遣之須事了詣來白狀至日入後社公來白事某甲李乙事已決了便可發出遂告死者家人掘地發棺死人氣息但不能語舉而出之三日能坐語言了了如是發數人塚皆遂生活更數十歲廼復死耳遠近咸稱為神明之君後日貴盛諸侯互有所請君擁閉神關塞妙杜驗告之曰我昔學道精思深山山靈附我因協以驅使之耳非已自達其神能死生於萬物也或迫之不已君亦倖自篤病以至於殆矣淵池枯囊變適無倫時人雖奇其有道亦不能測其有為也後十餘年君父母壽考而終居喪盡禮傳家凡五十三年仲弟即定錄君漢景帝時察孝廉元朔元年舉賢良拜五官郎正和二年轉太子太傅元鳳元年拜破胡校尉武威太守季弟即保命君少以節行著名隱華陰山武帝建元三年舉方正不就徒梁國為孝王上賓宣帝地節二

年遷洛陽令轉拜西城校尉上郡太守元帝即位拜五更大夫轉西河太守仲弟時為執金吾並當之官鄉里父老少長祖送者數百人君亦在坐對賓曰吾雖不作二千石卿相亦當有神靈之職天帝見選補東嶽上卿震林司命君總統吳越死生之籍領拔學道試校羣仙此亦上真宗師神官之要位也來年四月三日當昇舉諸君能來顧如今日否若見省者亦不須有所損費吾自當有以相供待也衆賓皆相然至期君門前數頃地忽自平治青練帳屋屋下鋪白氍毹數重容數百人坐遠近相語此家得道當去小大並集來者塞道客廼數倍於送第時但見金紫玉杯奇肴珍果自至人前光景翕赫不可名狀絲竹金石聲動天地芳香之氣達于數里飲食隨益六百餘人莫不醉飽明日迎官來至君廼與家辭次語宗族子弟曰夫真仙道隱貴在迹翳不應表光曲飾動耀視聽吾所以不得默遁藏景潛舉空同者蓋欲以此道誘勸二弟之追慕也亦何但固衷之反迷耶天下有

心者盡當注向神仙之冀獲耳季偉思和雖見事晚必能自悔釋官委祿來尋於我今此去權停江水之東向曲之山此山內有靈府衆洞相通穴岫長連真洞仙館也昔與聖師期宜先於此以自清勵恭伺天命然後鎮彼大霍居于赤城矣言畢周辭即登羽車參駕龍虎浮空而去東行十餘里忽然不見時元帝初元五年丁丑君年一百二歲矣遂過江暫治句曲內游洞宮推拔真仙外立茅舍於山之北即今下領統地官屬籍關決生死黑虎馴衛白鵠交往靈著江左道惠百邑吳越之境競為臣僕邦人因改名此山為茅君山二弟在官聞兄白日神仙著於民口始信仙化可學神靈可致然後明松喬不虛鼎湖有實耳於是各棄官還家以日久之年修繕相遺事未有補益廼相謂曰家兄得道非他人也何不往從親稟口訣而廼按云云方書以規度世乎縱往而不達終不使吾等死於非所遂以元帝永元五年壬午三月六日度江求兄於東山相見悲忻流涕君告二弟曰

悟何晚矣二弟謝曰固衷頑下不達道德流
洒風塵希世臭味垂纓漢朝閭門完全位至
守相享年壽考皆兄神祐覆護之恩蒙蔭以
來日用不覺一旦失兄若無天地人非金石
命當有盡年已朽不常慮奄忽呼吸寄生不
朝則夕昔日歸家修兄遺事不受真訣未獲
其効越江來侍規稟訓誨願賜長生濟弟無
死君曰卿已老矣難可補復縱得真訣適可
成地上仙耳上清昇霄大術非老夫所學於
是教二弟服青芽始生咽氣液之道亦停年
不死之法也後語季偉曰卿宜服黃帝四屬散
我昔受之於高丘先生今以相傳耳又語思
和曰卿宜服王母回童散思和體中損少於
季偉故宜服此以填精補腦耳夫此二方皆
妙法也二弟具受教初廼服藥咽氣勤精靜
思又施行諸為生生之戒慎者如是十八年
色如處子君曰藥已行矣廼受以上道使存
明堂玄真之氣以攝運生精理和鬼神三年
之中神光始現君又各賜九轉還丹一劑神
方一首仙道成矣君廼啓王君自陳二弟蒙

天恩濟度得為地仙仙法要當佩錄受策帶
真極之符然後書署處官掌領所司乞願推
恩平其履蓋王君曰子少學道德勤心不懈
吾憫汝至志是以相成堅心關奏為子保舉
之主太上垂許賜命神仙二弟賴卿蔭祐享
年富貴驕淫敗氣止存規息年出一百非復
學道時也得神散靈方變化久視足矣詎宜
便受職署為地上之仙位乎且曠古以來兄
弟俱仙亦為少矣然子高祖得道仁加萬物
積德所及廼鍾子身慈心仁和每修陰功誠
可憐也子屢請乞二弟仙官之職今重賜玄
水玉液丹可使長齋而服之慎他宣示別宜
關啓太帝而保効之信子當自將以來于時
二弟雖內通神靈外攝六丁至於天真大神
如王君之傳猶未肯降見明高卑不倫矣君
使二弟清齋服藥食芝畢復相與心齋三月
詣青童方諸宮書名金簡次詣西城洞宮朝
見總真上宰南詣衡山朱臺謁太虛赤真人
歸方諸請地仙三真之策造赤城受真變神
符又之羅霍求華旌繡幡廼上登九宮詣金

闕受聖君之書頓首於闕下者三月聖君廼
命九微太真上相王大同命高晨師青童君
使上詣太上帝道君協晨宮中請朱官使者
下拜固衷於金闕下須臾使者二人及侍從
數千人俱使者手授紫素之書以付固衷
策文二見第五
季偉有地真上仙定錄神君之號思和有司
三官保命仙君之位焉各依紫素之命封蒞
所治神宮上府亦隨事而實給於二君矣大
司命君佳句曲四十三年至哀帝元壽二年
庚申歲年一百四十有五歲八月十八日
已西南嶽赤真人西城王君龜山王母方諸
青童君同造君于山中時天皇大帝遣逸域
宮繡衣使者授君以神璽王章太微天帝君
遣三天左官直御賜八龍錦輿紫羽華衣太
上帝道君遣協晨大夫賜金虎真符流金之
鈴金闕聖君命太極真人使正一上玄玉郎
賜以四節燕胎流明神芝長曜靈飛夜光洞
草使拜而食之佩璽服衣正冠北首帶符握
鈴畢使者告君曰食太極四節隱芝者位為

真卿食金闕燕胎王芝者位為司命食東官
流明金英則有司錄之任食長曜靈飛夜光
洞草則當為真伯兼主總左右御史之任子
今日盡食之矣壽同天地位為司命上真東
嶽卿君都統吳越之神靈總帥江左之山元
也言畢使者各去須臾五帝君各乘方面色
車從官來下衛大帝之命授君九錫冊文九錫冊文見諸位為司命東卿上真君文以紫玉為版黃金刻之君伏受書署再拜畢靈官上真五帝各去唯師王君西王母留後為君大設天厨王母命諸侍女作樂復歌玄雲之曲曰大象雖云寥我把九天戶披雲汎八景條忽適下土空同玄音至靈不容冶大帝悟風塵苦願神三元中納精玉闕下遂乘萬龍椿落鳳盼九野又曰玄圃遏北臺五城煥嵯峨啓彼無涯津汎此織女河仰上昇絳庭下游日窟阿顧盼八落外指點九空遐忽已不覺勞豈悟少與多撫璇命衆女空遐忽已和妙暢自然同是為玄雲歌靈詔肆天韻真音辭無邪歌訖良久俱詣二君之宮二

君頓首奉迎北面稱小臣之敬王母告之曰汝道雖成所聞未足我當為汝二人有所要以致汝於此矣須臾遣侍女郭密香與上元夫人相聞二君亦不知上元夫人是何神也云西龜九靈太真王夫人敬謝但不相見已千餘年天事勞我致以愆面茅固衷道成適來視之久不向人間主客對坐邑邑不樂夫人能暫來否答能屈駕當停相須侍女既去少頃而返上元夫人亦遣侍女答相聞云阿環再拜上問起居遠隔絳河擾以官事仰戀先潤情系無遺密香至承降尊茅固衷處聞命之際登當整駕先被大帝君勅使詣希林枝定三元錄正爾暫往如是當還遂便東帶願暫小留二君因問王母不審上元夫人為何真也王母曰三天真皇之母上元之高真統領十方玉女之名錄也當二時許上元夫人生來時聞雲空之中簫鼓之音龍馬之鳴也既至從官數十人皆女子年齊十六七許形容明逸多服青綾紋衣先來耀目夫人年可十八九靈儀絕整服赤霜之袍披青毛錦

來頭作三角髻散餘髮至腰戴九晨耀日之冠帶六出火王之珮腰鳳文琳華之綬佩流黃輝精之劔入室向王母拜王母止之呼與同坐北向上元夫人設厨迺不異王母所設王君勅二君再拜自陳曰固衷受性頑鄙生長濁亂面牆不啓無聞道真然貪生畏死宗奉師元今日成拔此廼天願唯垂衷告夫人愍二君之向真惟靈妙之未啓迺勅侍女宋辟非出三元流珠丹景道精隱地八術太極綠景凡四經以傳于二君王母復勅侍女李方明出玉珮金璫太霄隱書洞飛二景內符傳司命君上元夫人有言於王母曰阿母隱書之妙上真內經封之金臺佩入太微迺徑輪而前衛文大武卻伏抱關出登上清則振身瑤房左邀希林長招仙公右樓白山下盼太空汎彼天津則乘雲騎龍游此名山則真人詣房萬神奉衛山精司迎動有八景玉輿靜則宴寢金堂此文妙矣所謂玉珮金璫也環有三元流珠丹景道精隱地八術太極綠景經能返老還少卻白迴嬰推折千魔驅策

百靈致明月之黃華得白日之赤精藏軀翳景萬物化生出水火叱咤幽冥收束虎豹呼召六丁隱淪八地顛倒五星久視在身與天相傾耳安及太霄隱書八會之奇文乎用之眇邈可以登王京之宮紛紛飄飄入流霞之堂臣五嶽之主坐司命之床挹鳳腴之醴漱藥丹之觴駕八龍以凌空御虛落紫雲而高浮遠翔於是上元夫人下席起立左手執四部經右手執受書盟仰天向二君祝曰九天浩洞太上曜靈神照玄微清虛朗明登希者妙守氣者生至心道臻寂感真成役神形辱安精年榮石精金光藏景錄形左右招神天元策靈可以步虛可以淪形長生久視與天同明達盟泄漏禍必族傾各宜慎禍敢告茅生祝畢二君拜受靈書抱之肘腋焉王母亦下座手執太霄隱書復命侍女張靈子把交信之盟對司命君啓手授書向天而祝曰天高地卑五嶽鎮形元精激氣滄澤玄清天回九道六和長平太霄隱書玉珮金璫玉景八會寶洞上章登行太極上清瑤房池則受

考身獲天殃受者慎之敢告茅盈君伏受隱書宴集受事粗畢西王母上元夫人各去唯王君復留於是君與二弟決別而與王君具之赤城玉洞之府也道次諸山川有司迎啓引者將以千萬矣臨去告二弟曰吾今去便有局任不得數相往來旦夕相見要當一年再過來於此山三月十八日十二月二日期要吾師及南嶽太虛赤真人游盼於二弟之處也將可記識之有好道者待我於是日吾自當料理之有以相教訓於未悟於是二君留治此山洞內立宮結構於外將道著萬物流潤蒼生德加鳥獸各獲其精神驗禍福罪惡必明內法既融外教坦平爾迺風雨以時五禾熟成疾癘不起暴害不行境無災眚邑無賊兵時父老謠歌曰茅山連金陵江湖據下流三神乘白鶴各治一山頭召雨灌旱稻陸田亦復柔妻子咸保室使我百無憂白鶴翔青天何時復來游三君往曾各乘白鶴集山之三處時人互有見者是以發於歌詠矣迺復因鵠集之處分句曲之山爲大茅君中

茅君小茅君三山焉統而言之直是句曲之一山耳無異名也父老雖外承茅君仙真之靈祐而實未親溫顏於膝下茅君亦潛閑洞宮順神葆真忽臭味之交馳遠凡俗以靜身故不復外接衆庶耳唯好道骨挺之子時得袖引相見至於澤溉萬物德加兆民已陰爲用也時人惟此靈德之洋溢同於天地大神亦顯聖道之無心因民情而爲感矣遂迺相率扶老攜幼挈糧壺漿共起壇積基立廟觀于山中窮工肆巧結構連阿圖三君之像於丹青之榜書神靈之德於能宣之筆播殖百果竹柏成林決利清流於毗陵之元虎豹衛災巨狩備闢素鴻玄鳥翰飛戾天勇者懾其武仁者懷其文農夫感敬於洪澤萬物宗庇於靈信垂死者必獲其生學道者棲慕于墻岸矣明帝永平二年詔勅郡縣修靈山大澤能興雲雨有益百姓者廟如陳國老子廟會稽夏禹廟丹陽句曲茅真人之廟長沙湘水黃陵二妃屈原之廟有是此之比者皆德遺黎民道匠萬物或標聖母之高軌或範聖賢

之靈蹟是故象以銘器廟以期神皆當因而營護使守而修之時邑人通呼此廟為白鵠廟而實不知司命君早已東之赤城也昔人有至心好道入廟請命者或聞二君在帳中與人言語或見白鵠在帳中白鵠者是服九轉還丹使能分形之變化也亦可化作數十白鵠或可乘之以飛行而本形故在所止也二君性好音樂其有所持念人每入廟者二君常從方諸宮及西城請天妓天妓來時皆聞虛空之中有音樂之聲來下稍近既到管絃歌音非人世所聞清哀激洞而不可名終日迺遣妓去亦復並作並去漸遠良久迺不聞夫此之神者是能變化假景因百姓之心以順其情耳本真定形故自無還洞臺願光潛輝乎定錄君曰向曲自是司命之別宮吾人亦不得為洞臺之正主也東鄉司命監太山之衆真總括吳越之萬神可謂道淵德高折衝羣靈者也賈玄道李叔升言城生傳道流並受司命君之要也玄道河東人周咸王之末年生叔升涿郡人漢元帝時生道流

北地人漢靈帝殿中將軍也城生吳人後漢劉聖公時為武當郡尉也受學至勤並得真道後入太山友子小白陽山中此所謂地真者也李翼字仲甫者京兆人也與司命君俱事西城王君仲甫為入室弟子司命君為北牖弟子但仲甫所受業異恒服水玉有効能步斗隱形晝夜行三綱六紀之法又作白虎七變百餘歲轉更少壯與司命君同受還丹一劑服而歸家仲甫相識人相去五百里常以張羅為業當晨張羅獲一大鳥視察之迺是仲甫語畢別去言已復是日還家在民間二百五十年漢靈帝時入西嶽去亦有迎官如司命君初發時也受書為西嶽副司命每自歎云吾受業少不如茅叔申此亦吾之命也仲甫曾以七變神法傳左元放元放修之亦變化萬端矣

茅山志卷之五

茅山志卷之六

龍六

上清嗣宗師劉大彬造

括神區篇

句曲山太元真人內傳曰江水之東金陵之左右間有小澤澤東有句曲之山此山洞虛內觀內有靈府洞庭四開穴岫長連古人謂為金壇之虛臺天后之便闕清虛之東窓林屋之隔沓衆洞相通陰路所適七塗九源四方交達真洞仙館也山形似已字故以句曲為號焉隱居大小澤即今赤山湖從江來直對望此山又曰句曲山源曲而有所容故號為句容里周時名其源澤為曲水之穴秦時名為句金之壇以洞天內有金壇百丈因以致名也外又有積金山亦因積金為壇號矣漢有三茅君來治其上時父老又轉名茅君之山三君往乘白鵠各集山之三處時人互有見者是以發於歌謠迺復因鵠集之處分為大茅君中茅君小茅君三山焉統而言之盡是句曲之一山耳隱居云句曲從山嶺分界西及北屬句容東及南屬延陵山去石頭江水步道一百五六十

里句容延陵唐屬潤州宋分句容屬江寧府熙寧中廢延陵山東及南今屬鉅野縣

華陽洞天太元內傳曰大天之內有地中之洞天三十六所其第八是句曲山之洞周迴一百五十里名曰金壇華陽之天洞虛四郭上下皆石也上平處在土下正當十三四里而出地上耳東西四十五里南北三十五里正方平其內空虛之處一百七十丈下墟猶有原阜攏偃上蓋正平也其內有陰暉夜光日精之根照此空內明並日月矣陰暉主夜日精主晝形如日月之圓飛在空玄之中句曲之洞宮有五門虛空之內皆有石階曲出以承門口仙人卒行出入者即若外之道路也日月之光既自不異草木水澤又與外無別飛鳥交橫風雲翳鬱亦不知所以疑之矣所謂洞天神宮靈妙无方不可得而議不可得而罔也句曲洞天東通林屋北通岱宗西通峨嵋南通羅浮其有小徑雜路阡陌杪會非一處也漢建元史左元放既得道聞此神山遂來山勤心禮拜五年許迺得其門入洞

虛造陰宮三君授以神芝三種元放周旋洞宮之內經年宮室結構方圓整肅甚悅具也嘆曰不圖天下復有如此之異神靈往來推校生死如地上之官府矣

金陵地肺福地按洞天福地記福地有七十二地肺福地為第一即金陵之地是也金陵之地出於內傳其地水至即浮故又比之於肺抱朴內篇別有地肺山迺玉溜嶼又商山亦名地肺今以內傳為正保命君受言金陵者洞虛之膏腴句曲之地肺也履之者萬萬知之者無一人又曰金陵者兵水不能加災厲所不犯河圖中要元篇第四十四卷云句金之壇其間有陵兵病不往洪波不登正此之福地也太元內傳曰句曲山其間有金陵之地地方三十七八頃是金陵之地肺也土良而井水甘美居其地必得度世河圖要元篇亦曰迺有地肺土良水清句曲之山金壇之陵可以度世上昇曲城定錄君受言金陵之土似北邙及北谷關土堅實而宜禾穀掘其間作井正似長安鳳門外井水味是清源

幽瀾洞泉遠沾耳水色白都不學道居其土飲其水亦令人壽考也內傳又曰金陵之左右有汧谷溪源陵之左有山右有源汧名柳谷陵之西有源汧名陽谷又名山內經福地志曰伏龍之地在柳谷之西金壇之右可以高棲孔子福地記曰岡山之間有伏龍之鄉可以避水辟病長生本所以名岡者亦金陵之質也是以百代百易非復本名良可歎也右弼王真人受言越桐栢之金庭吳句曲之金陵養真之福境成神之靈墟也五倍堯水東海傾人盡病死武安兵其知予何由我帶近洞臺之幽門恃此而仿佯耳

山

大茅山在元符宮南獨高處是司命君白鶴所集處定錄君受言大茅山有玄帝時銅鼎鼎可容四五斛許偃刻甚精好在山獨高處入土八尺許上有磐石掩鼎上玄帝時命東海神埋藏於此又言玄帝者昔軒轅子昌意娶蜀山之女生高陽德號顓頊父居若水之鄉項身陶七河之津是為玄帝也山頂常現

神光謂之丹光一日天燈舊有石壇石屋今為殿宇祀三茅君古石像歲以三月十八日十二月二日為司命游盼之會四方之人來山禮觀盛作靈寶齋事今古弗渝也

中茅山在積金山北長嶺獨高處定錄君受

言中茅玄嶺上第六司命君埋西胡玉門丹砂於

此深二丈許塼上四面有磐石鎮其上其山

左右當泉水下流皆小赤色飲之益人山下

左右有小平處可堪靜舍今三陽百姓間得

長壽者謂朱陽太陽北陽三村也

○小茅山在中茅北太元內傳曰王莽地皇三

年七月戊申遣使者章邑齋黃金白玉銅鍾

五枚贈於句曲三仙君光武建武七年三月

丁巳遣使者吳倫齋黃金玉帛獻三仙君

積金山元符宮之陰定錄君受言大茅後中

茅前相連長阿中有連石古時名積金山其

處宜人住可索有水處為屋室靜舍迺佳快

可合丹以修上道隱居曰此即隱居今所住

處東面一橫壑純是石石形甚瓌奇多穿穴

西南有大石壁聳而拆開內有洞入數丈漸

狹小不復容人迺颺颺而有風

金蘭山積金東四獨小山是定錄君受言句

曲文山有名蘭山此山至佳隱居曰今人不

復知有蘭山者此山形當如蘭孤立亦或是

倉困之困形如困也按大茅後長阿積金東

四地有一山子獨秀如博山第五又近積金正

此是矣

華婁山在崇禧宮南昔女仙人孫寒華修道

於此有廟久廢此山夜中多見光景或以為

丹芝靈氣居人常望見之

○丁公山崇禧宮之陰相傳漢初丁令威仙舉

其上不知遠東何得遠來此山豈道成分身

任意之所至也

丁山在拱辰峪東

虎爪山在丁山西

雷平山在雷平池上定錄君受言許長史今

所營屋宅對東面有小山名雷平山周時有

雷氏養龍來此

鬱岡山在小茅東北一名大橫山林木蔽翳

望之鬱然故名定錄君受言雷平山之東俗

人呼為大橫山其實名為鬱岡山也名山記

所謂岡山是矣昔李明於此合神丹而升玄

洲水邊今猶有處所其地古名鍊丹院

方隅山真誥云雷平山之東北良常山之東

南其間有燕口三小山相隅名方隅山古人

曾合九鼎丹於此幽人在世時心嘗樂居焉

今常游此隱居曰前云李明合丹即此是矣

幽人者許掾去世後不欲顯名故自稱幽人

耳

三公山在燕口洞東南

○青山在鬱岡東其西一山名西青山

麻姑山在鬱岡西

衛珠山在雷平南王隱記云俗呼獨女山

獨公山在小茅北

小竹山在小茅東

良常山太元內傳曰茅山北垂洞口一山名

良常山亦句曲相連都一名耳始皇三十七

年十月癸丑出游十一月行至雲夢祠虞舜

於九疑浮江下觀籍柯度梅渚過丹陽至錢

塘臨浙江水波惡迺至西百二十里從狹中

度上會稽祭夏禹望于南海而立石刻頌秦
德于會稽山李斯請書廼還諸山川遂登句
曲北垂山埋白璧一雙於是會羣臣饗從官
始皇歎曰巡狩之樂莫過山海自今以往良
爲常也爾廼羣臣並稱壽喚曰良爲常矣入
鳴大鼓擊大鍾萬聲齊唱洞駭山澤讚樂告
兆大小咸喜廼改句曲北垂曰良常之山良
常之意從此而名又曰良常山西南垂有可
住處是司命君往時別宅處也亦可合丹又
曰良常東南又有可住處其間當累石如竈
形間或有寄生樹樹形如曲蓋形此處正好
但恨淺耳雖爾自足洞口西北有一地小危
不安要自足立外舍也
秦望山在丁角路良常東北小尖山上下俱
路者是也始皇亦駐此山顧望丘阜
龍尾山大茅一嶺直至山東金壇界宛如卧
龍
三角山在華蓋峯北
海江山在慶雲洞上
雲堆山在皇甫峪南

仙莊山真誥姜叔茂種五辛菜以市丹砂隱
居曰今呼爲莊山在大茅西甚多大莊俗呼
石龍山
鼇足山在仙莊山西
大靈山
小靈山並在鼇足山西
竹山在疊玉峯南
吳山隱居曰自大茅南復莊山竹山吳山方
山從此疊嶂達乎吳興天目諸山矣
方山真誥大茅之西南有四平山俗中所謂
方山者也隱居云此山去大茅可二十許里
下有洞穴
峯
懸輪峯大茅東連峯是也事見稽古蹟篇
五雲峯積金東南對山昔三茅君各乘飛雲
現于峯頂人民共觀藩鎮上聞有詔若曰故
得卿雲煥爛仙相分明能均五色之光徧覆
三茅之頂時許長史在都常向方遙禮每云
遙瞻三秀冥運一心故得感通高真用意也
道祖峯在積金之陰

疊玉峯在大茅東
華蓋峯在疊玉東
白雲峯在中茅西
抱朴峯大茅北連峯是也
長隱岡一名伏龍岡隱居曰岡在郭真人池
南岸一壑長緩而隱嶂故名此岡上純是細
石非可居唯近東南取長史宅至雷平間甚
有可住處義興蔣負芻等並立曰舍於岡下
近長史宅四五里
栢枝壑在華陽南洞
桃華壑在小茅北林壑幽邃春時花卉紛敷
不異武陵源也
拱辰峪一名拱辰寨在中茅東北劉先生際
遇元符宮爲建宮仍勅江寧兵士二百人以
充巡邏灑掃因立寨峪中詳具宋史
皇甫峪在三角山
楂子峪在三角山北
黑虎谷在中茅小茅間長阿之西
洞
真人曰天無謂之空山無謂之洞人無謂之

房山腹中空虛謂洞庭人頭中空虛謂洞房是以真人處天處山處人所謂出入無間蓋天地之有山洞由人身之有喻穴神氣之所行焉太元內傳曰句曲之洞宮有五門南兩便門東西便門北大便門合五門也隱居云

今山南大洞即是南面之西便門東門似在栢枝壘中北良常洞即是北大便門而東西並未顯定錄君受言東便門在中茅東小阿口則西便門應在今呼作石墳處也

華陽南洞在大茅山下栢枝壘中唐越州刺史裴肅字中明造松子石案用以朝真

茅洞在元陽觀石壇下即南面之西便門定錄君受言大茅山有小穴在南謂之南便門但精潔齋心向於司命又常以二日望山延迎請祝自然得見吾也誠之至矣陰宮何足不觀乎左慈復何人耶

華陽洞東便門定錄君受言中茅山東有小穴繞如狗竇旁容人入耳愈入愈闊外以磐石掩塞穴口故餘小穿如杯大使山靈守衛之此磐石穴時時開發耳謂之陰宮之阿門

子勤齋戒尋之得從此而入易於良常洞口良常洞多沙路曲僻經水處不大便易又道路遠不如小阿穴口直下三四里便徑至陰宮東玄掖門自非已成仙人不得其門而入也

華陽西洞在積金山東嶺下隱居所謂積金山洞颺颺有風者是也累朝金錄投龍簡於此即西便門也

良常洞華陽北大便門也是為保命君所治定錄君受言良常北垂洞口直山嶺南行二百步有秦始皇埋藏白璧一雙上有小磐石在嶺上以覆塼處李斯刻書壁其文曰始皇聖德平章山河巡狩蒼川勒銘素璧始皇所履山川皆禮以玉璧不但句曲而已洞北石壇即許真人採燒香禮拜解化之處真誥所謂北洞告終以此

羅姑洞在金茵山西即九疑山女仙人羅郁也

高居洞與羅姑洞並石限界之
玉柱洞在華陽西洞南中積石乳四面僅容

人行

華姥洞在華姥山以孫寒華得名

鄭都洞在紫陽觀事見樓觀部篇

小青龍洞在小茅西朱砂泉上

天窓洞在積金山

碧巖洞在崇壽觀後洞頂為巖峯亭古木危基存焉

女仙洞在碧巖洞東三十步穴口下視如管

井然相傳任真人女得道變適于此

栢枝洞在金牛穴南昔人深入聞太湖風濤

鼓楫之聲

慶雲洞在海江山下

黑虎洞在華陽南洞九錫碑之左

黃龍洞在九錫碑之右

南斗洞在三角山女官妙法庵

海泉洞在皇甫峪泉源深不可測

水龍洞在白雲峯下

燕口洞在方隅山南有洞室女仙人錢妙真

道化其中淳祐五年巡檢使夏侯嘉真與建隆觀道士詣洞投龍簡是夕雷震洞戶開一

廳吏深入遇道士與來禽一食之絕粒

方隅洞在方隅山上真誥方隅洞有二門其一即燕口洞也洞名方源館南通大茅南之方山亦有二洞口見於外

夫子洞在良常對山孔子未嘗入其不知何以得名

方臺洞在方山下有洞室兩口見外與華陽通號為別字幽館得道者處焉世人呼為白石洞

青龍洞在怡憤山去方山十餘里怡憤山今人呼為丫頭山在溧陽州界隱居曰有大口見外昔有人深入見一大青蛇因相與呼為青龍洞其洞弘廓深委凡迹可至也

華蓋巖在石墨池上宋末詔舉邑令張標卜居其前

候仙巖在碧巖洞東數武

霧豹巖在碧巖洞下

碧玉巖在丹谷泉上

眾真巖在茅洞側

錢真人誦經巖在燕口洞上

金牛穴在栢枝洞東秦時採金獲金牛為女

子所觸遂擲而出取之不可逐牛至丁角地名因曰上欄下欄又有曰犇牛犇入海不復覩之也與地志亦云

由水穴在碧巖下

觀六

土

茅山志卷之六

茅山志卷之七八月龍

上清嗣宗師劉大彬造

括神區篇

水

東西楚王澗舊記崇禧觀東二澗是也并華陽西洞三水合流直至崇禧觀前昔楚威王游憩于上故名隱居云隱居今所住之東面一橫壟西南有大石壁內有洞外數步便有一湧泉水冬夏清流即下解所資近外洞口又有一湧泉水勢趺駛上者冬溫夏冷正對

邏前小近下復有一穴湧泉特奇大水大旱未嘗增損色小白而甘美柔弱灌注無窮但恨盡在山西自不得東流耳按橫壟即洞嶺下解即崇禧觀此水迺楚王澗也

鶴臺澗隱居云度積金壟東南有一石穴水東流極好其處隱障甚可合丹正箇山之前

陶塘澗

宜春澗在中茅東任真人就東流水合丹正

古洞天館之前也

九曲澗支流自大茅左脇而下達于菖蒲潭

也

大澗在金茵山東

流杯澗在雷平山西

碧榛澗在大茅西二里郭四朝真人嘗於其處種榛

白李溪在小茅北展上公種白李處

蒼龍溪在良常山西俗呼冷水澗

喜客泉在大茅北垂方池數尺客至泉即踴躍津津然或臨以聲勢則凝不為動亦一奇也一庵事孫寒華香火

益人泉在大茅東嶺上登真隱訣云天市壇

左右有泉皆金玉之津飲之益人故名

玉螺泉在鸞輪峯西垂二口貯泉至冬一冰一溫又名陰陽井

白玉泉

靈泉在積金山上

洞泉通仙橋一池是也

玉砂泉在中茅西司命君埋西胡玉門丹砂

於中茅玄嶺泉水飲之益人

朱砂泉在小茅西

鹿跑泉大羅源之左古人精修仙鹿為發此泉

百丈泉在拱辰峪

鎮飲泉在大茅南垂泉作乳色

海眼泉有二舊記一在楊尚書山房泉湧能

應潮候當積金中茅之西今西園一泉是也

一在石墨池西

丹谷泉慶雲洞之東昔有道人取水合丹童

子易他水道人識之由是得名

田公泉

陶公泉在皇甫峪

玉液泉有二其一在仙人捧石之北其泉甘

香微若乳色能已腹中諸疾今見其正白亦

呼為白泉一在三角山玉液庵

撫掌泉一名冬溫泉在昭明讀書臺下聞擊

掌聲泉湧如沸方池常湛如也

一勺泉在昭明讀書臺後巖上

天池在大茅頂神龍所都大旱不涸

泰龍池在天聖觀大中祥符間初取龍子御

製歌送還山

碧玉池在天聖觀碧玉天帝殿前放生池在常寧鎮東

石墨池即菖蒲潭漢費長房學道于此書符

滌硯澗石悉為墨色至今用池水合藥有奇驗

玉津池在崇壽觀前

周真人池隱居弟子周子良池在靈寶院

雷平池

郭干塘在長隱山東數里村名郭干廼郭四

朝真人外解有一塘水常滿鄉人涸之輒有

雷電至今請雨有驗每朝真日異香襲人定

錄君受言四朝往曾使人種植於此地年年

四朝每行皆過詣此山以造思和游看原阜

赤石塘

梅家塘在海眼泉西

陶塘在雷平山西

護軍潭在丁角路傍許長史之外解每自外

還先於此沐浴齋潔方入山其精虔如此

白龜潭在嵎珠山前梁天監中隱居弟子周

子良築靜室朱陽館因積茅覆屋後有殘茅

周往歛積見一白龜長可六七寸許身形皮甲通白如滑石唯背上有一黑文狀如符書不可識捉取玩弄復放之潭去數百步外來此積茅中是表真瑞也詳見周氏玄通記

大羅源在中茅西

桐華源在鶴臺澗上

霞架海在桐華源上

丹砂泓在燕口洞東

陽谷汧太元內傳金陵楊地詳之矣隱居云

陽谷汧源出中茅前大茅後數水相注合為

一汧諸水無註者事見稽古蹟篇

壇石橋亭

九層壇有二其一在乾元觀朱觀妙所築一

為上清宗壇

禮師壇在雷平頂南唐王貞素建

火浣壇在玄洲精舍

八卦臺在茅洞東

仙女臺在疊玉峯

釣魚臺中茅嶺南危石是

鶴臺在金蘭山後

鶴廟頂在中茅西

鳳凰阿在鶴臺前

金星峴在疊玉峯南金沙布地

青玉峽在丁公山東奇石林立即深秀軒故址

址

桐霞磴在碧巖下徐楷大篆石上

陶公醉石在中茅嶺

仙人捧石若有人山阿當大茅西垂也

雲根石在白雲峯下

基盤石在白雲峯上

動石在中茅頂一人可撼多人不能動

降真橋在小茅西句容路三十里

通仙橋直元符宮嶺下崇寧間劉先生建宮

時初

常寧橋在常寧鎮

燕洞石橋橫絕兩崖形如按劍

繡衣亭相傳但云是大司命君受九錫處今

指大茅西嶺上二三大石危立向西南崖下

小平處為故基也

九錫亭在南洞以覆九錫文碑石柱篆刻自

然弟子徐楷敬謁華陽洞天唐宋題名餘皆缺折

碧巖亭在碧巖洞下所存宋相史公浩錄書

榜

欽釜亭在碧巖洞上

繡羽亭在福鄉井上覆井銘碑

朝真亭在華陽西洞門

朝山亭在大茅北垂

半山亭在大茅半嶺

宜春亭在拱辰峪

形霞亭在中茅前

白雲亭在中茅北

西龜亭在柳汧上

迎恩亭在常寧鎮北

常寧鎮在句容縣東南五十里金壇縣西六

十五里宋天聖間朱觀妙請于朝為游人行

估憩息之所

北鎮在玉晨觀西

西園在積金山西平地

鹿墳在山南大路傍事見劉先生傳

茅山志卷之八

上清嗣宗師劉大彬造

稽古篇

天市壇定錄君受言天市壇石之下正當洞天之中央玄窓之上也此石是安息國天市山石所以爲名也玄帝時召四海神使運此磐石於洞天之上耳舊記在積金山頂隱居云天市壇石未知的何處在以醜輪迹而言隱量正應大茅左右又疑洞天中央不應迺近南門復恐中茅間邑人耆老亦不復知處

一曰仙人市壇真誥保命丞趙威伯善嘯如百鳥雜鳴或如風激衆林或如伐鼓之音時登天市壇上奮髯北向長嘯呼風須臾雲翔其上衝氣動林或冥霧歟合零雨其濛矣醜輪迹真誥昔東海青童君曾乘獨醜飛輪之車通按行有洞臺之山隱居云今大茅嶺上向東行有路傍山平治狀如人功足通軌轍相傳此爲醜輪迹夫真人常御九龍左勝名醜右服名歟既履山頂故指乘其左勝美巴路定錄君受言秦時有道士周太賓及

巴陵侯姜叔茂者來住山下種五果并五辛菜叔茂以秦孝王時封侯今名此地爲姜巴者是矣隱居曰今大路從小茅後通延陵即呼爲姜巴路也但秦孝公時未并楚置郡巴陵縣始晉初立不知那有巴陵之封恐是巴蜀之巴也

雷平池在雷平山前真誥周時有雷氏養龍于此定錄君受言今舍前塘迺四朝所造也高其牆岸益水得深但歷代久遠塘墻頽下耳四朝常乘小船游戲其中每叩航而歌歌曰清池帶靈岫長林鬱青葱玄鳥藏幽野晤言出從容鼓楫乘神波稽首希晨風未獲解脫期逍遙兵林中其浪神九垓外研道遂金真哉此靈鳳羽藏我萃龍鱗高舉方寸物萬吹皆垢塵願哀朝生壘孰盡汝車輪其游空落飛醜靈步無形方圓景煥明霞九鳳唱朝陽揮翮扇天津瞻霄卿雲翔遂造太微宇挹此金梨漿逍遙玄垓表不存亦不亡其駕醜儻神霄披霞帶九日高皇齊龍輪遂造

北華室神虎洞瑤林風雲合成一開闔幽冥
戶靈變玄跡滅_其山下居民今猶呼一平澤
地爲郭干者是四朝之姓尚存於民口乎
赤石塘定錄君與許長史三月一日書云今
當墾赤石田爲往來之階而竟不就事也長
史答書云昔占赤石田利近山下爲往來之
階此迺丹誠尋遇天旱佃不收塘壞移尋見
用出此事力未展非爲息懷今方居山下故
當修墾以此去洞口遠故不欲安耳隱居云
此田迺在大茅中茅之西去大山近瞻仰禮
拜迺佳而云去洞口遠當是道去北洞口遠
耳此田雖食澗水旱時微少塘又難立不知
後當遂墾之不今塘尚闕補築當用數百夫
則可既田十許頃隱居館中門人亦於此隨
水播殖常願修復此塘以追遠迹且兼爲百
姓之惠也

卷七

九

有田叔者居雷平山後得道名泉以此
茅君丹井在下泊宮
李真人井玄洲真人李明鍊丹井在鬱岡方
隅洞之東
許長史井在玉晨觀隱居云大明七年有述
墟父老徐偶云先祖伏事許長史相傳識此
宅只在今解前烏柏樹處應是似猶有齋堂
前井存于時草萊蕪沒即爰除尋覓果得碑
井土已欲滿仍掘治更加磨累今有好水色
小白或云似長安鳳門外水味也二口共一
水冬月氣分寒燠一名陰陽井
葛洪井在拖朴山庵稚川丹陽句容人許長
史孫黃氏娶稚川孫女相傳山居其處
陶真人丹井在華陽上館前石橋之東水甘
冷遇旱不竭政和初道士莊慎質修索得之
初去土三尺許得石井欄已破段合之尚全
環刻大字云先生丹陽陶仕齊奉朝請壬申
歲來山棲身高靜自號隱居同來弟子吳郡
陸敬游其次楊王吳戴陳許諸生供奉階宇
湖孰潘邇及遠近宗稟不可具記悠悠歷代

詎勿識焉梁天監三年八月十五日錢唐陳
懋宣書及見碑甃又穿數丈獲一員研徑九
寸許列十一趾滌之朱色粲然又一鵲尾銅
鑪仍見沙石間有丹一粒大如芡實光采射
人亟欲取之隨墮井中鑪研藏華陽經冠攘
亡之又一井在靈寶院周真人池側亦隱居
丹井也

昭真臺真誥翼真檢叙論真經每云還封昭
臺蓋隱居宗修楊許三真上法此爲藏經之
室山中久經盜竄寶書真蹟散逸無餘雖有
志學之士何田復見真人手澤至此慨歎而
已玉晨觀靈寶院即其地

卷十

十

青壇素塔按舊館壇碑東位青壇西表素塔
今塔已廢壇亦非舊初皆隱居所建表兩教
雙修之義當在玉晨觀

昭明太子福鄉井在南洞讀書臺東

昭明太子讀書臺在福鄉井上

明皇受錄壇在玉柱洞側

越翳王塚在大橫山下定錄君受言鬱岡山
正東面有古時越翳王塚隱居云越翳王是

勾踐四世孫初不肯立逃入胥山穴國人燹
出之後於吳徙還會稽以周宣王十一年為
孫諸咎所殺不知那得遠來葬此或當有神
異處也今尋視未見指的墳塚而如有兆域
處者又按至德遜王吳太伯初逃句曲山中
足知茲山為聖賢棲託自古然矣

隱居幽館在雷平山西南宋元祐初中貴人
羅淳一學道山中嘗意隱居之藏有丹砂異
書一日穴墓往觀焉唯鐵繩縣一空棺內有
一劍并孟鏡各一而已其墳甃甃環繞相次
成文隱起甃上其文曰華陽隱居幽館勝力
菩薩捨身釋迦佛陀弟子太上道君之臣修
上乘之六度 之三真懋靈嶽以委迹
游太空以棲神書蹟神妙當是隱居手書墓
既開道士輩遂摹此符文以示世人淳一後
亦得尸解之道元祐六年長樂林希子中所
傳如此

隱居鍊丹爐迹在華陽上館其地以水異試
之遂巡地乾如月暈然
王法主墓在常寧鎮北路東唐太平觀華表

在

桐栢先生墓在隱居幽館之右

玄靜先生墓在伏龍岡西南去雷平池二十
步

韋宗師墓在玄靜先生壽宮之左

茅山志卷之八

茅山志卷之九

龍八

上清嗣宗師劉大彬造

道山冊

道德經五千文

按登真隱訣隱居云老子道德經有玄師
揚真人手書張鎮南古本鎮南即漢天師
第三代系師魯魏武表為鎮南將軍者也
其所謂為五千文者有五千字也數系師
內經有四千九百九十九字由來闕一是
作三十篇應作州轄蓋從省易文耳非
正體矣宗門真蹟不存今傳五千文為正
本上下二篇不分章

上清大洞寶經篇目

上清大洞高上三十九章經

上清金真玉光經

上清八素真經

上清九真中經

上清金根玉經

上清躡行七元經

上清七十四方經

上清三天正法經
上清黃炁陽精經
上清青童內文經
上清金闕靈書經
上清紫度炎光經
上清三九素語經
上清三元玉檢經
上清石精金光經
上清丹景上道經
上清神州經
○
上清三圖經
上清九赤班符經
上清消魔智慧經
上清曲素訣辭經
上清白羽黑翮經
上清素奏升符經
上清金璫玉珮經
上清龜山元籙經
上清玄紀九霄經
上清四十四方經

上清太霄琅書經
上清石景水母經
上清太微黃書經
上清豁落七元經
上清洞玄大有經
上清金虎真符經
上清神虎真符經
上清神慧高玄經
上清丹章綠字經
上清五晨金華經
○
上清高上曲素經
上清帝君九陰經
上清步虛玉章經
上清金玄羽章經
上清黃書高上經
上清太上九晨經
上清玉景太元經
上清玉景金書經
上清紫精洞房經
上清元始鳳文經

上清五帝鬱冥經
上清素靈童丹經
上清三五元籙經
上清太上龍蹻經
上清法誠玉章經
上清金母求仙經
上清三元浩篇經
上清太陽七精經
上清四極明科經
上清五老真文經
○
上清日月精華經
上清赤書玉訣經
上清洞景金元經
上清靈素上篇經
上清大乘妙林經
上清金房度命經
上清太丹洞房經
上清黃老迴元經
上清高元真法經
上清高上五老經

上清朝禮上仙經
上清玉晨五老經
上清解胞胎上經
上清鎮五臟上經
上清太帝大有經
上清太真求仙經
上清大洞守一經
上清三洞混化經
上清四真內神經
上清六陰洞微經
上清元始歷化經
上清九丹上化經
上清洞神經
上清步罡經
上清道君玉註經
上清太上始青經
上清智慧消魔經
上清太微金簡經
上清三天正法經
上清太上迴元經

上清無上真藏經
上清八素大丹經
上清黃庭二景經
上清黃庭養神經
上清玉京山妙經
上清太極秘要經
上清道君守三元真一經
上清道君守丹元上經
上清金闕守三元真一經
上清真人守三元真一經
上清太極錄景經
上清青芽始生經
上清大洞寶錄篇目
上清二十四高真玉錄
上清曲素訣辭錄
上清羽章錄
上清洞真錄
上清元始譜錄
上清上元錄
上清中元錄

上清下元錄
上清玉檢錄
上清神虎真符錄
上清金虎真符錄
上清素奏丹符錄
上清瓊宮秘符錄
上清內思上法錄
上清五帝錄
上清三天正法錄
上清黃書八素錄
上清八景晨圖錄
上清洞真八景錄
上清龜山元錄
上清龜山元命大錄
上清龜山真符錄
上清洞真八威錄
上清召龍錄
上清攝山精圖錄
上清七元上符錄
上清太玄錄

上清流金火鈴錄

上清回車畢道錄

上清回風合景錄

上清三錄蓬萊版札高上真書

上清大洞寶錄請法詞

衆真所著經論篇目

元始天王紀

上清高聖太上玉晨大道君紀

太微天帝君紀

三天列紀

青童道君紀

總真主錄紀

清虛真人玉君內傳弟子南嶽魏夫人撰

太元真人茅君內傳弟子中候仙人李導字安林撰

魏夫人傳

楊真人傳

許真人傳

仙人許遠游傳李遵撰

蓬萊都水監陶真人內傳薛華撰

華陽隱居陶先生本起錄從子羽撰

陶先生小傳吳興謝澹永明十年撰

梁茅山貞白先生傳唐李渤撰

周真人傳周隱居撰

玉晨觀石本加句天童經宋大觀三年道者梁悟真受

崇壽觀註本清靜經宋宣和進士常州戴叔獻註

學苑一百卷以下隱居在世所著書

孝經論語集註并自立意十二卷

三禮序并自註共一卷

註尚書手詩序一卷

老子內外集註并自立意四卷

抱朴子註二十卷

三國志讚述一卷

世語闕字二卷

續世說二卷

卜筮要畧一卷

古今州郡記三卷

竿數藝術雜事一卷

登真隱訣二十四卷以下隱居在山所著書

真誥十卷

草堂法師傳一卷

本草集註七卷

藥總訣二卷

肘後百一方三卷

効驗施用方十卷

合丹節度四卷

夢記一卷

鍊化雜術一卷

太清玉石丹藥集要三卷

太清諸草木方集要三卷

服雲母諸石方一卷

服餌方三卷

靈奇秘奧一卷

消除三尸諸要法一卷

隱居集一卷昭臺弟子傳齊編江總序

陶先生文集三十卷

陶先生內集十五卷

周氏玄通記四卷隱居集進弟子周子良咸降事

易總十五卷王法主撰

修真秘旨十二篇以下司馬真人所著書

坐忘論一卷

天隱子八篇

周易義畧三篇

以下玄靜山生所著書

老莊學記三篇

內學記二篇

本草音義二卷

三玄異同論

道學傳二十卷

道覺論

隱士馬

右道山冊一卷古文真經相傳品目如上
雜著等書來之隋唐經籍志悉無存本

鄭樵通志藝文畧茅山道書目

道德經雜說一卷

靈寶經目序一卷

服御五芽導引元精經一卷

昇元步虛章一卷

靈寶步虛辭一卷

步虛洞章一卷

已上陸簡寂真人所撰

道德經註四卷

黃庭集訣一卷

上清握中訣三卷

導引圖一卷

金丹訣三卷

鍊服雲母法一卷

太清諸石變化神仙方一卷

經食草木法一卷

達靈經一卷

養性延命集二卷

養生訣一卷

真人水鑑十卷

周易林一卷

易林體三卷

易髓三卷

天儀說要一卷

星經五卷

三命立成算經一卷

三命鈔畧二卷

三命殺曆一卷

名醫別錄三卷

古今刀劍錄一卷

已上陶貞白真人所撰

修真秘旨事目歷一卷

修真養氣訣一卷

靈寶五嶽名山朝儀經一卷

已上同馬真人所撰

金藏經二卷

茅君撰

授茅君歌一卷

晉太康時人蘇元明撰

紫虛元君魏夫人內傳

宗撰

仙人許遠游傳

王羲之撰

潘尊師傳

唐武后時人撰

瞿童述一卷

溫造撰大曆八年昇仙

三茅處士王潛傳一卷

無名氏撰

茅山記一卷

茅山新小記一卷

並無名氏撰

茅山志卷之九

龍八

茅山志卷之十

龍九

上清嗣宗師劉大彬造

上清品

上清經錄聖師七傳真系之譜

元始虛皇天尊。太上玉晨大道君。

上相青童道君。

後聖玄元上道君。

小有清虛道君。

上清道祖大洞至尊元始天王上皇。

天帝紫霞虛皇天尊。

元始天王迺玉清元始天中之尊黃庭經云上清紫霞虛皇尊玉緯經云虛皇者大道之所理即大道之域包羅三清道之祖也元天生神章稱大洞尊神是也。

聖師高聖太上玉晨元皇大道君。

玉晨大道君居協晨靈觀陵層之臺治藥珠日闕館七暎紫房左帶神虎右佩金真龍冠鳳裾羽褐錦帔侍衛天真玉童玉女各三萬

人所謂太上者道之子孫審道之本洞道之根是以上清道君為老君之師萬道之主有傳紀名八素上經又曰太上隱書金真玉光豁落七元八景飛經黃庭經所稱太上玉晨大道君正太上之尊也。

聖師紫宸太微天帝大道君。

太微天帝為三十六天帝之主治太微紫宸玉闕之內受以金闕帝君日中五帝字曰日竟珠景昭韜綠暎迴霞赤童玄夷飈象凡十六字此是採服飛根之道一名赤丹金精石景水母玉胞之經。

聖師金闕帝宸後聖玄元上道君。

玄元上道君地皇之胄居瓊臺之殿侍女從官三萬人上升上清中游太極下治十天乘三素飛輿陰察鬱絕洞臺諸天河海翔躬小有解駕龜山以校試衆仙隨才授職五年一下游一年一朝上清有傳紀名靈書紫文一曰五老寶經今三天列紀是也。

聖師上清九微太真玉保王金闕上。

相大司命高晨師東海玉明青華小。

童大道君。

青童大君一號青蓋紫童一號斗中真人治東海大方諸宮東華山丹闕黃房之內乘碧霞流景雲輿帶飛青翠羽龍帔從桑林千真受消子三元真一經受太虛赤真人消魔經以晉代降魏夫人家嘗以三月十八日十二月二日與茅司命同至句曲推校學者有傳紀名玉保洞觀經一曰雲林上玄品。

聖師金闕上宰西極西城總真道君。

總真大君姓王諱遠字方平益州西城山即西極總真之府領仙官五千人治其所茅司命之師也嘗降蔡經家會麻姑漢安元年壬午從老君降鶴鳴山受天師張道陵經符千卷降陽洛山受清虛真人清虛上經三十三卷晉代復降陽洛受道於魏夫人及受楊許三真經法歲以二日同茅司命游華陽推校學真男女當為真人者成都枯蒼崑崙皆為總真仙府王君總司太平下教二十四真人是為三洞教主。

聖師小有天王太素清虛道君。

清虛真人姓王諱衷字子登范陽襄平人也安國侯七世孫以漢元帝建昭三年九月二十七日誕焉父謚文侯母夫人司馬遷之孫真人學道華陰山感太極真人降授上法總真大君授上經三十一卷遂爲盟傳之師共載詣玄洲請書真名復還西城又詣太素三元君受流金豁落七元八景飛晨神策玉璽太上遺賜繡羽晨蓋雙珠月明素羽瓊干丹紋錦旌又遣齋成命之書位爲太素清虛真人領小有天王三元四司左保上公治王屋山給玉童玉女三百人主領寶經乘虎旂龍輦金蓋瓊輪八景飛輿伏九色之節出入上清受事太素宴寢太極也上清經錄至是上天七傳而降世矣

嗣上清第一代太師

上清道主南極紫真後聖上保太微王晨聖后領南嶽上真司命高元神照紫虛至道元君姓魏諱華存字賢安任城人晉司徒舒之之女魏齊王嘉平三年辛未歲生天才卓異玄標挺拔少讀老莊書服胡麻散茯苓九常

欲閒居別處年二十四父母強適南陽劉又幼彥生二子璞遐幼彥爲汝郡修武縣令子息粗立廼齋居別室反修初服以太康九年戊申歲十二月十六日夜半感太極真人青童道君搏桑賜谷王景林真人清虛真人來降謂元君曰聞子密緯真氣太帝君勅我授子神真之道遂出太上寶文八素隱書大洞真經高仙羽玄等書三十一卷手授元君曰此書音授之西城總真君今以付子且語以存思指歸行事口訣廼去元君時年三十七後幼彥沒長子璞爲齊司空司馬次子遐爲陶太尉從事中郎安城太守元君在世八十年咸和九年甲午清虛青童君再降與靈藥兩劑使頓服之剋期會陽洛宮七日夜半太乙遣飈車來迎元君用藏景之道託形神歛而化往陽洛山明日青童君太極四真人清虛王君凡四十七真人降教元君於隱洞雲臺衆真各標至訓三日而去元君研誦玉書積十六年顏如少女於是西王母南極元君來迎升晨詣

上清宮玉闕王晨大道君太微天帝金闕後聖君各令使者致命授以玉札金文位爲紫虛元君領南嶽上真司命秩比仙公使治天台太霍山洞臺之中主下教學仙者且宴會于清虛之宮次司命神仙請隸屬南嶽迎官並至諸真廼與元君俱詣天台霍山洞臺便道過句曲金壇茅叔申宴會二日二夕廼共適霍山矣璞後仕至侍中蒙使傳法于司徒瑯琊王舍人楊君以興寧三年乙丑六月二十三日元君與衆真降楊君家自是屢降句曲多從青童清虛三茅君游真受非一華陽之傳始此宋元祐進封高元神照紫虛至道元君大元泰定國子司業虞集撰四十五宗師贊其贊曰

仰瞻紫虛巍乎祝融飛霞成章流響振空

日朗月輝玉質金容上承諸天啓我仙宗

嗣上清第二代玄師

上清真人金闕上保檢仙司命東華道君洞靈顯化至德真君姓楊諱義字義和本吳郡人徙家句容晉咸和五年庚寅歲九月生幼

而通靈義姿容善言笑工書畫與王右軍並名海內許先生邁長史穆年並懸殊而早結神明之交簡文帝為瑯琊王進位丞相用長史薦為公府舍人及帝即位廼不求遷叙高蹈遺榮精思致感永和五年受中黃子制虎豹法六年從魏夫人長子劉璞傳靈寶五符時年二十一興寧三年六月感紫虛元君紫微夫人九華真妃降于家講授要道自是清虛清靈凡四十七真人數來降或降長史山廨所傳經誥多轉使錄示許君父子至是遂為許君傳經之師九華安妃應運為靈嘗告之曰明君夷質虛閒秘構玉朗蘭淵高流清響金宮所謂珍寶藏奇幽真內煥必三事大夫侍晨帝躬高佐四輔承制聖君理生斷死賞罰鬼神攝命千靈封山召雲察陰陽之氣為吳越司命之君將乘龍駕雲白日升天君若不耐風火之煙欲抱真形於幽林者且可尋劍解之道作告終之術乎西城王君又教服日月之華法簡文帝從而師之以太元十一年丙戌歲解駕年五十七贊曰

夷質虛閒靈傳感玄金宮流韻玉樹浮煙衆真會言太帝錫召手傳道書筆跡墨妙

嗣上清第三代真師

上清仙侯金闕侍晨左卿司命太元廣德至仁真君姓許諱穆字思玄一名謚汝南平輿人六世祖光徙居丹陽以晉惠帝永興二年乙丑歲生起家太學博士出為餘姚令後徵為尚書郎遷郡中正護軍長史給事中散騎常侍外混世業內修真學嘗慕兄遠游之高軌值簡文晏駕專靜山廬與楊君深結神明之契興寧中衆真降楊備傳經誥定錄中君尤多示訓太元元年解化年七十二子姪禮寔虛樞於縣西大墓真誥云君挺命所基緣業已久廼周武王九宮上相長里薛公之弟兼許肇遺功復應垂祉後胤故乘運託生因資成道玉札所授為上清真人爵登侯伯位編卿司理仙撫治佐聖牧民矣贊曰

晨混化元一真人仙侯第三子也諱翺字道翔小字玉斧清穎瑩潔特絕世倫生晉咸康七年辛丑歲正月郡舉上計掾主簿祖司徒府辟掾並不赴立宅雷平山前密修上道興寧三年七月紫微夫人降教自是與衆真酬接書疏備修迴元飛步二景儀璘之法嘗願早游洞室不欲久停人世以太和五年庚午歲詣北洞告終時年三十耆舊相傳云掾在北洞石壇上燒香禮拜因伏而不起明旦視形如生保命君受言許子遂能委形冥化從張鎮南之夜解鎮南即天師第三代系師曾也自此居方隅洞館常去來四平方臺真誥云後十六年當度東華受書為上清仙公掾妻建康令黃演女名敬儀生子黃民廼遣還家黃民字玄文年十七仕至司農丞元興三年避京畿亂廼奉遺經入剡中矣贊曰

紫微受書追奔兩儀人間如帝久留何為委形虛壇合莫太始遺經不忘保之有子五代宗師上清仙卿保真先生姓馬諱朗一名溫公字子明浙東剡縣東關人家素饒財

履信行義為鄉里所宗聞茅山楊許得道威傳南真上清經法以其居接金庭天台咫尺仙府彌加崇慕元興三年許丞黃民載經避亂君躬迎道左延止其家禮敬供養元嘉六年許丞還錢唐封其先世真經一榻子留君靜室之中且云此經並是仙靈之蹟唯須我自來取縱有書疏慎勿與之唯分十數卷自隨至錢唐感疾慮不即瘥遣人取經君既得書堅執先旨謂親受教勅豈敢輕付遂不還經許亦旋沒君同第罕敬事經實有過君父恒使有心奴子二人一名白首一名平頭侍直香火灑掃拂拭每有神光靈氣見於室宇君妻頗能通見云數有青衣玉女空中去來狀如飛鳥君家遂益富盛資產鉅萬累世壽考而終贊曰

天不愛道地不愛寶而彼渺薄豈之能保羣真手遺玉珮金璫知之者希見之者昌六代宗師上清仙卿輔正先生諱罕字子言保真之堂弟也同兄敬奉經寶居士妻惠明者先以在刻意甚貪樂經法而扁錫嚴固觀

覽無方景和元年迺出都令嘉興父秀真啓宋主勅就馬家取經比經至都父呈景和於華林暫開勅以付後堂道士即陸先生靈驗記曰二馬有保經之功沒世之日上帝命靈官持玉版召入金庭洞天俱授仙卿之任贊曰

維昔茅君兄升弟及繼茲令蹤共保靈笈王書所在萬神衛持道以時興匪人得私七代宗師上清監仙大夫九天掌籍宋國師謚簡寂先生丹元真人姓陸諱修靜字元寂吳興東遷人父琳九徵不起謚高道處士真人。○人聽有重輪足有雙蹀掌有大字背有斗文篤好文籍旁究象緯及長好方外游南詣衡湘九疑訪南真之遺蹟西至峨眉西城尋清虛之高躅宋元嘉末因市藥京邑文帝召不往迺友陶淵明僧慧遠於廬山明帝泰始三年詔江州刺史王景宗禮聘來朝勅住後堂真人不樂迺授館于外又勅會于華林延賢之館王公畢集真人鹿巾謁帝而升帝肅然加敬遂以父季真取到上清經法勅付真人總括三洞為世宗師仍勅北郊天印山立崇

虛館建傳經宗壇教法大備矣明年帝疾即其館修金籙一夕有黃氣如寶蓋狀彌覆壇宇帝復感異於夢疾迺有瘳所著齋法儀範百餘卷元徽五年正月忽若趣裝將還舊山弟子皆訝之迺三月二日儵然解化時廬山諸徒屬共見霓旌藹然下臨靜室聞空中有言曰上清監仙大夫降俄而勅送冠履還山詔所居為簡寂觀贊曰

緬游靈嶽結友匡廬采秀黃華濯清素藥手握奇文足履輪輻蕭館虛林想見遺躅。○八代宗師紫微仙卿興世明德先生姓孫諱游嶽字穎達東陽人性稟淵淳博學經傳拜簡寂於仙都山教服教精尤居仙都四十七年不與世接後來茅山簡寂見而喜曰遲君來吾高枕廬山矣授以楊許真法未幾簡寂化詔先生主興世館為嗣宗師一時名士沈約陸景真陳寶識等咸學焉弟子百餘人先生嘗夢茅君曰青華小童復降句曲汝弟子中善護持之永明間陶弘景入山先生異其丰神超邁且聞身有斗文因省所夢曰青華

小童豈非斗中真人耶即盡受其法累表乞還山詔不允永明七年五月十五日沐浴還神年九十一贊曰

百穀之精結英中庭人以腹實我以虛寧金真玉光神文在世青童復來吾得攸寄

九代宗師金闕右卿司命蓬萊都水監梁國師中散大夫謚貞白先生宗元翊教真人姓陶諱弘景字通明吳荆牧濬七世孫丹陽秣陵人也生宋孝建三年丙申四月三十日甲戌十歲見淮南八公事便嗜養生之說既冠而不肯婚以資營未立薄游下位仕齊歷諸王侍讀年二十餘從興世館孫先生咨稟經法茅山獲前真楊許手書於是啓假東游詣婁惠明於大洪山遇杜京產於太平山尋鍾義山於朶山謁朱僧標於天台又獲真人手蹟十餘卷還都以振武將軍除奉朝請永明十一年廼拜表辭職時年三十七遂來山自稱華陽隱居嶺西立華陽三館上館建層樓身居其上弟子居中樓賓於下梁武即位彌加欽重時人謂爲山中宰相天監四年出居

嶺東有事于鑪燹七年以爲林巖溪近復思遠游廼改名氏曰王整官稱外兵夜半出山至永嘉楠江青嶂山夢佛受記名勝力菩薩住大若巖修所著真誥復泛海詣霍山經年還木溜嶼武帝有勅迎還舊山因詣鄞縣禮阿育王塔自誓受五大攝戒既歸入住東澗明年冬徙朱陽館又移鬱岡齋室先生山世所著書二百餘卷弟子受經法者三千餘人大同二年三月十二日作告逝篇示桓法閻等即日尸解年八十一屋中香氣積日不散勅遣舍人主書監護喪事十四日窆虛樞于雷平山先生神儀明秀盼睐有光形細長項耳間矯矯顯然異衆矣嘗言心中恒如明鏡觸形遇物不覺滯礙紫陽王君曰陶公久入下仙之上廼范幼沖等也趙丞曰蓬萊都水監高光坐治水事被責以陶代之既且停召當更選耳按此廼乙未年中事見周氏玄通記後二十一年先生始去世仙位當更升也贊曰

高卧白雲晨飡絳霞弟子如林著書滿家

灌神九清騰耀三景與天爲徒如日之炯十代宗師上清少室仙伯唐國師金紫光祿大夫謚昇玄先生姓王諱遠知字德廣瑯琊臨沂人父曇選陳揚州刺史母丁夢鳳鳥集其身僧寶誌謂其父曰生子當爲神仙宗伯以梁大通二年生弱冠師宗道先生咸祿進而宗修隱居經法陳主召入重陽殿特加禮敬送歸茅山居于洞西北嶺隋晉王廣鎮揚州具禮迎請既至忽鬚髮變白王懼而歸之大業七年煬帝幸涿郡召見臨朔宮扈駕洛陽奉勅詣中嶽修齋復詔京師建玉清玄壇以處之唐高祖龍潛時先生密告以符命武德中太宗爲秦王平王世充因與房玄齡微服謁先生先生迎謂曰此中有聖人秦王廼審其實先生曰方作太平天子願自愛已而請還山貞觀九年勅建太平觀賜田度道士七十七人爲侍者八月十四日適因睡寤喜形於色謂弟子曰吾向暫游洞宮仙官見報欲以疲朽補仙伯名位已定行在不久十六日沐浴入室焚香顧問侍者日時早晚對曰辰

茅山志卷之十

時曰好即正衣冠就寢而化年一百二十有六高宗調露二年贈太中大夫謚昇真先生天后嗣聖加贈前號時稱玉法主云贊曰翩翩鳳儀覽德不遲或隱或來景運有期質化神通不滯玄白百廿六歲唐仙宗伯

龍九

十三

茅山志卷之十

龍十

上清嗣宗師劉大彬造

上清品

十一代宗師上清檢校仙公唐國師太中大夫謚體玄先生姓潘諱師正字子真貝州宗城人父寘隋通州刺史母魯氏善言名理口授以道德經母卒廬墓以孝聞大業中有道士劉愛道者見而奇之曰三清之驥非爾誰乘之時王法主爲煬帝所尊禮每入禁中躬薦松水以祈福愛道曰吾甚欲子相從然成就功道非法主不可由是師事法主同還茅山一日謂先生曰嵩陽迺修真之地當亟往無疑先生遂入雙泉中嶺間居十許年復深入逍遙谷避與世絕上元三年高宗幸東都禮嵩嶽召見先生請作符書辭不解又問山中所須答曰茂松清泉臣之所須此中不乏帝異之調露初再祀高帝廼幸逍遙谷見薛荔繩床將朽敗餘無火粒之具唯兩瓢貯青飢飯耳因即其地勅建崇唐觀明年春又以步輦致先生於洛城西宮仍勅改嵩陽觀

爲奉天宮每手詔具弟子姓名皆白自是乘輿屢陟山阿帝在洛陽復召對及請還御製詩以送先生嘗謂弟子曰吾實無用接見帝王驚擾靈嶽汝等學道不厭深眇則無累矣永淳元年六月十四日索沐浴書青符置湯中曰終身淨也時造石室於北巖下將成十六日遽云去去弟子韓文禮問何去曰泰山檢校功德語畢雲氣覆庭須臾解蛻年九十八天后降制若曰去年冬晚軒皇之駕不追今歲秋初廣成之居又寂聖曆二年立碑嵩山贊曰

絕世之資皆思友之仙緣有定敢廢以私茂松清泉亦復何須冥心合真樂出太虛十二代宗師上清玄初仙公唐國師銀青光祿大夫謚貞一先生姓司馬諱承禎一名子微字道隱世居溫晉彭城王權之後襄滑二州長史仁最之子生而能言天錫神表年二十師體玄於嵩陽受金根上經三洞隱書嘗有鳥如鳳凰下集香几爪痕著几成書文曰東華上清真人由是益神其行玄宗異之遣

使徵聘勅王屋山置陽臺觀以居一日感天帝召遂來山禮謁華陽洞天因撰貞白碑陰記師以王屋小有之天總真之府景氣幽歛神祇會昌吾道苟行奚足不可翻飛投足有終焉之志復於觀之朝維高丘之午窮極絕

界得中巖臺上直天壇下繚長阜巨木圓抱鳴溪中流每養龍大谷相鶴中峯燎金洞之衆香吸石窓之鮮氣有日矣著坐忘論及撰修真秘旨十二篇為隱居真訣之副師且慮帝恩深久遂徙居天台玉霄峯以期冲舉又

勅建桐栢觀其地請師五體書道德經開元乙亥歲六月十八日忽謂近侍曰吾已受職玄都不復得住廼部署封檢若將遠適追暮有赤雲繚繞摩地而來雲上簫聲泠然衆咸駭異謂必上升遽展戶而已蛇形矣玄宗御製碑在桐栢頂龍十贊曰

至神合虛應物無迹強名坐忘銷爾塵質

高風華林旭日丹臺蓬海無師歸求天台

十三代宗師上清真人唐國師正議大夫玄靜先生姓李諱含光廣陵江都人本姓弘避

則天諱易馬家世業儒父孝威號貞隱先生精黃老之術神龍初師以清行度為道士居龍興觀開元十七年從司馬先生於王屋山一見目之曰真玉清之客也居嵩陽二十餘年司馬僊游玄宗召詣闕與語歎曰吾見含

光知司馬真人猶然在世一日問及金鼎對曰道德公也輕舉公中之私耳若忽道德而求生徇欲則似繫風玄宗深感異之詔居陽臺觀歲餘稱疾乞還句曲纂修經法天寶四年十二月命中使齋璽書徵之既至館於禁

中每欲咨稟必先齋沐請傳道法辭以疾不能強而止再求還山廼特勅楊許故宅紫陽觀以居之御製詩餞別又禁山中採捕漁獵食葷血者不得入時經誥真蹟已多散逸師奉詔搜訪備得寶書進上之又詔山人王旼

請師楷書上經十三紙以補遺闕七年三月十八日玄宗受三洞經錄于大同殿遙禮度師賜號玄靜先生法衣一襲以伸師資之禮詔刻石華陽洞宮以志之繼兩徵詣闕旋皆請老而還為國修齋數感甘露靈芝之瑞大

曆四年己酉十一月十四日解蛻于紫陽之別院年八十有七以左玄大夫贈正議大夫贊曰

公私之辯至道名言徒說弗從頻煩主恩上經十三妙補遺闕龍十參著刻銘無愧稱絕

十四代宗師上清仙伯大洞貞元先生姓韋諱景昭丹陽延陵人吳司空慎十六代孫精究儒術而不肯取科名獨慕神仙之學初度于延陵之尋真觀師事包士禁士禁師崇玄觀包法整法整師包方廣方廣師王執軌之

師昇真王法主也惟習靈寶經法後居長安肅明觀至天寶中奉詔侍玄靜先生歸茅山勅建紫陽觀居焉大曆初受玄靜經錄正傳肅代以來天下喪亂師獨以道為己任貞元元年十一月癸卯召門弟子曰吾昨見仙官

持勅書召任上清仙伯不復住世矣來何為喜去何為悲汝等體之毋或哀泣時年九十而化贊曰

神馮虛生至靈為寶世塵紛揚獨靜以保時成返空我知其歸來無所欣去無所悲

十五代宗師洞真先生姓黃諱洞元南嶽人早游華陽與玄靜先生為師友嘗受行中黃服日之法後入武陵住桃源觀有瞿童子名栢庭自辰溪來師事甚謹一日獨游歸語師曰桃源中有水洞花木紛繁洞室周繚澗中

多五色石童子得一石狀如龜引之首尾俱

動師藏經笈中旬餘失所在異日約俱往水

溢溪洞迷不知處大曆八年癸丑夏五月晦

童子辭師曰後當於句曲相見明年師徙居

廬山紫霄峯凡十載復來山住下泊宮日誦

大洞經嗣章宗師之學又八載瞿童子者至

師適曳杖有出栢庭亦不留及歸聞姓名大

駭遂易服焚香望空拜伏久之凝立而化舉

體唯空衣耳德宗嘆異贈先生號壽九十五

贊曰

瞻日得道其知甚真栢庭之來桃源始春

石龜五色首動尾應忽然亡之妙極玄微

十六代宗師明玄先生姓孫諱智清不知何

許人在繼祿時畏聞腥羶及解事唯進以酒

辭家入山師洞真先生大和六年為山門威

儀七年奏請重禁採捕四時祭祀咸絕牲牢奉勅書立石紫陽觀李衛公尊師之嘗有詩贈武宗會昌元年召修生神齋勅建九層寶壇行道因賜號焉解化時衆見風雨中有大魚金鱗玉鬚師乘之凌大峯而上未詳歲月

贊曰

食味養形食氣養神鼎俎傷生忍而害仁

我貴食母無假于外瞻儀有感豈識其會

十七代宗師唐國師希微先生姓吳諱法通

潤州丹陽人有文學試舉子業不利來山明

玄先生度為道士盡授經法踰年明玄化形

風雨中師大悟解僖宗乾符二年遣使受大

洞籙遂尊稱為度師賜先生號天祐四載年

八十三預知世行有變潛入巖洞不知所往

贊曰

世之將危智者去之而彼真人慨然興悲

深處巖洞流潤千里動植遂生風雨時至

十八代宗師洞微元靜先生姓劉諱得常金

陵人十七歲作大道歌見吳宗師觀其氣骨

飄然出塵曰賢者能飲茅山泉一月當十倍

今日聰明一年特生光慧十年開仙道矣師迺作冷泉吟又曰吾有玉經妙旨子若歛華歸實可以混合天人離情理識由是再拜執弟子禮得其道居紫陽觀二十年不踰戶闕華姥山一夕有童子歌曰靈蘭長金刀響山中人數聞之慮有兵是年歲產黃芝經月枯

悴師亦解真贊曰

龍章鳳書可制劫運藏之貴虛保之貴定

全體皆用誰執其方欲窮所之弟子亡羊

十九代宗師貞素先生姓王諱棲霞一名敬

真字玄隱生於齊而長於魯七歲神童及第

而仙才靈氣稟於自然天祐丁卯歲避亂南

渡至于壽春從問政聶先生傳道法及來華

陽又從威儀鄧君啓遐受大洞經訣南唐烈

祖方在賓門寔來作鎮召師至金陵館於玄

真觀聖曆中興恩禮殊重加金印紫綬號玄

博大師表請還山詔不允又加貞素先生號

復贈洞微元靜之稱保大元年壬子歲夏四

月甲寅隱化于玄真春秋六十有二時錢二

十萬奉冠劍歸葬雷平山徐鉉撰碑贊曰

旭日未升衆星燦如江南之都依我仙墟
金印紫綬於我何有彼以爲貴來斯順受

二十代宗師紫陽沖虛先生姓成諱延昭字
懷玉潤州金壇人氣稟純素不染世塵初詣
紫陽觀王先生伏節爲弟子宋開寶八年平

江南後刑部郎中知昇州楊克讓請師爲茅
山威儀兼昇州道正未幾辭還紫陽舊居門
人受學甚衆淳化元年四月十四日無疾從
容觀化年七十九贊曰

域中之大唯王與道我以虛神彼以位寶

華陽之傳其書孔多以佐時功陰陽大和

二十一代宗師洞虛先生姓蔣諱元吉字吉

甫號碧虛子常州義興人祖麟父器之貨藥

不二價爲鄉里醇儒先生手標絕塵厭事生

產作業讀書尤長於詩常白日致鶴飄飄有

霄舉之氣從沖虛先生應詔居京師久之同

還紫陽極論上清之學曰三洞玉書非子不

足付度師曰度文不度訣吾無望於師焉沖

虛曰度人不度文吾所望者子耳師既受度

人曰蔣氏世德之報哉奉揚大教屢有禎祥

咸平改元三月以經錄授弟子萬保冲十五
日仙去贊曰

朝游寶林暮宿玉池微銓所徵籙生涼颺
玄圃之英濯濯其羽我翔太清假爾飛舞
二十二代宗師冲素先生姓萬諱保冲字用

玄常州武進人幼失怙恃兄氏教撫之及長
議析業師曰吾無兄無有今日先人分業非
所願得寄迹黃冠足矣遂詣騰仙觀出家後
來禮洞虛壇下咸平元年始傳上道專善採
服日霞之法至九十二解脫顏貌如童景德

間奉詔請禱大應聖書賜號退隱黑虎谷中
贊曰

赫陽吐芒赤水騰光引以神鼎灌以靈漿

千日道成潛躍自在盤桓玉童縞衣玄帶

二十三代宗師宋國師觀妙先生姓朱諱自

英字隱芝句曲朱陽里人生於太平興國元

年八九歲從牧兒郭十村能吹笛致鶴父母

以爲不祥棄之迺從朱元吉著道士服時年

十二端拱之初也繼與明真張鍊師居積金

山頂試辟穀術人稍趨之遂思遠游至襄陽

遇異人陳鐵脚扶往青城山復過瀨鄉校僻

太清宮古藏經遇水星童子武抱一游河中

府行止神變景德元年嗣教年二十九四年

真宗遣使祈胤明年仁宗生事具宋史奉旨

住持至清昭應宮山中勅建乾元天聖兩觀

賜號國師明肅太后傳大洞畢法復賜號觀

妙先生還山得武抱一蜀中所寄書意警責

姓名顯耀暴露天機先生對之泣數行下第

子莫測也天聖七年十一月坐化手執祥符

所賜玉如意流汗浹體額有凝珠尸解之上

法者世壽五十又三贊曰

赤子童真宿智冥得淩虛有音履水無迹

有道之朝煖如中春執玉振金爲時外臣

二十四代宗師通真明元先生姓毛諱奉柔

建康句容人嘗侍父入茅山天市壇遇黑虎

父終無所見先生追視之虎拜其前觀妙宗

師聞而異之謂其父曰華陽之道在君之子

矣遂留山中師事觀妙謹朴忠厚有長者風

結廬積金山慕隱居道靖之地居焉苦志在

於輕舉嘉祐八年十二月大雪中庵前木庫

驟花先生心異之少頃有道士劉混康者自常州泰和觀來先生感其誠懇且嘉瑞應一時授以經法未幾解化崇寧元年贈先生號贊曰

積金之陰其神孔威潛靈感符啓我仙扉

兩扉闔開神生懸景丹光在林人識餘鼎二十五代宗師葆真觀妙冲和先生太中大夫謚靜一姓劉諱混康字混康一字志通晉陵人景祐二年乙亥十二月二日生十三歲從泰和觀湯含象嘉祐五年試經爲道士一夕夢神人告曰汝欲學仙當擇名山嘗患世無良師每靜夜登壇散髮焚香以天爲宗已而聞華陽毛宗師有道德性依馬庵居積金山常有五色雲霧結爲樓殿人異之一日有三羽士造其廬指庵之東隅謂師曰汝即此居抱神守中德惠及人當無愧前人又顧師眉間曰此無作之地道之所尚不可有疵手爲捫之明日癰滅元祐元年哲宗后孟氏悞吞針猴中醫莫能出有司以高道聞召見師進服符嘔出針刺符上宮中神其事賜號洞

元通妙法師住持上清儲祥宮紹聖四年初江寧府即所居潛神庵爲元符觀別勅江寧府句容縣三茅山經籙宗壇與信州龍虎山臨江軍閭阜山三山鼎峙輔化皇圖徽宗加號元符萬寧宮賜九老仙都君玉印景震玉

樞具劔御製詩頌書畫賜予不能悉紀師累表災變上雖加歎而不能用其言屢召至闕大觀二年赴召出山羣鹿遮道師以意喻之一鹿觸車而斃瘞之道左先是所畜鶴聞召飛去師曰鶴去鹿斃吾無還期四月至京館于儲祥宮新作元符之別觀夜夢天帝召詰朝駕幸儲祥就見因進上所誦大洞經十七日臨午儵然解脫年七十二勅遣使護柩還山葬壘玉峯特詔建藏真觀爲祠室云贊曰玉華蕩空金英散香羣仙啓關受契紫皇神明之區有相成道襲真紹傳天地同老二十六代宗師凝神殿侍宸守靜凝和法師冲隱先生姓苴諱淨之字清遠金陵人父得一好道術鄉里號達翁餘杭有杜道士者自匿其名嘗從翁游熙寧元年師將誕父夢杜

投其家心異之師幼與羣兒戲輒畫地爲道家像父携之來山劉先生見而奇之曰是子他日人天師也師喜躍誓不復歸父亦欣然從之元祐間與俱入朝先生被旨住持上清儲祥宮以師歸主元符宮事崇寧四年賜法

師號兼領崇禧觀凡上恩興建土木與夫山門之請乞師備勞焉撰集科儀營救貧乏尤所致意政和三年七月三日召門弟子曰吾今四十有六歲昔先生嘗授記以爲過叨朝廷厚恩壽當不逾於此遂索筆書遺表盟沐更衣泊然而逝表聞天子嗟悼詔贈冲隱先生爵及父母葬藏真觀之山入室弟子俞希隱徐希和希和得旨嗣傳印劔希隱入青城山今蜀人有聞洞法上道俞公之行化也師美髯長身丰骨異俗每入見爲上加賞云贊曰

秋空塵消春淵冰渙美哉仙儀皇明所贊徒贊其儀弗究其道臨終之言帝王之要

茅山志卷之十一

茅山志卷之十二

師一

上清嗣宗師劉大彬述

上清品篇

二十七代宗師太中大夫凝神殿侍宸養素觀妙先生姓徐諱希和字仲和金陵溧水人祖父樂施與笄君尤為徐君所敬慕命師以侍巾舄嘗從入朝上嘉其道才清素勅就陞前承恩為道士沖隱解化奉御筆嗣宗壇政和四年召詣闕及秋還山賜丹臺郎轉太素大夫凝神殿校籍宣和三年復被召內廷建別館處之四年授前職請歸故山勅有司禮送五年三月十八日降御封香入山有白鶴天燈之應每坐大靜接降仙真侍者窺之唯聞其語師預知世故常若隱憂靖康之初閉靖不食一日集徒眾曰吾仙期已迫不得見聖人治世也以建炎元年七月二十五日若坐忘長往矣

贊曰古先聖真鍊質返始往來無方聚散無體我神甚真故與之遇外戶何人欲聞其語二十八代宗師元觀先生姓蔣諱景徹字通

老金陵句容人眉目秀異面有斗文十一歲侍沖隱公及聞三洞俞先生入蜀往見於峨眉山俞嘉其意益其所學臨別謂師曰三十五代我當如阜及山嗣掌大法建炎冠起燬元符宮師獨保經錄印劔左街道錄傳希烈聞于朝高宗賜金重建宮師復行化至京師前一夕和王楊公存中夫人趙同夢天尊降其第明日師謁王門王大敬信今宮山門王所建者嘗歎曰吾以土木事虧損仙業不得白日昇翬師有白玉天尊像甚秘比至解化像亦亡去紹興十六年四月二十九日也

贊曰土木之崇時息時興我行無為彼夢有徵我我象帝王質天粹臨化俱返孰執其契

二十九代宗師崇德先生姓李諱景合字靈運句容人幼師元觀該練經法南渡之後壇席典儀缺落賴師潤色之一日遊雷平山得古劔一以獻元觀元觀曰此陶公墓中物也神物不可泄合歸之故地果得隱居墓卓劔墓上須臾雷電大風晦冥明日往視其劔無

有墓上復得二青李元觀聞之曰劔去李出予當避席即奉師登壇是日虎嘯鹿鳴鸞鶴交至師好施藥人一疾安今投一錢井中積錢盈井人呼曰藥錢井所活人可知矣紹興二十年九月十五日不疾而逝葬歸真山中

贊曰神物之還雷電與俱青李何來報徵神壇發藥羣疾泉流林注以無盡施待有緣者

三十代宗師靖真先生諱景映字靈暉崇德宗師弟也早喪父事母至孝年四十不娶母卒從兄著黃冠崇德公曰吾昔得二李陶公墓下子來驗矣因作二李亭于白李溪師至性澹泊深實慈儉一入大靜彌月不出高宗累召辭疾不起即山中賜號靖真先生紹興二十五年夏早留守詣師請兩大應守聞之朝使一再至師辭疾愈力明年為秦夫人王氏拜章知檜繫鄆都事隆興二年正月一日謂侍者曰吾將觀化矣遽開靜危坐不食至六日午時化

贊曰太一好生法容禱祠而所福禍則不

敢私迷國當誅猶冀冥報玄獄之警亦輔名教

三十一代宗師保寧沖妙先生姓徐諱守經金陵溧水人母夢流星降其室而生十歲不能言有道人言自茅山來服其丹遂能言母廼令入山師事靖真守一抱道不求人知隆興二年嗣主壇壝朝廷累召守靖真之教確然不起每有禳禳遣使即山修事輒獲嘉應及得江陰秦先生手印劔付之退藏於密慶元元年三月九日辭衆而逝

贊曰流星之光下而爲人歛精含輝忘言絕塵神丹之來道不苟授應物泊然是善玄守

三十二代宗師明教先生姓秦諱汝達字通遠江陰人家貧苦學常拾廢紙遺筆學書強記過人訪道東南名山保寧宗師開館西洞以書致之先生來與語通夕明日以印劔奉先生登壇衆望見先生眉宇若神皆服保寧公擇賢之密知人之明也紹熙二年朝廷遣使封香營金籙齋有白鶴綠雲之異賜先生

號慶元元年十月九日句容簿沈來謁比別至山橋聞鐘聲人曰秦宗師仙去沈大駭還望先生跌坐凝然體猶溫澤因歎曰相逢茶已罷一笑便昇仙入室弟子邢汝嘉時在京爲太一宮高士左街道錄是日還山奉勅嗣教

贊曰仙學所能非人間書示假豪素何妨棄餘幾動於微我感以虛謂我預知孰究玄樞

三十三代宗師真應先生姓邢諱汝嘉字子嘉建康溧水人七歲能綴文善談名理身長七尺手垂過膝孝宗召爲御前高士師蚤年寡髮不勝冠特賜巾裘上殿并御製詩曰朕親命製華陽巾賜與茅山得道人戴此不妨朝玉陛免教五嶽受埃塵慶元元年十月三日得秦宗師書曰吾近得真誥將有回車之期宗教甚重子可速請勅歸領印劔期以九日至山奏聞上深異之勅送還山爲嗣宗師重建藏室獲施與金帛數萬計謂門人曰吾非好此明年將歲大饑矣嘉定二年三月二

十二日不疾而化是歲秋歉甚衆賴以安有餘濟困頓者活人無算其存心如此

贊曰於皇阜陵躬勤孝理爰尚清靜詢于真士手製華巾俾卻冠塵疇克稱茲玉立長身

三十四代宗師沖玄明一先生姓蔣諱汝積字德夫常州晉陵人性簡儉學周易老莊與真應先生意甚相得真應以高士主祠尚方晉問不相涉二十餘年後卒爲師友傳其道統嘉定六年癸酉地臘日寧宗皇后楊氏用明肅太后故事命左街鑒義上官德欽齎香幣受大洞畢法遙禮先生爲度師修羅天醮甘露降靈芝生白鶴綠雲嘉瑞非一高士劉先覺撰傳錄記七年十二月十八日解真先生初名克昭字明夫及傳華陽之學更前名著其世德之由起也

贊曰發書啓玄託易著明出日入月道正不傾瑞露密降芝英自生白鶴起飛遂超太清

三十五代宗師通靈至道先生姓任諱元阜

字山甫溧水人幼負奇質察理幽深神貌超然綽有仙氣薛宗師夢童子揭其坐席曰俞先生來子慎避席俞即元觀蔣公我眉山見之有三十五代如阜之語蓋蜀中仙去數十年薛公嘗聞斯語矣及師入山薛公曰華陽

再來客也即授以玉書學者駢踵而至嘉定十六年滌雨寧宗召至闕修大醮師勅水至坤隅向良戶躡罡若有禁勅上亦先夢其地有妖異人所不知也因賜號通靈明年復召

檇雨加至道賜象簡冠帔皇后賜之純扇親書特賜妙相真人于上其他賜予悉散貧者上益加敬嘉熙三年三月十八日建齋罷白

衆曰吾將佐司命君理忠孝之任宜珍重焉儵然而逝壽六十四

贊曰孰謂仙真遺世去之受職于天忠孝

是司地道無成含章爲美俾揚皇風是用

錫爾

三十六代宗師明微先生姓鮑諱志真字淳夫溧水人家業儒而貧父道中得遺金有遠吏泣至問所遺即歸之夕夢羽人謂父曰汝

有陰德生子當仙父母以歲疫命入山受道是年疫惟鮑氏一門免焉趙葵開闢東方請師醮拔除城戰歿之士羽童鸞鶴見於雲中葵深敬異之復於義家獲南嶽景震劔淳祐三年上表解職居陪真館日誦太丘隱書

十一年辛亥其四月十七日靜一先生解真之日也燒香作禮召大衆曰我當從祖師去矣是夕蛻去

贊曰千萬之一人保純德萬億之一純德之極純極而仙人化而遷父不拾遺仙許子焉

三十七代宗師靈寶先生姓湯諱志道鎮江丹陽人讀書負奇氣髻髻跣足坐大茅山頂三十年誓不出山趙善湘帥金陵訪山中高道一見奇之使禮明微宗師始聞大道之要

淳祐三年傳印劔五年秋大旱召赴闕禱雨師曰雨不須禱上曰亢旱奈何師曰臣聞民者天之赤子陛下憂民若此雨當旋至臣行不足格天臣心有足知天是夕果雨上大悅民舉手曰湯仙雨召住太一宮力辭還山賜

贊特厚十一年四月上表退席寶祐六年正月三日說偈有云笑入寥天一迺一笑辭世贊曰冠巾裳衣人飾其外我髻以游返質非怪桑林之憂釋以甘露而不自神曰天所溉

三十八代宗師冲妙先生姓蔣諱宗瑛字大玉毗陵人幼習舉子業長游四方居越之金庭山二年嘗於石壁間得登真隱訣一書私甚異之遂挾書來華陽從湯先生游一昔夢天門開見游玉海仙人五字明日傳度登壇因以爲號朝廷行郊祀禮久雨召詣闕禱廼大霽理宗賜御書上清宗壇聖德仁祐之殿景福萬年之殿凡三勝賜錢十萬緡繕修宮宇還山累表乞謝事不允開慶改元託疾游廬山過鄂渚之亂迺過天目山往來永嘉山水間註大洞玉經十六卷上聞其高尚不可回而法主之任不可缺遂勅高士景元範代之大元至元十八年世祖皇帝降特詔便安就道不得辭比至燕都六月二十七日無疾化弟子奉冠履歸葬藏真之山

贊曰得書石室古仙所留具釋隱言以鎮丹丘天門廣開羣真畢來匪夢伊真萬方其新

三十九代宗師架巖先生姓景諱元範字仲模句曲人幼依任宗師為侍者脩髯廣額如

古列仙生平不知酒肉味嘉熙間從任公詣

都出住建康天慶觀開慶改元召為龍翔宮

高士歷左右街鑒義未幾勅充上清宗師理

宗后謝氏如先朝故事專以師禮受大洞畢

法其詞略曰為天下母敬持坤順之符導道

中師庸受願真之錄時師以元陽觀為外靖

居焉景定壬戌十二月二十五日化

贊曰偉乎架巖誓遺世塵食地徇形寔滯

昇真處高非危守潔非介飛步神京接軌

玉海

四十代宗師元靜先生姓劉諱宗祖深水人

師事玉海蔣公公弟子數十輩師年獨幼卑

順自牧真心得域寶祐間從蔣公造朝復從

游廬山宿紫極宮夜聞呼茅山道士曰天王

校錄洞中劉子可歸矣師心怪之明日別蔣

公去至金陵父卒終喪廼還句曲一夕芝生滿山悒悒不樂人問之終不言明年北兵破四川朝廷累徵不起深晦其道以終天年

贊曰世運向微海將塵飛仙人知幾暫至

遙歸山靈夜呼芝英晝暎我保玉書以請

民命

四十一代宗師一空真妙先生姓王諱志心

金壇人棄家學道師元符知宮湯元載唯上

清宗壇主其法者世以甲乙次蓋自靜一先

生始時開慶宦者董宋臣私於發之道士朱

知常挈印劍於赤松宮師詣闕上言暴其惡

詔如舊次勅取印劍還山眾推登壇揮手謝

之寒暑一袖而已每疑坐而起兩袖常拂火

光咸淳癸酉九月二日說偈解去大衆追禮

為復正宗師以補系代之失

贊曰道之所傳天且弗違孰睥睨之間以

人為苟可問者斯非其道告示真士善守

神保

四十二代宗師觀妙先生姓翟諱志穎字同

叔丹陽人年十三入華陽洞之西便門遇道

士坐石上指石壁題名謂師曰汝姓名在宗師之列因顧石壁失其人及長果嗣法主之任清容慈儉唯道是從始自永嘉迎玉海度師還山北兵乙亥歲下江南明年丙子化去時至元十三年六月二十四日也

贊曰華陽之洞壁以玄瓊千歲一開列見

仙名仙之為道有化無迹人躬火傳我返

真極

四十三代宗師凝和宣靜真應法師姓許諱

道杞字祖禹句容人上清仙侯之裔也宋端

平三年丙申十二月二十七日生幼事蔣度

師性行方矢不輕然諾國初兵革之餘歲旱

饑疫淮邦惟甚時省治在維揚省臣避堂請

師至禱雨足而疾已遂給驛敦送于朝世祖

以臂疾召見大都香殿令試以法愈復命祈

雪止風皆奇驗賜寶冠法服降璽書大護其

教佩印南還三茅山悉統隸之至元二十八

年二月三日微示疾握固促召王君道孟授

之經法謝別而逝壽五十六

贊曰上清之宗世以賢受景運肇新仙裔

延復虛和翕精保衛聖躬翼以星斗導之雷風

四十四代宗師養素通真明教真人姓王諱道孟字牧齋句容人方面豐頤容止莊厲年十四師事元符道士沈宗紹不飾偽而行益高不求譽而名愈出未四十人以先輩屬焉比嗣教朝京師蒙恩數一如許先生大德戊戌歲饑兩至維揚驅蝗請雨大驗特賜號稱真人行業見翰林直學士元明善所撰華陽道院碑文至大辛亥請老而傳迺命入室弟子劉大彬襲其教年七十有三蛻于華陽實宋寶祐壬寅生人

贊曰養素以朴通真以誠內接玄同外佐昇平蜚蜚伏藏年穀成遂少見其微已足名世

四十五代宗師洞觀行妙玄應真人姓劉名大彬號王虛子吳郡錢唐人延祐四年得九老仙都君玉印有司聞于朝仁宗皇帝特旨還賜宗壇以傳道統

贊曰山嶽昂藏湖海浩湯玄微備至植宗

華陽承允紫闕敷貺朱方九老都君錫爾寶章

茅山志卷之十二

茅山志卷之十三^{十四}

師二

上清嗣宗師劉大彬造

仙曹署篇

華陽洞天三官五府曰易遷宮舍真宮蕭閒官曰太元府定錄府保命府童初府靈虛府其太元定錄保命爲三茅君所治易遷舍真則女子成道者居之餘官府皆男真也保命間用女官東海青童君一年再游校此諸官觀見羣輩

前司三官保命真人

郭四朝真人燕國人也兄弟四人秦時居伏龍之地並得道四朝是長兄真法其司三官者六百年無違坐超遷之四朝職滿上補九官左仙公領玉臺執蓋郎中間久缺無人後以茅小君代四朝耳

定錄府左右理中監

定錄官僚有左右理中監準世長史司馬職又有北河司命主水官考此三職常領九官禁保侯職主領應爲種民者洞宮自二君而下便次此三職爲大矣

左理中監準大府長史昔用韓崇以居之崇字長季吳郡毗陵人少好道林屋仙人王瑋玄曾授之以流珠丹一法崇奉而修之大有驗瑋玄語之子行此道亦可以出身仕宦無紡仙舉也崇遂積仕至宛陵令遷汝南太守秩中二千石在郡積十一年化政治著舉天下最年七十四瑋玄迺授以隱解法得去入大霍山復受瑋玄遁化泥丸紫戶術以度世來在洞中也漢書有傳

右理中監準職如司馬有劉翊字子翔者居之漢書作字子相翊本潁川人少好道德常能周施而不以為惠血死救窮非一人矣舉上計掾拜郎中遷陳留太守遇馬皇先生告翊曰子仁感天地陰德神鬼太上將嘉子之用情矣使我來携汝以長生之道翊叩頭自搏乞願侍給因將入桐栢山中授以隱地入術服五星之華法得度名東華受職洞中也

北河司命

北河司命須闕無人昔以姚俊兼之耳俊錢唐人受業太學明經術災異曉為交趾太守

漢末棄世入增城山中學道遇東郭幼平幼平秦時人久隱增城得道者也教俊行九精鍊氣輔星在心之術修之道成來洞中兼北河司命主水官之考罰此位雖隸定錄其實受事於東華宮中節度姚俊字翁仲者也隱居曰有塚在錢唐臨平墳壇歷然苗裔猶在鄉近時聞輦角之響故人不得侵毀之皆知呼為姚司命塚

張激字河內張奉也字公先少時名激子耳棄世入剡山遇山圖公子授棟玉法修之得道進東華宮行當為太極仙侯或領九宮尚書與北河侯對職治水考北河司命或為禁保侯亦并共業故也治在洞天之中

定錄府典柄執法郎

淳于斟字叔顯主試有道者斟會稽上虞人漢桓帝時徐州縣令少好道明術數服食胡麻黃精餌後入吳烏目山中隱居遇仙人慧車子授以虹景丹經修行得道職任洞中

保命府明晨侍郎

保命府多女官司三官官屬有七人四女三

男明晨侍郎七人如今世上御史中丞之職並隸東華方諸官保命君總關之周爰爰者漢河南尹周暢字伯持之女也暢汝南安城人好行陰德功在不覺永初二年夏旱收葬洛陽城旁客死骸骨萬餘人為立義塚祭祀之應時大雨豐收所行多類此陰行聞于太上令爰爰從南宮受化得仙來在洞中爰爰少亦好道服茯苓三十年後遇石長生教以化遁化遁上尸解也隱居云暢周嘉從弟也殤帝時為河南尹至光祿勳

張桃枝漢司隸校尉朱寓季陵母也寓母行陰德久聞在易遷始得為侍郎耳隱居云朱寓沛人桓靈時八俊

夏馥字子治陳留人也少好道服術餌和雲母後入吳山從赤須先生受鍊魂法又遇桐栢真人授以黃水雲漿法得道來在洞中馥少時被公府辟召懸壁書著桑樹廼去其用懷高邁如此隱居云後漢及高士傳並云馥陳留圉人桓帝時舉直言不就真誥云例皆取平貞正直體隱神清即侍郎之才不限男

女也餘數人不能一一道之

保命府理禁伯

張玄賓定襄人也魏武帝時舉茂才歸鄉里師事西河劉公受服術餌兼行洞房白元之事後遇真人樊子明於少室噉以道變隱景

四

之道昔在天柱山後來華陽內為理禁伯理禁伯者主雨水官也亦保命之監國也玄賓善談空無迴談士常論無者大有之宅小有所以生焉積小有以養小無見大有以本大無有有亦無焉無無亦有焉所以我目都不見物物亦不見無奇有以成無寄無以得無於是無則無宅也太空亦宅無矣我未生時天下皆無無也自云昔曾詣蓬萊左公宋晨生與其論無竊得人意桐栢諸真且不能折之過此以去尚未能本有安能本無耶其高氣秉理如此

保命府丞

趙威伯東郡人也少受業于邯鄲張先生行挹日月之景服九靈明鏡之華晚在中嶽受玉珮金璫經於范丘林丘林迺是漢樓船將

軍衛行道婦也河圖云具楚多有人得見太平者常語人云此言不虛此驗不久其所存明鏡非世間常法得道來在華陽內為保命丞保命有四丞趙主仙籍及主暴雨水領五芝金玉草欲致洪雨者可將詞詣之也

五

其一丞是咸陽樂長治東鄉司命君鄉里人也為茅小君所舉用漢桓帝中書侍郎晚從中嶽李先生受步七元法得仙長治主災害其一丞是孟君入室弟子鄭維正也孟君所屬用鄭主考注

其一丞是西山唐公房蜀人奉事李八伯者也唐主生死

周氏玄通記黃元平東海人年可三十許白布袴褶平上幘執手版版黑色散在保命趙丞間無位任

河內李整昔受守一法并行洞房得道初在陽洛山後來入華陽中又主諸考崇民間之事整往嘗為常道鄉公傳受道入山時已年六十隱居云整居四平山及大茅東採石脂服之得道今猶有採處

周子良字元餘內諱太玄字虛靈永嘉人隱居高第弟子也挺命降真以梁天監十四年十月二十七日白日尸解時年二十隱居檢集平日真降事迹類為四卷進之武皇帝即周氏玄通記也記中載二君選為保籍丞此位迺始立以助領諸簿錄其任數小而高清為美後當度名東華更奏上位為保晨司知天下神仙功夫之事教學之方也

保命府鬼帥

王延傳見范彊徐術此四鬼帥本亦道家之祭酒也得下解法受書為鬼帥耳

華陽洞玉童

周氏玄通記華陽之天司晨玉童姓景名上期

蕭間宮仙人

六

周氏玄通記蕭間宮仙卿張子安芙蓉冠絳繡衣侍者三人子安名孝榮陽樂井人也

童初府上帥

劉文饒弘農劉寃也年七十三一旦遇青谷先生降之寢室授其杖解法將去入華山行

九息服氣又授以爐火丹方修之道成後來洞中主始學道者寬仕漢位至司徒太尉好行陰德拯災困萬民悅而附之如父母焉漢書有傳

童初府監

范初冲遠西人也受太素胎化易形之道常旦旦存青白赤三氣各如縱從東方日下直入口中抱之九十過自飽便止行之十年得道其法約其事驗太素秘道也范監者即其人也昔為童初監今在華陽中

童初府仙人

童初府有王少道范叔勝李伯山皆童初之標者少道漢時人王遜兒也遜漢時山陽太守范叔勝北地人也魏文帝黃門郎李伯山李冲父也冲漢時為白馬令行陰德或積世有道仁行所鍾此之仙人皆一進再進得入此府未必盡徑來也

三官大理

范帥云三官有獄官不名廷尉名大理李豐今為大理都餘一守缺以擬王附子不以與

許虎也隱居云李豐字安國改字宣國馮翊人李義子本寒微有才志遂仕魏為尚書僕射大理即古之獄官前漢洎魏時廷尉亦名大理此職是仙官也王附子是王缺之小名許虎即虎牙也

地下主者

鮑靚字太玄陳留人也仕晉累徵為黃門侍郎出為南海太守洞監幽玄學通經緯人莫知之師左元放受中部法及三皇內文能役使鬼神封山制魔復於蔣山遇真人陰長生授刀解之術按真誥靚及妹並是七世祖積行陰德故令福建於靚等今並作地下主者在洞宮中靚所受學本自薄淺質又澆滯故不得多也隱居云鮑用泰清尸解法當是主者之最高品矣靚女鮑姑散騎常侍葛洪之妻也姑與稚川亦相次登仙有鮑姑艾曾灼龍女見別傳

茅山志卷之十三

茅山志卷之十四

上清嗣宗師劉大彬造

仙曹署篇

易遷宮仙人

易遷館舍真臺皆宮名也易遷中都有八十三人又有協辰夫人者九宮之真女也太上往還來教此輩法皆以保命授書協辰夫人主教領之也夫人漢司空黃瓊女黃景華也師韓終授以岷山丹服之得仙趙素臺者在易遷中已四百年不肯徙自謂天下無復樂於此處也素臺是趙熙女漢時熙為幽州刺史有濟窮人功河中救王惠等族誅行陰德數十事故其身得詣朱陵兒子並在洞天中熙恒出入定錄府素臺數微服游行道巷時山澤以自足矣玄通記云易遷領學仙妃趙夫人字素臺年三十餘綠繡衣易遷中有高業而蕭條者有寶瓊英韓太華劉春龍王進賢李奚子郭叔香此數人並天姿鬱秀清澄眇邈才文擬勝儀觀駭眾此則主者之高華仙官之奇才其次及得張姜子

華耳寶瓊英者實武妹也其七世祖有名峙者以藏枯骨爲業活死爲事故祚及英身韓太華者韓安國子漢二師將軍李廣利之婦也廣利宿世有功德今亦在南宮受化劉春龍漢宗正劉奉先之女李奚子李忠之祖母

也忠晉初東平太守忠祖田舍人耳而多陰德遇大雪寒凍而不覆所積嘗露穀於園庭惟恐鳥雀餓死其用心如此王進賢王衍女郭叔香者王脩母也又進賢有婢名六出本姓田漁陽人浚儀令田諷之孫年二十三

許體貌亦整善有心節同在易遷

易遷左嬪王夫人改字太英年二十許紫衣

易遷右嬪劉夫人字玄微年二十許綠衣

易遷都司學陶夫人改名智安年四十許上

綠下紫許掾母名科斗改名恐此即是

易遷受學李飛華淮陰人來易遷中已九十

四年年可二十許通青衣

易遷中有柳妙姬孫芳華阮惠香此三子學

有功夫得度方諸第八朱臺中受書並爲仙

妃

張姜子西州人張濟妹也李惠姑齊人夏侯玄婦也施淑女山陽人施績女也鄭天生鄧芝母也此數女子昔世有仁行今聞並得在洞中

含真臺仙人

含真臺是女子已得道者居之隸太元東宮中近有二百人定錄君喚言含真臺洞天中皆有非獨此也此一臺偏屬太元府隸司命耳其中有女真二人總之其一張微子漢昭帝將作大匠張慶女微子好道得尸解法常服霧氣受其法於東海東華玉妃溥文期青童之妹也云霧是山澤水火之華金石盈氣服之能散形入空與雲霧合體其一傳禮和是漢桓帝外甥侍中傳建女也其家奉佛精進女常旦夕洒掃佛前勤勤祝誓心願仙化神靈鑒其心亦得來此久處易遷後始得爲含真臺主也常服五星氣以得道禮和善歌歌則鳥獸飛聚而聽聲焉

茅山仙人

展上公高辛時人定錄君喚言展先生昔學

道於伏龍地植李彌滿所住之山先生今爲九宮右保司其嘗向諸仙人云昔在華陽下食白李味異美憶之未久忽已三千年矣秦巴陵侯姜叔茂得道于句曲山種五果五辛菜貨之以市丹砂叔茂曾作書與太極官僚云昔學道於鬼谷得道於少室養嗣於華陽待舉於逸域時乘飈車宴于句曲悟言永歎代謝之速物存人亡我勞如何周太賓有才藝善鼓琴昔教麋長生孫廣田即孫登也獨弦能彈而成八音真奇事也

杜契字廣平京兆杜陵人建安初來渡江依孫策後孫權用爲立信校尉黃武二年漸學道遇介琰先生授以玄白術久久能隱形居中茅後去來良常山契與徐宗度晏賢生三人俱在茅山之中時得入洞耳或自採伐貿易衣糧於墟曲而人自不知耳徐宗度晉陵人作孫皓左典軍呂悌司馬受風谷先生氣禁術晏賢生是步隲外甥即宗度弟子也隱居云契音薛契字四畫契三畫分豪有異也契弟子二人其一人孫賁孫女寒華也賁迺

吳大帝權之同堂兄爲吳豫章太守父諱吳封山陰王寒華先入建安晚來茅山行玄白法有少容其一弟子是陳世京世京孫休時侍郎少好道數入佛寺中與契鄉里故晚又授法此數子處茅山之外非常在洞之客也亦時得入耳世京服澤瀉寒華無所服並已三百餘年正玄白之力也

左慈字元放漢建安之中齋戒登山入洞虛造陰宮三茅君授以神芝復就司命君乞玉門丹砂得十二斤耳隱居云元放當是爲魏武所逼後仍來所請丹砂合爐火九華丹也定錄君受言左慈今在小括山常行來數在此下尋更受職也慈顏色甚少正得爐火九華之益又云慈初來亦勤心禮拜靈山五年許迺得深進東西宮耳即李仲甫弟子葛玄之師

蒲先生失其名字常乘白鹿采芝草於茅山許先生名邁一名暎字叔玄丹陽句容人上清真人長史穆之兄總角好道從郭璞筮卦遇泰其上六爻發謂曰君元吉自天宜學道

初師鮑靚未忍違親謂餘杭懸溜山近延陵之茅山是洞庭西門潛通五嶽陳安世著季偉所嘗游處於是立精舍於懸溜而往來茅嶺之洞室朔望時節還家定省而已父母既終迺遣婦孫氏還家改名玄字遠游永和二年入居臨安西山與王右軍父子周旋後移

臨海赤山遇王世龍趙道玄傳太初遂師世龍受解東反行之道服玉液朝腦精之法臨應得道三官都禁左郎造典柄侯周飭主非使者嚴白虎出丹簡罪簿各一通詰暎諸愆如其無答便當執之先生怖懼強長嘯叱宅而答曰大道無親唯善是與天地無私隨德迺矜是以坂泉流血無違龍髯之舉三苗丹野涿鹿絳草宣妨大聖靈化高通上達耶吾七世祖許子阿者積仁德陰加鳥獸凶荒疫癘之年人民百遺一口子阿散財拯救自營方藥垂死得濟者四百八人德墜我等應得登昇者三人度世者五人錄名太上策簡青宮豈是汝輩所可豫乎言畢會定錄君建中候李遵挫火鈴而至飭等笑而走即得度

名宋華爲地仙之中品復還蓋竹山中故後與長史書曰恨吾遭良師之太晚反滯性之不早吾得道之狀艱辛情事定錄真君當已說之矣崇顙成覆救濟之恩天地不能踰也任真人名敦字尚朴樂安博昌人少學道羅

浮山晉永嘉初游岱宗後居華陽南洞修步斗道及洞玄五符能役鬼神隱身分形飲酒服木黃精餌藥地入七尺取赤堊土狀如赤石脂日吞九九時後出入人間手執經科教示愚人遠近翹然從化永昌元年壬午歲大雪盈丈鳥獸半死施食山中虎鹿數十同羣而游每出羣虎垂耳弭尾從之一日忽見一人身長丈許著五采玄黃衣至前揖問曰卿是何鬼神何爲來此其人稱是和那老君使來問信公名已上丹簡矣真人嘗爲洞天館主鍊大丹成語弟子曰吾嘗尋括蒼蓋竹諸山去矣其故宅即今崇壽觀雲笈七籤亦城志俱有傳

桃源黃真師法蓋甚高於茅山修天尊殿講說教化日有數千人時講筵初合忽有一人

排闥叫呼人貌羸黑言辭鄙陋腰插驪鞭如
隨商客騾馱者罵曰道士奴正熱時聚衆作
何物不向深山學修道還敢作漫語耶黃導
師不測下講筵避詞衆人悉懼不敢抵牾良
久辭色稍和曰豈不是修臺殿都用幾錢黃
曰要得五十貫曰盡搬破鑄釜及雜鐵來約
八九百斤掘地爲爐以火銷之探懷中葫蘆
瀉兩丸藥以物攪之少頃出火已成上銀曰
此合得萬餘貫修觀計用有餘講則所獲無
多但罷之黃與徒衆深相謝問其所欲笑出
門去不知所之後十餘年黃奉召來京忽於
長安街西遇搥驪鞭者有一袱子隨騎驢老
人行全無茅山氣色黃欲趨拜廼撥手指騎
驢者復連叩頭黃但遙稽禮而已老人髮盡
白視之十四五女子也事見逸史

師二

十四

茅山志卷之十四

茅山志卷之十五

師三

上清嗣宗師劉大彬造

采真游篇

吳綽神鳳初采藥華陽洞口見一小兒子把
大珠三顆戲於松下綽因前詢誰氏之子兒
奔入洞中綽恐爲虎所傷遂相從連呼救之
行不三十步見兒化作龍形一手握三珠填
左耳中綽素剛膽以藥斧斫之落左耳而三
珠已失所在龍亦不見出不十餘步洞門閉
矣宋宣和封綽爲養素先生事見龍城錄
薛彪之晉陵人也少不狎俗無羨榮秩齊建
武二年停東川採訪真秘三年廼反啓勅於
大茅山東嶺洞天館行道松澹澗飲彌歷年
歲也館即晉任真人於此成道壇竈猶存殊
有靈驗先生是以訪古求真而即地焉

師二

馮法先字法遠晉陵曲阿人陳文帝天嘉元
年遣中庶虞蒞詣法遠管大齋三日中時行
道每禮一拜鍾輒自鳴誦步虛盡契亦復如
此莫不嗟異

馬樞字要理扶風郿人也博極經史尤善佛

書及周易老子義邵陵王綸爲南徐州刺史
引爲學士綸舉兵授臺留書二萬卷付樞樞
肆志尋覽殆徧乃喟然歎曰吾聞貴爵位者
以巢由爲桎梏愛山林者以伊呂爲堯庫束
名實則芻芥柱下之高翫清虛則批糠席上
之說稽之篤論亦各從其好也比求志之士
望途而息豈天之不惠高尚何山林之無闢
甚乎廼隱於茅山有終焉之志陳天嘉元年
文帝徵爲度支尚書辭不應命目精洞黃能
視閭中物有燕雙巢其庭樹馴狎開廡時至
几案春來秋去幾三十年大建十三年卒撰
道覺論行于世

師三

戴勝字世榮晉陵曲阿人少而出家貧盡爲
鄉人劉表傭作表是將士好畋獵勝廼棄之
來入茅山也

褚稚字玄通吳郡錢唐入梁末隱山中重施
輕財拯物無厭營田若熟以乞貧者與人共
居常旦起洒掃取水徧以周給覓樵薪乞人
夏月種瓜資人來取也

桓法閔字彥舒東海丹徒人陶隱居高第弟

子也為梁南平王清遠館主任事緣多緒有廢研修廼齋岡山石別築玄洲精舍周處士弘讓題精舍壁云李基遺故鼎趙嘏絕風雲悠悠千載下更復屬夫君王僧辯使陸晁圖聞及已形與周處士像於障面又飛白寫閣與僧辯書於障背仍以遺聞世有指桓記云閣為隱居執爨者宋道士賈善翔集高道傳謬用其說隱居書閣入山詩及隱居墓碑可表也矣

孫文韜一名韜字文載會稽剡縣人入山師隱居參授真法及見楊許三真手書上經稍學模寫遂大巧妙後學大王書殊有深分當時稱之南洞九錫文碑許長史舊館壇碑並韜之迹也南洞碑陰云文韜心柔容毅迹方智圓既業不羣物故異簡刊焉

錢妙真晉陵女子也辭家學道於隱居普通年中獨處幽巖誦黃庭經時年十九所居燕口洞積三十年而仙將去手裁書并詩七首與隱居別一日佩白練隱形入洞勅其地為燕洞宮至今女官奉祠

上清道士丹陽葛景宣仙公之胤太中蘭陵蕭世顯解纓帝室服道山林平昌幸脩之精進勤修古宿所推

蘭陵邵元泰道化弘遠東海徐伯遷德教惟洽

菩提白塔行禪比丘會稽釋智淵業總五乘義該兩教

陪真館主義興蔣負芻去來茅山有志栖託肅建元二年勅請於宗陽館行道練納修備風骨異俗年過眉壽沐浴還神

前華陽館主吳郡陸逸仲

前華陽館主太原王法明此二先生並以志

遠棲逸不羣眾館

崇元館主嘉興張元之建武中勅為館主又於茵山澗上築臺以居時有白鶴來止遂名

鶴臺

朱陽館主上清道士潘淵文隱居奉平三茅二許經實以天監十二年啓勅所建

嗣真館主丹陽句容許靈真館主晉世許真人云六世孫也天監三年啓勅所立

崇虛館主道士正吳郡張繹館本宋明帝勅立於潮溝供養大法師陸脩靜齊永明勅立於蔣陵里陶先生再興焉

宗真館主曲阿徐公休善有道素德望溫真天師九世孫張玄真道兼三洞德流四遠

天師十世孫張景邈容行識業秀挺超羣

天師十世孫蜀郡張智明

天師十世孫蜀郡張子華

天師十世孫張綱

天師十世孫張畢

天師十世孫張楷

天師十世孫張胃

崇元館主丹陽永世謝天立

華陽館主北郡傅卓

宗玄館主吳郡張玄宗

崇真館主曲阿湯法宜

延真館主義興吳邁之

宗明館主建康俞萬達

建善館主建康羅法仙

上善館主吳興孟慧普

鵠鳴館主瑯琊衛靈符
妙門館主餘杭暨天祿
福林館主博昌任彥淨
棲真館主建康陳法明
洞玄館主鹽官朱法永
含真館主曲阿弘法清
昭仙館主會稽伍玄則
青陽館主建康張曇要
仙靈館主鹽官朱法景
張求館主延陵張道存
玄圃館主延陵錢法慧
開真館主延陵王方閔
龍阿館主曲阿陳紹先
福鄉館主晉陵劉湛之
金陵館主嘉興父遵祖
招真館主高陽許叔存
方隅館主延陵鍾文胄
龍泉館主義興周景冲
宗真館主延陵尹法靜
玉泉館主曲阿左文舉

五

脩真館主句容畢文和
天市館主延陵韋尼子
北洞館主句容王法休
招靈館主吳郡丁奉之
陽明館主末世於天慧
金剛館主延陵謝法先
龍陽館主晉陵薛延之
曲林館主蘭陵繆法興
黃曾館主曲阿陳石鴻
洞陽館主義興張方成
茅真館主錢唐俞僧瑤
通微館主蘭陵許靈慶
洞清館主蘭陵車靈晚
興齊館主曲阿陳師度
齊鄉館主曲阿劉僧明
方玄館主湖孰戴令待
正範館主晉陵王希弟
降真館主延陵陳耀雲
林屋館主剡縣楊超遠
帝鄉館主蘭陵鞠遠

六

龍安館主延陵陳怡
清玄館主女官延陵潘令翹
宗靈館主女官延陵王明珠
昭臺館主女官晉陵錢密妃
處靜館主女官吳郡劉妙雲
萬椿館主女官延陵王玉盈
仁靜館主女官丹陽楊淨音
梵明館主女官溧陽萬妙妃
實梵館主女官溧陽萬妙娥
天師十世孫女張子臺
天師十世孫女張李妃
太素精舍女官曲阿張妙容
上明精舍女官晉陵薛要羅
太文精舍女官丹陽湯明輝
騰勝精舍女官彭城韓霜妃
鬱單精舍女官延陵朱靈妃
妙寂精舍女官延陵潘妙縹
尋真精舍女官延陵唐僧妃
宗標精舍女官曲阿陳僧淑
永福精舍女官延陵閻丘靈桂

七

服食道士女官暨陽徐靈翠

招真道士句容嚴浩耀

鳳臺道士蘭陵桓方開

山居道士句容張法真

三洞法師曲阿殷靈養

三洞法師永世於玄明

二洞法師魯郡周顯明

宗元遷主吳郡陸僧回

神州邑主法身薄九真

建真邑主法身韓休明

朝宦法身延陵曹玄明

治令法身彭城鄭休之

治丞法身山陰董道蓋

桐栢先生王執字洪範一字道模琅琊臨沂

人也曾祖筠梁散騎常侍祖鈞簡文太子統

馬父瑜陳著作佐郎先生年二十事王法主

爲中瓶弟子積十六年從法主際遇隋唐二

代初大業十一年奉詔河南二十四郡博訪

異人貞觀間奉勅改建華陽觀乾封二年十

一月旦願謂門人曰吾昨夢三羽人執簡告

日華陽天宮用師爲神仙萬人主者兼知校

領省官請當行矣吾昔在桐栢山已感斯夢

須應此召至八日沐浴易衣冠九日端簡而

化年八十八葬雷平山陶真人墓右

王是有術解居洛陽青蘿山鄉里見之已數

百歲常有少容開元中徵至京師玄宗見其

童顏鬢髮頗加恩禮時玄宗於茅山得楊許

衆真及陶貞白所寫上清諸經真蹟其經闕

文十三紙使是賈璽書信幣詣紫陽觀請玄

靜先生補書之若曰朕不欲命小臣干冒於

先生委卿專往必冀神仙手筆今古相續耳

是到山之日靈鶴翔鳴玄靜書經之時神人

降其室皆精誠所應也事見仙傳拾遺

吳筠魯中儒入嵩山依宗師潘師正爲道士

傳上清之法苦心鑽仰延盡通其術開元中

南游金陵訪道茅山久之東游天台尤善著

述玄宗聞其名徵之與語甚悅令待詔翰林

未幾求還茅山許之既而中原大亂江淮多

盜逼東游會稽天台與李白孔巢父詩篇酬

和道遙泉石竟終於越中見唐書本傳

崔希真客鍾陵舍于郡西善鼓琴工繪事兼

好修鍊之術大曆二年十月朔夜大雪希真

晨啓門見一老人衣裘戴笠避雪門下崔異

之延入脫去裘笠神色毛骨非常益敬之問

曰家有大麥麵聊以充飢公能食乎老父曰

大麥受四時氣穀之善者也沃以鼓汁彌佳

崔命家人具之間又獻松花酒老父曰花澁

無味野人有物能令其醇美迺探懷中丸藥

色黃而堅以石叩之置少許酒中甘香頓異

仍以餘藥遺希真崔入宅隙窺之見老父

於幃幃前所慎畫素上如有所圖瞬息而罷

崔出已失老父遂踐雪迹逐之數里至江入

蘆洲中見一大舫舫中數人狀貌皆奇其人

顧笑曰葛三迺見逼於伊人迴謂崔曰遵道

嚴師之禮不必然也崔拜而謝之歸視幃中

得圖焉有三人二樹一白鹿一藥笈其二人

蓋方外之狀手執玄芝一似采藥者二樹似

松栢皆幽巖爲風雨所敗枯朽之狀根相連

屬非常意所及後携圖并丸藥來山詣李舍

先天師天師曰此真人葛洪第三子所畫也

李君又曰寫神人形狀於朽木之下意若得道者壽過松栢也其藥迺千歲松膠也事見原化記

崔羊處士隱居茅山貞元十二年右諫議大夫韋渠牟薦之德宗徵至闕下事見唐史
龔道者逸其名居東海蓬萊觀服食十餘年唐咸通中得入華陽洞大有靈異

茅山志卷之十五

茅山志卷之十六

師四

上清嗣宗師劉大彬造

采真游篇

夏侯隱者不知何許人唐大中末來山常携布囊竹杖而已飲食同常而獨居一室或露宿壇中草間樹下人窺覘之但見雲氣蓊鬱不見其身每游三五十里登山渡水而閉目美睡同行者聞其鼻鼾之聲而步不蹉跌之無蹶礙至所止即覺時號睡仙後不知所終見仙傳拾遺

周隱遥字息元唐寶曆崇元聖祖院在南洞者即贊皇李公德裕供養先生之所又嘗居洞庭苞山不以晝夜更動息不以寒暑易纖厚不食而甚力雖飲而無漏唐令狐楚為之記仙傳拾遺亦有傳

張紹英丹陽人自為道士不入城府仁宗思接方外之論先生與友朱自英觀妙宗偕應詔朱既治行先生辭以疾明年丞相丁謂王欽若同奏于上再召後二年使車再至俱稱疾不起遣中貴人任珪齎詣于山賜號明真

先生仍勅所居處為天聖觀年七十五一日清旦沐浴更衣升壇拜于四方上下周戶而坐弟子異之啓戶已蛻化矣

王荃字子真岐下平陽人父錫殿中丞母司馬氏兄弟皆從科舉荃獨學道因郊行憇瓜圃間有婆婦從乞瓜視其乳齋於腹異之遺以瓜婦食之以其餘啖荃荃食之婦喜曰可教矣吾蕭三娘也神仙海蟾子居此詰旦與俱見遂授丹訣自爾奉

三清尊像朝夕禮謁誦黃庭經累月不出戶後遠游名山西至成都富鄭公慕之館於門下八年丞相呂公尤敬之近臣欲舉种放故事以諫議大夫起之宰相以荃無為人意迺止元豐中復舉于朝賜號冲照處士族弟柄守台州欲往台未至而柄卒因來山從劉先生受上清經錄傳度之夕雷起中茅峯上便門忽開仙樂聞於空中一日晝寢夢二天人引入便門至洞宮見茅君告曰已勅汝司命府丞賜以金尺翅覺遂預言逝日投山下道民葛冲家端坐而蛻年六十一荃清脩骨立

所食纔如嬰兒通夕燕坐冠帶不去體老更起居輕利張舜民撰碑文冠劍藏于鳳翔湯用明字晦之鍾陵道士也神鋒凌邁通經博物專內鍊坐忘之學元祐初年方壯聞劉先生之道不遠千里參受經法與盧必強湯道原馮悅道鮑鍊師王景山數人為友劉先生被召欲師與道原偕行俱辭不往結庵金蘭山高居洞之側不交外物衣弊履穿無愧人之色大觀初無疾化去

馮太申字悅道池州人為道士結友十人來居山會連歲歎九人去獨太申藜藿不給終守初志居祠宇久為道俗所歸有盧先生者建觀礫山未成聞召而解去其徒積逋數千緡不敢歸請太申主其觀齋施所入盡償之復還祠宇旋化于山舍弟子邵次山葛真一皆恬漠自守人敬愛之

陳希微字彥真姑蘇人先名伯雄父之才朝奉郎監江寧府糧料院元祐中伯雄得復連疾已困詣劉先生乞符水治之疾良愈妻門下侍郎薛昂夫人之妹會先卒遂山居為道

士改名希微築室柳沂泉上徽宗聞其名累召不起迺勅所居為抱元觀賜號洞微法師宣和中為人拜章請旦解去

黃澄毗陵人諱業丹陽之仙臺觀崇寧初有勅改玉晨觀為崇寧萬壽宮先生充住持未

幾徽宗重書召赴闕勅差住持金山神霄萬壽宮累授太素大夫冲素靜一先生領玉堂高士左右街都道錄兼管教門公事食實封一千二百戶賜紫金方符請老還山告逝於玉晨所建東庵初三山經錄龍虎正一閣皂

靈寶茅山大洞各嗣其本宗先生請混一之今龍虎閣皂之傳上清畢法蓋始於此

楊希真字元道世為儀真米商積陰德元道生建中靖國元年六歲始能言稍長知敬事四聖真君像一夕夢神人告曰吾為北方天

輔上師憫子慙志哀子尸濁期於華陽仙府與子換骨當授以神書君自是數通冥感若有心疾狂走失所在宣和二年庚子歲入華陽洞不返明年自洞出比還鄉鄰皆訝之君曰我昔實非狂顛為求法耳今得真受童初

大法可以度世矣徽宗索異人進上九靈玉嬰神變等經及靈虛秘旨勅黃冕校定錄付道藏特授丹臺即冲和妙一法師視朝諸大夫年二十四尸解越三日復起手書辭謝門狀投筆坐逝甲辰三月十七日也童初之法

遂顯于世門人承務郎沈育作楊真人傳

沈若濟字子舟遠祖當吳越錢氏時為謀主遂為錢唐人宗族盛大師年十許歲便不樂塵埃中事詣本郡元真觀出家元祐庚午試經為道士年始十三取道藏書讀旁采外書

與其學之同者參焉上下貫穿無不該洽尤長於醫游山客崇禧觀政和末延康殿學士

王公漢之因論內外丹有契載與俱歸公帥建康廼葺山中洞陽館以處師俾鍊大藥且廣施藥以已四方疾者徽宗再召強起館於

龍德宮數月賜號洞元大師命之道官辭以疾賜金方符送還山紹興初服丹尸解年六十二

湯友成字道原桐川人兄景仁登進士第熙寧丙辰歲與弟友直同試經為道士友成事

徐神翁於泰州翁天機深妙不與物接唯時與友成語居歲餘因獲二鼠閉盎中欲縱之發視而鼠已死翁咄咄有所尤不復顧之遂辭翁翁遣詣劉先生受經法與友直修鶴廟居王公漢之邀治丹爐又從王謫居濠梁王得還復歸鶴廟呼四宣和召索異人友成兄弟晦迹山廬恒恐人知建炎盜起友直逃入深巖不返友成居山五十餘載自濠州還不復出門紹興癸亥預言去世日其年六月五日汲寒水沐浴問日早晏正午而逝年八十四

李珏廣陵江陽人販糴自業人有糴者即授以升斗俾自量年八十餘不改其業適李珏節制淮南珏以同姓名改名寬李珏下車數月修道齋次夜夢入洞府見石壁金書李珏字長尺餘珏視之極喜自謂生於明代又陞宰輔今洞府有名我仙人也方喜之際二青衣自石壁左右出珏問此何所也曰華陽洞天此姓名非相公也珏驚復問非珏何人也青衣曰此相公江陽部民也珏曉益自驚歎廼令城府求訪同姓名者得李寬舊名珏迎

置靜室拜為道兄寬素恬澹道貌秀異鬚長尺餘皓然可愛年六十時有道士教其胎息亦久不食珏愈敬之洎問道術寬辭以愚民不知所修以取糴對珏咨嗟曰此常人之難事陰功不可及也寬百餘歲輕健異常忽一夕卒三日棺裂視之如蟬蛻矣事見續仙傳傳霄字子昂晉陵人博古明經善書尤精隸古由儒入道隸居常州天慶觀高宗召主太一宮祠乞還茅山賜號明真通微先生領山門都道正住持玉晨觀建雷平院往來山中四十年搜訪真秘拯救窮乏利益甚深重編隱居集修茅山舊記著作惜多無傳紹興二十九年己卯正月立春日化

楊任丁字夏甲河北相州人氣貌雄偉紹興三十年棄官入山築庵懸輪峯下和王揚公存中遣兵士五百人為築庵基庵成先生曰吾平生未嘗求信於人惟求信於天遂名庵曰天信先生精於變通之道蓋真隱者也太宗淳化二年生孝宗淳熙五年二月十五日卒壽一百八十有四

劉道懷恩州人時稱養衣先生齊雲庵是其居也高宗御筆召先生留守晁公謙之傳上意具書敦請強延詣闕時金海陵湯王完顏亮兵臨瓜洲上懼詢以國事先生直答云沒事沒事南北兩家各換主耳俄海陵弑高宗亦內禪先生年八十四坐逝於齊雲

陶源靜曹州人居山之南同養衣先生被召上表力辭還山紹興十八年也時號陶劉二公

陳楠京口人號靖真先生紹興間任待制勇決辭祿肥遁入林築八卦臺于茅洞之東石室像遺存焉

劉至孝失其名咸通里人也弱冠喪父母願終身麻衣人呼為至孝住白鶴廟數年修奉勤瘁一日修殿於海石榴樹下有物如桃以冬月非時爭擘之且無核人皆棄去至孝取食味異美是晚復至前所得物如拳內綠外紅明日得如掌者色味皆如桃充珍美至孝自是不烟火食遠游名嶽不知所終豈純孝之報耶所遇皆芝英之類耶見道藏靈驗記

劉商彭城人居長安擢第歷臺省為郎性耽道術每歎浮榮世官於己何益古賢皆賤官以求道多得度世幸畢婚嫁不為俗累豈劣於許遠游哉遂以病免官道服東游及廣陵遇一道士賣藥衆中見商目之相異延罷藥携手登酒家樓譚秦漢間事如目睹商師敬之及暮下樓閃然不見明日訪諸城街劇談歡醉出小藥囊贈商戲吟曰無事到揚州相携上酒樓藥囊為贈別千載復何求別後累求之不得囊中得藥九粒依訣服之頓覺神爽不飢身輕醒然迺過江隱於山中時往來胡父渚樵者有遇之者我劉郎中也而不知其所止

溫德成字韶叟自稱東家子三山長樂人與晦庵象山諸先生游住持玉晨觀三十年立道藏初受度於吳興計籌山之昇元觀喜泰間歸主昇元嘉定丙子四月示化年七十二葬武康縣蛟池之西復十五年庚寅歲一日乘肩輿過山中八卦臺守庵見而疑且曰往東嶽檢校江東齋燕文籍因經故山時有雙

鶴飛鳴若相迎導索筆留詩而去明日守庵持其詩質於崇禧管轄包守明包識為故人溫講師真蹟大相歎異昇元令有東家集所留詩刊附卷末云

金元範凝神庵道士性朴野未嘗聞道法寶祐元年浙江潮犯錢唐不能禁元範夢茅君受符訣令治潮明日忘之是夕再夢如是三夕迺詣關自白初有司往試其法比潮怒至元範飛符厲聲喝退潮勢卻立自是水不為害命之道官賜金帛皆不顧惟乞免庵田稅租時相謝方叔有喝退江潮免稅還之句送之還山蓋實錄也咸稱金真人云

楊志隱字空靜鄂州人年數歲不告其家隨木後至江東稍長為道士於元符宮喜讀書貌甚怪遇異人受召雷雨之術大元初以其法事世祖皇帝每被顧問奏對朴直不避時忌上優容之未幾乞身還山奉璽書錄三茅山道教住持乾元觀平生夜至子時誦黃庭經一遍始眠白髮被頂或以雜綵分小髻行山澤間旁若無人一夕命所與往來者作靈

寶齋蓋出所秘書焚之明日偃卧而逝

林大敷號紫軒自稱本通生永嘉平陽人玉海蔣宗師游浙東從入山至元丙子歲許宗師度為徒嗜酒不羈行步不疾而速徧游五嶽諸名山晚就玄洲精舍築壇把茅居之大德戊戌歲二月十八日徧辭交舊言將東歸明日坐茅龕中焚香誦洞經忽大聲喝去守庵驚視之見危坐火光中經聲不絕頃之地無遺骨空有祥雲法所謂火解者衆方歎異適薛道民者自揚州回言遇先生于瓜洲繼數出入人間附信山中解去時年六十一

茅山志卷之十六

茅山志卷之十七九十八十

師五

上清嗣宗師劉大彬造

樓觀部篇

元符萬寧宮在積金山陶隱居道靖故基劉先生混康庵居其上先生以道遇哲宗詔以所居為元符觀崇寧五年落成徽宗御題額曰元符萬寧宮復於上清儲祥宮之側建元符別觀為先生入朝寓直之所今宮舊製其初登山為通仙橋直元符萬寧宮門左官廳右浴室第二門曰玉華之門正殿祠三茅真君曰天寧萬福殿左玉冊殿右九錫殿東廡景福萬年殿西廡飛天法輪殿左鐘樓右經閣天寧殿後為大有堂東庫堂西雲臺雲堂後為寶籙殿景福殿後為雲廚大有堂後曰衆妙堂左知官位三素堂右副知官位九真堂北極閣在寶籙殿後衆妙堂後曰震靈堂又有潛神庵在堂後建炎四年為盜焚毀紹興戊寅高宗賜金重建御書官額理宗朝勅修御書上清宗壇聖德仁祐之殿二榜崇禧萬壽宮在丁公山前隱居華陽下館唐

貞觀九年太宗為王法主建號太平觀天寶七年玄宗勅李玄靜取側近百姓一百戶並免租稅科徭長充修葺酒掃中和間盜火所焚天祐間郡啓邀重建宋改賜崇禧觀額建炎復遭火焚塔再造寧宗賜高士易如剛止堂方丈二御書勝理宗御書玉氣凝潤鶴情超逸八字并寶珠林勝賜司徒師坦大元延祐六年奉勅改宮玉晨觀在雷平山北高辛時展上公周有郭四朝真人秦巴陵侯姜叔茂漢杜廣子東晉楊真人許長史父子並此得道宋太始中道士王舉為長沙景王雅所推重就長史宅東起長沙館梁天監十三年勅買為朱陽館為陶真人住止立昭真臺供養楊許三真人真蹟經諸唐太宗為桐栢先生勅建華陽觀天寶七年玄宗為玄靜先生勅改紫陽觀仍勅取側近百姓二百戶並免租徭永充修葺南唐王貞素繼居之宋大中祥符元年勅改玉晨觀定錄君受言近所標靜舍地此金鄉至室若非許長史父子豈得居之後世當有亦

子賢者延得居此鄉耳正此金陵地肺福地也崇禧觀在大茅山下華陽洞南便門之前晉真人任敷成道之故宅也宋元嘉十一年路太后始建壇宇太始中廬陵太守魯國孔嗣之重立供養道士曲阿華文賢齊建元二年勅立崇元館太子武帝臨幸館主王文清開置室宇廊廡殊為方副唐貞觀初勅改崇元觀天寶七年玄靜先生奉勅重修仍取側近百姓一百戶蠲免租徭長充修護宋大中祥符七年勅賜今名定錄君受言大茅山下亦有泉水其下可立靜舍近水口處題住隱居云今近南大洞口有好流水而多石少出便平比世有來居者齊初延勅句容人王文清仍此立館號為崇元則此觀是矣有唐太極元年碑在拾遺孫處玄文揚幽經書餘字漫不可識大元泰定元年國子司業虞集重撰碑文隸刻于太極碑陰下泊宮在中茅西大司命君以漢地節三年自咸陽昇舉徑來句曲外立茅舍以饒二弟

處也隱居云父老相傳題言大茅之西北平地棠梨樹間名下泊處言是司令故宅是矣唐貞觀十一年重立碑桃源黃先生文和州盧使君書今刻非舊唐御史大夫王公緯嘗修是宮此記之所作也

華陽宮在積金山西隱居上館天寶七年三月玄宗從玄靜先生受上清經蘇勣度道士焚修後燬于兵宋政和中道正莊慎質重建隱居丹井樓基在焉

乾元觀定錄君受言大橫山下有泉水昔李明於此合神丹而昇玄洲天監十四年隱居勣齋岡齋室以追玄洲之蹤天寶中玄靜先生居之勣建棲真堂會真侯仙道德迎恩拜表五亭大中祥符二年觀妙先生築九層壇行道天聖三年賜名集虛庵續勣改今額

燕洞宮在燕口洞女仙人錢妙真遁化立祠之所梁邵陵王為記碑不存天寶七年勣修賜宮額度女道士三人奉香火元祐甲辰為野燎所焚遷立句容縣紹興二十年復建故基祠宇宮在中茅西與鶴廟鄰天寶七年勣

在廟下立精舍度道士焚修奉三茅君道祖香火也田員外郎柳識撰碑亡

華陽觀梁昭明太子故宅古名鴻禧院一名福鄉館在崇壽觀西寶曆二年奉勣置改號寶曆崇元聖祖院時贊皇李德裕奉

老子孔子尹真人三像供養太玄周先生於此治平中賜名鴻禧觀宣和改賜今額

天聖觀在積金山上天監初隱居勣小沼養雷平池龍子貞觀間王法主庵居遇法本仙人肅宗至德中賜名火院宮唐末遂廢景德

三年明真先生張紹英廬其處明真與朱觀妙為明肅太后傳錄保度二師天聖三年九月賜所居為延真庵五年改賜觀額

棲真觀在華陽宮之西隱居勣館桃源黃尊師所居和州盧士牟撰碑不存宣和中賜額

五雲觀在五雲峯下天聖中建丞相王公欽若即世後許國夫人請于朝為公棲神之所因賜觀額晏元獻公撰碑

清真觀在大羅源政和中道人吳德清結庵以待雲水之衆徽宗賜以觀額每歲三月十

八日四方道人畢集禮謁茅君齋時多有白鶴翔逸因傳謂鶴會焉

白雲崇福觀在白雲峯下華陽宮知宮王景溫退居於是溫以其名聞德壽宮勣賜觀額累遷道職道遇四朝寧宗皇孫時嘗從受戒

法即位賜號虛靜真人徽猷閣學士戴溪撰觀記

凝神庵在黑虎谷紹興庚午祠宇宮道士張格齡所勣張初名達道高宗歲遣使降香山

中乙亥歲中使以達道名聞于上累召對德壽殿賜摩衲被水精環紫石茶磨御書陰符清靜二經且命圖其形於神仙閣

昇元觀舊白鶴廟司命真君專祠也在中茅西天寶間詔修祠宇度道士焚修列于祀典政和八年建康守臣俞與奏賜今額建炎三

年為盜焚毀紹興十四年道士茅宗白重建於故基之南劉至孝三遇靈桃其地事見采真齋篇

抱元觀在柳汧泉上政和八年姑蘇陳希微從劉先生學道居此柳谷庵後勣改觀慶元

間王元綱重建

元陽觀古觀名見顧況詩此觀十年游此房
千里宿還來舊窓下更取君詩讀今觀在茅
洞之上隆興初吳興道人沈善智者穴居自
稱洞主遇斬王韓夫人茅氏為創殿宇初名
沖虛庵慶元間請額為觀

藏真觀靜一劉宗師基廬也在疊玉峯大觀
中奉勅建

紫陽觀舊名洞雲庵建炎中河北博州道人
王若寧者來山獨居丁公山東巖下夜夢神
人指巖穴曰此鄧都考訊之所可去洞百步
居焉至泰檜歿夫人王氏純素詣靖真李宗
師乞拜章知檜繫此鄧山獄中王命其子燹
即洞口建太乙殿以求冥釋所施旛與石記
存焉大元至元癸未歲奉璽書為觀存古額

也

崇元觀紹興末桐川石先生名元朴從楊重
甲學道結庵常寧鎮之南岡以醫濟人日織
草屨一緡兼錢十文懸於戶外之樹使行者
自取之寒暑弗渝也年八十八無疾而逝漫

塘劉宰為文祭之大元丙子歲奉璽書以古
額為觀其徒嗣守藥室

聖祐觀在大茅山頂延祐三年奉制書賜額
加封大君真應真君

德祐觀在中茅山頂同前奉制書賜額加封

中君妙應真君

仁祐觀在小茅山頂同前奉制書賜額加封

小君神應真君

三茅真君廟太元內傳曰漢明帝永明二年
勅郡縣修丹陽句曲真人之廟隱居云此廟

今猶在山東及山西諸村並各造廟大茅西
為真墟廟中茅後山下為述墟廟今並廢惟

昇元觀本名鶴廟在祠宇之上紹興間奉皇
后中旨重建丹光發于故址道士呂雲為記
不存

廣濟廟天聖觀龍祠也紹興賜額淳熙紹熙

淳祐三封神龍為敷澤廣應利濟侯

元符萬寧宮神祠封護聖侯廟元符宮二使

者祠封靈祐靈護侯廟事具宋史

茅司徒廟在乾元觀東南臨姜巴路昔有人

痞疾卧道邊夜半有導從乘馬者至呵問之
其人告以疾作乘馬者與之九藥且曰我茅
司徒也旦而疾愈因立廟其地事見稽神錄
建康溧陽東門外一里亦有祠
茅山志卷之十七

茅山志卷之十八

上清嗣宗師劉大彬造

樓觀部篇

山房庵院

許長史宅今王晨觀是隱居云長史宅自湮沒之後無人的知處至長沙景王譚太妃供養道士姓陳為立解於雷平西北即今北解也句容王文清後為此解主見傳記知許長史於此立宅因博訪耆宿至大明七年有述墟父老徐偶云其先祖伏事許長史相傳識此宅餘見長史井條中

靈寶院在王晨觀隱居昭真臺故基唐宗師孫智清王棲霞重建奉

靈寶天尊像額曰靈寶內有

老君瑞像殿先是玄靜先生所立高祖時老

君屢降晉州羊角山因請立像大觀三年四

月王晨道者梁悟真旦汲水殿前池即周真

忽覺紫烟彌覆其身烟中見老君乘白馬以

加句天童經授梁本庸愚自是不食誦經

言人福禍有驗天童經刻石傳

唐若山庵在郭干塘東若山唐開元中潤州刺史棄官來山又居太湖苞山今林屋有碑殘缺矣

都尊師庵在八卦臺南數十步尊師不知名

亦不知何時居此累甃為垣鑿石為日鏡方

丈餘遺甃尚在久為荆莽所蔽西清陳公紹

興間築庵始見之

顧著作山房在菖蒲潭石墨池上唐顧況自

號華陽真逸謨焦山瘞鶴銘者況為韓滉判

官歷江南郡丞校書郎著作郎累歲脫縻無

復北意結屋居山中子非熊登進士第累佐

使府大中時歷盱眙簿

秦系山房在石墨池按輿地記唐人宓石為

研註道德經又隱逸傳系會稽人工詩權德

輿云劉長卿自謂五言長城系以偏師攻之

雖老益壯

宋齊丘山房在海眼泉上

鄭尚書裴太師楊尚書山房並在海眼泉

趙書記楊侍郎周侍郎山房並在中茅西南

李侍郎高松書山房在栢枝塋

劉侍郎裴侍郎山房在中茅前

雷郎中張拾遺何先生山房並在龍尾山

崔徵君員鍊師王鍊師山房並在雷平山崔

定言見抒情詩

竇鍊師侯仙姑嚴鍊師唐鍊師金山人山房

並在南洞

宋張文簡公山房華陽宮之深秀軒公名綱

紹興參知政事讀書山中有華陽老人集四

十卷

齊雲庵在中茅小茅之西玉沙泉上劉莎衣

先生之居

天信菴在鼇輪峯下楊宣甲先生之居

洞陽館在南洞華陽觀之西政和間延康殿

學士王公漢之重勅供養高士沈子舟鍊大

藥其處

圓錫庵紹興間毗陵道者虞慧聰所勅虔蓬

頭苦行先棲大羅源日織草屨二緡以易粟

每夕拜斗一夕感黑虎伏其傍高宗知名召

見德壽宮賜以齋米對曰野人無用留作軍

需上一笑放還山遂徙居龍尾山前

東天寧院在鎮江丹陽縣

西天寧院在建康句容縣並元符莊崇寧五年奉勅賜額

棲白庵華文閣學士秦煇建元符知宮張洞元主之在丁公山巖壁秀絕

玄洲精舍在鶴臺澗上大元至元間玉海蔣宗師所立齋室存鬱岡古名也至治壬戌歲

劉宗師請貞居建外靖于紫軒仙人火解處華陽道院在積金山東大德間牧齋王宗師

建西偏有奇石翰林學士元明善撰碑

三茅道院大德間元符道士姜大珪

建

崇真院

歸真館

迎真館

鶴臺菴

常靜菴

石堂菴

超然菴

萬松菴

俱妙菴

朝陽菴

思真菴自天寧院凡十所

雲谷菴

積金山菴

玉泉菴

集聖菴

崇真菴

奉真菴

靜真菴

澄真菴

喜客泉菴

所錄崇真宮凡九

茅山南北諸菴

慶和菴

上善菴

守柔菴

靈寶菴

抱朴菴

秀雲菴

青龍菴

真興菴

志和菴

素華菴

和福菴

仙臺菴

玉液菴二有

丹谷菴

寧真菴

脩然菴

見素菴二有

靖虛菴

靖真菴

通泉菴

太和菴

致柔菴

潛神菴

喜慶菴

崇真菴

靜真菴

朝斗菴

妙法菴官女

迎真菴二有

願真菴

如常菴

靈泉菴

回仙菴

洞陽菴官女

通靈菴

洪福菴

玄德菴

全真菴

黃寧菴

冲慶菴

崇德菴

玉虛菴

九錫菴

草堂菴

三華菴

寧壽菴

清靜菴

朝陽菴

老壽菴

觀妙菴

洞清菴

東華菴

延真菴二有

悟真菴

慶雲菴二有

高靈菴

圓慶菴

朝真菴

隱深菴

谷神菴

抱陽菴

和真菴

瑞雲菴二有

仁和菴

抱元菴

集禧菴

至聖菴

養神菴

潛真菴

正一菴

拱極菴

養素菴

碧虛菴

居靜菴

濟陽菴

朝元菴

百丈菴

體純菴

玄真菴

扶虞菴

凝雲菴

寧靜菴

明真菴

居常菴

澄虛菴

靜隱菴

凝熙菴

清虛菴

柔和菴

澄神菴

守一菴

常應菴

德善菴

熙真菴

洞仙菴

養拙菴

玄通菴

德潤菴

洞玄菴

茅山志卷之十八

茅山志卷之十九

上清嗣宗師劉大彬造

靈植儉篇

神芝奇藥

太元內傳句曲山有神芝五種二君見道士

有合仙者亦以與之求芝法當以三月九月

開日登山賣金環二隻答以奉誓二君如此

者三以為盟也投環於石間勿顧念之仙道

貴青環之物以為効信也

第一龍仙芝似交龍之相負也以葉為鱗根

如蟠龍

第二參成芝色朱有光燁燁然扣其柯葉如

金石聲折而續之亦復如故

第三燕胎芝如葵葉而色紫上有燕形如欲

飛舉光明洞徹

第四夜光洞草其色青其葉似栢實正白似

李高三四尺夜視其實如月光洞照一室一

株九寶墮地須臾轉大如徑七寸鏡盤著地

厚一二寸許夜視如牛目動盼以視人也

第五白糾苦過切玉芝

熒火芝真誥曰良常山有熒火芝此物在地

如熒火狀其實似草而非也紫華大如豆夜

視有光得食之心孔明可夜書

九莖紫菌琅葛芝

丹珠玉漿並見周氏玄通記

前件丹芝按仙傳所錄自非已成仙人求

之弗得見也

石腦定錄君受言出方山北穴下繫陽子姜

伯真昔嘗取服北竈一中亦有此物石腦故

如石但小斑色而軟耳所在有之服此時時

使人身熱又使人不渴真誥云療風痺

石鍾乳本草茅山土石相雜乳色稍黑而滑

潤謂之茅山乳性微寒

禹餘糧本草茅山甚有好者狀如牛黃重重

甲錯其佳處迺紫色泚泚如麵啗之無熱然

用之宜細研以水陶取汁澄之勿令有沙土

也隱居茅山鑿地得之極精好迺有紫華靡

靡服食用之

南燭清虛真人內傳曰其樹似木而葉似草

故號南燭草木一名侯叔草一名男續一名

惟那木之王小許真人曰方山大有侯叔草

異佳葉乃大異越間亦呼藥叔登真隱訣云

三茅四平山迺不多而樹大其子如菜更八

九月熟酸美可食葉不相對似茗而圓厚味

小酢冬夏常青枝莖微紫大樹亦高四五丈

而甚脆易摧折沈存中良方所謂即南天燭

非也

木本草隱居曰出白山蔣山茅山者為勝真

誥紫微夫人術叙盛稱其益服餌數方傳焉

芍藥本草隱居曰出白山蔣山茅山最好白

而長大餘處亦有而多赤又芍藥譜有茅山

冠子紫樓子茅山紅三種

黃精九蒸九曝服之駐顏隱居云為仙經所

貴根葉華實皆可餌服酒散隨宜茅山者佳

何首烏本草因祖能嗣服之有益唐元和七

年僧文象遇茅山老人遂傳其事李翱因著

方錄云

附子山中名茅附比蜀產者實小而氣劣性

大去濕

烏頭性同附子

菖蒲出菖蒲澤中一寸十二節

茯苓

白朮

枸杞

澤瀉

黃連

決明

茅苧

桔梗

細辛

前胡

貝母

防風

瞿粟

玄胡索

天南星

黃獨

山藥

玉蕈

紫芋

金罌子

錄為膏煎酒和服味如飴

名木異卉

左紐檜晉許長史手植在玉晨觀

鶴頂松一名元枝松在鶴廟頂相傳茅君任

亦城時昇舉其上丫然雙幹疑非舊物

九陽松在金蘭山北虬枝柱地蒼古冠絕

隱居松在玄洲精舍方壇上

卧龍松在清真觀側

經臺栢在崇壽觀太元殿前宋末有道人自

咸陽老君說經臺移本植此檀樂翠碧非凡

木也

棠梨樹在下泊宮大司命君初入山止此樹

下結廬以候二弟今餘丹井樹不復存下泊

所藏廢鼓腔一木刻成徑三尺餘相傳遇古

樹身所作

福鄉古木梁昭明太子植福鄉井上幸心摧

朽生意逾茂

山桃

側栢李衛公平泉草木記並出茅山

白李展仙人遺種

福鄉奈似來禽而小可去疾癘

驚鵲樹在穀牛槽兩木杪合為一無有罅脉

漢孫平泉記芳蕪生茅山東溪隱居稱蕪花

紫色生淺水中相傳女仙人錢妙真所種

玉蘭蘭芽刻玉氣甚幽亦芝英之別種也

蘭

蕙

茗

瑞香

茅山志卷之十九

茅山志卷之二十

師六

上清嗣宗師劉大彬造

錄金石篇

梁碑

九錫真人三茅君碑文九錫玉冊文見諸碑墓篇

梁晉通三年歲在壬寅五月壬辰朔十五日丙午三洞弟子領道士正

吳郡張籍立茅山道士孫文翰書

太元真人司命君諱盈字叔申咸陽南關人

以漢景帝中元五年太歲丙申誕生茅氏之

胤年十八棄家學道入恒山六年時年二感

道通神遂師西城王君十有七年時年四又三

年與王君同乘駕詣龜山王母授經仍隨王

君還西城修法三年時年七顏如玉童體有

光照王君復賜九轉還丹一劑君道通成時年

四十有九武帝還家侍養父母而役使鬼神

有積死久葬皆令更活時年凡五父母既歿

後至漢元帝初元五年太歲丁丑四月三日

通顯乘雲駕來江左句曲之山時年一停住

凡四十三年至哀帝元壽二年太歲庚申八

月十八日己酉受錫昇通從衆官乘雲駕往

霍山赤城玉洞之府也臨去告二弟曰吾今去便有局任不得數相往來當一年再過來此山三月十八日十二月二日期要吾師及南嶽太虛真人游聘若有好道者吾自當料理之有心相教訓於未悟也

定錄其君諱固字季偉太元君之次弟景帝後元元年太歲戊戌誕明於世以英輝仁睿貞孫震舉察孝廉舉賢良拜五官郎或威太守以孝元四年太歲丙子四月轉執金吾卿司命對賓之日時年一百歲

保命仙君諱衷字思和太元君之小弟後元三年庚子歲誕少以節行顯名貞高著稱隱居華嶽五十餘年以學優可任宣帝地節二年為雒陽令轉西城校尉以四年四月拜上郡太守五更大夫即與定錄君同日就路司命對賓之日時年九十有八二君到丁丑年並解任還家修學積五年元帝永元五年歲在壬午過江來尋兄中君時年一百五歲修小君時年一百三歲行勉勉二十四年廼賜九轉還丹一劑照之成道

碑文

若夫有無之莫辨陰陽之不測故自無得而稱之今且談其轍迹述其攸處君廼咸陽南關人也始胄之興則姬于黃帝周公之次子分職致宗氏弟族高祖濂深識玄覽絕塵華嶽及君入山顯乘雲駕控龍南嶺祖意才兼方員智通文武掃定荆揚秦皇嘉悼贈以相國之禮父作懷淳古之氣抱上皇之真不學不仕確然而不可改也君稟元靈於妙始挺至德於玄符生知獨穎天情孤脫深念促生之不淹悟仙齡之可求故能棄纓紱於宰門服綬蒞於丘壑年十八隱居恒山以從其道心業二篇口談十翼茹芝朮以堅根振薛蘿而為服在山六年翹勤精苦遂仰感西城王君親躬執事十有六年進近衣書預同輿駕廼泛白水而造龜山登青琳而詣王母受玉珮金璫之文太霄隱書之道遂得還形玉狀反少天姿王君廼告君曰子道已成可以反矣復百年求我於南嶽授爾仙任於吳越也君廼停雲駕於天衢止羽車於漢路短褐布

衣歸寧父母於是父欲杖而罰之君怡顏跪謝溫恭盡禮杖即碎斷飛揚四濺如電擊焉父又令君生尸起死君即面召神祇口斷枉闕死而活者不可稱數君之二弟並仕漢朝爾時俱被國命同日引道遠近餞送數百餘人君親自僎接初不異俗廼曰吾雖不作二千石卿相亦當有神靈之職天帝見選補東嶽上卿霍林司命總具越生死錄籍亦神官之要位也到來年四月三日當之官諸君復能來顧如今日否於是衆賓僉懷欣允咸欲資持禮貺君並止之及至期戒旦忽有自然門列賓亭路筵客宇土潤脂容地平鏡色神官星羅天騎雲滿海頰龍輿山停鳳蓋烟來而霧至者靡不充溢當賓接客並以虛空而至甘肴旨酒珍奇美果之徒皆非衆賓所識也金葉寶危靈童漢女之屬故非言象所述也于時三天請駕九錫催陳君廼瞻羽蓋而整神容念將離而歛玉色於是舉手言乖無不同偏廼告衆人曰真道隱迹廼不應表顯動耀視聽吾今所以不得默爾者欲以勸誘

二弟之追慕也亦何待二弟之反迷天下有心者蓋當注向神仙耳今去當停江水之東句曲之山以自清勵然後受事也於是盤雲耕而安動進羽駕而徐迴鸞鳴鳳嘯虎躍龍騰紫蓋成霞朱旂起電既神駕之不淹轡仙輪而易速於是人相視歎歎不禁君迴奮龍轡而來翔指句曲而留憩朱宮懸列紫館虛成總任璿璣徧司吳越千里而至者不可稱也二弟聞君得道各解秩還私停家修習積有五歲渡江尋兄君迴教以黃帝四扇神散之方青茅變枯潤骨之法精勤丹至積感幽靈君又啓王君於二弟艱難勤苦備加憐到遂皆降以神天高聖之授俱晏虎耕矣君然後乘九錫之駕轡三天之輪汎景浮空於南嶽耳猶且哀黔首之顛顛悲黎元之不救故期諸一歲再降金陵料別有善載之玉牒惟君道德仁智之深孝悌通神之至感幽徹靈之誠震天動地之業自古及今莫能擬者若夫望景奔月控龍轡鶴之徒尚不能以喻其盛況羊潛鹿處水行火變之儔其可喻君之

巍巍耶有道士張繹欣聖迹之預聞慨真蹟之不睹念至德之日道懼傳芳之消歇故敬携同志謹鐫傳錄雖復羅衣之屢拂冀巨石之不糜面千齡而瀝腎對萬古以披心但恨言不足以盡意庶冥鑒之匪尤迴仰銘曰

玄玄妙始宵宵靈端智明不體慧寂何言心期絕路指測無源哀此黔首念彼飛喧流連永夜波迸長昏促生電逝短晷星奔異生天世俱爲夜寃從迷既往望反無門誰哀誰悼惟聖惟賢應逐規矩感任方員以師以友作輔作天惟我真人厥誕茅裔孤貞獨秀邈爾霞際如彼玉京迢迢天外如彼河清千年一世惟君聖德獨立孤貞耽玄味道舍秩辭榮千年一世如彼河清迢迢天外如彼玉京秋威春澤日暄月明金剛玉潤水潔冰清長懷萬古虛仰千齡芳音既遠傳石流聲

碑陰題

此碑有如玄辱宿構畧有四事一者工八鑿山唯得此碑一石有如現成二者衆石悉不堪作跌唯所指安碑處一石有如伏龍之狀

三者密石連環唯安柱處有自然埒四者事竟洞內飛泉忽涌碑陰及兩旁徧刻齊梁諸館高道姓名畧見采真游篇石柱篆刻自然弟子徐楷敬謁華陽洞天唐宋刻題多漫缺矣

上清真人許長史舊館壇碑

弟子華陽隱居陶弘景謹造

悠哉曠矣宇宙之靈也固非言象所傳文迹可記默然則後之人奚聞乎含吐萬有化育羣生本其所由義歸冥昧至於形域區分性用殊品事限觀聽理窮數識者倘或可論山之萬海之廣夫何故以其有容焉大天之內復有小天三十六所並拓寓地空亘涂水脉開闢風岫通氣雲嶽此山本號句曲其下是第八洞宮名曰金壇華陽之天周迴一百五十里分置三府前漢元帝世有咸陽三茅君得道來掌此任故稱茅山具詳傳記至晉太和元年句容許長史在斯營宅厥迹猶存宋初長沙景王就其地之東起道士精舍天監十三年勅買此精舍立爲朱陽館將逮符先

徵定祥火曆於館西更築隱居住止十四年
別創鬱岡齋室追玄洲之蹤十七年廼繕勒
碑壇仰述真軌

真人姓許諱穆世名謚字思玄本汝南平輿
人後漢靈帝中平二年六世祖光字少張避

許相諛俠廼來過江居丹陽句容都鄉之吉
陽里後仕吳爲光祿勳識宇亮拔奕葉才明

祖尚字元甫有文章機見吳中書郎父副字
仲先器度淹通風格清簡晉刻令寧朔將軍

下邳太守西城侯長史副第五子也王生少

知名簡文在藩爲世表之交起家太學博士

朝綱禮肆儒論所宗出爲餘姚令勤恤民隱
惠彼鄰邑徵入凱闈約言帝側昇平末除護

軍長史本郡中正外督戎章內詮茂序遐邦
肅律鄉采砥行太和中遷給事中散騎常侍

蟬冕輝華事歸尚德簡文踐極方優國老僚

值晏駕於焉告退專靜山廬以修上道君雖
措絃朝班諷議庠塾而心標象外志結霞門

第四兄遠游永和四年嘉遁不反君尚想幽
奇歲月彌軫恒與楊君深神明之契興寧中

東真降楊備令宣諭龍書雲篆食然徧該靈
謨真旨于茲必究年涉懸車遵行愈篤太元
元年解駕達世春秋七十有二子孫禮定虛

柩於縣西大墓京陵之蹤未遠飛劍之鄉在
焉謹按真誥君挺命所基緣業已久周武王

世九宮上相長里薛公之弟也兼許肇遺功
復應垂社後胤故乘運託生因資成道玉札

所授爲上清真人爵登侯伯位編卿司理仙
撫治佐聖牧民矣真傳未顯於世莫能具述

長史第三子諱王芥世名翽字道翔正生母

陶威女先亡已得在洞府易遷宮中君清穎
瑩潔特絕世倫郡舉上計掾不赴執糖塵務

研精上業即弘景玄中之真師也恒居此宅
繕修經法楊君數相從就通真感太和五

年於茲告逝時年三十真誥云後十六年當

度東華爲上相青童君之侍帝晨受書爲上
清仙公與谷希子並職帝晨之任世傳中君長兄揆

世名明次兄虎才世名聯並亦得道揆今有
玄孫靈真在山勅立嗣真館以褒遠祖之德

皇上乘弘誓本力來君此土肅育蒼祇範鑄
羣品導法開俗隨緣啓教以隱居積蘊三真

經誥大樓華陽宜還舊宅供養修理廼勅工
匠建茲堂靖即仰祇帝則兼闢大猷東位青

壇西表素塔壇塔之間通是基址埋甃拚瓦
投鋪便值紫烟呼六白霧纏徊蔭蓋宅南一井即

長史所穿井南大塘廼郭朝遺製源出田公
之泉路通姜已之軌旁枕雷平前瞰下泊東

際連岡北橫長嶺柳沂陽谷俱會西垂四域
之內皆謂之金陵地肺者也長史所居尤爲

標勝方將駟雲虬而高騁驅奔鶴以追風望
洪濤之浩汗瞻故都以浸遠古人有言匪作

奚傳敢刊石頌永屬來賢
渾樞驚氣方祇吐靈依性分境傳識賦形化

通八寓功浹四溟巡跡電滅淵淵渾渾旋區
嶽立亘海雲舒搏風泳水蹠實馮虛亦有幽

匠開石架廬情高身遠天府地居縈戀已曲
畫壤肺浮五闌面啓九涂環周長隰旁嶺交

沂比流廼稱龍伏寔謂金丘昔在西漢三茅
來賓爰暨東晉二許懷真裁基浚井棲道接

神允膺輔聖錫茲侍宸參差年代網緼名氏
書詰具宣精華未弭甄他為梵將淪沉階已
毀拱樹霜摧脩庭草萎肇館華陽歲壇二紀
永觀前猷聿遵洪軌帝曰林哉爾焉斯止經
之營之輪乎與矣勝殿密響瀉瓶揚芬瑤宮
碧簡絢采垂文瑤函玉檢綺幕繡中蘭缸迺
耀金鑪揚熏桐栢雙教方諸兼學並證心清
俱漏身濁離有離無且華且朴結號虛皇筌
法正覺藥微質瑩禪感慧通飛行歛悅捫景
帶虹振苦排郭還明反聰物言是力我見無
功紛紜今古汗漫兩儀三相幻惑舟壑自移
緣來則應不慮不為式題龜錄人天鑒知
碑陰記 此碑梁普通三年太歲壬寅
歲戊午凡二百六十六年文字將湮
中山劉明素字微重加洗刻也
華陽隱居陶弘景丹陽秣陵西鄉下里人宋
孝建三年丙申歲夏至之日未曉時生仕齊
高武世諸王侍讀奉朝請永明十年壬申歲
投絨棲山住中茅嶺上立為華陽館至梁天
監四年移居積金東澗七年往永嘉楠江青
嶂山十年涉海詣霍山十一年夏還木溜嶼

其年十月奉勅迎還舊山十三年正月至茅
山入住東澗十四年冬徙來此館十五年移
鬱岡齋室靜齋
上清弟子華陽前館主吳郡海鹽陸逸冲
上清弟子宗元前館主東海剡縣楊超遠
上清弟子朱陽館主丹陽湖孰潘淵文
上清弟子華陽前館主晉陵丁景達
上清弟子華陽前館主晉陵馮法明
上清弟子嗣真館主丹陽句容許靈真
上清弟子四明山館主會稽山陰潘文盛
上清弟子太平山館主吳郡錢唐褚仲儼
齊世祖武皇帝
太宗明皇帝
衡陽王蕭鈞
揚州刺史始安王蕭遙光
時大
荊州刺史開憲公蕭遙欣
尚書令太子少保丹陽尹建昌侯沈約
開府儀同三司平固忠敬公呂僧珍
侍中吏部尚書吳興太守謝覽
南梁州刺史豫章王司馬季延曹

交州刺史始興王司馬阮研
臨海太守伏曼容
晉安太守謝纂
晉熙太守紀僧猛
梁武皇帝
太尉揚州刺史臨川王蕭
開府儀同三司南平王蕭偉
南平王世子蕭恪
侍中豫章內史太尉長史謝舉
臨川正世子前羅平侯蕭立正
廷尉卿虞權
右王侯朝士刺史二千石過去見在受經
法者普通三年五月五日畧記

茅山志卷之二十

十一

茅山志卷之二十一

師七

上清嗣宗師劉大彬造

錄金石篇

梁碑

陶先生朱陽館碑梁元帝造

昔太和中許遠游者廼雲霄之勝友太虛之選客先生規同矩合實踵高步曩基先構即架胥宇千尋危聳憑牖以望奔星百拱高懸倚闌而觀朝日飛流界道似天漢之橫波觸石起雲若奇峯之出岫銘曰肇彼冥默翻成協贊身託外臣心同有亂重道遵德爰積○敝衷顧懷汾射重問遙通朱陽鬱起華構方崇靜臺冠月經榭迎風嶢嶢高棟杳霭脩攬極望山川周觀京陸碧嶂千嶺清流萬谷景落崖重烟生岫復○

茅山長沙館碑華陽陶隱居撰

夫萬象森羅不離兩儀所有百法紛淩無越三教之境措絃之士飾禮容於閑閑耿介之夫敷旌麾於山裔銘曰大哉乾元萬物資始皇王受命三才廼理惟聖感神惟神降祉德

被歌鐘名昭圖史友于兄弟敬惟西宣言追茂實用表遺先敢循舊制有華雜章刊石弗朽奕代流芳

茅山曲林館碑華陽陶隱居撰

層嶺外峙邃宮內映不亢旁通紫泉遠鏡尚德依仁祈生翊命且天且地若凡若聖連覺比棟各謂知道參差經衍跌宕辭藻執如曲林獨爲勁好掩迹韜功守茲偕老

華陽隱居真蹟帖

元帝在藩送碑入山今猶在朱陽館東又有南平王蕭偉所造清遠之館即弘景弟子桓清遠所居桓師名法閻○二公之師也其桓師初入山作詩曰寒谷夜將晨置賞復尋真方壇垂露葉澈水渡朱鱗杏林雖伏獸芝田詎俟人丹成方轉石鑪變欲銷銀當知勝地遠於此絕囂塵邵陵王曾入茅山尋桓清遠題壁詩曰荆門丘壑多寬牖風雲入自非棲適情誰堪霜露濕朱陽館西又有長沙嗣王所造長沙之館基址存焉梁昌侯又造石碑弘景製文今亦在朱陽館北二里有處士

周弘讓宅雷平山有水曰柳谷所又名田公泉今按茅傳云在山之左汧名柳谷在陵之西曰陽谷昔有田叔居之取水因以爲號此泉是玉津砂飲之益人今用水浣衣不須灰也弘景石頌曰左帶柳汧水右浚陽谷汧土懷北邙色井出鳳門泉又有郭子池者昔燕國郭朝兄弟四人皆云得道亦任洞中之職四朝居長初至山種植於此郭干號因斯兆焉

石刻前製隱居小像初真蹟藏建安徐閻中家宋宣和癸卯十二月道士芮南華摹刻傳世

華陽隱居授門弟子陸敬游十齋文

隱居先生遣總事弟子戴坦秉策執簡膝授前學弟子吳郡陸敬游建連石之邑焉

棲靜處士策文曰

咨爾敬游昔我紆紱帝閑侍筵梁席雖迹混教塗而心標逸境芝田之想無忘曉夜濠潁之志歲月已深至德有鄰風雲相會爾之來也爰移兩春於是槐帶青墀掛冠朱闕携手

東驅創居茲嶺脉潤通水徙石開基登崖斷
幹越壘負弁筋力盡於登築氣血疲乎趨走
肥色憔悴不以暴露為苦心寬空襟寧顧飢
寒之弊棟宇既立載罹霜暑于時七稔經始
甫訖今日之安爾有勤焉君子不獨居其榮
仁人必與物同泰是用邑爾長阿北阪積金
山連石之鄉方七十步澗水屬焉茂爾嘉業
永為華陽上賓爾其莅之其爾以誠慤為性
恬澹為情質直居本沉重樹志不遷世才高
謝接俗權謀詭譎非意所欲今故資爾為棲
靜處士可謂因德立號克終斯美其爾基祭
館境營創援城堂壇弘敞樓路通嚴官私行
止並有棲憇繕築之勞莫匪爾力今故資爾
四雷飛軒廊廡側屋可以安身靜卧顯祇遐
福其爾奉上惟勤接下以惠稼穡艱難備嘗
勞苦貨殖之宜允贍粮服手足胼胝未獲告
休櫛風沐雨於焉尤切今故資爾蒼頭一人厥
名多益可以傳代薪水省息劬劇其爾族惟
舊緒身廼邦聞道雖一貢事望宜分今故資
爾鋼鐵如意可以揮對賓僚即名立事其爾

崇教惟善法無偏執器服表用爰寄玩習今
故資爾節竹錫杖可以振動三界精祇憚響
其爾期誠玄契遐想靈風至懷所指因心則
通今故資爾香爐一枚熏陸副之可以騰烟
紫閣昭感上司其爾澡形潔藏有糧既去宣
導松木寶資芳醕今故資爾杯盤一具可以
夕挹桂漿朝承菊露其爾敬事經誥遵尚楷
模翰墨之用於是乎在今故資爾大硯一面
紙筆副之可以臨文寫字對真受言其爾真
心內固清行外彰滌蕩紛穢表裏雪霜今故
資爾鋤石澡灌手中為副可以登齋朝拜出
入盥漱其今資爾十事事準前史可對揚嘉
策備言求理無或驕情以騫斯旨援筆申懷
敢告處士

梁解真中散大夫貞白先生陶隱居
碑銘邵陵王
蕭綸撰

夫夜光結綠非胠篋之恒珍逸羽翔鱗豈園
池之近玩寧期心於遠大蓋不知其所以然
也是以潁陽高蹈洗耳於唐朝漢陰貞接滅
迹於周代盛德流風有自來矣應期而耀質

者其在茲乎先生名弘景字通明本冀州平
陽人其先出自帝堯陶唐氏之後堯治冀州
平陽故因居此龍馬見五色之符欽明表八
采之瑞光被於天下允釐於庶職洪源廣遠
系緒綿長漢興舍為高祖右司馬子青翟
位至丞相後漢末南渡始居丹陽七世祖潛
仕吳為鎮南將軍荊州刺史祖隆宋南中郎
參軍事父貞寶司徒建安王國侍郎並立履
清約博涉文史先生含元精之和氣蓄凌颺
之雅姿兼宣七善總修九德行仁蹈義嶽峙
淵渟墻仞無以睹清濁不能測道風與星漢
俱高勝氣與烟霞共遠六歲便解書能屬文
七歲讀孝經論語毛詩數萬言曼倩勿習墳
典公幹少誦詩賦方之於古彼有多慚是以
岐嶷流聲中黃著頌有鄉人得葛洪神仙傳
見淮南八公諸仙事廼歎曰讀此書使人有
凌雲之氣於是寢興諷誦晨昏不輟年二十
七歲為宜都王侍讀總知管記事勝道求賢
禁林招士朝難其選咸曰得人阮瑀之書記
不足扶衡孫楚之辭才何以捧轂齊代好治

宮室方修花園青溪舊館更就起築仍奏表
上頌詞事兼美邁彼樂職之篇踰乎景福之
製帝者覽久之益以爲善除奉朝請恪居官
次夙夜惟寅春朝秋請是謂棧樸者也先生
本不希榮常欲辭退迺與親友書曰疇昔之
意不願處人間年登四十畢志山藪今已三
十六矣時不我借知幾其神乎毋爲自苦也
明年遂拜表自解抽簪東郭之外解組北山
之阿同稷丘之棲隱慕留侯之卻粒便具舟
楫永言東邁朝廷錫問時賢餞別祖以二疏
括茲四隱超然輕舉異代同符爾迺杖策遐
征游踐名嶽既而至于句容登於茅嶺以此
地神仙之宮府靈異之棲託往而不返遂卜
居焉先生曰夫子云隱居以求其志行義以
達其道吾聞其語未見其人今我義達無復
其方請同求志之業故自稱隱居亦由稚川
之抱朴士安之玄晏倚巖棲影依林遁迹交
柯結宇剡徑爲門懸崖對溜悲吟灌水深壑
峭嶺組織烟霞枕石漱流山禽無撓採藥偶
從野獸不亂逍遙間曠放浪丘陵惓然若喪

確乎難拔屬齊末道喪天命既否水閣洛谷
地震甲辰先生靜思冥數預識其兆於是遠
近書問一皆杜絕昔遇聞之夏甫今則見之
先生我大梁休運應期受天明命三辰開朗
四海寧謐先生奉表稱慶於是信問復通自
天監以來常有勅旨供給藥餌不乏歲時經
澤深恩莫之與比先生七年暫游南嶽茲山
也闢閭風之地軸若崑陵之天鎮八表旁臨
九純間設樹有琅玕草生車騎遺世獨往是
用忘歸十一年有勅遣左右司徒慧明徵先
生還茅山別給解宇軒君之降情天老漢帝
之致禮河上沉於茲日弗能尚也養志山河
多歷年所攝生既至冥祥亦降猛獸不據魑
魅莫逢庭無荆棘遠同闕里階吐神泉遙扶
疏勒於是羽人徘徊仙客上下鸞鳳游集芝
英豐潤矣以大同二年歲在丙辰三月壬寅
朔十二日癸丑告別遷化春秋八十有一天
子嗟惜儲皇軫悼有詔稱謚追贈中散大夫
謚曰貞白先生禮也以其月十四日寔于丹
陽郡句容縣之雷平山若軒轅之葬衣冠如

子喬之藏劍馬比於茲日可得符焉先生器
宇凝深思議精瞻含章貞吉不修廉隅年將
中壽匪踰於矩矱目疎朗儀貌鮮潔寔忘勸
組多行德惠實惜光景愛好墳籍篤志勵節
白首彌至若延淮南鴻寶之訣隴西地動之
儀太乙遁甲之書九章曆象之術幼安銀鈎
之敏允南風角之妙太倉素問之方中散琴
操之法咸悉搜求靡不精詣爰及羿射荀某
蘇卜管筮一見便曉皆不用心張華之博物
馬均之巧思劉向之知微葛洪之養性兼此
數賢一人而已門人桓法閭等慕遙風於緱
氏結遺想於喬陽勒玄碑而相質騰絳霄而
流芳迺作銘曰
留鳥表化棄劍凝神徘徊紫炁照耀丹林厥
迹猶在餘風可遵誰其嗣此淵哉淑人高行
邁種盛德日新朗猶懸鏡鑒似真筠身以弘
道行不違仁昔游縵紱頡頏縉紳厭乎匡救
勞彼問津亦既解組迺襲山中遠尋丘壑高
蹈風塵情無緬世隱不隔其結宇崇巖貞棲
茂草冰玉留年精華郁老迺有今聞榮躋壽

考白水過庭危峯臨洞露綴蘭階雲生桂棟
日斜簷席花落窓壘尚平未遠王孫不旋海
桑變易陵谷貿遷豐碑有堅遺芳萬年

華陽隱居墓銘碑

梁昭明太子撰

維大同二年龍集景辰克明三月壬寅朔十

二日癸丑巳時華陽洞陶先生蟬蛻于茅山

朱陽館先生諱弘景字通明春秋八十有一

屈伸如常顏色不變有制贈以中散大夫謚

曰貞白先生遺舍人主書監護喪事十四日

寔于雷平之山若夫真以歸空爲美道以無

涯爲真不知悅生大德所以爲生不知惡死

谷神所以不死妙矣哉隱顯變化物莫之測

既而岫開析石天墜玉棺銀書息簡流珠罷

竈九節麗於中天千和焚於地下仙官有得

朋之喜受學振空谷之悲余昔在粉壤早逢

圯上之術今邁元良屢稟浮丘之教授留符

而側愴思化杖而酸辛廼爲銘曰

無名之道不死爲仙亦有元放兼稱稚川逃

形解化自昔同然猗歟夫子受籙歸玄黎傳

宛吏書因賈船虎車照景蜺拂凌烟餘花灼

爍春澗潺湲潏潏茅嶺悠悠洞天三仙白鶴
何時復旋

燕洞宮碑

御製王撰

茅山志卷之二十一

碑七

九

茅山志卷之二十二

師八

上清嗣宗師劉大彬造

錄金石篇

唐碑

唐國師昇真先生王法主真人立觀

碑

觀夫天德惟溥亭育肇其不差人靈本智聞
見資其愈甚是以役成則百不足事逸則
萬物皆動莫不鼎鉉黃金尊崇居處

資養性靈青縑漸於履霜白首成於衆獄

但長途捷徑豈所般游風葉寒芳忘其飄踐

假使維梢掛席終遠實岸縣車策馬詎越崇

山未有若斯之甚者也至人應世爲而

不處援手濡足拯溺救焚滌其含垢之性復

其既迷之轍立關鍵樹隄防艤慈舟於罕濟

之川明慈炬於未昕之夕當其虛往處以真

知被辟絢蘭吞虹噬月踐赤墀而弘衆妙排

羣衆而播玄風踵牧臺之舊蹤襲山之遺

軌勝業與鰲峯並峻層澤共緄海同流理絕

名言事忘稱謂可久可大猗歟偉歟法主姓

名言事忘稱謂可久可大猗歟偉歟法主姓

王諱遠知字廣德琅琊臨沂人也眇迹周

襲於上賓之胃非同薛族託於平輿之

門垂雲雲而灑潤御長風而縱響道無常器

應有常倫故得幽貺鬱其枚條潛杜被其遐

襟則有葉縣奇蹤雷門逸響閱世伯喈

珍其異信邈時威明貴其縫掖故迺百

川紛湊滄溟浸無涯之廣累石不窮惟嶽至

極天之峻法主大父景賢梁征北將軍江州

刺史考臺選散騎常侍太子右衛率輕車將

軍陳車騎將軍揚州刺史建安郡公食邑三

千戶鼓吹一部班劍二十人衣華載鬱台扁

啓曜動成儀表肅以具瞻法主鎮五石於生

宮韞三田於命府降靈以資妙氣受鍊而浴

蘭池漱其芳津二儀賦其純望德門

而直指曉華宗而誕曜母氏濟陽丁夫人陰

祇降嬪柔德垂美夙有神明之契先稟積祥

之符嘗因晝寢夢身為飛鳳所集既寤見赤

光貫乳遂感而娠七日便啼聲聞于外纔經

少選而載焉昔浩靈受錫仰神嗣於妃瑛

柱史流沙託日精於玄妙叶符玄慶高騰聖

迹復延流光外朗豫顯大傳之教希聲內發

先聞導俗之音既而聖縱自天稟至知於弱

植道備於藏往孝友冥至就養

無方業隆幹蠱情忘德美加以俯同學教盡

銳墳典三易述其殷周四詩傳其鄒魯者康

成之章簡聽季長之絲竹黼藻三古琴瑟百

家玉書見重金釐取貴明毀縣鏡照奪清溜

迺深素俗纏早生厭離寂寥愛網牢落塵情

望玄關而一息係蒼雲而長往時有國師宗

道先生識洞幽微智深玄妙宣風黃道作訓

紫宸九重致禮百工興敬攝齋撰履妙簡英

奇法主以體二沐玄風知十升堂與握照應

於荆藍之下抱燭乘於隨合之濱宅空成性

智之所漸沿無致學惟幾必彰理詣希微忘

所言而知道情遺徑廷就日損以為德爰在

冠年度修上法迺有族雲浮紫羣鶴呈素曉

曉高垂徘徊迴屬周尹候氣詎可參衡晉野

揮弦曾何扶轂斯蓋玄心廣運遠結冥祥故

能幽既不言嘉瑞爰發法主顧眾芳以指信

因羣靈以擁抱內戰斯止道勝則肥去有欲

之廉息多聞之智六經三史縹帙緗囊昔所

研味並皆棄絕物色真應耽尚玄虛吐納六

宮去來三景峻巢由之節勵夷皓之行便即

群穀休糧唯資松水六塵不染智照杜其氛

埃五味性空慧口絕其甘旨遠迺避聲於街

枚之路滅影於至陰之域茅山華陽即三十

六洞天之第八也峯秀龍文之鼎水叶鳳門

之泉仰三山以交真思五便而竚聖迺抗表

闕廷願歸巖谷黃門侍郎賀徹奉宣中旨繼

是山棲所須並令官給既而雅志獲從幽襟

獨往高蹈俗外舉手時人羣公祖道衣裾聚

觀法主投簪有所終焉是託潤淹草樹光溢

林泉拂雲徑以展足援喬枝以移視雖復金

鐸和鼓獨韻新聲玉琯調時偏諧雅氣與夫

道風遐暢遠秀松筠之表勝趣挺生孤映烟

霄之外安可亂其清越羣我寒暄故以仙伯

嗟其格高雲將談其氣遠仍值旗蓋南歇禮

樂西歸法主養粹中巖不染氛穢隋開皇十

二年晉王分陝維揚事崇至教欽味風範具

禮招迎辭不獲命出自山谷長吏王子相承

候動止諮議顧言每申談對法主豪墨所至必聲今古辭義所該殆無遺逸幽尚有本固請還山晉王重遠所守遣使將送遂投於天窻背嶺鑿崖穿室卷晦聲迹纔可修行十三年正月七日夜端坐精思彷彿朱衣羽人握節而進謂法主曰岫隱川藏事由獨善寓形寰宇宜弘利益重官品藻以卿開教一方可宣揚法味開度後學既受茲靈詰始有應物之心焉於是澄止水於衆象疎貞松於羣望廣運玄機盛談名理重關復奧故以啓其幽深六瑚四璫曾不矜其器用山門著錄三千許人並立精舍寔爲壯麗十九年初使鄭子騰送書詢問欽尚殷勤誠深下輦大業七年煬帝遣散騎員外郎崔鳳賁勅書迎請見於涿郡之臨朔宮帝廼歎曰朕昔在揚州師已素髮今茲重覩更有童顏豈非道固存焉養之得理者六軍返旆麾駕洛陽奉勅於中嶽修齋儀而炎德遂卑忠良解體挽捨遠燭格擇旁流沉馬謖三十之占膠船無五反之愼蒼生塗炭天命有歸大唐景運龍興玄象斯

構皇上繼明理物光宅黔元參天二地經文緯式神謀廣畧道屬雲雷躋畧曜於已晦綴參辰於將落毀隅具固廊清復修絃席還爲俎豆非夫唐風惟大大章可以作歌軒德如雲雲門所以流詠其孰能至於此乎故使天成地平其武功也如彼戢戈歸獸其文德也如此諒可以四三王而六五帝蹈東戶而穆南風瑞發雲星祥應頽素涸泉獻醴茂棘垂柔神筵衛尉芳實翊砌巍巍蕩蕩未有若斯之盛者歟猶復降情動慮旰食已勤克已思治宵衣彌篤仁高穹昊澤漏重泉於是嗣興至教尚想玄極在昔藩朝頻經降問法主眷懷處世三變市朝語默人間一途有道既遇龍田方知必舉之翼將攀鳳羽故審扶搖之勢以茲先覺曲招恩禮屢有陳開乞還江外廼詔洛州資給人船并施法服勅潤州於舊山造觀一所賜田度道士七十七人以爲侍者貞觀九年四月至山勅文遣太史令薛順校書郎張道本太子左內率長史桓法嗣等送香油鎮絲金龍玉璧於觀所爲國祈恩

復遣朝散郎蕭文遠賁璽書慰問并賜袖帔几杖等皇太子以其年六月又遣將仕郎張萬迪送香油龍壁供山中法事勅又遣桓法嗣送香八月十三日至觀法主沉吟久之方遣恭愛謂弟子曰此香何能燒盡可分四近諸觀廣供齋講冀能感徹十四日午時適因睡寤喜形於色侍者在旁諮問所以答曰吾向契游洞宮仙官見報欲以疲朽補爲仙伯名位已定行在不久十五日沐浴冠帶焚香正坐集諸弟子述聖朝立觀之由勵學人策勤之志十六日旦忽聞異香入室鳥獸哀噪顧謂侍者曰日時早晚曰辰時廼應曰好即轉身平卧自正衣冠九易之形一朝解束春秋一百二十有六歲肢體柔輭顏色不變停殯旬餘倍勝常日州遣行參軍馬君偉訃山弔祭并以狀奏聞越二十八日以符竹託紉定錄神山之右夫劍解之道皎昧難知至於刊名伯札勅功仙品青銑成文召帝晨之旨紫玉爲簡錫太元之命建圖獨立總要羣靈若得之於千載猶逢之於萬劫自許葛以來

未之有也初法主從容謂所親曰國家爲吾造觀恩德極重自惟微應恐不見其成至是時也斧斤始就前刺史辛君昌與五縣官人爰集山所定方準極八桂運於瑤阜五杏伐於緇林整荆峯而求寶玉決河宮而取珠具郢人負其塗器般匠獻其奇斤百姓子來四方悅服 非若堵錦動如雲商畧雲崖考量泉石廼於積金洞門之右太元降真之地其山則峯岫開天逼乾行之峻嶺谷括地窮良象之深滴瀝縣流因風振響歲蕤喬木承雲聚翠於是式墓大壯建其精宇據脩原而却指陪秀嶺以斜列飛陞排雲危墉列漢構玄檻以轆轤景丹拱以崔嵬儼香閣於烟空鬱珍臺於倒景烏容拂曉假造璇題之間兔色分宵晦影綺疏之側埃壘滅而瑤甍遠寒暑隔而寶殿深綺霞共藻稅爭輝清風與琅玕競響披軒迥眺鬱鬱之千巖不窮鑿牖俯臨蒼蒼之萬壑同色螭龍鱗甲動青玉之鐙雲霧光芒列赤瑤之案扇 九色雜流蘇而迴卷華櫺百戲拂藻井而斜縈霜鐘韻鳧氏之

音仙蓋盡輪人之妙列印佺於東序憇羽客於南榮簷度玄霜庭凝絳雪昔漢宗萬乘玄宮繞峙於豫章齊侯九合正寢止聞於拱栢未若綸誥爰發雕甍勝地玄都萬雉植立天憲之間蕭臺九層輝耀洞天之表故以一磬崑驪中貧海漬又於內殿奉爲文德皇后造元始天尊像一軀二真夾侍擬香園之妙寫空歌之儀遐邇歸依人天讚仰法輪常轉洪恩不替州伯武陟公李使君諱厚德真人胄裔衣冠舊緒天潢分其遠派帝圖疎其旁枝政循化穆途謠里頌崇信法門義不忘本弟子陳羽弱年服道暮齒不疲稟洞神之言得入微之致平昔應徵已當付囑今茲綜理復隆堂構弟子王軌夙挺機緣幼忝德宇鑽仰聞于典室舉措網於循常清言餘論演暢有歸羽等廼與遠近同門道俗耆舊以爲日月迴薄總盈縮之期春秋遞代運盛衰之道寔宜騰芳垂茂遠播清塵但韋編既絕宣尼深易道之嘆簡書遂落東晉補由庚之辭是用樹彼高垣題其琬石立言紀事傳諸不朽上

願皇圖定七百之基符千載之運同玉京而等固與金闕而俱遙敢述微猷廼爲銘曰生靈蠢蠢世界悠悠吉凶並驚愛惡相謀如彼薜華望畧不留如彼蟪蛄棄朝無秋至人顯用夙膺玄籙勝已克勤導揚斯屬非相游道無言臣俗物有可甄寧憚濡足幾探其妙鑒獻其明鍊微毓德疑玄肆情才高楚澤價重秦城義堂縱辯文路蜚英跡淪青嶂聲通丹屏蹈禮河濱當仁茂嶺師臣是屬如綸敝聘爰召瓊材構茲嚴整偉哉暇迨壯矣凌虛儀刑玄圃輝映方諸欄垂疊壁堯間聯珠崑崙崑仙阜煥燁神居迷 香階合昏奇樹擾塵蟬遙集馴蛺蝶迤邐入歲招 騎箕引傳蔽虧日月杳冥雲霧化周道息靜鑒潛神鸞旂宛宛象躅鱗鱗乘颺神茂析理玄賓永言終古無絕清塵

和州司戶參軍楚城豐城二縣承包紹門挺基纓夙業超舉連延從職已隔流輩況在學優彌絕塵累玄構繩墨仍參揆度預有厥勞是宜刊記希玄觀三洞弟子江旻

撰貞觀十六年二月十五日立石

少室仙伯王君碑銘諡議大夫李勣撰

少室山天標中氣吐穎浸洛潛靈神洞別輝日月為靈人正府府有伯太清正中莅之故劉北臺光其前王法主襲其後法主瑯琊人

呼八

呼八

諱遠知陳揚子牧曇選子母丁感鳳化胎年七歲日識萬言宅華陽師陶弘景咸矜鏃羽玄業遂能精融道數弛張化機降真易髭延寶氏殂鬼疑其統天與真宰為徒矣涉陳越隋暨我唐皆宗之語門弟子潘師正曰吾被署少室仙伯沐浴加冠衣而化享齡一百二十六高宗追贈太中大夫謚昇真先生聞道也貞元癸未鄙人至自盧嶽棲託灑溪牽蘿踐危深入丹窟漱挹瑞水感仙儲洛游禮空投誠銘辭於石銘曰

道結元氣神機真精玉膏金芝凝質自靈跡散霞岫思激霜颺浮丘往矣光塵寂寥至大元二十四年正議大夫御史中丞王博文子冕重書

桐栢真人茅山華陽觀王先生碑銘

并序朝散大夫江寧縣令河南于敬之撰卿郡王玄宗書

惟軒轅有道之君時著順風之美姑射凝神之主爰標讓位之芳斯皆遠鏡遺編遐希靈冊豈若道包千古業映百王先天而天弗違後天而奉天時化洽無遺仁含有截青溪之館紫府之鄉言招若士迺下螭紱

佇霓裳希倖絳闕之游暫輟丹田之賞謹命終南山萬福觀道士趙元敬祇召先生

辰先生霞裝奄倣趙法師痛微音

之未隔收蕤松澗弟子祁行則丁玄亮等悲陟岵之長往采絢芝巖共勒豐碑同甄盛烈

先生姓王諱軌字洪範一字道模瑯琊臨沂人也耀質珠川分枝瓊萼姬儲下鳳周書美其輕舉葉宰飛鳧劉史紀其神異綿聲遠系

言歟曾祖筠散騎常侍太府卿度支尚

書文括辭林義理學府既飛華於楚塞誠育

呼八

德於大父銛梁簡文太子洗馬招遠將

軍洎陳太中正光祿大夫晨趨鶴禁夕侍龍

樓出入兩朝聲猷纓侶從容二代譽掩珩流

父瑜陳著作佐郎番易國常侍蓬嶠含章

增輝於蘭闥梧宮載筆時揚勳於桂山抽簪

陪置醴之賓偶乘蓬脂車之彥竭誠以奉上鳴謙以棲下常厭坐忘之寓迺秀行之胤先生養質鯤波終搏鵬羽遣之又遣玄之又玄志合天倪情舍地籟施妍媸醜泯之而為一挺橫極從混之而無二年甫八歲早喪所

天痛彼髫年志符曾孝哀思卅日性掩崇仁屬陳運告終人神靡託玉炎鍾岫芝焚楚郊萬始之背飛之淚三荆之樹唯下分條

之葉萍流不定蓬轉無依賴乎祖父故人勞養寄諸包氏一經慙庶五載方離先生業契

自然道通縣解真心粹質有符天縱蘊靈和之茂範流太虛之芳潤弱齡去俗高步歸真

太平觀法主王遠知踐三清之奧隅游六學之津要翹心丹訣警慮玄波既毀網於迷途

矩分燈於暗室清規素論一代偉人先生頌

呼八

繼玄門思弘妙旨仍隨法主卜居茅谷為香

餅弟子一十六年夜寢風興劬勞匪懈晨供

沆瀣夕進流霞服義忘疲依仁無數想朱宮

而思聖懷紫素以尋真浪情泉石披襟蘭杜

抗巢由而狎鳥鵲莊惠以觀魚每至風觀春

山月華秋水猿啼危嶠虎嘯幽谿未嘗不警
思緣情拙毫寫慮先生爰及冠年度受經法
養谷神於玄牝游浩氣於黃庭初在法主座
下聽老子西昇靈寶南華真人論退席之際
即為人講說五行俱覽一字無遺辯若建瓴
詞同炙輠胡元法主歎而言曰吾道東矣何
獨康成洎隋氏握圖物色巖穴旁求俊異旌
賞英翹王法主美孕三仙芳踰七聖爰降絲
渙追赴東都先生此辰從游京洛朝陪瑣闥
夕侍銅池出入兩宮聲華四部若匪體符真
智志叶虛舟豈可應彼弓旌尤茲綸召當時
奉勅玉清玄壇行道豐厨厚饌既饌玉而漿
金供帳芳華亦鋪霞而藉錦隋後主薄伐玄
免先生扈從黃龍車駕凱旋陪還洛邑大業
十一年有詔特委先生於河南二十四郡博
訪緇素有道術異能雜技德行講說灼然堪
供養者及精通道法之徒並具狀追送駕所
以茲銜命言歸舊廬俄而炎運道消蒼靈失
馭黃巾赤眉之侶螳聚挺妖綠林青犢之儔
蓬蒿肆蕞關河路絕因即避亂名山遂歷天

台赤城四明桐栢金庭蔡隴縉雲若耶悟一
息之難追知百年之易往廼隨時石室或遙
旅曲枝折桂紉蘭漱流自樂日月居諸復淹
十載而黔黎塗炭縣命有歸我大唐鳳舉晉
陽龍興渭涘掃境擒以居南面除猘獠以正
北辰御極紫微胡元負圖黃屋靜稽天之浸滅
炎崑之燎火包日月以為高牖苑溟渤以作
池隍列瑤壁於長安大禮儀天地之軌陳箕
篲于清廟大樂節天地之音先生既屬文明
遂動思歸之引整軋馭振蜺裳背天台還地
肺入輶轅而迎法駕游郊廓而謁真人太宗
文皇帝游心寥廓之津開玉京於碧落凝神
杳冥之境敞金闕於絳宮殿指於是照臨至
聖以之綿邈而亭毒之私弘遠然隨迎之道
未臻遇崆山之順風仰瀨鄉之微旨于時法
主尚承恩梓澤未果言之柳沂故遣法師先
以還修葺許陶遺址此觀梁武帝於許真
人舊宅為陶隱居建立號曰朱陽皇明啓運
更以華陽為目按真誥云華陽第八洞天之
名也其山則崇巖隱天入雲逶而上竦盤基

括地帶風溪而旁屬東連林屋飛九轉以游
仙南控羅浮開五便而納聖西通我嶠遠屬
犀津北振岱宗遙翻鶴駕固靈祇之窟宅誠
羽客之留連者也而舊基夷漫餘迹淪蕪先
生更翦棘開場肇茲崇構敬造正殿三間兩
廡并及講堂壇靖房宇門廊飛桂棟於烟衢
則黠然雲布架梅梁於霄路則赫爾霞舒虬
簷軒舉征鸞度而嘹唳鳳羣孤峻賀雀仰而
聯翩豈止蟬羽生風胡人竦貌而已抑靈光
之易接何景福之難酬者歟入於內殿奉造
元始天尊像一軀光趺八尺左右真人夾侍
神儀肅穆法相希微圖面影於月玄寫豪精
於日亮柱光雙彩表瑞金經掌耀十文摘祥
玉札遂使天華聖妓晞菌閣而來儀羽旆雲
輶職憲樓而戾止先生於是排翠展而扇玄
風游赤墀而宣眾妙運慈舟而濟有待揚智
炬以照無明惠澤與鯨鯨同深勝躅蜺龜峯
比峻大哉美矣信無得而稱焉法師往於名
山福地感遇真經晚居華陽又摹寫上清尊
法洞玄洞神符圖秘寶並竭鍾魏之模楷盡

班倭之剗剗緘封靜室永鎮山門先生自幼及長恒味松木平生齋講傳授所有信施並入功德賙救貧無乾封二年歲在丁卯十一月丁巳朔旦朝禮畢返顧命門人曰吾昨五更彷彿夢中見有三人羽衣嚴整手執簡策進於房內告云華陽天宮素已品藻用師為神仙萬人主者兼知校領省官且法師才德清高宜居此任今重奉命邀迎請當行矣吾昔在桐栢山中已感斯夢辭不獲免須應此召遂戒勗門人示以修道要訣經書法事各有付囑其月八日頻索香湯沐浴改易冠帶更服新衣九日寅時異香入室整榻端笈奄從解化春秋八十有八粵十七日癸酉以符竹託附于華陽觀雷平山西陶貞白墓石悲夫重惟先生德叶二儀情包六氣生而岐嶷長符規矩黃中表稱丹穴凝姿白鳳游蒙揆華文於翰苑碧雞飛辯析妙理於談叢體共神俱性與道合皎貞心於松路棲苦行於雲衢固迺鵬鷄齊區彭殤一致西山五色空想仙童淮南八公徒聞鴻烈弟子戴慧恭包方

廣吳德偉王元暉等十有餘人並價逸楚材聲超稽箭承音闕里服道緇閑皆痛甚摧梁悲逾臨谷挹金華而結轍尋玉輪而增耿日月逝矣而清猷尚存見課稿文廼為銘曰至人無待上德難名心凝丹竈神游玉清搏風鵬羽擊水鯤瀛青溪孕質碧落蜚聲一其質茂松筠氣芳蘭芷性同濠上情符闕里爽節川渟高風嶽峙徘徊林壑放曠文史二其玄珠已得白雲可馭目牛無全害馬斯去黃庭有德紫宸欽譽爰紆渙噩俄悲漬絮三其照雪崆峒凝霜姑射雲虬散弭雷軒徒跡乍看埋劍還歸留舄舂言弘誘其方孔碩四其重惟芳霽再美成功災延絳闕火浣丹宮開榛蘿草餘基永隆虹盤鳳翥有類神工五其柳谷思陶芝田揖許四朝愉忻三茅宴語野調霞軒山情月舉亭臨霜嶠池連風淑六其猗歟法侶聲猷業遂智境未窮勝因先墜將鄰塋埴功虧覆篋素標真宰寧資美謚七其條睹龍姿俄觀蟬蛻釋謝星隕任折于嗟應真示同生滅紀仙官於紫府勦真微於

翠碣八其

茅山貞白先生碑陰記天台華白雲道士河內司馬道隱子微述并書

大哉道元萬靈資孕其自然也忽恍不測其生成也氤氲可知若夫稟習經法精思感通調運丹液形神鍊化歸同一致舉異三清自古所得罕能盡善兼而聚之鑒而辯之靜而居之勤而行之者寔惟貞白先生歟蓋特稟靈氣胎息見龍昇之夢卓秀神儀骨錄表鶴仙之狀心若明鏡洞鑒無遺器猶洪鍾虛受必應是以天經真傳備集於昭臺典義微言咸訣於靈府纂類篇簡悉成記帙廣金書之鳳篆益琅函之龍章開幽前秘繫蒙後學若諸真之下教為百代之名師焉瞻先生寫貌之像則道存目擊覽先生著述之義則情見乎辭縱逾千載亦可得之一朝矣至於思神密感之妙鍊形化度之術非我不知理難詳據教以修身德業受書道備按夫科格固超真階命分殊途顯默異軌應從解景不事登晨冥昇上清不可得而測識者矣然隱几云

化虛室仍存代劍未飛陰丘尚開道導德貴
終古不渝披文相質迺今無睹朝代累華山
世轉睽未懷仙烈人增誠慨子微將歸衡嶽
暨憩茅山與諸法義聚謀刻石邵陵撰製莫
具當年今以書勒言全往行因運拙筆聊述
真猷紀于碑陰式昭年世時大唐開元十二
年甲子九月十三日己巳書
開元歲乙亥四月壬子時白雲先生在王
屋山姪延陵縣主簿綽稟命親視鐫勒
茅山志卷之二十二

茅山志卷之二十三

師九

上清嗣宗師劉大彬造

錄金石篇

唐碑

唐茅山紫陽觀玄靜先生碑

識撰大理司直吳郡張
從申書李陽冰篆額

道門華陽亦儒門洙泗蓋玄化振於此也白
日登晨有西漢茅氏兄弟隱景遁化有東晉
許氏一門襲明冲用以闡道風有梁貞白先
生唐玄靜先生開元中玄宗禮請尊師而問
理化對曰道德經君王之師也昔漢文帝行
其言仁壽天下次問金鼎對曰道德公也輕
舉公中私也時見其私聖人存教若求生徇
欲則似繁風上悅因加玄靜之號無何故以
疾辭東還句曲先生諱舍光本姓弘則天諱
弘改爲李氏考孝威州里號真隱先生家本
醇儒晉陵人也夫性與道妙則真有運無古
之學者離有得有不外歎馳景而內觀馳心
不遠思化金而近思化欲今之學者多見反
是若通行於真理實然觀妙先示正性發明

宗元則玄靜其人也年十三辭家奉道端視
清受慈向蠢動開室之中如對君親時人見
之情性皆歛幼工篆隸或稱過父一聞此議
終身不書所撰仙學傳記闕遺備載又論三
玄異同著真經及本草音義而皆精詳祛惑
窮理於學如鐘蘊聲其後師事華蓋峯司馬
君雲篆寶書傾囊傳授既而目之曰真玉清
之客抱虛無而行功者與道不窮託幽阜而
滅迹者於德亦淺承之自遠宜且救人於是
引後學升堂稟玄訓也先生元氣不散瑤圖
虛映達靈已久晦曜爲常動非用開靜非默
閉當吹萬之會若得一之初應迹可名常道
不可名也羣蒙求我豈勞言說孕育至化虛
融一心心一變至於學學一變至於道同淑
氣自來得之不見所以樞衣而進無有遠邇
仰範元和茂資金性者若秋芳之依層巘夏
潦之會通川也先生忘情於身而慈於人積
祥屢應視同衆衆士庶咨詢色授其意常令
章壇閉院照火擇新精微誠敬率皆此類曩
者天書繼至務欲尊崇公卿祈請信無虛月

卒使玄門之中轉見其璞持慈儉之寶歸義黃之風至矣哉我師教也大曆四年冬十一月顧謂入室弟子章景昭孟湛然曰吾將順化神氣恬然若生忘長往時年八十七靈雲降室執簡如生據真經斯廼乘化自由仙階深妙者也門人等以為醴泉之味飲者始知我師之道學久方見願叙真宗以示於後奉曾游道敢述玄風銘曰

古有強名元精希夷黃帝遺之先生得之縱心而往與一相隨真性所容太無同規日行仙路不語到時人言萬靈我見常安玄宗仰止微就京師紫極徒貴白雲不知遐方後學來往怡怡空有多門真精自持委順而去人焉能窺玄科秘訣本有冥期大曆七年八月十四日建

茅山玄靜先生廣陵李君碑銘并序

金紫光祿大夫行湖州刺史上柱國會稽開國公顏真卿撰并書

先生姓李諱含光廣陵江都人本姓弘以孝敬皇帝廟諱改焉二十一代祖弘江夏太守避王莽徙居晉陵遂為郡人高祖文皇帝陳桂陽王國侍郎曾祖榮皇朝雷州司馬祖

隱居以求其志徙居江都父孝威博學好古雅修彭聃之道與天台司馬鍊師子微為方外交尤以篤慎著于州里考行議謚曰正隱先生母瑯琊王氏賢明有德行先生提孩則有殊異睟日獨取孝經如捧讀焉髫髻好靜處習誦墳典年十八志求道妙遂師事同邑李先生游藝數年神龍初以清行度為道士居龍興觀充精老莊周易之深趣執喪過哀口不啻甘旨之味食惟糲麥而已封植膳羞皆出其手號毀骨立親族莫不傷之開元十七年從司馬鍊師於王屋山傳授大法靈文金記一覽無遺綜覈古今該明奧旨玄宗知先生偏得子微之道通詔先生居王屋山陽臺觀以繼之歲餘請歸茅山纂修經法頻徵皆謝病不出天寶四載冬廼命中官齎書徵之既至延入禁中每欲諮稟必先齋沐他日請傳道法先生辭以足疾不任科儀者數焉玄宗知不可強而止先生嘗以茅山靈蹟翦焉將墜真經秘籙亦多散落請歸修葺廼特詔於楊許舊居紫陽以宅之仍賜綰二百

疋法衣兩副香鑪一具御製詩及叙以錢之又築於山側採捕漁獵食葷血者不得輒入公私祈禱咸絕牲牢先生以六載秋到山是歲詔書三至渥澤頻繁輝映崖谷初山中有上清真人許長史楊君陶隱居自寫經法歷代傳寶時遭喪亂散逸無遺先生奉詔搜求悉備其蹟而進上之先時玄宗將求大法請先生為師竟執謙沖辭疾而退洎七載春玄宗又欲受三洞真經以其春之三月申官齎聖書云其月十八日尅受經詰是日於大同殿潔修其事遂遙禮先生為度師并賜衣一襲以申師資之禮因以玄靜為先生之嘉號焉仍詔刻石華陽洞宮以志之是歲夏五月隱居合丹之所有芝草八十一莖散生松石之間詔俾先生與中官啓告靈仙緘封表進夏又詔以紫陽觀側近二百戶太平崇元兩觀各一百戶並免其官徭以供香火秋七月又徵先生既至請居道觀以養疾九載春辭歸舊山其年夏六月前生靈芝之所又產三百餘莖煌煌秀異人所莫睹先生又因而奏

之是歲冬又徵先生於紫陽別院館之十載秋先生又懇辭告老御製序詩以餞之十有一載先生奉詔與門人章景昭等於紫陽之東巒岡山別建齋院立心誠肅是夜仙壇林間徧生甘露因以上聞特詔嘉異初隱居先生以三洞真經傳昇玄先生昇玄付體玄先生體玄付正一先生正一付先生自先生距于隱居凡五葉矣皆總襲妙門大正真法所以茅山為天下學道之所宗矣於戲是非可齊也物我均焉生死可忘也覺夢同焉如此者何域心於變化之際哉先生以大曆己酉歲冬十一月十有四日遁化于紫陽之別院春秋八十有七其十二月八日門人赴喪而至者凡數千人號奉冠舄遷窆于雷平山之西陲遺命以松棺竹杖木几水瓶香奩香爐置於藏內門弟子等仰奉嘉猷克遵儉德先生識思真淳業行高古道窮性命之本學冠天人之際所以優游句曲巒為王者之師出入明庭特寵肩輿之貴是以順風而問昔稱於黃帝望山而請今見於玄宗矣又傳覽羣

書長於撰著嘗以本草書精明藥物事關性命難用因循著音義兩卷又以老莊周易為潔靜之書著學記義畧各三篇內學記二篇以續仙家之遺事皆名實無遺詞旨該博初先生幼年頗工篆籀而隸書尤妙客或賞之云賢於其父因投筆不書玄宗詔山人王旼強請先生楷書上經一十三紙以補楊許之闕先生能於陰陽術數之道而不以藝業為能極於轉鍊服食之事而不以壽養為極但冥懷素朴妙味玄津非夫博大之至人孰能盡於此真卿乾元二年以昇州刺史充浙江西節度欽承至德結慕玄微遂專使致書茅山以抒誠懇先生特令韋鍊師景昭復書具卿恩眷綢繆足勵超然之志然宗師可仰望紫府而非遙王事不違寄白雲而攸遠洎大曆六年真卿罷刺臨川旋舟建業將宅心小嶺長底高蹤而轉刺吳興事乖夙願徘徊郡邑空懷導道之心瞻望林巒永負借山之託而景昭洎郭閑等以先生茂烈芳猷願銘金石廼邀道士劉明素求託斯文真卿與先生

門人中林子殷淑遺名于韋渠半嘗接采真之游緒聞舍一之德敢強名於卷黨曷足辯於鴻濛其詞曰抱一混茫人之紀綱先生以之氣王神強延啓玄旨玄門以彰延為帝師帝道惟康甘露呈瑞靈芝發祥上士云感高風載揚鶴返仙廟雲辭帝鄉退歸而老妙識行藏德本無累道心有常寔曰形解孰與坐忘伐石表墓勒名傳芳谷變陵遷厥迹彌光大曆十二年夏五月建 勅海休吳銘
華陽三洞景昭大法師碑碑首篆題 弄玉像 朝議大夫檢校國子司業兼御史中丞吳郡開國男陸長源撰 朝議大夫檢校尚書兵部郎中兼侍御史上柱國齊魯公并篆額夫戴宇宙懸日月提萬象而首出者其惟道乎夫通聖神該品彙冠百靈而獨立者其惟人乎道所以包渾元經始萬象者也人所以稟純粹司會百靈者也故人因道而集社道因人而垂休不宰之功兆乎造物無言之德洽乎生民蕭散乎汗漫之間冲融乎希夷之表與天籟而吹萬並谷神而長存者矣紫陽

真人大法師諱景昭字懷實本丹陽延陵人也其先來自顓頊大彭之後在虞為陶唐氏在夏為御龍氏在商為承韋氏因國命氏芬馥蔓延以至于裔孫孟孟為楚太傅賢為漢丞相昭入吳為侍中昭兄慎為司空法師即司空十六代孫也司空薨葬于延陵子孫因而家焉祖道會父思歲皆丘園養素道高跡隱載于列仙之籍法師方娠稟異自幼表奇孕元和之粹靈體太玄之妙質初以素書發蹟配度于延陵之尋仙觀後以丹臺著緝練居于長安之肅明觀屬玄宗廣成問道姑射順神放心於凝寂之場垂拱於穆清之上法師因得羽儀金籙頡頏玉繩籍京師垂二十載爰辭上國思還故鄉重隸茅山之太平觀天寶中興玄靜先生奉詔修功德造紫陽觀因而居焉遂於鍊丹院傳黃素之方修齋醮之法翔雲瑞鶴飛舞於壇場甘露神之降生於庭院初法師師事大法師包士榮榮師事崇玄觀道士包法整整師事上士包方廣廣師事華陽觀道士王軌軌師事昇玄先生

王遠知遠知師事華陽隱居陶弘景自道源錫派玄教傳宗玉堂銀閣之人羽蓋毛旌之客府無虛籍代有其徒法師至行稽於玄化通識合于靈造與其有也萬物不得而不有與其無也萬物不得不無得喪以春秋為死生盈虛以天地為旦暮雲外虎頭之佩雪中鶴氅之裘孩季通而撫子玄師仇公而祖黃太教戒示乎傳授服餌見乎延長侍杖屨者迹徧於江湖傳經錄者事同乎洙泗一居山觀三紀于茲還神契乎時來寂鬼同乎物故以貞元元年癸卯委蛻于紫陽之道場顏色怡悅屈伸如常春秋九十有二以其月己酉遷神于雷平山之西原玄靜先生壽宮之左傳授蘇州龍興觀道士臯洞虛得冲虛之妙用躡上真之玄蹤梁市之客胥來華陽之人間出矣道士韋崇詢主修齋醮祭俯仰節度道士朱惠明掌法錄經書修真秘訣法師上編仙籙旁契道樞神含混元德與純粹誘進羣動感通衆靈邈然非寰宇之間超然在風塵之表至如身纏世故跡混俗塵發忠孝

以飭躬演信義而旌行蓋隨時而不器豈常道之可師與浙江東西節度支度判官檢校尚書兵部郎中兼侍御史扶風實公曰暴布武區中棲心象外與法師聲同道韻理契德源追往想琴高之祠傳神著務光之傳見微副墨用琢他山其詞曰惟道之大提功混茫惟人殆庶與道迴翔素韻凝寂玄功靈長肇形無迹啓迪逾光矯矯法師錫羨華陽本族命世在虞系唐御龍事夏承韋居商巖然靈表自幼而彰理冠容成質伴夏黃尋仙發蹟肅明始揚宵禮金殿晨朝玉皇丹臺道侶白雲帝鄉楚山萬里故國丹陽黉宮鳴磬齋室焚香芝生庭院鶴舞壇場茅君秘洞葛氏真方來時去順齊彭涓殤化鱗風翥委蛻雲驤峯巒遷邈松桂蒼蒼塵生杖屨苔染巾箱龍街彩眊虎綴繁囊閭風玄圃瑤軒玉堂追存如在頌德不忘孤石歸然萬古連岡貞元三年獻奏正月元之長久徐則內行克修外通儒學許則宿推公幹虔奉真宗崇元聖祖院碑文

唐寶曆二年歲直丙午浙右連帥^後大夫
贊皇公新建聖祖院于大茅峯下崇元觀之
前上直天華陽洞之南門集羣仙之靈慶
聖壽於億萬本其經始實感周先生出應昌
運為唐廣成薦瑞表祥式旌不朽於是恩錫
院額號曰寶曆崇元聖祖院玄門之盛輝動
巖谷時唐與二百有九載天子以神聖武文
惟新景命德合乎五千文之玄訓明繼乎十
二聖之丕業以清靜源代理以仁壽域生靈
陶之以太和躋之於至順故自臨御大寶則
詔百辟旁延萬邦推誠備禮徵訪治道寤寐
孜孜如恐不及夫明天子勤求于上必賢邦
伯感致于下君臣一德而道德可興迺其年
秋七月公以天子之命齋戒虔懇果得周先
生曰息元寔元精之全德大道之宗師也先
生葆真抱一涵光吹萬天下^{神九}聆其風者久矣
而遐襟曠迹冥寄希夷顯晦自我人莫能識
夫玄珠非喫詬可索至道惟精誠是致故累
聖所不能起而一朝感契洪化蒸然來思且
謂公曰昔廣成對理身之問鴻濛啓養心之

說二若皇上大本也今息元亦將以斯道上
報吾君公於是澄心清神思所以慶皇休而
贊景^但遂與先生圖議選置玄宇相彼形勝
莫靈以峯昔梁朝福鄉太子置道館二古壇
廢井遺址猶在迺鏹荒夷險鬱起層構散偉
錢以冰其費擇幹吏以董其役羣飛矢直不
日而成像設崇嚴殿宇沉邃神仙儀衛左右
森列并按舊史氏得仲尼問禮關尹請著書
之象咸備于前蓋將會通仙而肅百靈以永
為國家齋醮之勝選也況三茅精氣二許馨
烈古來得道者代有其人考傳驗圖若可攀
揖而繚垣之內有流泉嘉木滋飾幽潤地靈
境秀觸類增益懋此成績與山無窮仰惟聖
祖育德乎太極之前顯仁於未形之表當是
時也合散消息莫可名象明而為日月動而
為風雷播育而不測運行而不殆君得之豕
韋以挈天地臣得之傳說以相武丁吾何為
哉道本一貫及夫神化挺生含章炳靈象帝
之先資我強名將寄言以顯玄樞錫羨以興
皇業猶龍既見萬物方觀是宜夫垂休儲社

長發其祥億萬斯慶集于寶曆此崇元新院
所以得時而啓也初公以上方崇嚮道德之
士可以當是大選者唯周先生一人而已故
其招致之忠盡訪求之精實則先生不得不
出而公之誠節不得不伸既而聖情感愜萬
國瞻賀其逢迎之優異禮貌之嚴顯自古尊
師重道之盛無以加也則真宗玄極至道之
精不得不洞契乎上心播宣於至街俾風流
澤浸廣被八區此先生所以出而不疑亦所
以示天下之不可不致如已者當吾君之至
理適吾道之可行千載一期起應時耳矧公
以濟代全材合乎休明樹風南藩績最天下
前歲興建儒學而天降膏露顯于廟庭俗變
風移遂至於道今之輝崇真館闡奉玄化上
感睿旨下孚元元仁聲順氣流溢四境推是
為政大而伸之則致君經國之用可見矣又
況封部之內融汰之下徧識玄元之教俱為
嚮嚮之人顧難乎哉鍊謬列屬城獲詳事實
又嘗以春秋屬辭為學故承命舊筆直而不
文其銘曰

聖運光啓山川効靈黃帝爲君起廼廣成嵒
峒至言今復行兮 明明天子以道致理方
伯虔誠先生戾止累聖莫致今茲起兮 玄
感既宣化流溥天公拜稽首天子萬年何以
薦神御玄元兮 闕宇崇崇聖祖尊容神而
明之神應豐隆華陽仙洞大茅峯兮 金榜
瑤壇仙衛真官羽節凌風珠佩珊珊是醮是
齋百福延兮 名從天錫境占地久下薦臣
忠上資聖壽靈山萬歲績不朽兮

三聖記碑

有唐寶曆二年歲次丙午八月庚戌上清玄
都大洞三景弟子正議大夫使持節潤州諸
軍事潤州刺史兼御史大夫充浙西道都團
練觀察處置等使上柱國贊皇縣開國男食
邑三百戶賜紫金魚袋李德裕上爲九廟聖
主次爲七世先靈下爲一切含識於茅山崇
元觀南敬造老君殿院及造老君孔子尹真
人像三軀皆按史籍遺文庶垂不朽謹記
孔子按史記孔子適周將問禮於老子老子
曰子所言者其人與骨皆已朽矣獨其言在

耳且夫君子得時則駕不得時則蓬累而行
吾聞之良賈深藏若虛君子盛德容貌若愚
去子之驕氣與淫神是皆無益於子之身吾
所告子若是已孔子去謂弟子曰鳥吾知其
能飛魚吾知其能游獸吾知其能走走者可
爲網游者可爲綸飛者可爲矰至於龍吾不
知其乘風雲而上天吾今日見老子其猶龍
耶

尹真人按史記老子居周久之見周之衰廼
適去至關關令尹喜曰子將隱矣強爲我著
書於是老子廼著上下篇言道德之意五千
餘言而去列仙傳曰關令尹喜者周大夫也
善內學服星宿精華隱德行仁時人莫知也
老子西游喜先見其氣知真人過物色而迎
之果得老子老子亦知其奇爲著書與老子
俱之流沙之西服巨勝實莫知其所終

唐石燈記

功德主崇元觀上清三洞道士賀思寶敬造
長明燈臺於寶殿內永充供養寶曆三年歲
直丁未二月十五日丁未奉記助造燈臺三

洞道士陳惠瑫大匠樂安蔣渾男清嶠鑄
齊建元勅立崇元館唐貞觀勅號崇元觀宋
大中祥符勅改崇壽觀太元殿長明石燈寶
曆三年丁未歲造當是文宗太和元年積四
百九十八年是爲大元泰定甲子上清弟子
崇壽觀主具郡張嗣真重爲刻治著銘于石
銘曰

華陽之天流金之庭陰輝日精晝夜洞明神
燈燁燁二景是法樹此南便閱世小劫稽首
司命朝徹重玄度人度仙若火之傳

茅山志卷之二十三

茅山志卷之二十四

師十

上清嗣宗師劉大彬造

錄金石篇

唐碑

唐道門威儀玄博大師真素先生王

君碑朝議郎守尚書祠部郎中知制誥武騎尉賜紫金魚袋徐鉉撰并篆額

原夫至道之先邈哉希矣書契以降可得而云黃帝堯舜澄其源故垂衣恭己在有天下伯陽仲尼道其用故建言立德憲章無窮素松羨門神而明之故輕舉上賓留侯商皓變而通之故解景滅迹順是而下莫不由之故有緡紳端委利萬物於廟堂之上葛巾蕙帶全陰功於塵埃之外隱顯殊志趣舍同歸其人有終其鬼不死闔風玄圃羣帝之密都赤城華陽仙聖之治所光靈盱衡若在左右仁人君子往往至焉見之於貞素先生矣君諱棲霞字玄隱華宗繼世積德所鍾生於齊得泱泱之風長於魯習恂恂之教七歲神童及第十五博綜經史闕黨童子靡敢並行東方

諸侯為之前席而仙才靈氣稟於自然塵縷世網不可拘繫每名山獨往神契感通奇怪恍惚衆莫能測天祐丁卯歲避亂南渡至于壽春感四海之分崩想八公之遺跡於是解巾名路委質玄門問政先生聶君見而奇之授以法籙是日有彩雲皓鶴翔舞久之既而窮若士之遐遊得東鄉之勝境道無不在善豈常師又從威儀鄧君啓遐受大洞真經玄科秘旨動以諮詢福地仙源因而棲託誅茅穿徑枕石漱流身既隱而名愈彰道已寂而節彌苦桑田自改桂樹長留烈祖孝高皇帝方在賓門實來作鎮紫炁表真人之應青雲符好道之占君鶴書被徵褐衣來見談天人之際講道德之源靡勞牧馬之迷自契順風之請因從敦禮來止建康有玄真觀者陳宣帝為威矜先生之所作也殿堂岑寂水木清華游焉息焉以遂其好每竹宮望拜玉牒秘詞叩寂求真必君是賴嘉祥靈應世莫得聞聖曆中興恩禮殊重賜金印紫綬號玄博大師烈祖嘗從容謂君曰吾不貪四海之富惟

以蒼生為憂君對曰夫古聖人修其身而後及天下天下得一人安而後安今天子勤勞萬機志寢與食身且不能自治豈能治蒼生哉帝善其言以百金為之壽其識度亮直又如此焉今上嗣清靜之基尊玄默之化諮諏賓敬有踰於前而君茅嶺夙心老而彌篤比年抗表請歸舊山優詔惜之又加貞素先生之號既而玉棺有命紫素告期葛洪見留不成大藥少君捨去先夢繡衣保大士子歲夏四月甲寅隱化于玄真觀春秋六十有二恩旨痛惜賻錢二十萬道俗嗟慕會葬數百人初君之及茅山也即良常洞之前相雷平山之下披榛翦穢面壑臨流除地為壇表朝真之位因丘設隧卜安神之室至是歸葬符風願焉六月丙申發自京師沂淮而上時畿內久旱川塗可揭是日大雨洪注騰波卻流慕長堤踰重堰飄然利涉人不知勞昔周君有樂水之朝宣尼有泗水之應校靈比德其殆庶乎君傳法度人數逾累百有若玄真觀主朱懷德名先入室道極嚴師首座孫仲之章

表大德劉德光參受經法預聞玄秘永懷在三之義願垂不朽之風威儀王可德首座陳希聲並仰高山共刊貞石鉉也不佞夙承教義雖復仙凡異迹靜躁殊途而誠以所感素交斯在徘徊祠宇邈若山河敬書峴首之悲以同遼城之歎其詞曰

於鑠子晉上賓于天亦有胤孫窮神體玄昔我來斯世稱其賢今我往矣人謂之仙至道希夷孰知其然華陽洞府句曲風烟林芳橘葉地即芝田披文相質億萬斯年○

賢院直學士徐楷書 錄青元錄
大夫行右千牛衛兵曹 參軍兼監
察御史上柱國 王秉刻字

茅山紫陽觀碑銘并序○
朝議郎中太
子右諭德武
騎尉賜紫金魚袋臣徐鉉奉制撰
朝議郎守尚書虞部郎中武騎尉
尉賜紫金魚袋臣楊
元鼎奉制書并篆額

臣聞太初之氣其生也無始衆妙之門其本也無名積而成形散而為氣乾坤運之而兩儀位王侯受之而天下貞是故斷鼈鍊石之功絕地通天之業衣裳軒冕之后干戈揖讓之君雖復遭罹異途步驟殊致莫不協契於

神明之域飲和於道德之原廣無為之為執無象之象萬物恃生而不有百姓日用而不知其述也則格天光表化人而成俗其本也則收視返聽全真而養身至其玉檢登封蘿圖啓後游神象外脫屣區中鑄金鼎而乘白

雲登寒門而立玄極闕宮清廟式嚴觀物之場玉洞金壇別啓下都之所靈符綜集金籙岐分三元八會之文潛神彷彿七映九華之室密擬形容足以徵福應於含生致孝思於時事聖人繼作靈構相望故茅山紫陽觀者

今上愷敬為烈祖璟孝高皇帝元敬皇后之重修也爾迺星紀儲精下為峻極河圖著錄縣示禎期自道氣融明其科流演治化弘開於赤縣符圖廣被於名山而華陽洞天實羣仙之都會金陵地肺又三茅之福鄉左憑柳

汧烟霞輶暎石帶陽谷川源隱鱗伏龍靡迤鎮以雷平之嶺鬱岡回合浸以護軍之渾郭真人叩舷之池不遷留岸許長史鍊丹之井自剏寒泉白霧紫烟照暎其上鸞車鶴馭往來其中高真七人四處茲地其後貞白真人

以玄德應世肇開朱陽之館以玉書演秘爰立昭真之臺堂靖疏基玄洲之蹤可擬生徒廣業白龜之迹斯存金紐鳳羅代相傳授龍車虎駕世有飛昇及玄靜先生以冲氣含和體庚桑之歲計玄宗皇帝以尊師重道屈軒

后之順風由是天眷遐臨皇心密契維新舊館再易華題丹鼎洞經潔修無倦芝泥龍蘭投奉相望戶邑之民豈止奉明之縣樵蘇之禁寧唯柳下之墳故得雲物告祥芝英表瑞小周王之瑤水徒詠空歌異漢帝之猗蘭唯

陳甲帳自茲厥後代有修崇上士名人時時解蛻雲軒羽蓋往往降靈皆著之金石播於謠頌嗟乎四時代謝天道盈虛雖九氣長存歷劫以資其融結而三階有象隨時因表其晦明則斯觀也將世運以汧隆興皇圖而昇

降亦明未啓猶多開戶之悲白水方興始漸高門之慶孝高皇帝猶龍孕德指樹垂陰應樞電之殊祥肖中天之奇表甘盤就學和光於百六之初庖正分官利見於九三之際賓門納揆有大造於當時彤矢盧弓允至公於

四海於是法堯受命紀夏中興補西北之不周應東南之王氣御明堂而揖羣后輯瑞玉而覲諸侯既治定而功成更憂深而思遠乘奔御朽不以黃屋爲尊旰食宵衣惟以蒼生是念知無爲之無敗體上德之不德凝神姑射端拱穆清政舉其中事至而應愛民重法敦本訓農偃革銷兵守好戰必危之戒卑宮菲食懼以人從欲之譏故得百寶効靈三辰薦祉遠無不屆邇無不安少康光武之功獨高帝錄貞觀開元之業更啓孫謀今上承積德之基法自然之道變化無方之謂聖神武不殺之謂仁學洞精微守謙光而沖用明昭隱伏體大度以包荒動則蔽民不矜功而尚智靜惟修政恒務蓄以勸分聞善若驚毋察秋毫之細容光爲照寧違行葦之微化決風隨時和俗厚嘗以爲天下者烈祖之天下憲章者升元之憲章垂裕無窮永懷罔極衣冠原廟未足盡思聲樂娛神良非致敬緬慕在天之駕因嚴訪道之宮尋屬長樂上仙濯龍興感載詠生民之頌思弘止亂之功迺春靈

巖誕敷明詔發虞衡之吏集般爾之工執藝駿奔飾材廣至果園之柰供其舊斷北邙之土給其巧塤迺新秘殿秘殿孔碩黯其靈霄屹其穹窿璇題互照以晶瑩珠網交疏而窈窕震殷雷於滴瀝拖宛虹於楹軒忽陰闔以陽開乍霞駭而雲蔚儼若虛皇之御穆然太上之容疑御氣以迥躋眇陵雲而遐觀迺立高門高門有闕擬金闕之觚稜洞朱扉而煥照龍章鳳篆以之題著霓旌絳節茲焉出入迺建兩序紛邈迤而重深迺起層樓邈若亭而顯敞北彌郭千之路南亘姜巴之衢赫光景以燭坤麗丹青而藻野速如神運恍若化工每至日薄星迴歲之云暮桐華萍合春華載陽赤城旋軫之初白鵠會朝之際都人士女舉袂成帷襲靈風而共洽人和仰雲構而方知帝力豈止百年猶畏獨識軒轅之臺三壽作朋永閔姜嫄之廟大哉至矣無得稱焉夫妙本太無名垂不朽挺窮神知化之盛然後顯通幽洞靈之微立尊道貴德之教然後致還淳返朴之理漸於人爲富壽被於樂爲

聲詩告於太史爲典冊著於豐碑爲銘篆耿光顯被其在茲乎爰命下臣敬書今德詞曰邈哉至道悠哉妙門龜龍無物綿綿若存是生清濁爰闢乾坤迺生之民迺作之君德盛惟皇功高曰帝訪道崆峒求珠赤水下或稱有時稱至理三正循環鴻圖資始於惟基命赫矣皇唐運啓再造天垂百祥玄德升聞既壽永昌時乘白雲至于帝鄉穆穆嗣君雄雄下武禮極配天教先尊祖明發盡思熙然若睹敬佇仙游式嚴庭宇庭宇何在句金之陵丹霞夕暎白霧朝凝重屋四注崇臺九層雲生窈窕日麗觚稜三秀交陰五便分徑丹砂流液玄洲立靖柳谷絙烟雷池瀉鏡彷彿九華依稀七暎至誠則應有應斯來含真上客蕭閑逸才颺輪倏忽晨蓋徘徊浮黎認上方

文疑臺昔有聖人建言敷教救物以慈奉先以孝敬佩真契恭聞大道顯妙用於言象鼓淳風於億兆薦純嘏於無窮仰皇猷於克邵時歲己未十二月一日建

復禁山碑徐鉉爲文

華陽洞天金陵福地羣仙之所都會景福之所興作故其壇館之盛薦享之殷樵牧之禁冠於天下其所由來舊矣聖曆中微官失其守望拜之地多所榛蕪若廼真靈翔集玄貺盼饗興復之蹟必假異人天祐丁丑歲貞素先生王君棲霞始來此山恭佩上法徘徊地肺偃息朱陽永懷舊規期在必復先生潛德內映符籙外融名士通人道契冥合凡縞紵之贈晚信之資悉奉山門以成夙志於是由良常洞至雷平山十里而近入于氓隸者盡購贖之芻蕘不得輒至墟墓不得雜處藝樹蔽野植松爲門川梁必通榛穢必翦建方壇於雷平之上造高亭於良常之前朝修有致誠之地游居有稅駕之所姜巴古陌秦望舊封肅然清光復如開元天寶之盛矣先是紫陽之右有靈寶院焉真臺故基鞠爲茂草先生殫罄資用克構殿堂有開必先無遠弗届都督武陵康王奉錢百萬梁王造殿一區向道之徒咸助厥事曾未周歲惟新舊宮皆先生之力也昔大隈致襄城之駕庚桑化嶧嵎

之人是知道心唯微其應如響時則有若道士經若虛協規同志是攝是贊幹事以恪感物以誠績用不愆斯實尤賴先生以保大壬子歲夏四月悉書夫屋室之數疆畔所經請命于京師中禁于郡縣以授茅山都監鄧君棲一能事既畢數日而化期命玄應昧者不知夫仙階感召諒非一揆若廼神清氣靈骨錄標映受之於天也心虛器冲玄德充蔚基之於性也昭真垂教啓煥靈迹行之於勤也故策名紫素飛步黃庭流功儲慶必相參合然則先生之道其殆庶乎雖駕不留冥升日遠而高風可述遺範在人進而紀之翰墨之職也鄧君企慕前躅見托直書已未歲秋八月日記

上清真人許長史丹井銘碑

史舍道樓神九天人非色既丹井存焉射谷穀劉校寒泉分甘玉液流潤是田我來自西尋真紫陽若受耶謝如什魯重敬州翠霞未識銀朱噫此餘光
靈寶院記 陽紫道士王棲霞撰 吳使檢校太尉守中書 今東海徐公重述

粵靈寶者空洞赤書之秘號也鬱勃自然生天地先運無爲德被有爲作是以太上立德其次立功德者乾坤之大生功者生三中利益也苟德以潤身功能濟物即示輕舉如躡歸徑重喧囂於蛻脫耳且校籍所載真跡所存有非常人立非常功遂歷古今芳猷不絕茅東卿棟專以直道仕愷悌立身周物者智樂靜者仁云黨咸陽初依恒嶽尋棲此山介然掩跡克奉玄寂陶然若朴惟德動天遽繡衣持九錫之文芝蓋導三清之路玄鵠下盤感應無昧斯積業風習之感哉緬惟異代同途繼踵美蹟者諒我公矣公以踐履德業游泳忠信松高韻遠玉真芒寒景鍾麟史堂構葉蹟鳳池龍節鷹序分寵致君一匡錫戎所履威臨鐵壘貴擁朱輪智發未萌道了得一滿鞭舉而過改桑附謠而政遐謂我無欲民朴我無爲民化法黃老而熙帝載考始制而弘象教廼顧名都更植世福靈寶院者梁天監歲貞白陶先生弘景所創也始本昭真其號焉紫陽觀即長史宅界于東小茅嶺雷平

山列于南鍾山西朝焉良常北徹焉其餘勝
繁羣阜若衆星之環拱不可殫論先是迺臺
層漢攸閣匝雲秘三洞瑤文集丹丘羽客門
人周仙君子良勤修於是崇習玄風鍊金石
身騰烟霞輒時移代莫忘木之功寢泯及唐
太和中太尉贊皇李公每瞻遺蹟屢構遐緣
門師道士孫智清復討前址再建是院尋諸
舊號額曰靈寶爾後既偶兵焰靈致煨燼荆
棘相森凡材園長孤免往焉芻蕘往焉弗芟
弗薙歷五十載矣棲霞曾叨素業幼專不息
雖童叟獲名而屢厄其難跡不遑處遺構殆
空斷梗杳泊自北徂南幸托玄化遐欽茲境
幸諧所適迺勵奮鍾忘憂勞砌壇植松結茅
庇拙紉蘭餌木願言終適俄奉先齊王旨命
出居會府齒朝修事沐浴恩遇揚歷館仍甄
道街表命服弄璋再篇是挺是銘洎我公移
鎮是邦自以風痺厥躬告從谷隱公遂捨俸
錢一百萬俾於舊基別崇利有稟命之際塵
疊勉勵夙夜匪懈思竭克勤冀荷恩教噫事
難謀始智寡周防且虎視非一雀之圖而雀

終噪蟾盈非片雲可同而雲或掩時或理非
契也非台曜覽幽幾止終廢繇是度撥經營
月期日就博邀執斷量材取制墻茨必裏圖
憂必難平瓦礫以等阜屏豺狼而斷羣力工
約萬綿歲靡替剏督奇丹腹晒妙造正殿
三間中塑

靈寶天尊景從砌壇三級三門三間環繞廊
廡一十六間并葺壇整額降真堂續連於內
重新沼沚再築垣墻東北隅即忠義太保公
之季弟先於舊閣基建瑞像殿三間兩厦中
塑羊角山應現

老君西南隅向日三官堂三間塑像爰其
狀亭亭其勢金碧其飾輪奐其映瓦疊駕翠
甍差鳳翹睥容禮而若眄侍衛瞻而乍愕旌
幢翻翻雲鶴軒軒對峙崛起異疑飛來非我
公願力斯應像教斯感即荒茵之域安歛睹
壯麗乎足使真風永布靈致恒芬配天地而
齊壽總山川而介福噩噩烈烈可久可大棲
霞智慚絕妙才非述作蓋受恩于始受命于
此竭誠竭慮迨茲成功聊實記於質文呈台

覽而刊於將來也時大和三年重光單闕歲
九月乙酉朔九日癸巳謹記錄清光緒大夫
侍行句容縣令知縣事黃鶴慶奉台首月備
成仁句當道士經若虛朱懷德雲水道士呂
子元書并篆額正一弟
子沈德謙盡心助善

體玄先生潘專師碑頌右拾遺陳
子昂撰

專師業尚冲密勤慈幽深理心事天所寶惟
奮絕聖棄智不耀其光故真感冥期珍圖秘
學性與天道不可得而聞也若迺崇標曠迹
遐情遠思志摩青雲遙視紫閣高宗每降鸞
輦親詣精廬專師身不下堂接手而已廼歎
曰大丈夫業於道不能投身霄嶺滅影雲林
而疲病此山以煩世主吾之過乎遂欲東求
蓬萊孤舟入海屬天皇敷駕斯道新歎逾深
遲躑山隅絕策未往既而金格有命饒蠻遺
區於戲昔姑射有神人堯輕天下崆峒有至
道軒屈順風玄真高蹤萬古同德何其盛哉
專師有弟子十人並仙階之秀然鸞姿鳳骨
眇愛雲松者唯潁川韓法昭河內司馬子微
皆稟命瑶庭密受瓊室專太清之業遺下仙
之傳谷汲是耕服勤於我蓋歷歲紀也始專

師受籙於茅山昇玄王君王君受道於華陽
隱居陶公陶公至子微二百歲矣而玄標仙
骨雅似華陽夫階真蹈實鍊景游化者其心
必有類乎昭等永惟尊師靈迹洞業高深邁
古而棄世往矣其若之何廼斷石幽山申頌

玄德頌曰

四十

十一

觀元化兮求古之列仙得瑤圖與金鼎信元
符之自然神與道而為一天與人兮相連苟
精守以專密必駕景而凌烟丹立不死若美
門子黃宮度世兮吾體玄玄至德兮洵淑
美冲心養和保元始初學茅山濟江水通入
華陽洞天裏道逢真人昇玄子授以寶書青
台旨令守嵩陽玉女峯雲棲窮林今五紀聖
人以萬機為貴而我以天下為累聖人以大
寶為尊而我以天下為煩是以冥居於崐崘
寄遺迹於軒轅有唐高宗兮天子之光好道
樂仙兮思彼雲鄉千旌萬騎兮翠鳳凰遊游
汝海兮箕山陽朝拜白茅紫房齋心潔意
緬相望祈問玉真及
玉皇何以得之受天昌黃庭中人在子身竊

窈冥冥精其真去汝驕氣與淫神勤能思之
道自親遂解形而遺世乘白雲而上賓弟子
不知其所往也廼刻石以思真

唐漢東紫陽先生碑銘西李

嗚呼紫陽竟天其志以默化不昭然白日而

昇九天乎或將潛實皇王非世所測十一

挺列仙明拔之英姿明堂平白長耳廣顙揮

手振骨百關有聲殊毛秀采居然逸異十

而直達何龜鶴早世蟪蛄延秋元命乎遭命

乎余長息三日惜於變化之理先生姓胡氏

族也代業黃老門清儒素皆龍脫世網

鴻冥高雲但貴天爵何微閱閼始八歲經仙

城山十有清都紫微之遐想九歲出家十

二休糧二十游衡山雲尋洞府水涉溟壑神

王八召為威儀及天下採經使因遇諸真

人受赤丹陽精石景水母故常吸飛根吞日

寃密而修之六所居苦竹院置殮霞之樓

手植雙桂棲遲其下聞金陵之墟道始盛於

三茅波乎四許華陽七陶隱居傳昇玄子

昇玄子傳體玄體玄傳貞一先生貞一先生

傳天師李含光李含光合契乎紫陽五於

神農之里南抵朱陵北越白水稟訓門下者

三千餘人隣境牧守移風問道忽遇先生之

宴坐五隱机鴈行而前為時見重多此類

也天寶初威儀元丹立道門龍鳳厚禮致屈

傳籙于嵩山東京大唐二宮三請固辭偃

卧未幾而詔書下責不得已而行入宮一革

軌儀大變都邑然海鳥愁藏文之享援狙裂

周公之衣志往迹留稱疾辭帝尅期離闕臨

別自祭其文曰神將馱余余非馱世廼顧命

姪道士胡齊物具平肩輿歸骨舊土王公卿

士送及龍門次王喬之祠目若有觀泊然而

化天香引道尸輕空衣及本郡太守裴公以

幡華郊迎舉郭雷動四開顏如生觀者日

萬羣議駭俗至其年十月二十三日葬于郭

東之新松山春秋六十有二先生含弘光大

不修小節書不盡妙辭有崩雲之勢文非風

工時動雕龍之作存也宇宙而無光歿也浪

化而蟬蛻豈八乎有鄉僧貞倩雅仗才氣

請余為銘余與紫陽神交飽殮素論十得其

九弟子元丹丘等咸思鸞鳳之儀羽想珠玉之雲氣灑掃松月載揚仙風篆石頌德與茲山不朽詞曰

賢哉仙士六十而化光光紫陽善與時而為龍蛇固亦以生死為晝夜有力者挈之而趨

劫運類落終歸於無惟元神不滅湛然清都

延陵既歿仲尼嗚呼青青松柏離離山隅篆

石頌德名揚八區右二碑附錄體玄潘宗師碑在嵩山雍州司功

王適撰弟子司馬子微書大周聖曆二年所建

明皇受錄碑御製

經藏碑檢校尚書彭

潤州茅山崇元觀碑左拾遺孫處玄撰楊幽經書

孫先生碑三傳錄記

桐宇宮碑柳誠撰

徐法師碑大理評事張生撰

白鶴廟記柳誠撰張從申書

玉霄菴碑和州史君盧士年撰

下泊宮記桃源黃洞元撰

凝和陳先生碑

石並闕文

茅山志卷之二十四

十六

茅山志卷之二十五

火一

上清嗣宗師劉大彬這

錄金石篇

御製觀龍歌并序

茅山記云雷平池火院宮池並有小黑龍游

其中今少觀者又有郭真人池池中常有之

靈物變化所處不一人或取之出山雖絨閑

於器皿中皆潛失焉近遣中使任文慶醮祭

名山為民祈福文慶得取一龍來獻因將二

龍以行中路風雨果失其一持一龍至闕下

細觀其形誠有可異故為歌以紀之歌曰

四靈之長惟虬龍虬龍變化因難同三茅福

地羣仙宅靈物潛形在此中池內仙人馴擾

得至今隱顯誰能測乘雲蠢動獨標奇行雨

嘉生皆荷力常人競取暫從心纔出山檻方

無處尋中使勤求深有意欲獻明廷芳陳上

瑞初禱一龍朝魏闕偶挹二龍離洞穴人心

龍心若符契一去一住何神異我觀真龍幸

不驚至誠祝龍龍好聽但期風雨年年順庶

使倉箱處處盈大中祥符三年六月

宋天聖皇太后受上清錄記上清大師

賜紫臣朱自英撰御書院樞密臣孟應之奉聖旨書并篆額

皇宋應運之四葉聖君在宥之三年聖母皇

太后劉氏九靈分粹三元毓神流光開泰之

期握符聖明之化內以肅雍九族外以緝熙

庶政萬機之暇宅心虛無之表凝神太漠之

鄉金妃拂筵于琳碧之堂玉華散馨於虛白

之室而又澄神澹思誦黃庭二景經志意內

修晨夕志倦豈獨拘羈制冕上符高聖之言

蓋亦務本還淳下蔭普天之衆于以觀三素

思九真揖儀璘玩璫珮南真依稀而密盼西

母髣髴以宴觀勝蠻之應繼日而昭積累之

功卜年而進信乎仙可學而道不虛行矣仍

念研精尚鮮未臻道源聞南嶽紫虛元君魏

夫人昔以東晉興寧甲子歲先農日以小有

天王清虛真人所授上清大洞寶文下教于

茅山東華真人楊君洎上清仙侯許長史迄

後靈源真系接武華陽道葉仙枝流芳寰海

繇是迺詔玉清昭應宮沖妙大師皇甫希及

尋贍王魏之文研揚許之迹得上清三品神

經玉清隱書九清衆秘與金神二虎八景玉
錄上皇玉諱元始譜錄流金火鈴迴車畢道
三元玉檢九鳳靈章紫文白帶太微黃書瑤
宮靈飛等錄凡十卷金仙玉馬等一十五券
依科備辦金龍玉魚金羊銀鷹青絲金鈕雲
錦鳳文碧霞拂塵之羅絳章落尸之帛四規
明鏡景霞靈劍五色絲繒上清法服盟文禮
物莫不周悉先遣中使賁密詞詣南嶽致告
于紫虛元君默允冥旨續命入內侍省西
頭供奉官臣康從政入內侍省內侍殿頭
勾當御藥院臣江德用并詔右街副道錄知
玉清昭應宮事同管勾左右街教門公事冲
真大師賜紫臣李知損左街都監壽寧觀住
持明真大師臣石知章玉清昭應宮副直歲
宣教大師賜紫臣周遂良玉清昭應宮住持
冲妙大師賜紫臣皇甫希及玉清昭應宮同
住持冲秘大師賜紫臣薛清和等同賁青詞
黃素一行禮信就江寧府茅山崇禧觀開建
上清黃壇預啓玉錄道場七晝夜散日設醮
三百六十分位依科傳度訖別設謝恩道場

三晝夜設闔山道士女冠大齋一中投送金
龍玉簡金環玉魚于華陽洞燕洞金山水府
于以告盟七聖于以致誠九清伸授受之儀
登師資之禮始以輶軒至日靈鶴低迎於羽
葆當建齋之夕有雲遠布於層霄宿露其文
以祈感預陳精禱以伸款蘭膏晃爾璧月
然百神受釐以効祥五嶽衛靈而薦祉中夜
靈風颯至嘉雨霈然須臾之頃銀漢森列星
斗爛如咸云風伯掃壇雨師洒席觀其所以
不亦宜乎及啓傳之旦九霞流光之輝熠燦
而燦照三素飛煙之氣縹緲以浮空飄歛萃
焉霓旌煥焉羽儀僊焉萬靈肅然當分金列
契之際皓鶴復翔于壇上絳霞紛繞於山中
蕙風襲人靈芬郁野矧夫衆妙多門而學則
有序至神無方而感則無待斯以見我后用
心之精誠也符健順服人神降靈仙契冥與
非浩劫累崇之德積生致尚之果其孰能臻
於此焉是知令手善始則美克有終謀之以
道何患不臧若然者八景飛霞之輦三元流
雲之宴九色鳳腦之饌十精徊水之漿靡日

而致之矣恭惟聖念奉若秘文蓋欲昭事昊
穹保寧真主固宗枋於億載福民庶之三登
永載干戈同承富壽者也至於後天之算無
疆之祚金枝之遠蒼生之賜不其宜哉觀一
代之能事考百王之末書用敢直筆以記之

云耳時天聖三年甲子歲四月戊午朔二十

三日庚辰謹記

茅山五雲觀記

高書同中書門下平章事上柱國監
淵聖師上清大洞宗師賜紫臣朱自英
陳壇吏師上清大洞宗師賜紫臣朱自英

封二千七百
戶晏殊撰

丞相莫文穆公即世之明年其小君許國夫
人聞于內朝請建道館于茅山之南麓以爲
公棲神之所聖上追念大臣哀憐時思特命
郡守舊相李公迪主其營繕又勅公門下吏
右侍禁張得一董其力役後十四年夫人以
制度之未備申命公之猶子右班殿直士顯
往增葺焉始賜名曰五雲觀僞工於天聖之
丙寅已事於康定之庚辰其廣袤因崖巖之
回抱其與昨視科文之品第崇堂以宅省像

秘殿以嚴真供層閣崛起廣除環構脩廊蔓
衍高源濬開庖廚有方廐庫有次其外則壇
場著前朝之蹟洞穴表靈峯之蘊喬松夾植
陰行旅之勞良田外營資糗糧之給妙擇勤
士恭修秘式其所以事奉遺貌安妥淨衆者
固不周具惟道家者流有清靜沖虛之說歸
真復朴之教後代悅其風者觸類而長於是
乎幽經秘訣之敷演清都洞臺之照臨三雲
八景之鍊修童初廣寒之游集上自后辟迄
于臣民用資化源著在彙典初真宗皇帝既
僭武節聿修文事封泰山款后土謁仙里建
靈宮務輯一王之儀邈追前代之盛公於是
時都將相之重極風雲之遇與一二元老鴻
儒碩生內則翊贊宸猷外則討論經禮用
削蕪之 密荷沃心之賞借前著而謀定申
其風而今行至如檢玉介丘瘞繒睢壤近甸
巡豫嘉壇哀對咸遵秘錄聿彰勤任用三洞
之科式先八鑒而啓行公則參儀衛之職焉
寅受天瑞欽崇祖烈五嶽陞號靈泉効祉並
敬真宇茂昭元貺公又歷置使之任焉總集

髦雋紛披載籍顯百世之龜鑑述方來之矩
矱復詔公典領焉公又以混元之法有助亨
會函笈所蘊源流寔繁欣逢盛明用得論次
迺復選通達其學者校讎而辨正焉名山洞
室之藏金簡玉文之萃多所刊定訖無譌謬
本至性之沖漠益聖朝之參會徜徉乎叢書
太霞之境諷詠乎廣韶曲素之篇寤寐亦松
之游沉酣金七之藥間接真士高談妙樞由
是脩然有乘雲騎鶴離人拔俗之想每出沐
休暇元辰令吉特屏世事虔修淨醮壇宇嚴
遼旌旛颯儼杳塵寰之不接疑景象之有聞
絲襪寢父積精忘疲乾興壬戌歲分符林陵
眷言茲山實邇郊次俄奉中詔即仰嘉薦注
慕靈壤徘徊淨域道肅自得澹乎忘歸隱士
朱自英者肥遯中巖載更年所公樂其素約
究若石友還朝東釣之再歲以其名聞召至
都下宴語綢繆異於常倫及其還山又約他
日卜鄰洞府音旨隆密大君異之後數月而
公捐館舍且有遺語卜茲締構前後所費私
帑凡百五十萬官給不預焉續詔朱自英往

來臨蒞之皆從公之素志也按真誥言句曲
地肺土良水清謂之華陽洞天可以度世種
民是處三災不干又言至忠至孝之人皆先
受靈職次爲列仙歲登降其幽明如人間之
考績則公之結思崇岫歸誠妙象豈徒然哉
矧夫出應賢運越登極位佐時勲大用物精
多非持受靈氣躋踰群品曷以協昌辰之偉
任非然契仙籙往階真格曷以顯太和之挺
生質於前聞其有冥合鳴嚕乘時奮庸握文
武之柄尊主庇物罄其蘊懷執方持衡不疚
風議烜赫輝耀以功名自終然後脫遺世氛
與羨門偃佺之徒相期於煙靄之際不其盛
與惟夫人恪奉治命無忘道追其嗣子殿中
丞寅亮瞿瞿協心克終勝槩足播徽範永光
圖史謂殊夙以文翰游公館宇見託撰述著
之金石是用拜禮命之辱而忘其陋蕪公姓
王氏諱欽若字定國夫人姓李氏公之邑里
世系歷官差次上載史牒下刊碑誌此得畧
而不書慶曆二年歲次壬午十月乙卯記畧
道判兼管觀亭賜紫五子宣 雷平胡快書
丹 將仕郎守句容縣尉陸絳句當立石

茅山第二十三代上清大洞國師乾

元觀妙先生幽光顯揚之碑雲陽南郭陳輔

造七閣西山蔡仍書并題額

先生姓朱氏諱自英字隱芝句曲朱陽里人

也生八九歲牧牛郭干村兒曹巷廬吹笛鞭

角馳牛陟降為戲先生辭不能牧兒咭焉先

生笑曰爾騎牛曷若我騎鶴徐徐出笛袖間

裂竹而鶴舞空下先生跨背鶴騰輒墜牧兒

駭呼自是從牧時能致鶴或謂不祥父母遂

棄之入道師玉晨觀道士朱文吉訓為鍊業

先生過目掩卷曰熟矣師蓋未能奇也十有

一歲度為道士仙標玉骨固已稜稜迥出風

塵外先生幼生村野未始目吾儒經史與夫

道家仙籍間焚香誦六經百子三乘三十六

部衮衮不絕口四遠老人夙學願見眉宇先

生坐一室閉目溫繹聽者按無一字遺及長

把筆為文章混然天成尤精風雅句句警策

發藥契經如空洞之音焉金陵牧馬公金允道

吏持書置而弗問其師恐告以未善先生曰

不然勞我矣自爾偕明真張鍊師紹英捫蘿

上積金峯密天市壇龕火浣而棲二人卻轂

以至骨立餐沆瀣奔三景修儀璘璫珮之法

以速輕舉居無何戶外之屢滿顧謂張曰如

何此期絕迹而躡我衆不泰多事乎張曰子

勿殫人將擲子之不暇如其殫天下斷有不

嗅者何必行先生曰一住一行亦各其志奚

必同於是旦疊壇而夕渡江將拜混元於毫

杜禮天師於青城方其歷關而西抵劔門道

達一吏脩臂鶴髮方目憤踴踞坐咄曰少冠

奚自曰自華陽復而曰奚適曰如蜀如蜀奚

求曰求大藥吏仰天大笑曰少冠不聞陶隱

居乎可人也五鍊而丹弗就因然後發三朝

浮名之嘆遂不成白晝騰踏迺從狗竇一過

汎汝骨法未就道僅小成若不潛晦光曜將

折揚汝以仁義剗則汝以禮樂為天戮民良

可哀先生曰投吾鑿室吾寢命之矣吏於是

指指瞑想曰隱居告余七百年後當有赤子

出於茅山殆此應已此語應登其隱訣云命先生閉目

曰謹執余裾唯覺林梢拂足開目迺坐青城

山下遂咬以金鼎九轉飛精劔法事竟先生

曰血肉目不識丈人他日容進復如穀城

影像可乎叟曰世號陳鐵脚即吾已頃年先

帝太宗命遣求藥海上適有倥傯安期之滯

至無及矣言訖失叟所在先生出關欲遂東

歸復思三茅道藏缺謫題載游瀨鄉校讎太

清古本居歲餘常日有丐徒武姓提弊篋就

齋堂石盤倒餘食而去衆訶不動候先生滌

器已即相訊問黃衣初臘競舉手揶揄之曰

朱茅山等類此丐索伍仙遂捨去約先生旦

會旗亭酒家話心焉顧謂先生曰汝真法器

第故習未除不洒濯終汝果能往否先生曰

敢不從命藏睛少選觸耳聞然忽睹闌闌顧

謂先生曰此河中府也侵尋及河截流安涉

先生踵之若蹈平陸接岸武欣欣曰信士可

教乎吾水星童子也汝此一行已抵度形太

陰然須幽屏不厭深眇大匠勿示人以璞不

爾未易知也殊時復會審究夷微遠背而去

先生愴恨暨還故山剗心剔志寶二師之誨

存三守一追楊許之烈未幾玉清昭應宮成

詔選名行工部侍郎薛公映以先生名上朝

廷遣使召先生表辭尋而宮車晏駕章聖上
仙仁廟嗣服明肅太后垂簾丁晉公謂王冀
公欽若並薦章三上使兩至先生復辭謝表
溫雅有儒臣高世之風朝廷嘉之故晉公簡
詩曰大隱何妨混朝市三天澄淨謁元君冀
公簡詩曰何事故人違舊約負琴携鶴待相
隨先生繼答詞極清妙二相上之皇太后追
懷華陽洞天為先帝祈嗣感應之地故特喻
二重臣強起先生府縣敦迫且言得罪先生
不得已遂受命勅朱自英未經朝見百官禁
不得通謁雖梁器陶景唐禮具筠未足方萬
分尋奉旨登寶符閣觀天書累表乞退二聖
眷遇方隆以重違雅尚先生得請東歸故鄉
決志精思心馳太空之境矣朝廷賜勞車蓋
相望先是中貴人傳上與太后慰籍語山中
百須時上恩許一新諸靖先生對道士當巖
居穴處勤修上法遵保大茅司命之苦行然
可報國恩若効西方土木裝嚴非老氏慈儉
之教唯乞近山立常寧一鎮為游客行商息
肩之所朝廷從之道藏三洞四階靈文寶笈

寶金繩玉檢之秘傳大法自魏南嶽以降逮
先生凡二十有三代明肅太后欲踵紫虛故
事祈授畢法遂尊朱張為度保師賜號觀妙
明真建乾元天聖兩觀以旌師資先生於斯
不辭當是時琅玕飛精神景三鑪方四轉火
矣居一日江寧府遞得蜀州守蕭貫傳所謂
道士武抱一書者先生執書泣數行下弟子
莫測所以書貴姓名顯耀天機暴露之咎意
警先生避俗藏身中宵引去猶為可救文綴
藻練綽有可觀縉紳先生簪裳淨侶警其風
聲有繪像刻石傳于世所謂武仙童者大聖
七年大丹成鼎輒覆丹竈弟子毛奉素密啓
先生視丹歎息曰桑榆既迫狗竇一過信矣
至其年十一月解駕春秋五十有三即夕掩
關初弟子母入頗異常時夜將半弟子擁爐
壇房候警效穴憲朱衣使者執冊立庭下雖
儀容甚都光燁鑑人童子輒誰何徐徐答曰
真官下盧文秀帝遣迎朱真人耳弟子輩牢
局惕息不復出頃之先生問夜對曰視星三
鼓須臾又問玉晨鐘聲已答曰未也連問者

數四鐘既聲先生呼侍衛曰吾行矣弟子入
但見危坐手執梓符所賜玉如意儼然是夕
天苦寒先生項生圓光溫融一室玉體汗浹
若珠璣然大斂際有聲隱隱自其棺出法固
謂之尸解舉木疑空衣耳前一日陶真人坐
日無故震者三大衆咸異先生曰若何與汝
事繼夕遷神鶴唳旋壇谷鳴若簫凡三日句
容權令酷吏也丞相李公迪出鎮遣屬官致
詞邀先生俾縣加道脩肅候先生過邑不顧
而去令陰衙之還又不少留左右曰縣令朝
服道左當下車一見先生曰非不願也顧血
腥苦難近耳今聞益志至是按負租廛盡逐
先生徒弟逃難不暇而嘉祥異瑞為其所抑
誣以中丹毒死九重寥廓亦無從而達越明
年今去任始克葬反真之宅卜鬱岡西麓方
隅洞之東距李真人丹井若干步高三尺者
是已嗚呼以先生夙淨基脩宜無不圓猶有
不幸況悠悠之徒後五十有九載歲在
徐先生侍香弟子石致柔年過八十即索簡
得西劍州道客任懷一錄先生事頗為疏畧

漫滅過半矣跪而泣曰先生之道可扼於一時庸拒鬱於千載念可以發潛德之幽光非夫子而誰其意以僕九十歲偏親先生三景弟子謂得之詳僕歸以告吾親曰石氏子之謂迺吾素志汝盍表大宗師奉命藻雪涓辰而書迺拜手稽首而獻頌曰緊高陽氏之遺裔子誕已字之靈墟幼紫陽之羽楊子應赤子之誠符度劍嶺之危哉子執鐵脚之長裾憑黃河以徒涉子躡星童之雙鳧方帝三葉之慶祥子屬春宮之位虛祀高標以詔弓韜兮洞天輟司命之友于膺玉女之受度子續元君之紫虛館昭應之隱几兮閭實符而觀天書上方邊崆峒順下風兮俄泠然而及歸途攀帝恩而戀戀兮奈仙期之敢踰朝辭絳闕而暮復繡嶺兮真官已降于庭除足三乘圓七果兮將贅身而凌空無損懸輪御六氣兮竟歸神于清都系曰保深息兮煙霞結廬邀玄游兮龍虎駭興悵超遙其無蹤存桐栢之丹壚青牛谷冷兮石壇蘚合白榆風蕭兮玉棺綢孤侯虛皇之在宥綿寶錄於宗圖

武仙童書碑上刻仙童小像道士戴道成書

抱一啓肅傲昇平輕欺富貴扶疎丹桂難藏明月之光峭絕青山莫滯白雲之跡言之不足道在其中名姓已彰四海形神別隱三山歲月何定鉛汞何求如或因循空成潦倒真珠圓而美之為美絳雪凝而自然而然在市孰非入山孰是水積成海氣積成神匪我相知少言休語抱一貨藥而利名何有和光而道俗寧殊輕舉行修長生道在多是逍遙於雲水未嘗暴露露於天機知者誰言行者自見聊舒懇悃以代笑譚一日三秋咫尺萬里陽氣如煙荒郊似水更保沖和別休清問今因魚鴈聊附寸心書到山前已申鶴望謹狀不宣

故交道士武且上

道者之右 二月二日

聖主搜羅物外人總來金闕見靈真餘余不願彰名姓別得田元道可親我知已有好名傳世早須速別隱深山他時異日相看去也
○夕妙明

觀妙先生曩嘗邂逅武仙童後先生於仁廟時應詔還山忽接仙童書殷勤誨諭意警先生韶光晦迹世不耀名其真墨蹟政和四年八月間聖上道君皇帝搜羅天下奇異之文遂為本邑句容令黃學士唐傳索取以進於戲斯本舊偶摹寫今命工刊于石庶永其傳焉時政和八年歲在戊戌仲秋望日茅山乾元觀住持知觀道士楊守程題誌

江寧府茅山崇禧觀碑銘朝請郎新羅知洪州

軍州事兼管內勸農事充江南西路兵馬鈐轄賜紫金魚袋張商英撰
朝散郎金州軍州判官公事輕車都尉賜緋魚袋王古書
請即充寶文閣待制知廣州軍州事兼廣南東路安撫使護軍賜紫金魚袋王等
篆額

東南之望曰句曲山蓋華陽洞天肺福地易遷舍真之所宅司命童初之所治晉宋以來得道之士二許楊陶遺壇故宅猶存存者宮觀十二崇禧總之國家靈承天心敷錫民福鍤金之剋鏤玉之簡妙真之香丹素之詞歲修常典間遣王人設官以提其綱賜田以

瞻其衆宜其宮闕壯麗列聖下居廊廡深嚴萬靈侍衛至者悚然有以移其視聽居者肅然有以洗其心志仙科祕範之所出寶章靈篆之所宗而希夷淡泊之門寂寞無爲之教學士大夫未之或講州縣政事又非所先田租所入悉籠於官道侶計口而賦糧有司互券而出納方斗筭之鈎考孰土木之暇議上下顧望歲月因循屋顛而不持榱故而不葺圯廢而不興垣頽而不作實文待制何公君表在元祐中以趣向背時提舉西京崇福宮居金陵嘗至山中熟知其弊紹聖親政召對便殿明年移鎮於此仲發彙志議營善之會商英謫蒞管庫公倂圖以授商英曰子於道家之學博且久矣凡向背與開闔之不如經者其悉據古考正之商英視圖南面三門則道俗出入之所由也三清北極本命三殿相直而玉皇殿迺在東隅商英謹按老子之書曰天法道道法自然自然者清氣之始也其天爲清微其境爲玉清其天尊爲元始其帝爲玉皇所謂道者氣之純清也其天爲禹餘

其境爲上清其太上爲大道玉晨君其帝爲天皇所謂天者氣之積清也其天爲太赤其境爲太清其太上爲老君其帝爲北極本命者支干之神以統於北極者也北極者天中之樞以承玉皇者也今以北極次三清以本命次北極而玉皇居左非道之序也神而來格亦莫安於其位矣請先玉皇而後北極而左本命三門者神靈之所由也非祠醮則闔之東建道院西設賓館如此則尊卑不相亂道俗不相淆人神不相雜矣公曰善乎論也茲山宮宇古今廢置不一道術之士有在於是者亦已多矣曾亡一人以三氣三天三尊三帝之說辯正升降者豈崇無而復靜者或闕於羣有之用造有以致動者或昧於至無之體代正移句容縣如子之議因而完之矣越明年五月玉皇殿成奉安之日有雙白鶴終日徊翔遠啖其上於是上清大洞法師劉混康與其授錄弟子曰異時白鶴常以三月十八日來集或有或無亦不常也今殿成而鶴降非何公崇敬之誠默與真契其何以召

此祥請繪公像于別室以永我邦人之思已事而求記於商英迺序而系之以頌曰一氣之先強名自然致虛爲道運道成天三彰一隱一立三全分爲九氣列爲八埏我我茅峯東南之望帝居道祠于山下上厥初經管先後錯英何公正之靈報如響儀儀若鶴來自雲霄誰其駕之於焉逍遙氣合太冲神游汝家鑒觀在下德馨孔昭宮室絢綯巖谷煥煥風馬霓旌侯止侯燕維山有祥維國有良天子萬年賚及四方何公于藩百治皆具神之聽之亦惟公故錫爾嘉穀宜其邦人介爾多祐耆寧厥身邦人感仰繪公之像配山久長以對景貺紹聖三年十月八日山門都紫雲亭之江寧府觀察推官提舉修造丁維承奉即知江寧府句容縣事兼管句容茅山崇禧觀武騎尉杜紹朝奉郎充實文閣待制知江寧府軍府事充江南東路兵馬鈐轄桂陽縣紫雲金魚宣和御製化道文碑大道無方微妙莫測包含造化陶育乾坤是以國家虔奉上天欽崇至道恢闡化元咸歸正教眷惟厥初生民以來皆未知其向道之

方者日固久矣每念至此則惻然興歎以謂道者聖人體之以爲用百姓日用而不知由是存心秘檢思有篤厚人倫訂正謬俗故發諄諄之誨俾其來者皆得嚮明歸道也今天大擾擾羣動不知妙道之生育而反事象教之殊風既習其風復師其法雷同以寂滅爲真樂使暗識之民動甘死地廼爲常理可不憫此沉迷乎且人生天地之間處最靈之首當受生於胞胎之中三元育養九氣結形戴天履地莫不本乎道者也其有上智之人夙稟靈秀不待學而自然嚮道者千萬之中或三數人而已逮夫中智以上者區區於名教利祿之間雖知道之慈育姑徇親愛之累尚滯聲色之娛故若亡若存也其下智之民甘食美服安居樂俗悉皆懵然冥其向偽背真殊不知我之形氣皆道之所生也且人在道猶魚之在水魚失水則死人失道當何如哉凡百羣倫固宜守道也夫道也者虛無之總造化之源浩曠莫得其端者冥冥窮其奧萬象以之而生五音以之而成故六合雖巨未離

其內秋豪雖小待之成體其香邈也不可階升其應感也不疾而速謂之渾淪渾淪太極之宗也故太極生兩儀兩儀者天地也清氣升而天濁氣降而地沖和結而爲人故五緯宣精三光下濟而成三才也其施化也則有

炎涼燥濕之候有方圓形器之名有盈虧消息之度故日月麗乎天星辰行其紀鼓之以雷霆潤之以風雨播時百穀以養民人蕃殖聖育以阜常產然後人各成材物遂其性故得耕而食織而衣欣樂乎太平之世者一皆妙道生成養育之所致也觀夫伏羲三代而降雖稱號不同其於導事天則一也今夫蔽蒙倒置之民宜究其理欽而奉之不亦善乎況昭昭然在上者可畏也今發明訓諭宣救積習之謬弘益天下之福庶使遷善貴生絜然曉悟一新其志歸奉道真上以協天心之享下以副膺乾紹述之意如此則皇極休光之美綿亘乎道德之鄉浹洽乎仁壽之域豈不偉歟大觀庚寅先天節日宣和殿製和
二年十一月己未中靜和法師宣
之立石 嗣漢三十代天師張繼先書

茅山志卷之二十六

大二

上清嗣宗師劉大彬造

錄金石篇

宋碑

茅山元符觀頌碑

承務郎知江寧府句容縣事兼管勾

茅山崇禧觀
臣鮑煥辭撰

維宋受命百有四十六年天人和同萬物咸多重光累休越于古初哲宗皇帝推輯福應報禮上下游心道真側席異人於是茅山上清三景法師劉混康以道業聞于東南迺遣中謁者致禮意欲必起之混康不得辭既朝遂住持上清儲祥宮恩數頻煩爲國廣成已而求還故山許之賜所居爲元符觀今皇帝既親萬機遵復先志治人事神誠意感格而專德樂道猶恐不及復遣使迎致先生于京師待遇之禮悉用元符故事有加焉未幾告歸賜號葆真觀妙先生詔刻九老仙都君玉印及白玉念珠燒香簡紅羅龍扇諸物又親御毫楮爲書度人清靜六甲神符三經以寵賚之皆驚世駭目不可名之寶皇帝若曰先

帝所以經營元符於名山蓋將揭虔安靈祈
天水命用輔相我國家朕既嗣事而觀之基
構有未備其敢皇寧廼命江東轉運司凡土
木工費悉爲之調度別降御前空名祠部度
牒百道以助其用委官護作仍增崇三茅君
位號司命君曰司命太元妙道真君定錄君
曰定錄冲靜真人保命君曰保命冲惠真人
又初尚方取金玉瑞物依天之命作爲九錫
以顯揚三君之景光于無窮部使者與郡縣
吏虔上之命夙不敢懈經始

年正

月九日粵崇寧五月八月十五日告成重門

夾 萬福殿以祠三茅君東爲景

福萬年殿以祠皇帝 飛天

法輪以藏恩賜之書傍爲崇寧閣以奉

參列多勒宸翰虹光寶氣仰薄

璿極天龍共瞻林壑 至於鐘閣醮壇齋
房無室亦無一不協于度總四百有餘區高
明傑大工盡其技金碧丹堊之飾煒煌昭爛
于崇岡秀嶺之上煙霞霏微草木蔥蒨望之
若神變幻化莫可圖寫即之肅然若雲車風

馬往來於空曠有無之間不可得而知也可
謂盛矣臣謹按句曲山於仙經爲金壇華陽
之天山川神秀據東南一都會漢晉以還世
著靈蹟往往禁樵牧營館御以祈福祥本朝
專奉之儀務隆典則而山爲見符命靈光仙

籙慶雲紫氣合於圖牒者史不絕書然臣嘗
謂寶玉神鼎金茵紫芝皇天上帝寶藏之茲
山所昇付後世太平有道之主苟匪其時不
虛其應而歷代方士隱人弗揣其本徘徊巖
阿冀幸遭遇良足憫笑至聞華陽有司命之

庭則又築室廬欲據其勝結構相望而終莫
得其處逮元符既建歸然居積金之下深崦
長谷蒼崖翠壁隱見斷續臣僕而朝然後知
天作而地藏之蓋有待也恭惟皇帝陛下聰
明睿智得於天縱孝悌之行通于神明自初

紹服駿惠前烈改元命曆具著聖意延登同
德以熙天功罷黜奇袤用勸多士朝廷旣治
蠻夷率服頌聲已作協氣自應天高地下日
星明潤河不怒溢委蛇而流坤靈効珍成我
帝肅清海內外獲蒙豐年盛德大業顯著如

此方且精思於清靜無爲之學屈已於巖穴
有道之士增築殊館以迎三神之釐是宜無
疆之祚集于一人億萬斯年永作民主所謂
寶玉神鼎金茵紫芝殆將薦于帝廷享于宗
廟以昭明應而積金清淑之氣蜿蜒扶輿磅
礴鬱第亦欲產祥儲休膚寸而合燕及四海
若時雨彰示方來爲國福地嗚呼斯實聖時
甚盛之舉萬方黎庶瞻望驩呼不能嘿已者
臣愚不勝悵悵忘其固陋昧死上獻元符觀
頌頌曰

於皇上帝傳臨萬國分真山川以相有德巖
巖積金曲水之澌仙聖所宅望彼吳楚河圖
幽贊我不敢誣達時休明迺錫之符秦人矜
夸鼓鍾山顛神不報享瘞璧而旋降及近世
祠祝日勤馳馭寥寥亦莫或聞我嘗元符冠
冕林麓欽崇三真百靈懷服乘彼白雲陟降
帝所無以致之孰爲來者崇寧之政視古無
前有不吾信酌民之言乾運其剛離麗其明
先訓是若大猷是經校姦屏偷賞信刑威羣
公庶尹千載一時士敏于學吏恪其職除我

戈矛長我泰稷外攘內修成底厥緒堪堪羣生式歌且舞彼蒼匪高有聽在下申命百神錫以純嘏華陽之天密邇靈囿流慶隕祉益不耿後卿雲之下靈芝煌煌鳴鶴飛舞來獻其祥太史占之實應壽考媚茲一人後天難老皇帝曰嘻朕何私焉敘時五福播之黎元羣臣拜手天子萬壽越彌億年作民父母明明天子事帝以實有道是遵無文成秩符既存臻不忘齊衆明明天子景命維新置我神器不震不騫德音孔臧與世永延山積而高川至而增並受福祿日維不勝垂拱儲神監于太清

上進茅山元符觀頌狀

右臣所領邑居茅山之下元符觀實隸焉經營之際得以職事自効于斤築之末因獲究見朝廷所以製作之本意臣愚不佞恭惟皇帝陛下天神天明經緯萬事文德既暢武功亦昭上自京師下逮海表勝衣之子知趣經術絃誦之音如昔鄒魯偏師西指關國萬里名王貴人浮獻兩觀治功巍巍曠代未有至

於懷柔百神盡誠備物靈貺昭答臣庶頌數維元符之建實紹先志不惑於飛舉靈化之說無取於黃冶變幻之事清靜無爲深達道妙載營恭館以格真馭尊異高行風厲四方歷選列辟孰如今茲固宜仙聖瞻懷蒙福無極瑞鶴翔集以示民信聞之邑人父老華陽自崇寧以來慶雲醴泉紫芝瑤草益多有之然可聞而不可見可見而不可致惟是瑞鶴之應上薄九霄萬目所瞻不得而掩臣前與部使者已具列上景命之符莫此驗白竊意羣公庶尹禮官博士因符瑞之既富刻六藝之可攷抗章而請有事於泰山梁父以繼七十二君之絕業以揚我祖宗之休功則茲山之靈寔兆厥祥臣觀古帝王既有殊尤特絕之績必有非常能言之士鋪張本末比次律呂勒之金石著在簡冊以光明于本朝臣游沐太平拭目盛事而暗未聞聲詩不可非其人故休缺廼擇日齋戒沐浴撰成茅山元符觀頌一首詞義鄙淺無足簡錄而臣之區區願有攸在倘蒙萬機之暇俯賜乙覽雖以狂

斐誅死臣所榮幸所有元符觀頌一本謹隨狀上進干冒宸嚴臣無任隕越兢慙跼踖俟命之至謹錄奏聞伏候勅旨

後序

崇寧五年八月十日茅山元符觀落成臣拜手稽首作頌以獻于時九鼎既新大樂既備諸福之物遠邇創見凡厥臣庶推瑞應陳賦頌奏御者蓋千有餘篇上命大臣論定居選中者十有八人而臣實辱在第二八月十五日伏奉制書進秩一等臣竊自思念束髮就學即覃思於經術在朝廷雅有師承不敢輒著書書成亦博士弟子所餘棄獨以餘力琢磨文章妄有意於古人之域然連試有司不中程晚以父任得官吏道先法律又不取貳事退食有間亦未忍遂廢翰墨擊轅叩角窮愁無聊用以自慰會國家築宮茲山以尊有道以交神靈土木之功甫畢羽毛之祥適至臣子之心區區有不能已者輒不自揆原大推功播於頌詩以祝千萬歲壽願雖臣之極思而材力駕下訓詁不博言之所載經緯失

緒大懼以狂狷獲戾今茲猥蒙明詔寵綏之
遂使賤姓名附見於崇寧第頌之列臣雖
死骨不朽然大馬微命恐終無以仰報天覆
謹取所獻頌副本刻之樂石以風示四方使
承學之臣知如臣之昧陋猶以文字當褒嘉
海濶之廣必有高明博大不世出之士形容
德業具載雅頌咸五登三告功神明垂之無
極以示得意其於始隗之義則臣或庶幾焉
大觀元年四月一日宣德郎充淮南江浙荆
湖制置發運司勾當公事臣鮑慎徽謹記

元年丁亥歲八月守靜凝和法師充住持
江寧府茅山元符萬寧宮臣監淨之立石

茅山元符萬寧宮記 寶政殿大學士
醴泉觀使兼侍講上柱國南陽郡開

國公食邑四千戶食實封一千戶臣
蔡卞奉勅撰

崇寧五年秋有司言茅山元符萬寧宮成有
詔臣下為之記臣十拜手稽首而獻文曰德
莫崇於尊道業莫大於昭功臣伏觀皇帝自
踐祚以來苑囿之觀無所增飾外物之玩無
足以累其心者而深觀化原探索道妙澹然
無為以御羣有心既得此矣且曰道之所在

聖人專之是故山林之士寂寞之濱槩嘗有
聞於是者必有以寵嘉之況其上者乎夙興
夜寐因任原省以昭前人之光凡已事之未
就雖其小者必緝熙之蓋所以尊道而昭功
可謂至矣而斯宮之成二美并焉將以詔後
世而垂無窮臣是以受命而不敢辭也謹按
金陵句曲山在西漢時有真人居焉抱神以
靜超然遺物仙聖降而與之言以登雲天推
其緒餘以化二季而二季亦以仙去是為三
茅君而世因號其山曰茅山自時厥後光景
之異雲鶴之祥笙簫之響震見于山椒者歲
嘗有之而方外之士慕道聞風而來者亦莫
可勝數熙寧初常州道士劉混康者始誅茅
結菴于山之積金峯其始至也拾橡栗以為
食焚栢實以為香久而甘之不厭於是人稍
信異往往負薪裹糧以給之先生躬有妙行
而濟之以常善救物之心每以上清符水療
治眾病服之輒愈繇是遠近輻湊而先生之
名益著矣哲宗召至京師燕見便殿賜號洞
元通妙大師且命即其故居易而新之會改

元元符因號其處曰元符觀先生屢辭歸許
之然終哲宗世元符觀猶未訖功皇帝二年
秋遣中貴趣召先生來朝且詔守臣監司委
曲敦諭勿聽其有所辭先生至自茅山入對
久之語有以當上心者他日訪以三茅君事
具奏所聞迺詔加錫茅君號而即山構殿以
禮祠焉先生又請建皇帝本命殿于東南隅
之長生地從之於是鐘有樓經有閣歲度人
有數日給眾有田而宮之眾事畢具矣仍降
誥以為葆真觀妙沖和先生而度其弟子為
道士者十餘人其上皆錫紫水師名以寵之
所以尊禮之甚至先生再謁還故山皇帝又
為書道藏經數卷及親畫老子像賜之以榮
其歸宮將成御題其榜曰元符萬寧宮雲漢
之章下賁巖谷是將有神物守護垂之億年
與道無極也且以謂是宮經始於元符而落
成於今故因其舊名而增之以彰繼志述事
之意睿聖相承紹隆真風所謂一宮之成而
二美并焉者此也臣既序其事使後世得以
覽觀而又繫之以詩其詞曰

猗嗟三茅得自初成氣合於無與形俱昇軌希其風必靜必清寥寥久哉迺發先生帝用尊之載召來廷迺親其人燕見妙語迺錫命書迺其儔侶因其故廬啓此新宇像圖仙真上肖帝所神筆勝之龍鳳軒翥天錫皇帝聰明孝友抱一用中以綏九有遐邇率從導道熙功有欲求之與在斯宮作為好歌以詔無窮

皇帝以新宮告成親題其記之額刻碑以賜聖筆神畫妙絕古人龍章鳳書輝映秘殿既而申命有司填之以金蓋以護持秘藏永為斯宮之寶又以示其不可傳玩於民庶也臣淨之伏觀聖上所以協成先志繕此棟宇者甚寵甚渥資政之記鋪張闡休發輝睿意者甚丈甚煥此而不揚天下何觀焉臣夙傳師訓累預賜對比緣慶成錫加異號聖恩隆重無以為報是用別刊佳石以廣其傳庶使內外遠近皆得究知聖上作宮之意先生成道之跡洗心滌慮以趣真風者區區之願也大觀元年二月

十五日特賜守靜凝和法師上清經錄二十六代嗣教宗師元符萬寧宮事臣宣淨之謹題咸淳七年歲次辛未二月廿二日賜紫觀妙大師勅差茅山清經錄四十二代嗣教宗師管轄元符萬寧宮事臣羅志頌重立石

茅山華陽先生解化之碑觀文殿學士金紫先

棟大夫提舉亮州太清宮上柱國南陽郡開國公食邑四千三百戶食實封一千一百戶臣蔡卞奉勅撰并書

大觀二年春詔華陽先生來朝京師夏四月丁亥先生至自茅山上命道士二百人具威儀導迎館于上清儲祥宮新作元符之別觀先生病不能朝勞問之使不絕於途是月十日車駕幸儲祥宮因召見先生與語久之前兩夕先生夢侍天帝所相論說大洞真經覺而異之及見上迺以平日所寶大洞經以獻上覽之動色曰朕潔齋書此經甫畢及親繪三茅真君像適欲以授先生是日遂并賜之先生既授經興上意合則釋然以喜車駕將還宮復召見先生所以撫存之甚厚後七日丁酉有司以先生解化聞上震悼命中貴人賜金營表持贈太中大夫使使護其柩以還

葬有日詔臣下作為墓碑以詔無窮臣既受命竊惟古之全德之人本在於道以資物而不匱貴在於已以順人而不失是故頌仰酬酢無適而非真也及至後世一曲之士知為已而已而其弊至於絕物抱虛守寂老死於巖穴之中自以為得矣而功不加諸人道不行於世始以自為而所以自為者實少此普之隱者所以有往而不反之論也若華陽先生則不然方其棲真深巖人迹罕至則以上清符水愈人之疾至不可勝數其功利博矣及遭聖上以天縱大智作新斯民本原道真宗尚有德則頻年之間數奉命造朝召入宮廷燕見終日造膝所談多所謂天下妙理向也雲泉之為娛而今也名顯於朝廷向也樵牧之與俱而今也道信於宮壺天下方士聞其風者翕然化之豈可與彼枯槁一曲之士同日而語哉先生姓劉氏諱混康常州晉陵人也其上世皆不仕崇寧中以先生故始詔贈其父守真宣德郎母朱氏蓬萊縣太君先生少則虛澹不羣仁宗時試經為道士脫畧

世故日閱道書而於洞經妙旨獨心得之患世無明師廼散髮登壇以天爲宗已而聞三茅道士毛奉素者有道行名聞一時遂往依焉毛一見而奇之悉授以大洞經錄其後廼結菴于山之積金峯居一日有三羽人者莫知其所從來同造其廬亟出指菴之東隅謂之曰汝即此以居抱神守中德惠及人當無愧於前人矣又顧先生額間曰此無作之地道之所尚非可以有疵以手捫之明日瘳滅不復見而求所謂三羽人者終莫能得也先生繇是刻意勤行而於接物利人日益不懈遠近宗仰之哲宗時召至京師賜號洞元通妙大師而以所居菴爲元符觀未幾謁還故山上之元年復召赴闕其明年又告歸許之賜以九老仙都君玉印又詔增廣殿宇而命近侍總其事於中都得專達焉尋降詔賜號葆真觀妙先生先生雖居山而手勅詢勞無虛月觀將成詣朝天廷以謝上恩有詔敦勉其來召對宣和殿賜御書畫於是增改觀名曰元符萬寧宮而宮之正門及景命萬年天

寧萬福兩殿太平飛天法輪之勝皆上自書昭回之章煇耀萬古三茅崇奉之嚴未有盛於斯時也明年夏四月先生又告歸詔賜所居菴以潛神爲名而加先生以沖和二字居數月又作慶成頌及賜歸山詩以寵之大觀改元詔屢趣召先生固辭許之於是有旨命其傳錄大弟子守靜凝和法師眞淨之入見猶德意焉其明年先生迺來朝將行之前一日菴中平時所養鶴輒飛去先生聞而歎曰鶴去吾殆不還乎已而果卒京師即其年七月壬申葬山南疊玉峯詔特謚靜一而以其墓之祠宇爲藏眞觀先生專氣致柔不與物忤淵淳雲行動靜兩得眷待終始身名尊榮可銘也已銘曰
芒乎道初未始有物自氣求之則已芒芬昔之得者造乎其先逮後沉冥廼始無傳泯泯膠膠轉徙之塗貌象樊然心與之俱何以更之侯靜侯虛侯矣先生與古爲徒純氣是守靡所營趨帝命造廷翩然來思敢告所聞妙入無爲靡之高名樂此巖棲乘化而盡形則

如斯鏡石道周後人之詒

先師被遇聖朝恩榮終始如藏真建觀前所未有詔宗工述解化之迹上親題額以賜焉鉅碑泥金艱於傳本謹再模刻以廣施云時政和元年四月十七日上清三洞

弟子二十六代守靜凝和法師眞淨之謹

題持節昌州諸軍事昌州刺史充本州防禦使文水縣開國子食邑五百戶食實封一百戶上柱國王植纂額皇叔武安軍節度潭州管内觀察處置等使檢校司空同府儀同三司持節潭州諸軍事潭州刺史上柱國華原郡王食邑九千戶食實封二千四百戶仲卿立石

沖隱先生遺表碑二通

臣淨之遺表上言皇帝陛下臣自違闕庭屢更晦朔仰慕聖顏日深馳想本圖再出山林一瞻天表無何大數有限志與願違辜負皇朝不勝痛恨然臣雖世緣淺薄仙路殊途曷敢忘陛下終始眷遇之厚伏願陛下精固邦本善保聖躬上以副皇穹寶曆之恩下以慰社稷生靈之願臣無任瞻天望聖之至謹奉表以聞政和三年七月二日茅山經錄二十六代守靜凝和法師充住持元符萬寧宮臣

宣淨之上表

臣自惟至愚至昧伏自先師遭遇陛下以來興建宮祠敷弘教法而臣凡所請求實為過分上瀆天聽罪所不容本期盡犬馬之勞以報萬一不期偶染脾疾飲食自減雖勉強醫藥殊無退候近因設醮祈恩上天迺獲報應當須謝世去住之理臣實無憾但恨終天永訣無緣再覲天顏及別中宮皇子諸王不勝悵望之極陛下天聰聖哲導道崇德自古帝王未有過者然念帝王奉道迺與臣庶不同一言一動上合天心則萬方蒙福幸母以華寵蕩真以虧聖典太上五千言以去奢去泰慈儉為先迺陛下之師寶致道之津梁也伏願陛下清心寡欲以保聖躬即財儉用以固邦本聽納忠良以廣言路天下幸甚如臣下愚固不當冒死陳詞實念先師付託之重當令臣以盡忠報國為先當今之際不進一言以裨聖德則臣違天負師抱恨泉壤矣臣傳宗法錄真經玉印及陛下前後所賜書畫並已付本宮徒弟俞希隱收掌訖更願陛下重

念先師扶教宣道之心曲垂恩祐終始無替於宗門則臣雖不獲再瞻天顏死無憾矣操筆陳情伏增感愴臣淨之再言押

沖隱先生墓誌銘
檢校少保鎮東軍
三司中太一宮使兼侍讀修
國史臣蔡卞奉勅撰并書

先生氏宣名淨之金陵人父得一少不事事晚好道術鄉里號宣翁餘杭有杜道士者自匿其名常從翁游先生方在娠一日翁夙興見杜道士入其門俄失所在心異之有頃先生誕焉先生生而淳澹識度深遠幼不如輩六七歲日誦書數百言從羣兒嬉輒畫地為道家像父携之游茅山時靜一先生劉混康結茅積金峯一見稱之曰是子他日人天師也示之以輕舉之法先生躍而大喜願留師事誓不復歸父亦欣然許之服勤左右累年王安石間居金陵聞靜一高行遣書致禮邀之先生奉杖屨以從試與之語率皆造理屢稱善焉元祐中臣守宣城靜一遣先生持書過之館之後園西室前有華果林木疊嶂樓臺之勝近俯城市遠望百里間而先生終日

靜坐未嘗出門心竊奇之迺出緡錢度為道士先生志益精篤靜一悉以三洞經錄畀之書符咒水以弭疾除邪率多驗蓋累年之間盡得靜一之道深居山林之幽而聲名暴著一時哲宗皇帝在宥天下搜求道術之士首召靜一來朝京師從師入見顧其貌異焉錫師名以寵之元符初賜所廬為觀號元符令天子躬體妙道以臨萬邦命守臣敦遣靜一造朝勿聽其有所辭先生與之俱來禮遇尤至初有司大新厥宇親書宮名以賜更號守靜法師領住持事又明年復召入朝暨進見弟子從行者皆有恩數及之久之得請還山又加號凝和賜御書畫以寵其行大觀四年復至自茅山天子命即所館建壇席俾倡其教以示學者遣中使賁之縉紳士大夫多從聽受復固辭還山上更以御書及畫靜一遺像付之先是九幽黃籙久廢世罕道者先生發明之二科儀式方大顯於時凡深山絕嶠學者棲處其間時或淫雨積雪徑路阻絕先生必亟往餉之歲稍不登輒令減田租之入

以糜粥食飢者不幸殍殍衣衾瘞之居數年
一日召其徒謂之曰吾今年四十有六昔吾
先師記吾之數不逾於此吾將化矣荷國重
恩不得面見天子迺索筆自草遺表以聞翌
日具湯沐易衣冠而逝時政和三年七月三
日也表聞天子嗟悼詔贈冲隱先生資之緡
錢以其年十一月封寔于大茅峯之陽華蓋
峯下受業弟子數十人其上首曰傅希列徐
希和為養素法師繼踵住持而希列被召為
右街都監後三年又詔贈先生之父為承事
郎母周氏為孺人蓋自先生少時臣已識之
及其將終亦令人喻意於臣云寫遺表畢屬
期已至不得書數言以別既葬數年有詔使
為之銘銘曰
識道之真則遺其形初成得之上入太清靜
一慕焉少也無管結廬峯顛以逮于成誰其
嗣之允矣先生天子嘉之荐錫休名召語於
前理暢而明形雖有逝神則常升緒餘之傳
粵在斯銘

茅山疑神菴記

句曲名山三茅勝地靈宮闕宇突兀炳煥甲
于江左數千百里疑神菴居其間林樾蔽虧
氣象深穩宜高人逸士之所廬也紹興癸亥
祠宇宮道士張椿齡與其徒相攸於中峯之
下誅茅結菴擺落世紛怡神葆光為物外之
游性真內融道腴外豐秀骨山峙神鋒玉舉
望之真蓬萊方壺中人學者稍趨歸之聲聞
帝聰有詔召對控辭弗獲既見上顧勞其罷
解御服以賜且命圖形於神仙閣固請還山
先生起草萊受知聖明前後六至闕下壬午
視師亦賜對于行在所每見加厚初太上皇
欲易菴為觀先生辭以有觀額則事煩非幽
居之宜故止賜今名實乙亥六月也庚辰歲
建三清殿像設供具皆上方所製其後以行
宮賜銀建天祥閣奉藏宸翰又為層屋置內
府賜鍾雲漢在上光被草木寶器所鎮神鬼
守護凡二紀資錫悉充棟宇費齋庫庖廩位
置不瀆於是豐約中度規制具體矣乾道壬
辰賜田三百三十畝有畸仍命漕浙除其稅
德至渥也屋之高下皆因其山之勢妥帖邃

密不晦不露白雲峯擁其左小峯拱其右面
挹赤山大羅源平遠當曾而昇元頂亦遂逐
在目也紫翠環繞四山如屏晨先陸離篆影
凌亂宵籟閑寂琴聲清圓恍若與塵世隔匹
夫而能動冕旒之高聽享山林之至樂其必
有以也夫噫老佛之教與孔氏鼎立後世紛
紛矛盾異同真人御辯融三為一恭已正南
面而儒術行於天下刑政修禮樂興二家翼
之使民心一於為善薰陶漸漬風俗淳厚兵
寢刑措日躋仁壽之域庸非助乎先生訪對
之際言不得聞若夫方士誣虛之說治道清
靜之要將奚擇焉天寶聞之矣其能動高聽
享至樂宜哉先生常州晉陵人少為人也名
行義字達道度為道士改今名而世先以其
字行既歿之九年住菴弟子茅見獨以僕疇
昔與先生有一日之雅而與其兄王見志從
游荆溪之上垂四十年屬為之記故獨取其
菴之顛末係於與創者識之其被遇兩宮榮
寵尤顯當有紀錄以侈眷異茲不具載云
十年九月朔朝散大夫新羅發遣
處州軍州事贊皇李處全記并書

嘉定皇后受錄之記

皇帝妙毓至神續承大統薄海外外晏然無事皇后道合坤寧光齊日耀彌綸帝德輔贊化原而內助餘閒貴道清靜宅心虛白迺嘉定庚午午節命左街監義臣上官德欽緘封寶熏肅將中旨用章獻明肅皇后故事至華陽洞天上清宗壇傳受大洞畢法寶錄金龍玉璧質信禮儀罔不畢備上清經錄宗師臣薛汝積實臨壇度師臣汝積恭承教令潔已齋心馳誠南嶽結想上靈建置王錄道場羅天大醮廣修齋設延供羽衣是夕玉繩金波昭回璇漢祥飈瑞靄紛郁宮庭翼日笙鶴翔翔飛舞呈瑞靈芝異草迭產於林壑間四方來觀莫不敬歎猗歟盛哉臣先覺業以微賤遇孝宗皇帝蒙恩放還山林與臣汝積從游目擊盛事欣喜踴躍竊考經錄之自來求流傳之所在巍巍至妙蕩蕩難名誠求道之津梁登真之道路至於光顯流衍囑付帝后俾承天而行與道合真則我朝之盛又非前代所及也氣結九天自然成文火鍊太空皇人

按筆此寶錄所由始也太平下教小有天王紫虛元君流播人間此寶錄所由傳也元君初降句曲命楊羲以隸古定其文傳上清仙翁許翹寶笈琅函鳳羅金鈕割畝有儀盟誓甚重得之者必名書金簡身在丹臺苟非其人不在此族歷代帝后佩服崇尚用以延洪作用以益永年發祥隕社如鼓應桴然足以知其教不足以見其盛也自元君二十二傳觀妙先生朱自英是為章獻明肅皇后臨壇之師兩傳而至沖和先生劉混康時在宣和徽宗皇帝命先生總括三洞四輔為盟傳之師仍賜白玉印以續宗壇之系九傳而至臣汝積又復恭遇聖后下屈崇尊增貴經錄其道益以光顯其事益以流衍聖子神孫奕葉相承不忘道化用躋世於仁壽此千載一遇萬世之下不可尚矣天降其祥地不受寶未足見皇天之所以眷顧我聖后者億萬斯年與帝並尊為天下母此降精三境流光十極付囑我聖后者其在茲乎恭惟皇后殿下聰明天稟慈慧日隆百神敷祐瑞氣騰空國家

寶曆過期流芳億兆之祥也臣不敢自默敬為之記姑錄始末不敢為文嘉定三年庚午歲五月十有六日右街道錄凝神齋高士臣劉先覺拜手稽首恭記

臨壇保舉師太上靈符萬寧宮知官沖妙大師臣任元阜監度師國臨壇度師茅山經錄三十四代嗣教宗師上清三洞法師管轄元符萬寧宮明一大師賜紫臣薛汝積承議郎知建康府句容縣事兼管內勸農管田公事臣朱拱臣建并書

白雲崇福觀記徽猷閣學士正議大夫太子詹事兼修國史兼實錄院修撰兼太

編修官兼實錄院檢討官兼國史院編修官正奉大夫守史部尚書兼修

國史兼實錄院修撰兼太子詹事曾承穎

句曲江左名山洞天福地以茅君隱而仙是稱茅山有積金峯當西一面積金之支右轉而特起者白雲之峯也道俗相傳嘗見其草木後凋煙霞在望然東西兩山靈宮闕宇各真所宜茲曠弗卜顧有待耶紹興中華陽道士王景溫披榛棘鑿巖崖室于峯之下俄以行志修潔聞迺即其居錫崇福觀額暨白金莊田饒益之俾展其成於是甍壇場班像設有門鼎峙有亭翬飛堂皇深密廊廡表延重

樓傑閣雲層巍哉前開端遠松杉行列如蓋如幢有赤山湖軒豁面勢崇岡秀巒左顧右揖鬱鬱蒼蒼映帶清深而居而游如脫紛拏如蹈仙墟中間方壺丈室上親洒翰揭以虛靜與夫紹興以來四朝錫予寶鎮泉石人間世事待有大樞德力作興風雲會合殊勝然後底廼績今其徒居之思有以稱亦反其初而已大林丘山之善於人也亦神者弗勝然而道者託焉昔之為道術者棄絕乎名勢利欲精專乎身心性命唯恐入焉不深且密也待其行成一朝脫去人方競競然持其所棄迹其所統以悻悻其隱約鼓鐘其沈潛影響其清風素節而冀得其人如初迺亦甘心焉泰其養尸其居美其衣食寢處如世俗轉復為名勢利欲所愚而道術安在是山不特茅隱二許楊陶之遺地不改址往往蓬戶桑樞霞殫栢食託於人之所不堪顧自有丹臺絳宮抱玉懷珠在開白雲者必不專以外境遺子孫也溪之從子挺往來山中人境俱熟道士周觀復景溫高弟求記其師之功緒甚力

迺伴挺序次其見聞因附見吾說觀復持歸告語其徒庶有警焉以復其初嘉定四年九月望日記

洞陽館記

宣和間道士元鍊大藥人知神其醫而已侍郎王公漢之帥金陵為人擇地廼之華陽之南四平之北修築館舍仍舊號曰洞陽并祠其先世蓋道書稱洞陽為朱陵昇度之館又以據洞府之陽而名焉思陵在御歲遣使清真觀建萬道齋齋時羣鶴翔集蓋三月十八日稱鶴會始此淳熙初洞元之徒皆遠游貳車王光國克承先志為地擇人道者王介叔草木食主天市壇邀致來洞陽介叔之徒曰丁道存相與刻志道業招來四方之士而鶴會之盛既無前代賜予不在清真而在洞陽矣三十四代宗師薛君汝積強以祠牒衣冠之以表其容眾俾為善日益不怠珥陵推官湯喬年施田二頃以續歲供意亦以增冥福為報本地其手澤付子周防甚至未幾為湯後者肯獲功虧田不能久而歸洪氏

洪氏有名秉鈞長且賢四中鄉選投筆高蹈士類因以真隱稱真隱知田之自迺集子姪議舉半入延慶飯僧其百畝復施洞陽若將使湯推官少償夙願於地下吁湯君之施出於有心而真隱未始容心此豈周防思慮所及哉洞陽既再入田迺紹定庚寅予偕諸姪成存道之志為建齋寮大隸題榜并識始末以傳永久且為賢不肖子孫之世鑒云嘉熙丁酉日南至丹陽張湜撰并書朝奉大夫監行在左藏西庫丁宗魏篆額

宋羅天感應碑 山人從遺文

元符萬寧宮經藏記 朱熹撰

右闕文

宋重修華陽宮記 郭衡撰

元陽觀記 朱拱臣撰

玉液菴記 劉宰撰

右不錄文

茅山志卷之二十六

茅山志卷之二十七

火三

上清嗣宗師劉大彬造

錄金石篇

元碑

華陽道院碑銘

翰林直學士朝列大夫知制誥同修國史

元明善撰翰林侍讀學士中順大夫知制誥同修國史趙孟頫書

道家者流有符籙之法謂能呼吸風雷役召神鬼或者疑焉天人一也寒則體慄暑則體燠是形吾者天也周吾形者無非天也故曰天人之際感與應而已惟其人氣之戾始與天乖愚夫愚婦一念之烈猶能有動況高人德士棲身孤寡鍊行精純志之所在天必不違昔在世祖皇帝時句曲許宗師來朝有禱輒應上異之特詔主其諸宮觀紹傳符籙許宗師將化手印待今王君至而傳之大德二年淮南蝗本道宣慰使禮請君至江都離而穰焉俄而未羽者燼於雨羽者有鶩蔽空而至啄食之食而復吐吐之復啄如是連日蝗不為災先是旱禱而雨淮南人大駭悅爭持金帛拜而禱之卻之不退送者填道歸曰吾

豈必夫景既裁第竭吾誠以濟吾法至於兩獲捷應全活數郡者實三茅君有相其往且寶運方隆不當有饑民耳其所訓金帛苟棄裝之是幸功也吾以別館三君而祝釐於國兼祀二親以報其私庶乎稱也是年遂營於

元符萬寧宮之東仰挹颺輪俯瞰金苗山得所峙水得所經隈靈即秀巧適地宜儉不至陋奢不踰制凡為屋五十餘楹象三茅君於主殿依其考妣於翼室肇基訖工盡六年號華陽道院至大三年夏天子命玄教嗣師吳

真人醮祀江南始于句曲君出近京口嘗具人曰香幣上所祝而予以授余余將之無敢不恪暑雨方淫詰朝當抵元符雨淖或雷亦惟神羞君曰敢敬諾翌日雨垂不下既奠香幣大雨行事之日復止真人還朝為余縷言王

君如右因為求銘華陽余聞王君簡而早莊而和靜方而動圓蓋有道君子也故出言而災弭有禱而神彰功成而不宰德克而怨約由是制授養素通真明教真人夫句曲之為名山舊矣高人德士游息其間者以其幽深

隔世囂紛絕迹駐靈光而資悟賞也既紀其事仍繫之辭依倣步虛之聲寓其閒遠之思君名道孟號牧齋建康句容人嗣四十四代宗師辭曰

句曲嵯峨窈窕嶺崇神仙所宅閔雲扃霓旌羽蓋博紫清儵來忽逝何杳冥通真真人鍊元精餐霞服氣方瞳青樓連陽谷吹玉笙瑤漿駐鶴崑崙庭燭災弭變翼世平揚休儲慶奉天明遠心絕物思蓬瀛手持青芝對丹經瓊都琳館吾此營大招真侶捫幽靈爰清爰靜無勞形無搖爾精可長生下觀塵囂百憂嬰醉生夢死悲短齡重陰無罅窺日星有欲從之視此銘

句曲山洞泉銘

泰定甲子歲玉虛子造

茅山三山羅絡諸峯大魁小杓象斗七宮上清有壇高居其中山曲而容水斯朝宗我修華池內景合同在艮之止塞兌之空丹井西注石梁亘東玄師有作兆茲靈踪藏錄玉漿向用奚窮善利萬物道不言功

福鄉井銘

惟蕭有臺曲水之濱并麓不改我思若人若人伊何桐栢其傳稟教華陽振迹丹丘百世之澤式如金玉是謂上明並受其福

弘道壇銘

上清真人潘尊師體玄建弘道壇于萬之陽

句曲外史基石儀道迺復古初迺奉聖神永作憲矩上清宗師劉大彬作篆鎮壇大洞法師倪天奎協誠鎮石

崇禧萬壽宮記

從仕郎鎮江路錄事致仕王七疾為文前翰林學士承旨榮祿大夫知制誥兼修國史趙孟頫書并篆題

華陽洞天自三茅君以神道設教瑞人神士

不可梯接者代有其人歷考其間惟隱居陶真人立館以處高弟所以啓佑其後人者為最盛今之崇禧觀隱居曲林館也唐貞觀間太宗以昇真王真人有潛藩之舊且嘗師事隱居遂建太平觀以居之賜田與山贍其學者殫錢舖粟用給所轄宮觀十有二宋政和三年始分田以給之使自養其弟子具戴山志宋改太平觀為崇禧揭虔安靈有威無數式克至于今日廣殿脩廊弘弘轍轍棟題牖楠之飾樞華香火之供千餘年間其崇奉未

有如此之盛者也於皇三君威神在天陰陽默相華陽道派如魯洙泗世有升降道無升降時有顯晦道無顯晦陶真人之於三君也神交沆寥之上王真人之於隱居也心授問答之間絲絲延延往過來續千載如一日皇

大三

元肇興天兵南渡神明所扶壇宇如故心遠鄒君道元若造物者擬其人為時而山叫閭闔於九天之上上方偃武修文以清靜為壇以慈儉為宇垂意玄教命鄒君道元掌教事盡護諸山厥後東潤洪君宗源復陽楊君元澈碧泉蔡君德溥繼繼承承用保有累朝之寵命皇慶初元春南陽陳君志新入覲上觀天光於清都紫微之間承九重之殊渥荷真人之美名上賜金欄道衣以為身章延祐四年南陽君私竊自念崇禧道場自昔總轄諸

山實為

上帝垂休儲社之所不有以表章之何以名有尊乞隆崇禧為宮白之集賢諸公以其事聞于朝嗣歲陞辭還山上復降香以榮其歸延祐六年八月二十二日玉音自天而下賜

號曰崇禧萬壽宮玄教大宗師上卿大真人張公嗣師掌教真人吳公與有功焉是日也榮光異氣上燭層霄崇山峻嶺咸有矜色真人陳志新率羽士稽首再拜於道之左對揚休命曰明明天子萬壽萬年實與太元司命

大三

君自混沌演淳開闢之始亦明龍漢浩劫之前俱以願力裁成輔相以左右民雖今昔殊時幽顯異迹其受命於

皇皇后帝則異世而同符也於虞休哉既而冠巾之衆如出一口而祝之曰陳真人自隱

居陶真人立館以來既嘗為太平觀矣又嘗為崇禧觀矣上賜今額甚盛舉也他日東國史之筆者繫年繫月繫日大書之曰改觀為宮自真人陳志新始其皇恩如天將何以報塞耶惟我真人在帝左右必敬必恭晝夜以思弼成玄功庶其有以答君師寵綏之造而真人亦有無窮之聞真人曰三君之靈也吾皇之賜也臣何力之有焉敢不敬恭以從祝規延祐七年夏四月南陽君俾去疾紀其事以傳方來去疾謂必有山玄卿其人而後為

新宮銘草野之文何足以紀盛事辭不獲命
迺舉前說爲之記而又熏沐繫之以詩曰
自有宇宙有此山開山者誰高辛氏耿耿社
哉太元君天之輔相民怙恃曲林舊館陶真
人潛德幽光發千祀山圖飛上

天皇家雲漢分章來萬里煌煌崇禧萬壽宮
巨扁鸞飛義獻字鳳歌鶴舞銚鈞韶山川鬼
神共懷喜物不疵癘年穀豐乾坤清夷風日
美皇帝怡愉奉太皇萬年億載自今始元至治元
年正月十
有五日建

崇壽觀碑

承德郎國子司業蜀郡
唐集撰并書丹題額

大茅峯之下當華陽南洞之便門有崇壽觀
者本晉洞天館主任敦故宅宋元嘉十一年
路太后始建壇宇太始中廬陵太守孔嗣之
重立以奉曲阿高士華文賢齊建元二年勅
大三
句容王文清仍立而主之名崇元館武帝以
太子時至焉唐貞觀初勅改爲崇元觀有太
極元年所樹碑石完而文泯可識者左拾遺
孫處玄文楊幽經書數字而已天寶七年李
玄靜先生奉勅重修復民百家備修葺寶曆

三年主者有賀思賢則因器物銘識而考見
者也宋大中祥符七年勅賜今名大元至治
二年句曲外史張君嗣真始來主之顧瞻方
臺近對南面左峯疊玉右引大茅之支而回
合焉定錄君受言大茅山下有泉水近水口
處可立靜舍陶隱居云近南大洞口有好流
水而多石少出便平比有王文清居之則此
觀是矣迺歎曰山中館宇自齊梁唐宋至于
今代有增益求諸晉人之舊惟此與玉晨許
長史宅耳而吾所治迺傾廢隘陋持甚豈不
在我耶於是度材鳩工更後堂爲太元殿以
復舊規象三茅君於中東爲任華王李賀五
君祠西爲陶隱居祠充前殿基爲弘道壇自
製銘其上壇東爲玄武祠西爲廣惠祠後爲
文賢講堂而前爲都門門外浚古玉津池盡
受大茅南面諸原之水循池西南得昭明太
子讀書臺臺東有井曰福鄉井福鄉者因昭
明道館名也出諸榛莽著文刻石覆之以亭
而巖洞泉石之勝近在百步內者皆按圖表
之可以觀覽泰定元年上清四十五代宗師

劉君大彬朝京師授子始末俾爲之次第焉
張君吳郡人名天雨內名嗣真字伯雨別號
貞居年二十棄家入道徧游天台括蒼諸名
山吳人周大靜先爲許宗師弟子得楊許遺
書張君從而以爲師悉受其說嘗從開元王
君壽衍入朝被璽書賜驛傳顯受教門擢任
非其志也即自誓不希榮進因從三茅之招
追奉任君而下五君爲文而告之願畢力茲
宇所著外史山世集三卷碧巖玄會錄二卷
又尋山志十五卷考索極精博云嗚呼自任
君始居此餘數百年纔五人傳焉其自致于
久遠者果何託也豈若後世各誘門人系以
私屬如家人父子者哉故寧希闊而有待今
張君無前代賜子之助徒草木食以營此
而曠然思與四方之士共爲千載之期豈非
豁落丈夫也哉予故與君爲方外友奇其能
先予遠舉也故繫之詩曰
大茅南垂元氣積陰關闔扉陽洞關曲穴流
泉保靈宅任君來餌黃赤石天一召錫太元
世曲阿受養良有擇構宮方嚴自王伯清蹕

臨止靈響格虛林森爽化赫奕福鄉帝子發
甘液不食何年夜遺覽白雲映空玉清客開
元金盛煩百役持節旁午致練壁爾來蕭條
世代隔石鐙刻文土漫畫誰其啓之規古昔
句曲外史美冠烏研書千卷視貞白天真景
隨玄系繹玉室金堂萬無數

茅山志卷之二十七

茅山志卷之二十八

大四

上清嗣宗師劉大彬造

金籙編

齊梁詩

華陽石頌十五首

陶隱居

河篇徵往冊孔記昭昔名三宿麗天秀兩金

標地英

右樞城

宅無適生有在在則還空靈構不待匠虛形

自成功

右質象

總神列三府分塗交五便陰暉迎夜哲晨精

望曉懸

右形位

南峯秀玄鼎北嶺橫秦壁表裏玉沙津周回

隱輪迹

右標貫

左帶柳沂水右浚陽谷川土懷北邙色井冽

鳳門泉

右區別

郭千峙留岸姜巴亘遠蹤鶴廟或時饗別宅

迺恒恭

右跡號

具居非知地越家詎隱遷樹蓋徒低蔭石竈

未嘗煙

右類附

果林鬱餘奈蔬園蔓遺辛葵芝可燭夜田泉

嘗浣塵

右物軌

降靈龜山客解駕青華童寢宴舍真館高會

蕭閑宮

右游集

清歌翔羽集長嘯歸雲翻子絃有逸調空談

無與言

右才英

標舍雷平下立靜連石陰上道已沖念飛華

當軫心

右學稟

濟神既有在在去留從所宜心迹何用顯冥途

自相知

右業運

方隅游瓊刃華陽棲隱居重離倘或似七元

迺扶胥

右挺契

號期行當滿亥數未終丁迨迺承唐世將賓

來聖度

右機萌

刊石玄憲上題誠曲階門動靜願矜錄不負

保舉恩

右誠期

答詔問

山中何所有嶺上多白雲只可自怡悅不堪

持寄君

告逝篇

性靈昔既肇綠葉久相因即化非冥滅在理

澹悲欣冠劍空衣影鑲繆迺仙身去比昭軒
侶結彼瀛臺賓倘能踵留轍為子道玄津

入山尋桓清遠不遇 邵陵王蕭綸
荆門丘壑多變瞻風雲入自非棲遁情誰堪
霜露濕

初入山作

桓法閨

寒谷夜將晨寘賞復尋真方壇垂密葉漱水
度朱鱗杏林雖伏獸芝田詎俟人丹成方轉
石爐變欲銷銀當知勝地遠於此絕羈塵

酬華陽陶先生

沈約

三清未可覲一氣且空存所願回光景拯難
拔危竟若蒙九丹贈宜懼六龍奔

還園宅奉酬華陽陶先生

早欲尋名山期待婚嫁畢二事雖云已此外
復非一忽聞龍圖至仍親榮光溢副朝首八
元開壤賦千室冠纓會弗露風雨未嘗拂鳴
玉響洞門金蟬映朝日慚無小人報徒叨令
尹秩豈忘平生懷靡盬不遑恤

華陽先生登樓不下贈呈

側聞上士說尺木迺騰霄雲軒不展地仙居

多麗燕卧待三芝秀坐對百神朝銜書必青
鳥嘉客信龍鑣非止靈桃實方見大椿凋

奉華陽王外兵 隱居別易氏號

餐玉駐年齡吞霞返容質眇識青丘樹回見
樽桑日爛熳蜃雲舒欽峯山海出

答句曲先生

范雲

終朝吐祥霧薄晚孕奇煙迴澗生芝草重崖
出醴泉中有懷真士被褐守沖玄石戶棲十
秘金壇謁九仙乘鶴方履漢轡鶴上騰天

唐詩

酬茅山權器

皇甫冉

南望江南滿山雪此情惆悵將誰說徒隨羣
吏不曾閒顧與諸生為久別聞君靜坐轉耽
書種樹葦茅還舊居終日白雲還自足明年
芳草又何如人生有懷苦不展出入公門猶
未免回舟早晚待春風先報華陽洞深淺

送陸潛夫往茅山

游仙洞兮訪真官真瑤席兮禮石壇忽髣髴
兮雲擾杳陰深兮夏寒欲回頭兮揮手便辭
家兮來否有婚嫁兮嬰絰待歸來兮已久

送張道士歸茅山

向山獨有一人行近洞應逢隻鶴迎唯以素
書傳弟子還因白石號先生無窮杏樹綠山
種幾許芝田向月耕師事少君年歲久欲隨
毛節往青城

送鄭員外入茅山

但見全家去寧知幾日還白雲迎谷口流水
出人間冠冕情遺世神仙事滿山其中應有
物豈貴一身閒

送鄭二之茅山

水流絕澗終日草長深山暮春犬吠雞鳴幾
處條桑種杏何人

山居即事

顧況

下泊降茅仙蕭閒隱洞天楊君閑上法司命
駐流年庵合桃華水憲分柳谷煙抱孫看種
樹倚杖問耘田世事休相擾浮名任一邊由
來謝安石不解飲靈泉

庵裏桃華

庵裏桃華逢女冠林間杏葉落仙壇老人方
授上清錄夜聽步虛山月寒

大茅嶺東新居憶亡子從真

谷鳥猶呼兒山人夕霑襟懷哉隔生死悵矣
徒登臨東門憂不入西河遇亦深古來失中
道偶向經中尋大象無停輪倏忽成古今其
天非不幸鍊形由太陰凡欲攀雲階譬如火
鑄金虛室留舊札洞房掩閒琴泉源登方諸
上有空青林彷彿通寤寐蕭寥邈微音軟草
被汀洲鮮雲畧浮沈賴景宣疊麗紺波響飄
淋石窟含雲巢迢迢耿南岑悲恨自茲斷情
塵詎能侵真靜一時變坐起唯從心

思歸桃華峴二首

廢棄黍殘生後來亦先天詩人感風雨長夜
何時曉去國宦情無近鄉歸夢少底身絕中
援甘靜忘外擾麗景變重陰洞山空水表靈
潮若有信寄謝西飛鳥

朝與佳人期碧樹坐紅萼暮與佳人期飛雨
洒青閣佳人宵何許中夜心寂寞始憶花正
開復驚葉初落行騎飛泉鹿卧聽雙海鶴嘉
願有所從安得處其薄

題盧道士房

秋砧響落木共坐茅君家唯見兩童子門外
汲井花空壇靜白日神鼎飛丹砂塵尾拂霜
草金鈴搖霽霞上章塵世隔看奕桐陰斜稽
首問仙要黃精堪餌花

意山中

春還不得還家在最深山蔥園泉澆濕松窻
月映閒薄田臨谷口小職向人間去處但無
事重門深閉關

送李道士歸桃華峴

人境年虛擲仙源日未斜羨君乘竹杖辭我
隱桃華鳥去寧知路雲飛似憶家莫愁容髮
改自有紫河車

夜中望仙觀

日暮銜花飛鳥還月明溪上見青山遙知玉
女憲前樹不是仙人不許攀

酬章夏卿送歸茅山兼慕母正字

玉帝居金闕靈山幾處朝簡書猶有畏神理
詎能超鶴廟新家近龍門舊國遙離魂結不
斷洞府一吹簫

送顧況歸茅山

章夏卿

聖代為遷客虛皇作近臣法尊稱大洞著作
上清學淺忝初真夏卿初和鸞鳳文章麗煙霞
翰墨新羨君尋句曲白鶴是三神

奉同

慕母誠

謫宦聞嘗賦游仙便作詩白銀雙闕戀青竹
一龍騎先入茅君洞旋過葛稚陂無然列禦
寇五日有還期

答贈木耳一名樹雞

韓愈

軟濕青紅狀可猜欲烹還喚木盤回想君直
入華陽洞割取乖龍左耳來

刻溪逢茅山道士

張籍

茅山近別刻溪逢玉節青毛十二重自說年
年上天去羅浮最近海邊峯

贈茅山楊判官

應得煙霞出俗心茅山道士共追尋閒憐鶴
貌偏能畫暗辨桐音自作琴長嘯每來松下
坐新詩堪向雪中吟征南幕裏多賓客君獨
相知最最深

寄華陽孫鍊師三首

李德裕

何地最脩然華陽第八天松風清有露蘿日

靜無煙乍警瑤壇鶴時嘶玉樹蟬欲馳千里
思唯戀鳳門泉

石上溪蓀發紫茸碧山幽藹水溶溶舊花定
是無人見春日唯應羽客逢

獨尋蘭渚玩遲暉閒倚松窗望翠微遙想春
山明月曙玉壇清磬步虛歸

遙傷茅山孫尊師三首

蟬蛻遺虛白蛻飛入上清同人悲劍解舊友
覺衣輕黃鵠遙將舉斑麟儼未行唯應鮑靚
室終夜識琴聲

空宇留丹竈層霄被羽衣舊山聞鶴化遺鳥
尚免飛數日奇香在何年白鶴歸想君游下
泊方歎里閭非

金格期初至臙輪去不停山摧武擔石天隕
少微星弟子悲徐甲門人泣蔡經空聞留玉
鳥猶在阜鄉亭

尊師是桃源黃先生得法弟子常見
尊師稱先師靈跡今重賦此詩兼寄
題黃先生舊館

後學方成市今茅山宮觀道士是先生弟子也吾師久上賓

洞天應不夜源樹只知春此至蹟基客留童

子聖仙童即先生弟子桃源事精避直神生

石髓分與養生人

右四詩石刻唐會昌癸亥年暮春

十八日秘書郎上柱國裴質方書

溪蓀

楚客重蘭蓀遺芳今未歇葉抽清淺水花照
暄妍節紫艷映渠鮮輕香含露潔離居若有
贈暫與幽人折

自紫陽觀至華陽洞簡李延陵

劉長卿

石林媚煙景句曲盤江甸南望佳氣濃峯峯
遙隱見漸臨華陽口微路入葱蒨七曜懸洞
宮五雲抱深殿銀函竟誰發金液徒堪薦千

載空桃華秦人深不見東溪喜相遇貞白如
會面青鳥來去閒紅霞朝夕變一從葬貞骨

萬里乘飛電蘿月延步虛松風醉開宴幽人
即長往茂宰應交戰明發歸琴堂知君懶為
縣

宿華陽洞寄裴稱 李端

花洞晚陰陰仙壇隔杏林漱泉春谷冷擣藥
夜窻深石上開山酒松間對玉琴戴家溪北
住雪夜去相尋

贈茅山道者

姓字不書高士傳形神自得逸人風已傳花
洞將秦接更指茅山與蜀通懶說歲年齊絳
老甘為鄉曲號涪翁終朝賣卜無人識弊服
徒行入市巾

題李尊師山房

秦系

天師百歲少如童不到深山竟不逢洗藥每
臨新瀑水步虛時上最高峯蘿根五月留殘
雪壇石千年蔭怪松此去人寰知遠近回看
雲壑一重重

柳谷汧故居

權德輿

下馬荒郊日欲曛潺潺石溜靜中聞鳥啼花
落無人處寂寞山窻掩白雲

春游茅山酬杜評事見寄

喜得賞心處春山豈計程連溪芳草合半嶺
白雲晴絕澗飲冰碧仙壇挹瀨清懷君在人

境不共此時情

題崔山人草堂

竹逕茅堂接洞天閒持麈尾漱春泉世人車馬不知處時有歸雲到枕前

下第後寄高山人

顧非熊

我來堂屋前仰視大茅顛潭淨鳥聲異地寒松色鮮人眠甕燭月鹿飲鳳門泉多愧僻高隱無成又一年

贈茅山高拾遺

人皆貪利祿白首更營營若見無為理兼忘不朽名幽禽窺飯下好藥入離生夢覺巖泉滴猶疑禁漏聲

成名後歸茅山酬羣公見送

此名誰不得人賀至公難舊業承家了離筵去國歡暮天行鴈斷曉渡落潮寒舊隱茅峯下松根石上盤

酬鄭史君見送歸茅山

餞行詩意厚惜別酒筵重解纜城邊柳還舟海上峯飲猿當瀨見浴鳥帶槎逢吏隱應難遂為霖是蜃龍

茅山贈梁尊師

許渾

雲屋何年客青山白日長種花春掃雪看鍊夜焚香上象壺中閣浮生夢裏忙幸承仙籍後乞取大還方

贈何處士

東望茅山北去秦梅仙書裏說知人白頭煮石青山下雖遇唐生不敢親

贈茅山高拾遺

二首

李商隱

諫獵歸來綺里歌大茅峯影薄秋波山齋留客掃紅葉野逕送僧披綠莎長覆舊圖基勢盡徧添新品藥名多雲中黃鶴日千里自宿自飛無網羅

一笛迎風萬葉飛強携刀筆換征衣潮寒水國秋砧早月暗山城曉漏遲巖響遠催行客過浦深遙送釣船歸中年未識從軍樂虛近三茅望少微

送顧秀才歸丹陽

王建

江城柳色海門煙欲到茅山始下船知道君家當瀑布菖蒲潭在草堂前

茅山道中

趙嘏

溪樹重重水亂流馬嘶殘雨晚程秋門前便是仙山路目斷寒雲不得游

秋日寄華陽山人

高瞻

雲木送秋何草草風波凝冷太星星銀鞍公子竟堪斷玉弩將軍涕自零茅洞白雲和雨看荆溪黃鵠帶霜聽人間不見清涼事猶向溪翁乞畫屏

懷三茅道友

熊皎

塵事何年解客朝十年容易到三茅長思碧洞雲窻下曾借黃庭雪夜抄丹桂有心憑至論五峯無信問深交杏壇仙侶應相笑只爲浮名未肯拋

題茅山仙臺藥院

劉言史

擾擾浮生外華陽一洞春道書金字小仙圖玉苗新芝草迎飛燕桃華笑俗人樓臺爭聳漢雞犬亦嫌秦願得青芽散長年住此身

游地肺

章孝標

市朝擾擾千古林聲冥冥四賢郭二許也黃鶴不歸丹竈白雲自養芝田溪灘永夜流月羽翼清秋在天高跡無人更躡碧峯寒落孤

煙

金陵道中酬茅山廣文南陽博士三首

皮日休

寒嵐依約認華陽遙想高人卧草堂
半日始齋青飢飯移時空印白檀香
鶴雛入夜歸雲屋乳管逢春落石床
誰道夫君無伴侶不離窓下見羲皇

住在華陽第八天望君唯欲結良緣
堂局洞裏千秋燕厨蓋巖根數斗泉
壇上古松疑度世林間幽鳥恐成仙
不知何事迎新歲烏桲

裘中一覺眠烏桲裏見王筠集
五色香煙惹內文許遠游燒香五色煙
石飴初熟酒微醺將開丹竈那防鶴
欲算蒸圖却望雲海氣半生當洞見
瀑冰初折隔山聞如何世外無交者
一卧金壇祗有君

奉和前韻三首

陸龜蒙

一片輕帆背夕陽望三峯拜七真堂
三羊揚郭二許天寒夜漱雲芽淨雪瓊暗梳石髮香
自拂煙霞安筆格獨開封檢試砂牀莫言洞府能招隱會輾輪見玉皇

臺中行坐可携天何況林間息萬緣
組綬任垂三品石珮環從落四公泉
丹臺已運陰陽火碧簡須雕次第仙
想得雷平春色動五芝

煙甲又芋眠

良常應不動移文金醴從酸亦自醺
真誥太平家酒

微桂父舊歌飛絳雪桐孫新韻倚玄雲
春臨柳谷鶯先覺暖動蕪香鶴共聞
珎重雙雙玉條脫盡憑三島寄羊君

懷華陽潤卿博士三首皮日休

先生一向事虛皇天市壇西與世忘
牀脚支龜看氣訣刀圭餌犬試仙方
靜探石腦衣裾潤閒鍊松脂院落香
聞道微賢須有詔不知何日到良常

冥心唯事白英君不問人間爵與勲
林下醉眠仙鹿見洞中閒話隱芝聞
石牀卧苦渾無蘇滕篋開希恐有雲
記得玉皇新詔樣青瓊

版上綠爲文鳳骨輕來稱瘦容華陽館主未成翁
數行玉札存心舊一掬雲漿漱齒空白石煮多重屋

黑丹砂埋久染泉紅他年欲事先生去十賚

須加陸逸冲

奉和

陸龜蒙

幾降真官咬隱書洛公曾到夢中無
眉間入靜三辰景肘後通靈五嶽圖
北洞樹形如曲蓋東凹山色似熏鑪
金壇福地能容否願作岡頭將負芻

火景應難到洞宮蕭閒堂冷任天風
談玄塵尾拋雲底服散龍胎入酒中有路還將赤城接無泉不共紫河通
奇編早晚須傳噉免問神仙向葛洪

終日焚香禮洞雲更思琪樹轉勞神
曾尋下泊嘗經月不到中峯又累春
仙道最高青玉錄暑天偏稱白綸巾
清齋若見茅司命乞取朱兒十二斤
朱兒事見登真隱訣

華陽張博士欲居荆襄因寄之

皮日休

地肺從來是福鄉廣文高致更無雙
青精飯熟雲侵窻白初裘成雪濺窻
映日竹窻千萬字經冬未煎兩三缸
鱸魚自是君家味莫背松江憶漢江

代廣文酬

陸龜蒙

不知天隱在何鄉且欲煙霞跡暫雙鶴廟未能齊月馭鹿門聊擬並雲窻薛衡荒磴移桑屐花浸春醪滿石缸莫惜槎頭客釣伴也應東印有餘江

送潤卿懷華陽

皮日休

雪打蓬舟離酒旗華陽居士半酣歸逍遙只恐逢雲將恬澹真應降月妃仙市鹿胎如錦額陰宮燕肉似酥肥公車草合蒲輪壞事不教他白日飛

同前

陸龜蒙

何事輕舟近臘回茅家兄弟待歸來封題玉洞虛無奏點檢霜壇沆瀣杯雲肆先生分氣調山圖公子愛詞才殷勤爲向東卿薦酒掃含真雪後臺

南陽博士還雷平後寄

十五

微微春色染林塘親撥煙霞坐澗房陰洞雪膠知未入濁醪風破的偷嘗芝臺曉用金鏡煮星度閒將玉鈴量幾遍侍晨官欲降曉壇先起獨焚香

同前

皮日休

春彩溶溶釋凍塘日晴閒燕坐巖房瓊函靜啓無人見金液初開與鶴嘗八會舊文多榻寫七真遺詰剽思量不知夢到驚何處紅藥滿山煙月香

寄懷華陽潤卿

鹿門山下捕魚郎今向江南作渴菴無事只陪看鶴相有錢唯欲買湖光醉來渾忘移花處病起空聞焙藥香何事對君猶有愧一蓮風雪返華陽

奉和

陸龜蒙

高抱相逢各絕塵水經山疏不離身才情未擬湯從事玄解猶嫌竺道人霞染洞泉渾變紫雪披江樹半和春誰憐故國無生計唯種南塘二畝芹

再寄潤卿

皮日休

高眠可爲要玄纁鵲尾金爐一世焚塵外鄉人唯許採山中地主是茅君將收芝菌唯防雪欲晒圖書不柰雲若使華陽終卧去漢家封禪用誰文

酬襲美倒用前韻

張賁

尋疑天未喪斯文故選茅峯寄白雲酒後只留滄海客香前唯見紫陽君近年已絕詩書癖今日兼將筆硯焚爲有此身猶苦患不知何者是玄纁

奉和

陸龜蒙

忽辭明主事真君直取姜巴路入雲龍篆拜時輕詰命霓襟披後小玄纁峯前北帝三元會石上東卿九錫文應笑世間名利火等閒靈府剩先焚

文燕招潤卿辭以道友將至因寄

仙客何時下鶴翎方瞳如水腦華清不過傳連揚君夢從許人間小兆聽

和

皮日休

馳馭已應歸香眇博山猶自對氤氲不知入夜能來否紅蠟先教刻五分

答

張賁

仙侶無何訪蔡經兩煩韶渚出彤庭人間若有登樓望應怪文星近客星

謝潤卿惠飢飯

皮日休

傳得三元飢飯名大宛聞說有仙卿按西梁錦書大宛北谷子號青精先生分泉過屋春青稻此飯以青龍給之拂霧影衣折紫莖南燭色微紫蒸處不教雙鶴見服來唯怕五雲生草堂空坐無飢色時把金津漱一聲

同前

陸龜蒙

舊聞香積金仙食今見青精玉斧殮自笑鏡中無骨錄可能飛上紫霞端

送董少卿游茅山

皮日休

名卿風度足杓斜一舸閒尋二許家天影晚通金井水山靈深護玉門砂空壇禮後銷香母陰洞緣時觸乳華盡待子公作廷尉不須從此便殮霞

同前

陸龜蒙

威輦高懸度世名至今仙裔作公卿將隨羽蓋朝珠闕曾佩魚符管赤城雲凍尚含孤石色雪乾猶墮古松聲應知四扇靈方在待取歸來綠髮生

寄何道士

終身持玉律丹訣未應傳況是曾同宿相違

便隔年問頗知更少聽論想逾玄古錄文垂露新吟句絕煙蜂供和釘密人寄買山錢紫燕長巢洞青龜忽上蓮篋藏微隱詔囊佩攝生篇固暖芝臺秀巖春乳管圓林棲孫子鶴堂宿弟兄仙幸閱靈書次心期賜一編

洞宮秋夕

月午山空桂華落華陽道士雲衣薄石壇香散步虛運杉露泠泠滴栖鶴

寄懷華陽道士

華陽門外五芝生殮罷愁君入杳冥遙夜獨棲還有夢昔年相見便忘形為分科斗侵鉛槧與說蜉蝣坐竹樞醺後幾時歸紫閣別來終日誦黃庭閒教辨藥童名甲靜識歸巢鶴姓丁絕澗飲羊春水膩傍林燒石野煙腥深沉谷響含疎磬片段嵐光落畫屏休採古書探禹穴自刊新曆闕堯瑛珠宮鳳合迎蕭史玉籍人誰訪蔡經架上黑緣長楊穩案頭丹篆小符靈霓軒入洞齊初月羽節升壇拜七星當路獨行衝虎豹向風孤嘯起雷霆凝神密室多生白叙事聯編盡教青巾地山形皆

暗寫隱天竿籟秋閒聽分張火力燒金竈拂拭苔痕洗酒罇翠壁上吟朝復暮暖雲邊卧醉還醒倚身長短裁筇杖借客高低結草亭直用森嚴朝北帝愛將清淺問東溟常思近國看裁杏擬借鄰峯伴采茶拚樹半扉晴謁

鵲背琴殘燭曉熒熒舊來捫蝨知王猛欲去為龍歎管寧蟾兔幾應臨蕙帳漁竿獨尚枕楓汀含煙細草無端綠冒雨閒花任意馨掠岸驚波沉翡翠入簷斜照礙蜻蜓初征漢棧宣飛檄待破燕山好勒銘六轡未收千里馬一囊空負九秋螢我悲雌伏真方納他聘雄才似建瓴合在深崖齊散木自求滄海點浮萍頻拋俗物心還爽遠憶幽期目剩冥已買扁舟東負詰手披仙語任揚舲

寄茅山何威儀

二首

大小三峯次九華靈踪今盡屬何家漢時仙上雲顛鶴蜀地春開洞底花閒傍積嵐尋瀑眼凍凌殘雪採芝年未已奉黃庭教夕鍊精毫曉吸霞曾向人間拜節旄乍疑因夢到仙曹身輕或

羽霞襟袂聳我煙鹿憤高山暖不羣峯上
非水寒仍落洞中桃從間後日搜奇話轉覺
毫飛夜夜勞

送人罷官入茅山

呼童曉拂鞍歸上大茅端薄俸雖休入明霞
自足殮暗霜松葉赤疎雨草堂寒又鑿中峯
石重修拜月壇

句曲山朝真詞并序

歲十二月二日句曲山道士朝真于大茅峯
上學神仙有至自千萬里者余距華陽天程
止信宿塵約不能遂去馳神旦旦忽若戴昇
矣因作朝真詞迎送各一解以自塞意

迎真

九華磬答寒泉急十絕幡搖翠微濕司命旂
旌未下來焚香抱簡凝神立殘星下照霓襟
冷缺月纔分鶴輪影空洞靈章發一聲春來
萬壑煙花醒

送真

紫雲鳳髻飄然解玉鉞玄竿儼先邁朝真弟
子悄無言再拜碧杯添沆瀣火鈴跳擲龍毛

蓋腦髮青青赭綵綵萬象銷沉一瞬間空餘
月外聞殘珮

江南秋懷寄華陽山人

櫛髮涼天曙含豪故國情歸心一夜極病體
九秋輕忽起檐楹詠因悲絡緯鳴逢山即堪
隱何路可圖榮謀策空占命持竿豈釣名忘
憂如有待縱懶似無營小逕纔分草斜扉劣
辨荆冷荷承露蒨踈菊卧煙莖譜為聽琴聞
圖因看海澄鷺毛浮島白魚尾撇波蘋庭摘
低攀嗅園葵旋折烹飢烏窺食案闌鼠落書
棚種豆悲楊惲投瓜憶衛旂東鄰誰處士南
郭自先生分野星多塞連山卦少亨衣裾徒
博大文籍漫縱橫蘭葉騷人佩尊絲內史葵
鵲冠雖適越羊酪未饒僮倚嘯微抽恨論玄
好折醒樓遲勞鼓篋豪俠愛金贏鍊藥傳丹
鼎嘗茶試石甌沼連枯葦暗窻對脫梧明未
達譏張翰非才嫉禰衡遠懷竟易黯幽憤骨
堪驚礪缺知矛利磨瑕見壁瑛道源疏的漚
儒術售精誠敢歎良時擲猶勝亂世櫻相秦
猶幾死王漢尚當黥飲啄期應定窮通勢莫

爭髡鉗為阜隸譚笑得公卿浴日安知量追
風不計程塵埃張耳分肝膽季心傾諭蜀專
操檄通歐獨請纓匹夫能曲踊萬騎可橫行
許國輕妻子防邊重戰耕俄分上尊酒驟厭
五侯鯖靜默供三語從容算一枰弘深司馬
法雄傑二師兵朔雪埋烽燧寒茄裂旆旌乘
時收句注即日掃撓搶武昔威殊俗文今被
八紘琮璫陳始畢韶夏教初成芽葉羣妖滅
松筠百度貞郎官青瑣拜使者繡衣迎帝道
將雲關澆波漸砥平學徒羞說霸佳士恥為
吟負杖歌南畝操觚賦北征才當曹子怯書
比惠車盈謝氏憐兒女郝家貴舅甥唯荒稚
圭宅莫贈景山鎗賢彥風流遠江湖思緒縈
謳啞搖解艇出沒漾鵲鵲晚樹參差碧奇峯
迢遞晴水喧摠紫灰村響啼香杭荷笠漁翁
古穿籬守犬獐公衫白苧卷田餉綠簪擎地
與膏腴錯人多富壽并相歡時帖泰獨坐歲
崢嶸啣噴蛩吟壁連軒鶴舞楹戍風飄疊鼓
降月動哀箏未得文章力何由俸祿清和鉛
還搢搢持芥自丁丁驚懼疑雕朽功勤過肩

瓊凝神披夕秀盡力取朝英靈簡開塵篋寒
燈立曉禁靜翻詞客系間難史官評天地寧
舒慘山川自變更祗能分陌惠誰解等殤彭
項豈重瞳聖夔猶一足甕阮高酣麴藥莊達
謝攝性辭齒無勞話寬心豈可感但從鑪冶
煨莫受蔚羅嬰硯撥萍根洗舟衝蓼穗撐短
牀編翠竹低几凭紅檉霜信催楊柳煙客易
杜衡析排巢燕燕屏畫醉猩猩細檜堆嵐影
飛泉撼玉琤艸尋遠近握槊關輸贏樞歷
離披瓠簪垂礪磊橙忘情及宗炳抱疾過劉
楨野饋誇飯江商賣蔗飭送神抱瓦鼓留
客上窺饒舉械揮青劍鳴榔送遠鉦鳥行沉
莽蒼魚隊破泓澄手戟非吾事腰鎌且發硎
諒難求標標聊欲取錚錚幾數蟲甘夢還思
鹿美萍愁長難自剪歌斷有誰賡未去師黃
石空能說白珩性湍繞激浪言秀罷抽萌地
僻琴樽獨溪寒杖屨清物齊消臆對戈倒共
心盟綠曳靈妃瑟金涵太子笙幽棲膠竹塢
仙慮繹蓬瀛想象珠櫺鳳追飛翠蓋驚霧簾
深杳悄雲磬冷敲鐙錄字多階品華陽足弟

兄焚香疑一室盡日思層成匿影崦嵫色呀
空渤澥聲吾當管巨黍東去射長鯨

游茅山

杜荀鶴

步步入茅山仙家鳥徑分漁樵不到處麋鹿
自成羣石面迸出水松頭穿破雲道人星月
下相次禮茅君

送喻鍊師歸茅山

李建勳

休糧知幾載臉色似桃紅半醉離城去單衣
行雪中水聲茅洞曉雲影石房空莫學秦時
客音書便不通

送許處士堅往茅山

潘佑

天壇雲似雪玉洞水如琴白雲與流水千載
清人心君攜布囊去路長風滿林一入華陽
洞千秋那可尋

宿茅山

徐鉉

茅許稟靈氣一家同上賓仙山空有廟舉世
更無人獨往誠遺俗浮名亦累真當年各自
勉雲洞鎮長春

茅山志卷之二十八

茅山志卷之二十九

火五

上清詞 宋師 劉大彬造

金籙編

宋詩

將赴南徐任游茅山作 范仲淹

丹陽太守意何如先謁茅卿始下車展節事
君三黜後收心奉道五旬餘因尋靈藥逢芝
圃欲叩真關借玉書不用從人問通塞天教
吏隱接仙居

寄張道者

有客平生愛白雲無端半老尚紅塵祗應金
簡名猶在得見仙巖種玉人

寄道士張明真

田況

澹靜姿儀簡曠蹤結菴深對大茅峯坐忘世
故愁應少道斷人情語亦慵萬里信音憑鶴
到一厨煙火倩猿供幾時歸侍虛皇駕七色
霞衣九色龍

游茅山

滕宗諒

句曲山中古洞天金堂玉室地相連方當蓬
子知非日已過茅君得道年

寄張明真

王隨

紺髮丹顏氣粹和大茅峯畔隱雲蘿至人朝
斗傳靈訣先帝觀龍賜御歌町疇瑞文眠徑
草蜿蜒神物戲池波自慚五馬來塵外一挹
仙風幸已多

華陽逋客

胡宿

小隱華陽客山居不記年酒中常有聖基下
更無仙校得廣陵散注成秋水篇吾纓今未
濯慚愧舊林泉

登茅峯

三首

王安石

一峯高出衆峯顛疑隔塵沙路幾千俯視煙
雲來不極仰攀蘿爲去無前人間已換嘉平
帝地下誰通句曲天陳迹是非今草莽紛紛
流俗尚師傳

脩然杖屨出塵囂雞犬無聲到次家欲見五

芝莖葉老尚攀三四五鷗羽翰遙容溪影轉迷橫
徑仙凡風來得墮樵興罷日斜歸亦懶更磨

蒼辭認前朝

捫蘿路到半天窮下視茅州杳霤中物外真
游來几席人間榮願付蒼通白雲坐處龍池

杳明月歸來鶴馭空回首三君誰更似子房
家世有高風

中茅石上見徐鉉篆字

百年風雨草苔昏尚有南唐筆法存只恐終
隨碑盡西風吹燒滿秋原

謁觀妙宗師值晝寢

張方平

一枕清風靖館深滿庭松檜鬱交陰此時內
景人難見月在泥丸日在心

玉晨觀左紐檜

楊傑

華陽山裏千株檜玉晨殿前一左紐虬枝龍

幹向朝曦勢與搏桑關長久亳州渴水太清
宮老子手植纔數九一檜正與此樹同帶固
根深應不朽信知福地有靈木栽種曾經上
真手君不見龍從火裏出虎向水中生生理
尚在不尚石又不見天輪左旋不休止日月

五星如磨蟻四五左紐檜蘊至理上士體之能不
死

送洞元法師歸茅山

三首 蔡肇

絳節飄飄下紫清更參隱訣制頽齡若逢方
丈庵眉叟來受囊中赤甲經

崇寧新閣連雲起天篆浮空寶氣飛帝遣群

龍常護守池潭風雨夜深歸

一菴晴昔共嶽峯古木垂蘿歲月深恐是三

生房次律要隨藤杖去重尋

三茅風雨圖

筆間雲氣生豪末紙上松聲聽有無收得三
茅風雨樣高堂六月是冰壺

贈王荃

并序

龔原

荃字子真富鄭公客元豐中賜號冲照處士
元符三年從劉先生受上清錄華陽洞便門
一夕忽開自左慈得進洞宮旋閉且千載矣
華陽新報便門開應爲高人受錄來試問玉
門砂遠近未饒元放是仙才

寄茅山道友

丘濟

鳴鳳相邀覽德輝松蘿從此與心違孤峯萬
仞月正照古屋數間人未歸欲助唐虞開有
道深慚茅許勸忘機明朝又引輕帆去紫木
年年空自肥

題茅山

陳輔

積金峯頂作屏遮寶閣橫空疊彩霞鶴駕往

來茅許宅龍耕交會郭楊家洞天有望人如玉塵世休觀事若麻我是方臺舊僚友盍尋歸路種雲芽

下泊宮

咸陽龍虎此飛昇二弟東山道亦成不見棠梨司命宅空餘丹井一泓清

玉蘭

長史北軒多種竹隱居南洞少栽花藍橋西路青青處拾得瑤兒似虎牙

芝術歌并序

周邦彥

道正盧至柔得芝一本生於木間木生石上根鬚連絡不可解遇於白鶴廟之側樵斧斷取之猶金石也邦彥請乞於盧持壽叔文華陽之天諸洞府阿穴便門迷處所三君謁帝不知還帳冷祠空遺鶴羽玉津寶氣久成腰靈木神芝時出土日精潛燭山自明人力窮搜神不與前年棟撓作新宮坎空巖響斤斧君來胎禽舞海雪君去山雲雜川雨是生朱草示塵寰故遣樵青入林莽蘼膏紫漆自堅栗下附天蘇蟠石塢肉人但恐奇禍作

藥籠復憂神物取廬陵太守蘊仙風健骨清姿欲飛舉陰功除瘼民已悅靈藥引年天亦許願因服餌斷青梁未讓南華養生主

華陽洞

張商英

素虎斑虬躡紫煙幾看滄海變桑田赤城玉笥尋真後又到華陽第八天

南洞即事

張綱

紫綬金章八十三衰殘不稱舊官銜煩君寫作歸田老野服翛然坐碧巖

送鶴還齊雲

張釜

胎仙誰遣到塵寰盡日清吟伴我閒不作沖天支遁想頗疑攜箭佐卿還要追鸞駕煙霞上肯處雞羣伯仲間為語齊雲好看取他年我欲訪緱山

贈華陽法師

蔡卞

師到華陽洞山華幾度開祇應常救物却遣世人來

將之豫章別葆光先生

張堅

西山喚我陪輕輦上館留君養大還莫起世間離別念他年相見兩童顏

鶴廟松

開宋茂者傷其根遂枯其半

誰種飛仙百丈梯風摧雨折昔人非憑誰寄語楊員外留取孫枝待令威

茅山雨中

疎疎霧雨閔朝晴不那浮雲先自生傳語洞靈休勒駕而今逋客已歸耕

華陽南洞

周文璞

稽首游靈山駕言入華陽南洞極閼怪松深泉水香曲几妙隸畫鉅石刊靈章俛首闕雲門冷風襲綃裳守菴敬愛客暖我紫木湯遺我幾眼錢云是洞所藏往有尋幽徒入見黃金墻侈心或已起幾受奇鬼戕凡身倘會遇敢恨飛蓬霜更巧尺宅地便禁安閒房朝披神芝圖暮試飢飯方

金牛穴

大五

凌兢下危梯頽僂坐深穴側身避雲霧偃面視日月藥苗護餘衍竹根噴截薛安知幽磻下有此太奇崛金牛鏤光采仙牒尚可閱岡頭春已半枸杞如點血便恐顛風興橫吹崖石裂

寄華陽道侶 三首

服事三茅過一生癡心只望羽車迎舊時手
種黃龍子今解擎雲入太清
九錫碑亭日欲曛幽人跌坐對爐熏憑誰爲
謝桓司馬句曲山中只白雲

羽扇臨玄圃霓裳上醮壇九枝松葉冷千葉
杏花殘

玉晨觀

風鳴長史昇天栢草護仙翁瘞劍瑩瑞像殿
前亡馬蹟秦龍池上有鼉鳴

道中回望茅山

危亭插名嶽畢景扶鉤闌白鳥伺察過低即
若弓彎去歲負笈游徑往元符間離留叫晝
靜洞戶生春寒奇哉老宗師作屋雲雨端竟
爲殺蟲蛾不得升龍驚遺體既解脫故宮亦
燒殘今初已半舊千柱扶玄壇遂以兩不借
因復窮噴坑入宅問玉斧採芝投金環墨沼
篆結字丹臺氣成盤稽首大司命被髮綠映
山兩君控鶴從俱著漢小冠何當從之游惚
恍神觀還俗累復驅去黃藥鼎欲翻

燕口洞

田霖

燕口龍泓氣象清錢真此處有遺靈仙兄去
後師猶在女弟回時洞已扃雲葉尚如披素
練泉聲長似誦黃庭碧桃花發菖蒲紫留與
人間作畫屏

玉晨鑒義芮公見訪

毛友

曾看扁舟下國門風吹玉袖欲蜚仙經過弱
水三萬里邂逅長安五百年投老漸諧隨處
樂此生只有未償眠茅山木老堪饒斷服食
相依倘宿緣

次韻

翁彥深

聞道三茅五洞門翛然來往御風仙雲深騏
驎那容步松古龜蛇莫問年邂逅江頭披霧
語尋思巖畔枕流眠自憐天柱曾孫老句曲
清游合有緣

游茅山道中口占須徧游廼成章

周必大

千峯溧陽來勢若西南奔遙拱三茅峯不敢
迫至尊三茅如軒懸次序儼弟昆正西關夷
途羣仙之所門至今下泊宮往往弭旗幡

送張達道還山

趙璩

騰借紅塵一日閒有勞妙語徹幽關豈知隱
几如南郭也愧移文向北山有意清風憐我
住無心孤月伴君還三茅若問今消息爲報
逍遙天地間

棲白菴

呂江

門外竹千箇崖顛兩徑分奔泉流碎月高樹
礙行雲游客倦欲卧道人言少文但云秦學
士曾此遇茅君

庚子歲除前一日游茅山尤表

犯寒出行遇值此歲云除剛風駕颺輪送我
游清都華陽第八天仙聖之所居洞門旁容
人中寬如室廬橫前大溪水於焉限塵區其
右萬石林錯落空翠圖茅菴著深秀細路綠
崎嶇幽泉見客喜頗亦類逃虛山深日易曛
捷徑趨元符琳宮照金碧天籟鳴笙竽側睨
白雲峯前瞻赤沙湖金壇簪百丈陰洞通七
途俯視人間世擾擾真蟲蛆蚩以凡陋質忝
分赤城符豈悟夙昔緣復造神靈墟平生夢
寐處恍若登華胥歸來拜綠章足力尚有餘

瑤館十六所安能徧邀娛窮探恨不盡大息
仍踟躇

華陽洞辭 三章

游九言

河漢澈碧霄晴九華仙子到凡塵涼夜山頭
吹玉笛纖雲卷盡月分明

大五

九

香露濕草晶瑩起看大地盡瑤瑤下界十門
人寂寂空山夜靜海波聲

仙子去眇雲程天風杳杳珮環清回望九州
煙霧白千山月落影縱橫

大茅君像

曾極

面如頽玉碧臚寒散髮垂肩榭葉乾不向大
茅峯頂見世人只作伏羲看

寄溫尊師

趙師秀

幾度題書寄入山不知何處得書看莓苔石
上秋吟遠星斗壇中夜拜寒鶴改新名呼未
至碑逢斷刻打應難憶師每欲尋師去芝朮
我成自可餐

山行

湯志道

攀藤緣絕壁野鹿場邊去鳥銜山果來落在
鹿眠處

寄凌山人

劉宰

星冠羽帔威儀新納官錢得度歸慚愧三
茅老兄弟一生木食草爲衣

游山和諸姪

陳序

山南細路半青霄人昔共游非俗交浮玉故
鄉驚上國埋丹清夢記中茅峯頭仙客歸黃
鵠石面靈根走翠蛟見說西園潭草莽手栽
寸栢已勝巢

茅山

楊至質

玉肺空浮已字山五門不鎖洞天寬紫花可
餌秋尋木紅焰難埋夜見丹畫出一牛方水
草飛來三鶴各峯巒仙蹤寂寞高風遠誰爲
先生指額癡

送茅山劉書記游南嶽

憶共住華陽晴藍紫木香空山今詣闕吾子
亦游芳草露雙芒屨丹經一布囊好登祝融
頂紅橋進博桑

送林道士歸茅山

鄧道樞

多載事茅君麻衣與葛巾眼知人貴賤心鍊
已形神丁甲常爲使王侯不得臣華陽歸洞

晚芝草幾回春

送玉海宗師還山

趙伯秀

湖海天教十載閒玉經功就勝居壇驚塵天
目妨龍卧晚歲華陽望鶴還入詠五噫丹闕
近會心三笑畫溪寒世緣歷盡仙緣熟坐斷
陪真向上關

茅山志卷之二十九

茅山志卷之三十

火六

上清嗣宗師劉大彬造

元詩

遊茅山五首

盧摯

聞句曲山舊矣迺至元戊子春繇宣部行郡
漂陽省俗其墟距山麓一舍而近凡隆阜勝
川曰洞天福地登諸祀秩者部使者至焉禮
也予於是三茅之行至所謂崇禧觀崇禧
主人鄒姓以心遠自命賓子精舍規構若相
第燕室邃潔藻綯過之亭翼然水樹竹石間
爲此山麗瑋勝絕吾二人彷彿相與不覺日
之夕也遠師衣冠褒然清辯有奇趣又多藝
能託意繪素以幾物化出所畫鶴工緻詣極
雖古之善史畧無見踰而神韻超拔則又得
諸方外者如此因舉觴爲踈翁壽羽流之宇
於上峯者曰元符萬寧宮亦曰宗壇宗壇師
許君翼日肅予爲神明之觀揮杯倚空引睇
無極恨昔之隱居者不獲仍丹丘以從予游
也下探華陽洞穴玉膏泓渟石髮紛紺涓流
赴壑浮花與俱過喜客泉泉方井如澈鑑如

承以石砥如廣袤大許深衷尋之半繚以

四廡固以扁鋪闔闔唯謹疊齋豆蕭予以揭

虔以祇其泉客至客喜泉則喜沸沫溢渌渌若

躍蚌胎而貫龍髯者殆不可稱數謂之泉笑

否則否異哉予何以見笑歸復憩遠師所留

山間者既信宿矣主人睦客殊未艾也予誦

樂不可極爲解賦詩爲別序以貽之

馬上微風散薄陰玉笙吹客過華林山中宰

相杳何許日暮碧峯雞犬音

澗邊瑤草洞中花細水流春帶碧沙昨夜山

瓢酒初熟道人不暇讀南華

竹杪飛亭枕石泉松壇香霧趁茶煙鳥聲記

得夜來雨鹿夢驚回別有天

遶天有客訪髯龍好事仙人畫者儼笑卷雲

煙收拾去長教函丈在三峯

山君滿意爲山留故遣清泉笑不休萬斛珠

璣三尺玉要隨詩句過宣州

題鄒尊師松鶴圖

膏粉昂丹筆有神道人無夢到雞羣何時醉

拊蒼髯客喚起茅山萬里雲

茅山作

并序

戊子歲除復如茅山已丑春正月朔舉祝釐

之典曉登天市壇遂偕崇禧主人過積金中

峯留飲松溪方丈復歸遠師玉氣凝潤之室

海風吹曉上三山手把韶華滿意看偶向仙

家逢歲朔不知人世有春寒梅邊杖屨香隨

步雲際樓臺玉作闌萬古椒花一杯酒醉來

騎鶴問還丹

歲旦後四日留別宗壇師松溪許君

鄒君心遠五首

霜袍行客再來時不獨青山慰所思咽路黃

冠定奇士半能歌我步虛詞

碧溪風日隔人間催出梅花鏡裏看莫爲輶

車太幽獨剩分香玉照春寒

山頭羽客曉相携踏破蒼雲北斗梯偶向茅

君巖畔宿却隨猿鶴過松溪

袖裏丹砂鞋底雲堯天甲子漢時春只今句

曲游仙夢無復商顏避世人

揖雲聊與許君辭月下歸來訪遠師半夜竹

聲噴客去又教勞動歲寒枝

賦得松溪呈許宗師 陳鈞

積金高處擁髯蒼下有深清護石房
渴虎遠林巡琥珀伏龜隨鶴闌
滄浪驚濤兩岸作寒雨明月一灘流
翠霜頗似九層臺上坐空青樹樹落圓光

登大茅峯

梁棟

杖藜絕頂窮追尋青山世路爭岷嶽
碧雲遮斷天外眼春風吹老人間心
大君上天寶劍化小龍入海明珠沉
無人更守玄帝鼎有客欲問秦皇金
顙崖誰念受辛苦古洞未易潛幽深
神光不破黑暗惱山鬼空作離騷吟
我來俯仰一慨慷山川良昔人民今
安得長松撐日月華陽世界收層陰
一聲長嘯下山去草木爲我留清音

登茅山

張珪

久矣厭朝市心棲巖壑幽今朝復何朝
陟此蒼峯秋玉宇正寥廓風簫寒颼颼
平生獲壯觀萬里供寸眸煙嵐縹緲中
青原間平時琳宮一何麗突出寒巖陬
茅君此仙去遐想希前修胡爲塵土蹤
歲月徒悠悠何當乘雲虬

八表同周流念念竟忘言
凝神入冥搜彷彿鸞鶴音
還來故山游

喜客泉

昔聞喜客泉今來欣見之
俯檻一凝眸珠璣拂清池
山靈繇神秀出此天下奇
嗟予時所忌而泉喜何爲
爲丹忱天自知顧茲諒弗疑

晉檜

晉代王氣終劫灰今幾時
獨餘此蒼檜鬱鬱貞秀安
深根盤厚地雲漢參高枝
風霜固久歷雨露無偏滋
一笑媚時榮朝盛夕已衰

陰陽井

仙人修鍊地玉井著神功
日月雙輪見陰陽兩竅通
可堪清徹底那更施無窮
尚冀丹砂力當澆塵念空

玉晨觀懷古

趙世延

秦龍人去水平池樓廢壇荒
有所思落日回廊秋寂寂
摩挲晉檜讀梁碑

許長史井

因觀長史陰陽井始悟混元玄牝門
一勺三田勤灌溉無根靈草自春溫

覽蘇後湖待月南軒墨蹟白雲觀即景用韻

涼颼集庭柯秋氣殊未肅
扶雲度索岡訪古瞰巖谷
午茶琳宇琴晴致超冰玉
愧爾白雲人幽棲非碌碌

華陽道院石亭

秀石嶺巒泓水清雲松雪竹護危亭
一壺天地開仙境百里風煙簇畫屏
華表柱頭人易換槐安國裏夢初醒
何當借我東偏屋靜掩巖扉學鍊形

出茅山宿青元觀

白雲送我出山蹊來宿葛公丹井西
莫道歸途清興減夜來和月飲刀圭

與存此山上人山行

吳興趙公作詩意因

梁大柱

一聲兩聲松子落三片五片楓葉飛
夕陽下山新月上道人相送一僧歸

凝神菴

菴廬占勝倚巖偏中有高人謝俗名
書卷獨存標月指松風疑聽喝潮聲
杳摩銀鼠花生

縵墨洒金鸞草間行回首浮榮空一夢湖光
蕪碧遠山橫

計籌秋夕懷茅山道舊 林德芳

兩峯明月各天涯限以具區天渺瀰秋聲合
在聽輪頂借我王倫鐵笛吹

至大三年代祀茅山宿玉晨觀

吳全節

星馳六轡過華陽晉檜蒼蒼古道場夜鶴唳
風清地肺曉龍閣雨護天香三峯恍惚逢來
境萬象昭回草木光青石壇高天咫尺綠章
封事答吾皇

登大茅峯

第一福地第一峯玉臺積翠摩蒼空大君成
道二弟從還丹返老顏如童繡衣趣召凌天
風此事萬古將無同山高有仙水有龍龍腹
如篆朱砂紅鮫鮫變化理莫窮作霖濟早年
屢豐神仙為市壇朝宗真人換號芝泥封猿
鶴相語千載逢葵心耿耿通宸楓萬里六轡
馳花驄香飄龍篆江雲東瑞凝草木氣鬱蔥
稽首峯頂歌玄功他時歸奏明光宮

三峯

午夜瑤壇謁帝還筇與衡雨兩山間客來似
覺茅君喜淨掃浮雲出好山
石徑松雲入步輕垂垂空翠雨初晴風來山
閣涼如水小倚闌干聽鹿鳴

崇禧觀

曲林古觀水西流天遣皇華駟玉虬高士遠
分龍虎派哲人久伴鳳凰游樓臺山色三峯
曉池館泉聲五月秋雲案凝香浮洞府坐令
和氣藹丹丘

牧齋真人華陽道院

盤戴三峯擁客槎采真訪古意無涯雲山夜
雨棠梨樹宇宙春風棣萼花龍洞遠分丹井
水鶴松高映赤城霞宗師應帝光前緒仙館
新開第一家

鑑止

山泉漱玉雨浪浪渟渟深開一畝塘若向動
中知靜體湛然泰宇發天光

茅山志卷之三十

茅山志卷之三十一

火七

上清祠宗師劉大彬造

元詩

喜客泉

客游華陽天山徑有竹與首登大茅頂天市
神仙居回觀喜客泉稽首孫仙姑方池鑑止
水湛湛涵太虛仙君驅驪龍為吐萬斛珠袞
袞出石底拍手相歡呼有情感無情此理妙
鼓桴泉喜客亦喜主人當何如我願斟一勺
萬物同濡濡歌詩謝山靈臨風重躊躇

全清境界

境界全清地位高山中盡日樂陶陶旋刻白
石開三徑可是青山厭二豪眼底浮榮看草
露耳根清韻起松濤明朝足馬西湖路回首
靈峯聳巨鼇

別茅山

長松古道翠深深回首層巒積金鶴語雲
峯人換世鳳咭仙路客來今連朝晴雨隨人
意到處煙霞感帝心如此山川歌不足行看
褒袞出詞林

延祐元年五月重祀茅山瑞鶴詩序

至大庚戌秋百餘鶴集大峯一宿宗師劉君以其明年入觀嘗圖以獻茲以上命再祀宗壇比至下泊有鶴十二若相迎導遂賦二絕并紀之

一雨三峯分外青巖華潤草共欣榮茅君聞道天香至先遣西山羽駕迎
圖寫丹青上九天秋風百鶴駐山前誰知六轡重來日又見排空十二仙

重登第一峯

重登大峯頂曉色正蒼涼華構煙霞壯幽居日月長碧雲浮洞戶清露沁衣裳水淺玄龍躍林深黑虎藏去天疑咫尺勝地豈尋常屏俯金峯畫鑪分玉案香會仙猶有市濟世得無方藥園多春意丹房耿夜光何時結茅屋稽首禮華陽

二峯

壇高青石古峯小白雲多樂奏仙君喜茶香便客過神丹藏蕊笈清露滴松蘿路接金龍背回軒發浩歌

三峯

三峯琳宇狀松老鶴知還江白南徐月樓青北固山浮雲通地肺古洞敞天關寄語尋仙者蓬萊只此間

重過喜客泉

萬珠寒湧碧琉璃山色天光湛一池客本喜泉泉喜客闌干倚欄立多時
前度題詩重拂塵泉迎熟客喜津津主人不負當年約為把殊庭總一新

震靈方丈贈玉虛宗師

曉起南窗看白雲道心如水鬢絲銀當時宜室前簾席此日仙壇得主人方外煙霞知有喜掌中雷雨信如神夜來親見茅君說五百年間再世身

閒閒真人奉旨代祀三茅竣事既歸以行

卷示予為詩若干首并集庚戌代祀詩援先虛靖書劉靜一詩例求予并書將以傳焉予不見瓢葉久矣讀之釋然於登高能賦間而有歸美報上之心又皆以王事而從方外之樂真如坡翁所稱羨者是皆宜

書也故為行筆亦以想象同游之意云耳若曰擬虛靖則不敢延祐第一重九日嗣天師張與材敬題

送悟侍者游茅山

仇遠

雲開三茅古洞天借風一舵荆溪船所思綿綿長在夢此行冉冉如登仙汲泉淨洗黃獨雪斷石深耕瑤草煙蕙帳香凝蒲坐暖共讀南華秋水篇

寄梁中砥

釋覺恩

白雲明月本無期君子長吟有所思鴈向石頭城畔過寄書安用牧鴉兒
憶昔吳門商子家小樓吹雪賦蘭花人間百香金波滿一窗清愁百洛義
抹電浮漚豈足憑餘生只合付騰騰華陽書出金籠首好是瀟山某甲僧

傷中砥

文溪書到千峯閣報道良常已上升共我偶然成百歲知君久已伐三彭社中不見丹元子世上空傳白石生猶憶去年長別處一蓬春雪讓王城

初發金陵夜泊龍潭寄華陽道士

僧大訢

平生不必行萬里不必讀盡萬卷書願為茅
山十日客山僧坐列羣仙圖大峯揚馨出天
闕小峯萬馬爭奔趨俄頃波濤忽破碎木末
飛上金畢逋青書畫壇室靜玉鞭夜擊聞
傳呼去年獨宿丹井下天風掃地迎麻姑今
年許入玉柱洞誰遣旅食隨橋烏懷人弔古
夜寂寒江月落號颼颼祖龍埋金王氣歇
梁宮晉苑沉煙蕪想見雲林映朝日山中宰
相良非迂

登三峯

僧智圓

茅氏初成子三分地肺顛丹光時隱見石徑
逆盤旋黑虎嘯清月斑龍馭紫烟陶公如可
作欲問普通年

登大峯

僧惟則

白雲剪作瑤臺雪紅旭蒸開玉洞花山北山
南看更好炊煙朶朶是仙家
天市危闌倚碧空兩京山水見冥蒙東來十
日風霜路近在寒嵐一抹中

游陶塘三館之間

一片松林又一宮開門面看茅峯意行恍
惚廬山路歸飯僧分上下鐘

雲林清遠四時詞

馮子振

花分石徑蝶衣裳蜂惱暗檐燕雨香解事野
桃吹綺片誰教賺到鵲仙鄉

脫箠斑筠綠節明霖收梅子麥寒輕諸峯隔
截高低樹忽報初蟬第二聲

月濕流螢歇懶煙西南峯缺露原田冰簾不
倩匡山瀑萬丈銀潢瀉玉天

嘉平臘釀渴茶鐺直待龍沙雪水烹舞徹瑤
臺千歲翮鶴丹回施范長生

喜客泉

倪天奎

斯泉定何神客至粲然喜水何預人事是亦
氣機使坐看百琲珠生滅了無已客問從何
來如雷起處起

三峯

王仁輔

三峯伯仲行茲峯獨雄尊神霄開廣庭坐受
淮江奔華蓋垂地肺蔚藍抱天根稽首大司
命冷風假騰翥

大峯肩摩天中峯臂蕩雲無樹不古色有花
皆仙芬縱目畧淮南游心遺世紛誓將拂金
案畢願從茅君

仙仙三神君鼎峙三峯顛小君保民命萬靈
奉周旋風清石壇月天近香鑪煙安得控丹
鶴遨遊接飛仙

山中春日

褚環中

向陽松下雪泥乾野簇催春上客盤一勺紅
泉人換骨春風莫作舊年看

宗壇秋夕

流綺平雲徹夜開月明峯頂見樓臺瑤瑤聲
裏天燈近知是三真謁帝回

山繞天壇挂月涼斗牛斜掛曲闌傍清吟未
徹金鐘奏催上朝元午夜香

積金峯訪梁道士

白珉

驚羽穿林看細碎健興繞石聽歌斜道人住
近茅峯北一簇樓臺五色霞

京師贈劉尊師

揭傒斯

天書三聘出山來南望三茅日幾迴每說浮
名先氣短常因佳客暫眉開逢迎半是琴書

興留滯空驚歲月催自笑山間林下客四年
風雪與塵埃

知君用意世難聞常恐山門汗白雲方朔豈
能遺漢主魯連曾是卻秦軍已無豪傑平生
夢賴有神仙不死歟早晚蒙恩遂歸計青山
多處禮茅君

京師送玉虛宗師還山 吳善

道人野服鹿皮冠曾約茅君駕紫鸞天外至
今風露好人間何處水雲寬陰陰木葉藏經
榻軟軟林華綴石壇欲趁歸舟下吳越凌風
飛佩不堪攀

同前

元明善

句曲山高真楚氛神仙初祖大茅君遙天歸
鶴盤秋月幽壑潛蛟嗟夜雲丹鼎神光松桂
室酒壺春色潤溪芹一從待詔西清閣石髮
梳香得夢聞

題晉楊真人楷書黃素黃庭經

趙孟頫

琴心玉文洞玄玄金鈕朱錦迺汝傳子能得
之可長年黃素縑果完且堅橫理如髮約兩

邊從有赤道如朱弦文居其間走玄蛾飛雲
卷舒相終始大道甚夷非力使無爲自然有
至理誰能精專換骨髓明憲之塵不瑕穢目
中有神迺識真白玉爲軀裝車輪裹以天上
翠織成仙人樓居儼長生鸞鶴翔舞猿猱輕
子能得之慎勿驚宮室之中夜自明上清真
人揚與許焚香清肅接神女手作此書留下
土千年留轉子爲主東方蒼龍右白虎廉不
子求貪勿予

玄洲倡和 并序

句曲外史張嗣真學道茅君山所居玄洲
精舍左右多真仙古跡曰菡山羅姑洞霞
架海鶴臺玄洲桐華源紫軒火浣壇隱居
松等與趙孟頫同賦小詩以記其處至治
二年壬戌歲四月二十三日道吳興溪上
復還句曲書使刻石以爲山中故事

菡山

靈丘狀三秀紫雲覆其顛易我朝生質閱彼
大椿年
結茅依菡山焚香候芝蓋真靈幸憫我冠珮

右張嗣真

時來會

羅姑洞 事見真誥

右趙孟頫

九疑得道女受事易遠家詩贈金條脫人達
鄂綠華

蒼梧眇天末聞有綠毛仙却遇華陽路人間
九百年

六七

霞架海

日芒界金色紅梁飲鳳阿直把天孫袂烏鵲
詎填河

衆水會一壑天近發霞光晨興新沐竟晞髮
向朝陽

鶴臺

靜夜颯靈風神君語帳中至今雙白鶴時下
五雲峯

上有白鶴翔下有幽人居幽人道當成白鶴
來不虛

桐華源

華林清散景丹水碧凝脂落葉秋無數宜都
願寄詩
伊維植斯桐萋萋滿幽谷鳴鳳久不聞何當

一來宿

玄洲精舍

梁周處士弘讓題
桓真人壁不別撰

李基遺故鼎趙嘯絕風雲悠悠千載下更復

屬夫君

子有鸞鶴想甘同麋鹿游懸榻應待我分我

半玄洲

紫軒

玄憲太霞氣赤書洞古文借問軒中主莫是

紫陽君

林君已仙去紫軒名尚存丹光時或現藥鼎

夜常溫

茅山志卷之三十一

茅山志卷之三十二

火八

上清詞宗師劉大彬造

金蓮編

元詩

火浣壇

林真人火解事
見宋真游篇

真火本無候真人自出現問掃劫灰餘幾見

紅蓮變

真陽以解形四大何足靳指窮於為薪火傳

不知盡

隱居松

二首

露壇棲妙蔭仙籟降靈芬何時三易帳重拂

兩梢雲

真人在山日所至樹以松當知千載下遺子

以清風

玉像龕

二首

瑞儀溫比德寶帔曲流光稽首大司命料理

住金鄉

我有紫虛像白玉雕琢成貢之華陽天萬年

斬降靈

耕雲鋤月二首寄句曲山人

周馳

買田靈山下石多如羊羣造物為我耕種之

皆白雲洶湧初鬱勃散漫還氤氳收歸方寸

間吐作五色文一笑顧妻子未用愁空困

石田不生禾何以養吾拙中宵披白雲自起

鋤明月明月無根株滿地散霜雪吾鋤不妄

揮要使蕭艾別惜無植杖翁相對同此潔

夢游句曲

二首

脩竹垣牆映白沙紫清宮殿闕煙霞一條歸

路朱弦直三百來年不到家

三華樹下拜青童語我丹砂九轉功維氏不

逢王子晉雷平來訪郭仙翁

次韻華陽道士

四首

孫履道

飛神朝鈞天颺輪歷紫垣再拜三元君帝一

受秘言真空寂無聲至道了不煩縣知往古

人妙挈元氣根

金壇峙華陽家廟通帝居晨啓太霄章寸田

茅塞鋤紛擾蟬蛸聚人間死如如天老噉道

畢九光迴鸞車

先天有神物火被嗜欲籠浩劫覓無蹤清光

涵太空出入眉睫間游戲語默中六用混而一大魔從汝攻

聖師禮南真瑤篇啓東華丹篆寫碧牋龍蛇字欹斜紅梁瞰東溟良嶽天之涯西風鸞背高歸路豈憚賒

暮春計籌山中寄句曲山人

黃石翁

松花落粉啼子規山人燕坐春晝遲石泉豈非大韶樂日色猶是鴻荒時筠簍竹杖煙中語青紙丹書林下詩應謝錢唐舊知識白雲獨往無還期

和陸龜蒙朝真詞二首并序

袁桶

往歲在翰苑嘗草三茅君制書近句曲外史寄示陸魯望朝真詞二章蓋每歲大茅君十月二日相傳錄天台歸茅山春三月十八日復歸魯望所製迺十二月而三月獨缺予不揆用韻以補後章繚繚字書即繚字古率字作繚呂道士過三茅因書以寄且爲異日朝真之資外史詞氣清簡必以予言爲陋也

詞曰

參差窈窕行雲急翠旌飄飄露華濕神君夷猶疑未來矯首精思若山立瑤臺章徹星斗冷碧扉丹透紅流影春雷迸壑人不知獨鶴眠松已先醒

右迎真

妙顏朝迴寶衣解乘龍高駝賦過遍山中老人年送迎一酌寒泉過玉蘿翠氣紛霏森孔蓋挾以流鈴光繚繚帝子高歌歸去來白月迎雲送飛珮

右送真

寄贈華陽洞隱者

尸坐朝日雙臉顰寢扉曉入香鑪雲苔石縱橫紫絲障蓀花清淺青霓帶北山猿鶴似有約南巖鐘磬疑相聞更欲深居入絕壑紫壇夜禮三茅君

同前贈二首

虞集

獨棹扁舟入白蘋陶公故宅去尋真囊盛肘後存丹訣書到人間稱道民未覺白雲留住晚也知蒼術寄來頻手栽松上乘飛鶴當是華陽第幾人
隱居聞道無人迹麋鹿來依積雪深每占雲

氣得芝朮莫怪丹光穿樹林茅君自騎一虎下木客或與羣猿吟知爾此時最相憶想予飛躡度千岑

次韻二首

僧祖瑛

我居東海君句曲道遠那知消息真仙家自有縮地術夫子無意橫目民遙應洞草充飡慣不記蟠桃著子頻誰與寄書白土埭好在伴狂史道人

忽忽一別隔幾塵眼見蓬萊淺復深釣鼈每憶任公子放鶴誰同支道林丹就只應長不老詩成多是獨狂吟明年就子霞架海先遣飛車候遠岑

同前贈

楊載

羨君高舉入華陽古洞深鑄石路荒蔽日旌幢朝旄旒飛空環珮夜琅琅殫霞已試登真訣祀竈還修却老方聞說陶公雖隱遁猶將道德輔齊梁

同前

薛玄義

歸去華陽古洞天高情蕭爽絕凡緣牽蘿石壁書紅葉散髮雲林卧紫煙長史玉經何日

降隱居真訣至今傳江東却擬尋君去合景
徊風問上玄

同前

張耒

玄洲別塢鬱龍從滿谷縹雲養萬松外史編
圖金匱鑰隱居留詰玉泥封丹池雨現龍無
角瑤草春肥鹿有茸擬借一龕為洞吏與君
來往大茅峯

同前

劉汶

一日書成四海傳華陽始信有儒仙神交弘
景吹笙夜心在留侯辟穀年重碧拈春瓢貯
月硬黃臨帖硯分泉山中物色清無限便擬
凌雲到洞天

同前

鄭元祐

一自玄洲手結廬硯泉分得澗循除鉤題石
記修人表筆削山經作志書丹竈曉溫松節
酒茶甌春點鞠苗殖殘骸若有登真分亦欲
西游候羽車

同前

倪珽

道士朝乘白鶴還樓臺金碧鎖空山半天華
雨飛幢節一壑松風引珮環丹井夜寒光剡

剡石壇春靜蘇班班飄然便欲尋高隱分我
玄洲一半間

同前二首

李琳

天上神仙白玉扉春雲誰繡六銖衣人間傳
得新詩句為有高僧到翠微

句容郭裏望三峯綠翠芙蓉香霧中安得與
君騎兩鹿碧巖深處聽松風

贈玉虛宗師

王理

句曲山中老鍊師雙瞳如漆鬚如絲自騎玄
鶴朝金殿親奉丹書拜玉墀名姓每承明主
問篇章多出內臣辭蕭蕭風雨歸來夜白石
蒼苔長紫芝

贈集虛宗師朝京師

茅山道士人不識服氣養神三十年此日雙
龜朝紫闕當春獨鶴下遙天若逢物外游方
士應問如今第幾傳龍劍玉函開寶籙何須
重說地神仙

題一峯

王復元

五雲金紫湧仙宮十八灣尖第一峯木石陰
陰風颯颯方池掬看小神龍

二峯

江浙東西指顧間古鐘重鑿鷓鴣斑自憐白
髮猶凡骨千里來登第二山

三峯

曾授靈丹二卯君至今春臘火燒雲人傳隨
後昇空去仙鶴飛吟月下聞

同前

薩都刺

玉珮丁當下界聞天風吹動碧霞裙劉郎跨
鶴游三島王子吹笙到五雲洞府夜光傳玉
印石壇月黑禮茅君若逢天上吳夫子應問
丹砂鍊幾分

往游茅山山中佳致非一但詩思遲遲未
能道其萬一既還因嘗游之地追詠敬呈
集虛宗師

游茅峯

凱烈拔實

筍輿高入碧嶺坑為訪仙人白玉壇羽服常
來千載鶴霞衣曾駐九霄鸞洞生芝草山藏
玉人道琳宮并有丹松下空餘處士宅幾為
梁帝決時難

喜客泉

春水澄澄綠滿池，團圓顆顆湧琉璃。江妃解佩珠凌亂，淵客當盤淚漫垂。坤母由來承博厚，馮夷何事現新奇。倚闌莫謂曾無喜，且玩清冷潤惡詩。

元符山房

坐對千巖翠森森，萬木攢石玉留古。劍藥鼎鍊還丹雲，逼山窻濕嵐開澗樹。寒春禽知客意，啼我暫盤桓。

全清亭

石抱幽亭深復深，當軒翠竹弄清音。華陽山酒盈樽綠，坐對春泉澆醉心。

贈集虛宗師

路入華陽谿水流，仙人瓊珮綠雲裘。松陰石竈丹煙煖，洞裏桃花碧樹幽。嗟我塵中迴俗駕，無心方外訪瀛洲。何當一假茅君鶴，復向三山深處游。

三山深處游

游茅山

月忽難

大茅峯頂神仙府，石逕崎嶇幾屈盤。老兔幻來呈玉印，螭龍飛去賴金丹。喬松白鶴天壇遠，流水碧桃仙洞寒。何處吹笙明月下，珊珊

環珮欲騷鸞

贈集虛宗師

王謙

已字三峯咫尺天，龍池一掬雜嵐煙。牧齋仙去雲江隱，留得清名遠近傳。久客京師喜遂歸，日長風細撲征衣。歸來相對青山坐，杉頂丹光繞翠微。我別華陽歲月長，夢中時復到華陽。華陽洞府應如昔，直至而今噴鼻香。

同前

儲能行

祖印心傳本一真，豈應鶴馭久風塵。清朝大揭無私鑑，福地常歸有德人。瑞澤林原新雨露，歲寒壇宇舊松筠。辨香遙祝山中相，柱石華陽五百春。

改至元己卯仲夏不雨南臺御史馳香命集虛宗師禱雨有感賦詩以述

其事

金鑰

大鈞播物生萬殊，孟夏草木何焦枯。上天無雲久不雨，金陵四境田將蕪。臺端御史賢大夫，憂民憂國忠義俱。徧請羣神早尤甚，遂令驄馬茅峯趨。驄馬御史如冰壺，科頭赤脚凌

崎嶇躬禱茅君輒有應，正直自有神明扶。貞一真人王集虛，登壇呪水飛靈符。驄馬還臺路纔半，云有一雨當隨車。華陽洞天仙所都，卧龍不起誰能驅。自非精誠通，肱蠱何由如。此鼓應桴始見靈，霖終沾濡不假嗔雷轟。九區關臺令史駿奔走，報此德澤覃膏腴。然燭一炬香一爐，坐致三鵠來相呼。豈必西江決斗水，輟鮒不復為枯魚。天瓢一滴垂龍胡，洪波平地三丈餘。神功收斂安可測，寂然不動如虛無。

茅山志卷之三十二

茅山志卷之三十三

火九

上清祠 宋師劉大彬造

金蘿編

雜著

謝靈運羅浮山賦序曰客夜夢見延陵茅山

在京之東南明旦得洞經所載羅浮山事云

茅山是洞庭口南通羅浮正與夢中意相會

遂感而作羅浮山賦

梁武帝記齊中興元年十二月乙酉甘露降

茅山瀾漫數里

周氏玄通記梁天監十二年甲午臘月望甘

露降周子良解舍壇前松樹

陶真人請雨墨詞

華陽隱居陶弘景道士周子良詞竊尋下民

之命粒食為本農功所資在於潤澤頃亢旱

積旬苗稼焦涸遠近嗷嗷瞻天雀息百姓析

請永無感降伏聞雨水之任有所司存顧哀

憫黔首需垂霑渥吁風召雲膚寸而合使洪

濤溢川水陸咸濟則白鵠之詠復興於今共

伸至誠稽顙詞請謹詞天監十四年太歲乙

未六月二十日詞詣句曲華陽洞天張理禁
趙丞前

沈約上隱居書

先生棟樑流俗超然獨遠列覽羽帶總轡雲

霞方當名書絳闕身游玄關憑星夕外望日

朝殮而至理深微暖然難覩雖欲下風問道

未知厥路若夫棲遲閒遠咀嚙瓊芝出入清

都師友靈聖循崖返跡無缺惟心

庾肩吾謝隱居齋木煎啓

切以綠葉抽條生於首峯之側紫花縹色出

自鄭巖之下山精見書華神在錄木榮人謝

盡採擷之難啓旦移申窮的漚之割故能競

爽雲珠爭奇水玉百邪外禦六府內充自非

身疲掌硯役倦攀桃豈可立致還年坐生羽

翼臨沅丹井方覺可捐縣菊泉無勞復汲

庶得遨遊海岸追涓子之塵馳驚霍山共陳

玉為侶淫俗輕施尚曰難酬出世鴻恩寧知

上報

又謝木蒸啓

味重金漿芳踰玉液足使芝慚明麗丹愧夫

容坐致延生伏深銘戴

唐史天寶七載五月詔後漢天師張道陵冊

贈太師梁貞白先生陶弘景冊贈太保

良常山蒼龍溪新宮銘

良常西麓源澤東池新宮弘崇軒轅嶽雕

珉盤礎鏤檀栾梁碧瓦鱗差瑤階彤闥閣凝

瑞霧樓橫祥霓闕虞巡微昌明捧闌珠樹觀

連玉泉矩折靈輿遐集聖日頽晰太上游儲

無極便闕百神守衛諸真班列仙翁鶴立道

師水潔飲玉成漿饌瓊為屑桂旗不動蘭煙

互設妙樂競奏流鈴間發天籟虛徐風雨冷

激鳳歌諧律鶴舞會節三變玄雲九成絳雪

易遷徒語童初詎說如毀乾坤自有日月紫

陽真人山玄卿誤五雲閣吏蔡少霞書

唐史敬宗即位年詔浙西造銀粧具進觀察

使李德裕奏云云昨奉五月二十三日詔書

令訪茅山真隱將欲師處謙守約之道發務

實去華之美寧無人上塞丹詔而率土已偃

皇風豈止微臣獨懷抃賀

黃華老人雪溪堂法書刻李贊皇真蹟茅山

初置紫陽觀勅書於揚州龍興觀李天師舊院取得送還紫陽觀開成二年七月二十七日淮南節度使檢校戶部尚書兼揚州長史李德裕

宋會典諸遣使投龍簡處建道場三晝夜設醮一百二十分若遣使或差官致祭設齋醮所須之物並檢舉及時辦集若使人過有須索差擾隨處具奏江南道名山衡廬茅蔣天目天台會稽四明括蒼縉雲金華大庾武夷唐地志亦云

宋史章聖皇帝遣中使禱茅山遇異人言王真人已降生當爲宋第四帝使問王真人何人曰燧人氏章懿李后夢羽衣數百從一仙官自空下及仁宗生宮中火光燭天上五六歲常手持桃木以筋鑽之曰試鑽大耳章聖言所謂燧人信不虛也

二十七代養素宗師宣和間洞賓呂公數從游嘗受言曰修性者先伏其心修命者先澄其神神清心正則邪不干矣心不能自伏則內生奸火猶丹砂不死見火則飛者矣

唐玄宗行書有賜李含光勅二批答李含光表修齋二批答李含光表謝賜批答李含光表投壁批答李含光表起居批答李含光表香信批答李含光表謝修功德肅宗行書有賜李含光勅二批答李含光表修齋批答李含光表修功德批答李含光表錫繅見宣和書譜

德壽殿紫石茶磨賜凝神菴

御製銘曰截漢玉琢蒼筠鉛運頂承成塵

嘉祐中陳情知句容校修句
卿山記近歲士人曾向重述

玉晨觀入門有二壇其左即長史壇刻云貞白先生立其右云是隱居埋名壇也

三清殿後沐髮老君像甚古

周真人池道士王宜言字子誼號王自在年七十汴人徽宗屢授道官不就

丹砂泉出叢篠訪卧龍松根盤如龍技如覆屋嘗有道人結菴其下

喜客泉太元菴 嘉祐下六則語見周益公集乾道三年游山記後湖蘇庠隱居畫像贊陸殊妙言字照編簡雲霞三館其人則遠世

裴道喪完節者鮮臨終之歎作世和扁

特賜玉印劍還山省劄

皇帝聖旨東江浙等處行中書省准中書咨集賢院呈延祐四年十二月二十六日也先帖木兒怯薛第三日嘉禧殿有時分對保兒赤唆南大卿燭赤刺禾里歹留守等本院官曲木太保叔固大學士陳大學士曹大學士奏三茅山掌教具人文書裏說將來在先亡宋徽宗時分賜與本山元符宮宗師玉印一顆上面刊著九老仙都君的篆文更玉靶法劍一口是與他代代宗師傳度法錄用的印劍與龍虎山張天師的印劍一般有至元十二年軍馬渡江時分有翟宗師將玉印玉靶劍藏了後不知著落至元十六年許宗師尋得玉靶劍了延祐四年七月十八日餉午時分見一箇白面兔兒走入宮裏法堂後磚石穴中尋不見兔兒只見有印一顆隨即刷洗認辨得即係祖傳的玉印爲那般上呈與集賢院文書來後頭那裏建康路總管府將這印劍解赴行省如今差官將到這裏有

那印劍是他本宗祖來傳度法錄好事裏行用的有怎生可憐見呵將這印劍發回他本山宗師收掌依舊好事裏行用怎生奏呵奉聖旨昨日省官每也這般說來印和劍將到這裏放着有這是先生每法錄裏頭用的恰待教人與的張上卿去既這般可如今喚將張上卿這裏來分付與他交他發付與三茅山宗師收掌依舊流傳法錄好事裏用者恁與省家文書交那裏官司知道著麼道聖旨了也欽此除外具呈照詳都省咨請欽依施行准此省府除已行下建康路欽依施行外合下仰照驗欽依施行須議割付者

古剎付三茅山掌教真人准此

上清傳真圖序

夫高棲林嶺必先抗青雲之志涵濡玄味必達尋丹水之源凡學有傳孰大於道是以古之學道者以得師為急為師者以得人為難而況仙者非有求於人道者初不假於外准當爰清爰靜歸心歸誠所冀真靈感應耳信者功德之母惑者進修之賊可不慎歟華陽

洞天自漢三茅君飛昇于此魏晉而降仙者接武神君仙人之所主治雲裾霞佩之所游集蓋地上之天宮人間之仙境故昔人謂道門華陽猶儒門洙泗欲以凡言讚數彌覺費辭上清玉虛真人劉君大彬命工傳寫祖師

真像自紫虛元君凡四十五代俾孟頫又作小傳附書其後藏之山中以貽來葉俾知傳授之緒希心存目注無墜玄風竊惟茲山之靈異斯道之顯揚皆自貞白真人陶君著書立言網羅搜訪不遺餘力故茅魏遐躋尚獲彷彿於無言之表揚許舊迹猶可追想於既逸之餘慨然遠懷神情飛越嗟乎安得從陶真人於雷平柳汭之間執弟子禮以供筆硯之役乎庶幾考槃阿鑑性泓潭草木食以終餘年志願畢矣豈敢觀長生不死神仙輕舉耶延祐七年庚申歲九日前翰林學士承旨榮祿大夫知制誥兼修國史趙孟頫序

茅山志卷之三十三

純陽帝君神化妙通紀序

帝一

吾道或以神通誘掖塵俗或以藥物救濟善良委順曲成隨機方便大慈大化會萬派咸歸一源至願至仁備衆德不居一德悟不空之未始了无生之有玄論其微言辭難盡悟其的擬議即遠不可智識以度思當在精誠而默會不揣井觀管量於諸經集唐宋史傳撫收實跡削去浮華績成一百二十化析為六卷每章就和詩詞彙章直說目之神化妙通紀使同心志士開卷朗然得觀天象默會道微明通无極重玄了徹純陽至妙圓通无上道真得先天春不自誠意集成高明公心靜鑑自然不迷異運直造天衢矣金陵中和老默子苗善時敬序引

制詞

皇帝若曰大道開名可致无爲之化至真在
宥迄成不宰之功朕以祖宗獲成基構若稽
昭代雅慕玄風自東華垂教之餘至重陽開
化之始真真不昧代代相承有感遂通无遠
弗届雖前代累承褒贈在朕心猶嫌追崇特
乃命儒臣進加徽號惟東華以稱帝君增紫
府少陽之字其正陽純陽海蟾宜錫真君名
丹陽以下七真俱號真人載在方冊傳之萬
世噫漢世之張道陵唐朝之葉法善俱錫天
師之號永爲道紀之榮當代不聞異辭後來
立爲定制朕之所慕或庶幾焉

東華教主可贈東華紫府少陽帝君

正陽鍾離真人可贈正陽開悟傳道真君

純陽呂真人可贈純陽演正警化真君

海蟾劉真人可贈海蟾明悟弘道真君

重陽王真人可贈重陽全真開化真君

宜令掌教光先體道誠明真人張志敬執行
准此

至元六年正月 日

上天眷命

皇帝聖旨昔聞

太上教闡全真法天地之常經因陰陽之大
順始東華之變現訖于開化之垂緣由漢及
唐必曠代而至人出以金繼宋際熙朝而玄
統彰恢其衆妙之門鎮以无名之朴或得意
忘象涵泳於靈樞或騁星御龍飛遊於紫極
不可聞不可見惟與造物者爲徒脩然往脩
然來亦曰隨時而示應今載傳於後裔猗叶
贊於元功益殊級之循加俾宗風之永紹除
始祖東華帝君別議旌崇餘仰主者一例施
行

正陽開悟傳道鍾離真君可加贈正陽開

悟傳道垂教帝君

純陽演正警化呂真君可加贈純玉演正

警化孚佑帝君

海蟾明悟弘道劉真君可加贈海蟾明悟

弘道純佑帝君

重陽全真開化王真君可加贈重陽全真

開化輔極帝君

右付玄門演道大宗師掌教擬和持正明素

真人苗道一收執准此

至大三年二月 日

純陽帝君神化妙通紀卷之一

玄門苗善時校正編次詩彙

瑞應明本第一化

謹按道統錄帝君姓呂名巖字洞賓唐河中府永樂縣人氏曾祖延之終浙東節度使祖渭性賦純良文詞精妙樂善好道多有陰德累遷禮部侍郎終潭州刺史贈陝州大都督渭生四子溫恭儉讓溫治春秋藻翰精富一時遷戶部員外郎終衡州刺史恭尚氣節喜縱橫終殿中侍御史儉多才進御史裏行讓有德善政遷太子右庶子終海州刺史真人乃讓季子唐德宗貞元十四年四月十四日巳時衆見有一白鶴自天飛下竟入房帳中不見母氏正寢亦夢驚覺即時真人降生異香滿室經日不散童稚時數重少語不好戲長大身長六尺有餘道骨仙鳳目入鬢眉秀鼻鋒面色黃白左眉角右眼下各一痣如豆大兩足下龜紋隱起性稟純厚仁孝聰敏三教經書圓貫精熟常誦周易道德陰符經喜頂華陽巾衣黃白欄衫大條或道遙服冠

帶後不肯姻娶常慕清虛恬淡不好華飾富榮自幼年已有仙道志矣

彖章曰夫大道人人本具物物全彰奈人自有生以來物慾交攻利名迷昧況自己无福緣祖宗无善德所以棄道遠矣故仙師云達道登真必仗祖宗陰德厚實自己夙生靈慧剛志果決可以省力成證豈虛言哉本紀帝君天性純厚仁孝聰敏三教經書一覽圓貫豈非夙生靈慧果手祖陝州都督樂善好道政多陰德生四子皆顯達乃父讓純厚仁善政有佳聲百姓敬慕故上知名遷太子官屬以此誠實遂感真仙謫降豈非善積餘慶乎帝君自冠以來不肯婚娶實貴精神豈非身體髮膚不敢毀傷乎篤志修真心澄性朗養浩樂天名揚後世豈非全德要道以顯父母乎況繼嗣玄元道統名襲紫府仙宗爲天人聖師神化无方隱顯莫測豈可以常賢聖共語哉或疑各本載帝君生所及居處不一詳推乃父仕宦遷移又作者欲在本鄉人物

爲美是以差誤不一今考河中府永樂鎮九峯山故宅基址儼然今建純陽萬壽宮是矣永樂縣至宋熙寧間改作鎮愚校正的實亦不敢固執庶幾同志無疑矣

黃梁夢覺第二化

唐憲宗元和五年時年二十一歲赴長安應舉寄居旅館一日有一羽士狀貌奇古美髯環目鶴髦長裙丰采不凡直詣館中揖坐話間誘化帝君入道帝君曰待某受一官爵光顯祖上門風然後隨師未晚羽士笑求一齋帝君命僕造飯覺身倦欲睡羽士於袖中取一枕與帝君曰此如意枕若枕此從爾平日所好即應就枕卧方睡忽一使者至召狀元呂某受誥始自州縣官次擢朝署由是臺諫翰苑秘閣及諸清要无不備歷或默或陞前後兩娶富貴家女子孫振振簪笏盈門如此幾四十年最後獨相十年權勢薰炙忽被重罪籍沒家產分散妻孥流于嶺表孑然窮弱憔悴立馬風雪中方此嗟歎恍然夢覺羽士在旁笑曰黃梁猶未熟一夢到華胥帝君驚

曰君知我夢耶羽士曰子適來一夢萬態榮悴多端五十年間一俄頃耳得不足喜喪不足憂且有覺而後知此大夢人間世百年亦一大夢耳帝君豁然悟曰縱簪纓極品金玉滿堂以此推之亦造物戲弄何足戀哉遂作禮再拜曰先生非凡也願加點化愚蒙羽士曰汝既頓徹幻化空花利名桎梏回心向道易矣帝君曰某然少省知易中云遊魂為變死生之說盡性至命之理望師慈憫指示修進之方羽士默然良久曰萬理融通則心朗徹七情寧息則性圓明此心澄息自然本性玉虛又何遊魂為變性一太空寂明寥廓了无生滅何死生之慮哉乃知我本无生何名為死帝君茫然良久大洞明了再拜謝曰夙生慶幸得遇仙真通聞慈音妙義恍然不知有我羽士曰吾所語汝乃性盡之妙一邊事也以至慧命末後大事待汝果脫洒時再付未晚帝君謝曰師孰耳羽士曰吾鍾離其姓權名也雲房其字也吾居終南七星山鶴嶺子異日尋吾來言畢飄然而往帝君曰悵

然亦自樂次日回本鄉

彖章曰南華老仙因蝴蝶夢頓然大覺純陽帝君因黃梁夢了徹本元故南華經云且有大覺然後知此其大夢也純陽帝君頓然徹悟萬幻皆空一真洞曉旨哉美哉

慈濟陰德第三化

帝君回鄉中時遇飢荒罄捨資產糧米較濟飢貧得活者幾三二萬人鄉中耆老親屬亦喜亦勸存留資產為子孫計帝君歎曰夫人之失也自心昏迷本性以致貪戀幻物慳吝錢財而生嗔怒憎愛沉淪苦趣某非敢抑諸親因少有省不足戀也如是作一詩以示鄉宿親屬云摘碎葫蘆踏碎琴瓢然拂袖出儒林太初實相純如玉元始真如瑩若金丹焰冲天神莫測劍鋒入地鬼難尋自從一覺黃梁後始信從前枉用心後別鄉里倬然往終南山尋師皆莫能留

彖章曰帝君別親時遇飢荒盡捨資產糧米救濟飢貧得活者三二萬人鄉中耆老親屬喜敬亦勸存留資產為子孫計真人

歎曰夫人之失也自心昏迷本性以致貪戀幻物慳吝錢財生嗔怒煩惱沉淪苦趣某非敢抑鄉耆因徹悟夢幻我身尚假財物何足戀也遂作此詩辭別入道奇哉愚評此詩因留註為同志受用摘碎葫蘆踏碎琴瓢音聲色相飄然拂袖出儒林開名利網超太初實相純如玉清淨法身元始真如瑩若金丹不壞丹焰冲天人莫測神化无方劍鋒入地鬼難尋智慧深藏自從一覺黃梁夢夢覺不昧始信從前枉用心十載文章盡可憐人我之徒將此詩除四句改一覺為一見黃梁為黃龍似此問答不一以帝君飛劍斬黃龍蓋哉如帝君詩云栗中藏世界芥子納須彌鑑內度山川即六祖劫火燒海底此皆喻真空慧命之妙如般若梵語言智慧豈可假土地口鼓葛藤枝謊乎以此誑惑愚俗是何心哉亦如熾盛佛降九曜且夫九曜星辰自天以來經躔度數毫分无差且木星紫炁在人命中主人富貴聰明仁慈純善何

罪而佛降之若果降了則至今星辰不曜度亦无造化矣謬妄之甚佛心高明則笑其誑妄也詎上天星辰毀中國仙聖此輩歷歷惡報都沒結果奈何迷昧不復傷哉故真人神化記云吾之慧劍斬三尸六賊貪嗔愛慾煩惱障豈肯取人頭況超禪師與吾何仇故朱文公云君子仁慈猶克已神仙安肯取人頭信哉吾教西化經所載三十餘段事實故

宋仁宗贊云東訓尼父西化金仙又韓真人度慧禪師入道為馮尊師真人紫陽真人度道光禪師入道為紫賢真人又呂祖師度有德僧十餘人皆實事傳吾教並不彰耀誇矜因此人我之徒巧撰遮掩其先生亦有參和尚者呵呵

純陽帝君神化妙通紀卷之一

純陽帝君神化妙通紀卷之二

帝二

玄門苗裔時校正編次詩彖

歷試五魔第四化

帝君將別鄉忽見家人皆病死帝君心无悼怛但備葬具忽病死者皆起无恙此一試也一夜忽劫盜數十各持刀杖勒逼財物少頃家中財寶搜盡而去帝君並不動聲色任其所取此二試也次別鄉里三兩程迷路抵暮遙見燈明遂往見草房兩間一老者携取魚網出帝君向前揖投宿老者曰我子然一身乘夜取魚推托再三遂開門言秀才自歇我去取魚令帝君閉門霎時忽一女子年二十許叩門帝君將謂老者親屬開門此女携一袱入門作禮云秀才妻夜晚迷路投一宿帝君答此非我家我亦在此與漁翁借歇我亦不敢留娘子宿女子云彼此客中一宿即去何必阻妾夜深黑暗妾亦去不得百端妖媚調戲又云妾家田產財物无数妾見携金寶若干妾願與秀才為妻有何不可亦不辜負秀才帝君默坐並不動心任女子百端至曉

忽開眼在一大樹下坐默自笑而起行此三試也次至一渡春潦水溢得一小舟來遂求渡上小舟將至中流黑風大浪雷電大雨俱至浪濤翻滾小舟翻側飄蕩帝君瞑目冥坐任生任死心若泰山將近岸小舟覆沉幸得上岸人問何故帝君笑而不答此四試也次夜至一旅舍約三更忽見奇形怪狀无数鬼神有欲打者有欲殺者帝君巍坐一切不問須臾有數夜叉押一囚血肉淋漓號呼仗劍來前曰汝宿世殺我今日見汝可速還我命帝君曰殺命宜也又何說焉引頸就殺忽聞空中叱喝神鬼即散不見有一人撫掌笑曰吾雲房也吾嘗歎仙才難得人之塵心難滅吾之求人向道甚於人欲求我也故五試汝子皆不動心然可以教子但功行未完今且授汝鍊黃白秘方可以濟物利人待汝功行滿吾來度子帝君曰得燒鍊口訣復問如此則鍊成時久有變異乎雲房曰三千年後還本質帝君慨然曰如此則必誤三千年後人也某不願為也雲房曰子心如此三千八百

功行成悉在此矣

彖章曰夫人之厚貌深情此心最難測度故南華經云十事試之以得人周易繫辭以四等言辭而見人之情偽況學道修仙入大聖人乎豈輕易矣故聖經云多易必多難聖人猶難之況我輩乎今觀我輩逆境則怒順境則喜塵心俗氣舊識熟境舉止常在稟賦血氣之性未解習俗之性未改分毫而大言闊說誇誕張皇揚眉豎目舉拂拈槌舒拳豎指敲喝叫喚熱亂狂放百端情態而云本然天性一徹頓超正所謂抱贖叫屈掩耳偷鈴徒自欺昧深可憐哉正陽帝君以惡魔順境歷試不一純陽帝君心一玉虛凝然不可動搖再以黃白之術云立功行亦不願為宜乎正陽帝君樂然撫掌而接引矣我輩輕心慢意小德小智而為自了徹聞此歷試不動胡不寒心

神變傳經第五化

正陽師真曰吾所居終南鶴嶺洞天予能從

我遊乎純陽帝君曰願侍鸞儀師自携真人手偕行繞數步而恍然雲飄風送經歷山川頃刻至鶴嶺洞前有二虎師叱之去俄門開有天丁侍衛見琪樹珍葩祥雲瑞靄中朱戶金釘玉臺寶殿瑤階金閣二仙童迎師入瑤堂正坐帝君侍坐和氣如春景物非凡少頃仙童十數持元和瓊漿仙果貢獻畢閑坐間帝君避席問曰此何洞天師曰此吾師東華帝君舊館少陽洞天帝君再拜問曰修仙有幾種何功得至此師曰修真有一十五品仙人略言一二如明悟世間生滅不常幻妄俱空塵心頓息本性圓明此名清靈鬼仙法天地昇降之理效陰陽消息之微假身心為鼎爐以精炁為藥物五蘊皆空七情泯息久久色身輕健法象飄然此名靈明地仙情慾皆泯愛識頓消此心明了一性虛無以太極為爐天地為鼎鍊元精息元氣凝元神三元混妙一真體玄恍惚象先超然未始鬼神莫測變化无方此名神仙神炁妙融變化莫測混然无狀性命玉虛體一太空真空不空大

象无象逍遙无極游泳先天頓超虛无自然玉清真境此名天仙帝君問曰此總謂大道乎師曰大道无形无名无問无應其大无外其小无内充塞宇宙運化古今不變不遷无生无死不化而化不神而神希夷微妙清虛自然不可致詰子其勉之忽有二仙人金冠霞帔玉佩雲裳捧玉詔金書召九天金闕選仙使鍾離某赴蓬萊上宮瑤池仙會師迎詔真人遂獻一詩得道來來相見難又聞東去上仙壇杖頭春色一壺酒頂上雲橫五岳冠飲海龜兒人不識燒山符子鬼難看先生去後身須老乞與貧兒換骨丹此詩恐師去急不回也師笑於袖中出靈寶昇玄消災護命經一卷付真人再囑曰此經乃師東華帝君授受中言真空重玄之妙剖劈有无色聲妄幻子當熟味吾不久回珍重珍重

彖章曰谷神不昧曰靈元炁融中曰實微入玄關登上境曰昇玄心息混融保合太和曰護命經中自衆生沉滯聲色迷惑有无至若知空不空知色不色名為照了始

達妙音識无空法洞觀无礙入衆妙門自然解悟離諸疑網不着空見已上言辭簡當性理雙融盡三教性理真空大藏關要悉備於此經奈此輩日誦爲常更不參玩真味徒爲多端見解誠可傷哉師真始指鬼仙地仙神仙法度後授此經豈不有意外之妙乎學仙志士誠心咀玩可矣

明玄體道第六化

正陽真師赴會旬月餘回至洞天帝君喜迎再拜師曰子在於此岑寂數日得无欲歸乎帝君曰某塵緣既斷俗系已消既心志道更奚有家山之思乎師點首安慰帝君問曰魂魄冥冥至理幽深何以全真師曰慧燈冥冥泰定神靈神既混合豈不契真金形玉質本出精神法象飛昇就付口訣云云

帝君再拜謝時洞中金光明耀清炁雍和帝君九拜長跪曰某嘗玩諸仙丹經卦象異名多有疑心望師慈憫愚蒙一一細詳開發師曰心本无迹疑從何有且天地未肇父母未生道之一字亦是強名何卦象異名之有子

既有疑不妨拈出帝君曰丹書言修金丹何謂金丹師曰金堅之喻丹圓之喻即爾本性圓明堅固是也問曰性命一乎二乎師曰不可謂之一亦不可謂之二一點靈明无昧性也一點元氣常調命也性无命则无依倚亦不能安止命无性則不冲融亦不能固密二物混融一真玉瑩性也命也俱強名爾問曰何謂水火元神火也元炁水也神炁混融融則水火既濟也問曰何謂真陰真陽答曰身中一點元精真陰也一點元炁真陽也精炁密融則陰陽混合而爲純一之體也問曰何謂坎離答曰即前陰陽水火之象也陰中陽坎也陽中陰離也取坎中一陽復離中一陰則成純陽乾體也問曰何謂一陽生答曰身中元炁元炁生發時也靜極一動便是一陽生也所以道時至神知至此時也淵清息念含光内燭自然三宮升降道德經云綿綿若存用之不勤以致純全皆自然而然泥於子午四正本生時皆妄爲也所以不知常安作凶也問曰何謂火候答曰慧火炁候也心

息相依綿綿溫固文火候也情生念動剛志力反武火候也問曰何謂藥物答曰元炁元精也問曰何謂爐鼎答曰身爲玉爐心爲金鼎也問曰何謂玄關答曰至玄至妙之樞機也又謂玄之又玄最上重關也元神凝中強名神谷元炁息中強名玄牝假喻身中玄竅虛无之谷也元无定所不有不定道德經云谷神不死是謂玄牝即此妙也問曰何謂青龍白虎答曰性屬木故喻青龍情屬金故喻白虎金能剋木故情多損性誠能攝情歸性則金木无間而爲一自然龍虎伏矣問曰何謂龜蛇即前水火陰陽之象也問曰何謂鉛汞答曰心與炁也心猶汞之難死誠能息炁養心則心死而性圓明虛心養浩則炁息而命无漏矣鉛能制汞故聖人假此二物爲喻教人易爲修真至於八卦五行皆假喻以歸元四象三才悉強名而達道汝能死心息炁息炁凝神炁神一混心性一源身外有身體一玉虛這許多評論都是太空雲霄鏡水塵風汝其頓徹力行自然而然真人拜謝

彖章曰師祖此篇問答歷代聖師心心密印祕授仁德志士戒勿輕示常人愚風生慶幸得遇心傳時默敬味焚香九禮假空感謝言言金書玉宇寶珠乃修真最妙的上義心明性養之玄微慧命真空之妙用盡在是矣愚昧此嘗默歎世傳靈寶畢法鍾呂傳道集謬妄之甚乃要名尚奇之士爲之或云施肩吾作亦未知是否又有於偽書中取用作集作記證事證理而爲傳道根源真乃井蛙耳認賊作兒指石爲土以盲指盲无廉恥之甚矣愚亦不敢多言自有別實者在焉。

密印劍法第七化

正陽師真宴坐間而謂純陽帝君曰修真體道全憑慧力堅持入妙造玄先要志剛決烈所以極終極始天地莫遷大用大機鬼神莫測故聖人携寶劍倒斡璇璣仗剛鋒直摧魔怪故有劍法之喻也此劍也採无極至精合先天元炁假乾坤之爐鞴運元始之鉗鎚慧火煅成靈泉磨利以太極爲環剛中爲柄美

利爲刃清淨爲匣虛白燦爛純粹堅剛運造化之機秉仁威之令舉之无今古按之无先後六天神鬼歸降三界妖魔乞命破煩惱障絕貪愛緣斬七情誅六賊斷真怒勦妄邪事物來前迎刃而解藏之身可以无生死體象先攝之政可以鎮國家清天下光輝善利圓混剛中奸邪一見寒心外道纔聞破膽于當精進圓成橫向太虛凜凜帝君受此劍法至敬禮謝賴光晦迹密降華峯強名曰先天遁神劍。

教門善時得此劍篇咀玩不勝真樂遂作慧劍吟紫極洞中傳劍訣不屬陰陽不用鐵先天元炁煅鎔冲鑄成便會誅妖孽得煅鍊經琢磨利勝鎔錐及大阿握在手中龍虎伏收歸匣內炁神和斬三尸誅五賊勦滅七情并六慾貪嗔愛鬼悉消亡昏散魔軍皆滅沒亦能生亦能殺生殺威權流電星事物來前迎刃解憂疑驚起逐鋒平吾呂祖仙得此劍開闢乾坤成一片死生絕斷體金堅隱顯无方時變現救死漢沽

骷髏神仙安肯取人頭野狐巧撰瞞愚鄙丹鳳何嘗怪黑鷺伏天魔降外道萬法千門一劈掃威鎮太平沒價珍德清宇宙无窮寶此寶劍常隨身藏諸用顯諸仁絕如美玉无瑕璽瑩似水晶絕點塵此寶劍无中有太上親授東華手諸祖列仙密密傳得之慧妙光星斗掣金電接玉龍出入縱橫現六通雪刃光輝无極內霜鉞明燦太虛中平天下齊家國等閑一舉世清肅忠良賢聖盡歸依奸佞逆邪皆剪戮諸佛祖衆仙真若无此劍道難成剖除人慾全天理掃蕩風雲昇太清。

純陽帝君神化妙通紀卷之二

純陽帝君神化妙通紀卷之三

帝三

玄門苗善時校正編次詩錄

肥遯華峯第八化

正陽師真授帝君口訣及破諸疑難說慧劍法畢乃曰十洲羽客至玉京吾朝元有期汝恐難久居此可往華峯羽谷修養待時亦當隨機利物行滿功成復相際會遂於洞口題曰春氣塞空花露滴朝陽拍海岳雲歸再囑曰吾去後好住人間功德圓時亦當如吾昇玉虛矣帝君再拜曰弟子之志則異於先生○必須度盡天下衆生方上昇未晚師曰小子勉之真心慈憫奈衆緣輕業重此去所度合有五百弟子襲吾道統者三五人而已比及邂逅相見珍愛實重言訖與施太玉鄭思遠二仙乘雲輶金幢玉節羽儀仙樂冉冉而去帝君不勝依戀遂往華峯羽谷肥遯林泉實熙自牧四十餘年圓成道果故雍先生作碑文云晦迹華陰之羽谷四十餘年又道藏童帝君丹訣載唐有進士呂洞賓得鍾離誘以道妙授金丹鍊形之道後居終南華峯修鍊功成形神俱妙神化莫測又李奇言祥符間爲郎官時關中嘗見呂洞賓有神劍法年百餘歲貌如嬰兒行步如飛似此後或隱或顯優游湖湘鄂岳廬山方自莫知鬼神莫測又修真指玄圖載歷江州登武昌黃鶴樓以五月二十日午時化三級紅樓而上昇遺詩曰靈芝無種亦無根解飲能餐自返魂但得烟霞供歲月任他烏兔走乾坤嬰兒只戀陽中母蛇女須朝頂上尊一德不回千古內更無墓塚示兒孫○

彙章曰聖仙神化居止无常蹤跡不定故隱顯莫測莫知其鄉或有祠堂道院宮觀山川有顯迹處欲作碑記多不得人況得有名而無實者以已膚淺聞見一僻又不敢前後詳照真偽況有假托帝君自爲以實其事者如望江亭記帝君常隱名惟恐人識豈有自言色服相貌變現不測之理以訛傳訛似此可推愚亦不揣不肖於書史經集校照事實次序紀集庶幾體道志士一覽無疑矣後化三級紅樓上昇亦一神

化云耳惜乎不記年代幸有詩存

襲明印第九化

純陽帝君高尚其志不事王侯綽然方外頓超物表所以天下莫敢臣侯王不能友自別師後密隱華峯羽谷四十年餘自唐末間時人方知之故指示李奇奇壽百五十歲終焉度諸仙百餘人隱顯更名不一五代時又隱華山號无家宮至衣麻布袍人呼爲麻衣道者以易理參同點化陳希夷先生與燕國相劉玄英即海蟾帝君也皆師事之海蟾帝君始遇正陽帝君示累卵之危頓悟入道後隱華山修證後純陽帝君作心易授希夷先生即今傳於世麻衣心易是也又作仙統秘訣三篇授海蟾劉君今玄門達道師德心心相印而密授受今存金蓮實錄中宋初別華山贈警希夷先生詩云青霄一路少人行休歎興亡事不成金榜雖云无姓字玉京却幸有仙名雲歸大海龍千歲雪滿長空鶴一聲後感或作多謝清朝明聖主屢頒丹詔起先生後太祖太宗果三詔召之後再至華峯希夷先生

已上昇遂留詩云天網恢恢可是疎爲君箴
到華山區寒星沒後留殘月春雪來時問太
虛三洞真人歸紫府千年老鶴化蒼梧自從
違却先生後南北東西少丈夫

彖章曰真人授希夷先生易妙及心易希

夷後授種放放授穆脩脩授周濂溪周授
二程程授溫公馬光海蟾帝君受易發
明仙道復南授張紫陽張作周易參同契
授石泰之後三傳至諸葛玉蟾又二傳至
清庵李元素先生北授重陽帝君王某王

乃以易妙河圖洛書分裂十化丹陽七真
後開金蓮萬朵玉樹千株代不乏人皆祖
襲純陽帝君之餘蔭也五代時李守正叛
據河中府周太祖御駕親征同趙太祖周
世宗率兵攻城麻衣真人與趙韓王遙觀
曰李侍中安得久乎韓曰何故曰其城外
有三天子氣未幾城陷又文僖公錢若水
其神采清粹希夷謂其可學仙見之未詳
請真人決之曰無仙骨但可作貴公卿耳
二事果然就記之云

神應帝王第十化

宋藝祖神武皇帝建隆二年春帝於御苑龍
亭宴坐偶見一羽衣仙人自東南而來帝忽
見驚迎揖邀坐問仙真自何而來答曰自蓬
萊山來問姓名帝君以手空中畫二〇曰陛

下乃朱陵上帝還記憶否上默然帝君曰當
以火德旺天下將定无勞聖慮當戒殺戮以
无爲清靜治化乃安留語移時帝惟點頭應
諾後語秘不傳帝命侍從取酒果帝君辭帝
急解玉帶赭袍賜之帝君笑飄然乘空而去
帝悟曰乃吕公也命繪像于太清樓供奉左
街道錄陳景元傳其像于世後勝子京所見
與此絕類云

詩彖五代興亡五十年天生英武定山川
真人敬諫行清靜聖主誠膺允自然玉帶

赭袍天子貴青巾鶴氅道人玄飄然含笑
歸何處回首雲騰天外天

石肆求茶第十一化

後周末汴京有石氏設茶肆一女尚髻亂令
行茶帝君詭爲句者日往據上坐求茶衣服

藍縷血肉垢汚殆不可近女殊无厭惡意益
取上茗侍之父母怒笞女女益待帝君僅月
餘帝君謂女曰汝能吸我所飲茗之餘乎女
以垢甚不可下咽覆之地忽聞異香亟舐之
神杰爽然帝君曰我吕先生非幻者惜爾不
盡食吾餘然爾願欲富乎貴乎壽乎女曰我
小家子不識何謂貴得富且壽足矣帝君去
不復來女後適一管營指揮使已而爲吳王
之孫乳母所乳孫適宣仁聖烈高皇后叔父
遵約受陽沐邑百三十五歲而終

詩彖盧仝七碗勿言佳紗帽籠頭豈足誇
我祖龍涎方吐露忽焉遍地噴金花石家
女子忙餐半富貴安康老健加若使趙州
知此味等閑平地步烟霞

度老松精第十二化

岳州巴陵縣白鶴山下兩池潛巨蟒池上一
老樹枝幹悉槁蔓草翳焉帝君過之有人自
樹杪降而拜曰我松之精也幸見先生願求
濟度帝君曰汝妖魅也奚可語汝道平日亦
有陰德否曰池中兩蟒屢害人白愚弟子每

化爲人立水次勸人遠避救活數百人蟒出
化爲劍鋼之沉于泉帝君詩曰獨自行來獨
自坐世上人人不識我惟有南山老樹精分
明知道神仙過今已陵庵前一老幹枯死旁
一枝獨生乃神丹之力世號維松又一巨石
如墨狀乃帝君化石墨爲者存焉

詩彖真仙時行與時坐密密潛神誰見我
已知本老救人多特特從容池上過一粒
大丹應手揮兩條巨蟒隨風破呂仙亭下
跡常存歷久不磨靈德大

再度郭仙第十三化

郭上竈乃老樹精後身一日帝君詭爲勾者
垢面鵲衣瘡痕淋瀝日往來啜茶不償一金
求茶者掩鼻皆去自是經月不售郭无愠色
益取佳茗待之帝君曰子可教也吾呂公耳
子前生乃老樹精還記之否郭恍然若夢覺
也曰幸見先生可教弟子學道帝君曰子欲
學道不懼生死宜受一劍郭唯唯帝君引劍
向其首郭大呼帝君俄不見郭快快自是遍
遊雲水一日忽遇帝君遂得道後磁州趙長

官奉之一日與趙長官言吾來日午時去也
求一小棺首開一穴以竹竿通中趙曰諾來
日午時郭果坐逝趙如其言瘞之河岸上以
竹竿貫其穴重疊累石護之至秋大雨河水
溢趙掘之但見破絮无尸

詩彖樹靈前已積陰功得報人身隱市中
一劍塵緣今世了數年法雨宿生通俗情
泯息心無極天性圓明體太空何必化棺
再陳醜故留蹤跡振家風

謁鍾弱翁第十四化

平涼節度使鍾傳號弱翁帝君幅巾白袍謁
之從牧童牽黃犢庭下弱翁異其氣象深
廣進退閑雅指牧童曰道人能詩可賦此乎
帝君曰不煩我語是兒自能之牧童大書曰
草鋪橫野六七里笛弄晚風三四聲歸來飽
飯黃昏後不脫蓑衣卧月明既別人皆見其
擔二大甕長歌出郭或報弱翁曰甕乃二口
此呂公也亟追之不復見矣今世有貯其筆
跡者真有翔鸞翥鳳之態信非凡人能也
詩彖師父牧童已顯名長歌兩口振希聲

弱翁追索空惆悵祇爲緣輕性不明

警提丁謂第十五化

丁晉公名謂倅鄱陽帝君往謁曰吾唐呂渭
之孫也君狀貌大肖李德裕他日出處皆如
之謂聞觸其諱不喜亦不敬待晉公果大謬
而寬海外信似贊皇矣

詩彖晉公才智極玲瓏可惜心偏性執蒙
不悟警提李德裕至今羞見寇萊公

識張參政第十六化

張公洎早年家居帝君謁之索紙筆作八分
書詩一章微示他日將佐鼎席之意卒章曰
功成將在破瓜之年後張果參大政後六十
四歲卒俗以破瓜爲八八蓋其識也
詩彖仙詩識警破瓜年直指韶光不久堅
可歎張公全不悟倏焉八八入黃泉

度曹國舅第十七化

曹國舅本傳丞相曹彬之子曾皇后之弟美
貌紺髮秀麗敏捷本性安恬天資純善不喜
富貴酷慕清虛年十二三歲三教經書一覽
精通自幼出入禁中上及后妃皆愛敬之上

每與語惟言清靜自然無爲治政上甚喜嘗錫衣黃袍紅條惟稽首謝而已一日辭上及后上問何往曰道人信意十方隨心四海上與后阻當數次賜鞍馬人從皆不受上賜一金牌刻云國舅到處如朕親行遂三五日忽不知所往惟持符籙化錢度日忽到黃河渡梢工索渡錢曰我道人家沒錢捐工毀罵逐下船遂於衣中取出金牌與捐工准渡錢舟中人見上字皆呼萬歲捐工驚懼有一藍縷道人坐船中喝叫汝既出家如何倚勢驚欺人曹恭身稽首曰弟子弟子安敢倚勢能棄於水中否曹隨聲將金牌擲向深流衆皆驚拜道人呼曹上岸同我去來曹諾遂隨道人上岸同行數里在一大樹下歇道人問曹曰汝曾識洞賓否曹曰弟子濁夫何識仙人道人歎曰吾是也特來度汝曹再拜後同往授以道妙口訣修證仙果亦有仙文集傳留于世云

詩彖物表英才性朴純天然氣象妙精神
眼空四海全無欲心貫三才絕點塵帝賜

金符微一笑師傅王訣樂長春源緣慈父
征唐德積一皇后二仙真

度曹仙姑第十八化

按曹仙姑傳純陽帝君遊河南一古寺中深夜有一圓寂僧影影來前作禮帝君詰之僧曰某甲元係本寺長老應對機鋒敏捷帝君曰可惜汝爲陰靈爾僧歎曰何故帝君曰吾純陽隨機應變人皆見之汝何能也僧疑貳問帝君曰汝不信今夜某人家設齋吾汝皆往赴齋若何僧諾同至齋所齋主迎接坐少時供齋一分帝君曰吾二人也再將一分來主家再進一分帝君齋了起謝僧唯吸炁而已主家問先生教某下兩分齋那一人在帝君詭曰此人不知如何却又不來遂出僧却悟省遂再拜求點化帝君曰若得性命雙融形神俱妙必假父母元炁修鍊而成汝須往人間一番僧曰恐復迷昧了帝君曰吾自來提汝遂指往托化僧隨念直入京都城隍合曹皇后孀生女子帝君遙見恐後難脫富貴遂布炁醜其形三日皇后恐上見羞托他

故送后親母養育後長成醜貌簪帶爲女道流後帝君往警提仙姑即頓悟薰禮請問道妙帝君授玄關秘妙修證雙圓自此後舉筆成章今語錄詩詞見行于世

詩彖明心見性成圓學舉一兀兀都不著

百年萬化已空亡一點靈明何處托性命
圓通體太空形神一混超天閭仙姑若不遇真師安證真空遊碧落

度何仙姑第十九化

何仙姑零陵市道女也始十三歲隨女伴入山採藥茶俄失伴獨行迷歸路見東峯下一人脩髯紺目冠高冠衣綠鉢衣即純陽帝君也仙姑僕僕亟拜之帝君出一桃曰汝年幼好果物食此盡他日當飛昇不然止居地中矣仙姑僅能食其半髯者指以歸路仙姑歸自謂止一日不知已逾月矣自是不飢无病洞知人事休咎後尸解去帝君嘗謂仙姑曰吾曾遊華陰市中賣藥以靈丹一粒置他藥萬粒中有求藥者於瓢中信手採取與之觀其緣分也

純陽帝君神化妙通紀卷之四

帝四

玄門苗裔時校正編次詩彙

遊金我寺第二十五化

帝君抵四明金我寺顧方丈蕭然頃有一童子出乃問此何家童子曰莫道家虛空也不著師佳其答題詩壁曰金我寺有門出不鑰見箇仙童赤雙脚問伊方丈何家童報道虛空也不著聞此語笑欣欣主翁豈是尋常人我來謁見不得見渴心耿耿生埃塵歸去也波浩渺路入蓬萊山杳杳相思同上石樓兒雪晴海上千峯曉

彖曰洞門開闔無開鑰出有入無妄動脚動靜兩忘了不拘色身三昧全無著无嗔无怒不歡欣中孚无妄與同人性天清肅无纖翳靈地虛閑絕點塵无涯苦海滔滔渺有限光陰冥冥杳石樓擊碎雪初晴冷淡寂寞能幾曉

二十六化	二十七化	二十八化
二十九化	三十化	三十一化
三十二化	三十三化	已上原集

道印康節第三十四化

康節先生邵雍字堯夫一日宴坐忽聞異香滿室覺心地恍然遂下數得一兌卦爲口重兌兩口也曰呂公至也忙整案設一純陽真人位牌敬待良久僕報一道人在門首欲謁雍忙出作禮迎請上庭真人中坐將位案倒曰爾何知吾來雍以前因實告真人曰子既知吾來必知吾往只今吾往何處雍茫然无答再拜進酒果雍重禮求點化真人曰適來便是吾一念動子便知之吾寂然子茫然罔措雍豁然有悟再拜真人止之曰子有何見便謝雍曰一念未起鬼神莫知不由乎我更由乎誰真人曰此性理也真空慧命則未再拜三熏跪曰望師點化愚頑真人曰孟子以直養浩然云難言也非難言不得其人也子平日德厚多有陰騭吾故來提子適有悟性宗一邊事吾安忍不傳子然子性雖明了奈累未消再拜懇告再三遂授口訣拜謝再進酒洪飲抵暮飄然而往家庭異香半月不散自此後堯夫少出屏事養浩樂天後工

夫綿密有詩云冬至子之半天心无改移一陽方動處萬物未生時玄酒味方淡大音聲正希此言如不信更請問庖犧

神警陳公第三十五化

陳公執中建甲第東都大會親朋合樂陳嘗奉道和混有德有藍縷道士即洞賓也陳公問曰子何技能曰我有仙樂一部欲奏以侑燕席腰間出一軸畫掛于柱上繪仙女十二人各執樂器道士呼使如人累累列于前兩女執幢旛以導諸女奏樂皆玉肌花貌麗態嬌音冠七寶冠衣六銖衣金珂玉佩轉動珊珊鼻上各有一粒黃玉如黍大而體甚輕虛終不類生人樂音清徹雲霄曲調特異三闋竟陳曰此何名女子道士曰此六甲六丁玉女人學道成則身中三魂七魄五臟六腑諸神皆而為此公亦願學否陳以為幻惑頗不快道士顧諸女可去矣遂皆復上畫軸道士取軸張口吞之索紙筆大書之曰曾經天上三千劫又在人間五百年腰下劍鋒橫紫電爐中丹焰起蒼烟纔騎白鹿過滄海復跨青

牛入洞天小技等閑聊戲爾無人知我是神仙未題云谷客書即出俄不見陳謂谷客呂洞賓也悔恨欲拭目未幾謝世

探徐神翁第三十六化

海陵徐神翁得道知人休咎賓客滿門呂惠卿往謁之適有道人踞上坐不起頗以語侵惠卿惠卿拂然不平曰子何人斯道人曰吾與若同族之曾道人布香爐灰於地畫灰作一詞曰鼎裏坎離臺中天地滿懷風月一吸虛空塵寰裏何人識我開口問洪濤雲中三弄笛岳陽樓外天遠霞紅笑騎黃鶴暫過海陵東拂袖呵呵歸去鑾和玉佩風響喬松君若要知吾蹤跡試與問仙翁拍手大笑而去不知所之惠卿問徐徐曰即洞賓也惠卿方悟同族之說追恨莫及

再提惠卿第三十七化

元豐中惠卿守單州天慶觀七月七日有異人過焉書二詩于紙一曰四海孤遊一野人兩壺霜雪足精神坎離二物今收得龍虎丹成運水銀一曰野人本是天台客石橋南畔

有舊宅父子生來有兩口多好歌兮不好拍惠卿塔余中解之曰後篇第一句客者賓也第二句石橋者洞也第三句兩口者呂也第四句歌者吟也吟此詩者其洞賓也

救滕中病第三十八化

元豐中東京有道人稱谷客與布衣滕中同飲將起以藥一丸遺滕滕有癖誓願齋道求治得遇真人賜藥服之即愈別又二年於揚州開明橋東隔水相遇客坐水次招滕取路跨橋柱而往至則无所覩始悟其洞賓也快倖狂未幾卒

度陳宣德第三十九化

宣德即陳某嘗遇帝君授以巨履神丹可疾走可不老作二詞一曰葆鍊中分相火行持外借方鞋清虛奏徽御原缺十字靈寶為胎十方无極至真來恍惚芝翽羽蓋二曰一日清歡何往十年舊事重拈細風斜日到江南春滿平湖漱澗黃簡手題龍篆綠輿前控鸞驂王清真錄署仙銜列職靈臺書監後宣德尸解而逝

神光繪像第四十化

帝君遊山陽神光觀白筆自繪已像於三清殿北墻眉目修整狀貌古怪不類世傳上有北斗七大星君相被髮秉珪立傍作一符徑丈餘書曰元祐二年作如吾下筆處可與語道人以疾刮符服之往往良効

靈石求齋第四十一化

杭州西湖南岸靈石寺一日有四道人來乞齋僧已停午齋已過拒而不接一道人題六言詩一首南塢數回泉石西峯幾疊烟雲登携孰以爲侶顏偶李甲蕭耘或解之曰首句寓呂字次句寓洞字三句寓賓字四句是三人姓名必呂公與三人偕也其字倒書于椽間削之不滅

景德度僧第四十二化

東京景德寺峨嵋院有一蜀僧來住持號峨嵋道者戒律甚嚴至二十年不去方丈一日有異人青巾白袍道者厚待之昂然來與語至半夜而去期以明年今日後相見侍童皆見之明年次日午道者索沐坐逝至暮異人

來歎息不已俄失所次日但於堂側壁間絕高處望所書字筆勢飛動如舞鳳翔鸞乃詩一章曰落日斜西風冷今夜故人來不來教人立盡梧桐影小書云同省作蓋寓洞賓二字減畫也

遊大庾嶺第四十三化

橫浦大庾嶺有一富家子慕道建庵接雲水士多年一日衆建黃籙大醮方罷忽有一藍縷道人至求齋衆不知恤或以凌辱道人題一詞于壁曰暫遊橫浦白鶴飛來誰同語嶺畔人家曾見寒梅幾度花春來春去人在落花流水處花滿前蹊藏盡神仙人不知未書云无心昌老來字作三樣筆勢題畢竟入雲堂良久不出迹之已不見徐視其字深透壁後矣始知昌字无心乃呂公也衆共歎惋

度忠獻公第四十四化

韓忠獻公琦晚年喜延方士帝君鵜衣垢面求謁韓意輕之曰汝何能解曰能墨試令爲之即掘地坎洩焉韓不悅帝君揉和坎中泥爲墨曰成矣遂去公徐取墨視之乃良金上

有呂字破之字徹肌理韓追恨无已後再遇得點化精修三年後尸解充紫府真人

訪蔣暉作第四十五化

全州道士蔣暉志行高卓洞賓謂之適蔣他出帝君題詩于壁曰醉舞高歌海上山天瓢承露浴金丹夜深鶴透秋空壁萬里西風一劍寒後書无上宮主訪蔣暉作遂去字徹壁暉歸大驚曰宮字无上此呂翁也追之不復得矣

賜藥黃覺第四十六化

黃覺能詩名宦未遂一日送客東都門外至則客已去追不及旅次見一羽士因携祖席酒殷呼羽士共享之畢羽士舉杯撫水書呂字且曰明年江南見君翩然而去覺始悟其洞賓也明年果調官江南復見洞賓與大錢七其次十又其次小錢三曰數不可益也吾以藥數寸遺子歲旦以酒磨服之可一歲无患覺如其言至七十三歲藥亦垂竭作詩曰床頭曆日无多子屈指今年七十三遂終

度李太醫第四十七化

東京李德成能醫崇道心慈多救貧苦有陰德感寒時遇一貧窘道士衣單衣无寒色邀李入酒肆自據主席李怪之店者曰交錢取酒道士指店中三酒瓶曰中各有一升酒錢店者始不信試視之果然乃以三升酒與之道士酌後飲李止取一瓶二瓶自竭語李曰此小術耳吾乃呂洞賓也李驚喜道士書一絕曰九重天子寒中貴五等諸侯閭外尊事似布衣无事客不將性命屬乾坤李不悟祇以藥一粒遺李曰服此當享高壽即別去李服藥髮不白齒不落百七歲而卒

尼寺留題第四十八化

東京安遠門內有一尼寺祖師在彼欲度某人緣淺不來向東門之東壁作一詩題其上墨透三寸餘筆力道勁詩曰青龍駐此少徘徊夜靜雲閣尚未來知是有緣人換骨暫留真跡到天台徧字止書其半意在為洞賓也

賜藥馬氏第四十九化

東京一歲民大病瘡帝君普化皆拒之有老姥馬氏鬻茶子孫皆病一日有道人來老姥

善待之以子孫病為請道人曰翌旦待我姥早起待道人以絳紗裹藥病發者執之自愈一圓可愈百人過百人即不驗矣姥從之子孫皆愈通療及百人滿果不驗姥折衷已不見藥但有呂洞賓三字而已

教孝子母第五十化

桐廬有通守沈志具有母病發背百方不瘥祈禱備至孝忱所感帝君夜往救之曰公至孝感天命予來救拔若過一日不復可療乃授以靈寶膏方括薑五枚取好乳香五塊如棗大二味各細研以白砂蜜一斤同煎成膏每服三錢溫酒化下大治發背諸惡瘡腫漏其母服之立痊通守繪洞賓像朝夕敬事焉純陽帝君神化妙通紀卷之四

純陽帝君神化妙通紀卷之五 帝五

玄門苗善時校正編次詩表

齋大雲僧第五十一化

帝君詭為回處士遊大雲寺隨雲堂會食月餘謂寺僧曰僧饌甚精但少麤耳遂去旬日携少許麤至自庖設數百僧皆飽足僧智明請處士啜茶舉丁晉公詩曰花隨僧筍破雲逐客既圓處士曰句雖佳未盡茶之理乃書詩曰玉藥一槍稱絕品僧家造法用工夫兔毫碗淺香雲白蠅眼湯翻雲浪浮斷送睡魔離几席增添清氣爽肌膚幽叢自樂幽巖畔未肯移根入上都僧獻詩云求真已得真獨有呂君身篋裏惟詩句爐中皆藥銀性靈淳似古神炁煖如春異日雲橋路如何得少親處士和曰三千里外無家客七百年來雲水身行滿蓬萊為別館道成无石化黃銀待賓植裏常存酒鍊藥爐中別有春積德求師何患少由來天地不私親復以丹一粒遺僧曰服此可不死遂別去後僧亦仙去訪侯用晦第五十二化

帝君遊江州廬山簡寂觀臨砌淬劍道士侯用晦問之曰先生何所用曰地上一切不平事盡皆去之侯心異之以酒果共飲謂曰先生道貌清高必非風塵中人帝君曰且劇飲无相窮詰既醉以筋點酒書劍詩一首于壁上曰欲整鋒鉞敵憚勞凌晨開匣玉龍鳴手中氣岸冰三尺石上精神蛇一條奸血點隨流水去凶膏全逐舊痕銷削平浮世不平事與爾相隨上九霄初若无字既而墨迹粲然透出壁後侯大驚再因問劍法曰有道劍有法劍道劍則无形法劍則有術治之者此俗眼所共見第能除妖去祟耳問曰今以道劍戮奸人于稠衆中得不驗俗乎曰道劍則忠劍惟斬自己邪妄耳法劍術也則不然以神爲母以炁爲子神存則炁存神去則炁散但珍其神而寶其炁以此戮不正鬼神之類也侯曰真仙之言也願問姓氏曰吾呂巖也言訖因擲于空中隨之而去良久不見侯乃恨恨而已

遊戲虹橋第五十三化

蘇州垂虹橋一日有藍縷道人至携酒于橋亭上悠然獨酌嘯詠終日神氣飄然衆計其所飲自旦及晡已非人量所及亦无酒客或詢其姓氏道人取佛前香爐灰爐題一詞于柱上飛梁壓水虹影沉清曉橋裏魚村半烟草算今來古往物換人非天地裏惟有江山不老兩巾風帽四海誰知道一劍橫空幾番到玉龍嘶未斷月冷波寒歸去也紫極洞天誰鎖指雲屏烟障是吾廬任滿地蒼苔年年不掃畢書吾洞賓也衆驚趨之俄不見

訪薛鍊師第五十四化

江州太平觀薛道士有高志帝君過之贈詩曰落魄薛道士年高無白鬚雲中閑卧石雪裏冷尋碑誇我飲大酒嫌人說小詩不知甚麼漢一任輩流嗤末小書云回道入同三客謁薛鍊師作始知洞賓併寓其字

誘甯道士第五十五化

宿州符離縣天慶觀有甯道士少談莊老有奇趣一日晨興有賣藥道士至即洞賓也儀狀雄偉往來彌月帝君欲度之不契臨別題

二絕句于扉上作大篆體勢飛動一曰秋景蕭條葉亂飛庭松影裏坐移時雲遮鶴駕何方去仙洞朝元失我期二曰肘傳丹篆千年術口誦黃庭內景經鶴觀古壇松影裏悄无人跡戶長扃既去人爭割之以治病良已字入木寸餘墨跡不減

度侯行首第五十六化

兗州妓侯其姓者家爲邸舍帝君詭服求授館齋出暮歸歸大醉逾月不償一金侯召蝦茶洞賓曰吾見鍾離先生謂汝可與語道侯不省以酒飲之帝君索飲不已滋不悅帝君伸臂示之金釵隱然解其一令市酒侯利其金曰飲罷寢此乎曰可也即登榻鼻鼾鼾至夜分侯迫榻帝君以手拒之叱侯亟去遲明失帝君所之視其背則手所拒處呂字微肌肉侯感悟曰此呂公也得非宿世一念之差遂至于此公來度我乎即斷髮布裘尋洞賓復遇授道遂隱去不知所終

誘尚書第五十七化

尚書郎賈師雄藏古鐵鏡嘗欲淬磨帝君稱

回客謁焉初但言道費不悟次日乞試其技
笥中取藥少許置鏡上辭去曰候更取來藥
跡已不見但見所寓太平寺扉上題詩曰手
內青蛇凌白日洞中仙果艷長春須知物外
烟霞客不是塵中磨鏡人

誘曠若谷第五十八化

青城山丈人觀道士曠若谷風骨清峻戒行
嚴潔常以天心符水三光正炁治疾良驗而
得人錢帛即以散施貧乏帝君詭為廣法師
上謁留月餘所作符篆往往吹起皆為龍蛇
霧雲飛去治鬼召將必現其形通人言語足
踏成雷目激成電呵炁成雲噴咳成雨又善
畫不用筆墨但含墨水噴紙帛上自然成山
川花木宮室禽獸人物之象略加拂拭而已
賣畫得錢即市酒與若谷痛飲若谷飲素无
量每為賓所困一日若谷問曰先生操行異
常人必自神仙中來還可語吾道否曰子左
足北斗七星缺一矣能成道耶更一生可
也若谷驚曰賓公殆聖人也蓋我左足下有
黑子作北斗七星狀而缺一未嘗為人所

知故也復問壽幾何帝君倒書九十四字于
壁作兩圓相圍之即別去始悟兩圓相乃呂
字而姓也後若谷九十四歲卒果符倒書之
識也

詩象先生元炁鍊玄玄感應隨機法自然

若谷傲然輕問道更生一世亦無緣

度瞿筆師第五十九化

涿江筆師瞿某喜接方士帝君往謁之瞿館
于家禮遇殊至自是往來彌年一日瞿遊
江許齋筆管為兩片泛于波上帝君履其一
引筆師效之瞿怖不敢前帝君笑而濟及岸
俄不見瞿始知其異人也旬浹復來自挈飲
食食瞿皆臭腐矣瞿閉鼻謝弗食帝君太息
曰若不能惡食吾以肉醬兩瓶遺君遂去不
見開視醬瓶皆麤金也兩瓶者非兩大甕之
類也

詩象往來提警一年餘必是瞿公德不孤

不上管舟嫌臭食可憐无分赴仙都

度黃鶯妓第六十化

廣陵妓黃鶯有姿色豪客填門好濟貧布施

一日有呂秀才即洞賓也托宿黃以其藍縷
垢污拒之秀才題二詩于屏一曰嫫母西施
共此身可憐老少隔疎親他年鶴髮雞皮媼
今日玉顏花貌人二曰花開花落兩悲歡花
與人還共一般花在枝頭防客折落未地上
請誰看題畢俄不見黃悟欲拭目

詩象幻化形骸假合身貪財好色喪真親
行藏語默奚為主誰悟中中的主人又曰
終朝賣笑與追歡幸積陰功有幾般德感
真仙來救拔可憐福薄不相看

遊戲岳陽第六十一化

帝君遊岳陽詭名賣藥一粒千金三日不售
乃登岳陽樓自餌其藥忽空而立眾方駭悟
欲慕其藥帝君笑曰道在目前蓬萊跬步撫
機不發當面蹉過乃吟詩曰朝遊北海暮蒼
梧袖裏青蛇膽氣雄三日岳陽人不識明吟
飛過洞庭湖

詩象仙遊翺若鳳栖梧隱顯全忘精與麤
靈藥度人人不識德風吹此滿江湖

救趙監院第六十二化

監文思院趙應道病瘵幾危委頓泣別親舊
吾死矣夫問聞有之物皆捨得獨鶴髮老親
與托奈何語未竟俄有一道人扣門語趙曰
病不難愈也取紙二幅各指其中爲二方竅
徑可二尺許以授趙曰俟夜一幅灰之調乳
香湯塗之病上留一幅以待後人言訖別去
趙貼藥自夕迨曉即愈大驚喜覓道人不復
見矣始悟兩方竅乃呂字也

詩彖趙公敬母德充天孝感慈孝兩口仙
病愈求眞眞已遁不明教後乃心傳

誘崔進士第六十三化

崔中舉進士道過巴陵寓旅邸歌沁園春樂
章帝君適意蒲溪隱市井間質其所歌崔曰
東都新聲也曰吾和此詞不解書吾唱之子
爲吾書也崔爲書其詞曰七返九還丹在人
先須鍊已待時正一陽初動中宵漏永溫溫
鉛鼎光透簾幃造化爭馳虎龍交媾進火工
夫牛斗危曲江上見月華瑩淨有箇鳥飛營
時飲刀圭又誰信無中養就兒辨水源清濁
木金間隔不因師指此事難知道要玄微天

機深遠下手速修猶太遲蓬萊路仗三千功
滿獨步雲歸崔問姓氏曰吾生江口長山口
今爲守谷客望日訪太守言之太守曰此呂
洞賓也亟令召之叩其戶應聲漸遠再呼不
應推戶而入聞無人矣壁有詩曰腹內嬰兒

養已成且居塵市暫娛情无端措大剛搖舌
却入白雲深處行崔與太守歎恨无已乃和
詞曰自己陽生正是中虛靜極動時默地雷
微震衝開玉戶天心朗徹放下簾幃眞火冲
融靈泉復湊不昧谷神何險危自然妙若三
川龍躍九萬鵬飛中中二土成圭意眷戀濃
如母護兒這恍惚眞容不空不色窈冥妙象
无識无知命住丹圓全眞體道奮志精修休
自遲收功了把三才全理一貫全歸

詩彖雙圓性命大丹成師憫仁賢喻道情

太守既明親拜謁祖師安肯綽然行

成都施丹第六十四化

成都藥市日有道人垢面鵝衣手持丹一粒
大呼于市我是呂洞賓也有能拜我者以丹
餌之衆皆以爲狂相聚戲笑或加凌侮道人

不顧如是往還市道上數回迨夜意无人拜
之者道人往坐五顯靈觀廟前大池上兒童
爭以瓦礫擲之道人笑曰世人欲見吾甚切
既見吾而又不識吾亦命也夫乃自餌其丹
俄五色雲周身有頃不見衆共悔恨

詩彖一粒金丹度有緣明明直示反生烟
世人薄福緣輕甚覩面眞仙不悟玄

誘陳澹然第六十五化

陳澹然富而儒者也性慕道延雲水士多年
竟元所遇帝君詭爲儒者爲治國歲餘所作
工役力倍常人陳愛之然止以儒者待之而
已一日陳與一道友講陰符經至天發殺機
龍蛇起陸人發殺機天地反覆未曉殺機之
旨備者從旁抗聲曰生生者不生死死者不
死已生而殺生未死而學死則長生矣陳大
驚曰汝非儒者耶誰教汝爲此言既而詰之
則復謬悠其辭不可解道友曰田野村夫定
於何處竊得此語耳非實通曉也居无何忽
辭陳曰吾將遠行明年五月五日復來也既
去寂然陳有鄉人客于巴陵遇之曰爲寄語

陳公我洞賓也始可授道徐察之則不然吾不復來矣言訖走入呂仙亭前竹林中不見明年端午日午時陳暴卒

詩募慕道參師即有年真仙臨降了无緣明言生殺无生妙何故澹然空澹然

訪太守奕第六十六化

武昌太守倅一日對奕有一道人通姓名直前曰吾能也守試與奕纔下僅八子即曰太守負守曰汝子未盈局安知吾負道人曰吾子以分途据要津也是以知之已而果然

如是數局守皆負道人俄拂袖不見守令人遍城尋之聞在郡治前吹笛繞至郡治前則聞笛聲在東門至東門則聞在西門至西門則聞在南門至南門則聞在北門至北門則聞在黃鶴樓前道人走往石亭中不見但見亭中有詩曰黃鶴樓前吹笛時白蘋紅蓼映江湄表情欲說無人會惟有清風明月知末小書一呂字

詩募基言勝負露機時皎月當空照水湄空自隨聲四門亂局中一著不能知

度七子第六十七化

刀鐻工陳七子夫婦坐茶肆梳剃一日有道入携一白金求剃鬚髮纔剃即生既生隨剃如是自旦迄暮夫婦手幾脫腕知其為異人也幸教其道可乎道人曰吾翌旦至陳早起

待之不至累月寂然陳棄業浪迹雲水求之數十年竟无所遇意稍懈思歸去家纔五里許忽見道人自山中出曰吾呂公也子精忱如此何患不成道乎乃授以丹訣併與詩曰携手三清玉帝鄉宿生緣契不尋常與君一轉金刀手削去滿頭无限霜自此七子精修成證後與師偕往

詩募十載灰心返故鄉真仙憐憫語真常三冬凍地生紅焰六月炎天降雪霜

武昌貨墨第六十八化

帝君遊武昌城詭為貨墨客墨三笏僅寸餘而價錢三千連日不售眾皆笑侮有鼓刀王某曰墨小而價高得无有意耶自以錢三千求一笏且與客飲醉歸昏睡午夜俄有叩門者乃客以錢還辭去比視墨紫金一笏上有

呂字遍尋客以不復見

詩募一墨三千意甚深數朝无一是知音鼓刀王丈雖高見祇得金予不得心

織梳高價第六十九化

帝君遊武昌天心橋鬻敝織木梳索價千錢連月不售俄有老嫗行乞年八十餘龍鍾偃僂秃髮如霜帝君謂曰世人徇目前襲常見吾高價貨敝織物豈无意而千萬人中咸无起卓之見尚可與進道耶乃以梳與嫗理髮隨梳隨長髮黑委地形容變少眾始神爭以

錢求梳帝君笑曰見之不識識之不見乃投梳橋下化為蒼龍飛去帝君與嫗不見詩募穢梳誘俗價千錢連月无人達此緣萬髮梳通人始愛化龍倏爾上雲天

醉衝節儀第七十化

帝君遊巴陵市太守陳甫出犯節前驅執太守置諸獄令書款目迨曉无一辭吏趣之洞賓曰須我醉醒吏云汝不能憂罪尚以酒為解耶言未竟俄失之但遺幅紙曰暫別蓬萊海上遊偶逢太守問蹤由身居北斗魁罡下

劍掛南箕月角頭道我醉時真是醉不知愁
是怎生愁相逢何事不相認却駕白雲歸去
休太守曰此呂公也夙興焚香謝過一日方
磻水盆中見焉亟召畫史圖之與滕子京絕
類也

詩象和光混世樂天游不自由時也自由
火息靈宮冲妙微水潛慧海徹源頭壺中
自有全真樂心上都无半點愁太守遇真
如感悟好當勇退死心休

度施肩吾第七十一化

施肩吾字希聖唐亦有肩吾字希聖如滄浦人少業習佛博經史攻詞章而學道隱居豫章西山遇帝君教以五行顛倒之法三田反覆之義或以鍾呂傳道集會其記皆施所編也道成之日作詩曰重重道炁結成神玉闕

金堂逐日新若記西山學道者連余即是十
三人

詩象傳道集奇怪亂神西山記華德惟新
二書果是先生謬誑誤闖浮多少人

度劉跛仙第七十二化

長沙劉跛仙遇帝君於君山得靈龜息炁之
法功成歸隱岳麓號瀟湘子常侍帝君往來
黃洞併數遊城下有詩曰南山七十二獨
愛洞中墟

後有鄭

愚者遇跛仙于清泰門外相與仙去

詩象跛仙劉子行功深誠感仙師點化心

息炁靈龜綿密密形神圓混振希音

度陳進士第七十三化

陳非閩中進士自羅浮來遊南岳俄遇帝君
陪連旬日陳薰禮問道帝君曰喜怒哀樂未
發之謂中汝以何為中陳默然書一○帝君
曰此性理也何謂天命陳再拜帝君默授之
遂得道後謁宜春李觀言洞賓度老樹仙本
末今隱南岳永康軍

詩象永釋科名罷論書頓忘者也與之乎

虛中至道明天命一點靈真體太虛

誘太公第七十四化

倪某新開酒樓有一道人至索飲自旦及暮
飲佳醞已及石餘衆怪相聚以觀倪索酒金
道人睜目不語頽然醉倒倪坐守之曙鼓動

道人忽起援筆題詩于壁曰鯨吸鰲吞數百
杯玉山誰起復誰頽醒時兩袖天風冷一朵
紅雲海上來未書云三山道人陽純作以土
一塊擲倪面走出門仰望東北一朵紅雲飄
然而來撫掌大笑俄不見刮視其壁墨微數
分視土塊乃良金也自是酒樓大售始知陽
純乃純陽也

詩象欲度倪公弄酒杯直言誰起復誰頽
黃金擲面猶迷昧安得回光見本來

誘楊柳金第七十五化

徽宗時有道人自稱昌虛中往來諸琳宮動
履怪異飲酒无量啗生魚肉至數十斤引冷
水數十斛大雨雪平地六七尺餘自埋於雪
中旬日不出雪霽復起行于深潭水面如履
平地及善草書作枯藤游絲勢一舉筆數千
字絡繹不斷人爭携楮以請然往往不與時
有妓楊柳金東都絕色也道人往來其家警
提楊終不悟又屢輸金帛然不與楊交接楊
一夕乘醉進之道人曰吾先生坎離配合身
中夫婦內交聖胎已結嬰兒相生豈復戀外

色內交之樂過於外之樂遠甚楊終不悟疑
訝其語時宰相張天覺館賓蕭某與楊父狎
楊以告蕭而蕭以告張遂往即之道人大呼
疾走徑趨栖雲庵雲臺不出良久排闥尋之
則已不見惟壁上有詩曰一吸鸞笙裂太清

綠衣童子步虛聲玉樓喚省千年夢碧桃枝
上金雞鳴張曰昌字虛中此吕公也後庵遭
火无子遺詩巍然獨存亦一異也

詩豕不侵寒暑體輕清數警嬌娥離色聲
身內陰陽提不悟空教丹鶴九臯鳴

廬山放生第七十六化

崇寧間有客航海橫風飄至一島有洞天見
金樓門牌上王字曰天仙院一老人在門首
客作禮問曰此何福地老人曰此洞天也此
處隔凡絕世人惟吕洞賓時來此游戲其人

問姓氏曰吾即唐裴休也客曰有缺到廬山

尋問前事彼處人俱說近有一道人見酒肆
家剖活魚作鱠道人不忍遂化其人放生主
家不從曰吾令此魚活耳鱠者不信道人以
藥一粒捺入魚腹中隨手跳躍衆人大驚遂

放之江其魚圍圍洋洋悠然而去道人隨不
見惟以沙灘上書回客二字海客記前日在
海洞時與放魚日同本人遂捨家入道

詩豕海客飄舟至洞天必然夙世有仙緣
回聞魚死復開悟何若洞天便拜仙

警提刑第七十七化

帝君遊江夏詭為吕元圭往來居民楊氏家
為人言禍福事其驗如神就警提人悟道一
日忽辭去曰惡人至矣吾將避之是日提刑
點獄俞某行部至鄂首覓吕公已不見得其
平日所與往還者岑文秀詰其所得岑曰无
有喻勵以聲色將罪之岑答如故喻命搜其
家得所遺岑長歌一首論丹訣事喻省之曰
此吕先生也元圭者祈先生二字耳惡人者
謂喻迫之云

詩豕來往楊家勸誘人就中欲警喻提刑
偶知喻老心多詐拂袖歸歟往玉京

度姚道真第七十八化

合州姚道真少為長年三老操舟三峡帝君
使負藥笈往來荆襄凡周歲俄洞賓遊洞庭

坐水面招道真道真股慄莫前帝君以杖扶
之曰分未應仙耶既時舉藥十二丸大如栗
曰歲星周則餌一丸服畢不死自此遇龍則
復慎勿適清河由是不食或寢旬日乃寤炎
天擁重裘盛冬裸冰上後至通川有地名龍

復鎮遂居之崇寧四年郡人何適病狂力致
道真適所居有水名清河道真忘帝君言不
覺三涉之適往迎致儀仗頗侈太守史某見
之以為妖械道真與適下獄道真曰吾忘真
人言宜抵此尚何悔焉面覆于地七日尸解

詩豕侍師復復整三周磨鍊塵凡尚未休
一死頓忘前一步仙師必引赴瀛洲

題詩天慶第七十九化

帝君遊秦州天慶觀時道流悉赴隣郡膳席
獨一小童在帝君求筆欲書童辭以觀新修
師戒勿汚壁乃曰但煩貯火殿爐欲禮三清
既往見殿後池水清泚以人皮畫壁曰石池
清水是吾心浸彼桃花倒影沉一到却山空
關內清閑塵累七絃琴末題云回復養書壁
絕高非手所能及衆歎異始悟回為吕而後

養者先生反對也

詩家寂朗虛空即道心无情日月自升沉
清堂誰是知音者空鼓无絃一操琴

度張珍奴第八十化

吳興妓張珍奴性淡素雖落風塵每夕沐浴

更衣炷香告天求脫去甚切宣和中有一士

人訪之珍奴見其風神秀異殊敬待之置酒

盡歡而去明日又至如是往來幾月餘終不

及亂張訝而問之曰荷君眷顧甚久獨不少

留一宿聲枕席之娛豈下妾微陋不足奉君

子耶士人曰不然人之相得但貴心相知耳

何必是哉他日酒半問珍奴曰汝平日更何

所爲曰失身於此又將何爲但每夕告祈願

了此債耳士人曰然則何不學道曰迫於口

體何暇及此且何從得師乎士人曰吾爲汝

師可乎曰果爾則幸矣即起整衣炷香拜之

既去決句不至張方獨處偶自書曰達師許

多時不說些兒箇及至如今問損我援筆未

置間士人忽來見所書笑曰何爲者張匿之

士人曰示我何妨乃示之士人讀其後曰別

无巧妙與你方見一箇子後午前定息坐夾

脊雙關崑崙過恁時省氣力思量我張珍奴

大喜再拜敬謝自是神氣豁然若有開悟亦

密有所傳張不以告人然未知其誰何也累

月告別張設宴餞之臨歧出文字一封曰我

去後開閱之及開封乃步蟾宮樂章一首曰

坎離坤兌分子午須認取自家宗祖地雷震

動山頭雨要洗濯黃芽出土捉得金精牢閉

鋼辯甲庚要降龍虎待他人問汝甚人傳但

說道先生姓呂張遂齋戒謝賓朋繪像事之

修其訣逾年尸解而去

詞彙和曰陽復乾純陰始千象帝先是吾

元祖一氣氤氲降甘雨恍然大浮黎土无

極極中誠密錮玉龍蟠幽囚金虎主人輕

鼓沒絃琴全不屬宮商律呂

純陽帝君神化妙通紀卷之五

純陽帝君神化妙通紀卷之六

玄門苗善時校正編次詩彙

度劉高尚第八十一化

劉高尚天資純厚性賦溫良不喜貴榮頓拋

富產捐情割愛泯識超凡不事王侯高尚其

志棄儒從道遁跡林泉逍遙方外先遇一仙

人謂曰辟內鉅鉸碎甕復完喻修真亦如此

後遇帝君語契遂問曰道心惟微可得見乎

答曰非耳目所及惟精神默會問允執厥中

何謂中答七情未發處六慾不生時是甚麼

又問云何體式帝君默然端視於空中畫一

字高尚拜云萬理歸元一性太虛弟子已无

疑矣帝君曰慧命真字知之乎高尚再拜

請教帝君密授口訣而往後於渤海縣安定

鎮築室居園二十餘年修證圓成道化大行

徽宗三詔方至闕庭惟以清靜自然无爲輔

化之旨奏之上問修鍊金丹之妙答曰陛下

萬機此方外事不勞聖問上默然喜敬教賜

微妙處士號後遊羅浮山建立道場又於秀

州隱真道院顯化皆有碑記作還元篇于世

常教門人曰神凝炁聚炁息丹成心无妄念
意外馳死心塌地不必外求三處神化

詩彖碎甕鉸鉸喻漏可修微中頓悟七情
元由无疑性了慧命未周得師密授快樂

天游中原園隱遊戲羅浮秀州堂內副墨

同儔百千億妙道化皇州三詔諫帝清淨

嘉猷功成行滿一劍瀛洲

宮中勦崇第八十二化

政和中宮禁有崇白晝現形盜金寶蓋妃嬪
獨有上所居无患自林靈素王文卿諸侍宸

等治之息而復作上精齋虔禱奏詞九天畫

寢見東門外有一道士碧蓮冠紫鶴髦手執

水晶如意前揖上曰臣奉上帝敕來治崇良

久一金甲丈夫捉崇劈而啗之且盡上問丈

夫何人道士曰乃陛下所封崇寧真君關羽

帝六

也上勉勞之再四復問張飛何在羽曰飛乃

臣累劫弟兄今已為陛下生于相州岳家他

日輔佐中興飛將有功焉上問師何姓名曰

姓陽四月十四日生陛下性尚奇怪多心不

正致使邪犯官庭當正心清靜治化天下免

將來奸盜侵亂帝不省遂隱去意其為洞賓
也自是宮禁帖然遂詔天下有洞賓香火處
皆正妙道神化之號仍塑像于景靈宮歲時
奉祠焉

詩彖天子天元炁純誠貴執中誠中不欺

昧上下悉和通奸佞潛蹤迹陰邪絕影踪

忠良全正化妖怪設神通清靜陰陽泰和

平人物豐兵戈咸偃息天下樂仁風

遊戲羅浮第八十三化

帝君遊羅浮朱明觀至小院中值道士他出

獨一小童在院童揖帝君先生少坐此遂竊

道士酒以獻帝君滿飲使童子盡其餘童子

不飲童所患左目內障帝君以所餘酒嚙其

目忽開明若素无患者乃取筆畫一山水于

壁山下作池三口謂飲吾酒則得仙矣不飲

帝六

命也然亦高壽言訖飛入石壁隱去及道士

歸見所畫山透壁內外大驚曰山下三口乃

崑字非呂先生手後童果百五歲而終

詩彖信步恍然遊海岳翻身忽爾到羅浮

豁開道眼除昏暗山水隱名歸太虛

長沙警僧第八十四化

帝君遊長沙托為回道入持小瓦罐乞錢得
錢無算而錢常不滿人皆神之一日坐市道
上言能以錢滿吾罐者當授以道人爭以錢
投罐不滿有僧推車錢戲曰汝能容之否道

人曰唯乃令推車入罐嚙嚙然有聲俄不見

僧曰神仙耶幻術耶道人口占詩曰非神亦

非仙非術亦非幻天地有終窮桑田幾遷變

身固非汝身則亦何足戀曷不從吾游騎鯨

騰汗漫僧益驚疑欲死之道人曰若惜此錢

耶吾今償若取片紙投罐祝曰速推車出良

久不出道人曰非我自取不可因跳入罐寂

然僧擊碎罐上有片紙題一詩曰尋真要識

真見真渾未悟一笑再相逢驅車東平路僧

悵然歸次東平忽見道人曰吾俟若欠錢之

念已償求道如此不可也僧方悔謝已遂不

及矣

詩彖萬法總非真一身皆是幻功名似水

泡世事猶雲變金玉豈常存簪纓非久戀

凡僧尚愛財苦海增瀾漫幻物迷且貪真

宗昧不悟不知明性天只會用心路

警妻道明第八十五化

梓潼妻道明家富而善素女術常蓄少女選十分美麗豐肥无癍痕者常不減十人之數然好周急濟貧多有陰陽神清體健面若桃花或經月不食年九十七止如五十許人尤好誇誕大言對客會飲或言素女送果或言彭祖容成輩遺書自以爲真神仙也一日帝君詭爲乞人登門妻不識之叱使去帝君以兩足於甃石上遽成兩方竅深可三寸妻始異之延置座右曰子非乞人也出侍女歌游仙歌命之酒帝君口占望江南詞時之曰瑤池上瑞霧藹群仙素練金童銷鳳版青衣女子嘯鸞笙身在大羅天沉醉處縹緲玉京山唱徹步虛清燕罷不知今夕是何年海水又桑田侍女進蜀牋請書自紙尾倒書徹紙首足不遺空隙妻大驚喜請問道要曰吾以口口相傳矣妻請益復曰吾以口口相傳矣俄登門外大栢樹杪不見後數日妻忽不快吐膏液如銀者數斗而卒口口相傳之說與夫

石上兩方竅皆呂字之寓也

詞家妻公秉炁壯實賦性慈仁惜乎心術不正如言送酒送果遺書皆著邪魔境然多有陰德故祖師警救之哀哉道明不明清高士志道體真仙養浩虛中吹玉笛凝神真樂吸瓊瑩清淨瑩心天離慾海放倒我人山玄素採陰魔畜道妻公邪術執爲玄休効損丹田

青城鶴會第八十六化

紹興末帝君赴青城山鶴會憩一賣餅家人亦不識醉吐餛飩盆中主人不動心但聞吐盆異香滿室人頗異之洞賓濃墨大書詩一章于門之大木上曰但患去針心真銅水換金鬚邊无白髮駛馬去難尋後題曰洞賓來四字筆勢遒勁光彩殊常觀者雲集或取刀削之已深透木背墨跡轉鮮時士人關雲祥者見之即會其像乃一清癯道人也是後其家油餅大會詩畧青城鶴會度金針吐出肝腸遍地金肉眼凡夫何不悟曰雲飄杳莫能尋

度曹三香第八十七化

安豐縣娼曹三香染惡疾爲邸舍往來客帝君詭爲寒士托宿僕以其藍縷拒之三香曰吾既立此門尸垢淨何擇焉遂延入殊禮待之居无何曹疾作神吟良苦帝君以筋鍼其股曰回心回心時門外一皂角樹久槁死帝君投以藥翌日樹即再生枝葉蕃茂曹始悟真爲神仙而兩回心者呂也即毀眼去粉黛棄家遠遊仍爲呂真人祠奉祀焉紹興末曹忽還鄉顏狀秀異人无識者奈自言本末復去不知所終

詩畧人人皆可證爲仙纔肯回心便有緣爲感三香善陰德淤泥一舉上青天

寶輪現像第八十八化

紹興中縣官胡真喜道術建大齋于京城寶錄宮方士大集用技能者帝君詭姓氏寓焉自贊其能異衆取藥少許置諸掌吹數過俄紅暈四溢成寶輪相現洞賓兩字衆大愕覓之不見矣詩畧天道能然匪技能纔云法術眼昏瞢

寶輪中顯天真性默得圓明證上乘

藥救傳道人第八十九化

江陵傳道人性純善平日敬事洞賓像甚切
乾道中正且獨坐鋪中俄一客方巾布袍入
共語良久起曰吾有百錢能隨我酒肆中飲
一杯乎傳從之自是旬日一來或留飲或與
之飲時目昏多淚客教服生熟地黃切焙取
川椒去枝目及閉口者微炒三物等分末之
鍊蜜為丸空心米湯服五十九傳如法服之
夜能視物後忽見一真像與客貌類所遇洞
賓像云

詩彖共飲時來已見心豁開道性便圓明

傳公想你福緣淺且救昏蒙內眼睛

長溪覓齋第九十化

福州長溪縣老媪開飯肆常齋僧道過往者
乾道中有道人來化齋老媪喜接待問姓名
不答食畢以火柴頭書壁作呂洞賓來四字
光艷奇偉自此飯店中人食衆太守聞之騎
馬往觀則字已銷沒无復餘迹太守自歎而
回信神筆也

詩彖閑戲長溪化一齋飯婆善待問元來
壁書直指人明道太守不知空自歎

警趙兵馬第九十一化

潭州兵馬都監趙不問淳熙九年四月十四
日作鶴會一道人不知所從來攝衣齋所不
與人揖徑入堂房內不見但於几上得一幅
紙書絕句云這回相見不無緣滿院風光小
洞天一劍當空又飛去洞庭驚起老龍眠末
書云谷客書

詩彖各職慈仁結道緣仙真感得降人天

攝衣不揖真消息悟得身眠神不眠

邵州索飲第九十二化

邵州城外有老媪開酒肆每早晨供呂真人
酒三杯至誠切切一日有呂道人索飲偶无
酒媪以所餘濁酒一升與之道人問價媪曰
每升錢二十道人以指點酒書二十字于門
外一紫石及銅錢二文忽然隱去徐視之則
字迹與錢下透石底幾尺餘自是觀者如堵
酒肆大售老媪年九十坐化後人因其居建
康仙堂云

詩彖清晨酌酒供真仙酒禮雖輕意不輕
二十二文俄透石化人心善樂長生

救劉氏病第九十三化

越州貧民劉氏一病跛艱于行幾二十年每
日炷香禱天乞已此疾虔誠備至一日有道
人手携鐵瓢市六謂劉曰子疾易愈可隨我行劉
隨之二里許指地下曰此下深三尺餘有五
色石試掘之果得石大如彈丸五色殊常道
人日子可持歸暴露九日細末以木瓜皮煎
湯服盡即愈可來城東駐雲庵東廊第三間
左壁再相會云劉如其言服盡果然輕便若
素无疾者即往庵中左右壁尋之无人但有
洞賓像携鐵瓢

詩彖身貧病楚正心堅誠禱高穹二十年

假像寓言慈憫救脫然病愈步輕便

覺章太守第九十四化

潭州益陽縣楚興寺東有來真堂乾道中帝
君曾遊題詩壁間有布袍拂出秋九月有章
嗣敬愛不已淳熙中章嗣守岳陽命工整治
洞賓塑像夜洞賓稱謝且請日子藏五金丹

三成法書有年可傳揚後世俾衆見之大道不爲一人私也既覺遂綉梓于郡齋廣其傳馬其三成法書自序曰嵩幼習儒教長好玄

門志慕清虛心游雲水尋師訪友往來不憚於驅馳切問近思終始不生於懈怠陰陽升

降取法於二儀性命根基歸元於一炁无形无相來時只一婦一夫有姓有名去後存三

男三女九重臺畔金童採得黃芽十二樓前玉女收成白雪水中起火當分八卦之才陰

內鍊陽自別九州之炁三花和會化火光直上昏衢千日功成鸞鶴元遊海島天機深

遠不敢輕言道要玄微難於直述今以平日見功之法尊師已驗之符集成口訣一十八

道密示後學凡金丹小成七訣天童不老一聚火煮海二匹配陰陽三聚火還元四散火

鍊形五龍虎金丹六周天火候七金丹中成六訣河車肘後一肘後飛金精二玉液還丹

三五液鍊形四金液還丹五金液鍊形六金丹大成五訣集神朝元一鍊炁成形二體同

太虛三出有入无四形神超脫五其書合三

十言每訣四句每句四字以明白之言發杳冥元精先天至神以此推之與傳道集靈寶畢法相去遠矣

詩彖頓漸三成非易難高明虛已返心觀靈泉化質丹臺瑩慧火鍊形慾海乾息念

凝神全法像鍊精化炁駐童顏形神俱妙超生滅游泳先天不等閑

純陽帝君神化妙通紀卷之六

純陽帝君神化妙通紀卷之七

純陽帝君神化妙通紀卷之七 帝七

玄門苗裔善時校正編次詩彖

度開先僧第九十五化

廬山開先寺僧法珍坐禪二十年頗有戒行

一日入定坐見一道人來謁問曰師謂道惟

坐可了乎珍曰然道人曰佛戒貪嗔癡婬殺

爲甚方其坐時自謂无此心矣及其遇境遇

物不能自克則此四種心紛飛莫禦道宣專

在坐因與珍歷僧堂見一僧方睡酣謂珍曰

吾偕子少坐于此試觀此僧良久見睡僧頂

門出一小赤蛇長五寸餘緣床左足至地過

涕唾食之復循溺器飲而去乃出軒外渡小

溝繞花臺若駐翫狀復渡道人以一桶水傾

漫小溝以溢而退道人當其來徑以小刀插

地迎之蛇見畏縮尋側徑至床右足循僧頂

門而入僧睡驚覺問訊道人及珍曰吾適一

夢與二子言之初夢從左門出達齋供甚精

食之又達美酒飲之因渡門外小江逢美女

數十恣觀之復渡一小江水驟漲不能往遂

回達一賊欲見殺走從捷徑至右門而入遂

覺道人與珍大笑而去謂彼足爲門以涕唾
溺爲供醞以溝爲江以花木爲美女以刃爲
賊人其夢寐幻妄如此珍曰蛇者何道人曰
此僧性毒多噴薰染變色已成蛇相他日瞑
目即生于蛇中矣可不懼哉吾呂公也見子
精忱可以學道故來教子僧遂禮敬求點化
後隨之而往而莫知所終

詩彙珍僧德行異常人我祖垂慈救出塵
道種昏蒙因愛慈佛心迷昧爲貪嗔四端
泯絕明元主一性圓純見本真警策睡僧
方了悟同師天外樂長春

遊沈家園第九十六化

湖州沈惟心慈善多陰德其家園最勝慶元
中有一客青布袍巾徑入游散形狀頗異守
園者急白主人尋伺已不復見但於後亭壁
上見一詩章曰萬里來遊蜀道長杖藜閑
百花莊誰家雞犬千家市中有神仙一鳥藏
乳燕鳴鵲春自在落花飛絮水微茫主人了
却明寧事向此重開綠野堂末云向道人作
或謂向者回字之轉必洞賓也

詩彙誠信壺中日月長水山景物隱仙莊
比如世上險中顯好向雲根深處藏厚實
和同方士樂虛華粧點俗夫茫沈園秀麗
皆凡景何若京山白玉堂

度楊太明第九十七化

南康楊太明事親孝親喪已廬墓三年然後
歸方廬時七月七日帝君來謁曰子八月有
厄服吾藥則无恙腰間出一小壺取藥投太
明吞之已而捐梳上布袍曰能與我乎太明
唯唯帝君納諸壺中太明滋感帝君笑曰吾
何是哉姑試子耳復探諸壺還之俄取杯水
投之藥以手撓之頃之藥聚如彈丸光彩奪
目謂太明曰願餌之手太明答曰稍遲帝君
即自餌之徐曰擬議即非也子居此良苦亦
思所以給朝夕否吾有以遺子乃取土一塊
噓之成紫金太明謂以利餌我却不受帝君
蹴金成石太明曰諸公皆有詩遺我道人能
之手帝君應聲援秃筆拂地三四濡杯水大
書其壁曰楊君真確士孝行洞宮壤皇天憐
其難七夕遺追往遠巡藥頑石遺子另饋事

子既不我受吾亦不知強風埃難少留願于
志勿棄會當首鼠紀青雲看反掌末書回客
贈即辭去其字初若暗昧不可識已而色渥
如赭入壁數分至于年正月真人來與之偕
往焉

詩彙明通道一源迷昧中霄壤天地惟降
升烏兔自來往清虛世鮮明富貴人爭享
仙祖苦提撕太明誠勉強心空性眼明息
无神清爽不悟若隔山了明如視掌

度喬二郎第九十八化

京師喬公二郎家富豪好禮英男爲謙和順
同人仁慈利物施棺木埋葬孤貧設粥飲接
濟餓殍常齋道敬真仙是以得感祖師會遇
自相見以來求錢物以濟人或索酒飲至大
醉喬欣然取與並無慳吝時以狂放語言逆
觸如此往來一年有餘喬公並不動心故祖
師力救入道修真臨辭贈一長篇云與君相
見皇都裏陶陶動便經年醉醉中往往愛藏
真亦不爲名并爲利勸君休戀浮華榮直須
奔走烟霞程烟霞欲去如何去先須肘後飛

金晶金晶飛到上官裏上官下宮通光明當時玉露消消生奔到元海如雷聲從此夫妻相際會歡娛踴躍情无外水火都來兩半間卦復翻成地天泰一浮一沉陽鍊陰陰盡方知此理深到底根元是何物分明只是水中金喬公喬公急下手莫逐鳥飛兼免走如何修鍊作真人塵世浮生終不久人道長生那得來自古至今有有有

汞和超出乾坤裏表裏醺醺默常如醉和光混世了神功弘道度人多美利寵辱不驚誰顯榮逍遙遊戲恣鵬程萬緣洒落清水室一點圓明瑩水晶靜鼓瑤琴清浩炁閑携玉塵震希聲樞機圓活風雲會撥轉玄關无極外清肅玄風萬籟澄冲融元炁陽和泰坎内真陽離内陰坎離既濟密幽深霎時妙合中宮混純一乾陽體健全擊碎虚空不用手没脚童兒善飛走金童罔象撥玄珠慧命壽同天地久有人或問此天機向道真元中妙有

正君心非第九十九化

徽宗政和二年駕幸寶籙宮設供齋畢上問道衆能有異術否能化汞爲銀否衆无答最下有一道人越次而出化汞爲銀猶有所因不足論貧道專以土爲之上駭異即命爲之遂以泥和作銀錠入爐用火煅之須臾霞光四出遂成眞銀道人曰尚欠光澤容貧道歸邸取藥既去久不至上令近侍催促宣召已不知所向上命開爐取出得花銀一錠上有絕句詩一首若模鑄成其詩曰世上紛紛鍊汞銀大都宜假不宜眞太平宰相張天覺四海閑人呂洞賓上及官道衆駭愕悞恨不識眞仙次日上命再設齋醮謝詩彖吁嗟嗜利問燒銀邪見昏心喪本眞深警太平無宰相蒙塵宜佳作朝賓

度黃先生一百化

帝君遊梧桐山見黃一中棄儒入道篤志皈眞建庵接待四方雲遊道友數年未嘗少怠一日帝君求掛搭黃見非常每日敬待之帝君亦逆意試其心黃愈加誠謹始得受密印黃自此大洞徹明臨別告求法語于是贈一

長篇吾有玄中極玄語周遊八極无處吐雲輶飄從到宜陽一見君子在玄浦知君本是孤雲客擬話希夷生恍惚无爲大道本根源要君親見求真物其中有一分三五本自无名號丹母寒泉歷歷无綿綿上透崑崙還紫府浮沉升降入中宮四象五行齊見土驅青龍擒白虎起祥雲下甘露鉛凝眞汞結丹砂一派火輪眞爲主既修真須堅確能轉乾坤泛海嶽運行天地莫能知變化鬼神應不覺千朝鍊就紫金身乃致全眞歸返朴黃秀才黃秀才既修真須早早人間萬事何時了貪名貪利愛金多爲他財色身衰老我今勸子心悲切君自思芳生猛烈莫教大限到身來又是隨流入生滅末書云昌虛中留此片言用表其意他日相逢必與汝訣莫退初心善養善養後三年黃偕隱去

詩和汞假象強名留妙語惡雲法雨如龍吐道風鼓舞肅靈臺寶鑑圓明輝藥浦昌字虛中字谷客無方神化恍兮惚教人養性了眞心直指虚空忘幻物精神魂魄意

爲五五者爲子中爲母虛中五元朝一靈
一靈密混潛玄府性天朗朗即浮黎靈地
肅清真淨土雲從龍風從虎誠感合子金
體露豎指舒拳是識神揚眉瞬目非真主
造玄門志誠確我祖九年潛華嶽心无妄
僞乃全真性不偏邪惟正覺一念虛寂復
本然機心泯沒全純朴樂象先須趁早事
休休心了了紫金闕內禮三清白玉堂中
侍九老超萬法離一切慧劍光寒心決烈
神凝空碧樂无生性體玉虛常不滅

度王祖師一百一化

重陽帝君本傳王其姓初名中孚字允卿咸
陽大魏村人母懷二十四月餘生而聰敏及
長儀觀魁偉廣顙巨目鬚鬚長美志操清高
不拘小節文武皆備天春初試武略中舉易
名世雄字得威好布施利物濟人多有陰德
嘗歎曰孔子四十不惑孟子四十不動心吾
年已過猶碌碌世間不亦愚乎一日師飲于
甘河鎮酒肆中忽有二人形質面貌一般各
披瓊衫而坐笑視師驚異之二仙遂去師亦

隨其後至止處便作禮懇告求點化二人徐
言此子可教遂以性點省師頓然開悟二仙
再囑云此心明性著之妙未復大事待汝塵
累冰釋業緣鎔化吾以汝師分付師即海蟾
更名嘉字智明自此狂縱人以為害風目之
師受之亦自以為名詳二仙即兩口呂仙也

秘授重陽第一百二化

重陽帝君自甘河鎮得點化之後徃狂自樂
不以萬事于心遂斷緣釋累去俗離塵一年
有餘忽有二仙青巾布袍各懸二袋倒插一
肩師瞥見認是前披瓊衫先生便拜呼師父
相邀入酒館中酒闌請問姓名俱不答後辭
去指海蟾劉仙翁此汝師也重陽敬禮遂傳
密印真經慧命之旨及授秘訣五篇囑曰汝
熟了焚之吾乃正陽師父之弟子純陽子是
也遂拄杖與海蟾乘風而登雲漢矣

警鍾仲山第一百三化

長沙鍾仲山嘉定己巳自金陵罷官歸舟次
巴陵南津浦時俄觀一舟過焉舟中一黃襖
翁風貌奇危凝然佇立熟視仲山良久仲山

窺其蓬中无他物惟船頭有黑瓶罐十枚蓬
前兩青衣童子參差立仲山意其必徑渡既
而僅行二丈許即回棹而黃襖翁已復端坐
蓬後矣二舟相幫行約一二里再熟視仲山
良久俄失船所在仲山始謂為巨商不與之
語至是恍然驚訝知其為異人也翌日往呂
仙亭禮拜真像果儼然衣黃衣亦有兩童衣
青衣侍側其貌皆與昨日所見者肖也仲山
自恨凡目不識神仙感歎无已周星作水調
歌頭詞有更南津港再遇呂翁船之句次年
下世仲山之孫景瞻嘗出其祖所繪黃襖翁
具示人誠以清峻絕俗云

遊寒山寺第一百四化

帝君遊寒山寺在蘇州閭門外五里就歇一
夜風大作本寺塔鈴玎璫聒耳次日不止早
本寺長老待茶問姓曰姓呂坐間因言一夜
風吹鐸鈴聒惱人長老戲曰爾是呂先生何
不禁其鈴休響帝君笑遂吹悉禁之隨果不
響僧驚訝仰觀遂隱去長老方省其呂先生
也後僧取下舊鈴換上新鈴至今亦不響

儀真繪像第一百五化

真州天慶觀先和觀常奉純陽真君一日發心雜塑供養胎骨木植及泥作下匠者失期不至忽一秀才投宿和觀正怒秀才問其事勸曰小生善塑休動心來日小生結緣塑了知觀喜待至夜已醉安歇至來日方丈請早齋覓之已去知觀正嗟歎兩三道衆來言昨夜廊下祠堂內誰塑一呂真人像知觀驚觀之果然其像清奇神彩收一足端坐衆皆喜慶謝齋謝之凡有祈禱无不感應後三遭回祿其像獨存見碑記事實于觀

度關真人第一百六化

四明關真人本貧家女自幼有出塵志年十六父母將許嫁關不悅走入深山不歸飢甚拾橡栗而食忽有一老翁鬚眉垂地眼碧有光指關腹一畫曰吾已與汝斬赤龍矣自是可入道關拜問道翁密授玄旨關謝曰然則穀糧之累不息道奚可代老翁曰此易耳袖中出一橡子大如彈丸光彩絢爛曰食此即不飢關食之移時方盡俄不見既歸即不喜

烟火食惟啖果飲水无復天癸動履若神父母不復強之嫁淳祐中召至闕庭謝后愛之度爲道士錫號真人當奉敕代太后降香至天師龍虎山壇所一羽流見之謂人曰肌膚纖麗眉目如刻畫宛然天女神无澹然清雅非凡關作女仙傳七卷自言遇老翁即洞賓真仙云

丹度莫敵第一百七化

楊州老兵官莫敵自解名籍家居奉道多化人積善消愆常齋道友濟貧苦一日有道人過之問曰汝所學何道耶莫曰吾平生懺悔殺人罪耳安敢望道耶吾束髮從軍大小百戰殺千百人今年七十三矣老來頗以爲恨時見冤魂道人死生一揆罪福本空心以爲罪則罪狀自見心以爲无罪則惡相皆无冤家形影皆自心生非實有也古人爲大善大惡極處一念迴機其力甚大乃引莫臨水次果見百餘人血身淋漓來莫左右莫驚泣哀求道人一喝其冤魂皆散去遂以丹三粒與之曰服三粒則成天仙二粒則成地仙一粒

則爲地下主者莫置丹掌上粒升空一粒墜地一粒則服之道人曰分止此耳莫拜問姓名乃以指畫空作呂字遠別去莫自是絕烟火食知人休咎年百三歲端坐而逝焉

度張和尚第一百八化

衡山僧智玄張其姓也一日遊衡山紫蓋峯修真院遇帝君共語機鋒敏絕契合帝君曰華嚴經釋迦佛與多寶佛入塔融會紫金閣上不分左右說何事僧无答遂作禮問答曰此佛祖正法眼藏真相空實教外心傳之妙二佛融會性命雙融也不分左右體一太虛也汝執一邊以見性爲能了何其偏乎僧再拜求點化遂授密旨僧曰不過真師幾乎誤此生帝君點化首遂贈詩云得道純陽七百秋五湖四海任風流此身已出三千界一日須遊數十州醉倒清風明月夜踏翻紅蓼白蘋洲禪門衲子休相笑我在華嚴最上頭僧謝出門乘雲而去

純陽帝君神化妙通紀卷之七

太華希夷志序

帝八

愚除晉寧河中府之幕職密邇華山稔聞希夷先生遺事公務之暇采古書所錄或諺語之談其高風峻節信乎前宋一代之異人也故作太華希夷志以紀之先生明易深造玄妙之理視人之禍福物之休咎其應有如著龜當五代之時有撥亂濟世之志所學得皇王帝伯之道聞宋太祖登極知天下已定遂入華山爲道士徵召不至及太宗即位三宣至闕下待以賓禮賜坐與語所論事之凶吉靡不徵驗欲拜官堅辭弗受不久放還山跡雖方外之士脗合中庸之道其脫落塵世泥滓軒冕傲睨公侯視萬乘若僚友恬退高隱不尚勢利足抑奔競之流可追配巢由嚴陵之節其崇名教厚風俗以助萬一云回顧吮癰舐痔奴顏婢膝昏暮扣人之門戶驕人於白日者猶醬瓿之醢雞奚足論哉輅遠居保郡官除蒲川爲家貧不免二千里來之任初兩任教官連任縣職館閣名公鉅儒累舉詞翰之選當路齟齬不果用僕恥於奔競故碌

碌居州縣之職以代耕未能展平生讀書之志恒鬱鬱不遂因閱古傳記感希夷先生之高節編次成一書俾新學之士激勵其志內有差訛鄙俗傳者之誤志其因陋就撰以補綴之以寓高遠之趣庶幾有取焉延祐甲寅秋七月己未日訥齋張輅序

太華希夷志卷上

登仕郎河中府知事訥齋張輅集集補撰

先生名搏字圖南亳州貞源人幼歲戲渴水一作青衣媪抱置懷中乳之曰令汝更無嗜欲聰悟過人青衣媪者魏辰星之精及長習舉業後唐長興中試進士不第隱居武當山九室巖辟穀鍊氣二十餘年或傳夜靜焚香讀易有五老人至尾眉皓髮容貌古怪常來聽誦居日久搏問之老人對曰吾儕即茲山日月池龍也此間玄武據臨之地華山是先生棲隱之所也異日希夷默坐五龍忽詣令先生閉目凌空馭風終宵至華山置坐於盤石之上聞目視之不見五老人去向或云睡法即龍教也龍善睡故云多閉門不出獨坐至百餘日不起周世宗召至闕下令於禁中局戶以試之月餘始開熟寢如故始異之因問以黃白之術搏曰陛下爲天下君當以蒼生爲念豈宜留意於此乎世宗不悅放還山賜號白雲先生令長史歲時存問先生負經濟才初五代間自晉漢之際每聞一朝革命輒鑒感

數日人有問者瞪目不答先生攬鏡自照曰
非仙而即帝其自任如此宋太祖與趙普遊
長安希夷逢之笑而隨驢曰真人亦在世矣
輒握太祖之手曰可市飲乎太祖曰可與趙
學究同往希夷睥睨普曰也得也得相隨入
酒肆普坐席左搏怒一手引之曰紫微帝垣
一小星輒據上次可乎斥之使居席右已知
帝王有徵矣後先生引惡少數百入汴州中
路聞太祖登極驚喜大笑問其故又大笑曰
自此定矣詩曰勦勦四十年來睡不覺東方
日已明先生即入華山隱居爲道士宋太祖
累徵不至及太祖崩太宗即位至道元年四
月十日帝坐垂拱殿時和歲稔代理均平間
先生之名久矣厭紛華之世喜清淨之教差
殿東頭供奉官陳宗顏爲使齋詔書并御詩
往華州華陰縣華山雲臺觀宣陳圖南先生
至四月十四日抵華陰縣縣宰著作郎丁壽
明迎接入縣時薄暮止宿焉來曉同天使四
月望日至雲臺觀與道士鍾希晦相見引導
見先生報曰皇帝宣師父先生盥手焚香拜

禮畢聽詔曰朕自即位以來克服八方威臨
萬國遐邇悉歸於皇化華夷亦致於隆平知
卿抱道山中洗心物外養太素浩然之氣應
上界少微之星節配巢由道遵黃老懷經綸
之長策不謁王侯蘊將相之奇才未朝天子
卿不屈於萬乘身奚隱於三峯乘風猶來舉
朝稱賀御詩曰華嶽多聞說知卿是姓陳雲
間三島客物外一高人丹鼎爲活計青山作
近隣朕思親欲往社稷去無因先生聽罷詔
書并詩對天使曰貧道棲真物外修鍊山間
無意求名有心慕道不願仕也待天使禮畢
未肯來朝即答回表并詩云伏念山野生居
吳地長自漢南成童以習業儒林壯歲而徧
遊洞府性同猿鳥心若土灰不曉仁義之淺
深安識行藏之去就敢荷作服脫簪爲冠體
有青毛足無草履有意慕義軒之道無心誦
管樂之篇南華道德頻看黃閣玉堂絕念數
行紫詔徒煩彩鳳嘶來一片閑心已被白雲
留住苟臨軒陛貽笑聖明詩曰九重特降紫
泥宣才拙深居樂靜緣山色滿庭供畫障松

聲萬壑即琴絃無心享祿登台鼎有意求仙
到洞天軒冕浮榮絕念慮三峯只乞睡千年
使見先生堅意不肯應召得回表并詩於四
月二十四日至京師進呈於紫宸殿太宗讀
表與詩畢知先生不來其弗悅念念不已即
當年六月三日帝坐垂拱殿召殿東頭供奉
官張素真齋詔書再往宣先生至六月八日
到華山雲臺觀見山童擁筠箒而立天使問
曰師父在否山童曰師父於庵中熟睡正濃
使臣曰何以得覺山童曰擊頭邊金鐘便覺
擊之即悟先生知天使至忙起整道服問使
臣曰何故復來答曰皇帝爲陳宗顏宣先生
弗至甚爲失望特遣吾再來召先生焚香禮
畢聽讀詔曰朕伏惟先生白雲隱士碧洞高
人悟大道之玄門達希夷之奧理朕歎詔光
其速迅景難留忽暑往以寒催漸顏衰而鬢
改雖達治世之略未諳鍊性之機廢寢忘餐
思賢若渴暫離洞府跨鸞鶴以飛來佇立宮
闈列簪纓以敬待先生讀罷詔書答使臣曰
貧道山野之人鹿豕同群登高望遠臨流漱

齒松君桂父吾之友也雲峯霞嶺吾所遊也孰羨浮榮之富貴哉請天使暫停軒轡止歇山庵作回表并詩以謝殊渥表云伏念愚拙深潛澗壑誤蒙天恩臣無諸葛之奇才君邁漢皇之厚德臣山麋之性野鶴之姿冠簪獨羨手逍遙軒冕難禁手羈束高卧蒼龍之嶺蝶夢愁揚閑看玉井之蓮詩魂浩蕩餐烟霞於洞口採薇蕨於林間杖屨徜徉身心懶散鍊爐中之丹藥遠擬登仙避世上之虛名屢防嫁禍賴遭逢乎堯舜可踈放其巢由幸盡餘生遐瞻聖代詩二絕云坐達聖代即堯年草澤愚人也被宣自笑形骸元懶散才疎安敢望朝天調和四氣憑燒藥修鍊千方只要安黃閣高官無意戀閑居佳境勝爲官使臣得回表并詩力不能強起至六月十六日至京師進呈文德殿下太宗讀罷表并詩宣先生不至龍顏大不樂即當年六月二十九日帝坐垂拱殿宣內都知石實問曰百官中有誰言辨者實奏曰有內藏庫副使葛守中能言太宗宣至今守中爲使再宣希夷先生

齊詔書并御詩往雲臺觀七月七日到觀不見先生有知觀道人楊子導言先生恐皇帝再來宣上玉泉觀遁迹坐靜去了使臣伴子導前導塵碑確石徑至觀所報先生接詔迎使焚香禮畢聽讀詔曰朕上承天命下撫民心兵消而四海咸寧化行而八方無詘位臨有衆舍哺鼓腹以同歌道體無爲鑿井耕田以安業知大賢之生世海晏河清望君子以教時風行草偃身未離於巖壑名滿寰區志恒想於蓬瀛心遊寥廓朕素知軒后博施之德實歎廣成修養之方地僻雖深王澤所及伊尹就徵而適毫孟軻隨聘以至梁命有相從禮無多讓御詩曰三度宣卿不赴朝關河千里莫辭勞鑿山選玉終須得點鐵成金未見燒紫袍綽綽宜披體金印累累可掛腰朕賴先生相輔佐何憂萬姓輟歌謠先生讀罷詔并詩意懶赴徵聘言復辭謝天使守中曰宣命三次先生不可固辭豈不聞魯論云君命召不俟駕行矣詔旨豈宜抗拒又鄒書云率土之濱莫非王臣不可辭也僕雖不才爲

先生賦詩一首詩曰華嶽三峯客幽居不記年烟霞爲活計雲水作家緣種藥茅亭畔栽松澗壑邊暫離仙洞去可應帝王宣先生讀罷甚喜隨答詩曰鶴鷺翩翩即散仙蒲輪爭忍利名牽留連華嶽傷心別回顧雲臺望眼穿涉世風波真險惡忘機鷗鳥自悠然三峯纔欲和衣倒又被天書下日邊先生賦詩畢與使者同行留別山中麻衣道友詩一絕華嶽峯前兩路分數間茅屋一溪雲師言耳聾持知久人是人非聞未聞麻衣道友答詩曰獨坐茅庵迥出塵亦無衣鉢日隨身逢人不話人間事便是人間無事人先生得詩默喻其旨相別訖與天使不久至京師於建隆觀安歇夜寢偶聞禁鐘響吟嘆世詩二絕千門萬戶鎖重關星斗排空靜悄然塵世是非方欲歇六街禁鼓漏初傳銀河斜轉夜將闌枕上人心算未闌堪嘆市廛名利者多應牽役夢魂間先生睡至五更聞曉鐘響復吟詩曰玉漏將殘月色沉一聲清響透寒音能催野客思鄉切暗送離人起恨深牕下驚開名利

眠枕前喚覺是非心皇王帝霸皆經此歷代
興亡直至今先生賦詩畢盥漱巾櫛時已昧
爽令使臣先入內奏言先生宣來見帝帝急
命宣至闕下見於延英殿先生服羽衣戴華
陽巾草履垂條以賓禮見賜坐上賦詩問曰
知卿得道數餘年鎮日常吞幾粒丹可許鬢
邊無白髮還疑臉上有紅顏終宵寢向何方
觀清曉齋登甚處壇肯為眇躬傳妙訣寡人
擬欲似卿閑先生答詩曰臣今得道幾經年
每日常吞二氣丹仙釀飲時添漆鬢蟠桃食
後注童顏夜深只宿雲臺觀曉起齋登法籙
壇陛下問臣修養法華山深處可清閑太宗
覽先生所答詩大悅時上方欲征河東先生
諫止之會軍已興命先生寢於御園兵還果
無功睡百餘日方起帝驚異加號恩禮特厚
太宗從容謂希夷曰先兄太祖功高德厚宣
先生弗至寡人功卑德薄煩先生降臨丹陛
搏曰先帝不須貧道來陛下不免臣一遭耳
太宗又問曰昔在堯舜之為天下今可致否
對曰堯舜土堦三尺茅茨不剪其跡似不可

及然能以清靜為治即今之堯舜也上善之
太宗多延入宮中與語謂宰相宋琪曰陳搏
獨善其身不干勢利真方外之士遣中使送
至中書琪等問曰先生得玄默修養之道可
以授人乎曰搏遁跡山野無用於世修鍊之
事不知無所傳授然設使白日飛昇何益於
治聖上龍顏秀異有天人表洞達古今治
亂之旨真有道仁聖之君正是君臣合德以
治天下勤行修鍊無以加此琪等表上其言
上覽甚喜先生以鶴書赴隴野服來廷太宗
喜其拔俗之標待以不臣之禮處之直館幽
廷西清靡勞襄野之遊自契岵岵之間八素
九真之要訣四覺七緣之妙門故其造膝沃
心之旨莫得而聞也太宗命先生相真宗即
壽王也太宗八子真宗第三使左右引導至
東宮王未起而迴帝問之先生曰王門廝養
皆將相王可知矣所見乃張相耆楊相崇勳
郭大尉承祐也先生被召至闕下聞有士大
夫詣其所止願聞善言以自規搏曰得便宜
事不可再去優游之所勿久戀得志之地勿

再往聞者以為至言康節詩曰珍重至人留
好語得便宜是落便宜太宗暇日與先生同
登東角樓閣觀市肆見樓下富人日高纔起
洗漱問左右是誰之家或奏曰此東京豪富
民耳即吟詩曰人人未起朕先起朝來萬事
攢心裏可羨東京豪富民睡至日高猶未起
先生答詩曰昨夜三更夢裏驚一聲鐘響萬
人行多應又是朝金闕臣自無官睡到明太
宗見先生所答詩大喜來日早朝上欲以為
諫議大夫先生堅辭不受乃作退官歌并詩
一絕歌曰道能清道能靜清靜之中求正定
不貪不愛任浮生不學愚迷多怪悖時人笑
臣不求官官是人間一大病官卑又被人管
轄官高亦有人趨使或經泰或經鄭東來西
去似繩糾直至百年不曾歇算來爭似臣清
靜月為燈水為鏡長柄葫蘆作氣命出入雖
無從者扶左有金龜右鶴引朝日醉長不醒
每每又被天書請時人見臣笑呵呵臣自心
中別有景又詩曰元氣充餐草結衣等閑無
事下山稀不侵織女耕夫利猶自傍人說是

非太宗見先生堅意不肯就官祿問先生有
濟世安民良策留之可也希夷曰臣總角慕
道壯歲遊山處心澹泊默悟玄風濟世良策
未暇知也臣頗好睡幸放還山可也隨賦辭
職嘆世詩一首云南辰北斗夜頻移日出扶
桑又落西人世輕飄真野馬名場爭擾似醯
雞松篁鬱鬱冬猶秀桃李紛紛春漸迷識破
耶鄆塵世夢白雲深處可幽棲太宗曰寡人
召卿來方期陰陽燮理朝綱整治安國家濟
人民不意先生只說山中之樂惟睡為念信
有說乎先生曰然進睡歌一首云臣愛睡臣
愛睡不卧擅不蓋被片石枕頭簑衣覆地南
北任眠東西隨睡轟雷掣電泰山摧萬丈海
水空裏墜驪龍吐噓鬼神驚臣當恁時正鼾
睡閑想張良悶思范蠡說甚曹操休言劉備
兩三箇君子只爭些小閑氣爭似臣向清風
嶺頭白雲堆裏展放眉頭解開肚皮打一覺
睡更管甚紅輪西墜後又口號云問君世上
何事好無過曉起睡當早庵前亂草結成衣
飢餐松栢常令飽因說山石脚絆倒不能起

得睡到曉時人盡道臣愁疾臣自愁癡無煩
惱先生初在周顯德中人訪其居窺其戶間
然惟獸跡鳥聲而已有樵於山麓者見其遺
骸歷窮迫而視之乃先生也捫其心獨暖良
久氣還而起曰睡適酣矣奚為擾我州將羅
彥威以聞太宗知先生堅辭不仕欲求還山
帝命百工聚集貨物於五門前歌呼喧闐以
誇萬民之富庶約先生登觀謂先生曰京師
豐盛若是安忍棄寡人還山不同治世乎先
生曰鳥獸棲於林麓魚鱉游于江湖各有所
樂耳太宗指示人烟輳集處問先生曰見否
曰見帝曰見甚先生曰見富者貪生貧者競
命太宗默然須臾下五門還殿詰朝先生入
內堅辭還山帝懇求濟世安民之術先生不
免索紙筆書四字遠近輕重帝不諭其意先
生解之曰遠者遠招賢士近者近去佞臣輕
者輕賦萬民重者重賞三軍帝聽罷大悅上
知其不可留即賜宴便殿詔宰臣兩禁赴宴
賦詩以寵其行又詔華州刺史王祚時就存
問以廩其闕由是海內無賢不肖聞其風而

慕之其願操几杖以師事之者不可勝數將
出京師先生賦辭朝詩云十年蹤跡踏紅塵
為憶青山入夢頻紫陌縱榮爭及睡朱門雖
貴不如貧愁聞劍戟扶危主悶聽笙歌聒醉
人携取舊書歸舊隱野花啼鳥一般春太宗
為先生堅要還山不能苦留上賜龜鶴鞍馬
等物餘重物堅辭不受惟茶藥而已令使臣
以安車送先生至華山雲臺觀賜號希夷詔
曰賜詔陳搏一代高人累朝逋客慕我隆平
之化來修觀謁之儀不有嘉名何彰貞範宜
賜號希夷先生先生臨別留詩一絕云華山
高處是吾宮出即凌空跨曉風臺殿不將金
鎖閉來時自有白雲封太平興國初太宗差
天使持詩再召先生辭謝不起先生密陳天
命實在章聖御詩曰曾向前朝出白雲後來
消息杳無聞如今若肯隨徵詔總把三峯乞
與君先生竟辭不至帝令使臣賜二女與先
生以備執巾櫛先生却之回詩曰雪為肌體
玉為腮深謝君王送到來處士不生巫峽夢
虛勞雲雨下陽臺一說唐僖宗封高道清虛處
士仍賜官女三人以備洒

拾遺賦太宗賜希夷先生詔勅華山道士陳

詩云搏混跡窠中棲心物外養太素浩然之氣應少微處士之星既不屈於王侯但守志於林壑樂我中和之化慶予下武之期而能遠涉川途暫來城闕決旬延遇弘溢居多白雲莫駐於帝鄉好爵難縻於達士昔唐堯之至聖有巢由爲外臣朕雖寡薄庶遵前事或恐山中所闕已令華州刺史王祥每事供須乍返故山履茲春序緬懷高尚當適所宜故茲撫問想宜知悉春寒汝比好否遣書指不多及賜茶綃詔曰勅朕居九五之尊雖數年用兵而一心利物乃者鸞旌南狩江表來庭款誠屢聲於軍前方物咸陳於闕下既能效順遂命班師以汝早乘塵寰高居物外自得逍遙之趣不驚寵辱之心鎮彼置浮有足嘉尚俾均賜費用獎隱淪今賜汝云云河潼氣爽連嶽地靈攝道知方諒多休社臨軒翹矚寤思在懷想宜知悉夏熱汝比好否遣書指不多及賜汝細白綃三十匹蠟面茶一十斤研膏茶二十斤鴉山茶二十斤詔至可領也先生

嘗立於庭間見金人持劍呼曰子道成矣當有歸成之地蓋秋爲萬物之所斂而歸者也吾其隱於西方乎是時年已七十餘遂抵華山得古雲臺觀故基闢荆榛而居之以契歸成之語著三峯寓言五十首時境內有虎食人先生至其處叱虎令去自是虎不爲害雍熙中先生因吟望仙掌坐對瀑流指隙地曰此北極之舊地也吾嘗夜見神人衣黑衣頂冠掌中有朱書字示吾其文曰北極開同紫微帝君之殿先生因曰開同者因天地而生故爲北辰也乃命弟子構之侯璿張觀將舉進士以問先生曰侯張二生今年登科不如來年是年春省黜其名明年中第皆如其言

太華希夷志卷上

太華希夷志卷下

帝九

登仕郎河中府知事訥齋張格纂集補撰

初張忠定公乖崖詠謁華山陳圖南欲同隱華山希夷曰他人即不可如公者吾當分一半相奉然公有官職未可議此如失火家待公救豈可不赴也公別搏搏以宣毫十枝白雲臺墨一副蜀牋一角爲贈公謂搏曰會得先生意驅詠入關處去曰珍重珍重搏送公回謂弟子曰斯人無情於物達則爲公卿不達爲帥乃贈詩一絕云征吳入蜀是尋常歌舞筵中救火忙乞得金陵閑養老也須憂恤鬢邊蒼公始不論其意後更鎮西蜀馳驛過華陰不暇與希夷相見寄詩與先生曰性愚不肯林泉住剛欲清流擬置君今日星馳劍南去迴頭慚愧華山雲後公西蜀回有詩云世人大抵重官榮見我東歸夾道迎應被華山高士笑天真喪盡得浮名公晚年有瘡發於鬢治久不差遂自請金陵養老以鬢瘡卒果如其言錢文禧公若水少謁希夷求相邀入山齋地爐畔見老僧擁壞衲瞑目附火錢

揖之僧微開目而已良久希夷問曰如何僧擺頭曰無此等骨後見希夷曰吾始見子神貌清粹謂子可學神仙而此僧言子無仙骨但可作貴公卿耳錢曰其僧何人耶希夷曰麻衣道者聞見錄一說若水爲舉子時見希夷於華山希夷曰明日當再來若水如期往見有一老僧與希夷擁地爐坐僧熟視若水久之不語以火箸畫灰作做不得三字徐曰急流中湧退人也若水辭去希夷不復留後若水登科爲樞密副使年纔四十致仕希夷初謂若水有仙風道骨意未決命僧觀之做不得故不復留然急流中湧退去神仙不遠矣僧麻衣道者也華陽隱士李琪自言唐開元中郎官人罕有見者關中逸人呂洞賓有劍術雖數百里頃刻輒至世以爲神仙數至希夷齋館與之唱酬如交友時人異之此皆舊史之文也陳堯佐知華州一日謁希夷先生坐定與語少頃有一道士風姿英爽目如點漆真神仙中人也徑入坐次希夷急避尊位略話數語皆方外之事須臾豹囊中取棗

一枚與堯佐却而不受希夷起接啖之不久辭去送於觀外復會坐堯佐曰此何人希夷曰即洞賓也堯佐悔愕不已清源王世則等同詣先生世則爲僕隸拜於階下先生笑而降階曰侮人者自侮也揖世則坐諸生之右曰將來君冠諸公明年世則果第一人及第一日先生自言嘗遇高士孫君仿摩皮處士二人語余曰武當山九室巖可以隱居因往棲焉許諫議仲宣罷成都牧過其廬先生曰昨久再當補外尋遷給事中尹河南踰年入觀又遣人致書幣以問休咎謂門人賈德升曰爲我答書給事比去更不出矣未幾果卒郭沆者少居華陰嘗宿觀下中夜先生呼令趣歸沆憚其遠不欲去先生與之俱往行一二里有人號呼以報母卒沆始悟先生遺藥急去可救既至果卒餌其藥遂愈齋中有大瓢掛壁上有道士賈休復欲之未敢言希夷謂之曰子來非有他意蓋欲吾瓢耳命侍者取而與之种放字明逸隱居終南豹林谷聞先生之風往見之先生一日令洒掃庭除有

佳客至明逸果至作樵夫拜庭下希夷挽之而上曰君豈樵夫者後當有顯官聲名聞天下明逸曰放以道義來官祿非所問也希夷笑曰人之貴賤莫不有命君骨相當耳雖晦山林恐不能安異日自知之後真宗朝召爲司諫帝攜其手登龍圖閣論天下事辭歸山拜諫議大夫後改工部侍郎又謂明逸曰君不娶可得中壽明逸從之至六十歲卒先是希夷爲明逸卜上世葬地於豹林谷下不定穴既葬希夷見之言地固佳安穴稍後世世當出名將明逸不娶無子自其姪衡至今爲將帥有聲後希夷解化明逸立碑叙希夷之學曰皇王帝伯之道云希夷先生有高識嘗誡某曰子他日遭逢明主不假取跡動天關名馳寰海名者古今之美器造物者深忌之天地間無完名子名將起必有物敗可戒之放晚節侈飾過度營產滿豐鎬間門人戚屬亦怙勢強併歲入益厚遂喪清節時王嗣宗守京兆醉慢罵條奏於朝會赦方止祥符八年一旦山齋起服聚諸生列飲取平生文藁悉

焚之酒數行而逝亦奇男子希夷先生好讀易以數學授穆脩伯長脩授李之才挺之挺之授康節邵堯夫堯夫以象授種放放授蘆江許堅堅授范諤昌一枝傳於南方也世但以爲神仙術善人倫風鑒而已非知希夷先生也先生忽謂弟子賈德升曰今日有佳客至當速見報少頃一人衣短褐青巾扣門賈未及報其人忽然而去先生遽出追之一里餘遇老人衣鹿皮因問曰前去遠否老人曰此神仙李八百也動則八百里又悟鹿衣者乃太清得道白鹿先生也李即不及而鹿衣者亦失所在希夷先生曰吾不久留此世矣端拱初語門人曰吾來歲中元後當遊我眉使晝夜然燭於石室中弟子等恭受文翰虔奉約束皆嗚咽流涕先生曰無亂尔情以恒我化也先生臨卒草奏疏人莫見其言遣弟子賈德升持所賜龜鶴并青駝馬詣關以進上獨覽久之以所獻物復賜德升仍加紫服號曰悟真先生希夷端拱初命德升曰汝可於張超谷鑿石爲室二年七月初室成先生

乃欣然策馬徑造其谷至盤石磽确處捨馬而徒攀藤引蘿暮抵其室大笑數四謂弟子曰巉巖太華氣清景秀吾之所歸乎即書數百言爲表其略曰大數有終聖朝難繼已於今月二十二日化形於蓮華峯下張超谷中至期以燭及夕命滅之令弟子各休息既曙則以左手支頤而終壽一百一十八歲經七日肢體猶溫有五色雲蔽塞洞口累日不散後有中使至我眉有客入謁衣冠甚偉自稱東明專相多說華山事後方悟華山陳先生遽令召之不知所往自號扶搖子其先生門弟子并高人勝士同至者咸錄於後以激勵後學云晦庵先生通鑑綱目曰周世宗召華山隱士陳搏詣闕問以飛升黃白之術對曰陛下爲天子當以治天下爲務安用此乎乃遣還山詔州縣長吏常存問之胡氏曰陳搏所蘊非世宗所知也飛升黃白之問不亦陋乎搏以治天下對已發其端世宗不能訪以治道也先生披荆榛築室於上方太平興國中太宗累賜詔齋御詩召搏赴闕乃敕有司

增積隱廬復給內府金錢經始壇殿規模方備今觀是也先生著指玄篇八十章入室還丹詩五十首又作釣潭集萬餘字皆醜縷道妙包括至真其言簡而理深使觀者有所自得先生啓沃上意幽贊遠圖太宗欲以爲諫議大夫先生懇辭命遂不下委化之年蓋百一十八歲自謂先機逆數知來識往精微深妙殆不可測至諸奇說眩曜之事則未嘗爲也故先生之道浩然莫得而揭厲之者無賢愚貴賤莫不聞其風而悅之先生沒後有弟子曾孫武尊師因文正范公指教得入室還丹詩於京師凝真院得三峯寓言於太華李寧處士得指玄篇於赤城張無夢得釣潭集於張中庸進士共三百篇餘乃纂先生傳集并養生要旨及李真人服餌法御賜詩曰只向身邊有大還胎神月殿在秋天三靈密象誰分別尸質清虛本自然又御賜篆明堂及飛白清靜二字真宗祀汾陰駐蹕華陰再幸雲臺閣先生遺像佇立凝思久之命除其觀田租召對道士武子華等賜紫服張方平往

來秦蜀恭謁神御既而瞻禮希夷推神仙者之云蓋神本無方道無不在神也者妙萬物而爲言者也惟神也故不疾而速不行而至漠然與合謂至人由是後可以出死生而窮變化至于一氣返復之元本四象自然之體用指玄理精婉已成章彼九室下方豈徒與麋鹿爲群木石爲伍而已哉先生紫袍綠絡眉目偉異方瞳粹音九流百氏之學咸徹視洞觀先生之道窈乎其深而不可窮恍乎其變而不可測固將乘雲氣騎日月以遊乎四海之外豈與眩奇怪尚詭譎以欺世取譽者同年而語哉种放以處士召見拜諫官真宗待以殊禮名動海內後請歸終南山恃恩驕倨甚王嗣宗知長安放至通判以下群拜謁放小俛垂手接之而已嗣宗內不平放召其姪出拜嗣宗坐受之放怒嗣宗曰曩者通判以下拜君君扶之此白丁耳嗣宗狀元及第名位不輕胡爲不得坐受其拜放曰君以手搏得狀元何足道也嗣宗怒遂上疏言放才識無以踰人專飾詐巧盜虛名陛下尊禮擢

爲顯官恐天下竊笑益長澆偽之風且陛下召魏野野閉門避匿而放陰結權貴以自薦達因扶掖言放陰事數條上雖兩不問待放之意浸衰种放別業在終南山後生徒學者甚衆性頗嗜酒躬耕種秫以自饌所居有林泉之勝殊爲幽絕真宗聞之遣中使攜畫工圖之開圖召輔臣觀焉上歎賞之其後甘崇魏野居有幽致帝以遣人圖之故野有詩曰穆脩伯長汶陽人後居蔡州師圖南脩少豪爽性褊少合多遊京洛間人嘗書其詩句于禁中壁間真宗見之深加歎賞問侍臣曰此爲誰詩或以穆脩對上曰有文如是公卿何不薦丁晉公在側曰此人行不及言由是上不復問蓋伯長與晉公有布衣舊晉公頃赴夢澤伯長猶未仕相遇漢上晉公意欲伯長先致其禮伯長竟不一揖而去晉公憾之由是短於上前後晉公貶朱崖途道州伯長詩曰却訝有虞刑政失四凶何事不移量可見其不相善也伯長祥符二年梁固榜登進士及第調海州理掾以忤通判遂爲前籍隸池

州其集中秋浦會遇詩自叙其詳後遇赦署潁州文學參軍故當時呼之曰穆參軍老益貧家有唐本韓柳集乃勾於親厚者得金募工鏤板印數百帙携入京師相國寺設肆鬻之伯長坐其傍有儒生數輩至其肆輒取閱伯長奪取怒視謂曰先輩能讀一篇不失一字當以一部爲贈自是經年不售學者方從事聲律未知爲古文伯長首爲之倡其後尹源子漸洙師魯兄弟始從之學古文又傳其春秋學李之才字挺之青州人憫儻不群師事伯長性嚴急稍不如意或至呵叱挺之左右承順如事父兄略無倦意登科仕孟州司戶挺之坦率不事儀矩時太守范忠獻公以此頗不悅挺之自若也後忠獻建節移鎮延安郡僚多送至境外挺之但別於近郊衆或讓之挺之曰異時送太守至如是且情貴稱禮范公實不我知而出疆遠送非情豈敢不情事范公未幾忠獻謫守安陸過洛三城故吏無一人往者獨挺之往省之忠獻始稱歎遂受知焉邵堯夫子某云挺之嘗爲共城令

屬衛州時先君康節居祖母喪築室蘇門山
百源之上布衣蔬食三年躬屢以養先祖挺
之聞先君好學苦志自造其廬問先君曰爲
科舉進取之學耳挺之曰科舉之外有義理
之學子知之乎先君曰未也願受教挺之曰
義理之外有物理之學子知之乎先君曰未
也願受教挺之曰物理之外有性命之學子
知之乎先君曰未也願受教於是先君傳其
學挺之後終殿中丞簽書澤州判官廳公事
澤人劉義叟晚出其門受層法以爲名士易
學則惟先君得之也康節少時自雄其才懷
慨有大志既學力慕高遠謂先王之事爲可
必致及其學益老德益邵玩心高明觀於天
地之運化陰陽之消長以達乎萬物之變然
後頽然其順浩然其歸在洛三十年始至蓬
草環堵不蔽風雨躬屢以養其父母居之裕
如講學於家未嘗強以語人而就問者日衆
鄉里化之遠近尊之士人之道洛者有不之
公府而必之先生之廬先生德氣粹然與人
言必依於仁義忠信樂道人之善而未嘗及

其惡故賢者悅其德不賢者服其化所以厚
風俗成人材者先生之功多矣先生之學得
之於李挺之挺之得之於穆伯長推其源流
遠有端緒而先生淳一不雜汪洋浩大其所
自得者多矣受命不起以詩答鄉人平生不
作皺眉事天下應無切齒人斷送落花安用
雨裝添舊物豈須春幸逢堯舜爲真主且放
巢由作外臣六十病夫宜揣分監司無用苦
開陳張師正年五十齒已疎搖後十餘年臣
嚮大哉利若刀截嘗得藥方叙曰元亨在天
聖中登嶽頂至明星館故基下得斷碑髣髴
有古文乃治口齒烏髭藥方歌一首猪牙皂
角及生薑西國升麻蜀地黃木律旱蓮槐角
子細辛荷蒂剪荷葉心子也要相當青鹽等分同燒
煨研細將來使最良指齒牢牙髭鬚黑誰知
世上有仙方幸九此希夷先生之方也處士魏野
字仲先陝州人也居于東郊架草堂有水竹
之勝好彈琴作詩清苦多聞於時前後郡守
皆所禮遇上祀汾陰過其廬遙望魏野松下
教鶴舞真宗曰寡人須到此中使報之將近

魏野携琴引鶴踰垣而去駕至山庵不遇隨
書於門曰朕與寇準同來後使人召之辭疾
不至野以詩贊寇公曰從前輔相皆頻出獨
在中書十五秋泰嶽汾陰俱禮畢這迴好伴
赤松遊公覽之喜形於色以酒茗藥物爲答
素編云先公遺札有公自寫此詩數本旦得
詩感悟以疾屢辭改柄遂拜太尉王清昭應
使王文正遺事魏野謂寇準曰自古功名蓋
世少有全者因與詩曰好去上天辭富貴却
來平地作神仙公及貶始悔不用野之言溫
公集言野之子名開亦不仕皇祐中賜清逸
處士號出歸田錄

太華希夷志卷下

西嶽華山誌序

帝十

凡古之士合作神藥必入名山福地不止小山之中何則小山無正神為主多是木石之精千歲老物此輩蘊邪之氣不念為人作福故也謹按山經云可以精思合作神藥者華

山泰山霍山恒山嵩山餘係中州或在諸侯五服之外其間稱名山者以百數迺不可以遍舉此皆有正神在其山中或隱地仙之人又生芝草若有道者登之則此山神助之為福其樂必成矣吾鄉金城千里控壓三河川

英嶽秀太華位焉夫太華者坐挹三公抗衡四嶽終南太白却立而屏息首陽王屋不敢以爭雄西觀昧谷之稍昏東顧扶桑之已白更無峻極惟戴高穹蓋得太素之元精稟金天之爽氣作成萬物分主允方預之於十大

洞天之中則極真為號含藏日月吐納雲烟生象外之樓臺匪人間之風物目之於十八水府之數則車箱有潭東南江海地脉潛通載祀典而為常經投金龍進玉簡若夫仙掌雲空蒼龍日出千山捧嶽嵐氣川流翠撲客

衣經時不落已而斜陽映山蓮峯弄色如金如碧匪丹匪青奇麗萬千不可名狀松生琥珀夜即有光地出醴泉為國之瑞固宜降五靈玄老隱函谷真人或星冠羽衣乘雲而謁帝王者有之或寶車羽蓋駕龍而觀大羅者

有之招邀真聖總集仙靈則此又華山為一都會也吾友王公子淵先覺而守道獨立而全和每語人曰我欲曳杖雲林舉觴霞嶺斯志積有年矣方畢婚娶棄家入名山修鍊金液不有太華其孰留意焉人曰可矣公遂取

舊藏華山記一通慮有闕遺更閱本郡圖經及劉向列仙等傳有載華山事者悉採拾而附益之俾各有分位不失其叙以山水觀之則峯穴林谷巖龕池井溪洞潭泉之境可得而見以祠宇觀之則宮殿寺廟藥爐拜壇諸

神降現之處可得而知語其所產藥品則茯苓菖蒲細辛紫栢俱中炎帝之選錄其所出仙人則清虛裴君白羊公黃初平十六真人盡預玉皇之游宴而不與下界相關乎噫華山仙蹤聖跡於是大備無不包也其文僅七

十餘篇命工鏤板務廣流傳則豈曰小補之哉既成請余以文冠其首余或拒且賀曰余才乏卿雲無力挽千鈞之筆然喜見公之志即我之志也我亦欲入名山合作神藥未知明指會公有此迺成我之志也歟大凡入名

山之中合作神藥必有所依書曰為巫者鬼必附之設象者神必主之況修仙藥而入名山豈山之正神而不佑我耶其藥之成可立而待也但勿謂青天空闊白龍來遲一旦造玄洲會群仙翔紫霄朝太一聽鈞天之樂享

九芝之饌行亦未昧其他有諸天之隱語空洞之靈章約與公異日道也時大定癸卯十二月壬申泥陽劉大用器之序

唐玄宗御製序

天有四序星辰辨其位地有五方山嶽鎮其域陰陽交暢則物形焉精氣相射則神明著矣西嶽太華山者當少陰用事萬物生花故曰華山踞中土西偏七宮正位是稱西嶽按圖以察削成而四方信焉立表以算其高五千仞明焉石壁傑豎而雄竦衆山奔走而傾

附其氣肅其勢威其行配金其辰直酉前列
華陽之谷後壓華陰之郡左抱桃林之塞右
產藍田之玉下有方士真人金鼎石室上有
明星玉女仙草瓊漿焉

西嶽華山誌

蓮峯逸士王處一編

華州圖經

昭文館記云蓮花峯上有三峯上接三光中
有石池二十八所上應二十八宿青松綠竹
叢生高岡白雲萃靄旋於幽阜懷蘊金玉蓄
藏風雷爲大帝之別宮迺神仙之窟宅也方
域志云華山在華州華陰縣界華州按禹貢
係雍州分野自周宣王封母弟友於咸林是
爲鄭國至秦武公十一年以鄭爲縣後始皇
分天下爲三十六郡以鄭隸內史漢以鄭隸
京兆西魏爲華州歷隋屬京兆至恭帝義寧
元年稱爲華州唐武后垂拱二年改爲太州
中宗神龍年復名華州肅宗上元元年更名
鎮國軍至上元二年復名太州寶應元年却
名華州昭宗乾祐四年爲興德府光化二年
復名稱華州宋更名爲鎮潼軍華陰因名華
陰縣後或爲太華縣或爲晉陰縣或爲寧泰
縣或爲仙掌縣

蓮花峯 仰天池 八卦池 太一

池 白蓮池 二十八宿池 十丈
蓮 玉井

蓮花峯一上四十里卓立五千仞上有明星
王女之別館金天王之正廟二十八宿池黑
龍潭王女洗頭盆菖蒲池仰天池八卦池太
一池太上泉傍有玉井生千葉白蓮花食之
令人羽化古詩云太華峯頭玉井蓮花開十
丈藕如船冷比雪霜甘比蜜一片入口沉痾
痊我欲求之不憚遠青壁無路難躋緣安得
長梯上摘實下種七澤根株連

太上山 老君洞 太上泉 菖蒲

池 老君燒丹爐

老子見周之衰西邁流沙至函谷關關令尹
喜占其形色即知真人將過果得老子老子
亦知其奇爲著書上下篇言道德之事後隱
華山昭文館記稱蓮花峯爲太上山四面削
成高五千仞迴巒四合三峯崢嶸上廣十里
鳥獸不居頂之東南峯有老君洞次北有太
上泉泉之傍有老君菖蒲池其菖蒲葉細如
劍脊其根每寸九節服之令人強健延年益

壽耳蒼龍嶺之東北峯上有老君鍊丹爐細
享平嶽頂西南隅方圓三四畝盡是細草服
之令人身體生香聞及百步古記所稱草似
帛似布今人所稱西藏布是也

紫栢

嶽頂東北峯上有紫栢葉際碧露以五月五
日油囊接之食者可作地仙

五粒松

嶽頂西南峯上有五粒松平如偃蓋上有青
蘿長百尺下生茯苓具如人形時生琥珀夜
即有光如荷花晝如牛目服之遐舉矣夜可
書字

明星玉女 玉女石馬 玉女洗頭
盆

明星玉女祠在頂之中峯龜背上立祠堂有
玉女石室玉女聖像一尊并玉女石馬一疋
其馬神靈異常夜聞嘶嘶之聲頂上隱者常
見之祠前有石曰五枚曰中俱有水號曰玉
女洗頭盆其水碧綠澄澈旱不竭雨不溢神
霧經云明星玉女持玉漿餌之令人得神

玉女牕

玉女牕在雲臺南峯上有石門入丈餘直上
石窗如牕望見南峯明星玉女之別館也

石龜躡

石龜玉女祠在石龜上其石似龜東西八九
步南北二十餘丈兩頭壁立其形如龜前有
石躡猶如折裂闊可有五寸其深不可測以
物投中食頃猶聞其下聲即古之進簡於嶽
府之所也

黑龍潭

黑龍潭在頂之南峯上有仰天池黑龍潭人
間曠早祈求必雨宋崇寧二年准勅神封顯
潤侯

洞玄石室

西嶽洞玄石室在頂之西北峯上四絕昔清
虛真人裴君入此室精思至道積二十三年
矣降五靈玄老之所其石室東西有二門初
入才容身側入至室中周迴五六丈東門上
接雲霞西門下臨地中有石道像高三尺戴
三景扶晨之冠石衣文如九色雜羅之文像

多古錢其錢多脚一頭多孔一面有文云大
布大篆

筭場 蘆花池

筭場在頂上後魏道士寇謙之洞曉渾天儀
尤善玄像曾定天元五紀其筭有差後成公
興真人狎狂而來假為貨客誤觸筭筭其筭
乃合謙之悔恨獨居山林遂隨真人去棄其
餘筭筭化為葭荻今名蘆花池是也

碁石

碁石在頂上東南隅別一孤峯上遙望有石
方如並榻真若碁局漢武帝時面前忽有人
羽衣星冠乘雲車駕白鹿而從天降武帝驚
問為誰答曰山中衛叔卿也帝曰若是山中
人乃朕臣也忽失叔卿所在帝甚悔恨即遣
使梁伯至山中推求叔卿不見但得其子名
度世帝曰汝父在何處度世曰臣父少好仙
道委家而去入華山四十餘年矣帝使梁伯
度世求之於華山絕頂上望見其父與數仙
博戲於石上但見紫霧鬱鬱又見數童執幢
節立其後度世等望而百拜叔卿曰汝等何

來度世曰帝恨前日倉卒不得與父語叔卿曰前爲太上所遣欲誠帝爲窮黷事而帝強梁自貴而反欲臣我不足與語是以去耳又誠度世曰汝慎不得爲漢臣亦不復爲語帝也梁伯度世於是拜辭而反事見列仙傳

石仙人 瀑布 石仙洞 昭陽洞

正陽洞 西玄洞 水簾洞

石仙人者在嶽北面半腹中登真隱訣云嶽洞深三百里有瑤臺玉室樹則蘇茅芳林碧泉則石髓金精遙望洞方圓可丈餘鳥道絕通人蹤罕到時出異色雲炁洞口上有丹石間青石似丹青畫出仙人之狀冠幘衣服無不周備高下大小如人形號曰石仙人上有瀑布飛流直下三十餘丈其石仙洞又稱爲水簾洞其嶽有四洞東曰昭陽西曰西玄南曰正陽北曰水簾

蟹遺穴

蟹遺穴在頂之西北峯山海經云華山有獸而翼六足蛇身出則天下大旱

巨靈掌 仙掌石月

中十

巨靈左掌上有半輪石月在頂之東北峯上遁甲開山圖云巨靈得玄元之道與元氣一時而生混沌之師九元祖也漢武帝觀仙掌於縣內特立巨靈神祠焉

華山靈異

華山之頂迺天真降臨之地神仙聚會之鄉降現之事極多略叙其一二曾先聞異香次觀瑞靄或見千乘萬騎或見玉女金童或見髻童子數百或羽服道士踰千或見珠幢而金傘或見絳節而霓旌或見騎龍騎虎人或見乘鳳乘鸞客或見金光滿地或見火焰連天或見紫霧騰空或見祥雲覆頂或聞金鐘鳴其降見不一或在最高峯上或於仙掌峯頭或集三公山或聚西玄洞昔清虛真人裴公隱於頂之西北峯上曾降五靈玄老中方大羅峯王母數現或衣黃裳戴金冠乘寶輦駕五色斑龍九頭上有羽蓋左右金童玉女仙官將吏莫窮其數後於現處建其祠堂唐貞觀中山下建王母觀華山之西有一山名曰羅敷山大曆五年有天地水府三官降現

中十

又感代宗皇帝夢中復勅修三官院至咸平中更爲承天觀

神林

華山之上山之下或谷內或廟道中但有生死樹木名曰神林禁人採伐如有犯者立禍於身山之西南隅有一林侵天松檜乃嶽神遊宴之處名黑山林有樵竊採之者火燒虎食甚衆

御道

御道在仙掌峯之北乃昇嶽之路也漢武帝唐玄宗曾遊此因名御道今兩傍有石曰子乃當時裁闢干用錦綉遮護危險峯頂須由御道跨蒼龍臨雲臺天井徑下有百尺狀自頂至青柯平二十里青柯平出谷口二十里

張超谷

張超谷者後漢張楷字公超結廬之地學者如市又能爲五里霧故稱張超霧市每跨蹇驢入市晚即携壺帶酒而歸

石羊城 仙谷

石羊城在張超谷之西迺黃初平黃初起弟

兄二人得仙之地山谷故名仙谷黃初平者丹溪人也年少時家使牧羊久而不歸其兄初起尋覓近四十年矣後聞市中有道士言人休咎其驗如神初起乃問之道士曰太華山中有一牧羊兒姓黃名初平是卿之弟耶初起拜謝即隨道士入此谷中見弟悲喜語畢問弟羊今何在初平曰僅在山東耳兄初起往視之但石而還與弟曰弟兄俱往初平乃叱石曰羊起於是白石盡變為羊數萬頭兄初起叩頭曰弟獨得仙吾可學乎初平曰若有志可得也初起便棄妻子拜弟為師後乃俱成列仙矣叱石處四面寬廣有似城壘今人稱為石羊城

文仙谷

文仙谷者乃是呂真君隱居之所也真君來此易姓姬更名洞明道號抱真子居華山蓮花峯下文仙谷內結庵四十年矣人無識者紹興丙子中秋前一日謂門人劉裕之曰張翁驪母昇玄待吾久矣因作頌曰上面一箇口下面一箇口世間堅的有盛水不交漏囑

付裕之說怡然卧化裕之即藏遺骸於石室後數歲先生神現泗州塔自題詩云姬州墨客羽化三峯又數載來謁裕之題詩云昔日曾居此理名四十春紅塵多少客誰是識余入又詩云余曾十載攻文墨萬卷詩書鎖胃腸浮萍雲水寄家緣住在蓮峯人不識後云回公題裕之尋所瘞屍處惟見空棺中有二口呂字之事由是時人方悟是呂真君也真君唐太宗朝得道至今五百年矣元豐間題琴臺詩云野人本是天台客石橋南邊有住宅父子從來只兩口子好歌時我好拍又詩云四海遨遊一野人兩壺霜雪是精神坎離之物會收得龍虎丹行運水銀其碑見在文仙谷今稱為羽谷庵

牛心谷山

牛心谷者昔楊震微時隱居此講授群書學者如市其谷多槐故稱楊震槐市其山巖間多有五色葵鳥山上有雪天王聖跡雪中觀之惟顯天王披銀甲騎驃白馬之狀

黃神谷

黃神谷者嶽之東乃是真人黃蘆子隱居之所也黃蘆子者楚人也姓葛名越但居此山號曰西嶽公其治病有千里而來者衆矣或寄與姓名病無不愈若禁虎狼不敢動飛禽不敢飛去受術於赤松子年過八十力舉千斤行及奔馬時大旱召出潭中龍催促使昇天降大雨一朝乘黃龍而去矣

藏馬谷 藏馬龕

藏馬谷者在嶽東漢武帝求仙於華山下造集靈宮存仙殿望仙門有神馬自華山出帝令置內棧馬不久留令人尋之見在此山谷中石龕下故名藏馬谷藏馬龕東北澗中石上馬跡尚存焉

毛女峯

毛女峯在嶽之西毛女字玉姜秦始皇宮人也見國祚流亡遂負琴入華山此峯上隱居服松栢葉飲泉水體生綠毛世人以見之所稱毛女洞至今洞中有鼓琴之聲有道人得見此洞峯下有白石寺廢已久

雲臺峯

雲臺峯嶽東北其山兩峯崢嶸四面玄絕上
冠景雲下通地脉巖然獨秀有若雲臺下有
穴昔有人入此穴東出方山行云經黃河底
上聞流水之聲周武帝時有道士焦道廣獨
居此峯辟粒餐霞常有三青鳥報未然之事
周武帝親詣山庭臨軒問道因而谷口置雲
臺觀後弟子洪仙等見師道廣乘一物如麟
往而不返矣

試鑿穴

雲臺北峯北面有一試鑿穴可高百尺其深
不測穴邊有一堅石如鑿大小闊狹狀如鑿
出迺希夷先生蛇骨之穴

白雲峯

白雲峯在嶽之東北唐明皇妹金仙公主修
行之所名曰白雲宮八仙洞看嶽棚上竹園
下竹園棗樹栗子林花園藥畦磴確見在焉
白雲側有焦真人石洞

白羊峯

白羊峯在嶽之西北五里層崖晃朗洞室空
濛每至三元八節及諸齋日即有神燈或三

卷十

十三

或五見於巖壁昔有人隱此峯莫知其名姓
常乘白羊往來塵世後與弟子介琰俱登仙
以此號為白羊真人真人有禁山錄及製虎
豹狼熊符七十道行於世也

松檜峯 朝來峯 玉柱峯 玉秀

峯

此四峯上盡是青松檜栢常有異色雲氣覆
之其峯聳翠孤巒人跡希及之也

焦公巖

焦公巖在嶽東南真人姓焦字孝龍河東人
也常餐白石或分與坐客其味如芋後遭野
火燒其庵隣峯人往視之見先生危坐於火
中庵燒盡先生乃徐徐而起衣服並無焦灼
後數載天忽大雪人覓不見忽於雪中單衾
而卧顏色赫然如勝夏之狀或老或少至今
人有遇之者

神土巖 仙油碩 避詔巖

神土巖在雲臺東南百步焦道廣精思所感
欲構房廊石上湧出神土用盡復生于今尚
然仙油碩在雲臺峯壁中焦道廣每設齋醮

天降油于此碩自道廣乘麟之後此油不復
見矣避詔巖在華山之西南古之隱遯之士
避詔冥隱於此處也

白鹿龕

白鹿龕在嶽之東昇嶽路之右是仙人魯女
生置白鹿龕有飛泉滴流魯女生者是華山
古之得道仙人也在華山二百年莫知所之
後忽有人嶽廟前逢女生乘白鹿從王女十
人與人別而去

太極總仙洞

太極總仙洞在毛女峯之西壁中有洞乃曰
太極總仙洞其下有車箱潭

王刁三洞

王刁三洞在嶽之東仙人王遙字伯遼鄆陽
人也有妻無子頗能治病病無不愈亦不祭
祀不用符水針藥或有邪魅作祟者畫地為
獄叩石呼之皆見狐狸單龜蛇之類皆斬
而焚之王真人以竹篋令弟子錢哥以九節
竹杖擔之十餘年未嘗見開或逢羽衣並不
顯夜行見有炬火前導後至此巖洞中見有

友人刁自然遙聞竹篴取出五舌竹篴三枚
三人共鼓之及王遙辭而去刁自然云卿當
早來不可久在塵寰再期此洞處後王刁錢
哥俱登仙矣上洞莫能到中洞有飛石遮于
洞門下洞隱居者皆在其中

碧雲洞 碧雲溪

碧雲洞碧雲溪在嶽之東乃鄭雲史羅隱之
翟士端鄭隱此四高士隱居之所也鄭邀字
雲史南燕人氏高節不屈棄其妻子閒華山
五鬣松凝脂千歲能延年却老至此洞隱居

天成中以拾遺詔不起賜號曰逍遙先生羅

隱之居臨江軍新淦縣王筍山玉梁觀道士
來居華山或臨水或登山一觴一詠高情自
適天福中賜號曰希夷先生翟士端字表正
齊人也博通九經祥符中真宗幸汾陰禮召

不起無疾而逝七日肢體猶溫及火之有聲
如雷五色光炳耀鄭隱字明處充之奉符人
也左臂上有黑鰲子如北斗狀常居王刁三
洞口自冬涉春不出人異之祥符中真宗祀
后土還駐蹕驛下詔行在賜號貞晦先生又

賜歸山歌云嶽中逸士本藏名常詠琴樽道
性情盡日臨流看水色有時隱几聽松聲遍
遊萬壑成嘉遁偶出千峯詭治平談希夷究
玄默沃予心號無極辭城闕歸山林樂爾志
號何深已薄紛華號存素音好將吟嘯號暢
冲襟

壺公石室

壺公石室在嶽之西北孤峯上有石室可容
十餘人有泉東北入霧市谷東谷中即後魏
道士寇謙之築場西谷中修羊公石榻穿之

所壺公者莫知姓名常懸空壺於座上日入
之後輒跳入壺中費長房從之學令住此石
室中有一方石廣丈餘壺公以茅繩繫之懸
於空中令長房坐卧石下使諸蛇蟲竟來嚙
繩繩欲斷而長房坐卧自若終無懼也公至

憮之日子可教矣賜子為地上主者令令乘
竹杖而歸後至葛陂投於陂中竹化龍而去
得役鬼魅之術

三公山石室

三公山在嶽之東南有三峯巖然各秀上象

三台副此列嶽故號三公燕濟字子微漢明
帝時人也隱此石室服木黃精恒散髮亦有
練巾惟月朝節乃著之時復一琴一詠常有
黃白雲覆其上後辭別交友乘雲而去

長春石室

長春石室在雲臺山側大唐貞觀中有道士
杜懷謙居此石室斷穀不食好吹長笛令人
多買笛至於隔一吹之投於巖下笛盡更供
巖中累月不動自號長春先生今石室巖然
笛聲不絕

修羊公石榻

石榻在嶽之西北仙谷中石室有石榻修羊
公常卧於其石榻上盡穿隙常不食見漢景
帝問曰公有何能公不答即化石羊題其背
有字云修羊公謝天子後置石羊於通靈臺
羊又去不知所之

卧仙平

卧仙平在張超谷內有一石室所張超真人
蛻骨之室為樵牧嬉戲於其間有飛石自空
來塞其穴今只稱卧仙平也

種藥平

種藥平王暉真人常餌蒼朮黃精有驅虎豹之術每種黃精即駕虎豹為耕耘常乘虎豹其轡轡之屬竹杖策之威如人乘驟馬之狀常誦九字詩百餘言人莫解其意後乃昇天不復見之

醴泉 玉泉

醴泉在古庵直下其水微有酒香醇味為國之瑞屢招鳳飲傍有玉女神祠玉泉在張超谷口其水色如漿因此置玉泉院二泉皆腹漿王隨人久服之可去沉疴也

黃龍潭

黃龍潭在神谷口祈雨感應神封廣潤侯

車箱潭

車箱潭在仙谷裏一十里乃太極總仙洞直

下宋仁宗皇帝明道年每歲朝廷遣使投金

龍玉簡宋徽宗皇帝崇寧二年奉勅封為豐

潤侯按水府記云天下一十八處水府華山車箱潭乃第七水府也與東海南海溫

江同即投金龍一簡之處也

駕鶴軒

駕鶴軒在中方半路乃金仙公主成道乘鶴昇天之處也

神姑林

神姑林在黃神谷內次東有獨坐姑姑廟其林合圍松檜數萬根禁人樵採

古栢行

古栢行晉太康九年太守魏君實來去西嶽古廟道裁栢不知其幾千根也兩傍烽堠以千字文為號禁人牧放樵採

無憂樹

無憂樹者陳希夷先生庵傍之樹也先生姓陳名搏字圖南道號扶搖先生亳州真源人也唐長興中舉進士不第因肆意山水後之華山雲臺觀古基闢荆榛而居之語人禍福若合符節後柴世宗召見留禁中月餘拜諫議大夫因辭不受賜號白雲先生至宋太宗詔方赴召服華陽巾草履垂條以賓客禮見延英殿賜坐問之久賜號希夷先生有指玄篇釣潭集超苦海詩入室還丹訣三峯寓言行於世

上方白雲宮 中方太清宮 下方

雲臺宮今即觀也 西嶽真君殿 華嶽

觀 鹿園觀 拱極觀 太平興國

觀 王母觀 仙宮觀 休糧院

巨靈神祠 蘭石院

上方中方下方此三宮皆因羽人焦道廣興

建唐玄宗天寶中命右補闕集賢學士衛包

撰修三方記西嶽真君廟崇寧年改為崇寧

萬壽觀紹興年改報恩廣孝觀阜昌年改為

迎祥觀昔司馬溫公奏天下建置五嶽真君

給賜金牌永鎮洞天福地華嶽觀漢武帝修

建後至祥符中因四高士而復興也鹿園觀

元在竹谷嶺西於大觀中因道士仇潤之請

額修建於華山之下也拱極觀宣和年修建

於嶽前社太平興國觀元在關谷內紹興年

因道士焦虛請額修建於華山之下王母觀

元在大羅峯下古有廟焉至唐貞觀中修建

華山之下仙宮觀金仙公主所居之宮乘鶴

之後勅修為仙宮觀休糧院在栢行內太平

興國年太宗紹興休糧道者赴關賜經一藏

及還山詩賜號巖靜大師有休粮詩三百章
盛傳於世蘭石院廢已久惟存巨靈神祠漢
武修建焉

拜嶽壇

拜嶽壇乃漢武帝拜祀之所也至唐太宗修
為鎮嶽靈仙寺後或名勝會院或名昭慶寺

宣澤亭

宣澤亭宋真宗拜嶽壇在太華驛之側太中
祥符四年七月二十日真宗拜嶽之所也仍
賜名為宣澤亭有御製碑龍首龍座昔為禁
地。

素靈宮

按太平廣記馬周傳華山有素靈宮有仙王
迺總天洞府及十洲三島神仙之所也

極真洞天

極真洞天按十大洞天記第一王屋山小有
洞周迴一萬里杜甫詩云萬里仇池穴潛通
小有天第四華山西玄洞周迴三千里名極
真洞天其洞中天地高大日月星辰風雲草
木與外無異惟日月停輪耀赫朗接太空乃

帝十

二十

長春之境也宮闕樓臺盡是金玉七寶所成
傍生紫林芳花玉髓金津並洞天之景也素
靈真人讚極真洞天頌曰異果奇花不可名
尋真何用到達瀛碧雲天地洞中列白玉樓
臺象外生萬壑芝蘭盤峭拔千峯嵐靄聳崢
嶸八公曾此分金液服盡全家上太清

總仙洞天

按三十六小洞天記云第一霍童山洞周迴
三千里名霍林洞天第二東嶽泰山洞周迴
三千里名蓬玄洞天第三西嶽華山洞周迴
三百里名總仙洞天素靈真人讚曰墜石為
仙號七星五門日月配玄程雲飛雨散天中
去管得林巒生異名

華山之神封金天王懿號冊

冊金天王順聖帝華山之神能興雲致雨而
西方為最貴矣軒轅黃帝遊焉以會神虞舜
望焉以觀群后爰因夏氏以迄隋室朝更五
姓載歷三千祀典相因舊章未改壇場廟宇
何代不修一禱三祀無歲而缺所以報生植
事靈神未嘗有怠也其神社休明災滯應亦

帝十

二十一

未嘗絕也神之祠在黃神谷口漢興光初遷
於官道北建立宮殿庭祀事牲器視三公之
禮焉

唐先天三年

西嶽華山誌

凝陽董真人遇仙記

帝上

祿 昭 聞 編 纂

真人家世隆安本姓木虎俗稱董氏諱守志字寬甫號凝陽子元係女直人也父故不仕母夙喪娶女奚烈氏生一男二女以祖遊宦陝右遂寓居終南山大定庚子府帖夜下揀閱軍徒後爲謀克遷隴州汧陽鎮防因家焉真人性資淳朴氣貌恢弘幼而篤孝長而異俗雖隸戎行動作云爲迥絕流輩志慕玄風而力不及行感遇正陽純陽海蟾三神仙察其累劫修行迭作間出明話前因力加點化故使抱疾拂亂其所爲有司坐是爲落軍籍真人緣此得專心於教門焉自是而後厥疾弗瘳蒙上仙分之刀圭及鍼其膏育授以鐵馬星印而使之執持降以符水藥力而俾之濟世留詩以勸誘之賜酒以慰諭之或歷試其所行或提策其不逮或下臨於菴所或相逢於道中青天白日顯然見之其遇合未有如此之拳拳也真人自遇真以來棄俗出家結庵下志往來於德順秦隴間每每自悟隨

寓行緣信從者衆請藥而藥降療病而病愈言雷而雷作禱雨而雨應出神入夢示現代人凡有起心動念者善惡必先知之發於歌頌見於詩詞出語驚人無烟火氣也真人於正隆庚辰年十二月二十八日生大定庚子隸於軍籍明昌乙卯九月一日出戍於德順州南寨十一日辰時與衆會食間忽見一神人身長八尺許頂分二髻容貌紫赤鬚鬣盛美青袍草履仗劍造門而呼曰爲汝隱於軍中故來相接何爲不出真人驚起墜於床下即時昏悶衆皆扶翼之至七日稍蘇四肢不能屈伸本寨千戶申至總押所遣官醫驗以爲癱瘓遂得長假還歸汧陽本寨求治承安丙辰三月三日未時復見神人衣白袍於門首指面大笑真人就卧榻瞻禮忽然不見因問家人曰來者神人識之否答曰不識真人謂家人今夜甚要洒掃精潔庶幾神人再降救我性命家人如其言已是月望日夜半神人復降光明如晝異香滿室立於前曰爲汝不省得此重疾特來救汝即於懷中取丹三

粒俾安三魂藥七錠俾定七魄語之曰服此蕩散一切邪氣通身如火慎勿驚怖言畢遂失所在既服丹藥病果痊愈二十七日午時神人復降真人喜而拜謝神人曰汝識鍾否真人曰識是處官觀皆有之神人笑曰汝只識撞的鍾不知聲從何來吾乃漢鍾離也爲汝累世修行有缺功行故來賜汝鐵馬可隨身執持勿得輕棄今歲運氣人多疾疫吾又賜汝法水符藥可以救人補完功行汝可每旦焚香請藥吾降藥與汝真人依其言藥果從空降下但有疾者服之必效凡請藥之際屢見神人現於空中至誠祈請之人亦有見之也真人每呪水必先自飲然後賜人治病日多飲水莫知其數人竟不能曉有緣遇之者真人必以詞示之丁丑年正旦見一異人身長面黃髮頭跣足毛連蔽體麻繩繫腰兩手扮肩仰天而行勾於市中口云只化一錢與之兩錢者則云乞兒本來只化一錢安用兩錢既得錢即指而歎曰你却有眼只爲四字教我等候一日但所化錢即以買肉將肉

并餘錢包之以紙齋至河畔以手掬沙土遂取所裹肉埋之復累土如塚栽柴一枝掛紙錢於上取棗梨獻于傍扮肩而坐俟觀者衆至指云喚棗梨你棗後怎生棗得梨後怎生梨得隨以兩手挿土至於埋肉亟力揚之口云棗梨不得直待恁麼如此行化數月時人號扮肩先生真人與先生每相會輒話修真之事凡百爲喻冀化出家真人悟其言遂云弟子願隨先生云汝未可去待你去得時我將你去真人問曰敢問法姓先生曰黃面劉師也復問何方人也先生曰解州芮城人也又問以修行之事先生索紙而題曰斬罷三尸水望向西流到揚州恁時好抽頭一言有神一神有言神言不信人不可乎言不顧形出言難追精定則氣定氣定則神住精氣神聚而不散真日用也又留頌云來也無修無形質去也無修無形質其中奪取造化機恁時方可是無爲真人深異其言先生自此別去真人每懷之八月中秋真人與衆習射相角勝負酒脯過傷故疾再作十月間隴州檄

取驗以疾篤方落軍籍不復舊隱即日肩輿徑往白坡庵所甫及半載醫藥無效季冬生辰因自責云予重嬰疾若是聖賢有譴耶何時復愈承安戊午正旦忽聞空中言曰既歸道矣敢食酒肉乎汝之疾端由乎此真人聞此語改過自誓不敢重犯至上七日午時有一先生黃面皂巾長髯布袍草履擔簦而來問曰汝所苦何疾真人告以腰膝爲患不能行履復問所患得幾時真人曰已及半載先生曰即刻鍼刺今夜子時乃愈不然則否遂扶起倚先生膝而坐遂揣穴施鍼先刺天門次及百會二鍼在合谷二鍼在湧泉鍼畢先生欲辭而去真人請姓字答曰劉止先生宿不可夜既分聞霹靂一聲真人愕然而起腰膝舒展病若拈去是夜大雪詰旦真人喜而掃雪至隣庵衆爲驚異皆知遭遇上真救療之力也承安庚申十月望日於汧陽佳庵忽遇向者神人真人急膝跪於前神人曰爲汝不能省悟吾先賜汝鐵馬今又賜汝七星寶印可作持修印馬者乃先天之物七星慧劍

也汝依法修鍊吾復提汝勿得漏泄記取取真人拜謝問神人恍然不見泰和壬戌孟冬十七日寅時忽聞空中降語云三河口相會真人倉惶趨進行至虛川澗口岸之南見二神人已坐盤石即鍾呂二仙也真人拜跪於前鍾仙曰汝身垢膩太多何不入水中洗滌真人曰唯仙又指水中一大魚曰汝能捉否真人泝流而上搏之魚竟不獲又指一大龜曰汝能登龜背否真人勉力而登亦不能得二仙撫掌笑曰汝魚龜俱不能得待汝洗淨垢膩捉得魚龜吾復提汝汝望西南覩及仰視間二仙恍然不見於是出水穿衣望空拜謝而歸既至庵中覺遍體蒸熱如此彌旬每旦沐浴於三河頓然不食自覺有得於心常默然感於仙真也癸亥年真人既入道俗眷猶存室奚烈氏親見真人遇仙異跡遂割愛始得禮師出家乙丑年仲春望日夜見鍾仙降於土室中神光射人晃然如晝長跪於前仙誨曰汝母以藥與人恐誤人性命損汝功行吾前與呂仙會於三河令汝洗垢膩捉魚龜汝悟

其旨手真人曰否仙曰垢膩者乃心垢也魚龜者乃性命也大抵修行只要除垢止念靈臺無物自得性命相守鍊成金丹脫殼飛昇邀遊仙闕汝切記取因留行藥吟其辭曰勸汝行藥兮於心無益貪救他人兮不覺自己縱然醫可兮人皆道好若是悞殺子難還累世似此行藥子可不痛哉子細尋思子經綸不識吾今勸汝子行藥勞神若不依從子永墮沉淪莫著聲色兮是非休說再勸於子子不得貪嗔亘古販骨子何時得徹惜氣養神○子固蒂深根改過歸正子舊業皆消清淨無為子與道合真受人供養子一心辦道若不進道子萬禍臨身吾今訣破子省悟記取性停命住子邀遊輕舉若不改正子一失永失依此修行子吾來提汝復取小瓢傾酒賜之既飲而冥然不省已經七日然後稍醒見土室中功德幡蓋所須之物俱為灰燼滿室異香不絕自茲厥後豁然大悟大安己已上元平旦於汧陽忽聞空中降語云汝之因緣在於德順切記切記真人亟出瞻禮了無所見

仲春二十五日至順德專誘門人盧自然出家既見與語若合符契庚午年德順卓庵仲冬七日夜色將分真人縱步前院仰觀乾象適二仙乘彩雲而過真人驚惶易衣焚香見正陽上仙青袍草履一仙面黃髯美皂巾絳服正陽手托一仙右肩立於大杏樹下霞光射目香風襲人真人拜跪正陽仙曰汝在汧陽時有扮肩先生化汝數月不省悟汝以先生為何人也真人曰當時先生云解州芮城黃面劉也正陽指而笑曰即此海蟾公也後於白坡庵有一先生與汝鍼法今汝病可亦此海蟾公也為汝前生亦是修真之士吾與海蟾亦曾提挈賜汝道號曰凝陽子法名遇真吾今與海蟾再來明話前因復賜舊號加以和光老人法名守志又教汝三共之道水火顛倒鍊金液還丹之法既濟黃芽枯水銀不飛走之訣汞鉛凝結神氣相守之道即賦詩曰金神養氣得身安汞結鉛凝合自然入聖超凡歸物外何愁不做大羅仙又曰吾曾賜汝鐵馬七星寶印汝猶未省吾今為汝言

之吾昔以劍法傳洞賓令其執以修行今傳汝鐵馬星印與洞賓一同因賦二頌云其一曰七星寶印正當權復顯光明照大千鐵馬祛邪能代劍龜蛇自是兩相纏其二曰七番提挈大愚頑鬚髮蒼浪老却賢若是蹉跎歸地府人身一失永難還海蟾仙亦留頌云前世貧人號海蟾今來說破舊因緣不因累劫修行到誰肯頻頻提挈賢又以五言長篇贈之曰吾今說大道亘古人行少要固水銀瓢勿令後偷了清淨真無為纖毫塵不擾黑雲一點無湛然明月皎開口牢藏舌六根盡除掃北海黑龜兒南山赤蛇繞洞中雪飄飄爐鼎自然造鍊成無價珍同赴蓬萊島此乃修真秘訣慎勿獨善兼汝有數子亦是前生法眷汝曾於鸞鶴山登真洞集休觀建庵號曰凝陽與通玄子陳信道為伴今谷神子馬善能等為汝之門人同作修持登真洞乃張果老仙隱通玄子即今之冰陽子陳知和也今亦付之道號法名先令盟誓而後傳法方可修行切記切記慎之戒之真人拜謝仰視二

仙復駕彩雲而升空矣於是真人復想二仙提挈前生之言忽然大省辛未年往德順遇真庵道友聞真人腹中雷鳴驚異請詩二絕以示道衆崇慶癸酉仲春二十六日與師叔陳先生歸汧陽天色昏冥黃塵障空至流江峽忽遇二仙正陽海各乘花鹿而立真人拜跪正陽曰吾先付汝修真秘訣當夜事煩恐汝不明今復提汝勸化一切男女返真歸道可煉大丹養冲和自然之氣運用真水真火汞鉛凝結烹煉成丹若不煉心定意息氣養神如何得出離輪迴之苦莫起風波休生烟火若嗔則神弱怒則氣散氣散則人亡人亡則永爲下鬼何時出期陰符經云火生於木禍發必剋茲生於國時動必潰知之修鍊謂之聖人若人發火火生則烟起烟起則不見形影暗中不覺損壞其身不可恣縱六賊三尸只要勦除獲馬屏去萬緣怕汝不信火剋金金剋木木剋土土剋水水剋火此是五行相剋之法又如金生水木生火此是地道順行即有生死只要水生金火生木此是天道

逆行豈有生死乎大抵修鍊決要養就水中金此是五行顛倒法若人見吾一面三世不墮地獄已後難見吾面切記切記若漏泄天機流傳非人殃及已身罪禍必有如遇信心之人先盟誓狀當其祖先次可傳法真人拜謝問二仙已上升矣真人復四顧仰見一仙立於峭壁松石間適師叔至真人曰山間仙人汝見之乎師叔曰不見真人祝以虔懇再拜果見仙人皂巾絳袍現於松石間風袖翩翻迤邐而去衆雖瞻拜竟不得見師復迴德順時孟夏中旬也貞佑甲戌真人從德順往汧陽九月望日起發十八日到隴州宿南關未時分忽見正陽神仙立於河上問曰汝今何往真人亟拜而答曰弟子汧陽有土堽所爲人占奪今故幹此仙曰土堽直錢耶汝性命直錢耶汝只識得土堽昧了真空著了假空汝還不省墮落頑空真人告曰何者爲真空仙曰真空者遍塞虛空不染不著一靈常在問識否真人曰不識遂以氣一噓真人頓然省悟須臾失其所在行至汧陽惶恐不已

所幹之事更不敢言論至月餘復還德順遇真庵道友張二郎等問冬至一陽初生意旨若何師以詞贈之貞佑乙亥德順王進卿請真人齋畢送師至庵天已昏黑將欲告歸真人留宿不可真人曰汝可將吾鐵馬歸樓上安奉若聞雷聲勿驚怖進卿一依師言夜坐昏睡忽然雷震震動樓屋柱礎幾拔滿家驚呼進卿不覺明燈視之進卿面上髭鬚爲火所燒家人呼起稍蘇翌日舉家具香花頂鐵馬送還庵中詳陳其事真人曰昨日雷作汝呼不省知其因乎汝樓上有一孽龍隱於樓壁掛刀中適值天雷收捉是時非吾鐵馬進卿歸而視之果見龍跡銷刀突鞘而去樓壁上爪痕尚存真人隨機顯化人莫識之也丙子年真人自洛水復還德順抵壽聖觀行至殿後松間忽遇二仙正陽海曰吾於四海之內化爲貧人口口勸人不回皆緣業障深重慳貪嫉妬作業越然奈何奈何吾有詞云日常行遊四海每日街前鬧處爲乞勾口口相違化不回暗損精神只爲凡情昧苦勸君生

死大頭奈頑愚作業貪心然不肯修真犯天戒墮落鄴都受苦無年代詞畢令真人闡化勸緣海蟾曰吾等觀見世間迷徒種種積業萬中無一覺知汝但見女男可以勸諭令入善道外修陰德內固精神若本性不昧於慾界真心自合於天道此箇幻軀假合四大何輕何愛吾亦傳汝詞云子細聽吾教誨說與門生莫把真心昧若是不除墮口債走入輪迴今世人身改髮髮蒼休得怪莫戀凡胎假合終須壞無事清閑鍊丹臺自尔純陽隨我蓬萊會真人受教畢拜謝間二仙遂失其所。在於是備云教旨訓及四方不數年教風隆盛無有不歸信也戊寅年門人盧自然等願聞印馬源流故以歌示之元光壬午仲春十二日夜及二鼓真人靜坐間忽聞空中霹靂之聲愕然而起得降語云汝之因緣已在隴地此處不可留心汝宜聽取真人出前院觀瞻了無所見癸未年隴州道友請師教化真人隨機顯現慈悲指人四方奉道者莫不忻然而仰慕者亦衆矣周圍建庵數十餘所道

風日盛宗門爲之廣大矣正大乙酉大旱久不雨隴人請師作雨真人以生靈爲心於是潛靜太虛天雨自至矣丙戌年貞元節謂門人曰我數四教指汝等生死事大辦道修真汝等於十二時中無一時在道受了十方供養虛度時光向前還他口債受苦如何當得但起意動念須要合於天心過去一切好人皆是福緣廣大自能感動天地神明大抵修行積功累行鍊性成真休歇無事萬緣不染真清真淨神氣冲和性命自然相守大丹自然凝結功成行滿聖賢自然接引汝等共我同伴能得幾時衆皆憂懼禮謝而退丁亥十月旦日揭庵名爲養浩二十三日至二十五日祥雲覆庵霹靂數四異香滿空人悉見聞焚香請曰此何故也真人曰祖師邀我赴蓬萊之會吾將歸矣我昔遇正陽上山時賜我印馬令我修行今將鐵馬付盧自然七星寶印付馬善能二人與我立教可爲師牧與我當日傳法一同不得輕泄懈怠自然等告白素無功行不敢當克辭讓再四真人見不受

威形於色目光射人衆皆驚怖真人曰不以我教門爲念輒相違拒二人悲泣不獲已而祇受真人呼衆門人即令拜靈陽子谷神子後遂索水浴既訖索衣真人曰不須綿絹厚服但布素單衣即可皆曰冬寒奈單衿何真人曰我來時著甚來遂服單衣坐而良久索筆留三頌其一曰陸地一法船舉棹數十年船棹都撇下我命不由天其二曰我有聚神法真火鍊丹砂無形亦無心認得祖阿麻其三曰通神變化造物無窮我命由我天地難籠頌畢囑門人曰待我歸後宜附隴下而已言訖正未刻儼然而化矣時丁亥十月二十五登真之後遭時多故藁葬於低村養浩庵越十二載戊戌門人靈陽子盧自然等歎日月之如流痛音容之愈遠遂自秦度隴權爲移殯親造墳庵彷徨瞻禮觀塚之北崖石上有瑞草一株狀若紫芝枝葉如蓋蒼密蔓延蔽覆墳土命衆開穴有聲如雷挽紼舉棺啓而視之顏貌如生周身之衣芒霜如雪異香質鼻周衣之棺奇花異草如刻如畫衆皆讚

歎不已翌日扶輿挽輓葬于隴底龜山之下時首夏十有三日也真人資稟不凡夙性穎悟真神仙中人也既獲三聖口傳而面命脫馳馬試劍之習而為修真鍊行之歸離抗塵走俗之形而為超凡入聖之舉向也不識之無今也筆則成書向也未嘗學問今也言則成文命意高絕於古今措詞暗合於聲韻雖博學多識文人才士有所不逮蓋其造詣極深修行極至聖賢不期而自佑詞章不學而自得宜與夫窺陳編以盜竊者大有逕庭矣門人靈陽子等親炙日久聞見日多得師流傳遺文詩詞歌頌總四篇為上中下三卷目曰和光集不敢自私刻梓以傳於世別集真人出處遇真紀年一帙曰遇仙記尚庶幾真人昇仙證道之源流垂世立教之本末開卷而瞭然也故為之記

凝陽董真人遇仙記

諸師真誥

元始至尊號

鳥一

志心歸命禮三界之上梵炁彌羅上極無上天中之天鬱羅蕭臺玉山上帝渺渺金闕森羅淖泓玄元一炁混沌之先寶珠之中玄之又玄開明三景化生諸天億萬天真無鞅數眾旋斗歷箕回度五常巍巍大範萬道之宗大羅玉清虛无自然至真妙道元始天尊

上清號

志心歸命禮居上清境號靈寶君祖劫化生九萬九千餘梵炁赤書煥發六百六十八真文因混沌赤文而開九霄紀元洞玉曆而分五劫天經地緯巍乎造化之宗樞陰機陽卓爾雷霆之祖大悲大願大聖大慈玉宸道君靈寶天尊

泰清號

志心歸命禮隨方設教歷劫度人為皇者師帝者師王者師假名易號立天之道地之道人之道隱聖顯凡總千二百之官君包萬億重之梵炁化行今古著道德凡五千言主握

陰陽命雷電用九五數大悲大願大聖大慈太上老君道德天尊

彌羅號

志心歸命禮彌羅無上天妙有玄真境渺渺紫金闕太微玉清宮無極無上聖無無復光明寂寂浩無宗玄範總十方湛寂真常道恢漠大神通蒼蒼真老妙圓清靜智慧辯才至道至尊三界師混元祖無能聖主四生慈父高天上聖大慈仁者十號圓滿萬德周身無量度人拔生死苦諸佛之師眾聖之王太上開天執符御曆含真體道金闕雲宮九穹歷御萬道無為大通明殿昊天玉皇大天尊玄穹高上帝

天皇號

志心歸命禮紫微宸極勾陳天宮九光寶苑之中五炁玄都之上體元皇而佐司玄化總兩極而共理三才主持兵革之權衡廣推大德統御星辰之躔次毋失常經上象巍巍真元恢漠大悲大願大聖大慈勾陳上官天皇上帝

星主號

志心歸命禮大羅天闕紫微星宮尊居北極之高位正中天之上佛號金輪熾盛道稱玉斗玄尊璇璣玉衡齊七政總天經地緯日月星宿約四時行黃道紫垣萬象宗師諸天統御大悲大願大聖大慈萬星教主無極元皇中天紫微北極大帝

后土號

志心歸命禮九華玉闕七寶皇房承天稟命之期主陰執陽之柄道推尊而含弘光大德數蓄於柔順利貞效法昊天根本育坤元之美流形品物生成施母道之仁嶽瀆是依山川咸伏大悲大願大聖大慈承天效法后土皇地祇

神霄號

志心歸命禮高上神霄府凝神煥照官會元始祖炁以分真應妙道虛無而開化位乎九霄之上統理諸天總乎十極之中宰制萬化宣金符而垂光濟苦施惠澤而覆育兆民恩溥乾元仁敷浩劫大悲大願大聖大慈玉清

真王南極長生大帝統天元聖天尊

救苦號

志心歸命禮青華長樂界東極妙嚴宮七寶芳霽林九色蓮花座萬真環拱內百億瑞光中上清靈寶尊應化玄元始浩劫垂慈濟大千甘露門妙道真身紫金瑞相隨機赴感誓願無邊大聖大慈大悲大願十方化號普度衆生億億劫中度人無量尋聲赴感太一救苦天尊青玄上帝

可韓號

志心歸命禮高上丹霄鍊元上府朱宮絳闕毓神光於浩劫之家寶木霽林現瑞相於太清之境運大化慈悲之造降真精素籙之機削死上生廣天地一元之德陶魂鑄魄回幽靈萬類之生煥發陽明普疏陰境大悲大願大聖大慈九天青城可韓丈人朱陵度命天尊

普化號

志心歸命禮九天應元府無上玉清王化形而滿十方談道而趺九鳳三十六天之上闕

寶笈考璣書千五百劫之先位正真權大化

手舉金杵如意宣說玉樞寶經不順化作微塵發號疾如風火以清淨心而弘大願以智慧力而伏諸魔總司五雷運心三界羣生父萬靈師大聖大慈至皇至道九天應元雷聲普化天尊

雷祖號

志心歸命禮高上玉霄府雷霆洞淵宮三境分真九天演化光會大羅之表神通浩渺之天拯水旱於下方祛蟲蝗於歷劫發弘誓願利濟衆生大聖大慈大悲大願九天雷祖大帝除災濟物天尊

太一號

志心歸命禮高上琅霄府紫微碧玉宮光煥鬱蕭真擬太極發妙炁於金闕烜大化於混茫回溥風於澆漓之餘保制劫運恢利澤於寰宇之表陶育黔黎大聖大慈大悲大願上清紫微碧玉宮太一天帝保制劫運天尊

洞淵號

志心歸命禮高上太霄境六天洞淵宮瑞相

端嚴現光明於碧落之境真身廣博救妙澤
於種民之天遏五府之魔靈蕩萬方之瘴癘
躋民生於仁壽撫治化於希夷大悲大願大
聖大慈六天洞淵大帝伏魔上上太一天尊

六波號

志心歸命禮紫霄上境六波天宮妙相光明
現慈顏於天一宸居寥廓施福惠於人寰捍
浩渺之洪災濟災威之回祿陶鑄萬彙綜理
一元大聖大悲大願六波天主帝君普
施法潤天尊

採訪號

志心歸命禮紫霄景曜府九天保運宮至道
分光總十方之梵炁真常顯妙回浩劫之澆
風采錄諸天紀善功而消惡籍恩融萬化標
祿字而上生名大聖大悲大願九天採
訪朱陵上帝應元保運妙化天尊

斗母號

志心歸命禮西天竺國大智光中真空妙相
法王師無上玄元天母主金光燦燦日月潛
輝寶杵旋時鬼神失色顯靈蹤於塵世衛聖

駕於閭浮衆生有難若稱名大士尋聲來救
苦大悲大願大聖大悲聖德巨光天后摩利
支天大聖

三官誥

唯三聖人乃一太極晉受浩劫家之命鼎曆
無量品之褒崇微清虛洞陰總領功過賜福
赦罪解厄傳濟存亡道冠諸天恩覃三界大
悲大願大聖大悲三元三品三官大帝三官
九府應感天尊

火官誥

四元四品考較火官運扶乾健德合離明居
太陽丹天之中統左府注生之籍盛德在火
炎帝持衡功參佐於三元氣運行於四月駕
赤龍而行南陸照明熒感之宮燭朱陵而顯
丹臺煥赫文昌之府輝輝朗耀炳炳照臨大
悲大願大聖大悲赤皇上品三炁火官炎帝
真君洞陽大帝南丹紀壽天尊

玄天誥

混元六天傳法教主修真得道濟度羣迷普
爲衆生消除災障八十二化三界祖師大慈

大悲救苦救難三元都部署九天遊奕使左
天罡北極右垣大將軍鎮天助順真武靈應
福德衍慶仁慈正烈協運真君治世福神玉
虛師相玄天上帝金闕化身蕩魔終劫濟苦
天尊

祖天師誥

本來南土上沔蜀都先獲黃帝九鼎之丹書
後事老君兩度於玉局千軸得修行之要一
時成吐納之功法錄全成受盟威品而結璘
訣正邪兩辯奪福庭治而化鹹泉德就大丹
道齊七政大悲大願大聖大悲三天扶教輔
玄體道大法天師雷霆都省泰玄上相都天
大法主正一沖玄神化靜應顯佑真君六合
無窮高明大帝降魔護道天尊

路祖師誥

誕生漢室錫號晉朝惟布悉以降邪曾吞虎
而救世管玉霄洞真之法傳玄室內教之經
掌書府刑行都督府便宜之事授天師職昇
紫微天右相之班判保陽宮主混元教大悲
大願大聖大悲真元清皇上帝太虛普惠真

君九天寶冊司命天尊

魏祖誥

元皇演化妙有真身光明滿月現慈容清靜
玄風開正教道尊聖祖德重醫王主三界之
雷霆校羣生之祿籍祖師大慈仁者宸照法
王南嶽總仙上真九天司命金闕上保高元
清真紫虛元君

仙公誥

天台得道閣阜成真昔受東華復傳西蜀詔
命玉京金闕位登太極仙班慈憐拯拔於沈
淪○思念普資於苦爽萬天氏遺風顯著勾漏
今丹砂具存括蒼任遊羅浮乃止脩闢玉笥
修理金書大悲大願大聖大慈太上玉京東
吳太極左宮仙公雷霆玄省天機內相玉虛
紫靈普化玄靜常道冲應孚佑真君奎恩廣
救慈悲大帝度人無量天尊

真君誥

混元始祖一炁分真多劫之前積修至道勤
苦備悉經緯逾深萬法千門罔不斯歷救災
拔難除害湯妖功濟生靈名高王籍衆真推

仰宜有甄陞大悲大願大孝大仁九州都仙

太史高明大使雷霆奉省天樞伏魔上相至
道玄應神功妙濟掌九天司職太一定命注
生真君三天按察都檢校普奏諫議大夫天
醫大帝度人祖師淨明普化天尊

華蓋誥

玉清高聖虛皇至真混元仙主應化分靈合
真體道功行圓成驅雷役電福國康民輔佐
忠孝滅罪延齡華蓋祖師人天教主金書雷
霆三省上相金闕大仙孚佑顯靈超應護國
真君九天掌祿上卿高玄上帝妙道教主三
五飛步正佑妙靈冲應太虛真君南極注生
仙卿玄明上帝克誠教主九一上清顯佑感
靈誠應妙遠真君北極考校仙卿大明上帝
三境化身天尊

梓潼誥

不驕帝境玉真慶宮現九十八化之行藏顯
億千萬種之神異飛鸞開化於在在如意救
劫以生生至孝至仁功存予儒道釋教不驕
不樂職盡乎天地水官功德難量威靈莫測

大悲大願大聖大慈九天輔元開化主宰司
祿職貢舉真君七曲靈應保德弘仁大帝談
經演教消劫行化更生永命天尊

三茅真君誥

天人道德仙聖真師孝悌通於神明恩澤被
於家國隱恒山而悟道棲句曲以昇天主岱
宗恒霍之山職赤城華陽之洞劫運陰陽而
統轄雷霆水澤以兼司接二弟之英資授登
真之祕訣咸領神仙之籍共膺玉冊之榮德
博幽明仁霑普率隨機赴感誓願弘深太元
妙道冲虛聖佑真應真君地仙上真定錄右
禁冲靜德佑妙應真君地仙至真三官保命
冲惠仁佑神應真君九天司命三茅應化天
尊

麻姑元君誥

圓通湛寂定應慈仁崑崙山示現妙身青城
洞光顯聖迹過吳度蔡善應誠而感通擲米
成丹常遊戲而變化總領羣仙之上包羅萬
彙之中鍊體九和超功十極大悲大願大聖
大慈麻姑真寂冲應仁佑妙濟元君

洪崖仙伯誥

一炁分真五行毓質作上古神農之師表受
二儀靈寶之真機常示現於晉唐每垂光於
今昔跨雲精於西嶺劃長嘯於開元音動宸
旗清絕湛露之殿法傳羽褐綿洪道日之輝
澤被寰區恩周普率大悲大願大孝大仁洪
崖先生青城仙伯淨明經師應化真君

全真五祖誥

大道開先玄元闡化教垂今古示號東華接
漢室之將軍隱終南而仙契過化每超於劫
運示現常在於人案啓唐朝之英賢悟神仙
之秘訣飛劍貨藥警化無方金廷丞相之高
標寶印力辭之勇決霞裾上步南北統宗天
復挺於人豪道遍通於四海發金蓮之七朵
演仙派於十方長生理被於今玄妙天垂
於率土恢弘至道廣度愚迷全真祖師東華
紫府輔玄立極大道帝君正陽開悟傳道垂
極帝君純陽演正警化孚佑帝君海蟾明悟
弘道純佑帝君重陽全真開化輔極帝君五
祖闡道天專

祖元君誥

元始化炁清微正宗廣大高明悟心全於道
體剛健純粹生性稟於神靈致雷震於無為
之中包天地於有象之外上極無上會四派
之真源玄之又玄參三乘之妙義闡揚大教
利濟羣生洞照官中清微師祖元上侍宸金
闕昭凝妙道係仙通化一輝元君

北七真誥

道先一氣世顯七真悟五行不到之言得九
轉返還之訣甘泉潤物變朽回春金國仙姿
得四言而契道衡州變化坐十載以成真壁
間墨迹之非凡雪竹月松之姿異二井有多
生之記一時著顯化之功礪礪六年龍門七
載道功備而名聞時主丹符錫而掌握神仙
石上談玄空中飛蓋元主屢宣而問道甘霖
剋日以濟民養窮易道之言晚造神仙之訣
卦圖斯演至道大成清靜散人探玄得道蓬
萊仙路億劫獨持慈悲濟苦全真祖師丹陽
抱一無為普化真君長真與神玄靜慈德真
君長生輔化宋玄明德真君長春金德神化

明應主教真君玉陽體玄廣慈普度真君太
古廣寧通玄妙極真君清靜淵真玄虛順化
元君七真演化天專

南五祖誥

明真證道行化南天九皇降迹於天台一脉
浚通於劉祖采瓊花之仙異著悟真之丹書
道付杏林不日還元之篇集法通難足于焉
丹髓之書成真入挺出惠州性地悟超神俊
力圭入口神化無邊施雷雨於掌中甦民生
於世外德彰南海獲瓊玉之英標道徧遐荒
飲法言之靈妙龍虎浮羅之迹武夷玉隆之
區過化多方真文備著為神仙之首冠集前
代之範模著願弘深慈慈仁聖祖師悟真紫
陽真人杏林翠玄真人道光紫賢真人泥丸
翠虛真人瓊瑤紫清真人

虛靖天師誥

白雪丹消黃芽舊積文章星斗老君授三五
飛步之玄玉局錄符漢祖傳正一新邪之旨
于以登名於紫府于以掌握於雷霆伐疵癘
於青城滅妖氛於下界蕤蕤蕩蕩妙玄玄

去太極登紫微聚三華朝五炁隨機格物開
邪存神祖師三十代天師虛靖冲弘悟道真
君玄風演化天尊

侍宸誥

高上神霄玉清雷府光分一炁鍾秀君峯道
運五行侍宸徽廟掌中雷雨救旱消災指顧
陰晴安邦護國功齊億劫教法祖師德濟羣
迷衆生慈父冲虛通妙靈慧真君

雷真人誥

高上神霄府玄都執法尊演教大真人玉帝
侍御史九天都糾察闡教慈父濟世真師提
點三界統攝萬靈瓊都上相混元妙道普濟
真君雷聲演教天尊

辛天君誥

高上碧霄上清華王東極注生青華大帝南
昌火府通明猛吏陽晶鍊度執法真人分權
定衡真王玄都玉府太極先天冲玄上吏太
乙木郎先天都元帥九天考較使司元儲福
定命真君鐵筆注律大神光寂通天演法大
元帥掌風雲雷雨電霜雪電銀牙耀目提點

三界三十六天雷霆大都督青帝天君元始
一炁節制萬靈太乙五雷判府天尊

鄧天君誥

高上神霄玉清真王南極長生朱陵大帝太
陽九龍皇君南昌上宮受鍊真人至真霹靂
大仙玄都九疑九夷蓬萊滄水使者上清三
境都元帥九天採訪使應元保運妙化真君
欽火律令大神光妙橫天演真大元帥掌行
風催雨誅邪破廟祛諸譚洞總統三元八十
一天雷霆都總管炎帝天君元始祖劫一炁
分真太一雷聲普化天尊

張天君誥

高上神霄玉清真王南極保生洞陰大帝賜
谷神君清都律令蓬萊都水使九天採訪大
元帥統攝三十三天雷霆都總管掌雷雲電
雨部玉府持奏禦魔天君校籍三界洞淵真
宰誅滅五逆賞善罰惡使者飛捷報應真君
元始一炁宰御萬靈太乙五雷廣應天尊

趙元帥誥

靈通丕演聖德昭彰凝形於大梵之初顯化

乎無窮之世持鞭提索馭虎降魔飛行三界
鬼神驚呼吸一聲天地振威光景朗無願而
弗從玄鑑靈明有求而皆應救生靈疾苦保
家國安寧贊揚道法以無窮靈鎮玄風於永
劫大悲大願大聖大慈扶天廣聖如意冲和
大神君

諸師真誥終

金錄齋三洞讚詠儀卷上

宋太宗皇帝御製

鳥二

步虛詞十首

通奉太子中書侍郎兼御史大夫知樞密院事宋太宗皇帝御製

清靜建金壇 無爲大道理 歸依玉帝前

稽首求宗旨 發詠藝名香 一心專不已

願同四海知 萬億神仙子 悟即杳冥中

玄談皆彼此 真人受命時 覺者有終始

象外好優游 愚情生謗毀 羽蓋駕青龍

行徧八方水 右一

天尊馭六龍 百萬神仙騎 雲起自逍遙

五音皆鼓吹 瑤桃爛熱時 七寶林中賜

白鳳集千羣 雪身排玉翅 華嚴如意珠

聖化不思議 師子善非常 華胥妙法智

凡愚有道心 慧眼眾生施 無限小兒童

藥宮深殿戲 右二

玉籙受經師 科儀尊上帝 頌聲世界中

道業心相濟 靈寶度衆生 丹丘雲雨翳

虛無入太清 白鶴聲嘹唳 百谷盡朝宗

煙霞全美麗 器塵自不迷 秘要門開閉

洞府最深嚴 神仙無繫綴 天高似掌平

一一皆精細 右三

上帝化無窮 仙居紫府位 信心杳若空

稽首拜天地 晴霽布星羅 真門持不二

十州散雨花 五福真人秘 符瑞表其恭

戰兢擊寶器 善哉諸法師 祈福來凡意

功行滿三千 心緣勿退志 歸依大道君

一切靈官記 右四

仙集會玄都 法輪常轉處 持齋振寶鈴

冬夏無寒暑 絳節藥珠宮 瀛洲臨遠渚

天尊侍立人 崇道絕私語 妙入大乘經

六情皆盡去 默然念在心 澹泊勿疑阻

月皎盛明時 清娥播玉杵 叩鐘雅調音

鍊質容相許 右五

天上典人間 黃衣受玉籙 經開道眼明

持念果成速 若遇邪魔臨 灰心似草木

丹田是命根 俯仰皆生福 鶴骨爲餐霞

修行如野鹿 三才鬱茂中 執卷但勤讀

太一及星官 康民無反覆 還淳務實時

四序長盈縮 右六

慕道要歸真 知非求得一 先須修鍊心

甚好變凡質 禮懺用精專 登壇明似日

六丁驅使易 去住如風疾 念呪與神符

邪魔無縱逸 青詞奏表章 善惡包凶吉

元始諸天尊 聖言分甲乙 香燈及醮茶

喫弄神刀筆 右七

七寶瑤瑤宮 飛符排絳節 玉京鎮十方

衆真頌真訣 天地杳冥中 景雲浮不絕

太仙跨鶴遊 齋醮清嚴潔 詠讚亦非常

長生無隕滅 上帝伏魔王 執事皆賢哲

下察向黎民 靈官爲等列 香華從輩時

揚教動喉舌 右八

寶鐸振鑾鳴 諸仙相聚集 較量高下時

浮淺不能入 旋遶如意珠 破壞善修葺

玉皇朝謁前 真人傍侍立 步虛聽自然

仰望華胥邑 駕鶴與乘龍 祥光起熠熠

三千功行來 壺有大丹粒 玄都鎮八方

臨壇皆翳鬱 清風發播揚 養命存虛吸

日月五星明 公平鑒善惡 三官五帝君

右九

億萬周遊樂 法雨從行時 乘雲與駕鶴
如意一顧身 所化化城郭 馥郁香冥中
真宗皆澹泊 九天利物多 寶林葉交錯
象教福人間 仙花開紫萼 剛柔轉智輪
大道心依託 右十

白鶴讚一十首

白鶴凝霜一頂紅 常隨瑞落香冥中 三清好
是逍遙處 天上人間事不同 右一
白鶴生來羽翼鮮 一聲高唳玉皇前 虛無境
裏飛翔異 去住人稀到九天 右二
白鶴希奇瑩月華 雪毛翳日懸朝霞 神仙抱
向長生殿 踈羽飛騰出絳紗 右三
白鶴非凡迥不同 人間描在畫幀中 桃花結
子千年實 自在優遊萬里空 右四
白鶴雲中朝太清 玉童高送鳳池鳴 常教樓
宿塔挑下三島真人畫不成 右五
白鶴毛歌夜月圓 高飛來至步虛前 仙壇綽
節霓裳舞太一 真人福壽年 右六
白鶴靈禽與壽年 生教常得羽毛鮮 五雲自
有千峰嶂 紫蓋巖巖海上仙 右七

白鶴銜丹羽翼輕 玉皇常使混三清 崑崙來
去飛閑暇 五色雲中萬里程 右八

白鶴朱紅一頂深 鈞天似聽沃羣心 常隨羽
客遊人世 碧玉桃花萬丈尋 右九

白鶴山高第九層 毛衣潔淨夢春冰 化人宮

室諸天遠雲翼靈飛大道稱 右十

太清樂二十首

太清樂太清樂太清樂 虔以道遠太清樂 紫
微瑞色駕青龍 太清樂玉籙香殘夜奏封 太
清樂羽蓋雲中皆縹緲 太清樂霓裳一舞貌
思恭太清樂太清樂 右一
精誠大道動幽元 太清樂天地常存不死仙
太清樂象外不同人 世界太清樂衆生願福
太平年太清樂太清樂 右二
帝星明耀斗星魁 太清樂絳闕雲浮夜醮臺
太清樂七寶山高樓白鳳 太清樂瓊樓十二
月中來太清樂太清樂 右三
仙官朝會儼珠旒 太清樂素月當天運九秋
太清樂方丈雲輶闕玉關 太清樂鸞鶴瞻望
殿依樓太清樂太清樂 右四

焚香夜啓醮仙壇 太清樂麗景遲遲柳拂煙

太清樂天上星繁光溢目 太清樂真人似降

步虛前太清樂太清樂 右五

黃衣受籙用心勞 太清樂法事壇前夜佩刀

太清樂修鍊但教祛俗態 太清樂瀛洲仙境

不爭高大清樂太清樂 右六

秋風入律正凄清 太清樂道法邪魔振鐸鈴

太清樂恬澹虛無真可重 太清樂科儀次第

夜堪聽太清樂太清樂 右七

遙天薄暮景雲連 太清樂一軸青詞月下文

太清樂四氣調來思長養 太清樂仙壇夜醮

紫微君太清樂太清樂 右八

時來樂道正熙熙 太清樂八極靈仙是我師

太清樂太一真人臨土宇 太清樂蟠桃枝下

屬文詞太清樂太清樂 右九

風清恬澹夜焚香 太清樂光景如流四序長

太清樂瑞氣浮空何快意 太清樂醮茶不敢

預先嘗太清樂太清樂 右十

九天無間運三清 太清樂夜月寒光海上明

太清樂紫府洞中堪眷戀 太清樂步虛啓唱

一聲聲太清樂太清樂 右十一

夜壇移燭似流星太清樂駕鶴乘龍羽蓋輕

太清樂勢猶雲端成絳闕太清樂十洲花好

洞中明太清樂太清樂 右十二

步虛文好思無窮太清樂姑射逍遙夜境中

太清樂龍闕降祥天畔出太清樂韶音遠聽

貫心聰太清樂太清樂 右十三

天仗門開闕帝閣太清樂登壇玉錄受經文

太清樂豁訝洞府吞祥氣太清樂王母追遊

駕五雲太清樂太清樂 右十四

玉皇下視九天清太清樂仰望層霄一炷馨

太清樂勝境幽奇千萬億太清樂延年字字

受丹經太清樂太清樂 右十五

上方章奏起清編太清樂道士科儀事業專

太清樂玉燭調來雲霞變太清樂丹丘遊歷

莫知年太清樂太清樂 右十六

奇絕文通妙入神太清樂凝情瑞雪片紛紛

太清樂玉華殿裏排章奏太清樂月滿楹庭

擁白雲太清樂太清樂 右十七

寶閣香飄遠殿樞太清樂帝城綠葉士民居

太清樂天真可愛遙空裏太清樂子育黎元

盡樂胥太清樂太清樂 右十八

大象星羅混太清太清樂五千言道世長生

太清樂神仙來往雲霞麗太清樂白鳳經天

自有程太清樂太清樂 右十九

一聲鶴唳九霄中太清樂王母行天閬苑風

太清樂幾許仙人來侍從太清樂肅心清潔

盡微躬太清樂太清樂 右二十

金錄齋三洞讚詠儀卷上

金錄齋三洞讚詠儀卷中

島三

宋真宗皇帝御製

步虛詞一十首

步虛詞一十首

步虛詞一十首

銅渾春律至 玉闕曉煙披 吉夢通天意

靈文表帝期 奉符成鉅典 胥宇報純禧

克布蒸民祐 應諧百福宜 右一

錫符瞻絳闕 揆日會彤庭 迎導森容衛

黃威聲典刑 氤氲流協氣 格輝奏祥經

苾苾修嘉薦 祗祗達香冥 右二

將議元封禮 期觀上帝心 清都雲杳杳

丹禁漏沈沈 先覺迴飈馭 遵期錫玉音

喬封成紀號 虔章倍欽欽 右三

上封初歲事 吉夢復通真 玉檢功成近

龜書錫祐臻 靈丘揚典禮 恭館答威神

介祉從穹昊 流祥及下民 右四

岱嶽琅函至 神州藻仗迎 流金爽氣散

觸石慶雲生 喜見傾都意 歡聞戴路聲

華簪皆仰望 仙羽表殊清 右五

神皋求爽塏 珍館法園清 鴻應流無極

玉功見有成 發祥開茂緒 介祉佑羣生
億兆觀宏壯 虔恭意倍傾 右六

夕夢通中禁 仙游降上蒼 鴻源昭濟發
丕曆協無疆 報況虔心積 儲休瑞命昌
慶雲知不竭 億載保咸康 右七

福地求清界 良金範粹儀 中霄聞聖訓
遠古啓昌期 累洽彰敷祐 精衷報錫禧
乾乾瞻肖像 簡簡茂丕基 右八

築宮成壯麗 邱匠極精微 層閣形疑湧
虛簷勢若飛 寶龜生綠氈 畫棟見靈輝
欽奉求多福 常期惠九圍 右九

窈窕門扃啓 崢嶸殿宇開 雲低龍影度
風靜鶴音來 金簡藏三洞 飄車溱九垓
何煩言閤苑 即此是龜臺 右十

玉清樂一十首

玉清樂玉清聖境異諸天 玉清樂五門高敞
在雲中玉清樂知與三天路閣通玉清樂絳
節參差疑瑞日玉清樂同音縹緲引和風玉
清樂玉清樂 右一
祕殿岩峩象玉虛玉清樂騰遊臨墜福祥敷

玉清樂百神設衛尊靈命 玉清樂億載延禧
佑帝圖玉清樂玉清樂 右二

千八高高薄紫煙 玉清樂望中隱隱見靈仙
玉清樂上藏玉宇昭丕貺 玉清樂下佑璿圖
保億年玉清樂玉清樂 右三

宏構巍巍如嶽峙 玉清樂層軒弄弄狀羣飛
玉清樂上清降治流鴻福 玉清樂下土祈禱
仰烈輝玉清樂玉清樂 右四

畫棟華棟臨福地 玉清樂琅函金簡秘仙經
玉清樂民風永使臻清靜 玉清樂帝緒常期
奉慶靈玉清樂玉清樂 右五

虛廊顯敞列丹青 玉清樂萬葉森然罔遁形
玉清樂已按玉書圖隱景 玉清樂更舉寶應
載祥經玉清樂玉清樂 右六

三尺齋壇碧玉成 玉清樂五更醮席對繁星
玉清樂靈儀祗率遵三洞 玉清樂景福咸臻
保萬齡玉清樂玉清樂 右七

萬壽無疆期景貺 玉清樂百靈咸秩表虔心
玉清樂蕭蕭午夜思昭格 玉清樂歛駕層霄
想降臨玉清樂玉清樂 右八

臺號通天閭漢氏 玉清樂閣名降聖想唐時
玉清樂豈將往古矜宏壯 玉清樂但冀蒸民
受福禧玉清樂玉清樂 右九

測影神臯求吉地 玉清樂僞工剛日建宏規
玉清樂烝黎受福應無算 玉清樂宵旰延祥
悉在茲玉清樂玉清樂 右十

太清樂一十首
太清樂太清樂太清何處以逍遙太清樂寶
籙凝祥下玉虛太清樂靈心敷祐屬瑤圖太
清樂肇開恭館揚丕祐太清樂永祕琅函在

上都太清樂太清樂 右一
金繩揆日將成禮太清樂玉宇遵期復降靈
太清樂緬法園方營壯麗太清樂仰延庭欵
答高明太清樂太清樂 右二

仙官協夢告靈期太清樂真馭排雲下禁闈
太清樂鴻緒發源聞錫羨太清樂珠宮報貺
務寅威太清樂太清樂 右三

貢金在治鎔天表太清樂離衛導塗展國經
太清樂邃古發祥成茂緒太清樂億年恭已
奉鴻靈太清樂太清樂 右四

珍符錫祐彰垂裕太清樂秘宇成功答降祥
太清樂勵翼宣曾忘夙夜太清樂誠明常冀
達穹蒼太清樂太清樂 右五

蕊芬清夜列皇闈太清樂星斗煒煒瑞氣滋
太清樂玉酒更無餘瀝在太清樂應車默有

降臨期太清樂太清樂 右六

顯澈層楹奉帝期太清樂森羅珍果備鴻儀

太清樂芳馨徧享彰來格太清樂感應冥通

見錫禧太清樂太清樂 右七

天柱喬峯藏瑞石太清樂道林開土著微辭

太清樂真宗潛發形先覺太清樂丕曆延洪

示後期太清樂太清樂 右八

昊穹降鑒顯鴻威太清樂方冊披文敘烈輝

太清樂瑞日德星常並照太清樂商雲協氣

每交飛太清樂太清樂 右九

方地效祥羣寶日太清樂靈芝摧秀瑞尤多

太清樂已占共額符多稼太清樂更有交柯

協至和太清樂太清樂 右十

白鶴讚一十首

舉嬉瑞羽出青田望以霜華編繞天人世不

知空仰嘆靜思應是洞中仙 右一

仙姿相續呈祥至瑞典徐觀自古同方信揚

音清蹕內運同矯翼燎煙中 右二

霜翎高逐祥風勢朱頂低浮瑞日輝爲顯靈

心來表瑞前迎秘錄每羣飛 右三

八景戒期登秘宇九清敷佑協祥經曾雲頤

頤瞻仙羽暴日徘徊在福庭 右四

五金鎔範粹儀成千里森羅藻衛行應有靈

仙來述職化爲珍羽蔽空迎 右五

福地將興靈籙功人心祇慄夙宵同忽觀淬

羽丹青色飛上瑤壇煙霧中 右六

良治將期觀粹容應壇先事禱神功豈期嘉

薦當中夜忽有仙音在半空 右七

舳艫相接濟洪川萬目叢觀意惕然因見靈

潮來巨壑益知降祉自高天 右八

寶艦乘流近帝都應龍表瑞見全軀不隨翁

鬱飛雲去常與輝煌藻衛俱 右九

鴻淵極目接蒼煙巨艦揚帆獨晏然不獨陽

侯收駭浪更觀等覺見金田 右十

散花詞一十首

玉宇千門啓金爐百和然 芬芳盈法座

祇標待羣仙 右一

天上春常在花開不計時 瑤壇露瑞露

芳氣更蕃滋 右二

仙葩色最紅望與火雲同 爲問生何處

瀛洲清景中 右三

仙花不記名百步有芳馨 華席開清醴

飈車降紫庭 右四

洞中春不歇常有百花香 攀折來瑤席

芬芳徧道場 右五

禁苑花齊發人間第一芳 雕盤和湛露

蘭殿奉虛皇 右六

非剪亦非栽先春曉夕開 爲迎真馭至

常有好風催 右七

散花花不盡徧在玉清中 還似卿雲起

紛紛連碧空 右八

空裏花無際元生玉帝宮 只來臨靖館

不去逐和風 右九

此花顏色異片片綺霞飛 散布瑤壇上

徧露羽客衣 右十

又散花詞七言一十首

散花何處最花多 天上高天有大羅
花在此中生本異 況將瑞露慶雲和

右一

崑丘絕頂有龜臺 臺上奇花四序開
不是羣仙朝玉帝 何由散到世間來

右二

天上天花旦夕開 不同人世待春來
天花無有天人折 將獻層城日幾回

右三

瑤臺半夜露華滋 月帳朝真在此時
時有仙花空裏降 吹來玉宇奉金姿

右四

五色奇葩降洞天 仰觀空裏勢翩翩
莫言仙境常時有 動是人寰億萬年

右五

仙花折得自仙宮 散在珍臺曉景中
玉闕有春春不老 璿圖受福福無窮

右六

羽客驂鸞在半天 下瞻珍館意乾乾

蓬萊折得花無數 散在殊庭黼座前

右七

上林花卉先春發 幽谷鶯聲尚未知
不遣常人攀折得 盡將福地奉真期

右八

洞中三十六天春 仙境由來異世人
採得名花何處去 將來宮館奉高真

右九

仙官真侶往還頻 去看蓬山閬苑春
每採芳華朝上帝 願均福佑及生民

右十

金錄齋三洞讚詠儀卷中

金錄齋三洞讚詠儀卷下

宋徽宗皇帝御製

鳥四

玉清樂一十首

地居天上接空居 玉清樂萬衆森羅通八區

玉清樂功用不知誰主宰 玉清樂絳霞丹霧

闕清都玉清樂二清樂 右一

碧落空歌黍米珠 玉清樂十方勃勃入無餘

玉清樂聞經慶喜難言說 玉清樂九色龍騰

八景興玉清樂玉清樂 右二

羽童呼吸辟非煙 玉清樂煙氣徘徊綠室前

玉清樂造化不從身外得 玉清樂自根本

即三天玉清樂玉清樂 右三

帝景相將會玉洲 玉清樂明真層觀紫雲浮

玉清樂掣開三八黃金鎖 玉清樂無極虛皇

在上頭玉清樂玉清樂 右四

白玉飛符下紫庭 玉清樂華禧三舉召羣靈

玉清樂攀條咀嚙空青藥 玉清樂五體金光

射日星玉清樂玉清樂 右五

遠昌臺下海揚波 玉清樂得道高真始得過

玉清樂下格小仙追莫及玉清樂邕邕遙聽

八鸞和玉清樂玉清樂 右六

五色雲霞覆轂屯玉清樂三三洞戶敞瓊門

玉清樂何方道士通朱表玉清樂玉女飛函

達上尊玉清樂玉清樂 右七

上景三元妙色精玉清樂絳宮久已列仙名

玉清樂更從大恨存雌一玉清樂縹緲雲車

駕羽明玉清樂玉清樂 右八

真陽館裏氣徘徊玉清樂升降三宮客往來

玉清樂生死不忤浮世事玉清樂相將五老

上金臺玉清樂玉清樂 右九

三華太素自然生玉清樂空裏芙蓉灼灼明

玉清樂絳室金房虛寶座玉清樂大微童子

下相迎玉清樂玉清樂 右十

上清樂一十首

紫清天上育華林上清樂絳實朱柯竹葉深

上清樂咀嚼繁英身不老上清樂下觀烏兔

換光陰上清樂上清樂 右一

元君八炁號青靈上清樂錦帔飛裾住玉城

上清樂把握帝符司道籍上清樂拔除塵累

濟羣生上清樂上清樂 右二

高上皇人宴紫霄上清樂擷芳常引八鸞條

上清樂肌膚表裏瑤瑤徹上清樂映照三塗

萬苦消上清樂上清樂 右三

九日宮中四老真上清樂廣霞山上宴仙賓

上清樂鳴鐘鼓瑟行靈醕上清樂碧落融融

別有春上清樂上清樂 右四

浮絕山連白玉京上清樂金華樓共日華明

上清樂五真結就圓珠炁上清樂骨侶丹瓊

貌侶嬰上清樂上清樂 右五

秀華峯下五靈都上清樂元景神君握化樞

上清樂真火有功能造物上清樂銷鎔五毒

出陰途上清樂上清樂 右六

赫赫瞳瞳日九輪上清樂六淵宮殿紫元君

上清樂霞冠錦帔端居暇上清樂披拂祥煙

著赤文上清樂上清樂 右七

佳炁青葱覆紫空上清樂青精羽駕命元童

上清樂逆風浩蕩三千里上清樂七返香煙

處處通上清樂上清樂 右八

流汨池中太寶蓮上清樂開花十丈映池泉

上清樂嗅香飲水無飢渴上清樂綽約金華

葉上仙上清樂上清樂 右九

萬仞霞山峙玉虛上清樂四司冠劍護靈都

上清樂衆真稽首持天禁上清樂腰佩仙皇

逸錄符上清樂上清樂 右十

太清樂一十首

太一元君掌列仙太清樂彤輝絳彩射芝田

太清樂功圓會遇刊名籍太清樂可但洪崖

笑拍肩太清樂太清樂 右一

五節清香半夜焚太清樂天人玉女盡遙聞

太清樂味同炁合遙相應太清樂絳節霓旌

下五雲太清樂太清樂 右二

太極元君翠輦車太清樂萬魔奔走聽神符

太清樂九龍縱步齊驤首太清樂時見空中

吐火珠太清樂太清樂 右三

藥珠宮裏七言成太清樂十一神君一一名

太清樂雲擁蒼虬歸火府太清樂風隨素虎

出滄瀛太清樂太清樂 右四

金闕明光後聖君太清樂流津煥彩結丹雲

太清樂不因太上相傳授太清樂安得人間

有玉文太清樂太清樂 右五

元景巖巖憐太空太清樂彭仙室在霞中

太清樂九靈變化俄離合太清樂羽駕飄飄

不可窮太清樂太清樂 右六

東井中涵皓月精太清樂羣龍奮擲運金甌

太清樂仙人濯沐知何代太清樂唯見玻璃

透骨明太清樂太清樂 右七

渺渺三津繞帝川太清樂川連紅霧霧連天

太清樂玉靈仙母時遊息太清樂侍衛森羅

日月軒太清樂太清樂 右八

九靈玉館接崑崙太清樂山隔流剛不可親

太清樂囑付紫蘭令說與太清樂紅塵何苦

弊精神太清樂太清樂 右九

左右靈飛運甲庚太清樂琳房八景鍊華精

太清樂常陽宴罷歸何處太清樂擲火流金

事尅成太清樂太清樂 右十

步虛詞一十首

太極分高厚 輕清上屬天 人能修至道

身乃作真仙 行溢三千數 時丁四萬年

丹臺開寶笈 金口為流傳 右一

大梵三天主 虛皇五老尊 尚難窺微妙

豈復入名言 寶座臨金殿 霞冠照玉軒

萬真朝帝所 飛鳥躡雲根 右二

濛濛如細霧 冉冉曳絳衣 妙遂祥煙上

輕隨綵鳳飛 幾陪瑤室宴 忽指洞天歸

竚立扶桑岸 高奔日帝輝 右三

旋步雲綱上 天風颯爾吹 飄飄凌斗柄

乘笏揖參箕 獅子銜丹綬 麒麟導翠輜

飛行周八極 幾見發椿枝 右四

綠鬢頽雲髻 青霞絡羽衣 晨趨陽德館

夜造月華扉 搏弄周天火 韜潛起陸機

玉房留不住 却向九霄飛 右五

昔在延恩殿 中宵降九皇 六真分左右

黃霧遶軒廊 廣內尊神御 仙兵護道場

孝孫今繼志 咫尺對靈光 右六

寶籙修真範 丹誠奏上蒼 永淵臨兆庶

宵旰致平原 萬物消疵癘 三辰效吉祥

步虛聲已徹 更詠洞玄章 右七

宛宛神洲地 巍巍衆妙壇 鶴袍來羽客

鳬舄下仙官 玉笋斟元醴 琅函啓太丹

至誠何以祝 四海永澄瀾 右八

水噤魔宮懾 燈開夜府明 九天風靜嘿

四極悉澄清 嘯咏朱陵曲 朝翔白玉京

至誠何以祝 國祚永安榮 右九

華夏吟哦遠 人聲自抑揚 沖虛歸道德

曲折合宮商 殿閣沉檀散 樓臺月露涼

至誠何以祝 多稼永豐穰 右十

散花詞一十首

絳節徘徊引 天花散漫飛 高真無染著

片片不沾衣 右一

八陛旋瑤級 千花颺錦英 綠渚弄紫柁

煥麗不知名 右二

淺淺黃金萼 勺勺白玉英 天風隨御駕

吹滿九重城 右三

綽約縈空際 繽紛落座隅 韶華長不老

何處覓仙都 右四

淨侶吟仙曲 人人讚善哉 萬花興供養

飛舞自天來 右五

寶葉開琪圓 珍柯在紫微 不教蝴蝶採

長共綵鸞飛 右六

聖境三千歲 仙花始一開 如何金籙會

併奉列真來 右七

几席延鸞馭 香燈建寶壇 丹心無可獻

碎錦灑雲端 右八

碧綠相差次 紅黃迭淺深 化工應自失

雕斲本何心 右九

洞案爐煙起 無爲道德香 同根無異氣

噴鼻更芬芳 右十

白鶴詞一十首

胎化靈禽喚九天 雪毛丹頂兩相鮮 世人莫

認歸華表來 瑞昇平億萬年 右一

瑤臺風靜夜初分 仰喙驚鳴露氣新 太液徘徊

歸未得 曾於往劫作麒麟 右二

靈鶴翩翩下太清 玉樓金殿曉風輕 昂昂不

與雞爲侶 時作沖天物外聲 右三

三山碧海路非遙 來瑞清都下紫霄 霜雪羽

毛冰玉性瑤池深處啄靈苗 右四

金火純精見羽儀 長隨王母宴瑤池 玉壇夜

醮神仙降飛過 緱山人不知 右五

五雲宮殿步虛長 斗轉旋霄夜未央 白鶴飛

來通吉信清音齊 逖逖竟香 右六

一聲嘹唳九皋禽 換骨輕清歲月深 遼海等

閑人不識大羅天 上有知音 右七

白毛鮮潔映霜華 丹頂分明奪絳紗 千六百

年神炁就飛鳴 長伴玉仙家 右八

蓬萊會散列仙歸 羽駕飄然白鶴飛 明代爲

祥人 慣見何須樂府誅金衣 右九

玉宇沉沉瑞霧開 香風未斷鶴徘徊 奇姿會

與青田別 定是仙人次第來 右十

金籙齋三洞讚詠儀卷下

黃帝陰符經頌

元陽子頌

神仙抱一演道章上

觀天之道執天之行盡矣

在天垂象化元精 至道沖和在杳冥

得一觀天無別行 太陽元旨盡分明

故天有五賊見之者昌

惠覺心通九一光 五星聚會入離鄉

若教浮世因修得 黃帝徒誇五賊昌

五賊在心施行乎天

五賊剋伏轉天關 次第分飛證九還

咫尺金華門豁啓 淮南王採不爲難

宇宙在乎手萬化生乎身

妙手能搏日月光 出身萬象卦牙黃

道之宇宙無瑕謫 不悟焉知坎裏陽

天性人也人心機也

天利人和宇宙同 人心至感道機通

靈元豈是無情物 得路焉知成有功

立天之道以定人也

天一陽光顯照西 木三青氣以爲妻

水銀不是真鉛力 坎子如何認得主

天發殺機龍蛇起陸

天補將軍丙化權

太清海變蓬萊島

人發殺機天地反覆

人與殺氣布炎宮

既濟往來龍虎見

天人合發萬變定基

人天定蹟合雙弦

萬變既通神室內

性有巧拙可以伏藏

積德圓成大辨音

目前雲路道非遠

九竅之邪在乎三要

有鼎防姦應八門

復文運轉通消息

可以動靜火生於木 禍發必剋奸生於國時
動必漬

木生真火禍成恩

法象不全仁義尤

知之修鍊謂之聖人

仙骨能通上下真

鍊鉛若得流珠住

富國安民演法章中

天生天殺道之理也

赤髓生來降白天

水銀一味仙家祿

天地萬物之盜

天地元開覆載門

可憐造化區區盜

萬物人之盜

人求地利顯多同

恍惚有鉛何不盜

人萬物之盜

饑食寒衣養色身

何如究取陰符理

三盜既宜三才既安故曰食其時百骸理動
其機萬化安

三盜同元入元宮

仙桃美熟延筋骨

人知其神而神不知不神而所以神也

功道由來立紀綱 有神須假法威光

白金晦跡誰能測 太一知來助聖皇

日月有數大小有定聖功生焉神明出焉

魂魄靈蹤九一興 復還交媾定相應

聖功漸覺香氣郁 神裏來官必上昇

其盜機也天下莫能見莫能知也

萬萬神機功覆元 人人盡見莫能詮

積陰居解陰知悟 石火光中得遇蓮

君子得之固窮小人得之輕命

道士防姦鍊鼎心 刀圭變老旋填陰

愚夫小利天官法 輕命唯崇點化金

強兵戰勝演術章下

瞽者善聽聾者善視絕利一源用師十倍

視聽行師絕利源 華池截頸削奸煩

採鉛百日仙鄉近 立降流珠封子桓

三反晝夜用師萬倍

日月年開曉夜光 剋時三濟幾相當

算來萬倍功成歲 顯是長生太上皇
心生於物死於物幾在目天之無思而大恩

生迅雷烈風莫不蠢然

目分萬望掌乾坤 對境心常不二門

泄在蠢然思在已 物標生死住陽魂

至樂性餘至靜則廉

畢功瀟灑雜器誼 任意遨遊逸道源

守訥固閑廉已靜 一鑑丹飯壽千年

天之至私用之至公禽之制在氣

天之制禽飛入神 舉之功用未惟新

卯生金玉潛通碧 戊亥為良火要津

生者死之根死者生之根

有生根死死為神 殺未成丹活得人

若離五行應不盜 未通元理卒難陳

思生於害害生於思

月魂思生胞在離 又憑庚氏奪金姿

當從害上思生惠 特地全由五兆龜

愚人以天地文理聖

從凡入聖歷崎嶇 道合乾坤法有無

聚芥投拳還自住 了知元會不同愚

我以時物文理哲

四時薄氣在陰陽 神水曾清轉醴漿

平地有鉛鉛豈錫 但窮天理妙斟量

自然之道靜故天地萬物生

二儀交泰氣調和 物象彫鑄似琢磨

動靜全由鳥兔力 易元我在石人歌

天地之道浸故陰陽勝

地昇天降理元珠 入妙還同水躍魚

陽動陰消神自聖 日魂月魄昧來無

陰陽相推而變化順矣

相生相剋互包藏 變化鉛飛石鍊銅

否極泰來歸順矣 眼前誰不是陰陽

是故聖人知自然之道不可違故因而制之

神仙制氣指元機 金石陰陽不可違

惠用一門先聖易 自然鼎道合天機

至靜之道律曆所不能契鳥獸之位也爰有

奇器是生萬象

全陽至靜道沖虛 本末寧教律曆拘

素篇既無藏鳥獸 彼中方有混元圖

八卦甲子神機鬼藏

離頭坎水與金精 允入龍宮震玉清

甲會丙壬乾鬼藏 庚辛機艮必坤成

陰陽相勝之術昭昭乎

姤女求媒欲住顏 黃君聽聖直臨軒

相攜同入金華頂 盡日乾坤掌內闌

進乎象矣

回顧塵凡好付思 進程有路會仙岐

但求已上陰符理 天道分明有見知

黃帝陰符經頌

太上昇玄消災護命妙經頌序

鳥六

唐貞一先生司馬子微撰

天尊示見三界慈憫四生開衆妙之門救無極之苦是以垂文玄教曲奏妙音俾未聞者聞令未悟者悟此經者蓋太上玄元老君之所作也其旨也即妙性之本萬法之宗焉文雖簡略理實淵深一毛吞四海之波巨黍納無鞅之衆神明莫測智識難詮不可以聲求不可以色見遠而無外近而無親追之不見其前伺之不來其後無上之上不可階而升也玄之又玄不可得而聞也混先天而不古歷浩劫以長存尊而無名貴而無位逡巡萬變倏忽無邊照耀則日月有虧覆載則乾坤不普隨機化導對境忘心訣疑網以入玄宗引輪迴而歸覺路散余一氣毓彼羣生失我則逝水以俄頃保我則後天而不老毀之者持巨筭以掃崑崙究之者類鴻鵠之飲滄海所以玄言莫暢聖道難彰縱有修行徒多讀誦朝聞夕死未見其人不揆斐然輒爲頌云

太上昇玄消災護命妙經頌

太上本來真虛無中有神若能心解悟身

外更無身

爾時元始天尊

假名元始號元始虛無老心源是元始更

無無上道

在七寶林中五明宮內

七寶爲林苑五明宮殿寬人身皆備有不

解向心觀

與無極聖衆俱

三世諸天聖相因一性宗一身無萬法萬

法一身同

放無極光明照無極世界

放出光明照無央世界中乾坤明表裏日

月覺朦朧

觀無極衆生受無極苦惱

妙觀無盡苦自性不能知妄想隨緣去何

時有出期

宛轉世間輪迴生死

生滅何時盡相因浩劫來似環蟻蟻轉如

穀碾塵埃

漂浪愛河流吹欲海

誰言河海闊深淺尚能知愛欲情無底何

年有出時

沉滯聲色

水鳥及風林咸歸一法音如何顛倒性自

起萬般心

迷惑有無

虛無含有象有象復歸無心若分明了知

權呼有無

無空有空無色有色

無空空不空無色色不色若能知色空色

空皆自得

無無有無有有無有

有有兼無有無無及有無虛心能不動妙

道自來居

終始暗昧不能自明

如人入黑暗目覩又何曾若要分明見須

憑浩劫燈

畢竟迷惑

有相象無相迷惑終不知未能明覺性安得決狐疑

天尊告曰汝等衆生

衆生情行劣迷失道根源特謂宣宗旨教令入妙門

從不有中不無中無

物向無中有道從有裏無莫生無有見迷執自消除

不色中色不空中空

空色互相生相纏如糾墨要知空色理自

莫分空色

非有爲有非無爲無

道性本虛無虛無亦假呼若生無有見終被法來拘

非色爲色非空爲空

不空是真空不色是真色空色便爲真真

法何曾得

空即是空空無定空色即是色色無定色

是空及是色究竟總非干要認真空色迴

心向已觀

即色是空即空是色若能知空不空知色不色

空色宜雙泯不須舉一隅色空無滯礙本

性自如如

名爲照了始達妙音

妙音喻虛性虛心非妙音認他毫髮事難

得自由心

識無空法洞觀無礙

一心觀一切一切法皆同若能如斯解方

明智慧通

入衆妙門自然解悟

了悟性根源名爲入妙門妙門方便法是

法勿留存

離諸疑網不著空見

決破疑惑網有無都不干正心長自在如

準入雲盤

清靜六根斷除邪障

心靜六根清六根隨性行性能無著物邪

障那邊生

我故爲汝說是妙經名曰護命

妙經無礙性權立妙經名故爲衆生說今教悟此經

濟度衆生隨身供養

一真度一切如械濟橫流真性隨身有勿

於身外求

傳教世間流通讀誦

傳教虛無理世間散布行誦經能萬通其

義自分明

即有飛天神王破邪金剛

真性號神王飛天無定方破邪能自外堅

固喻金剛

護法靈童救苦真人金精猛獸

靈童即正性無滌號真人威猛喻師子名

殊一法身

各百億萬衆俱來侍衛是經

諸天諸聖衆無一亦無二性不遂彼流是

名真侍衛

隨所供養捍厄扶衰

語默及游息無生一念思忘形歸恍惚神

鬼不能窺

度一切衆生離諸染著

正法度邪法衆生見處偏若生無有見即
被染心田

爾時天尊即說偈曰

天尊重說偈直爲指心源汲引迷惑者令

歸解脫門

視不見我聽不得聞

道非干視聽視聽轉生疑應物臨機用虛

心即可知

離種種邊名爲妙道

○心疑隨萬境隨境認心田道非有爲有方
名離種種邊

太上昇玄消災護命妙經頌終

生天經頌解

起

然

子

頌

鳥七

元始天尊

至高至大虛無祖

接引羣生萬法根

三十二天都教主

如如不動號爲尊

說此生天

生天生地亦生人

四象三才育五行

無相無名天地始

有情有相物情宗

得道真經

深根固蒂始中心

復命歸根立本真

鍊就九陽金鼎出

慧光朗照遍乾坤

爾時元始天尊

泓濛混合未分源

似有如無恍惚間

至寂至虛含萬象

漸生五太立人天

在大羅天上玉京山中

大羅天上玉京山

曠朗無塵絕往還

覺悟剎那生靜境

迷情如隔萬重關

告諸仙曰吾今爲汝略啓身心

虛無妙相身心啓

暫假凡軀主妙規

金口泄開天地奧

靈光射出混元機

明開道要

道要玄微非有無 無中生就有形軀

有中鍊出無形體 自在逍遙物外居

十方得道神仙皆從此經修行而通微奧

萬八千篇玄妙玄 生天得道始修仙

愛河須仗舟船渡 到岸遺舟合自然

善男子善女人

天尊普化遍十方 男女無殊一體觀

大抵澄心崇至道 智愚凡聖總成仙

依憑齋戒是作津梁

洗心防患真齋戒 除情去慾是津梁

○境滅心忘無垢染 靈明何處不圓方

一切有爲顯諸真露 朴散形生自有爲

色心未動本無爲 莫因假物喪靈儀

籍假養真真露顯 體此法相乃可投持

方求魚兔覓蹄筌 得兔忘蹄魚亦然

乃可投持雖有相 有爲無作越中邊

能屏衆緣永除染著 莫將名利喪根源

外行周圓託衆緣

洪鍾在叩聲雖獨 應物無心兩事全
外想不入內想不出

六門長閉緊牢關 莫縱三尸恣往還
二物調和收寶鼎 一條銀焰出崑山
乃得五臟清涼六腑調泰

四象中央一炁先 週流三界任巡還
青龍火裏噴寒霧 白虎潭中吐赤煙
三百六十骨節之間有諸滯礙十惡之業
三三六六結成形 口四身心眼耳唇
始為七情耽染著 屏除十惡認元宗

百八十煩惱之業

七情三業喪靈源 半是凡身半是仙
鍊就極陽無相體 自然煩惱不相干
衆苦罪源悉皆除蕩

三彭恣縱業根源 五慾身耽惹禍愆
罪業屏除無苦惱 自然超脫死生關
即引太和真炁注想身田

意定心寧莫強求 綿綿來往自通流
華池澆灌三田潤 要長靈芝飼白牛
五臟六腑心目內觀

五氣朝元五氣清 六陰消盡六陽生
慧眸踢起分明觀 內外無塵體自真
真炁所有清靜光明虛白晃曜

虛白靈光晃太空 輝輝煥煥古今存
莫將明月清風論 風月何曾得久停

杳杳冥冥內外無事 真樂真歡喜自由
內無所感外無求 了無一物掛心頭

昏昏默默如醉夢 昏昏默默正達無爲
昏昏默默正達無爲 昏昏默默性恬虛

混混沌沌若有若無 法界往來無所住
法界往來無所住 無爲無作了元初

古今長存總持靜念 浩劫綿綿非有有
浩劫綿綿非有有 不增不減不空空

長江萬頃無波溢 湛湛澄澄息浪風
從茲解悟道力資扶

迷雲消散靜乾坤 朗照虛無若鑒容
玉兔奔馳投絳闕 金烏飛入廣寒宮

法藥相助仍節飲食 天地相和萬物沖
天地相和萬物沖 衣食調攝自然通
抽添水火無虧溢 煉就神丹射九宮

驅遣鬼尸安靜六根淨照八識

陰魔遣却六神寧 寶鼎祥光晃太空
八景返爲八色水 結成雲篆出崑崙

空其五蘊正妙三元 五慾翻除五蘊空
五慾翻除五蘊空 五般霞彩闌爭新

三宮昇降無窮盡 總跨金龍赴玉京
得道成真自然昇度

金丹煉就保長生 玉性玲瓏萬法空
得道有如非得道 自然昇度九霄中

爾時諸天仙衆上白天尊言
諸天仙衆各歸依 仰謝天尊潔衆迷

雲散風停天瑩靜 一輪明月照希夷
自從無始以來至於今日

未分五太混元初 恍惚其中若有無
浩劫長存無損益 有餘那得證無餘

未聞如是大乘經典 視之不見聽無聲
視之不見聽無聲 非色非空絕我人

只爲衆生著有相 教風權且立三乘
我等緣茲幸會廣及一切道果圓滿
未曉前生作甚緣 今生同遇上真傳

亘初業障皆消散 行滿功周赴九天
而作頌曰杳杳冥冥清靜道

無中生有陰陽道 五行內外俱顛倒
忘心忘法亦忘形 杳杳冥冥清靜道
昏昏默默太虛縱

無拘無滌越和沖 靜色非千萬法空
得意忘言如酩酊 昏昏默默太虛縱
體性湛然無所住

絕情絕意忘憂慮 慧光不滌纖塵汙
茫茫浩劫獨縱橫 體性湛然無所住

色心都寂一真宗
正眼拂開塵世界 靈臺不掛半毫分
真清真靜玄中妙 色心都寂一真宗

生天經頌解

三洞讚頌靈章卷上

玉清惠命頌

真

稽首玉清元始尊 稽首金闕虛無帝 包含造化運陰陽 極處自然無凝滯 生天生地生人物 五色祥光隨處慧 度人无量不思議 敢仗祥光來拯濟 歸命東極宮中尊 歸命十方救苦尊 毫光遍照三千界 智慧潛通五苦門 常以廣大威神力 慈悲救苦濟亡魂 指迷惡道返歸真 法橋大度永長存

華蓋玄謁真疑炁章

幽微禁宮為仙宅 道貫樞靈圓景白飛根 散葉翳翠條 妙炁三華貫 幽微鬱靈香 淑真人墟雲景眸 奔通烜赫泥丸三五合 靈芝結珠固精神 炁活飛煙妙霽却殘光 鍊獲飛仙去 否厄太玄太和在 右府紫清真人道為主 中虛恬淡自怡然 返老還胎導玄圖 知雄守雌資天機 回反乾坤鎮中主 飛玄神炁合青玄 含藥吐芳明子午 鍊養靈根不復枯 萬靈朝會羣陰觀 琅音玉霜灌死體 徘徊沉默須周普 擒龍捉虎坐殿與隱韻 流音述妙府黃華

朱醴濯陽精萬道炁為羣仙舉

妙英飛爽集炁炁章

道貫青玄集素瑞 靈寶飛真瓊妙炁 生魂育魄返金容 五藏生華凝景翠 三田飛鬱映華峯 寶曜玄黃端拱會 提攜日月運璇璣 九炁發春揚拆地 含和吐藥曜金蓮 驪龍吐珠呈彩翅 鸞鳴鳳翔對上賓 虎嘯虛岩華曲麗 洞觀三界百關明 六緯七經齊天地 飛靈煥景擲炎靈 東井天河灌幽渭 九龍奔躍蹇寶園 圓景燦輝總翹翹 飛霞採集咀玉根 景景胎仙生萬彙 千災却消摧凶殘 幽室光明何所繫 紫華混合青玄宮 電掣雷奔絳霞閣 雲臺碧落黍米珠 導達光玄煥 二炁注念左府悟玄機 反覆陰陽成上位

青靈九炁君頌

東華吐靈鳳 西宮扣瑤音 三炁結空洞 太虛生中心 靈書披七條 寶文翠華林 鳳福遂天響 六時應節吟 上有度命童 煥夜朗長陰 萬劫保形明 眇眇莫能尋 長鍊不死年 與運同浮沈 日月照靈魂 璇璣向東南 九星落形影

寶花生五心自有不彫神與我契丹金赤書
檢籍炁玉訣妙自陳朱宮有綠籍魔神莫能
侵

丹靈三炁君頌

絳雲翠玉虛靈風披太微逮逮六炁降眇眇
吐靈輝乘我日中影披縵順天迴朱童披靈
夜洞陽鍊落暉玉童度促年靈歌五神開長
浪无絕景一念入九圍億劫超幽期華命不
彫衰飛天披重闕南宮朗凶機朱陵定絳籍
神備便形飛七祖上生天福德高巍巍輪轉
空洞魄出我九玄扉夜景披朝陽飄飄乘運
歸

皓靈七炁君頌

琨臺生琅音玉炁遐七冥實章洞太虛攝真
入无形錦雲翠朱日圓華逐月生混合自然
炁迢迢九遐清六慧純梵行五神有高靈絳
宅耀朱景萬劫不彫零長存好生君太乙合
黃寧保命度符籍鍊魂金華庭引歸不死炁
飄飄乘運生七玄入南宮枯骸更鮮榮長樂
登雲浮高飛戲彩軒逍遙大羅外三界莫能

輕

玄靈五炁君頌

飛步入北清托真招上元秉景望玄臺四華
生錦雲中有採芝童羽衣何紛紛長歌九命
籍金籙赤書文十絕遠華庭飄飄度命懷綠
蓋乘風迴丹霄拱瓊軒為我造上皇拔錄九
夜門度命朱陵闕長保億劫椿留神管絳府
赤子明玄關受形不死炁自然生寶魂七祖
度南宮世世福慶門

青玄真導魂章

玉京萬法大羅尊十重寶梵億言碧霞絳
雲引衆道玉闕金閣敷真文偃定高真遊飛
空八極飛神度無邊鬱鬱昭昭萬炁中吐聲
如嬰炁成紋振動梵天是空道靜明法曜惟
慈雲超簡昏衢北羅鄴列上金簡還靈明矣
炎火池成清涼解刃挫鋒悉摧紛豁散業境
空法身保召罪性來吾壇天尊經濟本无際
萬天萬地成真元莫有不從不化度超凌三
界佐虛玄隨心所召隨心歸仙信梵音如甘
泉一聞百骸解熱惱朱陵開度成飛玄起凡

大道入慈悲不濯巨細惟翮伶華夏泠泠引
汝魂逍遙獨步紫虛天

金真章

天魔乘空發萬神駭神庭託化謠歌章隨變
入无名器歷何紛紜穢道當塗生雲合結朱
空北帝湧神兵鼓極自知道玄運來相征上
景御飛轡迅駕檢雲營促校北帝錄收執羣
魔明豁落張天羅放威擲流鈴金真護空洞
玉光煥八冥金符守上宮神精戮天精剪滅
萬妖炁億億齊齡上承九天信嘯命靡不
傾招真究三洞惠誦朗日清八道望玄霞七
轉緯天經洞合帝一真拔度七祖程削落五
苦根反魂蒙受榮金光耀寂室神燭自然生
香花散玉宇煙炁徹玉京帝遣徘徊輩三元
降綠軒迅駕騰九玄朝我玉皇庭
玄掖振雲袂飛空樂未央高步七寶林逍遙
天衢長迢迢玉京山瓊臺耀飛梁仰觀黃金
闕俯窺白玉牀中有黃老君紫炁幹天章宴
坐捧生籍綠筆紀華陽萬劫長無期超凌不
死鄉

雲衢耀明景瓊田植紫芝神風翔高清琅琅
聲何悲三華覆八圓梵炁籠玄機至道參寥
廓招真凌雲飛吟哦懽懽懽懽風曉池下
有招仙子千劫戲雲衣不老游萬天十極雲
霞樓

紫蓋榮神麾朱霞映清微鬱儀煥丹極結璘
耀玄輝神風挹三素九老揚雲旂俯仰重霄
上宴樂服靈虛攜展朝玉寶西華羅高輝竊
窺方諸宮青童躡雲梯旋步歌丹鳳朗嘯葉
雲飛

西宴瑤池酒東遊蓬萊津倏忽越桑田陽谷
耀朱晨龍旌曳千林寶蓋迴九真流鈴煥中
黃握節斥魔氛萬仙拍手笑清歌浩无垠翹
傾觀太无齊齡太上賓

檢仙尊帝一金書妙難雄高奔契八素混合
百神功二老兩仙王五靈符籍同神光耀金
樓妙哉雲烝重是謂大洞法九真步玄空金
津和玉液咽服瓊樹豐鬱耀朝太上揚袂歌
天風

乘烟結霞友御轡歌寥闕北登廣寒宮玄英

玉練顏飛步天津上雲璈鳴鼓彈龍輶駕虎
楸朝揖扶桑曦夕憩琪林影攜提控九玄遊
遊太空館徘徊運朱輪受書登南丹長歌億
萬春

朝登太微宮夕憩常陽臺天風扇清冷榮駕
五雲回星珠羅碧漢綽約流九垂眇莽御明
煙圓霄宴玉墀神虎攝萬魔靈威煥執龜金
真檢雲營玉室映靈堦丹丘无圓方奇哉仙
真才

泛景宴紫清雲旌儻丹霄遊觀瑤臺上鈞天
何迢迢流風煥騰樹神光耀瓊樓仰喻玄珠
華金書輝層洲萬天拱四皇羽復迴煙輶八
浮羅鳳蓋琅樹映飛颺霞墉帶神畿千齡如
一朝

琳琅魁華晨九遐凌非煙左顧招无英右盼
揖白元神光御玄素黃老俯芝田吉光駕飛
乘遊戲控流輶高皇觀紫微恍朗遊萬天春
秋无彫謝千劫窮遐年至真无所得攜提靈
景仙

青帝歌

東望重拜手蒼帝玉皇君靈風鼓橐籥育物
布元春雲龍鬱嚴駕玉衛擁瓊輪枯萌泛霑
及大惠无不均萬仙歌以道奏曲成天人心
根迷自固拱跼戴洪仁

白帝歌

六甲抱金闕七政守靈壇流鈴擲火化威劔
巨龍蟠邈彼素靈真明憲孰敢干束制妖鬼
魔凜落霄風寒沴烝既已息萬天饒而安真
儔荷大茫抵額相歌歡

赤帝歌

太景開玉樞洞堂啓金除霽林廢瑤砌丹鸞
踏瓊株寶房名曲麗明璫神所居飛遊豁雲
道引目盼真都天日永不夕重烟鎖青廬太
上敕印開帕几羅簡書

黑帝歌

无質統有物淵兮上帝心不啓不發道蘊妙
化機深恐爾漏未盡陰想忽浸淫輪轉元涯
波苦道相迷尋萬年常謹約一旦自湮沈无
冲落鬼境殃譴不可任

黃帝歌

萬天拱宸控駕玉池根翹機實億曆洞朗
開四門大有混皇真紀制星宿魂非帝道不
運有方賴之存威念即霜秋和豫為陽春生
成握元紀仰荷戴无垠

青帝消魔讚

洞耀育元精青華開大明布育九天炁始生
存无英扶陽通攝御丹林合總真積霄始暉
上鬱疊明霞晨靈无煥羅絡衛育保形魂混
化合玄景仁惠消魔羣萬徧道已超功當奏
上清

赤帝消魔讚

三炁謁靈闕明虛煥玉丹朱陵有帝真華雲
飛絳軒統御萬界中撫運超億千執策按簡
錄洞章敷神篇解結散禍根流金摧亢姦志
能成此道魔試俱無前保度冥劫津宴盼无
窮年

白帝消魔讚

西靈回七度太眇鬱明華白元維我神皇真
御景霞皎皎三素暉昭昭破百邪攝音延至
炁金晶育三田鍊結固玉質寶曜映瓊鮮魔

精當滅試速地无沈連逸轡高消館齊輪太
上仙

黑帝消魔讚

北玄三秀謁太上紫皇居總炁攝幽棲造化
敷靈綱下統虛危精寶育天元房靈通太妙
神纏羅衛百關豁落滅魔試凶災永不干大
道保自然壽命无虧殘萬劫享慶會白日登
雲輪

黃帝消魔讚

混化歸冲妙元皇總帝靈真老閉黃闕四御
齊玄鈞圓華太張上同攜聖王君結津固百
骸瓊耀擁胎仙晨暉注明景魔應自滅形萬
道保无虧返老回童嬰五會合一炁飛馭超
雲京

龍漢始青玉曆寶頌

九陽迴妙炁三景散元精碧霄浮靈篆青林
榮淑英超遙玉清府遠邈蓬萊瀛真化通无
間神風滋萬生

赤明丹光玉曆寶頌

浩劫開神運龍文泛赤霞八威奔電激九鳳

破光邪鍊度丹皇室飛昇元始家炎明常繼
照靈慶集晨華

上皇中靈玉曆寶頌

混黃生一炁感化結真形上德持柔順含光
洞杳冥建中該九極執本統三晨輝燁天端
上飛芒曜玉靈

延康素靈玉曆寶頌

皇老儲靈粹金精曜斗威六天威滅萬寶
復幽微爽炁浮高闕寒光藹素輝空同披玉
勒華麗九霄飛

開皇玄上玉曆寶頌

五炁符元妙諸天混太冥辰精飛羽黑玉女
散華青紫榮封天寶玄光凜帝庭羣魔欽至
化萬國保安寧

空洞靈章

飛玄紫炁凝靈根網維玉虛總萬神空中鬱
勃結自然上有稜層十二傳玉樓我我耀景
雲流精紫闕帶金軒瓊堂瑋鍊繞八竈中有
青金九靈仙丹皇真母號精延飛青羽揚晨
嬰冠手執玉節握靈幡五色命魔對帝尊把

持符籍當生門咀日嚼月喻體泉離羅吐輝
鍊五魂內充外溢絳府欣金光煥煥形正圓
從朔入金色渾倫唯有開明曉此言日五月
十朝北元刻見華蓋領仙君紫炁左迴與斗
連歷度四七入金門正是丹皇校萬仙有明
此訣加精勤秘念密思每分分妙景感會得
要文三年當審保長存九年乘空駕羽裙鳳
衣輕翔昇龍山俯仰九靈謁玉晨得爲靈寶
大真人

東方玉晨君讚

森耶連華闕神帝一真靈虛交日月玄覺
照冥津玉關回運數梵炁啓都明麾播揚洞
唱天君秉化輪金華領仙錄鬱帶龍山宮寶
芳煥珍景宴戲高上壙霏煙散妙霄陶精養
我形飛天觀劫會讚詠元始文太極建青篇
晨輝布發生爽耀應霄觀熙怡存玉嬰皇育
旋景與昇度七祖魂彌範流飛網周維天地
根祥霞翳霄仞紫館真人君軒昇清玄府滅
試推邪兇道應混高元神結泥丸精靈丘三
素雲羅耀交琳峯七九齊至用三五合同功

併協沖和德變鍊超仙宗

南方玉晨君讚

和陽煥明弄炎暉玉鍊顏虛梵隱玄邀空朗
昭神功九華破幽錄四極延生津黃房晨景
居綿綿保長存窈窕騰月妃萬界超劫輪混
洞騎玉書龍漢明耀晶神文攝六天察制妖
魔羣邪試莫我干列名標上清超度五苦難
逍遙玄仞峯飛神開大運明觀九雲重南上
鍊我魂旋蓋遊靈林汎霑靈虛網十轉回天
關大魔咸來賓入景朝紫微龍淵注東井黃
華養我真大羅无色光寂度元窮人未靈協
至炁太和昇福堂玄臺映鬱蕭誦洞遵西靈
神公布玄範反嬰齊自然

西方玉晨君讚

洞陽映霄闕受度好生君靈童火鍊攻福館
涉生津太漠明道彰真人翔景雲高淸布元
化蕩穢除妖氛接我琅碧與昇入微妙門揚
輝浩極家洞耀九玄真造化回幽關杳眇固
靈根景皇連鬱秀檢校超仙魂蕭仞白元子
洞攜列帝賓始皇天中王寂寂虛无庭玉晨

張大範流慶祿我塵霄樓演洞唱收魔束鬼
形三元分化祖九度悉宣陳阿丘馳素斬邪
邪契所緣彌羅大聖神更生陞福延逸化乘
運歸削死永合歡瓊府魏我境森扶霑華霽
雲牙揖三暉享此億遐年

北方玉晨君讚

開化無上神霄度凝玄炁陽華真一精太和
育妙慧九靈鎮西崑機化停樞會鳳車升羽
輪越此大劫津雲阿擁圓皓育生天神君受
符羽林官藹秀靈霞襟空霄飛玄章接舉身
超騰天統攝八耀闕度九幽魂蘭宮連紫微按
格昇朱陵南宮有妙童琅輝鍊我形蒼霞浮
綠輦稱慶拱高尊靈風泛洞響可寶无窮齡
九仙頌運錄釋散宿業根流網抗虛梵廓達
歸无名大混百骸紀徊煙合紫雲慶垂七葉
孫禍塞三徒源解帶離塵網齊密道遙實倏
忽登龍臺稽首玉帝前

三洞讚頌靈章卷上

三洞讚頌靈章卷中

應用讚頌

馬元

七真讚

太上玄虛宗弘道尊其經俯仰已得仙歷劫
無數齡巍巍大聖德寂寂因無生霄景結空
構素虛自然征日月為炳灼安和樂未央
學仙絕華念念念相因積去來亂我神神躁
靡不歷滅念停虛間蕭蕭入空寂請經若飢
渴持志如金石保子飛仙路五靈度符籍
濟我六度行故能解三羅清齋禮太素吐納
養雲牙逍遙金闕內玉京為余家自然生七
寶人人坐蓮花仰瞻玄都奈俯酣空洞瓜靈
顏耀朱日冥計年劫多法鼓會羣仙鳴鐘微
大魔
靈風扇奇花燦爛開繁縵天真撫雲璈衆真
彈靈琴雅歌三天景散慧玉華林七祖升福
堂由此步玄音前世福未足斯書邈難尋信
道情不盡圖飛乃返沈太上無為道弘之在
兆心
學道由升信奉師如至親抱景伴清輝孜孜

隨日新衆人不得度中不度我身大願有重
報玄德必信然陰德罪至深對來若轉輪
學道亦甚苦晨夜建福田種福由植樹積貴
而成山子能耽玄尚飄爾昇清天修爾無為
道當為結大緣太上至隱書名為智慧篇拔
苦由人材超俗以得真靈姿世不奇時若淵
中蓮

人行各有本皆由宿世功立德務及時發願
莫不從善惡俱待對倚伏理難窮賢士奉法
言道亦在兼忘解是大智慧上為太極翁寶
蓋連玉佩命駕御九龍金華擎洞經捧香戀
仙童嘯歌徹玄都鳴玉扣瓊鐘
鍊身凌太清超景逸雲霄保持持法言遊玄
極逍遙萬劫猶昨夜千秋如展朝魏我陰雲
華手攀寶林條香煙自然生玄階莫扶搖靈
幡應時散繁想應時消滅智弘大混無為為
清謠

啓壇頌

渺渺空無象悠悠感至靈敬則承天貺泄則
被魔精吉凶隨運轉否泰應緣生道不貴珠

玉神惟感至誠丹情盡勤苦懇禱竭玄情自
然通大道皆得降真靈檢香陳所願稽首冀
嘉禎天專常湛寂回心禮香冥

解壇頌

太空包有家至道窈無形承和通妙炁感應
達衷情倏忽周八極依稀降萬靈微香陳素
悃委質表丹誠速汎翔鸞蓋遐攀綺鳳旌烟
宮高鬱鬱霞閣上停停瓊駕出霄漢金龍入
太清甘露降人世景福被幽冥

請玄師頌

科律嚴章奏精誠事百神投詞陳悃願潔醮
答萬昊俯盼垂雲駕冥心啓上真玄師都教
主奉請降凡塵

請天師頌

太上傳符錄初因過鶴鳴積功超玉簡列位
侍三清接引章詞奏克隨凡庶情修齋當奉
請願俯鑒精誠

請監齋頌

寶號留塵世仙階列上清三千功已滿八百
行先成禮懺修真福監齋作證明今宵雲馭

降祥社被舍生

請天官頌

妙道垂真教修齋立福田結壇朝上聖建醮
會高仙注念通霄極精神感上玄天官秉寶
輦彩仗下凡筵

請地官頌

翼翼陳丹悃競競仰紫虛祈通塵下志願達
土皇君潛應垂真祐遐臨赦罪書地官來下
降俄擁五雲輦

請水官頌

方便開真化慈悲立聖科虛心修妙會調系
詠靈歌默念祈淵府丹誠通大羅水官龍駕
降雲錦起滄波

請五帝頌

五帝居仙品糾彈善惡因祥光臨宇宙惠澤
清沈淪發露祈真佑冥心感聖賢存亡俱快
樂享福永無垠

請經師頌

入靖修齋錄嚴裝啓上仙奏章先達御詞款
欲關宣寶錄因師度威儀太上傳經師求下

降奏請列羣仙

請籍師頌

肅肅祈清福說說結寶齋登壇須此夜行道
續徘徊有願仍雖啓皈心道眼開經和師來下
降仙仗下瑤臺

請度師頌

經戒丹心持虔誠召百神拾香祈至聖持戒
請仙真清詠凌朝啓精思入夜勤度師來下
降保護結齋人

送玄師頌

上帝命真仙修齋黃錄壇諸天來下降焚香
懺罪愆祈思行道畢齋事已周圓洪福留人
世玄師上九天

送天師頌

齋福已精嚴表牒上九天至誠通感應闔門
得延生掌籍諸天衛章詞達御前祖宗感升
度嗣胤慶榮遷三天扶教主事畢奏功圓

送監齋頌

靈壇崇法席允賴下監臨糾過兼善真仙
亦仰欽行當驅道騎縹緲五雲深生存富有

賴更復濟幽沈

送天官頌

妙範修齋直明科洗罪根瞻霄崇上善滌惡
致微言既納依投靖蒙垂恩天官還玉
府寶駕入金門

送地官頌

淨會朝元罷三塗結果因真思宣五嶽誠悃
奏三天撤席停宗範解壇送列仙地官回嶽
府高涉五雲輦

送水官頌

宣演靈音畢諸仙返上穹靈光降橫尼甘露
降真風復命驪龍駕遙還太寶官水官歸洞
府福祿賜無窮

送五帝頌

仙仗來霄極尊臨列五方檢氣吹羽節驚輅
駐清場齋事將圓撤迴輿返上蒼流恩無不
遍豈但感馨香

送經師頌

經法雖微妙崇奉悉因師凡有五善者咸得
頻禮之氣運功易就心慢悔難追若能勤繫

念朝夕自仙飛

送籍師頌

道以齋爲重法以朝爲常不修不奉者安能
達帝鄉有骨入仙品自然開紫房玄武排靈
駕但見金殿堂

送度師頌

迢迢玉京山玄都何巍巍朗朗長夜開真人
乘步虛大道由人弘心至神自歸修齋行道
畢稽首辭三師

明燈頌

正一陽光炎上朱烟開明童子一十二人洞
照天下及臣等身百邪摧落却鬼萬千光明
明徹通真達靈

太上散十方華燈通精誠諸天悉皆照諸地
皆明我身亦光徹五臟生華榮炎景朝太

虛遐想通玉京

丹精寄太元玄陽空中響食形滅苦根幽妙
至真想垂華不親實因緣永無象我身亦如
之兼化託流景

夜光表丹陽迢迢照虛空諸天普光顏諸陰

即自滅我神亦聰明常玩智與慧道運通運
運還謝任天勢舉形躡空洞夜燭燦流萃

滅燈頌

玄陰閉光長燈續明太陽已朗八山開清聲
還太陰光附景生日月二真爲我舍并

智慧頌

智慧生戒根真道戒爲主三寶由是興高仙
所崇受況此不死舟倏忽濟大有當此說戒
時諸天來稽首

智慧起本無明朗起十方結空峙玄霄諸天

挹流芳其妙難思議靈感真容通有有竟无
有無無無不容

智慧常觀身學道之所先眇眇任意肆自然
錄我神天專常擁護魔主爲保言晃晃金剛
軀超超太上仙

奉戒頌

道爲無心宗一切作福田立功無定準本願
各由人虛已應衆生注心莫不均大聖崇正
教亦由兩降天高凌靡不周常卑故成淵海
爲百川王是能舍龍鱗萬劫保智用豈但在

厥年奉戒不暫虧世世善結緣精思念大乘
會當體道真

還戒頌

天尊大慈悲說戒度衆生威德被幽顯果報
感真靈諸天來稽首羣魔自束形過去超八

難見在保千齡齋福行當息相共送虔誠流
梵逸雲唱飛香雜烟馨瓊鳳乘丹輦金龍駕
綠軒生死皆快樂家國悉安寧

燒香頌

學道當勤苦斂信運丹誠燒香皈太上真炁

雜烟馨惟希開大有七祖離幽冥

太極頌

道以齊爲先勤行登金闕故設大法橋普度
諸人物宿世恩德報道心超然發身飛升仙
都七祖咸解脫

投簡頌

太上法微妙簡錄度人天元始告符命時刻
獲升仙傳授救沈溺皆得自修然書名金錄
簡迢迢玉帝前

度簡頌

赤明開玄圖和暢通上虛元始敷靈章十部
飛天書開度九幽祖萬通道自居玉皇秀瓊
林生死福德虛自無黃籙簡苦根焉得除旋
行誦靈章五靈還相扶

焚詞頌

衆生多障難大道實矜憐濟度垂科教咸令
懺罪緣罪愆遍地府覺結已聞天發露析真
佑冥心感聖賢虔恭禮三寶願得早生天焚
詞版上界奏名玉帝前

焚疏頌

聖德流科教修齋福壽長延生移玉簡請命
奏金章罪名消北府生籍注南昌見存皆快
樂過去生福鄉

迎真頌

天尊御天龍百萬神仙騎雲起自道通玉音
成鼓吹花嚴如意珠聖化不思議惟願降瑤
壇福被羣生類

送真頌

回轡五雲輿騰駕九章歌倏忽升天遠離壇
香氣多玄恩覃宇宙福祿遍山河緬想神仙

路道遙上大羅

送直符頌

仰啓直符使幽顯路潛通乘雲馳奏積遠涉
三界中紫清金闕邃玄都水府宮奏傳寶聯
息端簡俟真風

普獻頌

普獻無邊聖香煙散十方願乘七寶臺垂光
五濁世運度人天衆咸令上法橋同會證無
爲勤修不退轉

北帝頌

善哉元始尊衆生慈父母傾光紫微宮曲映
九幽戶我我丘寒庭回照廓冰浦炎炎烈火
獄沛然洒法雨圓通大哀智常善濟衆苦拔
度長夜魂今得稽首禮

華夏讚

勤行奉齋戒誦經制六情故得乘空飛耀景
騰玉清精心奉齋戒吐納鍊五神內德冠諸
天轉輪成上仙

學道讚

學道行爲急奉戒情制心虛爽正炁居仙聖

自相尋若不信法言胡爲棲山林

太極真人頌

神雲煥層虛梵羅屯碧霄元始九龍駕皇人
按青輶靈光集萬真珠影開陽寥出示靈寶
篇福德由是招洞玄隱高嚴玉音泛雲敷无
量匪得思道海生波濤法義同消流滋植成
嘉苗用以賑飢窮教典衛中朝帝尊壽億年
太平滅兵刀稽首望玉晨靈華散金毫
大道雖無心可以有情求佇駕空洞中迴盼
騎滄流淨明三界外蕭蕭玉京遊自無玄挺
運誰能悟冥趣落落天漢澄俯仰即虛柔七
玄散幽裔返胎順沈浮冥期苟潛凝陽九無
虞憂觀此去來會時復爲淹留外身而身存
真仙會良儔
疊疊玄中趣湛湛清漢波代謝若旋環椿木
不改柯靜心念至真隨運順離羅感應理常
通神識速自徂淡遊初無際繁想洞九霞飛
根散玄業理反非有它常能誦玉章玄音徹
霄退甲申洪災至控闕王母家永享無終紀
宜知年劫多

金錄度命九幽拔罪頌

稽首無上道歸心元始尊至真妙應主開化
飛玄門妙戒怡五靈金書警萬神察命定錄
籍靈符度苦魂乘雲朝玉帝齊契玄中人

解冤拔罪頌

偉哉大道君常普無量功舟楫生死海濟度
超羅酆罪對不復遇福報與冥通用神安可
測讚之焉能窮

功德往生頌

冷冷甘露滋法味難思議齋香流七真冥冥
何生疑受此法食者生天登紫微

福田高巍巍供施令清淨一切有爲事普皆
成代命拔汝三塗苦施汝九玄慶臨當受食
時諸天皆讚詠

寒庭多悲苦迴心禮元皇女青靈寶符中山
真帝書一念昇太清拜念歸太無功歸九幽
下旋旋生紫微

太元真人臨授洞玄經頌

八塗會無宗乘運觀靈羅化浮塵中除解桎
有道家勝煙忽未頃攜真造靈阿虛景瞻瓊

軒玄鈞作鳳歌道路無軌滯神音舞雲波齊
德秀玉京何用世間多左把玉華蓋飛展蹕
七元三辰煥紫輝鍊盼撫明真變踊期須臾
四面皆已神靈文無涯際勤思上清文何事
坐橫塗令爾感不專陰虧失玄機不覺年歲
分玄波振滄濤洪津鼓萬流駕景盼六虛思
與真人遊妙唱不我對清音無誰投雲中騁
瓊輪孰爲塵土儔

太極真人頌

太上大道君出示靈寶篇高妙難爲喻猶披
玄中玄自然十方土共仰無上仙大手洞虛
經安坐朝諸天上寶紫微臺下藏諸名山煥
爛龍鳳文載耀在其間妙哉太上道無爲常
自然王侯及凡庶所貴唯貴賢宿命有福慶
卓拔在昔緣法師轉相授寶信劫數年廣心
度一切大福報爾身供養必得道奉行成至
真大道無彼我傳當得至人

玄一一真人頌

衆妙出洞真煥爛耀太清奉者號仙人體元
永長生逍遙戲玄虛宮殿羅其形倩藥七寶

林是朗日月精龍麟交橫馳鳳凰翔悲鳴
太上治紫臺衆真誦洞經檢香稽首禮旋行
繞官城三周歸高座道王爲應聲人主弘至
道天下普安寧

玄一二真人頌

虛無常自然強名字大道紆邈無邊際衆妙
歸靈寶閉眼存至真精思降十老升仙永無
爲靈顯常妙好渴飲玉池醴飢食金花草淨
世度八難濟世諸苦惱

玄一三真人頌

妙哉靈寶經太上自然書奉者致得道號世
降真來受命宣道教真爲超俗才事畢升神
仙官殿治玄臺時降崑崙崑崙山道遙憩蓬萊

張天師頌

靈寶及大洞至真道經王唯有五千文高妙
無等雙奉行致飛仙玄居治虛空侍衛太上
臺逍遙紫微宮萬劫猶電頃長存永無窮道
眼已備足豁落自冥通幽昧無不知安坐觀
十方

三啓頌

樂法以爲妻愛經如珠玉持戒制六情念道
遣所慾淡薄正氣停蕭然神靜默天魔並敬
護世世享大福

鬱鬱鬱家國盛濟濟經道與天人同其願縹緲
入大乘因心立福田靡靡法輪升七祖生天

堂我身白日騰

大道洞玄虛有念無不契鍊質入仙真遂成
金剛體超度三界難地獄五苦解悉歸太上
經靜念稽首禮

演道讚

天道應運陰陽至神察其機要有亡其身悟
即爲上迷者非真

演法讚

天地萬物陰陽四時更相爲盜貴合天機聖
功神明非賢莫知固躬輕命審察其宜

演術讚

絕利一源三思反覆徇物之機生死在目樂
出安靜思生害酷天地災祥時理爲福

清靜經頌

五太初爲先虛無道自然混元權祖正妙體

契宗玄演教明無上知常假喻詮因斯清靜
德闡化立經篇

大道隱乎形真精混窈冥二儀分始九一氣
運無停覆載誠難側生成育只寧陶甄能匠
物蠢動盡含靈

日月運虛空明明甚至公得天能久照麗物
可成通有質蒙光照無情混象融陰陽常體
道不息太無中

妙道實難名包含萬物生運時充地脉任信
稟天清吹煦真消息冲和大化成圓通歸一
體高下坦然平

無相杳無蹤難名混沌中未萌天地日安得
雨雲風鑿破胚渾沌兆衝開物象象因斯分造
化權立道無窮

清濁陰陽氣周流上下冲自然成感化終則
契圓通萬類含滋育三元配合同乾坤交泰
定都會一真空

聲判兩儀分人靈至貴尊三才安宇宙二物
定乾坤種種含真炁元元實相門剛柔相濟
用體道孰能存

降本通真體還元見末因春陽敷茂暢秋候
主周淪太極生形化純和造物新樞機推大
運掌握任功神

清靜理幽深誰能究竟尋觀空除萬境絕相
了諸心慧月流丹漢慈雲覆翠岑寂然人不
動應物顯知音

人悟常清靜知源妙聖機太初無滌滯全寂
隱光輝默默藏沙界昏昏微紫微三元昇降
後天地悉皆歸

心者靈之府神棲靜可安貪嗔癡易作戒定
慧難觀深要正中正堅持開內關常無生六
慾法界自然寬

若遣諸情欲澄心妙洞觀同真非物物歸寂
棄般般水遠連天靜山高戴月寒圓融通智
慧壺內聚金丸

正念無偏黨冲虛合自然六根塵頓息三毒
病須痊妙道超空劫全神達上天些兒幽寂
處玄牝自絲絲

迷路失家鄉都緣昧已先心浮誠易動境熟
爲難忘欲滌何能遣邪奸轉使荒回頭堪悟

處返照見空王

覺了諸塵漏分明道眼開色聲非有礙知見
定須埋神靜千災滅心虛萬慮灰清風穿玉
戶自有好音來

諸相觀非相其形是種無內含真法界體合

太空虛雲靜蟾光露潭澄練色鋪此般明顯

示何在覓殊塗

寂照觀諸物羣靈豈有殊同真非可見絕迹

莫能模了了堂中老休休法外無玄玄也

泯八極任寬舒

廓達真空界迴觀一物無混融同大漠湛寂

體虛无洞照音常寂圓通性自如中間并內

外不屬返元初

達了心無物無無實亦無何勞除妄想豈在

辨精麤緣靜虛施巧歸真任不渝這般消息

密孰敢強名模

萬法本來空無無合聖功湛然非內外寂爾

泯西東心境雙忘處方圓一際同杳冥超造

化無物悉皆通

假寂權為體還當去欲因忘緣如是息真靜

自然新契合無生法方知不夜春獨超天地
外任意燕中申

一定達真常神光莫可量照開三毒室射透

五明堂寶月晴空露迷雲盡迹亡清風布消

息應物任舒張

曠劫鎮圓成無暗亦無明谷神常自寂法海

晏然清正念投真路澄心達妙程永離生死

繫三界任寬行

了寂沈聲迹深通至理幽真空寧有得實相

本無修飲啄從他過威儀任自由豁然除疑

議安靜保全周

為證衆生化俱亡種種求頻超無漏果寧許

有根由取舍安能動因緣亦斷流瞥然都放

下聖道可傳留

上士何無爭勤常抱志堅棲真常惜泊養素

隱幽玄俯仰觀天理窮通達道端堪嗟未明

者競法昧心田

德化非求報恩寬肯自矜韜光藏大器明性

瑩堅冰默契高穹遠深通至道弘豈同愚士

執分別強談能

衆生多背道顛倒外邊求妄想因斯有真靈
昧了休本來無欠少何假強持修頓拂迷雲

盡銀蟾照玉樓

謀事因生妄乖真為動神皆心存愛欲著物

起貪嗔常惹無明火還添煩惱塵從茲緣受

報六道轉沈淪

為妄生嗔怨貪癡作障緣憂愁長繫絆煩惱

鎮纏綿為此迷真道從斯就業慾迴光能返

照自覺妙中玄

煩惱緣興念何曾覺自心茫茫遭苦辱擾擾

肯沈吟浪死無休息虛生直至今因而真道

失夢想轉來侵

人若通天地俱蒙道悉存藏根深固蒂滅魄

返安魂得悟長生路須開久視門全真神自

化無上法王尊

三洞讚頌靈章卷中

三洞讚頌靈章卷下

鼻

三契頌

元始洞空无三氣精上門紫容煥太室四明
植靈根妙化發東瓊三便啓西崑崙映九玄
清五華帶錦雲離羅煥神燈七星曜北元飄
飄上清微翼冀帝一尊落落高上章羽重何
紛紛流香本無色洞入萬仙羣左迴三流劫
右輪萬天關雲華纓玉雲八鳳舞空轉四時
無停機青白早分明九九改劫運三三度一
椿天地有終會否微歸在攝洞明正一法嚴
終六天文

太平反空元奉翼後聖君靈風起西門錦雲
生東瓊三氣煥玉洲流香乘煙輕五華披風
散倏忽朗九清霽林曜朱日黃華逐月生中
有採芝童衣羽帶飛青鳳景萬嶺峯道遙雲
綠軒總御九空輪運開無稽程左命三天文
右攝六天兵檢氣反空洞天度應運傾劫運
自有會誰測敗與成洪波淪雲網六合無遺
形白尸飄長流孤塊因復零悲此去來際方
覺正法明至學加精修東華結瓊名欣有白

簡人相與樂太平

洞關運天綱五氣轉三微紫戶吐瓊簡金門
納神暉八會交真風晃朗重冥開天際九清
外落落高晨迴三色返空无四候應玉畿河
侯已鼓筆五行潛相推六度無終劫運極乘
氣歸萬魔羅天布羣凶竟吐威兆人負災衝
積尸令人悲妙哉正法文復劫明不衰至時
相奉迎契在九天扉與爾期太平放身無翻
飛

妙哉三洞響寥寥何鈴鈴尋聲若有無運之
不見形響音洞十方聽之不聞聲

大道須人弘遊心歸太空朝禮運十方昇度
乘九龍飄飄超三界亦由雲中崇
吾師天中尊超超無上皇仰觀地維表彷彿
紫炎堂巍我玄都室但見仙人房

大洞經讚

大洞真經本大東淵深極奧極玄冥十方三
世諸仙聖修習功成達始青
三洞三乘未易涯虛皇妙語絕纖瑕諸經萬
法歸宗祖解悟登躋浩劫家

帝王宰輔及公侯州牧諸官與庶流富貴榮
華無別事總真大洞究玄猷

緇黃二教若殊途聞禮聞詩君子儒咸可誦
持真大洞先天先地一虛無

全真學道眾王民萬法千門枉用心大洞仙

經持萬遍虛皇老子自知音

世間文武及僧僚娼妓聞闕比比倚咸可率

心持大洞罪根剷滅與神遊

大洞真詮異眾經登仙入聖謁玄真饒經天

萬塵塵劫圓證虛皇无上人

吐哉蠢蠢未明徒豈識浮黎黍米珠大洞度

人元一體等閑平地達玄都

若欲修行達上乘爭如大洞幾篇經盡心盡

性修身法悟得高昇大有庭

予因諸子錄斯經述頌稱揚讚此經功德範

巍无盡藏虛皇妙道本无形

元皇天帝讚

始自蒼胡檀熾音結成雲篆度天太玄道

父親求受下世方聞大洞經

大地凡夫學悟真仙源路者實難尋欲知捷

徑無差錯口誦心持大洞經

宗祖前生善力輕今生祿嗣願艱辛禱祈欲得如君意何似勤者大洞經

日月无光苦併吞星辰錯度奈天文上消天厄寧凡庶至士同宣大洞經

早魁為災兩若金蟲蝗水滂殺无成普教豐稔无飢饉祈禱全憑大洞經

工賁農商與四民食求不覺業隨身忙中好割開心力習誦文昌大洞經

府庫資財甚滿盈兵戈永息樂昇平民歌有道圖長治報國勤者大洞經

社廟神祇與百靈欲求陞擢蓋无因遷名善籍增威力旦暮須聽大洞經

眷屬宗親父母魂久留地府不超昇欲思薦拔緣无力齋戒勤者大洞經

冢訟徵呼累後人又兼譴告在天堂生生世世遺殃咎解止宜看大洞經

或為營修與築墳興工動土犯凶神致令宅宇多災咎解息宜持大洞經

行病年王統五瘟通州歷里害生民保全鄰

族无傳淙嚴深同者大洞經

月厄年災久淙身尋醫問卜與求神不能解離无門告命道級依大洞經

六類冤親男女魂冥冥漢漢在幽陰普教受鍊生天界好與頻者大洞經

六道冤家結得深冤冤相報幾時停欲令各生歡喜除是聽聞大洞經

或為爭財或為嗔一時忿怒叫神明結成鬼訟何時了解雪无非大洞經

疾病喪亡不離身官災盜賊苦侵陵財消物散如冰雪保祐當持大洞經

木石狐狸猴犬精拋磚放火現人形作成作福求淫紀殄滅宜看大洞經

居處山林與僻行蟲蛇狼虎每傷人尋齊迴避无遺毒佳坐留心大洞經

士子儒生茅塞心神重應對不聰明揮毫欲得如神助先好常持大洞經

如幻如泡是此身悉精神裏好修真保全形命同天在熟玩文昌大洞經

莫恃家豪積萬金天司奪祿易危傾有時正

好修功德割己刊行大洞經

一片真心達上清感通得授自三神此身位證天尊果只為勤者大洞經

聽我重言大洞經斯文玄奧果難名无邊功德莫思議普勸凡夫不可輕

元始天王說大乘有緣方遇此專經若能終始勤修誦共作文昌一會人

開度法輪偈頌

吾開八門中有玉城七寶瓊林無根而生金條穿五陰映上清開度法輪通真達靈上無

不照下無不明見有道士晨夕誦經長齋幽阜不倦晝冥切栢中食素水兼濡躬師受法

時刻不傾單景巖穴獨宿孤衽與鹿為羣倚林棲形窮獸對躡飛鳥哀鳴風雲凄切萬枯

沈零凝水填澗素靈翳庭寒癘切肌執志殊精契闕林岫難苦備嬰勞不敢倦極不敢寧

展轉求道遂感皇情丹書綠字列圖玄名神仙羽服錦帟飛青鬱然而降煥落大鈴流霞

丹與三素飛翥入我八門乃知死生皆由積行苦哉有情

滅度行業頌

法輪開滅度死生從願迴積基有明報福
更相摧世眼求前生達士希後歸前生功未
滿故致福報遲藉先勸來行功備形自飛前
世十方仙歷劫乃入微吾觀至學士乃不領
人懷勤行奉師實師佑福龜龜輕師失吾寶
先功永無施勸誠成爾真三師度玄扉若能
體道真法輪洞自開莫見此寂寂幽冥中甚
微

命根未盡偈頌

轉輪空洞魂滅度更死生罪福各有對吉凶
無偏嬰得道行所致緣爾先身精行惡招斯
酷流曳五苦庭天地雖悠悠玄鑒理甚明吾
歷觀汝輩從師受吾經得經叛汝師始嫉爭
功名軼軻不自咎洽路吐怨聲致使六部司
執筆糾爾形命滅負刀山苦惱身是嬰往反
三塗中豈覺形與名化為六畜羣望反其冥
冥法輪有常運去留無稽停哀此禍福无受
報不費生念汝不知命發頌為傷情

思念轉神偈頌

妙通轉我神弘普無量功道成天地劫輪化
發九重滅度更死生緣對各有宗孰悟去來
因形魂無始終積慶藉福基身拔五難拳脫
離三惡道蕭蕭入閻空念度無邊境思定感
神通法轉三度場轉成高仙公迴我大椿步
飄升太極宮

宿命因緣頌

不殺得長壽無痛常離苦一切受天位身安
得所怙不盜常清貴自然錢財聚七寶為宮
殿歡樂當安人不淫則不亂身體常潔清所
生當端正行德自聰明不欺口氣香言語常
忠貞所說出元道談論使功成滴酒不過口
無有謬誤事常願見華實得使天人侍壽終
昇天堂二十五神迎萬福自來降光影恒煌
煌

布施得大福錢財自然來所生常尊貴傳世
受歡欣持戒常敬敬奉受於九專精敬不犯
惡保得身長存忍辱謙下人嗔怒不形口罵
詈忍不應祿壽常自然精進不怠懈念道常
得真所行合於道壽終為天人念真心不退

忠信不妄言供養諸道德所生無難難能行
此六善輒得生為人面色端且正自然成貴
身

慳貪不布施私竊不養親藏財貪妄貴不救
老窮人妻子及下使不衣視飢寒端坐守財
物殺為餓鬼殘身不見飽足苦毒生瘡癰東
西乞不得家族悉滅殫造作弄口舌生死被
剝殘洋銅灌其口拔舌過身半沃口強令咽
入腹腸胃爛生時不念善死沒被塗炭疽惡
輕凌人被考數萬年罪畢後身出便為下賤
人元惡好殺害盜竊反強梁形殘入地獄萬
劫被災殃

常行盜竊心負債不肯還殺生好田獵非法
作俗緣執行無誠信小言輒恚嗔罪惡不自
覺好邪不信真後生墮畜生牛馬驢馬類臭
惡恒負重如是拷萬劫內淫犯干逆雷電所
槌殺死沒地獄中倒懸被火燂弄口謗真道
後生極苦難洋銅灌其口常抱飢且寒
布施常不惜普濟令眾安即身受清貴世得
見升仙供養好道德齋戒見真靈靜念心不

懈七祖昇天堂忍辱無嗔怒生軀得正端學問好道德得爲人中尊行心能柔和謙節下於人救急度危厄剋得延命長敬奉靈寶戒明練九宮道委心信虛無壽與天同光

正有癡愚者驕慢於二親無有恭恪心後生卑賤人見實不恭禮違突於長者執行不慈孝後生爲奴婢衣食仰於人驅打無晝夜受生恒苦惱死不得免度放蕩好淫色至不信鬼神後生受飢凍所作逢難難負債反咒詛貧苦罵先祖後生作牛羊爲人所困苦

篤信好生道慈心常哀哀素食身清潔化後登天機恭奉於三寶不驕於二親至誠不欺詐是行忠孝人謹口不妄語行心周一切勸人遠罪目念法不違戾周窮救危急功德甚難重增算益年壽終身受欣泰結友行義弘相敬如父母閉惡揚善德孝悌感神靈欺詐好妄語常無至信誠心口自相反恒受穢辱形悖惡好誹謗死落地獄中洋銅灌其口苦毒長冥冥酒酒好罵詈不信有鬼神鐵鉤著其舌痛惱當可言脫當生人中口氣常

腥臭爲人所憎惡衆災所剋注惡念常遭逢所向遇罪刑無端橫嬰羅網毒靡不經死復還地獄後身作畜生展轉五毒中愁惱慘辱生

奉敬歸三德宣化勸善事願得見仙賢長得真人至願撫一切賢與我等無異吾我心平獨練練道百誠晝夜勤修學智慧爲天人尹生西地化普使知道真篤好思仙真積念無不同先願昇虛遊上與希微通積善不厭多布惠勿怯惜功德感仙真自然降丹藥

沖妙先生朝天讚頌

上帝降命聖算綿長金枝挺秀玉葉彌芳五星順序七曜垂芒赫赫煌煌空洞靈章福我聖皇寶祚無疆天清地寧萬宇輝光西靈聖母貴曳璫瑤鸞臺鳳閣密從宸輿虹光貫斗月瑩太虛穆清宮禁永鎮天居挺秀雍熙運日奉至尊前身居龍鳳關名籍繼諸仙燒香謝天陰長誦希夷篇千生殊百福列位清微天永處逍遙境長享福自然天生明哲來贊昌期冰稜玉峭鳳質鸞姿燮

調元化力贊雍熙農歌綠野兵戢四夷長臻五福永集天祺

煥赫空洞章靈音震九天至真開寶籙傳受希夷篇寶偈今仍遇靈文拔祖先救度長夜魂上登朱陵天虔心尊所奉朝謝虛皇前

玉帝宣天旨普放幽夜魂八難俱解釋五道悉開通都都絕報對上朝朱陵宮羣生悟至道永享福元窮

玉京元始尊生成萬化主靈文告三官下開九幽府都都炎鑊獄慈悲灑法雨洗滌諸罪

魂咸皆得超度

傾心朝太極玉帝降洪恩天符宣地府開度長夜魂幽都解七祖靈符告三官神仙同接引上朝朱陵天永脫罪業根長享福自然

金闕大聖主天地萬靈師慈悲灑甘露洗滌

諸塵迷廣演空洞章徧使悟希夷救拔八難苦拋離五濁泥超度六毒海水謝貪嗔癡神

仙同接引逍遙上太微玉帝垂靈貺天宣告萬靈救拔九幽苦廣演三洞經名奏南丹府魂超北寒庭永離炎鑊

獄徑出水池城神仙同救度道遙上太清

救苦讚

吾師天中救苦尊常善化形十方界以此威
光興大慈救彼衆生無量苦九夜重昏幽暗
府署令廓照生光明牛頭獄卒盡成仙一切
沈魂皆解脫

四目老翁地祇頌

五炁玄元真演法度迷津像外無法像真中
求至真迷悟在心悟心靈法自靈神本無所
法生神心自生我心若專一神明隨心行至
理本無說至道本無言有像皆爲僞神靈須
我靈欲透妙中妙寂靜觀內心內外無毫滯
透洞心無心心已無名像自然超仙廷抱一
成真一逍遙登太清

五湖真經頌

稽首虛元无上道慈悲救苦大慈尊神光百
億照中昏遍覆慈雲濡法雨映石潭冷無間
獄五湖五海五池盆玉籙大赦諸罪魂解脫
沈淪萬劫苦鍊形度命朱陵府悟道登真衆
妙門巍巍功德難思議永爲衆生作慈父

拔罪心印妙經偈頌

大道澄廓元理幽深先天而生運化古今道
無形體澄澹身心不貪不慾不嗔不淫是非
莫識表裏思專身心清淨煩惱不侵無起無
滅冥漠難斟湛然空寂了心無心自然合道
衆聖來欽昇朝金闕遊翫壽林七祖解脫永
離幽陰皆契心印悟道合真念念相繼勿起
塵心

三洞讚頌靈章卷下

宋真宗御製玉京集卷之一

官一

謝瑞麥表一道

玉皇

嗣天子臣某誠感誠慶頓首頓首再拜

上言臣比者朝真之禮雖徇於後來若厲之

心實虞於涼薄願惟福壤遽顯祥徵俾彼膏

田再生嘉穀觀靈休之協契知天意之眷懷

祇荷降禎益思自勵臣無任感幸激切之至

謹奉表稱謝以聞臣某誠感誠慶頓首頓首

再拜謹言

謝祥瑞表三道

三清

嗣天子臣某誠感誠慶頓首頓首再拜

上言臣伏以龍井檜壇禱靈格而順拜福庭

太室撥言日而告期枚卜攸同多儀斯薦高

旻降鑒嘉應發祥內顧眇冲誕膺於介祉永

惟勵翼用答於凝禎臣無任感幸激切之至

謹奉表稱謝以聞臣某誠感誠慶頓首頓首

謹言

玉皇

嗣天子臣某 誠感誠慶頓首頓首再拜

上言臣伏以颺馭降禎駐僊遊於中禁璫圖協慶示寶誨於億年顧今序之載臨乃精衷而昭薦天祺紛委允彰眷祐之懷夕惕無忘益勵夤虞之志臣無任感幸激切之至謹奉表稱謝以聞臣某誠感誠慶頓首頓首再拜謹言

聖祖天尊大帝

嗣天子臣某 誠感誠慶頓首頓首再拜

上言臣伏以報況於龍井福庭先期已戒祗見於琳宮清廟昭告虔伸禮盛燭蕭樂揚拊石蓋靈源之敷祐故瑞典而斯隆錫類之仁紹彰於丕應適追之孝永勵於精衷臣無任感幸激切之至謹奉表稱謝以聞臣某誠感誠慶頓首頓首再拜謹言

謝天地祥瑞表一道

玉皇

嗣天子臣某 誠感誠慶頓首頓首再拜

上言臣伏以精衷昭格乃感動於靈心嘉應誕敷實章明於天眷臣比者禮文祗考密祀恭

脩膺穹昊之降秉荷珍符之錫祐祥經爍燭瑞物荐臻表福祉之來成示基圖之永固內

懃涼德獲顯鴻禎益勵小心用承丕錫臣無任感幸激切之至謹奉表稱謝以聞臣某誠感誠慶頓首頓首再拜謹言

謝雨表二道

三清

嗣天子臣某 誠感誠慶頓首頓首再拜

上言臣伏以續紹慶基統臨決寓寶資天祐用保民和近者方展燔裡稍愆十雨慮傷稼穡致災千箱冀觀離畢之祥庶協充箱之望爰伸密禱果洽明徵式顧原田已霑膏澤宵旰之眷既同影響而冥符夙夜之心益鑒盈玉而自勵臣無任感幸激切之至謹奉表稱謝以聞臣某誠感誠慶頓首頓首再拜謹言

玉皇

嗣天子臣某 誠感誠慶頓首頓首再拜

上言臣紹臨綿寓獲致洽平祗答鑒觀豈忘寤寐近者方成茂典稍屬愆陽多稼充箱屢虧於豐茂油雲觸石冀觀於霑濡密禱虔伸

明徵下浹俄流甘澤溥濟大田眷祐之祥既昭昭而響答欽承之志尤翼翼而日增臣無

任感幸激切之至謹奉表稱謝以聞臣某誠感誠慶頓首頓首再拜謹言

為皇子謝加恩表二道

三清

嗣天子臣某 誠感誠慶頓首頓首再拜

上言臣伏以洪覆之靈誕敷於丕祐本枝之盛克固於永圖某祇受天祺年當就傳載詢國典禮有建封爰疏寵於苴茅復升榮於環衛誕昭嘉慶實帝室之增華率勵精心庶神禧之昭報益期介祉常茂多祥臣無任感幸激切之至謹奉表稱謝以聞臣某誠感誠慶頓首頓首再拜謹言

嗣皇子臣某 誠感誠慶頓首頓首再拜

上言臣伏奉制書云云者仰被茂恩伏增榮懼恭以疏封之典誠屬於本枝列爵之崇允歸於盛德伏念臣適當稚齒獲備維城奉慈訓於承顏方蒙天蔭錫徽章於啓宇遠煥國經

位峻桓圭秩尊環衛集邦家之異數昭藩屏之鴻輝敢不自勵夙宵服勤詩禮務交修於忠孝庶永洽於慶靈臣無任感幸激切之至謹奉表稱謝以聞臣某誠感誠慶頓首頓首再拜謹言

為皇子生日表一道

玉皇

嗣皇子臣某誠感誠慶頓首頓首再拜

上言伏以候當朱夏月屆正陽降元曆既望之辰乃本枝載誕之日天心錫祐宗緒凝禎俾百福之咸宜實三靈之丕貺敢不益勤齋僦用報高明期昭鑒之俯臨庶繁禧之常茂臣無任感幸激切之至謹奉表稱謝以聞臣某誠感誠慶頓首頓首再拜謹言

謝忠武軍大麥表一道

玉皇

嗣天子臣某誠感誠慶頓首頓首再拜

上言今觀忠武軍奏大麥一莖七穗者竊以靈心眷顧瑞典昭彰瞻彼原田育茲嘉麥而況生閭輔之與壤俯接於都畿因農畝之效

祥用昭於善歲既欽承於丕祐彌勵翼於精忠臣無任感幸激切之至謹奉表稱謝以聞臣某誠感誠慶頓首頓首再拜謹言

謝玉石過淄州氣色表一道

玉皇

嗣天子臣某誠感誠慶頓首頓首再拜

上言今以將謀刻像恭侍殊庭爰自海濱採茲燕石遵塗所屆善應攸敷因景物之效祥見穹昊之降鑒內循冲眇仰荷顧懷益勵素衷用承鴻祐臣無任感幸激切之至謹奉表稱謝以聞臣某誠感誠慶頓首頓首再拜謹言

謝瑞應表一道

玉皇

嗣天子臣某誠感誠慶頓首頓首再拜

上言伏以靈宮款謁將祝於純禧瑞謀章明用昭於景貺矧先期之誕成復清醮之方修素魄效祥霽雲表異降瀼瀼之甘露鬱鬱之喬柯內顧眇躬膺茲丕應欽承之志實積於黃威敷祐之仁庶隆於億萬臣無任感幸

激切之至謹奉表稱謝以聞臣某誠感誠慶頓首頓首再拜謹言

冬至謝表一道

玉皇

嗣天子臣某誠感誠慶頓首頓首再拜

上言伏以歲序言周天正斯屆大田之稼克協於順成率土之民咸躋於仁壽臣獲膺靈眷仰紹慶基萬國來庭實懷於景貺九功惟序永賴於純禧臣無任感幸激切之至謹奉表稱謝以聞臣某誠感誠慶頓首頓首再拜謹言

年節謝表一道

玉皇

嗣天子臣某誠感誠慶頓首頓首再拜

上言伏以銅儀成歲綏管生春釐寓多歡咸躋於仁壽含靈有幸並集於福禧臣猥以眇躬躋茲丕緒夙興之志敢急於欽承紹至之祥益期於昭錫臣無任感幸激切之至謹奉表稱謝以聞臣某誠感誠慶頓首頓首再拜謹言

奏告加上聖號表三道

玉皇

嗣天子臣某 誠感誠慶頓首頓首再拜

上言臣猥以眇冲承茲保祐俯臨縣寓既荷於監觀仰報降真敢忘於乾華是以翹瞻紫極恭薦鴻名由顯應之下垂俾精衷之上達今則對越真像昭示輔臣將申命於攸司佇誕興於微則清都在望同咫尺之不違丹腑聲伸庶高明而斯察謹奉表啓告以聞臣某 誠感誠慶頓首頓首再拜謹言

又

嗣天子臣某 誠感誠懼頓首頓首再拜

上言臣紹臨區宇獲保於隆平降鑒基圖永惟於春祐是以虔瞻普宙仰薦強名仲有翼之精心答無疆之寶命今則已領中詔誕告外庭顧盛典之克伸實鴻靈而俯照內思涼薄彌切夤威但勵至恭庶昭丕錫臣無任精虔激切之至謹奉表奏告以聞臣某誠惶誠懼頓首頓首再拜謹言

聖祖天尊大帝

嗣天子臣某 誠惶誠懼頓首頓首再拜

上言臣承積累之丕緒獲撫中區荷太紫之鴻積用成至治仰瞻瑤極祇薦寶名克膺春祐之仁俾展夤威之禮今則已伸誕告盛顯降祥內顧眇冲敢忘欽翼臣無任精虔激切之至謹奉表奏告以聞臣某誠惶誠懼頓首頓首再拜謹言

為奏告上聖號祥瑞表一道

玉皇

嗣天子臣某 誠感誠慶頓首頓首再拜

上言臣恭藉鴻靈獲隆基緒方崇徽稱用報監觀恭對眸容親告台席遽顯彰於美應獲紛觀於祥經願以眇軀承茲景貺但虔夕惕以答天祺臣無任感幸之至謹奉表稱謝以聞臣某誠感誠幸頓首頓首再拜謹言

謝降制告諭恭上聖號表一道

玉皇

嗣天子臣某 誠感誠慶頓首頓首再拜

上言臣獲膺寶歷用撫蒸民承春祐之無疆勳猷威而有益由是仰瞻普宙俯率縣區聲

達精衷上崇顯號爰詢今日誕布外庭百執

交趨共忻於嘉會九清垂鑒增盛於禎期敢不夕惕惟夤夙興靡舍庶茂宣於大典俾欽奉於鴻靈臣無任感幸激切之至謹奉表稱謝以聞臣某誠感誠慶頓首頓首再拜謹言

謝降制祥瑞表一道

玉皇

嗣天子臣某 誠感誠慶頓首頓首再拜

上言臣抑懷純錫俯率與民祇薦鴻名茂揚寶貺外庭宣布方協於元辰嘉瑞章明用昭於丕春顧惟非德荐觀祥徵益務至虔永承善應臣無任感幸激切之至謹奉表稱謝以聞臣某誠感誠慶頓首頓首再拜謹言

謝上寶號表一道

聖祖天尊大帝

嗣天子臣某 誠感誠慶頓首頓首再拜

上言伏以膺積累之祥丕圖獲啓荷鑒觀之德盛典攸伸臣虔紹慶靈撫綏黎獻宸衷底定允賴於降禎夙夜勵精敢忘於昭報是以俯同縣宇仰望玄都共薦丕名庶揚鴻祐凌

競之至方靡於自寧顧誕之仁遠彰於下濟
今則已諧宣布將講禮容迴天聽之蓋高由
僊源之協贊內惟冲眇祇戴詒謀但益資威
欽承錫類臣無任感幸激切之至謹奉表稱
謝以聞臣某誠感誠慶頓首頓首再拜謹言

謝上寶號祥瑞表一道

聖祖天尊大帝

嗣天子臣某 誠感誠慶頓首頓首再拜

上言臣欽承覆冒祇紹和平但勵至虔用膺
介祉比者俯同聲宇恭上鴻名式揆元辰方
從誕布精心勵翼尚切於戰兢嘉應咸通遠
彰於鑒祐永惟錫類茂顯降禎益務資威不
隆道蔭臣無任感幸激切之至謹奉表稱謝
以聞臣某誠感誠慶頓首頓首再拜謹言

謝允上寶號表一道

玉皇

嗣天子臣某 誠感誠慶頓首頓首再拜

上言臣聞玉圖累盛由普宙之鑒臨善應誕
彰自清都之昭感獲荷高明之降顧實增竊
寐之資恭竊以臣克紹成基有慙菲質茂膺

寶命存錫元符俾四海之咸寧賴九陽之垂
貺雖巍巍之德祇答無階而慄慄之心勵精
曷舍由是思同率土上薦鴻名乾筆內深誠
思罄竭威神仰望彌切凌兢伏蒙天意冥通
靈謀協契昭茲懇至示以允俞今則宣布縣
區肅修大典豈唯冲眇曲被於顧懷實亦衆
瀛共承於覆冒但勤夙夜用表欽崇臣無任
感幸激切之至謹奉表稱謝以聞臣某誠感
誠慶頓首頓首再拜謹言

謝祥瑞等表一道

聖祖天尊大帝

嗣天子臣某 誠感誠慶頓首頓首再拜

上言伏以開奧之圖早膺於丕錫集真之館
爰勵於精心顧寶閣之聲管蓋琅函而斯奉
崇梁錯事明應儲祥實聳動於輿情益昭彰
於瑞典恭承景貺伏積虔誠臣無任感幸激
切之至謹奉表稱謝以聞臣某誠感誠慶頓
首頓首再拜謹言

宋真宗御製玉京集卷之一

宋真宗御製玉京集卷之二

官二

真遊殿祥瑞表十道

天

嗣天子臣某 誠感誠慶頓首頓首再拜

上言臣欽奉僊遊繕完秘殿俾功斯協降鑒
尤明顧瑞典之交呈實靈心而不顯載惟涼
德獲荷於祥徵守乃慶基益勤於潔志臣無
任感幸激切之至謹奉表稱謝以聞臣誠感
誠慶頓首頓首再拜謹言

聖祖天尊大帝

嗣天子臣某 誠感誠慶頓首頓首再拜

上言伏以飈遊降格蘭殿增修顧棟宇之方
新觀棋祥之紛集虔披瑞謀茂顯靈心眷祐
之仁既邦家而允洽欽承之志諒夙夜而無
偷臣無任感幸激切之至謹奉表稱謝以聞
臣某誠感誠慶頓首頓首再拜謹言

宣祖皇帝

嗣天子臣某 誠感誠慶頓首頓首再拜

上言仰奉僊宗俯新祕殿欽承之意獲動於
監觀紛委之祥茂彰於尤異內惟涼德存觀

鴻禎但勵戰兢用承春祐臣無任感幸激切之至謹奉表稱謝以聞臣誠感誠慶頓首頓首再拜謹言

太祖皇帝

嗣天子臣某 誠感誠慶頓首頓首再拜

上言伏以真馭降臨告發祥於遠古曾軒增葺答儲祉於清都微役在辰流禎屢顯瑞圖祇考實祐於家邦慶緒恭承庶隆於宗社臣無任感幸激切之至謹奉表稱謝以聞臣誠感誠慶頓首頓首再拜謹言

太宗皇帝

嗣天子臣某 誠感誠慶頓首頓首再拜

上言伏以真馭排雲茂禎於鴻祐曾軒際日用葺於宏規言屬僞工存彰降鑒禎祥紛委永荷於垂恩宗祐欽承益隆於追孝臣無任感幸激切之至謹奉表稱謝以聞臣某誠感誠慶頓首頓首再拜謹言

昭憲皇后

嗣天子臣某 誠感誠慶頓首頓首再拜

上言伏以鴻緒發祥皇圖累盛言新寶構用

志颺遊棟宇方興存昭於明應祺祥疊委實荷於貽謀益勵孝思以承基命臣無任感幸激切之至謹奉表稱謝以聞臣誠感誠慶頓首頓首再拜謹言

孝明皇后

嗣天子臣某 誠感誠慶頓首頓首再拜

上言伏以駕颺之遊俯臨於秘宇凌雲之構欽奉於靈源完葺在辰祺祥疊矩瑞圖祇考實茂於降禎慈訓永懷益增於追孝臣無任感幸激切之至謹奉表稱謝以聞臣某誠感誠慶頓首頓首再拜謹言

明德皇后

嗣天子臣某 誠感誠慶頓首頓首再拜

上言伏以層霄降迹久駐於禁闈崇棟增基庶揚於寶貺群工咸集嘉瑞茂昭燕翼之仁上懷於慈訓凌兢之志永勗於孝思臣無任感幸激切之至謹奉表稱謝以聞臣某誠感誠慶頓首頓首再拜謹言

懿德皇后

嗣天子臣某 誠感誠慶頓首頓首再拜

上言向以寶貺昭彰颺遊臨暨顧延真之祕殿聳大狀之宏模不應存敷嘉祥茂顯禎圖有煥累集於家邦慈訓追思增勤於寤寐臣無任感幸激切之至謹奉表稱謝以聞臣某誠感誠慶頓首頓首再拜謹言

元德皇后

嗣天子臣某 誠感誠慶頓首頓首再拜

上言向以降紫清之御久集於宸闈恢棟宇之規用昭於丕祐鴻禎茂顯嘉瑞繼臻俯念眇躬誕隆於美應載惟慈訓伏切於至懷臣無任感幸激切之至謹奉表稱謝以聞臣某誠感誠慶頓首頓首再拜謹言

萬歲殿祥瑞表十一道

三清

嗣天子臣某 誠感誠慶頓首頓首再拜

上言伏以內寢興工方從於必葺上真降鑒曲表於殊祥克協祥圖九彰靈眷內敷菲德茂集於監觀仰報瑤霄但增於勵翼臣無任感幸激切之至謹奉表稱謝以聞臣某誠感誠慶頓首頓首再拜謹言

玉皇

嗣天子臣某 誠感誠慶頓首頓首再拜

上言近以尊宇禁闡方從於微役儲仁膏極
荐觀於降禎瑞典交臻靈心茂顯高明之祐
實表於無方欽翼之心敢忘於若屬臣無任
感幸激切之至謹奉表稱謝以聞臣某誠感
誠慶頓首頓首再拜謹言

聖祖天尊大帝

嗣天子臣某 誠感誠慶頓首頓首再拜

上言近以兩儀之殿方葺於規模百世之祥
茂垂於眷佑克成壯麗文集禎祺眇薄之姿
曲膺於介祉續承之志但勵於至虔臣無任
感幸激切之至謹奉表稱謝以聞臣某誠感
誠慶頓首頓首再拜謹言

宣祖皇帝

嗣天子臣某 誠感誠慶頓首頓首再拜

上言近以官司率職用葺於中闡帝室開祥
茂膺於累善欽承嘉祝荐觀殊瑞典有孚
實昭於鴻蔭孝心無怠永奉於皇靈臣無任
感幸激切之至謹奉表稱謝以聞臣某誠感

誠慶頓首頓首再拜謹言

太祖皇帝

嗣天子臣某 誠感誠慶頓首頓首再拜

上言近以宸闡必葺久關於興工吉日協期
爰從於授役宗祊積德符瑞炳靈仰紹丕圖
茂膺於眷祐內循菲質但切於凌兢臣無任
感幸激切之至謹奉表稱謝以聞臣某誠感
誠慶頓首頓首再拜謹言

太宗皇帝

嗣天子臣某 誠感誠慶頓首頓首再拜

上言近者遵壯麗之規言脩於帝宇膺積累
之祐茂顯於天祺宗祊炳靈福祥疊矩內惟
眇德獲盛禎猷益務欽承用符追適臣無任
感幸激切之至謹奉表稱謝以聞臣某誠感
誠慶頓首頓首再拜謹言

昭憲皇后

嗣天子臣某 誠感誠慶頓首頓首再拜

上言近以禁宇歷年頽虧於宋壯良工揆日
爰務於繕完嘉應荐彰丕禎屢觀宗祊之祐
俯示於發祥夙夜之心敢忘於追孝臣無任

感幸激切之至謹奉表稱謝以聞臣某誠感
誠慶頓首頓首再拜謹言

孝明皇后

嗣天子臣某 誠感誠慶頓首頓首再拜

上言近以中闡授役方在繕完普宙降祥遽
彰鑒祐嘉祥屢觀瑞典寔符續紹基圖茂臻
於善應勵精夙夜庶展於孝思臣無任感幸
激切之至謹奉表稱謝以聞臣某誠感誠慶
頓首頓首再拜謹言

明德皇后

嗣天子臣某 誠感誠慶頓首頓首再拜

上言近以丹禁累年莫展斧斤之效梓人率
職荐遵壯麗之規方在授工屢觀薦瑞宗祧
之佑彰累洽於有開繕治之心勵寅恭於善
守臣無任感幸激切之至謹奉表稱謝以聞
臣某誠感誠慶頓首頓首再拜謹言

懿德皇后

嗣天子臣某 誠感誠慶頓首頓首再拜

上言近以大壯之規方崇於中禁紛委之瑞
荐洽於禎期宗稷降靈家邦協吉荷發祥之

祐介社交臻伸追孝之心鴻仁永恃臣無任感幸激切之至謹奉表稱謝以聞臣某誠感誠慶頓首頓首再拜謹言

元德皇后

嗣天子臣某誠感誠慶頓首頓首再拜

上言近以彤闈葺宇方屬程工紫宙降禋屢觀善應瑞圖允協丕貺實隆宗祐之仁俯垂於保佑家邦之慶愈勵於續承臣無任感幸激切之至謹奉表稱謝以聞臣某誠感誠慶頓首頓首再拜謹言

謝皇子加恩表一道

太宗皇帝啓聖院影殿

嗣天子臣某誠感誠慶頓首頓首再拜

上言臣祇荷天祺茂隆世胄熊羆叶夢早盛於本枝寶玉分封今膺於丕典仰憑燕翼用保延洪屬明命之已頒勵孝思而彌積慶靈追感夙夜增虔臣無任感幸激切之至謹奉表稱謝以聞臣某誠感誠慶頓首頓首再拜謹言

爲元德皇后升祔表二道

天

嗣天子臣某誠感誠慶頓首頓首再拜

上言臣今者升祔先后合饗神宗撥元辰於日官展鴻儀於太室允祐眷祐養舉典章虔伸若厲之心用佇來同之應伏冀繁陰不作愛景有融表穹昊之降靈俾聲明之茂著臣無任精虔激切之至謹奉表奏告以聞臣某誠感誠慶頓首頓首再拜謹言

又

嗣天子臣某誠惶誠懼頓首頓首再拜

上言臣比者伸劬勞之感展升祔之儀已祇考於元辰方虔修於合饗慮因陰睦或失禮容慰夕惕之交增祈神休之俯洽伏望克達霽景獲顯祥徵俾盛典之有成安孝思之無措臣無任精虔激切之至謹奉表奏告以聞臣某誠惶誠懼頓首頓首再拜謹言

謝祥瑞表一道

天

嗣天子臣某誠感誠慶頓首頓首再拜

上言伏以僊馭降臨聿當於陽月元辰肇紀

用答於上是顧令晨之載周乃契誠而仰薦靈心昭感垂嘉瑞以章明神貺欽永實至精而增積臣無任感幸激切之至謹奉表稱謝以聞臣某誠感誠慶頓首頓首再拜謹言

宋真宗御製玉京集卷之二

宋真宗御製玉京集卷之三

宣三

謝皇子加恩表一道

玉皇

嗣天子臣某誠感誠慶頓首頓首再拜

上言比者自天之祐下庇於本枝裂壤之封

獲頒於成命臣仰膺靈眷克盛帝國孺子勝

衣早憑丕蔭名邦祚土載峻寵章家邦之祉

實隆太紫之仁曷報惟思祗慄慎守於慶基

庶洽升平用承於大造臣無任感幸激切之

至謹奉表稱謝以聞臣誠感誠慶頓首頓首

再拜謹言

為疏決刑禁表一道

天

嗣天子臣某誠感誠慶頓首頓首再拜

上言伏念猥以眇冲撫茲億兆克隆繼體實

自降祥令以方屬長歲深傷縲繫將仰祈於

錫羨敢俯議於在寬是用躬臨各從原減冀

延不祐用保脩齡虔伸祇告之誠恭佇咸宜

之應謹奉表啓告以聞臣某誠感誠慶頓首

頓首再拜謹言

迎奉聖像表一道

天

嗣天子臣某誠感誠慶頓首頓首再拜

上言伏以答元命之符肇新於祕宇奉高真

之像已慶於成功僊馭遠迎中塗俯屆荷威

靈之所被故跋履之攸宜敢薦精衷用揚左

貺益期介祉以慰後來臣無任瞻望激切之

至謹奉表以聞臣某誠感誠慶頓首頓首再

拜謹言

謝立仗景色表一道

天

嗣天子臣某誠感誠慶頓首頓首再拜

上言伏以恭紹帝國允膺天祐盛儀每舉純

嘏必臻比者聿屆元正言陳朝禮願來庭於

萬國承錫祐於三靈旭景含和輿情胥悅蓋

萬穹之委鑒故景福以咸宜益勵養恭用酬

保人臣無任感幸激切之至謹奉表稱謝以

聞臣某誠感誠慶頓首頓首再拜謹言

謝皇后授冊表一道

天

嗣天子臣某誠感誠慶頓首頓首再拜

上言伏念猥以眇軀紹茲寶命思隆內則用

訓多方今者妙選元妃俾臨中饋庶宗祏而

仰奉期風化而下流爰考令辰恭膺茂典緬

瞻霄極實茂於福禧俯守璿圖愈懷於祗慄

臣無任感幸激切之至謹奉表稱謝以聞臣

某誠感誠慶頓首頓首再拜謹言

降聖節謝表一道

天

嗣天子臣某誠感誠慶頓首頓首再拜

上言伏以早紆鸞駕俯降中闈親聽寶音緬

聞鴻緒肇新令節用茂純禧今則聿屆首冬

復臨元日祺祥總至實顯於顧懷夙夜勸精

用承於保佑臣無任感幸激切之至謹奉表

稱謝以聞臣某誠感誠慶頓首頓首再拜謹

言

冬至謝表二道

嗣天子臣某誠感誠慶頓首頓首再拜

上言伏以建子之月履長之辰九域蒸黎克

隆於祉福萬齡命歷益洽於延洪臣內顧眇躬紹膺丕構無疆之佑曲荷於鑒臨若屬之心益隆於欽奉臣無任感幸激切之至謹奉表稱謝以聞臣某誠感誠慶頓首頓首再拜謹言

玉皇

嗣天子臣某誠感誠慶頓首頓首再拜上言臣祇守成基顧慙涼德膺上穹之錫祐致率土之洽平今以冬律戒期天正協節九圍底定成被於福禧五稼順成罔聞於疵癘荷紫清之既施增夙夜之戰兢期益勵於撫綏用永康於生植臣無任感幸激切之至謹奉表稱謝以聞臣某誠感誠慶頓首頓首再拜謹言

年節謝表一道

天

嗣天子臣某誠感誠慶頓首頓首再拜上言伏以三陽肇始萬彙咸新溥率來賓載脩於職貢照臨無外並洽於王正臣復紹慶靈誕膺保佑懷生之福既荷於昭彰報貺之

心愈增於祇慄臣無任感幸激切之至謹奉表稱謝以聞臣某誠感誠慶頓首頓首再拜謹言

謝聖祖降表一道

三清

嗣天子臣某誠感誠慶頓首頓首再拜上言今月十七日十八日獲於夕寐得奉靈期二十四日爰在禁庭肇紆飈駕丕休所集方冊未聞眇德載思戰兢罔措伏念臣紹承命曆臨撫烝黎夕惕靡忘夙興是念高穹之聽俯鑒於勵精率土之濱克諧於治定向者存頒祕錄恭展上儀實愧冲人遽揚盛節比者九天司命天尊神遊預兆倦馭下臻仰觀眸容俯聞寶訓清都景祐紛屬於有邦紫府高真誕恢於駿命此蓋三神介祉百福來同錫乃鴻禧彰于玄鑒敢不愈勤夙夜益務恪恭庶增祇慄之懷永報監觀之德臣無任感幸激切之至謹奉表稱謝以聞臣某誠感誠慶頓首頓首再拜謹言

上梁表一道

玉皇

嗣天子臣某誠感誠慶頓首頓首再拜上言伏以向者元符申錫靖館肇營建寶閣之宏規奉靈文之祕檢僞工有漸層構爰成言屆今辰率陞巨棟俾殊猷而允集荷介祉之下昭益勵黃恭用膺顧誕臣無任感幸激切之至謹奉表稱謝以聞臣某誠感誠慶頓首頓首再拜謹言

祈福表四道

聖祖天尊大帝

嗣天子臣某誠感誠慶頓首頓首再拜上言伏以慶靈下浹肇啓昌圖祉福無疆實期丕蔭臣永惟眇質思獲純禧敢虔望於清都用恭禱於鴻應伏望誕彰景貺以庇於家邦允勵精心庶安於海域臣無任精虔激切之至謹奉表奏告以聞臣某誠感誠慶頓首頓首再拜謹言

又

嗣天子臣某誠感誠慶頓首頓首再拜上言伏以靈謀降鑒世德儲積昭積累之鴻

仁佑盈成之丕緒臣願惟眇質克紹慶圖祇述精衷用祈鴻應伏望夤威克照祉福茂臻彰景貺於九清保崇基於億載臣無任精虔激切之至謹奉表奏告以聞臣某誠惶誠懼頓首頓首再拜謹言

又

嗣天子臣某誠惶誠懼頓首頓首再拜上言伏以長發之符克成於帝業不匱之孝思集於天祺載念臣祗荷慶靈惠綏區寓將析純嘏允勵精心伏望美應無疆祥徵丕顯愈勤繼服用報詒謀臣無任精虔激切之至謹奉表奏告以聞臣某誠惶誠懼頓首頓首再拜謹言

又

嗣天子臣某誠惶誠懼頓首頓首再拜上言伏以帝國之盛實自於發祥道陰之隆允期於降顧臣茂承丕緒思在無疆祗叩玄都庶諧有應伏望昭彰純嘏鑒佑下方愈極夤威用承覆冒臣無任精虔激切之至謹奉表奏告以聞臣某誠惶誠懼頓首頓首再拜

謹言

謝道場表一道

聖祖天尊大帝

嗣天子臣某誠感誠慶頓首頓首再拜

上言臣祗答降禎虔修法懺存隆孚佑愈罄精心慶五稼之順成仰懷丕蔭考九清之科教用達至誠高明洞照於丹衷興寐益欽於鴻應臣無任感幸激切之至謹奉表稱謝以聞臣某誠感誠慶頓首頓首再拜謹言

五嶽觀祥異表一道

玉皇

嗣天子臣某誠感誠慶頓首頓首再拜

上言伏以列嶽儲祥中區是仰集靈建宇宏構方新精感所通明徵斯顯表神心之鑒佑增人意之夤威內顧眇躬獲臻嘉應欽酬景貺倍勵素衷臣無任感幸激切之至謹奉表稱謝以聞臣某誠感誠慶頓首頓首再拜謹言

星見謝表一道

玉皇

嗣天子臣某誠感誠慶頓首頓首再拜

上言昨以祗謁禱庭欽崇於至道仰瞻珠緯濬發於丕禎觀瑞彩於德星見祥徵於寶曆太官飲至歲律未移霄極著明靈輝再覲穹蒼垂祐溥率同和冲眇之軀存臻於福祉凌兢之志愈切於繼承臣無任感幸激切之至謹奉表稱謝以聞臣某誠感誠慶頓首頓首再拜謹言

謝玉津園種成占城稻表一道

玉皇

嗣天子臣某誠感誠慶頓首頓首再拜

上言向者肅膺寶眷昭示嘉生自殊俗而結根屆中區而提質可滋瘠土足拒驕陽俾畎畝之農民保倉箱之歲事爰居靈囿肇伸播植之功暨涉商秋允副順成之望洪惟景貺茂集禎圖愈勵克恭奉承介祉臣無任感幸激切之至謹奉表稱謝以聞臣某誠感誠慶頓首頓首再拜謹言

謝降制立右表一道

玉皇

嗣天子臣某誠感誠慶頓首頓首再拜

上言伏以臣實愧眇躬獲膺寶命思崇內治用訓中區必微問以言求冀柔儀而允穆某氏早聞令德夙冠後庭將敷化於河洲俾正名於椒掖已頒明詔俯告外朝此蓋亨昊眷懷家邦集慶期茂揚於靈教庶祇奉於宗祏恭答景靈敢忘勵志臣無任感幸激切之至謹奉表稱謝以聞臣某誠感誠慶頓首頓首再拜謹言

謝景色表一道

玉皇

嗣天子臣某誠感誠慶頓首頓首再拜

上言伏以臣獲紹成基誕膺丕佑將與盛典必荷殊禎比者言舉舊章式崇中饋當外庭之誕告遽美應以來臻景物融和祺祥昭顯但內增於乾華用仰答於高明臣無任感幸激切之至謹奉表稱謝以聞臣某誠感誠慶頓首頓首再拜謹言

謝禮畢表二道

玉皇

嗣天子臣某誠感誠慶頓首頓首再拜

上言伏以靈期昭示真馭格恩錫以天禧建茲帝緒欽承寶命冀答於丕休祗率精衷用伸於明薦至神委鑒美應誕敷景氣融和祺祥昭顯紹膺純祉允茂珍圖敢忘夙夜之憂勤以答圓清之貺施臣無任感幸激切之至謹奉表稱謝以聞臣某誠感誠慶頓首頓首再拜謹言

又

嗣天子臣某誠感誠慶頓首頓首再拜

上言伏以肇膺寶命旋降真遊述帝緒之赫長示天休之紛屬至神保佑允協於格思嘉薦茲芬敢伸於昭報虔誠洞達美應章明旭景流輝殊禎表異載惟涼薄克荷監觀勵精意而有加答景靈而無捨臣無任感幸激切之至謹奉表稱謝以聞臣某誠感誠慶頓首頓首再拜謹言

承天節表一道

玉皇

嗣天子臣某誠感誠慶頓首頓首再拜

上言伏以宵旰降康祖宗流慶顧惟眇德獲紹丕圖當仲呂之御展乃荷蘭之協吉隆平之緒昭介祉於中區保佑之徽荷錫禧於霄極愈思勵翼用答監觀臣無任知感戰汗激切之至謹奉表稱謝以聞臣某誠感誠慶頓首頓首再拜謹言

謝迎奉聖像瑞應表一道

玉皇

嗣天子臣某誠感誠慶頓首頓首再拜

上言昨以緬瞻福地慕肖像而成功祗遣輔臣奉儀遊而戒路存承委鑒誕集繁禱屬踐履於洪川實紛綸於景貺奉安恭館永伸欽翼之心錫祐睿圖常佇昭彰之應臣無任感幸激切之至謹奉表稱謝以聞臣某誠感誠慶頓首頓首再拜謹言

宋真宗御製玉京集卷之三

宋真宗御製玉京集卷之四

官四

天貺節表二道

三清

臣名言向者紫壇潔祭將建於元封綠字降祥實昭於景既肇新佳節用顯靈期霄極降康紹膺於多福璿璣仰察復屆於今辰況施永懷誠明益勵臣無任感幸激切之至謹奉表稱謝以聞臣名誠感誠慶頓首頓首謹言

玉皇

臣名言向者日觀建封將成於大典河圖錫祐遠顯於鴻禧紀丕應於元辰肇嘉名於今節寅威之志故夙夜以無忘保久之祥屬歲時而斯浹益期齋懌用答顧懷臣無任感幸激切之至謹奉表稱謝以聞臣名誠感誠慶頓首頓首謹言

謝上尊號表二道

天

臣名言虔議升中用伸報本勉從群望祇受崇名仰荷天休俯增夕惕臣名誠感誠幸頓首頓首竊念臣繼臨大寶嗣撫群生顧慙

寡昧之姿克致隆平之治蓋三辰之垂祐俾百福以咸宜由是恭答元符聿陳封祀春言率土固薦徽稱載揆令辰允膺茂典由宵旰之降鑒成億兆之樂推敢不益勵小心愈勤昭事思上時於顧諟唯下泰於蒸黎臣無任齋懌戰汗激切之至謹奉表稱謝以聞臣名誠感誠慶頓首頓首謹言

玉皇

臣名言伏以高明垂視用協於無私歷數會昌允鍾於有德玄休俯洽徽號爰增雖仰荷於慶靈實內慙於寡昧竊念臣誕膺景貺嗣守成基賴穹昊之眷懷奉祖宗之謀訓夙宵自勵小心常畏於三辰遐邇粗康至治未臻於萬彙屬以青陽叶吉黃素垂文式醺元命之符虔採上封之議非敢揚於盛節但期答於洪禧宣意斑白群黎搢紳庶尹封章並獻稱謂載加顧溢美以爲虞匪當仁而可處屢形敦讓靡奪輿情又念儀天尊道之名蓋施於昭事寶應章感之旨寔契於降祥難遽因辭遽從祇受埃克終於祀禮方事舉於冊書

輒伸薦告之文庶達寅恭之志永惟涼薄彌不迨違謹奉表啓謝以聞臣名誠感誠懼頓首頓首謹言

謝偃兵表二道

玉皇

臣名言自續丕圖常虞黷武非因式過於寇亂未嘗輕舉於甲兵載念先后開基中區未靖每興薄伐止爲弔民今則穹壤春懷書文無外集茲成命屬于冲人祇慄內增寤寐無措是以俯伸精懇仰謝鴻靈伏冀昭介社於祖宗示降祥於冲眇勵至誠而有翼敷丕應而無垠臣無任知感祈恩激切屏營之至謹奉表奏告以聞臣名誠惶誠懼頓首頓首謹言

聖祖天尊大帝

臣名言恭承丕歷常戒佳兵苟當疆場之無虞未嘗戈甲而先舉載念兩朝創統諸夏未康每興薄伐之師蓋徇徠來之志今則慶靈所祐區宇大同猥以眇躬續茲鴻緒內惟戰慄交集衷心敢罄精誠用伸昭謝伏望降

賴於二后介祉於沖人聲勵由東誕期至應
臣無任精虔激切之至謹奉表奏告以聞
名誠惶誠懼頓首頓首謹言

為二聖祈謝表二道

玉皇

臣名言臣祇荷鴻明紹臨縣寓好生之德常
稟於高穹黷武之譏敢忘於古訓蓋每因於
禦敵乃暫動於興師載念二后御圖四方未
一蒸黎無告即用軫憂戰伐伸威止期平亂
實靡佳兵之志本懷濟物之心今則萬域攸
同三神所祐追念干戈之未戢諒惟寤寐以
責躬伏願敷介福於祖宗錫純禧於冲眇申
衷之感增夕惕以交深不宰之仁佇天祺而
斯洽臣無任精虔激切之至謹奉表奏告以
聞臣名誠惶誠懼頓首頓首謹言

聖祖天尊大帝

臣名言臣內惟源薄祇紹慶靈法天道而予
民好生是務肆威武而樂戰誓志不為每屬
興師莫非應敵載念祖宗創業書軌未同俯
徇猥來雖伸於薄伐暨當克勝即用於懷柔

志本異於佳兵心但期於拯溺今則上旻敷
佑浹寓大康追思未息於干戈或慮莫分於
玉石是以虔伸精意願佇鴻禎伏望福二后
於上仙庇沖人於縉服罄輪丹膺祇謝皇明
恭惟察懇惻之心靡忘於寤寐錫紛綸之祉
永佑於家邦臣無任祈恩懇禱激切之至謹
奉表奏告以聞臣名誠惶誠懼頓首頓首謹
言

祈雨表一道

玉皇

臣名言伏以災沴之生信由於人事精誠所
至必動於靈心竊念臣獲嗣丕基實懇昧道
徒懷惕勵固致和平願雨澤之久愆慮農耕
之失望雖再形於懇禱尚未克於感通啓慶
不遑鑒寐無措三辰垂戒蓋德教之有虧九
穀靡登在蒸黎而可念是以重形悃悃仰祈
高明伏願息鳴鳶之風駐離畢之月流滋鴻
澍絳彼嘉生剪爪之勤故弗違於終日膚寸
之潤期普濟於大田臣無任精虔激切之至
謹奉表奏告以聞臣名誠惶誠懼頓首頓首

謹言

謝雨表二道

玉皇

臣名言臣聞風雨不時誠由於寡昧乾坤垂
佑乃致於感通竊以日獲嗣慶基未臻至治
刑政有失早曠為災民將廢於春耕心實增
於夕惕是以屢伸精禱庶格靈休果膏澤以
應期俾原田而無害此蓋高明顧諟博厚春
懷豈涼德之可當諒群生之共荷既霑既足
俯運於度祈克儉克勤愈懷於祇畏冀罔違
於勵翼用昭答於鑒觀臣無任感幸激切之
至謹奉表稱謝以聞臣名誠感誠慶頓首頓
首謹言

又

臣名言伏蒙聖慈特賜降雨者臣聞風雨不
時誠由於寡昧乾坤垂祐乃致於感通臣名
誠歡誠慶頓首頓首伏念臣獲嗣丕圖未臻
至治刑政有失早曠為災纔露精誠普施甘
雨此蓋睿慈委曲聖眷彌隆豈涼德而可當
諒群生而同慶得觀豐稔樂上瑞於寒區更

勸實恭思少酬於生育_臣無任感恩荷聖歡
忭榮懼之至謹奉表稱謝以聞_臣名誠歡誠
慶頓首頓首謹言

又祈雨表四道

玉皇

_臣名言近以亢陽為沴甘雨未霑慮有損於
嘉生致莫登於善歲仰瞻層宙備形顯苦之
懷俯濟大田靡獲霈然之應敢再伸於精意
庶克動於靈心俾鴻澍而允諧使中時而協
望凌兢斯積鑒佑期臻_臣無任精虔激切之
至謹奉表奏告以聞_臣名誠惶誠懼頓首頓
首謹言

又

_臣名言近以甘澤未霑大田慮損倉箱之望
莫保於順成夙夜之心靡遑於寧處是以仰
瞻環極疊貢精衷伏望洞鑒誠明誕敷福應
俾驕陽之退舍使嘉雨之順時濟平秩之民
克諧於善熟答無疆之祐敢急於寅威_臣無
任精虔激切之至謹奉表奏告以聞_臣名誠
惶誠懼頓首頓首謹言

聖祖天尊大帝

_臣名言近以自屆春時頗愆十雨永言農事
慮奏千箱雖仰叩於清都尚未霑於鴻靈俯
慙涼薄益用兢心再禱慶靈虔思乎祐俾其
濛之斯降庶既渥而可諧允獲朝濟敢渝夕
惕_臣無任精虔激切之至謹奉表奏告以聞
_臣名誠惶誠懼頓首頓首謹言

又

_臣名言近以灰管言新油雲罕布祁祁之澤
莫潤於原田芄芄之苗慮傷於億庶雖慶靈
而仰叩顧霑洽而未諧伏望俯照至虔誕隆
丕應俾茲零雨濟彼中疇夙夜之心實戰兢
而無措紫清之胝庶昭感而有孚_臣無任精
虔激切之至謹奉表奏告以聞_臣名誠惶誠
懼頓首頓首謹言

為火罪已表一道

天

_臣名言伏以高明降顧實顯諸仁冲眇承基
宜忘罪已中謝竊念_臣雖城後夜烈焰延焚
火禁不修致震驚之斯作政經內省乃祗畏

而交增今則寤寐載思啓處無措敢述宣於
丹抱俟臨鑒於層宇_臣無任戰兢憂惶激切
之至謹奉表待命以聞_臣名誠恐誠懼頓首
頓首謹言

謝降天書表一道

天

_臣名言_臣嗣守慶基獲膺駿命當上春之旭
旦受大帝之祥符靈貺存臻丹衷增惕_臣名
誠惶誠恐頓首頓首伏念_臣猥以涼薄寅奉
宗祧幸一紀于茲荷庶邦咸入撫綏黎獻祇
畏穹玄慮政之未孚懼德之弗類常加勸翼
罔敢怠遑豈謂蒼昊儲祥高真降鑒爰因獻
歲之始特垂秘籙之文諭以十世之延長誨
以為治之清靜周旋戒勗俯伏震驚_臣敢不
上奉神休恭膺純錫虔守大中之道用康率
土之民益誓精勤少酬覆露_臣無任懇禱激
切之至謹奉表稱謝以聞_臣名誠感誠慶頓
首頓首謹言

謝東封禮畢表一道

天

臣名言近者寶錄儲祥岱宗展禮荷洪休之
載洽俾茂典以無違臣誠感誠幸頓首頓首
伏念臣嗣守成基撫臨寓縣內循寡薄莫庇
蒸黎徒惕厲以自勤何施德教顧治平而僅
致實繁明靈屬秘檢之下臨因與民之上請
爰登喬嶽用答元符為蒼璧而真黃琮精誠
雖竭賓百神而來萬國神眇眇愍期雲起
於園封尚虞雨至於中既今則泥金告畢瘞
玉言終盛禮咸宣殊禎顯應六勝初往免迷
駕於襄城七萃來歸克受釐於宣室非高明
之眷佑豈福祉之誕膺唯當勵翼君臨憂勤
子育庶阜安於品物用昭報於穹昊臣無任
祇畏戰汗屏營之至謹奉表稱謝以聞臣名
誠感誠慶頓首頓首謹言

謝上二聖謚號表一道

天

臣名言恭答元符登封神徽仲嚴配於宮
壤增尊謚於祖宗盛禮載揚景靈是荷臣名
誠感誠幸頓首頓首謹言臣顧慙涼德嗣守
成基俯慶隆平仰懷錫羨是以勉從興識虔

舉上儀陳禮祀於喬峯聿崇大報益微名於
清廟用展孝思伏願眷佑下臨典章克振獲
諧追遠之志克資降鑒之明敢不寅畏居心
憂勤思治庶保綏於萬國期對越於三辰臣
名無任齋慄戰汗激切之至謹奉表稱謝以
聞臣名誠感誠慶頓首頓首謹言

謝秋成表一道

玉皇

臣名言臣聞庶彙生成並繫於妙道三天政
令咸稟於虛皇既福應以攸彰實降祥而允
賴臣夙慙涼德獲嗣成基百姓為心常思於
惠養一夫失所豈敢於遑寧由休惕以疚懷
致杳冥而垂佑瞻言南畝方屆中秋望蕪
之原田盈芄芄之穡事為水為旱雖申儆於
沖人如茨如梁寔無愆於多稼允致豐年之
上瑞用安比屋之蒸黎此蓋正直儲靈高明
降監由元和之交感俾嘉應以昭宣敢不履
薄增虞乘奔積懼俯慎君臨之道仰符子育
之仁臣無任感幸激切之至謹奉表稱謝以
聞臣誠感誠慶頓首頓首謹言

謝今歲無事表三道

天

臣名言臣獲以寡昧恭紹慶靈祇畏三神雖
小心而罔舍在宥萬國顧明德以多慙今者
杓建云周湯春俯屆嘉生允植善氣交臻蓋
穹昊之儲靈故黔黎之集福敢不益思齋潔
用答顧懷若屬之誠既夙宵而增惕紹至之
祐期區夏以膺常臣無任感幸激切之至謹
奉表稱謝以聞臣名誠感誠慶頓首頓首謹
言

三清

臣名言臣獲守丕基有慙盛德乘奔之志唯
戒於怠遑降鑒之明誕昭於顧提今以言周
斗建肇屆天正疵癘靡興封疆絕警祇荷九
陽之眷佑用諧萬國之晏寧恭答慶靈愈增
虔畢期明微之紹至俾庶彙以常康露精
衷佇迴嘉應臣無任感幸激切之至謹奉表
稱謝以聞臣名誠感誠慶頓首頓首謹言

謝天慶節表三道

天

臣名言臣顧慙寡昧祇荷景靈俾臣夏之底
寧賴穹旻之委鑒向以誕膺眷祐昭錫珍符
肇紀元辰用揚丕應今則載周月紀益茂神
休答玄貺於高明但增夕惕降鴻禧於溥率
愈冀日新庶保治平永綏蠢動無任感幸
激切之至謹奉表稱謝以聞臣名誠感誠慶
頓首頓首謹言

三清

臣名言臣紹膺命歷獲撫中區仰荷眷懷用
康庶彙向以青陽肇屆綠曆存頌祇協靈辰
○ 聿新令節今則載周四序紛委千祥齋慄之
心故無忘於寤寐高明之祐期紹集於家邦
虔露精衷佇迴玄應無任感幸激切之至
謹奉表稱謝以聞臣名誠感誠慶頓首頓首
謹言

玉皇

臣名言臣獲嗣寶圖實慙菲德俾人倫之交
泰由天意之曲成向以貺施下臨珍符申錫
仰儲休於獻歲紀協吉於靈辰今則言屆履
端益彰降鑒三儀願設實增祗畏之誠九土

樂康更時格居之應庶紹膺於景福用永在
於群生臣無任感幸激切之至謹奉表稱謝
以聞臣名誠感誠慶頓首頓首謹言

宋真宗御製玉京集卷之四

宋真宗御製玉京集卷之五

官五

告謝詞六道

天

臣早因主鬯遂至承祧但思憂勤罔敢逸豫
荐更歲律馴致成平蓋襲慶於祖宗每推功
於穹昊爰陟東岱俯順下民殊庭瞻懷休祐
斯及肝鬢無際符瑞存臻惟仰頌於昭回誠
不忘於戒懼臣無任懇倒之至謹詞

又

臣纂承鴻業欽奉上天雖萬務憂勤不忘宵
旰而八方清謐實自鑒觀寶符已示於殊楨
真馭復宣於景命內惟涼薄彌負戰兢但持
勵翼之懷庶答高明之賜臣無任懇倒之至
謹詞

玉皇

伏以三界攸宗十方所仰尊惟太上位極高
真蓋浩劫以難窮固強名之不及臣叨膺寶
曆嗣撫蒸黎荷茲瞻懷蒙被純嘏深惟大幸
併在眇躬寢寐不遑祇慄無措臣無任懇倒
之至謹詞

又

伏以造物之源咸歸於大道列真之長是處
於高天瞻祐所臨欽承敢忘內慙涼德叨嗣
慶基雖已洽隆平而益深祇畏至誠斯馨景
貺幸垂敢不愈勵精心虔遵寶訓永期昭事
少答顧懷臣無任懇倒之至謹詞

聖祖天尊大帝

伏以高極九天位尊眾聖是推寶命下迨渾
人若乃銷偃五兵每歸功於道廢懷柔萬國
實受賜於真庭雖寅畏之常深於德教而何
有屢膺戩穀交霈純禧顧負荷以莫違惟兢
惕而彌厚臣無任懇倒之至謹詞

東嶽岱嶽觀

三清

伏以無得而升天所以為大莫知其始道於
是居尊竊念臣祗謁玉圖薦膺瑞命喬峯檢玉
已藉於江茅吉壤瘞瘳復觀於汾鼎賴高明
之眷祐俾典禮之昭彰由是瞻紀號之名山
顧集靈之珍宇式嚴清醮用答鴻休期精意
以洞神竦殊楨而狎至臣無任懇倒之至謹

詞

謝聖祖降臨詞二道

玉皇

伏以無始太虛莫窮真蹟含生有象皆被大
恩萬化推尊百王受命惟冲人之寡薄紹曆
數之延洪獲蹈真風遐依聖座清宵警寐遽
降於靈仙紫殿凝神恭承於秘訓敢不虔遵
景貺愈勵深衷益脩精潔之儀用伸致謝之
禮臣無任懇倒之至謹詞

聖祖天尊大帝

伏以治國之基奉天為大化民之本崇道居
先在欽翼之不忘故感通而斯至殊祥兆夢
具取應期屬清夜之方闌降紫宸而彌久躬
宣聖訓昭示靈徵享是不休實彰涼德謹當
益勤庶政上答洪恩臣無任懇倒之至謹詞

祈福庇民詞六道

天

伏以秉茲一氣總彼萬靈實覆育於群生用
鑒觀於率土竊念鴻基嗣守景貺荐膺華粗
致於治平故無忘於惕厲尚虞品彙罔獲晏

安允資下濟之靈俾協威寧之治是以虔伸
清醮聲達素衷伏望祥降九清惠流六合星
躔靡爽年穀有成銜漳泰華之封疆場不聲
廣漢番禹之域縣道常康凡混車書並消疵
癘儻荷高明之賜愈增齋懌之心臣無任懇
倒之至謹詞

三清

伏以混元之教無方之神蓋典治於百靈用
生成於萬有竊念欽承駿命紹撫中區期茂
育於黎氓但祇畏於穹昊尚虞涼薄罔致隆
平思荐擁於殊楨爰仰祈於純錫是以虔修
清醮用達素衷伏望玄應昭彰黔民富壽三
辰順序百穀用成交河遼海之封永通聲教
五嶺二江之域常獲底寧克協惠綏允資顧
謁敢勵寅恭之意載求保佑之仁臣無任懇
倒之至謹詞

聖祖天尊大帝

伏以炳煥威靈發鴻瑞命精心所仰純錫攸
臻將下庇於蒸黎實上憑於丕應伏冀人無
疵癘歲保順成十雨協期五星順軌偃七兵

於率土和一氣於含生清醴宿陳用祈於降
鑒洪禧載洽允賴於儲休臣無任懇倒之至
謹詞

又

伏以俯祐蒸民允資神道上迴玄鑒必勵精
心竊念嗣撫中區內慙闕政去秋多稼頗失
於歲功今載甫田益虞於天厲是以素秉下
聲鴻福仰祈伏冀風雨不愆倉箱有望恭俟
昭彰之應彌增戰慄之懷臣無任懇倒之至
謹詞

聖祖天尊大帝

伏以含生之患雖默定而有期錫類之祥必
鴻禧而可禱緬瞻戎壘俯介邊陲屬洪濤之
流行慮群倫之失所將祈景貺敢薦精衷庶
洞照於寅威用誕敷於祉福俾民災之弭息
賴天祐之昭彰臣無任懇倒之至謹詞

太清宮

聖衆

竊念猥以眇躬紹臨大統荷百靈而降鑒俾
九寓以咸宜瞻瀨水之福庭有清都之祕館

實昭介祉俯庇含生是以祗遣廷臣遠伸潔
醴載形密疏聿道丹衷冀不昧於至神用誕
敷於景貺臣無任懇倒之至謹詞

謝天禱節詞一道

聖祖天尊大帝

伏以明靈之顧既昭昭而下臨祇畏之心乃
乾乾而上達向者長贏之月鬱蒼之區方展
於元封荐頒於祕檢紀茲令序用志於延祥
錫以繁禧彌彰於降鑒載臨吉日虔仰清都
敢伸昭薦之精衷益佇來同之美應臣無任
懇倒之至謹詞

會靈觀興工詞一道

伏以靈鑒錫符荐承於丕應精心報貺實聲
於至誠竊念躬接謨言眇聞鴻緒肇建集真
之宇用昭長發之符爰揆日以聚工遽延祥
而介祉緬瞻恭館仰謝繁禧期貯饗以下垂
庶靖恭而上達臣無任懇倒之至謹詞

景靈宮興工詞一道

玉皇

伏以僊遊昭格恭覲於睟儀寶誥欽承緬聞

於丕緒荷發祥而斯在期錫類以無疆乃葺
宇於福庭佇降真於霄極庶工經始慎考於
元辰嘉應流禎誕昭於景貺敢虔伸於精意
用祇答於明禱臣無任懇倒之至謹詞

皇子生辰詞二道

天

伏以臣紹膺元曆實愧眇冲獲茂本枝允昭
貺施瞻言孺子荐屆生辰承保佑之至靈克
諧安乂感高明之介祉益勵寅恭敢聲達於
精衷冀永敷於純錫臣無任懇倒之至謹詞

玉皇

伏以臣紹膺命曆實荷慶靈仰上帝之眷懷
俾本枝之蕃茂春言繼體俯及勝衣屬生日
之戒辰感神心之降鑒敢伸精意用答鴻禧
庶曲茂於延祥俾永膺於介福臣無任懇倒
之至謹詞

祀事祈晴詞一道

三清

伏以妙道無方至神虛受獲膺保佑諒在虔
恭比者言徇輿情恭修潔祀將川塗而載涉

恐雨雪以交零致茲危從之人因乃泥塗之事敢伸精意冀格正休庶自啓行暨臨旋踵克免常陰之患允彰降鑒之靈臣無任懇倒之至謹詞

為蟲螟詞二道

三清

伏以強名之道與太始以俱生不宰之神蓋群倫而總治竊念恭膺命曆唯務戰兢惠養黎元常期昭泰春都畿之接壤屬農事之方興遽產飛蝗漸傷多稼實仰資於天鑒用俯殄於人災是以祇竭素衷上祈丕應伏望清都降祐金闕儲祥俾疢癘之咸消使和平之溥洽明明之福儻荷於來成懷懷之心愈思於若厲臣無任懇倒之至謹詞

玉皇

伏以百神受職咸聽於上靈萬彙化成並資於至道洪惟丕應實顯洪休竊念祇嗣慶基有慙涼德惟精心而自勵庶和氣以常臻屬以都畿暨茲開輔顧農耕而屆候遽螟螣而為災思上格於明徵敢下伸於精意庶膺純

錫以兆豐年伏望玄感升聞紫清委鑒俾嘉生之並育致率土之咸寧蠢爾之民儻承於保佑惕然之志愈積於嚴恭臣無任懇倒之至謹詞

為迎鑄聖像詞一道

天

伏以比者擇福地而範銘允成肖像詔輔臣而迎奉仰祝降禱顧誕以誕敷錫福禧而紹至明靈春祐景物清和跋履咸宜存承於昭鑒至虔報祝愈勵於精心臣無任懇倒之至謹詞

為聖像在路詞二道

天

伏以殊庭肇建答眷佑之靈真御仰摹勸欽崇之意元辰協吉迎春戒期丕應延祥感通實冀適當煩暑常保清和俾跋履之咸宜緊高明而錫祐臣無任懇倒之至謹詞

三清

伏以誕膺春祐祇竭誠明恭館肇新用昭介祉辟容虔寫獲觀成功揆吉日以在辰奉真

儀而戒路伏冀鬱蒸靡盛氣序成和俾利涉之攸宜彰炳靈之降鑒臣無任懇倒之至謹詞

景靈宮興謝祥瑞詞二道

天

伏以昭彰之應允協於有孚齋懷之心實增於無斃竊念僊遊俯降寶緒欽承佇飈駕以常迴法琳宮而必葦繕完茲始符瑞荐臻由是緬望殊庭恭伸精意冀答三神之祐並期百福之臻臣無任懇倒之至謹詞

又

伏以真馭下臨奉晬儀之炳煥鴻源迭示承丕祐之昭彰既寶誨而欽承故純禧而仰答擇神區之爽塏建恭館之宏清初吉在辰方興於庶役維祺協應爰觀於嘉祥敢伸勵冀之心用報紛綸之祉臣無任懇倒之至謹詞

謝祀汾陰禮成詞二道

東嶽王母殿

伏以龜臺福地夙挺神居日觀喬峯下迴僊馭靈遊所屬善應實昭昨以祇答珍符虔修

封祀俄慰僊來於西土復祈介福於方丘俾
茂典之有成賴殊休之伸錫是以遐瞻祕宇
恭薦精衷期玄感以紹臨庶鴻禧之永洽
無任懇倒之至謹詞

泗洲塔下

伏以化流真俗惠浹人天莫五達之名區挺
百常之寶塔昨以時巡冀壤親祀坤靈典禮
咸昭書文無外荷明祇之協吉資大士之儲
休是以遐薦精衷用時介福冀悲心之不捨
俾繁祉以存臻無任懇倒之至謹詞

滋福殿道場謝降臨詞一道

聖祖天尊大帝

伏以長發之符啓鴻源而有自來成之佑昭
丕應以無方膺貺施以存臻勵齊明而斯積
屬以辟容作繪祕宇延真祇禱于中奉蕭鄒
而增惕監觀在上迴欵駕以儲祥玉羽群嬉
瑤觴徧舉緬懷錫類實用戰兢恭答凝禎豈
忘欽翼敢罄伸於精意庶仰答於景靈無
任懇倒之至謹詞

宋真宗御製玉京集卷之五

宋真宗御製玉京集卷之六

官六

為皇子事詞一道

聖祖天尊大帝

伏以靈禧丕顯道蔭博臨承累洽于天源顯
多昌于世曾皇子未克諧成立成繫寵綬具
章綬而寶誨屢頒分珪玉而列爵爰啓燕翼
之訓垂慶緒以無疆祇畏之心率真科而仰
報無任懇倒之至謹詞

祈福詞一道

聖祖天尊大帝

竊思錫類儲仁承基紹緒蓋仰依于積祐
乃俯洽于多祥今以炎氣方新火旗攸祝奉
真科于琳館達精意于璇都伏願九城晏寧
五稼豐稔黎元靡于疾癘家邦集于福禧繼
孝之心敢忘于兢惕來同之杜常冀子昭彰
無任懇倒之至謹詞

謝刻玉祥瑞詞一道

天尊

向以茂膺寶命申錫元符聲建琳宮用昭
丕貺祕文仰奉將置於琅函溫玉言刊先奉

於綠字式當協吉方在致虔願河洛之書近
臨於外次瞻紫清之座益勵於至恭無任
懇倒之至謹詞

為奉祀事詞九道

三清

玉清
上清
太清

臣仰報純禧俯從僊望屬鄉仙宇將展於朝
脩春首令辰式遵於時邁敢伸嘉薦用禱祥
徵伏冀霄極降禎綿區俾人使輿情而咸若
致盛典以斯成春祐之靈儻符於昭感寅畏
之志彌切於至虔無任懇倒之至謹詞

聖祖天尊大帝

臣順考古經適宣茂則靈區款謁方祝於純
禧法從戒期將詢於吉日佇祥徵而允洽故
精意以虔伸伏冀佑錫高旻慶敷綿寓俾人
祗而胥悅使典禮之咸宜惕惕之心敢忘於
善禱穰穰之應益俟於來同無任懇倒之
至謹詞

三清

玉清
上清
太清

臣祇考禮經恭懷道蔭琳宮款謁已戒於先
期玉輅省方即登於夷路冀誕敷於景貺敢

仰叩於清都伏冀萬國咸康千祥紛委克揚
茂則允賴純禧仰望殊庭顧精衷而斯薦益
新鴻應昭介祉而無疆臣無任懇倒之至謹
詞

三清太一

臣緬瞻靈域祇謁僊祠協吉元龜已謀於剛
日戒期大輅即涉於皇衢思介祉之誕隆故
至誠而仰薦伏冀克揚嘉應茂集丕禎俾區
寓之晏康致禮容之昭顯殊庭瞻望罄述於
精衷神鑒章明允期於鴻福臣無任懇倒之
至謹詞

聖祖天尊大帝

臣仰懷純錫俯勵至精三檜之庭將伸於款
謁六聯之駕方屬於戒期思眷祐以誕敷故
寅威而昭薦伏冀高明降顧祉福來成俾澤
率以咸康使禮容而克展無疆之錫儻荷於
鑒觀不匱之心益期於祇懽臣無任懇倒之
至謹詞

三清遊福

臣欽崇秘道款謁真官六轡省方已戒期於

春序九符即路將展禮於靈辰思鴻應之有
敷勵精心而無敦伏冀高明垂貺澤率同歡
俾茂實之克揚侯丕休之允屬夙興之意敢
怠於至虔降鑒之仁益祈於丕顯臣無任懇
倒之至謹詞

聖祖天尊大帝

臣緬望屬鄉載稽春序靈宮款謁已吉於先
期齋輅省方俯臨於剛日佇凝禎之昭錫伸
虔禱之勵精伏冀茂集千祥保康萬彙克揚
盛節允賴鴻休祇懽之懷顧夙宵而靡舍鑒
觀之祐期紫清而誕敷臣無任懇倒之至謹
詞

謝玉清昭應宮奉安聖像祥瑞詞一道

三清

臣向以獲聞丕緒思佑寶圖乃勵至精用揚
累盛申詔列郡虔奉真儀建恭館於譙都方
興茂則仰僊遊於瀟嶽遽集殊禎允協靈期
再翔瑞羽祇荷昭彰之應實增齊懽之心臣
無任懇倒之至謹詞

先天節詞一道

三清

伏以紀颺馭之下臨肇新今序顧靈場之中
啓用報鴻禎昭感有敷祥經丕觀集翩翩之
珍羽見浹洽之純禧仰眷祐之心永隆於景
貺屬寅恭之志常守於慶基臣無任懇倒之
至謹詞

內中設醮謝祥瑞詞一道

三清

臣紹膺寶命繼受珎符顧盛典之增修遽祥
禎而昭顯商雲綢彩僊羽流音穹厚之心表
顧懷而斯在夙宵之志聲勵翼而攸勤中禁
密清醮筵祇肅真垂鑒佑洞察寅威臣無任
懇倒之至謹詞

上清宮設醮謝祥瑞詞一道

三清

臣恭續成基誕膺丕貺方琳官而順拜爰霄
極而降衷嘉氣絪縕靈禽頡頏荷高昊之鴻
應俯佑禎圖勵明發之小心仰醺靈眷瞻言
靖館恭啓醮筵期委鑒之昭章洞至誠之欽
翼臣無任懇倒之至謹詞

為大事詞十三道

三清 王清昭應宮

臣顧以眇躬續茲大寶雖純禧之淳洽實至治之未臻屬以宮城偶延焚燎眷言朝列頗屬震驚雖人事之有因敢忘於祗畏庶靈謀之不昧曲照於戰兢虔達中懷用伸昭謝臣無任懇倒之至謹詞

玉皇

臣紹撫中區有慙盛德雖炳靈之曲祐然制治之失中屬以藩房燭茲遺燼久方從於撲滅遂願致於延燒誠則因人敢忘罪已但思抑畏以務增修庶協側身九期降顧臣無任懇倒之至謹詞

聖祖天尊大帝

臣仰承保佑但積寅威俯念震驚靡違宣處蓋由王邸不謹於周防乃致宮城頗延於焚燎實慙人事莫副靈心引咎之懷但兢兢而無捨昭謝之懇庶明明而曲臨臣無任懇倒之至謹詞

北極

臣永惟涼德仰紹丕圖雖明發以自勤顧政經而多闕因茲王邸不謹於防閑遽致宮城頗延於焚燎敢忘引咎以謝皇靈允冀儲仁洞明丹懇臣無任懇倒之至謹詞

天書

臣內顧沖人存膺瑞命雖靡忘於恭已實無報於降禎餘燼相延偶興於王邸連覺莫遏遂及於宮城載念震驚愈增祗慄敢思引咎用謝錫符臣無任懇倒之至謹詞

太祖皇帝

臣祗紹慶基茂膺蕃錫顧惟涼德靡報發祥屬烈燄之相延自維城而欵燭既難嚮爾遂致焚如內顧眇沖有虧於申儆仰懷夙累伏積於多慙昭謝宗祊敢忘寤寐臣無任懇倒之至謹詞

太宗皇帝

臣欽承命歷祗紹基圖申儆有虧延災斯作顧茲遺燼偶發於宮城致彼炎煙頗驚於民聽戴惟人事之不謹實慙邦治之無聞兢業之懷靡違於明發昭謝之志庶罄於幸修臣

無任懇倒之至謹詞

二星殿

伏以天顧之仁實膺於保佑君臨之德但嫺於眇沖火禁罔修宮城延燎蓋不謹於人事敢有惻於靈心昭謝著明敢忘克己恭伸精意允鑒至虔臣無任懇倒之至謹詞

翊聖

伏以沖眇之姿仰膺於寶命兢業之志庶答於鴻禎言屬威藩偶忘周慎遂令烈燄遽有延燒既觀震驚益懷祗畏敢忘咎已用謝炳靈臣無任懇倒之至謹詞

諸小殿

竊以命歷仰承茂臻景貺眇沖俯念莫報不祥由不謹於維城致延災於烈燄震驚中禁焚燎端聞思盛德之靡昭積丹心之引咎敢伸致謝允冀俯臨臣無任懇倒之至謹詞

三清 上清

臣眇沖之德靡足感通穹昊之仁誕回春顧莫洽建中之治遽生炎上之祥維城偶失於慎微烈燄欵禱於延燎載惟菲薄敢急責躬

祇述誠明庶伸昭謝臣無任懇倒之至謹詞

玉皇

臣願以眇躬紹茲丕歷雖靡忘於兢業蓋偶
爽於隄防藩邸之中遽因遺燼端闢之內遂
致延燒思有失於慎微實自際於克已恭伸
昭謝允鑒至誠臣無任懇倒之至謹詞

聖祖天尊大帝

臣續紹慶圖祇畏靈命雖懷戰慄靡報鑒觀
烈燄延災偶興於王邸環廊莫救遽及於端
門內省眇冲靡遑寧處庶鳴源而昭謝敢精
意而洞伸臣無任懇倒之至謹詞

宋真宗御製玉京集卷之六

太上濟度章教卷上

官七

章

延生解厄章七曜齊用

具位臣某誠惶誠恐稽首頓首弄拜上言臣
滋叨真秩揔暢玄風凡激切以皈投盡懇懇
而敷奏臣謹據齋意臣仰惟圓穹廣覆列緯
經行司下土之機祥察人生之禍福况命分
枝輪運列祿刑六甲三元周行歲月三災九
厄巡察日時自非請命以扶衰易俾消災而
益算謹為拜章一通上聞三天伏望帝恩昭
曠宸澤敷羅特降勅命宣告日月星宿璇璣
玉衡三天玄曹十二分野六十甲子主宰官
君特為齋主某除本生身命之災解流年
臨犯之厄二運三限俱進吉星八卦九宮無
違惡曜庶蠲災患延續禎祥臣謹為上請南
上君壽命君丹秩君絳官君消災君解穢君
各一人官將各一百二十人主消滅惡星度
厄益壽太和真一好生君運氣君定貴君各
五人官將各一百二十人主和順流年權解
惡曜解刑度厄君延壽益算君請命好生君

收刑却煞君斷刑絕煞君執刑收煞君各五
人官將各一百二十人主益算延年拘制刑
煞萬福君南極君司命君太白明星君定名
玉曆君財庫祿庫君各五人官將各一百二
十人主增注生名削落死籍拘魂制魄君周
玉君各一人玉曆素女千二百人主拘魂守
魄錄神衛氣天曹解災去禍君五方生炁君
益命延壽君六甲將軍從官吏兵主度厄消
災除邪保命庶使齋主某入運限協和身命
安泰動靜出入有祿馬之加臨分野躔離無
災刑之衝戰木星為災金星制之土星為災
木星制之金星為災火星制之水星為災土
星制之俾得調理五行和合四象命基鞏固
壽址堅牢度厄扶衰解災保算益廣好生之
澤上禱育物之仁蒙如所陳允昭玄貺恩惟
大道分別求哀臣愚謹因二官直使正一功
曹左右官使者陰陽神決吏科車赤符吏剛
風騎置吏驛馬上章吏飛龍騎吏進章鳳凰
騎上章雲龍騎言章風發騎御章神龍騎奏
章飛龍飛虎騎各二人出操臣為齋主某人

拜上某章上詣三天曹伏願天恩告報臣誠惶誠恐稽首頓首再拜以聞

謝土安宅章

安宅齋用

臣矢心領教勵志度人自揆疎庸夙叨涵育敢瀝粟絲之悃仰酬山岳之恩臣謹據齋意臣切惟齋主某人繼述謀家辛勤問舍經營版築莫真室廬墳墓極移慮傷禁忌况星躔之臨照與神煞之循環練日練時或因冒觸定方定位恐致災乘期寧靜於土司盍皈依於帝關仰希福慶預殄屯危謹為拜章一通上聞三天伏望皇極流祥蒼昊委監特降玉清道炁靈寶妙光灌注齋主某人所造屋宅之中內外輝華邇遐洞燠導迎萬福辟斥千妖鎮守真靈各安陽界觸犯神煞咸回善心卜世卜年永臻玄貺臣謹為上請謝土君制土君解土君安土君安宅君安宅君五方保護君解功破耗君各五人官將各一百二十人主解謝造宅已來前後動土觸犯禁忌太歲太陰大將軍一百二十位官符毒火吊客喪門上下神煞悉令和釋其有方隅神祇因

掘鑿權遷避者請告諭宜復本位陽方君安上君右都候君安石安土君各一人官將各一百二十人考官吏兵主收攝土公之鬼母敢侵犯鄉邑大夫神君守宅大神守宅三將軍吏兵三十萬人主驅遣五方土炁故炁逼絕邪精毋令侵犯五岳將軍六甲神將五方安宅大將軍護宅大將軍保宅大將軍鎮宅大將軍各一十一人鎮安宅舍驅斥邪精九橫三災千殃萬厄悉皆消蕩毋損居人庶使齋主某人自今以往百事康安宅舍光鮮門庭清謐盜賊虛耗遠離他方水火官災毋撓近部鬼邪絕滅疾病消除瘴疫不興謀生穡遂詩書有耀富貴無涯眷屬利安以為效信

遣疫癘保病章

臣濫膺選舉冒綴班聯淺淺自慚希夷未悟扣宸闈而屢請醜靈府以知非冀冀隆慈曲垂涵貸臣謹據齋意臣切念齋主某人塵寰涉迹身世謀生五慾七情寧無翳累百非眾惡易積愆尤致寒暑燥濕之憑凌乘身命運限之屯滯忽沾疫炁遂履危機自非帝造之

垂矜矜俾餘生之有慶謹為拜章一通上聞三天伏望盛德涵容玄恩矜恤特降玉清道炁靈寶妙光灌注某人身家之中俾正炁輝明妖氛速離消災解厄保命延生臣謹為上請北關九夷君北黑天機君運炁解厄君地官督炁君各五人官將各一百二十人北城化吏五人天市大夫一人五瘟部炁兵四十萬人拒天大兵千萬人主收制疫毒斷除瘟炁東方九夷君八十一官君斷青瘟青毒之炁南方八蠻君六十四官君斷赤瘟赤毒之炁西方六戎君三十六官君斷白瘟白毒之炁北方五狄君二十五官君斷黑瘟黑毒之炁中央三秦君一十二官君斷黃瘟黃毒之炁大胡老君家中守宅三將軍左右三部將軍赤陽兵士運炁解厄君五瘟都炁君吏兵各三十萬人與里社井邑君主同心收除斬制疫鬼中官遊邏大將軍科車武騎大將軍鋒火虎賁大將軍監天敢健大將軍邀遮大將軍鋒火大將軍驍騎大將軍斬斷虎賁大將軍羅網龍虎大將軍討捕飛行大將軍吞

天絕地大將軍各一人吏兵七十萬人主收
斷五瘟積類無侵鄰里搖天動地兵十萬人
討天君胡越騎君陰陽神決吏收系食炁吏
收神食神吏收鬼食鬼吏收毒食毒吏各一
人執赤越大胡君千二百人三五元命功曹
使者魁罡擊刺將軍各一十五人金剛八煞
兵士各九十六人主收捕瘟鬼掃蕩疫炁免
相侵染貽禍鄉閭即俾某毒炁消除病源康
復天醫扶體靈藥資身家門尊卑均臻景貺

收邪斷厄保命章

臣蹄浴卑賤茅徑昏愚夙沐洪恩監司玄教
摺度人而激切庶贊化以承宣凡有皈投敢
忘關告臣謹據齊意切念齋主某入運逢
屯否身際妖邪致寢食之倉皇覺精神之顛
倒致生疾患藥餌罔功恐涉冤愆沉綿莫釋
歷時既久恠證愈深自非請命於虛玄曷克
流恩於圓輻謹為拜章一通上聞三天伏望
廣運慈悲曲加拯援特降玉清道炁靈寶妙
光灌注齋主某人身家之中俾內外洞明門
庭輝煥靈光所燭邪祟速離疾病安痊壽齡

延永臣謹為上請斷邪天靈官功曹攝神衛
身吏斷邪使者護身將軍檢邪直符斬邪刺
姦吏攝神使者主驅逐精魅收捕兇邪好生
保命大將軍續命大將軍驅邪大將軍斬邪
大將軍度厄大將軍各一人官將各一百二
十人主解除災厄却去精邪安平守石君一
人官將一百二十人无上監炁君一人兵士
七十萬人天罡大兵五丁君一百萬人无上
天生君五人兵士一百二十人蓋天大將軍
兵士七十萬人高麾大鼓五湖將軍反甲逆
鱗兵四十萬人收鬼食鬼吏收系食炁吏收
神食神吏主收捕諸惡君擾害生民無上中
官五曹校尉兵五十萬人清玄公君一人官
將一百二十人主捕制鬼賊陸梁犯人歲甲
君太甲君朱陰君各一人官將各一百二十
人五天侯將軍兵士十萬人主擒戮精魅勦
蕩無留陽明君一人官將一百二十人與所
在真官諸部吏兵社稷土地山林孟長同心
協力和合家中守宅諸神併力追捉無令隱
漏捕赴天獄依律蕩除又為上請左右陰陽

太醫吏救治病源太和真一好生君解穰惡
曜庶使齋主某人形體安和邪精殄滅疾病
痊愈藥食調平春序康寧門庭清肅起居隨
意謀為稱心永保利貞以為效信

保病解厄章資福齋用

臣學業愚蒙性資荒陋幸緣宿慶僭陟真階
摺殫濟度之勤庸報生成之德臣謹據齊意
切惟齋主某人命運災衰形神凋瘵三業
十惡夙累行藏六曜五星偶凌次舍忽染疾
疾寢食靡寧藥餌罔效日時浸久夙宵驚戰
控告無門非賴帡幪曷臻平復謹為拜章一
通上聞三天伏望隆慈誕施惠澤特降玉清
道炁靈寶妙光灌注齋主某人身家之中俾
災炁消除靈光照耀目今病患早遂平安臣
謹為上請陽秩君一人司命吏一百二十人
各主重病未痊速令康愈須臾君赤天食炁
君各一人官將各一百二十人主久病困衰
即得痊療收神上明君一人官將各一百二
十人主明暢精神斷除惡夢赤星君三天慰
愈君各一人官將各一百二十人主制絕家

親乘時構釁解考君度命君益算君誅殃君
遊邏大將軍地燒大將軍各一人官將各一
百二十人主收錄邪精辟除故炁火龍君山
周君東明大夫君各五人官將各一百二十
人主制醫藥黃衣節命玉女月玄玉女各千
二百人主持神方太仙明堂玉女千二百人
主按方治病中官大醫吏十二人主擇方合
藥天醫官醫太醫五官治病醫吏各一十二
人主入臟腑經絡關節行神存炁天曹上平
太醫吏一十二人治病功曹一十五人主上
詣鳳凰太清宮中取五色神藥和合官君治
療病患本官持藥金官持鍼水官主湯火官
主灸土官和德各奏奇勲東青生炁君南赤
生炁君西白生炁君北黑生炁君中黃生炁
君各領吏兵除邪收病南昌朱陽君黃老君
天魂君地魄君各一人起生玉女玉屑素女
各千二百人主扶却災危度脫年命即俾齋
主其人炁體康健災衰消散精邪遠避殃訟
和平病患蠲除命身牢固服藥有效動止無
魔命運亨嘉以為效信

傳法授道祈恩謝過章

傳度用

臣誤奉宸恩繼承師承期提後進庸紹前脩
僭陳悃悃之私仰謝涵濡之澤臣謹據齋意
臣切惟女青玉律選舉至難太極金科保任
尤重儻傳授有乖於踐履則師實俱冒於憲
章今弟子某入深己求真願奉^上法靜言障
累越有數端或神炁難保於脩齡或骨相不
符於道品或九玄七祖家訟未消四負三生
兇仇猶結或宿劫今世謹考尚繁或故作誤
為愆尤莫釋匪賴甄陶之賜曷詣願望之隆
謹為拜章一通上聞三天伏望由施玄燈俯
矜丹悃特降玉清道炁靈寶妙光灌注弟子
某人五宮六府之中俾正炁輝華道心開發
靈光羅絡妄累消鎔仍乞敕命宣告三界十
方應于玄局特為蠲銷考訟解釋愆尤紀字
玄編定名青簡臣謹為上請无^上九天帝君
三十二天帝君五老帝君日官月府五星四
曜南辰北極列宿星君三省五師三官九府
天曹主執四司真靈福地洞天五岳四瀆地
水職司三界神祇俱赴玄壇證明傳度又為

上請靈寶六部仙官三界所向玄曹赫奕仙
曹玄壇侍經議道降真召靈合屬仙吏九天
司命府青玄黃籙院玉清神霄玉府上清童
初府玄靈璇璣府北魁玄範府靈寶如意萬
司九天溥度院^{俱隨所傳}將軍神吏玉童玉女
合該傳授將吏官君疾速分景化形隨逐香
火同候交機輔佐宣行庶弟子某人證誓萬
靈告盟眾聖勤修精進學道參真存念行持
濟生度往身膺仙職心契玄宗智慧洞明慈
悲利益魔試寢絕靈胎日臻譽望興隆邇遐
皈向功圓道備舉形仙飛永暢真風益光宗
緒稽終浩劫歸戴玄元蒙如所陳允昭聖造
謝罪祈雨章^{雷雲齋合用}
臣愚蒙無取踈謬何庸風依覆育之恩勉飭
精修之志承符領教宣德濟人凡有皈投理
宜關告臣謹據齋意臣切惟春耕秋歛稼穡
之常久旱亢陽炁運之變儻時雨未敷於播
種則嘉禾曷望於豐登況溝澮之如焚極閭
閻之愁嘆何以卒歲坐見饑荒諒萬兆之積
過浩繁而司土之神明謹責匪輕帝力莫顯

民哀謹為拜章一通上聞三天伏望道德曲成慈悲善應特降敕命告下十方三界一切真司原赦下民隱顯之愆垂軫歲事阻飢之苦亟沛甘澤為長禾苗更乞告宣主宰雷霆之司掌執風雨之吏湫澗澤洞威聖龍神城隍山川祀典杜貌應千攸屬各體慈仁嘯命風伯雨師指麾雷公電母普注膏雨甦解焦枯臣謹為上請天翁正氣君河上真人九海九江九河北玄君各一人官將一百二十人主水炁泉源興雲致雨海中玉女千二百人河伯呂公子三十六人主興起水脉立降風雨四洲九谷君靈臺漢明君九州玄冥君九江北玄君九侯君各一人官將各一百二十人湖中玉女千二百人主召攝河伯使者青水帝君九江水帝十二溪女水部鬼神河平掾吏合符行雨應時下降於疆邑之內驅雷役電興風布雲先霽霽於江河次霽霽於郊野即俾甘霖應候好雨知時槁禾回青平疇變綠苗秀而實歲稔且穰騰樂事於垌原播歡聲於畝壟願拜成終之造允垂資始之恩

更冀百穀用成九域咸遂遺蝗遁影妖魅潛蹤飽食暖衣極三農而快樂仰事俯育歷百歲以光華蒙如所陳允昭宸貺

祈嗣章 祈嗣用

臣草芥微生塵泥賤品濫承正化得奉真宗無半功之可書有千愆之堪錄曲蒙覆育賈藉汪涵敢九拜以歸誠備一言而續聽臣謹據齋意臣切惟父子有親人倫之本夫婦有別天屬之常儻身命有犯於孤辰與運限或罹於寡宿或相因戰或犯刑衝致嗣續之未諧使宗祊之莫托逡巡暮景愈衰齡自非請命於玄穹曷克承恩於黃混謹為拜章一通上聞三天伏望大德好生至仁無外特降敕旨告下玄曹應身命中風生今世所有戰衝盡與解釋仍乞賜降玉清道炁靈寶妙光灌注某人妻某氏身心之中即令起處安和胞胎凝結疾病不作榮衛勝常十月周圓誕生男嗣願心圓滿福慶駢臻臣謹為上請司命君司錄君南斗降生度化君東斗度星通炁君西斗度魂結胎君北斗通魂通血實骨

君中斗度魂成人音聲君主成就胞胎結聚魂魄注生夫人注生天女通脉運骨天女回星度胎天女各五人從官各一十二人主和合陰陽結胎成形度胎夫人五人上詣五方五斗闕下請以五方真炁覆育己身榮衛調和凝結胎孕五行君素白玄明君文曆君各一人官將各一百二十人主降炁結胎除邪護正解除夫妻刑害成就陽男中神太和真君陰陽生炁君三元丹田赤白君各五人官將各一百二十人主血炁流通黃白相累多引陽系牢結男胎陽神決吏男神玉女各二人甲子神人君吏主扶助真胎凝結陽炁若已孕女回轉為男即俾某人妻某氏懷胎含孕起居不傷全陽成男飲食無忌月數滿足必產陽男日吉時良速得分娩母子周圓以為效信

文昌祈祿章 祈祿用

臣睢眊無取駢僻何庸濫叨雨露之恩恩積雷霆之譴尚祈洪造俯賜慈觀臣謹據齋意臣職惟領教理難抑違依按真科次第修奉

臣切惟登崇俊良拔擢材彥一則關於運限二則系於修爲儻祖宗之積累未陳與今昔之過愆尤厚既乖踐履難就功名自非帝造之維持曷副民情之願望謹爲拜章一通上聞三天伏望大慈曲垂惠澤特降敕命行下

三界合屬玄曹爲某人樓謝星曜和平運氣赦除障累紀錄善功增注勳名光崇宗祖謹爲上請夫子君一人官將一百二十人東井清明君決了吏一合來下以溫潤清和英靈善爽之炁下布某人五藏四肢身體骨節之間安定神靈衛護真炁驅三尸滅九蟲背死向生却禍來福心志開通超拔林能五經九炁君一人官將一百二十人主智慧圓明與衆有異天玉女千二百人衣青衣主部領萬官賜以印綬運爲舉動能通神明玉曆素女千二百人衣赤衣主紀姓名於玉曆注壽算於丹書若某人入仕之初或願主倉庫或願職金帛或願典場務或願領兵卒或願司學校者則陰陽有神靈主之乞爲關告所在靈應神祇正直土地點賜臨相使之爵祿

隨心德行備足若大選之後圖謀願望升品進階者則上有星辰主之乞爲宣告紫微太微二垣公卿將相大理尚書文昌三台南斗北斗東壁奎宿羽林壘壁師門將軍應主宰人間官職諸星並爲垂象宣精舒光絢彩即俾橫飛直上於省臺部監徵塞邊陲有九遷之榮華膺十賚之富貴公忠許國清白傳家祿壽兼全以爲效信

廷生解厄延壽章 祈壽用

臣夙藉慶基生逢昌運佩鸞圖而領教承鳳牒以學真竄賴幃幃若爲報稱輒瀆千鈞之聽庸陳一得之愚仰冀高明俯垂監察臣謹據壽意臣切惟人情欲壽大德好生儻運限有犯於成蹊致身命或臨於屯否易逢厄疾曷保年齡今某人藉祖宗積累之功膺門戶付託之任欲祈眉壽或衍遐齡庸安樂於期願勿馳驅於障難于孫昌熾富貴利宜自非玄造之慈觀焉得黃垓之佚老謹爲拜章一通上聞三天伏望廣運深仁廓施惠澤特降敕命行下三界十方合屬玄曹爲某人辟斥

凶星斷除戾炁寬愆頓釋身心雙隆八節四時纖災無恙常居吉慶永處福齡百歲周圍一身康泰臣謹爲上請天曹解厄去禍君益算延壽君五方生炁君六甲將軍主消災度厄益命除邪太和真一好生君萬福君解刑度厄君益壽延命君請命好生君保命生炁君收刑却煞君斬絕刑煞增益壽命萬福君運炁君解厄君南上君司命君司錄君太白明星君拘魂拘魄君財庫君祿庫君定名玉曆君各五人官將各一百二十人主落除死籍注上生名收殮君斷殮君破殮君各一人官將各一百二十人主解除殮厄拔贖壽命東斗主算君西斗紀名君北斗落死君南斗上生君中斗大魁君各一人官將一百二十人主度脫五行災厄增紀壽算六十甲子從官吏兵主張解年窮算盡之厄消除命衰運敗之災五方五帝君從官吏兵各乘本方真炁執符持節上詣二十三天星宿玉曆之官檢尋命籍增注年齡延命大將軍兵士千二百人主解消災厄增益年命明堂君南昌

君朱陵君黃老君天魂地魄君各一人拔命君十二人鼎倉玉女五人五緯玉女起生玉女玉曆玉女各一千二百人主度脫年命增壽延生諸部官君和合保護解除二十四厄增延壽算即俾某人命運亨通災危驅遁福祿興華壽算延長無難無災多祥多慶雲仍家哀門戶輝輝以為效信

謝罪祈晴章

祈晴用

臣稟資疎散賦性庸愚印武班聯強顏奏對每捫心而省過期弘道以憲天庶證勲勞上禪化育臣謹據齊意臣切惟務農種穀重藉天時秋歛春耕惟資地利所願五風而十雨庶令百穀以三登既茲郊野之田勢處陂塘之側繞致霖潦澎湃莫支乃經旬催積雨之傷致稻苗多乘流而稿歲事足慮生民存飢若非開霽以斷流何以有年而多稼全資聖造特賜慈觀謹為拜章一通上聞三天伏望帝德好生民情堪憫特降敕命開告匝境里社一切玄司散茲雨陰即成晴霽庶得三農勤動百穀豐成田疇無淹浸之憂黎庶免飢

謹之苦優游卒歲允藉天恩謹為上請天翁正炁君一人官將一百二十人兵士七十萬人九海北玄君一人官將一百二十人河上玉女千二百人主收雲止雨致風興霽水泉官屬八海九江掾吏主決開壅脉疏導百川即俾四境狂霖登時開霽陰雲解散紅日陸離田野歡心耕耘樂意坐看刈穫白粲登場實叨覆護之恩加拜生成之賜更祈教旨行下四海四瀆溪源潭洞應千龍神洎玄虛主掌今年今季風雷雨部一切神祇咸令知委並與停風息浪收雨散雲濃陰開明日光照野禾稻豐稔稼穡盈成樂歲無憂以為效信

禳火災章

禳火災章

臣草茅賤質樗櫟散材謬處班聯濫司濟度敢罄小心之禱庸祈大造之仁臣謹據齊意臣切惟仰事俯育端藉室廬接棟連甍乃堪衣食實生成之厚利宜上帝之矜憐修於前朝忽傳星變謂來墜於屋角勢有似於火殃由中驚惶罔知攸措私料近至信宿遠則旬

時恐有燎原之憂或致焚如之慘綿連井落延亘鄉閭若非請命於上蒼曷克流恩於下界謹為拜章一通上聞三天伏望廣運隆慈廓施妙化特降敕命開告匝境里域一切真司為某人驅除火災即移他境無生殃咎流虐黎元臣謹為上請九海北玄君天翁正炁君兵星神君游都君明星君誅殃君天昌君各一人官將各一百二十人河上玉女千二百人蓋天大將軍黃衣兵吏各十萬人无上天君兵士七十萬人主動畢星升陰炁驅六丁六甲消滅火殃之鬼驅逐火精之恠與北方黑帝羽子之精壬癸正炁太陰水德防制火災即令斷絕仍關風伯雨師下雨滅火當境神祇斥遣火恠速令遠離庶得流災遠徙里社安寧眷序不移屋宅如故以昭宸貺

謝罪遣蝗保田章

謝罪遣蝗保田章

臣塵泥賤品草莽微生值昌運之興行際真詮之曉覺學真領教弘道度人擔補過以立功庸承流而宣化臣謹據齊意臣切惟春耕秋歛觀爾有年地膺天災將成凶歲既蟲蝗

之誕發實妖戾之肆興林木盡童田禾俱食
非愛心而哀籲為請命以祈禳曷保稻梁終
無損蠹謹為拜章一通上聞三天伏望廣運
慈悲曲加鑒采特降敕命關告匪境一切神
司辟斥妖蝗斷除戾禬乘狂風而徙他境因
暴雨而移別鄉悉化餘蟲無令遺種庶得田
禾秀發成熟可期臣謹為上請四野君五野
君九野君里域山川社稷君蘊元君白蠶五
穀君大田五斗君六富君各二人官將各百
二十人地畜君天甲君五千王君各一十二
人官將各一百二十人主田疇豐稔五穀登
成辟斥螟蝗驅除鼠雀稻苗秀好蟲蛾遁逃
與社稷山川城隍神君遞相保護即俾田禾
秀實蟲蝗去離轉之外疆以為教信

諸章官式祈禳通用

保蠶

謹為上請暴食君供食君千澤君各一人官
將各一百二十人仙官玄男女神男神女
素男素女玉男玉女蠶室仙吏絲綿仙吏二
十四人養育蠶桑保護絲繭辟斥鼠耗萬倍

繙收

保胎

謹為上請安胎君護胎君扶衰度厄君萬福
解厄君護胎聖母天醫玉女護胎成生吏保
胎成生聖母各二人主保護胎孕無有疾傷

十月周圓產蓐快利天醫太產吏治通乳母
天門中君天醫助生君催生童子各二人官
將各一百二十人主調理陰陽和安胎藏產
蓐無阻得就陽男九天好生君監生大神衛
房聖母主錄勅籍真君傳胎應夢童子三元
保胎大神六十甲子從官符吏主保胎護命
定魄安魂臨產之時母有厄難

保男

謹為上請陽仙護魂君陰仙護魄君天靈陽
生君主通於營衛乳食平安太皇萬福君解
患君各五人官將各一百二十人主錄護生
氣辟斥邪精

逐盜

謹為上請五陽君斥災君營星君各一人天
位君暴勝君東西太白君各五人官將各一

百二十人搖天動地君九炁太兵五十萬人
赤衣日男白衣月女各千二百人絳衣日月
大兵承天大將軍兵士各十萬人追逐寇盜
驅斥賊徒遠離門庭惠安閭里

保六畜

謹為上請六畜王相君天陽君天儀君天休
君黑水期君各一人官將各一百二十人主
孳養六畜榮盛不傷斷逐疫瘟斥除邪禬歲
星太元君一人官將一百二十人周天兵士
十萬人主治祠廟傷鬼擅殺六畜

絕墓訟

謹為上請九地君大元君都侯君文童君地
甲君九玄察氣君卿大夫各一人官將各一
百二十人收塚訟鬼安穩生人五行君一人
大墓君小墓君各五人官將各一百二十人
主解除祖先謹責利安塚墓風水斥絕故禬
斷伏殃訟太玄君都侯君誅殃君太白中陳
明星君各五人官將各一百二十人主收斷
塚訟家鬼解散和釋

斷口舌

謹為上請五經君一人清靈六鍾太皇君五人官將各一百二十人主制斷口舌斥絕變關無上清玄君兵士十萬人南鍾六星君五人南鍾太真君一人官將一百二十人太陰君吏十二人主收捕口舌禁斥誣罵左惠右善君一人官將一百二十人仙花玉女千二百人主斷除口舌解消耗殃五方大領神吏主鎖惡人口舌令不言語從今絕滅

除官訟

謹為上請冠帶君青禽君四顧君八門君北一官左童君各一人官將各一百二十人收刑領連吏一百二十人八甲周趙女三千七百八人主縣官公事悉令消絕察惡君一人官將一百二十人主收斥毀謗息邪眾言五方五帝大夫君吏五十人斬斧陽父君破市大將軍破獄大將軍脫繫大將軍解愚大將軍散事大將軍鎮訟大將軍七部大夫官將吏兵主迴化官事悉令消除

離呪詛

謹為上請離倒君一人官將一百二十人主

離解呪詛和釋冤憎青龍白虎大將軍年月日時四煞天然地煞三十六煞官將各一百二十人主收攝呪詛和同仇讎若東方木地年月日時就木神呪詛者請金炁神解而除之若南方火地年月日時就火神呪詛者請水炁神解而除之若西方金地年月日時就金神呪詛者請火炁神解而除之若北方水地年月日時就水神呪詛者請土炁神解而除之若中央土地年月日時就土神呪詛者請木炁神解而除之天罡五行君赤帝兵士百萬人建天司馬千二百人主收捕廟貌之鬼南昌君東關君各一人官將各一百二十人主收捕林社呪詛之鬼旺相君一人官將一百二十人主收捕師巫竈前呪詛之鬼八卦君兵士十萬人還功君破邪君各一人官將各一百二十人主收捕造作形像呪詛之鬼五方大額君各一人兵士各一百二十人主收捕口舌叫喚呪詛之鬼邪神淫祠盟誓魔倒貪饕陷害侵損生人諸部官君連令消滅若惡人謀議呪詛者請無極天生兵馬十萬

人主收逆理陷害禱祠之鬼攝送鄧獄歸身自受遷拔亡爽即得超昇

除顛邪

謹為上請无上中官五營校尉兵五十萬人清玄公君一人官將一百二十人无上天士君五人官將一百二十人无上九江茂盛君兵士百萬人主收捕陸梁精邪狂歌叫喚與妖之鬼太古華蓋君二十四人天樂君五人述炁君地精君破逆君天地水炁君天玄開閉君各一人考壽君五人官將各一百二十人地孔君青衣兵士十萬人主叫呼狂易失志顛邪天宮健吏十二人兵士一百二十人赤車將軍十二人吏兵士十萬人天貴君敢健吏天五侯將軍兵士十萬人太甲君朱陰君門都君右玄都君陽明君各一人官將各一百二十人主收捕精邪誅滅鬼賊與所在真官社稷山林孟長家中守宅眾神一合誅戮種類無遺

防劫盜

謹為上請萬維君東西面太白天戰君各一

人官將各一百二十人九天乾元君搖天動地君九炁兵五十萬聚天大兵十萬人主盜賊劫掠收捕無餘五方大額君各十萬人主圖謀抄掠神歸陰東九夷君南八蠻君西六戎君北五狄君中三秦君各十二人主守護井間辟斥劫盜

利宅舍却虛耗

謹為上請安炁君太玄君赤白沙君元炁君天玄君各一人官將各一百二十人主收攝橫禍利安宅庭斥散凶殃擒束蠱恠天昌君黃衣兵士太白君各十萬人天罡官將一百二十人主收捕殃煞解逐災害青龍君一人官將一百二十人五福天官地祇十二官將與守宅三將軍三十萬主驅遣虛耗利宜畜養天德廣大吏五人主驅除群凶收絕邪鬼

保遠行

謹為上請萬里君北馬君各一人官將各一百二十人明堂玉女千二百人主遠行利涉謀望稱懷盜賊不逢災殃遠離

保移徙

謹為上請郡邑大神君仙官將息君去穢君各一人官將各一百二十人主宅舍移徙不傷禁忌人口安泰財富和平

解冤愆

謹為上請解罪君解過君解刑君解謫君各一人官將各一百二十人主解釋冤愆調除考驗

祈雪

謹為上請靈臺漢明君九州玄明君各一人官將各一百二十人主攝河伯呂公子三十六人與水帝十二溪女水部神祇興雲下雪九江北玄君四洲九谷君四洲九海君浮雲使者各一人官將各一百二十人一合來下開風伯雨師社令正神起風積雪

右諸項章請官式在人分合以滿齋主期

望之心又須知行下所屬玄曹敎如祈雨則須乞敎旨下扶桑水府賜谷神王蓬萊都水使者水官司命四海九江三元水府四瀆五湖十二溪真泉源潭洞今年歲分行雨龍神風伯雨師雷公電母九州社令

管界神祇協力同心起風雲雷電下雨應時

太上濟度章敎卷上

太上濟度章救卷中

宣

章

破鄧都開業道章開度黃籙用

具位臣某誠惶誠恐稽首頓首再拜上言臣樗櫟散材蓬茅賤質幸緣宿慶繼真班功無絲粟之圓過有淵陵之積曲蒙涵貸未賜誅夷摺勉操修庸期報稱既承投懇敢不關聞臣謹據入意臣切惟三官九署北都羅鄧六洞十宮冥關幽夜水火考對生死拘維茹苦終天千齡展轉雖衆生之妄業自受而上玄之仁澤堪矜非賴救原易臻超邁謹爲拜章一通上聞三天伏望慈悲曲垂矜憫特降玉清道系靈寶妙光煥朗十方開明九墨即俾亡故某人暨九玄七祖億劫種親六道四生諸類幽爽濯沐妙炁頓悟良心宿劫寬愆應時解散臣謹爲上請十方飛天使者十方救苦玉童玉女上詣三天金闕玉陛下請降元始符命救苦真符告下十方三界無極神那天地水官陰陽罪錄三官九府百二十曹北都羅鄧內外宮洞阿鼻無間大小鐵圍十

二河源泉曲之府九幽五嶽罪考主司五苦三塗諸大地獄五道都府執法冥曹乘此符光輝明照耀鐵城摧毀苦考錮停枷索脫除繫囚消廢爐炭銅柱化作霖林鏤湯冰池悉成蓮沼灰河炮炭俱變清涼劍戟刀山盡爲寶樹燭炎炎烈火之獄燦重重金剛之山執對停平冤仇和釋惡根落滅罪籍捐除救宥亡過某人滯及幽冥無執滯爽因徒苦趣志遂逍遙滯魄沉魂各獲解脫更希麻首勅下青宮開紫陽玉匱之函出應化慈尊之號十方流演萬品皈依廣開法門飛度累戶庶使善緣霽霽靈貺羅敷均沐生成以爲教信恩惟太上分別求哀臣愚謹因二官直使正一功曹左右官使者陰陽神訣吏科車赤符吏剛風騎置吏驛馬上章吏飛龍騎吏進章鳳凰騎上章雲龍騎言章風發騎御章神龍騎奏章飛龍飛虎騎各二人出操臣爲齋主某拜上破鄧都開業道章文上詣三天曹伏願天恩告報臣誠惶誠恐稽首頓首再拜以聞

空三行

臣姓某屬州某縣某鄉某里某官某職某品某爵

空三行

太上無形無名虛無自然至真大道無上玄尊金闕七寶玉陛下

空三行

太歲某年月日於某處拜上

右凡書章用黃紙朱書紙高一尺一寸六分行闊一寸二分幅宜單幅幅宜單行每行定排十七字前一幅指兩行空第三行方寫章銜疊書下寫臣某誠惶誠恐稽首頓首再拜此一行不指字看長短到何處住第四行寫上言字低於銜銜一寸此行方指十七字數也自上言以下至後每行指字如法行上留半存行下不通走壇人姓名作一字寫不得抽破如鬼字如凶字如死字如賊字諸不佳字不得在行上頭如仙字人字生字諸佳字不得在行下頭寫至以爲教信即換云恩惟太上分別求哀臣愚謹因二官直使正一功曹左右官

使者陰陽神訣吏科車赤符吏剛風騎置
吏驛馬上章吏飛龍騎吏進章鳳凰騎上
章雲龍騎言章風發騎御章神龍騎奏章

飛龍飛虎騎各二人出操戶為齋主某人
拜上某章上詣三天曹伏願天恩告報臣

誠惶誠恐稽首頓首再拜以聞以聞二字
低前行一字與再拜相去空三行疊書臣
姓某屬州某縣某鄉某里某宮觀某靖焚
修須自半行寫至下其下與紙下頭相平
又空三行疊寫大道街太上無形無名虛

無自然至真大道無上玄尊金闕七寶玉
陛下只指書四寸八分又空三行自半行
寫太歲某年某月某日於某處拜上其下
與紙下頭相平太歲以後皆空紙末書章
不隔日填大道街不隔時故留某時及陛
下一點及以聞字內耳字一直筆未填至
校章時方填也章可漏上寫大道街具法
位街臣姓某章奏謹封方函上寫謹謹上
詣三天門下具法師銜位臣姓某謹重封
入章在函內章函長一尺二寸闊一寸八

分以青繫線三度纏之其十字結處及兩
頭並貼紙印封之又入青紙方函寫如前
方函式前後以袱包之此封章法也

素車白馬章

臣賦性迂疎稟姿愚拙職忝司於濟度誠敢
急於關聞重冀高明曲原狂斐臣謹據入意
臣職惟領教理難抑違謹消今月某日為始
就某處肅建玄壇依按真科次第修奉臣切
惟九幽六洞三官北鄰冥路幽關職司考對
匪藉蒼穹之宣告曷令部衛於形魂謹為拜
章一通上聞三天伏望慈悲曲垂矜憫特降
玉清道炁靈寶妙光照耀陰鄉煥明夜府即
俾亡故某人泊九玄七祖億劫種親六道四
生諸類幽爽免淪苦趣各脫拘維來詣玄壇
證品升度臣謹為上請素車白馬大將軍一
十二人官將一百二十人九龍符命使者一
十二人官將一百二十人太玄玉女一十二
人官將一百二十人太玄直符一十二人官
將一百二十人上詣三天金闕玉陛下請降
太上救教生天寶錄告十方三界無極神

鄉北都羅鄧泉曲之府三官九署百二十曹
水火陰陽內外宮洞三十六獄無間阿鼻大
小鐵圍炎池冰沼四瀆五岳十二河源五帝
考官六官掾吏巨天力士執罰神兵司殺司
功司錄司命主考主罪主獄主非四明賓公
天門庭長十宮六洞五帝大魔冥冷大神五
道都府幽臺冥掾長夜鬼官無量陰曹咸令
知委遵承今來建壇之所頒行符命侍衛送
迎疾令上件亡魂眾苦蕩除出離地獄永辭
幽夜睹見光明黑簿燒焚業根披散參朝玄
座受煉更生以為效信

開通道路章

臣惟蠢濁性稟頑蒙冒領玄階重錄洪造敢
竭再三之瀆庸抒萬一之忱臣謹據意忱臣
職惟領教理難抑違謹消今月某日為始就
某處肅建玄壇依按真科次第修奉臣切慮
魂魄英識來往經由道路關津或生拘障非
賴上玄之誥命曷令阡陌之開通謹為拜章
一通上聞三天伏望慈悲曲垂矜憫特降玉
清道氣靈寶妙光開闢幽途光明無極即俾

亡故某人泊九玄七祖億劫種親六道四生諸類幽爽俚離所部來觀齋壇釋罪通幽朝真受煉臣謹為上請太玄直符太乙使者五帝直符十天傳言騎吏玄都金龍焚龍驛吏玉龍飛龍驛吏各一十二人官將各一百二十人上詣三天金闕王陛下請降東華青宮九龍符命紫陽寶節五方生炁十天寶符洞朗幽陰開明長夜告下天牢地獄水府陰曹冥局土司泉曲六道北鄴九壘三宮九幽五嶽十宮九州社令洞天福地考校曹僚高里丈人丘丞墓伯河侯河掾土下官君歲德尊神山林孟長泉源溪澗冥路幽關血食神司城隍里域社廟土地一切主曹咸稟天符遵依告戒除冤拔罪啟路開局釋放上件亡魂整肅形儀經歷次第來詣壇席聽法恭真傳授戒符領沾功德幽夜不經於險阻冥關克遂於逍遙召攝無拘以符效信

攝召亡魂章

臣倥侗無識愚鈍自將冒闡明科奉揚妙化爰濟聖威之峻荐陳愚悃之微冀藉慈憐俯

垂來覽臣謹據入憲臣職惟領教理難抑違謹消某月某日為始就某處肅建玄壇依按真科次第修奉臣切慮冥途寥廓幽路淒迷匪憑召攝之威曷顯神虎之政謹遵太乙神虎秘法宣告太乙玄冥玉札神虎符命鐵迹臺光寶章建立神虎攝召壇刻時定令追攝亡故某人泊九玄七祖億劫種親六道四生諸類幽爽顯接陽春昭現神機謹為拜上章文上聞三天伏望慈悲曲垂矜憫特降玉清道炁靈寶妙光洞朗幽關無有窒礙玉札符命照耀輝華冥吏幽曹至承敬聽臣謹為上請北魁玄範神虎內真雄左大力統制百節三魂符吏東機玉曹玄伯雌右武驚提魂攝魄倒生玄司飛符玉札主吏上部追魂使者中部追魂使者下部追魂使者追家先七祖三魂上元玉女追傷亡癩癰癩瘡瘰癧瘡亡魂中元玉女追無主癆瘵風癰亡魂下元玉女追瘟疫雷噴亡魂玉符玉女追驚吊刀刑自縊落水投火胎產厭穢亡魂龜真素握玉女追毒藥厭魅呪詛刀兵劫掠王法禽獸所

害亡魂九靈幽臺玉女追見禁罪魂正一延生六甲隱天靈符玉女疾速來降承符宣德攝魄召魂又為上請丹天左衛大將軍五方啓道童子十方道主者六道功曹三界追魂使者天洞天真清清冷冷尋魂攝魄對魂聚魂諸大將軍一合來下為臣攝召上件亡魂聚神復炁克返陽居升幡現形通靈入夢上彰道化下慰哀情受煉膺符開經聽法削罪書於北轡紀真籍於南丹時刻升遷以為教信

沐浴醫治章

臣塵泥漏品螻蟻微生冒膺宣德之班敢忘度人之典威顏有赫未聽是期臣謹據入憲臣職惟領教理難抑違謹消某月某日為始就某處肅建玄壇依按真科次第修奉臣切慮上件亡魂幽閉鬱陰垢纏羅欲期容體之澄清必賴神泉之蕩滌謹為拜章一通上聞三天伏望慈悲俯垂矜憫特降玉清道炁靈寶妙光泱灌蘭池輝華沐浴即得亡故某人泊九玄七祖億劫種親六道四生諸類幽爽

獨消氣腎潔湛形神六府洞明一塵不染臣

謹為上請東井玉女華池夫人浣濯玉女沐浴君吏日月童子各一人五方解穢君將吏各一百二十人一合下降神化東井黃華之池西田流汨之沼汲取石景玉肥黃華神水五方正炁日月芝英甘露金津雲腴玉醴沐浴所度亡魂穢煉罪塵解除障垢淨結節胞胎之穢清冤債煩惱之氣又為上請東方青靈始老哺飴以九炁之青津南方丹靈真老哺飴以三炁之丹華西方皓靈黃老哺飴以七炁之素漿北方五靈玄老哺飴以五炁之玄滋中央黃靈玄老哺飴以一炁之黃英定魄安魂自生五臟又為上請金剛百煉玉液千和太白流光元皇散精解除鬱煩去蕩滓穢身心清淨智慧洞明又為上請天醫神吏尚藥靈官三五功曹天醫博士砭石小吏敷藥靈童密運九轉芝英五色神藥布散經絡藏府之中救療生前榮衛之病即使上件亡魂宿患清平沈痾瘥愈精神復舊肢體潔清受化更生以為效信

濟度幽魂章

臣忝列真階莫裨玄化矢心領教勵志度人芥子咫尺之威庸露億千之悃臣謹據齊意臣職惟領教理難抑違謹消今月某日為始就某處肅建玄壇次第修奉臣切見冥關出路滯魄窮魂或水火飄焚或兵戈謀害或木石損磕或挺刃刑傷或久抱飢寒或曾遭煬毒或冠盜殺戮或蛇虎吞殘或王法凌遲或震雷噴擊或覆車墜馬或自縊投河或他境流亡或從軍傾斃或鬼神拘繫或覓對勾連或瘡跛聾盲或瘡癰癰疽或胎產殞命或疾病夭傷或宿抱怨嗟或常懷憂忿或玄思未度或常赦不原孤獨千名沈淪萬姓山林寄影郊野潛形流浪無歸實堪憐恤惟黃籙昭天漏泉之澤正陰關求哀望度之機臣雖稟承玉符冒頌大赦尚慮功德未徧幽冥謹遵無量度人之道取今月某日夜修設玄都大獻玉山淨供攝召九州十界六道四生諸類傷亡無違典議享食受煉脫苦生仙自非大道之慈憐曷俾眾魂之解脫謹為拜章一通

上聞三天伏望慈悲特垂矜憫頒降玉清道炁靈寶妙光遍滿十方輝明九野上極無上下極無下接引萬類均赴法筵滌罪解冤煉形受化臣謹為上請玉清溟津大梵靈官青玄黃籙救苦靈官功曹玉童玉女各三十二人仙吏一百人上詣三天金闕玉陛下請降元皇慈悲吉祥甘露寶持天慈赦宥寶幡一合下降即為呪洒甘露溥化斛筵周徧虛空無窮無盡哺飴眾奏充足豐盈隨感來款悉皆飽滿仰承元始符命金籙白簡救苦真符長生靈符太上生天寶籙東華青宮九龍符命寶光羅絡拔度幽沈不分六道四生成受黃籙治煉即使未度者度未生者生未升者升未化者化合符膺券返陰還陽超凌人天以為效信

九煉生仙升度亡魂章

臣道未通玄德難入妙屢為人而造請每拊已以凌兢仰藉汪涵俯加原貸臣謹據齊意臣職惟領教理難抑違謹消今月某日為始就某處肅建玄壇次第修奉臣切慮上件亡

魂陰暗久淪陽光易隔匪藉黃華之治煉曷
令碧落之登真謹取某日夜遵依靈寶大法
無量度人開廊五文奉行九煉先為拜章一
通上聞三天伏望慈悲曲垂矜憫特降玉清
道炁靈寶妙光灌注玄壇輝明洞耀即俾上

件亡魂身沐靈光心滌陰穢水火煉質表裏
周圓謹為上請南宮度人不死尊神南極長
生大君度世司馬大神好生韓君夫人真君
南上司令司錄延壽益算度厄尊神迴骸起
死無量度人真君度魂上生南宮真君奉為
亡故某人注算金文定名玉簡又為上請太
乙救苦仙吏金闕化身仙吏朱陵度命仙吏
逍遙快樂仙吏寶華圓滿仙吏煉度玉司靈
寶仙官玉童玉女將軍使者功曹主吏上詣
三天金闕玉陛下請降元始符命金錄白簡
長生靈符內音玉字亦書真文上生黃籙寶
誥下臨壇席奉為亡故某人破鄴都之穢濁
蕩泉壤之幽陰削落業根焚燒罪籍飛度五
戶斬滅三尸建立法橋迴旋雲界啓黃華之
寶井立流火之神庭陶冶陽靈蕩除陰翳上

登朱府下入關先復返萬神重生九炁披登
天之法服駕蓮花之寶輿徑詣天門朝禮金
闕道遠自在與道合真永無輪轉之憂常履
熙明之運

鄴都赦罪章 明真齋用

臣生居濁世運際昌期佩錄參玄傳經悟道
誓度人而領教庶補過以立功凡有皈投敢
忘關告臣謹據齋意臣切惟三官九署百二
十曹六洞十宮三十六獄鐵圍無間泉曲河
源五苦三途九幽五岳典司憲令考對愆尤
愚俗累生因明正理造冤積業抱惡逞非致
使名諱北鄴魂歸幽夜拘閉陰獄囚繫終天
痛苦備嬰莫由解脫匪賴玄虛之曲赦曷今
罪報之蠲除謹為拜章一通上聞三天伏望
大德好生至仁無外特降玉清道炁靈寶妙
光明映十方煥明三界冥關幽路照耀輝華
地累罪魂應時清淨即俾上件亡魂出離夜
壑覩見晨陽開發善心自識宿命悔過進善
脫苦超生臣謹為上請降真名靈符吏降真
召靈童子各一人特為亡故某人恭請大極

真符告下東極天中長樂宮內大慈仁者尋
聲赴感太乙救苦天尊希降威神慈光普照
十方世界重陰極壘北都寒池一一獄中悉
成陽境鐵城摧毀枷鎖脫除赦宥亡故某人
萬罪蕩除冤仇和釋不經地獄親見光明仰

賴天尊上聖召十方飛天神王救苦真人救
苦童子青玄玉女遍下幽獄降慈悲之法雨
洒甘露之寶漿即得冰雪生春炎烟息焰刀
化玉樹劍變寒林寒氷泯泯頓除凜冽鑊湯
銅柱悉獲清涼獄卒牛頭俱生善念銅蛇鐵
狗永斷惡緣曹局除考對之名司案焚業報
之字以至驅雷役電建汲溟波負石擔沙天
圓轉匝穿地引水運風掃山謫役囚徒均承
妙化斷地逮役度上南宮蒙如懇切之祈允
拜提携之造

沐浴煉度章

臣塵埃賤質草莽微生誤沐甄陶俾登階品
重藉圓成之造敢忘報稱之私誓拯沈淪庶
敦勲行臣謹據齋意臣職惟領教理難抑違
謹消今月某日為始就某處肅建玄壇依按

真科次第修奉_臣切惟積夜重泉冥鄉幽路陰氛繁結業垢交罹衆生魂墮寒庭神歸夜壑陰靈混翳晦濁蒙維雖已頒告符章曲行攝召慮淪幽域莫遂參朝自非沐浴於神泉曷俾形魂之蕩滌謹為拜章一通上聞三天伏望大德好生至仁無外特降玉清道炁靈寶妙光洞映蘭池神化玄液即俾亡故某人潔身浴德蕩垢清塵洗表裏之昏蒙除形神之熱惱朝真聽法度命升玄_臣謹為上請五方五靈童子各五人解穢君吏各一百二十人浣濯夫人黃華玉女各一人應時下降取黃華神水煉尸素漿甘露金津雲腴玉醴灌注蘭湯之中沐浴亡故某人滿滌塵勞消除罪障五臟六腑悉得清明九竅四肢俱成澄潔又為上請主水主火大將軍石景水母流精玉女九光童子火鈴靈童青玄煉魂應干真衆取南昌朱陵流火之庭東井黃華流汨之沼真水真火一合來下專為亡故某人煉洗穢氛陶澄累垢莊嚴受度克應升仙永證無為不經輪轉

升度亡靈章

_臣陋質何庸短材無取師恩赫奕幸觀希微帝力輝華若為報效期廣揚於濟度克昭贊於生成_臣謹據齊意_臣職惟領教理難抑違謹消今月某日為始就某處肅建玄壇依按真科次第修奉_臣切惟上件亡魂久淪陰地獲觀陽光自非度命以反生曷俾超凌而自在謹為拜章一通上聞三天伏望大道好生至仁無外特降玉清道炁靈寶妙光朗耀玄虛煥明壇墀即俾上件亡魂沐靈光而快樂乘煉度以逍遙_臣謹為上請南昌上宮司命君司錄君廷壽君益算君度厄君度人君不死君南極長生君度世司馬君好生丈人君迴骸起死無量度人君升度亡故某人先入黃華寶井次入流火神庭濯質蕩形除陰煉穢挹九天之真炁灌五帝之靈芒氣象周圓形神完復麗車碧落羽駕太清升入天門佩符合券永無輪轉常獲逍遙受化更生以為效信

遷拔亡靈章 遷拔道場用

_臣福基風挺昌運欣逢佩籙進階傳經受道深慚蹇淺莫悟希夷過有貫盈功無續積尚沐生成之澤俾司濟度之科益勉操修庸期報稱敬奉詞悃所合奏聞_臣謹據齊意_臣職惟領教理難抑違謹消今月某日為始就某處肅建玄壇依按真科次第修奉_臣切惟三官九署六洞十宮泉曲河源北鄴東岱考校善惡毫髮無差濁世衆生罔知修飾六根三業五慾七情流浪顛冥馳騁不息致使魂歸幽府神返幽關冤仇繫繫曹局推對悠悠長夜深可矜憐自非上聖推惻隱之仁曷俾下愚免沈淪之苦謹為拜章一通上聞三天伏望道德曲成慈悲不冑特降玉清道炁靈寶妙光照耀鬱單煥明澤壘即使亡故某人觀此靈輝自識宿命捨惡趨善脫苦上生_臣謹為上請太上十二陽門開光童子一十二人天道功曹一人九天雲路正一功曹九人南昌上宮扶接引送神童玉女各一百二十人手執太上還神符命開導靈幡接引所為亡魂蒙陽光之下燭指雲路以上升逍遙太空

永無淪墜

蕩滌血湖章 血湖通場用

臣塵泥賤類草莽微生誤玷班聯濫司濟度莫報生成之德誓宣化育之仁凡有皈依敢忘關告臣謹據齋意臣切念亡故某人三生四負多積冤愆六慾七情易招繫咎命罹產厄神墮幽關北鄴東岱之曹紀錄姓字硃石血湖之獄考對形魂抱痛終天無由解脫爰念稟生之本始孰非祖炁之分靈妄業自招實堪矜憫帝恩無外諒賜哀憐謹為拜章一通上聞三天伏望垂惠重泉曲加省覽特降玉清道炁靈寶妙光洞映十方照燭長夜變陰暗為陽明之境化血湖為清淨之場令諸罪人自識宿命捨惡趨善脫苦超生臣謹為上請三炁流光符吏蕩滌血湖符吏各一人官將各二十四人上詣三天金闕玉陛下請降三炁流光真符玉元蕩滌血湖真符告下北都羅酆大鐵圍山硃石無間血湖地獄即冀符光明耀陰壤開明原赦亡故某人泊見禁經產身亡未得出離者並與疾除罪簿落

滅惡根解釋冤仇開通性識承令符命獲脫冥途來詣玄壇聞經聽法全形復質隨果注生又念淪染血腥形神穢濁來朝三寶難近天光謹為上請五方五帝解穢君吏各一人玉女使者各二十四人九鳳破穢大將軍潞穢大將軍洗穢大將軍滅穢大將軍各一人官將各二十四人沐浴東井君一人官將二十四人浣濯夫人黃華玉女各一人仙花玉女一百二十人一合來下為取黃華神水煉尸素漿甘露金津雲腴玉醴灌注蘭湯之內沐浴亡故某人洗除產厭蕩滌穢腥俾令內外光明形神潔淨根塵業垢並與澄清又念亡故某人淪謝之初自膺痛毒榮衛傷瘁未遂安痊謹為上請天醫神吏尚藥靈官治病功曹太醫博士各一人一合來下審運神聖工巧餌以日精月華玉芝金醴五色神丹救療諸苦庶得陰陽通暢血炁和平經絡還元魂神澄正朝真受度托化人天永無淪墜之憂自在光明之界更願靈光煒燁慧澤周流業海澄波血湖息浪人民品物並受生成舒

化日於三塗播仁風於八極

滅度煉尸生仙章 五煉生尸齋用

臣幸藉宿因濫裨妙化普廣宣於濟度庸上贊於生成過有淵陵功無毫髮尚祈恩霈俯賜包容臣伏為先師某人元命某年月日時生存日佩某經受某籙奉某法補充某職係某靖焚修末學道淺仙品未充莫能背土凌空飛騰霄漢運應滅度以某年月日身經太陰享年幾歲已準三洞仙度品格衣服枕席通篆靈章衛其尸形又準滅度五煉生尸寶經玉字真文安鎮五方護其神識練吉遷葬寄形土官未葬更伺煉吉寄形土官尤慮生存之日功德未周恐阻超邁遂卜今月某日謹就某處崇建靈寶滅度五煉生尸妙齋二晝夜期將先師某人扶接引送返形受生遊行太空臣事金闕臣義同父子志劇悲惶孝子云情鍾父志劇悲惶恭按真科次第修奉臣切惟三官九府百二十曹四極明科三品洞律昭如日月威若雷霆學道參真易招罪戾未經赦宥必墮幽鄉轉眼畏途惟增駭汗今先師某人生逢昌運

佩奉玄元未明修真御景之方徒抱濟物利人之志元臘節會禁戒多違經錄法階朝修有缺重以飛章進表每瀆仙真設醮建齋或干神吏致使玄曹畢錄黑簿登書陽過未原陰愆莫追倏忽厭世遽受沈寥自非大道廣運於慈慈曷俾後學疾躋於冲蹟謹為拜上丹章一通上聞三天伏望上聖垂仁至真矜憫特降玉清道炁靈寶妙光下覆先師某入魂魄尸形削落愆尤解除考訟隨光御炁俾上虛无仍乞告下十方三界一切真司特為原赦宿生今世三業六情泊學道以來無邊過咎並從寬釋移名紫籍受化更生臣謹為上請靈寶落滅惡道靈官三人官將各一百二十人斷絕地根靈官四人官將各一百二十人飛度累戶靈官五人官將各一百二十人一合下降為先師某入落滅三惡斬絕地根飛度五戶名列太玄乘景升神上登無極若先師某入魂魄淪墜三塗五苦六天九幽者即為度脫高升上境又為上請玄都金龍驛吏一十二人東華青宮九龍符命使者九

天道功曹一人十方飛天使者十人官將各一百二十人上詣三天金闕玉陛下請降元始符命金籙白簡長生靈符東華青宮九龍符命登真度命出離生死真符南昌上宮寶誥告下三官九署五帝四司無執陰治若先師緣公私罪犯未得解釋者願乘此仙度功德悉為赦除若因三曾九祖億劫種親宿對罪緣結繫幽冥者願為條錄生前建善之功速為解宥即冀改易罪籍定名玉簡遷神度品高步天衢又為上請九天三十二天五老上帝諸天省府北斗南辰日月五星天曹真眾各降真炁接引先師某入蕩滌愆瑕進升道境復還治職入太玄登品成真永無輪轉更願先師某人所屬某岳某山真靈正神符下九土地官各依部界營衛尸形災害消除塚墓寧靜形安神守魄不敢揚持節契符重甦骨肉形與神合遊宴騰凌得為神仙一如五煉生尸經旨永奉玄恩以為效信

升度仙魂章

師友命過月

臣綴武班聯濫司濟度叨恩逾分拊已知元

誓弘洞輔之仁密贊生成之德尚祈洪造俯鑒丹忱臣謹據齋意臣職惟領教理難抑違切念某入幸藉夙緣叨承玄蔭佩籙奉法受經學真易涉塵寰未明竅妙建齋設醮每冒威儀拜表上章實乖俯仰破齋犯戒縱業逞情常失天和多循人愆三元五臘莫謹朝修甲子庚申曾無懺謝過書黑簿名錄玄曹未能坐脫忘志升神御炁運應滅度身經太陰莫測升沈修經旬朔孝子云臣情鍾父子志劇悲惶弟子云臣義均師友志劇悲惶自非上聖垂慈高真乎佑俯矜愚昧力賜憐憫何以洗浣前愆導迎新脫庸是不揆狂斐謹為拜章一通上聞三天伏望大慈曲成至仁無外特降敕命行下十方三界合屬去處將某人浩劫以來累生之後應有過犯並與赦除即俾定錄青宮移名朱府形神混合悉象周圍隨我學功校勲還賞復還治職入太玄克為聖君金闕之臣大揚聖化緣運不絕身得神仙逍遙上清永無輪轉

斷絕復連章

度星齊月

臣性識迂愚資材短陋綴班聯而領教普濟
度以推仁凡有皈依敢忘關奏臣謹據齊意
臣切見上件亡魂涉生以來造業縱情罔知
檢戒厭世之後積愆抱繫自致沈淪流曳三
途顛連五苦惟思執滯豈念超凌春屬姻親
俱罹傳染家門大小積致傾亡求替代以莫
能遂復連而無已如斯陷溺實可矜傷自非
玄造之拯提曷俾下愚之安泰謹為拜章一
通上聞三天伏望隆慈曲加哀憫特降玉清
通炁靈寶妙光照燭重泉釋明夜壘即俾亡
故某人開通正念悔悟宿因醒覺前非自求
升邁免致延累永斷復連臣謹為上請石安
君都星君誅殃君都平君翔平君天玄君石
仙君高都君斷拜君回化君十人天醫博士
善談大夫各一人官將各一百二十人除殃
君天昌君無上高倉君中宮左都候君各一
人兵士各一萬人素車白馬君一人吏兵十
萬人參星將軍太白金星熒惑吏鐵面敢健
食鬼力士天鄒甲卒吏兵官將一合來下為
齋主某人化諭先亡分解家訟消除執著斷

絕復連又為上請斷註大將軍斷尸大將軍
各一人官將兵士十萬人九天補氣將甘露
將護命將各一人官將各三十二人一合來
下保護未來病苦斷除先亡復連即令某人
形魂利安塚墓寧靜微呼塚訟自此斷除釋
罪登真永超幽暗齋主某人泊內外眷屬合
門姻親快樂逍遙竟離傳染精神安泰管衛
和平富壽康寧以為效信

啓告玄穹章預修黃籙齋用

臣澄承玄貺叨領真班仰荷甄陶俯深銜戴
期暢生生之厚澤庸裨化化之深仁控告既
勤關聞敢後臣謹據齊意臣切慮建壇之所
劫灰以來陰濁混凝游氛四塞塵靈流伏昏
垢飛揚非絲解校之功曷肅玄真之奉重以
故系糾雜人物紛葩宜解滌除庶令清淨謹
為拜章一通上聞三天伏望大慈曲施玄化
特降玉清道炁靈寶妙光上煥雲霄下輝風
壘十華八極罔不洞明即俾所建齋壇灌沐
靈光一塵不立內外融潔寶芝自生臣謹為
上請五方五帝解穢君各一人官將一百二

十人捧持五和香泉真精法水一合下降浣
濯靈壇解除厭穢仙花玉女一千二百人九
鳳破穢籙中運穢解穢收穢却穢除穢斷穢
洗穢蕩穢諸大將軍各一人官將各一百二
十人五方五龍主水使者一合下降蕩滌內
外潔齋應辦器用室廬悉獲澄澈更無厭滓
又為上請降真召靈符吏降真召靈童子各
一人資持高上玉清仙王降真符命元皇召
靈符命宣告三界肅命十方策役千靈關盟
萬聖護持壇律糾正齋功由始及終迄無障
撓更希教旨行下玄壇受事靈寶仙曹省府
院司官君將吏從臣請降共佐洪釐使齋主
某人善果周圓嘉祥密被承恩今日流慶他
生散壇言功不負效信

超凌祖玄解冤章

臣學術荒疎材能淺局每為人而有請惟拊
已以知慚仰藉高明俯垂淵鑒臣謹據齊意
臣職惟領教理難抑違謹消今月某日為始
就某處崇建玄壇依按真科次第修奉臣切
惟齋主某人世緣酬酢塵務蒙迷九祖七玄

寧無罪累三生四負或結冤仇非由解釋以
超凌曷俾善功而圓滿謹先於某月某日夜
修設玄都大獻玉山淨供攝召上件亡魂普
及六道四生諸類幽爽享食受煉膺戒佩符

若冤若親俱超淨域庶使齊主某人一身清
淨萬罪蕩除家訟不生怨憎何有逍遙自在
成就良因謹為拜章一通上聞三天伏望大

慈曲施宏化特降玉清道炁靈寶妙光照耀
陰陽開明夜府幽冥萬類均脫化機乘此靈
光來親壇墀聞經聽法各遂騰凌臣謹為上

請玉清溟津大梵靈官三十二人仙吏一百
人為齋主某人呪洒甘露溥化斛筵周遍虛
空無窮無盡喃飴眾爽各獲豐盈隨感來歆

悉皆飽滿又為上請玉清上解祖考靈官解
冤釋結靈官各三十二人仙吏各一百人為
齋主某人開釋祖玄疾除罪簿永超愛網獲

脫輪迴解釋仇讎齊同慈愛克離冤囿竟陟
生方俾先亡永無繫戀之憂而齋主克遂熏
修之果更為上請朱陵火府南昌上宮黃籙

靈曹執法仙眾各持真水真火煉度眾魂俾
出幽關咸生淨域庶幾恩甦品類悉出迷途
寃愛冥靈齊登道岸敷太上無私之澤贊玄
元有造之仁極天際地成膺至化

不經地獄章
臣一介愚蒙千生緣會冒憑涵育存濟崇嚴
雖揣分以凌兢敢謄詞而關告臣謹據齊意

臣領詞虔切理難抑違謹消今月某日為始
就某處肅建玄壇依按真科次第修奉臣切

惟齋主某人托迹塵籠隨緣世網為人為已
易積愆尤謀身謀家動招罪障恣情於三尸
五累逞志於三業六根束係簡書北酆錄籍

百年運盡慮墮幽寥九夜神遷必膺考校茲
預投誠於玄極先期曲赦於蒼穹懺往罪而
盡消悔前非而不作勿經幽暗常履光明徑
上南宮永離北府究觀素實可矜憐謹為

拜章一通上聞三天伏望大慈曲施宏化特
降敕命宣告三官九府百二十曹六洞十宮
羅酆鬱絕河源泉曲五道溟泠五帝考官六

宮掾吏巨天力士執罰神兵司殺司功司命
司錄城隍社令主罪職察俾齋主某人積劫
以來稟生之後心生口語自作教他輕重罪
愆未經原赦因今善果咸與蕩除削過黑編

移名青錄將來運應滅度身經太陰所在玄
曹普加部衛不罹苦趣疾詣南天受化朱陵
逍遙自在輪轉不絕得為神仙蒙如所陳允
昭真貺

南宮寄籍章
臣迂疎賤類朴野愚生誤綴班聯濫司濟度
既投誠而懇告盡請命以開聞臣謹據齊意

臣職惟領教理難抑違謹消今月某日為始
就某處肅建玄壇依按真科次第修奉臣切

惟齋主某人身隨塵域心慕玄關謝過祈恩
既殫懇切修齋行道爰罄修崇期生前削落
於罪愆庶身後轉輪於福祐北都泉曲願滌

刑編南昌上宮覲書真籍儻此日寄名而有
耀則他生受化以無憂洞察忱恂委堪矜憫

謹為拜章一通上聞三天伏望大慈曲施宏
化特降敕命宣告南曹為消黑鬱之名即紀
朱陵之籍臣謹為上請南宮度人不死尊神

人真君南上司命司錄延壽益算度厄尊神迴骸起死無量度人真君一合來降特為齋主某人寄名玄籍削罪鄴山運盡百年即登朱火不經陰地常觀陽天流餘慶於曾玄沛天恩於浩劫更希睿渥遍澤群靈監善惡之數羅沐齋功之廣大普天率土均衍蕃釐六趣三途俱承純嘏慈雲誕布湛露密濡動植飛潛生生自在幽冥品類化化無方陶太和之靈風鼓時雍之至治

眾真監度章

臣夙承玄運生際昌時漸無及物之功期暢度人之澤存數萬一敢殫再三尚冀高明俯垂采聽臣謹據齋意臣職惟領教理難抑違謹消今月某日為始就某處肅建玄壇依按真科次第修奉臣切慮齋主某人業機累性世網謀生五慾七情寧無過咎六因十習易積愆尤雖汨沒於今時恐紛紜於身後懺罪北府寄籍南宮諒荷玄恩俯垂洪澤自非生身而受度永斷惡緣曷令膺戒以佩符常趨善地庸罄忱恂之請仰干穹昊之仁謹為拜

章一通上聞三天伏望大慈曲施宏化特降敕命宣告十方三界合屬玄曹俾齋主某人肅建壇場羅敷盟信敬迎萬聖降召千真遵金錄度命之文受九戒二簡之妙他年滅度不墮迷途徑上朱宮更生受化謹為上請無上九天帝君三十二天帝君五靈五老帝君日月五星真君南辰北斗二十八宿三官帝君南昌上官度人真眾天曹地府五岳四瀆無執真宰俯降玄壇監真證度奉為齋主某解釋冤仇超度宗祖飛滅途苦斷落業根剗削陰名移注真籍降金液而煉質灌靈芽以生津九炁周流八景合備消五行之魔試度萬劫之凶災白簡上生赤書保運欣慶受度既無拘於天門逍遙登真自永離於地戶百年運盡直詣南丹受書超凌永登妙果培今生之慶址植他世之昌基與道合真以為效信

太上濟度章赦卷中

太上濟度章赦卷下

官九

赦

玉清大赦 開度黃籙用

泰玄都省 牒鄴都九幽主者億萬冥曹

敕門下天地之大德曰生仁涵三極日月之容光必照恩浹九幽瞻庶類之流形均一元之稟氣六塵六識陽源易汨於化機萬死萬生陰域遂蒙於業網冥冥罪性慘慘窮魂雖繫黎之妄垢自貽而玄元之真慈曲憫今據法師銜奏為齋意伏候敕旨事牒三天門下敕陳詞激切頒旨允俞依金錄白簡之文數玉墮明真之典普令夜壑咸樂春臺可大赦三界應赦恩到日九幽罪人除十惡五逆不忠不孝誹謗大道毀壞經教者不赦外其餘雜犯以下已發覺未發覺已結證未結證已受苦未受苦已受報未受報不論輕重常赦所不原者咸赦除之

應冥吏陰曹有功高德重者與陞仙職以次進補陽官

應山川神祇係祀典不係祀典有功德及

生民者並與還官推賞務令允當

應一切天仙道一切神明道一切人倫道一切地獄道一切餓鬼道一切畜生道若胎生卵生濕生化生並與解除宿對原釋前愆永離輪迴上生福境

應三途五苦請役囚徒地水二司見禁罪與並與原釋罪犯削落簡書出離冥途受生陽界

應玄壇所度亡過某及某氏九玄七祖歷劫種親宜與和釋冤仇削除罪累證品超度受化更生

應在世水火飄焚兵戈謀害冠盜殺戮蛇虎吞殘王法凌遲震雷噴擊木石墮損旋刃刑傷久抱飢寒曾遭鴆毒疊覆車墜焉自縊投河他境流亡從軍傾斃鬼神拘繫究對勾連疾患喪生胎產殞命官尊跋扈癰瘻拳擊久滯幽鄉未得解脫並與蠲消宿債洗滌新愆超離苦輪往生善道
應三生七世結為冤仇執對不釋並與齊同慈愛和釋牽纏各遂超生永消宿憾

應鐵圍無間硤石血湖囚繫產魂並與湯

除業垢和釋憎仇澄正形神獲生樂界

應冥關幽路一切孤魂滯魄若有主若無主若凶終若善終士農工商文武醫卜男女老少民俗衣冠中國外夷九州四海沈

淪既久超離無因並與洗除罪犯解散冤仇隨願往生逍遙自在

應赦書該載不盡事件所在長吏餘錄奏聞

於戲除罪薄滅惡根庸廣昭天漏泉之澤離

鬼官出地戶允符登真度命之恩嘉與舍生

同歸至化赦書到日主者施行牒奉上帝敕請翻錄行下疾速遍牒所屬遵依帝敕各宜祇奉風火無停故牒

年月日牒

具法位

列八相位

姓某承諸奉行

右玉清大教常時不用惟黃籙壇用之以大紙札之數幅大書前敕門下及三天門下敕二敕字不可越筆寫須控了待法師

錄赦副具奏三天門下及三省飛神上朝

金闕激切奏告候得旨回歸然後法師用

朱筆親填其敕門下用此敕字外用大可漏正面書謹法師銜姓某押承諸奉行封背面書泰玄都省牒九幽都主者億萬

冥曹並大書與赦苦簡同發

青玄寶赦青玄黃籙用

青玄黃籙左府牒九幽主者億萬冥曹

敕門下職履職載天地之常運無窮時修時

舒陰陽之化機不息瞻羅鄧之鬼域號鬱絕

之神鄉蠶蠶下愚每累惡緣而報對龜龜上

聖帝矜善性以提攜崇九華雨露之恩息六

洞雷霆之考盡宣德澤普軫慈悲俾離幽暗

之都均入光明之界今據法師銜奏為齋意

伏候敕旨事牒奉青玄上帝敕宜頒鳳詔併

煥龍符開九地以逍遙拯群靈而快樂可曲

赦三界應赦恩到日九幽罪人除在世十惡

五逆不忠不孝誹謗大道毀壞經教者不赦

其餘雜犯以下已發覺未發覺已結證未結

證已受苦未受苦已受報未受報不論輕重

咸赦除之

應山林社稷神祇聰明正直功德及民者所在長吏條錄奏聞言功還賞

諸北鄭東岱地水職司見禁囚考對一切

罪魂宜與疾除罪簿焚毀寬書離苦登真

超生陽界

諸三途五苦謫役囚徒八難幽關徧繫積

美宜與原釋過犯解蕩冤仇托化人天隨

品受度

諸玄壇所度亡過某人及某氏九玄七祖

億劫種親宜與削除愆過解釋冤仇各還

升遷受生樂境

諸冥關幽路滯魄窮魂執迷沈淪未得解

脫宜與開導正性啓發善心各伴托生母

自執著

諸傷亡死非正命陷沒幽達實可哀憫宜

與罷散仇讎消除罪累身心清靜早得托

生

諸在世微有片善長夜願冥歲月既深未

曾超度宜與考校料簡條錄關陳上名青

官準備任使

諸血湖獄禁繫產魂宜與斷絕冤愆解釋執對潔清形質隨品受生

諸九州十道中國外夷凶終令終有主無

主男女老少士農工商無執數眾久在冥

關宜與和合寬親蠲消罪累普受開度時

刻昇遷

諸赦書該載不盡事件所在長吏條陳以

聞

於戲無拘留逼合之憂品類咸超於北府有

侍衛送迎之喜形魂徑上於南宮嘉與混與

同歸陶治赦書到日主者施行牒奉青玄上

帝敕諸翻錄行下所屬遵依帝敕疾速奉行

風火無停故牒

年 月 日

具法位 姓某承詔奉行

知青玄黃籙左府事

判青玄黃籙左府事

右青玄寶赦青玄救苦妙齋用之書寫格

式如前得旨填敕亦如之只用此數字可

漏前正面如前後背面大書青玄黃籙左

府牒九幽主宰億萬冥曹與九龍符同發

玉皇上帝敕號寶赦九天齊用

泰玄都省 牒九幽主宰億萬冥曹

敕門下天施地生仰乾坤之大造陽關陰關

符晝夜之常經故黑單司考對於推研而紫

極沛慈仁於羣宥與言六趣莫慘九幽積夜

迷烟鎖業機於夜壑重泉昏霧開冤網於泉

扃豈無悔過之心執導求生之性靜惟沈滯

實可矜憐今據法師銜奏為肅意伏候敕旨

事牒奉上帝敕所陳詞旨備切忱恂恭惟

玉皇上帝微號名非常名上極无上聞之者

萬罪消滅得之者千冤解除仁泱泱與事彰

載籍隨敕頒降如帝親行蓋誕布於德音廣

煥敷於寶誥庶提苦趣均證樂鄉可大赦三

界應今月某日建壇以前九幽罪人除十惡

五逆不忠不孝誹謗大道毀壞經教者不赦

所有雜犯以下已發覺未發覺已結證未結

證已受苦未受苦已受報未受報不論輕重

咸赦除之

應山川神祇有功德及民者所在長吏條陳奏聞言功遷賞

應冥吏陰曹無濫刑無僭賞者與陞仙職以次進補陽官

應三途五苦見禁誦役地水二司囚繫罪

爽並與蠲除宿犯解釋冤仇脫離幽途往生福境

應六道四生展轉報對無有窮已並與原宥愆過和釋冤讎俾出輪迴超登善界

應玄壇所度亡故某人及某氏九玄七祖億劫種親並與消解宿憾落滅惡根受化超生逍遙自在

應世傷亡死非正命沈魂滯魄久墮冥鄉並與削除過咎解釋冤憎隨品受生免輪幽暗

應血湖地獄諸類產魂並與蠲滌過犯蕩除冤仇母子分離形神超邁

應諸類幽魂曾經子孫薦拔未遂超升者並與引用日前所修功德無大小咸使升遷毋滯陰域

應九州十道萬姓三軍士農工商男女老少有主無主凶終善終沈淪幽鄉久不受化者並與洗滌冤枉散釋愆辜速令轉輪受生樂處

陳

於戲疾痛呼天尚期歸於翳累齊戒事帝猶冀勝於愆愆况救書之敷諭周詳而實語之光明輝燁十華讚嘆三極皈依宜回幽路之春輝開寒度之旦下塞死尸上開生門凡爾攸司各宜遵奉救書到日主者施行牒奉上帝敕請翻錄行下所屬遵依帝敕風火無停故牒

年 月 日

具法位

姓某承誥奉行

列 八 相 位

右玉皇微號寶赦九天生神齋用之書寫格式得旨填敕亦如前只用此敕字可漏背書泰玄都省牒九幽主宰億萬冥曹

太上濟度章赦卷下

御製靈寶天尊說洪恩靈濟真君妙經序朕惟道之為教闡鴻濛虛玄之秘具無極自然之妙窈窕冥冥昏昏默視之而不見其形聽之而不聞其聲上以陰翊皇度下以利濟羣品功德之大不可名言有若

九天金闕明道達德大仙顯靈溥濟清微洞玄冲虛妙感慈惠護國庇民洪恩真君江王九天玉闕宣化扶教上仙昭靈博濟高明弘靜冲湛妙應仁惠輔國佑民洪恩真君饒王萃靈鍾秀天挺人豪寬惠慈祥仁民愛物忠君孝親崇信三寶篤志好善精勤不二功成行滿遂感天封昭錫徽號序列仙品弼亮化機出幽入明禦災捍患驅沴致祥敷祐下土利濟羣生乃者弘闡靈貺翊衛朕躬扶持保庇載底平寧已而示以符藥廣施靈宇期在使人蠲除疾疢蕃育子孫大德深恩同於天地朕感神之惠夙夜弗忘萬幾之暇因閱靈寶天尊說洪恩靈濟真君妙經顯微玄奧神化莫測方便利益拔濟曠劫誠燭幽之日月而濟海之舟航也乃以鈐梓用廣流傳以

報神休善信之士果能洗滌懺悔崇信三寶盡忠盡孝行仁行義弘發誓願受持諷誦則身家吉慶命運亨通子孫蕃衍消災度厄增福延壽延及九祖咸獲超躋苟或嘗毀輕慢凌忽三寶不忠不孝不仁不義不能敬信奉持則身罹惡業門戶衰替子孫微弱壽年夭促累及九祖永墮淪冥歷觀已往具有明徵於乎吉凶善惡皆由心造為善獲福為惡受殃此自然之理故曰積善之家必有余慶積不善之家必有余殃又曰惟上帝不常作善降之百祥作不善降之百殃然則觀於此者可知所勉哉可知所勉哉

永樂十八年正月初一日

靈寶天尊說洪恩靈濟真君妙經

爾時靈寶天尊在大羅天上五明宮中憑几而坐鐘磬自鳴宴集諸天星眾五斗大神宣演太上無極至真妙道時有斗中都水二使者左執青節右仗黃鉞侍立帝前稽首再拜

長跪而進言臣等宿生慶幸得預天天下觀慾界衆生不忠不孝不義不仁多作惡業全無慚愧曆數已終今生末劫丑口失圖網維折裂兵火肆興玉石焚喪或遭洪水或遇凶年刑賦苛虐災毒流行罹諸苦惱不知解悟生意幾息人道將窮作何因緣可以救度願垂憐憫開方便門

天尊曰善哉善哉末劫衆生一如赤子發汝如是心成汝如是願依吾教法廣為衆生說諸因緣令開悟性勿生疑慮曰忠與孝曰仁

與義四者修持常居吉慶臣等既承斯語敢不奉行乃於甲辰之歲丙午之年下降人間分身教化成功東海顯跡南邦甲子一週復還職任香火一方歷年彌久載逢歲復播如初躡進仙階真君錫號蒙

天尊嗟憫之仁體太上好生之德使一切善男善女知身性命皆憑道生忠孝仁義了悟此因能於三元八節三會五臘庚申甲子本命之日焚香修齋如法供養冥心向北稽首禮念

九天金闕明道達德大仙顯靈溥濟清微洞玄冲虛妙感慈惠護國庇民洪恩真君江王九天玉闕宣化扶教上仙昭靈博濟高明弘靜冲湛妙應仁惠輔國佑民洪恩真君饒王恭對聖意依經懺悔不違真君之誓願各以忠孝仁義而立身內可以增福延年外可以消災度厄上可以使祖禰之魂神超度下可以使家宅之眷屬又寧普願衆生同霑利樂於是

天尊重為真君演說而作偈曰

靈濟真君 修真得道 遊宴仙都
天尊錫號 北斗降神 洋洋于左
下臨三界 上朝五老 福國寧家
其功浩浩 無願不從 默符所禱
忠孝仁義 永為身寶 用作因緣

不違嗜好 一切善惡 皆由心造
為善者福 為惡者禍 急急如
天尊律令勒

靈寶天尊說洪恩靈濟真君妙經終

洞玄靈寶自然九天生神章經

人二

三寶大有金書

天寶君者則大洞之尊神天寶丈人則天寶君之祖炁也丈人是混洞太無元高上玉虛之炁九萬九千九百九十億萬炁後至龍漢元年化生天寶君出書時號高上大有玉清官

靈寶君者則洞玄之尊神靈寶丈人則靈寶君之祖炁也丈人是赤混太無元玄上紫虛之炁九萬九千九百九十九萬炁後至龍漢開圖化生靈寶君經一劫至赤明元年出書度人時號上清玄都玉京七寶紫微宮

神寶君者則洞神之尊神神寶丈人則神寶君之祖炁也丈人是冥寂玄通元无上清虛之炁九萬九千九百九十萬炁後至赤明元年化生神寶君經二劫至上皇元年出書時號三皇洞神太清太極宮此三號雖年殊號異本同一也分為玄元始三炁而治三寶皆三炁之尊神號生三炁三號合生九炁九炁出乎太空之先隱乎空洞之中無光無象無

形無名無色無緒無音無聲導運御世開闢玄通三色混沌乍存乍亡運推數極三炁開光炁清高澄積陽成天炁結凝滓積滯成地九炁列正日月星宿陰陽五行人民品物並受生成天地萬化自非三元所有九炁所導莫能生也三炁為天地之尊九炁為萬物之根故三合成德天地之極也人之受生於胞胎之中三元育養九炁結形故九月神布炁滿能聲聲尚神具九天稱慶太一執符帝君品命主錄勅籍司命定筭五帝監生聖母衛房天神地祇三界備守九天司馬在庭東向讀九天生神寶章九過男則萬神唱恭恭則萬神唱奉男則司命敬諾女則司命敬順於是而生九天司馬不下命章萬神不唱恭諾終不生也夫人得還生於人道濯形太陽驚天駭地貴亦難勝天真地神三界齊臨亦不輕也當生之時亦不為陋也所以能愛其形保其神貴其炁固其根終不死壞而得神仙骨肉同飛上登三清是與三炁合德九炁齊并也但人得生而自不能尊其炁貴其形實

其命愛其神自取死壞離其本真耳九天生神章乃三洞飛玄之炁三合成音結成靈文混合百神隱韻內名生炁結形自然之章天寶誦之以開天地之光靈寶誦之以開九幽長夜之魂神寶誦之以制萬靈太一誦之以具身神帝君誦之以結形九天誦之以生人學士誦之以昇天鬼靈聞之以昇遷凡夫聞之以長存幽魂聞之以開度枯朽聞之以發烟嬰孩聞之以能言死散聞之以還人三寶神與萬品生根故非鬼神所知凡夫所聞也夫學上道希慕神仙及得尸解滅度轉輪終歸仙道形與神同不相遠離俱入道真而無此文則胞胎結滯死炁固根真景不守生炁無津九戶闔塞體不生神徒受一形若寄炁而行學得此法可坐致自然三寶尊重九天至真祕之大有九重金格紫陽玉臺自非天地一開其文不出元始禁書非鬼神所聞竊之者風刀萬劫魂死無生依科遵奉形神同仙三元宮中宿有金名紫字刻書來生應為三清神仙之人當得此文有其緣會當齋金

寶奉師効心依科盟受閉心奉行慎勿輕泄風刀考身修行之法千日長齋不關人事諸塵漏盡衷心默念清香執戒入室東向叩齒九通調聲正炁誦誦寶章誦之一過聲聞九天誦之二過天地設恭誦之三過三界禮房誦之四過天王降仙誦之五過五帝朝真誦之六過魔王束身誦之七過星宿停關誦之八過幽夜光明誦之九過諸天下降一切神靈莫不衛軒一過徹天胞原宣通二過響地胎結解根三過神禮魂門練仙四過天王降仙魄戶閉關五過五帝朝真藏府清涼六過魔王伏諾胃管生津七過星宿朗明孔竅開聽八過幽夜顯光三部八景整具形神九過諸天下臨三關五藏六府九宮金樓玉室十二重門紫戶玉閣三萬六千關節根源本始一時生神九過為一遍一遍周竟二界舉名五帝友別稱為真人十遍通炁制御萬靈魔王保舉列上諸天百遍通神坐致自然太一度符元君受生千遍通靈坐在立亡仙童玉女役使東西萬遍通備馳騁龍駕白日登晨

元始天尊時靜處閑居偃息雲宮黃房之內七寶幃中熙夷養素空碧練真耽咀洞慧俯研生神理微太混嘯朗九天是時飛天大聖無極神王玉輔上宰四協侍晨清齋建即侍在側焉憑瓊顏而妙感仰靈眸而開襟竊神章而踴躍發天音而蒙生敢乘機而悟會冒靈眄而披心於是飛天大聖無極神王前進作禮稽首而言上白天尊賤臣幸會得仰侍靈軒不以短狹叨渥冥津重悟凝玄位登神王總御生死領括天僊賞監七覺遠覽遐方雍觀上宰對司侍晨方當乘機應會履九太陽洞理陰符撫掌兆民大運將期數終甲申洪流蕩穢凶災彌天三官鼓筆料別種人考算功過善惡當分自赤明以來至上皇元年依元陽玉匱受度者應二十四萬人開皇以後後數至甲申諸天選序仙曹空廢官僚不充遊散職司皆應選人依元陽玉曆當於三代更料有心積善建功為三界所舉五帝所保名在上天者取十萬人以充其任又當別舉一十二萬人以充儲官如此之例或以宿名

玄圖或以骨像合仙或以減度因緣轉輪或以篤好三寶善功徹天或供養三寶為三官所稱或修齋奉戒功德積感或施散財寶建立道堂或救卹窮乏濟度天人或為三師建功充足天官有名考簿錄三官相應皆逆註種名上下有別毫分無遺又九幽之府被東華青宮九龍符命使拔九幽玉匱男女死魂宿名有善功德滿足應受開度者取三十二萬人以充甲申驅除之後開大有之民當此之時生死交會善惡分判得過者真為樂哉然三官相切文墨紛紜龍門受會鳥母督仙萬聖顯駕晝夜無閑功過平等使生死無偏此之昏闇亦臣之憂矣大期既切觸事關替恒恐一旦受催公門伏聞天尊造大慈之化垂憐蒼生開九天之奧以濟兆民明科有禁戒非賤臣所可參聞然大數有期甲申垂終運度促急大法宜行使有心者得於考簿之中聞於法音開示於視聽勸化於未悟者也緣茲上陳懼觸天顏願見哀愍賜所未聞於是

天尊撫几高抗凝神遐想仰誦洞章嘯詠琳琅良久忽然歎曰上範虛漠理微太幽道達重玄悉冠神霄至極難言妙亦難超子既司帝位受任神王飛天翼於瓊闕四宰輔於明輪遐眎極覽領綜無窮雍和萬化撫料蒼生今大運啓期三五告辰百六應機陽九激揚洪泉鼓波萬災厲天四宮選舉以充種民三代昏亂善惡宜分子當勞心兆庶疲於三官興廢之際事須開能今以相委其勉之焉實書妙重九天靈音施於上聖非鬼神所聞明具有格四萬劫一行今冒禁相付子秘之矣。慎勿輕傳登命九天司馬侍仙玉郎開紫陽玉笈雲錦之囊出九天生神玉章四輔列位五老監真太一命辰玉帝唱盟一依俯仰明真具典南向長跪以付飛天無極神王法事既畢諸天復位

賜篇目九祖同仙當採擇其人應為仙者七百年中清齋千日齋金縉誓心依盟以傳慎之則享祚漏之則禍臻享祚則福延九祖德重山海招禍則考流億劫痛於毒湯風刀相刑可不慎之焉

始青清微天寶章
元始洞空無 三炁精上門 紫容觀太空
四明植靈根 妙化發東瓊 三翩起西崑
號應九玄清 五華帶錦雲 離羅煥神燈
七精耀北玄 飄飄上清畿 奕奕帝一尊
落落高上章 羽童何紛紛 流香本無色
洞入萬仙羣 左迴三流劫 右轉九天關
金華纓玉童 八風舞空輪 四時無停機
青白早明分 九九改劫運 三三度一春
天地有終會 祕激歸在觀 洞明正一法
嚴修六天文 太平返空無 奉翊後聖君

元白禹餘靈寶章
靈風起西門 錦雲生東瓊 三炁煥玉洲
流香乘東輦 玉華披風散 倏忽朗九清
霖林耀朱日 黃水逐月生 中有採芝童

衣羽戴飛青 颺景萬領風 逍遙寧綠軒
總御九空輪 運開萬稽程 左命三天文
右攝六天兵 檢炁返空洞 六度應運履
劫運自有會 誰測敗與成 弘波輪靈聖
六合無遺形 白屍深長流 孤魂因復靈
悲此去來際 乃覺正法明 至學加精修
東華結瓊名 欣有白簡人 相與樂太平

玄黃太赤神寶章

洞關運天綱 五炁輪三微 紫戶吐瓊簡
金門納神暉 八會交真風 晃朗重明開
天際九清外 落落高神迴 三色返空無
四候應玉轡 河侯已鼓筆 五行潛相推
六度無終劫 運極乘炁歸 萬魔羅天布
羣兇竟吐威 兆民負災衝 積屍令人悲
妙哉正法文 理劫明不衰 至時奉相迎
契在九天飛 與爾期太平 放心無翮飛
鬱單無量天生神章第一帝真胞命
元元一黃演之炁
混合空洞炁 飛爽浮幽寥 延康無期劫
眇眇離本條 苦魂沉九夜 乘晨希陽翹

真胎命元洞冥紫戶之炁

大有通玄戶 鬱單降晨霄 黃雲凝靈府
陰陽炁象交 胞元結長命 惡根應化消
桃康合精延 二帝秀玉飄 灌漑胞命門
精練神不彫 九天命靈章 生神神自超
元君遏死路 司馬誦洞謠 一唱萬真和
九遍諸天朝 稽首恭幼年 慶此榮舊苗
上上禪善無量壽天生神章第二帝
無量結紫戶 炁尊天中王 開度飛玄爽
凝化輪空洞 故根離苦愛 緣本思舊宗
幽夜淪遐劫 對盡大運通 帝具始明精
號曰字元陽 櫻兒伯史華 結胎守黃房
斬根斷死戶 照願養櫻童 禪善導靈炁
玄哺飛天芳 華景秀玉質 精練自成容
務玄育上生 羅列備明堂 太虛感靈會
命我生神章 一唱動九玄 二誦天地通
混合自相和 九遍成人功 大聖慶元吉
散華禮太空 諸天並歡悅 一切稽首恭
梵監須延天生神章第三帝真魂命
元長靈明仙之炁

須延總三雲 玄元始炁分 落落大梵布
華景翠玉尊 明梵飛玄景 開度長夜魂
遊奕赴期歸 炁炁返故根 大帝號陽堂
字曰八靈君 九開綠迴道 胎炁生上元
陵梵度命籍 太一輔精延 泥丸敷帝席
三部八景分 魂生攝遊炁 九轉自成仙
琅琅九天音 玉章生萬神 三徧列正位
炁參八辰門 玄關遏死戶 靈鎮津液源
應會感靈數 明道潛迴輪 慶此櫻兒魂
稽首讚洞文

寂然梵術天生神章第四帝真魄命
元陽尸冥演由之炁

寂然無色宗 梵術抗大羅 靈化四景分
萬條翠朱霞 遊魄不顧反 一逝洞羣魔
神公攝遊炁 飄飄練素華 榮秀椿劫期
乘運應靈圖 空洞生神章 瓊音逸九霞
一唱萬真會 審美合成家 九轉景靈備
鬱鬱曜玉葩 兜術開大有 一慶享祚多
上聖迴帝駕 櫻兒歎以歌 不勝良晨會
一切稽首和

波羅尼密不驕樂天生神章第五帝

真藏府命元五仙中靈之炁

翻翻五帝駕 飄飄玄上門 遊步黃華野
迴靈驕樂端 採集飛空景 舊典多不存
太微迴黃旗 無英命靈禧 攝召長夜府
開度受生魂 公子輔黃寧 總錄具形神
五章洞幽靈 五轉天地分 炁練元藏府
紫戶自生僊 數周衆真會 啓陽應感繁
玉女灌五香 聖母慶萬年 三界並歡樂
稽首禮天尊

洞元化應聲天生神章第六帝真靈

府命元高真冲融之炁

應聲無色界 霄映冠十方 迴化輪無影
冥期趣道場 靈駕不待轡 朗然生神章
空洞諒无崖 玄爽亦爲疆 練胎返本初
長乘飛玄梁 薪畜喪天真 散思候履常
斬伐胞樹滯 心遊超上京 願會既玄玄
悟我理兼忘 介福九天端 文禮地辰良
混化歸元一 高結元始王 稽首侍靈運
長謝置塵張

靈化梵輔天生神章第七帝真元府

命元高僊洞笈之炁

玄會統無崖 混炁歸梵輔 務猷運靈化
潛推無寒暑 乘數構貞條 振袂拂輕羽
瓊房有妙韻 沉登高神所 圓輪無停映
真仙參列序 上上霄衢邈 洞元深萬巨
秀葉翳翠霞 停陰清泠渚 邀翫怡五神
繁想嘯明侶 五難緣理去 冲心自怡處
爽魂隨本根 疊疊空中佇 七誦重關開
豁滯非神武 運通由中發 高唱稽首舉

高虛清明天生神章第八帝真華府

命元真靈化凝之炁

清明重霄上 合期慶雲際 玉章散冲心
孤景要靈會 煥落景霞布 神衿靡不邁
玉條流逸響 從容虛妙話 靈音振空洞
九玄離幽裔 感爽無凝滯 去留如解帶
明識生神章 高遊無終敗 玄景曜雲衢
跡超神方外 應感無方圓 聊以運四大
研心稽首誦 衆聖共稱快
無想無結無愛天生神章第九帝真

神府命元自然玄照之炁

無結固無情 玄玄虛中澄 輪化無方序
數來亦巨乘 誰云無色平 峨峨多丘陵
冥心縱一往 高期清神微 良遇非年歲
劫數安可稱 浮爽緣故條 返胎自有恒
靈感洞太虛 飛步霄上水 津趣鼓萬流
潛凝真神登 無愛固無憂 高觀稽首昇
太極真人頌二首

大道雖無心 可以有情求 佇駕空洞中
迴盼翳滄流 淨明三界外 蕭蕭玉京遊
自無玄挺運 誰能悟冥趣 落落天漢澄
俯仰即虛柔 七玄散幽裔 返胎順沈浮
冥期苟潛凝 陽九無虞憂 觀此去來會
時復爲淹留 外身而身存 真仙會良儔
疊疊玄中趣 湛湛清漢波 代謝若旋環
椿木不改柯 靜心念至真 隨運順離羅
感應理常通 神識逮自徂 淡遊初無際
繁想洞九霞 飛根散玄葉 理反非有它
常能誦玉章 玄音徹霄遐 甲申洪災至
控翽王母家 永享無終紀 豈知年劫多

洞玄靈寶自然九天生神章經終

八二

十二

誦經應驗

蜀青城山乃神仙會府昔蜀主孟昶往祈見女真麻姑致齋壇側青城今有獻美女張氏遂納之名之曰麗華同處于丈人觀忽一夕迅雷掣電暴雨猛風掀拔屋宇騰空散落張氏遂殞命葬山下後數十年上元節丈人觀道士李若冲夜歸憩於山前忽竹陰有一女子號泣而出詣若冲前賦詩云獨卧經秋墮髮蟬白楊風起不成眠澄思往日椒房寵淚濕衣襟損翠鈿言訖復泣而退若冲還觀見丈人殿上有衣冠朱履之士皆面北立如有奏對殿下廊廡間列諸罪人見獄卒引一女子繫於鐵柱杖之號叫痛楚徐察之乃山前途之者俄頃善神以劍指若冲曰今夕上元天官自五嶽丈人校勘生死罪目不宜久立若冲乃潛避達旦具白其師唐洞卿唐曰汝知之乎此乃張麗華也昔寵幸於此褻瀆上真致獲斯罪既以詩告汝汝當救之曰何法可救曰但轉九天生神章九卷奏金錄

八二

十三

白簡可免斯苦即自託生偶遇臨邛牧田魯儔設黃籙若冲遂置簡書疏轉經十過投仗醮所因而救度謫至九卷適丁焚簡之時若冲即回向而焚之明日張氏所葬之地有沙字四句云符吏忽忽扣夜扃便隨金簡出幽冥蒙師薦拔恩非淺領得生神九過經若冲諦觀太上垂教憫諸衆生故立救拔之門以濟生死之路嗚呼世人欲濟度先亡者誠當崇此瓊文爲超脫之捷徑謹書于經末以爲崇奉之勸云

洞玄靈寶本相運度劫期經

人三

靈寶天尊昔於洞浮山中謂道士炎明日汝居此山幾何也炎明答曰弟子自住此境三百萬劫

天尊曰汝住是境三百萬劫臣有何奇章異種之物乎炎明答曰自居此土三百萬劫蘭林不衰鳳鳥不死其林樹葉有天景大混自然文字九色鳳鳥恒食樹葉其鳥晝夜六時吐其異音其鳥鳴時國中男女皆望音而禮舉國男女各面有金容壽命三十六萬歲無有中夭者其國中有一火鍊之池其水蔚勃禮服而激形狀有似天景大混之文國中男女三年一詣大池沐浴身形不知因緣所從而來其國人民不知三寶可奉不知造惡任化自然亦如鳥鹿之徒生也唯願

天尊告其因緣所從而來令諸國人悉得聞知

天尊告曰此土男女無辜壽命長遠而無中天者吾昔在赤明元年於此土中撰天景大混自然文字以火鍊其字形流精水池故有

字形國人男女三年一詣大池沐浴身形即飲其水腹中三年調節故人命壽長遠以此天景大混自然文字故爾時香草拂拭天文化成蘭林其葉文字以本有之故葉起天文鳳鳥食之故能長命其音麗雅汝知不平從

今以去天運當促真文還收太芒上京紫微宮中其後人命短促五濁躁競眾邪野道競來擾亂國主貪暴兵革妄興疫氣流行助其威虐人民疾病死亡狼籍是男是女任命生死不以道理吾哀之故為撰其文字天景大混之科歷國說法出法度人若有善男善女修行道德永度惡世取於將來無為之福場炎明日此事久遠非是淺智愚情之士所能分別今日聞說得知本始所從而來一生之幸無喻可匹

天尊言天運當促真文收還大羅之外玉芒玄臺紫微宮中五濁躁競人命轉促眾邪野道競來擾害人民疾病死亡狼籍如斯之苦無可怨之唯有禮拜燒香願度惡世求將來世無量之福場如有斯業可以均之復有餘

業可得免脫後獲大福乎答曰三寶者道之元度世之本三業者神真之徑路萬聖之所由長齋者真仙之上業斷結之本始布施者無窮之道場七寶常自然如五戒者安樂無終患人道常不絕四十五念者大慈之業明

始終別三惡造屋者安靜無量樂官殿常自隨供養者行坐無飢乏天厨常自然濟人渴乏者去往常安穩始終無他苦橋梁過度者臨難不以難天神常扶持捨施者天神空中喜道士殊丹誡唱道者行來常如意生死得人主一切諸業者莫不得如意人能行如是意從無不達心注口必書徘徊必馳之心口行相從和光神必周情逆其相違百向無人可雖假得微恩天必還奪之行學從意浪徑違必墜坑塹之喻五內違欲投巨海塵至想炎煩正念孤獨存不得躁外煩毫深不得加微受想奪人本志心派塞百煩毫孔開悉納無上法用之便用之不用便不用生之何生之不生為不生學士不思審魔欲無疑之付行良擇用馳路且夷止始終無朽敗神怡助

道之功立事亦成道王其歎之授記無上卿湛而無違知永辭百煩苦萬真同神慧矣明問曰當來僅為五濁惡世衆邪野道一切衆橫擾亂良善疾病死亡不以道理蒙

天尊言造諸功德修行道法功晉成就得度惡世一切衆生為生官逼迫上擾下給苦惱衆生進不及功退不免死官事疾病競來威虐如斯之厄奈何免脫夫聖人大慈應濟世苦豈不勉之豈不勉之

天尊告曰善汝之所問甚要甚妙諦聽諦聽語汝諸苦濟厄之法昔者赤明元年正月上寅天光悉朗日月吐暉靈風掃塵山嶽藏雲出是法時知當來運終劫末之世兵病流行人命短促致開緊微上官延生度世不死之法濟厄救苦拯難之道故說神呪經十卷救濟衆生苦厄之者若有衆生遭諸疾病官事刑獄一切衆橫者有能讀誦至心受持書寫供養將來往生兜術徐來勒一時同出能還見世永終康吉若有衆生遭諸苦厄不能及是神呪經十卷者誓魔呪邪二卷二卷不可

無也假使力不能及一卷亦可免度厄難見世平安何以故此二卷能召三十五大魔王三十六世大邪鬼威誓六天鬼神無不威伏若有不如神呪之法能令魔王入淵能令魔王入火能令魔王萬斬頭破萬分不以為謝復有藥王藥盛恒歲以雪山採藥採合藥草和合搗篩救諸病苦若有衆生遭諸疾病苦厄之中不及湯藥但當一心思惟二藥真人造諸良藥醫治百姓皆得差愈但當正思正念病可差除若心飛馳不加正念不能差愈復有元陽上部七仙真人六神仙人十三過去得道真人名號臨有厄難不能免脫但當至心呼其名號十三真人亦即來應救護是人悉得平安若無至心呼之萬遍不能降致神真也此元陽上品濟人厄難救護世中苦厄衆生若有衆生無男無女有能至心受持書寫讀誦憶念是經有願悉得復有靈寶無量度人上品有能書寫讀誦齋詠是經有願無不如意何以故斯經諸天隱韻之音尊妙無量不可思議若有衆生病疾死亡官事刑

獄有能達齋讀誦十遍亡者去離幽苦上昇天上受福自然若遭厄難能呼三十二天名號至心祈願無不解脫復有太清二十五真人名號亦能濟人厄難不可思議復有大洞真經六天魔王諱字亦復濟人厄難無量神經十二真人名號至心稱誦亦復濟人厄難復有三昧真經九天名號亦能濟人厄難復有道德經解五藏真神名號至心呼召附衛身形安鎮魂魄能使神爽安定不遭衆橫悉得如意若能思念無量至無邊億所向之時思之念之號之呼之無不允合皆得如意矣。明曰一切衆生作如是念作如是思稱呼聖人名號得度厄難一切蒙恩但以衆生不信斯念不信聖人之有名號過於衆橫苦惱之中方思玄業委身道門至心稱其聖人名號有功感以否

有功感以否

天尊答曰有何以故貴其初心尚其後果能有身心具發可謂美矣豈有無感功也踈陀人不信功德任命生死不知因緣輪轉福報而不經懷諸部經典謂之虛言遇一餒士羸

瘦欲死路見懷稔甚無己已扶將到豐飲飽
過糜食一以畢顏色暢悅食二以訖走力充
足食三以竟辯口通說食四以足智力自然
餒困得濟名號與命三日五食五德備矣斯
人即名書東華落死北薄食信慈心其果如

是而況遭厄思聖濟度夫聖人常臨難接人
不窮無智恒以德報怨授化有心其人前雖
無親思附丹誠豈得不應者乎譬如谷神咨
無不對豈擇聲而授者乎聖人之應亦復如
是問曰若善男子修行三業諸法亦備萬善
普全思慮亦盡其道如何答曰十仙記矣何
以故衆行普備盛德誕彰累煩滅除功盡記
矣問曰若有女人修行三業諸法以備萬善
普全思慮亦盡其道云何答曰降授一形何
以故女人前功卑故生在女身今合功行並
備功書名記無可奪之要須轉女化男乃就
此果耳問曰十仙可一起而成復有轉輪答
曰一仙二仙乃至十仙皆有次第未可等而
同輪也何以故或有凡夫而行十仙或有聲
聞未悟不能行一仙者是以行有精麤見有

遠近所用不等各由心也問曰學士之法爲
數身數心數行數功數年若修其身未必苦
勤若依其心未必數身若計其行未必細心
若計其功未必苦行若數其年未必翹勤進
退之宜不能明了惟願

天尊告其未悟今諸衆生悉得解了答曰自
心不數身計功不計年何以故學士乃至此
身而不一果乃有學士起一室而行道以成
一仙是故計功因心而起因心而數其功因
行以致其真問曰天下萬物都由道氣而生
既有其生皆應有土水石鐵獨無命乎答曰
此四事者有性而無命何以故有性而無命
無命者以無血脉汁色是以有性而無命也
問曰人所以十微草木所以八微答曰以無
意行問曰道所以獨清答曰清者萬行足而
無垢塵故曰清自道以下皆未清何以故外
無所彰內無若塵其性淡然而無虧盈毀之
不滅譽之不榮撓之不濁澄之不清淡泊虛
無無有及之漂流無滯稱之曰清耳問曰道
何以稱一答曰名道者無爲無不爲高而無

蓋下而無底上無復尊覆下無復卑承無匹
無偶無摩無喻淡泊虛無萬聖之祖宗乃至
世界恒沙尊神莫不宗述以成至真是故獨
標聖外不可思議而無羣徒故稱之曰一耳
問曰何以稱之本相答曰本相者經號稱耳

何以故本者道教開敷啓曜聖藝踐起法場
流通之始故稱之曰本相者道法開闢像教
衆生形踐三界光明振暉十方衆生得蒙威
相之功故稱之曰相二名肇建開張之首一
切萬真莫不宗受得道之本成就之始故稱
之曰本相也問曰天地所以生成日月所以
布立衆星所以列宿答曰天地初生人命長
壽而無惡心道悉純化無爲而治世王煩耗
民漸生惡道悉澆浮天運漸促天魔下降野
道橫行國主剋暴兵殘民命疫烝流布助行
威虐傷胎落子無辜縱毒天下無慘皆遭兵
患男曠女怨面有憂色雖有豪家賦稅蕩盡
男失其娶女失其嫁男女失時上徹天靈使
陰陽失度水旱交并災霜雨雹傷害五穀人
民飢饉各離鄉僑迤相陵奪更相吞食或有

淫蕩之男不時之女私行號令共相呪誓或
 於日月星辰之下或於山河社祠之邊迭相
 䟽誓棄門蕩戶以臨證驗冥神毒鬼因誓攝
 錄生男墮傷生女便夭天下鬼兵助行威虐
 人民死亡不以道理盜賊競興吏食百姓窮
 民呼嗟正怨上天漸漸夭促命延不久壽不
 過三十歲而終男年八歲而陽女年七歲而
 陰當斯之世天運促急共相渾濁不可稱記
 炎陽涌陰激結相迫陽毒陰怒生火江海劫
 燒乾坤萬物灰揚上無天色下無地淵上下
 澆豁泯然空蕩濫風鴻鴻赤炁彌張方遣授
 記之賢持爐鑪篇排托施張彫造乾坤清炁
 上昇爲天濁炁下降爲地清布陽道濁布陰
 道步天量地制作東西南北四維上下中央
 方遣巨靈胡亥建造山川五嶽四瀆通之海
 源授記賢主玄中養以靈寶真精凝成日月
 星宿日主陽道日行一度月主陰道月行十
 三度三百六十五度一周天日圍千里月圍
 一千二百里天地相去一億五萬里崐崙山
 處於土中凡有八十一重亦名八十一天崐

崦嵫四面即名四天下天王主之上承帝一崦嵫者四海之源何以故四方大海出於山下旋流四面而去湛於淵其淵深三百三十六萬丈縱廣三萬六千五百里上合天度須人主之此海廣有大龍王三十二頭上承阿耨龍王諸天神龍百萬之數及諸龍子亦無數量崦嵫之山高地一萬五千里有地神仙人車道從東北甲地而上西南庚地而出其中徘徊十二市乃達其頂上凡有三百三十六萬里神仙車牛於今在也天地造化萬物有形周而復始亦如十二月法所以地山之高崦嵫爲之最高崦嵫之南三十萬兆里復有崦嵫之山東西南北亦有無量不可稱計一日月所正一崦嵫名爲四天下更不及諸方從崦嵫至崦嵫滿千數之爲一從崦嵫至崦嵫滿千數之爲二從崦嵫至崦嵫滿千數之爲三其數滿千小數始一從小數一起其數至千始名一小千從小千數至滿千始名爲一從小千至滿千始名爲二從小千至滿千始名爲三其三滿千中千之數也從中千數

至滿千始名爲一從中千數至滿千始名爲二從中千數之至滿千始名爲三其三滿千名爲大千此三千世界十仙所主化見神智具相威力所能及也是以世界無邊聖智無極載衆無頭道力無修一切含形悉得生活德無所宗獨立無喻問曰天尊所說天地運終劫數盡矣造化萬物乾坤更始崐崙巨海廣狹高卑具以說之運阨之難幾年一終災會之艱幾歲一遭唯願分別答曰天地一成乃至終盡其中有三元九阨大災小災其運不可移何以故但數終矣故不可移所以若何三元者上中下也一元三阨數終巨易凡有九阨天不能改地不能易其數定矣何以故上元之上九九八十一萬年而終上元之中八八六十四萬年而終上元之下七七四十九萬年而終此上元三阨交運之數故不可奪中元之上六六三十六萬年而終中元之中五五二十五萬年而終中元之下四四十六萬年而終此中元三阨交運之數故不可奪下元之上三三九萬年而終下元之中

二二四萬年而終下元之下一萬年而終此
下元三厄交運之數也故不可奪此是三元
九厄數期厄連九厄之中一厄三災六害亦
不可却之三十年一大災人民死亡骸骨不
收十年一災人民半死骸骨亦不收百年一
災兵起滿野人民亦有死者此三災其數既
至不可改讓之六害者三百六十年一害三
百年一害二百四十年一害一百八十年一
害一百二十年一害六十年一害凡有六害
不可讓却六害之中復有三小災所以者何
三十年一災牛病五穀貴十二年一小災賣
牛馬糶食儲六年一小災布絹賤米麥貴恒
以此度不可却之凡此三元九厄三災六害
皆不可讓之智人審之可避而去之若小災
飢饉不熟貯穀備之是以賢人就有德去無
道逐福地離湯火故始終無殃患也故天下
皆亂而賢獨安天下皆飢而賢獨足是以賢
者觀時來知吉凶審年數避禍難故終無患
也是以君子逐賢而居果有利益小人就土
地而處果有覆沒之患故須逐賢者也炎明

曰受恩願問餘解大千之載一切衆生悉有
道性雖有其性而無其真當運滅盡其性如
何答曰滅盡運終一切衆生普生慈心志存
道場當斯末劫周時得道唯有種子泡生而
漂終不死也何以故以重其種故一切萬類
亦留其種終不普昇也問曰如諸衆生普得
道真與大道同體否答曰一切衆生得道成
仙號曰世尊於此稱盡矣唯有大道之氣可
得之耳云欲合同道量未之有也何以故譬
如飢人羨飽得飽飽而忘飢是以真人起於
不足而忘於之得足以忘不足問曰道性可
見否答曰不可見而可見之成之故可見未
成觸目而不觀何以故一仙真人視道性萬
分始得見一自聲聞圓覺知進而不觀知進
者諸漏已盡更無煩惱神通變効學士所不
能及故知進而忘其退四道尚知進而不知
退而沉於二士乎問曰三道果人俱有果行
其漏何以不除答曰三道果人有時漏而不
忘一道果人妻子眷屬未相去離憂念眷屬
不能斷絕故為漏有願進退若有之四道以

上日昇于辰必至盛午何以故無漏無願是
昇于辰亦向午也是以悉存而不忘故譬之
也

洞玄靈寶本相運度劫期經

三

十二

洞玄靈寶丹水飛術運度小劫妙經 合

太上大道君曰元始天尊言景光併國大天下劫運盡其景無蓋其光無底不可安止日月不能照列辰不能紀無上無下不可依逮其數難窮道言無上無下彌綸運會輕至於歷無淪入於空玄二者同號思議遼寂迴而復同竟而玄圓上鍾於絕頂下人於微塵左達於蒼浩右通於萬川大羅蓋列斗絕接冥玄都元君靈運旋隱巨嶽巖谷翻然盡并六度既修梵行雙處登諸天關天跡遠豁虛無湛根小運流周運度開元諸天輪轉炎度會期諸地應數亦俱輕翻天高無極乎洞原天以竊樹正為網紀地以人鳥住乎炎煙小劫運來上造高天從天運度不絕幽門於是衆靈記注名曰天地數交小劫已交也元始天尊度此輪轉已交之數凡三十六萬劫時行名為小天風度小劫交也大天者有三千九百六十天包於十方諸小天其天各治真人各有十方真人三百年一過旋行此竊樹及人鳥山竟名曰小天運度交小劫周也真人


從今天中出之於大天天有三千九百六十天大劫景光真人禮行此天畢名為小劫運度周也


元始與景光真人言天有百億大天地有百億洞天一天三十六萬劫年行同盡名為小天其天有大洞鄉真人小劫運度周時還其立置宿五斗七籍魁魁始成日月朗明天元新治其時玄度出化經道流應有太靈紫元夫人從靈耀天中出從女飛天人十許人遠尋玄度爾時正在五嶽鎮此炎煙清蕩災禍止伏諸山人見玄度應於十絕虛空中作禮夫人言往昔上古劫運未交時天尊太真已見玄降其辭演上古靈寶經部屬卷數藏之於大洞玄鄉中有仙骨者見其經文後有太極真人未得道之時常居世間遊山採藥年七歲遊行至九十歲不殺衆生常修世間諸經若君道德衆經為業通微內究神真普足遊行所至不問幽山深谷林森巖岵絕澗之地後於武人山洞中見元君得道之跡遺八素交帶真文妙經太上洞玄靈寶小劫運

數妙經學者自當授子令知天地運數交會百億數盡玄度復降恐大數欲至何可過哉小劫見也


元始與玄度真人言數隨百六生於末運其時有仙骨之夫吾自教之度身之法學者當以常求過災度煙厄者當學三洞妙經置立靈寶齋法若在人間者當立高座寶蓋華燈香机朝禮一日六時日中一食若遠棄世務在山林幽谷齋法獨立之道者長齋唯嚙氣吞丹常以立坐左手迴北極星言某甲日吉時良豎立福田願北極太上度某甲形開氣三呼六時行此自得道真天運小劫交時玄度真人以此秘文九符度之元始言九符者九章也應太上九策文受靈寶佩此九符水文是洞玄靈寶章文也誦詠經時佩身丹書素籙迴符給囊請帶之以去小劫交秘之也元始天尊演太上洞章符九章

演太上洞章符第一







演太上玄章符第二




演太上靈章符第三





演太上寶章符第四




演太上玉章符第五




演太上九章金章符第六




演太上玉音三十九章符第七



演太上生神章符第八



演太上九淪化隱章符第九



秘符文者太上洞玄隱策者也學者佩之於身常誦此九章音真道自降

元始天尊言三素者紫素黃素白素是也今各為太上洞玄靈一真人三素合為三真人恒統領今治也

經言靈寶法師建齋法服法裙以黃布為裙內著泥丸繒泥丸繒其法上著青橫幅為帔

黃繒為巾寒夏不改易通常以此為法衣常有神男玉女衛之

經言法服者若山林幽隱建立齋法其裙襦巾帔等皆以鹿皮製之然不得與世人同齋若在世學者當按經言不得服山學法衣遊出人人間教不得入山林且亦違經犯戒諸天大真觀看威儀失法為魔王所笑正神不感玄真不臨前上古之時太妙天真未得道之時奉修靈寶法不按儀注以山學法衣遊出人間真道垂成於此為一國王家齋遂為此法衣犯戒敗真道後作五藏真人今故在世間天地小劫數盡此真人得一登劫仍從此真秘戒敗天地九過度運小運訖十其運欲周真人方且遊行靈嶽未得上登十絕從此法衣不按儀科所為也學士慎哉天運小度若訖十者此真人還得為十方數中真人隱也經言又有一法師修學洞玄齋法故未絕跡在世供養靈經治戒修道業已積時矣誤著世間法衣入山遂不得道也其時復有三玉

女衣九繖繡帔紫絲為帶頭作三環角結上著蘭生繡巾足著交龍九文之履手把運度靈幡燒丹合九色和香遊戲笑言天運欲盡誰解之哉於此有一上古仙人見此玉女知非常人因頓首作禮玉女初不看視謂言君是上古賢君何忽禮乎玉女因起彷徨不安又有二玉女復來手各持一卷妙經言曰紫微夫人使我持此八條出自天中不與世人相接經文秘不出於此景光真人論數天地大小劫畢恐其後無復種民因造作小劫運度謂契已可過為真者修學秘之八節日投玉簡用也

景光真人造種民起劫頌
旋行過已周 禮涉無為空 上至靈雲宿
下入淵微宮 宅園方平上 思惟寶室鄉
度數不乃多 天運素言遠 時茂元成宮
八極常往反 三者同一契 禮化來何晚
六合來往至 世祚長高大 金馬光精威
其言將運泰 誰跡智慧塗 念思元中外
網紀一時盡 百六數交會 周流三素見

天帝之所尊 過去不成種 天地運將翻
何緣得過之 仰念靈寶言 感應可度災
握節詠玉篇

景光真人時在運度之際告此頌已方召風伯諸天小天天真來會運期數盡更造立諸小天真入今分形作十大大天尊遊觀五濁靈寶十極真人今正教化經法得真者當作此十方真人其文今雖未得白日飛騰見法後轉輪往作小天真人也

元始天尊言小劫者真人三圓竟天天數交地地數善會名為小劫運度者也其時諸天日月星宿皆自滅絕諸地梁網無有根宗爾時三景真君化度衆小聖未得真者特恐今運周也言昔往有玄度一人本從九潛空微中生自然而化光澤類如少童持八部太上元洞清靜靈寶二素真經八部下登告五嶽鎮往災生禍至安定災煙乾坤演坐八卦建錄授與太極真人者也開三賢遊戲觀者運度所以過爾一玉女持一卷鎮災泣川小劫玉字言授晨卿天人夏禹者也可是衆天教

大災之時以往過也上古仙人今作太極主得仙者記名跡也

經言真人從無堯之前受重羅天王女鎖矣注煙小劫妙經於今淪散度身之法其經也流周迴 網紀滅 山海藏 威神至

去復來 日月食 魁魁化 今已至

元始天尊言太玄有六戊遠清蕩作應輪轉無極教觀虛遐登高上峻嶒無崖十絕無立浩浩空達冥劫移度五星不備宿倒置翻運周數終日月無光陽澤不和時應失氣乾坤漏泄五嶽淪沒福地汎岡得過陰涼江合為叢者也三界飛行其時人民都悉無餘諸天大真於此鍊過骨合道者記名黃素如是度數盡空洞洞合為空而立大卿嚮於十絕無崖也北極過去未來大數并於大數入於微空數空造虛其號難窮
大羅真人言道可言道非可常論記言為名亦可非名可謂隱乎處下三者歸於虛大者入遠豁細者達無幽潛行空鄉內煒燁洞宮裏四瀆為洞門裏宅是鍊仙之大卿也

元始太極真人玄度真人於小劫洞門演出運盡之道以記洞之卿山山有洞天洞有四門是大洞門也至此門學自得過也

太上大道君曰元始天尊言大小劫運盡期度將至道君故自言生名異流種類相乘高者居其上下者還其底大者反歸止一元爲其圓小者定入於細元在內中分形而生或處高下或入大小中生或根立而生或胎姪懷而生或朔復而生或變化自然而生或在虛無無氣而生初不見形影淪幽而生諸如此類各有福應並從變化皆隨本由其數盡未若有福應多者其度不絕隨類始生若五根生者益其光好與樹七寶之錄生在靈寶國七寶林中衆仙大聖時往觀照大小劫盡周而更化得爲人道中修學文旨自見衆真靈寶光耀普懸十人若是胎化者前生福重得生胎中有形有體魂魄結神自然上皇之辭元始天尊高上老君於玄都上卿玉京少室演出太上洞玄靈寶三十六部妙寶上經其時高上老君以有元虛之算壽無極之數

未至上皇世運輪轉祚祿欲交鬱儀代謝結璘旋行高昇劫仞星辰分破列宿更始五嶽變化易更方鎮四瀆蕩除海成山嶽水成巨石煊飛蠢動一切衆生咸而倏忽度如三十二萬種民元始老君演出五千文道德上下中經三洞真文衆要妙經教化後學其辭曰白石公空姓也於人鳥山奉受學法四十萬言因停此山建齋立直萊素中餐悔念罪福開度一切求脫厄世得見太平朝禮諸天拜謁十方仰謝玄真羅梵衆天八種音聲燒香然燈誦詠旋禮十極念法思惟次遣浮邪論講至妙積學六百歲還玄都武人山北室中復學二百年太歲甲午五月二十四日靈寶應見忽有七寶飛天人十二人乘飛雲之輿從九玄臺下即號位迎太虛元君白石空洞真人飄然飛登上造九霞教化衆仙學真仙之術法至太皇元年九月十日有龜山王夫人來受八生元錄上經八卷赤松子其年十月五日受大洞寶章三十六部妙經三洞真科道德要戒於玄都寶域山中破金投魚蛟

龍結鈎登壇盡一寶信爲質用飛雲錦百尺玉札二枚金龍二口魚一雙劍二十四具白素四十尺五方明鏡以度其文時羅梵衆天八種音聲作三契頌受學遂得真仙之道說領劫仞玄洞官名曰空洞元一君太光君老君太一君所居鄉邑於無崖無淵細微象監魔羅於大千三洞本有太素真科靈寶寶科至妙也一曰空洞真術大洞齋法素靈讚經爲頌作羅天玄音洞齋法玉京山經步虛頌梵天音洞神齋法八素陰陽經中夏音大洞齋法絕跡崖隱遠遯世人長齋服食咽元充氣不參世間非其服食長齋流延不同爲講十方上聖天尊觀人善惡名曰高上至真玄妙齋法建齋獨立之道太虛元君於人鳥山奉受太上洞玄梵天威儀羅天大戒悔謝億曾祖考七世父母生死罪福輪轉胎化之厄願得長居無爲燒香燃燈日中一食晝夜六時悔謝前後以來玄祖父母咸得上登天堂化生十方與玄都同行誦詠三洞真文富爾之時靈寶真人雲光降十極飛天人神男

玉女各十許人羅梵衆音七寶光耀煥爛玉京之中誦三契羅天頌十極真人各頌一契梵天頌飛天人神男玉女共贈詩一篇太虛元君即下座禮拜天尊因奉受詩云章靈妙高真元君以爲勝太虛元君於玄中答詩一篇竟奄然不見衆真所向白石公學得真也

高上真人羅天頌三契

六度生梵跡 至真出虛玄 空洞嚮靈霄 仰秀十極質 形受奇妙相 遼遼造登賢 執節侍營枝 被褐靈寶晨 解散飛雲結 耀光照羅天 通身黃金體 頸有七寶圓 足躡蓮華行 旋遊十極間 玄都邑玉京 自然赤字文 玉訣非常音 法輪是真言 妙哉高上教 道建五千文 衆經歸首目 豁落洞玄真 德合超然去 塵俗緬飄因

右一

鬱鬱空洞鄉 岩岩天寶臺 濛濛衆真降 萬劫爲一期 子抱玉真經 吟詠過三災 五苦一時送 七祖化無爲 上造紫微宮

元錄方寶持 太虛非爲遠 合鍊吐邪疑 軀精濁損次 朝禮高上師

右二

玄洞空中去 虛虛豁無嚮 羅天生洞宅 十聖俱齋景 五嶽得安鎮 四瀆慧受象 重飛吾衛無 蠢動無算等 九真還丹錄 飛行造玉京 萬劫終忽間 億載在須頃 超度衆根難 流霞登濛隴

右三

道非道非常道名非名非常名空非空非常空玄非玄非常玄故知道玄虛空名自妙也。彌綸至濯遼豁無窮上包大羅於無崖下入無淵於細微亦象監魔羅於大千魔羅難察大羅寶真言高上演教衆真勸化天靈寶玄經至妙之必文度智三十二萬種民三一蕩除百官開度演出真文以化下愚承奉禁忌自蒙度脫苟無其質亦免地獄之災道有五

道之跡學士熟看五千文洞玄真文大洞三十九章此經從元始以來祕之金闕至于上元經道欲行掃除清濁戒人罪福通悟流俗至道不速安在太空大洞三十九章本三十九言高上老君演作三十九篇以授素黃太虛元君空洞真文積學一千六百二十四日衆仙歸仰真道遂成空洞真人瞻觀六度復演出大劫一卷教化衆仙至經高妙莫歸於本太真真科高上科法太素真科太虛元君空洞真秘靈寶玉字洞玄真文初生三十九章玉字所演三十六部妙經經文淵微出自道言諸天真人宗奉赤書觀於梵跡所以真人曰學大乘之業禮拜玉字洞玄真文位證高真上名梵錄十極真仙展轉超證本爲空洞真人亦爲十方真人佐理十天梵天名十極真人至真羅天音是名爲道東方無極世界虛中之虛妙相真人寶光世界開度虛中一切頌一契高嶽絕幽嶺 中道有妙言 羅天空洞章 飛造登九玄 足躡雲綱行 俯眄上皇真

奉戒昇虛無 吟詠靈寶篇

南方無極世界空中之空無上真人靈光世
界開度空中一切頌一契

虛真是玄真 至道無為尊 元氣訖虛寂
龍倒朱鳳翻 惟採秀瓊芝 奉戒入雲門

飛羅戲龍虎 願結前世緣

十三 訖書九

西方無極世界玄中之玄太浩真人素光世
界開度玄中一切頌一契

紫微玄中玄 獨立體自然 瑞相七十二
頭光五色圓 煥爛照十方 飛雲散香煙

叉手向梵天 得見無極篇

北方無極世界無中之無玄錄真人玄光世
界開度無中一切頌一契

靈耀空中鸞 高妙何為遠 玉晨非質器
災害以旋反 金門五苦經 胎錄永以斷

流珠向上宮 億劫豈云晚

東北方無極世界玄州上卿真人開度玄州
上卿無極一切頌一契

謁謁洞林蕭 芬然昇太霞 鳴玉服天蔭
雲氣鬱嵯峨 赤界衆道眉 長生爲辟邪

奉嘯黃庭錄 得道還度家

東南方無極世界彌劫真人淨羅天中開度
世界一切頌一契

仰觀劫仞卿 玉京玄中虛 巍峨赤松子
上造如太霞 遊沈過衆生 太一乘雲與

少樂高尚法 七祖生天居

西南方無極世界無量真人鬱羅世界開度
無量一切頌一契

耀光出大洞 真神何徘徊 左顧龍銜轡
右眄虎吐威 朱鳳交觀集 騰蛇登大魁

九宮生八卦 十極遊太微

西北方無極世界化生真人波羅光世界開
度波羅一切頌一契

飛步躡上宮 七元長生道 願樂一世人
騰身避苦惱 削除百曾罪 徊轉造五老

定名玉札篇 咸念長自保

上方無極世界億億之劫上皇真人九光靈
寶世界開度元中一切頌一契

太霞觀曾微 絕嶽幽中嶺 巖巖交洞卿
玄州衆仙并 遊行三周過 更錄易光象

還期十極真 雲行登玉京

下方無極世界算數養生真人太一金光世
界開度算數一切頌一契

歸道妙中真 梵天有靈篇 虛無演玉宇
用以教後賢 真人不見形 和光氣洞塵

玉札奉上皇 願以賜要文

十篇十方真人造齋用燒香謝文步虛詠明
燈祝燈祝願別出衆經

太虛元君於是虛皇五年七月七日下午遊戲
衆天者觀善惡見羣精魔鬼交逸天下橫害

良民強絕人命太上高遠三清廣大千妖萬
邪假作正真風雨水旱不應節卦元君出現

於人鳥山演出洞玄真文玉訣妙經分作三
十六卷威儀法式安鎮五嶽以察天靈今作

十表卦人鳥山浩洞太卿玄洞室中玄尊至

寶中教有仙骨之類當見其文隱學思惟奉

行其科世間供養別法世經所紀三十六部
妙經白石崆峒真人受三十六萬言本有三

十六卷號曰三十六部尊經有三十六卷言
字無定經卷首目出大洞大小劫本業妙經

其中字天音百神內名是也今出學法所修
太虛元君演出中品妙經太虛元君曰經道
欲見學者精情感至十位真人使飛天自授
篇目日更新妙勤修得真道
飛天人神男玉女頌曰

浩浩清霄藻 渺渺玄元阿 沈紀放自然
妙度九天羅 絕跡空氣靈 千劫不為多
精光普朗瑩 洞徹照一軀 玉皇高尊降
解脫百曾憂

高上弟子太虛空洞真人頌曰

煥爛無崖跡 曠豁虛寂鄉 俯眄紫微臺
因緣俗形象 于持洞章文 相與戲玉景
天尊飛登真 釋散脫世網

真人曰道有太上清淨元洞真文玉字妙經
太上清淨元洞玉訣羅梵衆音妙經清淨飛
行九元洞妙經清淨飛行七生化度元洞妙
經清淨元洞靈章上經清淨元洞輪轉五道
真上經清淨元洞玄輪上經清淨元洞三十
六聖衆音真經清淨元洞鳳止妙紀洞真道
跡妙經清淨丹水飛術胡語妙經玉文威儀

秘經

大度真人無極丈人於劫初卿日演出丹水
飛訣法授與紫微王夫人夫人作禮奉受十
方真人於此同被極空洞大靈章天道真文
三十六部妙經梵音目錄竟真人等信受奉
行

丹水飛法用藥十二種

絳陵珠子口訣是丹砂白馬玄通口訣是石
鍾乳玄微通身口訣是白石英紫度炎光口
訣是紫石英黃承微身口訣是硫黃玄命益
箒口訣是太一禹餘糧英月精口訣是雲母
粉青戊還精口訣是白朮却毒溫身口訣是
細辛枯道冬華口訣是茯苓丹侍臉口訣是
巨勝延年度命口訣是黃精已上各二十四
種

右藥十二種各各自治持藥必使精好者
去人間長齋一百二十四日銅曰持之草
藥各五萬杵石藥各十萬杵治都成并合
以銅曰白蜜先和持十二萬杵藥半成以
來水銀十二石著銅釜中銅蓋蓋之白石

英調作泥泥竈竈作兩口屋覆勿使俗人
鳥雀雞犬見之新用栢葉為火復水銀消
盡藥成陰曝百日開之出著金銀玉器中
服之齋可服十二丸如巨勝大即飄然飛
登萬階十方真人衆天真人服丹水飛術
所得真也

太上老君養生觀化十方觀急戒頑出妙
文授教衆天大度真人羅天法師玄極太
真以文法表顯諸天十方靈空真人以嘉
平二十三年九月九日遊劫初玄都登觀

玉景人鳥奉謁太極朝禮太度真人竟謂
問求法下愚纏綿邪濁未敢上陳枯骨舍
元之始輪轉胎化誤生人道腐臭骨肉比
蒙靈澤玄降啓拔有心靈專高妙養育群
生普度一切此參真妙法飛靈動成脫三
惡道靈尊未賜枯骨真文願見其旨因起
作禮經步七天許時大度真人湛然不應
忽有龜山王夫人從紫霞宮來從玉女十
許人至劫初夫人笑曰有何請求真人難
之道有玄真上讚丹水飛術妙經八條玄

錄要文正通畢矣夫人因塗炭叩頭苦請
王女共爾須臾之間真人出文見授此十
方真人亦於此得文修學今得十方靈寶
真人也

洞玄靈寶丹水飛術運度小劫妙經

洞玄靈寶諸天世界造化經

人五


天尊說經開叙品第一

太上天尊居靈鳥山中與諸天人說十二部
經於是乃分四十萬品弟子書之故曰妙道
爾時天尊化為居士而智慧無窮而告衆曰
我學道以來九十一劫斷求念空故得無想
定通衆聖中王以洞達之照得見天地敗而
更成衆生死而復生無有窮已如日月圍繞
崑崙之山旋照四方天下周而復始無止息
時有四千崑崙四千日月四千天下有大海
水四千大龍王宮四千大金翅鳥王宮四千
大惡道高數萬里大神山高數千里大神樹
萬種種大地獄合爾所名為小劫世界數是
小劫世界千名為中劫世界數是中劫世界
千名為三界大劫世界從彼始成至後七日
並出悉燒敗之一切蕩盡後復更成一如往
法無休止時自然如是無神爲也亦如衆生
死而復生但其壽長遠人不知之又衆生死
時形滅而神移皆緣其生時所作罪福至彼
五道之處何謂五道一者天道二者人道三

者地獄之道四者餓鬼之道五者畜生蟲獸
之道若其人生世積德深厚得上福則生
天道長壽好形安樂無極還知宿命因緣之
事若其生世得在中福則生人道得其富貴
之門無所不足若其人生世福微罪多得在
下福則生貧賤之門凡事下惡所向無可或
得盲聾瘡癰六疾醜惡奴婢臭處臊穢之身
是上二道雖有優劣猶勝是下三塗有生之
苦若其人生世慳貪悋惜不施飢渴不濟窮
急即生餓鬼之道當受鬼形腹如懸鼓喉中
容縷縱見美饌不能得食長受飢餓形色醜
惡兼有長年思滅不得若其人生世奉親無
孝九族無仁惡及百姓羣衆所忌者則生地
獄之道受其罪鬼之形常被考毒不可勝說
若其人生世好殺害衆生射獵爲事屠割爲
業不知修福但行惡事即生畜生之道爲彼
羊牛猪鵝鷄鴨受其屠割秤賣之報如先身
所爲誰能見是唯得道者知之謂汝未信故
說偈頌

天地諒改換 何等能常存 出生必入死

神隨五道緣 敢或有欺誑 地獄相拘連
但當修善業 悔過滅罪根



太上耀靈之符行之無怠超凌三界得離五
苦轉輪不滅位為真人


崑崙山王四天下品第二

道言我在玄化之前故有太上號見彼崑崙
山王以金銀琉璃水精作之上高三百三十
六萬里下有大海圍之深亦三百三十六萬
里廣亦三百三十六萬里地深二十億萬里
次下有地亦深二十億萬里次下有果金二
十億萬里次下有剛鐵二十億萬里次下有
水深八十億萬里次下有大風深厚五百二
十億萬里以是大風持地使有墮落地浮水
上水浮風上其下大空異天地也崑崙山北
以金光照之其天下名鬱單越地方四十萬

里人壽千歲其髮紺色男女長短同等無有
高下民悉好善不復相教作惡者也凡四天
下是天下最勝三天下也又崑崙山西以水
精照之其天下名大唐界其地如半月之形
廣長三十二萬里人壽二百歲其人長短皆
有人間之事壽夭之年又崑崙山東天下以
銀光照之名碧落界地方四十六萬里地正
圓人壽三百歲或長或短皆有人間之事壽
夭之年又此崑崙山南以琉璃光照之地方
二十八萬里其地名棄賢界其人或長或短
於人間最苦不如彼三天下人也年壽無定
猶有一事勝三天下及上諸天人者其人勇
猛求道易也若能修福從我道者逕上生天
堂或出三界得無上道如其積罪者死入地
獄俄頃之間無有定品又崑崙之山在黃曾
天下太微帝君或居中央有四天王各鎮四
邊各掌一方天下常以月一日八日遣使者
下案行天下伺察帝王臣民龍鬼蜃飛蛟行
蠕動之類心念口言身行善惡十四日遣真
人下十五日十八日仙王下二十三日二十

四日使者復下二十八日二十九日仙王下
三十日諸天王下四下者日月五星二十八
宿其中諸天森然俱下伺察衆惡罪犯之者
汝曹當以是日改心易行持齋悔過誦經持
戒唯行善事能如是者天官愛護司命益算
盡其本壽不遭枉橫至其壽盡上生天堂衣
食自然安樂無窮是言至實而汝未信故說
偈頌

爾觀四天下 矜是無祕言 受生若電過
那不修福田 冥冥地獄中 萬萬億劫年
天律無原赦 為欲訴何尊




天律乘真正魔邪神符騰福至與道昇遐玄
都司契紀法不赦急急如律令

日月旋照四天下及天上品第三
道言崑崙山上方三十六萬里其中神聖居

之各有方位又有日月天子光明具足普照
天下唯月城之中有五風轉行月中有四宮
五夫人有竊樹上高四千里所以影見月中
善人見之其樹有實不可稱說又有七仙精
舍及七寶之山七寶之樹此等仙人常修我
道終無橫夭損壽也汝曹若欲生是長壽天
中者當修是下五事一者慈心不殺愛存物
命二者賢良不盜濟救窮急三者用心貞潔
不犯外色四者奉齋護戒精進無倦五者誠
信不欺滅酒慎過行是五事必得生天謂汝
不信故說偈頌

時行巨能制 哀哉生世促 如何萌罪辜
天官所糾錄 一往無拯拔 沈魂淪地獄
速願生天好 三塗不可觸




太上尊靈經之符濟有羣生開悟盲冥雜妙

華香修心恭敬得金光之身無量壽命急急
如律令

諸天世界大洞品第四

道言三界之人凡有三生一者花生二者化
生三者胎生花生者積福深厚於蓮花中生
為彼天人化生者福有神力於變化中生唯
有胎生福德微淺最為下劣託神肉形年壽
短促不如天人天人雖樂猶在三界之內至
其壽盡還生下土無由得道真人無死能有
能無金剛不能為固石壁不能為障雷霆不
能為駛水火不能為患諸天不能為隔智慧
不能為長鬼神無不降伏有生無不宗仰是
為無上三界之人得道者與虛空合體無盡
者也其化生者先有善功應化故也欲希昇
度喻如脫身救獸忘死求道當行萬善斷棄
俗緣隱居山林奉禮羣聖日夜齋直沐浴潔
清洗滌口齒不食臭惡令精神附著不害羣
生唯道是從誓願不絕得道飛仙如是之教
語諸仙官道士有法服之身非是帝王臣民
所能行之但能遵行十善修奉五戒不染十

惡必生上天八劫之壽有兼聖則得生道非
誑汝也




諸天齊功隨願即報紀德仙都及諸羣魔鬼
神有來聽者增官益族早得天道為金光真
人不輕慢玄都律吏明如律令

小劫大劫天地敗成品第五

道言地有三災一者火災二者水災三者風
災先為小劫後為大劫小劫至時陰陽氣變
水旱不調五穀匱乏一切木石草棘及衆生
指爪盡成刀劍互相殺伐人民死盡兼人命
短淺忽自誑惑七日之內相殺都盡是洪水
滔溢洗滌天地山川改換土地平坦甘露降
臻真人下生身有明光名曰崐崙爾時洪水
美好味甘除患一種七獲如有便利不淨地
即裂之受已還合人壽八萬歲女年五百歲

方乃行嫁天下快樂同彼上天其後真人過去後生之徒漸漸積罪經是數千萬年地獄滿溢大劫欲至帝王臣民父子上下相殘民無忠孝君無慈仁劫盜橫起逆暴相仍為惡之苦劇於大劫之前及四天之下人情盡惡無有往日淳風之俗於是大劫始至大災先起二日並出乃至三日四日五日六日七日一時俱為是數萬億年河海乾涸衆生死盡天尊觀地上其中男女散戲地味之草顏色變惡失其光明其身即重不能飛去常居下苦於是天尊愍此衆苦今日月還生星宿復度風雨順時天降甘露地出醴泉人無疾病華色赫奕其壽六萬食自然之米衣自然之服後世人性行轉薄罪根萌生年壽漸短自然衣食忽自珍滅乃食鳥獸之肉衣其皮羽更相殘害罪負日積陰陽不調雨旱不節冬則穴處夏則巢居以避時害未有衣食禮義之節死入地獄不得生天如是萬億年方生聖智感降教化伏牛乘馬造大田蠶衣食君人之事以相維制有高下貴賤之差能行

至善行合道教則得生天如其不然悉入地獄冥冥萬劫無有出期以是之故今說偈頌地獄徒罪苦 永劫無出期 蒙毒由身植信哉莫爾咄 形滅反泉壤 神魄隨功基天地猶一忽 汝無疾風時



下敷元生和神之度翼是靈經天人慶慕扶福三界除汝罪故敢能毀墮獄律無怨急急如律令

九幽地獄品第六

道言其黃曾天下凡有九州皆以小海環之流通崦嵫大海我今教化之處名曰赤縣小洲中為九州法彼大洲者也是小九州之人聰明巧偽少有真實希得生天多入九幽地獄縱橫數十萬里其中冥冥盡是罪人或洋銅灌口或鑊湯煮之或猛火燒之或鐵叉刺

之或鐵鉗鉗之或火杖拷之或屠解其形懸其頭首或擔砂負石填河塞海大神結政徒罪無赦或為一劫二劫三劫四劫乃至百劫是劫有大深坑方四十里告令罪人作役百年投一芥子至是坑平滿名為一劫又有大石方四十里告令罪人徒作百年以天衣一拂須是大石消盡名為一劫爾時罪人哭泣相向相謂曰芥子至小是坑深廣何當平滿是石堅勁天衣輕眇百年一拂何當消盡而獄吏聞之怒而告曰如是之劫其數二十未名半小劫也罪人聞之氣思哀咽死而復生將知入是科罪無復出期方恨先身不孝惡逆為賊殺生誹謗經道奪人之命負人之財姦巧盜取不奉神道致有是報者也我見如是念汝士女不可為罪故說偈頌

坑石不為名 二十非大劫 悠悠徒罪中神魄不為滅 須臾起身形 變爾復屠裂鑊湯為蒸羹 刀風為俎切 懸哉下天人何不建福業 生天必可果 況復神仙法

告衆聖品第七

太上天尊說是經已爾時衆聖諸君丈人九老仙都君九炁丈人等悉皆在座咸曰善哉上白天尊如是悟道無不宗仰請問彼諸天世界復有至化不天尊告曰自我學道九十一劫因學教化六十二億塵沙世界或分神散體同其生死或化作金剛瑠璃之光或爲帝王聖智長老童子或爲神瑞仁獸師子白鹿麒麟鳳凰種種方便無所不通但天下衆生罪業深重緣期未至不能受化終歸地獄其中受化之者悉得至道不生三界汝曹既觀道場唯當闡揚道教濟度羣生爲發大願普令國主帝王總及諸天地法界一切臣民下至蚰蛄蠕動蚊行之類皆使開悟不入三塗十苦八難死得無極之樂生得法身無量之壽七寶宮殿無物不足汝能如是濟度則爲天人之師可不勉也天尊告曰是經出世未可隱藏同契相授景福由昌謬傳流俗獲罪招殃於是衆聖稽首悉皆稱善信受奉行洞玄靈寶諸天世界造化經

太上靈寶天地運度自然妙經

人六

道言太上靈寶先天地而生然後有天地數起於一立於三成於五盛於七極於九故天去地九萬里積陽氣道陰形列布崐崙爲地柱氣上通崐崙者地之中地崐崙直東一億萬六千五百里崐崙直西一億萬六千五百里崐崙直南一億萬六千五百里崐崙直北一億萬六千七百五十里地周遊四匝四億二萬六千二百五十里焉道言夫日月徑上千里周三十里運行八十一域更迭朦朧暝北斗九星二星陰不見相去九萬里以沈潤八十一州八百一十域北斗當崐崙上抱崐崙氣運注天下春夏爲零露秋冬爲霜雪人與天地同也天地八方之外萬物受性皆懷憂苦常傷人民含血蠕動不得自在與天地爭命皆當歸死骸骨消入於地精神飛翔輾轉五道爲善上天爲惡入淵凡人生時所爲善惡精神魂魄隨其罪福唯學道求生達運度極致可以長存復陽九之運

道言人生涉胞胎當經十月日死如大風卒起無期死至無時當與心爭爲善勿疑故以經道勸勵學士目所不見耳所不聞瑤琦珍物亦何益於身諸爲道者當信經誠守善以死不犯惡而生道不可失德不可違違道失德如兒生無母如魚脫淵若志學輪轉死生如蠶在繭中混沌沌故一旦變形易數道成於微長齋誦經爲德之根自然玄解運度足于神方之外得禮太上玉京之尊乃作頌曰

我唯年衰時 百病皆當經 水消而火起 災衝解其形 百骸生分離 大劫要當傾 吾故畏是痛 求道願長生 去此塵中累 會彼至寂貞 高行期大乘 自然學道成 輪轉無上德 忘我故不名 靜惠度八難 道遣竟何營

人六

道言夫生惟人爲貴既有其生宜獎而成之而貪財恡惜不肯施散奉事師寶以求昇度執自思惟令身非我身所有財寶亦非我有官爵俸祿爲身重累將何益於己身若病死

者皆不能為我却之不能自拔為道厚自文
飾謂生已足譬如陸鳥愛其尾終為射夫之
所得為學者當勤心上契知是皆不隨人魂
神去空為困苦當思拔度之根絕三惡之道
令入三善道一者不老二者不病三者不死
長生度世去厄會遇運得太上之賓乃作頌
曰

自念老病盡 三界之大患 福訖命將終
氣絕入棺槨 冥冥成灰土 魂魄無暫安
吾故畏是故 學道無天殘 攝意存正真
淑心諒可觀 耽成三寶圖 自能伏魔官
故我損身施 志超生死岸 混然既無待
永保億齡歡

道言夫修長生志在昇度求無為之道身超
於塵垢絕跡于羣方者當先知天地運度大
期之數陽九百六之災去厄即安之宜如其
不爾雖自求道終年而希昇騰將復費其功
夫卒為徒勞也今開示爾劫運之期盈縮之
分保躬求生以招長命豈但在一軀而已哉
亦將七祖反胎也仙公曰夫學道精研能明

運度陽九百六之會亦必得度世無危傾也
要在長壽久思遠去人事想累兼忘然後可
期肉飛之舉如其一毫不盡不可謂求太
極真人誦法言十首

赤書土出治 金玉復為夫 青龍甲申會

奄至誰能知 雖著天文文 寶候王子期

辰中色當變 先時觀胡兒 崐元最其充

積石次不治 蕭蕭上學士 後天奉天時

福非一朝遇 七葉積善基 太平契孟津

樂哉何照怡

玄運金馬末 古月侵神州 陸上既無子

兄弟亦迭遊 河洛子空盡 燕趙成洪流

荆陽柳其次 已刻中嶽符 芒子盡十載

東海桑中遊 宜先入福地 八石以鍊軀

柳城即生地 伏龍不為悠 玉筍近世間

桐栢甚易求

丁亥不云遠 八公同會俱 玄生浮紫雲

誨以九靈子 令未負災充 雷電不可止

出在申酉歲 彌漫留十紀 至于水龍時

仙君乃方起 弓口十八子 高吟相管理

百官森列序 穆穆皆首士 勤心慕松喬

劫盡已度已 平日解帶遊 寸毫寫衿裏

方平記太鳥 當來東南翔 下愚不見事

賢者披神方 郊境沒夏首 太白失度常

雲霧皆變化 魚鱉遊汪洋 一時淪東海

無復起子商 壬午之南嶽 即陰以為陽

揚州可度世 時誦生神章

張氏著鵠鳴 識緯金馬末 反白相中傷

妻衿不解帶 官兵悉竄走 賊疆日凶大

九重雖衣裳 官場時了壞 荆棘當庭生

王侯沒虜賊 妻婦亡異域 使役無時泰

街賣諒可哀 千載豈復會 末若早學道

宅志霄霧際

修學諸祭酒 治法當今勤 不謹百八十

至時如火煎 近在金氏世 念此當可言

兵力四衝至 一日不可延 然後洪災會

浩哉與天連 行尸無所觀 聖人知信然

先學悟玄京 方寸會名山 歛衽之勝地

至道固靈祖 平都述翰墨 福地諒可往

庚辰菟胡動 壬午有奇賞 先當之福鄉

高詠以自養	萬里望無烟	壬辰未消殃
既平仙君治	八方息羅網	如吾玉斧惠
永謝塵中壤	華祿豈足貪	於茲絕冥想
孔生遺明藏	木封若有因	甌山可遊處
九夷拂輕塵	陋廬守空寂	玄默湛冥緣
泉涌不繼本	卯金無傷人	刀曲不覺痛
今世傷爾身		
太和山可詣	鴈門其明真	鹿堂信可貴
和民至壬辰	十八既出治	子來合明真
吳地偏多仙	荆湘最困貧	
柳谷安可親	三倍放勳世	爾乃知苦辛
聖帝既出治	期在壬辰始	明星煥水母
申後留十紀	大島東南聚	生血城門裏
羣鼠緣高木	衆多不可止	女子入官府
雲龍無比擬	愚者謂不然	賢者自方峙

道言靈寶自然運度有大陽九六百六小陽九小百六三千三百年為小陽九小百六九千九百年為大陽九六百六天厄謂之陽九地虧謂之百六至金氏之後甲申之歲是天地運度否泰所經陽九將會至時道德方明

凶醜頓除聖君受任於壬辰之年也此太極真人法言十篇神趣妙暢微旨朗空期運之數去就之要可謂詳矣可謂盡矣

道言若能常誦誦真韻則得度洪災於陽九受位任於丁亥約當先長齋靜詠默絕羈累然後求釋解之微旨發清音於脣吻則七祖反胎已身長存經運周而無害受仙而登焉妙哉微矣非言所宣子若遇之則得上遊王京為聖帝牧民理治

道言傳受之科如吾稱舊典清齋二十四日別齋上金五兩丹地錦百尺以為盟誓受者奉而行之若不依科而妄傳則風刀考罰矣受者辛勤詳慎之哉

太上靈寶天地運度自然妙經

太上洞玄靈寶三元無量壽經 全

爾時

太上道君於三元宮中大會說法眾內有一真人名曰儀可則智力無畏從座而起雅步前跪諮論請談不審一切諸法從何而生既得生已云何觀行而得成道作是語已儼然而立

太上道君撫几微笑曰夫三界諸法皆從道生若欲求道當修觀慧觀慧增益漸至常道常道無邊行亦非一子欲知之當一心聽有數十事不可稱量何謂為數十事一者智慧速身行法不可稱量二者慈悲速身行法不可稱量三者含忍速身行法不可稱量四者行功速身行法不可稱量五者修心速身行法不可稱量六者善業速身行法不可稱量七者精進速身行法不可稱量八者飾身速身行法不可稱量九者遣情速身行法不可稱量十者普心速身行法不可稱量是為十種速身行法

太上曰復有十種難口過法不可稱量何等

爲十種離口過法一者智慧離口過法不可
稱量二者慈悲離口過法不可稱量三者舍
忍離口過法不可稱量四者行功離口過法
不可稱量五者修心離口過法不可稱量六
者善業離口過法不可稱量七者精進離口
過法不可稱量八者飾身離口過法不可稱
量九者遣情離口過法不可稱量十者普心
離口過法不可稱量是爲十種離口過法
太上曰復有十種除惡想法不可稱量何等
爲十種除惡想法一者智慧除惡想法不可
稱量二者慈悲除惡想法不可稱量三者舍
忍除惡想法不可稱量四者行功除惡想法
不可稱量五者修心除惡想法不可稱量六
者善業除惡想法不可稱量七者精進除惡
想法不可稱量八者飾身除惡想法不可稱
量九者遣情除惡想法不可稱量十者普心
除惡想法不可稱量是爲十種除惡想法
太上曰復有十種拔逮根法不可稱量何等
爲十種拔逮根法一者智慧拔逮根法不可
稱量二者慈悲拔逮根法不可稱量三者舍

量九者遣情洗垢穢法不可稱量十者普心洗垢穢法不可稱量是謂十種洗垢穢法
太上曰復有十種無昏惑法不可稱量何等
爲十種無昏惑法一者智慧無昏惑法不可
稱量二者慈悲無昏惑法不可稱量三者舍
忍無昏惑法不可稱量四者行功無昏惑法
不可稱量五者修心無昏惑法不可稱量六
者善業無昏惑法不可稱量七者精進無昏
惑法不可稱量八者飾身無昏惑法不可稱
量九者遣情無昏惑法不可稱量十者普心
無昏惑法不可稱量是謂十種無昏惑法
太上曰復有十種不淫想法不可稱量何等
爲十種不淫想法一者智慧不淫想法不可
稱量二者慈悲不淫想法不可稱量三者舍
忍不淫想法不可稱量四者行功不淫想法
不可稱量五者修心不淫想法不可稱量六
者善業不淫想法不可稱量七者精進不淫
想法不可稱量八者飾身不淫想法不可稱
量九者遣情不淫想法不可稱量十者普心
不淫想法不可稱量是謂十種不淫想法

太上曰復有十種不疑空法不可稱量何等
爲十種不疑空法一者智慧不疑空法不可
稱量二者慈悲不疑空法不可稱量三者舍
忍不疑空法不可稱量四者行功不疑空法
不可稱量五者修心不疑空法不可稱量六
者善業不疑空法不可稱量七者精進不疑
空法不可稱量八者飾身不疑空法不可稱
量九者遣情不疑空法不可稱量十者普心
不疑空法不可稱量是謂十種不疑空法
太上曰復有十種平好醜法不可稱量何等
爲十種平好醜法一者智慧平好醜法不可
稱量二者慈悲平好醜法不可稱量三者舍
忍平好醜法不可稱量四者行功平好醜法
不可稱量五者修心平好醜法不可稱量六
者善業平好醜法不可稱量七者精進平好
醜法不可稱量八者飾身平好醜法不可稱
量九者遣情平好醜法不可稱量十者普心
平好醜法不可稱量是謂十種平好醜法
太上曰復有十種不邪還法不可稱量何等
爲十種不邪還法一者智慧不邪還法不可

稱量二者慈悲不邪還法不可稱量三者舍
忍不邪還法不可稱量四者行功不邪還法
不可稱量五者修心不邪還法不可稱量六
者善業不邪還法不可稱量七者精進不邪
還法不可稱量八者飾身不邪還法不可稱
量九者遣情不邪還法不可稱量十者普心
不邪還法不可稱量是謂十種不邪還法
太上曰復有十種常住無法不可稱量何等
爲十種常住無法一者智慧常住無法不可
稱量二者慈悲常住無法不可稱量三者舍
忍常住無法不可稱量四者行功常住無法
不可稱量五者修心常住無法不可稱量六
者善業常住無法不可稱量七者精進常住
無法不可稱量八者飾身常住無法不可稱
量九者遣情常住無法不可稱量十者普心
常住無法不可稱量是謂十種常住無法
太上曰復有十種絕心想法不可稱量何等
爲十種絕心想法一者智慧絕心想法不可
稱量二者慈悲絕心想法不可稱量三者舍
忍絕心想法不可稱量四者行功絕心想法

不可稱量五者修心絕心想法不可稱量六者善業絕心想法不可稱量七者精進絕心想法不可稱量八者飾身絕心想法不可稱量九者遣情絕心想法不可稱量十者普心絕心想法不可稱量是謂十種絕心想法

太上曰復有十種習悉意法不可稱量何等為十種習悉意法一者智慧習悉意法不可稱量二者慈悲習悉意法不可稱量三者含忍習悉意法不可稱量四者行功習悉意法不可稱量五者修心習悉意法不可稱量六者善業習悉意法不可稱量七者精進習悉意法不可稱量八者飾身習悉意法不可稱量九者遣情習悉意法不可稱量十者普心習悉意法不可稱量是謂十種習悉意法太上曰復有十種善防言法不可稱量何等為十種善防言法一者智慧善防言法不可稱量二者慈悲善防言法不可稱量三者含忍善防言法不可稱量四者行功善防言法不可稱量五者修心善防言法不可稱量六者善業善防言法不可稱量七者精進善防

言法不可稱量八者飾身善防言法不可稱量九者遣情善防言法不可稱量十者普心善防言法不可稱量是謂十種善防言法太上曰復有十種不亂轉法不可稱量何等為十種不亂轉法一者智慧不亂轉法不可

稱量二者慈悲不亂轉法不可稱量三者含忍不亂轉法不可稱量四者行功不亂轉法不可稱量五者修心不亂轉法不可稱量六者善業不亂轉法不可稱量七者精進不亂轉法不可稱量八者飾身不亂轉法不可稱量九者遣情不亂轉法不可稱量十者普心不亂轉法不可稱量是謂十種不亂轉法太上曰復有十種不悟念法不可稱量何等為十種不悟念法一者智慧不悟念法不可稱量二者慈悲不悟念法不可稱量三者含忍不悟念法不可稱量四者行功不悟念法不可稱量五者修心不悟念法不可稱量六者善業不悟念法不可稱量七者精進不悟念法不可稱量八者飾身不悟念法不可稱量九者遣情不悟念法不可稱量十者普心

不悟念法不可稱量是謂十種不悟念法太上曰復有十種不彼念法不可稱量何等為十種不彼念法一者智慧不彼念法不可稱量二者慈悲不彼念法不可稱量三者含忍不彼念法不可稱量四者行功不彼念法

不可稱量五者修心不彼念法不可稱量六者善業不彼念法不可稱量七者精進不彼念法不可稱量八者飾身不彼念法不可稱量九者遣情不彼念法不可稱量十者普心不彼念法不可稱量是謂十種不彼念法太上曰復有十種不悠想法不可稱量何等為十種不悠想法一者智慧不悠想法不可稱量二者慈悲不悠想法不可稱量三者含忍不悠想法不可稱量四者行功不悠想法不可稱量五者修心不悠想法不可稱量六者善業不悠想法不可稱量七者精進不悠想法不可稱量八者飾身不悠想法不可稱量九者遣情不悠想法不可稱量十者普心不悠想法不可稱量是謂十種不悠想法太上曰復有十種無常定法不可稱量何等

為十種無常定法一者智慧無常定法不可稱量二者慈悲無常定法不可稱量三者舍忍無常定法不可稱量四者行功無常定法不可稱量五者修心無常定法不可稱量六者善業無常定法不可稱量七者精進無常定法不可稱量八者飾身無常定法不可稱量九者遣情無常定法不可稱量十者普心無常定法不可稱量是謂十種無常定法
太上曰復有十種無常的法不可稱量何等為十種無常的法一者智慧無常的法不可稱量二者慈悲無常的法不可稱量三者普心無常的法不可稱量四者行功無常的法不可稱量五者修心無常的法不可稱量六者善業無常的法不可稱量七者精進無常的法不可稱量八者飾身無常的法不可稱量九者遣情無常的法不可稱量十者普心無常的法不可稱量是謂十種無常的法
太上曰復有十種無常顧法不可稱量何等為十種無常顧法一者智慧無常顧法不可稱量二者慈悲無常顧法不可稱量三者舍忍無常顧法不可稱量四者行功無常顧法不可稱量五者修心無常顧法不可稱量六者善業無常顧法不可稱量七者精進無常顧法不可稱量八者飾身無常顧法不可稱量九者遣情無常顧法不可稱量十者普心無常顧法不可稱量是謂十種無常顧法

忍無常顧法不可稱量四者行功無常顧法不可稱量五者修心無常顧法不可稱量六者善業無常顧法不可稱量七者精進無常顧法不可稱量八者飾身無常顧法不可稱量九者遣情無常顧法不可稱量十者普心無常顧法不可稱量是謂十種無常顧法
太上曰復有十種不追懷法不可稱量何等為十種不追懷法一者智慧不追懷法不可稱量二者慈悲不追懷法不可稱量三者舍忍不追懷法不可稱量四者行功不追懷法不可稱量五者修心不追懷法不可稱量六者善業不追懷法不可稱量七者精進不追懷法不可稱量八者飾身不追懷法不可稱量九者遣情不追懷法不可稱量十者普心不追懷法不可稱量是謂十種不追懷法
太上曰復有十種無猶豫法不可稱量何等為十種無猶豫法一者智慧無猶豫法不可稱量二者慈悲無猶豫法不可稱量三者舍忍無猶豫法不可稱量四者行功無猶豫法不可稱量五者修心無猶豫法不可稱量六者善業無猶豫法不可稱量七者精進無猶豫法不可稱量八者飾身無猶豫法不可稱量九者遣情無猶豫法不可稱量十者普心無猶豫法不可稱量是謂十種無猶豫法

者善業無猶豫法不可稱量七者精進無猶豫法不可稱量八者飾身無猶豫法不可稱量九者遣情無猶豫法不可稱量十者普心無猶豫法不可稱量是謂十種無猶豫法
太上曰復有十種忍不可忍法不可稱量何等為十種忍不可忍法一者智慧忍不可忍法不可稱量二者慈悲忍不可忍法不可稱量三者舍忍不可忍法不可稱量四者行功忍不可忍法不可稱量五者修心忍不可忍法不可稱量六者善業忍不可忍法不可稱量七者精進忍不可忍法不可稱量八者飾身忍不可忍法不可稱量九者遣情忍不可忍法不可稱量十者普心忍不可忍法不可稱量是謂十種忍不可忍法
道言夫洞玄經者蓋天地之源道德之宗上聖所尊貴鬼神所畏伏其高則出九天之上其深則通九地之下千變萬化道盡於此若復有人能於此經受持讀誦心無懈怠即得生無量智慧增無量善因滅無量業障消無量煩惱延無量壽算長無量福田世世歡榮

生生快樂恒須恭敬抄寫流傳利益衆生是
爲無量真人聞說信受奉行

太上洞玄靈寶三元無量壽經

上清五帝變通萬化靈寶經

八

太上大道君曰空常者天地之魂魄陰陽之
威明空者九天之魂精常者九地之魂靈其
二炁則結成帝尊之大神以威輔弼之煥明
空常則以輔弼爲瞻視役運天光察觀萬方
總錄天宿迴化五常召運攝會促機轉輪天
休地泰則空常隱藏天否地激則空常煥明
吉凶報應立告不祥變化萬氣改易陰陽四
時代謝莫不由焉故二星尊貴隱伏華晨皆
空常之妙趣難可屢瞻也得見二星延壽無
窮存修其道飛昇華堂上真秘言此之謂也
上相青童君敢請問空常之道靈寶妙書豈
可聞乎太上大道君曰空常者天地之至名
而謂之無名混而爲一是爲有名但九天祕
其靈寶不行於經文既運輔弼爲視聽倚光
景以通真帝尊稟之以致治學者御之以致
仙使有心者求之於無測因復名之爲有名
有名而不傳於蒼莽之徒莫能測焉好尚者
而不獲其真也如此豈復爲勸學之宗者哉
然九天有命唯宿有玄圖玉字方諸刻簡來

生合真之人得參隱名君當總掌羣方試校
萬仙理定幽微拯救兆民不得冒禁相告子
當祕焉於是君便登雲景之上丹靈朱房清
齋三月裂帛告靈金羊銀鴈禮天受真道君
告曰九天有禁依格萬劫一傳令運度交周
氣反上清道應行於今一依玄科七百年中
有其人聽三傳自無其挺封還九天或付名
山九洞之室輕泄漏慢責及七祖捷汲溟波
以灌四瀆擔肩諸山以填河海此禍福報應
無一差失也子明審此言慎而行焉

凡欲步空常飛綱以逃形變景飛行玉清當
以一月七過行之八節六丁日亦行其道至
其日入室燒香左右敷置圖席南向叩齒二
十四通閉目思五星煥明五方良久來下入
己身五藏之中金星入肺宮土星入脾宮火
星入心宮木星入肝宮水星入腎宮五星光
明洞照五藏覺體熏熱便思五星皇夫人及
二十五點空常晨君姓諱衣服各在其方都
畢而微祝曰
金木水火土總統四元玄精流映光照五門

中有五皇夫人靈君二十五點空常天尊變
化形影千合萬分降入五藏結成玉仙鍊我
七魄育我三魂舉形上昇飛入斗門遊戲上
都五星齊羣今日玄慶請如所陳^平

引星光炁二十五咽止便起登綱也并足

上太白星上閉氣七息向西而微祝曰

西方七門 白氣飛光 上有皓帝 少陰明皇

諱金上精 衣服羽裳 艷精流映 煥明金宮

號曰五點 空常之宗 帶符建節 召陰攝陽

變化水火 七十四方 使我飛步 隱景入空

駕乘白輿 遊翔雲房 天地長年 永享無窮

畢仰咽七氣止次行十二步并足上鎮星

上閉氣十二息向西南仰天而微祝曰

中皇四氣 總監八靈 玉臺紫房 神點化生

內有元皇 五帝隱名 號曰步常 安鎮黃庭

衣帶飛雲 首建華精 執籍持符 煥落火鈴

使我飛步 告我神名 下降脾府 鎮神安精

上天入雲 藏影逃形 變化萬物 遊遊玉清

得與皇君 俱保太明^平

引星光炁十二咽止次行三步并足上癸

感星之上閉氣三息南向而微祝曰

三門洞曜 丹光流精 玄氣鬱勃 煥照南冥

上有赤皇 五帝明靈 諱遊光曜 衣錦文精

首建寶冠 腰佩玉鈴 出入朱宮 紫房絳城

保錄我命 南宮記生 使我飛步 變氣藏形

日吉行道 普天肅清 心神結真 五魂洞明

齊光三氣 合景火星^平

引星光炁三咽止次行九步并足上歲星

上閉氣九息東向而微祝曰

東方九氣 青天王門 中有青晨 玄上之君

流青鬱勃 是為天魂 諱太明煥 天地高尊

身衣鳳衣 斑文虎裙 化生五點 變景九端

頭建青精 橫天玉冠 金符羽節 流鈴紛紛

手執隱書 飛行羽文 總我命錄 保我肝門

外映內曜 肝府結仙 迎我高登 上朝帝晨

引星光炁九咽止次行五步并足上辰星上

閉氣五息北向而微祝曰

五氣北玄 玄門洞靈 北晨流映 魁上玉清

中有太皇 五帝尊名 諱陰元然 衣服玄清

首建玉冠 腰帶流鈴 金章玉節 翠珮煥明

徘徊華晨 傍觀八冥 迴津下降 入我腎庭

保錄五神 藏府鮮榮 內外充溢 變景化形

骨飛肉昇 上造玉清^平

仰引星光炁五咽止步五星畢從水星下從金

星上七步又登空常紀也第一并足上第一九

常上祝曰^平

地九常君 變景幽冥 為我隱步 以逃我形

次上第二育常上祝曰

育常靈君 形無常服 為我變化 身為草木

次上第三卯常上祝曰

卯常尊神 能沈能昇 為我化景 變成丘陵

次上第四流常上祝曰

流常皇君 形無恒身 為我吐喻 與氣起煙

次上第五行常上祝曰

行常大君 威伏萬鬼 變化我形 起煙成大

步五常畢還金星上閉氣五息而祝曰

飛空太幽 化景五常 北入五氣 南創三陽

金符命靈 太帝扶將 六戊逃已 保度洞鄉

太白護肺 金鎖胃腸 內充外溢 形魂俱翔

千變萬化 適意所迎 得與玉皇 同遊上京

飛常入空 上下百韻 化形六畜 使人不見
次上六常上祝曰

六常綱紐 制鬼御神 迴轉天地 當之教人
步五常畢還水星上閉氣五息叩齒五通
祝曰

北玄五氣 五門開張 中星黑皇 號曰五常
變化幽冥 出陰入陽 召命三晨 制御土宮
使我飛步 逃景太空 在所適向 分形百方
上造鈞陳 昇身玉京 體生奇毛 腎府納芳
今日行道 神仙之宗 得天上願 享祚無窮

早引氣五咽止如此步二十五點常都竟
便下從門叩齒三十六通向綱而歌三洞
飛步章九步登陽明星也併足上陽明星
上東向祝曰

太上宮中 變隱遁元 內妃大神 太一上尊
總領命籍 為我致言 藏形逃已 上昇帝軒

次上陰精星上東北向祝曰
中元宮中 保胎化形 內嬪太真 高上玄靈
新胞解結 鍊胎固精 變化萬方 使我長生
次上弼星上向真人星祝曰

真元宮中 六通七隱 上元玄母 育我胎產
通化金室 變成蒼輦 使我飛空 長年無限

次上玄冥星上向北祝曰
紐幽宮中 匿景藏光 中元內妃 神仙大宗
度我六戊 出我八方 逃跡飛步 上超帝房

次上丹元星上西向祝曰
網神宮中 變體易景 斗中大女 玄化無像
度我元斗 書名帝榜 飛空榮虛 騰身浮影

次上北極星上東北向祝曰
紀明宮中 隱跡散衆 斗中中女 靈化上宮
落我玄籍 度名諸方 分身成千 反容嬰童

次上天關星上向西北祝曰
關會宮中 分景萬形 斗中少女 玄上大靈
隨斗運機 總輪萬生 使我飛空 變化太冥

次上輔星上向天門叩齒九通祝曰
帝席上宮 右皇夫人 上對帝君 齊景合真
號曰妙常 變化九天 運導日月 聚氣成烟

迴轉水火 萬機潛身 是時元吉 玄慶敷陳
使我飛步 乘常入真 九晨流落 享福萬千
形齊天光 德同三便畢

仰咽氣二十四過止次上弼星上向地戶叩齒
九通祝曰

上尊上宮 夫人右皇 帝尊同符 合靈華房
天魂地魄 號曰上空 變化九氣 萬真祖宗
迴金轉石 與天齊功 化消山河 呼雲召龍
萬姓立滅 分景億通 飛步躡虛 流煥四衝
藏身冠席 覆衣天光 長靈天地 享慶洋洋
請如所願 受福永終畢

仰咽三十六過止如此皆一過行之不往反也
空常之道畢於此矣

太上步空常之道每至其日清齋燒香別
室獨處不交人事密而行之安心定意存
想神真星點羅列並使歷然徐而步綱五
年之中帝尊皇妃無不下降元皇五星無
不垂映洞明形內變化萬神也行之七年
分形萬景隱迹九空十四年飛行太虛上
昇斗晨若羈逼世務運會得經未獲修步
但每至其日燒香執經北向朝星存念神
真乞可神仙如此便獲萬災辟却凶患神
朗體清還年反顏如此十四年延壽七百

年穢慢漏泄殃滅一門罰及七祖罪福懃對其効甚明

從此八七步登金星上一祝


從金星十二步登土星上又一祝

從土星三步登火星上又一祝

從火星九步登木星上又一祝

從木星五步登水星上又一祝

如此五星畢通一祝又從金星起如初往反十五過但步不祝其道畢



步五星畢又從外八七步登地戶九常以次行五常畢

還金星上一祝十二步登上常以次行五常畢

還土星上一祝三步登空常以次行五常畢

還火星上一祝九步登九常以次行五常畢

還木星上一祝五步登陰常以次行五常畢還水星上一祝

天樞星元斗宮中魁精玄上眞皇夫人姓明

通諱覽育眞名^天頭作飛雲華積之髻

衣紫黃青三色之帔

天璇星玄魁宮中靈精上玄皇夫人姓玄鏡

諱鬱勃光眞名^天頭作飛雲華積之髻

衣飛錦羅裙鳳文錦帔

天璣星上精宮中靈妃元皇夫人姓常明諱

化雲眞名^天頭建晨嬰寶冠衣飛雲明

光錦襪

天權星網極宮中上靈神妃華皇夫人姓開

生諱運明眞名^天頭建七稱玉冠衣緋

羅鳳文之襪

玉衡星靈開宮中北上金蓋中皇夫人姓元

方諱神武眞名^天頭建紫晨飛華之冠

衣九色之襪

閭陽星北極宮中安上晨華元皇夫人姓玉

元諱根華眞名^天頭建玉晨進賢冠衣

飛青羽襪

瑤光星運天宮中玉華靈皇夫人姓慶元諱

終會眞名^天頭建飛華額雲之髻衣七

色夜光雲錦之裙九色錦帔

洞明星空眞宮中帝大明常皇夫人姓幽昇

諱元韻眞名^天頭作飛雲華額之髻衣

飛羅之襪

隱元星常寶宮中空玄變靈上皇夫人姓冥

通諱萬光眞名^天頭建飛天七稱玉冠

衣青文錦襪

右九星之魂精皇夫人之至名變化之威

神知者不死修之飛仙也記而勉之

輔星帝席宮紫氣玉樓帝尊九晨君姓精常

諱無羸字玄解子眞名^天頭建飛精玉

冠衣九色鳳衣

弼星上尊宮玉樓紫館帝尊元晨君姓幽空

諱空無先字隱元覺眞名^天頭建飛天

玉冠衣天龍衣

此二星則天地魂魄之威神輔星曰常主

天弼星曰空主地皆迴天宿轉五嶽變化

億萬知者延年無極修之立致藏隱二十五

點常則以此二神之支輔靈專之八號也

陽明星太上宮青城玉樓九晨君姓上雲諱

法覺容字董洞陽真名天_{頭建九晨玉}

冠衣青飛裳

陰精星中元宮五色玉樓北上晨君姓育覽

諱玄上寔字昌陽文真名天_{頭建玄精}

玉冠衣玄羽飛裳

真人星真元宮黃臺玉樓主仙華晨君姓歸

珙諱妙音光字通度元真名天_{頭建飛}

晨寶冠衣青羽飛裳

玄冥星紐幽宮朱臺玉樓玄飛蓋晨君姓冥

樞諱定宣覺字法開度真名天_{頭建二}

晨寶冠衣丹錦飛裳

丹元星網神宮素臺玉樓金剛冠七晨君姓

上開諱寔通光字朱煥元真名天_{頭建}

七寶飛天冠衣白錦飛裳

北極星紀明宮玄臺玉樓北晨飛華君姓明

靈諱長明化字淵洞源真名天_{頭建飛}

精華冠衣紫錦飛裳

天關星關會宮九層玉樓總靈九元北蓋晨

君姓玄樞諱轉天光字會天終真名天_{頭建九元寶冠衣九色錦裳}

右七星皆九精帝晨九天之威神治七星

之宮館迴轉天光召促劫運變化萬物混

合天地知其內名延壽七千年修行十四

年白日登晨也

太上宮中帝君變隱遁元內妃姓延明諱太

一法坦字幸正扶真名天_{衣黃錦帷丹}

青飛裙類雲髻

中元宮中帝君保胎化形肉嬪姓開闢諱太

一三寔字羅朱嬰真名天_{衣青錦帷綠}

羽飛裙類雲髻

真元宮中帝君六道七隱上元母姓溟濛諱

太一靈夷字冲雙兆真名天_{衣青錦帷}

繡羽華裙類雲髻

紐幽宮中帝君隱景藏光中元內妃姓開耀

諱太一七烈字橫單磐真名天_{衣紫錦}

帷黃華羽裙類雲髻

網神宮中帝君變體易景斗中大女姓玄路

諱太一鬱書字晴立蘭真名天_{衣朱錦}

帷紫青飛裙類雲髻

紀明宮中帝君隱跡散衆斗中中女姓蜚廉

諱太一氣精字抱定陵真名天_{衣朱錦}

帷青繡飛裙類雲髻

關會宮中帝君分景萬形斗中少女姓翁重

諱太一郁墨字天凡淑真名天_{衣丹錦}

帷青華羽裙類雲髻

帝席宮中帝君化日月水火斗中高皇左夫

人姓常明諱太一石啓珠字落茂華真名

天_{衣紫錦帷繡羽丹裙類雲髻}

上尊宮中帝君化金石山河斗中高皇右夫

人姓空黃諱太一愛條字育玄真名天_{衣綠錦帷翠羽華裙類雲髻}

右帝君九晨斗宮中隱妃九陰之大神知

之者則九妃下降攝兆上昇斗宮之中位

爲玉清真人七年能分景散形變化萬物

混合幽冥飛行太虛上昇玉清

東方歲星陽元宮中真皇帝君姓碧空諱澄

瀾字清凝真名天_{頭建青精玉冠衣青}

羽飛衣

南方熒惑星洞陽宮中真皇君姓煥空諱華
瓶字玄羅真名天_頭建朱精玉冠衣絳
羽飛衣

西方太白星素明宮中真皇君姓浩空諱寧
凌字振尋真名天_頭建金精玉冠衣白

羽飛衣

北方辰星玄斗宮中真皇君姓陰空諱玄華
字龍娥真名天_頭建玄精玉冠衣玄羽

飛衣

中央鎮星上樞宮中真皇君姓常空諱玄瑤

字飛賢真名天_頭建黃精玉冠衣黃羽

飛衣

右五星宮中五真皇君隱名太上藏之紫

房九靈上宮不授始學之人得者皆宿有

玄圖刻簡來生九萬劫之前已逆注真名

應得其文也尅為後聖之臣玉清真人也

東方陽元宮中有真皇帝君皇夫人姓開常

諱寶容字飛雲真名天_頭建永青錦帔綠羽

飛裙積雲髻

南方洞陽宮中有真皇帝君皇夫人姓陽常

諱維停字散融真名天_頭建永丹錦帔丹羽

飛裙積雲髻

西方素明宮中有真皇帝君皇夫人姓明常

諱瓊英字靈恩真名天_頭建永素錦帔紫羽

飛裙積雲髻

北方玄斗宮中有真皇帝君皇夫人姓淵常

諱肇咄字精原真名天_頭建永玄錦帔翠羽

飛裙積雲髻

中央上樞宮中有真皇帝君皇夫人姓康常

諱藏暝字耽延真名天_頭建永黃錦帔黃華

飛裙積雲髻

右五星夫人內陰隱名太上藏之玄斗紫

蓋宮中此五夫人皆迴天轉地盈縮三光

變化山河改易五行移動萬物隱藏幽冥

有知其道皆不復經履地戶魂過太山也

尅為玉清之真依科萬劫一出

修九晨五星之道當以八節及本命之日夜

半入室北向叩齒九通閉眼思九星光明煥

照北方又存五星洞明五方垂光洞映已身

覺身在赤光之內內外冥然良久又思九星

五星帝君及皇君夫人九星內妃姓諱字衣

服各在其星宮並使分明須臾衆神欽然合

變為一小兒如始生之狀名曰無常童子字

曰變化神王手執九星五星纓絡一身帶日

銜月童子以日月星光以映薰兆身身在赤

光之內表裏洞徹則為混合萬變之道仍仰

咽氣九過而祝曰

周天大神 號曰帝皇 迴轉九道 精煥八方

洞天流曜 發芒散光 陰陽絕冥 迴合紫房

改化萬形 結成靈童 流降內外 玉真四衛

左命大鈴 右激電光 雲霧奮動 華文憲揚

太一神化 錦帔華雲 銜日戴月 身佩天章

飛迴五晨 促轉斗綱 適心縱已 在意所通

上天入冥 變化百方 保養我身 天地齊功

身生羽服 飛昇帝宮畢

仰咽氣九過止

洞思九真五晨之道隱淪八冥事極於此矣

金星五點第一點姓地常諱覺育字通動真

名地九元

第二點姓育常諱煥通字幽元真名入五道

第三點姓卯常諱金上字浩淳真名代六形

第四點姓流常諱谷清字述真名韓三關

第五點姓行常諱浩逃字去斗真名服真精

右西方太白星之五常並建素梁寶冠衣

素錦飛衣手執金符玉節主七門變化

土星第一點姓上常諱黃光字元胤真名逃

皇元

第二點姓天常諱家雷字卓度真名入木精

第三點姓名常諱空肫字霞玄真名變水火

第四點姓三常諱滕是字靈變真名金上生

第五點姓辰常諱內溢字益微真名黑木谷

右中央鎮星五常之隱名並建黃梁寶冠

衣黃錦飛衣手執黃麾命魔之章主十二

門變化

火星第一點姓空常諱常陽字元無真名黃

通實

第二點姓阿常諱流精字七轉真名七神會

第三點姓元常諱南皓字精極真名入流光

第四點姓古常諱洞主字微生真名變三神

第五點姓已常諱季行字後化真名逃形連

右南方熒惑星五常並建朱梁寶冠衣朱

錦飛衣手執赤神召靈之章主三門變化

木星第一點姓九常諱青芒字上陽真名隱

真身

第二點姓世常諱蒼元字長命真名通九道

第三點姓明常諱碧淵字洞生真名化青光

第四點姓五常諱歸青字玉陽真名流雲街

第五點姓法常諱綠臺字明曉真名萬真會

右東方歲星五常並建青梁寶冠衣青錦

飛衣手執青帝制魔之章主九門變化

水星第一點姓陰常諱玄通字子元真名北

上元

第二點姓黃常諱曰空字冬冥真名動天飛

第三點姓定常諱隱陽字勃光真名輪大劫

第四點姓飛常諱上元字藏光真名定萬神

第五點姓六常諱終變字分圖真名入黑關

右北方辰星五常並建玄梁寶冠衣玄錦

飛衣手執北宮攝殺之麾主五門變化

修行空常變化之道常以八節及本命之日

正中入室南向叩齒十二通閉目思空常二

神及二十五點常之隱名衣服各在其方分

明羅列在星宮之中光明流煥玄映兆身良

久忽化為鳳凰玄龜二獸從天中來下鳳凰

乘赤氣之光下兆頭上玄龜乘白氣之光下

兆兩脚下鳳凰從兆泥丸中入玄龜從兆命

門下入赤白二氣交絡兆一身覺已形化成

鳳凰立玄龜之上在赤白二氣之中便叩齒

二十五通咽氣二十五過而仰祝曰

天精地靈 號曰空常 北入五氣 南制三陽

水生流火 七氣折傷 水灌九震 中元不行

土王養金 木氣伏藏 金符命靈 太帝扶迎

六戊逃已 隱影冥卿 太一護肺 金鎮腎勝

上元輔心 鍊仙肝官 內鮮外榮 玉真四充

變化萬景 混合二光 靈鳳玄龜 神獸來迎

洞虛入微 形魂同翔 千變萬化 適意所行

東西南北 莫不扶將 長保天地 享福無央

得與明皇 同遊上京

引氣二咽止

此空常隱淪之道玄微理妙事極於此所謂
變化萬方身生水火迴合天地適意所求者

矣子得之者位加仙公北辰書名南宮記籍
五星下降萬神侍衛福德自然無求傍力修
之九年立致飛行上步天宮遊宴玉清學無
此法便絕望於遐思無損神於寢夕矣上天
禁書輕泄漏慢罪及九祖父母已身卒亡長
閉鬼官

龍飛九道尺素隱訣

太上大道君以上皇元年二月一日甲子於
無量天告盟傳度飛行羽經空常變化隱文
以付北極真公時九天上帝高仙大聖並臨
盟場五帝東帝萬靈侍軒日月吐暉衆星列
精七元開闢黃道不行天地停機三界肅清
絳霞隨騰紫雲四審時和日慶八景敷陳道
君裂帛華晨之下授訣金口之中發言九天
遙唱命諱上帝稱欣天真稽首魔王束形保
舉玄虛位登玉清命五老監試四司輔真左
右侍仙分盟告靈依俯仰之格北向祝曰
寒非登場上命九靈運度推移日月不停
是時告晨赤心解形銜刀南宮嚙丹寒庭
金華銀鴈禮獻上清裂素分經告盟于天

請如四極萬劫一傳有泄我言禍罰七玄
有愆我盟考減爾形生死謝責長閉幽冥
畢於是裂素度經口授秘言

天眞下降五帝衛靈九晨給以金晨玉童九
百人九皇給以玉華玉女七百人五皇又給
五帝玉女各五百人五老命駕四司仗幡紫
雲飛軒十二瓊輪前導鳳歌後從天鈞六師
啓路九龍翼轅以迎於真公上登玉清北辰
上宮邀宴七元迴旋五宿歷步天關位登總
仙治於北極廣靈之官至開皇上年以文付
東華青童大君依格萬劫一傳龍飛尺素之
道出於九天上帝以載天地九晨五星空常
之名高上寶秘靈音故爲盟文自非前生九
萬劫逆注玄簡錄字上清應爲真人者不得
聘其篇目參其隱音也得見此文生死成仙
能修其道則神光流映帝皇下降七年隱論
變化百方出入幽冥浮景九空十四年白日
登晨飛昇玉清有宗大經但朝禮神真則致
長生延壽無窮千禍不干萬凶不當兵災殄
息觸向皆成出入則致九皇垂應項映圓光

五帝營衛所向司迎尅得奉侍聖君於上清
宮此道與元始俱生九元虛皇以傳太上大
道君大道君以傳後聖金闕帝君及太帝君
太微天帝君北極真公使付東華青童大君
依格萬劫一傳於後學得道之人傳度之法
受者依科齋信絳紋繒九十尺五色紋繒各
五十尺詣有經之師對齋百日或七十日或
七日於玄嶽立壇高寂之地書文北向分盟
度訣以金華五兩告五星銀鴈九兩告九晨
二物禮天受經奉師効心子時露於壇場之
上以絳紋之中威羊著東白紋之中威鴈著
西告誓九天分盟各半口度秘名臨度之時
亦依上祝之法可謂寶道貴真誓不泄漏之
盟若無盟輕傳師及弟子同考減身七祖充
責萬劫不原上天之禁宜各審詳登盟之時
弟子執羊鴈北向九拜次五方各一拜西起
竟南還西伏東向置羊鴈於師左右師於中
央北向叩齒九通稱某嶽真人某甲敢以
良時上吉三合喜辰謹登皇壇披形赤心清
齋軟丹列盟于天願高上垂映顧盼賤臣北

帝所舉某嶽先生某甲先身垂福慶深來生
輪轉流祚九天不絕宿名玄簡運稟今日得
目披洞章口詠帝一貪羨神仙仰希靈契今
輒於某天之中授度羽章飛空之訣上告萬
帝至極元皇高仙大聖無量道君願垂迴映

曲監盟靈以玉清上宮真仙之氣輔侍某身
上告五帝五嶽萬靈河海大神共監盟文請
如所奏依格以傳









尺素訣左半

當以白素二尺書此文令一半在一尺上兩

太上白羽黑翮靈飛玉符

八二

統日馥散太無華光交換三燭合明凝真上
契咀嚼日根餐玄注虛披朗金章洞嘯九微
靈暢瓊軒妙思感於太寂內念啓於自然以
上皇元年三月三日

元始啓旦忽致玄靈垂駕白鸞之車黑翮之

藹沫太虛館 靈風散奇香 蕭蕭玄景上

玄鳳迅雲翻
白鸞欣躊躇
飛香和芳花


流星耀雲衢 巨虬控長轡 飛仙互相扶
萬真慶嘉吉 欣鳳虛中遊 元始本無跡
玄感自相求 振羽不待駕 飄飄乘烟浮
寶章綜玄綱 五體御靈符 稱慶禮福庭
旋香各三周

誦畢天帝君起立東向又誦曰


素羽斑玄翮 衆浮落運迴 流香溢十天
芳芝鬱太微 靈章啓幽機 羽經朗玄輝
至道本無牘 持真景白飛

於是誦畢太真丈人身建法服冠極天無量
三寶玉冠衣無縫九色飛雲耀光羽章左佩
流鈴右帶七元正南向而伏太微天帝君起
命羽仙侍郎擎執金案承經北向長立以授
於太真衆仙咸稱善太真長立授經面發金
光五體即生自然靈飛玉符登攜衆真共登
白鸞之車駕黑翮之鳳以宴常陽東之豪林
碧水之境扶桑之墟九源之口西遊玄羽素
野之域濛汜之濱南造朱陵極炎之精南夏
之邑北到朔陰洞玄之館寒水之鄉中盤十
絕黃氣陽精太玄玉京金臺玉室丹瓊之宮

遊朗十天八域洞清總領億真無天不係無
幽不關無氣不統無仙不攝普御羣神自天
以下莫不範德於太真仰宗於羽經也於是
帝君各浮玄宮經劫七千傳於太上大道君
焉




上靈飛玉符玄仙羽精自然之章佩之七年
乘空飛行上登七元修羽經飛步之道無此
符則不得乘虛昇玄也受者青錦九十尺盟
天登修之日書左手掌心即能握碧霞而飛
行書青繒九寸佩之左肘六甲十二神靈飛
玉女十二人侍左




下靈飛玉符元始羽精玄玉之章佩之七年

乘空飛行上登五星行飛步昇玄之道無此
符則不得乘空而行也受者素錦六十尺盟
天登修之日書右手掌心則能握素霞而飛
行書白繒九寸佩之右肘六甲十二神靈飛
玉女十二人侍右




左靈飛玉符玄氣始生之精素羽之章佩之
九年乘空飛行上登五星行飛步昇玄之道
無此符則不得躡雲玄昇也受者丹錦八十
尺盟天登修之日書左足蹠心即能躡空飛
行書絳繒九寸佩之左肘六甲十二神靈飛
玉女十二人侍前



右靈飛玉符元氣之精昇玄羽章佩之九年

得乘飛雲行步玉清修飛步之道無此符不得躡於七元而昇虛也受者玄錦五十尺盟天登修之日書右足蹠心即能步玄飛行書皂繒九寸佩之右肘六甲十二神靈飛玉女十二人侍後



太靈飛玉符陽氣黃精飛行羽章佩之九年面生金光坐在立亡飛行太空修飛步之道無此符則不得仰登星魁超昇九玄受者黃錦十二尺盟天登修之日書符於心前即能吐氣成雲乘雲飛行書黃繒九寸佩之左肘六甲十二神靈飛玉女十二人侍身

凡修行存思七星之道入室皆先服五符然後書也書及服符皆東向叩齒十二通仰祝曰

玄虛紫清 飛行羽經 上眺雲宮 下攝千靈 控御六甲 運我身形 飛步天綱 上舉斗精

凝魂固魄 內鎮充盈 出空入玄 與氣常生 畢服符并書五心然後行事如此九年冠得乘空御雲飛行太清左右靈飛玉符出於自然之氣傳授於太真以登空步虛乘魁躡綱經絡七元上昇玉清之道以備飛行羽經得之者神仙佩之者成真人修之者致白鸞之車黑翮之鳳來迎子身上登玉清宮遊宴常陽太上大道君以傳上元太素君太微天帝君施行道成祕於太上靈都之宮依科三千年一傳不得輕泄宣露天真違盟負誓身沒鬼官殃及九祖充閉幽泉

飛行羽經九真昇元上記

太上大道君昔受飛行羽經九真昇元上記寶言紫文綠金之字超虛躡空浮景之道於玉清上宮虛皇高上道君於是太上大道君以其要傳上清玉帝君上清玉帝君以傳上元太素君上元太素君又傳太微天帝君太微天帝君施行真祕以傳晨中黃景君晨中黃景君又以傳皇初紫靈君皇初紫靈君以傳中央黃老君中央黃老君以傳九微太真

玉保王金闕上相大司命高晨師青童大君梵涌使以此文教授當得為真人者也諸有太素絳錄及金闕刻名皆當得見此文自非其人不得與相遇欲出傳之者必須精應感暢乃付之耳軟盟斷金誓以不宣之信矣

有此經者太素三元君遣玉童二十四人玉女二十四人侍經之左右糾刺泄慢之愆衛護有經者身此中真之道也非仙次第之中也蓋中和之中真也配簡三元名刊太素行則紫毛之節駕則八景雲與前導萬靈後從千真九鳳齊鳴天鈞唱弦神龍啓導五帝驂軒飛行太空遊宴丹霄位為上清真人玉卿之師諸有太上飛行羽經昇元九真者聽三千年六傳遇其人一日頓授之若無可授者三千年限盡以朱書素寫六通封之峨嵋山金臺之室過此不復傳出不可授而傳者泄真入之道也受而不承科者毀真人之誓也授者經師受者宗焉違經慢範宣露實文者七祖父母詣玄都受風刀之考身為下鬼積幽夜之河也

欲受飛行散金為盟欲知仙忌文中為質既知羽書天地同符子聞玄文超駕慶雲此之謂也出委羽洞壺刻石銘

太素三元君有言曰仙人始知廢底斗星之道而未知真人藏斗星之法夫九斗者天樞之正蓋玄軸之華實機紐八維總旋九度迴八廢圓方運攝和氣理調陰陽司通無外夫斗星者朗曜為之夜翳璿璣為之動用四象為之流墜玄明煥爛威光赫尉矣

太無帝君有言曰仙人徒知咀嚼陰陽吐納

二氣而不知斗星者是陰陽之根府二象之玄綱也乃苦辛翫其波末而不識管始而甚易廢其枝條而失手根本矣何不藏九斗陶冶至象耶行之十四年太上迎以瓊輪超虛躡空上登上清列為上真反神嬰顏衆神侍軒

青童大君有言曰仙人徒知瓊璣大威煥耀萬辰觀九道之流赫翫圓動以攝神底之以求大度用之以求神仙而猶不識迴九光以內照藏明斗於泥丸於是魂凝魄鍊合德雲

烟解其道上升上清得其道身為上真是以真人抱大象以匿霞包斗精以藏身我先師是故左駕綠雲右轡絳晨身昇太素超虛躡空存斗星紫色其綱赤色覺紫色之氣溫溫暖也存星大小在意行之此青童君口訣

昔栢成子谷希子廣成子青真子合存斗星之氣並與身共入蓮實之中忽見蓮內有千里金池玉山萬頃官臺宇室蓋亦連雲朱木結實紫華生園碧輦玄黃三素八輪奇異之觀不可名字四子遨遊經時旋宴極盼而反當是之時不覺蓮實之中央也所謂以大投小變化無蹤此存星之極感闊狹之標致也乃可臺妙為八極何蓮實之足妙哉

以月一日三日及五日禺中夜半唯一時也入堂正坐北向接手定氣臨目畢乃存北斗九星來下入頭泥丸中以柄杓前指魁偃向上也良久忽見斗魁中有一大神人衣服名字如祝所言極久頭中當小熱溫溫然也此是上元九精真氣來入頭故暖異以告驗報感之休應也方及咽液五十過叩齒九通畢

左手第三指捻兩眉中於是微祝曰

太上紫暉 九道之華 華蓋七絡 迴曜萬晨

動御高靈 靜和景雲 陰陽流灌 一氣中分

遊瀟無外 煥朗東天 令月啓辰 來登泥丸

元精結威 化為大神 名曰奇紐 厥字靈綱

正坐斗中 遊我明堂 鳳羽紫帔 虎錦丹裳

左帶玉佩 右腰金鐺 手把流鈴 頭巾晨光

吐氣溉精 泥丸以康 魂魄凝和 植華柱梁

使我飛仙 超虛躡空 上達上清 策虎命龍

北朝玉帝 瓊琳上官 西謁太素 稽首三元

祝畢又咽液三十過叩齒九通又祝如前畢

起北向再拜西向再拜畢乃不復臨目事訖

諸寢靜之室牀上行之亦可也拜亦不下地

也夫真人作法所貴於安其所安崇妙簡微

不復曲折敗常乖乎寢處也要道不煩迺絕

倫矣

後施三祝之法皆依倭擬象此行也但祝不同及存星有背向之異耳要言在於密房曲

室勿令有見其存思時也所以爾者存思時玉童玉女將在側而監焉不可吊喪臨尸經

穢穢衣被中履一切勿錯越以假借於非類
矣何謂非類耶不同志契者是也非我同好
不與同席而坐非我同盟弗與同器而食道
俗有殊有崇奉六天及事山川魔神者弗居
其室弗饗其饌勿著其衣勿冠其中蓋避其
尸穢之下氣遏其邪風之往來也此所謂真
道之真道矣精妙之精妙也若能為其妙乃
得其真道避其穢乃獲其新若將混沌雜糅
臭香齊器不標其神不整其氣淫真同居貪
廉共位則邪風而不蕩心履塵壤而不思超
邁者以此尋真為無也夜光不生於糞穽下
才不植於標頌此之謂也精感髮髯靈應機
微玉華告驗神光表暉自非爾師勿妄與之
言也
斗中大神者蓋九星之精因感變而忽生矣
是施行時當心存名字至後祝曰止後祝自
後有神又存如初若是泥丸中星神恒存居
其中每事効此為象
存斗星來下令極思不覺忽然已在我形中
也初存或未來時髮髯但極思念之如已在

形中亦足致感也久久自漸入妙

月七日九日十三日禺中時若夜半時入室
正坐接手定氣臨目畢乃存北斗九星來下
入心中以柄杓堅仰向疾魁中向外也良久
忽然見魁中有一大神衣服名字如祝所言
極久當覺心中溫溫暖暖真氣來入也乃咽液
五十過叩齒九通舉右手第二指以捻心於
是乃微呪曰

太上紫真 九氣中靈 包括萬度 瓊璣煥明
飛霞流曜 暉燭玉清 玄蓋衆晨 陰陽判成
四和交降 七緯順生 肇月吉辰 來映心庭
飛光絡景 中元充盈 六府啓關 華液湛平
魂魄制鍊 得真之精 感至觸變 億兆立成
忽見大神 坐安心房 整氣潮津 百節流通
攀斗據魁 眇邈十方 其名瓊度 厥字素康
絳羽華帔 龍帶虎囊 身生寶曜 項負圓光
首巾飛晨 英冠低昂 使我飛仙 超浮太空
上造紫闕 北朝玉皇 役使萬神 衆靈奉迎
心上生華 慶雲永昌 鳳嘯玲瓏 鸞吹鏘鏘
祝畢咽液三十過叩齒九通又祝如前祝畢起

南向再拜事畢乃開目

月十五日十九日二十三日禺中時若夜半
時入室正坐接手定氣臨目畢乃存北斗九
星來下入臍下三寸下元宮中以斗柄杓堅
向心魁中向外極久忽見魁中有一大神衣
服名字如祝所言亦當覺臍中溫溫熱熱真氣
來至也乃咽液六十過叩齒九通舉左手第
三指以捻鼻下人中於是乃微祝曰

太上紫皇 煥朗中樞 九緯炳萬 光秀太霞
萬靈仰鎮 千晨植牙 七度用明 九烟芬葩
制陽表順 執陰以和 真暉啓陣 玄根總羅
肇月惟吉 觀映臍內 紫氣發霄 飛光縱墜
鍊我魂魄 華津榮蔚 忽見大神 上宮靈貴
名曰祝萌 厥字流鬱 正坐臍中 乘斗九氣
吐納靈液 平血理胃 黃鳳羽帔 龍衣虎帶
手啓日根 頭戴綠英 腰生流火 煥電映無
使我飛仙 超虛躡浮 上造玉房 攜帶霄虛
役使萬神 天地同休
祝畢又咽液三十過叩齒九通又祝如前祝
畢起向本命再拜事畢開目行下元之道畢

矣舉手有所撿是臨祝之時耳祝畢接手如初以八節日夜半時入室正坐接手定氣閉目內視乃存一身冉冉起上飛昇北斗魁中良久為之如覺我形已在斗中也極念為之當覺體中熱是真氣合德也又存九精三神

名字服色貌如嬰兒之始生也三神與我對坐也我心拜之焉精想髮鬚遺形眇眇將令恍惚也乃咽津八十過叩齒九通舉左手拊心乃微祝曰

太上丹靈 玄光騰煥 九璋啓璿 暉氣澄散

紫晨幽燭 七曜蔚燦 二景奏明 陰陽以判

四度用昌 靈津迴灌 八節啓氣 上昇九元

據斗攀綱 奉見三神 問我稽留 何不昇仙

我即稽首 畏以帝前 爾乃赫壯 口銜日根

左破六天 右督鄴山 流鈴上煥 萬魔碎分

遂知我魄 強我三魂 藏斗內曜 九精在心

紫霞洞映 飛光萬尋 和魂制魄 六胎調鍊

精感變躍 玉妃忽見 坐當我心 俯視仰盼

其名審華 厥字璿清 吐納二氣 和平百關

身服鍊蛟 鳳光騰耀 腰帶虎錄 龍章玉文

手執月華 頭巾紫冠 騰躍太霄 駕景蓋雲

書名太素 我得飛仙 超浮空洞 乘瓊太元

上造朱房 役使萬神 紀均二度 還反嬰顏

北帝激電 南帝大陣 蒼帝啓燭 赫赫靈震

西流雙杼 鳴音唱鈞 四舉超躍 薦我玉真

遂乘八景 邀宴九烟

祝畢又咽液三十過叩齒九通復祝如前祝畢起向西北再拜畢開目行八節之真畢矣

此道是超空之秘妙九真之奇法三段行真月用九日故謂之九真昇玄文乃太真禁書

內實為真之要訣也若得其人當傳之時受者當清齋百日或三十日或十日任意造其所適也又當先告齋一日以洗素心授者對齋如受者也付與之日皆當先歛血壘壇剪髮立盟為不宣不泄之信誓也後聖以歛血

犯生氣之傷剪髮違膚毀之禮謹以黃金三兩代刺血之信青紋之繒三十二尺當代割髮之約師受誓物不得收為私利藉以濫用皆當施山栖高隱單貧道士若超騰步虛或投之於山室散之於靈巖所以爾者明天信

貴重誓深測道精賤實欲也不奉科約生死七祖父母受玄都風刀之考身為下鬼

傳授年限出授節度如上法當謹按之盟物皆精上也啓心秀整坦誠彈允靡有不盡投者則師宗也受者則資也聞道則仰範標模

求生則存近生地不違所奉闕略違慢者三世祖獲刑於火官身生棄疾軒轅師荆山丈人丈人但解鍊石之道無他妙豈賢於軒轅哉軒轅曾問其鍊石之道故遂師焉荆山丈人是姬幽子也今在委羽山能鍊石成水煎水成玉粉玉為散以石水服之能知其道與

天同存然不能飛行空虛手把晨霞也鍊石雖妙固小術耳

右太上飛行羽經九真昇玄上記其道畢矣其下卷是太上九真中經雖有上下序

然別法異用不相干也中央黃老君分以傳太虛真人與八道秘言相次九真中經在人間施行亦有口訣本文以秘不書今請言

第一真法當以五月五日十五日二十五日

二十七日二十九日一月之中五過行之皆以平旦

第二真法當以八月八日十一日十四日十九日二十三日二十七日一月之中六過行之皆以辰時

第三真法當以六月六日七日十七日十八日二十五日二十六日一月之中六過行之當以巳時

第四真法當以正月二日八日十四日十八日十九日二十八日一月之中六過行之皆以午時

第五真法當以三月三日八日十三日二十日二十六日一月之中五過行之皆以未時

第六真法當以七月七日十一日十四日十八日二十三日二十五日二十八日一月之中七過行之皆以申時

第七真法當以十一月二日六日九日十三日十六日十九日二十三日二十七日一月之中八過行之皆以酉時

第八真法當以二月二日七日九日十五日

十八日十九日二十七日一月之中七過行之皆以戌或亥時

第九真法當以十二月三日九日十七日十九日二十六日二十九日一月之中六過行之皆以子時

右行九真中經口訣畢矣

此月此日皆是合真迴順生氣攝精之時害可以存思易致玄感若高棲絕頂潛操靈巖斷人事於內外割粒食以清腸接手正心念乎含晨皆當日日施行自如本經今之所書蓋人間多事不得日日清關以行之也行之十四年亦足超浮虛無能生死出水入火上登三清五藏生華與天相傾其昇玄羽經上卷也行之三過一月九日蓋亦人間未及大靜之時若長齋久靜抱景獨往仰秀空洞心單事外者皆宜此日行之以次相續一月九行施於人中耳八節思斗中又存思忽見斗中玉妃在我前坐玉妃吐紫烟入我口中良久其衣服如八節所祝此女子是九精之陰靈玉清之上妃也此青童君口訣

上清五常變通萬化鬱冥經

太上洞玄靈寶智慧定志通微經 人九

爾時

靈寶天尊靜處玄都元陽七寶紫微宮恬神玄漠寂然無爲時紫微宮中中外光明映照無量百和寶香不燒自熏香光纏會衝溢虛空飄飄流散注無窮飾光遐鬱霽滌清涼清涼奇雅非可演銘天鈞大樂萬種互作天尊俄然初不顧眴思念萬兆造化之始胎稟是同各因氤氲之氣凝而成神神本澄清湛然無雜既授納有形形深六情六情一漆動之弊穢惑於所見昧於所著世務因緣以次而發招引罪垢歷世彌積輪迴於三界飄浪而忘反流轉於五道長淪而弗悟嬰抱痛毒不能自知馳神惶悸唯罪是履慙之在心良無已矣憶其稟受之始理有可哀即遣侍臣召左玄真人右玄真人須臾二真人立便躬到稽首禮畢依位而坐侍座良久言讌粗悉於是

賢已發大慈大悲亦當同斯趣耶二真人答曰衆兆塗炭常於所邑並各已作委曲教化具說罪福於理造極猶有疆梁愚癡之人永自不信縱有微信當時錄伏不經旬朔已復懈怠蓋亦天尊高鑒所簡當如之何

天尊曰其雖懈怠當時一信福已不輕二賢已植此功宜獎之焉二真曰不審復應何方必令其悟

天尊答曰此輩冥昧示以廣途文多事碎智所不堪智所不堪致生懈怠心今欲旨以簡文要事的以示之當不同也二真於是下座稽首

天尊不審何事簡要可以開悟

天尊曰卿並還坐吾欲以思微定志旨訣告之其要簡易從易得悟不亦快乎二真曰思微定志爲有經耶

天尊曰都無文字二真曰斯徒觸壁無底大癡如無文字何從得悟

天尊答曰即時一切經書本有文字耶今日之言不亦經乎二真曰唯乞願聞輒當書述

天尊曰譬如有人或千或萬欲得珍寶聞海中大有便各各裝治或舫或船千艘百艘泛於大海或千里萬里或近或遠有洲嶼百千島亦無數或在水中其多珍寶乃至無量七寶精光皆衝天色色各異同泛船伴如許多入及風當發無識光者爲爾且發問知何向

天尊又曰此諸船伴可得寶乎二真曰其無導師盡無先知處又不識寶光爲爾周章此行甚難方當處處悉到悉發掘或於水中用力億倍或可果耳

天尊曰學道之人不得思微定志要訣如此諸人不識寶光而欲求寶可懸如何

天尊又曰如此衆中忽有一人善識寶光寶光衝大萬里遙見如看掌中諸人雖多悉不能見善見光者舉帆先去衆船隨之逕至寶所悉皆大得七寶名珍各各滿載還至本處衆伴議曰賴有導師今當報德於是船船獻寶價直億千義以答恩其寧快乎二真曰何利若斯

天尊曰學道之人得此思微定志要訣其正如是識實光人


天尊又曰往古久遠無數劫時天王運盡應更改人天下綬信有得之者便為天子時善相師見一山上有此綬光當是其夜天雨大驟火炬不立光耀晦中而人不見師於東中語村人曰天下天子綬信在此山中村人聞之皆各潛往暗不能得學無思微定志如彼暗行人也時相師聞人看綬不得自往看之往便即得遂登天位人若得此思微定志志意便定求道審諦如彼相師善寶之焉勿得輕洩輕洩之者彼我獲罪罪在難原所以爾者非但輕經乃輕道也受學之人慎之慎之二真聞說欣踊無量中表相應唯無願聞天尊曰故欲相告豈得為隱便曰要訣當知三界之中三世皆空知三世空雖有我身皆應歸空明歸空理便能忘身能忘身者豈復愛身身既不受便能一切都無所愛唯道是愛能愛道者道亦愛之得道愛者始是反真思微定志理盡於斯斯則反乎兩半成一本

之一還歸真道業日昇吾等不亦無復憂勞耶

天尊又曰兩半成一其義有五卿等知乎二真答曰已知不亦於彼清虛之炁因氤氲之交分半下降就此四半合為一耶不亦或此假一而為惡者致招自然之炁淪於三塗乎不亦為善離此四半還登太虛復我清虛之氣反我兩半處於自然乎

天尊曰卿體之矣今便以兩半輪轉圖局相示於空中下左真之前

兩半圖局如左一名思微定志真卷法用金錢二萬四千上金五兩五錢紋中各一段素絲五兩五錢紋各一疋明鏡一面本命紋續歲計餘一金鈕一雙凡如千種授者得信當分明計十二折傳傳不理盡便違科罪增四倍受者法信不充而不意悉早足亦得罪罪與違科傳同寒樓道士不論



上清弟子某甲齋信如法奉受要訣當志心拔還半反上不至枉魂飲丹盡一為信二真曰此實簡要始蒙開明乃有如此之妙旨而早不悟不勝天尊成濟之恩銜荷而已豈是今日卑辭可謝

天尊曰雖得此訣當以十戒為本授兩半訣畢次度十戒度十戒法法師居南弟子向師三禮畢請曰願見成就授以十戒當終身奉行誓敢有違於是長跪心存見十方大聖在於上方乃稽首誦受法師燒香便為說戒

- 一者不殺當念眾生
- 二者不姪犯人婦女
- 三者不盜取非義財
- 四者不欺善惡反論
- 五者不醉常思淨行
- 六者宗親和睦無有非親
- 七者見人善事心助歡喜
- 八者見人有憂助為作福
- 九者彼來加我志在不報
- 十者一切未得道我不有望

是為十戒受者並云弟子某甲受終身奉修又禮師都畢

天尊曰能受是十戒修行如法十方天官無不衛護必致得道子若逼世累不盡心十者九八七六乃至於五擇其能者然五戒之福福亦難稱子其廣勸衆兆垢重聞或不喜猶不一二羅縷委曲開悟如復懈怠日趣長苦由其罪深夫可如何二真曰如有善人志欲勤修斯事幸開復有何事求道益速

天尊曰普教科儀隱在三錄三元品戒三錄乃東經之端已出于世亦當相降也二真曰三錄為是金錄玉錄黃錄耶

天尊曰然然此並為形外之教思微定志之至理務知三元妙覺无二有道有地獄祈請七玄苦兼度未見者當爾之時上方空中有

人誦曰

此法實玄妙 免汝九祖役 是其人不授 令人與道隔 非人而趣授 見世被考責 死墮三塗苦 萬劫悔無益 所以空中作此頌者恐愚人得經便爾賤之

或以借寫或舉本乞人今有心之人施信無所法橋路斷是故爾耳益宜慎之益宜慎之時二真人意中咸云此要訣炳灼聞即玄悟前後冗冗了不開發為是何物於是天尊知二真意報曰二賢卿等知不一切善

惡皆有因緣應從吾受是故爾耳當相為說便可靜聽往昔過去恒沙之數信不可計无極久遠劫時有賢信道民姓樂名淨信居業巨富財不可計甚信道德靜處思惟心與口誓我富如此此皆福來銜荷天地甚宜報恩報恩之心實有冥到然未知何方從外寢處還問其妻具說如此道不須財今當云何妻曰道從心生何處覓道但當營始道士諸所乏无道士得已齋戒興顯道事豈非報道夫得妻言然之為佳心開覺悟時彼山南有一道士長齋居山恒誦經句去淨信家二百餘里淨信久聞此人亦常依依即語妻曰我當往彼問其所乏當隨之供足須令盈餘不使竭少亦當且送薄餉妻曰能爾真是佳理開眼之日猶有所佑如不如此身死神覓求哀

無所津信即開料雜庫出好名香細布白氈吉貝綿絹之類卧具氈帳乃及玩弄服飾之物金銀銅器皆精好者及諸雜藥事事種種捨十丁奴整作十擔詣道士所言語粗悉及所發起今齋薄餉奉上道士并以十奴長給灑掃道士從今以去有所乏須可分遣奴還隨命奉給道民幸甚勿得疑難道士為受淨信別去還家語其妻具說如此妻聞道士已受夫妻歡喜喜不自勝自今以去便以為常如此少時淨信夫妻命曰欲終都有一兒兒名法解時年十七侍父母疾父母臨終語其兒曰我得此豐有資財無量皆從道來誓欲報道罔極之恩道不須財唯當供養道士吾比來入山諸所管為是汝所見今家財產足汝施用汝其勿廢法解銜淚嗚咽煩冤懊惱悲哭喚天一頓一伏氣絕復蘇手抱父母而啼又曰阿爺阿婆發如此之福臨命將終善尚不退天道雖遠豈當不感唯願即昇福堂位至高尊兒後壽終必得相見俱在道位耳於是父母命絕法解長吁氣絕于時久久乃

緣由其父母子合門心行和吉雖以道士為先亦傍教親族鄉里遠近皆蒙惠潤當爾之日是親非親不避遠近皆往奔赴及家僮役亦復甚多見法解與父母長設孝心徹靈誓願如此舉眾無不自相顧視人人流涕不能自止吉人如斯命盡如何法解於後敬向道心亦是天然加奉尊命供養道士拯救貧乏給卹行旅逮及衆生數百倍先外無毫入用度唯廣遂至於貧餉卹道士向欲不連道士轉老他無得處每日燒香憶此主人供養我輩遂至於貧唯願天道領其丹心我今老悴何以報之道士常以月末一日六時行道恒自感憶法解在心是故遣信要呼法解語信曰汝頓首主人剋此月末依常一日六時行道無復所須可來見就共作功德福雖悠悠亦不宜廢法解得信欣喜答曰為法解稽首道士承至日齋輒當奉命信去之後計校家中諸食諸倉諸庫悉皆空罄無可齋持憶父遺教愈增悲感訪貴屋宅屋宅高廣非中士可居唯宜天王天王復自有宮第或又云此

宅勢盡或且云凶了無買者乃欲自賣恐身屬他人永不得復入山見我道士法解夫妻與二男為居大者胤粗年十一小者次胤私名阿奴始涉八歲並姿容端正絕世無倫吐納誦詠聲有玉響行步舉止德味有餘年雖幼稚並加勤修答對遠近禮敬親疎書畫言辭每在人表其娛大富都無男嗣恒樂此兒兄弟大小無在唯願得一能與我者雇錢百萬貧兒佳故不計錢多法解忽悟還問妻曰憶昔曾聞卿姊樂吾一兒今欲爾耶妻未知問意即趣答曰寧當俱死何有以如此之子去眼前理實兒欲以自活復增愁思故是死耳了無此理夫曰我賞兒意不以供口亦不供身妻曰欲以何施夫曰道士在山供養轉關卿昔聞我奉先君遺教為忘之耶妻即拭淚跪而答曰今雖窮弊實亦在心若如是者福德之事盡亦先君遺教安可不爾妻曰法用頗廢便當將兒往報姊也母子臨發兒跪父別因啓父曰便當遠遶膝下眷戀何極願爺行止時過見視天性內發相抱俱哭阿奴

阿爺感徹天地胤祖抱其弟頭號哭良久曰福德之事我亦當不久非言可盡父見其兄弟如此心亦罔已恐其妻悔即語妻曰即今且將往就其姨質十萬錢作月日期冀望宅售必得兒還若至期不贖當長與姨也所以爾者不忍便別以自寬耳於是割情母子即路母至姊所具說質兒意姊得聞之歡喜無量乃與見錢整五十萬遣車三乘載妹及錢送還妹家次胤跪母辭曰父作如此功德後必得道未果之間願婆爺行止時遇見親次胤至欲慰其姨意抑忍不啼及母垂臨上車遠遠在近母子恩情非可割雖不號咷母子及姨三人相與雨淚百行於是次胤跪姨啓曰今為姨兒何異所生但凡人分離猶尚罔罔願姨見恕今欲乞一萬錢以與父別寄婆車去姨愍此小兒情趣乃爾愈加矜敬即又料出見錢十萬曰以此與子意可與者恣意與之次胤跪曰賜錢太多即啓母言以六萬奉阿爺阿婆此是奴心以供養二尊朝夕之資蓋亦微微願以自供必不他用以二萬

奉兄願勤加供養時復見憶餘有二萬寄奉山中道士願我父母兄弟及我阿姨常與福會所以不道共會又及姨福會者心恐觸忤姨意故也母歸至家憶兒兄弟甚相珍重食息嬉戲及其出入未嘗不同得一異味輒相分與終不獨噉一旦分別我今獨反為福故也胤祖在後甚懷憂思聞母大得錢還知弟不歸拭淚掩手跪問母曰婆與奴別奴啼若如母欲割其思欺曰不啼姨常念沙兄弟得之歡喜抱不離膝銀以衆果笑與吾別寄汝錢耳胤祖知其必啼婆誘祖耳其眠好與祖俱今獨在彼恍惚未習亦當思戀阿爺及憶阿祖且新與婆別那得不啼因而歎曰兄弟二人忽爾生離父母為道故道當見念必使彼此各彊健耳言之噓唏淚下覆面併氣嗚咽不能自止法解於是市供齋具并更大餉道士道士驚問那復得此法解不敢上欺具如事答道士不言相與共齋齋竟法解辭退至家忽見諸雜倉庫金庫銀庫寶珠玉庫錢庫絳庫絲綿布庫綾羅錦綺繒絲等庫米倉

鹽食五穀諸倉悉皆盈滿問其妻曰官寄此耶妻曰不也忽見此耳夫妻一怖一喜或恐是夢想或是天卹不自寧安法解復入山中請問道士具白如是道士答曰貧道昨夜下講於卧中得夢見有一人持一真材如意授以與卿卿即受之貧道思惟謂是佳瑞然不敢學恐事未應同齋之人謂我噴噓今果如此此是天卹人豈敢奪且卿敬信彰於玄遠足以招此殆不須疑但用無嫌法解曰猶欲白王令知其可爾乎道士曰善法解白王王即答云卿精進出世天那不感此是天卹人豈敢奪但用勿恐於我無嫌法解還家語其妻兒具說如是王與道士異口同音此真天卹益加篤信遂相承繼福祚永隆無復極已於是天尊問二真曰卿等識此三世人耶二真對曰此事久遠實所不識天尊曰時樂淨信者吾令身是法解者左玄真人是法解妻者右玄真人是卿等頗憶往古鞠育之恩乎致有今日更相關悟亦其由

也二真人聞教方始開悟雖憶此事領然無味然亦悠悠其為久遠言語未畢忽有八色雲耕二人共乘侍從仙童玉女作鉤天大樂從東南上來不通逕前前即稽首

天尊轉拜二真二真方悟是二息乎今中候

太夫人將非

天尊往古夫人乎即先親也展此座畢當往拜觀

天尊曰然子知之手二真曰能實兒供法亦為苦乎

天尊曰夫如此輩有何限量或賣身供法或身投餓虎或割肉餵禽或殺身施蟲或質致妻子或以頭施人諸如此例終劫說之亦不可盡說亦無窮所以者何一切是輩並是得道真人共作親見勸化愚蒙身不復痛了見人理或是幻作蓋亦無奇所以指說胤祖次胤兄弟父祖三世六人者其時並是凡人而能如此真為少比是故說耳二真曰實如教旨二真得經衆訣之要各各慶悅意自云曰如此一切微有緣者必當樂受於是啓

天尊曰如今還外傳說此經不審科儀法信輕重謹以上諮

天尊曰朕未體備甚宜應問所以爾者大有旨要玄科隱秘故不一二載說之耳子並諦聽善識此禁最嚴慎勿差違

天尊於是告右玄真人曰卿受此經可擇其人傳不須法信又告左玄真人曰卿受此經當依冥典法信所用金錢紋繒等物皆令如式此法出自虛元浩素元君之凝思五方元老常所寶修受者別齋上金五分素絲五兩以贖五方元老之靈本命紋繒上壽百二十歲計歲餘一公王一疋中人一丈貧者一尺此三種物慎不可闕闕而墮受者有罪其中增降以貧富量之左玄真人疑不平因白

天尊曰右玄真人受此經文不須信物而反見使頓責如許經法是同即有二異其可解乎

天尊曰非為偏也子未知乎衆兆不同心心各異故開二塗其歸一也所以爾者右玄第

子桑門居士居士普行乞求破惡以為法橋能有施者福報萬倍故今授經不重責信卿今弟子縱使分衛以乞求度人人無與者更益彼罪信心無表何由得度今故制以法信法信之報報在無量如經無盡不妨右玄布施福也

天尊又曰右玄弟子施居士者是能減割施財與人福報萬倍萬倍有盡左玄弟子齋信受經此為信道則是施財於道是故福報如經無盡左玄真人雖奉教旨心猶未體福報如經無盡之理理復云何

天尊知其心念即語大賢卿有疑耶無所嫌也所以云福報如經無盡也何以故譬卿得此經寫治一通傳與一人十人百人千萬人十億萬人不可計人人寫一通一通無限量通彌布無外卿本猶存法信之報如此無盡假令卿今以一金萬金從師受經後得福報如經無盡隨復永無耗竭恐弟子中脫有未悟為近譬耳夫經信之報隨信多少悉如良井縱使天下大旱百丈絕源此井猶滿井主

足用餘以施人百千萬人舉鄉郭人慈意汲取給極無極終於無竭此是自然不盡之報天尊曰既能信道用信道故能信經滅損身口以用受經財報無盡故謂無量加得信道之福信道之福令人精神聰明智慧如經無盡譬然一燈轉然百燈千燈萬燈巨億萬燈無量數燈普照虛空先所然一燈光明無損此是福報智慧永無盡也卿當普告受經之人導以智慧開悟一切如此井燈不得獨足便自爲足左玄真人又疑曰悉天下大早百丈無源井那猶滿欲問未敢天尊已知左玄之意即又語曰所以名爲良井者也是時虛空之中衆仙大聖聽說法者巨億千萬咸皆開解同聲稱善一稱善福福足三皆左玄真人疑解廓然知責經信更是勝理下座稽首曰始蒙開悟是時共乘雲轡二人乃是往古胤祖次胤兄弟聞說要言即以仙童玉女千二百人稽首奉上左玄真人求受要訣左玄真人即授二人思微定志要訣二人信解即入第三仙品是時千二百仙

童王女見二人受經得道便各解身上寶珠瓔珞奉上左玄真人求受尊經受之亦竟讀得一徧神開解悟知三界皆空福盡應終便各悔過千二百人即於其身仍化入仙爾時空中有一天人意疑

天尊說此譬喻云學道之人不得思微定志要經如人海採寶無有導師又云如彼愚人暗人空山覓天子綬設如是者造化之初未有此經故

天尊大聖那得成道作是念已

天尊即知便答天人曰卿未預天人豈能速知造化之由如

天尊大聖經法未出而得道者皆是純朴行應自然自然之行暗與理合暗與理合自然玄悟玄悟之理本無文字撰集成經以告後來何所嫌耶譬人墮地獄豈須先作地獄法乎天人稱善曰聖尊之言悟我愚蒙於是悔謝進仙一階時有十二年少處世閑樂曰日相就共作好食酣飲嬉戲或復論議爲道之難易

天尊以道眼遙見此人前生在世得爲人師而祕懷經典故弟子於道之心亦復猶豫因此微緣緣猶可度於是

天尊即化作凡人從會中過過託乞食因悉共語諸年少輩復論如故一人曰我數隨家兄至安樂山中見諸道士悉持十戒肅肅甚佳如此後死魂神所在亦當不虛但十戒持人難悉從耳化人曰持此甚易違此難耳諸人聞化人言皆各忿然問化人曰云何先生持戒云易不持反難化人曰立身如戒不畏天子亦不畏鬼神何爲不易如違戒者是人悉畏復畏鬼神云何不難於是十二年少並有得意因各各自付其中一人素性好酒先曰餘者乃可唯酒難斷除我本性所好作不敢計所以者何我先服散散發之日非酒不解是故敢耳化人曰散發所須此乃是藥將養四大藥酒可通但勿過量至不如平耳一人曰餘事猶可妄語甚難所以爲難或身有靈藥或是尊長應爲隱諱而人見問不得不欺欺便犯戒是故爲難化人曰事有隱顯言

有方便此亦可通但勿善惡反論說人之短言傷人耳一人曰餘者乃可唯盜戒難小小之間已是犯目化人曰大事可難小小之間不益易慎乎即為說偈曰

何不受盜戒 不受盜亦難 孰云闇中昧

中有記盜官 取一年年倍 倍倍殊不寬

以手捧洋銅 燒口煮心肝 一朝言此苦

終年猶心酸 何不受此戒 保持必令完

我信彼亦信 在在無不安 安坐招靈人

永享長年歡

一人曰餘者悉易淫最難斷所以爾者我曾履斯事數隨凡中食當中食時謂云一日精進無不過理亦謂後死必當得此齋戒之福至是夕夜是我所懸轉來狡獪雖苦加抑迄

不覺已爾每每如此是故最難化人曰色者

今是想耳想悉是空何有色耶但先自觀身

知身無奇便知無色何可不忍且淫欲煩恣

如飲鹹水飲多渴多唯死而已何有厭足於

是化人而說偈曰

色欲劇於渴 小忍差可度 何為進鹹水

水鹹益渴固 予能善解渴 當飲天甘露

甘露香且薰 通體皆流布 天人尋香降

玄趣自然悟 熙熙永無為 長保九天祚

其一八曰餘悉可從唯殺生戒難我性好歌

雞一食無肉了自無味數日便瘦化人曰賢

者肥為人患瘦益體輕用肥何為即說偈曰

賢者戒其殺 亦莫懷殺想 衆生雖微微

亦悉樂生長 如何害彼命 而用以自養

自養今一時 累汝自然英 長論三塗中

辛苦還復生 善惡各有緣 譬如呼有響

何不以此行 慈心以自獎 真人携手遊

逍遙觀浮量

說此偈已化人見大威變極道之姿侍從僚

屬鈞天大樂非可目名反于上方諸人悉見

喜懼交集并聞要說意解開悟悉俱共詣左

玄真人求得奉受經法并諸十戒真人亦以

道眼見此諸人先世因緣致其難悟之由枉

屈

天尊下降多方開悟故作建故不以授之以

其有緣不得都斷唯語明日當相授也明日

明日無復極已諸年少輩自共語曰我等命

日難保不可為復如前明日明日也當各齋

法信并辭便當更共苦請相照言曰叩頭自

搏血出斛數亦要莫止左真慈心必授我等

辭曰男生某甲等叩頭乞道自搏今日之日

流映已差恒恐微氣奄同彼昧昧而無曉長

夜難即孤獨困苦求免無所伏聞

天尊所演思微定志有十戒之法文簡事要

無細不度實人專專實仰希奉受朝受夕沒

永無遺恨若復遷延日過一日朝菌殘命未

知明日吉凶何如如此妙趣萬代始出會遇

有今今復差違譬盲人捉雀入手復去雖復

萬劫豈可重遭輒自罄竭辨信如法條牒如

左謹重稽顙奉辭以

聞唯乞成就謹辭

上金五分 本五兩

素絲五兩

本命絃綰年餘一合如干

命米五斗

薪一束

右五種如法

太上洞玄靈寶智慧定志通微經
二十

三經同卷

太上洞玄靈寶觀妙經

太上洞玄靈寶天尊說大通經

太上洞玄靈寶護諸童子經

今

太上洞玄靈寶觀妙經

夫欲觀妙成真先去邪僻之行外事都絕然後澄靜其心所思次東次滅習之既久其心漸開唯滅動心不滅靜心但疑空心不疑有心靜心之上豁然無覆靜心之下寂然無載有事無事常若無心處靜處誼其志唯一若東心太急又却成疾發乎狂癡是其候也心若不動又須放任恒自調適勿令結滯處誼無惡涉事無惱者此是真靜也不以涉事無惱故求多鑒乎靜久神凝天光自發勿舉急求致以乖自然於靜境中見無所取若有所取則偽亂真久而行之自然得道夫得道者心有五時身有七候一時心動多靜少二時心動靜相半三時心靜多動少四時心無事則靜有事還動五時心常與道冥觸亦不動

七候一者心得真定不雜塵塵二者宿疾蠲消身心清爽三者填補虧損復命還年四者延齡度世名曰仙人五者鍊形為氣名曰真人六者鍊氣成神名曰神人七者鍊神合道名曰至人其於鑒力隨候益明夫久學靜心都無一候但令穢質殂謝方空欲成真道未之聞也

太上洞玄靈寶觀妙經

太上洞玄靈寶天尊說大通經

真空章

先天而生生而無形後天而存存而無體然而無體未嘗存也故曰不可思議

玄理章

靜為之性心在其中矣動為之心性在其中矣心生性滅性現如空無相湛然圓滿

玄妙章

大道無象故內攝於有真性無為故外不生其心如如自然廣無邊際對境忘境不沉六賊之魔居塵出塵不落萬緣之化致靜不動致和不遷慧照十方虛變無為

偈曰

有法悟無法 無修解有修 包含萬象體 不罣一絲頭

太上洞玄靈寶天尊說大通經

太上洞玄靈寶護諸童子經

道言天地父母日月五星運炁自然凡人居世命屬北斗七星三台輔弼華蓋本命星官元辰真君二十八宿南斗北斗東斗西斗眾星官屬天地水三官河姑織女天河星眾一切神仙世間男女立身濁世出入門戶衝突天狗天河惡星醜宿致有刑剋三煞六害禍聚相仍豈知趣向若能虔心祝誦降福流恩使諸男女或求嗣胤或保長年普謝眾靈皆如是願身中七傷六害胎娠元辰應是逆災可倚十方諸善童子重賜威光為除厄難保壽延生

道言道能生成道能育養七神童子者是天北斗七星之精炁也凡人蔭在胎中七月之時下降人身開明九竅記於姓名便屬管係一曰天蓬二曰天內三曰天衝四曰天輔五曰天禽六曰天心七月天柱

道言諸善童子各乘飛雲七明之車五絲之帔從十方神仙兵馬七億萬眾常在人間分身變化或長或短或男或女執符把籙檢校

罪福善惡因緣男女年命長短人能知之不死長生若諸世俗夫妻男女命隔星河身居樓閣或男女有隔越之難橋梁不通滯在三十六星河之畔夕被天狗所隔曉為地狗所越眷屬咨嗟憂傷無路但當虔懇燒香轉經謹請七元真炁童子流恩降福為度災厄赦男子女人得過星河孤神不犯於孩童河母無侵於幼稚男女成立身命延長南斗添益算之符北斗落死籍之字父母安泰各保吉昌一請東方九炁天中九神童子為諸男女度脫春三月所有疾病三刑四殺七傷八難河神侵撓之厄悉令消散二請南方三炁天中三神童子為諸男女度脫夏三月所有疾病三刑四殺七傷八難河神侵撓之厄悉令消散三請西方七炁天中七神童子為諸男女度脫秋三月所有疾病三刑四殺七傷八難河神侵撓之厄悉令消散四請北方五炁天中五神童子為諸男女度脫冬三月所有疾病三刑四殺七傷八難河神侵撓之厄悉令消散五請中央一炁天中一神童子為

諸男女度脫四李之內所有疾病星河漫繞
三災九厄悉令解除度脫

道言汝等善男子善女人但當讀誦此經則
令五神童子及十方聖眾即來擁護降福消
災滅除罪咎即說頌言

一切空無本 皆先稟運系 有識即非識
無留亦無滯 名字居多眾 混然積年啓
仙度甚久遠 得一歸真理 遊經無定方
權應非一體 皆由此經得 歷劫自澄洗
歸依太上經 壽算得長存 吏兵常擁護
禍去福來臻

爾時北斗七星童子五神童子十方諸善童
子其數如沙塵委悉聚功德將來五濁世七
傷與六害自然歸正旨天地陰陽悉周匝輪
迴轉長育於人民司馬定命章萬神唱恭諾
更無有留滯男則志聰明女則質端惠慈惠
不能生終天保慶壽如此至心誠歸命太上
經

太上洞玄靈寶護諸童子經

太上洞玄靈寶開演秘密藏經

十一

太上大道君以上皇元年十月五日與無量
天真妙行神人詣太微帝君處明霞之上瓊
闕之內金華之房諸天上帝清齋道前行
步虛誦誦靈章一依俯仰三乘之格扣擊法
鼓普集羣真此時眾聖莫不皆集敷講玄妙
闡揚道德聖眾列位四座嚴整太微帝君從
座而起稽首道君今日大慶教誡之晨迂屈
聖尊曲降卑肆洪慈垂賜過忝重恩願臣小
子希遭嘉會羣真歡樂不並於常伏願哀憐
覺所未悟不審三世十方天事所得妙身以
何為法為同一體為各異耶唯願哀於具垂
敷演令一切眾生及將來世學道之人有所
依倚緣恩上啓伏用戰惶

太上道君方命西臺金母三十二天齊聲合
和唱詠靈音鼓天妓樂表現祥瑞驚天駭地
妙麗殊持良久言曰深乎微哉乃欲問發真
道祕藏自我成道已來未曾說此隱奧之事
今既有請冒禁相傳當諦聽受勿妄宣泄是
時眾會伏受要言

太上告曰至真妙理寂絕無形清淨凝湛不
可言名方便引化略開二途一者道身寂體
虛無二者生身誕孕形軀言道身者離一切
相正慧成滿除斷虛妄冥契玄宗與道為一
不滅不生無來無去言語路斷念慮永畢言
生身者隨順世法依因父母氣數和合瓊胎
靈府猶如虛空隨宜出處年月不同腋背降
誕長養深宮或生而皓素或常保少容瓊姿
妙質天人所宗帝君禮曰不審道身即是寂
本為更有義名為本耶

太上告曰道為聖本本即道根雖是一體先
無二源道名獨立體自靈通強字無待遠逝
息功本對於末因待假名稱為物始用涉能
生又為定本動寂用殊出沒互表語嘿相須
帝君又問如是本身能生萬物即是萬物之
本始者此與神本有何差別

太上答曰源其實體無有二相何以故俱畢
竟故無始終故不可說故以善方便亦得言
異所謂神本是妄想初一念之心能為一切
生死根本以是初心念念相續衆生業果輪

轉無窮是名識初亦名神本言本身者即是
道情清淨之心能為一切世出世法之根本
故故名為本如是真性非心不心非色不色
無緣慮故非無常故言非心能生心故無
不知故亦名為心無所礙故故名非色能生

色故道眼見故亦名為色是清淨心具足一
切無量功德智慧成就常住自在湛然安樂
但為煩惱所覆蔽故未得顯了故名為性若
修方便斷諸煩惱障法盡故顯現明了故名
本身如此身者本自有之非今造故故名為

本本非有性非三世攝方便說故非非三世
本來有故名為過去一切眾生必定當得故
名未來十方大聖今已得故故名現在雖復
說有三世差別體不動故常住無變帝君又
問若是本身性是具足一切煩惱云何能障
若本具足而起障者一切神尊得成道亦已
應還失何以故體唯一故

太上答曰雖體是一義則有二方便未足故
方便具足故是故我言一切諸法以空為性
為化眾生善巧方便隨宜演說是言說性猶

如虛空亦無分別識本本身皆虛空相得無
所得故無所失有所得故故有所失是故凡
夫名為失者十方神尊名為常德帝君又問
若生死法無始無終本性清淨何故不名為
道果耶

太上答曰生死之法有因果故故是無常不
名道果常道之體非因果故是故為常體是
果故故名道果帝君又問如是本身為悉共
有但是一身為各各有有無量身若有一者
一人得已應礙餘人若是多迹非為太一不
得言常

太上曰我不說言一切諸法如虛空即虛空
之性非一非多非礙非無礙如是本身亦復
如是體非一多性無障礙太微帝君稽首謝
曰謹聞命矣不害生之與迹二義云何經門
二言敢以諮啓伏願弘慈廣垂分別
太上告曰體實無二隨義名身生體擢貌事
事同人迹無定相形不常倫但能顯本即是
迹陳帝君又問生身迹身是應作耶
太上答曰如是如是是生之與迹並稱機緣利

益不差即名為應體則無別隨義異名帝君
又問是迹身者為有法耶為無法耶

太上答曰我不說云一切諸法性無所有云
何迹身而當有法若假名字亦有亦無不離
本故故名為無眾生見故故名為有更非別

體故名為無有實利益故名為有猶如明鏡
能見色象了了分明種種差別是鏡中象不
可定說是有是無而亦得言鏡中有像一切
眾生心鏡明故見真道像又如止水無濤波
故影現日月星辰飛鳥日月星辰及以飛鳥
悉見水底一切諸物亦見自影了了分明此

水中物及所見影俱非真實不可言有不可
言無一切眾生心水澄清見道身影亦復如
是體即真道是故非有非不見故不得言無
如追逝者尋跡能得是跡與人非一非異迹
身亦爾明解之人用跡入悟見真道身知無
迹法故名為一非不因迹漸得開曉達立福
田是名為異如是之義是道境界非是凡夫
下聖能了於是道君欲顯斯義重說偈言
道身不生滅 任理自玄通 湛然常清淨

獨立強言空 絕名無待對 亦忘造物功
端靜息義用 蕭寂守虛冲 本身為物始
生立布三才 冥功雖巨測 圓照遂念開
能為妙迹本 表見億萬該 神用無起滅
奇功靡去來 生身託父母 寄慧示同凡
瓊胎非世享 變示通所堪 端嚴使欣慕
白首破迷貪 非是骨肉身 隨願之所覃
權迹無定方 見身亦長久 遍示五道形
姿容順妍醜 任本之所垂 利益無優貌
乍有變化生 時或因父母
太微帝君稽首又曰敢問道身為有因耶為
無因耶若有因者同世間法因緣生故故是
無常若無因生復墮邪見異道之謂若是道
身不從因生自然有者一切衆生不修道者
應皆成道如是二義云何可了唯願慈愍廣
垂開示
道君答曰太微帝君乃能顯發如是深奧微
密之義夫正道者真實之相非言語法之所
能宣今言道者寄言顯示令得悟入解了無
言忘筌取旨勿著文字所言道者通達無礙

猶如虛空非有非無非愚昧智非因非果非
凡非聖非色非心非相非非相即一切法亦
無所即何以故一切法性即是無性法性道
性俱畢竟空是空空亦空空亦空無分別
分別空故是無分別亦復皆空空無二故故
言其即而諸衆生不能解了如是義故於無
法中而生法想於不空中而生空想以有如
是心想倒故而有見著具是四倒妄造諸法
計我及物故名生死不得道身天尊大聖了
此實性畢竟無性洞會道源混體冥一故名
得道身與道一故名道身習此正觀名之曰
因亦無所習故名非因是故正道非從因生
亦非無因體非是果亦非非果非常非非常
非滅非非滅如是深奧祕密之義唯性與道
乃能解知上聖真仙皆不通達以信力故勢
繫能知如是身者住無所住無所不住是名
正道真實之身帝君又曰不審
天尊所受生身業相云何
太上告曰所言生者無生不生離一切生何
以故十方天尊生已盡故淨欲無明永清淨

故故無有生欲利衆生示同世法是故有生
何以故我若說云道氣高遠寂滅不生衆生
便謂不可修習無迴向心不修善業是故說
云一切聖人皆有生果然非結業隨願故生
若復相說隨人天生皆以上業而為生因以
於其中最第一故是名分別生身之相太微
帝君稽首禮曰善哉道君演說如是深奧之
義自昔以來未曾得聞如是妙經譬如薄福
重罪之人生而瞽盲不見五色青黃赤白及
黑等相不聞宮商五音之聲有大明醫授以
妙術為開耳目一切色聲無不聞見我亦如
是聞於是經能得聞見二種身相當知是經
是法耳目其有得者能見正道二種法身權
實之趣大明賢者即是道君示我妙經如施
耳目得此教者即得正道微妙之身得道身
已便能隨順示見生身是經能生二種身故
名為法母何以故是深妙教能令一切生真
法身如世慈母能生子故至孝之子常念鞠
育懷抱之恩思欲上報終天無極我等如是
因是正教生無漏身是故常當報恩供養安

置堂殿七寶莊嚴香花燈燭伎樂幡蓋晨夕朝禮如侍所親

太上道君答帝君曰如是如是實如所說我從昔來未曾為人說如是法何以故是諸學者力未堪故非是我等十方天事有所隱覆有所憐惜所演法言皆表一道一味一相而諸衆生各得悟入深淺差別隨解有異名為別教示其一相故曰同歸無異經也譬如天降一味甘雨江河大海受處不同名為異水雨實唯一十方大聖降一法雨隨三乘器受益不同故名三教所示身相亦復如是於未悟者名為未說於解了者常滿究竟是故我等無所秘藏是時太微帝君及諸大衆聞是法音歎未曾有於虛空中雨天妙花鼓天伎樂供養道君而共齊聲說偈歎曰

我等歸命太上尊 無上最勝真法王
巧說二種微妙身 猶如等降甘露雨
三乘得悟有差別 道君所說皆周普
衆生汎此法舟航 免度生死大河苦
服此清淨良法藥 身心垢穢病皆愈

各蒙法利喜充滿 是故禮謝慈悲父

爾時太微帝君及諸大衆說是偈已白太上言若諸神尊所說諸法同表一道無淺深者云何而得有圓滿教及未具了差別趣耶道君告曰若於大聖諸有所言皆是正觀一

切智心無非畢竟是了義隨衆生故半滿不同為鈍根者或時說有或時說空或時說常或說無常是名兩半前後異說不得一時隨病發故偏示一義是名為半前病除已復顯一藥用具足故名之為滿了兩半已入一中道乃名具足圓滿之相若深智者聞說一邊即應了悟因緣假名即正中道所言中者離一切者亦無所離不滯二邊故名為中能通衆生至善家處到解脫城故名為中若有了知是中道者名為正觀是第一乘能運學者出離三界過二生死了真法性成無上道是故此經能破無邊無明暗室令見無上正法珍寶猶如明燈破一切暗令有目者見諸寶物隨意更用稱心快樂我今哀愍閻苦衆生然此法燈照煩惱闇普令一切尋光見道

得真智慧自在安樂極無上果究竟昇玄太微帝君白太上曰若如是者唯當正解中道之要便得成道何須更習諸餘經誡為繁勞耶

太上告曰若諸學人深蘊德本了達正空中道之相是即具足無俟更修諸餘法術但為五濁諸衆生等未了此經深妙之趣先示餘法調伏其心遮斷煩惱四魔惡賊猶如帝王具足無量珍寶樂具而須城舍墻塹莊嚴防斷盜賊遮諸障難如是正觀始悟心王住中道城以諸誠慧為法墻塹牢自莊嚴備諸魔試是故十方天尊大聖具演經誡廣開法門太微帝君稽首拜曰敢問道君畢竟究竟云何差別領垂告示

太上曰畢者決也竟者定也我所說法決定無二如言世間無常若空空無我淨道果常臻安樂自在真實清淨若異學者有來難問如是之義終不動轉三世神尊皆作是說是決定畢竟之義又復畢者名審竟者名諦若諸道君說一切法本性清淨如虛空性假因

緣有體非真實中道之理性無顛倒是寂滅相作是說者審諦誠信無有虛妄是故復名畢竟之義又復畢者名達竟者言了十方大聖坐道場時證深正智於一切法及法真性一念洞明通達照了無有差謬是智圓滿稱寔相法達了無遺故名畢竟言究竟者究之言到竟之言邊際十方神尊得一切智到法邊際是名究竟又復究者名斷竟者名盡一切神尊以實相慧斷煩惱習一切皆盡具足解脫是明究竟又復究者名度竟者名已十方大聖得道真人度生死海已至彼岸故名究竟如此是名分別畢竟究竟差別之相帝君又曰當何名此經云何傳授方法所須願垂具告

數劫來久證此法同一性相平等無二而能出見種種法身示修習報應化無方人天惡道隨類所見受生業行皆同其法或見殊勝超踰世間第一希有獨步無畏威變自在不可思議是名開演身秘密藏能於正道真寔之性無言無說寂滅相中善巧因緣分別顯示隨其所宜說法無盡言辭次第義味深廣或說一乘或說三乘人天業果漸漸開化使得同歸真一正道是名開演口秘密藏雖無念慮離分別想以一切智洞達空門正解正觀窮理邊底與真實相平等為一以一切種智照世間法色法非色法心法非心法人天五道四六大家眾生想念果報因緣於一念中明了無礙善識根性隨宜所行世出秘法洞達究竟是名開演心秘密藏以是三種秘密之法成真道身非是凡夫乃至上聖所能覺知我於是經具開此義明說身相啓方便門令諸學者入重玄趣是故此經名為開演秘密奧藏如是受持此經大乘東經中最妙若有至心堪能解了講宣其義審得其人稽

首而傳不須盟信何以故已受餘經知其心故亦是平等無揀擇故太微帝君拜手言曰善哉道君演說如是深奧之義我於今日始知神事審是東生真寔父母能以大慈大悲之力於無相中示真法相說此三種微密之趣令諸來生悟一乘道得妙法身證無上覺自能了知秘密之藏亦當能為一切眾生開演甚深三種微密我今始知無上大乘平等正法無擇穢賤唯授能行有心之人輒當傳付今此妙教廣得流通普令一切開正法眼紹繼道君無上之位使三寶輪轉運照無輟太上告曰善哉帝君乃能發心弘宣此法來生男女當受斯慶咸見正道得淨法身帝君當知若使餘經不流布者於諸世間無深損害若失此經一句一偈則為一切構諸災禍何以故此經明示真道正身即是眾生終歸窟宅若失此經永為孤露漂漂三塗五道之中沒於長苦無由解脫何以故不得本源無所歸故是故帝君常當一心弘宣此法必使流通我皆受之於大帝大帝受之於五帝上

真高上玉皇玉皇受之於玉清帝君消魔大
王大王受之於八天虛皇帝君口口相傳不
記文字帝君今可書而錄之使得流布將來
衆生吾當以神通力守護此經隨有之處悉
皆吉祥大劫之周餘道皆滅此經獨存當還
大羅之天隨機下世救度天人於是太微帝
君鑄玉爲簡鑲金爲字編以白銀撰錄此經
威以紫玉之函封於七寶之臺仙童玉女散
花燒香供養靈文是時大衆聞受經已太上
道君還於玉京諸來會者各禮而去

太上洞玄靈寶開演秘密藏經終

太上洞玄靈寶真文要解上經

人十三

高玄大法師受

太上靈寶治玄都玉京山七寶玄臺十方至
真自然妙行真人飛仙大聖衆皆浮空燒香
散華旋行一日三周手把十絕華幡口誦洞
章日月交迴七星運關三百三十日則天關
迴山一度三百三十度則九天氣交三千三
百度天地氣交天地氣交爲小劫交九千九
百度則大劫周此時則天淪地沒九海濱一
金玉化消豪末无遺天地所以長存不傾者
元始命五老上真以靈寶真文封於五嶽之
洞以安神鎮靈制命河源致洪泉不涌大災
不行此自然之文故曰靈寶九天上書昨鬼
神所知世有其文則保國寧家萬災不衝學
得其法至大劫之周時晏鴻翻而高翔躡飛
霄而浮空也人十二舊科四萬劫一出皆授宿有金
名刻簡來生應爲真人者
太上元始靈寶五篇真文舊藏太上玄臺七
寶上宮天書究真不可尋詳文彩煥曜洞映
上清五老侍衛上帝朝真玉女執巾金童揚

煙燭百和合香流薰紫庭吐日精以却穢散
月華以拂塵神燈朗照炳燭合明金風八發
慶雲四陳鸞鳳悲鳴嘯歌邕邕飛龍嘉獸備
衛玉闕萬帝稽首旋行上官飛空步虛嘯詠
洞章讚九天之靈與欣三天之寶明寔玄文
之妙重功德巍巍乎太空故元始記篇有一
十二德以崇寶於天具標靈文之難窮一者
其德如虛無澄真洞寂澹泊自然幽幽冥冥
爲天地之根二者其德如大道恢廓無爲爲
神明之宗一切萬物普受其成功三者其德
如天澄虛廣覆高浮上清一切萬物普受生
成四者其德如地開張養生含容無細一切
萬物受其厚載五者其德如日月光明洞映
無幽不徹一切萬物受其柔惠六者其德如
衆星照曜諸天朗達幽冥一切萬物普受光
明七者其德如雲雨和天潤地流澤廣施一
切萬物普蒙惠灑八者其德如四時轉輪陰
陽節氣和平一切萬物普受含生九者其德
如太山包容障遏威靈恢恢五帝安鎮神仙
所居十者其德如大江柔弱蕩蕩惠流百方

不簡穢賤无細不容十一者其德如真教導
三乘綿綿長存開張法門普濟萬民十二者
其德如神人救死護生使寒灰起煙演明玄
教普度天民靈文妙重出於自然故標其至
德以貴其真夫靈寶五文皆天地之根化生
五老上總五星下鎮五嶽運導五行通人五
臟安氣養神保國寧家使帝主興隆萬災不
加洪波不衝靈文既見保天長存元始之旨
其微其深今故相告秘而勿宣勤加修誦道
自感焉

太上大道君曰夫為道結緣世世不絕致善
福來生當行十二上願普度一切致國太平
家門興隆子孫昌熾世出賢明七祖生天轉
輪福堂此功高重勤而修行一者當願大道
澹泊虛無安閑空寂澄清自居廣開法門教
導頑夫皆蒙惠解精苦是修願以同學普得
昇虛與天相保長存无憂一切衆生咸同寧
謐二者當願諸天結氣澄清高虛廣覆保真
固靈氣候調節四運和平國安民豐普天閑
寧廣濟一切惠逮有生保劫長存億億不傾

三者當願地土廣載無窮安平不陷海淪不
崩保鎮寧國兆民興隆養生安死惠周十方
永稼種植滋生日豐含德厚載萬願咸從四
者當願日月二景高明無有剝蝕虧縮安清
光照諸天洞消闇冥保固劫運世祚和平普
加惠潤澤灑衆生五者當願星辰與日月齊
光轉燭照曜映朗十方各安其位經緯直行
保鎮安國无有災殃四海寧一普天興隆六
者當願四時隨節推遷景氣和調无有災患
疫毒消滅普天平安五穀豐熟國富民權七
者當願浮雲結氣聚煙飛空高澄塵覆玄玄
隱則無為散則彌天神仙同車結交衆真惠
流一切興國愛民普濟羣生人同劫年八者
當願風雨流灑无窮普加施泄受其發揚萬
物滋生國諸民豐九者當願五嶽各安其方
巍巍包藏長為仙宮安鎮國祚保天无終護
度一切莫不仰宗十者當願江海滂湧无極
含容恢廓无細不殖淵泉柔惠潤加動息天
人獲慶年同劫石十一者當願帝主國土日
昌四鎮安穆兵革不揚天民歌唱吉應永祥

敷教濟濟威化洋洋兆庶稱慶長樂未央十
二者當願靈飛蛸動已生未生咸蒙完全普
得生成皆充元氣受陽之形草木果林使經
冬不零一切濟度靡不鮮榮此十二大願舊
出元始五篇智慧經中靈寶大慈之遺施惠
種福為人結因其功廣大其報難稱斯福之
上業功德諸天有見此法立應自然動心修
行生死獲仙

太上大道君曰吾昔受之於元始天王使授
仙公仙王仙卿上清真人不傳中仙自无玄
圖帝簡玉名上清不得見聞脫有漏慢之中
見亦不勤九天禁書四萬劫一傳
夫修學之士不行此法功德不建思无感徹
真靈不降與善緣冥絕福路既乖仙何有日
至學之士常當齋戒行香朝禮事竟仍東向
行願心口相應无有異念將足以招玄真於
虛無坐求靈福於自然拔七祖於幽牢昇窮
魂於南宮保家國於厄運懷天災於康年此
福巍巍難可具宣於是說靈寶自然五篇衛
靈神呪曰

東方

九氣青天 明星大神 煥照東鄉 洞映九門
轉燭揚光 掃穢除氛 開明童子 備衛我軒
收魔束袂 上對帝君 奉承正道 赤書玉文
九天符命 攝龍驛傳 普天安鎮 我得飛仙

南方

南方丹天 三氣流光 熒星轉燭 洞照太陽
上有赤精 開明靈童 總御火兵 備守三宮
斬邪束袂 剪截魔兒 北帝所承 風火八衝
流鈴交換 敢有不從 正道流行 我享上功
保天長存 億劫無終

西方

七氣之天 太白流精 光曜金門 洞朗太冥
中有素皇 號曰帝靈 保神安鎮 衛我身形
斷截邪源 王道正明 宮殿整肅 三景齊并
道合自然 飛昇紫庭 靈寶符命 普惠萬生
功加一切 天地咸寧

北方

北方玄天 五氣徘徊 辰星煥爛 光曜太微
黑靈尊神 飛玄羽衣 備衛五門 檢精捕非

敢有干試 豁落斬摧 玉符所告 神真八威
邪門閉塞 正道明開 映照我身 三光同輝
策空駕浮 舉形仙飛

中央

黃中理氣 總統玄真 鎮星吐輝 流煥九天
開光童子 一十二人 元氣陽精 燭上朱煙
洞照天下 及臣等身 百邪摧落 殺鬼萬千
中山神呪 普天使然 五靈安鎮 身飛上仙
太上大道君曰此自然五篇衛靈神呪舊出
靈寶五文上篇制魔召靈役使群神安鎮五
嶽保天長存明理三光致國太平兆民享福
濟度群生吾普受之於元始天王使依玄科
四萬劫一傳子位登高仙總統三界臣御群
靈今以相告子擇其人必合玄圖依科以傳
凡欲修道求仙致真安國寧家截諸不祥當
奉行自然衛靈神呪常以本命太歲甲子庚
申及修齋之日常東向誦之一徧則神朗氣
正宮宅肅清邪魔摧滅五老降真萬試賓伏
跌災喪亡長齋修誦剋成真人
太上大道君告高玄大法師曰夫來入吾法

門上希神仙飛騰華蒼次願家國安寧過度
萬患消災滅禍請福求恩當先修靈寶自然
五篇八齋悔罪懺謝十方上解宿世重過拔
度惡緣下解己身積行以來所犯罪愆勤行
齋直廣建福田救度一切卹死護生功成德
普乃合道心惡對自滅善緣來生家門端整
所願咸從神真玄降坐致飛仙此治行之本
求道之源學無此法徒勞心神宿根不解望
道泯泯至老無獲不免諸患大道廣應哀之
在心今故相告子勤修行吾普受之於元始
天王使我秘之於靈都上館四萬劫一出子
今當依先師舊科若有至學之人名書金簡
行合神仙子當傳之焉

道言齋日燒香東向祝曰今故燒香歸
身歸神歸命

東方無極太上靈寶天尊人十二今仰謝東方九
氣青天太清玄元上三天元極大道太上老
君太上丈人天帝君天帝丈人太帝帝君上
皇老人三十九真七十二聖高玄真君九老
仙都君九氣丈人始生青真東華玉寶高晨

大司馬上相青童君元老九玄主仙真人无
鞅數量百千萬重道氣千二百官君太清玉
陛下青帝九氣玉門神仙四司真人諸天至
極上聖大神東鄉无極世界神仙正真乞可
原臣宿世以來七祖父母下及_{身積行所}
犯殺害賢良元逆醜惡非人所行淫色盜竊
敗人成功離人骨肉奪人所崇為子不孝為
臣不忠反上逆主攻伐師宗上不敬天地下
不畏鬼神嘗毀大道泄露靈文口是心非勝
已嫉能輕慢四大污穢三光惡口兩子讒擊
善人諸如此罪歷世纏綿結固不解積成丘
山乞今燒香行道懺謝玄真宿縛解散七祖
同懽去離五道拔度八難窮魂解脫上昇福
堂舉家无他天下受恩國土太平四海興隆
帝王懽悅國富民豐惠加衆生咸蒙道恩今
束身歸命靈寶天尊賜_臣得如所願位登上
仙昇入无形與道合同

畢九叩頭九搏頰次南向燒香祝曰_臣今
故燒香歸身歸神歸命

南方无極太上靈寶天尊_臣今仰謝南方三

氣丹天太清南極皇上老君洞靈玉帝上元
禁君三元丈人始老玄真萬福君萬福夫人
南昌上官注生司馬太極真人太和老子玄
和丈人赤帝丹靈高仙萬真諸天至極上聖
大神南鄉无極世界神仙正真乞可原臣宿
世以來七祖父母下及_{身積行所}
畢九叩頭搏頰次西向燒香祝曰_臣今故
燒香歸身歸神歸命

西方无極太上靈寶天尊_臣今仰謝西方七

氣素天太清西華高上皇帝太靈元始老君
萬始先生太素三元君金闕七寶後聖帝君
主仙丈人太和玉女西靈金母白帝高仙四
極真人諸天至極上聖大神西鄉无極世界
神仙正真乞可原臣宿世以來七祖父母下
及_{身積行所}

畢九叩頭搏頰次北向燒香祝曰_臣今故
燒香歸身歸神歸命

北方无極太上靈寶天尊_臣今仰謝北方五
氣玄天太清太上高皇玉帝虛皇道君太上
老君太上丈人太上太道玉晨君北極真公

文始先生黑帝皇老高玄真人自然童子北
辰九真斗中大神五靈夫人太華九辰高上
萬重諸天至極上聖衆神北鄉无極世界神
仙正真乞可原臣宿世以來七祖父母下及
_{身積行所}
畢九叩頭搏頰次東向燒香祝曰_臣今
故燒香歸身歸神歸命

東北无極太上靈寶天尊_臣今仰謝東北始

蒼天太清無極虛無自然大道至真上聖靈
寶始青老君九天真王東明虛皇帝君九靈
先生玉華真帝高皇上真真人諸天至極上
聖衆神東北方無極世界神仙正真乞可原
臣宿世以來七祖父母下及_{身積行所}
畢九叩頭搏頰次東南向燒香祝曰_臣今
故燒香歸身歸神歸命

東南无極太上靈寶天尊_臣今仰謝東南始
丹天太清洞極虛無自然至玄道君上聖靈
寶始赤陽元老君南極老子太和先生三靈
玄上萬福皇老丈人丹靈高皇帝君太陽真
人好生度命司馬玄真三元君紫晨大道君

南明洞靈虛道君朱官赤精南昌司命四極真人諸天至極上聖衆神東南无極世界神仙正真乞丙原臣宿世以來七祖父母下及臣身餘悉如上法

畢九叩頭搏頰次西南向燒香祝曰臣今

故燒香歸身歸神歸命

西南无極太上靈寶天尊臣今仰謝西南始素天太清玄極虛無自然浩冥皇上元靈道君金華至真靈寶始素老君三天玉童紫陽真公斗中四真元陽帝君紫精先生萬福萬氣萬度萬生君西明太靈虛皇道君金門素靈七真玉華君諸天至極上聖衆神西南无極世界神仙正真乞丙原臣宿世以來七祖父母下及臣身餘悉如上法

畢九叩頭搏頰次西北向燒香祝曰臣今

故燒香歸身歸神歸命

西北无極太上靈寶天尊臣今仰謝西北始素天高上元皇道君九天元靈洞寶太上真老君無量太華靈寶始素老君皇上丈人北玄九真華晨君天門度世飛天羽郎玉仙監

總靈司馬上古三師大聖衆至真諸君丈人諸天至極上聖衆神西北无極世界神仙正真乞丙原臣宿世以來七祖父母下及臣身餘悉如上法

畢九叩頭搏頰次向上方燒香祝曰臣今

故燒香歸身歸神歸命

上方无極太上靈寶天尊臣今仰謝上方太上无極无形无名无頂无極至真太上帝高皇大帝九天元父元始天王元始丈人至極靈寶洞玄太上元靈老君无極大聖衆至真諸君丈人諸天至極上聖衆神上方无極世界神仙正真乞丙原臣宿世以來七祖父母下及臣身餘悉如上法

畢九叩頭搏頰次向下方燒香祝曰臣今

故燒香歸身歸神歸命

下方无極太上靈寶天尊臣今仰謝下方玄黃天无上无極无色无鞅无量數太上帝九千九百九十九萬億重道天老九天玄母太黃元君九天真王无上虛皇玄和老人太極真人黃老皇帝黃老丈人元黃中帝五老

上仙諸天至極上聖衆神下方无極世界五嶽四瀆神仙正真乞丙原臣宿世以來七祖父母下及臣身餘悉如上法

畢九叩頭搏頰

行此十方懺謝畢便依威儀舊典此學道之

本上可以解七祖之宿對下可以除身行醜惡之罪衆愆既散神明自祐神明既降天民歸心功德廣載福慶无窮普濟一切護度群生斯法妙重難可具稱

道言夫欲修善建功廣種福田當為天民修齋謝罪放生然燈拔度宿緣解脫世羅天民蒙恩也

靈寶真文既竟方諸宮中東華上房青童君歌和魂致神之曲有得誦之天靈降衛萬祇喪迹神聰意朗存念易感有經之子實而秘之勿妄傳焉

東華上房靈妃歌曰

紫桂植瑤園 朱華聲樓樓 月宮生藥洲 日中有瓊池 左拔圓靈曜 右掣丹霞暉 流金煥絳庭 八景絕煙迴 綠蓋浮明空

口為玉池太和宮漱咽靈液災不干體生光
華氣香蘭却滅百邪玉鍊顏審能修之登廣
寒晝夜不寐乃成真雷鳴電激神泯泯

黃庭章第四

黃庭內人服錦衣紫華飛裙雲氣羅丹青綠
條翠靈柯七蓮玉籥閉兩扉重掩金闕密樞
機玄泉幽闕高崔嵬三田之中精氣微嬌女
窈窕翳霄暉重堂煥煥揚八威天庭地關列
斧斤靈臺盤固永不衰

中池章第五

中池內神服赤珠丹錦雲袍帶虎符橫津三
寸靈所居隱芝鬱鬱自相扶

天中章第六

天中之嶽精謹修靈宅既清玉帝遊通道
路無終休眉號華蓋覆明珠九幽日月洞虛
元宅中有真常衣丹審能見之無疾患赤珠
靈裙華清紫古下玄膺生死岸出青入玄二
炁煥子若遇之昇天漢

至道章第七

至道不煩訣存真泥丸百節皆有神髮神蒼

華字太元腦神經根字泥丸眼神明上字英

玄鼻神玉龍字靈堅耳神空閑字幽田舌神

通命字正倫齒神崑鋒字羅十一面之神宗

泥丸泥丸九真皆有房方圓一寸處此中同

服紫衣飛羅裳但思一部壽無窮非各別住

居腦中列位次坐向外方所存在心自相當

心神章第八

心神丹元字守靈肺神皓華字虛成肝神龍

煙字含明腎鬱導煙主濁清腎神玄冥字育

嬰脾神常在字魂停膽神龍曜字威明六腑

五臟神體精皆在心內運天經晝夜存之自

長生

肺部章第九

肺部之宮似華蓋下有童子坐玉闕七元之

子主調氣外應中嶽鼻齊位素錦衣裳黃雲

帶喘息呼吸體不快急存白元和六氣神僊

久視無災害用之不已形不滯

心部章第十

心部之宮連含華下有童子丹元家王適寒

熱榮衛和丹錦飛裳披玉羅金鈴朱帶坐婆

娑調血理命身不枯外應口舌吐玉華臨絕
呼之亦登蘇久久行之飛太霞

肝部章第十一

肝部之宮翠重裏下有青童神公子主諸關

鏡聰明始青錦披裳佩玉鈴和制魂魄津液

平外應眼目日月精百病所鍾存無英同用

七日自充盈垂絕念神死復生攝魂還魄永

無傾

腎部章第十二

腎部之宮玄闕圓中有童子冥上玄主諸六

腑九液源外應兩耳百液津蒼錦雲衣舞龍

幡上致明霞日月煙百病千災急當存兩部

水王對生門使人長生昇九天

脾部章第十三

脾部之宮屬戊巳中有明童黃裳裏消穀散

氣攝牙齒是為太倉兩明童坐在金臺城九

重方圓一寸命門中主調百穀五味香辟却

虛羸無病傷外應尺宅氣色芳光華所生以

表明黃錦玉衣帶虎章注念三老子輕翔長

生高僊遠死殃

膽部章第十四

膽部之宮六腑精中有童子曜威明雷電八
振揚玉旌龍旂橫天擲大鈴主諸氣力攝虎
兵外應眼童鼻柱間腦髮相扶亦俱鮮九色
錦衣綠華裙佩金帶玉龍虎文能存威明來

慶雲役使萬神朝三元

脾長章第十五

脾長一尺掩太倉中部老君治明堂厥字靈
元名混康治人百病消穀根黃衣紫帶龍虎
章長精益命賴君王三呼我名神自通三老

同坐各有朋或精或胎別執方桃核合延生
華芒男女徊九有桃康道父道母對相望師
父師母丹玄鄉可用存思登虛空殊途一會
歸要終閉塞三關握固傳含漱金醴吞玉英
遂至不飢三蟲亡心意常和致欣昌五嶽之

雲氣彭亨保灌玉虛以自償五形完堅無災
殃

上觀章第十六

上觀三元如連珠落落明景照九隅五靈夜
燭煥八區子存內皇與我遊身披鳳衣銜虎

符一至不久昇虛無方寸之中念深藏不方
不圓閉牖牖三神還精老方壯魂魄內守不
爭競神生腹中銜玉璫靈注幽關那得喪琳
條萬尋可陰仗三魂自寧帝書命

靈臺章第十七

靈臺鬱謁望黃野三寸異室有上下間關營
衛高玄受洞房紫極靈門戶是昔太上告我
者左神公子發神語右有白元併立處明堂
金匱玉房間上清真人當吾前黃裳子丹氣
頻煩借問何在兩眉端內映日月列宿陳七
曜九元冠生門

三關章第十八

三關之中精氣深九微之內幽且陰口為天
關精神機足為地關生命扉手為人關把威
衰

若得章第十九

若得三宮存玄丹太一流珠安崑崙重中樓
閣十二環自高自下皆真人玉堂絳宇盡玄
宮璇璣玉衡色蘭軒瞻望童子坐盤桓問誰
家子在我身此人何去入泥丸千千百百自

相連一十十似重山雲儀玉華俠耳門赤
帝黃老與我魂三真扶骨共房津五斗煥明
是七元日月飛行六合間帝鄉天中地戶端
面部魂神皆相存

呼吸章第二十

呼吸元氣以求像儂公公似在前朱鳥吐
縮白石源結精育胞化生身留胎止精可長
生三氣右徊九道明正一合華乃充盈遙望
一心如羅星金室之下可不傾延我白首反
孩嬰

瓊室章第二十一

瓊室之中八素集泥丸夫人當中立長谷玄
鄉繞郊邑六龍散飛難分別長生至慎房中
急何為死作令神泣忽之禍鄉三靈毀但當
吸氣錄子精寸田尺宅可治生若當決海百

常念章第二十二

常念章第二十二
清飲葉去樹枯失青青氣亡液漏非已形專
閉御景乃長寧保我泥丸三奇靈活淡閑視
內自明物物不干泰而平想矣匪事老復丁
思詠玉書入上清

常念三房相通達洞視得見無內外存漱五
芽不飢渴神華執巾六丁謁急守精室勿妄
泄閉而寶之可長活起自形中初不聞三官
近在易隱括虛無寂寂空中素使形如是不
當汚九室正虛神明舍存思百念視節度六
腑修治勿令故行自翱翔入雲路

治生章第二十三

治生之道了不煩但修洞玄與玉篇兼行形
中八景神二十四真出自然高拱無爲魂魄
安清靜神見與我言安在紫房幃幃間立坐
室外三五玄燒香接手玉華前共入太室璇
璣門高研恬淡道之園內視密盼盡見真真
人在已莫問隣何處遠索求因緣

隱影章第二十四

隱景藏形與世殊含氣養精口如朱帶執性
命守虛無名入上清死錄除三神之樂由隱
居修歛遊邀無遺憂羽服一整八風驅控駕
三素乘晨霞金輦正位從玉與何不登山誦
戒書鬱鬱窈窕真人墟入山何難故躊躇人
間紛紛臭如帑

五行章第二十五

五行相推反歸一三五合氣九九節可用隱
地迴八術伏牛幽關羅品列三明出於生死
際洞房靈象斗日月父曰泥丸母雌一三光
煥照入子室能存玄真萬事畢一身精神不
可失

高弁章第二十六

高弁日月吾上道鬱儀結璘善相保乃見玉
清虛無老可以迴顏填血腦口銜靈芝携五
星腰帶虎錄佩金璫駕故接生宴東蒙

玄元章第二十七

玄元上一魂魄鍊一之爲物巨卒見須得至
真乃顧盼至忘死氣諸穢賤六神合集虛中
宴結珠固精養神根玉篋金籙常完堅閉口
屈舌食胎津使我遂鍊獲飛僊

僊人章第二十八

僊人道士非有神精精累氣以爲真黃童妙
音難可聞玉書絳簡赤丹文字曰真人巾金
巾負甲持符開七門火兵符圖備靈關前昂
後卑高下陳執劍百丈舞錦蟠十絕盤空扇

紛紜大鈴冠霄際落煙安在黃闕兩眉間此
非枝葉實是根

紫清章第二十九

紫清上皇大道君太玄太和俠侍端化生萬
物使我僊飛昇十天駕玉輪晝夜七日思勿
眠子能修之可長存積功成鍊非自然是由
精誠亦守一內守堅固真之真虛中恬淡自
致神

百穀章第三十

百穀之實土地精五味外美邪魔腥臭亂神
明胎氣零那從反老得還嬰三魂忽忽魄糜
傾何不食氣太和精故能不死入黃寧

心典章第三十一

心典一體五臟王動靜念之道德行清潔善
氣自明光坐起吾俱共棟梁晝日曜景暮閉
藏通達華精調陰陽

經歷章第三十二

經歷六合隱卯酉兩腎之神主延壽轉降適
斗藏初九知雄守雌可無老知白守黑見坐
守

肝氣章第三十三

肝氣鬱勃清且長羅列六腑生三光心精意專內不傾上合三焦下玉漿玄液雲行去臭香治蕩髮齒鍊五方取津玄膺入明堂下溉喉嚨神明通坐待華蓋遊貴京飄飄三清席清涼五色雲氣紛青葱閉目內眇自相望使諸心神還自崇七玄英華開命門通利天道存玄根百二十年猶可還過此守道誠甚難唯待九轉八瓊丹要復精思存七元日月之華救老殘肝氣周流終無端。

肺之章第三十四

肺之為氣三焦起視聽幽冥候童子調理五華精髮齒三十六咽玉池裏開通百脉血液始顏色生光金玉澤齒堅髮黑不知白存此真神勿落落當憶紫宮有座席眾神合會轉相索。

隱藏章第二十五

隱藏羽蓋看天舍朝拜太陽樂相呼明神八威正辟邪脾神還歸是胃家耽養靈根不復枯閉塞命門保玉都萬神方昨壽有餘是謂

脾建在中宮五臟六腑神明主上合天門入明堂守雌存雄頂三光外方內圓神在中通利血脉五臟豐骨青筋赤髓如霜脾救七竅去不祥日月列布設陰陽兩神相會化玉英

淡然無味天人糧子丹進饌看正黃乃曰琅膏及玉霜太上隱環八素瓊溉益八液腎受精伏於太陰見我形揚風三玄出始青恍惚之間至清靈戲於懸臺見赤生逸域與真養華榮內盼沈默鍊五形三氣徘徊得神明隱龍遁芝雲琅英可以充飢使萬靈上蓋玄玄下虎章。

沐浴章第三十六

沐浴咸潔素肥薰入室東向誦玉篇約得萬偏義自鮮散髮無欲以長存五味皆至正氣還夷心寂悶勿煩寃過數已畢體神精黃華玉女告子清真人既至使六丁即授隱芝大洞經十讀四拜朝太上先謁太帝後北向黃庭內經玉書暢授者曰師受者盟雲錦鳳羅金鈕鑲以代割髮肌膚金臂手登山軟液丹金書玉景乃可宣傳得審授告三官勿令七

祖受冥惠太上微言致神僊不死之道此其文

太上黃庭內景玉經

太上黃庭外景玉經上

太上閑居作七言解說身形及諸神上有黃庭下關元後有幽闕前命門呼吸廬間入丹田玉池清水灌靈根審能修之可長存黃庭中人衣朱衣關門壯籥合兩扉幽闕俠之高魏魏丹田之中精炁微玉池清水上生肥靈根堅固老不衰中池有士衣赤衣田下三寸神所居中外相距重閉之神廬之中當修理玄膺炁管受精符急固子精以自持宅中有士常衣絳子能見之可不病橫立長尺約其

志遊神三奇靈閑暇無事心太平常存玉房神明達時念太倉不飢渴役使六丁神女謁閑子精路可長活正室之中神所居洗身自理無敢汚歷觀五臟視節度六腑修治潔如素虛無自然道之故物有自然事不煩垂拱無為身體安虛無之居在憚間寂寞曠然口不言恬淡無欲遊德園清淨香潔玉女存修德明達道之門

太上黃庭外景玉經上

太上黃庭外景玉經中

作道優游深獨居扶養性命守虛無恬淡無為向思慮羽翼已成正扶疎長生久視乃飛去五行參差同根節三五合炁要本一誰與共之斗日月抱玉懷珠和子室子能知之萬事畢子自有之持勿失即得不死入金室出日八月是吾道天七地二迴相守昇降進退合乃久玉石珞珞是吾寶子自有之何不守心曉根基養華采服天順地合藏精九原之山何亭亭中住真人可使今內陽三神可長生七日之五迴相合崑崙之山不迷誤蔽以紫宮丹城樓俠以日月如連珠萬歲昭昭非有期外本三陽神自來內養三陰可長生魂欲上天魄入泉還魂返魄道自然

太上黃庭外景玉經中

太上黃庭外景玉經下

璇璣懸珠環無端。迅北金爲常。完堅載地懸。天周乾坤象。以四時。赤如丹。前仰後卑。各異門。送以還丹。與玄泉。象龜引炁。至靈根。中有真人。巾金巾。負甲持符。開七門。此非枝葉實。是根。晝夜思之。可長存。傳人道。士非有神。積精所致。爲專。年人皆食穀。與五味。獨食太和。陰陽炁。故能不死。天相既試。說五臟。各有方。心爲國主。五臟主意。中動靜。炁得行道。自持我神明。光晝日照。昭夜自守。渴自飲。漿飢得飽。經歷六腑。藏卵酉。轉陽之陰。藏於九常。能行之。不知老。肝之爲炁。修而長。羅列五臟。生三光。上合三焦。道飲漿。精候天地。長生道。我神魂魄。在中央。精液流泉。去鼻香。立於玄膺。含明堂。通我華精。調陰陽。伏於玄門。候天道。
八十三

利天道。藏靈根。陰陽列布。如流星。肝氣似環。終無端。肺之爲炁。三焦起伏。於天門。候故道。清液醴泉。通六府。隨鼻上下。開二耳。窺視天地。存童子。調和精華。理髮齒。顏色光澤。老不白。下于喉。嚨何落落。諸神皆會。相求索。下入絳宮。紫華色。隱藏華蓋。通神虛。專守心神。傳相呼。觀我諸神。辟除邪。脾神還歸。依大家。藏養靈根。不復枯。至於胃。管通虛。無閉塞。命門似玉都。壽傳萬歲。將有餘。脾中之神。遊中宮。朝會五神。和三光。上合天。炁及明堂。通利六府。調五行。金木水火土。爲王。通利血脈。汗爲漿。二神相得。下玉英。上稟元氣。年益長。循護七竅。去不祥。日月列布。張陰陽。伏於太陰。成其形。五臟之主。腎爲精。出入二炁。入黃庭。呼吸虛無。見吾形。強我筋骨。血脈成。恍惚不見。過清靈。坐於虛。下觀小童。旦夕存在。神明光出於無門。入無戶。恬淡無欲。養華根。服食玄炁。可遂生。還返七門。飲太淵。通我喉嚨。過清靈。問於仙道。與奇功。服食靈芝。與玉英。頭戴白素足。丹田沐浴。華池灌靈根。三府相得。開

命門五味。皆至善。炁還大道。蕩蕩心。勿煩被。髮行之。可長存。吾言畢矣。勿妄傳。

太上黃庭外景玉經下

八十三

十四

靈寶天尊說祿庫受生經

人畜

爾時靈寶天尊在淨羅世界淨明國土善積山中七寶樹下與無量飛天神王及諸仙聖衆演說妙法乃放九色彩光徧照十方一切衆生善惡果報或貴或賤或富或貧大衆懷疑此等衆生有如上果未敢議問時有光妙音真人從座而起嚴整衣冠叩頭長跪上白天尊曰通見威光照耀十方或男或女富貴貧賤苦樂不同此等衆生有何異因伏願聖慈憫以所請賜以訣言

○天尊曰善哉善哉汝當復坐靜默安神一心諦聽

天尊言十方一切衆生生命屬天尊身繫地府管得人身之日曾於地府所屬冥司借貸祿庫受生錢財方以祿簿注財爲人富貴其有貧賤者爲從劫至劫負欠冥司奪祿在世窮乏皆冥官所尅陽祿填於陰債是使貴賤貧富苦樂不同汝當省知

天尊言吾昔賜寶樹一株付與鄧都北帝植於冥京明察衆生善惡果報以聖箭三隻神

弓三張給與得生人身男女將此弓箭望寶樹而射射得東枝得官壽長命身射得南枝得延年康健身射得西枝得富貴榮華身射得北枝得貧窮困苦身如上之寶樹若乃是業鏡果報之緣若在生欽敬三寶方便布施設齋誦經行種種善緣及依吾教誦念此經燒還祿庫受生錢者得三生爲男子身若復死亡不經地獄再復人身鄧都若以弓箭施爲寶樹我以神力扶持無使中於北枝再得榮貴之身若復有人在世慳貪惡癡不信經法負債不還更相嫉妬不念善因惟惡是修致使罪簿注名天曹減算及負欠冥司受生錢財在世不還更相誑妄死入地獄爲劫方生畜獸身輪轉果報若復得爲人身再以神弓聖箭於寶樹自然果報射中北枝既得爲人貧窮下賤及不信善緣之報真人又白

天尊言未審人之生身從何所屬冥曹庫借過受生錢在世貢還何庫分雖蒙開悟未測此因幸望慈尊爲衆分別

天尊曰人之生身便有十二年直官分各有

曹典主掌祿庫我今爲汝顯說十二官曹姓屬

子生人欠錢一萬三千貫屬第一庫曹官姓李丑生人欠錢二十八萬貫屬第二庫曹官姓田寅生人欠錢八萬貫屬第三庫曹官姓雷卯生人欠錢八萬貫屬第四庫曹官姓柳辰生人欠錢五萬貫屬第五庫曹官姓袁巳生人欠錢七萬貫屬第六庫曹官姓紀午生人欠錢二十六萬貫屬第七庫曹官姓許未生人欠錢十萬貫屬第八庫曹官姓朱申生人欠錢四萬貫屬第九庫曹官姓車酉生人欠錢五萬貫屬第十庫曹官姓鄭戌生人欠錢二萬五千貫屬第十一庫曹官姓成亥生人欠錢九千貫屬第十二庫曹官姓亢

天尊又言前十二官庫官各主局生人欠受生錢簿及得爲人身曹許所屬元辰錢財乞註受生祿庫之簿合同冥司之籍真人曰此之元辰亦未審於名位錢數更望慈憫盡其所說天尊含笑而言曰善哉汝當盡力爲於衆生吾當再爲汝開演十二所屬元辰姓名

錢數

子生人本命元辰劉文真當得人身許錢七千貫丑生人本命元辰孟候當得人身許錢九千貫寅生人本命元辰鍾元當得人身許錢六千貫卯生人本命元辰郝元當得人身許錢一萬貫辰生人本命元辰李文亮當得人身許錢六千四百貫巳生人本命元辰曹交當得人身許錢一千貫午生人本命元辰張已當得人身許錢九千貫未生人本命元辰孫恭當得人身許錢四千貫申生人本命元辰杜準當得人身許錢八千貫酉生人本命元辰田交佑當得人身許錢五千貫戌生人本命元辰崔漸進當得人身許錢五千貫亥生人本命元辰王爽當得人身許錢六千貫爾持

天尊告諸四衆若有善信男女意樂經法布施貨財依此經典建立道場嚴備香花燈燭莊嚴供養三寶大道諸仙大聖六時行道十徧轉經修齋設醮準備所欠受生錢數及許元辰之財一一明具合同疏牒燒還本屬庫

分者即得見世獲福榮貴果報來生永無苦難若有衆生不信前緣返生惡業者一墮九泉若不具陳故有生死苦樂之報汝等大衆各自省知是時光妙音真人及諸仙衆鄧都北帝閻羅冥官祿庫曹典本屬元辰在會大衆一切稽首瞻仰尊顏頂禮而退於是光妙音真人傳教世間濟度存亡讚歎敷揚信受奉行

靈寶天尊說祿庫受生經

太上靈寶元陽妙經卷之一

皇二

聖行品上

爾時元陽真人光妙音聞天尊在玄都寶殿紫微上宮妙樂國土元陽世界與諸天大聖飛天神王演說大乘經教為諸神仙眷屬開闡玄義微妙經典神通變現不可思議妙音既聞斯事心生歡悅即率門徒弟子八萬四千人我今聞有聖尊威德堂堂不可譬喻汝等可辦名香寶幡蓋輿輦音聲伎樂供養之具剋明日中尋訪明師爾時弟子既聞斯語已各各驚疑歎未曾有即辦行裝珊瑚琥珀明珠寶幢香華馥郁盡世珍奇侍從徒衆乘雲駕龍浮空而去既到天尊之所妙音眷屬心懷戰懼動止不寧時衆之中有一真人名曰賢智高聲唱言我今弟子整頓衣冠明潔視聽以百和名香立空之案幡幢寶蓋音聲伎樂備衛左右羅列虛空賢智身被正帔手執香爐低眉歛膝下氣和聲叩頭稽首前進作禮諮審靈顏問訊尊體開揚法教德無損和賢智宿因有幸過忝

上真輪轉因緣遭遇運慈愍之歡實為無量然猶宿滯尚有深疑沈迷既久無緣曉悟今聞

天尊發大鴻恩開慈愍路為諸百姓子男凡夫衆生作大舟航作大梯磴作大明師作大道主賢智敢藉威光憑斯妙力輒有諮問心所疑滯伏願大師憐愍凡愚降垂辯答

天尊默然良久五色開顏三光明曜七十二相八十種好徧明十方恒河世界發大法音喧動國土善哉善哉子之所問要乎深矣隨汝所問當為解析賢智上白

天尊言既蒙開示曉悟衆生未審修何行願可登道果

天尊答曰若修自然妙道當須除身六種弊行賢智真人白言以何因緣名為六種弊行天尊答言一者慳貪二者破戒三者嗔恚四者懈怠五者散亂六者愚癡真人修自然道者當須除此六種弊行其道可獲復次五種觀身何等為五一者觀身不淨二者觀身苦惱三者觀身无常四者觀諸法无我五者觀

身空寂一无所有善男子真人道士常當修習是五種觀行復有一行是天尊所謂元陽上品妙經云何真人所修聖行真人道士若從天尊得聞如是大聖經已心生敬信敬信法已應行如是思惟有無上道有大正法有元陽經典我今思惟常為愛樂求至要故捨離所愛妻子父母兄弟六親眷屬所居住宅金銀珍寶僮僕奴婢之屬復作是念居家迫近猶如繫縛一切罪根由之而生出家閑靜猶如虛空一切善因緣之利益若在居家不得讀誦元陽經典修於智慧我今應當捨離恩愛出家學道復作是念我今定當割愛修學无上正真自然之果真人道士如是欲出家時有諸天魔鬼生於撓惱即當與我興大鬭爭善男子如是真人云何復與人鬭爭爾時真人道士即至元陽官中若見

法戒猶如赤子譬如有人帶持浮鉢欲濟巨海爾時海中有一海神即從此人乞取浮鉢其人聞已即作念言我今乞汝必定沉溺答言海神汝寧殺我浮鉢必不可得海神復言若不全與我者可乞一半是人猶故不肯與之海神復言汝若不能與我半者可三分之一其人又復不肯海神又言汝可與我如手許大其人又復不許海神又言我今飢寒困苦願當濟我如絲毫許又復不肯復言汝今所索計自不多然我今日方涉海水不知邊際去岸遠近云何與汝我今何緣出海之難脫喪身命悔將何及善男子真人道士守持法戒亦復如是如彼涉海愛惜浮鉢真人如是守持法戒時常有煩惱諸惡海神語其人曰汝當信我終不欺誑但破五禁護持法戒以是因緣令汝安穩得入元陽仙品爾時應作是言我今寧持如是禁戒墮玄沙地獄終不毀戒犯法而生天上煩惱海神復作是言汝若不能破五禁法者可食人肉以是因緣令汝安穩得入元陽仙品真人亦不復從其

誨海神又言汝若不能食人肉者亦可犯偷劫罪以是因緣令汝安穩得入元陽仙品真人爾時亦復不從海神復言汝若不能犯偷劫罪可犯五逆罪以是因緣可得安穩入於元陽仙品真人爾時又復不從海神復言汝若不能犯五逆罪者可入淫室以是因緣令汝安穩得入元陽仙品真人爾時亦復不從海神又言汝不犯淫室者可破四盟戒以是因緣可得安穩入於元陽仙品真人爾時心自念言我今若犯四盟戒律不首悔者則不能度生死岸而得元陽仙品真人道士於是微小諸戒律守護堅固心如金剛真人道士持百八十戒智惠上品戒供養尊重等無差異真人若能如是堅持則爲具足真道禁戒迴向元始正真之道爾時賢智真人復有五錄戒一者不殺生二者不盜人物三者不邪淫人婦女四者不噴噉妄語五者不飲酒食肉真人若修五錄戒者終不爲惡即入无爲真常之樂復次善男子有二種戒一者修心清淨戒二者息世機嫌戒修心清淨戒者謂

行無點污志不犯非息世機嫌戒者不作販賣財寶以求福樂不假他人形勢以顯己身不求世間肉味以潤飢虛不樂華麗衣物以爲服用不樂高廣屋舍牀席屏幃錦繡等物如是之事並能除斷善男子名曰息世機嫌戒真人道士堅持如是禁戒等无差異善男子真人道士受持如是法戒以發是願寧以此身投於猛火深坑終不破犯元始天尊所制法戒與諸凡夫衆生而行不淨復次善男子真人道士又發願言寧以熱鐵燒身不敢破法而受信心賢者衣服復次善男子真人道士又發願言寧以此口吞熱鐵汁終不敢破法而食信心賢者飲食復次善男子真人道士又發願言寧以此身卧熱鐵牀終不敢以破法而受信心賢者牀卧褥具復次善男子真人道士又發願言寧以此身受於重病終不敢破法而受信心賢者醫藥復次善男子真人道士又發願言寧以此身投沸鐵鑊中終不敢破法而受信心賢者房舍屋宅復次善男子真人道士又發願言

寧以鐵棒碎我此身不以破法而受信心賢者恭敬禮拜復次善男子真人道士復作願言寧以鐵鈎挑我眼瞳不以邪心翫他好色復次善男子真人道士又發願言寧以鐵錐刺耳不以染心聽好音聲復次善男子真人道士復發願言寧以利刀割去其鼻不以染心貪諸香氣復次善男子真人道士復發願言寧以利刀割去舌根終不染心貪著諸味復次善男子真人道士復發願言寧以利斧斬身終不染心貪諸色觸何以故以是因緣願令一切衆生守持法戒得清淨法善男子真人道士修治如是清淨法時即得住不動之地云何名不動之地真人住是不動之地不動不墮不退不散善男子譬如玉京山猛風不能搖動真人道士住是地中亦復如是不爲色聲滋味所動不爲邪見淫風所散善男女不動傾者不爲貪慾嗔恚所撓又不墮者不墮三惡又不退者不退法還家又不散者不爲退逆元陽經之所散壞復次真人道士亦復不爲諸煩惱魔王所動不爲邪鬼所

傾乃至坐於道場窰林樹下雖有魔王不能令其退无上正真大道亦復不為死魔所撓是名真人修習真行善男子云何名為真行真行者天尊及諸仙之所行故故名真行以何因緣故名天尊真人為聖人耶如是等人有聖法故常觀諸法性寂靜故以因緣故名為真人有聖法故故名真人有定惠故故名真人有七真財所謂信法慚愧多聞智慧捨離故故名真人以是因緣復名真行復次善男子真人道士真行者觀察是身不淨因緣和合共成此身云何而得坐起行住屈伸俯仰視瞬喘息悲泣喜笑此中無主誰使之爾作是問已座中諸仙忽然不見復作是念或識是我故使諸聖人不為我復觀此識次第生滅猶如流水亦復非我又作是念若識非有出息入息或能是我又作是念出息入息直是風性而風性乃是四大四大之中何者是真地性非真水火風性亦復非真又作是念此身一切悉無有真唯有心風因緣和合變現種種所作事業譬如呪術所作亦如鳴

鍾隨意出聲是故此身如是不淨因緣混合共成其體當於何處而生貪欲若被罵辱復於何處而生瞋怒如我此身百關不淨六根臭穢何處堪當罵辱者若聞其罵即便思惟以何音響而見罵耶一一音響不能見罵若一不能眾亦如是以何義故不應生瞋若他來觸亦應思惟如是觸者因何而生復作是念因心因作反以我身故名為觸我今何緣橫瞋於他乃是我身自作其罪以為我身受於五陰故譬如因的則有弓箭我身亦爾有身有觸我若不忍心則迷散心若迷亂則失正念若失正念則不能觀真不真義若不能觀真不真義則行惡事惡事因緣則墮三塗十惡地獄真人爾時作如是觀已得四種念處得四種念處已則可住於堪忍之地具人道士住是地已則能堪忍貪欲嗔恚亦應堪忍寒熱飢渴種種惡觸種種疾病惡口罵詈鞭杖楚撻身心苦惱一切能忍是以為住堪忍之地元陽真人賢智白

戒時頗有因緣得破法罪善男子真人未得住不動之地有因緣故可得破法真人言唯然天尊何者因是耶天尊告真人賢智若有真人道士知以破法因緣則能令人受持愛樂元陽經典又能令其受持讀誦文句通利書寫經卷廣為人說志不退轉无上正真自然大道為如是故故得破法真人爾時應作是念我寧一切墮於玄沙地獄受於苦惱要令是不退轉於無上正真自然大道爾時元陽真人賢富子林等白

天尊言若有真人攝取守持如是之人令不退轉自然之心為是毀法若墮玄沙地獄無有是處爾時

天尊讚賢智真人善哉善哉如汝所說我念過去於閻浮地作大國王名曰受見愛念敬重元陽經典其心純善無有穢惡嫉妬慳貪口常宣說柔軟之語心常攝護貧窮孤獨布施精進無有休息時世無聖人我於爾時愛樂元陽上品大乘經典九年之中事道士為

師供給所須過於九年施安已訖即作是言
師等今應發無上正真自然法心道士言曰
大王自然之性是无所有元陽經教亦復如
是大王云何乃欲令人同於虛空善男子我
於爾時心樂元陽妙經恭敬讀誦乃有如是
无量功德復次善男子修聖行者當知有漏
之法有二種事有因有果无漏法者亦應有
二種有因有果有漏果者是則名苦有漏因
者則名為集无漏果者則名為滅无漏因者
是名為法復次善男子具人道士有八種苦
相所謂生老病死愛憎離別能生如是八苦
法者是名為集無有如是八法之處是名為
滅善男子生者出相所謂五種一者初出二
者至終三者增長四者出胎五者種類生云
何為老老有二種一者念念老二者終身老
復有二種一者增長老二者滅壞老是名為
老以何因緣名為病謂身中毒蛇互不謂
適以是義故復有二種一者體病二者意病
體病復有五等云何為五一者因水為病二
者因風為病三者因熱為病四者雜惡為病

五者外物為客病以是因緣客病之中復有
四種一者非意墮落二者志誤墮落三者器
仗瓦石四者魘魘邪鬼所著心病之中亦有
四種一者邪心踊躍二者心生恐怖三者心
有憂愁四者志性愚癡復次善男子具人道
士心性之病復有三種以何因緣名為三
一者身心作罪受於業報二者不得遠離諸
惡對罪三者四時代謝如是因緣名為分別
病諸病名字心意迷亂是名為病云何為死
死者捨離所受之身捨離受身有二種別一
者壽命盡死二者攀緣死命盡死者復有二
種事一者壽命盡非是福盡二者福盡非是
命盡攀緣死者復有二種義云何二種義一
者非分自害死二者橫為他人害死又有三
種死一者放逸死二者破法死三者壞命死
云何名為放逸死若有毀謗元陽上品大乘
經典是名為放逸死云何名為破法死毀謗
過去未來現在諸聖人所制法律是名破法
死云何名為壞命死捨棄五陰是名壞命死
如是等死名曰大苦何等名曰愛別離苦所

愛之物破壞離散如是愛別有二種別云何
名為二種一者人中陰懷二者天中陰懷如
是人天所受陰懷分別計數有无量種是名
愛苦云何名為怨憎會苦所集聚其有三種
一者地獄二者餓鬼三者畜生如是三趣分
別多少有无量數如是之名為怨憎會苦云
何名為求不得苦其有二種一者有所冀望
求之難得二者多用氣力不獲福報如是之
事名求不得苦云何名為五陰苦五陰苦者
生老病死愛憎別離是煩惱根本善男子當
知八苦之中為身大患若能挫銳閉情專心
飲意修行供養元陽上品大乘經典可得免
離如是八種煩惱八種憂患之苦爾時
元始天尊告賢智真人曰一切凡夫眾生顛
倒覆心貪著生相厭離老病我今不爾觀於
初生已見病患真人如有女人名曰善信入
於蒲隣世界長者之舍是女端正顏貌美麗
世間錦繡紋繒服玩莊嚴其身長者見已即
便問言汝今名字云何從何而來女人答曰
我即是今世界中功德大富主長者問曰汝

今所至之處為何利益女言我所至處能生種種甘果飲食之味金銀銅鐵錦繡紋繒牛馬車乘奴婢僮僕長者聞之心生歡喜我乘昔因緣逢善知識為大利益即便恭敬禮拜燒香散華至心稽首願能慈愍爾時門外復有女人形容醜陋衣裳臭穢長者見已問言汝自何等女人答言我名黑業長者曰以何因故名為黑業女人答曰我所經遊能令其家財物衰耗長者聞已即持利刀赴逐令去如有留滯即害汝命黑業答言汝莫愚癡元有善心長者問言何故名我愚癡元有善心黑業答曰汝家中女人名曰善信即是我姊常共經遊汝若赴我姊亦須逐去長者還入問善信門外女人是汝妹不善信答言實是我妹我等姊妹處處經遊未曾相離在所履歷我常為善彼常為惡我作善業彼為惡業長者既能愛我亦復憐彼長者答言若有是事我皆不用即便急去勿復有遲是時二女便去還其所住爾時長者心生喜悅歡樂無量是時二女相隨便至貧家貧人見已心

生踊躍即請之言從今已去願二女常在我舍女人答言我等先已為他驅逐汝今何緣俱留我住貧人答曰汝今念我我亦念汝是故俱請令住我舍賢智真人等亦復如是不願生天以生富有老病死故是以俱棄曾元愛心凡夫衆生不知老病死是故心常貪愛生死二業復次真人道士如有妙智童子為飢所逼見糞穢中有諸果子即便取之有賢者見之即便呵責汝妙智童子種性清虛何故取此糞穢之果妙智聞之心直慙愧即答之言我實不食為欲洗淨還棄捨之賢者語言汝大愚闇若還棄者更不須取善男子真人道士亦復如是於此生中不取不捨如彼賢者呵責妙智童子凡夫衆生欣生惡死如彼妙智童子取果還棄復次賢智真人譬如有人於四達道中器盛美食而欲賣之有人遠行飢乏見其美食即復問言此是何物食主答言此食香美若食此食能除飢渴得見諸仙唯有一病所謂命終是人聞已即作是念我今不用仙亦不用死即作是言食此食

已若運命終盡汝今何為賣之食主答言有患之人終不肯買唯有愚癡不知是事多與我值貪食其食真人道士亦復如是不願生天但免煩惱何以故以其不免諸苦惱故凡夫衆生隨其生處貪受諸觸以其不見老病死故復次善男子猶如毒樹之根汁能殺人真人道士於受生處所受五賊陰身亦復如是一切能殺復次善男女猶如糞穢多少俱臭真人道士生亦如是設受千年下至十歲俱亦受苦復次賢智真人猶如嶮處有草覆於岸邊多有甘露若有食者壽年千歲永除諸病安穩快樂凡夫衆生貪其味故不知其下有深坑即前欲取不覺墮坑遂殞其命賢者知已捨棄遠離真人道士亦復如是尚不欲受諸天妙食況在人中凡夫衆生乃於地獄吞噉鐵汁況復人天妙饌而能不食真人道士以如是譬及諸无量無邊當知生為大苦真人道士是名聖人住於元陽世界讀誦大乘微妙經典觀於生苦真人道士云何聖人於元陽世界觀於老苦者能為嗽逆上氣

能懷勇力憶念進持盛年歡樂自恣及斯老苦皮肉消瘦形容與穢爲人所輕真入道士譬如池有蓮華光色鮮榮芬芳可愛忽值天雹一時零落真入道士老亦如是悉能破壞盛壯好色復次賢智真人譬如國有忠臣善知兵法有他國拒捍不從威令王遣忠臣往彼伐之即便擒縛將來詣王老亦如是擒縛壯色將付於王復次善男子譬如折輪无所復用老苦將至亦復如是復次善男子如大富家豐諸珍寶衣服卧具怨賊入家劫奪家資悉皆空盡善男子盛年壯色亦復如是常爲老賊之所劫奪復次善男子猶如窮人貪諸衣服雖復冀望而不能得善男子老亦如是雖有貪心欲求富樂而不能得復次善男子猶如陸龜心念於水真入道士老亦如是

壯色亦復如是既爲老賊侵壓無有滋味出家讀誦精進之味復次善男子猶如滿月盛光晝則不明善男子老亦如是少則端正刑貌鮮潔老至憔悴顏容枯瘦復次善男子譬如帝王以正法治國理人無曲時爲敵國之所侵奪流離波迸遠入他境他境人民見而怒之俱作是言大王往昔正法治國不濫百姓如何一朝波迸流離乃至於此善男子人亦如是既爲衰老所毀常念少時所爲事業復次善男子譬如燈炷唯藉於油油既消盡勢不久停真入道士老亦如是唯藉油明油既消盡衰老之炷焉得久明復次真入道士猶如枯池不能潤益人及非人飛禽走獸善男子老亦如是爲老所枯不能利益生所作業復次真入道士猶如河岸臨險之樹若遇驚颺必當顛墮善男子老亦如是臨老險岸飛颺一生勢不得住復次真入道士如車無輪不堪運載善男子老亦如是不能請受自然之法復次真入道士猶如嬰兒爲人所賤善男子老亦如是恒爲萬物輕毀真入道

士以是因緣譬喻及諸无量无边不可思議如是老苦實爲大病善男子是名真入道士修行元陽上品大乘經典觀於老苦爾時賢智真人云何善男子修行元陽上品大乘妙典觀於痛苦所謂諸病能消滅一切樂事譬如雷雨傷毀苗稼損於穀實復次真入道士如人有怨意恒愁惱而常恐怖善男子一切衆生凡夫之人亦復如是常憂痛苦心懷愁惱復次真入道士譬如有人形貌端正爲王妃后欲心所念遣信逼呼與其交通時王知之挑其一眼截其一耳斷其一手刖其一足是人爾時形儀改異人所輕賤善男子病亦如是先雖端正六根具足既爲病苦之所纏逼則爲衆人心所輕賤復次真入道士譬如芭蕉及驢有子爲死所逼善男子病亦如有病則死復次真入道士猶如風輪王主兵大臣恒在前導王後隨行亦如四種畜生王商主在前行亦如是諸衆悉隨無捨離者善男子死風輪王亦復如是常有病臣不相棄離四種商主亦復如是常爲死衆之所繫逐

真人道士病因緣者所謂苦惱愁怖憂恐身心或為怨賊之所惱害破壞浮瓠發撒梯磴亦能欺奪正念根本復能毀美貌怒色能為身心焦損實體如是等喻當知病苦是為大賊善男子是名真人道士能行元陽大乘微妙經典觀於病苦爾時賢智真人云何善男子修行讀誦元陽上品大乘經典觀於死苦所謂死若能消滅故真人道士如劫火起能燒一切善男子死火亦爾能燒一切唯除真人道士住於元陽世界因天尊力勢不及故復次真人道士如水災起一切漂溺唯除三仙力不至故善男子死水亦復如是漂溺一切唯除真人住於元陽國土大乘世界復次真人道士如風災起能搖動一切諸物悉令消壞唯除四仙力不至故善男子死風既至能吹一切所有唯除真人道士住於元陽國土大乘世界賢智真人白天尊言彼四仙力以何因緣火不能銷水不能溺風不能搖天尊告賢智真人曰四仙力者是諸過患一切无故善男子初仙過患內有觀察外有火災

二仙過患內有歡喜外有水災三仙過患內有喘息外有風災善男子彼四仙者內外過患諸漏悉无是故諸災不能及之善男子真人道士亦復如是安住元陽國土大乘世界內外各過患皆却盡是故死至不能及之復次真人道士如金翼之鳥能食能消一切禽魚金銀等物唯除金剛不能吞噉真人道士死金翼鳥亦復如是能食噉諸眾生唯不能消住元陽國土大乘世界真人道士復次賢智真人猶如嶮岸所有樹木洪水暴長悉隨漂溺流入大海唯除楊樹以其軟故善男子是諸眾生亦復如是悉皆沿流入於死海唯除真人道士住於元陽國土大乘世界復次賢智真人猶如天丁力士能摧伏一切魔鬼唯除大風何以故以无礙故善男子死天丁力士亦復如是悉能摧伏凡夫眾生唯除真人道士住元陽國土大乘世界以何因緣以无礙故復次賢智真人有人於怨憎中妄作親善恒相隨從如響從聲伺候其便而欲殺之其怨謹守堅固自防故使怨人不能得害

善男子死怨亦爾伺候凡夫一切眾生而欲殺之唯不能殺住元陽國土大乘世界真人道士何以故如是真人不遊放逸故復次賢智真人猶如卒降暴雨破壞山林樹木土石沙礫一切諸物唯不能毀壞金剛之寶善男子金剛死亦復如是悉能消滅凡夫眾生唯除金剛真人道士住於元陽國土大乘世界復次賢智真人如金翼鳥能噉龍魚不能噉三洞法師善男子死金翼鳥亦復如是能食無量眾生一切含識唯除真人道士住三洞者何謂三洞空无之相復次賢智真人有如毒蛇放毒螫人雖有良呪世之草藥无如之何唯有聖人甘露妙藥能消其毒善男子死毒所害亦復如是一切醫藥无奈之何唯除真人住於元陽國土大乘世界復次賢智真人猶如有人為官所嗔若能卑辭遜謝低言軟語償於珍寶便可免脫善男子死官所逼其事不爾雖以軟語珍寶償之死不得脫善男子夫死者於險難處無有糧食去人懸遠而無伴侶心懷煩惱不知何處深邃幽闇無

有光明入無門戶而有處所雖有楚痛非可療治為無遮遏往不復脫无所毀壞見者愁憂非是惡色令人恐怖敷在體上不可覺知賢智真人如是譬喻當知是死真為大苦賢智是名真人道士修行元陽上品大乘經典觀於死苦爾時賢智真人云何真人道士修於元陽上品大乘經典愛別離苦能為一切凡夫衆苦根本以是因緣則生憂苦以憂苦故則令衆生生於衰老恩愛別離苦所謂壽命終盡善男子以別離故能生種種諸苦能生種種微細煩惱今當為汝分別一一顯說。善男子過去之世人壽長遠无量劫時有王名曰受見其王爾時身為太子及登王位壽四萬歲時王頂上生一肉髻其髻柔軟如綿細軟漸漸增長不以爲患滿一年中肉髻自開生一童子形貌端正世界罕雙色相妍華人中獨步父王喜悅字曰莊嚴時受見王因以國事委付莊嚴棄捨國內珍寶妻子眷屬入妙樂之山蒲隣世界修學元陽上品大乘經典滿一千歲爾時莊嚴於一月間處在高

臺沐浴冠帶受齋即於東方大福堂鄉納善世界有金輪寶車其輪轂軸盡皆具足不由規矩自然華麗而來應之莊嚴大王即作是念我往劫時曾聞六通聖人說若普惠王於一月間處在高臺沐浴受齋若有金輪寶車轂軸具足不由規矩自然華麗而來應者應知是王當得作人天聖帝復作是念我今當試即以左擎輪寶右執香鑪長跪禮拜而發誓願如是輪寶若實不虛應如過去人天聖王所行道去作是誓已如是輪寶飛昇虛空徧滿十方還來住在莊嚴左手爾時莊嚴心生喜悅歡樂屏營復作是言我今定作人天聖王其後不久復有金寶狀貌端嚴如蓮華葉七枝柱地莊嚴見已復作是念我往昔時曾聞六通聖人說若人天聖王於一月間處在高臺沐浴受齋若有赤金寶象狀貌端嚴如蓮華葉七枝柱地而來應者當知是王即是人天聖帝復作是念我今當試左擎香鑪右膝著地而發誓言是金寶象若實不虛應如過去人天聖王所行道去作是誓已金

寶象從旦至夕周徧十方盡大海際還住本處爾時莊嚴王心生歡樂喜躍無量復作是言我今定是人天聖王其後不久次有白銀寶馬狀貌端嚴鬣尾金色莊嚴見已復作是念我往昔時曾聞六通聖人說若人天聖王於一月間處在高臺沐浴受齋若有白銀寶馬其色華麗鬣尾金色而來應者當知是王即是聖帝復作是念我今當試即執香鑪長跪禮拜而發誓願如是寶馬若實不虛應如過去人天聖王所行道去作是願已寶馬馳驟從旦至暮周徧十方盡大海際還住本處爾時莊嚴心生踊躍歡喜无量復作是言我今定是人天聖王其後不久復有妍麗女寶容儀琬琰姿貌第一身上毛孔出諸名香口氣香潔其眼能視見十由旬耳聞鼻嗅心識聰智有大智慧於諸衆生常有軟語是女以手指王衣時即知未來安樂休否亦知王心所緣之處爾時莊嚴復作是念若有女人能知王心即是女人之寶其後不久於王宮內自然而有珍寶有大明珠能於黑闇之中照

一世界若有魔王邪鬼來繞世界凡夫衆生此珠照了魔不能近爾時莊嚴復作是念若人天聖王得是寶珠必爲聖帝其後不久當有賢臣主藏自然而出增益珍寶庫藏充滿无有少乏報得眼根力能徹視十方世界所有伏藏王所思求應念即來爾時莊嚴復欲試之即共乘船泛於大海語藏臣言我今隨汝入海心有所求欲得珍寶臣聞王言即以手挽海水時手指頭出諸寶藏以奉聖王而白王言大王有所求須隨王意說爾時莊嚴心大歡喜即作念言我今定是人天聖王其後不久有主兵智臣自然輔相勇健第一智慧无比善知術數妙解兵書若有不賓之國而能摧伏已摧伏者力能守護爾時莊嚴復作是念若人天聖王是臣守護當知之是聖王爾時莊嚴人天聖帝告諸大臣卿相當知此閻浮世界安穩福樂我今已有珍寶具足更無所之諸臣答曰東方大福堂世界猶未歸德大王親往教化彼國爾時莊嚴聖王即以七寶珍玩人物侍從而往彼國人民歡樂

悉皆歸化復告臣言我今國土安穩人民豐樂七寶充滿臣子具足更何所爲諸臣答言西方盛行世界猶未賓伏爾時莊嚴聖王復與七寶珍玩人物侍從而往彼國人民歡喜悉皆歸伏復告臣言我今國土安穩人民豐樂七寶充滿臣子具足復何所爲諸臣答言北方清淨世界猶未歸化爾時莊嚴聖王復與七寶珍玩人物侍從而往彼國人民歡喜悉皆歸伏復告臣言我今國土安穩人民豐樂七寶充滿臣子具足更何所爲諸臣答言南方棄賢世界猶未歸化爾時莊嚴聖王復與七寶珍玩人物侍從而往彼國人民歡喜悉皆歸伏復告臣言我今國土安穩人民豐樂七寶充滿臣子具足復何所爲諸臣答言三十二天壽命長遠安穩快樂彼天形容端嚴獨步所居卧具悉是珍寶自恃福樂未來歸化今當往詣令其賓伏爾時莊嚴聖王復與七寶珍玩人物侍從飛騰虛空上至三十三天世界見有一樹枝葉鬱茂果實威嚴聖王見已即問天主神寶天王此是何色之樹

神寶天王答言此名壽木諸天神仙四時節月常於其下歡娛愛樂又見雲色猶如紫氣復問神寶天王彼是何色答言是善福堂處諸天仙聖常集其中論人天之事於是神寶天王知莊嚴王有大威德即共昇善福堂分座而坐彼時二王形容相貌等无差異是時聖王即生念言我今退彼王位即住其中爲天王不真人道士爾時神寶天王受持讀誦元陽上品微妙經典剖析玄義皆悉通達以是讀誦受持分別爲他廣說因緣力故有大威德善男子是莊嚴王於神寶天王生諸惡心即便墮落還閻浮世界與所愛念遂乃分離生大苦惱忽遇惡病即便命終爾時元始天尊是人天聖王則我身是善男子當知如是愛別離苦極爲大患善男子真人尚憶過去如是等事愛別離苦何況真人住於元陽國土大乘世界而當不觀見在之世有別離苦善男子云何真人道士修行元陽上品大乘經典觀於怨憎會苦善男子是真人道士觀於天上人間地獄畜生餓鬼皆有如是怨

憎會苦猶如有人觀於牢獄禁繫枷鎖揣以爲憂苦真人道士亦復如是觀於六道一切衆生皆悉怨憎合會爲大苦惱復次善男子譬如有人常畏怨家捨棄父母妻子產業服具而速逃避善男子真人道士亦復如是怨懼生死具足修行尊六度行求於元上道果善男子是名真人道士修行元陽上品大乘經典觀於怨憎苦善男子云何真人修行元陽上品大乘經典觀於衆生求不得苦一切衆生盡求不得盡求者有二種義一者求善法不得二者求不善法未得苦惡法未離苦是則略說五陰盛苦善男子真人道士是名求不得苦爾時賢智真人白天尊言如尊所說五陰盛苦是義不然何以故如天尊往時告富子元若色苦者凡夫衆生不應求色若有求者則何名若如天尊告諸道士有受苦受樂受不苦不樂如天尊先爲諸道士女冠善男子說若有能修行善法則得受樂又如天尊說於善道中六染受樂眼好諸色是名爲樂耳好諸聲是名爲樂鼻好諸香是名爲

樂古好諸味是名爲樂身受細滑是名爲樂意好榮華是名爲樂六味好法皆悉受苦天尊即爲而說偈曰

持戒爲歡樂 身不受衆苦 誦詠元陽品 名入不死戶 如是怨憎會 聞經病自愈

念法愛淨歆 魔鬼不得腐 轉輪爲聖王 因緣作慈父 慎莫行惡心 有惡傾天主

若能懸衆生 以法爲梁柱 晝夜常恭敬 願去三官府 真人及道士 精心鳴法鼓

曉悟六道中 常與法爲伍 大乘是世界 天堂爲淨土 一切罪根盡 皆由我規矩

天尊說偈已如諸經中所說事相其義如是賢智真人等既聞斯義了然解悟稽首作禮辭退而去

太上靈寶元陽妙經卷之一

太上靈寶元陽妙經卷之二

皇三

聖行品下

爾時高上玉晨天尊告元陽定光真人曰我觀一切諸法皆悉无常性相不定若有諸法從因生者則是无常是諸仙人無有一切不因緣生善男子道性無隱無顯無生無滅無去無來非見在非未來非過去非因所作非緣所生是故名常善男子道性即是天尊天尊即是法法即是常善男子常者即是天尊天尊即是真人真人是常道性是常以是義故從因生法不名爲常是諸下仙之人無有一切不從因生善男子是諸下仙之人不見道性天尊妙法是故下仙之人所可談說皆悉妄語無有真實一切衆生先見衣服卧具車乘象馬城郭聚落後見相似便言是常當知其實非是常耳善男子一切有爲之法皆是無常虛空无爲是故爲常道性无爲是故爲常虛空者即是道性道性者即是天尊天尊者即是元爲无爲者即是常樂常樂者即是法法者即是无爲无爲者即是常樂善男

子有爲之法凡有二種一者色法二者非色法非色法者心心數法色者地水火風善男子心名无常何以故性是攀緣相應分別故善男子眼識性異乃至意識性異是故无常善男子色境界異乃至法境界異是故无常善男子眼根相應異乃至意根識相應異是故无常善男子心若常者眼根應獨緣一切法善男子若眼根識異意根識異則知无常以法相似念念生滅凡夫見已計之爲常善男子諸因緣相可毀壞故亦名无常所謂因緣因色因光因明因思惟生於眼識耳識生時所因各異非眼識因緣乃至意識異亦皆如是復次定光真人諸善男子懷諸行因緣故心名无常所謂修无常心異修苦空無我心異心若常者應常修无常尚不得觀苦空無我况復得觀真常之樂以是義故下仙法中不能攝取真常之樂善男子當知心法必定无常復次善男子心性異故名爲无常所謂邪見邪疑之人心性殊異不信真法不敬真人不崇有道作諸惡心善男子應知用心

之法有三種心一者出家心二者在家心三者在家遠離心樂相應心異苦相應心異不苦不樂相應心異貪欲相應心異瞋恚相應心異愚癡相應心異一切邪見邪魔心相應亦異所謂愚癡相應心異疑惑相應心異邪見相應心異動止運爲其心亦異善男子心若真常者亦復不能分別諸色所謂玄黃朱紫赤白之色善男子心若常者諸憶念法不應忘失善男子心若常者凡所讀誦不應增長復次善男子心若常者不應說言已作今作若有已作今作當知是心必定无常善男子心若常者則無怨親非怨非親心若真者則不應言我物他物若生若滅心若真者雖有所作不應長善男子以是義故當知心性各各別異有別異故當知無真善男子我今於此非色法中演說无真其義已顯復當爲汝說色無真是色無真本無有生已滅故故知無真凡夫無知計以爲真以是義故名曰無真若無真即是無苦若無苦即是不淨善男子我昔於元始之運先問斯事因得了

然復次善男子諸法無我總一切事謂色非色非我也何以故可毀可滅可破可壞生增長故我者不可毀滅破壞增長以是義故知色非我非色之法亦復非我何以故攀緣生故善男子若諸邪見以專念故知有我者專念之性實非我也若以專念爲我性者過去之事則有忘失有忘失故定知無我善男子若諸邪見以憶想故知有我者無憶想故定知無我如說見人手有六指即復問言我先何處共相見邪若有我者不應復問以相問故定知無我善男子若有邪見以遮故知有我者善男子以有遮故定知無我如言童子者我亦如是若定是我終不遮我以遮我故定知無我若以遮故知有我者汝今不遮定應無我善男子若諸邪見以伴非伴知有我者以無伴故應無有我無法無伴所謂天尊空虛道性我亦如是實無有伴以是義故定知無我復次善男子若諸邪見以名定故知有我者無我法中亦有我名如貧賤人名字富貴如言我死若我則殺我而我實不可

殺假名殺我亦如座人名為長者以是義故
定知無我復次善男子若諸邪見以生已求
乳知有我者善男子若有我者一切嬰兒不
應執持不淨以是義故定知無我復次善男
子一切衆生於三法中悉有等智所謂姪姪
飲食恐怖是故無我若諸邪見以相貌故知
有我者相故無我無相故亦無我若人睡時
不能進止俯仰視瞬不知苦樂不應有我若
以進止俯仰視瞬知有我者機關木人亦應
有我善男子亦不進不止不俯不仰不視不
瞬不苦不樂不貪不恚不癡不行真道如是。
真實有我若諸衆生邪見以見他食果口必
生咨知有我者善男子以憶念故見則生咨
咨非我也我亦非咨非喜非樂以是義故定
知無我善男子如是衆生癡如小兒不解智
慧無有方便不能了達常與无常苦與无苦
樂與無樂淨與無淨我與無我壽命非壽命
衆生非衆生於道法中取少許分虛妄計有
真常之樂而實不知真常之樂如生盲人
識乳色便問他言乳色何似他人答言乳色

白如具盲人復問是乳色者如具聲邪答言
不也復問具為何似邪答言如稻米味盲人
復問乳色柔軟如稻米味邪稻米味者復何
所似答曰如雪盲人復言彼米味者冷如雪
邪雪復何似答言猶如白鶴是生盲人雖聞
如是譬喻終不能得識乳真色是諸邪見衆
生亦復如是終不能識真常之樂以是義故
我道法中有真常之義非於邪見爾時定光
真人復白天尊言希有大師於今過去方便
更轉无上法輪乃作如是分別真常天尊告
定光真人汝今云何故於大師生過去想善
男子大師實是真常不變不過去若有計我
是法成无上正真大道我即是法法是我身
我即是道道是我身我即大師大師即是我
身我即真仙真仙即是我身我能說法令他
聽受我轉法輪餘人不能大師終不作如是
計是故大師不轉法輪若有人作如是妄計
我即是眼眼即是我身口意耳鼻亦復如是
我即是色色是我身乃至真法亦復如是我
即是地地即我身地水火風亦復如是若人

計言我即是言言是我身我是多聞多聞即
是我身我是布施布施即是我身我是持戒
持戒即是我身我是忍辱忍辱即是我身我
是靜定靜定即是我身我是精進精進即是我
身我是智慧智慧即是我身我是六念處
其六念處即是我身四種正勤四種如意五
心淨分八聖道分亦復如是善男子大師終
不作如是計是故大師不轉法輪若言常住
無有變改云何說言大師轉法輪是故汝今
不應說言大師方更轉上法輪善男子譬如
因眼緣色緣明緣思惟因緣和合得生眼識。
善男子眼不念言我能生識乃至思惟終不
念言我生眼識亦復不作念言我能自生如
是等法因緣和合得名為見善男子天尊亦
爾因六度行七種之法曉了諸法復因咽喉
唇齒舌舌言語音聲初始說法名轉法輪以
是義故天尊不名轉法輪也善男子若不轉
者即名為法法即大師善男子譬如因燧因
鑽因手因草而得生火燧亦不言我能生火
鑽手乾草各不念言我能生火火亦不言我

能自生天尊亦爾因六度行乃至名轉法輪
天尊亦復不念言我轉法輪善男子若不
生者是則名為轉正法輪是轉法輪即名天
尊大師善男子譬如因酪因水因鑽因餅因
繩因人而得出酥酪不念言我能出酥乃至
人手亦不念言我能出酥酥亦不言我能自
生因緣混合故得出酥天尊亦爾終不念言
我轉法輪善男子若不出者是則名為轉正
法輪是轉法輪即是天尊善男子猶如因子
及地水火風沃壤時節因人作業而牙得生
○善男子子亦不言我而能生牙乃至作業亦
不念言我能生牙牙亦不言我能自生天尊
亦爾必不念言我轉法輪善男子若不作者
則名為轉法輪是轉法輪即是天尊善男子
猶如因鼓因空因皮因人因緣混合出於音
聲鼓不念言我能出聲乃至因緣亦復如是
聲亦不言我能自生善男子天尊亦爾終不
念言我轉法輪善男子轉法輪者名為不作
者即是天尊善男子轉法輪者乃是諸仙大
師境界非諸弟子所知善男子虛空非生非

出非造非作非有為法天尊亦爾非生非出
非造非作非有為法如大師性道性亦爾非
生非出非造非作非有為法善男子諸仙大
師之語有二種義一者世間語二者出世間
語善男子天尊為諸弟子說世間語為諸真
人說出世間語善男子是諸大眾之中復有
二種一者求於小乘二者求於大乘我於昔
日於元陽世界為諸仙弟子轉於法輪今者
始於甘露城中為諸真人轉大法輪復次善
男子有諸二人中根上根為中根人於元陽
世界轉於法輪為上根人中法王定光真人
等今於甘露城中轉大法輪廣開法幢為大
利根善男子極下根者天尊終不為轉法輪
極下根者即是邪魔愚癡之輩復次善男子
求无上道者復有二種一者中心精進二者
上心精進於元陽經中最能精進轉於法輪
今於此城為上心精進轉大法輪復次善男
子我往昔時於彼甘露城初轉法輪八萬真
人得自然道果今於此城八千萬億人心無
退轉於正真道中皆獲清淨復次善男子甘

露城中元陽真人稽首請我轉於法輪今於
此城定光真人稽首請我復轉法輪復次善
男子我昔於彼甘露城轉法輪時演說無常
苦空常樂今於此城轉法輪時如實演說真
常之樂復次善男子我昔於彼甘露城轉法
輪時所出音聲聞于大羅之上天尊今復於
此城轉法輪時所出音聲徧於空歌國土九
天恒河世界東西南北四維上下亦復如是
善男子諸天真人凡有所說皆悉名為轉法
輪也善男子譬如國王有所高慢不生信敬
未降伏者能令降伏已降伏者能令信法得
於安穩善男子諸天真人凡有所說亦復如
是無量煩惱未調伏者能令調伏已調伏者
令生信向作諸善根譬如國王所有輕慢則
能降伏信向真道天尊演法亦復如是能令
一切諸煩惱賊皆悉清淨俱得寂定復次善
男子譬如國王所有輕慢下上輪迴天尊說
法亦復如是能令下趣諸惡衆生上生人天
乃至真道善男子是故汝今不應讚言天尊
於此更轉法輪爾時元陽定光真人白天尊

言我於此義非為不知所以問者為欲利益諸衆生故我以久知轉法輪者實是諸天具人境界非是邪見之人所能齊等爾時天尊告元陽真人善男子是名真人住於大乘得道之人所行聖行元陽真人白天尊言復以何義名為聖行

天尊告曰善男子聖者即是天尊以是義故名為聖行天尊若是諸真人之所行者則非邪見所能修行善男子是諸天尊安住於此元陽官中而作如是開示分別演說其義以是義故名曰聖行及諸衆生邪見之人如是聞已則能奉行故名聖行善男子是諸真人道士得是行已則得住於無所畏地善男子若有真人道士得住如是無所畏地則不復畏貪嗔煩惱生老病死亦復不畏惡道地獄餓鬼畜生之報善男子惡有三種一者邪姪恣意輕慢經實二者誹謗善人不信有道三者犯五逆四重善男子住是地中諸真人道士終不畏墮如是惡處亦復不畏天魔惡鬼魑魅魍魎亦復不畏受諸汙穢苦惱悲酸是

故此地名為無畏善男子真人道士百姓子等住是地中皆得无上正真大道自然福樂安穩之處善男子既得真道能壞地獄有能无退真道能壞畜生有得心樂真道能壞餓鬼有得飽滿真道能壞天魔有得調伏真道能斷黑闇有得光明真道能斷寒氷夜庭有得溫暖真道能斷邊夷皆生中國真道能斷閻浮提皆得清淨無憂國土真道能斷諸天魔王皆信經法善男子是知真道能為一切衆生作大法服能為一切衆生作大法幢能為一切衆生作大法航能為一切衆生作大法炬善男子當知真道即是天尊法王令諸衆生隨意即得欲知三千大千世界所有衆生心知所念亦悉能知欲以三千大千世界所有衆生內於己身一毛孔中隨意即能亦令衆生心無迫想若欲化作无量衆生悉令充滿三千大千世界中者亦能隨意能令一身以為諸身復合諸身以為一身雖作如意無有著猶如寶華善男子真人道士得入如是真道法王已即得住於自在之地真人

道士住是自在在地者得自在力隨欲生處即得往生善男子譬如聖王領四天下隨意所至無能障礙真人道士亦復如是一切生處若欲生者隨意往生善男子真人道士若見地獄一切衆生有可教化令住善根者且入即時往生其中真人雖生非本業果真人道士住自在在地有因緣故而生其中善男子真人道士雖在地獄不受諸苦善男子真人道士所可成者如是善根无量无边恒河億數尚不可說何況天尊威力功德福田而不測量爾時衆中有一真人名曰賢智有大威德成就神通得大總持法相具足得無畏懼即從座起前進作禮長跪執板白言如天尊所說諸真人道士所可成就功德智慧无量无边百千萬億實不可說我意猶謂故不如是元陽經典何以故因是元陽大乘經力故能出生諸天尊无上正真大道爾時天尊讚言要乎深矣不可思議善男子如是如是如汝所說是諸大聖微妙經典雖復成就无量功德欲比是經不得為喻百倍千倍无量无边

恒河沙數不可譬喻善男子譬如從牛出乳從乳出酪從酪生酥從酥生甘美法味若有服者眾疾皆愈所有諸藥悉入其中善男子天尊亦復如是從天尊出元陽妙經從元陽妙經出大道法從大道法出精進法從精進法出忍辱持戒法從忍辱持戒法出自然道果自然道果即是甘美法味所言甘美法味喻於道性道性者即是天尊善男子以是義故說言天尊所有善根恒河沙數不可稱計賢智真人白天尊言如天尊所說元陽妙經猶如甘美法味最為微妙若有凡夫眾生能服病自除愈一切諸藥悉入其中我聞是已竊復思念若有不能聽受是經當知是人為大愚癡無有善心天尊我於今者實能盡心盡意書寫如是元陽妙經受持讀誦令其痛利然後為人廣說其義天尊若有眾生貪著財物我當施財然後以是元陽妙經勸之令讀若專貴者先以軟語隨順其心然後漸當以是元陽妙經勸之令讀若凡愚者當以威勢逼之令讀若驕慢者為作僕使隨順其心

令其歡喜然後復以元陽妙經而教導之若有毀謗大乘經者當以威力迫之令伏既威伏已然後勸令讀誦元陽妙經若有願樂真道經者我今應當躬往恭敬供養尊重彈指讚歎爾時天尊讚賢智真人善哉善哉汝今愛念真道經典貪真道經樂真道經信敬受持供養禮拜善男子汝今以此善心因緣當得起元量无边恒河沙數真人道士成无上正真自然之果汝亦不久復當如我廣為大衆解說如是元陽妙經天尊所演秘密之藏善男子乃至過去天尊未出我於爾時作精進修天王修真人行悉能通達一切仙人所有經論修真常行具足威儀其心清淨不為邪見能生怨想之所破壞滅嗔癡火受持福業真常之樂周徧求索大乘妙典乃至不聞元陽經名字我於爾時住於妙樂之山其山清淨流泉池沼樹木甘果反塞其地處處充滿崖石之間有清流水平多諸香華周徧界域驚禽駭獸不可目名甘果繁蔚種種芬苾復有無量香根我於爾時獨處其中准食諸果

香根食已繫心思惟精進忍辱之行无量歲中亦不聞有天尊出世微妙經名善男子我修如是難行之行時彼天人等心大驚怖即共集會各各相謂而說偈言
天尊說至典 出法演元陽 號為眾生父
功德莊嚴王 斷除貪惑行 消滅愚癡狂
清淨妙樂山 逍遙甘露場
爾時衆中有一天王名曰普慧復說偈言
如是諸真人 清淨為第一 善解大乘義
深能知秘密 若有求至道 當除意遊逸
體達苦空行 永無煩惱疾
爾時復有一仙人名曰定光而說偈言
至法體玄妙 寂寞理難窺 自非總持者
誰曉元始儀 今得聞此教 可以樹良規
斷除諸惡業 閑出入元為
說是偈已諸真人天王言我今讚歎說偈諮請天尊為其賢士并諸眾生不為己身為欲利益諸凡夫眾生而修種種元量苦行如是人見生死中諸過咎故設見珍現滿此地
上諸山大海不生貪樂如是真藏如是賢士

棄捨珍寶所愛妻兒骨肉髓腦肢體手足所居屋室牛馬車乘亦不願求生於天上唯願一切得於歡樂如我所解如是賢士清淨無染衆結永盡唯欲志求无上正真大道自然之果復作是言如汝言者是人則爲攝取一切世間有道樹者能除煩惱毀謗若諸衆生住是道樹蔭涼中者煩惱諸業皆得消滅若當未來世中作善逝者我等悉當得滅无量煩惱如是之事實爲難信何以故一切衆生發自然道意見少微緣於自然意中即便動轉如水中月水動則動猶如畫像難成易壞自然道意亦復如是難發易壞如有多人以諸鎗甲冑自莊嚴欲往討賊臨行陣時心生恐怖則便退走一切衆生亦復如是發自然道意徒自堅牢見生死過心生憂怖即便退悔我見如是一切衆生發心之後皆生動轉是故我今雖見是人專修苦行無煩無惱住於道中其行清淨未能信也我今要當自往試之知其真實堪任荷負正真大道自然重擔譬如車有雙輪則有載用鳥有兩翼堪任

飛行修苦行者亦復如是我雖見其堅持禁戒未審其人有智慧不若有智慧則能堪任荷負正真大道自然之擔又如魚母多有胎子成就者少又如果樹華多實少衆生發心求真无量及其終始少不足言真人我當共汝俱往試之猶如真金三種試之乃知堪燒打磨試彼苦行亦復如是爾是元陽真人自化其身變爲猛獸形甚可畏下至妙樂之山去其不遠而便立住是時猛獸心無所畏勇健難當辯才第一音聲清雅宣揚過去天尊所說以偈頌曰

諸行本无爲 是其生滅法 轉輪寄因緣
雖捨還復合 當諦專一心 修持淨三業
正道可翹期 度脫於貧乏

說是偈已便住其前所現形貌甚可怖畏顧盼左右觀於四方是苦行者聞說是偈心生歡喜譬如羈客於險難處夜行失伴恐怖憂慮忽遇同信心生歡喜踴躍无量亦如宿病未遇良醫於儻歎頃忽遇妙藥病得除愈心生歡喜踴躍无量如人沒水遇得舟航得度

彼岸心生歡悅亦復如是如人渴乏忽遇醴泉恣意酣飲得無渴乏心生歡喜亦復如是如被冤家趁逐忽然得脫無諸煩惱心生歡喜亦復如是如囚詣市卒聞恩赦而得解脫心生歡喜亦復如是亦如農夫遇旱忽便得雨而苗得長五穀豐熟心生歡喜亦復如是亦如人遠行忽便還家心生歡喜亦復如是善男子我於爾時聞此偈頌心生歡喜亦復如是如是即從座起四向顧盼而作是言向所聞偈誰之所演爾時四顧不見異物唯見猛獸即說是言誰開如是玄妙之門誰能雷震微妙音聲誰於生死眠睡之中而能曉了唱如是言誰能於斯開導生死飢餓衆生无上道味一切衆生迷淪苦海誰能於中作大船師一切衆生恒爲煩惱疾病縈纏誰能於其中間爲作良醫說是偈已啓發我心猶如半月漸見光明善男子我於爾時一無所見唯見猛獸復作是念將是猛獸說是偈邪心復生疑似非其說何以故是物形容甚可怖畏若有得聞是偈頌者一切怖畏醜陋即除何有

此物形容如是能說是偈不應火中蓮生夜
光芝草善男子我於爾時復作念言我今无
有智慧而此猛獸或能得見過去仙人從天
專所聞如是偈頌我今當問即便前至是猛
獸處作如是言善哉善哉汝於何所遇是過
去離怖畏者所說偈頌定於何所而得如是
光明寶珠偈頌之義乃是過去未來見在元
始天尊正真之道一切世間无量无边凡夫
衆生常爲疑惑羅網所覆終身於道法中不
能得聞如是十方天尊所說玄義善男子我
聞是已即答我言是大真士汝今不應問我
是義何以故我不飲食已經多日種種求覓
了不能得飢餓困苦心迷誑語非是本心之
所知也我今力能飛行虛空處處求食而不
能得以是之故我說是語善男子我時即復
語猛獸言若能爲我說是偈頌竟我當終身
爲汝弟子汝所說者名字不終義亦不盡以
何因緣不欲說耶夫以財物珍玩布施者則
有竭盡而法施因緣不可盡也法施無盡多
所利益我今聞此偈頌心有疑惑汝今幸可

爲我除斷說此偈竟我當終身爲汝弟子猛
獸語言汝今智太過物但自愛身都不見念
今我定爲飢餓困苦所逼實不能說我即問
言汝所食者爲是何物猛獸答言汝不須問
我若說者令人怖畏我今復言此中險處更
無有人我不畏汝何故不說猛獸答言我所
食者唯人煖肉其所飲者唯人熱血自我所
餐唯食人肉徧處求索困不能得世之多人
皆有福德爲諸天善神之所覆護而我無力
不能得殺善男子我復語言汝但具足說此
偈頌我聞偈頌已當以此身奉施供養猛獸
我設命終如我之身無有所用當爲惡蟲之
所啖食而復不得一分之福我今爲求无上
正真大道之果捨不淨身以易淨身猛獸答
言誰當信汝如是之言爲真道故棄所愛身
善男子我即答曰汝大無智譬如有人施他
凡器而得真實我亦如是捨不淨身得堅固
身汝言誰當信者我今有證无量天王等皆
證此事復有天眼諸真人道士爲欲利益一
切衆生修行供養大乘經典具四等六慧者

亦能證知有十方天尊利益衆生亦能證我
真道故捨此身猛獸復言汝若如是能捨身
命當諦專心爲汝分別說其偈頌善男子我
於爾時聞是語已心中歡悅即解已身所著
衣服爲此猛獸敷置法座白言真人願上此
坐我即於前長跪欽手而作是言唯願真人
爲我演說偈頌令得具足猛獸即說偈言
生滅滅已盡 寂滅爲常樂 優遊七寶臺
徘徊四明閣 諸陋皆以滅 清淨無穢惡
捨命受真身 善緣無愛著
爾時猛獸說此偈已復作是言神仙法衆汝
今已聞具足偈頌汝之所願爲悉滿足必欲
利益衆生可施我身我於爾時深忖斯義然
後種種書寫此偈繫著衣服恐今死後形體
露現即緣大樹時樹中神復問我曰咄哉仁
者有何事故時答曰我欲捨身以答偈頌神
又言曰如是偈頌何所利益我時答言如是
偈頌乃是元始天尊之所演說我爲此法棄
捨身命不爲名聞利養財物但欲利益无量
凡夫故捨此身善男子我捨身時而作是念

願令一切慳貪之人悉皆見我捨離此身若有愛惜有噴噓者亦令見我爲一偈頌捨於身命如棄糞穢我於爾時作是語已尋復捨命自投樹下下未著地虛空之中出百種聲爾時猛獸還復捨身於虛空之中捧按我身安置平地元陽真人神仙眷屬稽首作禮於我座前讚歎善哉真是賢智能大利益一切衆生欲於無明之中燃大法火爲我愛惜天尊妙法故生撓惱唯願大德許今首悔懺謝罪愆汝於未來必定成就无上正真大道自然之果願見救度爾時真人及諸大衆一時辭退忽然不見。

太上靈寶元陽妙經卷之二

十九

太上靈寶元陽妙經卷之三

皇

慈行品

爾時元始天尊於紫微瓊宮金暉玉殿九曲之房元陽世界告妙樂真人汝今於此國土修慈悲喜住於恩愛一子之地妙樂真人稽首禮拜上白天尊以何因緣名爲恩愛一子之地天尊曰猶如父母養兒安穩心生歡喜善男子住此地中亦復如是觀諸衆生同於一地見有修善生大歡悅是故此地名曰恩愛猶如父母見子遇病心生憂惱初無棄捨善男子住是地中亦復如是見諸凡夫一切衆生爲煩惱病之所縈纏心生憂惱哀慙如子諸毛孔中皆流出血是故此地名爲一子之地如人小時拾取糞穢置於口中父母見已心生愁怖恐爲其患以水灌洗挑出糞穢善男子住是地中亦復如是見諸凡夫一切衆生身口意業多爲不善真人見已則以智手按之令出憐愍凡夫不欲令彼流浪生死受諸煩惱是故此地名爲一子猶如父母所念之子忽遇疾病俄頃之間子便終沒父母

悲泣願與同命真人亦見一切衆生墮於三塗亦願與其俱生地獄何以故是一切衆生受苦時或生一念改悔之意我即爲說修善方法彼於一念生善根是故此地復名一子猶如父母唯有一子行住坐卧心常愛念若有罪咎和聲軟語方便慰誘不加其惡真人道士亦復如是見諸凡夫一切衆生墮三惡道心生悲慙終不生瞋以惡加之是故此地復名一子妙樂真人白天尊言如尊所說其言秘密我今智短云何得解若諸真人住一子地能如此者云何天尊昔爲甘露國王時行真人行斷法龍長者之命若得此地則應生心愛念凡夫若不得者復何因緣不墮三惡若憐愍衆生等視一子心無偏愛如此之言云何於義不相違背天尊住虛空地凡欲求乞飲食要須觀人若有於已生嫉妬心則不須行乃至極飢亦不行乞何以故真人道士常作是念我憶往昔劫時於福田所生一惡念以是因緣墮落地獄受諸苦惱我今極飢終不乞食終不令彼於我有疑墮於地

獄受諸苦惱復作是念若有凡夫一切衆生
疑我立者我當終日端坐若有凡夫疑我坐
者我當終日立不行卧是真人道士護念衆
生尚有是心何況大聖通靈若得一子地者
何緣天尊出如是言使諸凡夫起重惡心

天尊告妙樂真人汝今不應作如此難言我
爲諸凡夫作煩惱因緣假使力能傾竭海水
我終不爲諸凡夫一切衆生作煩惱根本假
令天地悉爲非色水爲堅相火爲水相風爲
注相我終不爲諸凡夫衆生作煩惱根本假
使毀犯四盟禁罪及一凡夫誹謗正法現身
得成十聖無畏我終不爲諸凡夫衆生作煩
惱根本假使下仙弟子及一邪見常住不變
我終不爲諸凡夫衆生作煩惱根本假使諸
真人等犯四盟科律作於誹謗真正之法我
終不爲諸凡夫衆生作煩惱根本假使一切
无量衆生斷滅道性我終不爲諸凡夫衆生
作煩惱根本假令擲索能繫縛風吹諸猛火
燔燒石山我終不爲諸凡夫衆生作煩惱根
本寧與毒蛇猛虎同共一處不應發言聖人

爲諸凡夫衆生作煩惱根本善男子天尊具
實能爲凡夫衆生斷除煩惱終不爲作煩惱
根本妙樂真人如汝所言天尊往昔劫時殺
法龍長者善男子我今小小蟲蟻尚爾不殺
況法龍長者是於善士常作方便惠施衆生
无量壽命夫施食者則爲施命真人道士行
布施時常施衆生无量壽命善男子行不殺
法壽命長遠真人道士行持戒時則爲施與
凡夫一切衆生无量壽命善男子檢口無惡
得命長遠真人道士行忍辱時常勸凡夫一
切衆生莫生怨想推直於人引曲還已無有
瞋恚得命長遠是故真人行忍辱時已施凡
夫一切衆生无量壽命善男子專心修善得
命長遠真人道士行精進時常勸凡夫一切
衆生勤修善法凡夫行已得壽命是故真人
道士行精進時已施凡夫一切衆生无量運
命善男子修攝心法得壽命長遠真人道士行
靜定時觀諸凡夫一切衆生修平等意凡夫
行已得命長遠是故真人行靜定時已施凡
夫一切衆生无量壽命善男子於諸法中心

不放逸得命長遠真人道士行智慧時勸諸
凡夫一切衆生於諸善法不生放逸凡夫行
已以此因緣得命長遠是故真人行智慧時
已施凡夫一切衆生无量壽命善男子以是
義故真人道士於諸凡夫一切衆生終不棄
捨妙樂真人汝向所問殺法龍長者時得是
地不善男子我時已得愛念故斷其命根非
惡心耳善男子猶如父母唯養一子愛之甚
重犯於官律是時父母以怖畏故若擯若殺
雖復擯殺終無惡心真人道士爲持善道亦
復如是若有凡夫一切衆生謗元陽經者即
以鞭杖苦而治之或害其命故令改惡修於
善道真人心常作如是思惟以何因緣能令
凡夫一切衆生發起善心隨其方便要須爲
之法龍長者命終之後生玄沙北獄即有三
念一者念我從何而來到此即便自覺從人
道中來二者自念我今所生爲是何處即便
自覺知是玄沙北獄三者自念因何業緣而
來至此即便自覺從謗元陽經典不信因緣
爲國王所殺而來生此覺是事已於元陽經

典生恭敬意尋時命終生於福樂自在世界於彼而得壽命具足善男子以是義故我於往昔劫時乃與是人同於壽命云何名殺善男子善人掘地刈草斫樹斬截死屍罵詈咒詛以是因緣墮於地獄不妙樂真人白天尊言如我解聖人所說義者應墮地獄何以故如天尊昔為邪見說法汝諸弟子於諸草木莫知惡心何以故墮於惡道爾時天尊讚妙樂真人善哉善哉如汝所說應善受持善男子若因惡心墮惡道者真人時實無惡何以故真人道士於一切凡夫衆生乃至蟲蟻悉皆慈愍增益心故所以者何善知因緣諸方便故以方便力欲令凡夫一切衆生作諸福業善男子以是義故我於爾時以善方便雖奪其命而非惡心善男子若殺蟲蟻滿於億數微有罪報虎狼毒蛇蚊蚋蠶虱熊羆貓獸能為一切凡夫衆生害者斬奪其命微有罪報若殺凶害惡人則有罪報殺已不悔則墮三塗地獄若能懺悔發露三日斷食其罪即消無有遺餘若害善人德行道士及其父母

女人與牛墮於地獄無有劫數善男子我及真人知殺有三何者名三所謂為三一者下二者中三者上下者蟻子乃至一切畜生唯除真人示現生者真人道士以願因緣示受畜生是名下殺以下殺因緣墮於三塗地獄具受諸苦何以故是諸畜生有微善根是故殺者具受罪報是名下殺中殺者從凡夫乃至初學是名為中以是業因墮於三惡具受中苦是名中殺上殺者所謂謀危國主父母尊屬真士善人是名為上以是因緣墮於惡道三塗地獄具受上苦是名上殺若有能殺十惡五逆者則不墮於三種惡中善男子彼諸兇人等皆愚癡猶如掘地刈草斫樹木罵詈鞭撻無有罪報殺一兇逆之人亦復如是無有罪報何以故諸兇逆者無有信等無有利益衆生是故雖殺而無罪報善男子汝上所言天尊何故罵受業大士癡人食唾汝亦不應作如是問何以故天尊凡所發言不可譬喻善男子或有實語為人所愛非時非法不為利益如是之言我終不信善男子或

復發言橫惡邪詭虛妄非時非法聞者不愛不能利益我亦不信善男子若有音聲雖復橫惡真實不謬是時是法能為一切凡夫衆生有於利益聞雖不信我要說之何以故天尊神通智力徧知方便善男子如我昔時遊於山林聚落城邑在樹下有一大鬼名曰警昌純食肉血多殺衆生復於其聚曰噉一人善男子我於其時為彼大鬼說諸法相然彼愚癡不受教法我即化身為大力神傾其宮室令不安住其鬼爾時率其部屬出其宮殿欲來拒擊大鬼見我時即惶怖迷悶躡地猶如死人我以慈念手摩其體即復起坐作如是言大哉有幸還得身命是大神力具大威儀有慈念心赦我罪咎即於我前生敬信心我即還復天尊之身復更廣說真要道法令其鬼神受不殺業即於其日聚落城中有一長者名曰法龍次應當死家人已送付與鬼神鬼神得已即以施我我既受已而為長者更立名諱名曰儒首爾時其鬼即白我言今此眷屬唯仰血肉以供性命今以受法當何

資給天尊答言從今已去令諸真人道士隨有方法行業之處普皆令其施與飲食善男子如是因緣為諸仙人道士制如是法汝等從今常當施彼警昌鬼食若有住處不能施者當知是輩非我弟子即是天魔伴侶善男子天尊為欲調伏凡夫一切眾生故示如是方便之法非欲令彼生於怖畏善男子我今以木打護法鬼又於其時在一山頭推大鬼身令墮山下亦以鍼刺剪毛鬼身雖作如是亦不令彼諸鬼神輩有毀滅相直欲令彼安住正法示其如是方便之法善男子我於往時亦不罵辱邪見邪疑亦不愚癡食人涕唾亦不生諸惡道中三塗地獄受諸苦惱亦不毀謗道士及諸學人亦不違犯四盟之罪誹謗元陽正法微密經典非諸晚學之人亦非下仙之流善男子下仙晚學實非邪見邪魔境界唯有聖人之所知委善男子是故汝爾不應問言天尊何緣責諸仙晚學汝於諸天所有境界不應如是生於疑惑妙樂真人白天尊言猶如甘蔗噉嚼口中得於甘味我

亦如是從聖人數聞經典多得法味所謂道味法味智慧味達解味天尊猶如真金屢加銷鍊轉轉益明調和柔軟光色妍淨其價難量然後乃為人天之寶天尊聖人亦復如是鄭重諮問則得曉諸深奧之義令得受持悟於元量凡夫眾生發自然道意然後為諸人天之所尊重爾時天尊讚妙樂真人善哉善哉真人道士為欲利益凡夫一切眾生故啓天尊如是妙法善男子以是義故隨汝意願說是元陽大乘微妙經典所謂愍念猶如一子之地妙樂真人白天尊言若諸真人道士修慈悲喜得一子地者修捨心時復生何地天尊言善男子汝善知時知我有說汝則諮問真人道士修捨心時則能住於虛空平等法地善男子真人道士住是虛空平等法地則不見有六親眷屬怨憎中心善男子猶如虛空無有六親眷屬乃至無有怨憎一切諸法亦復如是無有眷屬一切諸漏真人道士見一切法亦復如是其心平等猶如虛空何以故善能觀度諸空法故妙樂真人復白天

尊言云何名空天尊曰善男子如是空者所謂內空外空无為空有為空一切諸法皆悉是空善男子云何觀於內空真人道士觀內法空是內法空無有眷屬怨憎中心真常之樂天尊法子所有財物是內法中雖有道德性而道德性非內非外所以者何道德性常住无有運動是名真人道士觀於內空所謂外空者亦復如是无有內法內外空者亦復如是善男子唯有天尊法子道德性不在內外二空何以故如是等法真常之樂是故道法不名為空是名內外俱空善男子有為空者有為之法悉皆是空所謂內空外空內空者真常之樂天尊法子第一義空是中道德性非有為法是故道德性非有為法空善男子云何真人道士觀无為空是无為法悉皆是空所謂无常苦樂无我陰界入眾生相有為漏內法外法无為法中平等一法非有為法非无為法非有為性非无為性是名常住非內非外是名真人觀无為空云何真人道士觀无始空是真人道士見生滅无始皆悉空寂所謂空者真常之樂皆悉

空寂无有變易衆生命相三寶法性及无爲法是名真人觀无始空云何真人觀於法空是真人道士觀一切法本性皆空所謂陰界入常元常苦无苦樂无樂淨不淨觀如是一切諸法不見本性是名真人道士觀於性空云何真人道士觀無所有如人無子言宅舍空究竟觀空無有親愛愚癡之人言諸十方皆空貧賤之人言一切空如是所計或空或非空真人觀時如貧賤人一切皆空是名真人道士觀無有空云何真人道士觀第一法中皆悉是空善男子真人道士觀第一時是從眼生從何而來及其滅時去無所至昔無今有本有還無推其實性無眼無主一切諸法亦復如是云何名爲第一義法有業有報不見作者如是空法名第一法空是名真人道士觀第一法空云何真人道士觀於空法空是空中乃是下仙弟子所述沒處善男子是有是無是名空空是是非非是名空空善男子三世真人尚於是中通達少分猶如微塵善男子如是空法亦復不同下仙弟子所

得空空是名真人道士觀於空空之法善男子云何真人道士觀於大空善男子是大空者謂天眼智慧是名大空善男子真人道士得如是空妙則住於虛空等地我今於大衆中廣爲演說諸空義時有無量無邊真人道士即得住於虛空等地善男子真人道士住是地中於一切法無有滯礙繫縛拘執心無迷悶以是義故名爲虛空之地善男子猶如虛空於可愛色中不生貪著不受色中不生喜怒真人道士住是地中亦復如是於好色中心無貪著善男子猶如虛空廣大悉能容受一切諸物真人道士住是地中亦復如是廣大虛空悉能容受一切諸法以是義故復得名爲虛空之地善男子真人道士住是廣大虛空地中於諸妙法亦見亦知若行若緣若性若相若因若果若凡夫心若根若本若善知識若善因緣若善法戒若善施爲若善料禁如是等法一切知見善男子真人道士住是地中知而不見云何爲知知自我法投水赴火自墮深坑常翹一足五熱灰身常卧

塵中棘刺樹木惡草牛糞之處麤衣布服茹菜噉草若行乞食限至一家主若言無即便捨去設主更招終不顧盼不食肉味世間五味如是等法皆悉除斷能爲无上解脫因者無有是處是名爲知云何不見真人道士不見一人行如是法得正解脫是名不見善男子真人道士亦知何等爲見見諸凡夫一切衆生行是邪法必墮地獄是名爲見云何爲知諸凡夫衆生從地獄出生於人中若能修行布施乃至具足諸精進法是人必得入正解脫是名爲知善男子真人道士復有亦見亦知云何爲見見常無常見苦無苦見樂無樂見淨無淨見我無我是名爲見云何爲知知諸聖人定不畢竟入不滅度知諸聖人身如金剛不壞非是煩惱所成就身又非臭穢腐敗之身亦復能知一切衆生悉有道性是名爲知善男子真人道士復有亦知亦見云何爲知知是衆生求於妙法是人順流是人逆流是人正住知是衆生已到彼岸順流者謂凡夫之人逆流者從無爲乃至諸仙正住

者真人道士等到彼者所謂天尊神通慧眼應正偏知是名為知云何為見真人道士住於元陽世界大乘法門修行妙行妙行心以淨天眼見諸凡夫一切眾生造身心口業三事不善墮於幽牢地獄之中見諸眾生修善業者命終當生天上人中見諸凡夫一切眾生從閻入閻有諸凡夫一切眾生從閻入明有諸凡夫一切眾生從明入閻有諸凡夫一切眾生從明入明是為知見善男子真人道士復有亦知亦見真人道士知諸凡夫一切眾生修身修行修法修戒修定修慧是人今生惡業成就或因貪慾瞋恚愚癡是業必應三塗受報如是之人直以修身修行修法修戒修定修慧見世輕受不墮三塗云何是業能得理報發露懺悔所有諸業既悔之後更不敢作慙愧成就供養三寶故常自呵責故以是因緣不墮三塗見世受報所謂疾病百種疹患羅諸死殃飢餓困苦身體楚痛如是等事見世輕報是名為知云何為見真人道士見如是人不能修習身行法戒定慧造少

惡業此業因緣見受報對是人少惡不能懺悔不自憶責不生慙愧無有畏忌是業增長幽牢受報是名為見復有知而不見云何知而不見知諸凡夫一切眾生皆有法性為諸煩惱之所覆蔽不能得見是名知而不見復有知而少見真人道士等知諸凡夫一切眾生皆有法性見不明了譬如闇夜所見不了復有亦見亦知所謂天聖人亦見亦知復有亦見亦知不見不知亦見亦知者所謂世間文字言語衣服卧具牀席屏帷飲食五味世間珍玩眾生命相是名亦見亦知云何不見不知聖人所有玄妙之義無有男女乃至園林是名不見不知復有知而不見知所布施知所供養知所受者知因果報是名為知云何不見不見布施供養受者果報是名不見真人道士知有八種即是元始天尊神通慧眼所知妙樂真人白天尊言真人道士能如是知得何等利天尊言善男子真人道士能如是知得四無礙力無礙法無礙義無礙智無礙慧無礙法者知一切法及法名字義無

礙者知一切法所有諸義能隨諸法所立名字而為作義智無礙者隨有經論深奧之理而能解析慧無礙者所謂真人道士凡所演說諸仙有疑者無有障礙悉能明了一切法相善男子是名真人能如是知見即得如是四無礙法善男子法無礙者真人道士偏知神仙大士諸妙經典深奧之法義無礙者雖有三乘知歸其一終不有異差別之相智無礙者真人道士於一法中作種種名經歷天地無量劫中說不可盡下仙弟子能作是說無有是處慧無礙者真人道士於無量劫為諸凡夫一切眾生演說諸法若名若義方便異說不可窮極善男子法無礙者真人道士雖知諸法而不取著義無礙者真人道士雖知諸義而亦不著智無礙者真人道士雖知名字而亦不著慧無礙者真人道士雖知有慧如是最上而亦不著何以故若取著者不名真人妙樂真人復白天尊言若不取著則不知法若知法者則是取著若不知著則無所知云何天尊說言知法而不取著天尊言

夫取者不名無礙無所取者乃名無礙善男子一切諸真人等有取者即名無礙若無礙者不名真人當知是人名為愚癡何故取者名為愚癡一切愚癡取者於色乃至著識以著色故則生貪心生貪心故為色染繫乃至為識之所染繫以染繫故則不得免生老病死愁惱大苦一切煩惱是故取者名為愚癡以是義故一切愚癡無四無礙法善男子真人道士已於無量恒河沙之劫知見法相以知見故則知其義以見法相及知義故而於色中不生繫著乃至識中亦復如是。以不染故真人於色不生著心乃至識中亦不生著以無著故則不為色之所繫染乃至不為識之所染故則能免生老病死憂苦大悲諸煩惱業以是義故一切真人得無礙法善男子以是義故我為弟子元陽經中說繫染者名為邪執若不染者則脫邪執猶如有罪凡夫之人為官所繫無罪之人官不能執真人道士亦復如是有執染者為邪所執無染繫者邪不能執以是因緣真人道士而無所

染善男子無礙法者真人道士善知方便而不妄失所謂方便者如土如山如眼如雲如人如母一切諸法亦復如是無礙義者真人雖知諸法名字而不知義得無礙義能知其意云何知義所謂如地能生一切草木凡夫衆生以是因緣名為如地善男子所謂如山者真人道士修學道法思惟其義令無搖動以是因緣故名如山所謂如眼能有諸光照了相見一切義以是因緣名為如眼所謂如雲能有蔭潤利益衆物以是因緣名為如雲所謂如人能持一切諸法妙義為世良醫療諸疾病以是因緣名為如人所謂如母愛養兒子心無偏黨以是因緣名為如母善男子真人道士知一切法深奧之義亦復如是無礙辭者真人道士以元陽妙典大乘之辭開演一句無有疑難亦無有義譬如一切舍宅草木等名善男子何故無義如是之義乃是真人道士諸天聖人境界辭者凡夫境界以知其義以是因緣名辭無礙無礙慧者真人道士知法義時於恒河沙劫說其義味理不

可窮是名無礙慧者善男子真人道士於久遠劫時修第一義法故得無礙義亦於久遠劫時修習靈寶大洞真經故得無礙法亦於久遠劫時修習三清妙法得於智慧無有疑難善男子諸仙弟子若有得是四無礙力者無有是處如是元陽經中我說諸仙弟子有四無礙力諸仙弟子真實無有以是因緣真人道士為度凡夫故有如是四無礙力諸仙弟子修下仙法志願仙品未登妙果以是因緣諸仙弟子有四無礙力妙樂真人等即起于席長跪欬板上白天尊今聞宣說具了道源諸天時衆稽首作禮各還本座

太上靈寶元陽妙經卷之三

太上靈寶元陽妙經卷之四

皇四

問行品

諸弟子等上白師尊言衆生各有緣品及諸大士男官女官等如弟子惟忖今聖非過去聖師廣演次第即元陽昇仙大法演大義經諸法衆聖男官女官外契內契我於過去諸仙男女得大莊嚴神通明了曾見此瑞放斯光明即說大法是故當知師尊現示變化廣演言教神通第二一切諸法亦復如是故令弟子等咸得聞知一切世間難信之人故發斯瑞諸男官女官等若過去無量無邊不可思議劫時有一王名大相燈清淨法王應化八萬四千地其地平整歡樂饒人無有山河沙石溝坑原陸堆阜其城黃金爲壁水銀爲池真珠玉室瑤華寢連綿四百餘里人民慈善有一弟子名大法林廣聞諸法明惠具足超登无上化導天人其義不雜其音巧妙具足明白五通之相說法利益度脫衆生了一切法空是爲真人與上六神王俱次得道元陽上品真人第二能成就一切道智次復

有一弟子名常精進行相大士名曰明如長相是人曾於二十二身得生文昌宮由以宿植德本靈智自天稟化玄風餐訓妙法積福具備證果九天獲慶將來得蔭太清凝神天府功德彌厚靈嶽真府仙官授手其所習說紫陽仙公太清圖品應爲第七未出家時有一大士智慧具足其所祖述紫陽爲師而每勤學神仙元陽爲上天圖仙品其人能知初仙中仙下仙初善中善後善其義深遠最後仙真人未出家時有八從弟子一名是林二名珍林三名意林四名表林五名善林六名樂林七名寶林八名除疑林是人而繫名天宮元陽上品具足智行備五神通威德自在各領天人初出家時思惟樹下棄捨高位發大悲心棄意逃逝常修真行皆爲仙伯於千萬歲後所植諸善悉皆成就夜半子時建剛仰北斗魁中紫微文昌忽然而開但見太上老子乘雲青龍而天下則青馬也謂其人曰是何真賢時老子答言吾是東海小童李元真人天慶會遣我來下化子林大士後能演

无量義經開敷元陽神仙第二天花覆其上普化世界種種震動爾時會中有一真士厥年十二上白師尊曰如我大衆得未曾見今歡娛喜樂長跪端心觀師尊所說善辭巧妙善喻方便能放光明普照一切令其會中蒙得開明所爲因緣照明元陽上品仙聖大品天人之界其土清淨得未曾有故使百千萬歲中衆生永安大福條林法靜真人曰吾師說元陽上品以來曾經六十小劫不起于座今欲攝應歸本正月七日當還天宮慶集天人汝等若有一人二人乃至十人於我去後能宣傳妙法勸化衆生皆當往生元陽品中莫得懈倦六十小劫天人並位齊心受記乃告諸大士等得條林法靜真人言今當慶會天人其人去後妙元林與光妙林應達五通廣智神仙巧利經記當得淨惠開悟衆生號曰淨惠度真人授記已便於壬辰年正月七日忽然去矣元陽淨惠度林真人者生於深妙王宮其先代積行勤心翹念就讀真經每習仙記常所祖述太一元宮其所修學太一

仙經八百卷其中廣演言教化度衆生說妙林仙記八千卷滿八十小劫不起于座爲人演說有八弟子一名晃林二名妙林三名教林四名堅固林五名燈香林六名樂林七名度林八名化林是八弟子皆有明行於元陽上品第三弟子也處臺榭園田廣林樹下有成仙品者名曰伯皇真人求在左右通利誦典廣演諸經宣暢至品曾於大衆過去之世經六十小劫其衆嚴敬演教度一切無數令入元陽上品初出家時有三弟子見神大聖諸仙隨從說此經中无量種義諸天仙人當廣分別吾當說此時即於天上玄坐虛空中八十小劫下觀汝等廣演言教昇入无量品天香寶蓋天龍仙王供養人中一切諸仙世界嚴淨其土如脂多諸寶樹名獅子象王官即時種種天人神響震動淨惠度林其人放神通光明見諸希有之相悉見彼土一切人民其土清淨真珠爲地黃金爲城白銀爲壁瑠璃爲室黃青赤繩連綿其中瑠璃界側水精爲殿白玉爲樓處處行樹園林臺榭清淨

蓮池花果茂盛一切衆生受樂其中連綿相續四十餘里天光普照衆寶莊嚴瑠璃玻瓈內外朗徹不由日月諸仙供辦銷饌飲食自然天廚供具銷饌彼有天人明淨第一出乘雲車駕龍神虎飛鳳嘯歌四面懸鈴八方安施自然伎樂身色光明如金寶山端嚴奇妙如淨瑠璃內外圓滿次一大士服名辯惠度厄真人所從弟子皆得昇天太一官府開度無數因我光明飛行自在悉見大衆諸仙山林精進大士持戒符契妙靈仙品猶如明珠有一弟子名莊妙林其人修行常在山林精進持戒淨行施惠忍辱元陽仙品有一弟子名大智藏入深妙定身心寂滅廣智定慧次一弟子名妙梵林智法深曠寂滅神智不動各於其國說法上品次一弟子名大梵林現大神通其心歡喜四部弟子廣演言教各各相問元陽仙品次一弟子名觀梵林好樂至道天人所尊三界第一能讚諸仙世間希有次一弟子名真妙音廣知一切天人所趣歸信大行能奉至業次一弟子名寶玄林玄智

虛空照明仙記每讚陰陽廣演言教慶集天人妙光世度次一弟子名智慧深智慧五通滿八十小劫能開世教不起於座所說上品妙奧難測號曰月光无上仙師次一弟子名寶妙林天人並悅諸法實相已爲汝說於中長短十月五日歸還天宮語諸弟子言汝等一心精進當昇天宮號曰太清天人如是弟子皆是元陽仙品神通无碍淨惠度真人說是既已語諸弟子言自吾與子仙紀斷絕慶會天宮有何隔乎吾至十月五日當還天宮上命甚速言會非常於是真人還以此月十五日日中之時與諸衆仙雲車羽蓋侍從八千萬人飛仙天仙无量聖衆乘之而去元陽度太清天人從无著王官乘三世界安庠而起告諸弟子曰吾受真人智慧甚深无量智慧見生智慧門五神洞朗諸根猛利饒益衆生一切世間難解難了難入一切天人所不能及所以者何吾曾親近百千萬億无數真人大士盡行无量大道勇猛精進名稱普聞成就甚深得希有法徽靈天圖仙官授法下

化三界隨宜啓導吾從成真人以來種種因緣種種譬喻廣演言教無數方便引導衆生令離諸著所以者何吾之方便知見深遠皆以具足百姓子人我太上先師其智廣深遠无量无边无所畏憚心定解脫深入秘藏知見元際成就一切未曾有法皆至天宮大妙仙四元陽上品大仙寶經種種分別巧說諸法言辭柔軟悅可衆心百姓子等取我要言之法无有限量承我所說悉皆成就不可思議子等不須復說何以故我所成就微妙第一義趣難解唯吾上師乃能分別諸法深奧不能究盡吾今有如是相有如是性如是體如是力如是作如是緣如是因如是果如是報如是本末盡等究竟爾時天人授記與信行善男善女一切咸使聞知悉皆開悟及天老玄淨王少子其先自出慰田王宮其所祖述大寶爲上其所修習太清經八千卷能廣演言教六十小劫不起于座本從無數具足諸行甚深甚妙難見難了有從弟子三人一名玄妙真人二名證果真人三名明智真人

然此弟子有大聖行能說法元陽仙品千日千夜不起于座次一弟子名真梵林諸根猛利甚深微妙行此諸品還得成果我以悉知如是大果元陽功德次一弟子名大梵林種種方便我及十方諸餘衆生悉能演化開悟暗冥次一弟子名真淨林其人智慧信力堅固及諸弟子煩惱漏盡住是最後悉皆昇天太上仙宮依位各處

太上靈寶元陽妙經卷之四

太上靈寶元陽妙經卷之五

皇五

觀行品上

爾時東方玉寶皇上天尊於空歌國土清淨世界與其神仙眷屬飛天神王至真大聖衆八萬四千徒侶俱會香林七寶樹間演說元陽上品觀行妙經爲諸衆生作大福田曉悟深疑令知妙道善男子應當發心願念遵行四種修學之法作是語已時衆之中有一真人名曰靈華整頓衣冠手執香爐長跪白言宿因有幸得遇威光過泰之歡實爲慙悚今聞演說元陽秘藏甚深義味不可思議云何天尊答曰善男子四種修學之法一者從師受與元陽經典二者從善知識開道深疑三者思惟玄義得苦空法四者修行精進志願成道善男子當知四種之業親近明師尋知識請說玄義得解疑難真人應知思其四種修學之法復次善男子身口意業有四種惑何等爲四一者貪惑二者癡惑三者淫惑四者瞋惑善男子修學大乘經典求自然果者應當捨除如是四種惑法云何貪惑所謂

貪惑者非分貪求世間榮華衣服珍玩種種規求種種計度殺害眾生侵損物命恣意所為縱情吞飲如是之事是名貪惑云何癡惑所謂癡惑者身心意業所作罪愆不避三光日月星宿不敬三寶有道之人聞他作善心生破壞談說是非誹謗尊老師父有命避會不肯依從如此之事是名癡惑云何淫惑所謂淫惑者愛樂女色不避親疎姦人妻妾私懷謀度潛欲誘引離人骨肉放蕩无度如此之事是名淫惑云何嘔惑所謂嘔惑者心懷詭妄構架百端因公傍私潛行威勢身為出家誑惑眾生取他財物詐言道術无真實相如是之事名為嘔惑善男子若欲至心求无上自然果者真人當知四種惡惑悉皆除斷復次善男子有二種信一者至心信二者心不信真人當知心信者是善心不信者不名為善復次信有二種一者常往法座二者不往法座真人當知常往法座者善不往者不名為善往法座者復有二種一者禮拜二者不禮拜真人當知禮拜者善不禮拜

者不名為善其禮拜者復有二種一者至心聽法二者不至心聽法真人當知至心聽法者善不至心聽法者不名為善真人當知至心聽法者復有二種一者思尋其義二者不思尋其義真人當知思尋其義者善不思尋其義者不名為善思尋其義者復有二種一者如說行二者不如說行如說行是則為善不如說行者不名為善如說行者復有二種一者有大智慧而能利益一切眾生二者有大智慧而不能利益一切眾生所謂能利益一切眾生者是則為善不能利益一切眾生不名為善真人童子應知利益眾生安穩歡喜得自然果報善男子如諸寶中有明月寶珠最為勝妙如諸味中有甘露漿最為勝妙真人能於人天之中演說元陽經義利益眾生最為勝妙不可譬喻善男子是名真人童子住於大乘清淨无為九法之中真人童子住是九善即得真於觀行復次善男子有觀行心謂慈悲喜捨靈華真人長跪白天尊言若多慈心能斷瞋恚悲心者亦斷瞋恚云

何而言四无量心尋理而言則應言三天尊曰慈有三緣一緣眾生二緣於法三則無緣悲喜捨心亦復如是若推其意唯應有一不應有四眾生緣者緣於五情願與其樂是名眾生緣法所謂緣者緣諸眾生所須之物而施與之是名法緣無緣者緣於天尊是名無緣慈者多緣貧窮眾生天尊大師永離貧窮受第一樂若緣眾生則不緣道法亦如是以斯義故緣天尊者名為無緣天尊慈之所緣一切眾生如緣父母兄弟妻子眷屬以是義故名眾生緣法緣者不見父母兄弟妻子眷屬見一切眾生皆從緣生是名法緣无緣者不住法相及眾生相是名無緣悲喜捨心亦復如是是以名三不應有四天尊曰人有二種一者見行二者愛行見行之人多修慈悲愛行之人多修喜捨是故應二不應有四天尊曰夫无量者名曰无边邊不可及故名无量者則應是一不應有四若有四者何得无量是故應一不名四也天尊告靈華真人善男子諸天聖人為諸眾生所宣法要其言秘

客唯子可知或為諸衆生說一因緣如說何者為一因緣所謂一切有為之法善男子或說二種因緣及果或說三種煩惱業苦或說四種元明諸行生與老死或說五種所謂受取有及生或說六種三世因果或說七種謂識名色六入觸受及以愛取或說八種元明行及生老死其餘八事或說九種生老病死善男子如是因緣為衆生故種種分別無量心法亦復如是善男子以此義故於諸天尊深秘行處不應生疑善男子天尊有大方便委曲教化子細宣揚令一切衆生深解法性除疑惑心无苦說苦无樂說樂无因說因无果說果无真說真无法說法无仙說仙无道說道善男子天尊以是无量方便為調伏衆生豈虛妄耶善男子或有衆生貪於財寶我於其人自化其身富貴長者於无量劫歲隨其所須種種供給然後教化令其解悟无上正真大道若有衆生貪著五欲於无量歲以知五欲充滿其願然後勸化令其安住无為之地曉悟无上正真大道若有衆生自恃榮

豪我於其人无量歲中為作僕使趨走給侍得其心已即復勸令安住无為之境明達无上正真大道若有凡夫衆生心生狠戾自作惡事須人呵諫我於无量歲中教誨呵諫慰喻其心令復調順然後復勸令入清淨之境明曉悟解无上正真大道之心善男子天尊如是於无量歲以種種方便令諸衆生入清淨之境修是无上正真大道豈虛妄耶諸聖人雖處穢惡无所染汚猶如明珠在沙磧中猶如蓮花在濁水內善男子應知如是四無量義是无量心如汝所言慈能斷瞋悲亦斷恚何以故善男子恚有二種一能奪命二能鞭撻修慈則能斷彼奪命修悲則能除彼鞭撻善男子以是義故豈非斷恚耶復次瞋有二種一瞋衆生二瞋非衆生修慈心者斷瞋衆生修悲心者斷非衆生復次瞋有二種一者有因緣二者无因緣修慈心者斷有因緣修悲心者斷无因緣復次瞋有二種一者於過去久已積集二者於見在今始積集修慈心者能斷過去修悲心者斷於見在復次瞋

有二種一瞋聖人二瞋凡夫修慈心者斷瞋聖人修悲心者斷瞋凡夫復次瞋有二種一者上二者中修慈斷上修悲斷中善男子以是義故則名為四何故難言應三非四是故靈華真人是无量心類例相對分別為四復以器故應名為四若有慈則不得有悲喜捨心以是義故應四不滅善男子以行分別故應有四若行慈時無悲喜捨是故善男子以无量故亦得名四无量者則有四種有无量心有緣非自在有无量心自在非緣有无量心亦緣亦自在有无量心非緣非自在何等无量有緣非自在緣於无量无边衆生不能得自在雖得參真染法或得或不得何等无量自在非緣如緣父母兄弟姊妹妻兒欲令安樂无量緣何等无量亦緣亦自在謂諸天聖人何等无量非緣非自在晚學法人不能廣緣无量衆生亦非自在善男子以是義故名四无量非諸晚學法人所知乃是諸天聖人境界善男子如是四事晚學法人雖名无量少不足言諸天聖人乃得名為无量无边

靈華真人白天尊言如是如是實如聖言諸天聖人所有境界非諸晚學法人所及天尊頗有真人住於大乘元陽經中得慈悲心非是大慈大悲心不天尊言有善男子真人若於諸衆中三品分別一者所觀二者慈憫三者中人於親人中復作三品謂上中下慈憫亦爾是真人童子於上親所與憎上樂於中下親亦復平等與憎上樂於上怨所與少分樂於中怨所與中品樂於下怨所與憎上樂真人如是轉增修習於上怨所與中品樂於中下怨等與上轉復修習於上中等與上樂若上怨所與上樂者爾時得名慈心成就真人爾時於善父母及上怨所得平等心无有差異善男子是名得慈悲大慈也天尊何緣真人得如是慈猶故不得名為大慈悲善男子以難成故不名大慈何以故昔於无量劫中多集煩惱不修善法是以不能於一日中調伏其心得堅固相无有懈退善男子煩惱之人堅牢難去真道之心輕薄易去譬如家犬不畏於人山林野鹿見人怖走瞋恚難去

如守家犬慈心易失猶如野鹿是故此心難可調伏以是義故不名大慈復次善男子譬如畫石其文恒在畫水易滅勢不可住瞋恚難除譬如畫石善根易滅猶如畫水是故此心難得調伏如大火聚其明久住電光之明其光不停瞋火聚慈如電光是故此心難得調伏以是義故不名大慈善男子真人童子住於真地名曰大慈何以故善男子最極惡者名為邪見初住真地修大慈時作邪見時心无差別不見其過不生其瞋以是義故得名大慈善男子為諸凡愚除无利益是名大慈欲與凡愚无量利樂是名大慈於諸凡愚心生歡喜是名大喜无所擁護名為大捨若不見我法相已身見一切法平等无二是名大喜捨自捨已樂施與他人是名大喜捨善男子唯四无量能令真人增長具足四種威儀其餘諸行不必能爾善男子真人童子先得四无量心然後乃發无上正真大道之心次第方得出世間者善男子因世无量得出世无量以是義故名大无量靈華真人白天

尊言除无利益與利樂者實无所為如是思惟即是虛觀无有實利天尊譬如道士觀不淨時見所著衣服悉是皮相而實非皮所可食豈皆作蟲相而實非蟲觀好美莖作糞穢汁相而實非糞穢觀所食乳酪猶如髓腦而非髓腦觀骨碎棘猶如粉相而實非粉四无量心亦復如是不能真實利益衆生今其得樂雖言發口與衆生樂而實不得如是之觀非虛誑耶天尊若非虛妄實與衆同者彼諸衆生何故不以諸天聖人威力故一切受樂。若當真實不得樂者如天尊所說我念往昔唯修慈心經此劫世界百返成壞不來此生世界成時生於龍變梵度天上世界破時生於太極平育天上若有衆生能發道心於我所唯修慈悲乃得如是人天果報若不實者云何得與此義相應天尊言善哉善哉善男子汝真勇猛无所畏懼即為靈華真人而說偈言
善能明法相 不起三毒心 所為平等行 是能宣妙音 百姓男女輩 當以淨神襟

是名觀行品 得果會香林 天明諸道士
明律善幽深 從容紫微上 窈窕玉京岑
若能體真實 玄義必須尋 六時常讀誦
八節恒歌吟 凡夫及衆生 當除殺盜姪
身口意業盡 邪鬼不能侵 一切善因果
皆緣願所欽 我今說此頌 開發諸迷沉
聖人甘露味 妙藥隨意斟 仙意奉法服
玉女上神簪 元陽隱密倡 猶如五合琴
子能辯至要 身體淨黃金
善男子夫修大慈者實為非妄想是其真實
理若是下仙初學之人是名虛妄諸天聖人
真實不虛云何知耶善男子真人童子修行
如是元陽上品大乘經者觀土為金觀金如
土地為水相水為地相水為火相火為水相
地為風相風為地相有為无相真為假相實
為空相隨心所成无有虛妄觀諸衆生非為
衆生觀非衆生為實衆生隨其心成无有虛
妄善男子當知真人童子四无量心是真實
義非真實義復次善男子云何名為真實思
微謂能斷除疑網息諸煩惱故善男子夫修

慈心者能斷貪愛修悲心者能斷瞋恚修喜
心者能斷不樂修捨心者能斷貪恚及衆生
相以是義故名真實義復次善男子真人修
四無量心能為一切諸善根本善男子真人
童子若不得見貧窮衆生无緣生慈若不慈
則不能起慈施心以是因緣令諸凡夫得安
穩樂所謂飲食車乘衣服香華牀席卧具種
種珍玩種種甘果種種文繒種種錦繡如是
施時心无悔惜不生貪著必定迴向无上正
真大道其心爾時无所歸依妄想永斷不為
恐懼名稱利養不求人天所受快樂不生驕
慢不望反報不為誰他故行布施不求報故
諸所施時不見受者持法破法是由非由此
是善知識作此施時不擇日揀時直心布施
无有悔恨亦復不計飢窮豐樂不見因果此
是凡夫此非凡夫是福非福雖復不見施者
受者及以衣物乃至不見斷及果報而常行
施无有斷絕善男子真人若見持法破法乃
至果報終不能施若不散捨則不具足自然
果若不具足自然果則不能成无上正真大

道善男子譬如有人身被毒箭其人親戚欲
令貞吉為除毒故即命良醫而為拔箭彼人
方言且待莫解我今當觀如是毒箭從何方
來誰之所射為是憎惡之人為是鬼神所害
為是自然自有如是癡人竟未能知尋便命
終善男子真人亦爾若行施時分別受者持
法破法乃至果報終不能施若不能施則不
具足自然之果則不能成无上正真大道復
次真人童子行施散時於諸凡夫慈心平等
猶如子想又行施時於諸凡夫衆生起慈念
想譬如父母瞻視病子行施散時其心喜悅
猶如父母見子病愈想既施散之後其心施
捨猶如父母見子長大能自養活想是真人
童子於慈心中布施食時常作是念我今所
施悉與一切凡夫共之以是義故令諸凡夫
得大智食勤心迴向无上大乘元陽妙經願
諸凡夫一切衆生平等一想得善智食不求
高貴富饒之人乞求飲食願諸凡夫衆生得
食吾食不求他食願諸凡夫一切衆生悉得
自然之食皆令飽滿攝取无礙增於善根願

諸凡夫一切衆生解達空相得无礙身猶如
虛空願諸凡夫一切衆生常爲受者憐愛一
切爲衆福田善男子真人童子修慈心時凡
所施食應當堅發如是无上正真等願復次
善男子真人童子於慈心中布施漿時常作
是願我今所施悉與一切凡夫衆生共之以
是義故今諸凡夫衆生趣大乘河飲八種味
水速悟无上正真之道離諸疑滯斷煩惱業
渴仰法味愛樂大乘元陽經典具足法身得
諸法藏入於甚深智慧大海願諸凡夫一切
衆生得甘露水飲醴泉味真道出世皆得清
淨如是諸法願諸凡夫一切衆生具足无量
百千法味具法味已得見道性見道性已能
兩法雨雨法雨已道法徧覆猶如虛空復令
其餘无量衆生得一法味所謂大乘非諸邪
見衆生異種差別非善之味善男子真人童
子於慈心中布施飲時應當堅發自然之誓
如是等願復次善男子真人童子於慈心中
施諸衣服錦繡車乘卧具常作是願我今所
施悉與一切凡夫衆生共之以是因緣普令

一切凡夫衆生成於大乘元陽之果得住大
乘元陽之果不退大乘元陽之果不有動轉
大乘元陽之果善男子於慈心中施諸衣服
錦繡車乘卧具時常應如是堅發誓願復次
善男子真人童子於慈心中布施衣時常作
是願我今所施悉與一切凡夫衆生共之以
是因緣今諸凡夫一切衆生得慙愧衣法界
覆身裂諸邪見衣服離身得清淨身所受諸
觸淨善无礙顏色溫潤肌膚柔軟恒光无色
願諸一切凡夫衆生皆得无色之身過諸色
境得入无色大乘祕藏善男子真人童子於
慈心中布施衣時應如是念堅發自然誓願
復次善男子真人童子於慈心中布施百和
寶香時常作是願我今所施悉與一切凡夫
衆生共之以是因緣今諸凡夫一切衆生聞
其香薰皆得悟道願諸凡夫一切衆生形如
皎月所見諸色微妙第一願諸凡夫一切衆
生皆獲一切萬善莊嚴願諸凡夫一切衆生
隨意得見可意之色願諸凡夫一切衆生常
值名友得无礙香離諸穢氣願諸凡夫一切

衆生具諸善業无上寶實願諸凡夫一切衆
生知識和悅无有憂惱悲悟苦空不相愛念
願諸凡夫一切衆生持无礙法香氣芬布
滿世界願諸凡夫一切衆生得堅固法无悔
恨法一切戒法離諸破法悉得无法未曾有
法无師法无作法无穢法无汚法染竟法畢
竟法得平等法塗割善惡等无偏愛願諸凡
夫一切衆生得无上法大乘之法非小乘法
願諸凡夫一切衆生具足自然道果猶如真
人初得法時願諸凡夫一切衆生悉爲布施
持戒忍辱精進神妙香華之所薰修願諸凡
夫一切衆生皆得成就元陽上品微妙寶香
其實香氣徧滿虛空願令凡夫一切衆生純
食元陽上品大乘香饌如蜂採花取其香味
願諸凡夫一切衆生得成自然无量功德所
被之身善男子真人童子於慈心中布施香
時常當堅發如是自然誓願復次善男子真
人童子於慈心中施榻席時常作是願我今
所施皆與一切衆生共之以是因緣今諸凡
夫得天中所卧之榻得大智慧坐四如意處

卧於真人之榻不卧邪魔非法之榻願諸凡夫得安穩卧離生死席成自然師子卧榻願諸凡夫坐此榻已復為其餘无量凡夫示現神通有大智力願諸凡夫住此元陽大宮為諸凡夫演說道法願諸凡夫坐无上榻不為世法之所降伏願諸凡夫得忍辱榻離於生死飢餓困苦願諸凡夫得无畏榻永離煩惱一切怨賊願諸凡夫得清淨榻專无上正真之道願諸凡夫得善法榻常為善友之所擁護願諸凡夫得左脇卧榻依於聖人所行之法善男子真人童子於慈心中施榻席時應當堅發如是誓願復次善男子真人童子於慈心中施屋宅時常作是願我今所施皆與一切凡夫共之以是因緣令諸凡夫處大乘屋修行善友所行之行修大悲行度妙行諸天真人所行之行无邊廣大如虛空行願諸凡夫皆得正念遠離惡想願諸凡夫悉得安穩住常樂淨永離四傾願諸凡夫悉皆受持微妙文字願諸凡夫必為无上一切智屋願諸凡夫悉皆得入觀喜甘露法屋願諸凡夫

初中後心常入元陽清淨之宅願諸凡夫於未來世常處真人所居宮室善男子真人童子於慈心中施屋宅時常當堅發如是誓願復次善男子真人童子於慈心中施燈明時當作如是願我今所施悉與一切凡夫共之以是因緣令諸凡夫光明无量安住道法願諸凡夫常得明明願諸凡夫得色光澤微妙第一願諸凡夫肉眼清淨无有翳障願諸凡夫得大惠炬善解无我无凡夫相无入无命願諸凡夫皆得了見清淨法性猶如虛空願諸凡夫其目明皎遠見十方恒河世界願諸凡夫得法光明徧照十方无量國土願諸凡夫得无礙明皆悉得見清淨法性願諸凡夫得大智明破一切闇及有邪魔願諸凡夫得无量光明普照无量无邊諸天世界願諸凡夫燃大乘法燈離小乘見願諸凡夫所得光明滅無明闇過逾千日願諸凡夫得大光明徧照三千世界所有幽闇皆悉朗徹願諸凡夫具足五眼悟於法相成无上師願諸凡夫不見無明願諸凡夫悉得大乘元陽微妙光

明示悟凡夫真人實法之性善男子真人童子於慈心中施燈明時常應堅發如是誓願善男子諸天真人童子慈為根本修習慈心能生如是无量善業所謂穢惡出息入息无常生滅四聖果處五種善業三達觀行八種功德一切入空無有形相知他人智及諸神通智本際智仙人智童子智真人智天尊智善男子如是等法慈為根本以是義故慈是真實非虛妄也善男子能為善者名實思微實思微者即名為慈慈即天尊慈即大乘大乘即慈慈即天尊善男子慈即自然慈即真道真道即慈慈即天尊善男子慈即仙人仙人即慈慈即天尊善男子慈者能為凡夫一切眾生作於父母父母即慈慈即天尊善男子慈者乃是不可思議諸法境界不可思議諸法境界即是慈也當知慈者即是天尊善男子慈者即是凡夫法性如是法性久為煩惱之所覆蔽故令凡夫不得親見法性即慈慈即天尊善男子慈即太虛太虛即慈慈即天尊善男子慈即虛空虛空即慈慈即天尊

善男子慈即是常常即是真真即是道道即是慈慈即天尊善男子慈即是喜喜即是仙仙即是法法即是慈慈即天尊善男子慈即是清清即是淨淨即是道道即是法法即是慈慈即天尊善男子慈即是我我即是道道即是法法即是士士即是慈慈即天尊善男子慈即甘露甘露即是慈慈即法法性性即是道道即是士士即是慈慈即天尊善男子慈者即是真人无上之道道即是慈慈即天尊善男子慈者即是諸天聖人无量世界无量世界即是慈也當知是慈即是天尊善男子慈若有無非有非無無如是慈非諸下仙初學等能思義善男子慈若不可思議法不可思議法性不可思議天尊亦不可思議善男子真人童子住於大乘妙死修如是慈雖復安於睡眠之中而不睡眠勤精進故雖常明了亦無明了以無眠故於其眠中諸天雖護亦無護者不行惡故眠不惡夢無有不善雖睡眠故命終之後雖得生天亦無所生得自在故善男子夫修慈能得成就如是無量

无边功德善男子是大元陽上品微妙經典亦能成就如是无量无边功德諸天真人亦得成就如是无量无边功德靈華真人白天尊言一切真人童子所有思微悉是真實下仙晚學非真實者一切衆生何故不以真人童子威力等受快樂若諸衆生實不得樂當知真人所修慈心爲無利益天尊言善男子真人之慈非不利益有諸衆生一切凡夫或必受苦或有不受苦有衆生必受苦者真人之慈爲無利益謂一切凡夫若有受苦不必定者真人之慈則爲利益令彼衆生悉受快樂善男子譬如有人遙見猛獸毒蟲自然生於憂怖夜行見鬼亦生恐懼善男子如是諸人自然怖畏衆生如是見修慈者自然受樂善男子以是義故真人修慈是實思微非無利益一切衆生應當至心供養讀誦元陽觀行上品妙經深解慈悲喜捨之心皆得度脫登无上自然大道之果善男子等勿得輕慢疑惑邪心不信經教毀聖文若有心生不信當墮三惡道中畜生之報於是靈華真人

神仙眷屬善男子等既得明了心無疑滯一時恭敬作禮左繞三匝稽首而去

太上靈寶元陽妙經卷之五

爾時元陽妙樂真人與諸天大衆神仙眷屬八萬四千童子俱會元陽世界設大高座香華伎樂幡幢寶蓋萬種羅列徧滿虛空一時剖析玄微元陽秘藏得使來生男女咸聞聖教天尊於是發大慈悲勸諸光相演說微密經典開悟衆生如世間知者我亦得知世間不知者我亦悉知其義云何善男子一切世間不知不見不覺道性若有知見知覺道性者不名世間名爲真人世間凡夫亦復不知不見不覺三十六部尊經三十六種因緣元陽上品觀行之義若能知見覺者不名世間當名真人善男子是名世間不知見覺云何世間所知見覺所謂造化之法主世界終始斷常二見說言初心至非非想名爲真道善男子是名世間所知見覺真人童子於如是事亦知見覺真人如是知見覺已若言不知不見不覺是爲虛妄虛妄之法則爲是罪以是罪故墮於地獄若男若女說言無道當知

是輩則名爲外魔之親屬名爲毀謗道法如是毀謗法者名謗天尊如是之人即墮三惡道中非人之類受諸苦報爾時妙樂真人及諸法衆聞是事已即以讚歎而作偈言

恩愛慈衆生 爲我說元陽 善拔衆毒箭

故稱大醫王 世醫所療治 雖差還復傷

天尊所治者 究竟得元殃 聖人甘露藥

是諸神妙藥 衆生既服已 不死亦不亡

天尊今爲說 剖析隱密章 衆生聞秘藏

即登自在場

妙樂真人說是偈已即啓天尊如專所說一切世間不知見覺元陽童子悉能知見覺者若使元陽童子是世間者不得說言世間不知不見不覺唯是元陽童子能知見覺若非世間有何異相

天尊言善男子言真人童子者亦是世間亦非世間不知見覺者名爲世間知見覺者不名世間汝言有何異者我今當說善男子若男若女若有初聞是元陽上品觀行妙經即生敬信發无上正真大道之心是則名爲世

間童子一切世間不知見覺如是童子亦同世間不知見覺童子聞是經已知有世間不知見覺應是童子所知見覺知是事已即自思惟我當云何方便修習得知見覺復念念言唯當至心修持法戒善男女以是因緣於未來世在處常元驕慢邪見疑網終不說言天尊畢竟入於玄妙是名真人修持戒行行既清淨次修真法故在生處正念不忘所謂一切衆生悉有道德性三十六部尊經天尊真人常樂我淨一切真人童子悉見道性如是等事當而不志因修定故得十二空是名真人童子修清淨法戒法戒已備次修淨慧以修淨慧故所受持法戒牢固不動善男子譬如玉京之山不爲四風之所搖動真人童子亦復如是不爲四倒之所傾動善男子真人爾時自知見覺所持法戒無有傾動是名真人所知見覺非世間也善男子真人所持法戒牢固不動心無悔恨故心得歡喜得歡喜故心得悅樂得悅樂故心得安穩心安穩故得无動定得无動定故得實知見得實知見

故獸離生死獸離生死故便得自在得自在故明曉道性是名真人所知見覺非世間也善男子是名世間不知見覺而是真人所知見覺妙樂真人復言云何元陽童子修持法戒心无悔恨乃至明了見於法性

天尊言善男子世間戒者不名清淨何以故世間戒者為於有故性不定故非畢竟故不能廣為一切眾生以是義故名為不淨以不淨故有悔恨心以悔恨心故心無歡喜無歡喜故則無悅樂無悅樂故則無安吉無安吉故無不動定無不動定故無實知見無實知見故則無獸離無獸離故則無解脫無解脫故不見法性不見法性故終不能得無上大道之果是名世間法不清淨善男子真人童子清淨法者法非法故非為有故定畢竟故為眾生故是名真人法清淨也善男子真人童子於法戒中雖不欲生无悔恨心無悔恨心故自然而生善男子譬如有人執持明鏡不期見面像自現亦如農人散種良田不期生芽而芽自生亦如燃燈不期滅闇而闇

自滅善男子真人童子能持法戒無有悔恨之心自然而生亦復如是以淨法故心得歡喜善男子如端正人自見面貌心生歡喜能持法戒者亦復如是善男子破法戒之人見法戒不淨心不歡喜如形殘跛陋者自見形像面貌不生歡喜破法戒之人亦復如是善男子譬如牧牛有二人一持略餅一持漿餅俱共詣市而欲賣之於路脚跌二餅俱破一則喜悅一則愁惱持戒破法亦復如是能用心恭敬持淨法戒者心生歡悅心生歡悅故則便思惟天尊諸法中說有能持清淨法戒者則得真道我今修習如是法戒亦應得之以是因緣心則歡樂元陽真人復言喜之與樂有何差別善男子不作惡時名為喜悅心持法戒名之為樂善男子觀於生死則名為喜見於法相名之為樂下名為喜上名為樂離諸共法名之為喜得不共法名之為樂以汝戒淨故形貌輕柔口無麤過真人童子爾時若見若聞悉無諸惡以無惡故心得安穩以安穩故則得靜定得靜定故得實知見得

實知見故獸離生死獸離生死故則得逍遙得逍遙故得見法性見法性故得於真道是名真人童子清淨持於法戒非世間法戒何以故善男子所受持清淨法戒五法佐助云何為五法佐助一者信二者慧三者愧四者善知識五者宗敬真法離五蓋故所見清淨離五見故心無疑滯離五疑故云何名五疑一者疑道二者疑法三者疑真四者疑戒五者疑不放逸真人爾時即得五根所謂信念精進定慧得五根故得五種真法謂色道遙乃至識道遙是名真人童子清淨持戒非世間有也善男子是名世間之所不知見覺而是真人所知見覺善男子若我弟子受持讀誦元陽上品經有破戒者有人呵責輕賤毀辱而作是言若元陽與藏大乘經典有威力者云何今汝毀謗所受法戒若人受持元陽妙經毀禁戒者當知是經為無威力若無威力雖復讀誦為无利益若是輕毀元陽經故今无量无边眾生墮於地獄受持是經而毀戒者則是眾生大惡知識非我弟子是諸邪魔

眷屬如是之人我亦不聽受微妙經典不以毀戒謗法受持修習善男女若我弟子中有人能精進受持讀誦書寫演說元陽祕藏大乘經者當正身心慎莫調戲輕躁舉動口為調戲心為輕動求有之心名為輕動身造諸業名為調戲若我弟子中求有造業不應受持是元陽經品微妙之義若是受持經者人當輕呵而作是言若天尊祕藏大乘經有威力者云何令汝求有造業若受持經者求有造業當知是經為有威力若无威力雖復受持讀誦為无利益緣是輕慢元陽經故復令无量无边眾生墮於三塗地獄受持讀誦是經求有造業則是眾生大惡知識非我弟子是邪魔親屬復次善男子若我弟子中有人讀誦書寫演說大乘經義莫非時說莫非法說莫不淨說莫輕心說莫滅道法說莫熾然法說善男子若我弟子受持是經非時而說乃至熾然世法說者人當輕呵而作是言若元陽祕藏大乘經有威力者云何令汝非時而說乃至熾然世法而說若持經者作如是

說當知是經為无威力若无威力雖復讀誦為无利益緣是輕慢大乘經故令无量眾生墮於地獄受持是經非時而說乃至熾然世法而說則是眾生大惡知識非我弟子是魔眷屬善男子若欲受持讀誦者說大元陽經者說法性者說大乘祕藏者說神仙經者說童子得道者說逍遙解脫者見法性者先當清淨其身淨故則无呵責无呵責故令无量人於元陽經生清淨心恭敬讀誦受持是經若聞一偈一句一字嗟歡歡喜為人演說開悟眾生便得无上正真大道之心當知是人則是眾生真善知識是我弟子非為外魔眷屬是名真人也善男子善女人是名世間之所不知不見不覺而是真人知見覺復次善男子云何名一切世間所不知見覺而是真人所知見覺所謂六念處何等為六一者念天尊二者念真人三者念童子四者念法戒五者念道士六者念慈悲善男子云何念天尊聖人應正偏知明行是善逝世間解无上士調御天人師常不變易具足威力身无所

畏畢竟清淨到於彼岸无能勝者无見傾者无有怖畏不驚不恐无侶无師自悟疾知大智利智深智解脫智成就人王調御天人師為大施主為大法師以知法故名大法師以知義故名大法師以知時故名大法師以知足故名大法師以知我故名大法師知眾生種種性故名大法師知一切眾生諸根利鈍中故名大法師說元陽妙道故名大法師復次妙樂真人上白天尊言云何為應天尊答曰世間之法悉名怨家法應害故故名為應夫四魔者是善男子怨天尊為善男子時能以智慧破壞四魔是故名應復次應者名為遠離為善男子時應當遠離无量煩惱故名為應復次應者名樂過去天尊為善男子時雖於无量劫為眾生故受諸煩惱終无不樂而常樂之天尊亦爾是故名應又復應者一切人天應以種種香華伎樂而供養之故名為應云何正偏知正者名不顛倒偏知者於顛倒中无不通達又復正者名為苦行偏知者知因苦行定有苦果又復正者名世間中

偏知者畢竟定知修習中道得於无上正真之果又復正者名為可數可量偏知者不可數不可量是故號天尊為正偏知善男子假使真乘於无量劫觀一色不除不能盡知以是義故无有偏知云何明行足明者名得无量善果行名脚足善果者名無上正真之道是故名為明行足又復明者名呪行者名吉足者善男子是名世間義呪者名為解脫吉者名為无上正真之果是故名為明行足又復明者名先行者名業足者善男子是名世間義先者名不放逸業者皆得自在之果又復明者名為三明云何為三明一者真人明二者天聰明三者无明明真人明者即是自然之果天聰明者即是慧眼无明明者即是畢竟空行者於无量劫為衆生故修諸善業足者明見法性以是義故名明行足云何善逝善者名高逝名不高善男子是名世間義高者名為无上正真大道不高者即是天尊心也善男子必若高者不名天尊是故天尊名為善逝又復善者名為善知識善男子是

名世間義善知識善知識者即是初發心果名為元陽上品天尊不捨最初發心得大妙經是故天尊名為善逝善男子是世間義名見法性得深妙理善男子真道之性實非有也天尊因世間故說言是有善男子譬如有人實无有人實無有子謬稱有人實无有道德謬言有道德真法亦爾因世間故謬言是有其人成无上道故名善逝云何名无上士上士者名之為斷无所斷者名无上士天尊真人无有煩惱故无所斷是故號天尊為无上士又上士者名為鬬爭无上士者无有鬬爭聖人无爭故號天尊為无上士又上士者名語可壞无上士者語不可壞天尊所言一切衆生所不能壞是故號天尊為无上士又上士者名為上座无上士者為无上座三世聖人更无過者是故號天尊為无上士爾時妙樂真人心復有疑諮問天尊云何調御大丈夫天人師天尊答曰一切真人童子若能修於四法則名大丈夫天人師何等為四一者依善知識修學真法二者心能聽法深解

妙意三者思惟玄義无有疑難四者遵於法戒行能伏物善男子具是四法則名大丈夫无此四法則不名為大丈夫何以故身雖是丈夫心懷詭曲意有邪姪是故不得稱為大丈夫天尊威力能調伏衆生令知正法是故號曰調御大丈夫天人師復次善男子諮問天師云何謂調御天人師天尊曰師有二種一者善教二者惡教我今以善法教諸衆生何等善法謂身口意善哉今教諸衆生作如是言善男子汝當遠離身不善業何以故以身惡業是可遠離得自在是故我以此法教汝若此惡業不可遠離得自在者終不教汝令遠離也若諸衆生離惡業已墮三惡道者无有是處以能遠離成无上正真之果是故我今常以此法教化衆生口意亦爾是故號曰天人師復次昔未得道今以悟解以所得道為衆生說從本已來未修善行今以修竟以所修為衆生說自破无明復為衆生破滅无明自得淨眼復為衆生破除盲冥今得淨眼自知二智演說二智既自解悟復為衆生

說解悟法自度无量无边生死大海復令衆生皆悉度脫自得无礙復教衆生令无怖畏自得无上正真之道復爲衆生演說無上正真之道是故號天尊爲調御天人師復次善男子心又生疑輒敢諮問云何名天答曰天者名晝晝長夜短是故名天又復天者名无愁惱常受歡樂是故名天又復天者名爲燈明能破黑暗而爲大明是故名天亦以能破惡業黑暗得諸善業而生天上是故名天又復天者名吉以吉積故得名爲天又復天者復名爲日日有光明故名曰爲天以是義故名爲天也人者名爲能多恩義又復人者身口清淨又復人者名有傲慢又復人者能破傲慢善男子我今雖爲一切衆生无上調御師而經中說爲天人師何以故善男子諸衆生中唯天與人能發自然道意修十善業能得无上正真大道之果是故號我爲天人師復次善男子諸問天尊疑心未盡更有諮請云何名爲大道天尊答曰道者名通既自通曉復能通他善男子譬如有人通知有賊賊

无能爲真人童子能通一切无量煩惱既通子已令諸煩惱无所能爲是故名道爲通以是通故不生不老不病不死是名真道善男子當知我道法中有大吏兵天驕甲卒天丁力士能收邪魔惡鬼一切煩惱盡皆消伏又能成就諸善法故有大威力徧十方故又能種種大布施故又於无量劫中不毀壞故善男子若男若女能如是念道者若行若住若坐若卧若晝若夜若明若闇常得不離見諸真道善男子何故名爲真道應正徧知乃至真人童子而有如是无量功德大名稱耶善男子具人於昔无量劫中恭敬父母師長於无量劫常爲衆生而行布施堅持禁戒修集忍辱勤行精進真定智慧大慈大悲是故今得七十二相八十種好真金之體又復真人童子於昔无量劫中修習信念進定慧根於諸師長供養朝拜常爲法利不爲苦害真人童子若持三十六部尊經若讀若誦若講若說常爲衆生令得逍遙解脫无爲安穩歡樂終不自爲何以故真人常修出世間心無取

捨心无繫縛心无生死心无疑網心无貪欲心无瞋恚心无愚癡心无驕慢心作如是心已皆得清淨深曉道源无纖濁意无煩惱意无苦意无量意无廣大意无空虚意无世間意常自在意常解脫意无報意无願意善願意无語意柔軟意不住意不退意无常意正直意无曲意淳善意如是意已故得无所畏常樂我淨是故修无上正真大道之心是故真人童子之果云何真人童子念法善男子思惟諸法所可說法最妙最上因是法故能令衆生得見在果唯此正法无有時節天明所見非肉眼見然不可以譬喻爲比不生不出不住不滅不始不終不去不來不動不轉不長不短永斷諸樂而安穩樂畢竟微妙非色斷色而亦是色乃至非識斷識而亦是識非業斷業而亦是業非結斷結而亦是結非界斷界而亦是界非有斷有而亦是有非出斷出而亦是出非入斷入而亦是入非因斷因而亦是因非果斷果而亦是果非真斷真而亦是真作是觀行即能體達苦空成於妙

道復次非虛非實斷一切實而亦是實非生非滅永斷生滅而亦是滅非相非非相斷一切相而一是相非教非不教而亦是教非怖非不怖斷一切怖而亦是怖非忍非不忍永斷一切忍而亦是忍如是一切法永能除一切煩惱永能消息清淨无相永斷諸相无量衆生畢竟住處能斷一切生死熾然乃是天尊所遊居處常不變易是名真人童子念法云何念法諸天真人如法而住不可破壞无能撓害不可思議一切衆生橋梁福田雖爲福田无所受取清淨无穢无惡其意調和平等一心无有二見常不變易无有撓觸是名念法云何念戒真人童子思惟有戒不破不犯不壞不雜雖无形色而可護持雖无觸對善修方便可得具足无有過咎真人童子之所讚歎皆獲无量妙因善男子若能修持淨界一切劫盜不敢撓害火不能焚水不能漂若修是戒得自然之果則得无上正真大道之心當爲一切衆生廣說妙法而作救護是名真人我念戒云何念施真人深觀此施乃

是天上正真大道之因諸善男子親近修集如是布施我亦如是親近修習若不惠施不能莊嚴供養四部之衆施雖不能畢竟斷結而能除破見在煩惱以施因緣故常爲十方无量无边恒河沙數世界衆生之所讚歎善男子施衆生食則施其命以是果報得道之時常不變易以施樂故成道之時則得安樂童子施時如法求則不侵彼施此是故成道得清淨之果真人施時令諸衆生不求自得是故成道得自然果我以施因緣令他得力是故成道得二種施因緣令他得語是故成道得三種善根真人童子修習此施爲无上因我亦如是修習布施施爲真善因是名念施云何念天有九天神仙處乃至非想非非想多聞布施智慧得九天神仙處乃至得非想非非想處我亦有分然非我欲何以故九天神仙處乃至非想非非想處皆是无常以無常故生老病死以是義故非我所欲譬如幻化誑於愚夫智慧之人所不惑著如幻化者即是九天神仙處乃至非想非非想處愚者

即是一切凡夫我則不同凡夫愚人我曾聞有第一義天謂諸真人童子常不變易以清淨常住故不生不滅不老不病不死我爲衆生精勤志求第一義天何以故第一義天能令衆生除斷煩惱猶如意樹若我有信乃至有慧則能得是第一義天是名真人念天善男子是名真人非世間也是爲世間不知見覺而是真人所知見覺善男子若我弟子謂受持讀誦書寫演說元陽上品微妙祕藏經典及以受持讀誦書寫敷演解說大乘經教等無差異者是義不然何以故善男子元陽經者即是一切諸天真人神仙甚深祕藏以是諸天真人甚深祕藏是則爲勝善男子以是義故元陽妙經甚奇微妙不可思議妙樂真人白天尊言我今亦知元陽妙經甚奇微妙不可思議道法尊高不可思議真人童子亦不可思議以何義故復言真人不可思議善男子无有教者而能自發无上道心既發心已勤修精進正使大火焚燒身首終不求救捨念法心何以故真人童子常自思惟我

於無量劫中或在三塗地獄畜生之中天上人間為諸劫火所燒初未曾得一決定法決定法者即是无上正真大道之因終不護惜身心與命我今為无上正真大道正使碎身猶如微塵終不放捨勤修精進也何以故勤精進心即是无上正真大道之因善男子如是真人未見无上正真大道乃能如是不惜身命況復見已是真人不可思議又復真人童子所見生死无量无邊諸惡過患非是一切邪魔所及雖知生死无量无邊諸惡過患為衆生故於中受苦不生厭離是故復名不可思議真人童子為衆生故雖在地獄受諸苦惱託跡同凡故名受苦不可思議善男子譬如長者其家失火長者見已從舍而出諸子在後未脫火難長者爾時定知火害為諸子故旋還救護不見其難真人童子救護衆生亦復如是雖知生死多諸過患為衆生故處之不厭是故復名不可思議善男子无量无邊一切衆生發自然道意見生死中多諸過患心即退悔歛閉六情絕除五欲修於妙

道思念真經是故復名不可思議善男子若有唱言我能浮度大海如是之言不可思議不天尊曰如是之言或可思議或不可思議何以故若人度者則不可思議如妄言度者即名可思議善男子我今所說論其實錄必无虛謬天尊言人中亦有可思議者不可思議者天尊曰人有二種一者聖人二者凡人凡夫之人則不可思議賢聖之人則可思議善男子我說凡夫不說聖人天尊曰若凡夫之人實不可思議善男子凡夫之人實不能度大海水也而是真人實能度彼生死大海是故復名不可思議善男子若有人能將藕絲曳懸王京山者可思議不天尊曰善男子於一念頃悉能稱量一切生死是故復名不可思議善男子我於无量劫中常觀生死无常无樂无淨而為衆生分別演說常樂我淨雖如是說然非邪見是故復名不可思議善男子如人入水水不能溺入猛火火不能燒如是之事不可思議真人童子亦復如是雖處生死不為生死之所惱害是故復名不可

思議善男子人有三品謂上中下云何名為上中下下品之人初入胎時作是念言我今在廁衆穢歸處諸死屍間棘刺叢林大幽闇中初出胎時復作是念我今出廁諸穢惡處乃至出於大幽闇中中品之人作是念言我今入於衆樹果林清淨河中閨閣宮宅出時亦爾上品之人作是念言我昇殿堂在鶯林間乘於駿馬登上高山出時亦爾真人童子初入胎住時知住出時知出不起貪欲瞋恚之心而未得初住之地是故復名不可思議善男子元陽上品祕密奧藏實不可思議不可以譬喻為比善男子心亦不可譬喻比量真人童子无有師資受學之處而能得是元陽上品甚深意義得此法已心无慳吝常為衆生而演說之是故名不可思議善男子有身遠離非口有口遠離非身有非身口而亦遠離身遠離者謂殺盜婬是名身遠離非口遠離者謂離妄語談毀經論惡口亦舌論曲誹謗是名口遠離非身非身口亦遠離者所謂遠離貪嫉惡妬瞋恚邪見善男子是名

非身非口而能遠離善男子不見一法是身是業一切過患是諸惡業而能遠離是故復名不可思議口亦如是善男子從身離身從口離口從惡離惡從業離業非身非口悉能除洗是名遠離善男子无有一法能壞能作有為法性異生異滅是故此慧不能遠離善男子慧不能破火不能燒水不能溺風不能動地不能持生不能生老不能老住不能住壞不能壞貪不能貪瞋不能瞋癡不能癡以有為性易生易滅故真人童子終不生念我以此慧破諸煩惱而自說言我破煩惱雖作是說非是虛妄是故復名不可思議妙樂真人白天尊言今者始知真人童子深曉法藏不可思議道法微妙元陽經藏及受持者披析至理功德深重不可思議

讀誦書寫演說其義為諸眾生之所恭敬尊重讚歎種種供養當知爾時道緣未滅善男子若元陽經具足流布當爾之時我諸弟子多犯禁戒造作眾罪不能敬信如是微妙經典以不信故不能受持讀誦書寫解說其義不為眾人之所恭敬乃至供養見受持者輕毀誹謗是為慢法非我弟子當知是人將滅不久妙樂真人復白天尊言我親從聖人受如是經義云何為一慢法誹謗道法即當滅乎天尊曰聖人隱形託跡變見无方非是慢法而能毀謗應滅身乎若如是義云何為理若其无者无者說言聖人過去善男子如是之義今當重說至心諦聽有二種法云何二種法一者世法二者第一義法世法可求第一義法則不可求復有二種云何二種一者无常无我无樂无淨二者常樂我淨无常无我无樂无淨則有顯晦常樂我淨則无顯晦復有二種法云何二種法一者外二者內外法者則有可顯內法者則无可顯復有二種云何二種一者有為二者无為有為之法則

有可得无為之法則無可得復有二種云何名為二種一者可得二者不可得可得之法則有始終不可得法則无始終善男子若我弟子受持讀誦書寫解說元陽經典恭敬供養尊重讚歎晨夕禮拜思念神仙當知爾時道法興盛无有終始善男子汝尚所聞真人童子有是經不善男子元陽經者悉是一切聖人秘藏何以故天尊雖說如是經典不說法性不說天尊常樂我淨一切真人不畢竟妙道是故此經名為元陽秘密之藏三十六部尊經所不說故故名為藏如人七寶不出外用名之為藏善男子是人所以藏積寶物為未來事故何等未來事所謂飢年積穀狂賊侵境值遇惡首為用贖命道路艱難財寶得時乃當出賑善男子諸天尊秘密之藏亦復如是為未來世諸惡道士畜不淨物為四眾說天尊畢竟无有滅神虛費供養不敬經典如是等惡見於世時天尊為欲滅是諸惡令得遠離邪見有能供養天尊則為演說是經若是經典秘密之藏无不見時爾時道法

興盛善男子元陽經典常不變易云何難言
元始之時有此經不善男子元始之時所有
人民悉皆淳善智慧滋多雖復志性未曉真
道身心清淨調柔易化有大威德總持不退
善男子今世衆生貪慾厚重多諸煩惱愚癡
喜忘无有智慧多諸疑網信根不立世界不
淨一切衆生咸謂聖人无常遷變畢竟入於
真道是故天尊演說如是經典善男子聖人
之法實亦不盡何以故常不變故善男子若
有衆生我見无我无我見我常見无常无常
見常樂見无樂无樂見樂淨見不淨不淨見
淨真見不真不真見真道見非道非道見道
生見非生非生見生滅見非滅非滅見滅昧
道之語名爲魔語實是魔語以爲真語如是
巧點種種詭誑當知此人墮三惡道不見善
因萬劫沉溺无有生期善男子寧說以索繫
縛猛風不敢說言真道盡昧寧言大火之中
生大蓮華不敢說言真道昧寧說月可令熱
日可令冷不敢說言真道昧善男子若真人
初出得元陽微妙无上正真大道之果未有

弟子解甚深義而聖人隱形變化當知是法
長久住世復次善男子若真人初得大道之
果已有諸弟子解甚深義聖人雖復變化當
知是法久住於世復次善男子若真人初出
得大道之果雖有弟子解甚深義无有篤信
白衣忠良之人敬重道法聖人過去當知是
法長久住世復次善男子若真人初出得於
道果已有諸弟子解深義味多有篤信俗人
敬重道法聖人過去當知真道久住於世復
次善男子若真人初出得大道之果已有諸
弟子解甚深義雖有篤信俗人敬重道法而
諸弟子演說經時貪爲利益雖復如此終爲
過去當知此法長久住世復次善男子若真
人初出得大道之果已有諸弟子解甚深義
復有忠信俗人敬重道法彼諸弟子凡所演
說不貪利益度脫衆生令歸正法雖復如此
終爲誘引當知是法久住於世復次善男子
若真人初得道果已雖有弟子解甚深義復
有忠信白衣清信之人敬重神仙心念道法
而諸弟子多起爭訟互相是非聖人過去當

知是人不久住世復次善男子若真人初出
得於妙果有諸弟子解甚深義復有敬信凡
人尊重道法彼諸弟子修和敬法不相是非
迥相愛重聖人雖復過去當知是法久住不
息復次善男子若真人初得道果雖有弟子
解甚深義復有敬信凡人尊重妙法彼諸弟
子爲一切衆生演說元陽妙法互相恭敬不
起爭訟然去一切不淨之物復自讚言我今
必定得於道果聖人過去當知此法常當住
世善男子若真人初得正真道果已有諸弟
子解甚深義復有中信凡人愛重道法彼諸
弟子能說元陽秘藏甚深經法善修和敬互
相尊重不去一切不淨之物亦不自言須於
妙果聖人過去當知此法久住於世善男子
汝等當知諸法无有定相不可測量不可忖
度何以故隨衆生受性利鈍業根受識有麤
有妙善男子我今慈念衆生无有偏恩貴賤
之心无有人我貪著之心是故我今平等一
相无有二邊善男子譬如良醫爲病服藥隨
其病相應病與藥天尊觀諸衆生煩惱病根

方便教化今知經戒修於正法我今救度衆
生除煩惱業令得清淨无復遺餘汝今當知
聖人久住於世非是過去无有休息爾時元
陽世界神仙眷屬皆得明了无有疑滯妙樂
真人既得總持深解妙理於是歡喜讚歎恭
敬禮拜左繞七市而說偈言

大道體玄妙 至理甚希夷 寄名真實相
隨運應明時 開度諸衆生 號曰天人師
是能合妙藥 爲世作良醫 剖析元陽教
秘密寶可思 八萬諸徒衆 皆得附光威
三塗悉解脫 五苦永停悲 罪寃皆得返
餓鬼悉充飢 神仙乃交映 珠玉自相暉
策鳳往玄都 乘鸞上紫微 衆生既曉悟
无爲信可期 今日蒙恩愛 福祚永巍巍
諸天盡歡樂 稽首辭退歸

太上靈寶元陽妙經卷之六

太上靈寶元陽妙經卷之七

觀行品下

爾時元始天尊在元陽世界寶鸞林樹間將
欲遁世時見國王名曰善種問絕躡地即告
大衆我今當爲是王住世至無數劫不入真
道於是元陽第三真人名曰隨業稽首上白
天尊言當爲一切衆生不入真道何故獨爲
善種國王天尊言善男子是大衆中无有一
人謂我必定入於真道善種國王定謂我當
畢竟永滅是故躡躡自投於地善男子如我
所言爲善種國王不入真道如是深奧之義
汝未能解何以故我言爲者一切凡夫造五
逆者又復爲者即是一切有爲衆生我終不
爲无爲衆生而住於世何以故夫无爲者非
衆生故善種國王即是具足煩惱又復爲者
即是不見道性若見道性我終不爲久住於
世何以故見道性者則非凡夫善種國王即
是未發无上正真大道之心又復爲者名爲
道性善種國王者名爲不生故不見道性以
不生煩惱故則見道性以見道性則安住正

真之道是名不生善男子天尊密語不可思
議道法玄妙不可思議真人清淨不可思議
元陽經典不可思議爾時元始天尊放身威
光八十種好七十二相光明徧照國土清涼
元陽真人與諸大衆神仙眷屬自相謂言我
今鄙陋諸穢未盡以何因緣逢茲瑞相天尊
所放光明其光本无云何忽有非色非无色
非相非无相非無非不无非有非不有非白
非黑非青非黃非欲度衆生故發斯瑞故使
可見有相可說有熱有冷有青有黃有赤有
白是光雖爾實不可說以何因緣放此光明
時衆之中有一第四真人名曰拘正林答言
今此瑞相將爲善種國王身有重疾言世无
良醫治療身心故放光明先治王身然後及
心王言真人天尊亦見念邪真人答言譬如
一人而有七子是七子中一子遇病父母之
心非不平然於病子心生偏愛大王天尊
亦爾於諸衆生非不平等然於罪者心生偏
愛於遊逸者則生慈念不遊逸者心則放捨
何者名爲不遊逸者所謂天尊真人神仙眷

屬於諸衆生不觀種性下賤僮僕卑陋之人
唯觀衆生有善心者若有善心則便慈念大
王當知如是瑞相即是天尊威德所被能令
衆生除煩惱熱大王當知甘露法味亦復如
是一切衆生之所愛樂真道名為甘露法味
灌洗身心得悟真道是謂良醫善種大王問
元陽第四真人言我聞天尊不與惡人同止
坐起語笑談論猶如大海不宿死屍如青鸞
赤鳳不棲雜木我觀天尊亦復如是我等云
何而得往見設令見者我身將无陷入地耶
我觀天尊寧近虎狼獅子猛獸大火可畏之
處終不親近四種五逆之人是故我今若為
思念當發何心往見天尊第四真人拘正林
答言大王譬如有人飢渴欲求飲食疾病之
人求於良醫苦惱之人求於救護大王思求
道果亦應如是大王天尊尚為邪疑衆生說
元陽秘藏何況大王非是邪疑而不慈悲救
濟大王言真人我昔曾聞有一邪疑不信不
聞不能觀察不得義理何故天尊而為說法
真人答言大王猶如有人身遇重病是人夜

夢齒髮墮落裸形露體臥糞穢中復與亡者
行住坐起攜手食噉毒蛇踰路而從中過是
人夢覺心生煩惱以煩惱故身病轉增以病
增故家人遣使迎醫貧乏无可遣使形體短
缺六根不具語其良醫速隨我去爾時良醫
即自思惟今見是使相貌不吉當知病者難
可療治復行是念使雖不吉當復占之為可
醫不於是占日候星皆非吉祥如是病人亦
難可治復作是念占日候星雖復不吉應當
觀時秋時冬時日入夜半時又不吉當知是
病亦難可治復作念已衆相不吉雖復衆相
不吉或定不定當觀病人若有福德皆可療
治若无福德雖吉則不可治思惟事已尋與
使俱在路復念若彼病者有長壽相則可療
之如无長壽相則不可治作是念已即於路
中逢二童兒鬪爭罵詈頭面流血或見人持
大炬火忽然自滅或見有人斫伐樹木或見
虎狼惡獸見如事已復作是念所見諸相皆
非吉祥當知病者難可救濟復作是念我若
不往則非良師如其往者不可救治復更念

言如是衆相雖復不祥我今既為良醫當往
救濟思惟事已復於前路聞有哭聲號天叩
地復聞犬鳴鳥噪惡獸之聲種種音響喧動
土境聞是事已復作是念當知病者難可療
治既至病家即觀是病或寒或熱頭面洪腫
形容臭穢大小便利閉塞不通言聲喘急眠
寢不安醫見是已問瞻病人病者昨來氣息
是何答言大師其人本來敬信三寶恒無怠
慢今者變異敬信心息本好布施今來慳吝
本性少食今則過多本性和善今則弊惡本
性慈孝愛念父母今於父母无恭敬心醫聞
是已種種諸相悉皆不吉定知病者必死不
疑語瞻病人言吾今且還明日復來隨病人
所須恣意勿禁至明日復遣使往因即延引
言我事未訖了兼未合藥智者當知如是病
者必死不疑大王天尊亦爾於一邪疑善知
根性而為說法何以故若不為說一切凡夫
當言天尊无大慈悲有慈悲者名為智慧若
言无慈悲云何說言一切智人何以故天尊
為一邪疑而說妙法大王當知天尊見諸病

者常施妙藥病者不服非天尊无恩愛心大王當知邪疑之人分別有二一者得見在善根二者得後世善根天尊知有一邪疑能於見在得善根者則為說法後世得者亦為說法今雖無益作未來因是故天尊為一邪疑演說元陽妙經者復有二種一者利根二者中根利根之人於見在世能得善根中根之人後世則得見法大王譬如有人墮墮圖廁糞穢之處在此廁中云何得出有善男子見而慙之尋前捉髮拔之令出因善男子而能清淨天尊恩濟亦復如是諸眾生墮三惡道方便救濟令出三惡道是故天尊為一邪疑演說元陽寶藏亦復如是爾時善種大王問第四真人拘正林若天尊審如是者明當選擇良時吉日然後乃往其人白王言道法之中无有選擇良時吉日大王當知譬如重病之人不擇良日時節吉凶唯求良醫大王今病重求天尊良醫不應選擇良時好日大王當知如木中之火竹中之火二俱相燒無有異也吉日凶日亦復如是若能念道思真俱

能消滅一切眾罪唯願大王今日速往爾時大王即命一臣名曰吉慎而告之言大臣當知吾今欲往元陽世界天尊之所速辦供養所須之具皆令備足臣言大王欲往元陽世界諮問真道善哉善哉所須供養之具一切悉有於是善種大王與其善屬公卿宰相諸大臣等各各莊嚴淨潔衣服及諸供養駿馬金鞍種種車乘齎持幢蓋香花伎樂種種珍玩无不備足導從馬騎有數千萬眾來詣元陽世界天尊之所諮請真道良醫妙藥爾時天尊告諸大眾言一切凡夫為无上正真大道者無有因緣無先善友何以故善種大王若不隨順真人教化者來月中間必定命終墮於三惡道是故欲除身心之病者莫若善友良醫妙藥能除重病煩惱之業大王當知元陽上品妙經即是一切眾生良醫妙術當須恭敬禮拜晨夕誦習積年不退必獲自然之果爾時元始天尊告諸大眾言善種大王猶有疑意我今當為作決定心時眾之中有元陽第六真人名淨德白天尊如先說一切

諸法皆无定相所謂色无定相所謂空无定相所謂法无定相所謂真无定相乃至無極大道亦无定相云何天尊今者而言為善種大王作決定心天尊言善哉善哉善男子我今定為善種大王作決定心何以故若王疑心可破壞者當知一切諸法皆无定相是故我為善種大王作決定心當知是心為定善男子若彼王心是決定者王之逆罪云何可壞以无定相其罪可壞是故我為善種大王作決定心爾時善種大王即往香林禪樹間至天尊所瞻視威光相好微妙於是口吐八種音聲告言大王時善種頌視左右此時眾中讚是大王我既罪逆又無福德天尊不應稱為大王爾時天尊即復喚言善種大王時王聞已心大歡悅即作是言天尊今日故以慈悲於諸眾生大慈大悲等無差別善種即上白天尊言昔日疑心今得悟解定知天尊真是眾生无上大師爾時元陽第六真人淨德語諸眾言天尊已為善種大王作決定心得於自然果報深疑醒悟宿滯便開即以此所

持幡蓋香華伎樂供養之具稽首禮拜左繞
三匝却退一面爾時元始天尊告善種大王
今當為汝說元陽上品觀行妙法微密之義
汝當歛意專心聽我宣說一切凡夫常當觀
身檢行有二十種事一者我此身心空虛无
滿二者无諸善根堪有開發三者我此生死
未復和順四者墮墜深坑无處不畏五者以
何方便得見真道六者云何修定得見天尊
七者生死常苦无常我淨八者八難之難難
得遠離九者恒為冤家之所隨逐十者無有
一善能遮諸惡十一者於三惡中未解脫十
二者具足種種諸惡邪見十三者亦未造立
度五逆津十四者生死無際未得真趣十五
者不作諸業不得果報十六者无有我作他
人受果十七者不作善因終无善果十八者
若有造業果終不失十九者因無明生亦因
而死二十者去來見在常行放逸大王雖為
人中長者當於此身常作如是二十種觀度
作是觀已身心清淨無有穢惡則得正觀次
第觀行生相住相滅相次第觀心生住滅相

心定慧進戒亦復如是觀生住滅已知心相
乃至戒相終不作諸惡无有死畏三惡道畏
若不用心觀察如二十種事者心生放逸无
種不作善種大王言如我解天尊所說義者
我從昔來未曾觀是二十種事故多造眾惡
造惡故則有死畏三惡道畏設觀必定當墮
三塗地獄天尊告善種大王一切諸法性相
无常无有決定王云何言必定墮三塗地獄
善種大王稽首上白天尊言若一切法無定
相者我之殺罪亦應不定若殺定者一切諸
法則非不定天尊言大王善哉善哉諸真人
說一切諸法悉無定相王復能知殺亦不定
是故當知殺無定相大王如彼所言父王无
辜枉加逆害者何者是父但假名眾生五陰
妄生父想於十二法十八界中何者是父若
色是父四陰應非若四是父色亦應是若色
非色合為父者无有是處何以故色與非色
性無合故大王凡夫眾生於是色陰妄生父
想如是色陰亦不可害何以故色有十種是
十種中唯色一種可見可持亦可稱量可牽

可縛雖可見縛其性不住以不住故不可得
見不可得捉不可稱量不可牽縛色相如是
云何可殺若色是色可殺可害獲罪報者餘
九應非若九非者則應無罪大王當知色有
三種過去未來見在過去未來則不可害何
以故念念滅故如是一色或有可殺或不可
殺有殺有不殺其色不定色若不定殺亦不
定殺不定故報亦不定云何說言定入地獄
大王當知一切眾生所作罪業凡有二種一
者輕二者重若心口作則名為輕身心口作
者則名為重大王心念口說身不作者所得
報輕大王昔日口不教殺唯言削足而无實
想況王不勅云何得罪一切諸真人亦應得
罪何以故大王受生尊貴良由昔日種於善
根稟道氣而生是故今日得居王位若王不
稟善業而生當知受報則不為王若不為王
汝則不能為國興害若汝殺父王當有罪者
如是真人亦應得罪若真人无有罪者汝獨
云何而得罪耶大王往有惡心於山遊行射
獵周徧曠野竟无所得唯見一仙人五通具

足見已即生嗔恚惡心我今遊獵所以不得正坐此人驅逐令去大王即勅左右而令殺之其人臨終生嗔惡心退失神通而作誓言我實无辜汝以心口橫加屠戮我於來世亦當如是還以心口而害汝命時王聞已即生悔心供養死屍大王如是尚得輕受不墮地獄況王不爾而當地獄受果報耶王先自作還自受之云何令王而得殺罪如王所言父王无辜者云何言无失有罪者則有罪報无惡業者則無罪報汝父先王若無有罪云何有報大王於見在中亦得善果及以惡果是故先王亦復不定以不定故殺亦不定殺不定故云何而言定入地獄大王當知衆生狂惑凡有四種一者心生貪狂一切財物二者樂狂欲求潤體三者呪狂獸有嫌疑四者本業緣狂貪求財物大王應知我弟子中有是四種狂雖多作惡我終不記是人犯戒是人所作不至三趣若還得心亦不言犯王本貪國興此逆害貪狂心作云何得罪大王如人醉酒而害其母既醒悟已心生悔恨當知是

業亦不得報王今貪醉非本心作若非本心云何得罪譬如幻化之師於四衢道幻作種種服玩男女車馬瓔珞衣被愚癡之人謂為真實達解之人知非真有殺亦如是凡夫謂實天尊慧眼知其非真大王當知譬如山谷響聲愚癡之人謂之實聲達解之人知其非真殺亦如是凡夫謂實天尊真人知其非真大王如人有怨詆來親附愚癡之人謂為真實智者了達知其虛詆殺亦如是凡夫謂實天尊真人知其非實大王如人執鏡自見面像愚癡之人謂為真面智者了達知其非真殺亦如是凡夫謂實天尊真人知其非實大王如熱時炎愚癡之人謂之是水智者曉達知其非水殺亦如是凡夫謂實天尊真人知其非實大王如寶聚城從地涌出愚癡之人謂為真實智者曉達知其非實殺亦如是凡夫謂實天尊真人知其非實大王如人夢中受五欲樂愚癡之人謂之為實智者曉達知其非實殺亦如是凡夫謂實天尊真人知其非實大王如人夢中及以解脫我皆了之則無有罪王雖知殺云

何有罪大王譬如主知典酒知而不飲則亦不醉雖復知火亦不燒然王亦如是雖復知殺云何有罪大王有諸衆生於日出時作種種罪於月出時復行劫盜日月不出則不作罪雖因日月令其作罪而此日月實不得罪殺亦如是雖復因王王實無罪大王應知如王官中常勅屠羊心初无懼云何於彼獨生懼心雖復人獸尊卑差別保命畏死二俱无異何故於羊心輕无懼於父先王生重憂苦大王世間之人是愛僮僕不得自在為愛所使而行殺害設有果報乃是愛罪王不自在當有何咎大王譬如元陽妙經非有非无而亦是有殺亦如是雖非有非無而亦是有慙愧之人則是非有有慙愧者則為非无受果報者名之為有空見之人則為非有有見之人則為非无有有見者亦名為有何以故有有見者得感果故无有見者則无感果常見之人則為非有有常見者則為非无常見者不得為无何以故常見者有惡果報故是故常見者不得為无以是義故雖非

有非无而亦是有大王應知一切衆生者名
出息入息斷出入息故名爲殺聖人隨俗亦
說爲殺大王色是無常色之因緣亦是无常
從无常因生色云何常乃至識无常識之因
緣亦是无常從无常因生識云何常以无常
故苦故空故以空故无我若是无常苦空無
我爲何所殺无常者得常聖人殺苦得樂殺
空得實殺於無相而得真相大王應知若殺
无常苦空无相者則與相同相亦如殺是无
常苦空無相不入地獄汝云何入爾時善種
大王言如天尊所說觀色乃至觀識作是觀
已即白天尊言我今始知色是无常乃至識
是无常我本若能如是觀者則不作罪即稽
顙恭敬上白天尊我昔曾聞聖人常爲衆生
而作父母雖聞是語猶未能審今乃定知天
尊真爲一切衆生父母我亦曾聞王京山王
四寶所成所謂金銀瑠璃瑪瑙若有衆馬隨
所集處則同其色雖聞是說亦不審定我今
來至玉京山則與同色者則知識法無常苦
空无相作是觀已皆悉无常一切諸法悉无

根本无根本者我初不知思念聖人不信真
道是名无根我今有幸得見天尊開闡玄妙
剖析真經所得功德悉能毀壞衆生煩惱諸
惡之心天尊言大王善哉善哉我今知汝必
能消滅衆生惡心破壞衆生煩惱之結大王又
白天尊若我審能明了破壞衆生諸惡心者
使我在太山二十四獄之中无量劫中爲諸
衆生受大苦惱不以爲苦爾時復有無量世
間衆生不信真道常有邪疑愚癡之人聞是
語已悉發无上正真大道之心以如是等无
量人民發大慈故善種大王所有重罪即得
微薄王及夫人後宮姝女見王明了法相身
心清淨悉皆同發无上自然道意爾時善種
大王白天尊言我今未死已得深了真宗捨
於短命而得長壽捨无常身而得真常之身
今諸衆生發无上正真道意即得長命真常
之身即是天尊真常弟子說是語已即以種
種寶幢幡蓋香花伎樂種種微妙珍奇服玩
供養天尊復以偈頌而讚歎言
天尊體玄妙 道德冠太清 逍遙步金闕

容與遊玉京 時演元陽義 至理甚威靈
是名甘露藥 復號大乘經 若信及不信
受持非自冥 慈悲救苦惱 恩愛及衆生
若能曉深義 即會玄都庭 无相寄有相
无形寄有形 一切善知識 當須盡至誠
存想一句偈 欽念除緣情 既離煩惱結
道性自然明 神仙當擁護 無憂體自輕
爾時善種大王既蒙天尊訓誨曉示懇懇與
諸眷屬皆得曉悟元陽秘典深知因果作偈
讚歎奉謝

天尊禮拜都畢左繞三帀辭退各還本國。

太上靈寶元陽妙經卷之七

七

十四

太上靈寶元陽妙經卷之八

真八

德行品

爾時元陽上品德行高貴真人尹妙林及其門徒眷屬八種智慧第一弟子無鞅數眾俱會香園樹下寒木林間稽首恭敬遊行三市長跪執簡諮問元始天尊自願運幸得遇聖尊輒敢啓問心所疑滯伏願靈顏以見訓喻天尊含笑善哉善哉要乎深矣隨子所問當爲解釋妙林上啓未審凡夫衆生作逆害罪有道德邪如是之人云何復墮地獄若如是人有道德邪云何復言无有真常之樂若斷善根名一凡夫者斷善根時所有道德云何不斷道德若斷云何復言真常之樂如其不斷何故名一凡夫邪天尊曰犯四明科名爲不定毀謗元陽經作十惡罪及一凡夫悉名不定如是之人若決定者復何因緣得成无上正真自然大道得九仙之果乃至明達真人亦名不定若九仙果至明達真人是決定者亦不應成无上正真自然之道天尊若犯四盟不決定者九仙之品乃至明達真人亦不決定如是不定諸天大

聖亦復如是若天尊不定元陽法性亦復如是至一切法亦復不定云何不定若一凡夫除一凡夫則成真道諸天大聖亦應如是入元陽品已亦應還不入元陽若如是者元陽之性則爲不定以不定故當知无有真常之樂云何復言一凡夫等當入仙品爾时无相天尊告元陽上品德行高貴真人尹妙林言善哉善哉善男子爲欲利益无量凡夫一切衆生令獲歡喜憐愍慈念諸衆生故爲欲增益發自然心諸真人道士故作如是之問善男子汝已曾經親近元陽八種真人并於天尊法中作諸善業已得成就其道功德摧伏魔怨令得退散已教无量衆生皆悉得至元陽仙品通達大乘微妙經典已問過去恒河沙劫諸天大聖如是妙義我都不見一切世間若人若天初學弟子有能諮審天尊是義今當至心諦聽諦聽我當一一爲汝子細分別解析善男子一凡夫者亦不決定若決定者是一凡夫終不果於自然之道以不決定是故如汝所說道性不斷云何一凡夫斷善

根者真人道士夫善根者有二種所謂內道性外道性非外非內以是義故道性不斷復有二種所謂有漏無漏道性非有漏非無漏是故不斷復有二種所謂常無常道性非常非無常是故不斷若是斷者則應還得若不還得是名不斷若斷已得名一凡夫犯四盟者亦是不定若決定者犯四盟律終不能得无上正真自然大道誘毀元陽大乘經典及三景法師亦復不定若決定者誹正法人終不能得自然妙道作十惡罪亦復不定若決定者十惡之人終不能得正真之道色相二法俱爲不定香味卑相生相無明相陰入界相一切諸相皆悉不定善男子猶如幻化之師在大衆中化作種種變異山林樹木城郭聚落而彼衆中有諸凡夫無有智慧觀見之時謂爲真實其中賢人知其虛誑以幻力惑人眼目善男子一切凡夫乃至諸仙弟子明達真人等於一切法見有實法亦復如是諸仙真人於一切法不見實相善男子猶如小兒於炎夏月見熱時盛謂之爲水有慧之人

於此熟炎終不生於實水之想但是虛炎誰人眼目非實是水一切凡夫諸仙弟子見於諸法亦復如是謂言是實諸天真人於一切法不見實相善男子猶如山谷因聲有響凡夫聞之謂是實聲有慧之人解無定實但有聲相惑於耳識善男子一切凡夫諸仙弟子於一切法亦復如是見有實相諸天真人明解諸法悉無實相見无常相空寂等法無生滅相以是因緣真人道士見一切法是无常法善男子亦有定相云何爲定真常之樂在於何處所謂元陽法中善男子自然之果亦復不定不決定故經十萬劫得无上大道自然之心如是道果亦得不實不定實故經八萬劫得正真大道自然之心真人之果亦復不實不定實故經六萬劫得无上道心仙人之果亦復不實不定實故經四萬劫得无上道心明達真人亦復不實不定實故經二萬劫得無上道心善男子天尊今於甘露大城碧林樹下示現威德神通智慧令諸仙弟子凡夫衆生至心奉法委意投真讀誦元陽上

品大乘經典甚深奧藏微密之義得无上正真自然大道修行聖行永無退轉善男子凡夫不能善攝六根則有諸漏爲惡所牽至不善處善男子猶如惡馬羸猛能令乘者至險惡處不能善攝六根惡業者亦復如是令人速離元陽妙道至諸惡處猶如狂象未曾調伏有人乘之不隨意去遠於善邑至險惡處不能善攝六根惡業者亦復如是將人速離元陽善邑至生死險惡曠野之處善男子猶如佞臣教王作惡六根佞臣亦復如是常教衆生造无量惡善男子猶如頑子不用父母師長教訓造諸惡事不調六根亦復如是不受父母師長善言教訓無惡不作善男子凡夫之人不攝六根常爲地獄畜生餓鬼之所賊害亦如怨盜害及善人凡夫之人不攝六根馳騁六塵猶如牧牛不善收錄犯人苗稼凡夫之人不檢六根常在諸有多受苦惱善男子真人道士修元陽上品大乘聖行時常能善調檢錄六根恐怖貪欲瞋恚嫉妬憍慢爲得一切諸法故善男子若能檢錄六根者

則能檢心若能檢心則檢六根譬如有人擁護於國王守衛國土衛護國者則守於王真人道士亦復如是若能聞是元陽上品大乘經典則得智慧得智慧已則能專檢六根善男子如善牧牛設牛放逸東西散他苗稼則能遮止不令犯物真人道士亦復如是念慧因緣故檢錄六根不令縱恣真人道士有念慧者不見我相不見衆生相及所受用見一切法同法性想生於山嶽草木瓦礫之相猶如屋宅從因緣生無有定性見諸凡夫一切衆生四大和合之所成立推無定性無定性故真人於中不生染著一切凡夫見有衆生故起煩惱真人道士修元陽經者有念慧故於衆生不生染著復次真人道士修元陽經者不染衆生相作種種法善男子猶如畫師以衆色雜畫若牛若馬若男若女凡夫無智見之便生男女之相畫師了知無有男女牛馬之相真人道士亦復如是於法異相觀於一相終不生於衆生之想何以故有念慧故真人道士修元陽上品大乘經者或時觀美

麗女人終不生於愛著之心何以故善觀相故善男子真人道士知五欲相無有歡樂不得淹留如狗啣枯骨如人持火逆風而行如水上泡畫水之迹如織經畫如囚詣市如假託勢不得久歡欲亦如是多諸過患復次真人道士觀諸凡夫一切衆生爲色香味觸以是因緣從无量劫來常受苦惱一一衆生一劫之中所積身骨如妙樂山高所飲乳汁如四海水身所出血復多於是六親眷屬命終哭泣所出眼淚多四大海盡地草木爲壽以數父母亦不可盡無數劫來或在三塗地獄幽牢之中所受諸苦不可稱數真人道士如是深觀一切衆生欲因緣故受苦无量真人以是生死行善不失念慧善男子猶如世間有諸大衆滿三十里間有王名曰莊嚴勅遣一臣名富林那持大油盆從衆而過莫令傾落一滴當新汝命復遣一臣名曰尹林常拔刀在後監持油之臣受王命盡心堅持經歷衆生雖見美麗女人不敢觀視心常戰懼我若放逸著彼邪欲當棄所持命不全濟如是

之臣以此恐怖乃至不敢棄一滴油真人道士堅持禁戒亦復如是於生死中不失念慧以不失因雖見五欲心不變著若見淨色不色相唯觀苦相乃至識相亦復如是不作生相不作滅相不作因相不作緣相觀一切法作和合相真人道士爾時六根清淨故持戒具足一切凡夫六根不淨不能檢持名曰根漏真人道士永斷諸漏是故無漏天尊授出水除根業是得清淨爾時真人尹妙林既聞此事心生歡喜而作偈言

凡夫及衆生 不知大乘趣 沉淪生死門
往還煩惱步 念念作諸惡 心心起疑悟
魔鬼方便侵 怨家興訟訴 受報往地獄
幽牢相禁固 一切諸罪業 非善能譬喻
當念元陽經 受持法戒具 愆咎可得消
福德相灌注 解脫大乘門 清淨元爲路
天仙常吸引 地神恒衛護 一日及一日
讀誦如是句 歷劫離憂患 終歲無淪盡
在所險難地 當無有畏懼 誦受五通偈
堅持於六度 今日說此頌 可爲長樂賦

真人尹妙林說此偈訖復次善男子有諸離漏真人道士欲爲无上甘露法界故離諸惡漏以何因緣名之爲離若能行元陽上品大乘經典受持讀誦思惟其義是名爲離何以故善男子我都不見三十六部尊經能除惡漏如是大乘經典善男子猶如良師教諸弟子之中有受教者不造過患真人道士修元陽上品大乘經者亦復如是不造過患善男子猶如世間有於呪術若有毒蛇不能侵害一切凡夫讀誦此經乃至壽終無有過患善男子是大元陽妙經亦復如是若有衆生一經耳聞如此經者不墮惡趣若有書寫讚歎讀誦解說剖析微妙當得无上正真自然大道俱體法相如彼聖人得甘露法味善男子是大元陽威力修行讀誦得如是道果善男子若有清信弟子能至心書寫讀誦是經解說其義爲他開演教化衆生當知是人真我弟子善知法教訓喻凡夫得知道法是我所見我之所慈是人真知我說元陽經典隨如是人所住之處若山林曠野城邑村落屋舍

宮宅我亦在中常住不變吾於此人常作受施或作道士女冠善男子善女人當令是輩得知天尊受其所施財寶善男子是人或眠卧之中夢見天尊聖人形象或見諸真人之像轉輪聖王形像或見江山海日月星宿或見金銀珍寶衣服卧具爾時當知即是天尊受其所施驚寤之後得大喜樂尋得種種所須之物不造過患志願真善是大元陽悉能成就如是无量功德不可思議善男子汝今應須受持法教微妙之語若有善男子修行善法恭敬於我同於法相受持至要破彼惡魔无常無樂無我無淨欲得天上人中逍遙快樂者見有受持元陽經典書寫讀誦為人解釋如是經義當往親近恭敬禮拜讚歎尊重供給所須令無乏少此經玄妙不可譬喻當應盡心供養無有退轉不生疲厭當得自然道果善男子吾念過去无量恒沙之劫有一世界名曰清淨有聖人號曰文始天人神通智慧天眼第一為諸大衆演說元陽上品大乘經典我於爾時從善男子聞彼聖人

當為大衆開闡无上義味我聞是已其心歡喜欲設供養家貧無物乃欲自賣恐身無力復畏不售俄頃之間路見有人而便語曰我欲賣身汝能買不其人答曰吾家作業無人堪者汝必能為吾當買汝吾即問言有何作業無人堪者其人答曰我有惡病良師處藥應當服人之肉日為二兩汝若能以身之肉日與一服我當酬汝金錢十文我時聞已心生歡喜我復語云汝惠我錢待我五日事訖了時便來相就其人答曰五日不可若如此者可期一日善男子吾於此時即取其錢來至天尊之所恭敬作禮盡家所有將以奉獻然後至心聽讀是經我時頑嚚雖聞此經志願受持如是偈頌

天尊說至要 號曰元陽經 度脫生死業
開發於幽冥 若有至心者 當得瑩心靈
必獲无上樂 徒步玄都庭 逍遙逐羽化
俯仰入雲扃 輪轉會虛寂 倏欵觀真形
南丹上生宿 北斗除死星 知我感妙道
歷劫不沉聲

受持偈頌心得悟解即便還至病者之家善男子吾時雖復日與二兩之肉以念偈頌不為苦楚善男子以是因緣其病得差我亦平復身體皮肉悉皆具足無有瘡癢臭穢之處即發无上正真自然道心偈頌之力即有如是威力何況天尊大聖演說元陽大乘經典具足受持至心讀誦我見是經有如是利益當應發心倍加念誦願於過去未來見在得於自然道果善男子以是因緣因緣令今者於時衆中為諸弟子宣說元陽妙典善男子以是因緣是大元陽不可思議成就无量真善因緣乃是諸天聖人微密奧藏以是義故能受持讀誦者斷諸惡漏所謂惡者狂象惡馬麤牛惡狗山崖險谷毒蟲猛獸江水懸流不善之輩如是等惡若作漏因具人爾時即復去離若不能作則不遠離若增有漏則便離之若不增長則不遠離若與惡事則便去之若能作善則不遠離常以智慧而相護持作於善法離於惡事真人道士自觀其身是大苦聚是諸一切惡業根本是身雖復不

淨如是真人猶故觀察瞻視何以故非為貪身為善法故為元陽不為生死為真常之樂不為元常無我真淨為於有道不為無道為於一乘不為三乘善男子真人道士常當護身何以故若不護身命則不全命若不全則不能讀誦書寫受持供養元陽上品大乘經義為人解析思惟其義是故真人道士應善護身以是義故真人得離一切惡漏善男子如欲濟水善護舟航船筏之具如臨路人善護騎乘如田夫布種善念冀穡真人道士亦復如是雖見是身元量不淨具足充滿為欲受持元陽經者莫令懈怠諸善事真人道士觀於狂象及不善者元有等異何以故俱壞身故真人道士於狂象邊心無恐怖於惡知識處生長忌心何以故如是狂象止能壞身不能壞心不善之者二俱能壞其狂象者唯壞一身不善之者壞元量善身元量善心是狂象者能壞不淨身不善之者能破淨身及以淨心是狂象能壞肉身不善之者破於法身狂象殺者不至三趣為不善之殺者必

至三趣如是狂象但為身怨不善之者為善法怨是故真人常當遠離諸不善友不善者等如是狂象不善者凡夫之人不能遠離是故生漏真人道士速能離之則不生漏真人道士尚無諸漏沉於元始天尊具大威神而有漏乎以何因緣親近諸漏一切凡夫取受衣食卧具醫藥口味為身心樂求如是物造諸過患不知法味輪迴三趣是故為漏真人道士見如是過患則便遠離若須衣食即須取受不為身故但為於法不生微忽意常柔弱不為華麗但為羞恥雖受飲食意無貪著不為身故常為正法不為膚體但為眾生不為微忽為身力故不為逆害為治飢渴雖得上味心元貪著取受衣服亦復如是貪慢之結不令在心但為正法不為壽命為常命故善男子作是思惟我若不受如是供養身則磨滅不得堅固若不堅固則不忍苦若不忍苦則不能修行正道若能忍苦則能修行正道元量真善我若不能堪忍諸苦則於苦中生於瞋恚於樂受中生貪愛心若求樂不得

則生無明是故凡夫於供養中生於有漏真人道士深能觀察不生有漏是故真人名為無漏以何因緣天尊當名有漏是故聖人不名有漏善男子一切凡夫眾生雖名善護身心猶故生於惡想以是因緣雖斷煩惱得生非非想處終墮三塗地獄善男子猶如有人濟於巨海欲至彼岸垂沒而死凡愚之人亦復如是垂盡三有還墮地獄何以故無善智故何謂善智所謂六念處凡夫之人善心微劣不善猛盛善心微劣智心輕少智心少故增長諸漏真人道士慧眼清淨見諸過患有種種事常與凡夫一切眾生作三乘怨以是因緣乃令凡夫不見法相恒沙劫來生顛倒想謂諸天聖人無真常樂唯有清淨天尊畢竟虛空一切凡夫眾生元常元樂元淨元我心生顛倒言有真樂真人道士應如是觀一切真人或時有因緣故應生驚覺猶如端正淨潔之人不受穢污如執鐵丸人無受者善男子至心奉道亦復如是因緣真人道士思惟一切凡夫眾生知我是大福田我今云何

受此惡事若受惡法則不堪為一切凡夫衆生作於福田我自不言是良福田一切凡夫衆生見相便言我起如是惡想則為欺誑一切凡夫衆生我於法時以欺誑故恒河劫中流浪生死墮於地獄我若惡心受人賤施一切聖人皆悉證明我若惡想受人賤施或令施主果報微薄或无果報我若是惡受人賤施則與施主是大怨讎一切凡夫恒於我所起善想念我今云何欺誑於彼而生惡想何以故或令施主不得福業或少果報我常自稱爲道士夫道士者不應起惡若起惡者則非道士道士之體身口相應若不相應則非道士我棄恩愛眷屬知識出家學道正念修集諸善想時非是修集不善想時猶如有人濟海求寶不取真珠直取金精亦如有人棄妙音聲而聽惡響如捨正室而愛婢妾如捨金器而取瓦盂如棄甘露法味而食惡毒食如捨善男子而親諸惡友如棄良醫而信巫鬼如捨元始天尊甘露法食而服魔怨種種惡味我今已值元陽清淨法寶難得見聞我

今已聞猶如盲龜值大浮木人命危脆猶如秋葉今日得度知明若爲我今云何縱恣六情作於惡法盛年壯色俄頃斯須我今云何而生輕傲猶如惡魔伺人愆咎四大惡鬼搖動身王亦復如是常來伺求我之過失云何當令惡想發起猶如朽屋乘至崩摧我今性命亦復如是我今云何起諸惡業我名道士之人名之爲通知一切事我今乃起不善之業云何名爲道士我名出家出家之人名修善道我今作惡云何應得名爲出家我名真士真士之體名破煩惱我不破惡想煩惱云何當得名爲真士世有六根難可具足我今已具云何當令惡想居心何等爲六所謂六者一者大道難值二者正法難見三者善心難發四者中土難生五者人道難遇六者身根難備如是六根難可備足我今已備是故不應起於惡想真人爾時修行如是元陽經者常當觀察諸惡心時一切凡夫不見如是惡心過患故受諸漏真人見已不受不染是故真人無有受漏云何當言天尊有漏以是

因緣一切聖人非是有漏於是諸天真人神仙道士聞此事已歡喜作禮一時恭敬而說偈言

我等今大衆 得聞微密義 各悟苦空性
深解元陽智 自非至學士 何由辯真偽
削落諸煩惱 消滅於瞋恚 男子及凡夫
諦聽真善譬 洗濯身心病 穢惡及漏累
一切諸神仙 稽首讚斯瑞

太上靈寶元陽妙經卷之八

太上靈寶元陽妙經卷之九

是

德行高貴品

爾時元始天尊告元陽真人言善男子善女人若有能修行供養元上元陽妙經得於十種功德不可思議聞者驚疑非隱非顯非去非來非生非滅非難非易非相非非相如是法相無有形貌世間所無何等為十種功德一者有五何等為五一者所未聞者而能得聞二者既聞玄妙能為利益三者能斷諸疑體於至理四者智慧之心質直無曲五者深知元陽秘藏是為五事何等所未聞者而能得聞所謂甚深玄妙之義一切衆生俱得道性一切經法無有差別若有善男女至心願念所答在法究竟得入无上正真之道常住无變恒无懈退非有為非无為非有漏非无漏非色非不色非空非不空非名非不名非相非不相非有非不有非因非不因非果非不果非明非不明非闇非不闇非出非不出非常非不常非斷非不斷非過去非不過去非未來非不未來非因緣非不因緣如是等

法甚深甚妙甚玄甚奧昔所未聞而今得聞昔所未見而今得見所謂一切經書所謂一切方法所謂一切伎藝所謂一切科律如是等經昔未曾聞今於此經而得了悟復有三清祕要七部神圖如是深奧之義今因此經而得知之善男子善女人是名所未聞者而能得聞既得聞已是大利益若能讀誦受持具自然道意能具知一切方法大乘經典甚深義味譬如有人懸於明鏡見其色像曉了分明无有障蔽元陽寶鏡亦復如是真人執持得見元陽經典深奧之義亦如有人處於閭室執大炬火悉見諸物元陽法炬亦復如是真人執持得見元陽深奧之義亦如日出陽谷有大光明悉能照朗令得一切遠見虛空是大元陽清淨慧日亦復如是照了幽冥深遠之處令一切衆生遠見真道所以者何以能聽受是元陽上品妙經皆獲无上道果善男子若有至心讀誦元陽微妙經典得知一切諸法名諱通達玄義為他廣說開悟凡夫能知元陽諸法至理善男子其聽受者雖

知元陽經字不知元陽義理深妙若能書寫授持讀誦為人演說開導沉迷令知其義則能知其義是大利益增長法橋復次善男子聽此經者聞有道法未能得見至心願念即得悟解書寫讀誦為人演說尋思其義則得見之聽是元陽經者聞有神通未能得見發心願念至慕神仙作是念已便能知法具諸道意了達道源於諸天魔惡鬼虎狼毒獸怖畏之處得無所畏開示分別玉簡金文丹章紫字演說其義无有差違不從他聞而能自知无上正真道意是名聞已能為利益又復除疑心者疑有二種一者疑名二者疑義聽是經者斷除疑心思惟義者斷疑義心復次善男子疑有五種一者疑道虛空有指的不二者疑道恍惚是真常不三者疑道隱秘是真樂不四者疑道幽玄是清淨不五者疑道顯晦是實義不聽是經者則得永斷疑惑之心書寫讀誦為人演說思惟其義五疑永斷復次善男子疑有三種一疑无上正真之道為有為无二疑三十六部尊經為有為无三

疑一切妙法為有為無聽是經者如是三疑永滅無餘書寫讀誦為他廣說思惟其義則能了知一切眾生悉有法性復次善男子若有眾生不聞如是元陽經典疑心甚多所謂如常不常如樂不樂如淨不淨如我無我如命非命如凡夫非凡夫如究竟不究竟如未來非未來若有若非有若苦若非苦若樂若非樂若道若非道若滅若非滅若法若非法若真若非真聽是經者如是諸惑悉能除斷復次善男子若有不聞如是經者復有種種眾生多有疑心所謂色是我邪受質相因識是我邪眼能見邪我能見邪乃至識能知邪我能知邪色受報邪我受報邪乃至識受報邪我受報邪色至他境邪我至他境邪乃至識亦如是生死之法有始有卒邪無始無卒邪聽是經者如是等疑亦得永斷復有人疑邪見犯四盟科作五逆罪毀謗道經如是等人有法性邪無法性邪聽是經者如是等疑悉得永斷復有人疑世間有際邪世間無際邪有十方法界邪無十方法界邪聞是經者

如是眾疑亦能除斷是名斷疑惑之心復次善男子慧心正直元邪曲者意若有疑則所視不正一切眾生若不得聞是元陽上品微妙經典所見邪疑乃至下仙悟道之人猶懷邪曲云何名為一切眾生所見邪曲於有漏中見常樂我淨於天尊所見无常苦不淨無我見有凡夫壽命長短非有相處非無相處以為元陽之宮有八聖道有見斷見如是等見名為邪曲善男子善女人若得聞是大乘經典修行聖道則得斷除如是邪曲云何名為一切邪曲若復有人書寫讀誦為他演說通解其義則得正直無邪曲見善男子修如是元陽上品經典知此經微妙從元量劫來至心修行晨夕願念得入无上正真之道復次善男子能知元陽上品深密之義為他演說曉悟眾生悉能知道除謗法心盡惡逆罪然後得成无上正真道果是名甚深秘密之義復次善男子云何復名甚深之義雖知眾生實元有我而於未來不失業果雖知六情於此滅盡善惡之業終不敗亡雖有業根不

得作者雖有妙處無有去者雖有執縛無受縛者雖有劫濁終无滅者是名元陽德行高貴甚深秘奧之義爾時元陽真人上白天尊言如向所說聞不聞義是義不然何以故道若有者便應定有道若無者便應定無無不應生有有不應滅無如我所聞是則為聞若不聞者則為不聞云何而言聞所不聞天尊若不可聞是為不聞若已聞者則便不聞何以故已得聞於道故云何而言聞所未聞見所未見譬如去者至則不去去則不至亦如生已不生亦如聞已不聞天尊若不聞聞者一切眾生未有道心即應有之未得尸解亦應得之未見法性應見法性云何復言真人雖有法性未得明了天尊若不聞者真人往昔曉悟從誰得聞若言得聞何故真人於天尊所復言不聞若其不聞真人何以得稟元陽之號若如是者一切眾生不聞經典亦得稟元陽之號不真人若當不聞如是經典見無上道者一切眾生不聞是經亦應得見无上正真道不天尊言是色者或可見或不可

見響亦如是或是可聞或不可聞是大變動
非色非聲云何而言可得見聞真人於是了
然驚悟言過去已滅則不可聞未來未至亦
不可聞見在聽時則不名聞聞已聲滅更不
可聞亦非未來過去見在若非三世則不可
說若不可說則不可聞云何而言真人修是
元陽妙經聞所不聞爾時天尊歡喜讚歎元
陽真人及諸大衆言善哉善哉汝今深知妙
理洞達玄微一切諸法如幻如化如風如電
亦如泡沫芭蕉之樹空無有實非命非我無
有真相時大衆中儵欬之頃有大光明徧照
國境非青非黃非白非黑爾時大衆遇斯光
已身心快樂譬如真人初得道果爾時元陽
真人白天尊言今此光明從何而有天尊嘿
然不答元陽真人心懷戰懼逡巡不安叩頭
稽首瞻視靈顏輒敢諮問天尊以何因緣有
此光明照於大衆天尊嘿然不答爾時無鞅
數衆浮空道士見此明朗自相謂言今此光
明誰之所有天尊又復嘿然不說明律仙人
總持法衆復白天尊以何因緣有此盛光徧

照虛空元有障礙如是大衆自相諮問無能
曉者爾時元陽真人懇慫慙歎頭腦至地泣
淚和聲低心下意諮審尊顏願垂開示曉悟
來生天尊於是含笑告元陽真人曰如是光
明名為智慧智慧者即是真道真道之法無
有因緣云何有問有何因緣故有是光明是
光明者名為元陽妙法元陽妙法者則名為
真道真道之法不從緣生云何仙人疑問何
因緣故有是光明是光明者即是元始智慧
元始智慧者即是真道之法不從緣生云何
道士問於因緣光明者名為大慈大悲大慈
大悲者名為元陽真道元陽真道之法者不
從緣生云何仙人問於緣生光明者即是思
真念道思真念道者是名真道之法不從緣
生云何仙人問於因緣光明者即是一切學
道之人吞精咽氣吐納服御之法即名真道
真道之法不從因緣云何仙人問於因緣光
明者即是元陽上品法燈
天尊言真人汝今莫入諸法羅織之義我今
於此東方恒河世界名曰不動之處國土緬

平元有沙磧其地七寶莊嚴元有溝坑其諸
樹木華果茂盛元時不有若有衆生聞其華
香身心清淨曉悟大乘譬如仙士獲於道果
復有一大河水其水香美八味具足若有衆
生在中浴者皆得清淨了然悟道其河有種
種之華種種之香一切衆生聞其華香皆得
清淨釋然悟道復有元量虎狼獅子諸惡鳥
獸其心相視猶如赤子彼世界中一切衆生
無有犯負之者毀謗道法及有惡逆等罪其
土調適元有瘴癘煩惱貪欲嫉妬之人元有
日月晝夜時節猶如龍漢之運其土人民聰
明正直元有憍慢之心一切衆生皆悉悟道
具大功德其心悉皆尊重正法修於大乘愛
樂大乘思念大乘護惜大乘功行成遂得大
總持心常憐愍一切衆生復有達解真人先
妙音深曉元陽正教調御天人師隨其處所
宣告衆生無不得聞為十方至真大聖衆講
說如是大乘經典善男子及諸眷屬若能修
行大乘元陽妙經所不聞者皆能得聞无上
要道西方去此二十恒河沙國土彼有世界

名曰大堂國土多有山陵岡阜沙礫荆棘周徧充滿其土人民常有飢渴四時苦惱恒無歡泰爲其愚癡不能恭敬求於正道貪著非法之緣於非法緣中習行邪法不信正道壽命短促常行奸詐王法持之王雖有國不知滿足於他所有生貪利心興兵相伐枉死者衆國王尋行如是非法諸天神祇心無歡喜故降災旱五穀不登人民飢餓多有疾病國土不寧達解真人先妙音調御天人師愍念衆生遊行世界於其國土化作七寶香林種種莊嚴種種神變種種奇麗與諸總持大聖獨步仙人演說元陽上品妙經開發衆生令解智慧歸依无上正真之道其土人民聞說是經各各驚疑人人嗟訝以何因緣忽聞聖人微妙經典從何而來我今歡喜得遇真道爾時達解真人先妙音與七千四百真仙眷屬俱持幡蓋華香種種伎樂種種莊嚴供養之具至於極樂土中寶林寶樹之間已用所持供養之具供養元始天尊稽首恭敬左繞三匝恭敬已畢却退一面天尊問達解真人

光妙音及諸善男子等汝爲至來爲不至來真人先妙音白天尊言至亦不來不至亦不來我觀此義都無有來天尊諸行若常亦復不來若是无常亦无有來若人見有衆生性者有來不來我今不見衆生定性云何當言有來不來有輕慢者見有去來无輕慢者则无去來有取行者見有去來无取行者則無去來若見真人畢竟无上道者則有去來不見真人畢竟无上道者則无去來不聞道性者則有去來聞道性者則無去來若見狐疑下仙之人則有去來不見狐疑下仙之人則无去來若見真人无常樂我淨則有去來若見真人有常樂我淨則无去來天尊且置斯事敢有諸問願垂哀愍少見聽許天尊言善男子隨汝所問今正是時我當爲汝次第分別一一解說曉悟諸疑所以者何諸法難見千載因緣有過靈文三清七部何由可見汝等應當精進專心聽受爾時達解真人先妙音元陽真人等既蒙聽許兼被教戒即白天尊言云何真人有能修行元陽上品聞所不

聞爾時天尊答言善哉善哉善男子汝今受持元陽妙經復值我能善爲講說汝今有所疑滯我爲大醫王爲汝剖判深疑汝於道性猶未明了我有法炬能爲照明汝今欲濟煩惱大河我能爲汝作舟楫汝於我所生父母想我亦於汝生赤子心汝心今者貪正法實諦聽諸聽善思念之吾當爲汝次第開張使无疑滯真人善男子欲聽法者今正是時若得聞法當生恭敬至心讀誦尊重正法於其法所莫求其過莫念貪欲瞋恚愚癡莫觀法師縱性行惡既聞經已莫生輕慢莫爲貪求名譽利養當爲度世甘露法藥莫生憎愛起於疑心我聽法已先自度身然後濟人先自悟身然後悟人先自安身然後安人於道法之中應生念想於生死中生大苦想於道法之中應生常樂我淨之想當爲大乘莫爲小見於一切法當無所住亦莫專執一切法相於諸法中莫生貪想常生知法見法之想善男子必須精進讀誦如是經典則能永出生死苦海登於慈善之岸汝宜遵奉不得起

疑惑之心真人光妙音稽首禮問元始天尊
言有漏之法若有生者為是常耶是無常耶
生若是常有漏之法則無有生生若無常即
有漏是常天尊若生自生生无自性若能生
他何以因緣不生無漏天尊若未生時有生
者云何於今名為生若未生時无生者何故
不說虚空為生耶於是天尊告諸大眾善哉
善哉善男子深達法相具了道源不生不生
可說生生亦不可說生不生亦不可說不生
生何以故以修道得故云何生亦不可說以
生无故云何不生不可說以有得故云何有
因有因緣故亦得說十因緣法為生作因以
是義故故亦可得說善男子汝今莫入甚深
空定何以故大眾鈍故善男子有為之法生
亦是常以住无常生亦无常住亦是常亦生
生故住亦无常以本無今壞亦无常善男子
以性故生皆悉是常念滅故不可說常是
正真之道能除滅故名无常善男子有漏之
法未生之時已有生性故生能生無漏之法
本無生性是故生不能生如火有本性遇緣

即發眼有見性因色乃明故見一切眾生
法亦復如是由其有性遇感因緣父母和合
便則有生爾時達解真人光妙音元陽真人
及七千四百萬眾聞是經已心懷踴躍恭敬
慇懃叩頭稽首齊執玉板敢問元始天尊言
今蒙教誨宣暢泠然元陽秘藏始得悟解聞
所不聞亦令七千四百萬眾深解諸法不生
生等天尊我今已解斷諸疑網然此眾中有
一真人名曰真定光復欲諮問唯願垂許爾
時天尊告真定光善男子隨意問難吾當為
汝分別解說於是真定光與諸徒眾俱從座
起更整衣冠長跪稽首而白天尊言此土眾
生當造何業而得生彼不動世界其土真人
云何而得智慧成就人中之尊有大威德具
修諸行利智捷疾聞則能解爾時天尊而說
偈言
一切諸眾生 皆含至道性 若能受妙經
即登常樂淨 布施及眾生 救濟諸貧病
斷除疑惑心 調和於識鏡 思念元陽經
晨夕常歌詠 從容出九天 逍遙登八正

善神相擁護 天真悉暉映 既得離三災
復能超九橫 書寫及受持 當須勤苦行
憐愍善男女 咸使終天命 輪轉成高真
因緣偶賢聖 今日得苦空 永息於馳競
天尊說此偈已一切時眾咸皆醒悟更无疑
滯爾時元陽真人真定光白天尊言我今已
知所造業因得生彼國是元陽高貴之品憐
愍一切眾生上所諮問天尊演此妙法則能
利益安樂人天爾時天尊即告元陽真人善
哉善哉善男子汝今於此當須至心聽吾分
別一一解說有因緣故未至不至有因緣故
不至至有因緣故至善男子夫不至至者是
大元陽高貴之品凡夫未至以有貪欲瞋恚
愚癡故身口意業不清淨故及受一切不淨
物故犯五逆罪謗真善法故是義故未至不
至善男子夫不至至者以無貪欲瞋恚愚癡
身口惡故不受一切不淨物故不犯四重故
不謗無上道故不作邪疑心故不作五逆罪
故以是因緣名至不至善男子以何因緣故
名至不至至者名為二十五有一切眾生常

為无量煩惱諸結之所覆蔽往來不捨猶如輪轉是名為至為欲濟度諸眾生故示現在中亦名為至善男子何因緣故名至至者即是二十五有一切凡夫煩惱因緣故名至至善男子聞所不聞亦復如是有不聞聞有不聞聞云何不聞聞善男子不聞者名大元陽之品何故不聞非有為故非音聲故不可說故云何亦聞得聞名故所謂常樂我淨以是義故名不聞聞爾時元陽真人一切時眾稽首長跪白天尊言如天尊所說元陽高貴秘密之義不可得聞云何復言常樂我淨而可得聞何以故天尊斷煩惱者名為元陽高貴之品若未斷者名為不得以是義故元陽高貴之品本元今有若世間法本無今有則名元常譬如汝等本元今有已有還无故名元常元陽高貴之品若爾云何說言常樂我淨復次天尊凡因莊嚴而得成者悉名元常元陽高貴之品若爾應是无常何等因緣所謂三十六部尊經三清秘藏七部真書如是等法皆是成就一切因緣故名元常

復次天尊有名元常若元陽高貴之品是有亦應元常如天尊昔於元始之先說諸妙經皆有變化以是義故名元常復次天尊可見之法名為元常如昔所說元陽高貴之品則得斷除一切煩惱復次天尊譬如虛空於諸眾生等无障碍故名常若使元陽高貴是常何故眾生有得有不得元陽高貴若爾於諸眾生不平等者則不名常天尊譬如百人共有一怨若害此怨則多人受樂若使元陽高貴是平等法一人得時應多人得一人斷結應多人亦斷若不如是云何名常譬如有人恭敬三寶供養經書尊重讚歎晨夕不倦國王王子父母師長則得利養是不名常元陽高貴亦爾不名為常何以故如天尊昔於元始之運演說此經告元陽真人言若有

之法有道无道性相常住以諸眾生煩惱覆故不學真道便謂為元元陽真人以戒定慧勤修其心斷煩惱已便得見之當知真道是常住法非本元今有是故為常善男子如閻室中種種七寶人亦知有閻故不見有智之人善知方便燃大明燈持往照朗皆得无之是人於此終不念種種七寶本元今有真道亦爾昔自有之非始今也煩惱闇故眾生不見大智真人以善方便燃智慧燈令諸大衆得見真道常樂我淨是故智者於此真道不應說言本元今有如是大衆汝言因莊嚴故成真應元常者是亦不然何以故如是大衆真道之體非生非出非實非虛非作業生非是有漏有為之法非聞非見非墮生死非別異相亦非同相非往非還非因非果以是義故真道是常恒不變易是以无量劫中修習善法以自莊嚴皆得了見如是大衆譬如地有八味之水一切眾生而不能得有慧之人用功穿鑿則便得水真道亦爾譬如盲人

是今有真道亦爾昔來有之非在今也善男子如人有罪繫之牢獄久乃得出還家得見六親眷屬真道亦爾如是大眾汝言因緣故真道之法應無常者是亦不然何以故善男子因有五種何等為五一者生因二者和合因三者住因四者增長因五者遠因云何生因生因者即是種種煩惱種種狐疑及諸草木子是名生因云何和合因如善與善心和合不善與不善心和合無記與不記心和合是名和合因云何住因如下有住屋則不傾山河樹木因大地故而得住立何有四大无量煩惱衆生得住是名住因云何增長因因緣服翫飲食等具故今衆生增長如諸種子火所不燒鳥所不食則得增長如諸道士四衆男女等依於真人善能之者而得增長如因父母子得增長是名增長因云何遠因譬如天尊往昔劫時演說此經為諸衆生作大因緣所有疑滯皆能除洗是名遠因又如父母血氣為衆生遠因如時節等名為遠因善男子真道之體非如是等五因所成云何

當言是无常因復次善男子復有二因一者作因二者了因何等為作因如陶師輪繩是為作因如燈燭照闇中物是名了因善男子元陽高貴經者不從作因而有唯有了因了因者所謂明了元陽上品深奧義味為諸衆生作大舟楫作大橋梁作大因緣作大福田令諸時衆皆得无上正真道果爾時元陽達解真人光妙音聲首上白元始天尊曰既蒙訓誨開導衆生種種方便種種宣說委曲教化子細讚揚過泰之歡實為无量然由宿滯尚有狐疑不鄙卑陋輕觸靈顏叩頭上啓更有諮問天尊未審一切衆生修何功德免離哀憂修何布施可得富饒修何福田可得豐足發何志願可得道真天尊曰如人種樹為得蔭涼為得花果及以材木若人修行心力專精嘿念洞思自然廣作功德布施窮乏貧賤之人慈念衆生恩愛萬物不惜珍寶所管在法修如是行則能深解妙法成於真道能為一切衆生斷除業障善男子譬如有人墮大海水抱持死屍則得度脫真人修无上道

行布施時亦復如是如彼死屍善男子譬如有人閉在深獄門戶堅牢唯有廁孔便從中至无礙處真人修无上道行布施時亦復如是善男子譬如貴人恐怖急危更无恃怙發心願念元陽經者皆得安穩真人修无上道者行於布施亦復如是善男子及諸時衆汝等當知元陽秘藏即是无上正真之道若能按經修行晨夕願念於家別立精舍方丈之室燒香供養積年不退如此精誠皆獲自然之果見世得免憂危煩惱之患爾時元陽真人及諸大衆神仙眷屬七千四百萬衆一時稱善而作偈言

真道體靈妙	至法甚冲玄	秘跡紫微宮
曜景大羅天	玄都至學士	清虛常自然
鸞鶴遊碧漢	策鳳往青煙	金闕禮大聖
玉戶會高賢	元陽時四衆	偶此大因緣
三清既啓籙	七部已相傳	開發深疑滯
曉悟昔憂煩	一切善男子	皆得淨身田
逍遙四正道	放曠九華巔	蕭聲出雲外
梵響度風前	偶逢元始運	不謝上皇年

調御天人師 割我恩愛纏 損絕諸疑網
 瞋癡遂乃捐 四衆稽首慶 離謝大神仙
 今日蒙開度 願卒大慈憐
 元陽真人及諸時衆說偈都畢一時恭敬作
 禮而去

第九

十八

太上靈寶元陽妙經卷之九

太上靈寶元陽妙經卷之十

皇十

昇大羅品

如是我聞一時

天尊在蒲林國中樊華樹下元陽宮中與大
 聖真人大仙道士男女官等百萬人俱前後
 圍繞爾時天尊剋以七月七日昇於大羅上
 宮思惟入定見威神力放大光明雜色青黃
 赤白遍照三千大千世界及至十方虛空邊
 際亦復如是其中所有六趣衆生遇斯光者
 四垢煩惱一切消除是諸衆生見聞是已心
 大憂惱同時舉聲涕泣自相謂言且各裁抑
 莫大愁苦當共疾往詣元陽宮中至天尊所
 頭面著地頂禮勸請天尊莫向大羅住此元
 陽或百年或千載互相執手復作是言世間
 空虛衆生福盡不善諸業增長我等今當速
 往天尊不久即去又作是言世間虛空我等
 從今元有救護无所宗仰貧窮孤露一旦遠
 離无上天尊設有疑惑當復問誰時有元量
 諸大聖衆真人大仙道士男女官等及諸清
 信士清信女遇見天尊光者其身顫掉乃至

大動不能自持心昏迷悶恍惚无寧爾時復
 有松靈真人光妙真人鬱羅真人等百千萬
 人心得自在所作已辦離諸煩惱調伏諸根
 如大龍王有大威德成就空慧逮得已利如
 栴檀林栴檀圍遶如師子王師子圍遶成就
 如是无量功德一切皆是天尊弟子各於晨
 朝日初出時離常住處手執香鑪過天尊光
 明更相謂言我等宜速澡漱清淨作是言已
 舉身毛豎不能自持涕泣盈目生大苦惱爲
 欲利益安樂衆生成就大乘第一空行顯發
 大道方便密教爲不斷絕種種說法爲諸衆
 生調伏因緣故疾至天尊所稽首尊足圍繞
 百市稽首恭敬却坐一面爾時復有道士男
 官女官男職女職二十四職將領徒衆百千
 萬人等諸漏已盡心得自在所作已辦離諸
 煩惱調伏諸根如大龍王有大威德成就空
 慧亦於晨朝日初出時舉身毛豎涕泣盈目
 生大苦惱亦欲利益安樂衆生成就大乘第
 一空行顯發大道方便密教爲不斷絕種種
 說法爲諸衆生調伏因緣故疾至尊所稽首

尊足繞百千市稽首恭敬却坐一面人中之龍位階十地安住不動方便現身其名曰大王納善真人決理真人最勝真人妙思具人大慧真人而為上首其心皆悉敬重大乘安住大乘深解大乘愛樂大乘守護大乘善能隨順一切世間作是誓言諸未度者當令得度已於過世無數劫中修持淨戒善持所行解未解者紹三寶種使不斷絕於未來世當轉法輪以大莊嚴而自莊嚴成就如是元量功德等觀衆生如視一子亦於晨朝日初出時遇天尊光時舉身毛豎涕泣盈目生大苦惱亦為利益安樂衆生成就大乘第一空行顯發大道方便密教為不斷絕種種說法為諸衆生調伏因緣故疾至尊所稽首尊足繞百千市稽首恭敬却坐一面爾時復有元量清信士女受持五戒威儀具足其名曰威德千吉遠遊董雙成許飛瓊宛陵華等而為上首深樂觀衆諸對治門所謂苦樂常淨我无我實不實歸依非歸依衆生非衆生恒非恒安非安為無為斷不斷常不常如是觀察等

法對治之門亦欲樂聞无上大乘如所聞已能為他說善持淨戒渴仰大乘既自充足復能充足餘渴仰者善能攝取无上智慧愛樂大乘守護大乘善能隨順一切世間度未度者解未解者紹三寶種使不斷絕於未來世當轉法輪以大莊嚴而自莊嚴心常染味清淨戒行悉能成就如是功德於諸衆生大慈悲平等无二如視一子亦於晨朝日初出時為欲莊嚴道教人人各取香水萬束栴檀沉水牛頭栴檀天木香等是一一木文理及附皆有七寶微妙光明譬如種種雜絲畫飭以道力故有是妙色青黃赤白為諸衆生之所樂見諸木皆以種種香塗鬱金沉水及膠香等以諸華而為莊嚴衆寶蓮華諸香水上懸五色幡柔軟微妙猶如天衣繡縠繒錦綺是諸香木載以寶車是諸寶車出種種光青黃赤白輻輳皆以七寶廁填是一一車駕以駟馬是一一馬駿疾如風一一車前建立五十七寶妙幢真金羅網彌覆其上一一寶車復有五十微妙寶蓋一一車上乘諸華等

青蓮華白蓮華紅蓮華金蓮華紺蓮華共華純以真金為葉金剛為臺是華臺中多有黑蜂遊集其中歡娛受樂又出妙音所謂無常苦空無我是音聲中說真人本所道復有種種歌舞伎樂箏笛篳篥簫瑟鼓吹是樂音中復出是言苦哉苦哉世間虛空一一車前有善男子擎四寶案是諸案上有種種雜華及鬱金諸香及餘薰香微妙第一諸清信士女若老若少各各運心為天尊及徒衆辦諸食具種種備足皆是栴檀沉水香新八味之水之所成熟甘食甘美有六種味一苦二酢三甘四辛五鹹六淡復有三德一者輕軟二者淨潔三者如法作如是等種種莊嚴至元陽宮中以黃金徧敷其地繒絲衣物寶蓋以覆地上周徧一宮為天尊徒衆敷置七寶師子之座其座高大如玉京山是諸座上皆有寶帳垂諸瓔珞悉懸種種微妙幡蓋種種好香用塗其座復以種種名華以散座間諸清信士女各作是念一切衆生若有飲食衣服頭目肢體隨其所須悉皆給與作是施時離欲

瞋恚穢濁毒心无餘思願求世福樂唯志无
上清淨法戒是清信士女等皆以安住真人
之道復作是念天尊今者受我食已當向大
羅上界捨離我等作是念已身毛皆豎涕泣
盈目生大苦惱各各脅持供養之具載以寶
車香水幢幡寶蓋飲食並至尊所稽首尊足
以其所持供養之具供養天尊圍遶百匝舉
聲號泣哀動天地淚下如雨復相謂言苦哉
仁者世間虛空便自舉身投天尊前而白尊
言唯願天尊大慈大悲哀憐我等受我等施
○受我懺悔除我宿愆我等從无始世界百千
萬劫來至于今日凡經无量生凡經无量死
六慾枷鎖五陰纏縛貪愛怯惜惟知造罪不
識大乘今藉天尊大光明業力各自呵責
自觀已身如四毒蛇是身常為无量諸蟲之
所啖食是身臭穢貪欲獄縛是身可惡猶如
死狗是身不淨九孔常流是身如城血肉筋
骨皮裏其上手足以為却敵樓櫓目為察孔
頭為殿堂心王處中如是身城諸善真仙之
所棄捨凡夫愚人常所味著貪婬瞋恚愚癡

羅刹止住其中是不堅固猶如蘆葦伊蘭水
沫芭蕉之樹是身无常念念不住猶如電光
卑水幻炎亦如畫水隨畫隨合是身易壞猶
如河岸臨峻之樹是身不久當為狐狼鷃梟
鵲鴞烏鵲鐵狗之所食噉惟有智者當樂此
身寧以牛跡盛大海水不能具說是身无常
不淨臭穢寧久大地使如棄等漸漸轉小猶
草靡子乃至微塵不能具說是身過患是故
當捨如棄涕唾以是因緣諸人士女以空无
相无願之法常修其心深樂諸受大乘經典
聞已亦能為他演說護持本願毀譽是身甚
患厭不堅牢心常修集如是正觀破壞生死
无際輪轉渴仰大乘既自充足復能充足餘
渴仰首深樂大乘守護大乘雖現是身實是
真仙等類善能隨世間度未度者解未解者
紹三寶種使不斷絕於未來世當轉法輪以
大莊嚴而自莊嚴堅持禁戒皆悉成就如是
功德於諸眾生大悲心平等无二如視一
子皆發是願伏願天尊受我供施容我懺悔
久住下界開度眾生授度經典得法益利莫

捨我等向於上界譬如父母未象成就忽捨
而去无所成就諸子孤劣貧窮失於覆蔭天
尊還於上方捨我等去亦復如是伏願天尊
且住世間成就諸法覆蔭我等如此諸請鳴
咽頓闕大眾哀泣淚下盈目不能自止爾時
天尊從其面門出種種光明其光明曜大眾
大眾遇斯光已即知是事傳相告語天尊今
者現是瑞相不久必當反於上界所有供養
之具宜施天尊及於大眾松靈真人及大眾
等知天尊放是種種光明非无因緣松靈真
人等默然良久天尊告松靈真人汝等所奉
施天尊及大眾今正是時天尊正爾當欲還
上方第二第三亦復如是爾時松靈真人等
大眾聞此語已舉聲號哭悲咽而言苦哉苦
哉世間虛空復白大眾我等今者一切當共
五體投地同聲勸請天尊且住下界覆蔭我
等勿捨我去還於上方爾時天尊告松靈等
莫大啼哭自亂各當觀是身猶如芭蕉熱時
之炎水泡幻化乾闥婆城坏器電光亦如畫
水臨死之囚熟果段肉如織碓上下當觀諸

行猶雜毒食有為之法多諸過患於是松靈真人復白天尊言尊不久住於下界我等云何而不啼哭苦哉苦哉世間虛空唯願天尊哀愍我等及諸眾生久住於下方勿返於上界天尊告松靈真人汝今不應發如是哀憐我故久住於下方我以哀憐汝及一切是故今日欲還上界何以故諸尊法爾有為亦然

是故天尊而說偈言
有為之法其性无常生已不住寂滅為樂松靈真人汝今當觀一切行新諸法無我無常不住此身多有无量過患猶如水泡是故汝今不應啼泣爾時松靈復白天尊言如是如是誠如尊教雖知天尊方便示現欲還上方捨我等去我等不能不懷憂惱得自思惟復生慶悅天尊讚松靈善哉善哉能知天尊示同眾生方便去來諸法皆如幻相大聖在中以方便力无所染著何以故諸有教化隨方利益欲度脫眾生死老病苦悉皆當得不動果報常受安樂何以故我是眾生良福田故汝若復欲為諸眾生作福田者速辦所施

不宜久停爾時松靈為諸眾生得度脫故低頭飲淚而白天尊言善哉善哉我若堪任為福田時則能了知天尊還於上方及非還上方我等今者及諸真人仙人等猶如蚊蚋實不能量天尊還於上方及非還上方爾時松靈真人及其徒眾憂愁啼泣圍遶天尊燒香散花盡心敬奉尋與眾真從座而去共辦食具松靈去後神州赤縣三界内外地大震動一切眾生聞見知覺天尊還於上方是故此

地大動時諸三界内外一切眾生聞是語已身毛皆豎同聲哀泣而說偈言
稽首調御師我等今勸請遠離於人仙永无有救護尊今還上方我等沒苦海悲戀懷憂惱如憤失其母貧窮无救護猶如困病人无醫隨自心食所不應食眾生煩惱病常為諸見害遠離法醫王服食邪毒藥是故大聖仙不應見遺捨如國無君主人民皆飢饉我等亦如是失廢及法味天尊還上方我等心迷亂如彼大地動迷失於諸方大仙向上界

我等於今日云何不愁苦天尊見放捨猶如棄涕唾譬如日初出光明甚暉炎既能還自照亦滅一切暗天尊神通光能除我苦惱處在大眾中譬如玉京山天尊言譬如國王生育諸子心常愛念教以仁義忠孝慈令通曉然後聽之不意諸子所習不善王乃棄之天尊告松靈曰我今為法教誨汝等已具正見願莫放捨如其放捨則同王子失天尊譬如有人善學諸論復於此論而生怖畏天尊亦爾通達諸法而於諸法復生怖畏若使天尊久住於世說甘露味充足一切如是眾生則不復畏墮於地獄天尊譬如有人初學作務為官所收閉之因固有人問之汝受何事答言我今受大憂苦若其得脫則得安樂天尊亦爾為我等故修諸苦行我等今者猶未得免生死苦惱云何天尊得受安樂天尊譬如醫王善解方藥偏以秘方教授其子不教其餘外受學者天尊亦爾獨以甚深祕密之藏偏教老子遺棄我等不見顧愍天尊於法應无秘悞如彼醫王偏教

其子不教外來諸受學者彼醫所以不能苦教情存勝負故有秘惜天尊之心終无勝負何故如是不見教誨唯願久住莫向上方天尊譬如老少病苦之人捨遠夷途而行險道險道多難備受眾苦更有異人見而憐之即便示以平坦好路天尊我亦如是所言少者譬未增長法身之人所言老者譬重煩惱所言病苦譬未脫生死所言險道譬二十五有准願天尊示導我等甘露正道久住於世勿遠上方爾時天尊告諸法眾汝等莫如凡夫諸天人等愁憂啼哭當勤精進繫心正念時諸天人及大眾等聞天尊所說止不啼哭猶如有人喪其愛子殞送已訖抑止不哭爾時天尊為諸大眾說是偈言

汝等當開意 不應大愁苦 大道法皆爾是故當嘿然 樂不放逸行 守心正憶念 遠離諸非法 自慰受歡樂

復次松靈等若有疑惑今皆當問若空不空若常無常若苦不苦若依非依若去不去若歸非歸若恒非恒若斷非斷若眾生非眾生

若有若无若實不實若真不真若滅不滅若密不密若二不二如是等種種法中有所疑者今應詰問我當隨順為汝斷之亦當為汝先說甘露然後乃當還於上方諸大眾等天尊出世歎人身難得值道生信是事亦難能忍是亦復難成就禁戒具足无缺得无上道果是事亦難如求金玉眾寶妙華亦難離於八難得人身難汝等遇我不應空過我於往昔種種苦行今得如是无上方便為汝等故无量劫中捨身手足頭目髓腦是故汝等不應放逸汝等大眾云何莊嚴正法寶城具足種種功德珍寶戒定智慧以為塙塹汝今遇是道法寶城不應取此虛偽之物譬如商主遇真寶城取諸瓦礫而便還家汝亦如是值遇寶城取虛偽物汝諸大眾勿以下心而生知足汝等今者雖得出家於此大乘不生貪慕汝諸大眾身雖得服黃褐染衣心猶未染大乘淨法汝諸大眾雖行乞食經歷多處初未曾求大乘法食汝諸大眾雖復大眾未為正法除諸結縛汝諸大眾今當真實教勸汝

等我今見在大眾和合性真實不倒是故汝等應當精進攝心勇猛摧諸結縛十方慧日既潛沒已汝等當為无明所覆諸法眾等譬如大地諸山藥草為眾生用我法亦爾出生妙善甘露法味而為眾生種種煩惱病之良藥我今當令一切眾生及我諸子四部之眾悉皆安住秘密藏中我亦復當安住是中入於上方何等名為秘密之藏猶如三際去來不斷何以故前際不去中際不住後際不來來无所從去无所至上中下亦復如是上不上中不中下不去住不住諸法如是三法各異亦非向於上方汝等應如是觀時到當還上方爾時諸法眾聞天尊定向上方皆悉憂愁身毛為豎涕淚交流稽首尊足繞无量帀白天尊言天尊妙說无常苦空无我天尊譬如一切眾生迹中鳥迹為上是无常想亦復如是於諸想中最為第一若有精勤修習之者能除一切欲界貪愛色无色愛无明驕慢及无常想天尊大聖若離無常想者今則不應向於上方若不離者云何說言

修无常想離三界愛无明驕慢及无常想天尊譬如農夫於秋月時深耕其地能除穢草是无常想亦復如是能除一切欲界貪愛色无色愛无明驕慢及无常想天尊譬如耕田秋耕為上如諸迹中鳥迹為勝於諸想中无常為最天尊譬如帝王知將升遐恩赦天下獄囚繫閉悉令得脫然後捨命天尊今者亦應如是度諸眾生一切无知无明繫閉皆令解脫然後向於上方我等今者皆未得度云何天尊便欲放捨向於上方天尊譬如有人為鬼所持遇良呪師以呪力故便得除差天尊亦爾為諸法眾除无明鬼令得安住大善福業譬如香鳥為人所縛雖有良師不能禁制須絕羈鎖自恣而去我未如是脫五十七煩惱繫縛云何天尊便欲放捨向於上方天尊如人病瘡值遇良醫所苦得除我亦如是多諸患苦邪冷熱病雖過天尊病未除愈未得无上安穩常樂云何天尊欲放捨向於上方天尊譬如醉人不自知不識親疎母女姊妹迷荒淫亂言語放逸卧不淨中時有良師

與藥令服服已即吐還自憶識心懷慙愧深自剋責酒為不善諸惡根本若能除斷則遠眾罪天尊我亦如是往昔已來轉輪生死情色所醉貪嗜五欲非母母想非姊姊想非女女想於非眾生生眾生生想是汝輪轉受生死苦如彼醉人卧不淨中天尊今當施我法樂令我還吐煩惱惡酒而來未得醒寤之心云何天尊便欲放捨向於上方天尊譬如有人歎芭蕉樹以為堅實无有是處天尊眾生亦爾若歎我人眾生壽命養育知見作者受者是真實者亦无是處我等如是修无我想天尊譬如漿滓无所復用是身亦爾无我无主天尊如七葉華无有香氣是身亦爾无我无主我等如是心常修習无我之想如尊所說一切諸法无我想汝諸法眾應當修習如是修已則除我慢離我慢已便向上方天尊譬如鳥迹空中現者无有是處有能修習无我想者而有諸見亦無是處爾時天尊讚諸法眾善哉善哉汝等善能修无我想時諸法眾即白天尊我等不但修无我想亦更修習其

餘諸想所謂苦想无常无我想天尊譬如人醉其心眩亂視諸山川城郭宮殿日月星辰皆悉迴轉天尊若有不修苦无常想无我等想如是之人不名為聖多諸放逸流轉生死天尊以是因緣我等善修如是諸想爾時天尊告諸大衆言諦聽諦聽汝向所引醉人譬者但知文字未達其義何等為義如彼醉人見上日月實非迴轉生迴轉想眾生亦爾為諸煩惱无明所覆生顛倒心我計无我常計无常淨計不淨樂計為苦以為煩惱之所覆故雖生此想不達其義如彼醉人於非轉處而生轉想我者即是道義常者是法身義樂者上方義淨者是法義汝等法眾云何而言有我想者驕慢嘖嘖流轉生死汝等若我言亦修習无常苦无我等想是三修修无有實義我今當說勝三修法苦者計樂樂者計苦是顛倒法无常計常常計无常是顛倒法无我計我我計无我是顛倒法不淨計淨淨計不淨是顛倒法有如是等四顛倒法是人不知正修諸法汝諸法眾於苦法中而生樂想

於无常中而生常想於无我中而生我想於不淨中而生淨想世間亦有常樂我淨出世亦有常樂我淨世間法者有字无義出世間者有字有義何以故世間之法有四顛倒故不知義所以者何有想顛倒心倒見倒以三倒故世間之人樂中見苦常見无常我見无我淨見不淨是名顛倒以顛倒故世間知字而不知義何等為義无我者即生死我者即天尊无常者聲聞緣教常者天尊法身苦者一切外道樂者即是上方不淨者即有為法淨者諸天尊真人所有正法故名不顛倒以不倒故知字知義若欲遠離四顛倒者應知如是常樂我淨時諸法眾復白天尊言如天尊所說離四倒者則得了知常樂我淨天尊今者永无四倒則已了知常樂我淨若以了知常樂我淨何故不住一劫半劫教道我等今離四倒而見放捨欲向上方天尊若見顛念教勸我當至心頂受修習天尊若當向上方者我等云何與是毒身同共止住修於梵行我等亦當隨天尊向於上方爾時天尊告

諸法眾汝等不應作如是語我今所有无上正法悉以付囑老君是老君者當為汝等作大指歸猶如天尊為諸眾生作指歸處老君亦復如是當為汝等作指歸處譬如大王多所統領若遊巡時悉以國事付囑大臣天尊亦爾所有正法亦以付囑老君汝等當知先所修習无常苦想非是真實譬如春時有諸人等在大池浴乘船遊戲失琉璃寶珠沒深水中是時諸人悉共入水求覓是寶珠捉瓦石草木沙礫各各自謂得琉璃珠歡喜持出乃知非真是時寶珠猶在水中以珠力故水皆澄清於是大眾乃見寶珠故在水下猶如仰觀虛空月形是時眾中有一智人以方便力安徐入水即便得珠汝等法眾不應如是修習无常苦無我想不淨想等以為實義如彼諸人各以瓦石草木沙礫而為寶珠汝等應當善學方便在處處常修我想常樂淨想復應當知先所修習四法相貌悉是顛倒欲得真實修諸想者如彼智人巧出寶珠所謂我想常樂淨想爾時諸法眾白天尊言如

天尊先說諸法无我汝當修學修學是已則離我想離我想者則離驕慢離驕慢者得向上方是義云何天尊告諸法眾善哉善哉汝今善能請問是義為自斷疑譬如國王暗鈍少智有一醫師性復頑嚚而王不別厚賜俸祿療治眾病純以乳藥亦復不知病起根源雖知乳藥復不善解風冷熱病一切諸患悉教服乳是王不別是醫知乳好醜善惡復有明醫曉八種術善療眾病知諸方藥從遠方來是時舊醫不知諮受反生嘖嘖輕慢之心彼時明醫即便依附請以為師諮受醫方秘與之法語舊醫言我今請仁以為師範唯願為我宣暢解說舊醫答言卿今若能為我給使四十八年然後乃當教汝醫法時彼明醫即受其教我當如是我當如是隨我所能當給走使是時舊醫即將客醫共入見王是時客醫即為王說種種醫方及餘伎藝大王當知應善分別此法如是可以治國此法如是可以療病爾時國王聞是語已方知舊醫暗无智即使驅逐令出國界然後倍復恭敬

客醫是時客醫作是念言欲教王者今正是時即語王言大王於我實愛念者當求一願王即答言從此右臂及餘身分隨意所求一切相與彼客醫言王雖許我一切身分然我不敢多有所求今所求者願王宣令一切國內從今已往不得復服舊醫乳藥所以者何是藥毒害多傷損故若故服者當斬其首斷乳藥已終无復有橫死之人常處安樂故求是願時王答言汝之所求蓋不足言尋為宣令一切國內凡諸病人皆悉不聽以乳為藥若為藥者當斬其首爾時客醫和合眾藥謂辛苦鹹甜酸等味以療眾病无不得差其後不久王復得病即命是醫我今病因當云何治醫占王病應用乳藥尋白王言如王所患應當服乳我於先明所斷乳藥是非實語今若服者最能除病王今患熱正當服乳時王語醫汝今狂邪為熱病乎而言服乳能除此病汝先言毒今云何服欲欺我邪先醫所讚汝言是毒令我驅遣今復言好最能除病如汝所言我本舊醫定為勝汝是時客醫復語

王言王今不應作如是語如蟲食木有成字者此蟲不知是字非字智人見之終不唱言是蟲解字亦不驚怪大王當知舊醫亦爾不別諸病悉與乳藥如彼蟲道偶得成字是先舊醫不解乳藥好醜善惡時王問言云何不解客醫答王是乳藥者亦是毒害亦是甘露云何是乳復名甘露若是乳牛不食酒糟滑草麥穀其積調善放牧之處不在高原亦不下濕飲以清水不令馳走不與犢牛同共一群飲食調適行住得所如是乳者能除諸病是則名為甘露妙藥除是乳已其餘一切皆名毒害爾時大王聞是語已讚言大醫善哉善哉我從今日始知乳藥善惡好醜即便服之病得除愈尋時宣令一切國內從今已往當服乳藥國人聞之皆生瞋恨咸相謂言大王今者為鬼所持為是狂邪而誑我等復令服乳一切人民皆懷瞋恨悉集王所王言汝等不應於我而生瞋恨如此乳藥服與不服悉是醫教非是我咎爾時大王及諸人民踊躍歡喜倍共恭敬供養是醫一切病者皆服

乳藥病原闕

太上靈寶元陽妙經卷之十終